


# Yosë nanamën



New Testament in Chayahuita (PE:cbt:Chayahuita)

**Yosë nanamën**  
**New Testament in Chayahuita (PE:cbt:Chayahuita)**

copyright © 2011 Wycliffe Bible Translators, Inc.

Language: Chayahuita

Translation by: Wycliffe Bible Translators, Inc.

Chayahuita

cbt

Peru

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Chayahuita

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 23 Aug 2023 from source files dated 29 Jan 2022  
2b907844-bec1-5cc7-a0e4-401d867c40e7

## Contents

Génesis . . . . .	1
Mateo . . . . .	75
Marcos . . . . .	138
Lucas . . . . .	174
Juan . . . . .	234
Hechos . . . . .	276
Romanos . . . . .	329
1 Corintios . . . . .	353
2 Corintios . . . . .	377
Gálatas . . . . .	393
Efesios . . . . .	403
Filipenses . . . . .	413
Colosenses . . . . .	420
1 Tesalonicenses . . . . .	426
2 Tesalonicenses . . . . .	431
1 Timoteo . . . . .	434
2 Timoteo . . . . .	441
Tito . . . . .	446
Filemón . . . . .	449
Hebreos . . . . .	451
Santiago . . . . .	471
1 Pedro . . . . .	478
2 Pedro . . . . .	486
1 Juan . . . . .	491
2 Juan . . . . .	498
3 Juan . . . . .	499
Judas . . . . .	500
Apocalipsis . . . . .	503

## Ya'ipi ma'sha caniaritërinso'

### *Yosë nani ma'sha acorinso'*

- <sup>1</sup> Yosë nani ma'sha acorinso sha'huichinquëma': Iráca co manta ya'huërinhuë'. Yosëichin ya'huërin. Caniaritapon, pi'iro'të'ton acorin. Ina quëran isoro'panta', acorin.
- <sup>2</sup> Naporó' isoro'paso', co ipora pochin nishátërarinhuë'. Ya'ipi marësáchin ninin, pa'pi anpotërin. Tashiri noyá i'copitërin. Naporó chachin Yosë ispiritonënso', i' aipi yanpo yanpónantarin.
- <sup>3</sup> Naporó' Yosë tapon: “¡Tashinantërinso nii'sohuanchin huachi!” tënin. Topachina, nii'sohuantërin huachi.
- <sup>4</sup> Nii'sohuantërinso nóya nicaton, nisha acorin. Tashinta', nisha acorin.
- <sup>5</sup> Nii'sohuantërinso: “Tahuëri,” itërin. Tashinaonta: “Tashi,” itërin. Tashirahuaton tahuëriantahuachina, i'huaraya huarë' a'na tahuërira', nanirin huachi.
- <sup>6</sup> Ina quëran Yosë taantarín: “¡Niquë niquë i' ya'huëcaso marë' ya'copinamën ya'huë'in!” tënin. Topachina, inachachin ya'huërin huachi.
- <sup>7</sup> Yosëri i' ya'copinamën nipachina, ina aipi i' ya'huërin. Inaanaquënta', i' ya'huërin.
- <sup>8</sup> Nani acohuachina, inápaquë ya'huërinso: “Pi'iro'të',” itërin. Tashiantarahuatón tahuëriantahuachina, i'huaraya huarë' cato tahuëri nanirin huachi.
- <sup>9</sup> Ina quëran Yosë taantarín: “¡Yaniró'pa' ya'nocaso marë' pi'iro'tëanaquë i' ya'huërinso', inaquëráchin niyonto'in!” tënin. Topachina, inachachin ya'huërin huachi.
- <sup>10</sup> Yaniró'paso': “no'pa',” itërin. I' niyontoninsoso': “marë,” itërin.  
Ya'ipi acorinsopita noyasáchin nizarin ni'nin. Ina nicaton, <sup>11</sup> Yosë taantarín: “¡Nisha nisha sharo'sa papoina! Nisha nisha panpatororo'santa nisha nisha ya'pirihuanpiso', papoina'. ¡Nisha nisha nararo'santa nisha nisha nitopisopita no'paquë papoina!” tënin. Topachina, inachachin ya'huërin huachi. <sup>12</sup> Ina nohuanton nisha nisha sharo'sa', panpatororo'sa', nararo'sa', inapita isoro'paquë paporin. Acorinsopita nicaton: “¡Ma nóyacha acorahuë paya!” tënin. <sup>13</sup> Tashiantarahuatón tahuëriantahuachina, i'huaraya huarë' cara tahuëri nanirin huachi.
- <sup>14-15</sup> Ina quëran Yosë taantarín: “¡A'pininsopita pi'iro'tëquë ya'huë'in. Tahuëri, tashi a'pintacaso marë' ya'huë'in. Inapita a'pinpachina, tahuëri, tashi', nisha nisha acoarin. Naporahuaton yoquiros'a', pi'ipiro'sa', inapitanta piyapiro'sa nitotapi huachi!” tënin. Topachina, inachachin ya'huërin huachi.
- <sup>16</sup> Tahuëri a'pinacaso marë' panca masho acorahuaton, tashinta a'pinacaso marë' hua'huishin miachin acorin. Tayoraro'santa acorin.
- <sup>17-18</sup> Yosëri inapita isoro'pa' a'pintacaso marë' pi'iro'tëquë acorin. Tahuëri, tashi a'pintarin. Acorinsopita nicaton: “¡Ma nóyacha acorahuë paya!” tënin.
- <sup>19</sup> Tashiantarahuatón tahuëriantahuachina, i'huaraya huarë' catapini tahuëri nanirin huachi.
- <sup>20</sup> Ina quëran Yosë taantarín: “¡Nisha nisha ma'sharo'sa i'quë ya'huëcaiso marë' ya'huë'in! Nisha nisha samiro'santa ya'huë'in. ¡Naporahuaton, nisha nisha inairaro'sa yanponacaiso marë' ya'huë'in!” tënin. Topachina, inachachin ya'huërin huachi.
- <sup>21</sup> Panca ma'sharo'sa nisha nisha nipisopita, marëquë ya'huëcaiso marë' acorin. Nisha nisha samiro'santa', acorin. Anpiantëhuano'santa', acorin. Acorinsopita nicaton: “¡Ma nóyacha acorahuë paya!” tënin.
- <sup>22</sup> I'quë ya'huëcaiso nipisopita noya yonquirapiton iso pochin sha'huitërin: “¡Na'amiatatoma marëro'saquë ya'huëco!” itërin. Naporahuaton anpiantëhuano'santa', sha'huitërin: “¡Na'amiatatoma canpitanta isoro'paquë ya'huëco!” itërin.

- 23 Tashiantarahuaton tahuëriantahuachina, i'huaraya huarë' a'natëräpo tahuëri nanirin huachi.
- 24 Ina quëran Yosë taantarín: “¡Nisha nisha ma'sharo'sa ya'huë'in! Tananquë ya'huëcaiso nipisopita, pë'tahuacaiso nipisopita, niohuaratacaiso nipisopita. ¡Inapita ya'huë'in!” ténin. Topachina, inachachin ya'huërin huachi.
- 25 Inapita ma'sharo'sa', ya'ipi Yosëri acorin. Acorinsopita nicaton: “¡Ma nóyacha acorahuë paya!” ténin.
- 26 Naporo tahuëri chachin tapon: “¡Iporaso huachi piyapi niahua! Inaso canpoa pochachin nisarin. Chiníquën nanantaton, samiro'sa', anpiantëhuano'sa', inapita hua'anëntarin. Ma'sharo'sa pë'tahuacaiso nipisopita, tananquë ya'huëcaiso nipisopita, niohuaratërin sopita, ya'ipi inapitanta hua'anëntarin,” ténin.
- 27 Yosëri piyapi acoapon, inaora pochachin acorin. A'nara quëmapi, a'nara sanapi. Inaíchín ninin.
- 28 Noya yonquirapiton iso pochín sha'huitërin: “Nóya ya'huëco'. Na'a hua'huasha ya'huëchinquëma'. Shiparimapita na'atona', ya'ipi parti ya'huë'ina'. Ya'ipi hua'anëntoco'. Samiro'sa', ma'sharo'sa', anpiantëhuano'sa', niohuaratërin sopita, inapita hua'anëntoco',” itërin.
- 29 Napotahuaton, itaantarín: “Ni'quë'. Nisha nisha sharo'sa apapotërahuë nitërinso capamaso marë'. Notohuaro' nisha nisha nararo'santa nitërinso ca'quë', iroquë'.
- 30 Ma'sharo'sa', anpiantëhuano'sa', niohuaratërin sopita, inapitaso nipirinhuë', panpatoro acotërahuë capacaiso marë'” itërin. Napotihuachina, inachachin nipi huachi.
- 31 Naporo' Yosëri ya'ipi acorinsopita nicaton: “¡Ma nóyacha ya'ipi acorahuë paya!” ténin. Tashiantarahuaton tahuëriantahuachina, i'huaraya huarë' saota tahuëri nanirin huachi.

## 2

- 1 Inapoaton Yosë: Isoro'pa', pi'iro'të', ya'ipi inaquëpita ya'huërin sopitarë chachin ténirin huachi.
- 2-3 Ya'ipi acorinsopita ténirahuaton, tahuëririnquë chinotërin. Napoaton, ina tahuëri noya ni'nin. Noya nicaton, chinoto tahuëri acorin. Napoaton piyapi pënënin: “Naporó tahuëri chinotatoma', casáchin yonquico,” itërin.
- 4 Ina pochín Yosë iráca: Isoro'pa', pi'iro'të', inapita acorin. Ya'ipi no'tëquën sha'huitaranquëma'.

### *Itin nararoquë piyapi acorinso'*

Sinioroso\* Yosë ni'ton, inapita ya'nán acoaponahuë',<sup>5</sup> co sharo'sa ya'huëyátërarinhuë'. Co panpatoronta papoyátërarinhuë'. Co o'nán tëranta acoyátërarinhuë'. Naporahuaton co insonta isoro'paquë sha'tacaso marë' ya'huëyátërarinhuë'.<sup>6</sup> Napoaponahuë', no'pa quëran chachin i'sha pipiton, së'cotërotárin.<sup>7</sup> Naporo' Sinioroso Yosë ni'ton, yaniro'pa' amocan quëran quëmapi ninin. Nani nisahuaton, nanpicaso marë' pihuinitërin. Inapotohuachina, niirahuaton nanpirin huachi.

<sup>8</sup> Ina piquëran, Sinioroso noyápiachin nararo Itin itopiquë acorin. Inaso no'pa', Cortanii' quëran pi'i pipirinso parti quëparitërin. Inaquë ya'huëcaso marë' quëmapi nininso acorin.<sup>9</sup> Naporahuaton, nisha nisha noyápiachin cashino'sa apapotërin. Yashi yashin ca'chináchin nitërin sopita apapotërin. Nararo huancánachin nanpirin nara apapotërin. Inaquë chachin a'nanta', apapotërin. Anitotacaso nara itopiso'. Ina ca'pachina', noya nininsopita nitotaponahuë', co noyahuë' nininsopitanta nitotapi huachi.

\* 2:4 Sinioro: Sinioroso', iráca iprioro'sari Yosë nininën Yapi (YHWH) itopi. Ina pochín nohuitopiso', cacharonquë, Sinioro itopi.

<sup>10</sup> Itinquë a'nara i' pipirin. Ya'ipi nararo asë'cotërotacaso marë' naporin. Ina quëran chachin catapini së'parai' pa'tërin. <sup>11</sup> Ya'natiirinsoso', Pisonii' itopi. Inaso', Apira parti conimarin. Inaquë oro ya'huërin. <sup>12</sup> Inaquë oro ya'huërinso', noya noya ninin. Pimo yaquinta noya noya nininso ya'huërin. Nisha na'pinta ya'huërin, onisi itopiso'. <sup>13</sup> Ina quëran niantarinsonta', Quiconii' itopi. Inaso', ya'ipi Coso parti pa'tërin. <sup>14</sup> A'nanta', Tiquirisii' itopi. Inaso', Asiria ninano pi'i ya'coninso parti quëran acorin. Ya'natomarinsoso nipirinhuë', Iopiratisii' itopi.

<sup>15</sup> Sinioroso Yosë ni'ton, Itin nararoquë quëmapi acorin. Inaquë sacataton a'paicaso marë' acorin. <sup>16</sup> Naporo' iso pochin camairin: "Ya'ipi isopita nararo'sa nitërinso', noya ca'quë', iroquë', inapoquë'. <sup>17</sup> Anitotacaso nara nitërinsoíchin, co nohuantërahuë capamaso'. Inaso ca'patan, noya nininso nitotaponahuë', co noyahuë' nininsonta nitotaran. Ama ina nitërinso ca'quësuhuë'. Ina ca'patan, tēhuēnchachin chiminaran," itërin.

### *Yosëri sanapi nininso'*

<sup>18</sup> Ina quëran Sinioroso Yosë ni'ton, taantarin: "Quëmapi inaora ya'huëcaso', co noyahuë'. A'na nianta'i nipachin, inari noya catahuacaso marë'," tēnin. <sup>19-20</sup> Ina quëran ya'ipi ma'sharo'sa', anpianthëhuano'sa', inapita no'pa quëran ninin huachi. Inapita nisahuaton, quëmapi quëshirin inari nininën acotacaso marë'. Pë'tahuaros'a', anpianthëhuano'sa', ma'sharo'sa tananquë ya'huërinso'pita, inapita nininën acotërin. Ma nininënsona acotohuachina, ina chachin ninihuanpi huachi. Napoaponahuë', co a'na ma'shari tēranta nanitërinhuë', quëmapi noya catahuacaso'.

<sup>21</sup> Napohuachina, quëmapi noyá ahuë'ëtërin. Huë'ëso', a'nara nininpitën ocoitërin. Ocoitahuaton, anoyataantarin huachi. <sup>22</sup> Ina nininpitë quëran chachin sanapi ninin. Capayatohuachina, sanapi nininso a'notërin. <sup>23</sup> Quënanahuaton, quëmapi pa'yanin. Pa'yataton, tapon: "¡Isocha tēhuēnchinso', ca pochachin Yosëri ninin! Cá quëran ninin ni'ton, sanapi itarahuë," tēnin.

<sup>24</sup> Napoaton quëmapi sa'apachin, pa'pin, a'shin inapita patahuaton, sa'inë' nichinpitacaso ya'huërin. Catoya'pi nipirinahuë', a'naíchin pochin nipi huachi.

<sup>25</sup> Quëmapiso sa'inë chachin noya ya'huërapí. Co a'moanaponaraihuë', co manta tapanpihuë'.

## 3

### *Co Yosë natëtonaraihuë', oshahuanpiso*

<sup>1</sup> Sinioroso Yosë ni'ton, ya'ipi tananquë ma'sharo'sa ya'huërinso'pita acorin. Ya'huanso nipirinhuë', a'napita ma'sharo'sa quëran yonqui yonquínahuan ninin. Sanapi yanonpintaton, paaparín nontacaso marë':

—¿Tēhuēnchachin ta'ma Yosë apiratërinquëma ya'ipi isopita nararo'sa nitërinso capamaso to? itërin.

<sup>2-3</sup> —Ya'ipi nitërinso', noya capa'huaiso'. A'naíchin huancánachin huanirinso', co Yosë nohuantërinhuë': "Ama ina nitërinso', ca'cosohuë'. Ama sē'huacosohuë'. Ca'patama', tēhuēnchachin chiminarama'," itërincoi Yosë, itërin.

<sup>4-5</sup> —Co napoarinhüë'. Co chiminaramahuë'. Ca'patamaso', ya'ipi noya nininsopita, ya'ipi co noyahuë' nininsopitanta', nitotarama huachi. Inapita nitotatoma', Yosë pochachin nisarama'. Ina nitotaton, Yosë apiratërinquëma', itërin.

<sup>6</sup> Ina natanaton, sanapiso nara nitërinso ni'sárin: Noyápiachin nícaton ca'chináchin cancantërin.

"Ina ca'pato, ya'ipi nitotarahuë huachi," tēnin. Napoyan quëran, sē'pashorahuaton ca'nin. So'ionta quëtohuachina, inanta ca'nin. <sup>7</sup> Naporo chachin nisha yonquipi huachi: "T'nanpirashitë canposo pa'saré'," niitopi. Ninapotatona', iquira huëron pipitopi. Inapoatona', nipa'shianatopi.

<sup>8</sup> I'huanahuanquë huisontapaso', Yosëri nararoquë huëcapairinso natanpi. Natanahuatona', na'picaíso marë' ta'api. <sup>9</sup> Na'pitopirinahuë', inariso përarin:

—Atan\*. ¿Insëquëta ya'huaran? itërin. <sup>10</sup> Natanahuaton, quëmapiso tapon:

—Co'ta o'maranso' natanai. I'nanpirashitëcoi ni'toi, të'huatërainquën. Naporahuaton tapantatëinquën, na'pirai, itërin.

<sup>11</sup> —¡I'yan! ¿Onporahuatomata nitotapanamaso'? Nara a'naíchin nininso': “Ama isoso nitërinso ca'quësohuë',” itopiranquënhuë': ¡Nani ca'nan! itërin.

<sup>12</sup> —Iso sanapi quëtërancoso', quëtërinco ni'ton, ca'nahuë', itërin.

<sup>13</sup> Napotohuachina, sanapi ya'huërë' tahuërë'tahuaton, itapon:

—¿Onpoatonta naporanso'? itërin.

—Ya'huan nonpintërinco ni'ton, ca'nahuë', tënin sanapi.

<sup>14</sup> Naporos' Sinioroso Yosë ni'ton, ya'huan ya'huërë' tahuërë'tahuaton, co huachi noya ya'huëcaso marëhuë' sha'huitërin:

—Piyapi nonpintëranso marë' a'napita ma'sharo'sa quëran, pa'pi co noyahuë' ni'nanquën. Napoaton ipora quëran huarë' cancanën quëran no'pa' pa'taran. Inapoaton, chiminaquë huarë' nosorotaran. <sup>15</sup> Ca nohuanto sanapi inimicotarinquën. Quëmarinta ina inimicotaran. Quëmá quëran pipipisopitanta', sanapi quëran pipipisopitarë' niinimicotapona'. A'na tahuëri sanapi quëran pipirinsoari† minsëmiatarinquën. Napoaponahuë', quëmarinta chiníquën ina aparisitaran, itërin.

<sup>16</sup> Ina quëran sanapi ya'huërë' itapon:

—Co natërancoso marëhuë', hua'huanpatan pa'pi iquin quëran huaiaran. Napoaponahuë', so'yan ya'cariantaran. Naporahuaton, so'yan camaiinquënso ya'huërin, itërin.

<sup>17</sup> Ina quëran quëmapinta itapon:

—Sa'an natëton, nara nitërinso co capacasohuë nipirinhue', ca'nan. Naporanso marë' ya'ipiro'pa' co huachi noyatacaso marëhuë' sha'huitarahue'. Napoaton nitapiarin. Pa'pi chiníquën sacataquë huarë' coshataran. Chiminaquë huarë' inapoaran.

<sup>18</sup> Naporahuaton, nahuano'sa', shihuarino'sa', inapita na'con na'con papotapon huachi. Nisha nisha canomëro'sa', nararayaro'sa', inapita yoniton, capon. <sup>19</sup> Pa'pi chiníquën sacatahuarë' coshataran. Napoin quëran chiminarian huachi. No'pa quëran ninanquën ni'ton, no'pa chachin niantamaso ya'huërin, itërin.

<sup>20</sup> Atanso', sa'in nininën acotërin, Ipa itërin. Ina quëran ya'ipi piyapi na'acaiso ni'ton, ina pochin nohuitërin. <sup>21</sup> Quëmapi sa'inë chachin a'mocaiso marë' ma'sha sha'huëtë quëran Yosëri nitërin. Ina quëtóhuachina, a'moanpi huachi. <sup>22</sup> Naporos' chachin tënin: “Íporaso', piyapi canpoa pochachin nitotërin. Noya nininso nitotahuaton, co noyahuë' nininsonta nitotërin. Ni'quëna nanpirin nara nitërinsona ca'pachin. Napohuachinso', nanpimiatarin,” tënin.

<sup>23</sup> Napoaton Sinioroso Yosë ni'ton, noyápiachin nararo quëran quëmapi ocoirin. Ocoirahuaton, niquë acorin. Inaquë sacatacaso marë' acorin. No'paquë chachin sacatapon huachi. <sup>24</sup> Piyapi ocoirahuaton, pi'i pipirin parti quëran a'paito anquëniro'sa acorin. Inapitaso', quiropino'sa itopi. Noyápiachin nararo a'paicaiso marë' acorin. Ina ya'carinta', sahuëni orotaton huënin huëninintárin acorin. Ama incari tëranta nanpirin nara ya'caricaso marëhuë', a'pairapi.

## 4

### *Atan ya'nan hui'ninpita napopiso'*

<sup>1</sup> Atan sa'in hua'huanpachina, quëmapia'huaya huairin. “Yosë catahuarinco ni'ton, quëmapia'huaya hua'huanahuë huachi,” ta'ton, nininën acotërin. Caino itërin.

<sup>2</sup> Ina quëran hua'huaantarin. Quëmapi chachin huaiaantahuachina, Apiri itërin.

\* 3:9 Atanso': Piyapi tapon naporin. † 3:15 Sanapi quëran pipirinso topachina: Quisocristo ninoton napotërin.



Hui'napitohuachinara, Apiriso ohuicaro'sa pë'tahuarin. Cainoso nipirinhüë', imin camayo.

<sup>3</sup> A'na tahuëri cato chachin ofrenda quëcatona', Yosë chinotapi. Cainoso', sha'ninso quëran Yosë chinotacaso marë' quënin. <sup>4</sup> Apiriso nipirinhüë', ohuicanënpita ya'nan hua'huatopiso quënin. Amo amoshin nininsopita Yosë chinotaton tēpacaso marë' quënin. Yosëso Apiri nóya ni'nin. Ofrendanëonta nóya ni'nin. <sup>5</sup> Cainoso nipirinhüë', co noyahuë' ni'nin. Ofrendanëonta co noyahuë' ni'nin. Ina marë' Cainoso', pa'pi no'huitërin. No'huitaton, aquinorárin. <sup>6</sup> Ina nícaton, Siniorori itapon: “¿Onpoatonta no'huitaton aquinoráran? ¡Ama huachi no'huitëquësohuë'!” <sup>7</sup> Noya ninan naporini, noya cancanchitonhuë'. Nipirinhüë', co nohuanteranhuë' noya nicacaso ni'quëhuarë', co noyahuë' nisápaso marë' oshanën minsëarinquën. Ina nipirinhüë', noya nipatan, nanitëran ina minsëcaso', itërin.

<sup>8</sup> Natanaponahuë', co yanatëtërinhuë'. A'na tahuëri iin itapon:

—Huëquë iyara iminquë pa'a, itërin. Inaquë canconpachinara, iin ahuëaton, tēparin.

<sup>9</sup> Siniorori nitotaton, Caino itapon:

—¡Ma'sona iyaya onporinso', sha'huitoco! itërin. Napotohuachina, Cainoso tapon:

—Co nitotërahuë'. ¡Co ina a'pairápa'huaso ya'huërinhuë'! itërin. <sup>10</sup> Napotohuachina, Siniorori itapon:

—¿Onpoatonta naporan? Iyaya tēpaton, pa'pi co noyahuë' ninan. Huënainën a'patëran ni'ton, co huachi noya ya'huëcamaso marëhuë' sha'huitaranquën. <sup>11</sup> Iya'hua tēparanso marë' pa'pi co noyahuë' ni'nanquën. Huënainënuquë no'pa' asë'cotëtëran ni'ton, ocoiaranquën. <sup>12</sup> Iminaton, sha'topiranhuë' tēranta', co huachi noyatarinhüë'. Co huachi ya'huëmia ya'huaponhuë', patë patërantapon. Co huachi sano cancantaranhuë', itërin.

<sup>13</sup> —¡Ma'huantacha nisarahüë' paya! Co ahuantochináchinhüë' ana'intaranco. <sup>14</sup> Ipora tahuëri iso ro'të quëran ocoiaranco. Co huachi ya'huëmia ya'huapohüë', patë patërantahuaso ya'huërin. Co huachi sano cancanta'huaso ya'huaponhuë'. Co chinota'huanquënso tēranta nanitapohüë'. Napoaton inso tēranta quënanpachinco, tēpaponco tēnahuë', itërin Cainori.

<sup>15</sup> —Insosona tēpahuachinquën, inanta na'con na'con ana'intacaso ya'huërin. Canchisëro ana'intacaso ya'huërin, itërin Siniorori. Napotahuaton marca acotërin. Quënanpachina ama tēpacaiso marëhuë', inapotërin.

<sup>16</sup> Ina quëran Caino pa'nin. Yosë quëran pipirahuaton, Noto parti ya'huëconin. Inaso no'pa', Itin quëran pi'i pipirinso parti quëparitërin.

### *Caino shinpita napopiso'*

<sup>17</sup> Caino sa'apachina, hui'nahuanin. Hui'nin nasitohuachina, Inoco itërin. Ina quëran Caino ninano ocoihuachina: “Inoco ninano'” itërin.

<sup>18</sup> Inoco hui'nahuanpachina, Irato itërin. Iratonta hui'nahuanpachina, Miocairo itërin. Miocairo ya'huërë' hui'nahuanpachina, Mitosairo itërin. Mitosaironta hui'nahuanpachina, Namico itërin. <sup>19</sup> Namicoso', cato sa'ahuanin. A'naso', Ata itopi. A'nanta', Sira itopi. <sup>20</sup> Ataso hua'huanpachina, Caparo itopi. Caparo shinpitaso' pë'tahuatona'piro'sa'. Napoaton nē'mëtë pëiro'saquë ya'huëpi. <sup>21</sup> Caparoso', a'nara iya'huain ya'huëtërin, Coparo itopiso'. Coparo shinpitaso', arpa míso pi'nipi. Nisha nisha pirinaonta míso pihuipi. <sup>22</sup> Siraso nipirinhüë', hua'huanpachina, Toparo-caino itopi. Inaso', hua'na camayo ya'conin. Hua'namia nitotahuaton, sha'pi hua'nanta nitotërin. Toparo-cainoso', a'nara oshin ya'huëtërin, Naama itopi.

<sup>23</sup> A'na tahuëri Namicoso', sa'inpita itapon:

“Natanquë Ata. Quëmanta Sira, noya natanco sha'huichinquëma':

A'na quëmapi tēparahuë' pë'sharincoso marë'.

Hui'napi nipirinhüë', ahuërinco marë' napotërahuë'.

<sup>24</sup> Iin tēparinso marë' Caino tēpahuachinaso',



canchisëro aquëtë Yosëri i'huërëtaapon.  
Caso nipirinhüë', tēpatërahuëso marë' tēpahuachinaco,  
canchisë shonca canchisëro aquëtë i'huërëtaçaiso ya'huërin," itërin.

### *Sito nasitërinso'*

<sup>25</sup> Oshaquëran Atan sa'in, hua'huaantahuachina, Sito itërin. "Cainori tēparinso ya'huërënamën Yosë quëtaantarinco," ta'ton, ina pochin nininën acotërin. <sup>26</sup> Sitonta hui'nahuanpachina, Inosë itërin. Naporo quëran huarë' piyapiro'sa caniaritopi Yosë chinotatona', "Sinioro" itaçaiso'.

## 5

### *Atan shinpita napopiso'*

<sup>1</sup> Atan shinpita napopiso sha'huichinquëma nitotoco'. Yosëri piyapi nipachina, inaora pochachin ninin. <sup>2</sup> Quëmapi, sanapi, nisahuaton, noya ya'huëçaiso marë' noya yonquirapiton sha'huitërin. Acorinso tahuëri chachin nohuitaton: "Isopitaso': 'Piyapiro'sa,' itarahüë," tënin.

<sup>3</sup> Atan pasa cara shonca pi'ipitaso', hui'nin nasitërin. Nasitohuachina, Sito itopi. Inaso', pa'pin noyá quëparin. <sup>4</sup> Sito nasitërin piquëran Atanso', posa pasa pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>5</sup> Ya'ipiya quëran Atanso', iscon pasa cara shonca pi'i icanin. Ina quëran chiminin huachi.

<sup>6</sup> Sito pasa a'natëräpo pi'ipitaso', hui'nin nasitërin. Nasitohuachina, Inosë itopi. <sup>7</sup> Inosë nasitërin piquëran Sitoso', posa pasa canchisë pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>8</sup> Ya'ipiya quëran Sitoso', iscon pasa shonca cato pi'i icanin. Ina quëran chiminin huachi.

<sup>9</sup> Inosënta iscon shonca pi'ipitaso', hui'nin nasitërin. Nasitohuachina, Cainan itopi. <sup>10</sup> Cainan nasitërin piquëran Inosëso', posa pasa shonca a'natëräpo pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>11</sup> Ya'ipiya quëran Inosëso', iscon pasa a'natëräpo pi'i icanin. Ina quëran chiminin huachi.

<sup>12</sup> Cainan canchisë shonca pi'ipitaso', hui'nin nasitërin. Nasitohuachina, Maarariro itopi. <sup>13</sup> Maarariro nasitërin piquëran Cainanso', posa pasa catapini shonca pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>14</sup> Ya'ipiya quëran Cainanso', iscon pasa shonca pi'i icanin. Ina quëran chiminin huachi.

<sup>15</sup> Maarariro saota shonca a'natëräpo pi'ipitaso', hui'nin nasitërin. Nasitohuachina, Carito itopi. <sup>16</sup> Carito nasitërin piquëran Maarariroso', posa pasa cara shonca pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>17</sup> Ya'ipiya quëran Maarariroso', posa pasa iscon shonca a'natëräpo pi'i icanin. Ina quëran chiminin huachi.

<sup>18</sup> Carito pasa saota shonca cato pi'ipitaso', hui'nin nasitërin. Nasitohuachina, Inoco itopi. <sup>19</sup> Inoco nasitërin piquëran Caritoso', posa pasa pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>20</sup> Ya'ipiya quëran Caritoso', iscon pasa saota shonca cato pi'i icanin. Ina quëran chiminin huachi.

<sup>21</sup> Inoco saota shonca a'natëräpo pi'ipitaso', hui'nin nasitërin. Nasitohuachina, Matosarino itopi. <sup>22</sup> Inocoso', nani tahuëri Yosë chinotaton, ina nohuantërinso'áchin ninin. Matosarino nasitërin piquëran Inocoso', cara pasa pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>23</sup> Ya'ipiya quëran Inocoso', cara pasa saota shonca a'natëräpo pi'ipi ya'huëtërin. <sup>24</sup> Inaso', Yosë nohuantërinso'áchin nininso marë' a'nanaya ayarin. Yosëri inápaquë quëparin.

<sup>25</sup> Matosarino pasa posa shonca canchisë pi'ipitaso', hui'nin nasitërin. Nasitohuachina, Namico itopi. <sup>26</sup> Namico nasitërin piquëran Matosarinoso', canchisë pasa posa shonca cato pi'i aquëtë ya'huaantarin. A'napita hui'ninpitanta quëmapi'sa', sanapi'sa',

ya'huëtërin. <sup>27</sup> Ya'ipiya quëran Matosarinoso', iscon pasa saota shonca iscon pi'i icanin. Ina quëran chiminin huachi.

<sup>28</sup> Namico pasa posa shonca cato pi'ipitaso', a'nara hui'nin nasitërin. <sup>29</sup> Nasitohuachina, Noi itërin. "Siniorori piyapi co huachi noya ya'huëcaso marëhuë' sha'huitaton, ana'intërin. Napoaton isoro'pa' nitapirin. Pa'pi chiniquën sacataquë huarë' cosharo manë'. Iso hua'huashaso nipirinhüë', nanan anoyatatonpoa achinotarinpoa'," ta'ton, ina pochin nininën acotërin. <sup>30</sup> Noi nasitërin piquëran Namicoso', a'natëräpo pasa iscon shonca a'natëräpo pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin. <sup>31</sup> Ya'ipiya quëran Namicoso', canchisë pasa canchisë shonca canchisë pi'i icanin. Ina quëran chiminin huachi.

<sup>32</sup> Noiso', a'natëräpo pasa pi'ipitaquë huarë' hui'nin paninantërinso nasitërin. Ina quëran cato hui'ninpita ya'huëtaantarin. Hui'ninpitato': Simo, Camo, Cahuito, inapita itopi.

## 6

### *Piyapi'sa nitapicancanpiso'*

<sup>1</sup> Piyapi'sa na'asahuatona', yanquëpi huachi. Itohua itohua ninanoro'sa ocoiatona ya'huërapí. Na'a hui'ninapita nano'sa ya'huëtópi. <sup>2</sup> Yosë hui'ninpitari\* ina nano'sa ni'sahuatona', pa'yatopi. Napoaton huayonatona huayonatona', costapiso mara'piapi. <sup>3</sup> Napoaponahuë', Siniorori co costatonhuë' tapon: "Co piyapi'sa ya'huëmiatápaíso ya'huërinhuë'. Piyapi ni'ton, chiminacaiso ya'huërin. Napoaton pasa cato shonca pi'ipira', nanpipona'," tënin.

<sup>4</sup> Yosë hui'ninpitari ina sanapiro'sa macatona', hui'nahuanpi. Hui'nahuanpachinara, panca piyapiro'sa ya'huërin huachi. Ina quëran inapitaso', iráca quëran huarë' hua'ano'sa nahuinpisopita ya'huëpi. <sup>5</sup> Napoaponaraihuë', pa'pi co noyahuë' cancantopi. Co noyahuë' nicacaisoráchin yonquipi ni'ton, Yosëri co noyahuë' ni'nin. <sup>6-7</sup> Ina nicaton, sëtërin: "Ma'marëcha piyapi acorahuë' paya. Ata'huanchi nipachin. Ya'ipi pë'tahuaros'a', anpianthëhuano'sa', no'paquë niohuaratërinso, inapitarë chachin ata'huantarahuë huachi," tënin. <sup>8</sup> Napoaponahuë', Noiso nóya ni'nin.

### *Noi panca nancha nininso'*

<sup>9</sup> Noi naporinso sha'huichinquëma': Noiso Yosëichin natëton, nóya ninin. Naporo tahuëri'sa inaíchín Yosë nohuantërinso ninin. <sup>10</sup> Inaso', cara hui'ninpita quëmapi'sáchin ya'huëtërin: Simo, Camo, Cahuito, inapita.

<sup>11-12</sup> Naporo' ya'ipi isoro'paquë ya'huëpisopita nitapicancanpi. Pa'pi co noyahuë' nicatona', ahüëtaçaisoráchin cancantopi. Napopiso Yosëri ni'nin. <sup>13</sup> Ina nicaton, Noi itapon:

"Ya'ipi piyapiro'sa ata'huantarahuë. Pa'pi co noyahuë' nipi ni'ton, piyapi'sa co huachi sano cancantopihuë'. Napoaton ya'ipiro'paquë ya'huëpisopita ata'huantarahuë huachi. <sup>14</sup> Quëmaso nipirinhüë', panca nancha niquë'. Yaquihuan nara quëran nisahuaton, aipi quëran, acopo quëran, to'ni pochin nininquë to'níquëtëquë'. Patoanaro'santa acotëquë'. <sup>15</sup> Nancha nipatan, iso pochin acoquë': Pasa cara shonca a'natëräpo mitro naporopitërinso'. Cato shonca cato mitro miria pancanatërinso'. Shonca cara mitro miria inaparinso'. <sup>16</sup> Naporahuaton, cara pa'cotë acotëquë'. Pëirapiranso ya'cari', miria mitro aquërinquë huintana acotëquë'. Ya'coananta', a'natëran acotëquë'. <sup>17</sup> A'na tahuëri panca pacon a'paarahuë, ya'ipiro'pa' imotarin. Ya'ipi piyapiro'sa', ma'sharo'sa', inapita taquiiitapi. <sup>18</sup> Quëmaro'coso nipirinhüë', anoyatarahuë ni'ton, nancha tënihuatan, sa'anë'quën chachin ya'conaran. Hui'nanpitanta', sa'inarë chachin

\* **6:2** Yosë hui'ninpita topachina, ma'sona tapon naporinso': co insonta nitotërinhuë'. "Yosë imaro'sa hui'nina'," topi a'naquën.

ya'conapi. <sup>19</sup> Naporahuaton, ma'sharo'santa nisha nisha nipisopita quëran, a'nara quëmapi, a'nara sanapi yontonquë'. Inapitanta canpita pochin cha'ëcaiso marë' yontonquë'. <sup>20</sup> Anpianthëhuano'sa', pë'tahuaros'sa', no'paquë niohuaratërsopita, ya'ipi inapita catoya catoya ya'conapona'. Canpitarë chachin ya'huaantacaiso marë' ya'conapona'. <sup>21</sup> Notohuaro' cosharo nisha nisha nininsopita ayontonahuaton nanchaquë po'moquë'. Canpita capacamaso nisahuaton, ma'sharo'santa capacaiso marë' po'moquë'," itërin. <sup>22</sup> Napotohuachina, Noiso' ya'ipi Yosëri camairinso chachin ninin huachi.

## 7

### *Nanchaquë ya'conpiso'*

<sup>1</sup> Ina quëran Siniorori Noi itapon: "Ya'ipi ipora ya'huëpisopita a'porinaco. Quëmasáchin nohuantërahuëso ninan. Napoaton iporaso', sa'anë'quën chachin nanchaquë ya'conquë huachi. Hui'nanpitanta', sa'inarë chachin ya'coina'. <sup>2</sup> Chinotamacoso marë' ma'sharo'sa tēpacaiso nipisopitaso', canchisë quëmapi nisahuaton canchisë sanapi nanchaquë po'moquë'. Ya'huërë' co ina marë' nipisopitasohuë', a'nara quëmapi, a'nara sanapi inaíchin po'moquë'. <sup>3</sup> Nisha nisha anpianthëhuano'santa', nanchaquë po'moquë'. Canchisë hua'anën, canchisë sanapinën na'antacaiso marë' po'moquë'. <sup>4</sup> Canchisë tahuëri quëran ca nohuanto o'nanapon. Catapini shonca tahuëri, tashirë chachin o'namiatapon. ¡Inapotato ya'ipi isoro'paquë acorahuësopita ata'huantarahuë!" itërin.

<sup>5</sup> Noiso', ya'ipi Siniorori camairinso chachin ninin.

<sup>6</sup> Noi saota pasa pi'ipitaso', paconi isoro'pa' imotërin. <sup>7</sup> Naporo inaso', sa'inë chachin nanchaquë ya'conin. Hui'ninpitanta sa'inarë chachin cha'ëcaiso marë' ya'conpi. <sup>8-9</sup> Yosë chinotacaso marë' ma'sharo'sa tēpacaiso nipisopitanta', Noirë chachin catoya catoya nanchaquë ya'conpi. A'nara quëmapi, a'nara sanapi ya'conpi. Co ina marë' nipisopitahuënta ya'conpi. Anpianthëhuano'sa', niohuaratërsopita, inapitanta inapochachin ya'conpi. Yosëri sha'huitërinso chachin nipi.

<sup>10</sup> Yosëri sha'huitërinso chachin, canchisë tahuëri quëran paconi isoro'pa' imotarin huachi. <sup>11</sup> Naporo' Noiso', saota pasa pi'i, cato yoqui, shonca canchisë tahuëritarin. Naporo chachin isoro'pa' huëncharoatë pochin ninin. Marënta acoporo ya'huërinso', pipimiatarin. Naporahuaton inapaquënta', i' ya'copinamën ya'huërinso nii'soatërin. Napohuachina, pa'pi i' isoro'paquë anotimarin. <sup>12</sup> Catapini shonca tahuëri tashirë chachin isoro'paquë o'namiatarin huachi. <sup>13</sup> Naporo tahuëri chachin Noi sa'inë nanchaquë ya'conin. Hui'ninpitanta', Simo, Camo, Cahuito, inapitanta sa'inarë' sa'inarë' ya'conpi. <sup>14</sup> Tananquë ma'sharo'sa ya'huërsopita, pë'tahuaros'sa nipisopita, niohuaratërsopita, anpianthëhuano'sa', inapitanta ya'conpi. <sup>15</sup> Yosë nohuanton, ma'sharo'sa catoya catoya nanchaquë ya'conpi. <sup>16</sup> Nisha nisha nipisopita quëran, a'nara quëmapi, a'nara sanapi ya'conpi. Yosëri Noi camairinso chachin nipi. Nani ya'conpachinara, Siniorori chachin nancha ya'coananën oncorapirin huachi.

### *Pacon pa'ninso'*

<sup>17</sup> Catapini shonca tahuëri o'nanárin. Pamatohuachina, nanchaso no'pa quëran yanponin huachi. <sup>18</sup> Pamaso' aquëtë chachin mëntaintararin, nanchaso nipirinhüë', noya yanponarin. <sup>19-20</sup> Pa'pi pacon pa'sahuaton, ina inápa motopiro'sa quëran huarë' imotërin. Inapita motopiro'sa imotahuaton, canchisë mitro aquëtë pantarin. <sup>21-22</sup> Naporo' ya'ipi piyapiro'sa isoro'paquë ya'huëpisopita, taquiitopi. Anpianthëhuano'sa', pë'tahuaros'sa', tananquë ma'sharo'sa ya'huërinso', niohuaratërsopita, inapitanta ta'huantopi. Ya'ipi nii o'huatona nanpipisopita, taquiitopi huachi. <sup>23</sup> Noisáchin cha'ërin. Panca nanchaquë ya'conpispitarë', cha'ërin. A'napitaso nipirinhüë', ya'ipi ta'huantopi. Pë'tahuaros'sa', anpianthëhuano'sa', niohuaratërsopita, inapitanta ya'ipi taquiitopi huachi. <sup>24</sup> Pasa a'natëräpo shonca tahuëri isoro'pa' iiri imotaton, napotërin.

## 8

*Pacon huiñquintomarinso'*

<sup>1</sup> Naporo' Yosëri Noi, ya'ipi ma'sharo'sa nanchaquë ya'huëapisopita, inapita ya-catahuarin. Ina nohuanton pacon huiñquintacaso marë' ihuan pa'nin. <sup>2</sup> Co'huara huiñquinchátërasohuë', o'nan'ton më'tarin. Naporo' marë acoporo quëran pipirinso', nioncotërin. Inápaquë i' ya'copinamën ni'soatërinsona inaporin. <sup>3</sup> Pasa a'natërápo shonca tahuëri quëran, i' pi'piyan pi'piyan huiñquintomarin. <sup>4</sup> Canchisë yoqui, shonca canchisë tahuëri quëran, Ararato motopiro'sa hui'nimotënquë nanchaso', ya'mitërin. <sup>5</sup> Iscon yoqui nanirahuaton tahuëririnquë, motopiro'sa hui'nimotëna ya'nopi huachi.

<sup>6</sup> Inapita ya'nohuachinara, catapini shonca tahuëri quëran, Noiso nancha huiñtanen i'soatërin. <sup>7</sup> Naporo' a'nara itatan a'parin. Inaso', itohua itohua yanpo yanpónantarin. I' huiñquintacaso ninaton, naporin. <sup>8</sup> Ina piquëran, Noiso' i' huiñquintërinso nitotacaso marë', nëpë ya'huërë' a'paantarin. <sup>9</sup> A'papurinhuë', co intopa huënsëcasohuë ni'ton, yanpo yanpónantarin. Naporarin quëran, nanchaquë chachin huënantarin. Huëntahuachina, Noiri masahuaton po'moantarin.

<sup>10</sup> Canchisë tahuëri quëran, naquëranchin a'paantarin. <sup>11</sup> Nëpëso pa'sahuaton, i'huarayasha huarë' huënantarin. Oripo nara së'para'huaya monoquënë chachin naquërahuaton quëntarin. Naporo' Noi, yaniromarinso nitotërin huachi. <sup>12</sup> Canchisë tahuëri quëran naquëranchin nëpë a'paantapurinhuë', co huachi huëntarinhuë'.

<sup>13</sup> Noi saota pasa a'na pi'itapaso', ya'ipiro'pa' yaniromarin huachi. Caniaritërinso yoquiquë, ya'natiirinso tahuëri chachin, napopinchin nancha pëirapurinso oquirin. Naporo ya'ipiro'pa' yaniromarinso nocorin. <sup>14</sup> A'na yoqui, cato shonca canchisë tahuëri nanihuachina, ya'ipiro'pa' noyá yaniromarin huachi.

<sup>15</sup> Naporo chachin Yosëri Noi itapon: <sup>16</sup> "Iporaso huachi sa'anë'quën chachin nancha quëran pipiquë'. Hui'nanpitanta', sa'inarë chachin pipiina'. <sup>17</sup> Ya'ipi ma'sharo'santa ocoiquë pa'ina'. Anpianthëhuano'sa', pë'tahuaro'sa', no'paquë niohuaratërinso, ya'ipi inapitanta pipiina'. Notohuaro' hua'huatatona', ya'ipiro'paquë yanquë'ina', itërin.

<sup>18</sup> Napotohuachina, ya'ipi piyapi'sa cha'ëpiso pipipi. <sup>19</sup> Ma'sharo'santa pipipi: Pë'tahuaro'sa', niohuaratërinso, anpianthëhuano'sa', inapitanta pipipi huachi. <sup>20</sup> Nani pipihuachinara, Noiso a'nara artaro ninin. Yosë chinotacaso marë' ma'sharo'sa tēpacaiso nipisopita masahuaton, tēparin. Anpianthëhuano'santa', manin. A'naya a'naya nisha nisha nipisopita quëran tēparin. Tēparahuaton, Siniro chinotacaso marë' artaro aipi ya'ipi ahuiquitërin. <sup>21</sup> Ma'sharo'sa ahuiquitërinso pimóchin imërahuaton, Yosëri nóya ni'nin. Naporo' inaso tapon: "Hua'huatapon quëran huarë' piyapi'sa', co noyahuë' nicacaisoráchin cancantopi. Inaso niponahuë', co huachi ipora ana'intërahuëso pochin, isoro'pa' ana'intaantapohuë'. Co huachi ma'sharo'santa inapotapohuë'.

<sup>22</sup> Isoro'paquë ya'huapona pochin, piyapi'sa noya sha'tapona'.

Nitërinsona macapona'.

Huënocanta ya'huërahuaton, sëhuëonta ya'huapon.

Pi'ipi tahuëri'santa nanirahuaton, o'napinta nanipon.

Tahuëri, tashi', inapitanta ya'huapon," tēnin.

## 9

*Yosë Noirë' anoyatërinso'*

<sup>1</sup> Naporo' Noi, hui'ninpitarë chachin, Yosëri nóya yonquirapiton iso pochin sha'huitërin: "Na'a hui'nahuanatoma', ya'ipiro'paquë ya'huëco'. <sup>2</sup> Ya'ipi ma'sharo'sa', anpianthëhuano'sa', marëquë ya'huërinso, inapita hua'anëntarama'. Inapitaso tē'huatarinënquëma'. <sup>3</sup> Carima ya'ipi inapita capamaso marë' quëtaranquëma'. Nisha nisha huërono'santa ca'co'. Ma'sona tēranta nayaramaso ca'co'. <sup>4</sup> Huënaiso nipirinhuë',

ama ca'cosohuë'. Ma'sha tëpahuatama', huënainën noyá inquitahuatoma', ca'co'. Huënainëni ananpirin ni'ton, ama inaso ca'cosohuë'. <sup>5</sup> Canpita capiniso', co nitëpamaso ya'huërinhuë'. Tëpatohuatama', ana'inta'huanquëmaso ya'huërin. Ma'sharo'sarinta piyapi tëpahuachin, ana'intarahuë. Tëpatohuatama', a'naya a'nayanquëma tëhuënchachin ana'intaranquëma'.

<sup>6</sup> Insosona piyapi tëpahuachin, a'nari i'huërëtarin.

Cá pochachin nicamaso marë' acoranquëma'.

Napoaton, co nitëpamaso ya'huërinhuë'.

<sup>7</sup> ¡Napoaponahuë', canpitaso na'a hui'nahuanatoma', ya'ipiro'paquë ya'huëco!' itërin.

<sup>8</sup> Ina quëran itaantarin: <sup>9</sup> “Ni'co'. Ipora canpitaro'co anoyatërahuëso', shiparimapitanta yonquiato, napotaranquëma'. <sup>10</sup> Ya'ipi ma'sharo'santa yonquiato napotaranquëma': Anpianthëhuano'sa', pë'tahuaros'sa', tananquë ma'sharo'sa ya'huërinso', nisha nisha nipisopita nancha quëran pipipiso yonquiato, sha'huitaranquëma'. <sup>11</sup> Ipora canpitaro'co anoyatato sha'huitëranquëmaso', co onporonta nishataponhuë'. Co huachi piyapi'sa', ma'sharo'sa', inapita pacon quëran ata'huantaantapohuë'. Co huachi paconi isoro'pa' ata'huantaantaponhuë'.

<sup>12-13</sup> Canpitarë'co nani anoyatomiatërahuë. Ma'sharo'sarë'conta', nani anoyatërahuë. Ina yonquicamaso marë' yahua'tanëhuë inápaquë acoarahuë. <sup>14</sup> Chitoro inápaquë ya'nohuachin, yahua'tanëhuënta ya'noarin. <sup>15</sup> Naporo' canpitaro'co anoyatato sha'huitëranquëmaso', yonquiarahuë. Ama huachi i' quëran, isoro'pa' ata'huaanta'huaso marëhuë', yonquiarahuë. <sup>16</sup> Yahua'tan chitoroquë ya'nohuachin ni'sarahuë. Ina ni'pato, ya'ipi piyapi'sarë'co ya'ipi ma'sharo'sarë'co anoyatërahuëso', ayonquiarinco. <sup>17</sup> Nani ina acorahuë ayonquiinpoaso marë'. Canpitarë'co anoyatërahuëso ayonquiarinpoa'. Ma'sharo'sarë'conta anoyatërahuëso ayonquiarinpoa',” itërin. Ina pochin Yosëri Noi sha'huitërin.

### *Noi hui'ninpitarë' naporinso'*

<sup>18</sup> Noi hui'ninpita nancha quëran pipipisopita, iso nápo ya'huëpi: Simo, Camo, Cahuito, inapita. Camoso', a'nara hui'nin ya'huëtërin. Inaso', Canaan itopi. <sup>19</sup> Caramiáchin Noi hui'ninpita nipirinahuë', inayaquëranchin isoro'paquë piyapi'sa na'antapi. <sup>20</sup> Ina piquëran Noi iminaton, inaquë opasáchin shacaton, oparotërin. <sup>21</sup> A'na tahuëri Noi huino o'oton, no'pirin. No'piton, në'mëtë pëinën huáncana notataton, i'nanpirashitë quëhuëánin. <sup>22</sup> Camoso', inaquë ya'conahuaton ni'pirinhuë', pa'pin no'piton huë'ësárin quënanconin. Quënanahuaton iinpita sha'huitapon pa'nin: “Tata no'piton i'nanpirashitë quëhuëánin ni'conahuë,” itërin. (Nani sha'huirahuëso chachin Camoso', Canaan pa'pin.) <sup>23</sup> Ina natanahuatona', Simo, Cahuito, inapitaso a'nara a'mopiso mapi. Ina masahuatona', niimopitopi. Niimopitopiquëranchin, pinëna quëran ya'conatona', pa'pina imotopi. Niquë notëtopi ni'ton, co pa'pina ni'pihuë'.

<sup>24</sup> Noi nonatohuachina, hui'nin hua'hua nininsoari, napotërinso natantërin.

<sup>25</sup> Natantahuaton, Canaan itapon:

“¡Tata tëhuërin ni'ton, pa'pi co noyahuë' nicatënquën co huachi noya ya'huëcamaso marëhuë' sha'huitaranquën!

Yosë chiníquën ana'ichinquën.

Ipora quëran huarë' iyaro'sa camaiáponquën.

Shiparimapitanta inaporápona',” itërin.

<sup>26</sup> Ina quëran taantarin:

“Sinioroso', Yosënhuë. Inari Simo noya niconon noya ya'huëcaso marë' catahuain.

Canaanso', Simo piyapinën niin.

<sup>27</sup> Yosë nohuanton, Cahuito, pancana hua'anëchin.

Simo ya'huërinquë noya ninicatona ya'huë'ina'.



Canaanso', Cahuito piyapinën niin," tënin.

<sup>28</sup> Pacon pa'ninso piquëran, Noiso' cara pasa a'natërápo shonca pi'ipi ya'huaantarín.

<sup>29</sup> Ya'ipiya quëran iscon pasa a'natërápo shonca pi'i icanin. Ina piquëran chiminin huachi. Ina pochin Noi ninin.

## 10

### *Noi shinpita napopiso'*

<sup>1</sup> Iporaso', Simo, Camo, Cahuito, inapita shinpita napopiso sha'huichinquëma'. Pacon pa'ninso piquëran hui'nahuanatona na'antapiso', sha'huichinquëma'. Simo, Camo, Cahuito, inapitaso nani sha'huirahuëso chachin, Noi hui'ninpita.

<sup>2</sup> Cahuito hui'ninpitaso', isopita: Comiri, Macoco, Matai, Capano, Toparo, Misico, Tirasi, inapita. <sup>3</sup> Comiri hui'ninpitanta': Asiquinasi, Nipato, Tocarama, inapita.

<sup>4</sup> Capano hui'ninpitanta': Inisi, Tarsis, Quitimo, Notanimo, inapita. <sup>5</sup> Ina nápo Cahuito hui'ninpita, shinpita inapita ya'huëpi. Inapitaso', marë yonsano'sa parti, ya'huëpi. Inatohua ninanoro'sa ocoirahuatona', a'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

<sup>6</sup> Camo hui'ninpitanta isopita: Coso, Misiraimo, Oto, Canaan, inapita. <sup>7</sup> Coso hui'ninpitanta': Sipa, Apira, Sapota, Naama, Sapitica, inapita. Naama hui'ninpitanta': Sipa, Titan, inapita. <sup>8</sup> Cososo', a'na hui'nin ya'huëtërin anta', inaso', Nimoroto itopi. Ina'ton chini chiniquën nanantaton, isoro'paquë hua'an ya'conin. <sup>9</sup> Nimorotoso Siniorori catahuarin ni'ton, pa'pi míso inantërin. Napoaton piyapi'sa nonpachinara pa'yatopi napocaiso': "Siniorori Nimoroto catahuarin ni'ton, míso inantërin. Inapochachin quëmanta catahuainquën," topi. <sup>10</sup> Nimoroto hua'anëntërinso no'paquë, ninanoro'sa panca panca nipisopita, isopita ya'huërin: Papiri, Irico, Acato, Carini, inapita. Inapita ninanoro'saso', Sinaro parti ya'huëpi. <sup>11</sup> Ina parti quëran Asoronta pipirahuaton, ninanoro'sa ocoirin: Ninihui, Niopoto-iri, Cara, inapita itopiso'. <sup>12</sup> Naporahuaton, Nisin ninanonta ocoirin. Inaso', panca ninano'. Ninihui, Cara, inapita ninanoro'sa huáncana ya'huërin.

<sup>13-14</sup> Misiraimo shinpitaso': Notoro'sa', anamoro'sa', niapiro'sa', napotoro'sa', patrosoro'sa', casonoro'sa', capotoro'sa', inapita. Capotoro'sa quëran huiristino'sa pipipi.

<sup>15</sup> Canaanso', paninan hui'nahuanpachina, Siton itërin. Ina quëran hui'nahuaantahuachina, Iti, itërin. <sup>16-18</sup> Canaan shinpitanta isopita: Quiposoro'sa', amororo'sa', quiriquiro'sa', iporo'sa', arasiro'sa', siniro'sa', arapatiro'sa', simariro'sa', amatiro'sa', inapita. Ina piquëran Canaan huëntono'sa niquë niquë yanquëëpi.

<sup>19</sup> Canano'sa no'pa' hua'anëntopiso', Quiraro parti huarë' icanin. Siton ninano quëraonta', Casa ninanoquë huarë' icanin. Naporahuaton, Sotoma, Comora, Atoma, Sipoin, inapita ninanoro'sataquëchin no'pa' mapi. Nasa ninanoquë huarë' no'pa' hua'anëntopi.

<sup>20</sup> Ina nápo Camo hui'ninpita, shinpita inapita ya'huëpi. A'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

<sup>21</sup> Cahuito iin mashonënso', Simo itopi. Inanta', hui'ninpita ya'huëtërin: Ipiri hui'ninpitaso', Simo shinpita nipi. <sup>22</sup> Simo hui'ninpita isopita ya'huëpi: Iramo, Asoro, Arapasato, Noto, Aramo, inapita. <sup>23</sup> Aramonta hui'ninpita isopita ya'huëpi: Osi, Ori, Quitiri, Masi, inapita. <sup>24</sup> Arapasatonta', Saro pa'pin. Saronta', Ipiri pa'pin. <sup>25</sup> Ina quëran Ipirinta cato hui'ninpita ya'huëtërin: A'naso', Piriqúi itopi. Naporo tahuëri'sa piyapi'sa itohua itohua yanquëëpi ni'ton, ina pochin ninihuanin. Iya'huainta Cotano itopi.

<sup>26-29</sup> Cotanoso', iso nápo hui'ninpita ya'huëtërin: Aromota, Siripi, Asaromapi, Quira, Atoramo, Osaro, Tiquira, Oparo, Apimairo, Sipa, Opiro, Apira, Copa, inapita.

<sup>30</sup> Inapitaso Misa parti ya'huërahuatona', Sipari parti huarë' ya'huëpi. Ina partiso',

motopiro'saráchin niconin. Cortanii' quëran, pi'i pipirinso parti ya'huërin. <sup>31</sup> Ina nápo Simo hui'ninpita, shinpita, inapita ya'huëpi. A'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

<sup>32</sup> Ina nápo Noi hui'ninpita quëran pipipi. Nisha nisha huënton nipisopita. Nisha nisha shimashonëna quëran pipitona', nisha nisha parti no'pa' hua'anëntopi. Pacon pa'ninso piquëran itohua itohua yanquëpi. Yanquërahuatona', nisha nisha naciono'sa isoro'paquë ya'huërinso ocoipi.

## 11

### *Nisha nisha nananquë Yosëri anoninso'*

<sup>1</sup> Pacon piquëran notohuaro' piyapi'sa na'antapi. Naporo' ya'ipiya a'na nananquësáchin nonpi. <sup>2</sup> Pi'i pipirinso parti quëran pipirahuatona', Sinaro parti canquipi. Inaso no'pa', noyápiro'tëchin ni'ton, inaquë ya'huëcaiso marë' quëparitopi.

<sup>3</sup> A'na tahuëri inahua capini ninontatona', napopi: “Huëco pa'ahua', natëricho no'pa quëran nicatëhua', a'pëahua',” nitopi. Ina nisahuatona', natëricho quëran na'pi ya'huërenamën pëipi. Achinpitacaiso marënta', to'ni pochin nininquë achinpitopi. Siminto pochin nininso ya'huërenamën, inaquë achinpitopi. <sup>4</sup> Ina quëran ninontaantapi: “Huëco chiníquën cancantatëhua', ninano ocoia'ahua'. Ina nisahuatëhua', a'na torinta pi'iro'tëquë huarë' nincaninso niahua'. Inapoatëhua', sacóshin nahuinarihua'. Naporahuatón, co huachi itohua itohua yanquëcaso ya'huaponhuë',” nitopi.

<sup>5</sup> Napopirinahuë', Sinioroso o'marin. O'marahuatón ninano', tori, inapita nisapiso ni'quimarin. <sup>6</sup> Ni'quimarahuatón, yonquirin: “Isopitaso inaquësáchin ya'huatona', ina nananquësáchin nonpi ni'ton, nani caniaritopi sacatacaiso'. Po'pachinara, co incari tëranta nanitarinhuë atananpitacaso'. <sup>7</sup> Napoaton acopitacaso marë', pa'matëhua nonpiso anishatahua'. Ama huachi ninatanacaiso marëhuë', napotahua',” ténin. <sup>8</sup> Inapotatón, Siniorori piyapi'sa itohua itohua ayanquëërin. Ninano nisapisonta a'porahuatona', tananpitopi huachi.

<sup>9</sup> Inaquë chachin Siniorori, ya'ipi piyapi'sa nonpiso anishatërin. Ina quëran chachin, ya'ipi isoro'paquë ayanquëërin. Napoaton ina ninanoso', Papiri\* itopi.

### *Simo shinpita napopiso'*

<sup>10</sup> Simo shinpita napopiso sha'huichinquëma'. Pacon pa'ninso piquëran cato pi'ipitapaso', Simo pasa pi'ipitarin. Naporo' a'nara hui'nin nasitërin. Nasitohuachina, Aropasa, itërin. <sup>11</sup> Ina piquëran Simoso', a'natërápo pasa pi'i aquëtë ya'huaantarín. A'napita hui'ninpitanta quëmapi'sa', sanapi'sa', ya'huëtërin.

<sup>12</sup> Aropasa cara shonca a'natërápo pi'ipitaso', hui'nin nasitërin. Nasitohuachina, Saro itërin. <sup>13</sup> Ina piquëran Aropasaso', catapini pasa cara pi'i aquëtë ya'huaantarín. A'napita hui'ninpitanta quëmapi'sa', sanapi'sa', ya'huëtërin.

<sup>14</sup> Saro cara shonca pi'ipitaso', hui'nin nasitërin. Nasitohuachina, Ipiri itërin. <sup>15</sup> Ina piquëran Saroso', catapini pasa cara pi'i aquëtë ya'huaantarín. A'napita hui'ninpitanta quëmapi'sa', sanapi'sa', ya'huëtërin.

<sup>16</sup> Ipiri cara shonca catapini pi'ipitaso', hui'nin nasitërin. Nasitohuachina, PiriQUI itërin. <sup>17</sup> Ina piquëran Ipiriso', catapini pasa cara shonca pi'i aquëtë ya'huaantarín. A'napita hui'ninpitanta quëmapi'sa', sanapi'sa', ya'huëtërin.

<sup>18</sup> PiriQUI cara shonca pi'ipitaso', hui'nin nasitërin. Nasitohuachina, Nio itërin. <sup>19</sup> Ina piquëran PiriQUI cato pasa iscon pi'i aquëtë ya'huaantarín. A'napita hui'ninpitanta quëmapi'sa', sanapi'sa', ya'huëtërin.

\* **11:9** Papiriso': “Co ninatananpiquëhuë',” tapon naporin.



<sup>20</sup> Nio cara shonca cato pi'ipitaso', hui'nin nasitërin. Nasitohuachina, Siroco itërin. <sup>21</sup> Ina piquëran Nioso', cato pasa canchisë pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin.

<sup>22</sup> Siroco cara shonca pi'ipitaso', hui'nin nasitërin. Nasitohuachina, Nacoro itërin. <sup>23</sup> Ina piquëran Sirocoso', cato pasa pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin.

<sup>24</sup> Nacoro cato shonca iscon pi'ipitaso', hui'nin nasitërin. Nasitohuachina, Tari itërin. <sup>25</sup> Ina piquëran Nacoroso', pasa shonca iscon pi'i aquëtë ya'huaantarin. A'napita hui'ninpitanta quëmapi'sa', sanapi'sa', ya'huëtërin.

<sup>26</sup> Tari canchisë shonca pi'ipitaso', hui'nin paninantërinso nasitërin. Ina quëran cato hui'ninpita ya'huëtaantarin. Hui'ninpitaso': Apran, Nacoro, Aran, inapita.

### *Tari, naporinso'*

<sup>27-28</sup> Sha'huitëranquëmaso chachin Tari hui'ninpitaso', isopita: Apran, Nacoro, Aran, inapita. Aran hui'ninso', Noto itopi. Aranso', Orë ninanoquë chiminin. Ina ninanoso', Cartia parti ya'huërin. Co'huara pa'pin chiminyátërasohuë', chiminin. Hua'huatërinso ninanoquë chachin naporin. <sup>29</sup> Apranso', Sarai manin. Nacoronta', Mirica manin. Miricaso', Aran hui'nin. Inaso', a'nara caipayain ya'huëtërin, Isca itopiso'. <sup>30</sup> Saraiso co hua'huana'pihuë ni'ton, co hua'huaninhuë'.

<sup>31</sup> Tariso', Orë ninano quëran pipirin. Cartioro'sa ya'huërin quëran pipirahuaton, Canaan parti chinoton, pa'nin. Hui'nin Apran itopiso Sarairë chachin quëparin. Naporahuaton, shionta Noto itopiso quëparin. Pa'sapirinahuë', Aran ninanoquë canconpachinara, inaquë quëparitonpi. <sup>32</sup> Inaquë ya'huëaso', Tariso chiminin. Cato pasa a'natërápo pi'ipitaso chiminin huachi.

## 12

### *Piyapinënpita shimashonën nicacaso marë' Yosëri Apran acorinso'*

<sup>1</sup> A'na tahuëri Siniorori Apran itapon: “Ya'huëran quëran pipimiatëquë'. Quëmopinënpita, tataparin ya'huërinso no'pa', inapita patëquë'. A'na no'pa' carinquën a'notaranquën. Inaquë ya'huëconquë huachi. <sup>2</sup> A'na tahuëri ca nohuanto, shiparinpita panca nacion ocoiaponá'. Carinquën catahuamiataranquën. Inapotaranquën ni'ton, sacóshin nahuinaran. Naporahuaton, quëmá quëran a'napitanta catahuararahué. <sup>3</sup> Inpitasona noya nicatënën catahuahuachinën, carinta inapita inapotarahué. Inpitasona co huachi noya ya'huëcamaso marëhuë' sha'huitohuachinën, carinta inapita napotarahué. Quëmá quëran, ya'ipi piyapi'sa nisha nisha nipisopita catahuararahué,” itërin.

<sup>4-6</sup> Apranso Yosëri sha'huitërinso chachin, Aran ninano quëran pipirin. Canaan parti paacaiso marë' pipirin. Canchisë shonca a'natërápo pi'ipitaso napoarin. Sa'inë chachin pa'nin. Sa'inso', Sarai itopi. Apin Noto itopisonta', quëparin. Ya'ipi ma'shanënapitarë chachin pa'pi. Piyapinënapitanta quëmapi'sa', sanapi'sa asacatacaiso marë' Aranquë pa'anpiso', quëpapi. Ya'ipi quiquipi. Canaan parti canconpachinara, Apranso piyapinënpitarë chachin ya'ipi ina no'pa' pa'tatona', pëntontopi. Siquimo ninanoquë huarë' canconpi. Inaquë panca insina nara ya'huërin. Ya'huëhuano'sa mamanshinëna moshapiquë ni'ton: “Mori insina,” itopi. Ina parti naporo canano'sa ya'huëapi. <sup>7</sup> Inaquë Siniorori, Apran ya'notahuaton, itërin: “Ya'ipi iso no'pa', shiparinpita quëtarahuë hua'anëntapona,” itërin. Naporo chachin Apran Sinioro chinotacaso marë' a'nara artaro ninin. Inaquë ya'notërin ni'ton, chinotërin.

<sup>8</sup> Ina quëran motopiro'sa parti pa'pi. Ina motopiro'saso', Pitiri ninano quëran, pi'i pipirinso parti quëparitërin. Inaquë në'mëtë pëiro'sa otënpi ya'huëcaiso marë'. Pitiri ninanoso', pi'i ya'coninso parti acorahuatona', Ai ninanonta', pi'i pipirinso parti acopi. Ina huancánachin ya'huëipi. Inaquë naquëranchin Apran Sinioro chinotacaso marë' a'na

ya'huërë' artaro niantarin. <sup>9</sup> Ina piquëran Apran piyapinënpitarë chachin paantapi. Oshaquëran pa'sápatona', Niquipi parti canconpi.

### *Apran Iquipitoquë pa'ninso'*

<sup>10</sup> Naporo tahuëri'sa ina parti panca tanarotopi. Napoaton Apran piyapinënpitarë chachin Iquipito parti yacapatacaiso marë' pa'pi. Ya'huëpiquë co manta capacaiso ya'huërinhuë' ni'ton, inatohua pa'pi. <sup>11</sup> Iquipito no'paquë ya'caritohuachina Apranso', Sarai itapon: “Ni'quë', quëmaso tëhuëenchachin noyápiroyanchinquën. <sup>12</sup> Iquipitoro'sa ni'pachinën noyaponën nimara: 'Isoso quëmapi, paso sanapi so'in,' ta'tona', caso tēpaponaco. Quëmaso nipirinhüë', macainëinquënso marë' co tēpaponënhüë'. <sup>13</sup> Napoaton ama quëma na'in quëran tēpainacoso marëhuë': 'Isoso yo'yohuë', tēquë', topirahuë,” itërin.

<sup>14</sup> Iquipito no'paquë Apran camahuachina, Iquipitoro'saso Sarai ni'sahuatona', pa'yatopi: “Ma noyápiroyanchincha paya,” topi. <sup>15</sup> Iquipito copirnosó', “huaraon” itopi. Ina catahuapisopita hua'ano'santa', Sarai ni'pi. Ni'sahuatona', noyápiroyanchin nininso hua'anëna sha'huitonpi. Natanahuaton huaraonso': “Quëshico,” tēnin. Napoaton Saraiso', ina pëinëinquë quëpapi. <sup>16</sup> Sarai marë' huaraonso', Apran pa'pi payarin. Nani ma'sha topinan quëtërin. Ohuicaro'sa', ohuacaro'sa', camiyoro'sa', moraro'sa', inapita quëtërin. Naporahuaton piyapinënpita camaicaso marë' quëmapi'sa', sanapi'sa', quëtërin.

<sup>17</sup> Napoaponahuë', Sarai na'inin ni'ton, Yosëri huaraon ana'intërin. Sa'in, hui'ninpitare chachin chiniquën canio quëran ana'intërin. <sup>18</sup> Napoaton Apran amataton, itapon: “¿Onpoatonta napotëranco? ¡Iso sanapi sa'an nipirinhüë', sha'huichitonco pora! <sup>19</sup> ‘Oshihuë’ tēnanso marë', cari shimanahuë. ¡Ma'tana sa'an, macaton quëpaquë huachi!” itërin. <sup>20</sup> Napotahuaton piyapinënpita camairin: “¡Apran, sa'inë chachin ocoico pa'in. Ma'shanënpitanta quëpa'in!” itërin.

## 13

### *Apran, Notorë' nia'popiso'*

<sup>1</sup> Apranso sa'inë chachin Iquipito quëran pipirin. Ma'shanënpitarë chachin Niquipi parti huënantatona ya'huëinantapi. Apin Noto itopisonta', inarë chachin huënantarin. <sup>2</sup> Apranso', notohuaro' oro, prata, pë'tahuaro'sa', inapita ya'huëtaton pa'pi ma'huan. <sup>3</sup> Niquipi parti quëran oshaquëran pa'sápatona', Pitiri ninanoquë huarë' huënantapi. Ina quëran paantarahuatona', i'hua ya'huërinquë chachin ya'huëinantapi. Pitiri ninano', Ai ninano', inapita ninanoro'sa huáncana ya'huëinantapi. <sup>4</sup> I'hua artaro ninquë chachin, Siniro chinotaantaran. <sup>5</sup> Notonta', apin pochachin pa'pi ma'huan. Notohuaro' ohuicaro'sa', ohuacaro'sa', inapita ya'huëtërin. Piyapinënpitanta na'a ya'huëtërin. <sup>6</sup> Nipirinhüë', notohuaro' pë'tahua ya'huëtópi ni'ton, co huachi pasto nanirinhüë pë'tahuaro'sa capacaiso'. Napoaton co huachi nanitopihuë cato chachin inaquërachin ya'huëcaiso'. <sup>7</sup> Apran pë'tahuanën a'paipsisopita, Noto pë'tahuanën a'paipsisopitarë', pasto niapiratatona yánino'huipi. Naporoso', canano'sa', huirisiro'sa', inapitanta inaquë chachin ya'huërapi.

<sup>8</sup> Napoaton a'na tahuëri Aprani Noto itapon: “Canposo', quëmopinpo ninë'. Co campo capini nino'huicaso ya'huërinhuë'. Co piyapinënpopitanta', nino'huicaiso ya'huërinhuë'. <sup>9</sup> Niquë niquë nipachin, ya'huëa'a. Ni'quë'. No'paso panca ya'huërin. Insëquësona ya'huëcamaso marë' nohuanteranquë, quëma huayonquë'. Pë'natë parti huayonpatan, caso pëtëtë parti pa'sarahuë. Pëtëtë parti huayonpatan, caso pë'natë parti pa'sarahuë,” itërin. <sup>10</sup> Natanahuaton Notoso', motopia'hua quëran, Cortanii' yonsan noyarotomarinso nocorin. Sohuaro ninanoa'huaquë huarë' notërinso' icanin. Inaquëso', notohuaro' i' ya'huërin ni'ton, pa'pi noyaro'pa' ninin. Siniro sha'tërinquë pochin ni'ton, Iquipito no'pa' pochin ninin. (Ina pochin iráca ina no'pa' nipirinhüë', co'huara Siniro Sotoma,

Comora, inapita ninanoro'sa ata'huanchátërasohuë', naporin.) <sup>11</sup> Ina ni'sahuaton, Notoso ya'ipi ina no'pa' huayonin. Inaso no'pa', pi'i pipirinsó parti ya'huërin. Inapoatona', Apran Notorë' nia'popi. <sup>12</sup> Apranso', Canaan parti quëparitërin. Notoso', Cortanii' yonsan ninanoro'sa parti ya'huëconin. Sotoma ya'cariya ya'huëconin. <sup>13</sup> Inaquëso', ya'huëhuano'sa pa'pi co noyahuë' nipi. Inapoatona oshahuanpi ni'ton, Yosëri no'huípiro ni'nin.

<sup>14</sup> Noto pa'pachina, Siniorori Apran ya'notaton itapon: “Huaniran quëran ya'ipi parti notëtëquë': Pë'natë parti, pëtëtë parti, pi'i pipirinsó parti, pi'i ya'coninsó parti, ya'ipi inaquëpita notëton, noya ni'quë'. <sup>15</sup> Ya'ipi no'pa' ni'nanso', carinquën hua'anëntacaso marë' quëtaranquën. Quëmari hua'anëntomiataran. Naporahuaton, shiparinpitarinta hua'anëntomiatapona'. <sup>16</sup> Ca nohuanto shiparinpita pa'pi notohuaro' na'amiatapona'. Mo'shi co pichicasohuë' ninin. Inapochachin shiparinpitanta co onpo pichicasohuë' na'apona'. <sup>17</sup> Iporaso', paaton ya'ipi iso no'pa' pa'tëquë'. Itohua itohua pa'tëquë'. Carinquën quëtaranquën ni'ton, inapotëquë'” itërin.

<sup>18</sup> Ina natanahuaton, Apranso piyapinëpitarë chachin në'mëtë pëiro'sa ótënpiso mapi. Masahuatona', insina nararoquë pa'pi. Inaquë pa'sahuatona', ya'huëconpi huachi. Ina nararoso', Mamiri itopisoari hua'anëntërin. Ipron ninano ya'cariya inaso'. Inaquë Apran Sinioro chinotacaso marë' a'na artaro niantarin.

## 14

### *Aprani Noto nicha'ërinso'*

<sup>1</sup> Naporo' Misopotamia parti: Sinaro ro'tëquë, Amarahuiro itopiso' copirno nisarin. Irasaro ro'tëquënta', Arioco itopiso copirno nisarin. Iran ro'tëquëso nikipirinhüë', Quitaraomiro itopiso copirno nisarin. Coimo ro'tëquënta', Titaro itopiso copirno nisarin. <sup>2-3</sup> Inapitaso', isopita a'natërápo copirnorosarë', niinimicotatona niahuërápi: Pira, Pirsá, Sinapo, Simipiri, inapita itopisoarë' niahuërápi. Piraso', Sotoma ninano copirno. Pirsanta Comora ninano copirno. Sinaposo nikipirinhüë', Atoma ninano copirno. Simipirinta Sipoin ninano copirno. Pira ninanoa'hua copirnonta', inapita catahuarin. (Pira ninanoa'huaso', Soaro itopi anta'.) Inapitarë', a'natërápo copirnorosá', Sitin motopiana itopiquë, sontaronënapita yontonpi ahuëtacaiso marë'. Inaso motopiana, Chimirii' marë parti quëparitërin. <sup>4</sup> Ina nápo copirnorosá chachin Quitaraomirori iráca canaton, shonca cato pi'ipi camairin. Napoaponahuë', ina pi'i niantarinquë a'natërápo copirnorosaso napopináchin yonquiatona', Quitaraomiro yaahuëpi huachi. <sup>5</sup> Ina pi'i huëantarinquë Quitaraomiroso', cara copirno catahuarinsopitarë chachin, huëantarin. Asotaroto Carnain parti huë'sahuatona', nihuaimoro'sa canaipi. Ina quëran sosiro'sa ya'huërë', An ninanoquë ya'huëpisopita canaantapi. Imiro'santa', Sapi-quiritain ninanoquë canaantapi. <sup>6</sup> Orioro'santa Sëir motopiro'saquë canatona', Ir-paran ninanoquë huarë' imapi. Ina ninanosó', inotëro intonquë ya'huërin. <sup>7</sup> Quitaraomiroso cara copirno catahuarinsopitarë chachin tahuërëantarahuatona', In-mispa ninanoquë canquipi. Ina ninanosó', Catisë itopi anta'. Huëantapona pochin amaricoro'sa ya'huërinso parti tiqitëriapi. Naporahuaton amororo'santa', Asison-tamarquë ya'huëpisopita inapotopi.

<sup>8-9</sup> Naporiatona', Sitin motopianaquë canquipi huachi. Naporo' Sotoma, Comora, Atoma, Sipoin, Pira, inapita ninanoro'sa copirnonënasó', inaquë pa'mapi. Sontaronënapitarë chachin pa'mapi. Inaquë inapita a'natërápo copirnorosaso', Quitaraomiro, catahuarinsopita, inapitarë' niahuëpi huachi. <sup>10</sup> Ya'ipi Sitin motopianaquë, notohuaro' to'ni pochin nininsó' posoro'sa ya'huërin. Naporo' quira nipachinara, Sotoma, Comora, inapita copirnorosá', piyapinënapitarë chachin ta'api. Ta'apirinahuë', ina posoro'saquë anotopi. A'napita cara copirnorosaso nikipirinhüë', motopiro'sa ta'atopi.

11 Canatoro'saso', Sotoma, Comora inapita ninanoro'saquë ya'conpi. Inaquë ya'conatona', cosharo', ma'sharo'sa pa'ton nininsopita, inapita ya'ipi macatona quiquipi. 12 Sotomaquë, Apran apin Notonta', ya'huërin ni'ton, inanta quëpapi. Ya'ipi ma'shanënpitarë chachin quëpapi. 13 Napoaponahuë', a'nara quira quëran cha'ërahuaton, Apran sha'huitapon pa'nin. (Apranso', iprio\* piyapi itopi.) Naporo' inaso', Mamiriri hua'anëntërinso insina nararoquë ya'huërarin. Mamiriso', amoro piyapi. In mashonënpitaso': Aniri, Iscoro, inapita. Inapitaso' Apran payatona', catahuapi.

14 Apranso apin quëpapiso natantahuaton, piyapinënpita natëtono'sa nipiso huayonin. Inapitaso', pëinënuë chachin hua'huatatona so'sopiso'. Ayontonpachina, cara pasa shonca posa quëmapi'sa ya'ipiya quëran icanpi. Inapitarë', Apran pa'nin copirnoros' imacaso marë'. Tano ninanoa'huaquë huarë' imarin. 15 Pa'sahuatona', inimicoro'sa quënanconpi. Yono tashi nisahuaso', ya'copirahuatona', ahuëpi. Copirnoros' canarahuatona', imapi. Opa ninanoquë huarë' imapi. Ina ninanoso', Tamasco ninano quëran norti parti quëparitërin. 16 Inapoatona', ya'ipi ma'sha quëpapiso' matopi. Notonta nicha'ërahuatona', ya'ipi ma'shanënpitanta quëpatopiso', mataantarin. Naporahuaton, na'a piyapiro'sa nicha'ërin. Sanapi'santa quëparapirinahuë', nicha'ërin.

### *Miriquisori Apran nacapirinsos'*

17 Apranso' Quitaraomiro canarin. Cara copirno catahuarinsopitarë chachin canarin. Inapita canarahuaton huënantarin. Huëntaso', Sotoma copirnoros' nacapirin. Sapi motopianaquë nacapirin. Inaso', "copirno motopiana," itopi anta'. 18 A'na copirnorinta', Apran nacapirin. Inaso', Miriquiso itopi. Sarimoquë copirno ya'conahuaton, corto hua'an nimantarin. Yosë chini chiniquën nanantërinso marë' sacatërin. Inaso Apran a'carahuaton, huinonta o'shitërin. Piyapinënpitanta', a'carin, o'shitërin, napotërin. 19 Nani a'carahuaton, Miriquisori Apran iso pochin sha'huitërin:

“Yosë chini chiniquën nanantërinso', catahuainquën.

Inaso', pi'iro'të', isoro'pa', inapita acorin.

20 ¡Ma noyacha Yosëso chini chiniquën nanantërin paya! itahua'.

Ina nohuanton, inimiconënpita minsëran,” itërin.

Naporo Aprani inimicoro'sa ma'sha matërinso', shonca quëran a'nara Miriquiso quëtërin. Inaso', diesmo itopi.

21 Ina piquëran Sotoma copirnoros', Apran itapon:

—Piyapi'sara' quëtoco, ya'huëre' ma'shaso', quëmari maquë', itërin.

22-23 Napotopirinhuë', Apraniso' itapon:

—Yosë chini chiniquën nanantaton, pi'iro'të', isoro'pa', inapita acorin. Ina ni'sárinco ni'ton, co pi'shi tëranta', co sapatë nonin tëranta caora marë' macapohuë': “Cari, Apran ama'huanahuë.” Ama tëcamaso marëhuë', co macapohuë'. 24 Caso caora marë' co manta nohuantërahuë'. Piyapinëhuëpita ca'pisoíchin tëhuëchinso', nani matatë pochin nitëranquën. Naporahuaton, Aniri, Iscoro, Mamiri, inapitanta ahuëta'huaso', catahuari-naco. Inapita tëhuëchinso' ma'sha mapiso', onpopionta macacaiso ya'huërin, itërin.

## 15

### *Yosë, Apranë anoyatërinso'*

1 Ina piquëran Siniorori, Apran ya'notërin. Co huë'ëponahuë', hua'narëso pochin nontërinso' natanin:

—Apran, ama të'huaquësohuë', carinquën pa'poyaranquën. Panca acanamiataranquën, itërin. 2-3 Napotopirinhuë', Apraniso' itapon:

\* 14:13 Iprioso': Nisha nisha taponna ina pochin nohuitopi. Co nitotërehuahuë' ma'chachinsona tapon napopiso'. A'naquënso': “Ipiri shinpita ni'ton, nopo nohuitopi,” topi.

—Sinioro. Quëmaso Yosënguën. Panca acanamiatopirancohuënta', co hui'nahuë ya'huëtërincohuë' ni'ton, topinan quëran nisarin. Co a'naya tëranta hui'nahuë quëtërancohuë ni'ton, piyapinëhuë Irisëro itëraiso ya'huërëtaPONCO. Inaso Tamasco piyapi nipirinhüë', chiminpato ya'huërëtaPONCO, itërin. <sup>4</sup>Siniororiso nipirinhüë', itapon:

—Co ina ya'huërëtaPONQUËNHÜË'. Hui'nAN chachin ya'huërëtaPONQUËN, itërin.

<sup>5</sup>Itahuaton, në'mëtë pëinën quëran ocoirin. Ocoirahuaton, sha'huitërin:

—Pi'iro'të në'përahuaton, tayloraro'sa pichiquë'. Nanitohuatan pichiquë'. Ina nápo shiparinpita ya'huëtërinquën, itërin. <sup>6</sup>Naporinso natanahuaton: “Yosë no'tëquën nontërinco,” tënin Apran. Naporinso marë' Siniorori nóya ni'nin huachi. <sup>7</sup>Napoaton itapon:

—Caso Sinioroco. Orë ninano quëran ocoiranquën. Inaquëso cartiaro'sa ya'huërin. Iso no'pa' quëtëranquën hua'anëntomiatacaso marë', itërin.

<sup>8</sup>—¿Onporahuatota hua'anëntomiata'huaso nitotapo? tënin Apran.

<sup>9</sup>—A'nara ohuaca', a'nara capra, a'nara carniro, inapita cara pi'ipitopiso' quëshico. Naporahuaton, a'nara nëpë', a'nara pë'tahua nëpëa'hua', inapitanta quëshico, itërin Yosëri. <sup>10</sup>Aprani, inapita ma'sharo'sa Yosë quëshirin. Tëparahuaton huancánachin nichatëra'piarin. Nichatërin SOPITA, cato panshinquë ya'carísha acorahuaton, anotëra'piarin. Inairaro'saso nipirinhüë', co nichatërinhuë'. <sup>11</sup>Ma'sha tēparinsopita, capita marë' tamëro'sa o'mapirinahuë', Apraniso a'parárin.

<sup>12</sup>Nani tashiahuachina, Apranso' noyá huë'ëtërin. A'nanaya pa'pi tashirori imotërin ni'ton, tē'huatërin. <sup>13</sup>Naporo' Siniorori itapon:

—A'na tahuëri shiparinpita, nisharo'sataquë yacapatapona'. Inaquë piyapitatona', camaiyapona'. Aparisitapona'. Catapini pasa pi'i inapoapona'. <sup>14</sup>Cariso nipirinhüë', aparisitërin SOPITA ana'intarahüë. Ina piquëran shiparinpita, noya cha'ëpona'. Ma'huano'sa pipipona'. <sup>15</sup>Quëmaso nipirinhüë', noyá mashoya nicama huarë' chiminapon. Co parisitaranhuë'. Inapoaton shimashonënpita quënancoanan. <sup>16</sup>Catapini shinpita huënton, ya'huërin piquëran, shiparinpita isëquë chachin huëntapona'. Amororo'sa co noyahüë' nipiso', co aquëtë huarë' nishatërarinhüë'. Napoaton naporo tahuëri'sa huarë' ana'intarahüë huachi.

<sup>17</sup>Nani tashihuachina, a'nanaya orno conai' tomontárinso ya'norin. Naporahuaton, panca yanatëtë pochin pën orótahuaton, ma'sharo'sa nichatërin SOPITA huáncana, na'huërin. <sup>18</sup>Naporo tahuëri chachin, Sinioro Apranë anoyatërin. Anoyataton itapon:

—Shiparinpita iso no'pa' quëtërahuë: Iquipito i' quëran huarë' Iopiratisii' pancai'pa', hua'anëntopiso naniarin. <sup>19-21</sup>Iporaso': Quiniro'sa', sinisëro'sa', catomono'sa', itiro'sa', huirisëro'sa', nihuaimoro'sa', amororo'sa', canano'sa', quiriquiro'sa', quiposoro'sa', inapitari iso no'pa' hua'anëntapi. Hua'anëntapirinahuë', quëma shiparinpita quëtërahuë, itërin.

## 16

### *Ismairo nasitërinso'*

<sup>1</sup>Sarai co hua'huana'pihuë ni'ton, co Apran hui'nahuaninhüë'. Napoaponahuë', Saraiso a'nara cosonanën ya'huëtërin. Inaso iquipitoron. Acara itopi. <sup>2</sup>A'na tahuëri Saraiso', so'in itapon:

—Ni'quëchi, Sinioro co nohuantërinhuë ni'ton, co hua'huanahuë'. Napoaponahuë', cosonanëhuë acoanchinquën topirahuë. Tapon a'inaso', hua'huana'pi nisápirinhüë'. Hua'huana'pachin cari masarahüë hua'huahuë pochachin nicacaso marë', itërin.

Napotohuachina, Apranta nohuantërin. <sup>3</sup>Naporo chachin Saraiso', Acara masahuaton, so'in acoantërin. Nani shonca pi'ipi Canaan parti ya'huapona pochin, napoapi. <sup>4</sup>Shiarahuaton Acaraso', cayorin huachi. Inaporahuaton, hua'anën nocanin. Nocanaton, co yanatërinhuë'. <sup>5</sup>Naporo' Sarairi Apran itapon:



—Quëma tēhuëran ni'ton, Acara nocaninco. Cari chachin acoantopiranquēnhuë', iporaso' hua'huanaton, nocaninco huachi. Sinioro chachin inquēnposona tēhuërëso' anitochinpo': Quëma tēhuëmaranquēn, ca a'na napomaraco, itërin. <sup>6</sup> Napotohuachina, Apraniso' itapon:

—Ni'quë', cosonanënso', natëinquënso ya'huërin. Ma'sona nohuantëranso' nitëquë', itërin.

Naporo quëran huarë' Saraiso', Acara pa'pi aparisitërin. Napoaton, inaso ta'arin huachi. <sup>7</sup> Ta'apirinhue', Sinioro anquëninëni\* inotëro parti quënanin. Shor iraquë i'sha pipirinsó' ya'cari', quënanin. <sup>8</sup> Quënanahuaton, natanin:

—Quëmaso' Acaranquën, nohuitëranquën. Sarai cosonanënquën. ¿Intoparanta huëcaton, intopata pa'saran? itërin.

—Patronanëhuë Sarai itopiso' ta'ananpiarahue', tënin Acara. <sup>9</sup> Naporo' Sinioro anquëninëni, itapon:

—Naquëranchin patronanën paapantaquë'. Ma'sona camairinquënsopita, natëquë', itërin. <sup>10</sup> Napotahuaton itaantarín:

“Ca nohuanto, hua'huayátërahuë amiparinpita ya'huëtarinquën.

Co pichicasohuë' na'apona'.

<sup>11</sup> Ipora cayoranso', quëmapia'huaya huaiyaran.

Huaihuatan, Ismairo itëquë'.

Co napion ancantaton na'nëranso',

Sinioro nataninquën ni'ton, ina nininën acotëquë'.

<sup>12</sup> Mashotohuachin, tanan cahuario pa'pi notëraya pochin nizarin.

Ya'ipiya inimicotarin. Inanta', ya'ipiya quëran, inimicotapona'.

Quëmopinënpitari co quë'yapirinhue',

inahua notënanquë chachin ya'huapon,” itërin.

<sup>13</sup> Siniorori nontërin ni'ton, Acaraso' pa'yanëinquë tapon: “¿Yosë chachin nontaparahue' co chiminahuë ti?” tënin. Ina yonquiaton, iso pochin Sinioro nohuitërin: “Nicatonco, catahuarincoso Yosë,” itërin. <sup>14</sup> Napoaton inaquë poso ya'huërinsona', “Nanpiton, ni'sárinco'so' posonën,” itopi. Ina pososo', Catisë ninano', Piriti ninano', inapita ninanoro'sari ahuanapanirin. <sup>15-16</sup> Acaraso' anquëni natërahuaton, patronanëinquë chachin paantarín. Tahuëri nanihuachina huairin. Apran posa shonca saota pi'ipitaso', hui'nin nasitarin. Nasitohuachina, Ismairo itërin.

## 17

### *Marca niacotacaiso' camaitërinso'*

<sup>1</sup> Apran iscon shonca iscon pi'ipitaso', Siniorori ya'notahuaton, itapon:

—Caso Yosëco, ya'ipi nanitaparahuë. Natëtonco, nohuantërahuësoráchin niquë'.

<sup>2</sup> Napohuatan, quëmarë'co anoyatarahuë. Ca nohuanto, hua'huayátërahuë shiparinpita ya'huëtarinquën, itërin. <sup>3</sup> Naporo' Apranso', isonin. Isonin quëran, no'paquë huarë' monshomarin. Inapoaso Yosëri sha'huitaantarín:

<sup>4</sup> —Ni'quë', iso pochin quëmarë'co anoyatarahuë. Quëmá quëran na'a naciono'sa pipiarin. <sup>5</sup> Naporahuaton, co huachi Apran itaponënhue'. Ipora quëran huarë' Apraan itaponën. Ca nohuanto na'a naciono'sa quëmá quëran pipipona ni'ton, ina pochin nohuitaponën. <sup>6</sup> Carinquën catahuaranquën ni'ton, notohuaro' shiparinpita ya'huëtarinquën. A'naquën shiparinpita, copirno ya'conapona'. A'naquëonta', naciono'sa ocoiapona'. <sup>7</sup> Quëmarë'co ipora nani anoyatërahuë. Shiparinpitarë'conta a'na tahuëri anoyatarahuë. Yosëncó ni'to, catahuaráponquën. Shiparinpitanta inapotápo.

\* **16:7** Sinioro anquëninën topachina: Yosë chachin tapon naporin.

<sup>8</sup> Ya'ipi Canaan no'pa' ipora ya'huëranquë, hua'anëntacaso marë' quëtaranquën. Shiparinpitanta iso no'pa chachin hua'anëntomiatapona'. Inapitanta', casáchin chinotaponaco, itërin.

<sup>9</sup> Napotahuaton, taantarín:

—Napoaponahuë', quëmarë'coso nani anoyatërahuë ni'ton, natëco. Inapochachin shiparinpitanta natëinaco. <sup>10</sup> Ina pochin canpitarë'co anoyatërahuë. Canpitanta anoyatërehuaso yonquicamaso marë' ya'ipi quëmapinquëma', marcahuanamaso ya'huërin. Naporahuaton, ya'ipi shiparimapitanta inachachin natëina'. <sup>11</sup> Taparonëmaquë, sha'huëchin imorayatërinso', niyashitëtoco'. Inaporamaso', ayonquiarinquëma carë'quëma anoyatëramaso'. <sup>12</sup> Ipora quëran huarë' ya'ipi quëmapinquëma ninamasopita, nasitërin quëran posa tahuëritapaso', marcanën acotoco'. Hui'namanta', inapotoco'. Piyapinëma nisharo'sa pa'antëramasonta inapotoco'. <sup>13</sup> Ya'ipinquëma niacotacaso ya'huërin. Co a'naya tëranta topinan nicamaso ya'huërinhuë'. Inapohuatama', canpitarë'co anoyatërahuëso', nonëmaquë chachin chiminamaquë huarë' ya'huëápon. <sup>14</sup> Nipirinhuë', insosona co marcanën niacotohuachinhuë', ya'huërama quëran ocoimiatoco'. Canpitarë'co anoyatërahuëso', co natërinhuë ni'ton, inapotoco', itërin.

<sup>15</sup> Naporo chachin, Yosëri Apraan itaantarín:

—Sa'aonta' Sarai itopiramahuë', co huachi inapochin nohuitaramahuë'. Ipora quëran huarë' Sara\* itapoma'. <sup>16</sup> Inanta noya nicato catahuararahué ni'ton, hua'huanarin huachi. Tëhuëenchachin cari noya nicato inapotarahuë. Na'a naciono'sa', ina quëran pipipona'. Ina quëran pipipisopita a'naquënso', copirno ya'conapona', itërin.

<sup>17</sup> Napotohuachina, Apraanso isonin. Isonin quëran no'paquë huarë' monshorahuaton tëhuarin. Tëhuapon pochin yonquirin: “¡Pasa pi'ipitohuachinara, co huachi hui'nahuanpihuë'! ¡Saranta iscon shonca pi'ipitaton, co huachi onporonta nanitërinhuë hua'huanacaso'!” tënin yonquinënuë. <sup>18</sup> Napoaton iso pochin Yosë nontërin:

—¡Ma'cha Sinioro sha'huitërancoso chachin Ismairo catahuaranhuë paya! itërin.

<sup>19</sup> Yosëriso nipirinhuë', itapon:

—Sa'anquë chachin hui'nahuanaran ta'to, napotaranquën. Hui'nan nasitohuachin, Isaco† itaran. Quëmarë'co anoyatërahuëso', inanta sha'huitarahué. Sha'huitërahuëso chachin, shinpitanta catahuamiatarahuë. <sup>20</sup> Ismairo marënta nontërancoso', nani natananquën. Inanta catahuarahuë. Ca nohuanto na'a hui'ninpita ya'huëtapon. Ina quëran pipipisopita na'amiatapona'. Shonca cato hua'ano'sa nicacaiso' hui'nahuanapon. Ina shinpita quëran panca nacion pipipon. <sup>21</sup> Napoaponahuë' quëmaro'co anoyatato sha'huitëranquënsopitaso', Sara hua'huinguën nisarin. A'na pi'i quëran, ipora tahuëri'sa pochin, Isaco nasitapon, itërin. <sup>22</sup> Apraan nontërinso tonitahuaton, Yosëso ina quëran pa'nin huachi.

<sup>23</sup> Naporo tahuëri chachin Apraanso', hui'nin Ismairo itërinso marca acotërin. Piyapinënpita pëinënuë chachin nasitopisonta', inapotërin. A'napitanta coriquinën quëran pa'aninso', acotërin. Ya'ipi quëmapi'sa Apraan pëinënuë ya'huëpisopita, marca niacotopi huachi. Yosë camaitërinso chachin nipi. <sup>24-25</sup> Apraan iscon shonca iscon pi'ipitaso', taparonën sha'huëchin yashitëtopi. Ismaironta shonca cara pi'ipitaso', inapotopi. <sup>26-27</sup> Naporo tahuëri chachin ya'ipi quëmapi'sa nipisopita marca niacotopi. Apraan, Ismairo, inapita niacotopi. Piyapinënpitanta inapopi. A'naquën pëinënuë chachin nasitopi. A'naquënso', coriquinën quëran nisharo'sa pa'antërin. Ya'ipiya niacotopi huachi.

## 18

### *Sara hua'huanacaso sha'huitërinso'*

\* **17:15** Saraso': Copirno hui'nin tapon naporin. † **17:19** Isacoso': Tëhuarinso' tapon naporin.



<sup>1</sup> Insina nararo', Mimiriri hua'anëntërinquë Apraan ya'huëarin. Inaquë niso', Siniorori, ya'notaantarín. Camotëchin pochín nisapaso' ya'notërin. Në'mëtë pëinën ya'coananëinquë huënsaso', napoarin. <sup>2-3</sup> Apraanso ni'pirinhuë', cara quëmapi ina notënanquë huaniapi quënanin. Quënanahuaton, a'naroáchin paaparin nontacaso marë'. Isonin quëran no'paquë huarë' monshorahuaton, itapon:

—Sinioro, pi'pian yanontëranquën. Ama na'huëtocosohuë'. <sup>4</sup> Canpita topatama', nipa'morantëcamaso marë' piyapinëhuë i'sha quëshiniquëma'. Inapoatoma', nara tashinantërinquë, na'yapoma pochín, chinototaco'. <sup>5</sup> Ya'huërahuëtaquëchin na'huëarama ni'quëhuarë', ma'sha tëranta capamaso quëshiniquëma'. Ina quëran chiníquën cancantatoma', paantamaso marë', itërin.

—Naporan ni'quëhuarë', inta nipachín, itopi.

<sup>6</sup> Napotohuachinara, Apraanso në'mëtë pëinëinquë ya'conahuaton, Sara itapon:

—Manorahuaton, cato shonca quiro pochín, noya noya tricoro'mo nininso' maquë'. Ina masahuaton, pan niquë', itërin. <sup>7</sup> Sa'in sha'huitahuaton, ta'arë'nachín ohuacaro'sa ya'huarinquë pa'nin. Noya noya nininso' toroa'hua huayonin. Huayonahuaton, a'nara piyapinën quëtërin. Quëtohuachina, inaso' tëparahuaton a'naroáchin capacaiso marë' anpirin. <sup>8</sup> Ina a'capon pochín, ohuaca sho'shoi' atachirotopisonta', acotërin. Naporahuaton ohuaca sho'shoi' o'shitërin. Inapoaton, a'capon pochín ninararin pahuantohuachina acotacaso marë'. Ni'toro'sa nara tashinantërinquë coshatasoí naporin.

<sup>9</sup> Nani coshatohuachinara, ni'toro'sari Apraan natanpi:

—¿Sa'ampo huachi? itopi.

—Ma'tana në'mëtë pëi acoana ya'huëarin, itërin. <sup>10</sup> Naporo' a'nari itapon:

—A'na pi'i quëran, nicaponquën huëantarahuë. Naporo' Sara hua'huanaton, hua'huin ipoarin huachi, itërin.

Napoasoí Saraso', ya'ipi nonpiso' natanárin. Apraan pinën quëran, në'mëtë pëi acoana, ya'coana pirayan natanárin. <sup>11</sup> Apraan, Sara, inapitaso nani mashotopi. Saraso yaniton, co huachi onpo hua'huanchináchinhuë', ninin. <sup>12</sup> Ina yonquiaton, co huachi huina cacotatonhuë', tēhuarin huachi. Tēhuapon pochín, yonquirin: “Inaporahuë naporini, noya cancanchitohuë'. Napoaponahuë', catocoi chachín nani mashotërai ni'ton, co quiyaso inapoasocoihuë' ayapoí,” tēnin yonquinëinquë.

<sup>13</sup> Siniororiso nipirinhüë', Apraan itapon:

—¡Sara co tēhuacasohuë nipirinhüë', tēhuarin! “Nani paiyaco” ta'ton, ¿co natëtërinhuë' hua'huanacaso ti? <sup>14</sup> ¡Caso Sinioroco ni'to, ya'ipi nohuantërahuëso' nanitaparahuë nica'huaso'! A'na pi'i quëran, nicaponquën huëantarahuë. Naporo' Sara hua'huanaton, hua'huin ipoarin huachi, itërin. <sup>15</sup> Sinioro naporinso natanaton, tē'huanëinquë Saraso tapon:

—Co tēhuarahuë', tēnin. Napoaponahuë', Siniorori itapon:

—Naporiranhuë', tēhuaranso' nitotërahuë, itërin.

### *Sotomaro'sa marë' Yosë nontërinso'*

<sup>16</sup> Nani coshatohuachinara, paantacaiso marë' ni'toro'saso' huanipi huachi. Sotoma ninanotaquëchin pa'sahuachinara, Apraani chi'yarín. Nontaton patacaso marë' chi'yarín. <sup>17-18</sup> Papon pochín, Sinioroso' yonquiraarín. “Apraan quëran a'na tahuëri panca nacion pipiarín. Naporahuaton ina nacionso', chiníquën nanantarín. Napoaton ma'sona yaninahuëso', sha'huita'huaso ya'huërin. Nani sha'huitërahuë ya'ipi naciono'sa isoro'paquë ya'huërin sopita, ina quëran catahua'huaso marë'. <sup>19</sup> Nani ina huayonahuë hui'ninpita, shinpita, inapita noya pënënacaso marë'. A'chintërahuësopita natëtona', noya nicacaiso marë' pënënarín. Inapohuachín, sha'huitërahuëso chachín quëtarahuë huachi,” tēnin yonquiaton. <sup>20</sup> Napoaton, Siniorori itapon:

—Sotomaquë, Comoraquë, inaquëpita ya'huëpisopita, panca oshahuanpi. Inapoatona pa'pi co noyahuë' nahuinpi. <sup>21</sup> Napoaton inatohua pa'sarahuë. ¿Sha'huitërinacoso chachin ta'ma nisapi? ta'to, nitota'huaso marë' pa'sarahuë.

<sup>22</sup> Cato ya'piso quëchitahuatona', Sotoma ninanoquë pa'pi. Apraanso nipirinhüë', Siniororë' ninontacaso marë' quëparitërin. <sup>23</sup> Napoaton ya'carirahuaton, natanin:

—Tëhuëpisopitaso' no'tëquën chachin ata'huantamaso ya'huërin. Co tëhuëpisopitasohüë' nipirinhüë', co inapotamaso ya'huërinhuë'. <sup>24</sup> Tapona a'natëräpo shonca ya'pi', co tëhuëpisopitasohüë' ninanoquë ya'huëpi. Ina nápo ya'huëpiso yonquiaton: ¿Co ninano nicha'ësarahuë'? <sup>25</sup> ¡Ama Sinioro napoquëssohuë'! ¡Tëhuëpisopita, co tëhuëpisopitahuë' co napopináchin oshahuanpiso pochin ana'intamaso ya'huërinhuë'! ¡Ama napoquëssohuë'! ¡Quëmaso', noya noya coisë ya'ipi isoro'pa' marë' ninan ni'ton, no'tëquënáchin ana'intamaso ya'huërin! itërin. <sup>26</sup> Napotohuachina, Siniorori itapon:

—A'natëräpo shonca co tëhuëpisopitahuë', Sotoma ninanoquë ya'huëhuachin, inapita nosoroato ya'ipi ina ninanoquë ya'huëpisopita nicha'ësarahuë, itërin. <sup>27</sup> Apraaniso nipirinhüë', naquëranchin nontaantarin:

—Quëmaso Yosënuën, caso topinan piyapico niporahuë', naquëranchin nontaanta'inquën. Ama ina marë' no'huicosohüë'. <sup>28</sup> Catapini shonca a'natëräpora' co tëhuëpisopitahuë' nanihuachina', a'natëräpo pahuaninso' marëáchin, ¿ya'ipi Sotomaquë ya'huëpisopita, ata'huantapon ti? itërin.

—Catapini shonca a'natëräpo tëranta co tëhuëpisopitahuë' ya'huëhuachina', co ninano ata'huantarahuë', itërin.

<sup>29</sup> —Tapona catapini shoncara', co tëhuëpisopitahuë' ya'huëpi, taantarin Apraan.

—Ina napoya tëranta ya'huëhuachinaso', co ata'huantarahuë', tënin Yosë. <sup>30</sup> Apraaniso nipirinhüë', naquëranchin Yosë nontaantarin:

—Inachin inachin nontápiranquënhüë', ama ina marë' no'huicosohüë' topirahuë. Tapona cara shoncara' ya'huëpi, itërin.

—Cara shoncaya tëranta ya'huëhuachina', co ata'huantarahuë', itërin.

<sup>31</sup> —Tëhuënhachin caso Sinioro co natantonhuë pochin nontáranquën. Cato shoncara', co tëhuëpisopitahuë' ya'huëhuachina': ¿Onpoaranta'? itaantarin.

—Cato shoncanta co tëhuëpisopitahuë' ya'huëhuachina', co ninano ata'huantarahuë', itërin Yosëri.

<sup>32</sup> Apraani naquëranchin nontaantarin:

—Iporaíchin Sinioro nontaantaranquën. Ina quëran co huachi apiponquënhüë ni'ton, ama no'huicosohüë'. Shoncaíchin co tëhuëpisopitahuë' quënanpatan: ¿Onpoaranta'? itërin. Napotohuachina, Siniorori itaantarin:

—Shoncaya tëranta co tëhuëpisopitahuë' ya'huëhuachina', co ninano ata'huantarahuë'.

<sup>33</sup> Apraan nontërinso toquitahuaton, Sinioroso pa'nin huachi. Apraanta', në'mëtë pëinënquë'pa' panantarin.

## 19

### *Sotomaro'sa', Comoraro'sa', inapita ata'huantërinso'*

<sup>1</sup> Nani yatashirahuaso', cato anquëniro'saso Sotoma ninanoquë camapi. Ninano ya'coanaquë chachin Noto huënsaso', camapi. (Inaquë ya'huëhuano'sa niyontonpi ma'sha yonquiatona anoyatacaiso marë'.) Cato ya'pi canquipiso quënanahuaton, paa-parin nontapon. Isonin quëran no'paquë huarë' monshorin. <sup>2</sup> Monshorin quëran itapon:

—Caso siniororo'sa piyapinëma pochinco. Huëco pëinëhuëquë onpopionta huë'ëcamaso nohuantoco'. Inaquë nanitërama nipa'morantëcamaso'. Tashiraya yapa'patama paan-taco', itërin. Napotopirinhüë', inapitaso co nohuantopihüë'.

—Naporinchi paya. Napopiranhüë' co nohuantëraihüë'. Caniquë tëranta noya huë'ëpoi, itopi. <sup>3</sup> Napotopirinhüë', Notori naquëranchin naquëranchin sha'huito huachina, napoin

quëran pëinëncuë pa'pi huachi. Canconpachinara, noya cosharo nitërin. Pan co ahuëpocatopinahuë' anpitarë' acotohuachina, ni'toro'sa coshatopi huachi.

<sup>4</sup> Napoaponahuë', co'huara chinohátërasoihuë' ya'ipi ya'huëhuano'sari Noto pëinën tancapitopi. Hui'napiro'sa quëran, mashoro'saquë huarë' yamoipi. <sup>5</sup> Noto no'huitona', chiníquën nontiipi:

—¡Quëmapi'sa pëinëncuë canquipiso! ¿Intopata ya'huapi? ¡Ocoiquë tēcari'! itopi. <sup>6-7</sup> Naporo' Notoso' pëinën noyá oncotahuaton, inapita nontapon pipirin.

—Ama iyaro'sa napocosohuë', pa'pi co noyahuë' yonquirama'. <sup>8</sup> Cato hui'nahuëpita nano'sa co quëmapi sè'huayátërarinsohuë', ya'huëtërinco. Inapita nipachin ocoichinquëma', nohuantëramaso' nitoco'. Isopita quëmapi'saso nipirinhue', ama napotocosohuë'. Cari përarahuë pëinëhuëquë ya'conquipi ni'ton, napotaranquëma', itërin. <sup>9</sup> Inapitariso nipirinhue', itapona':

—¡Po'shaquë quëmaso! Nisha piyapinquën niponahuë', ¿yacamairancoi ti? ¡Iporaso huachi inapita quëran na'con na'con, quëma nitarainquën! itopi. Napotatona', Noto ahuërapí. Pëinën ya'coananta', yapaparapitopi huachi. <sup>10</sup> Napoaponahuë', ni'toro'sari Noto mapi. Masahuatona', acoana po'mopi. Napotatona', ya'coana oncotaantapi. <sup>11</sup> Naporo chachin piyapiro'sa aipiran nisapisopita, a'naroáchin asomarayapi huachi. Hui'napiro'sa quëran, mashoro'saquë huarë' ya'ipi somarayapi. Ina nipirinhue' tëranta', amiai huarë' ya'coana yonípi.

<sup>12</sup> Naporo' ni'toro'sari, Noto itapona':

—¿Ya'huëtërinquën aquëtë huarë' quëmopiro'sa isëquë? Hui'nanpita quëmapi'sa', sanapi'sa', mi'sëro'sa nicacaiso nipsisopita ya'ipi inapita, iso ninano quëran ocoiquë'. Ocoiaton áquë quëpaquë'. <sup>13</sup> Iso ro'të ata'huantarai ni'ton, quëpaquë'. Iso ninanoquë pa'pi co noyahuë' nípiso', na'a piyapi'sari Sinioroquë sha'huirapipi. Napoaton, ata'huanta'huaiso marë' a'parincoi, itopi.

<sup>14</sup> Napotohuachinara, Notoso mi'sënpita nicacaiso nipsisopita sha'huitacaso marë' pa'nin:

—¡Manóton huëco pa'ahua! Iso ninano quëran pipia'ahua'. ¡Siniorori iso ninano ata'huantarai ni'ton, huëco pa'ahua! itërin. Itopirinhue', co natëpihuë'. <sup>15</sup> Nani tahuëri ya'cari nipachina, anquëniro'sari Noto itapona':

—¡Pashi tēquë! Sa'an, cato hui'nanpita, inapita masahuaton, iso ninano quëran ocoiquë huachi. Ninano ata'huantëraiquë, chimintama'. <sup>16</sup> Napotopirinhue', Notoso' co manorinhue' ni'ton, Yosëri nosoroaton, yanicha'ërin. Napoaton anquëniro'sari, sa'inë chachin maimirarin. Hui'ninpitanta maimirarahuatona', ninano quëran cha'ëcaiso marë' ocoipi.

<sup>17</sup> Ninano quëran nani pipihuachinara, a'na anquëniro itapon:

—¡Cha'ëcamaso marë' manóton ta'aco! Ama pinëma parti tahuëre'cosohuë'. Pa'mia paco'. Ama ma'sha marë' tëranta iso motopianaquë chinicosohuë'. Cha'ëcaso nohuan-tohuatama', motopiro'sa parti ta'aco', itërin. <sup>18-19</sup> Notoriso nipirinhue', itapon:

—¡Co Siniororo'sa topirahuë! Tëhuëncachin canpitaso', na'con catahuaramaco huachi. Noyanquëma ni'ton, nicha'ëramaco. Napoaponahuë', motopiro'sa parti ta'aca'huaso', co nanitarahuë'. Huancoipi ni'soi', ayaro' icantatoncoi tiquihuachincoi. <sup>20</sup> Ni'co', pasëyáquë a'na ninanoa'huaya ya'huërin. Inaquë tëhuëncinso' noya paca'huaiso' topirahuë. Nohuantoco inaquë pa'i cha'ëca'huaiso marë'. ¿Co'ta inaso', co panca ninanoyahuë? itërin. <sup>21</sup> Napotohuachina a'na anquëniro itapon:

—Nani natananquën nontërancoso'. Nohuantëranso chachin nisarahuë. Co ina ninanoso', ata'huantapohuë'. <sup>22</sup> Napoaponahuë', ¡manóton inatohua paco! Inatohua canama huarë' Sotoma ninano ata'huantarai huachi. Napoaton ina ninanoso', Soaro\* itopi. <sup>23</sup> Nani tahuërihuachina Notoso', Soaro ninanoquë camarin. <sup>24</sup> Naporo' Siniorori,

\* 19:22 Soaroso': Pi'pira'huaya tapon naporin.

pën o'nan pochin a'paimarin. Sha'pi mo'shirë chachin, a'paimarin. Sotoma, Comora, inapita ninanoro'sa aipi a'paimarin. <sup>25</sup> Inapotaton, ata'huantërin. Ya'ipi inaquë ya'huëpisopitarë chachin ata'huantërin. Ina motopianaquë papotërinso'pita', ya'ipi tiquirin. <sup>26</sup> Noto sa'inso nipirinhüë', co Soaroquë camarinhüë'. Oshaquëran so'in imaquiáponahuë', pinën parti tahuërëhuachina, inaquë chachin yamora moto' taranaton, chiminin.

<sup>27</sup> Tashiramiachin Apraanso', i'huara Siniro nontërintaquëchin pa'nin. <sup>28</sup> Ina quëran, Sotoma, Comora, inapita ninanoro'sa nocorin. Ya'ipi ina motopiananta nocomapirinhüë', ina ro'të quëran pa'pi huëhuëpiro conai pipirarin ni'nin. Panca orno quëran tomontërinso pochin, pipirarin. <sup>29</sup> Ina pochin, ina motopianaquë ninanoro'sa Yosëri ata'huantërin. Noto yacapatërinso parti noyá ata'huantërin. Notoso nipirinhüë', co ata'huantërinhuë'. Apraan yonquiaton, cha'ëcaso marë' ina quëran ocoirin.

### *Moaporo'sa, amono'sa, inapita ya'huërinso'*

<sup>30</sup> Inapita ninanoro'sa ta'huantopi piquëran, Notoso' të'huatërin. Të'huataton, Soaroquë ya'huëcaso co nohuantërinhuë'. Napoaton cato hui'ninpitare chachin motopiro'sa parti, ya'huëcaiso marë' pa'pi. Inaquë a'na motopi naninquë, cara chachin ya'huëpi. <sup>31</sup> A'na tahuëri paya paya nininsoari, caia'huain, itapon:

—Ni'quë caira. Ya'ipi parti sanapi'sa ya'huërinso', so'yatona hua'huanpi. Canposo nipirinhüë', isoporinquë quëmapi pahuanin quëran, co inapochináchinhüë' ninë'. Tataíchin mini nipirinhüë', nani inanta mashotarín. <sup>32</sup> Napoaton, huëquë pa'a o'shitate tēpaita'a. Inapotatë', hua'huanpo ya'huëtiinposo marë' huë'ëpa'a, itërin.

<sup>33</sup> Naporo tashi chachin pa'pina huino o'shitomiatopi. Nani ano'pihuachinara, paninanso' pa'pin quëhuënaparin. No'pirahuë ni'ton, co nataninhüë' hui'nini quëhuënaparinso'. Co pa'ninso tēranta nataninhüë'. <sup>34</sup> Tahuëriantarinquë paninanso', caya'huain itaantapon:

—Ni'quë caira, achin tashi caso tata quëhuënaparahuë. Quëma ya'huëre' quëhuënapacaso marë' ipora tashinta ano'piana'a. Inapotate catonpo chachin tatanpo quëran tēranta hua'huasha ya'huëchinpo', itërin. <sup>35</sup> Ninapotatona', naporo tashi naquëranchin pa'pina huino o'shitaantapi. Nani ano'pihuachinara, hua'hua nininso ya'huëre', pa'pin quëhuënaparin. No'pirahuë ni'ton, Notoso' co nataninhüë' hui'nini quëhuënaparinso'. Co pa'ninso tēranta', nataninhüë'. <sup>36</sup> Inapotatona', cato chachin cayopi. Pa'pina quëran napopi. <sup>37</sup> Paninanso' huaihuachina, quëmapi'huaya huairin. Inaso', a'shini Moapo† itërin. Iso quirica ninshitasoco huarë', ina ipora moaporo'sa ya'huërinso shimashonëna ninin. <sup>38</sup> Hua'hua nininsonta huaihuachina, quëmapi'huaya chachin ya'huëtërin anta'. Inanta a'shini Pin-ami‡ itërin. Iso quirica ninshitasoco huarë', ina ipora amono'sa ya'huërinso shimashonëna ninin.

## 20

### *Apraan Apimiricorë naporinso'*

<sup>1</sup> Apraanso', piyapinënpitarë chachin ya'huëapi quëran pipipi. Pipirahuatona', Niquipi parti paantapi. Quiraro ninanoquë canconahuatona', inaquë ya'huëcaiso marë' quëparitopi. Ina ninanoso', Catisë ninano quëran Shor parti ira pa'ninso' huáncana quëparitërin. <sup>2</sup> Apraanso inaquë ya'huapon pochin, Sara sa'in nipirinhüë': “Oshihuë,” toconin. Napoaton Quiraro copirno Apimirico itopisori yamanin. Camaitohuachina, macacaso marë' Sara quëpatopi. <sup>3</sup> Napoaponahuë', naporo tashi chachin Yosëri huë'ëinquë pënënin: “Quëmaso chiminarian. Sanapi mananso so'yahuan ni'ton, chiminamaso ya'huërin,” itërin. <sup>4</sup> Apimiricoso', co Sara ichihuë'ëshátërarinhüë'. Napoaton Siniro itapon: “Siniro co manta onporahuë ni'ton, co tēpaancoso ya'huërinhuë'. <sup>5</sup> Co'ta Apraan

† 19:37 Moaposo': Pa'pin quëran ya'huërinso', tapon naporin. ‡ 19:38 Pin-amiso': Piyapinënhuëpita hui'nin tapon naporin.

chachin naporin: 'Oshihuë,' ténin. Saranta': 'Yo'yohuë,' ténin. Cato chachin napopi ni'ton, co nitotatohuë manahuë," itèrin. <sup>6</sup> Napotohuachina, Yosërinta huë'énquë chachin a'paniantarin: "Tèhuëenchachin co nitotatonhuë' naporan. Napoaton ca nohuanto co ichihuë'èranhuë'. Carinquën ya'copiranguën ama oshahuanaton tèhuëtancoso marèhuë'. <sup>7</sup> Iporaso nipirihuë', so'in chachin quëtaantaquë'. Inaso pënëntona'pi ni'ton, quëma marë' nontarinco. Ama chiminamaso marèhuë', nontarinco. Co'so' quëtaantahuatanhuë', sa'an, hui'nanpita, inapitarë'quën chachin, ta'huantaran," itèrin huë'énquë.

<sup>8</sup> Tahuërianpitoahuachina, Apimiricoso huënsëintarahuaton, piyapinënpita amatèrin. Huë'pachinara, ya'ipi hua'narinso sha'huitèrin. Natanahuatona', piyapinënpitaso pa'pi pa'yanpi. <sup>9</sup> Ina quëran Apraan amatahuaton, itapon:

—¡Ma'huantacha nitapirancoihuë paya! ¡Caso co maquë tëranta tèhuëtëranquënhuë'! Quëmaso nipirihuë', napotatoncoi panca yaaoshahuanpirancoihuë'. Ca aoshahuanatonco, quëmopinëhuëpita, piyapinëhuëpita, inapita, na'inchitonhuë'. ¡Co naporèhuë'! <sup>10-11</sup> ¿Ma'ta yonquiaton, napotopirancohuë'? itèrin. Napotohuachina, Apraani itapon:

—Isëquëso', co manta Yosë natëpihuë'. Sa'ahuë matiinacoso marë' tëpaponaco caso', ta'to naporahuë. <sup>12</sup> Naporahuaton Saraso', oshihuë anta'. Ina tataquëranchin nipirihuë', mamahuëi quëranso', nisha ninai. Napoaton cari manahuë. <sup>13</sup> Yosë chachin, tatahuë ya'huërin quëran pipicaso' camaihuachincora, sa'ahuë sha'huitërahuë: "Insëquë tëranta pa'nëhuaquë: 'Inaso yo'yo masho,' tëquë ta'a, itërahuë," ténin Apraan.

<sup>14</sup> Ina natanahuaton, Apimiricoso sa'in quëtaantarin. Naporahuaton, ohuicaro'sa', ohuacaro'sa', inapita quëtèrin. Piyapinënpita camaicaso marënta': Quëmapi'sa', sanapi'sa', inapita quëtèrin. <sup>15</sup> Ina quëtahuaton, itèrin:

—Ni'quë iya, no'panëhuëso pancana, insëquëso costaranquë ya'huëquë', itèrin.

<sup>16</sup> Saranta', itapon:

—Ni'quë imoya, yo'yo masho huaranca coriqui prata quëran nininso' quëtërahuë. Ya'ipiya quëran co tèhuëransohuë' nitotacaiso marë' ina nápo quëtarahuë. Co insonta pinoinquënso ya'huërinhuë'. <sup>17</sup> Ina quëran Apraan, Yosë nontèrin Apimirico marë'. Ina sa'in, cosonanënpita, inapita marënta', Yosë nontèrin. Nontohuachina, Yosëri anoyatèrin. Naquëranchin hua'huasha ya'huëtaantacaiso marë' anoyatèrin. <sup>18</sup> Siniorori nani Apimirico ya'huërinquë, sanapi'sa ana'intopirihuë'. Ama hua'huanacaiso marèhuë', Sara na'in quëran napotopirihuë'. Napoaton Apraani Yosë nontèrin inari anoyatacaso marë'. Napohuachina, Yosëri Apimirico sa'in, piyapinënpita sa'ina', inapita anoyatèrin. Hua'huasha ya'huëtaantacaiso marë' anoyatèrin.

## 21

### *Isaco nasitèrinso'*

<sup>1</sup> Sha'huitèrinso chachin, Siniorori Sara catahuarin. <sup>2</sup> Ina nohuanton napoin quëran cayorin huachi. Tahuëri nanihuachina, quëmapia'huaya huairin. Inaso', Apraan mashoya nicaquë huarë' hui'nahuaninso hua'huatèrin. Yosëri sha'huitèrinso tahuëri'sa chachin, hui'nin nasitèrin. <sup>3</sup> Sa'inquë chachin hui'nahuaninso nasitohuachina, Isaco itèrin. <sup>4</sup> Yosë camaitèrinso chachin posa tahuëritohuachina, marca acotèrin. <sup>5</sup> Apraan pasa pi'ipitaso', hui'nin Isaco itèrinso', nasitarin. <sup>6</sup> Naporo' Sara yonquirin: "Yosë catahuarinco ni'ton, capa cancantato, tēhuërahuë. A'napitanta', hua'huanahuëso nitotohuachina', ya'ipiya quëran capa cancantatona tēhuëpona'. <sup>7</sup> Co hua'huana'picohuë ni'to, co inso tëranta Apraan nontaton: 'Tèhuëenchachin Saraquë hui'nahuanaran,' co ichitonhuë'. Inaso nipirihuë', máshoya niponahuë', hui'nahuanin huachi," ténin.

### *Acara, Ismairo, inapita Apraani a'parinso'*

<sup>8</sup> Isacoa'huaya oshaquëran so'sohuachina, a'shini a'potèrin. A'potèrinso tahuëri, capa cancantacaiso marë' Apraan panca pita ninin. <sup>9</sup> Capa cancantapirihuë', Saraso' co noyahuë' cancantèrin. Cosona hua'huini Isaco monaton ya'nipitarin ni'nin. <sup>10</sup> Napoaton



Apraan sha'huitërin: “¿Cosonaso', hua'huinë chachin, a'paquë pa'in! Isacoso hua'huahuë chachin ni'ton, co nohuantërahuë' quëma ma'shanënpita cosona hua'huionta quëtacaso',” itërin. <sup>11</sup> Ina natanaton, Apraan panca sëtërin. Hui'nin ni'ton, sëtëyarin. <sup>12</sup> Sëtöpirinhuë', Yosëri itërin: “Ama hui'napi marë' sëtëquësöhuë'. Co cosonanën marë' tëranta sëtacaso ya'huërinhuë'. Ma'sona Sara nohuantërinso niquë'. Isaco quëran pipipisopita, noya noya catahuararahuë. Inapita mini yonquiato nani sha'huitëranquën nisapaso'. <sup>13</sup> Cosona hua'huionta catahuarahuë. Ca nohuanto, shinpita panca nacion ocoiäpona'. Hui'nan chachin anta ni'ton, catahuarahuë,” itërin.

<sup>14</sup> Tahuëririnquë tashiramiachin Apraanso', Acara quëtacaso marë' cosharo manin. A'nara sha'huëtë morsaquë i'sha ta'panahuaton, quëtërin. Hui'nionta Ismaïro itërinso', a'paantërin quëpacaso marë'. Inahuaso pa'pachinara, Piirsipa inotëro parti chihuëatona', topinan pa'säpi. <sup>15</sup> I'sha sha'huëtë morsaquë ya'huërinso', ta'quipi. Ta'quihuachinara Acaraso', naraa'huaya tashinantërianaquë hua'huin acorahuaton, patërin. <sup>16</sup> Aquëmiachin pa'sahuaton, huënsëconin. Ama hua'huin chiminso nicacaso marëhuë', inaquë huënsëconin. Huënsëhuachina, hui'napiso na'nërin huachi.

<sup>17</sup> Yosëri, hui'napi na'nërinso' natanin. Napoaton Yosë anquëninëni, inäpa quëran përasahuaton nontërin: “¿Ma'ta Acara onporan? ¿Ama pa'yanquësöhuë! Yosëri, hui'napi na'nërinso' natanin. <sup>18</sup> Manóton pa'sahuaton, macontaquë'. Ama patëquësöhuë'. Ca nohuanto, hua'huan quëran panca nacion pipipon,” itërin. <sup>19</sup> Naporo' Yosë nohuanton, Acara a'na posoquë i'sha quënanin. Inaquë pa'sahuaton, sha'huëtë morsaquë manin. Ina masahuaton, hua'huin o'shitonin.

<sup>20-21</sup> Yosëri, hui'napi catahuarin ni'ton, nóya a'shinin. Paran inotëro parti ya'huëpi. Míso pë'chinantërin. Oshaquëran a'shini Iquipito sanapi yoniton, acoantërin.

### *Apimirico Apraanë anoyatopiso'*

<sup>22</sup> Naporo tahuëri'sa pochin Apimirico pa'nin Apraan nontapon. Huicororë' pa'nin. Inaso', Apimirico sontaronënpita camairinso'. Inaquë Apimiricori Apraan itapon:

—Tëhuëenchachin quëmaso' nani ma'sha nipatana, Yosë catahuarinquinso ni'nai.

<sup>23</sup> Napoaton isëquë chachin Yoscoarë' ta'ton sha'huitoco: Ama hui'nahuëpita, shihuëpita, ama ca tëranta', ma'sha onpotancoso marëhuë', sha'huitoco. Carinquënso nosoroatënquën co ma'sha onpotëranquënhuë'. Inapochachin quëmanta noya ni'coi. A'napita ya'huëhuano'santa', noya ni'camaso marë' Yoscoarë' ta'ton sha'huitoco, itërin.

<sup>24</sup> Napotohuachina Apraan tapon:

—Yoscoarë' co ma'sha onpotaranquëmahuë', itërin.

<sup>25</sup> Napoaponahuë', Apraani itaantapon:

—Carinquëmaso', noya yonquirapiranquëma'. Quëma piyapinënpitaso nipirinhüë', a'nara poso ihuaraiso matërinacoi, itërin. <sup>26</sup> Ina natanahuaton, Apimiricori itapon:

—Co sha'huitërancohuë' ni'ton, ipora huarë' namaso natanahuë. Inpitaso inapotomarinquën. Co caso nitotërahuë', itërin. <sup>27</sup> Napotohuachina, naporo tahuëri cato chachin, noya ninitona ya'huëcaiso marë' anoyatopi. Yoscoarë' ta'tona', anoyatopi. Ina quëran anoyatopiso yonquicaiso marë' Apraani ohuicaro'sa', ohuacaro'sa', inapita manin. Masahuaton Apimirico quëtërin. <sup>28</sup> Naporahuaton canchisë ohuica nanoyan nipisopita huëntonën quëran nisha acoarin. <sup>29-30</sup> Nisha acoaso', Apimiricori itapon:

—¿Ma'marëta canchisë ohuicaro'sa nisha acoaran? itërin.

—Isopita canchisë ohuica, quëtëranquën: “Tëhuëenchachin Apraani ina poso ninin,” ta'camaso marë' quëtëranquën, itërin. <sup>31</sup> Napoaton ina ro'tëso', Piirsipa itopi. Inaquë cato chachin Yoscoarë' ta'tona', anoyatopi ni'ton, ina pochin nohuitopi. <sup>32</sup> Nani anoyatohuachina Apimiricoso', Huicororë chachin huïristino'sa no'panën parti paantapi.

<sup>33</sup> Nani pa'pachinara, Apraanso inaranchin Sinïoro chinotërin. Inaso': “Yosë ya'huëmiatërinso',” itopi anta'. Inaquë chinotaton, a'nara tamarisco nara sha'nin. Nani

sha'huirahuë chachin ina no'paso', Piirsipa itopi. <sup>34</sup> Hua'qui Apraan huiristino'sa no'panënaquë, yacapatërin.

## 22

### *Yosëri Apraan tënirinso'*

<sup>1</sup> Ina piquëran Yosëri: “¿Tëhuëenchachin ta'ma Apraan natërinco to?” ta'ton, tënicaso marë' përarin:

—Apraan, itërin.

—Ma'ta Siniro ya'huëarahuë, tënin Apraan. <sup>2</sup> Naporro' Yosëri itapon:

—Hui'nän Isaco itëranso', a'naíchin ni'ton, nosoromiatëran. Ina nipirinhüë', masahuaton Moria parti quëpaquë'. Inaquë canconpatan, a'na motopi a'notaranquën. Inaquë chinotancoso marë' ina tëparahuaton, ya'ipi ahuiquitëquë', itërin.

<sup>3</sup> Tahuëririnquë Apraanso', tashiramiachin huënsëintarahuaton, tapatarin huachi. Ihuë Yosë chinotaton ahuiquitacaso marë' pë'shitërinso', moranënuquë a'mitërin. Ina quëran hui'nän, cato piyapinënpita, inapita quëparin. Yosëri sha'huitërinquë pa'nän huachi.

<sup>4</sup> Cara tahuëri quëran Apraanso', Yosëri sha'huitërinso' no'pa' notërin. <sup>5</sup> Naporro' piyapinënpita itapon:

—Isëquë ninatacoi. Moranta isëquë patarahuë. Quiyaso' amasha aquëcha pa'sahuato, Yosë chinotarai. Nani chinotahuato o'mantarai, itërin. <sup>6</sup> Ihuë Yosë chinotaton ahuiquitacaso', Isaco apitëntërin. Inaoranta cosoroa'hua, pë'to ra'pi, inapita manin. Ina quëran pa'pi huachi.

<sup>7</sup> Papon pochin Isacori, Apraan itapon:

—¡Tata! itërin.

—¿Ma'ta conpaa'hua'? itërin pa'pini.

—Ni'quë tata, nani ihuë ya'huërin. Pë'to ra'pinta ya'huërin. Carniroa'hua ya'ipi ahuiquitacaso marëso': ¿Intoparanta manë'? itërin Isacori.

<sup>8</sup> —Yosë nohuanton conpa ya'huapon, itërin pa'pini. Ina quëran, paantapi.

<sup>9</sup> Yosëri sha'huitërinquë canconpachinara, Apraanso a'nara artaro ninin. Tënirahuaton, ina aipi ihuë acorin. Ina quëran hui'nän tonporahuaton, ihuë aipi acorin. <sup>10</sup> Inaquë acorahuaton tëpacaso marë' cosoroa'hua manantërin. <sup>11</sup> Naporro chachin Siniro anquëninëni, inápa quëran përarin:

—¡Apraan! ¡Apraan! itërin.

—Ma'ta Siniro ya'huëarahuë, itërin Apraani. <sup>12</sup> Siniro anquëninënisó', itapon:

—Ama hui'nän tëpaquësóhuë'. Tëniponquën napotopiranquënhüë', iporasó' nani nitotërahüë. Ya'ipi cancanën quëran huarë' imaranco tënahüë. Hui'nän a'naíchin nipirinhüë', co apiratërancohüë ni'ton, nitotërahüë, itërin. <sup>13</sup> Naporro' Apraan tahuërerahuaton ni'pirinhüë', a'nara carniro quënanin. Yosë nohuanton pomonën quëran, nara'huaya së'paquënuquë a'tënin. Ina masahuaton hui'nän ya'huërenamën tëparin. Inapotaton, Yosë chinotacaso marë' ya'ipi ahuiquitërin. <sup>14</sup> Ina quëran Apraani ina ro'të aninahuanin. “Pahuantërinpoaso' Siniro quëtërinpoaquë,” itërin. Napoaton, iporahuanta ina pochin nohuitapi. “Motopiquëso', pahuantërinpoasopita Siniro quëtërinpoa',” topi nonatona'.

<sup>15-16</sup> Siniro anquëninëni, naquëranchin inápa quëran Apraan përaton itapon:

—Siniro naporin: “Ya'ipi cancanën quëran huarë' natëtonco, a'naíchin hui'nän nipirinhüë' co apiratërancohüë'. Inaporansó marë' noya ni'nänquën. Caso Yosëco ni'to, no'tëquën sha'huitaranquën. <sup>17</sup> Noya nicatënuquën catahuamiataranquën. Ca nohuanto shiparinpita, tayloraro'sa nápo na'apona'. Marë yonsanquë inotëra'huaya nápo, na'amiatapona'. Naporahuaton, inapitasó inimiconëna minsëra'pia'pona'. <sup>18</sup> Quëma natëranco ni'ton, ya'ipi isoro'paquë naciono'sa ya'huërinso'pita, shiparinpita quëran catahuararahüë,” itërin.



<sup>19</sup> Nani Yosë chinotahuatona', Apraanso hui'ninë chachin piyapinënpita quëparitopiquë, pa'mantapi. Ina quëran ya'ipi chachin, Piirsipaquë panantapi. Inaquë Apraan hua'qui ya'huërin.

### *Nacoro hui'ninpita nipiso'*

<sup>20</sup> Hua'quimiachin ya'huapona pochin, Apraanso natantërin. “Miricanta', Nacoro sa'in nininso', Sara pochachin hua'huanin anta',” itopi. <sup>21</sup> Paninanso', Os itopi. Ina quëran niantarinso', Pos itopi. Ina quëran a'nanta niantarinso', Quimoino itopi. (Quimoinonta hui'nahuanpachina, Aramo itopi.) <sup>22</sup> Quimoino quëran nasitaantapi: Quisito, Aso, Piritasi, Itarapi, Pitoiro, inapita. <sup>23</sup> Ina Pitoiro mini, Nipica pa'pin. Nacoroso', Apraan iya'huain. Ya'ipiya quëran Miricaso', posa hua'huinpita ya'huëtërin. Ina nápo Nacoroso', sa'inquë chachin hui'nahuanin. <sup>24</sup> Naporahuaton a'na sa'inquënta hui'nahuanin. Ina sa'inso', Nioma itopi. Inaquë hui'nahuaninsopitaso': Tipa, Caamo, Taas, Maaca, inapita.

## 23

### *Sara chimininsó'*

<sup>1</sup> Saraso', pasa cato shonca canchisë pi'i icanin. <sup>2</sup> Ina quëran Quiria-arpa ninanoquë chiminin. Ina ninanoso', Ipron itopi anta'. Inaso Canaan parti ya'huërin. Sa'in chimininsó marë' Apraanso', sëtatón, na'nërárin, ayanárin, naporin.

<sup>3</sup> Ina quëran, sa'inco' nonën patahuaton, ya'huëhuano'sa nontapon pa'nin. Ya'huëhuano'saso', itiro'sa itopi. Hua'ano'sa nipisopita niyontoyantopiquë, quënanconin. Inaquë nontahuaton itapon:

<sup>4</sup> —Caso co ya'huëhuancohuë' niporahuë', yacaparanguëma'. Sa'ahuë chiminin ni'ton, chiminpatamara nipo'moramaso' no'pa' pa'antoco canta topirahuë, itërin. <sup>5</sup> Napotihuachina, Iti hua'ano'sari itapona':

<sup>6</sup> —Natanquë sinioro sha'huichinquën. Yosë huayoninquën ni'ton, quëmaso' chiníquën nanantëran. Nipo'moraiso' no'pa' insosona noya noya ni'nanquë, sa'anco' po'moquë'. Co incoi tëranta apiratarainquënhuë', itopi. <sup>7-8</sup> Napotihuachinara, Apraanso huanirahuaton, itiro'sa nontaantacaso marë' mónsho tënin:

—Tëhuëchachin isoporinquë sa'ahuëco' po'moca'huaso nohuantohuatama', catahuaco. Canpitari ya'huërenamëhuë Sohuaro hui'nin Ipron itopiso', nontoco topirahuë. <sup>9</sup> Maquipiraquë nanin ya'huërinso', pa'anchinco. Inaso no'panën intonquë ya'huërinso'. Onposona pa'tërinso' no'tëquën pahuëretarahuë. Inapohuato, chiminpatoi nipo'moca'huaiso marë' isoporinquë ya'huëtarinco huachi. <sup>10</sup> Ipronta Iti piyapi. Inanta inaquë chachin nisarin ni'ton, a'napita hua'ano'sa natantonëquë inaora chachin Apraan sha'huitërin. Chiníquën nonin ninano ya'coanataquëchin, na'huëpisopitanta', natanacaiso marë':

<sup>11</sup> —Ama sinioro napoquësóhuë'. Topinan naninso quëtarinquën. Inainpichin no'pa' ya'huërinsona', quëchinquën. A'napitanta natantonëquë sha'huitaranquën. Napoaton sa'anco' po'moquë huachi, itërin.

<sup>12</sup> Napotopirinhüë', Apraanso ya'huëhuano'sa inachintopiso nitotaton, anoyatarin. Naquëranchin ya'huëhuano'sa ni'tonëquë mónsho taantarin. <sup>13</sup> A'napitanta natan-tonëquë, Ipron itaantapon:

—Natanquë api nontaanta'inquën topirahuë. Onpopionta no'pa marë' pahuëre' maquë'. Naporo huarë' sa'ahuëco' po'moarahuë, itërin.

<sup>14-15</sup> —Noya sinioro pa'. Ina no'paso', catapini pasa coriqui prata quëran nininso' pa'tërin. Canpoaso ma'huaënpoa ni'tëhua', co inaíchín marë' aquëtë huarë' nonsápaso ya'huërinhuë'. Napoaton, po'mochanquë sa'anco huachi, itërin.

<sup>16</sup> Napohuachina, Apraanso ina nápo maré' anoyatërin. Ina quëran Iti hua'ano'sa ni'tonënuë, no'tëquën pahuërëtërin. <sup>17-18</sup> Inapoaton Apraani, Ipron no'panën Maquipiraquë ya'huërinso', pa'anin. Ina no'paso', insina nararo Mamiriri hua'anëntërin quëran, pi'i pipirinso parti quëparitërin. No'pa', nanin, nararo'sa inainpichin ya'huërinso', inapita Apraani hua'anëntërin huachi. Iti hua'ano'sari ya'ipiya quëran nitotopi. Ninano ya'coanataquëchin na'huëpisopitanta', nitotopi.

<sup>19</sup> Nani anoyatahuaton Apraanso', Maquipira naninquë sa'inco' po'morin huachi. No'pa' pa'aningüë napotërin. Ina no'paso' sha'huirahuëso chachin, Mamiriri hua'anëntërinso no'pa quëran, pi'i pipirinso parti quëparitërin. Ina ro'tëso', Ipron itopi anta'. Canaan parti ya'huërin. <sup>20</sup> Ina pochin Apraan, no'pa', nanin, inapita pa'anaton, hua'anëntërin. Ítiro'sari, pa'antërin nipa'pitacaiso maré'.

## 24

### *Isaco marë' sanapi yonípiiso'*

<sup>1</sup> Apraan nani noyá mashotërin huachi. Nani ma'sha nininquë Siniorori catahuamiatërin. <sup>2-3</sup> A'na tahuëri, piyapinën masho masho nininso', përarin. Inari ya'ipi ma'shanënpita a'pairin. Huë'pachina itapon:

—Natëancoso nitota'huaso maré', tonaroana së'huatoco. Së'huatatonco: “Sinioroso Yosë ni'ton, inápaquë hua'anëntaton, isoro'panta hua'anëntërin. Ina ni'sárinco ni'ton, no'tëquën natëaranquën. Co isoporingüë Canaan sanapi nininso', Isaco macacaso ya'huërinhuë,” itoco. <sup>4</sup> Quëma chachin hua'huatërahuëso no'paquë paquë'. Inaquë pa'sahuaton, quëmopinëhuëpita quëran sanapi yonítëquë', itërin.

<sup>5</sup> Napotohuachina, piyapinëniso itapon:

—Napopiranhuë', sanapi yonirahuëso co yaimaquintahuachincohuë': ¿Onpochita? ¿Hua'huatëranso parti hui'nán quëpamanta'i ti? itërin. <sup>6</sup> Napotohuachina, Apraani itapon:

—¡Ama napoquësokuë! ¡Co inaquë quëpamantacaso ya'huërinhuë! <sup>7</sup> Sinioroso' Yosë ni'ton, inápaquë hua'anëntërin. Nani ina sha'huitërinco iso no'pa' shihuëpitari hua'nëntacaso'. Iráca tatahuë ya'huërin no'pa quëran ocoirincó. Quëmopinëhuëpita ya'huërin parti quëran ocoirincó huachi. Ocoirahuatonco isëquë quëninco. Inari chachin anquëninën a'pararin catahuainquënso maré'. Ina nohuanton, sanapi nohuantarin isëquë huëcacaso'. <sup>8</sup> Sanapi isëquë huëcacaso co nohuantohuachinhuë', naporo huaré' Yoscoaré' ténanso co na'íntarinquënhuë'. Nipirinhuë' ama onporonta inatohua hui'nahuë quëpaquësokuë', itërin.

<sup>9</sup> Napotohuachina, piyapinëni Apraan tonaroananën së'huatërin. Së'huatahuaton: “Yoscoaré', sha'huitërancoso chachin, nisarahuë,” itërin. <sup>10</sup> Itahuaton, tapatarin huachi. Hua'anën ma'shanënpita, pa'ton pa'ton nininsopita, huayonahuaton, nicanatacaso maré' tapararin. Shonca camiyóquë apë'pëtahuatona', Nacoro ninano itopiquë, pa'pi huachi. Inaso ninano', Misopotamia parti ya'huërin.

<sup>11</sup> Pa'sápatona', canconpi huachi. Ninano aipiran, yatashirahuaso canconpi. Naporo oraquë nano'sa i'sha macapona posoquë huë'sapi. Apraan piyapinënso' camiyoro'sa a'na poso pirayan achinotarin. <sup>12</sup> Naporahuaton inaquë chachin Yosë nontërin: “Ní'quë Sinioro, quëmaso Yosënuë. Hua'anëhuë Apraan, natërinquën. Hua'anëhuë nosoroaton catahuaco. <sup>13</sup> Nano'sa i'sha macapona huëcasoi', iso poso pirayan ninatapo. <sup>14</sup> Insoso nanon: ‘Yonshanën chinohuaraquë', canta pi'piyan i'sha o'opainquën,' itohuato: ‘O'oquë api, camiyonënpitanta machi o'oina', ichinco. Ina quëran piyapinën Isaco maré' sanapi huayonanso', nohuitarahuë. Ina pochin nitohuachinco: Tëhuëchachin hua'anëhuë Yosëri nosoroaton catahuarin, tosarahuë,” itërin.

<sup>15</sup> Orarinso' co tiqiyátërasokuë', a'nara nanon yonsha pitënahuatón, huë'sarin ni'nin. Inaso nanon, Pitoiro hui'nin. Nipica itopi. (Pitoiroso', sha'huirahuëso chachin Nacoro hui'nin. Miricaquë hui'nahuaninso'. Nacoronta Apraan iya'huain.) <sup>16</sup> Nipicaso',

noyápiroyanchin. Naporahuaton nanon, co quëmapiri sè'huayátërarinhuë'. Canquirahuaton posoquë nohuaramarin. Yonshanën amëntaitërinso pitënahuatón, panantapirinhüë',  
<sup>17</sup>Apraan piyapinëni ta'arahuatón, icantonin. Icantahuaton, itapon:

—Canta apia'hua, yonshanën quëran pi'pian i'sha o'opainquën topirahuë, itërin.

<sup>18</sup>—O'oquë api, itërin Nipicari. Napotahuaton, yonshanën chinohuararin. Inapoaton o'shitacaso marë' sè'quëtërin. <sup>19</sup>Nani o'opachina, Nipicari itapon:

—I'sha maantarahuato, camiyonënpitanta o'opiquë ta'panchi nohuantopiso' o'oina', itërin. <sup>20</sup>Itahuaton, a'naromarëáchin pë'tahuaro'sa o'opiquë, ta'panarin. Ya'ipi camiyoro'sa', o'ocai huarë' inaporin. <sup>21</sup>Inapoaso', Apraan piyapinënso' co manta taponahuë', topinan ni'sárin: “Tëhuëinchachin Siniro catahuarinco ni'ton, ¿co topinan iratomaracohüë ti?” tënin yonquiatón. <sup>22</sup>Camiyoro'sa nani o'opachinara, Apraan piyapinënso', oro quëran po'moitëra pochin nipiso' manin. Saota cramo pochin quë'ninso'. Ina masahuaton, Nipica nitëananënuquë a'tëntërin. Naporahuaton cato a'sontanpa oro quëran nipiso', quëtërin. A'naya a'naya pasa na'con cramo quë'ninso', quëtërin. <sup>23-25</sup>Inapita quëtahuaton, natanin:

—¿Ma'ninta quëmaso' tata?

—Caso tatahuë Pitoiro. A'shinso', Mirica itopi. Tata pa'pinso' Nacoro itopi.

—¿Ya'huërin canpita pëinëmaquë chinota'huaiso to?

—Ya'huërin mini. Camiyoro'santa capacaiso ya'huërin, itërin Nipicari.

<sup>26-27</sup>Ina natanaton, Apraan piyapinënso' isonin. Isonin quëran Yosë chinotaton itapon: “¡Ma noyacha Siniroso paya! Inaso Yosë, hua'anëhuë Apraan natërinso'. Tëhuëinchachin hua'anëhuë nosoroaton, noya catahuaantarin. ¡Quëmopinënpita pëinënuquë huarë' no'tëquën quëninco!” tënin.

<sup>28</sup>Nipicaso' ta'arë'nachin a'shin pëinënuquë pa'nin. Inaquë ya'ipi naporinso sha'huiontarin. <sup>29-30</sup>Nipicaso' a'na yo'in mashonën ya'huëtërin. Inaso', Napano itopi. Po'moitëra pochin nininso' oshin quëtópiso' nicaparin. A'sontanparinsopitanta', nicaparin. Sha'huirinsonta natanahuaton, Apraan piyapinën yonicaso marë' posoquë ta'amarin. Ina pirayan, camiyonënpitarë chachin huaniárin quënamarin. <sup>31</sup>Inaquë nontaton itapon:

—Huëquë api. Quëmaso' Siniro noya catahuarinquën. ¡Co aipiran quëparitamaso ya'huërinhuë'! Nani pëi taparahuë canpita marë'. Camiyoro'santa huë'ëcaiso', nani taparahuë, itërin.

<sup>32</sup>Napotohuachina, pëiquë pantapi huachi. Inaquë Napanori pë'pëtoro'sa chinohuararahuaton, camiyoro'sa a'carin. Apraan piyapinën, ca'taninsopitarë chachin nipa'morantëcaiso marënta', i'sha quëshirin. <sup>33</sup>Cosharo acotohuachinara, Apraan piyapinënso' tapon:

—Co'huara coshachátërapohüë', ma'marësona huë'nahuëso'ton, sha'huita'huanquëmaso ya'huërin, tënin.

—Ina'ton nipachin sha'huitocoi, itërin Napanori.

<sup>34</sup>—Caso Apraan piyapinënco. <sup>35</sup>Sinirori hua'anëhuë catahuamiatërin ni'ton, pa'pi notohuaro' ma'sha ya'huëtërin: Ohuacaro'sa', ohuicaro'sa', inapita notohuaro' pë'tahuarin. Naporahuaton oro, prata inapita ya'huëtërin. Piyapinënpitanta quëmapi'sa', sanapi'sa', inapita ya'huëtërin. Camiyoro'sa', moraro'sa', inapitanta na'a pë'tahuarin.

<sup>36</sup>Naporahuaton sa'in Sara itopisonta', a'naíchin hua'huanin. Paiya nicaponahuë', quëmapi hua'huanin. Inari iporaso', ya'ipi hua'anëhuë ma'shanënpita, hua'anëntapon huachi. <sup>37</sup>Hua'anëhuë camairincoso', natëca'huaso marë' nani Yoscoarë' ta'to sha'huitërahuë. Naporo' napotërinco: “Co isoporinguë Canaan sanapi nininso', Isaco macacaso ya'huërinhuë'.

<sup>38</sup>Tatahuëi quëran quëmopi ninaisopita ya'huëpiso parti tëhuëinchinso' paquë'. Inaquë pa'sahuaton, huëntonëhuë quëran chachin sanapi hui'nahuë marë' matomaquë'” itërinco. <sup>39</sup>Napotohuachincora, cari itërahuë:

“Quëmaso' hua'anëhuënquën nipiranhuë' nonchinquën: Pa'pato, co'so' sanapi yaimaquintahuachincohuë' ¿Ma'ta onpo'i?” itërahuë. <sup>40</sup> Napotohuatora, sha'huitërinco: “Ni'quë', caso Siniro iranën no'tëquën pa'tërahuë ni'ton, anquëninën a'pararin catahuainquënso marë'. Ina nohuanton, noya pa'sahuaton sanapi quënamaran. Tatahuëi quëran quëmopinëhuë hui'nin chachin, hui'nahuë marë' matomaran. <sup>41</sup> Quëmopinëhuë co hui'nin yaa'pantihuachinquënhuë', naporo huarëáchin Yoscoarë' tënanso', co na'intarinquënhuë'” itërinco.

<sup>42</sup> Napoaton huë'sápatoi, ipora tahuëri posoquë canquirai. Inaquë Yosë nontato napotërahuë: “Siniro quëmaso Yosënuën. Hua'anëhuë Apraan chinotërinquën. Ni'quë Siniro. Tëhuëenchachin quëma catahuararanco noya huë'nahuë nipachinso', <sup>43-44</sup> iso poso pirayan nontaranquënso' natanco. Apira sha'huitohuatënuën inachachin niin tënahuë. Inso nanonsona, i'sha macapon o'marinso', cari natanpato: ‘Canta pi'piyan yonshanën quëran i'sha o'opainquën,' ichi. Napotohuato: ‘O'oquë api. Camiyonënpitanta machi o'oina',’ ichinco. Ina quëran hua'anëhuë hui'nin marë' sanapi huayonanso', nohuitarahuë,” itërahuë. <sup>45</sup> Orarahuëso', co tiquiyátërasocohuë', Nipica o'marin ni'nahuë. I'sha macacaso marë' yonshanën pitënahuaton, posoquë o'marin. Paaparahuato: “Canta api i'sha quëtoco topirahuë,” itërahuë. <sup>46</sup> Napotohuatora, yonshanën a'naroáchin chinohuararahuaton, itaponco: “O'oquë api, camiyonënpitanta machi o'oina',” itahuatonco, o'shitërinco. Camiyoro'santa', o'shitërin. <sup>47</sup> Ina quëran cari natanahuë: “¿Ma'ninta quëmaso' tata?” itërahuë.

“Caso tatahuë, Pitoiro. Inaso', Nacoro hui'nin. Miricaquëya hui'nahuaninso',” itërinco. Itohuachincora, a'nara po'moitëra pochin nininso' nitëananënuë a'tëntërahuë. Naporahuaton cato a'sontanpacaso quëtërahuë. <sup>48</sup> Ina quëran isonahuato, Siniro chinotërahuë: “¿Ma noyanquëncha quëmaso' Siniro paya! Quëmaso Yosënuën, hua'anëhuë Apraan natërinquën. Noya quënanco ni'ton, no'tëquën canquirahuë. Hua'anëhuë hui'nin acoantacaso marë' quëmopinën hui'nin chachin quëpatarahuë,” itërahuë, Siniro chinotato. <sup>49</sup> Iporaso huachi, sha'huitoco nitochi. ¿Tëhuëenchachin hua'anëhuë nosoroapoma ti? Co'so' nohuantohuatamahuë', sha'huitoco inanta nitochi. Nani nitotohuato ma'sona nica'huaso' yonquiarahuë huachi, itërin.

<sup>50</sup> Napotohuachina, Napano, Pitoiro, inapitari itopi:

—Ya'ipi naporansopita Siniro nohuanton naporin tënai. Napoaton, so'yachin nipachin. <sup>51</sup> Ma'tana Nipica ya'huëarin. Sinirori ina pochin nohuantërin ni'quëhuarë', quëpaquë'. Hua'anën hui'nin so'yachin, itopi.

<sup>52</sup> Napopiso natanahuaton, Apraan piyapinënso isonin. Isonahuaton, no'paquë huarë' monshomarin: “Yosparinquën Siniro,” itërin. <sup>53</sup> Ina quëran notohuaro' ma'sha quëinsopita o'quirin. Oro quëran, prata quëran, ina quëranpita nipiso', Nipica nicanarin. A'mocasonta', pa'ton nininsopita quëtërin. A'shin, yo'in, inapitanta notohuaro' ma'sha pa'ton nininsopita quëtërin. <sup>54</sup> Naporo huarë' Apraan piyapinën, ca'taninsopitarë chachin, coshatopi, o'opi, napopi. Naporahuatona naporo tashi inaquë chinotopi huachi.

Tahuëririnquë capayatahuaton, Apraan piyapinënso Nipica pa'pin, yo'in inapita itapon:

—Ipora tahuëri hua'anëhuë ya'huërinquë yapaantarahuë ta'a, tënin. <sup>55</sup> Napopirinhüë', Nipica yo'inso a'shinë chachin, itapona':

—Shonca tahuëri tëranta nanon quëparichin. Ina piquëran noya imasarinquën huachi topiraihuë', itopi. <sup>56</sup> Itopirinhüë', Apraan piyapinënso napoantarin:

—Ama aquëtë huarë' ahua'quicosohuë'. Yosë nohuanton, noya huëcato, co topinan iratërahuë'. Napoaton hua'anëhuë ya'huërinquë pananta'huaso' ya'huërin tënahuë, itërin.

<sup>57</sup> Napohuachina, itaantapi:

—Pa'ahua nipachin nanon përahua'. ¿Ma'tama ichinpoa pa'? topi. <sup>58</sup> Nipica përasahuatona', natanpi:

—¿Ipora tahuëri chachin nohuantëran iso quëmapi imacaso to? itopi.

—Nohuantërahuë mini, tënin.

<sup>59</sup> Napohuachina, Nipica pacacaso nohuantopi huachi. Ina aso'sorinso sanapinta', a'pantopi. Naporahuaton a'napitanta piyapinënpita, sanapi'sa nininso' a'pantopi. Apraan piyapinë, ca'taninsopita, inapitanta noya a'papi huachi. <sup>60</sup> Nani yapa'pachina, yo'ini nóya yonquirapiton iso pochin sha'huitërin:

“Oshira, Yosë catahuainquën.

Pa'pi nohuantërai, noya hua'huanaton, notohuaro' amiparinpita ya'huëtiinquënso'.

Naporahuaton amiparinpitanta',

Yosëri catahuain inimiconënapita minsëra'piaina'” itërin.

<sup>61</sup> Nani nontohuachinara, Nipicaso piyapinënpitarë chachin, camiyoro'saquë ya'mitëahuatona', Apraan piyapinë imapi. Ina pochin Apraan piyapinë, Nipica matomarahuaton, huënantarin huachi.

<sup>62-63</sup> Naporo' Isacoso', Niquipi parti ya'huëarin. “Nanpitan ni'sárinco'so' poso,” itopiquë Yosë yonquiapon pa'nin quëran, huënantárin. Nani yatashirapaso', a'nanaya ni'pirinhuë', ni'toro'sa camiyonënapitarë chachin canquirapi ni'nin. <sup>64</sup> Nipicanta', Isaco ni'sahuaton, camiyonën quëran nohuararin. <sup>65</sup> Nohuararahuaton Apraan piyapinë natanin:

—¿Inta pasoso' quëmapi canpoataquëchin huë'sarin? itërin.

—Ina mini Isaco. Hua'anëhuë Apraan hui'nin, itërin. Ina natanahuaton, Nipicaso niimomototërinso' në'mëtëquë, nipa'shinayatërin. <sup>66</sup> Canconpachinara, piyapinëni ya'ipi naporinso Isaco sha'huitërin. <sup>67</sup> Ina quëran Isacoso', a'shinco në'mëtë pëinënquë Nipica quëparin. Co hua'quiya quëranhuë' macaton, noya cancantërin. Pa'pi nosoromiatërin. A'shin marë' sëtápirinhuë', inapoaton noya cancantërin huachi.

## 25

### *Apraan Sitoraquë hui'nahuaninsopita*

<sup>1</sup> Apraanso', a'na sa'in ya'huëtaantarín. Inaso', Sitora itopi. <sup>2</sup> Inaquënta hui'nahuaantarín. Inaquë hui'ninpitaso': Simiran, Cocosan, Mitán, Matian, Isopa, Soa, inapita. <sup>3</sup> Cocosan hui'ninpitaso': Sipa, Titan, inapita. Titan quëran pipipisopitaso': Asororo'sa', nitosoro'sa', niomoro'sa inapita. <sup>4</sup> Matian hui'ninpitaso': Ipan, Ihuri, Anoco, Apitan, Iritan inapita. Ya'ipi inapitaso', Sitora quëran pipipi.

<sup>5-6</sup> Na'a hui'ninpita Apraan ya'huëtopirinhüë', Isacoráchin pochín ya'ipi ma'shanënpita, quëtërin. Sitoraquë, Acaraqüë hui'nahuaninsopitaso', pi'piyan pi'piyan ma'sha nicanarin. Naporahuaton, nanpiso chachin niquë a'parin. Pi'i pipirinso parti ya'huëcaiso marë' a'parin. Co nohuantërinhuë' Isacorë' napopináchin ya'huëcaiso'.

### *Apraan chiminso'*

<sup>7</sup> Apraanso ya'ipiya quëran, pasa canchisë shonca a'natërápo pi'i icanin. <sup>8</sup> Nani noyá mashoya nipachina, mashori quëparin. Chimpachina, shimashonënpita, quënancontarin huachi. <sup>9</sup> Hui'ninpita: Isaco, Ismairo, inapitari, pa'pitopi. Maquipira naninquë po'mopi. Maquipirasó', sha'huirahuëso chachin, insina nararo Mamiriri hua'anëntërin quëran, pi'i pipirinso parti quëparitërin. Soaro hui'nin Ipron itopisoari, ina no'paso' hua'anëntopirinhüë'. (Inapitaso' itiro'sa'.) <sup>10</sup> Ina no'pa chachin iráca Apraan nanpison itiro'sa', pa'antërin. Inaquë inanta', sa'inco' Sara itopiso' pirayan, po'mopi.

<sup>11</sup> Apraan chiminpachina, Yosëri Isaco, catahuamiatërin. Inaso Nipicarë chachin: “Nanpitan ni'sárinco'so' poso,” itopiso' pirayan, ya'huërapí.



*Ismairo quëran pipipisopita*

<sup>12</sup> Sha'huitëranquëmaso chachin, Apraan Acaraquëya hui'nahuanpachina, Ismairo itopi. Acaraso', iquipitoron. Sara piyapinën. Ismairo hui'ninpitaso', isopita: <sup>13-15</sup> Paninantërinso' Nipayo itërin. Ina piquëran niantapisopitaso': Sitaro, Atipiri, Mipisan, Misma, Toma, Masa, Atar, Tima, Quitoro, Nahui, Sitima inapita. <sup>16</sup> Ina nápo Ismairo hui'ninpita ya'huëpi. Shonca cato ya'ipiya quëran. A'naya a'naya no'panëna hua'anëntopiso', niapora'piapi. Ya'huëpisonta inapotopi. Naporahuaton, inapitaso inahuara inahuara huëntonënaquë, hua'an ya'conpi.

<sup>17</sup> Ismairo pasa cara shonca canchisë pi'ipitaso' chiminin. Chiminpachina, pa'pitopi huachi. <sup>18</sup> Ismairo quëran pipipisopitaso', Apira parti, Shor parti, inapita partiro'sari ahuanapanirin. Inaquë, no'pa' macatona ya'huëpi. Iquipito notënanquë ya'huëpi. Ina partitaquëchin Iquipito quëran, Asiriaquë ira pa'ninso' na'huërin. Iinpitari, co nohuantopirinahuë', inaquë no'pa' macatona', ya'huëpi huachi.

*Isaco hui'ninpita nasitërinso'*

<sup>19</sup> Iporaso Isaco naporinso sha'huichinquëma': Inaso', Apraan hui'nin. <sup>20</sup> Catapini shonca pi'ipitaso', sa'arin. Pitoiro hui'nin Nipica itopiso', manin. Inaso yo'in, Napano itopi. Inapitaso' arano'sa itopi. Patan-aran parti ya'huëpi. <sup>21</sup> Nipicaso', co nanitërinhuë hua'huanacaso'. Ina marë' Isaco Siniro nontërin. Napohuachina, nontërinso' natanahuaton, catahuarin ni'ton, Nipica cayorin huachi.

<sup>22</sup> Catopia'huaya cayoaton, yo'namënuquë niahuërapi natanin. Napoaton yonquirin. "Hua'huahuëpita iporaquëranchin niahuërapi ni'quëhuarë': ¿Ma'marëta aquëtë huarë' nanpiiso'?" tënin. Inapochin yonquiaton, Siniro anitotacaso marë' nontërin. <sup>23</sup> Natanpachina, Siniro itapon:

"Catopia'huaya cayoran.

Inapita shinpita quëran cato nacion pipipon.

Cato huënton nicatona', niahuërápona'.

Ipora shimashonëna co'huara nasichátëraponahuë', niahuëpiso pochin nicapona'.

A'nara chini chiniquën nanantapon.

Naporahuaton hua'hua nininsoari

masho masho nininso camairápon," itërin.

<sup>24</sup> Napoin quëran, Nipica huaicaso nanirin. Catopia'huaya huairin. <sup>25</sup> Quëchitërinso' quëhuashin aina'huatahuaton, ya'ipi anporotërin. Napoaton Isao\* itopi. <sup>26</sup> Ina pa'taso chachin, iionta', a'na imirin quëran Isao matocanahuaton, hua'huataantarin. Naporinso marë' inaso', Cacopo† itopi. Isaco saota shonca pi'ipitaso', hui'ninpita nasitapi.

*Isao tëhuërinso'*

<sup>27</sup> Catopia'huaro'sa noya so'sopi. Isaoso' hui'napitahuaton, ma'sha yonicaso pa'yatërin. Míso inantërin. Cacoposo nipirinhuë', co inaporinhuë'. Ya'huëpiquë pa'yatërin ya'huápaso'. <sup>28</sup> Isaoso', pa'pini na'con na'con pa'yatërin. Inantërinso capaton, napotërin. Ya'huërë' Nipicaso', Cacopo na'con na'con pa'yatërin.

<sup>29</sup> A'na tahuëri Cacopo shantë a'itarin. Inapoaso Isaonta', inantapon pa'nin quëran, pa'pi canotërin huënantarin. <sup>30</sup> Cacopo a'itërinso ni'sahuaton itapon:

—Nosoroco iya, tana yatëparinco caso'. Quëhuashin‡ cosharo anpiranso', canta quëtoco ca'i, itërin. <sup>31</sup> Napotohuachina, Cacopori itapon:

—Paninanquën ni'ton, na'con ya'huëtarinquën canacamaso'. Carinquën nipachin ya'huërëchinquën. Naporo huarë' iso cosharo quëtëranquën, itërin. <sup>32</sup> Napotohuachina, Isaoso' tapon:

\* **25:25** Isao: Isaoso' piyapi anporo yonquiatona', ina pochin nohuitopi. † **25:26** Cacopo: Cacoposo', monatona'pi tapon naporin. ‡ **25:30** Itomo: Itomoso', quëhuashin cosharo tëninso marë' inapochin Isao apoyatopi.

—Ni'quë iyasha, tana caso yatëpararincó. Chiminpatoso', paninan ninahuëso marë' cana'huaso' ya'huëtërinco'sopita, topinan quëran nisarín, itërin.

<sup>33</sup> —Yoscoarë' quëtaranquën itoco nipachín, itaantarín Cacopori. Napotohuachina, “Yoscoarë' quëtaranquën,” itërin. Inapoaton, Isaoso paninan nininso marë' canacaso ya'huëtërinso'sopita, co pa'yatërinhuë'. <sup>34</sup> Naporo huarë' Cacopori, pan acotahuaton, shantë a'itërinso'ta o'huintërin. Nani ca'sahuaton, o'osahuaton, Isaoso' pa'nin huachi. Paninan nininso marë' canacaso ya'huëtërinso', co manta pa'tërinhuë pochín nitërin.

## 26

### *Isaco Quiraro ninanoquë naporinso'*

<sup>1</sup> Naporo tahuëri'sa Isaco ya'huërinso parti panca tanarotopi. Apraan nanpiso tahuëri'sa napopiso pochín, ninín. Napoaton sa'in, piyapinënpita, inapitarë chachín Quiraro ninanoquë pa'pi. Huiristino copirno, Apimirico itopiso ya'huërinquë pa'pi. <sup>2</sup> Inaquë Siniorori ya'notahuaton, itërin: “Ama Iquipitoquë pa'maquësohuë'. Insëquësona quëparitacaso', carinquën sha'huitaranquën. <sup>3</sup> Ipora marëso', iso no'paquë ya'huëtaco'. Carinquën ca'tanatëinquën catahuararanquën. Ya'ipi iso no'pa', carinquën quëtaranquën. Shiparinpitanta', ina chachín quëtarahuë. Tataparín Apraan nani sha'huitërahuë ni'ton, quëtaranquëma'. <sup>4</sup> Ca nohuanto quëma shiparinpita, na'amiatapona'. Tayoraro'sa pi'iro'tëquë ya'huërinso nápo, ya'huapona'. Inapitari ya'ipi iso no'paro'sa hua'anëntapona'. Naporahuaton, ya'ipi isoro'paquë naciono'sa ya'huërinso'sopitanta', shiparinpita quëran catahuararahuë. <sup>5</sup> Apraanso': Ya'ipi sha'huitërahuëso'sopita, camairahuëso'sopita, pënënhuëso'sopita, a'chintërahuëso'sopita, ya'ipi inapita natërin ni'ton, napoarahüë,” itërin.

<sup>6</sup> Siniorori napotohuachina, Quiraro ninanoquë quëparitopi. <sup>7</sup> Ya'huëhuano'sari Nipica ni'sahuatona', so'in natanpachinara: “Sa'ahuë,” ta'caso nipirinhuë', të'huaton nonpinin: “Oshihuë,” ténin. “Nipica noyápiroyanchín ni'ton, ya'huëhuano'sari macapona'. Ya'huëré' caso tëpaponaco,” ta'ton naporin.

<sup>8</sup> Hua'qui quëran pochín Apimiricoso', huintananën quëran notëtarín. Notëtapirinhuë', Isacori Nipica apinorarin quënanin. <sup>9</sup> Naporo' amatahuaton:

—¡Nipicaso', sa'an ténahuë! Ina niponahuë': ¿Onpoatonta', “oshihuë,” ténan? itërin.

—“Ina na'intërinco tëpaponaco caso',” ta'to naporahuë, itërin Isacori. <sup>10</sup> Napopirinhuë', Apimiricori itapon:

—¡Co napochitoncoihuë pora! Onpichín sa'an inso ya'huëhuani tëranta', ichihuë'ërin. Ina marë' quiyaso' oshahuaintoihuë', itërin. <sup>11</sup> Napotahuaton, piyapinënpita camairin:

—Inquëma tëranta iso quëmapihuë nipon, sa'inhüë nipon së'huahuatama', tëhuënhachín chiminarama', itërin.

<sup>12</sup> Ina pi'iquë Isaco inaquë iminapatërin. Sha'to'huachina, Yosëri catahuarin ni'ton, pa'pi notohuaro' nitërinso' manin. <sup>13</sup> Notohuaro' ma'sha ya'huëtahuaton, pa'pi ma'huan quëparitërin. <sup>14</sup> Pa'pi notohuaro' ohuicaro'sa', ohuacaro'sa', piyapinënpita, inapita ya'huëtërin. Ina marë' huiristino'sari noyapatona', no'huipi. <sup>15-17</sup> Napoin quëran Apimiricori Isaco itapon:

—Quëmaso' quiya quëran na'con na'con ma'huanan ni'ton, pipiquë huachi, itërin. Napotohuachina Isacoso', sa'in, piyapinënpita, pë'tahuanënpitarë chachín pa'pi. Quiraro motopianaquë, pa'sahuatona', inaquë quëparitopi. Iráca Apraan nanpipon, ina piyapinënpitari posoro'sa ihuapiso', huiristino'sari amëntarotopi.

<sup>18</sup> Inaquë ya'huëapona pochín, naquëranchín ina posoro'sa ihuaantararin. Iráca pa'pincori nanpipon ihuapisopita, inapotaantapi. Ina chiminpachina huiristino'sari, amëntarotopirinahuë', ina posoro'sa chachín ihuaantarín. Iráca pa'pincori ina posoro'sa nohuëtërinso chachín, inarinta nohuitaantarín.



<sup>19</sup> A'na tahuëri Isaco piyapinënpitari motopianaquë a'na poso ihuarapi. Ihuarapiri-nahuë', no'pa quëran i' pipirinso' quënanpi. <sup>20</sup> Napoaponahuë', Quiraro motopianaquë, huiristino'sa ohuicanëna a'paipisopita, no'huitopi. Isaco ohuicanënpita a'paipisopitarë', nino'huitona niahuëpi: “iIso i'shaso', quiyaquën!” Niitatona', niahuëpi. Napoaton Isacori, apoyatërin: “Niahuëyatopiso' poso,” itërin. <sup>21</sup> Ina piquëran piyapinënpitari, a'na ya'huërë' ihuaantapi. Ina marënta', naquëranchin niahuëantapi. Inanta', Isacori apoyataantarin: “Niinimicotopiso' poso,” itërin. <sup>22</sup> Isacoso', sa'in, piyapinënpita, pë'tahuanënpita, inapitarë chachin, áquë pa'pi huachi. Inaquë a'na poso ihuantapi. Ina marëso' co huachi niahuëpihuë' ni'ton: “Cha'ëpisopita, posonën,” itërin. “Ipora tēhuënchinso' Siniro nicha'ërinpoa noya noya isëquë ya'huëcaso marë” ta'ton, ina pochin ina poso nohuitërin.

<sup>23</sup> Ina quëran, Piirsipa parti paantapi. <sup>24</sup> Naporo tashi Sinirori ya'notahuaton itapon: “Caso Yosëco. Tataparin Apraan chinotërinco.

Ama tē'huaquësohuë'.

Carinquën ca'tanatëinquën catahuamiataranquën.

Piyapinëhuë Apraan natërinco ni'ton,

ca nohuanton shiparinpita na'amiatapon,” itërin.

<sup>25</sup> Napotohuachina Isacoso', a'nara artaro inaquë ninin. Ina nisahuaton, Siniro chinotërin. Inaquë ya'huapona pochin piyapinënpitari a'na ya'huërë' poso ihuaantapi.

### *Isaco Apimiricorë anoyatërinso'*

<sup>26</sup> A'na tahuëri Apimiricoso', Quiraro quëran Isaco nontapon huë'nin. Aosato, Huicoro, inapitari ca'tanin. Aosatoso', amiconën. Huicoroso nipirinhüë', capitan, sontaronënpita camairinso'. <sup>27</sup> Canquihuachinara, Isacori itapon:

—Canpitaso co quë'yatomacohüë', ya'huërama quëran ocoiramaco. ¿Ma'marëta iporaso' yaniantaramaco? itërin.

<sup>28</sup> —Tēhuënchachin quëmaso', Siniro catahuamiatërinquën ni'nai. Napoaton yonquirai quëmarë'coi anoyata'huaiso'. Iso pochin anoyatahua': <sup>29</sup> Quiyaso ya'huëraiquë, co ma'sha onpotërainquënhüë', noya nicatëinquën, noya quëran a'parainquën. Napoaton quëmanta', ama ma'sha onpotocoisohüë'. Yosë quëmaso' ipora noya nicatëinquën catahuarinquën ni'ton, napotarainquën, itërin. <sup>30</sup> Napotohuachinara, naporo chachin Isacori panca pita nitërin ni'ton, coshatopi, o'opi, napopi. <sup>31</sup> Tahuëririnquë tashiramiachin, huënsëantahuachinara itohuara capini: “Yoscoarë' noya nini'tēhua' ya'huarihua',” nitopi. Ina quëran, nani anoyatahuatona': “Pa'sarai huachi,” topachinara, Isacori itapon: “Osharan paco', Yosë catahuainquëma',” itërin.

<sup>32</sup> Naporo tahuëri chachin, Isaco piyapinënpitari huë'sahuatona', sha'huitiipi: “Poso ihuaráraiso', nani i'sha quënanai,” itiipi. <sup>33</sup> Napotohuachinara, Apimiricorë anoyatona': Yoscoarë' niitopiso', yonquiaton, ina pososo' aninahuanin, “Sipa” itërin. Napoaton ina ninanoso', ipora Iso quirica ninshitasoco huarënta' Piirsipa itopi.

<sup>34</sup> Isao catapini shonca pi'ipitohuachina, Cotita manin. Inaso', Piiri itopiso' hui'nin. Piiriso', Iti piyapi. Ina piquëran Isaoso', a'na maantarin, Pasima itopiso'. Inaso', Iron hui'nin. Irona Iti piyapi chachin. <sup>35</sup> Ina catoro'sa co Yosë imatonahuë', Isaco, Nipica inapita na'con asëtatona', aparisitopi.

## 27

### *Cacopo nonpinaton, iin ya'huërëtërinso'*

<sup>1</sup> Isaco noyá mashotohuachina, pëtorayataton co huachi quënantërinhuë'. A'na tahuëri hui'nin paninan Isao itopiso' përarin. Huë'pachina:

—Conpa, itërin.

—Ma'ta tata ya'huarahüë, itërin Isaori.

<sup>2</sup> —Ni'quë conpa, nani caso mashotërahuë. Payo chiminapo huachi. <sup>3</sup> Napoaton pë'chinanën, shinërënënpita, inapita masahuaton ma'sha yoníquë'. <sup>4</sup> Nani tēpahuatan, costarincoso chachin po'morahuaton, quëshico ca'i. Ina quëran noya ya'huëcamaso marë' sha'huitaranquën huachi. Co'huara chiminyátërasocohuë', inapochinquën, itërin.

<sup>5-6</sup> Napoaponahuë', Nipicanta Isao napotërinso natanarin. Napoaton ina tananquë paaso chachin, a'naroáchin Cacopo përaton sha'huitërin:

—¡Natanquë hua'hua sha'huichinquën. Nani iya masho tatari napotërinso' natay-atërahuë! <sup>7</sup> “Ma'sha yoníquë'. Nani tēpahuatan, costarincoso chachin po'morahuaton, quëshico ca'i. Ina quëran Siniro ni'tonënuquë chachin noya ya'huëcamaso marë' sha'huitaranquën huachi. Co'huara chiminyátërasocohuë', inapochinquën,” itërin. <sup>8</sup> Napoaton noya natanquë sha'huichinquën. <sup>9</sup> Pë'tahuaros' sa ya'huërinquë pa'sahuaton, cato chipoa'hua noya noyatopiso' macontarahuatón quëshico. Cari, tata masho costarinso chachin po'mochi. <sup>10</sup> Nani anpitohuato, quëmari quëpatëquë ca'in. Inapotohuatan, quëma noya ya'huëcamaso marë' sha'huitarinquën huachi. Co'huara chimiyantërasohuë', inapochinquën, itërin.

<sup>11</sup> A'shini napotopirinhüë', Cacoporiso itapon:

—Iyahuëso anporohuan. Caso nipirinhüë', tomapico. <sup>12</sup> Tatahuë së'huahuachinco, nohuitarinco. Nohuitatonco: “Cacopo nonpintarinco,” topachin, co inapotatoncohuë' ama huachi noya ya'huëca'huaso marëhuë' sha'huitarinco, itërin.

<sup>13</sup> Itopirinhüë', a'shini itapon:

—Co huachi noya ya'huëcamaso marëhuë' sha'huitohuachinquën hua'hua, ca marë' niin. Quëmaso sha'huitëranquënso chachin nicaton, cato chipoa'hua quëshico, itërin.

<sup>14</sup> Cacoposo', macontarahuatón a'shin quëshirin. Tëparahuaton, inari Isaco costarinso chachin, po'motërin. <sup>15</sup> Isao noya noya a'morinsopita nē'mëtë pëinënuquë taparinsonta', manin. Inaquë Cacopo a'moantërin. <sup>16</sup> Naporahuaton, chipoa'hua sha'huëtë quëran, tanpaquënpita, cononën, inapita achinpitërin. <sup>17</sup> Inapotahuaton, po'morinso sēnanquë o'huintërin. O'huintahuatón, panë chachin pa'pin quëtacaso marë' hua'huin quëtërin.

<sup>18</sup> Cacoposo', pa'pin ya'huërinquë ya'conahuaton, nontoonin:

—¡Tata! itërin.

—Ya'huarahuë conpa. ¿Inso hui'nahuënuquënta quëmaso'? itërin pa'pini.

<sup>19</sup> —Ca mini Isaoco, paninantërancoso'. Nani sha'huitërancoso' quëshiranquën. Huënsëaton tata, ma'sha inanahuëso', ca'quë'. Ina piquëran noya ya'huëca'huaso marë' sha'huitoco huachi, itërin. <sup>20</sup> Napotohuachina, Isacori natanapon:

—¿Onporahuatonta conpa a'naroáchin quënan quënanaranso'? itërin.

—Siniro chinotëranso', inaso Yosë ni'ton, catahuarinco quënanana'huaso', itërin Cacopori.

<sup>21</sup> Pa'piniso nipirinhüë', itaantaranin:

—Ya'carico nipachin së'huainquën. Tëhuëenchachin Isaonquën ninanso yanitotërahuë, itërin. <sup>22</sup> Napotohuachina, pa'pini së'huacaso marë' ya'caririn. Së'huarahuaton, tapon: “Isao pochin tanpaquënso' niponahuë', Cacopo pochin nohuanantërahuë,” tēnin. <sup>23-24</sup> Isao tanpaquën pochin anporohuaninso marë' co nohuitërinhuë'. Napoaponahuë' co'huara noya ya'huëcaso marë' sha'huichátërasohuë', naquëranchin nataantaranin:

—¿Tëhuëenchachin quëma Isaonquën? itaantaranin.

—Inaco mini, itërin Cacopori. <sup>25</sup> Napotohuachina, Isacori itapon:

—Acotoco nipachin conpa inantëranso ca'i. Ina quëran nani coshatohuato, noya ya'huëcamaso marë' sha'huitaranquën huachi, itërin. Napotohuachina, Cacoposo' pa'pin capacaso acotërin. Huinonta quëshirin. Isacoso', noya coshatahuaton, o'orin, naporin.

<sup>26</sup> Inaporahuaton hui'nin itapon:

—Ya'cariatonco conpa apinoco, itërin. <sup>27</sup> Cacopori pa'pin apinocaso marë' ya'caritohuachina, Isacori a'morinso huë'ëropinën imërin.

Naporo' noya ya'huëcaso marë' iso pochin sha'huitërin:

“Naporin ta'a, ina pochin mini huë'ëropitëran.  
Siniorori catahuahuachina imin noya noyatërin.  
Napohuachina pimoanahuaninso pochin quëmanta huë'ëropitëran.

<sup>28</sup> Yosë nontërahuë ina nohuanton o'nan ya'huëchinquën.  
Sha'tohuatan noya noya nitacaso marë' ya'huëchinquën.  
A'napita nitërinso' mapi quëran, noya noya maquë quëmaso'.  
Notohuaro' trico nitërinso' maquë capamaso'.  
Notohuaro' huinonta ya'huëchinquën o'ocamaso'.

<sup>29</sup> Hua'huayätërahuë piyapi'sa camaiquë'.  
Naciono'santa të'huatatënën natëinënquën.  
Iyaparinpitanta camaiquë'. Të'huatatënën inapitanta natëinënquën.  
No'huitënën co huachi noya ya'huëcamaso marëhuë' sha'huitohuachinën, Yosërinta in-  
apotarin.

Inpitasona noya ya'huëcaso marë' sha'huitohuachinën, Yosërinta inapotarin,” itërin.

<sup>30</sup> Isacori, Cacopo noya ya'huëcaso marë' sha'huitërinso', tonitërin. Tonitohuachina, inaso pa'pin ya'huërin quëran pipirin. Pipiso chachin, Isaonta inantapon pa'nin quëran huëntararin huachi. <sup>31</sup> Huëntarahuaton, inantërinso po'mointarin. Anpirahuaton, pa'pin quëpataton, itapon:

—Huënsëquë tata, inantërahuëso po'motëranquën ca'quë'. Capaton noya ya'huëca'huaso marë' sha'huitoco huachi, itërin. <sup>32</sup> Napotohuachina Isacori natanin:

—¿Inquënta quëmaso'? itërin.

—Ca mini Isaoco, paninatërancoso', itërin. <sup>33</sup> Hui'nin natanahuaton, Isaco pa'pi pa'yantërin. Pa'yanaton ropa ropátarin quëran itapon:

—¿Inta nipachin apípora inantërinso po'morahuaton, quëshirinco? Co quëma can-  
quiyätërasënquënhuë quëshirinco ni'ton, nani ya'ipi ca'nahuë: “Isao mini,” ta'to, nani  
noya ya'huëcaso marë' sha'huitërahuë. Ipora inaso', noya noya ya'huapon huachi,  
itërin. <sup>34</sup> Pa'pin naporinso natanahuaton, Isaoso co napion cancantaton na'nëmiatërin.  
Na'nëton pa'pin nontërin:

—¿Canta tata, noya ya'huëca'huaso marë' sha'huitoco! itërin <sup>35</sup> Itopirinhüë', pa'pini itapon:

—Iyaa'hua huë'sahuaton nonpintiirinco ta'a. Quëma pochin ancantato, noya ya'huëcaso marë' sha'huitërahuë, itërin.

<sup>36</sup> —¿No'tën chachin inaso', Cacopo itopi paya! ¿Nani catoro monararinco! Pani-  
nan ninahuëso marë' ya'huëtiincoso nininso'ton, matërinco. Iporanta', tatahuë noya  
ya'huëca'huaso marë' sha'huitiincoso' mataantarainco. ¿Co'tama canta', pi'piyan tëranta  
noya ya'huëca'huaso marë' sha'huitaponcohuë' to? itërin. <sup>37</sup> Napotohuachina, Isacori  
itapon:

—Ni'quë conpa: Nani Cacopo sha'huitërahuë camairápainquënso'. Ya'ipi  
quëmopinënpita camairápaso marë' nani sha'huitërahuë. Hua'huayätërahuë, trico, huino,  
inapita ya'huëtacaso marë' Yosë nontërahuë. Inasá tiquiantërahuë ni'ton, ¡quëma marëso'  
capa huachi ta'a! itërin. <sup>38</sup> Itopirinhüë', Isaoriso chiníquën nontaantarain:

—¿Iyayáchin noya ya'huëcaso marë' sha'huitacaso ya'huërin ti? ¿Canta onpopionta  
inapotoco! itërin. Napotahuaton chiníquën na'nëantarain.

<sup>39-40</sup> Napohuachina, Isacori itapon:

“Quëmaso nipirinhüë', noyaro'pa' aquëtë ya'huaran.

O'nan pahuaninquë ya'huëapon.

Noya ya'huëcaso marë' ahuëtápamaso ya'huapon.

Iya'hua camairáponquën.

Napoaponahuë', chini chiníquën nipatan,

iya'hua quëran, pipiaran huachi,” itërin.

*Cacopo iin ta'ananpirinso'*

<sup>41</sup> Naporero quëran huarë' Isaori Cacopo pa'pi no'huirin huachi. Inasá pa'pini noya ya'huëcaso marë' sha'huitërin ni'ton, naporin. Napoaton yonquirárin: “Payo tata chiminapon. Ina chiminpachin, Cacopo tēpaarahüë,” tēnin. <sup>42</sup> Isao napo yonquitërinso', Nipicaso nitotërin. Napoaton Cacopo amatahuaton, itapon:

—Ni'quë hua'hua. Iya masho, napotëranso marë' yatëparinquën natantërahuë.

<sup>43</sup> Napoaton noya natanco sha'huichinquën. A'naroáchin Aran ninanoquë ta'acquë'. Api masho Napano pëinënquë paquë'. <sup>44-45</sup> Inaquë paaton, hua'quimiachin yaca-paontaquë'. Iya masho no'huitërinso' sanoquë huarë', inaquë ya'huëcontaquë'. Co huachi quënanpachinquën'huë', napotëranso' naniantapon. Naporero' huënantamaso marë' amataranquën. Co nohuantërahuë' naporero chachin catonquëma chiminamaso', itërin.

<sup>46</sup> Ina quëran Nipicaso', Isaco nontapon pa'nin:

—Iti sanapi'sa Isaori maninso' co noyahuë' nipi ni'ton, chiminchináchin cantërahuë. Cacopo ya'huërë' ina sanapi chachin, iso Canaan ro'tëquë ya'huërinso maantahuachin, chimina'huaso noya noya nisarín, tēnahuë, itërin.

**28**

<sup>1</sup> Nipicari napotohuachina, Isacori, Cacopo amatahuaton, noya nontërin. Co no'huirínhuë'. Noya ya'huëcaso marë' sha'huitaton itapon: “Yosë noya catahuainquën conpa,” itërin. Napotahuaton pënënin: “Ama iso Canaan no'paquë sanapi máquësohuë'.

<sup>2</sup> Patan-aran parti tēhuëchinso' paquë'. Tata masho Pitoiro ya'huërinquë pa'sahuaton, api Napano hui'ninpita a'nara maquë'. <sup>3</sup> Yosë ya'ipi nanitaparínso' catahuainquën. Na'a hui'nanpita quëchinquën. Quëma quëran na'a naciono'sa pipicaso marë' inapochinquën. <sup>4</sup> Yosëri Apraan noya ya'huëcaso marë' sha'huitërinso chachin, quëmantata quëchinquën. Quëma shiparínpitanta', inachachin quëchin. Iso no'pa' ipora yacap-atërëhuaso', quëchinquëma'. Yosëri nani Apraan sha'huitërin ni'ton, quëtërinquëma',” itërin. <sup>5</sup> Ina pochin Isacori Patan-aran parti Cacopo a'parin. Cacoposo' pa'sahuaton, Napano ya'huërinquë canconin. Nani sha'huirahuëso chachin inaso', Pitoiro hui'nin. Pitoiroso' Aran piyapi. Napanoso', Nipica yo'in miáchin. Nipicanta', Cacopo, Isao, inapita a'shina'.

*Isao sa'antarínso'*

<sup>6</sup> Isaoso', pa'pini, Cacopo noya ya'huëcaso marë' sha'huitërinso' ni'nin. Patan-aranquë sa'acaso marë' a'parinsonta', ni'nin. Naporahuaton, pa'pini noya ya'huëcaso marë' sha'huitapon pochin: “Ama Canaan sanapi máquësohuë',” itërinsonata natanin. <sup>7</sup> Pa'pini, a'shini, sha'huitërinso chachin Cacoponta', Patan-aranquë pa'ninso' ni'nin. <sup>8</sup> Pa'pin inaporin ni'ton, Isaoso': “Canaan sanapiso', co tatahuë costarínhuë',” tēnin. <sup>9</sup> Napoaton, Ismairo nicapon pa'nin. Inaso', Apraan hui'nin. Inatohua paaton, Ismairo hui'nin Maarata itopiso' maantarin. Inaso', Nipayo oshia'huain. Nani cato Canaan sanapi macaponahuë', inanta maantarin.

*Yosëri Cacopo ya'notërinso'*

<sup>10-11</sup> Cacopo Piirsipa quëran pipirahuaton, Aran ira pa'tërin. I'huatohuachina, quëparitërin huë'ëton pacacaso marë'. A'nara na'pi masahuaton, motoantacaso marë' acorin. Ina motoantaton huë'ërin. <sup>12</sup> Naporero tashi huë'ëton, hua'narin: A'nara nanpënan no'paquë paquërahuaton, Yosë ya'huërinquë huarë' nincanin ni'nin. Ina nanpënanquë chachin, pancatë ni'ton, Yosë anquëninënpita a'naquën pantarapi, a'naquënso o'marapi. <sup>13</sup> Naporahuaton, Siniro chachionta', ina pirayan huaniarin ni'nin. Inari nontaton, itapon: “Caso Siniroco. Quëmaquën Tata masho, Apraan itopiso' chinotërinco. Tata parionta chinotërinco. Quëhuëntëranso' no'pa' quëtëranquën. Shiparínpitanta', iso no'pa' chachin hua'anëntapona'. Isoso no'pa', Canaan itopi. <sup>14</sup> Ca nohuanto shiparín-pita na'amiatapona'. Mo'shi pochin na'apona'. Norti parti, sor parti, pi'i pipirínso

parti, pi'i ya'coniniso parti, ya'ipi inapita parti hua'anëntapona'. Quëma quëran, ya'ipi piyapi'sa nisha nisha nipisopita catahuararahuë. Shiparinpita quëraonta inapotarahuë.  
<sup>15</sup> Ni'quë'. Carinquën ca'tanaranquën. Intópanta pa'patan, carinquën a'paiaranquën. Carinquën chachin iso no'paquë quënantaranquën. Co onporonta pataranquënhuë', ya'ipi sha'huitëranquënso' naniquë huarë' catahuararanquën," itërin.

<sup>16</sup> Cacoposo' capayatahuaton, yonquirin: "Tëhuëchachin Siniro isëquë ya'huëpirinhuë', co caso nitotërahuë'," tënin. <sup>17</sup> Napoaton, pa'pi pa'yanin. Pa'yanaton tapon: "Iso ro'tëso', Yosë chinotacaso marë' nóya. Isëquë chachin, Yosë pëinën\* ya'huërin. Naporahuaton ¡Yosë ya'huërinso ya'coananën!" tënin.

<sup>18</sup> Tahuërinquë Cacoposo', tashíramiachin capayatahuaton na'pi motoantërinso manin. Masahuaton, nohuitacaso marë' onë pochin ahuanirin. Naporahuaton ina aipi toma opotërin. Inapotahuaton, Yosë marë' acorin. <sup>19</sup> Inaquë chachin iráca a'na ninano ya'huërin. Noso itopiso'. Ina pochin nohuitopirinahuë', Cacopori nisha nininën acotaton, Pitiri itërin. <sup>20-21</sup> Inaquë Cacopori Yosë sha'huitaton itapon: "Quëma chachin ipora iratërahuëquë ca'tanco. Quëma nohuanton cosharo', a'moca'huaso', inapitanta ya'huëchincó. Naporahuaton quëma nohuanton tatahuë ya'huërinquë, noya huënanta'i. Inapo catahuahuatanco: 'Siniroíchin Yosënhuë', ta'to, chinotaranquën. <sup>22</sup> Iso na'pi onë pochin ahuanirahuësonta', quëma pëinën nisarin. Naporahuaton, ya'ipi quëtëranco quëran, pi'pian quëtáponquën. Shonca canahuato a'nara quëchinquën," itërin.

## 29

### *Cacopori Napano yacaparinso'*

<sup>1</sup> Cacopo pa'sápaton, pi'i pipirinso parti ya'huëpisopita ya'huërinquë canconin.  
<sup>2</sup> Ninano ya'cari', a'na poso quënanconin. Ina pirayan cara huënton ohuicaro'sa i'sha o'shitacaiso marë' achinotapi. Ina pososo', pancatë na'piquë a'tantopi. <sup>3</sup> Ya'ipi ohuica huëntono'sa niyontonpachinara, a'paipisopitari naní quëran yamotahuatona', chi'huincapi. Ohuicanëna o'shitacaiso marë' inapopi. Nani o'opachinara, naquëranchin inaquë chachin a'tantaantapi.

<sup>4</sup> Cacopori a'paipisopita natanin:

—¿Intoparanta canpitaso iyaro'sa'? itërin.

—Aran quëran quiyaso' ta'a, itopi.

<sup>5</sup> —¿Nohuitërama canpita Nacoro hui'nin, Napano itopiso' to? taantarin Cacopo.

—Nohuitërai mini, itaantapi.

<sup>6</sup> —¿Noya ya'huëarin? itaantarin.

—Noya mini ya'huëarin, itopi. Napotahuatona':

—¡Ma'tana hui'nin Naquira itopiso' huë'sarin! Ohuicanënpitarë chachin huë'sarin, itaantapi. <sup>7</sup> Naporo' Cacopo tapon:

—Yono pi'i ya'huëarin ni'ton, pahuanarin ohuicaro'sa huë'ërinquë oncorapicaso'. ¿Onpoatonta co o'shitatoma pasto capacaiso marë' quëpaantaramahuë'? itërin.

<sup>8</sup> —Co nanitëraihuë' inapoca'huaiso'. Ya'ipi ohuica huëntono'sa a'paipisopitarë chachin niyontonacaiso' ninarai. Naporo huarë' nanitërai na'pi chi'huincatahuatoí, ohuicaro'sa o'shita'huaiso', itopi.

<sup>9-10</sup> Inapita nontaso', Naquiraso' pa'pin ohuicanënpitarë chachin canquirin. Inari pa'pin ohuicanënpita a'paitërin. Ina ni'sahuaton, Cacoposo' a'naroáchin posoquë pa'nin. Pa'sahuaton, na'pitë masho chi'huincatërin. Chi'huincatahuaton, apin ohuicanënpita o'shitërin. <sup>11</sup> Ina quëran Naquira apinorahuaton: "I'huata oshi," itërin. Napotahuaton, na'nërarin. <sup>12</sup> Cacopori sha'huitërin: "Caso quëmaquën tata, apihuëmiáchin. Quëmaquën

\* **28:17** Yosë pëinën: Iprio nananquëso', Pitiri itopi.



a'shacha Nipica itëramaso hua'huinco ni'to, naporahuë," ténin. Ina natanaton, Naquiraso ta'arë'nachin pa'pin sha'huitapon pa'nin.

<sup>13</sup> Cantonahuaton sha'huitërin: "A'shacha Nipica hua'huin, Cacopo itopiso' canquirin," itërin. Ina natanahuaton, Napanoso ta'arë'nachin nicapon pa'nin. Quënanconahuaton apinorin. Apinorahuaton: "I'huata api," itërin. Nontahuaton pëinënquë quëparin. Inaquë Cacopori ya'ipi naporinso apin sha'huitërin. <sup>14</sup> Napanori natanahuaton itapon: "Quëmaso' tëhuënchachin quëmopinëhuënquën ninan," itërin.

### *Sanapi marë' Cacopo sacatërinso'*

Cacoposo' Napano pëinënquë a'na yoqaira' nani yacapatërin. <sup>15</sup> Ina piquëran Napanori itapon:

—Quëmopinëhuënquën nipiranhuë', co topinan asacata'huanquënso ya'huërinhuë'. Sha'huitoco onposo canacamaso nohuantëranso'. <sup>16</sup> Napanoso' cato hui'ninpita nano'sa ya'huëtërin: Paninanso' Nia itopi. Ina piquëran niantarinsoso', Naqaira itopi. <sup>17</sup> Niaso', noyápiachin ya'pirahuanin. Naquiraso nipirinhüë', noyápiroyanchin, co máquën tëranta tëhuërinhuë'. <sup>18</sup> Cacoposo' Naqaira costaton, apin itapon:

—Hui'nán hua'hua nininso', Naqaira itëramaso nohuantërahuë. Ina marë' canchisë pi'ipi quëma marë' sacatarahuë, itërin. <sup>19</sup> Napotohuachina, Napanori itapon:

—Naporan ni'quëhuarë', quëmari maquë nipachin. Nishaso quëtacaso', co noyahuë'. Yacapatonco sacatëquë nipachin, itërin. <sup>20</sup> Inapoaton Cacoposo' Naqaira marë' canchisë pi'ipi sacatërin. Hua'qui sacatopirinhüë', Naqaira pa'pi nosoraoton, cara tahuëriíchín sacatërinso pochín cancantërin.

<sup>21</sup> Nani canchisë pi'i sacatohuachina, Cacopori Napano itapon:

—Acoantoco huachi hui'nán. Sha'huitëranquënso' nani nanirahuë huachi, itërin. <sup>22</sup> Napotohuachina Napanoso' ya'ipi ya'huërin pirayan ya'huëpisopita, amatërin. Cacopo sa'arinquë pita nicacaso marë' amatërin. <sup>23</sup> Napoaponahuë' nani tashihuachina, Napanoso Naqaira ya'huërenamën Niasa', Cacopo acoantërin. Inaso co nohuitatonhuë', ichihuë'ërin. <sup>24</sup> Naporahuaton Napanori, a'nara piyapinën sanapi nininso' Nia nicanarin. Camaicaso marë' nicanarin. Inaso sanapi Siripa itopi.

<sup>25</sup> Tahuëririnquë tashíramiachin Cacoposo', Nia ichihuë'ërinso ni'nin. Ni'sahuaton, pa'pi pa'yantërin. Napoaton Napano chiníquën nontërin:

—¡Co napochitoncohuë pora! ¡Co'ta Naqaira marë' nani sacatërahuë! ¡Nani non-pintëranco ni'sora! itërin.

<sup>26</sup> —Isëquëso api, co hua'hua nininso'ton, aso'yaraihuë'. <sup>27</sup> Nia mananso marë' a'na simana pita nicacaso ya'huërinso', naniquë'. Ina nanihuatan, Naqaira ya'huëre' acoantëranquën. Canchisë pi'i chachin ca marë' sacatacaso' nohuantohuatan, inapotëranquën, itërin Napanori. <sup>28</sup> Napotohuachina, Cacopo nohuantërin. Nia maninso marë' simana pita imapiso nanihuachinara, Napanori, Naqaira ya'huëre' acoantërin. <sup>29</sup> Napanori, a'nara piyapinën sanapi nininso' camaicaso marë' Naquiranta nicanarin. Ina sanapiso' Pira itopi. <sup>30</sup> Nani acoantohuachina, Cacoposo', Naqaira ichihuë'ërin huachi. Inapoaton ina na'con na'con nosororin. Niaso nipirinhüë', co onpopinchin nosororinhüë'. Canchisë pi'ipi chachin Napano marë' sacataantacaso' nïponahuë', nosororin.

### *Cacopo hui'ninpita nininso'*

<sup>31</sup> Cacoposo', Nia co onpopinchin nosororinhüë'. Ina nitotaton, Siniorori catahuarin hua'huanacaso marë'. Naquiraso nipirinhüë', ina nohuanton chachin, co nito hua'huaninhüë'. <sup>32</sup> Niaso', cayorahuaton quëmapia'huaya huairin. Inaso', Nopino itërin. "Sinioro sëtërahuëso' nicatedon, catahuarinco. Hua'huanahuë ni'ton, iporaso' so'yahuë nosoroaponco huachi," ta'ton, ina pochín hua'huin nohuitërin. <sup>33</sup> Naquëranchin, cayoantarahuatón, quëmapia'huaya huaiantarín. Inaso', Simion itërin. "Nocaninacoso' Sinioro

natanin. Natanaton catahuarinco. Napoaton a'na hua'huasha quëtaantarinco,” ta'ton, ina pochin hua'huin nohuitërin. <sup>34</sup> Naquëranchin cayoantarahuaton, quëmapi chachin hua'huantarin. Inaso', Nihui itërin. “Nani cara hua'huanahuë ni'ton, iporaso' so'yahuë na'con na'con chinpitaponco huachi,” ta'ton, ina pochin hua'huin nohuitërin. <sup>35</sup> Niaso', naquëranchin cayoantarahuaton quëmapi'hua chachin huaiantarin. Inaso Cota itërin. “Iporaso' huachi, Siniro pa'yatato chinotarahüë,” ta'ton ina pochin hua'huin nohuitërin. Nani catapini hua'huanahuaton, copi tënin huachi.

### 30

<sup>1</sup> Naquira co nito hua'huanatonhuë', cainpain noyaparin. Napoaton so'in itapon:

—Hua'huantoco canta'. Co'so' hua'huantohuatancohuë', chiminarahuë, itërin.

<sup>2</sup> Cacoporiso nipirihuë', no'huiton itapon:

—¡Co caso Yosëcohuë'! Ina co nohuantërinhuë ni'ton, co hua'huananhuë', itërin.

<sup>3</sup> Napotohuachina, so'in itapon:

—Ni'quë'. Piyapinëhuë Pira itërëhuaso', maquë topirahuë. Ina mapatan hua'huanpachin, cari masarahuë. Hua'huahuë chachin nicacaso marë' masarahuë.

<sup>4</sup> Inapoaton, Naquirari piyapinë Pira itopiso', so'in acoantërin. Acoantohuachina, ichihuë'ërin. <sup>5</sup> Piraso', cayorahuaton quëmapi'huaya huairin. <sup>6</sup> Naporo' Naquira tapon: “Iso hua'huasha, Tano itarahüë. Yosë nontërahuëso' natanatonco: ‘Tëhuëchachin quëmaso' noya ninan ni'ton, catahuanquën huachi,’ itërinco. Napoaton a'nara hua'huasha quëtërinco,” tënin. Ina yonquiaton ina pochin nohuitërin. <sup>7</sup> Ina quëran Pira cayoantarahuaton, quëmapi'huaya chachin huaiantarin. <sup>8</sup> Naporo' Naquira taantarin. “Iso hua'huashaso', Nipitari itarahüë. Na'con caipayarë'co nichinitërai, iporaso huachi nani minsërahuë,” ta'ton ina pochin nohuitërin.

<sup>9</sup> Nianta co huachi hua'huanacaso nanitërinhuë'. Napoaton piyapinë Siripa itopiso' Cacopo acoantërin. <sup>10-11</sup> Siripa ya'huërë' cayoaton hua'huanpachina, Niaso tapon: “¡Ma noyacha nisharahuë paya!' tënahüë. Napoaton iso hua'huashaso', Caro itarahüë,” tënin.

<sup>12</sup> Ina piquëran Siripaso', a'na ya'huërë' hua'huaantarin. <sup>13</sup> Naporo' Niaso' tapon: “¡Ma noyacha ya'huërahuë paya! Iporaso ya'ipi sanapiro'sa': ‘¡Ma noyacha inaso ya'huërin paya!' itaponaco ta'to, iso hua'huashanta', Asiri itarahüë,” tënin.

<sup>14</sup> Trico macacaso tahuëri'sa', Nopino pa'sahuaton, mantracora huayo itopiso' quënanconin. Ina masahuaton, a'shin quëshimarin. Ina quënapataton Naquirari itapon:

—Hua'huan mantracora huayo quëshirinquënso', quëtoco canta topirahuë, itërin.

<sup>15</sup> Napotopirihuë', Niari itapon:

—Ayon caira. ¡Ama napopitëraquësohuë'! ¡So'yahuë nani osërëtëranco! Hua'huahuë ya'huërë' mantracora huayo quëshirincosonta' ¿yaosërëtaantamaranco ti? itërin.

—Ina quëtohuatanco, ipora tashi Cacopo quëmarë' huë'ëpon, itërin Naquirari. <sup>16</sup> Tashi huarë' Cacopo pasto quëran huënantahuachina, Niari nacapirahuaton:

—Hua'huahuë mantracora huayo quëshirincoso', nani Naquira quëtërahuë. Quëmaro'co ipora tashi huë'ëca'huaso marë' inaquë pahuërëtërahuë, itërin.

Napotohuachina, naporo tashi Niaso', Cacopo huë'ëparin. <sup>17</sup> Hua'huanacaso marë' orarinso Yosëri natanahuaton, catahuarin. Napoaton Niaso', a'natëräpo hua'huinpita nicacaso' cayoantarin. <sup>18</sup> Nasitohuachina tapon: “Iso hua'huasha, Isacaro itarahüë. Camairahuëso sanapi so'yahuë acoantërahuë ni'ton, Yosë acanarinco,” ta'ton, ina pochin hua'huin nohuitërin. <sup>19</sup> Ina quëran Nia cayoantarahuaton, saota nicacaso' hua'huaantarin. <sup>20</sup> Nasitohuachina taantarin: “Iso hua'huashaso', Saporono itarahüë. Noya nininso chachin Yosë nicararinco. Nani saota hua'huasha a'notërahuë ni'ton, iporaso' so'yahuë noya noya ni'sarinco,” ta'ton, ina pochin nohuitërin. <sup>21</sup> Nitiquioninquë Niaso', sanapia'huaya hua'huanin. Nasitohuachina, Tina itërin.

<sup>22</sup> Naquiraso co hua'huana'pihuë ni'ton, na'con Yosë nontërin. Napohuachina, napoiyan quëran nosoroaton a'panirin. Ina nohuanton hua'huanin huachi.  
<sup>23</sup> Paninantërinso' huaihuachina, tapon: “Co hua'huana'picohuë' nicato tapanápirahuë'. Yosë chachin catahuarinco ni'ton, hua'huanato co huachi tapana'huaso ya'huërinhuë'.  
<sup>24</sup> A'na ya'huërë' Siniro quëtaanta'inco topirahuë,” ta'ton, Così itërin.

*Cacopo Napanorë', ninonpintopiso'*

<sup>25</sup> Così nasitërin piquëran Cacoposo', Napano itapon:  
 —Ya'huërahuëquë chachin yapanantapirahuë'. <sup>26</sup> Sa'ahuëpita, hui'nahuëpita, inapita quëtoco. Nani inapita marë' sacatërahuëso' nanirin. Quëma nitotëran onpo sacatërahuësona ni'ton, quëpai huachi topirahuë, itërin. <sup>27</sup> Napotopirinhüë', Napanoriso' itapon:

—Ama napoquësokuë api. Quëma yacaparanco ni'ton, Siniro catahuarinco. Ani'tato, ina nitotërahuë. Napoaton quëparitëquë ténahuë. <sup>28</sup> Sha'huitoco onposona canacamaso nohuantëranso'. Nápo chachin pahuërë'inquën, itërin.

<sup>29</sup> Napotihuachina, Cacopori itapon:

—Quëma marë' onpo sacatërahuëso', nani nitotëran. Pë'tahuanënpitanta noya a'pairahuëso', nani nitotëran. <sup>30</sup> Co'huara huë'shätërapohuë', caraíchín ya'huëtërinquën. Iporaso nipirinhüë', pa'pi notohuaro' na'amiatërin. Huë'nahuë quëran huarë' Siniro catahuarinquën. Iporaso huachi canta', caora marë' sacata'huaso' nanirin huachi, itërin.

<sup>31</sup> —Caquë chachin sacataantacaso marë' ¿onpota pahuërë'inquën? taantarín Napano.

—Ama coriqui pahuërëcosokuë'. Apira sha'huitaranquënso' nohuantohuatan, quëma marë' sacataantarahuë. <sup>32</sup> Ipora tahuëri pë'tahuanënpita huëntonënuquë pa'sarahuë. Pa'sahuato, yaráton carniroa'huaro'sa', niquë acoarahuë. Naporahuaton chipoa'huaro'santa ninshipiton nipiso', niquë acoarahuë. I'coapi nipisopitanta inapotarahuë. Inapita quëran pahuërë' quënanahuaso marë' napoarahuë.

<sup>33</sup> Inapohuato, a'na tahuëri canarahuëso ni'quihuatan, no'tëquën sacatërahuëso nitotëran. Pë'tahuatërahuëquë, i'coapiro'sa', ninshipitono'sa inaporáchin chiporo'sa quënanaran. Naporahuaton, yaráton carniro'saráchin quënanaran. Nisha quënanpatanso', ihuaranquën ni'ton, naporin, itërin Cacopori.

<sup>34</sup> —Noyapa'. Inapoa'a nipachin, ténin Napano.

<sup>35</sup> Napoaponahuë', naporu tahuëri chachin inaso chiporo'sa hui'tonpi nipisopita, i'coapi nipisopita, nisha acorin. Chipu sanapi'santa ninshipiton, nipiso', inaquë acorin. I'coapiro'sa', máquënso tëranta huiritopisopita, inapitanta inaquë chachin acorin. Ya'ipi yaráton carniroa'huaro'santa', inapotërin. Inapotahuaton hui'ninpitari a'paicaiso marë' quëtërin. <sup>36</sup> Ina quëran, pë'tahuaro'sa huayoninsopitarë chachin Napanoso', Cacopo ya'huëarin quëran, cara tahuëri iratatë pa'në'pa', pa'pi.

Cacoposo nipirinhüë', co manta taponahuë', a'napita ohuicaro'sa Napanonquën a'paitarin. A'paitapon pochin canacaso marë' isoporin: <sup>37</sup> Nara së'paro'sa huara napapiráchin nanpi së'patërinso' pë'shitërin. Isopita nararo'sa së'paquën napotërin: Aramo, ni'to', tanpapi, inapita së'paquën manin. Masahuaton, hui'tona'piarin. Hui'toninsopitanta', i'shotëra'piarin. Acopo huiritërinso ya'nocaso marë', inapotërin.

<sup>38-39</sup> Ina quëran huararo'sa hui'tonanpinan nininso', pë'tahuaro'sa huëntonën notënanquë acorin. I'sha o'opiquë acorin. Inaquë pë'tahuaro'sa nito'quëpi ni'ton, naporin. Huararo'sa notërahuatona quëmapi nipisopita to'quëtopi. Inapohuachinara hui'ninpitaso': Hui'tontono'sa', ninshipitono'sa', i'coapiro'sa', inapita hua'huatapi.

<sup>40</sup> Naporu' Cacoposo', inapita nisha acorarin huachi. Inapotërinso', Napano pë'tahuanënpita yaratonos'a', hui'tontono'sa', inapita notënanquë acoonin. To'quëcaiso marë' acoonin. Inapoaton Cacoposo', Napano pë'tahua huëntonën quëran na'apisopita, inaora huëntonënuquë acoaton ana'atarin huachi. <sup>41</sup> Panca panca pë'tahuaro'sa nipisopita

huënitohuachinara, i'sha o'opiquë huararo'sa acorin. Nito'quëapona pochin huararo'sa notëcaiso marë' naporin. <sup>42</sup> Mashiraa'huaro'sa huënitohuachinaraso', co huararo'sa acorinhüë'. Napoaton pi'pira'huaya nipisopitaso', Napano marë' ninin. Ya'huërë' panca pancaro'saso', inaoranquën ninin. <sup>43</sup> Inapoaton inaso', pa'pi ma'huanin. Pa'pi notohuaro' ohuica ya'huëtahuaton, piyapinënpitanta quëmapi'sa', sanapi'sa', ya'huëtërin. Notohuaro' camiyoro'sa', moraro'sa', inapitanta ya'huëtërin.

## 31

### *Cacopo, mi'sën ta'ananpicaso yonquirinso'*

<sup>1</sup> Ina quëran Cacoposo', mi'sënpitari pinorinso' natantërin: “Cacoposo' tata pë'tahuanënpita matahuaton, pa'pi ma'huanin,” topi natantërin. <sup>2</sup> Naporahuaton Napanori chachinta', co huachi iráca pochin nitërinhuë' ni'nin. <sup>3</sup> Naporo' Siniorori Cacopo itapon: “Tataparin, quëmopinënpita, inapita ya'huërinso parti panantaquë'. Carinquën ca'tanatënguën catahuaranquën,” itërin.

<sup>4</sup> Ina natanaton, Naquira, Nia inapita pastoque amatërin. Inaora ohuicanënpita a'pairinquë amatërin. <sup>5</sup> Huë'pachinara, itapon:

–Tataparima co huachi iráca pochin noya ni'nincohuë'. Yosëso nipirinhüë', ca'tanatonco catahuarinco. Inaso' tatahuëri chinotërinso'. <sup>6</sup> Canpitaso', nani nitotërama tata marë' chiníquën sacatërahuëso'. <sup>7</sup> Naporahuaton nonpintahuatonco co no'tëquën pahuëërincosohuënta', nitotërama'. Napoaponahuë', Yosë catahuarinco ni'ton, co aquëtë huarë' ihuarincohuë'. <sup>8</sup> A'na tahuëri tataso' tënin: “Ninshipitono'sa quëchinquën sacatëranso marë',” topachina, ya'ipi sanapi ninshipitonáchin hua'huanpi. A'na tahuërinta': “Hui'tontono'sa quëchinquën sacatëranso marë',” taantahuachinaso', hui'tontono'sáchin hua'huataantapi. <sup>9</sup> Yosë nohuanton ina pochin tata pë'tahuanënpita hua'huatopi. Canpoanquën nicacaso marë' napopi.

<sup>10</sup> A'na tahuëri pë'tahuaro'sa huënitaso', hua'narahuë. Chipo mashoro'sari, chipo sanapi'sa to'quësapi hua'narahuë. To'quëtona'piro'saso', a'naquënso hui'tonpiro'sa', a'naquënso ninshipitono'sa', a'naquëonta i'coapiro'sa', inapita quënanahuë. <sup>11</sup> Naporo chachin Yosë anquëninën përarinco: “¡Cacopo!” itërinco. Itohuachincora: “Isëquë nisharahuë,” itërahuë. <sup>12</sup> Naporo' anquëni itërinco: “Noya ni'quë', ya'ipi chipo mashoro'sa', chipo sanapi'sa to'quëpisopita, hui'tonpiro'sa', ninshipitono'sa', i'coapiro'sa', inapitaráchin to'quërapí. Napano nonpintërinquënso nitotato, ni'nanso chachin a'ninquënta nicacaso marë' catahuaranquën. <sup>13</sup> Ca mini Yosëco, iráca Pitiriquë ya'notëranquën. Inaquë na'pi tomaquë opotahuaton, chinotaancoso marë' acoran. Naporahuaton inaquë chachin casáchin chinotaancoso marë' sha'huitëranco. ¡Manóton huëquë pa'a! Iso no'pa quëran pipirahuaton, hua'huatëranso no'pa parti panantaquë',” itërinco, tënin Cacopo.

<sup>14</sup> Ina topachina, Naquira, Nia, inapitari itapon:

–Quiyanta mini tata chiminpachin, co huachi ma'sha tëranta maca'huaiso ya'huërinhuë'. <sup>15</sup> Naporahuaton ipora chachin nisharo'sa pochin tata ni'nincoi huachi. ¡Pa'anpitërarincoi ni'ton, quiya marë' pahuëretaton ina nápo sacatëran! <sup>16</sup> No'tëquën chachin Yosëri, tata ma'shanënpita, matahuaton, canpoa quëtërinpoa'. Inaso' canpoanquën, hua'huanpoapitanquën. Napoaton, ma'sona Yosë sha'huitërinquënso', niquë huachi, itopi.

### *Cacopo ta'arinso'*

<sup>17-19</sup> Sa'inpitari napotërin ni'ton, Cacoposo Canaan parti panantacaso yonquirin. Pa'pin ya'huërinso no'paquë paantacaso marë' tapatarin huachi. Napanoso' a'na parti ohuicanënpita ya'iapon pa'nin. Inaquë pa'ninso' Naquirari, pa'pin mamananshinënpita ihuarin. Ya'ipi quëmopinënpitarë chachin mosharinso', ihuarin. Cacoposo' sa'inpita, hui'ninpita, inapita, camiyoro'saquë a'mitërin. Pë'tahuanënpita,



ma'shanënpita, ya'ipi inapita quiquirin. Ya'ipi inapitaso', Patan-aranquë sacataton canarinso'. <sup>20</sup> Inapoaton Cacopori, Napano nonpintahuatón, co sha'huitaponahuë' huëshirin. <sup>21</sup> Ya'ipi ma'shanënpitarë chachin Cacoposo', ta'arin. Co hua'quiya quëranhuë', Iopiratisiiquë pëntoitahuatona', Carata motopiro'sa parti, notëëtërin.

### *Napanori Cacopo imaquirinso'*

<sup>22</sup> Cara tahuëri quëran Napanoso', Cacopo ta'arinso' nitotërin. <sup>23-24</sup> Ina nitotaton, quëmopinënpitarë chachin, imaquirin. Canchisë tahuëri quëran, Carata motopiro'sa parti canquiipi. Napoaponahuë', naporó tashi Yosëri huë'ënuquë ya'notaton itapon: "Natanquë Napano sha'huichinquën. Ni'quëna Cacopo no'huiton ma'sha onpototan. Tananpitëquë pa'in," itërin. Tahuërianpituatón Napanoso', <sup>25</sup> piyapinënpitarë chachin Carata motopiro'saquë Cacopo nincantopi. Ina motopiro'saquë inanta', huëntonënë chachin chinotopi. Napanonta ina motopiro'saquë chinotaponahuë', co niquënananyátërapihuë'. <sup>26</sup> Cacopo quënanahuatón, chiníquën nontërin:

—¡Pa'pi co noyahuë' ninan! ¡Co nonpinchitoncohuë' pora! Ahuëtahuatë sanapi'sa manëso pochin hui'nahuëpita quëshiaranco. <sup>27</sup> Nonpintatonco, co sha'huitaponcorahuë' ta'aiaran. ¡Co naporëhuë'! Ya'huëranquë yapaantaranso sha'huitëranco naporini, noya ninontatëhua capa cancanchitërihuahuë'. Pita nicatëhua': Tonton, arpa, inapita pi'nipiquë ninonchitërihuahuë'. <sup>28</sup> Hui'nahuëpita, shihuëpitanta', ichita'airan ni'ton, co apinoto nonta'huaso' quëtërancohuë'. ¡Co manta yonquirëhuë pochin ninan! <sup>29</sup> Nohuantërahuë naporini, ma'shátërahuë ya'ipinquëma ana'inchitënuquëmahuë'. Napoaponahuë', achin tashi chachin Yosë nontërinco. Inaso' tataparionta chinotërin. Huë'ëhuëquë ya'notatonco nontërinco: "Natanquë Napano sha'huichinquën. Ni'quëna Cacopo no'huiton ma'sha onpototan. Tananpitëquë pa'in," itërinco. <sup>30</sup> Tataparín ya'huërinquë ya'nipishahuë yapantaton huë'saran ni'quëhuarë', ¡co mamanshinëhuëpitaso' ihuatónco quëitonhuë' pora! itërin Napanori.

<sup>31</sup> Napotihuachina, Cacopori Napano itapon:

—Të'huatatënuquën topinan huë'sarahuë: "Paanta'huaso sha'huitohuatoso', sa'ahuëpita osërëtarinco," ta'to, naporahuë. <sup>32</sup> Nipirinhuë', insosona tëranta mamanshinënpita matahuatënuquën, quësahuachin, ¡chimiin! Ma'sona tëranta quëmaquën nininso' quësahuato, ya'ipi quëmopinënpita ni'tonënuquë a'noquë'. Inapotaton quëpamantaquë', itërin. Napopirinhuë' Cacoposo', Naquirari pa'pin mamanshinënpita ihuarinso', co nitotërinhuë'. <sup>33</sup> Naporó' Napanoso', mamanshinënpita yoniton patë patërantarin. Cacopo në'mëtë pëinënuquë'ton ya'conin. Pipirahuatón, Cacopo cosonanënpita niniinquë, ya'coantarin. Nianquën niniinquënta ya'conaponahuë', co mamanshinënpita quënaninhuë'. Ina quëran pipirahuatón, Naquiranquën niniinquë ya'huërë' ya'coantarin. <sup>34</sup> Naquiraso' mamanshiro'sa masahuatón, po'orin. Camiyoquë huënsëcaiso marë' nitopisoanaquë po'orin. Inapotahuatón, ina aipi huënsëtërin. Pa'pinso' ya'ipi në'mëtë pëianaquë yonípirinhuë', co quënaninhuë'. <sup>35</sup> Naquirari itapon:

—Tata, co huanirahuëso marëhuë', ama no'huicosohuë'. Sanapicoi inachintëraisó tahuëri nanitërinco ni'ton, huënsëárahue', itërin. Napanori mamanshinënpita yon-ísápirinhuë', co quënaninhuë'.

<sup>36</sup> Co quënanpachinahuë', Cacopo ya'huërë' no'huitaton Napano chiníquën nontërin.

—¿Maquëta tēhuëtëranquën ni'nan? ¿Ma'ta onpoato oshahuanahuë ni'ton, co napion cancantaton imaquirancoso'? <sup>37</sup> Ya'ipi ma'shanëhuëpita o'quiatón yoniran. ¿Ma'ta quënaparanco quëmaquën nininso'? Ma'sona quënanpatan, a'ninquëchin, quëmopinënpita notënanquë acoquë'. Quëmopinëhuëpitarinta', ni'in. Inapita sha'huichinpoa' insosona no'tëquën noninso'. <sup>38</sup> Cato shonca pi'i quëma marë' sacatërahuë. Naporó' co a'na ohuica tëranta', co a'na chipo tëranta ana'huarinhuë'. Huëntonënpita quëran, co a'na carniro tëranta', capitëranquënhuë'. <sup>39</sup> Ni'niro'sari pë'tahuanënpita tēpahuachinara, co onporó



tëranta a'nota'huanquënso marë' quëshiranquënhuë'. Caoranquën masahuato, acoantarahuë. Tahuërihuë nipon, tashihuë nipon, ihuatohuachinanta', ca apahuërëtëranco. <sup>40</sup> Tahuëri nipachina pi'i acorinco, tashinta nipachina sëhuën acorinco. Pë'tahuaros'a a'paito, huë'ëi natanahuë. Inapoato nohuantaso' parisitërahuë. <sup>41</sup> Cato shonca pi'i quëma marë' sacatato, ya'ipi inapita ahuantërahuë. Cato hui'nanpita marë' shonca catapini pi'ipi sacatërahuë. Pë'tahuanënpita marënta', saota pi'i sacatërahuë. Naporahuaton, apira apira pochin nisha nisha cana'huaso sha'huitëranco. <sup>42</sup> Apraan chinotërinso catahuarinco. Tata Isaconta', inachachin chinotërin. Co'so' ina catahuarincohuë naporini, topinamiáchin ya'huërahuëquë a'pa'itoncohuë'. Yosëso nipirinhuë', parisitërahuëso' nitotërin. Chiniquën sacatato ma'sha ya'huëtërinco'sonta', nitotërin. Napoaton achin tashi pënëninquën, itërin Cacopori.

### *Cacopo, Napanorë' anoyatopiso'*

<sup>43</sup> Cacopori napotohuachina, Napanoso' tapon:

—Isopita catoro'saso', hui'nahuëpita. Isopita hua'huaro'santa shihuëpita. Pë'tahua huëntono'santa', caquën. Ya'ipi isëquë ni'nanso', caquënáchin. Napoaponahuë', hui'nahuëpita catahua'huaso marë' ya'ipi quëchi nipachin. Shihuëpitanta quëchi.

<sup>44</sup> Napoaton huëquë pa'a Yoscoarë' niitatë anoyata'a. Catonpo chachin anoyatërehuaso ayonquiinposo marë' inapoa'a, itërin. <sup>45</sup> Napotohuachina, Cacoponta', “Noyapa,” tëcaton, a'nara na'pi manin. Ina masahuaton, onë pochin ahuanirin. <sup>46</sup> Naporo' quëmopinënpita camairin:

—¡Na'piro'sa yontonco! itërin. Itohuachina, ya'ipiya quëran na'piro'sa yontonpi. A'mitë a'mitëtahuatona', panca imopi. Ina quëran, ya'ipiya coshatopi, na'piro'sa a'mitë a'mitëtopiso pirayan coshatopi. <sup>47</sup> Napanoso' inaora nanamënquë, ina ro'të nohuitaton, “Quicaro Saatota,” itërin. Cacoporiso nipirinhuë', inaora nanamënquë ina ro'të chachin, Carata, itërin. <sup>48</sup> Naporo' Napano tapon:

—Iso na'piro'sa imorëso', catonpo chachin ayonquiariinpo Yoscoarë' ta'të ipora tahuëri anoyatëre'so'. Napoaton, ina no'paso' ipora huanta Carata, itopi. <sup>49-50</sup> Naporahuaton Mispá itopi anta': “Nipatohuatë, co huachi niquënanarihuë'. Napoaponahuë', Sinioro chachin ni'inpo'. Co insonta ya'huërëquë naporëso ni'pirinpohuë', Yosë chachin ni'inpo'. Napoaton ama hui'nahuëpita no'huiton aparisitëquësokuë'. Ama aquëtë chachin sanapi'sa maantaquësokuë'. Ina marë' Yoscoarë' ta'ton sha'huitoco,” itërin. Ina naporinso marë' ina pochin ina no'pa' nohuitopi.

<sup>51</sup> Napanoso' aquëtë chachin Cacopo sha'huitaantarin:

—Ni'quë'. Na'pi imorahuëso ya'huëarin. Onë pochin na'pi ahuanirahuësonta ya'huarin. Ya'huërëhuaso huáncana inapita acorahuë. <sup>52</sup> Inapita ayonquiariinpo ama quëmanta ma'sha onpotancoso marëhuë', isëquëran pëntonquësokuë'. Co ca tëranta ma'sha onpota'huanquënso marë' isëquëran pëntona'huaso ya'huërinhuë'. <sup>53</sup> Canpo capini nanan ya'huëhuachin, Yosë chachin anitochinpo', inquënposona tëhuërëso'. Ina Yosë chachin quëmaquën tata masho Apraan, chinotërin. Caquën tata masho Nacoronta chinotërin. Inquënposo tëhuëhuatë', ina chachin ana'inchinpo', itërin. Napotohuachina, Cacoposo': “Caquën tata chinotërinso ni'sárinco ni'ton, co napoarahuë',” tënin. <sup>54</sup> Inapoa'tona anoyatohuachinara, Cacoposo' inaquë chachin Yosë chinotacaso marë' ma'sharo'sa tëparin. Nani Yosë chinotohuachinara, quëmopinënpita ichicoshatërin. Ya'ipiya coshatopi. Nani coshatohuachinara, inaquë chachin huë'ëantapi.

<sup>55</sup> Tahuëririnquë tashíramiachin Napanoso' huënsëintarahuaton, hui'ninpita, shinpita, inapita apinora'piarin: “Yosë catahuainquëma noya paco',” itahuaton ya'huërinquë pa'mantarin huachi.

1-2 Napano piyapinēnpitarē chachin pa'mantahuachina, Cacoponta piyapinēnpitarē chachin paantarín. Paasoi Cacoposo', Yosē anquēninēnpitari nacapirín. Inapita quēnanahuaton, tapon: "Isopitaso', Yosē sontaronēnpita huēnton. Catahuainacoso marē' a'paimarinso'," tēnin. Napoaton ina ro'tēso': Maanain\*, itērin.

3-4 Naporo' Cacoposo', comisiono'sa Isao sha'huitacaiso marē' Sēir no'paquē a'parín: "Iya'hua huēnantárin ni'ton, iso pochín nanan a'patiarinquēn: 'Ca iya masho huēnantárahüē. Ma'sona quēma camaitērānsō nisarahuē. Cato shonca pi'ipi api Napano ya'huērinquē yacapatērahüē. 5 Na'a ohuacaro'sa', moraro'sa', ohuicaro'sa', inapita ya'huētērinco. Piyapinēhuēpitanta', quēmapi'sa', sanapi'sa', ya'huētērinco. Iso nanan, a'pataranquēn noya ninicatē ya'huēantacaso marē' tēnin, itoco'," itērin. Napotahuaton a'parín.

6 Comisiono'sa huēnantahuachinara, Cacopo sha'huitiintapi:

—Iya masho Isao nicapoi a'parancoi ni'toi, pa'nai. Huē'sarānsō nitotaton, inaora chachin nacapiinquēnsō marē' huē'sarín. Catapini pasa quēmapi'sari imaquiarín, itipi. 7-8 Ina natanahuaton, Cacoposo pa'pi pa'yanín. Pa'yanaton yonquirárin. Yonquirárin quēran, piyapinēnpita, ohuicanēnpita, ohuacanēnpita, camiyonēnpita, inapita cato huēnton acorín. "Iya mashori, a'na huēnton ahuēhuachina', a'na huēntonso ta'ararín," ta'ton naporín.

9 Ina quēran iin tē'huataton, iso pochín Yosē nontērin: "Sinioro, quēmaso Yosēnquēn. Tata masho Apraan chinotērinquēn. Tata Isaconta chinotērinquēn. Quēma sha'huitēranco ni'ton, ya'huērahüēquē huē'sarahuē. Quēmopinēhuēpita ya'huērinquē huē'sarahuē. Naporahuaton: 'Ca nohuanton noya pa'saran,' itēranco. 10 Tēhuēnchachín co noyacohüē' ni'to, co nosoroancoso' ya'huērinhuē'. Co no'tēquēnáchin catahuaancoso ya'huēpirínhuē'. Iráca ya'huērahüē quēran pipipo, Cortaniiquē pēntoitērahüē. Naporo' co ma'sha tēranta quēparahuē. Pitananēhuēro'coáchin pa'nahuē. Napopirahuē', iporaso' cato huēnton pochín hua'anēntērahüē. 11 ¡Nosoroatonco Sinioro iya masho Isao quēran, nicha'ēco! Nani huē'sarín ni'ton, ahuērahuatōnco, sa'ahuēpita, hui'nahuēpitarē'co chachín niquitohuachínco. 12 Nani quēma chachín, catahuancoso marē' a'ninquēchin sha'huitēranco. Naporahuaton, shihuēpitanta caquēran pipipisopita, inotēra'huaya pochín na'acaiso' sha'huitēranco. Marē yonsanquē inotērahüaya ya'huērinso', co pichicasohüē'. Ina pochín na'acaiso' nani sha'huitēranco," itērin.

13 Naporo tashi inaquē Cacopo huē'ērin. Tahuērínquē capayatahuaton, ya'cariya ya'huērinsopita quēran, pētahuaro'sa huayonín. Iin masho Isao nicanacaso marē' huayonín: 14-15 Cato pasa chipo sanapi, cato shonca chipo, cato pasa ohuica, cato shonca carniro, cara shonca camiyo paya nasha huaipiso hua'huinpitare chachín, catapini shonca ohuaca', shonca toroa'hua, cato shonca mora sanapi nininso', shonca mora quēmapi, inapita.

16 Inapita huayonahuaton, piyapinēnpita quētērin a'na huēnton a'na huēnton quēpacaiso marē'. Co'huara pa'shátērasoihuē', ma'sona nicacaisonta sha'huitērin:

—Canpitaso quēchitoco'. A'na huēnton'ton pa'in. Amasha aguēmiachín nipachín a'na ya'huērē', paanta'in. Ama napopináchin pacosohüē', itērin. 17-18 Quēchinamēn huēnton quēpana'pi sha'huitērin:

—Iya masho Isao nacapiatēnquēn natanpachínquēn: "¿Inta quēmaso' hua'anēn? ¿Intohuata pa'saran? ¿Inquēnta pē'tahuaro'sa quēpaarānsō'?" itohuachínquēn, quēmari iso pochín sha'huitēquē': "Isopita pē'tahuaro'saso', quēma marē' quēsarahuē. Cacopo a'patiarinquēn. Inaso', quēma piyapinēn pochín cancantērin. Nani inanta piquēran huē'sarín," itēquē', itērin. 19 A'napita huēnton quēpana'piro'santa', sha'huitērin:

—Canpitanta iya masho Isao quēnanpatama', inachachín sha'huitoco'. 20 Nani sha'huitohuatama', napotaantaco': "Inaora chachínso', piquēran huē'sarín," itoco', itērin.

\* 32:1-2 Maanainso': Cato huēnton sontaro'sa', tapon naporín.

Isopochin yonquiaton Cacopo naporin: “Isopita pè'tahuaros'a quètato no'huirincoso asanoarahuë. Ina piquëran caora chachin ni'sarahuë. Tapon a inapotërahuëso marë' inanta noya nontaantarinco,” ténin yonquinënuë. <sup>21</sup> Inapoaton Isao quëtacaso'ton, aquëchitërin. Inaoraso nipirihuë', huë'ëcaso marë' ya'huëarinquëranchin quëparitërin.

### *Cacopo anquë'nirë nipanirinso'*

<sup>22-23</sup> Napoaponahuë', naporos tashi chachin co'huara huë'ëshátërasoihuë', Cacoposo' huanirin. Huanirahuaton, cato sa'inpita, cato cosonanënpita, inapita ayontonin. Shonca a'na hui'ninpitanta inaquë chachin ayontonin. Ayontonahuaton Capocoi' pëntoinantaquëchin, apëntoitërin. Ya'ipi pè'tahuanënpita, ya'ipi ma'shanënpita, inapitarë chachin aquëtëran a'parin.

<sup>24</sup> Cacoposo' inaora quëparitohuachina, a'nara quëmapi ya'norin. Inarë tahuërianpitaquë huarë' nohuantaso' nipanipi. <sup>25</sup> Napoaponahuë quëmapi ya'norinsoso', co Cacopo minsëcaso nanitërinhuë'. Co nanitatonhuë', Cacopo tonaransën, ahuëtërin. Catantën nipaquëtërintaquëchin ahuërin ni'ton, notohuëtërin. Nipaniso' napotërin. <sup>26</sup> Quëmapi ya'norinsoso', Cacopo itapon:

—A'poco huachi, nani tahuëririarin, itërin.

—Co'so' noya ya'huëca'huaso marë' sha'huitohuatancohuë', co a'poaranquënhuë', itërin inarinta'.

<sup>27</sup> —¿Ma'ninquënta quëmaso'? itaantarin quëmapi.

—Cacopo itërinaco, taantarin inanta'. <sup>28</sup> Naporos' ina quëmapi' itapon:

—Co huachi Cacopo itarinënhuë'. Ipora quëran huarë' Israiro itarinën. Yosë chinitëran, piyapi'santa chinitëran. Chinitaton canatëran ni'ton, ina pochin nohuitarinën, itërin.

<sup>29</sup> —Iporaso' quëmanta' nininën sha'huitoco, itërin Cacopori. Napotopirihuë', inariso itapon:

—Co quëmaso' nininëhuë natanancoso ya'huërinhuë', itërin. Ina quëran inaquë chachin Cacopo noya ya'huëcaso marë' sha'huitërin. <sup>30</sup> Napoaton Cacoposo' ina ro'të aninihuanin: “Pinoiro†,” itërin. “Isëquë chachin, Yosë nirayarahuë. Ina niponahuë' co chiminahuë',” ta'ton, ina pochin ina ro'të nohuitërin.

<sup>31</sup> Pi'i pipiriahuasos', Pinoiro quëran huë'sarin huachi. Catantëntaquëchin, tonaransë notohuëtërin ni'ton, sonpariarin. <sup>32</sup> Napoaton iso quirica ninshitasoco huarënta Israiro shinpitaso', ma'sharos'a catantënuë pancarin ipatë ya'huëtërinso', co ca'pihuë'. Inaquë Cacopo ahuëpi ni'ton, co ca'pihuë'.

## 33

### *Cacopo Isaorë' nanan anoyatopiso'*

<sup>1</sup> Cacoposo', Isao catapini pasa quëmapi'sarë chachin huë'sarin ni'nin. Ina ni'sahuaton, cara huënton hui'ninpita acorin. Niataquë a'na huënton, Naquirataquë a'na huënton, cosonaros'sataquë, a'na huënton. <sup>2</sup> Cosonaros'sa'ton hua'huinpitarë chachin aquëchitërin. Ina quëran Nia hua'huinpitarë chachin ahuanacatërin. Naquiraso', Cosirë' piquëran acorin. <sup>3</sup> Inaporahuaton, Cacoposo quëchitërin. Iin masho ya'cariapon pochin, canchisëro mosharin. Isonin quëran no'paquë huarë' monshorahuaton mosharin. <sup>4</sup> Cacoposo' tē'huaton naporin. Napopirihuë Isaoriso', ta'aquirahuaton iin iporin. Iporahuaton, apinorin, naporin. Cato chachin noya ancantatona', nina'nëtopi. <sup>5</sup> Ina quëran Isaoso', sanapi'sa', hua'huaros'a inapita ni'nin. Ni'sahuaton iin natanin:

—¿Isopita po'? ¿Inpitata? itërin.

—Hui'nahuëpita ta'a. Yosë nohuanton ya'huërinso', ténin Cacopo. <sup>6</sup> Naporos' cosonaros'saso hua'huinpitarë chachin, Isao huëcapaipi. Ina notënanquë huë'sahuatona', isonpi. Isonpi quëran no'paquë huarë' monshorahuatona', moshaiipi. <sup>7</sup> Ina quëran

† 32:30 Pinoirosos': Yosë ya'pirin tapon naporin.

Nia ya'huërë' hua'huinpitarë chachin, inapoantapi. Piquëran Cosiso', a'shinë chachin, huë'sahuatona', Isao notënanquë inahuanta inapoantapi.

<sup>8</sup> Ina quëran Isaoso', Cacopo natanin:

—¿Ma'marëta ina nápo pë'tahua huëntono'sa a'paransopita, nacapirimarahuë? itërin.

—Noya ninicatë ya'huantacaso marë' a'patëranquënsopita, itërin Cacopori.

<sup>9</sup> —Ama iya'hua napoquësohuë'. Canta ya'huëtërinco chachin. Co quëtaancoso ya'huërinhuë', itërin Isaori. <sup>10</sup> Itopirinhüë', Cacoposo' taantarín:

—Ama iya masho napoquësohuë'. Tëhuë'nchachin noya ninicatë ya'huantacaso nohuantohuatan, onpopionta maquë ta'a. Quëmaora chachin noya nontaantarancoso' nicato, Yosë chachin napotërinco pochin cancantërahuë. <sup>11</sup> Yosë nohuanton ma'huanahuë, co manta pahuantërincohuë'. Napoaton, quëshiranquënsopita, onpopionta maquë', itërin. Napotápaton Isao anohuantërin. Ya'ipi a'patërinso' manin huachi.

<sup>12</sup> Ina quëran Isao taantarín:

—Noyapa'. Huëquë nipachin carinquën ca'tainquën pa'a, itërin. <sup>13</sup> Napotohuachina, Cacoporiso itapon:

—Tëhuë'nchachin iya masho nosoroatonco napotëranco. Nipirinhüë' hui'nahuëpita hua'huaro'saráchin. Ohuicaro'sa', ohuacaro'sa', inapitanta nasha hua'huatopiso ya'huërin. Manon quëpahuatëso', a'na tahuëri marëáchin nanitërin, ohuica'huaro'sa taquicaíso'. <sup>14</sup> Noya quëmaso' pataquë topirahuë. Quiyaso nipirinhüë' oshaquëranchin pacapoi. Hua'huaro'sapitarë'coi, pë'tahuarosapitarë'coi oshaquëran pa'sarai. Co hua'quiya quëranhuë', Sëir parti cantoontapatëinquën, inaquë niquënaantarihua huachi, itërin.

<sup>15</sup> —Noyapa'. Naporan ni'quëhuarë', quëchitota'i nipachin. Nipirinhüë' ca'tainquënso marë' caraya piyapinhüëpita pachi, itërin. Itopirinhüë', Cacoposo taantarín:

—Ama iya napoquësohuë'. Noya quiyao pa'sarai, itërin. <sup>16</sup> Napotohuachina, Isaoso piyapinënpitarë chachin Sëir parti paantarín.

<sup>17</sup> Cacoposo nipirinhüë', Socoto parti pa'nin. Inaquë pëitacaiso marë' piyapinënpita camairin. Naporahuaton, pë'tahuanënpita na'icaiso marë' tanpora'huaro'sa anitërin. Napoaton, ina no'pa' "Socoto\*" itërin. <sup>18</sup> Inaquë hua'quimiachin ya'huërin. Ina quëran Cacoposo', ya'ipi huëntonënë chachin Siquimo ninano notënanquë pa'nin. Inaquë në'mëtë pëiro'sa otëantarín. Inapoaton Patan-aran quëran huë'ninso', Canaan no'paquë noya canquirin. <sup>19</sup> Në'mëtë pëiro'sa otënpiso' no'pa', Cacoposo' pasa coriqui marë' pa'anin. Ina no'paso', a'na quëmapi Amoro itopiso' hui'ninpitari hua'anëntopirinhüë', pa'antërin. Inaso', a'nara hui'nin ya'huëtërin, Siquimo itopi. <sup>20</sup> Ina piquëran Cacoposo', Yosë chinotacaso marë' a'nara artaro ninin. Ina nisahuaton aninuhanin: Ir Iroi Israiro†, itërin.

## 34

### *Siquimori Tina tapiton po'orinso marë' i'huërëtopiso'*

<sup>1</sup> Cacopo hui'nin Niaquëya ya'huëtërinso', Tina itopi. Ina nanontohuachina, a'na tahuëri Siquimo ninanoquë nanon capini nini'cai marë' pa'nin. <sup>2</sup> Inaquë ni'so', Siquimori ni'sahuaton noyarín. Inaso', sha'huitëranquëmaso chachin Amoro hui'nin. Amoroso', hua'an ya'conin. Ipo piyapi ni'ton, ya'ipi iporo'sa hua'anëntërin. Siquimori Tina co nohuanchachinpirinhüë' ichihuë'ërahuaton, po'orin. <sup>3</sup> Napoaponahuë', pa'pi nohuantërin. Napoaton Tinari nohuantacaso marë' ma'pitaso ninin. <sup>4</sup> Naporo chachin Siquimoso' pa'pin itapon:

—Paaton tata, Tina maca'huaso marë' pa'pin nontoonquë'. Quëmopinënpitanta nontoonquë'. Ina pa'pi nohuantërahuë, itërin.

\* **33:17** Socotoso': Tanpora'huaro'sa', tapon naporin. † **33:20** Ir Iroi Israiroso': Yosëso', Israirori chinotërinso', tapon naporin.



<sup>5</sup> Cacoposo' hui'nin po'opiso' nitotaponahuë', co manta téninhuë'. Hui'ninpita pë'tahuaro'sa a'pairapi ni'ton, co manta téninhuë'. Inapita canquiai huarë' sha'huitacaso' yonquirin. <sup>6</sup> Siquimo pa'pinso' Cacopo nontacaso marë' pa'nin. <sup>7</sup> Cacopo hui'ninpita huénantahuachinara, napopiso' natantopi. Natantahuatona', pa'pi no'huitopi. Siquimori oshina co mashátëraponahuë', ichihuë'ërin ni'ton, napopi: “Inapoaton inaso', is-rairo'sanpoa panca tēhuëtërinpoa'. ¡Co onporonta inapocaso ya'huërinhuë'!” topi. <sup>8</sup> Amoroso nipirinhüë', inapita nontaton napotërin:

—Hui'nahuë Siquimo itërahuëso', oshiparima pa'pi nohuantërin macacaso marë'. Onpopionta quëtoco'. <sup>9</sup> Inapoatëhua', ya'huëa'ahua topirahuë. Napohuatëhua', quiyanta canpita hui'nama macapoi. Canpitanta', quiya hui'nahuëi masarama'. <sup>10</sup> Isëquë quëparitatoma', quiyapitarë' ya'huëco'. Iso no'paquë ya'huatoma sacatoco'. Nohuantëramaso' pa'anco'. No'panta yapa'anpatama', pa'anco', itërin.

<sup>11</sup> Siquimonta huanirahuaton, nonsarin huachi:

—Tata napotërinquëmaso', nohuantoco ta'a. Onposo' natanpatamaco quëtaranquëma'.

<sup>12</sup> Sanapi marë' pahuërëtërë quëran na'con na'con apahuërëtohuatamaco noya, co ma'shahuë'. Naporahuaton ma'sona nicana'huanquëmaso' natanpatamaconta', quëtaranquëma'. Onpopionta cari mai, topirahuë, ténin.

<sup>13</sup> Napopirinhüë', inapitariso oshina na'inin ni'ton, i'huërëtaçaiso marë' yamonapi. Napoaton Siquimoso' pa'pinë chachin noyasha nontatona itapona':

<sup>14</sup> —Noya nipirinhüë'. Co quiyaso' nanitëraihuë' co marchuan quëmapi oshihuëi quëta'huaiso'. Quëtërai naporini, quiya marëso' pa'pi taparo niitonhuë'. <sup>15</sup> Ya'ipinquëma quiya pochachin marchuanama huarë' canpita naporamaso nisarai. Nohuantohuatama', ya'ipi quëmapinquëma marca niacotoco nipachin. <sup>16</sup> Naporo huarë' tēhuëchinsos', canpitanta hui'nahuëi masarama', quiyanta canpita hui'nama masarai. Inapohuatëhua a'na huëntoínchin pochin nisarëhua huachi. <sup>17</sup> Nipirinhüë', co'so' nohuantohuatamahuë', isëquëran pipiarai. Oshihuëinta macatoï, quëpaarai, itopi.

<sup>18</sup> Napotohuachina Siquimoso' nohuantërin. Pa'pionta nohuantërin. <sup>19-20</sup> Cacopo hui'nin pa'pi nohuantaton Siquimoso', a'naroáchin natëtërin. Inaso', ya'ipi Amoro hui'ninpita quëran chini chiniquën nanantërin. Napoaton, pa'pinë chachin ninano ya'coanaquë pa'pi. Inaquë ya'huëhuano'sa niyontonpi, ma'sha yonquiatona anoyataçaiso marë'. Ya'huëhuano'sa niyontonpachinara, itapona':

<sup>21</sup> —Pasopitaso' noyaro'sa'. Pancana no'pa' ya'huëtërinpoa ni'ton, inapitanta yacapatënënpoa' pa'anapona'. Canpoanta nanitarihua inahua hui'ninpita macacaso'. Ya'huërë' inapitanta canpoa hui'nanpoa nanitapi macacaçaiso'. <sup>22</sup> Napoaponahuë' inapoatëhua ya'huëcaso marë', ya'ipi quëmapinpoa marchuanacaso' nohuantopi. Inahua napopiso chachin canpoanta nicacaso' nohuantopi. <sup>23</sup> Inapohuatëhua', ya'ipi ya'huëtopiso canpoanquën nisarín. Pë'tahuanëna', ma'shanëna', ya'ipi inapita canpoanquën nisarín. Huëco nohuantoco inapoa'ahua'. Napohuatëhua', inapitaso canpoarë' ya'huëçaiso marë' quëparitapi, itopi. <sup>24</sup> Siquimo pa'pinë chachin napopiso natanatona', nohuantopi. Napoaton ya'ipi quëmapi'sa chiniquëno'sa nipiso', marca niacotopi huachi.

<sup>25</sup> Niacotopi quëran cara tahuëritapasos', Cacopo hui'ninpita Siquimo ninanoquë pa'pi. Simion, Nihui, inapita itopiso' pa'pi. Inapitaso', Tina yo'inamiáchin nipi. Ya'huëhuano'sa marca niacotopiso', pa'pi iquitopi. Inapoasoi chachin pa'sahuatona', sahuëninënaquë ya'ipi quëmapi'sa tēpaconpi. Co noyachátërasoihuë' ahuëtopi ni'ton, co chinitopihuë'.

<sup>26</sup> Amoronta', Siquimorë chachin tēpapi. Inapotahuatona', Siquimo pëinën quëran Tina masahuatona', pa'pi huachi. <sup>27</sup> A'napita iinpitanta canquirahuatona', ya'ipi quëmapi'sa nani tēpapi ni'ton, ninanoquë ma'sha ya'huërinso mamiatopi. Oshina Siquimori tapirinsos marë', i'huërëtatona inapotopi. <sup>28</sup> Ya'ipi ohuicanëna', ohuacanëna', moranëna', inapita matopi. Ya'ipi ninanoquë ya'huërinso', aipiraonta ya'huërinso', mapi. <sup>29</sup> Pëiro'saquë ma'sha ya'huërinso'pitanta', ya'ipi ihuatopi. Naporahuaton ya'ipi



hua'huaro'sa', sanapi'sa', inapitanta masahuatona quëpapi. <sup>30</sup> Simion, Nihui, inapita huënantahuachinara, pa'pinari itapon:

—Canpitaso napoatoma', sacai anoyata'huaso nitëramaco. Canano'sa', huirisëro'sa inapitaso', ya'huëhuano'sa'. Naporamaso natantohuachina', no'huiponaco caso huachi. Nihuëntonahuatona ahuëaponaco. Caso co na'ashahuë' piyapinëhuëpita ya'huëtërinco ni'ton, ya'ipinpoa tiquiaponënpoa', itërin. <sup>31</sup> Napotopirinhuë', inapitariso itaantapi:

—¿Monshihuantë paya pochin oshihuë nitacaso' nohuantopiranhuë' ti? itopi.

## 35

### *Yosëri Pitiriquë Cacopo noya ya'huëcaso marë' sha'huitërinso'*

<sup>1</sup> Naporo' Yosëri Cacopo huë'ënquë ya'notaton, camairin: “Caso Yosëco. Iráca iya masho Isao ta'ananpisën ya'notëranquën. Pitiriquë paantaton, inaquë ya'huëconquë'. Inaquë canconpatan, chinotaancoso marë' a'nara artaro niquë',” itërin. <sup>2</sup> Napotohuachina Cacoposo', ya'ipi hui'ninpita, sa'inpita, piyapinënpita, inapita camairin:

—Ya'ipi nisha nisha mamanshiro'sa chinotëramaso', a'poco'. A'poatoma quëshico pa'pita'hua'. Naporahuaton amarahuatoma', noya nininso i'nanpiraco'. <sup>3</sup> Manóton Pitiriquë pa'ahua'. Inaquë Yosë chinota'huaso marë' artaro nica'huaso ya'huërin. Iráca nanan ya'huëtaponco, Yosëso na'con catahuarinco. Naporahuaton, itohua itohua pa'nahuëquë, ca'tanatonco catahuarinco, itërin.

<sup>4</sup> Napotohuachina, nisha nisha mamanshinëna moshapiso quëshipi. Pë'tëhuëratëro'santa moshapiso quëshipi. Ya'ipi inapita Cacopori Siquimo ninano ya'cari', pa'pitërin. A'nara insina nara pirayan, pa'pitërin. <sup>5</sup> Pa'pachinara, Yosë nohuanton, nisha nisha ninanoro'saquë ya'huëpisopita pa'pi të'huapi. Napoatona co nanitopihuë' Cacopo hui'ninpita, imatona i'huërëtaçaiso'.

<sup>6</sup> Cacoposo' huëntonënë chachin, pa'sápatona', Noso ninanoquë canconpi. (Ina ninanoso', Pitiri itopi anta', Canaan parti ya'huërin.) <sup>7</sup> Inaquë canconahuaton, artaro ninin huachi. Inaquë Yosë chinotërin ni'ton, ina ro'të aninahuanin: “Iri Pitiri\*” itërin. Iráca iin të'huataton ta'ananpihuachina, inaquë chachin Yosëri huë'ënquë ya'notërin ni'ton, napo nohuitërin.

<sup>8</sup> Nípica piyapinën Tipora itopisonta chiminpachina, inaquë chachin pa'pitopi. Insina nara pirayan pa'pitopi. Pitiri ninano ya'cariya, inapotopi. Cacopori inanta aninahuanin: “Na'nëi' insina,” itërin.

<sup>9</sup> Cacopo Patan-aran quëran huënantahuachina, Yosëri naquëranchin inaquë ya'notaantarín. Ya'notaton noya ya'huëcaso marë' sha'huitërin. <sup>10-12</sup> Iso pochin sha'huitërin:

“Quëmaso' Cacopo itërinën.

Co huachi ina pochin nohuitarinënquënhuë'.

Ipora quëran huarë' Israiro itarinën,” itërin.

Ina quëran nininën canpiatahuaton itaantapon:

“Caso Yosëco, ya'ipi nanitaparahuë.

Notohuaro' hui'nanpita ya'huëchinquën.

Shiparinpitanta', hua'huayátërahuë ya'huë'ina'.

Quëmá quëran, a'na nacion pipipon.

Naporahuaton, shiparinpitanta na'a huëntono'sa nicapona'.

A'naquën shiparinpita, copirno ya'conapona'.

Tata masho Apraan, tataparín Isaco,

inapita iso no'pa' ahua'anëntërahuë.

Ina chachin quëmanta quëchinquën.

Shiparinpitanta iso no'pa chachin hua'anëntapona',” itërin Yosëri.

\* 35:7 Iri Pitiriso': Pitiriquë ya'huërinso Yosë, tapon naporin.

13-14 Napotahuaton pa'pachina, Cacoposo' a'nara na'pi masahuaton onë pochin ahuanirin. Yosëri nontërintaquë chachin ahuanirin. Ina quëran toma', huino, inapitaquë opotahuaton, Yosë marë' acorin. <sup>15</sup> Iráca nohuitërinso chachin ina ninanoso', Pitiri itërin.

### *Naquira chiminso'*

<sup>16-17</sup> Hua'quimiachin inaquë ya'huërapí quëran paantapí. Pa'sápatona', Iporata nianoquë ya'caritopí huachi. Inaquë Naquiraso', pa'pi parisë quëran huaiton, co'chachin ninin. Napoaso ahuaítóna'píri itapon: “Ama pa'yanquësóhuë', quëmapi chachin huaiyantaran,” itërin. <sup>18</sup> Napotopirínhuë', Naquiraso' yachiminin huachi. Nani yachim-inahuaso', hua'huin nininën acotërin: Pin-oni<sup>†</sup> itërin. Itopirínhuë', Cacoporiso', Mincamin<sup>‡</sup> itërin. <sup>19</sup> Inapo chimintërin Naquira. Napoaton Iporata ira pirayan pa'pitopí. (Iporataso ipora marë', Pirin itopí.) <sup>20</sup> Naquira pa'pitahuaton, po'oronën aipi Cacoposo' Panca ra'pi ahuanirin. Ina na'pi ahuanirin quëran, Naquira po'oronën nohuitopí.

<sup>21</sup> Inaporahuaton, Israiroso paantarin. Itiri tori aquëcha, ya'huaantacaiso marë' në'mëtë pëinëna ótëënpí. <sup>22</sup> Inaquë hua'quimiachin ya'huëpí. Inaquë chachin Nopinoso', pa'pin cosonanën Pira itopiso monshitaton, ichihuë'ërin. Ina natantahuaton, Israiroso pa'pi no'huitërin.

### *Cacopo hui'ninpita nininso'*

Cacoposo' shonca cato hui'ninpita quëmapi'sa ya'huëtërin. <sup>23</sup> Niaquëya nipisopitaso' isopita: Paninanso' Nopino, ina quëran, Simion, Nihui, Cota, Isacaro, Saporono, inapita. <sup>24</sup> Naquiraquëya nipisopitanta isopita: Cosi, Mincamin, inapita. <sup>25</sup> Naquira piyapínën Pira itopisoquënta isopita: Tano, Nipitari, inapita. <sup>26</sup> Nia piyapínën Siripa itopiquënta', isopita: Caro, Asiri, inapita. Ina nápo Cacopo hui'ninpita ya'ipiya quëran ya'huëpí. Ya'ipi pochin Patan-aranquë nasitopí.

### *Isaco chiminso'*

<sup>27</sup> A'na tahuëri Cacoposo' pa'pin ya'huërinquë pa'nin. Inaso', Mamiriquë ya'huërin. Ina ninanoso' Arapa itopí anta'. Naporahuaton ina chachin Ipron itomantapí. Inaquë Apraan, Isaco, inapita ya'huëpí. <sup>28</sup> Pasa posa shonca pi'ipitaso', Isaco chiminin. <sup>29</sup> Noyá mashoya nicaquë huarë' chiminin. Chimpachina, hui'ninpita Isao, Cacopo, inapitari nipa'pichantopiso' naninquë po'mopí.

## 36

### *Isao quëran pipipisopita*

<sup>1</sup> Isao quëran pipipisopita sha'huichinquëma'. Inaso', Itomo itopí anta'. <sup>2-5</sup> Isaoso' Canaan sanapi'sa manin: A'naso', Ata itopí. Inaso', Iron hui'nin. Ironta', Iti huënton piyapí. Inaquëya Isao hui'nahuanpachina, Iripasi itërin. A'na sa'ionta Aoripama itopí. Inaso', Ano hui'nin, Sipion shiin. Inaquëyanta hui'nahuanpachina, isopita: Quiosi, Caaran, Cori, inapita. Isaoso', Ismairo hui'nionta manin, Pasima itopiso'. Inaso', Nipayo oshia'huain. Inaquënta hui'nahuanpachina, Niohuero, itërin. Ina nápo hui'ninpita Canaan parti ya'huëapon nasitopí.

<sup>6</sup> Isaoso' Cacopo patahuaton, a'na parti ya'huapon pa'nin. Sa'inpita, hui'ninpita, yaipi inarë ya'huëpisopita quëparin. Pë'tahuanënpita, ma'shanënpita, inapita Canaan parti ya'huapon pochin canarinsonta', ya'ipi quiquirin. <sup>7</sup> Cacoponta', napopin chachin ma'huanin ni'ton, co huachi nanitopihuë inaquësáchin ya'huëcaiso'. Pastonta pë'tahuanëna capacaiso co huachi nanipihuë ni'ton, nia'popí. <sup>8</sup> Inapoaton, Isaoso Sëir motopiro'sa parti pa'nin ya'huapon. Sha'huitëranquëmaso chachin Inaso', Itomo itopí anta'.

<sup>†</sup> 35:18 Pin-oniso': Na'con na'con aparisitërinco hua'hua, tapon naporin.

<sup>‡</sup> 35:18 Mincaminso': Pa'ya

pa'yatërahuëso hua'hua, tapon naporin.

<sup>9</sup> Ina nápo Isao hui'ninpita ya'huëtërin. Inaso', ya'ipi itomoro'sa shimashonën. Inapitaso', Sëir motopiro'sa parti ya'huëpi. <sup>10</sup> Sha'huitëranquëmaso chachin, Isaoso Ataquëya hui'nahuaninso', Iripasi itërin. Ya'huërë' Pasimaquëya nininso', Niohuïro itërin. <sup>11</sup> Iripasi hui'ninpitaso', isopita: Timan, Omaro, Sipo, Catan, Quinasi, inapita. <sup>12</sup> Inapitaso' Ata aminpita. Iripasiso', a'na cosonanën ya'huëtërin Timona itopi. Inaquëya hui'nahuanpachina, Amarico itërin. <sup>13</sup> Niohuïro hui'nipitanta', isopita: Naato, Siran, Sama, Misa, inapita. Inapitanta Pasima aminpita. Pasimaso' sha'huitëranquëmaso chachin, Isao sa'in ninin anta'. <sup>14</sup> Aoripamaquënta', Isao hui'nahuaninsopitaso': Quiosi, Caaran, Cori, inapita. Aoripamaso', Ano hui'nin, naporahuaton Sipion shiin.

<sup>15-19</sup> Isao shinpita huëntono'sa hua'anëntopisopitaso', isopita: Timan, Omaro, Sipo, Catan, Quinasi, Cori, Amarico, inapita. Sha'huitëranquëmaso chachin Isao paninanënso', Iripasi itopi. Ina hui'ninpitaso', Itomo no'paquë Isao shinpita huëntono'sa', hua'anëna ya'conpi. Ya'ipi inapita Ata aminpita. Niohuïronta Isao hui'nin chachin ninin. Ina hui'ninpitanta', isopita: Naato, Siran, Sama, Misa, inapita. Inapitanta Itomo no'paquë Isao shinpita huëntono'sa', hua'anëna ya'conpi. Ya'ipi inapitaso', Pasima aminpita. Sha'huitëranquëmaso chachin Ano hui'nin Aoripama itopiso hua'huinpitanta', isopita: Quiosi, Caaran, Cori, inapita. Inapitanta Isao shinpita huëntono'sa hua'anëna ya'conpi. Ya'ipi ina hua'ano'sa', Isao shinpita. Isaoso', Itomo itopi anta'.

<sup>20-21</sup> Co'huara Isao inaquë pa'shátëraponhuë', a'nara Or huënton piyapi Sëir itopiso'ton inaquë ya'huërin. Quëmopinënpitarë chachin ya'huërin. Ina hui'ninpitaso', isopita: Notan, Soparo, Sipion, Ano, Tison, Isëri, Tisan, inapita. Inapita'ton Itomo no'paquë Or huënton hua'ano'sa ya'conpi. Inapitaso' Sëir quëran pipipisopita ya'huëpi. <sup>22</sup> Notan hui'ninpitaso', isopita: Orin, Iman, inapita. Notan oshinso', Timona itopi. <sup>23</sup> Soparo hui'ninpitanta', isopita: Arapan, Manaato, Iparo, Sipo, Onan, inapita. <sup>24</sup> Sipion hui'ninpitanta isopita: Aiya, Ano, inapita. Ina Ano chachin, inotëro parti pa'pin moranënpita a'pairin. Inapita a'paiaso', no'pa quëran i'sha pipirinsopita quënanin. <sup>25</sup> Anoso', a'na hui'nin ya'huëtërin, Tison itërinso'. Naporahuaton, a'na hui'nin sanapi, ya'huëtërin. Sha'huitëranquëmaso chachin inaso', Aoripama itërin. <sup>26</sup> Tisonta hui'ninpita isopita: Intan, Ispan, Itëran, Quiran, inapita. <sup>27</sup> Isëri hui'ninpitanta isopita: Piran, Saapan, Acano, inapita. <sup>28</sup> Tisan hui'ninpitanta isopita: Osi, Aran, inapita. <sup>29-30</sup> Or huënton hua'ano'saso', isopita: Notan, Soparo, Sipion, Ano, Tison, Isëri, Tisan, inapita. Ina nápo Or huënton hua'ano'sa ya'huëpi. A'naya a'naya huëntonënaquë, hua'an ya'conpi. Sëir parti napopi.

### *Itomo no'paquë copirno'sa ya'conpiso'*

<sup>31-32</sup> Co'huara israïro'sa copirno ya'huëchatërasoihuë', isopita'ton Itomo no'paquë copirno ya'conpi. Pira'ton ya'conin. Inaso', Pïoro hui'nin. Tinapa ninanoquë ya'huërin. <sup>33</sup> Ina chiminpachina, Sira hui'nin Copapo itopisori ya'huërëtërin. Inaso', Posora ninanoquë ya'huërin. <sup>34</sup> Inanta chiminpachina, Osamori ya'huërëtërin. Inaso', Timan parti ya'huërin. <sup>35</sup> Osamonta chiminpachina, Atatori ya'huërëtërin. Inaso', Pitato hui'nin. Apito ninanoquë ya'huërinso'. Inari matiano'sa', Moapo no'paquë ahuëaton canarin. <sup>36</sup> Atato ya'huërë' chiminpachina, Samarari ya'huërëtërin. Inaso', Masarica ninanoquë ya'huërin. <sup>37</sup> Samaranta chiminpachina, Saonori ya'huërëtërin. Niopo ninanoquë ya'huërinso'. Inaso ninano', Iopiratisii' yonsanquë ya'huërin. <sup>38</sup> Ina ya'huërë' chiminpachina, Paaro-ananori ya'huërëtërin. Inaso', Acaporo hui'nin. <sup>39</sup> Paaro-ananonta chiminpachina, Atatori ya'huërëtërin. Inaso', Pao ninanoquë ya'huërin. Atato sa'inso', Miitapiri itopi. Inaso', Matiriti hui'nin, Misaapo shiin.

<sup>40-43</sup> Isonápo Isao quëran pipipisopita huëntono'sa ya'huërin: Ya'huëpiso no'panënanta', inachachin aninahuanpi: Timon, Arapa, Quitito, Aoripama, Iran, Pinon, Quinasi, Timan, Mipasar, Maquitiri, Iramo, inapita. Ina nápo Itomo huëntono'sa shimashonënpita

ya'huërin. Inapitaso' Itomo no'paquë yanquëatona itohua itohua ya'huëpi. Isaoso', Itomo itopi anta'.

### 37

<sup>1</sup> Cacoposo nipirihuë', Canaan parti quëparitërin ya'huëcaso marë'. Pa'pinconta' inaquë chachin ya'huëaponahuë', co hua'quiyahuë' ya'huërin.

#### *Cosi, iinpitarë chachin napopiso'*

<sup>2</sup> Cacopo hui'ninpita naporinso sha'huichinquëma nitotoco'. Cosi shonca canchisë pi'ipitapon pochin, iinpitarë chachin pa'pin ohuicanënpita a'pairin. Pa'pin coso-nanënpita: Pira, Siripa, inapita hua'huinpitarë' a'pairin. Iinpitaso co noyahuë' nipi ni'ton, Cosiso' pa'pinquë yásha'huirapirin.

<sup>3</sup> Cacoposo' a'napita hui'ninpita quëran, Cosi na'con na'con nosororin. Nani másho nicaquë huarë', Cosiso hua'huatërin ni'ton, nosoromiatërin. Napoaton a'mocaso marë' noyápiachin nininso' nitërin. <sup>4</sup> Iinpitariso nipirihuë', pa'pini ina na'con na'con nosororinso' nicatona', co quë'yapihuë'. Co quë'yatonaraihuë', co nanitopihuë' noya nontacaiso'.

<sup>5-7</sup> A'na tashi Cosi hua'narin. Tahuëririnquë, iinpita sha'huitërin:

—Natanco iyaro'sa hua'narahuëso sha'huichinquëma': Huë'ëhuëquë, iminquë ya'ipinpoa trico masarëhua'. Manëhuasonta tonporarëhua ni'nahuë. A'nanaya ca tonporahuëso', huanirin. Canpita tonporamasoso nipirihuë', ca tonporahuëso' mosharapi. Ya'ipi tahuítatona', monshopi quëran mosharapi, itërin. Ina natanahuatona', iinpitariso aquë aquëtë no'huipi. <sup>8</sup> Napohuachina, inapitari itapon:

—Hua'an ya'conpato iyahuëpita camaiyápo ¿tocomaranquën ti? ¡Catoro' quëma camaiyáponcoi! itopi. Hua'narinso marëpita na'con na'con no'huipi. Sha'huihuachina, co yainhuë' natanpi.

<sup>9</sup> Ina piquëran Cosiso', hua'naantarin. Naporonta iinpita sha'huitaantarin:

—Natanco iyaro'sa a'na hua'naantarahuëso sha'huitaanta'inquëma'. Hua'nato ni'pirahuë', pi'i, yoqui, shonca a'na tayloraro'sa', inapita monshorahuatona moshararinaco ni'nahuë, itërin. <sup>10</sup> Cosi ina hua'narinso', pa'pin iinpita inapita sha'huitohuachina, pa'pini pënënaton itapon:

—¿Ma'ta tapon inapochinpita hua'na hua'namantaranso'? Napoahuarë' mamaparin, iyaparinpita, ca chachionta' ¿a'na tahuëri moshaponquën ti? itërin. <sup>11</sup> Iinpitariso noyapatona', aquë aquëtë no'huirápi. Pa'pinso nipirihuë', hui'nin naporinso na'con yonquirárin.

#### *Cosi pa'anpiso'*

<sup>12</sup> A'na tahuëri Cosi iinpitaso', Siquimo ninano ya'cari pa'pi. Pa'pina ohuicanënpita, chiponënpita inapita quëpapi pasto yonitona a'cacaiso marë'. <sup>13</sup> Naporo' pa'pini Cosi itapon:

—Ni'quë conpa. Iya mashoro'sa Siquimo ya'cari ya'huëapi. Inaquë ohuicaro'sa', chiporo'sa', inapita a'pairapi. Paaton ni'contaquë topirahuë, itërin.

—Noya tatapa'. Pa'i nipachin, itërin.

<sup>14</sup> —Inta conpa. Pa'sahuaton iyamashoro'sa ni'contaquë'. Ohuicaro'sa', chiporo'sa', inapitanta onpoinsona nisapiso', nahuicontaquë'. Ina quëran huë'sahuaton, onpoapisona sha'huitiico canta nitochi, itërin.

Cacoposo Ipron motopianaro'sa quëran, Cosi a'parin. Inaso pa'sápaton Siquimoquë canconin. <sup>15</sup> Ina parti chihuëaton pa'sápirihuë', a'na quëmapiri quënanahuaton itapon:

—¿Ma'ta yonisanan?

<sup>16</sup> —Iyahuëpita yonisárahue ta'a. ¿Co pora nitotëranhuë' insëquësona pë'tahuanëna a'paiyapiso to? itërin. <sup>17</sup> —Nani isëquëran pa'pi: “Totanquë pa'ahua',” niitapi pora, itërin.

Cosiso pa'sápaton, Totan ninano ya'cariya iinpita quënanconin. <sup>18</sup> Inapitarinta', áquë quëran Cosi quënanpi. Quënanahuatona', co'huara ya'carichátérasohuë', tēpacaiso marè' a'naroáchin yonquipi. <sup>19</sup> Inahua capini ninontopi:

—¡Ni'co'. Hua'natona'pi huë'sarin! <sup>20</sup> Huëco tēpa'ahua'. Inapotatēhua poso yaninantēquë po'moa'ahua'. Ina quëran “pa'piniri ca'nin,” itahua'. Inapotohuatēhua', ¿naniinta'ma hua'narinsopita pa'? niitopi. <sup>21</sup> Nopinoso natanahuaton, Cosi pa'poyacaso marè' itapon:

—Ama tēpa'ahuasohuë'. <sup>22</sup> Co tēpatacaso ya'huërinhuë'. Iso inotēroquë yaninantē poso nininquë tē'yatoco'. Ama canpitariso' ma'sha onpotocosohuë', itërin. Iya'huain nanin quëran ocoirahuaton, pa'pinquë'pa' a'paantacaso yonquiaton, naporin.

<sup>23</sup> Cosiso iinpitataquë canconpachina, no'huitona noyápiachin a'morinso matopi. <sup>24</sup> Matahuatona yaninantē posoquë, tē'yatopi.

<sup>25</sup> Inapotahuatona', coshatapi huachi. Coshatasoi ni'pirinahuë', a'na huëntona' Ismairo nicatoro'sa', nioshirin huë'sapi. Carata parti quëran huë'sapi. Camiyonēnaquë, pimo hua'sairo'sa', parsamo nimirio, pimo yaqui', inapita quë'sapi. Iquipitoquë pa'anapona', quëparapi. <sup>26</sup> Naporo' Cotaso iinpita itapon:

—¡Iya'hua tēpahuatēhua', co manta canarihuahuë'! Naporahuaton inapotohuatēhua', nonpi nonpínantacaso' ya'huapon. <sup>27</sup> Ama tēpa'ahuasohuë'. Ismairo nicatoro'sa' tēhuënchinsó' pa'antahua'. No'huípiro mini nipirinhue', co nishahuë'. Iyanpoa', tēnin. Napohuachina, iinpitari: “¡Tēhuënchachinchi paya!” topi. <sup>28</sup> Nicatoro'sa' inataquëchin na'huërahuachinara, iinpitari Cosi ocoipi. Yaninantē poso quëran ocoirahuatona', nicatoro'sa' pa'antopi. Cato shoncatē coriqui pahuëretohuachinara, Iquipitoquë quëpapi huachi.

<sup>29</sup> Nopinoso Cosi tē'yatopiquë huënantahuachina, co huachi iin quënanquintarinhuë'. Pa'pi pa'yanaton a'morinso osharin\*. <sup>30</sup> Ina quëran iinpitataquë huënantarahuatón, itiintarin:

—¡Iya'hua capa huachi! ¡Ma'huantacha caso nisarahuë paya! tēnin.

<sup>31</sup> Naporo' iinpitaso', Cosi a'morinso masahuatona chipo tēpapiso' huë'nainēnquë, asë'cotētopi. <sup>32</sup> Inapotahuatona pa'pinaquë a'papi. Quëpana'piso' iso pochin pēnēnpi: “Iso a'mopiso quënanai. Noya ni'quë'. ¿Hui'nanguën a'na nimara ti?” itēquë', itahuatona a'papi huachi.

<sup>33</sup> Cacoposo' nohuitahuaton, tapon: “¡Iso mini hui'nahuë a'morinso'!” tanan ni'niri napotërin ipora, tēnin. <sup>34</sup> Napoapon pochin co napion cancantaton a'morinso nioshatërin. Naporahuaton, sa'catën nininso' sētohuachinara a'mopiso', a'morin. Ina a'morin quëran hui'nin chiminso marè' hua'qui na'nërárin, ayanárin, naporárin. <sup>35</sup> Ya'ipi hui'ninpitari achinicanpírinahuë', inaso co nohuanchátërarinhue', sētërinso inquicaso'. Aquë aquëtē hui'nin marè' na'nëton, naporin: “Chimipiro'sa ya'huërinquë hui'nahuë quënanconta' huarè' sētërahuëso' copi tapo,” tēnin.

<sup>36</sup> Ismairo nicatoro'saso', Iquipitoquë camapi. Camahuachinara, Cosiso a'nara quëmapi Potihuario itopiso', pa'antopi. Inaso', Iquipito copirnorí catahuacaso marè' acorin†. Capitan ya'conaton, copirno a'paipisopita sontaro'sa camairin.

## 38

### *Cota, Tamararë' naporinso'*

<sup>1</sup> Naporo tahuëri'sa Cotaso iinpita patahuaton, Atoran ninanoa'huaquë pa'nin. Inaquë a'na quëmapi Iro itopiso ya'huërin. Ina ya'huërinquë yacapatónin. <sup>2-3</sup> Inaquë yacapatapon pochin, a'nara nanon nohuitërin. Inaso', Soa itopiso' hui'nin. Soaso' Canaan piyapi. Cotari natanpachina, acoantopi. Inaquë hui'nahuanpachina, paninanën nasitërin. Ina nohuitaton, Iri itërin. <sup>4</sup> Naquëranchin sa'in cayoantarin. Nasitohuachina, quëmapi chachin niantarin. Inaso', Onan itërin. <sup>5</sup> Naquëranchin hua'huaantahuachina,

\* **37:29** A'morinso osharin: Ina parti ya'huëpisopitaso', co napion ancantohuachinara, inapopi. † **37:36** Copirno catahuapisopitaso': Naporo tahuëri'sa macayora'piapi.



quëmapi chachin niantarin. Inaso', Sira itërin. Quisipo ninanoquë Cota ya'huëaso', inaso nasitërin.

<sup>6</sup> Iri hui'napitohuachina, pa'pini Tamara acoantërin. <sup>7</sup> Acoantopirinhüë', Iri co noyahuë' nininso' co Sinioro costarinhüë' ni'ton, ina nohuanton chiminin. <sup>8</sup> Napohuachina, Cotari Onan ya'huërë' itapon:

—Iya masho ayananpirinso sa'in, quëmari maquë'. Canpoaso inachintërëhua ni'ton, imoya macaton, inaquë hui'nahuanquë'. Hui'nahuanpatan, Iri quëran pipicaiso nipisopita quëmá quëran ya'huëtarin huachi, itërin. <sup>9</sup> Onanso' Tamara macaponahuë': “Hui'nahuanpato, hua'huaro'sa co caquën nisarinhüë'. Irico hui'ninpitaráchin pochin nisarin,” tënin yonquinënuquë. Napoaton, Tamara tëcarihuachina, aipí a'paconin. Ama iinco ya'huërënamënpita, ina quëran ya'huëcaso marëhuë' naporin. <sup>10</sup> Onan naporinso Sinioroso nitotaton, chiníquën no'huitërin. Napoaton inanta', ina nohuanton chimiantarin. <sup>11</sup> Naporo' Cotasó', Tamara itapon:

—Quëyoroantaran ni'quëhuarë', iporaso' tataparin ya'huërinquë paantaquë'. Hui'nahuë Sira itërahuëso hui'napitaquë huarë', inaquë ya'huëtaquë', itërin. Itaponahuë', co tëhuëchachin napotërinhuë'. Nonpintaton naporin: “Sira ya'huërë', iinpita pochachin chimiantahuachin,” ta'ton naporin. Napoaton Tamaraso', pa'pin ya'huërinquë pa'nin ya'huapon.

<sup>12</sup> Cara pi'iquëran pochin Cota sa'in ya'huërë' chimiantarin. Inaso' sha'huitëranquëmaso chachin, Soa hui'nin. Chiminpachina, Cotasó sëtaton na'nërárin. Sëtërinso' inqihuachina, Tinato ninanoa'huaquë pa'nin. Ohuicanënpita ya'inaapiro'sa inaquë ya'huëapi ni'ton, pa'nin nicapon. Amiconën Iro itopisorë' pa'nin. Iroso', Atoran piyapi. <sup>13-14</sup> Tamaraso ina nitotaton, quëyoron a'morinso ocoirin. Inaporahuaton, nitaparin. Niimomototërinso' në'mëtëquë nipa'shinayatërin. Ama nohuitacaiso marëhuë' naporin. Inaporahuaton, Inain ninanoa'hua ya'cari', huënsëconin. Inaso' ninano', Tinato iraquë ya'huërin. Sira nani hui'napitopirinhüë', co acoantopihuë' ni'ton, shiin yanonpintërin. <sup>15-16</sup> Cotari quënanahuaton, nipa'shinayatërinso marë': “Isoso sanapi, monshihuantë',” tënin. Napoaton pëshonin ya'caricaso marë'. Co shiin nohuitatonhuë', itapon:

—¿Canta quëmaro'co nii topirahuë? itërin.

—¿Ma'ta nipachin pahuërëaponco? tënin sanapinta'.

<sup>17</sup> —Pë'tahuarahuësopita quëran, a'nara chipoa'hua a'patiaranquën, itaantaran Cotari.

—Inta nipachin. Napoaponahuë', ma'sha tëranta quëmaquën nininso' patëquë'. Chipoa'hua a'patianco huarë', cari tapaarahüë, itërin sanapiri.

<sup>18</sup> —¿Ma'ta nipachin pachi? tënin Cota.

—Sicho po'moitëranën pë'natëransoarë chachin, huaranën, inapita patëquë', itërin. Napotohuachina Cotasó', nataninsopita quëtërin. Inapoaton tëcarihuachina, naporo chachin hua'huantërin. <sup>19</sup> Ina quëran Tamaraso', pa'pin ya'huërinquë panantaran. Nipa'shinayatërinso' ocoirin. A'morinsonta ocoirahuaton, naquëranchin quëyoron a'morinso a'moantaran.

<sup>20</sup> Ina quëran Cotariso', chipoa'hua a'patërin. Amiconën Irori quëpatërin. Sanapi acoantërinso' ayantacaso marë' a'patopirinhüë', inariso co huachi quënanconinhüë'.

<sup>21</sup> Napohuachina, ya'huëhuano'sa natanin:

—Monshihuantë sanapi Inain ira pirayan huënsëyantërinso': ¿Intohuata pa'nin? itërin.

—Co isëquë monshihuantë sanapi ya'huërinhuë', itopi. <sup>22</sup> Napotohuachina, Cota ya'huërinquë huëantarahuaton, itiintarin:

—Co'chi sanapi quënanconahuë paya. Ya'huëhuano'santa': “Co isëquë monshihuantë sanapi ya'huërinhuë',” itërinaco, itërin. <sup>23</sup> Napotohuachina, Cotari itapon:

—Ma'ta pini. Noyatapon. Quëtèrahuësopita yamapachin, main nipachin. Ina marè' nanan ocoihuatèhuaso', piyapi'sa tèhuaponènpoa'. Nanichi chipoa'huaya a'patochinpirahuè', co quèmari quènanconanhuè', itèrin.

<sup>24</sup> Cara yoqui quèran pochin, Cota sha'huitapona huècapapi:

—Shiparin Tamara itèrèhuaso', monshihuanin. Napoaton iporaso' cayorin huachi, itopi. Natanahuaton Cotasó', no'huitaton yai ténin:

—¡Ocoirahuatoma', a'pèco chimiin! ténin. <sup>25</sup> Ya'huèhuano'sari Tamara a'pècaso marè' ocoirapirinahuè', inaso shiin nanan a'patèrin: “Iso sicho po'moitèra pè'natèrinsorè chachin nininso' hua'anèn, napotèrinco. Iso huaranta', inanquèn chachin ni'ton, noya niconon nohuitèquè',” itèquè', itèrin. <sup>26</sup> Cotasó', shiini a'patèrinsopita nohuitahuaton, naporin: “Tèhuèchachin caso co noyahuè' ninahuè'. Co Sira acoantatohuè', tèhuèrahuè'. Inaso nipirinhuè', noya noya ninin,” ténin. Naporo quèran huarè' Cotasó', co huachi onporo tèranta shiin tècariantarinhuè'.

<sup>27</sup> Tamara huaicaso nanihuachina, catopia'huaya hua'huatopi. <sup>28-29</sup> Nasitapona napopi: A'na'ton imiria'huain ocoirin. Napohuachina ahuaitiona'piri, quèhuan pi'shiquè, tonpotanpatèrin. “Iso'ton hua'huacharin,” ta'ton, napotèrin. Napopirinhuè', hua'huashaso tanpara'huain po'moantarin. Shiarahuaton a'naso', nasitochanin. Napoaton ahuaitiona'piri nininèn acotèrin: Parisi\* itèrin. “Ya'copirinquènso inquirahuaton, pipiran,” itahuaton, inapochin nohuitèrin. <sup>30</sup> Quèhuan pi'shiquè tonpotanpatèrinsoso', ina piquèran hua'huatèrin. Inaso' nohuitaton: Saro itèrin.

## 39

### *Hua'an sa'ini, Cosi apirinsó'*

<sup>1</sup> Sha'huitèranquèmaso chachin Cosiso', Ismairo niconono'sari Iquipito no'paquè quèpapi. Inaquè a'nara Iquipito quèmapi Potihuario itopiso' pa'antopi. Inaso', Iquipito copirnorin catahuacaso marè' acorin. Capitan ya'conaton, copirno a'paipisopita sontaro'sa camairin. <sup>2</sup> Cosiso napotopirinahuè', Siniorori co naniantèrinhuè'. Inari catahuarin ni'ton, hua'anèn pèinènquè noya yonquiaton yacapatèrin. Noya niconon, noya ya'huèrin. <sup>3</sup> Cosiso', Yosèri catahuarin. Hua'anèni ina niconon: “Nani ma'sha Cosi nipachina, Yosèri catahuarin ni'ton, noya pipitèrin,” ténin. <sup>4</sup> Napoaton pa'yatèrin. Pa'yataton, acorin catahuacaso marè'. “Ma'pitasona ninahuèquè, quèma catahuaponco,” itèrin. Naporahuaton, ya'ipi piyapinènpita camaiaton asacatacaso marè' acorin. Ya'ipi ma'shanènpitanta a'paicaso marè' acorin. <sup>5</sup> Ina acorin quèran huarè', Siniorori Potihuario catahuamiatèrin. Cosi noya niconon, napotèrin. Pèinènquènta ma'sha nipachina catahuarin. Iminènquènta sacatohuachina', sha'topiso' noya noyatèrin. <sup>6</sup> Cosiri ya'ipi ma'shanènpita noya a'paitèrin ni'ton, co huachi ma'marè tèranta yonquiárinhuè'. Topinan noya coshatárin huachi.

Cosiso', noyapin noyapin ni'tomantarin ni'ton, ya'ipi quèran pa'yatopi. <sup>7</sup> Napoaton co hua'quiya quèranhuè', hua'anèn sa'ini ni'sárin quèran noyarin huachi. A'na tahuèri itapon:

—Huèquè pa'a quèmaso' inapoquè', itèrin. <sup>8</sup> Napotopirinhuè', Cosiso co pi'pisha tèranta nohuantèrinhuè'. Napoaton itapon:

—Ni'què siyora, pi'pian sha'huichinquèn topirahuè: Hua'anèhuè ya'ipi ya'huètèrinsopita a'paia'huaso marè' acorinco. Cari ya'ipi a'pairahuè ni'ton, co ma'marè tèranta yonquiárinhuè'. Natèrinco ni'ton, sano cancantèrin. <sup>9</sup> Chini chiniquèn nanan quètèrinco iso pèiquè camaita'huaso marè'. Naporahuaton, hua'anèhuè co ma'sha tèranta apiratèrincohuè'. Quèmasáchin tèhuèchinsó' sa'inquèn ni'ton, apiratèrinco. Napoaton, co caso pi'pian tèranta nohuantèrahuè' pa'pi co noyahuè' nininso' nicaca'huaso'. ¡Naporahuaton quèmarè'co ninahuè naporini, co Yosè natètohuè',

\* **38:28-29** Parisiso': Pasoarinsó' tapon naporin.

pa'pi oshahuaintohuë'! itërin. <sup>10</sup> Napotopirinhüë', sanapiriso Cosi ichiquëhuënacaso marë' nani tahuëri apisárin. Inaso napoaponahuë', co pi'pisha tëranta nohuantërinhuë'.

<sup>11-12</sup> A'na tahuëriso nipirinhüë', Cosi pëiquë sacatapon ya'conin. Naporó' co a'napita ya'huëasoihuë ni'ton, sanapiriso Cosi so'huianarinso matërin. Inapotaton:

—Huëquë pa'a quëmaso inapoquë', itërin. Napotopirinhüë', Cosiso niso'huianatërinso pa'coirahuaton, ta'arin.

<sup>13-15</sup> Ina patërinso ni'sahuaton, sanapiriso yanonpinin. Yanonpinaton chiníquën huiyo tënin. A'napita piyapinënpita përacaso marë' naporin. Huë'pachinara, itapon:

—¡Ni'cochi iso'! So'yahuë a'nara iprio piyapi quëshiantërinpoa tapiinpoaso marë'. Ya'conahuaton masapirincohuë', canpita huëcacamaso marë' caso chiníquën huiyo tënahuë. Ina natanaton, ta'arë'nachin pipirin. ¡Niso'huianatërinson'ta', patërin! itërin.

<sup>16</sup> Piyapinënpita napotahuaton, Cosi niso'huianatërinso' taparin. So'in huëcaquë huarë' taparin. <sup>17-18</sup> Ina huë'pachina, piyapinënpita sha'huitërinso chachin inanta sha'huitërin:

—Iprio piyapi quënan'so', patoananëhuëquë ya'conahuaton masapirincohuë'. Chiníquën huiyo topatora, a'porahuatonco ta'arin. Niso'huianatërinson'ta', patërin.

<sup>19</sup> ¡Inapotërinco piyapinën! itërin.

Sa'ini sha'huitërinso' natanahuaton, Cosi hua'anënso pa'pi no'huitërin. <sup>20</sup> Cosi macacaiso marë' piyapinënpita camairin. Nani mapachinara, tashinan pëiquë po'mopi. Copirno tēhuëtopisopita ya'huëapiquë po'mopi. <sup>21</sup> Tashinan pëiquë po'mopirinahuë', Siniororiso' co Cosi naniantërinhuë'. Nosoroaton catahuaantarín ni'ton, tashinan pëi hua'ani, noya nicaton pa'yatërin: “Cosiso', nóya hui'napi,” ta'ton, noya ni'nin. <sup>22</sup> Napoaton catahuacaso marë' acorin: “Quëmari a'napita prisoro'sa', a'paiaran,” itërin. Napoaton Cosi camaitërin'soráchin tashinan pëiquëso', prisoro'sa nipi. <sup>23</sup> Cosi camaito-huachina tashinan pëiquë, noyasáchin sacatopi. Napoaton tashinan pëi hua'anso', co huachi Cosi sacatërinso' ni'sárinhuë': “Siniorori chachin Cosiso catahuarin ni'ton, ma'sona nipachina, noya pipitërin” ta'ton, naporin.

## 40

### *Hua'ano'sa hua'napiso', Cosiri no'tëquën sha'huitërinso'*

<sup>1</sup> Ina piquëran cato hua'ano'sari Iquipito copirno tēhuëtopi: A'naso', copirno huino o'shitona'piro'sa hua'an. A'nanta', ina marë chachin pan nina'piro'sa hua'an. Cato chachin copirno tēhuëtopi. <sup>2-3</sup> Napoaton copirnorin inapita no'huirin. No'huiton tashinan pëiquëtacaiso' camaitërin. Napoahuachina cato chachin inaquë po'mopi. Ina tashinan pëiso', copirno a'pairinsopita capitan pëinënquë ya'huërin. Cosi ya'huëarinquë chachin po'mopi. <sup>4</sup> Copirno a'pairinsopita capitaniso', Cosi itapon: “Isopita cato hua'ano'sa quëmari noya a'paiton, catahuaquë',” itërin. Inapotihuachina inapita hua'ano'saso', hua'qui inaquë ya'huëpi.

<sup>5</sup> A'na tashiso nipirinhüë', cato hua'ano'sa chachin, hua'napi. A'naya a'naya hua'napiso', co inachachin tapon hua'napihuë', nisha nisha tapon hua'napi.

<sup>6</sup> Tashíramiachin Cosiriso nicapon huë'pachina, sëtápi quënanquirin. <sup>7</sup> Napoaton, cato chachin natanin:

—¿Onpoatomata iporaso' pa'pi sëtëramaso pochin ya'norama'? itërin.

<sup>8</sup> —Catocoi chachin hua'napiraihuë', co insonta ya'huërinhuë' ma'sona tapon hua'naraiso anitotiincoiso', itopi.

—¡Yosë mini nanitërin ma'sona tapon hua'narësopita anitotiinpoaso'! Sha'huitoco hua'naramaso', itërin.

<sup>9-10</sup> Napotohuachina o'shina'piro'sa hua'anso', hua'narinso Cosi sha'huitërin:

—Huë'ëhuëquë a'nara opa ya'huë ni'nahuë, cara së'pahuaninso'. Nicasoco chachin, papo së'patarin. Papo së'patahuaton, yancotarin. Yancotërinquëranchin nitërin'sopita cayarin. <sup>11</sup> Ina pirayan canta', hua'raon o'orinso' minënën së'quëato, huaniárahüë.

Opa cayarinso masahuato, huaraon o'orinquë shi'shirahuë. Inapotahuato huaraon ihuëtërahuë. Ihuëtohuatora ma'parinco huachi, itërin. <sup>12-13</sup> Napotohuachina, Cosiri itapon:

—Naporinchi paya. Ma'sona tapon hua'naranso sha'huichinquën: Cara sè'pahuaninso', cara tahuëri tapon naporin. Cara tahuëriya quëran, huaraonso' quëma tëhuëranso' yonquiantarin. Nanan anoyatahuatënquën naquëranchin acoantarinquën ina marë' sacataantacaso'. Iráca naporanso chachin naquëranchin o'shitaantaran huachi. Ina tapon, ina pochin hua'naran. <sup>14-15</sup> Inapotohuachinquën, canta nosoroatonco yonquico. Ocoincoso marë' huaraon sha'huitëquë'. Iprioro'sa ya'huëpique caso ya'huëpirahuë', topinan quëran no'huitonaco pa'arinaco. Co manta onporahuë ni'ton, co tashinan pëiquë ya'huápa'huaso ya'huërinhuë'. Napoaton nosoroco canta', itërin.

<sup>16-17</sup> Napotohuachina, copirno marë' pan nina'piro'sa hua'anta': “Noyachi sha'huitërin paya,” ta'ton, hua'narinso Cosi sha'huitërin:

—Canta nipirinhue', iso pochin hua'narahuë: Cara ya'huiri pan acoinanquë pitëmotorahuato, huiríton pano'sa quëpárahue'. Ya'natontarinso acoinanquë, nisha nisha cashi cashin pano'sa copirno marë' ya'huërin. Napoaponahuë', inairaro'sa huë'sahuatona pitëmotorahuë quëran capitarinaco, itërin. <sup>18</sup> Napotohuachina, Cosiri itapon:

—Cara pan acoinanso', cara tahuëri tapon naporin. <sup>19</sup> Cara tahuëriya quëran, huaraonso' quëmanta tëhuëranso' yonquiantarin. Naporo chachin piyapinënpita camaiapon: “Noninquë huëinquëconorahuatoma', naraquë pë'tëncó chimí'in,” itapon. Inapotohuachinën, chanaro ca'tëro'sari noshanën capona', itërin.

<sup>20</sup> Cara tahuëriya quëran, huaraon hua'huatërinso tahuëri nanirin. Naporo' ya'ipi catahuarinsopita hua'ano'sa ichicapacancanacaso marë', panca pita ninin. Ya'ipi përarinsopita ni'tonënuquë huaraonso' camaitërin: “Cato hua'ano'sa chachin tashinan pëi quëran ocoico,” ténin. <sup>21</sup> O'shina'piro'sa hua'anso', naquëranchin asacataantarin. Napoaton naquëranchin iráca pochachin huaraon o'shitaantarin. <sup>22</sup> Pan nina'piro'sa hua'anso nipirinhue', huaraoni piyapinënpita camairin naraquë pë'tënacaiso marë': “Noninquë huëinquëconorahuatoma', tēpaco',” itërin. Cosiri sha'huitërinso chachin nitopi. <sup>23</sup> O'shina'piro'sa hua'aniso', Cosiri catahuacaso marë' sha'huitërinso', naniantërin. Inapooton co catahuarinhue'.

## 41

### *Huaraon hua'nahuachina, Cosiri no'tëquën sha'huitërinso'*

<sup>1</sup> O'shina'piro'sa hua'an, tashinan pëi quëran pipirinsó' nani cato pi'ipitërin. Naporo' huaraon chachionta hua'narin. Niroi' yonsanquë huaniarin nihua'narin. <sup>2</sup> A'nanaya ni'pirinhue', canchisë ohuaca' Niroi' quëran pipirapi ni'nin. Pa'pi amoshináchin pipirapi. I' quëran pipirahuatona', shi'shinamatëro' huáncana coshatapi. <sup>3</sup> Ina quëran niantapirinhue', canchisë chachin Niroi' quëran pipirapi ni'nin. Inapitaso' capa nishinahuën nansëyaráchin niconpi. Pipirahuatona i' yonsanquë a'napita ohuacaro'sa pi-rayan huanirapi. <sup>4</sup> Nicaso chachin, inapitaso', amoshino'sa pashica ta'papi. Inapota-tona', canchisë chachin pë'yaquë huarë' ca'miatopi. Naporo' huaraonso' capayatërin. <sup>5</sup> Naquëranchin huë'ëantapirinhue', hua'naantarin. Canchisë trico moto' noya noyatërinso' a'na nanquëáchin nitërin ni'nin. <sup>6</sup> Inapita pirayan, canchisë chachin pipiantarin. Inapitaso' pi'iri ahuiquitërinso pochin ya'nopi. <sup>7</sup> Inapitanta noya noyatërinso nipisopita pashica ta'papi. Inapotatona pë'yaquë huarë' ca'miatopi. Naporo chachin huaraonso' capayataantarin. Capayatahuaton: “Co ipora topinan ina pochin hua'narahuë,” ténin.

<sup>8</sup> Tashiramiachin huaraonso' hua'narinso yonquiaton, co napion cancantërin. Napoaton piyapinënpita camairin ya'ipi Iquipito no'paquë ninotona'piro'sa huëcacaíso marë'. Quirica nitotoro'santa amatërin. Inapita huë'pachinara, hua'narinso' sha'huitërin.

Sha'huitopirinhüé', co incari tēranta nanitērinhüé' ma'sona tapon hua'narinso sha'huitacaiso'. <sup>9</sup> Naporu huarē' o'shitona'piro'sa hua'an Cosi yonquirin. Ina yonquiaton huaraon itapon: "Ipora huarē' yonquirahuē ma'sona i'hua chachin nica'huaso' nininso'. <sup>10</sup> Quēmaso' chiniquēn nanantēran. Caso piyapinēnco nipirahuē' sha'huitaranquēn. Pan nina'piro'sa hua'anoco chachin, iráca no'huitoncoi tashinan pëiquē apo'motērancoi. Inaso' tashinan pëi', a'pairinēnquēnsopita capitan pëinēnquē ya'huērin. <sup>11</sup> A'na tashiso' catocoi chachin hua'narai. A'naya a'nayacoi nisha nisha tapon hua'narai. <sup>12-13</sup> Inaquē chachin quiyaro'coi a'nara iprio hui'napi ya'huēarin anta'. Inaso' ina capitani chachin, asacatacaso marē' pa'anin. Hua'naraiso sha'huitohuatēira, ma'sona tapon naporinso no'tēquēn sha'huitērincoi. Sha'huitērincoiso chachin caso naquēranchin asacataantaranco. A'naso nipirinhüé', noninquē ahuēnquēconotahuaton atēpatēran," itērin.

<sup>14</sup> Inapo sha'huitohuachina, copirnosu Cosi macontacaso marē' piyapinēn a'parin. A'naroáchin tashinan pëi quēran ocoipi. Cosisu niya'itahuaton, nitaparin. Noya nininso' a'mosahuaton, huaraon nicapon pa'nin. <sup>15</sup> Canconpachina, huaraoni itapon:

—Caso hua'napiirahuē', co insonta nanitērinhüé' ma'sona tapon hua'narahuēso sha'huitiincoso'. Quēma tēhuēnchinso' nitotēran, topi natantērahuē, itērin.

<sup>16</sup> —Co caora nohuanton nitotērahuē'. Quēma piyapinēnco ni'to, Yosē chachin anitotohuachinco, sha'huitaranquēn. Ma'sona noya nicacaso marē', sha'huitaranquēn, itērin.

<sup>17</sup> Napotohuachina huaraoni itapon:

—Huē'ēhuēquē Niroi' yonsanquē huaniárahüé hua'narahuē. <sup>18</sup> Naporu chachin, canchisē ohuaca' pa'pi amoshináchin nipisopita, i' quēran pipirapi. Pipirahuatona shi'shinamatēroquē coshatapi ni'nahuē. <sup>19</sup> Ina quēran canchisē chachin pipiantapi niantarahuē. Capa nishinahuēn nansēyaráchin pipirapi. ¡Co onporo tēranta ya'ipi Iquipitoquē ina pochin nipisopita ni'chinahuē'! <sup>20</sup> Nicasoco chachin, inapitaso', amoshino'sa pashica ta'papi. Inapotatona canchisē chachin, pē'yaquē huarē' ca'miatopi. <sup>21</sup> Pē'yaquē huarē' caponaraihuē', co manta ca'pisohüé pochin ya'nopi. Naporu capayatērahuē.

<sup>22</sup> Huē'ēantapirahuē', naquēranchin hua'naantarahuē: Huē'ēhuēquē Canchisē trico moto' noya noyatērinso' a'na nanquēáchin nitērin ni'nahuē. <sup>23</sup> Inapita pirayan, canchisē chachin pipiantarin. Inapitaso' pi'iri ahuiquitērinso pochin ya'nopi. <sup>24</sup> Inapitarinta noya noyatērinso nipisopita pashica ta'papi. Inapotatona pē'yaquē huarē' ca'miatopi ni'nahuē. Ninotona'piro'sa sha'huitopirahuē', co insonta nanitērinhüé' ma'sona tapon naporinso', sha'huitiinacoso', itērin.

<sup>25</sup> Napotohuachina, Cosiri huaraon itapon:

—Caso quēma piyapinēnco nipirahuē', sha'huitaranquēn: Catoro hua'naranso', a'naíchin tapon hua'naran. Ina quēran Yosē chachin anitotērinquēn ma'sona ina nicacaso' yonquirinso'. <sup>26</sup> Canchisē ohuaca' noyápiachin nipisopita, canchisē pi'ipi tapon hua'naran. Canchisē trico moto' noyápiachin nipisopitanta', ina chachin tapon naporin. <sup>27</sup> Canchisē ohuaca' capa nishinahuēn nansēyaráchin nipisonta', hua'naran. Inapitaso', amoshino'sa piquēran pipipi. Inapitanta canchisē pi'ipi chachin tapon naporin. Ina pochachin noya noyatērinso' trico moto' pirayan, canchisē chachin papoantarin hua'naran. Pi'iri ahuiquitērinso pochin ya'nopisopitanta', ina chachin anitotērinpoa'. <sup>28</sup> Napotēranquēnso chachin mini nizarin. Piyapinēnco nipirahuē', Yosē ma'sona yanininso nani sha'huitēranquēn. <sup>29</sup> Yosē nohuanton canchisē pi'ipi iso Iquipito no'paquē nani ma'sha noya noyatapon. Co manta pahuanaponhuē'. <sup>30-31</sup> Ina piquēranso nipirinhüé', canchisē pi'ipi chachin panca tanarotapi. Napoaton co huachi inso tēranta', Iquipito no'paquē noya ya'huērinso yonquiarinhüé'. Pa'pi pahuantomiatapi ni'ton, co huachi iso no'paquē noya ya'huaponahuē'. <sup>32</sup> Caso piyapinēnco nipirahuē' sha'huitaranquēn. Nani Yosē yonquirin inapocaso'. Naporahuaton co hua'quiya quēranhuē' naniarin. Napoaton ina nohuanton, catoro inachachin hua'naran.



33-34 Inapocaso ni'ton, a'nara quëmapi yonquínahuan ni'ton, noyá nitotërinso' yoníquë'. Ya'ipi iso no'panënuquë ya'huëpisopita camaicaso marë' acoquë'. Naporahuaton, chirinchiro'sa acoquë' ya'ipi hua'anëntëranquë pa'ina'. Cosharo yontonacaiso marë' pa'ina'. Noya noyatacaiso' pi'ipiro'saquë yontoina'. A'natëräpo costaro quëran, a'na costarora ma'pachina'. Ya'ipi Iquipito no'paquë inapo'ina'. 35 Naporor' pi'ipiro'saquë trico yontopiso', niquë tapaina'. Quëma chachin anitotahuatënën, ninanoro'saquë tapaina'. Tanaro tahuëri'sa canquihuachina, capacaiso marë' inapo'ina'. 36 Inapohuachina', Iquipito no'paquë trico tapapinan ya'huapon. Canchisë pi'i tanarotacaiso canquihuachina, ina ca'sapi huachi. Ina capatona', ya'ipi iso no'paquë ya'huëpisopita co chiminaponahuë', itërin.

*Copirno ya'huërënamën camaitacaso marë' Cosi acopiso'*

37 Cosi yonquirinso natanahuatona', huaaronso hua'ano'sapitarë chachin: “¡Ma nóyacha yonquirin paya!” topi. 38 Napoaton huaaronso' piyapinënpita itapon:

—Iso quëmapiso', Yosë ispiritonëni chachin ya'coancantërin. Co onporonta a'na quëmapi iso pochin nininso' ina sacato nicacaso marë' quënanarihuahuë', tënin. 39-40 Piyapinënpita napotahuaton, Cosi itapon:

—Co a'na quëmapi quëmá quëran yonqui yonquínahuan ni'ton, noya noya nitotërinso ya'huërinhuë'. Yosë chachin ya'ipi inapita anitotërinquën. Napoaton carinquën acoaranquën pëinëhuëquë, ya'huërënamëhuë camaitacaso marë'. Ya'ipi piyapinëhuëpitanta natëinënuquënso ya'huërin. Copirnocó ni'to, casáchin quëmá quëran chini chiníquën nanantarahuë. 41 Ni'quë'. Ipora tahuëri carinquën acoaranquën ya'huërënamëhuë ya'ipi Iquipito no'pa' hua'anëntacaso marë', itërin.

42 Napotahuaton huaaronso', imisiringuë sicho po'moitëranën po'morinso' ocoirin. Ina ocoirahuaton Cosi imisiringuë po'motërin. Inapotahuaton, piyapinënpita camairin: “Noya noya rino pi'shi quëran në'mëtë nipiso' a'motoco'. Naporahuaton, osëtë oro quëran nipiso', apë'pëconotoco'. 43 Ina quëran, toronanëhuëquë pa'patora, imaquirinso toronanquë ananpëco'. Inapotahuatoma', quëpaco'. Ina quëpasëma', piyapinëhuëpitari chiníquën sha'huina': ‘¡Isonco!’ tëra'ina’,” itërin. Ina pochin copirnorí Cosi acorin ya'ipi Iquipito no'paquë, camaitacaso marë'. 44 Ina piquëran huaaroni Cosi itaantapon:

—Ca mini copirnocoso nipirahuë', co inso tëranta iso no'paquë inaora nohuantërinso' nisarinhue'. Naniyarín quëran huarë' ma'sona nicacaiso', quëma camaitaran, itërin. 45 Copirnorí, Cosi Iquipito nananquë nisha nininën acotërin: Sahuinato-paniya, itërin. Naporahuaton Potihuirá hui'nin Asina itopiso' acoantërin. Potihuiraso', On ninanoquë corto hua'an ya'conin. Ina pochin Cosi, ya'ipi Iquipito no'pa' hua'anëntacaso marë' acopi.

46 Cosi cara shonca pi'ipitohuachina, Iquipito copirno marë' caniaritërin sacatacaso'. Nani acohuachina, huaaron nontahuaton caniaritërin ya'ipi Iquipito no'pa' pa'tacaso'.

47 Canchisë pi'ipi noya noyatacaiso' pi'ipiro'saquë, hua'huayátërahuë cosharo noyatërin.

48 Cosiri ya'ipi trico tapacaiso nininso', ma'patërin. Ma'pataton, ninanoro'saquë taparin. Canchisë pi'ipi naporin. Nani ninanoro'saquë trico taparin. Ina pirayan imino'saquë sha'pisopita mapiso', taparin. 49 Pa'pi notohuaro' trico Cosiri ayontonin. Marë yonsanquë inotëra'hua ya'huërinso pochin ayontonin. Pa'pi notohuaro' ni'ton, pichirápirinahuë', co onpo pichichináchinhuë' nipachina, tananpitopi huachi.

50 Co'huara tanarotacaiso caniarichátërasohuë', Cosiso cato hui'ninpita ya'huëtërin.

51 Paninanso' Manasisi itërin: “Yosë chachin parisitërahuëso', quëmopinëhuëpita, inapita ananiantërinco,” ta'ton, ina pochin hui'nin nohuitërin. 52 Ina quëran niantarinsoso', Iprain itërin. “Yosë nohuanton parisitërahuëso no'paquë chachin noya noya acorinco,” ta'ton ina pochin hui'nin nohuitërin.

53 Canchisë pi'ipi Iquipitoquë ma'sha noya noyatacaiso' pi'ipiro'sa', na'huërin huachi.

54 Naporor' Cosi naporinso chachin, tanarotacaiso caniaritërin. Canchisë pi'ipi chachin naporin. Ya'ipi a'napita no'paro'saquënta', tanarotopi. Iquipitoquëráchin cosharo

tapapinan ya'huërin. <sup>55</sup> Iquipito ya'huëhuano'santa cosharori pahuantohuachinara, huaraon paapapi. Trico natanacaiso marë' paapapi. Natanpachinara, huaraoni ya'ipi iquipitoro'sa itapon: “Paatoma', Cosi nontoonco'. Ma'sona itohuachinquëma', ina nico',” itërin. <sup>56</sup> Ya'ipi Iquipito no'paquë piyapi'sa tanarotacaiso caniaritohuachina, Cosiso chirinchiros'a camairin: “Cosharo taparëhuaso pëiro'sa i'soatatoma', ya'huëhuano'sa pa'antoco',” itërin. Aquë aquëtë tanarotapi ni'ton, pa'antapi huachi. <sup>57</sup> Naporahuaton ya'ipi parti quëran huë'sapi. Cosi trico taparinso' pa'antacaiso marë' Iquipitoquë huë'sapi. Co inso no'paquë tëranta', cosharo noyatërinhuë' ni'ton, naporapi huachi.

## 42

### *Cosi iinpitanta Iquipitoquë pa'piso'*

<sup>1</sup> Iquipitoquë trico pa'anacaso ya'huërinso', Cacoponta' nataantërin. Ina natantahuaton, hui'ninpita itapon: “¡Co topinan nini'sápamaso ya'huërinhuë'! <sup>2</sup> Nani sha'huitërinaco Iquipito no'paquë trico pa'anacaso marë' ya'huërinso'. Napoaton inaquë pa'matoma', pa'amaco'. Ama tana tiquinpoaso marëhuë' inapoco',” itërin

<sup>3</sup> Pa'pini napotohuachina, Cosi iinpitaso', shonca ya'pi trico pa'anapona Iquipitoquë pa'pi. <sup>4</sup> Mincaminso nipirinhüë', pa'pini co nohuantërinhuë' a'pacaso'. Inaso', Cosi iin miachin. Ina yo'nanquëranchin pipipiso'. “Pa'ninquë tapon ma'sha yaonpoápirinhüë',” ta'ton, co yaa'parinhüë'. <sup>5</sup> Cacopo hui'ninpitaso', a'napita piyapi'sarë' pa'pi. Ya'ipi Canaan parti tanarotopi ni'ton, notohuaro' pa'mapi.

<sup>6</sup> Nani sha'huitëranquëmaso chachin Cosiso', huaraon ya'huërenamën ya'ipi Iquipitoquë camaitarin. Naporahuaton ina camaitohuachina, ya'ipi parti quëran huë'pisopita, trico pa'antapi. Iinpitanta camahuachinara, nontacaiso marë' isonpi quëran no'paquë huarë' monshorahuatona', moshapi. <sup>7</sup> Ipora quënanapon chachin Cosiso', iinpita nohuitërin. Nohuitaponahuë', co nohuitërinhuë' pochin ninin. Napoaton no'huitatë pochin co yashinhüë' nontërin:

—¿Canpita po'? ¿Intoparanta huë'nama'? itërin.

—Canaan parti quëran, trico pa'anapoi o'marai, itopi. <sup>8</sup> Cosiriso iinpita nohuitërin. Inapitariso napoaponahuë', co ina nohuitopihuë'.

<sup>9</sup> Naporo' Cosiso', iráca hua'naton iinpita sha'huitërinso' yonquirin. Ina yonquiaton itapon:

—Canpitaso', nëhuëtona'pirosanquëma tënhuë. No'panëhuëi insëquësona co noya a'paipinanhuë' ni'camaso marë' huë'nama', itërin.

<sup>10-11</sup> —¡Co siniro inacoihuë'! Quiyaso' quëma piyapinënpita pochin ninai. Tricoíchin pa'anapoi o'marai. Ina tataquëranchin ya'ipicoi ninai. Co onporo tëranta nëhuëtochinaihuë', itopi.

<sup>12</sup> —Nonpiánama'. No'panëhuëi insëquësona co noya a'paipinanhuë' ni'camaso marë' huë'nama ipora, taantarín Cosiso'. <sup>13</sup> Napotopirinhüë', inapitariso itapona':

—Quiyaso' quëma piyapinënpita pochin ninai. Ya'ipiya quëran ina tataquëranchin, shonca catocoi ninai. Canaan parti ya'huërai. Hua'hua nininsoso', tatarë' quëparitërin. A'naso nipirinhüë', ayarin, itaantapi.

<sup>14-15</sup> —¡Nani napotëranquëma'! Canpitaso' nëhuëtona'piro'sanquëma tënhuë. Iyaparima hua'hua nininso quëcama huarë', no'tëquën nonamaso' nitotarahuë. Huaraon ya'huërin ni'ton, no'tëquën nontaranquëma'. Co ina quëpatamahuë', co onporonta isëquëran pipiaramahuë'. <sup>16</sup> A'naquëma paaton maconta'in. A'napitanquëmaso nipirinhüë', tashinan pëi ya'contarama'. Ina huë'pachin, naporo huarë' naporamaso natëaranquëma'. Co'so' huë'pachinhüë', tëhuëenchachin nëhuëtona'piro'sanquëma'. ¡Huaraon ya'huërin ni'ton, no'tëquën nontaranquëma'! itërin.

<sup>17-18</sup> Cara tahuëri Cosiri iinpita tashinan pëiquëtërin. Inapotopirinhüë', nontaantarín:

—Canta Yosë të'huatërahuë. Iso pochin nipatama', co tëpaaranquëmahuë'.  
 19 Tëhuënchachin noya nina'piro'sanquëma nipatama', a'naquëma tashinan pëiquë  
 quëparichin. A'napitanquëmaso nipirinhüë', quëmopinëma capacaiso marë' trico  
 quëpatoma', panantaco'. 20 Ina quëran, no'tëquën nonamaso' nitota'huaso marë',  
 iyaparima hua'hua nininso quëshimaco. Co'so' quëmahuatamahuë' tëhuënchachin  
 chiminarama', itërin. Napotohuachina: “Noyapa',” topi. 21 Napoaponahuë', inahua  
 capini ninontopi:

—Tëhuënchachin canpoaso' iráca pa'pi co noyahuë' ninëhua'. Iya'hua ma'sha on-  
 potohuatëhuara, nosorochináchin nontopirinpoahuë', co nosororëhuahuë'. Co napion  
 ancantërinso nicarihuarahüë', co tahuërëtërehuahuë'. Napoaton iporaso' canpoanta',  
 po'sarëhua huachi, nitopi. 22 Napohuachinara, Nopinori itapon:

—Co'ta carima': ¡Ama napotocosohüë! itopiranquëmahuë', co natëramacohüë'.  
 Napoaton iporaso' canpoanta', tēpatona'pi i'huërētopiso pochin nitarinēnpoa', itërin.  
 23 Inapitaso', Cosiri ya'ipi nataninso' co nitotopihuë'. Iquipito nanan quëráchin nontërin  
 ni'ton, napopi. Nontohuachina, a'nari inahua nonpique' ohuërërin ni'ton, co nitotopi-  
 huë'.

24 Iinpita ninapotapiso natanahuaton, Cosiso amashamiachin pa'sahuaton, na'nërin.  
 Na'nëi' cacotohuachina, huëantarín. Huë'sahuaton iinpita ni'tonënuquë piyapinēnpita  
 camairin Simion macatona tonpocaiso'. 25 Ina quëran camaitaantarín: “Costaronënaquë  
 trico po'motoco'. Coriqui pahuërētopisonta', inaquë chachin po'moantaco'. Naporahua-  
 ton, cosharo caracaiso marënta quëtoco',” itërin. Camairinso chachin piyapinēnpita nipi.

26 Inapotohuachinara, moranënaquë triconëna a'mitahuatona', ya'huëpi'pa' panantapi  
 huachi. 27 Huë'ëcaiso nininquë canconpachinara, a'naso', moranën a'caso marë'  
 costaronën i'shiritërin. Inapotopirinhuë', trico marë' coriqui pahuërëtërinso' quënanin.  
 Ina quënanaton, pa'yanin. 28 Pa'yanaton, iinpita itapon:

—Ni'cochi. ¡Trico marë' pahuërëtërahuëso', ayantaantarínaco! ¡Costaronëhuëquë  
 chachin quënanahuë! itërin. Iinpitaso natanahuatona', pa'pi pa'yanpi. Pa'yanahuatona',  
 inahua capini ninontapi: ¡Yosë ana'intarinpoa ni'ton, co pahuërëtaaponahuë' trico  
 quësarin! Nitopi.

29 Ya'huëpiquë cancontahuachinara, ya'ipi napopiso pa'pina sha'huitopi:

30 —Iquipito no'pa' hua'anquë camahuatoira, co yashinyántërahuë' nontërincoi. “Can-  
 pitaso', nëhuëtona'piro'sanquëma ipora,” itërincoi. 31-32 Napotopirincoihuë': “Co quiyaso'  
 inacoihuë'. Co onporonta nëhuëtochinaihuë'. Ina tataquëranchin shonca catocoi  
 ninai. Hua'hua nininso', Canaan parti tatarë' quëparitërin. A'naso nipirinhüë',  
 ayarin,” itërai. 33-34 Napotohuatoira, itaantaríncoi: “A'naquëma isëquë quëparichin.  
 A'napitanquëmaso nipirinhüë', quëmopinëma capacaiso marë' trico quëpatoma', panan-  
 taco'. Napoaponahuë', iyaparima hua'hua nininso quëshimaco. Naporu huarë'  
 co nëhuëtonapiro'sanquëmahuë' ninamaso' nitotarahüë. Ina nitotohuato, iyaparima  
 quëparitërinso' ocoitaranquëma'. Nisahuaton, noya huachi nanitarama iso no'paquë  
 pa'anamaso',” itërincoi, itopi.

35 Nani pa'pina sha'huitahuatona', trico ohuatopi. Ohuatohuachinara, Cosi iin-  
 pitaso', a'naya a'naya costaronënaquë, coriquinëna quënaantapi. Tanpanantëa'huayaquë  
 ya'huëarin quënaantapi. Ina quënanatona', pa'pi pa'yanpi. Pa'pinanta pa'yanin. 36 Naporu'  
 Cacopori itapon:

—Canpitaso hui'nahuëpita tiquitaramaco. Cosi ayarin. Simionta capa. ¡Iporaso  
 Mincanta yaquëpataantaramaco! ¡Ya'ipi inapita casa', ahuanta'huaso ya'huërin! itërin  
 37 Naporu' Nopinori, pa'pin itapon:

—Iya'hua a'pahuatan, cari tata a'paiarahüë. Co'so' quëshintahuatënquënhüë', cato  
 hui'nahuëpita nininso', nanitëran tēpamaso', itërin. 38 Cacoposo nipirinhüë', tapon:

—Hui'nahuëso', co onporo pa'sarinhuë'. Iin mashonën nani chiminin. Inaíchin ina yo'nanquëranchin nípiso' ya'huëarin. Pa'namaquë ina ya'huërë' ma'sha onpoan-tahuachin, caso mashoco, sêto tēpaponco huachi, tēnin.

## 43

### *Mincamin Iquipitoquë quëpapiso'*

<sup>1-2</sup> Canaan parti co manta capacaso ya'huërinhuë' ni'ton, aquë aquëtë tanaro-tapi. Napoaton i'hua Iquipitoquë trico pa'anpiso' pë'yapi. Pë'yahuachinara, Cacoposo' naquëranchin hui'ninpita camaiantarin:

—Pa'mantatoma trico pa'amantaco', itërin. <sup>3-5</sup> Napopirinhüë' Cotari itapon:

—Co'ta tata hua'an napotërincoiso', nani sha'huitërainquën: “Co'so' iyaparima hua'hua nininso quëmahuatamahüë', ama o'macosohüë'. Ina quëmama huarë' tahuërëtaranquëma',” itërincoi. Iya'hua a'paantohuatancoi, naporu huarë' trico pa'antomarainquën. Co'so' a'paantohuatancoihüë', co pa'maaraihuë', itërin.

<sup>6</sup> —¡Canpitaso pa'pi co noyahuë' acoramaco! ¿Ma'marë chachinta ina quëmapi sha'huitërama a'na iya'hua ya'huëtërinquëmaso'? itërin pa'pini.

<sup>7</sup> —Na'con natanincoi onpo ya'huëtërehuasona nininso': “¿Nanpiárin tataparima'?” itahuatoncoi: “¿A'na iyaparimanta ya'huërin?” itomantaraincoi. Napo natanpachincoira, topinan a'panitërai. ¡Co quiyaso' nitotëraihüë': “Iyaparima hua'hua nininso quëshimacoi,” itiincoiso'! itopi.

<sup>8</sup> Naporu' Cotari pa'pin itaantaranin:

—Tëhuëenchachin tata nanpicaso' nohuantohuatëhua', iya'hua a'paquë pa'i. Cari a'pairahuë. A'paantohuatancoi a'naroáchin pa'sarai. Inapohuatëhua', co chiminar-ihuahuë'. Hui'napoapitanta', noya nanpiapi. <sup>9</sup> Iya'hua pa'pachin, cari ni'sarahüë. Ma'sha onpohuachinso', ca ana'intoco huachi. Co'so' quëshintahuatëinquënhüë', chiminaquë huarë' na'inarahuë. <sup>10</sup> I'hua chachin napotasëinquën a'pantërancoi naporini, ¡nani catoro pa'sahuatoi, huënanta'itoihüë'! itërin.

<sup>11</sup> Napotohuachina, pa'pini itapon:

—Co onpotacasohüë' ni'quëhuarë', isopoco nipachin: Hua'an nicanacamaso marë' iso no'paquë ma'sha noya noyatërinso'pita costaronëmaquë quëpaco': Parsamo nimirio, ninoi', pimo hua'sai', pimo yaqui', tanpapi nitërinso', ni'to nitërinso', inapita pi'pian pi'pian po'motahuatoma', quëpaco'. <sup>12</sup> Coriquinta', catoro' pa'anacaso nanirinso', quëpaco'. I'hua ayantërinquëmaso', inaora chachin quëtaantaco'. Tapona tëhuëatona', ayantërinëinquëma'. <sup>13</sup> ¡Paco nipachin! Iya'hua quëparahuatoma', hua'an nimaantarico'. <sup>14</sup> Yosë ya'ipi nanitaparinsu' nontarahüë catahuainquëma'. Ina nohuanton hua'an nosoro'inquëma'. Simionta nosoroaton ocoi'in. Naporahuaton, Mincanta a'painta'in. ¡Canta co hui'nahuan mashoco pochin quëparita'huaso Yosë nohuantohuachin, inapo'i nipachin! itërin.

<sup>15-16</sup> Cacopo hui'ninpitaso', hua'an nicanacaiso nininsopita mapi. Ina masahuatona', coriquinta catoro pa'anacaso' nanirinso' mapi. Naporahuaton, Mincamin quëparahuatona', Iquipitoquë pa'pi huachi. Cosi ya'huërinquë camahuachinara, nontopi. Cosiso', Mincamin quëpiso quënanahuaton, piyapinën camairin:

—Isopita pëinëhuëquë quëpaquë'. Naporahuaton a'nara ohuaca' tēparahuaton, anpiquë'. Ipora camotëchin nisahuaso', inapitaro'co coshatarahuë, itërin.

<sup>17</sup> Napotohuachina, piyapinënso' ina inachachin ninin. Cosi iinpita ina pëinëinquë quëparin. <sup>18</sup> Napoaponahuë', inapitaso quëpasoi pa'yanpi. Pa'yanatona inahua capini ninontapi:

—Nonpintahuatënenpoa', pëinëinquë quësarinpooa'. I'hua coriqui ayantërinpoaso marë' quësarinpooa'. Masahuatënenpoa piyapinënpita pochin asacatarinënpoa'. Moranënpoapitarë chachin asacatarinënpoa', nitopi.



19-21 Napoaton Cosi pëinënquë yaya'conpachinara, piyapinën itapona':

—Pi'pian sinioro nonchinquën topiraihuë'. I'hua chachionta o'mapoi, tëhuënchachin trico pa'anapoi o'marai. Pa'anahuatoi panantápiraihuë', huancopi huë'ëconaiquë, costaronëhuëi i'shiritërai. I'shiritopiraihuë', coriqui pahuërëtëraisoi' ya'ipi chachin costaronëhuëiquë quënanai. Napoaton quëtaanta'huanquëmaso marë' quëmantarai. 22 Incariso acomara, co quiyaso nitotëraihuë'. A'na coriquinta ipora trico pa'antohuatëinquëma', pahuërëta'huaiso marë' quëmarai, itopi. 23 Napopirinahuë Cosi piyapinëniso':

—Sano cancantoco'. Ama pa'yancosohuë'. Naporo' pahuërëtëramaso', nani manahuë. Yosë chinotëramaso nimara costaronëmaquë acotërinquëma'. Inachachin tataparimanta chinotërin, itërin.

Napotahuaton, Simion tashinan pëi quëran ocoirahuaton quëshirin. 24 Ina quëran, ya'ipi chachin Cosi pëinënquë po'morin. Inaquë i'sha nipa'morantëcaiso marë' quëtërin. Moranënapitanta', a'carin. 25 Camotëchin Cosirë' coshatacaiso', nani nitotopi. Napoaton ninapona pochin, nicanacaiso marë' quëshipiso', taparapi huachi.

26 Cosi canquihuachina, nicanacaiso marë' quëshipiso' quëtopi. Naporahuatona', isonpi quëran no'paquë huarë' monshorahuatona', moshapi. 27 Cosiri iinpita nontahuaton itapon:

—I'hua o'mapoma': ¿Tatahuëi ya'huëarin itëramaco pora? ¿Noya ya'huëarin? ¿Nanpiarin ipora huanta ti? itërin. 28 Inapitaso' mónsho tahuatona':

—Tatahuëiso', quëma piyapinën pochin ninin. Noya ya'huëarin. Ipora huanta nanpiárin, itopi. 29-30 Cosiso yonquitopirinhue', Mincamin quënanin. Inaso iya'huain. Ina yo'nanquëranchin nipiso'. Ina tasatahuaton, natanin:

—¿Isona: “Iya'hua a'na huëshirai” tënamaso ti? itahuaton, iin itapon: “¿Yosë chachin hua'hua catahuainquën!” itërin. Napotaso chachin iin ni'sahuaton, na'nëchináchin cancantërin. Napoaton a'naroáchin patoananënquë ya'conahuaton, na'nërin.

31 Na'nërinso' pa'cotohuachina, nipa'morayaton, pipiantarin. Pipirahuaton piyapinënpita camairin: “¿O'huinco huachi!” itërin. 32 Cosiso', a'na misaquë nisha o'huintopi. Cacopo hui'ninpitanta a'na misaquë nisha o'huintopi. Iquipitoro'santa Cosirë' coshatopiso', a'na misaquë nisha o'huintopi anta'. Iquipitoro'saso', iprioro'sarë' coshatacaiso', na'in pochin ni'pi. Napoaton nisha coshatopi. 33 Cosi iinpitaso', misaquë yahuënsëhuachinara, Cosiri a'naya a'naya sha'huitërin huënsëcaiso marë'. Paninan'ton, ahuënsërahuaton, ina quëran niantarinso' ahuënsërin. Inapotaton, huinshoin ninquë huarë' ahuënsërin. Napoaton: “Pi'ipinënpoa no'tëquën tantiarinpoa,” topi. Napoatona itohuara capini nini'pi. Nini'sahuatona', pa'yanpi. 34 Cosiso inaora ca'ninso chachin, iinpitanta a'carin. Mincaminso nipirinhue' o'huintohuachinara, a'napita iinpita quëran na'con na'con acotopi. Nani coshatohuachinara, napopináchin o'opi. Inapoatona capa cancantopi.

## 44

### *Cosi, iinpita ténirinsó'*

1 Nani ca'pachinara, o'opachinara, Cosiso piyapinën camairin:

—Isopita quëmapi'sa costaronënaquë, trico amëntatëquë'. Naporahuaton coriquinëna pahuërëtopisonta', a'naya a'naya costaronënquë chachin acotaantaquë'. 2 Minënhuë prata quëran nininsonta', hua'hua nininso costaronënquë acotëquë'. Coriquinën, trico marë' pahuërëtërinso' pirayan acotëquë', itërin. Napotohuachina, piyapinënso' ina inachachin ninin.

3 Tahuëririnquë pi'i pipirirahuaso Cosiso', iinpita nontahuaton a'parin. Napohuachina moranënapitarë chachin pa'pi huachi. 4-5 Ninano quëran pipitona iinpitaso co aquëyátërasoihuë', Cosiso piyapinën itapon:



—Apira quëmapi'sa pa'piso', imaquë'. Cantonahuaton napotëquë': “¿Onpoatonta can-pitaso nosoropirinënquëmahuë', co noyahuë' ninama? Prata quëran minë nininso', hua'anëhuë o'oton ninorinso chachin ihuatërama'. ¡Pa'pi co noyahuëchi ninama paya!” itëquë', itërin.

<sup>6</sup> Cantonahuaton piyapinënso' Cosiri sha'huitërinso chachin itërin. <sup>7</sup> Napotohuachina, inapitariso itaantapi:

—¿Ihuatërama', itërancoi ti? ¡Co'chi quiyaso onporo tëranta', inapo'itoihuë'! <sup>8</sup> ¿Co'ta Canan parti quëran huarë' coriqui costaronëhuëiquë quënanpatoira, quëshiantaranquën pora? ¿Onporahuatoita iporaso', pratahuë nipon, orohuë nipon, hua'anën pëinën quëran ihuachitoihuë'? <sup>9</sup> Quiyaso' piyapinënpita pochincoi ninai. Incoi tëranta minë quënapahuatancoi, chimiin. Quiyanta', piyapinënpita pochin asacatocoi tënai, itopi.

<sup>10</sup> Napotohuachina, Cosi piyapinënso' taantarin:

—Noyapa'. Naporama ni'quëhuarë', inapochinquëma nipachin. Nipirinhüë', insosona minë quënaparahuësoíchin, piyapinëhuë nisarin. A'napitanquëmaso', co manta onpoaramahuë', itërin. <sup>11</sup> Napotohuachina, a'naya a'naya costaronëna chinohuaratona', i'shiritapi huachi. <sup>12</sup> I'shiritohuachina yonissarin. Paninan nininso costaronën quëran caniaritahuaton, hua'hua nininso costaronënquë huarë', yonirin. Yonípachina, Mincamin costaronënquë quënanin huachi. <sup>13</sup> Ina nicatona iinpitaso', pa'pi sëtahuatona a'moanpiso oshapi. Napohuachina, a'naya a'naya pë'pëtonëna moranënaquë a'mitahuatona', naquëranchin ninanoquë ayaimantapi.

<sup>14</sup> Cotaso', iinpitarë chachin Cosi pëinënquë canconpachina, inaso ya'huëarin quënamantapi. Quënanahuatona', isonpi quëran no'paquë huarë' monshorahuatona', moshaipi. <sup>15</sup> Moshasoi', Cosiso iinpita itapon:

—¡Co'chi canpitaso yonquinahuano'sa pochinhuë ninama paya! ¡Caso chiníquën nanantërahuë ni'ton, nito ninorahuë! itërin. <sup>16</sup> Napotohuachina, Cotari itapon:

—¡Tëhuëenchachin co onpo a'pania'huainso nanitëraihuë'! ¡Co naporaihuë', co ta'cahuaiso ya'huërinhuë'! Oshahuanaiso', nani Yosë nitotërin. Ma'tana ya'huarai. Minënën maninsorë chachin asacatocoi, itopi. <sup>17</sup> Napotopirinhüë', Cosiriso itapon:

—Co napoarinhüë'. Insosona minënëhuë quënapapisoíchin piyapinëhuë nisarin. A'napitanquëmaso', tatama ya'huërinquë noya panantaco'. Co insonta ma'sha onpotar-inquëmahuë', itërin.

*Cota, Mincamin ya'huërenamën yaquëparitërinso'*

<sup>18</sup> Cosi napohuachina, Cotari amasha ya'carirahuaton, itapon:

—Pi'piyan siniro nonchinquën topirahuë. Yonquirahuëso no'tëquën sha'huichinquën. Quëmaso' huaroon pochachin chiníquën nanantëran. Napoaton ama no'huitonco ana'intaancoso marëhuë' napotaranquën. <sup>19</sup> I'hua huë'naiquë, quëmaso natanancoi tatahuëi ya'huëtërincoiso'. A'na iyahuëinta ya'huëtërincoiso', natanancoi. <sup>20</sup> Quiyarinta naporosha'huitëranquën: “Tatahuëi ya'huëtërincoi, nani máshoya,” itërainquën. A'na iya'huanta hui'napi ya'huëtërincoiso', sha'huitërainquën. Inaso', tatahuëi nani máshoya niso' hua'huatërin. Naporosha'huitëranquën tatahuëri na'con nosororinso'. Ina yo'nanquëranchin hua'huatopisopita cato ya'huëpirinhüë', a'naso ayarin ni'ton, inaíchin quëparitërin. Napoaton nosoromiatërin. <sup>21</sup> Naporosha'huitërancoi nohuitamaso marë' quëca'huaiso'. <sup>22</sup> Napotohuatancoira, sha'huitërainquën: “Iya'huaso', co nanitërinhuë' pa'pin huëshicaso'. Huëshirin naporini, pa'pinso' sëtori tēpa'itonhuë',” itërainquën. <sup>23</sup> Napotopiranquënhüë': “Co'so' iya'hua quëpatamahuë', co onporonta tahuëretaranquëmahuë',” itërancoi.

<sup>24</sup> Tatahuëitaquë canconpatoira, ya'ipi quëma napotërancoiso' sha'huitërai.

<sup>25-26</sup> Hua'quimiachin quëran, tataso' camairincoi: “Pa'sahuatoma' trico pa'amantaco',” itopirinhüë', quiyarisó: “Co nanitëraihuë'. Iya'hua a'paantohuatancoi, naporosha'huarë' pa'sarai. Co'so' ina quëpahuatoihuë', co hua'an tahuëretarincoihuë',” itërai.

<sup>27</sup> Napotohuatoira, tatahuëi sha'huitërincoi: “Canpita nitotërama sa'ahuëco' catoíchin hua'huaninso'. <sup>28</sup> A'naso', ayarin. Napoaton naporu quëran huarë' co quënanchinahuë'. Pa'piniri ca'mara tënahüë. <sup>29</sup> Iin ya'huërë' quëparamaquëya ma'sha onpohuachin, canpita tëhuëarama'. Canpita tëhuënëmaquë caso mashoco sëto tëpaponco huachi,” itërincoi.

<sup>30-31</sup> Tatahuëso', iya'huarë' a'naíchin pochin nipi. Co'so' quiyarë' pantahuachinhuë', tatahuëso chiminapon. Quiya tëhuënëhuëiquë tata mashoyaso' sëtori tëpapon. <sup>32</sup> Co'huara huë'shamátërapoihuë' sha'huitërahuë: “Iya'hua a'paantohuatancoi, cari ni'sarahuë. Ma'sha onpohuachinso', ca ana'intoco huachi,” itërahuë. Naporahuaton napotomantarahuë: “Co'so' quëshintahuatënquënhuë', chiminaquë huarë' na'inarahuë,” itërahuë. <sup>33</sup> Napoaton nontaranquën natanco topirahuë. Ca iya'hua ya'huërënamën quëma piyapinën quëparichi tënahüë. Inaso iinpitarë', pananta'in. <sup>34</sup> Co'so' iya'hua pantahuachinso', co caso nanitërahuë tatahuëtaquë, pananta'huaso'. Tatahuë ma'sha onporinso', co yani'nahuë', itërin.

## 45

### *Iinpitari Cosi nohuitopiso'*

<sup>1</sup> Ya'ipi piyapinënpita ni'tonënuquë Cotari nontërinso tonitohuachina, Cosiso co huachi ahuantërinhuë'. Co huachi ahuantatonhuë', Iquipito nananquë chiníquën nonin: “¡Ya'ipinquëma pipico!” itërin. Napotohuachina, ya'ipi piyapinënpita pipipi. Iinpitarëáchin nicaso', nohuitacaiso marë' sha'huirin. <sup>2</sup> Sha'huiton Cosiso', na'nëmiatarin huachi. Chiníquën na'nërin ni'ton, ya'ipi iquipitoro'sa nitotopi. Huaraon pëinënuquë huarë' a'naquënso pa'sahuatona', sha'huitonpi. <sup>3</sup> Naporu huarë' Cosiso', inahuara nanamënaquë iinpita nontërin:

—¡Ca mini Cosico! ¿Nanpiárin iporahuanta tata? itërin. Napotopirinhuë', iinpitariso pa'pi të'huataton', co nanitopihuë' nonacaiso'. <sup>4</sup> Të'huatopirinahuë', Cosiriso itapon:

—Ama iyaro'sa të'huatocosohuë', ya'caritoco', itërin. Naporu huarë' iinpitari ya'caririn. Ya'carihuachinara, itaantarin:

—Ca mini iyaparimaco. ¿Co'ta iráca nicatono'sa Iquipitoquë huëcasoi pa'anamaco?

<sup>5</sup> Napotëramacoso marë' ama canpitaora nino'huicosohuë'. Co canpitaso yonquipiramahuë', Yosë chachin aquëchitiirincó. Notohuaro' piyapi'sa ananpicaso marë' aquëchitërinco. <sup>6</sup> Ipora huarë' iso no'paquë, cato pi'ipi nisarin tanarotopiso'. A'natërápo pi'i chachin, pahuanarin. Ina nápo pi'i sha'topirinahuënta', co manta nitërinso' macaponahuë'. <sup>7</sup> Napotëranquëmaso chachin nisarin. Yosëso nipirinhuë', aquëchitiirincó. Canpitanta shiparima ya'huëtiinquëmaso marë' naporin. Canpita chachinta', huëhuëpiro ninin quëran nicha'ëinquëmaso marë' aquëchitiirincó. <sup>8</sup> Inapocaso ni'ton, co canpita nohuanton isoporinguë huë'nahuë'. Yosë chachin a'parincó ni'ton, huë'nahuë. Ina nohuanton, huaraon ayonquina'pi nica'huaso marë' ya'conahuë. Ya'ipi ma'shanënpita a'paiato, piyapinënpitanta', camaica'huaso marë' ya'conahuë. Naporahuaton, ya'ipi Iquipitoquë huaraon ya'huërënamën hua'anënta'huaso marë' acorincó.

<sup>9</sup> Manóton paantatoma', tata sha'huitonco': “Cosi ya'huëarin, iso pochin nanan a'patiarinquën: ‘Ya'ipi Iquipito no'paquë hua'anënta'huaso marë' Yosë acorincó. Manóton o'maton, ni'quimaco. <sup>10</sup> Ya'ipi hui'nanpita, shia'huaro'sa', inapitarë chachin, o'maco'. Pë'tahuanëmapita, ma'shanëmapita, ya'ipi ya'huëtërinquëmaso', quiquimaco'. O'mahuatama', Cosin parti acoaranquëma'. Inapohuatama', co aquëya quëranhuë' nini'sáparihua'. <sup>11</sup> Naro'pa huachi carima cosharo quëtáponquëma'. Ya'ipi huë'namaso nápo chachin co manta ichipahuantaranquëmahuë'. A'natërápo pi'ipi pahuanarin tanaro tahuëri'sa na'huëcaso ni'ton, napotápënuquëma', itoco'. <sup>12</sup> Iya'hua', canpitanta', ya'ipi naporahuëso', nani natanamaco. <sup>13</sup> Chiníquën nanantato Iquipitoquë hua'anëntërahuësonta', nani ni'nama'. Ya'ipi ni'namaso' tata sha'huitonco'. ¡Manóton paantatoma tata macontaco!’” itërin.

<sup>14</sup> Napotahuaton, iya'huain iporin. Ina iporin quëran na'nërin. Mincaminta', Cosi iporin quëran na'nërin. <sup>15</sup> Ina quëran Cosiso', ya'ipi iinpita noya nontaton së'quërin. Inapitanta iporahuaton na'nërin. Ina piquëran inapitarinta co huachi të'huatatonahuë', noya nontopi huachi.

<sup>16</sup> Huaraoon pëinënquënta', a'naroáchin nanan nincanin: “Cosi iinpita canquipi,” itopi. Ina natanahuaton, huaraoonso catahuarinsopita hua'ano'sarë chachin noya cancantopi.

<sup>17</sup> Noya cancantaton huaraooniso', Cosi itapon:

—Iyaro'sa sha'huitëquë', pë'tahuanënaquë trico a'mitahuatona', Canaan parti pananta'ina'. <sup>18</sup> Paantatona', pa'pina quëma'ina'. Ya'ipi quëmopinënpitarë chachin, o'ma'ina'. O'mahuachina', Iquipitoquë noya noya no'pa' nininso', cari quëtarahuë. Napoaton inapitaso', iso no'paquë ma'sha noya noyatërinso'pita, capona'. <sup>19</sup> Sa'ina', hui'nina', pa'pina', inapita quëmacaiso marë', camaiquë toronano'sa isëran quëpa'ina'. Sha'huitëquë a'naroáchin huë'ina'. <sup>20</sup> Naporahuaton, ama aquëtë ma'shanënapita yonqui'inasohuë'. Iquipitoquë ma'sha noya noya nininsopita, inapitari hua'anëntapona', itëquë', itërin. <sup>21</sup> Napotohuachina, Cacopo hui'ninpitato' ina inachachin nipi. Huaraoon camaitërinso chachin, Cosiri toronano'sa quëtërin. Naporahuaton cosharo iraquë caracaisonta', quëtërin. <sup>22</sup> O'nanpiracaisonta', ya'ipi iinpita ananitëra'piarin. Mincaminso nipirinhüë', cara pasa coriqui prata quëran nininso' quëtahuaton, a'natërâpo a'mocaso quëtërin. <sup>23</sup> Pa'pionta', shonca moraquë, noya noya ma'sha Iquipitoquë ya'huërinso', a'patontarin. Naporahuaton shonca moraquë chachin, trico, pan, cosharo', inapita a'patontarin. O'mahuachina carimacaiso marë' a'patontarin. <sup>24</sup> Pacacaiso marë' nontohuachinara, Cosiso iinpita itapon:

—Osharan paco'. Amana iraquë nino'huíracosohuë', itërin. Napotohuachina pa'pi huachi.

<sup>25</sup> Inapitaso', Iquipito quëran pipirahuatona', Canaan parti canconpi. Pa'pina ya'huërinquë chachin canconpi huachi. <sup>26</sup> Pa'pina nontatona sha'huitopi: “¡Cosi nanpiárin tata! ¡Inari ya'ipi Iquipito no'pa' hua'anëntërin!” itopi. Ina natanahuaton, Cacoposo pa'yanënuquë tachianantërin. Sha'huitopirinahuë', co natëtërinhuë'. <sup>27</sup> Napoaponahuë', Cosiri nanan a'patërinso natanin. Ina natanahuaton, toronano'sa quëpamacaiso marë' a'patontarinso'nta', ni'nin. Naporo huarë' capa cancantomiatërin huachi. <sup>28</sup> Capa cancantaton tapon: “¡Tëhuëchachin Cosi nanpiárin! Co'huara chimiantërasocohuë' pa'mato nimai,” tënin.

## 46

### *Iquipitoquë pa'mapiso'*

<sup>1</sup> Cacoposo' ya'ipi huëntonënë chachin pa'sarin. Ya'ipi ma'shanënpitarë' pa'sarin. Piirsipaquë canconpachinara, ma'sha tëparin. Tëparahuaton, pa'pinco' Yosë chinotërinso chachin chinotërin. <sup>2</sup> Naporo tashi Yosëri hua'narëso pochin ya'notërin. Ya'notahuaton, nininën quëran përarin: “Cacopo” itërin. Napotohuachina, inariso itapon:

—Ma'ta Sinioro ya'huarahuë', itërin.

<sup>3</sup> —Caso Yosëco. Tataparionta chinotërinco. Iquipitoquë pa'macaso marë' ama të'huaquësohuë'. Inaquë shiparinpita na'atona', panca nacion ocoiaponá'. <sup>4</sup> Canta quëmaro'co Iquipitoquë, pa'marahuë. Naporahuaton ca chachin, ina no'pa quëran shiparinpita ocoiarahuë. Inaquë chiminpatan, Cosi nocoarinquën, itërin.

<sup>5</sup> Ina quëran Cacoposo', Piirsipa quëran paantarin. Hui'ninpitari toronanquë a'mitopi. Huaraoon quëpamacaiso marë' toronano'sa a'patontarinquë, inapotopi. Sa'ina', hui'nina', inapitanta a'mitopi. <sup>6-7</sup> Cacoposo', hui'ninpitare' chachin pa'sarin. Hui'ninpitanta sa'ina hui'ninpitare' chachin pa'sapi. Ya'ipi inapitarë chachin pa'sápatona', Iquipito no'paquë huarë' camapi. Ya'ipi ma'shanënapitanta Canaan parti ya'huëttopiso', quiquipi. Pë'tahuanënapitanta', Ohuicaro'sa', ohuacaro'sa', chiporo'sa', inapitanta quiquipi.

<sup>8</sup> Isopita, Cacopo quëran pipipisopita Iquipitoquë pa'mapi. Inapita chachin israiro'sa itopi anta': Paninantërinso', Nopino. <sup>9</sup> Ina hui'ninpitaso': Anoco, Huaron, Ison, Caromi, inapita. <sup>10</sup> Simion hui'ninpitanta', Quimoino, Camin, Ohuato, Caquin, Sohuaro, Saono, inapita. Saonoso', Canaan sanapiquë hui'nahuaninso'. <sup>11</sup> Nihui hui'ninpitanta', Coirison, Quiato, Mirari, inapita. <sup>12</sup> Cota hui'ninpitanta', Iri, Onan, Sira, Parisi, Saro, inapita. Iri, Onan, inapitaso', Canaan parti chachin chimin piso', nani nitotërhua'. Parisi hui'ninpitanta', Ison, Amoro, inapita. <sup>13</sup> Isacaro hui'ninpitanta', Toran, Popan, Copo, Simiron, inapita. <sup>14</sup> Saporono hui'ninpitanta', Siriti, Iron, Cariri, inapita. <sup>15</sup> Ina nápo Cacopo hui'ninpita quëmapi'sa Niaquëya ya'huëpi. Sanapinta a'nara ya'huëtërin: Tina itërinso'. Inapitaso', Patan-aranquë ya'huapon hui'nahuaninsopita. Nia quëran pipipisopitaso', cara shonca cara ya'pi', sanapirë chachin icanpi.

<sup>16</sup> Caro hui'ninpitanta', Sipion, Aqui, Ison, Soni, Iri, Aroti, Ariri, inapita. <sup>17</sup> Asiri hui'ninpitanta', Imina, Isopa, Isopi, Piria, inapita. Oshinanta ya'huërin: Sira itopi. Piria hui'ninpitanta', Ipiri, Mariquiri, inapita. <sup>18</sup> Caro, Asiri, inapitanta Cacopo hui'ninpita Siripaquëya nipiso'. Ina quëran nipisopitaso', ya'ipiya quëran shonca saota ya'pi', icanpi. Siripaso' Napanori Nia catahuacaso marë' nicanarinso', nani nitotërhua'.

<sup>19</sup> Naquiranta Cacopo sa'in chachin ninin. Ina hua'huinpitanta', Cosi, Mincamin, inapita. <sup>20</sup> Cosiso', Asinaquë hui'nahuaninsopita: Manasisi, Iprain, inapita. Inapitaso', Iquipitoquë nasitopi. Asinanta', ayonquianta'inquëma'. Inaso', Potihuir hui'nin. Potihuiranta', On ninanoquë corto hua'an ya'conin. <sup>21</sup> Mincamin hui'ninpitanta', Pira, Piquiri, Asipiri, Quëra, Namano, Iqui, Nosi, Mopimo, Opimo, Arato, inapita. <sup>22</sup> Ina nápo Naquira quëran nipisopita ya'huëpi. Shonca catapini ya'pi ya'ipiya quëran icanpi.

<sup>23</sup> Tanoso', a'naíchin hui'nahuanin: Osimo itërin. <sup>24</sup> Nipitari hui'ninpitanta': Casiiri, Coni, Quisiri, Sirimo, inapita. <sup>25</sup> Tano, Nipitari inapitanta Cacopo hui'ninpita nipi. Inapitaso', Piraquëya nipiso'. Ina quëran nipisopitaso', ya'ipiya quëran canchisë ya'pi', icanpi. Piranta', Napanori Naquira catahuacaso marë' nicanarinso', nani nitotërhua'. <sup>26-27</sup> Iquipitoquë pa'mapisopita, saota shonca saota ya'pi icanpi. Ya'ipi inapitaso', Cacopo quëran pipipisopita. Hui'ninpita sa'inaso' co pichipihuë'. Cosi hui'ninpitaso' cato. Inapitaso' inaquë chachin nasitopi. Cacopo, Cosi, inapitarë' canchisë shonca ya'pi ya'ipiya quëran icanpi.

<sup>28</sup> Co'huara Cosin parti camayátërasoihuë', Cacoposo' Cota camairin: “Cosi sha'huitëquë huë'in, Cosin parti nacapi'inco,” itërin. Inaquë Cota paaso', Cacoposo ya'ipi huëntonënë chachin Cosinquë camapi huachi. <sup>29</sup> Iin cantomarahuaton Cotaso', pa'pini nanan a'patërinso sha'huitërin. Sha'huito huachina Cosiso', a'naroáchin piyapinënpita camairin toronanën tapacaiso marë'. Inaquë huësërahuaaton, Cotarë chachin pa'nin. Pa'sahuaton pa'pin quënanconpachina, iporin. Iporinquëranchin hua'qui na'nërárin. <sup>30</sup> Naporo' Cacopori, itapon:

—Ayapiranhuë', quënaantaranquën ni'ton: ¡Iporaso' chiminpatonta noyatapon huachi ténahuë! ténin.

<sup>31</sup> Pa'pin nani nontahuaton Cosiso', ya'ipi iinpita, quëmopinënpita inapita itapon:

—Huaaron nicapo pa'sarahuë. Pa'sahuato itapo: Ya'ipi quëmopinënhuëpita Canaan parti ya'huëpirinahuë', yacapainacoso marë' o'mapi. <sup>32</sup> Ohuacanënapita, ohuicanënapita, ya'ipi ma'shanënapita quiquiimapi. Inapitaso pë'tahuatona'piro'sa', itarahuë. <sup>33-34</sup> Napotohuato, huaaron përasarinquëma'. Përatëinquëma' maquësona sacatëramaso' natanpachinquëma': “Quiyaso', shimashonënhuëpita pochachin, ohuica pë'tahuana'piro'sacoi,” itoco'. Napohuatama', Cosin partiquë ya'huapoma'. Iquipitoro'saso', ohuica pë'tahuana'piro'sarë', napopináchin ya'huëcaiso', na'in. Napohuatama', canpitaráchin inaquë ya'huapoma', itërin.



## 47

<sup>1</sup> Cosiso', pa'pin, iinpita, inapita nontahuaton huaraon sha'huitapon pa'nin: “Tatahuë, iyahuëpita, inapita Canaan parti quëran o'mapi. Ya'ipi ohuicanënapita, ohuacanënapita, ma'shanënapita, inapitarë chachin o'mapi. Nani Cosin parti niquipi,” itërin. <sup>2</sup> Ina piquëran a'natërápo iinpita huayonin. Huayonahuaton, huaraoni nohuitacaso marë' quëparin. <sup>3</sup> Naporo' inari natanin:

—¿Maquëta canpitaso sacatërama'? itërin.

—Quiyaso' quëma piyapinënpita pochincoi ninai. Shimashonëhuëipita pochachin ohuica pë'tahuatona'piro'sacoi. <sup>4</sup> Canaan parti ya'huëpiraihuë', na'con tanarotërai. Pas-tonta', ohuicaros' capacaiso', yanirin. Napoaton no'panënuquë o'marai ya'huapoi. Yosë marë' nohuantëquë', Cosin parti ya'huë'i topiraihuë', itopi. <sup>5</sup> Napotohuachinara, huaraoniso' Cosi itapon:

—Yacapainënuquënsó marë' tataparin, iyaparinpita, inapita o'mapi. Nani o'mapi ni'quëhuarë', <sup>6</sup> ya'ipi Iquipito no'pa' hua'anëntërahuëquë, noya inapita ya'huëcaiso'. Cosin parti noya noya no'pa' ninin. Inaquë ya'huëcaiso marë' quëtëquë'. A'naquën quëmopinënpita pë'tahuatacaso' noyá nitotohuachina', caquën pë'tahuanëhuëpita, a'paicaiso marë' acoquë', itërin.

<sup>7</sup> Ina piquëran Cosiso', huaraon anohuitacaso marë' pa'pionta quëparin. Cantontahuaton Cacoposo', monsho tënin, nontacaso marë'. <sup>8</sup> Huaraoni ni'sahuaton natanin:

—¿Onpo pi'ita ya'huëtërinquën? itërin.

<sup>9</sup> —Nani pasa cara shonca pi'ipi ya'huëtërinco. Co ya'huëmia ya'huëatohuë', patë patërantarahuë. Inapoato na'con parisitërahuë. Shimashonëhuëpitaso', na'con na'con tahuëri ni'pi. Co caso inapita icantapohuë' nimara tënahuë, itërin. <sup>10</sup> Cacoposo nani huaraon nontahuaton, Cosirë chachin pa'nin huachi.

<sup>11</sup> Ina quëran Cosiso', Iquipitoquë noya noya no'pa' nininso' quëmopinënpita quëtërin. Huaraoni camairinso chachin ninin. Inapoatona Cacoposo' hui'ninpitare chachin Namisi parti no'pahuanpi. Namisiso', Cosin itopi anta'. <sup>12</sup> Naporahuaton Cosiso', ya'ipi quëmopinënpita cosharo quëtárin. Panca huënton nininso' na'con na'con, quëtërin. Caraya nininso', pi'piyan quëtërin. Inapotërin.

*Iquipitoquë onpo sacatacaiso', Cosi camaitërinso'*

<sup>13</sup> Co insëquë tëranta trico ya'huërinhuë'. Napoaton na'con na'con tanarotopi huachi. Canaan partiquënta', Iquipitoquënta', piyapiro'sa tanari tiquirarin. <sup>14</sup> Inaquëpita ya'huëpisopita, Cositaquë trico pa'anápirinahuë', nii'quianapi huachi. Ya'ipi coriqui trico marë' pahuërëtopiso', Cosiso yontonin. Yontonahuaton huaraon pëinënuquë taparin.

<sup>15</sup> Canano'sa', iquipitoro'sa', inapita coriquinëna i'quihuachinara, iquipitoro'saso', Cosi nontapona pa'pi:

—¡Yosë marë' cosharo quëtocoi! Capa nii'quianarai huachi. Capa coriqui ni'ton, co huachi cosharo quëtohuatancoihuë', tana tëpaponcoi quiyaso'. Ina marë' quëmanta co huachi noya nisaranhuë', itopi.

<sup>16</sup> —¡Naporinchi paya! Capa coriquinëma ni'quëhuarë', pë'tahuanëmapita nipachin quëco'. Ina quëpatama', trico quëtarainquëma', itërin Cosiri. <sup>17</sup> Napotohuachina iquipitoro'saso', pë'tahuanëna quëshipi: Cahuarionëna', ohuicanëna', ohuacanëna', moranëna', inapita quëshipi. Inapita marë' naporo pi'iquë trico canpiatërin.

<sup>18</sup> Ina pi'i na'huëanatopi. A'na pi'i maantarinquë naquëranchin iquipitoro'saso', Cosi paapantapi nontaantacaiso marë':

—Nani quëma nitotëran capa coriqui ya'huëtërincoisohuë'. Ya'ipi pë'tahuanëhuëipitanta canpitanquën ninin. Co huachi ma'sha tëranta ya'huëtërincoihuë' pahuërëta'huaiso'. No'panëhuëichin ya'huërin. Naporahuaton quiyanta ya'huëarai. <sup>19</sup> Quiyaora chachin nipachin, no'panëhuëirë'coi pa'ancoi. Ina ya'huërenamën trico quëtocoi. Inapohuato huaraon piyapinënpitacoi nisarai. Ina marë' no'panëhuëiquë chachin sacachi. Cosharo



quëtohuatancoi, no'panëhuëiquë sacatarai ni'ton, co nitapiarinhuë'. ¡Taquihuatoiso', no'panëhuëinta' pantatarin. Inapohuatoi, quëmanta co manta canaponhuë'! itopi.

<sup>20</sup> Napotohuachinara, Cosiso ya'ipi iquipitoro'sa no'panëna huaraon marë', pa'antëra'piarin. Co manta capacaisohuë ni'ton, no'panëna pa'ana'piapi. Inapopi ni'ton, ya'ipi Iquipito no'pa', huaraoni hua'anëntërin huachi. <sup>21</sup> Naporahuaton ya'ipi Iquipito no'paquë iquipitoro'sa ya'huërinso', Cosiri pa'anaton piyapitërin. <sup>22</sup> Corto hua'ano'sa no'panënáchin co Cosiri pa'antërinhuë'. Inapitaso' huaraoni topinan trico quëtárin ni'ton, co no'panëna pa'anacaiso ya'huërinhuë'.

<sup>23</sup> Ina quëran Cosiri piyapi'sa itapon:

—Iporaso', huaraon hua'anëntërinquëma huachi. No'panëmanta hua'anëntërin. Ma'tana ya'pirin ya'huëarin quëpatoma', sha'co'. <sup>24</sup> Napoaponahuë', sha'namaso' nanitohuachin, a'natërápo costaro quëran a'na costarora huaraon quëtamaso ya'huërin. Catapini costaroso nipirinhüë', canpitaora marë' nizarin. Hui'namapita, yacaparinquëmasopita, inapitanta capacaiso marë' nizarin. Naporahuaton ina quëran chachin shacacamaso ya'huërin, itërin. <sup>25</sup> Napotohuachina, inapitaso taantapi:

—Noyapa'. Inapochin nizarai. Quëmaso noya piyapinquën ni'ton, tana tēpaincoiso nipirinhüë', nicha'ërancoi. ¡Huaraon nipachin piyapichincoi! itopi. <sup>26</sup> Inapoaton Cosi camaitërin ya'ipi Iquipito no'paquë piyapinēnpita ma'sona nicacaiso'. Sha'topiso nanitohuachina, a'natërápo costaro quëran, a'nara huaraon quëtacaiso ya'huërin. Iso quirica ninshitasoco huarënta', ina camaitërinso', ipora huanta Iquipitoquëso ina chachin nisapi. Corto hua'ano'saso nipirinhüë', co huaraon marë' quëtacaiso ya'huërinhuë'. Inapita no'panënaso', co huaraoni pa'antërinhuë' ni'ton, co quëttopihuë'.

### *Cacopo nohuantërinso'*

<sup>27</sup> Israiro'saso', Iquipito no'paquë ya'huëapi huachi. Cosin parti no'pa' mapi. Inaquë ya'huëapona pochin na'amiatopi. <sup>28</sup> Cacoposo shonca canchisë pi'ipi, Iquipitoquë ya'huëantarin. Ya'ipiya quëran pasa catapini shonca canchisë pi'i icanin.

<sup>29</sup> A'na tahuëri Cacoposo', nani chiminacaso ya'caritërin ninatanin. Napoaton Cosi sha'huitacaso marë' a'nara a'parin. Huë'pachina, itapon:

—Tëhuëinchachin nosorohuatanco, nohuantërahuëso' niquë'. Ina yanipatanso', tonaroana sē'huatoco. Sē'huatatonco: “Yoscoarë' nohuantëranso' nizarahuë,” itoco. ¡Caso chiminpató, ama Yosë marë' isëquë pa'pitocosohuë'! <sup>30</sup> Shimashonëhuëpita quënancona'huaso tahuëri nanitohuachinco, Iquipito no'pa quëran quëpaco. Quëparahuatonco, inapita po'mopiquë, canta po'moontaco, itërin.

—Noyapa'. Inapochinquën nipachin, itërin Cosiri.

<sup>31</sup> —Yoscoarë' inapochinquën itoco, itaantarin pa'pini. Napotohuachina, Cosiso: “Yoscoarë' inapotaranquën,” itërin. Ina natanaton, Cacoposo, pë'saranënuquë huënsërin. Inaquë huënsërin quëran, “Yosparinquën,” ta'caso marë' mónsho tēnin.

## 48

### *Iprain, Manasisi inapita noya ya'huëcaiso marë' sha'huitërinso'*

<sup>1</sup> Ina piquëran miachin Cacoposo' caniorin. Napohuachina Cosi sha'huitopi. Ina natanahuaton, nicapon pa'nin. Hui'ninpitanta cato chachin quëparin. Manasisi, Iprain, inapita. <sup>2</sup> Cosiri nicapon huë'ninso sha'huitohuachinara, chiniquën cancantaton pë'saranënuquë huënsërin. <sup>3-4</sup> Cosiso', hui'ninpitare chachin ya'coontarahuaton pa'pin nontoonin. Ina quëran Cacoposo' Cosi itapon:

—Yosë ya'ipi nanitaparinsó', Noso ninanoquë ya'notërinco. Inaso ninano', Canaan parti ya'huërin. Ya'notahuatonco, iso pochin noya ya'huëca'huaso marë' sha'huitërinco: “Ni'quë'. Ca nohuanto, notohuaro' hui'nanpita ya'huëtarinquën. Quëmá quëran pipipisopita, na'a naciono'sa ocoyapona'. Naporahuaton, inapita, iso no'pa' quëtarahuë. Inapitari hua'anëntomiatapona',” itërinco. <sup>5</sup> Hui'nanpita Iprain, Manasisi, inapitaso co'huara

yacapaponquën huë'shamátërasocohuë' ya'huëtërinquën. Inapitaso' caquën nicapona'. Napoatona', Yosë no'pa' hua'anënta'huaso sha'huitërinco', hua'anëntapona'. Nopino, Simion, inapita pochin ni'tona', hua'anëntapona'. <sup>6</sup> Inapita piquëran hui'nahuanpatan, quëmaoranquën nisapi huachi. Inapitaso' Iprain, Manasisi, inapita iya'huainpita nicapona'. Ina ni'tona iin mashonëna no'panëna quëran, inapitanta', no'pa' macapona'. <sup>7</sup> Co topinan napotaranquënhuë'. Mamaparin co aquëtë hua'huaninso marëhuë', napotaranquën. Quëmanta nani nitotëran: Patan-aran quëran huëntasëhua', Canaan parti quëmaquën mama tëparëhua'. Iporata ninano ya'cariya nicasëhua', chiminin. Chiminpachina, inaquë chachin ira pirayan pa'pitërehua'. (Ina ninanoso', ipora marë' Pirin itopi anta'.)

<sup>8</sup> Ina ta'sochachin a'nanaya Cacoposo' tahuërëtahuaton ni'pirinhuë', Cosi hui'ninpita quënanin. Inapita quënanaton, hui'nin natanin:

—¿Inpitata isopitaso'? itërin.

<sup>9</sup> —Isopita mini hui'nahuëpita. Yosë nohuanton naro'pa' ya'huëtërinco', itërin Cosiri.

—Amashachin aya'carico. Noya ya'huëcaiso marë' sha'huichi, itaantarin Cacopori.

<sup>10</sup> Cacoposo' noyá mashoya ni'ton, co huachi ina inahuë quënantërin. Napoaton Cosiri hui'ninpita aya'caririn. Napohuachinara, Cacoposo shinpita iporahuaton apinorin.

<sup>11</sup> Ina quëran Cosi itapon:

—Co huachi onporo tëranta quënanahuanquënso' yonquipirahuë', Yosë nohuanton hui'nanpitanta quënanahuë'. <sup>12</sup> Pa'pin to'topitënuë hui'ninpita huësëápirinahuë', Cosiri ahuanirin. Ahuanirahuaton, pa'pin notënanquë isonin. Isonin quëran no'paquë huarë' monshorin. Noya nicon napotërin.

<sup>13</sup> Ina quëran cato hui'ninpita chachin manin. Iprainso', inchinanën quëran së'quërin. Ya'huërë' Manasisiso' ahüënanën quëran së'quërin. Inapo së'quërin quëran pa'pin aya'caririn. Napoaton Iprainso', shiin ahüënanën quëran acorin. Ya'huërë' Manansisiso', shiin inchinanën quëran acorin. <sup>14</sup> Cacoposo nipirinhüë', tanpaquënpita chi'huaratahuaton, inchinanën quëran Iprain së'huamotorin. Manasisiso paninan nipirinhüë', ahüënanën quëran së'huamotorin. <sup>15-16</sup> Inaporahuaton Cosi noya ya'huëcaso marë' iso pochin sha'huitërin:

“Shimashonëhuëpita Apraan, Isaco, inapita Yosë natëpi.

Canta hua'huatërahuë quëran huarë' ina chachin noya a'pairinco.

Ina Anquëninën\* chachin ya'ipi ma'sha onporahuë quëran, nicha'ërinco.

Inari chachin isopita hui'napi'sa catahuain.

Notohuaro' hui'ninpita ya'huëchina'.

Hua'huayátërahuë, isoro'paquë na'aina'.

Inapita nicon piyapi'sa', yonqui'inaco.

Tata Isaco, tata masho Apraan, inapitanta yonqui'ina',” itërin.

<sup>17</sup> Cosiso nipirinhüë', paninantërinso' ahüënan quëran shiini së'huamotorinso' ni'nin. Ina nicon co noyahuë' cancantërin. Napoaton pa'pin inchinan imirin masahuaton, Iprain motën quëran chi'huincatërin. Chi'huincatahuaton Manasisi motënuë acotërin.

<sup>18</sup> Inapoapon pochin pa'pin itapon:

—Co tata. ¡Ama inapoquësokuë! Isocha paninanso'. Inchinan imira quëran, ina së'huamotoquë', itërin. <sup>19</sup> Pa'pinso nipirinhüë', co nohuantërinhuë' inapocaso'. Napoaton itapon:

—¡Naporin mini conpa, nani nitotërahuë! Manasisinta shinpita quëran panca nacion nizarin. Iyaa'huainso napoaponahuë', noya noya nicon shinpita quëran na'con na'con naciono'sa pipiarin. <sup>20</sup> Naporo tahuëri chachin, Cacopori shinpita nóya yonquirapiton iso pochin sha'huitërin:

\* **48:15-16** Yosë Anquëninën topachinaso': Yosë chachin ta'tona napopi.

—Israiro nacionquë ya'huëpisopita noya ya'huëcaiso marë' yasha'huitohuachina', canpita nininëma yonquiatona iso pochin sha'huitapona': "Yosë quëmanta catahuainquën. Iprain, Manasisi, inapita catahuarinso pochachin catahuainquën," niitapona', itërin. Inapoaton, Cacoposo Iprain'ton acorin. Manasisiso nipirinhüë', piquëran acorin.

<sup>21</sup> Ina quëran Cosi tahuërëtahuaton itapon:

—Ni'quë'. Caso chiminapo huachi. Yosëso nipirinhüë', ya'huëmiataton catahuarinquëma'. Inari chachin shimashonëma no'panënuquë quëpanantaponquëma'. <sup>22</sup> Quëmaso' ya'ipi iyaparinpita quëran, panca pancana no'pa' quëtëranquën. Siquimo motopi quëtëranquën. Inaso' no'pa', amororo'sa ahuëato osërëtërahuëso', itërin.

## 49

### *Cacopo yachimination, hui'ninpita nontërinso'*

<sup>1</sup> Nani shinpita noya ya'huëcaiso marë' sha'huitohuachina, Cacoposo' ya'ipi hui'ninpita amatërin. Huë'pachinara itapon:

“Amasha ya'carico conparo'sa'.

Ma'sona a'na tahuëri onpocamaso', carinquëma sha'huichinquëma natanco'.

<sup>2</sup> Canpitaso hui'nahuëpitanquëma'.

Caso Cacopoco niporahuë', Israiro itërinaco anta'.

Carima sha'huitaranquëma ni'ton, natanco'.

<sup>3</sup> 'Quëmaso' Nopino, paninanquën.

Chiniquën nisoco, ya'nan hui'nahuanquënso'.

Chini chiniquën nanantaton, noya noya nicamaso' ninan.

<sup>4</sup> Inapocamaso nipiranhüë', co huachi inapoaranhüë'.

I' pa'pi chinii' nipachina, co onpo asanoirëhuë'.

Ina pochachin nicaaton cosonanëhuë monshitëran,' itërin.

<sup>5</sup> 'Simion, Nihui, canpitaso, napopináchin cancantërama'.

A'napita ma'sha onpotamaso marë' nisha nisha ohuararama'.

<sup>6</sup> Niyontonamaquë, ama onporo tëranta ya'noisohüë'.

No'huitatoma piyapi tëparama'.

Co natantonquëmahuë' nicaatoma', tororo'sa nishitëtëntëntërama'.

<sup>7</sup> Tanan ni'niro'sa pochin no'huitërama'.

Napopiramahuë', co onporonta inachachin nisápomahuë'.

Carima ya'ipi Israiro nacionquë, ayanguëmiataranquëma', itërin.

<sup>8</sup> 'Quëmaso' Cota, iyaparinpita pa'yataponën.

Inimiconënpita minsëra'piapon.

Iyaparinpita quëran huarë' moshaponën.

<sup>9</sup> Quëmaso' conpa masho, Cota itëranquën.

Pa'pinia'hua pochin chinimiatëran.

Mapintahuaton pa'pini' pë'inihuachina,

mónsho mónsho tërarinquëran quëhuënin huachi.

Panca pa'pini' pochin ninan.

¡Pa'pini' chinotaso', co incari tëranta apisarinhuë'!

Inapochachin quëmanta inimiconënpita nitaponën.

<sup>10</sup> Co inso tëranta hua'an quëran, quëmaso' Cota, ocoiarinënhüë'.

Huara së'quëranso co insonta mataponënhüë'.

Hua'anën chachin o'maquë huarë' co nanitapaponënhüë'.

Ina o'mahuachin, ya'ipi naciono'sari natëpona huachi.

<sup>11</sup> Cotaso notohuaro' oparohuanaton, mora'huanënta', co apiratarinhüë'.

Inaquë capacaso marë' a'sonpitërapon.

Huinoquë chachin a'morinso pë'sapon.

¡Opa huayo no'huiquénquë chachin, inapotapon!

12 Ya'pirinpitanta', huino quëran quëhua quëhuashin ninin.

Natëquënpitanta', sho'shoi' quëran hui huirichin ninin,' itërin.

13 'Quëmaso' Saporono, marë yonsan parti ya'huapon.

Panca nancharo'sa nonshinanëna ya'huërinquë, ya'huëapon.

No'panënso', Sitonquë huarë' naniarin,' itërin.

14 'Quëmaso' Isacaro, chiníquën mora pochin nisaran.

Pë'tahua pëiro'saquë pë'pëtëranquë ranchin chinotaran.

15 "¡Noyachi iso no'pa' paya! Yashi yashin chinochachináchin," tēcapon.

Co pahuërepirinënhuë', noya cancantaton patron marë' sacataran,' itërin.

16 'Quëmaso' Tano, quëmaora huëntonënuquë ya'huëpisopita catahuanan.

Nanan ya'huëtohuachina', anoyatacaiso catahuanan.

A'napita Israiro huëntono'sa pochachin nisaran.

17 Ya'huan yaquëtëtërinso pochin nisaran.

Inaso', ira pirayan yamorin quëtëtacaso marë'.

Cahuario tocanën quëtëhuachina, piyapi ya'mitërinso', anotapon.

Inapochachin quëmanta', inimicoro'sa nitaran,' " itërin Cacopori hui'ninpita nontaton.

18 Ina quëran Cacoposo' Yosë nontaton tapon:

"¡Siniro, quëmaso' nicha'ësaranco ténahuë!" itërin.

19 A'napita hui'ninpitanta yonquiaton taantarín:

" 'Quëmaso' Caro, matararoro'sa huënton ya'contarinquën.

Quëmariso napoaponahuë', nita'atahuaton imasaran,' itërin.

20 'Quëmaso' Asiri, noya noya cosharo ya'huëtarinquën capacaso'.

Copirnoros' ca'ninso pochin ca'sápon.

Napoaton quëmari quëtóhuatan inapitanta ca'sapi,' itërin.

21 'Quëmaso' Nipitari, co camainënuquënso costaponhuë'.

Tanan yo, noyanpia'huaráchin hua'huinpitarë' pa'ninso pochin nisaran.

Inapochachin quëmá quëran pipipisopitanta',

na'a nisahuatona', noyanpia'huaráchin nicapona', itërin.

22 'Quëmaso' Cosi, i'sha yonsanquë huayo huanirinso pochin ninan.

Inaso' huayo pa'pi notohuaro' nitërin. Së'paquënpitanta', paira pa'tërin.

23 Pë'chinan camayoro'sa', no'huirinquën.

No'huitënen pë'chinan shinërëquë yaohuaninën.

Napotatënen, co noya quëran ya'huëchináchinhuë nitarinën.

24 Quëmaso nipirinhue', chini chiníquën tanpatëran.

Pë'chinanënuquë inimicoro'sa tē'yanantóhuatan, co pacoitaranhuë'.

Yosë imarahuëso', chini chiníquën nanantërin.

¡Ina catahuarinquën inimicoro'sa minsëaran!

Siniroso' ohuica hua'anën pochin ni'ton, a'pairinco.

¡Ina chachin quëmanta a'paiatënuquën catahuarinquën!

25 Yosënhuë chachin, catahuapënuquën.

Inaso', ya'ipi nanitapaton catahuapënuquën.

Ina nohuanton, o'nanpachina catahuainquën.

Acoporonta i' ya'huërinso', ina nohuanton pipiton catahuainquën.

Pë'tahuanëmapita, sanapinëmapita, inapitanta huaihuachina catahuain.

26 Tata mashocoro'sa iráca, noya ya'huëca'huaso marë' sha'huitërinaco.

Carinquënso', ipora noya noya sha'huitaranquën.

Motopiro'sa ya'huërárinso ta'huantaquë huarë', Yosë catahuaráponquën.

A'napita iyanpita quëran, noya noya nicatënuquën huayonanquën.

Napoaton së'huamotorahuatënuquën quëma marë' Yosë nontërahuë', itërin.

27 'Quëmaso' Mincamin, pa'pi mapinton tanan ni'nira pochin nicapon. Tashiramiachin inaso mapintahuaton, ca'miatërin. Naporo' i'huanahuanquë chachin pë'sotërinsona', a'napitari ca'papi. Inapochachin quëmanta', yaata'huantëransopita nitaran. Inapotahuaton ma'shanënanta', nipatomatapoma', ' ' itërin.

28 Ina pochin Cacopo shonca cato hui'ninpita noya ya'huëcaiso marë' sha'huitërin. Inapita quëran shonca cato Israiro huëntono'sa pipipi.

### *Cacopo chiminso'*

29 A'na tahuëri Cacoposo', hui'nipita camairin: "Co hua'quiya quëranhuë' chiminarahuë huachi. Chiminpató, shimashonëhuëpita pa'pitopiso pirayan po'moontaco. Iti huënton piyapi, Ipron itopisori, ina no'paso' hua'anëntopirinhuë'. 30 Maquipiraquë nanin ya'huërinso yonquiato napotarahüë. Inaso', Canaan parti ya'huërin. Mamiri notënanquë ya'huërin. Ina no'pa' mini iráca tata mashoco Apraan nipa'pitacaiso marë' pa'anin. Ina pirayan no'pa' ya'huërinso rë chachin naporo Ipron pa'antërin. 31 Inaquë Sara, Apraan, inapita chiminpachinara ya'conpi. Tata Isaco, mama Nipica inapitanta inaquë chachin ya'conpi. Inaquë canta', sa'ahuë Nia itërahuëso ya'conin. 32 Ina no'paso' naninë chachin, Iti huënton piyapi'sa pa'antopi," itërin. 33 Cacoposo' hui'ninpita camairinso tonitohuachina, pë'saranënuquë quëhuëntarin. Quëhuënaso chachin, chimin huachi.

## 50

1 Pa'pin chiminpachina Cosiso', ina nonën iporin quëran na'nërin, apinorin, napotërin. 2 Ina quëran notoronënpita camairin pa'pinco' nonën tapacaiso'. Camaihuachina, ama chanatacaso marëhuë' taparapi. Pa'pincoso', Cacopo itahuatona', Israiro itopi anta'. 3 Catapini shonca tahuëri quëran nonën tapapi huachi. Ina nápo tahuëri nohuantërin tapacaso marë' ni'ton, ina nápo tahuëri sacatopi.

Iquipitoro'saso', canchisë shonca tahuëri Cacopo marë' sëtópiso' imapi. 4-5 Ina tahuëri'sa na'huëhuachina, Cosiso' huaraon catahuapisopita hua'ano'sa', nontërin:

—Tëhuëchachin noya ni'patamaco, ca marë' huaraon nontoonco'. Naporin Cosi: "Co'huara tata chiminyátëraponhuë', camairinco Yoscoarë' ta'to natëca'huaso': 'Nipa'pita'huaiso marë' taparahüëquë chachin, po'moontaco. Inaso', Canaan parti ya'huërin,' itërinco. Quëtoco paato tatahuë pa'pitonta'i, topirahuë. Nani pa'pitontahuato, o'mantarahuë ténin," itoco', itërin. 6 Sha'huitohuachinara, huaraoniso hua'ano'sa itapon:

—Cosi sha'huitonco': "Paaton tataco', pa'pitontaquë'. Sha'huitërinquënsó chachin nitontaquë'," itoco', itërin.

7-8 Huaraoni napotohuachina, Cosiso', pa'pin pa'pitacaso marë' pa'nin. Ya'ipi copirno catahuapisopita hua'ano'sa pa'pi. Iinpitanta', quëmopinënpitarë chachin pa'pi. Cosin partiso', hua'huaro'saráchin pë'tahuaro'sa a'paicaiso marë' patopi. 9 Sontaro'santa', a'naquën toronano'saquë, a'naquënsó cahuarioro'saquë, Cosi ca'tanpi. Napoaton hua'huayátërahuë piyapi'sa pa'pi.

10 Pa'sápatona', Corin-a-atatiquë canconpi. Inaquë niyontonatona panca sëtópi. Inaquë Cosi pa'pin marë' canchisë tahuëri sëtërinso', naniantarin. (Corin-a-atatiso', trico to'norapiquë) Ina no'pa quëranso', Cortanii' pi'i ya'coninso parti acorin. 11 Canano'sa inaquë ya'huëpisopitari, napopiso ni'pi. Ina ni'sahuatona', inahua capini ninontopi: "Iquipitoro'sa pa'piaona huëcatona', panca sëtapi," topi. Napoaton ina no'paso', aninihuanpi: Apiri-misraimo, itopi. Iquipitoro'sa sëtópiquë, tapon naporin. Ina no'pa quëranso', Cortanii' pi'i ya'coninso parti acorin.

12-13 Cacopo hui'ninpitaso', pa'pin nanpipon camaitërinso chachin ya'ipi nipi. Canaanquë quëpantarahuatona', Maquipiraquë nanin ya'huërinquë po'moontapi. Iti piyapi, Ipron itopisori, ina no'paso' hua'anëntopirinhuë', Apraani iráca nipa'pitacaiso marë'



pa'antërin. Ina naninso no'parë chachin, Mamiri ya'huërin quëran, pi'i pipirinso parti quëparitërin. <sup>14</sup> Nani pa'pin po'oroquë po'mohuachinara, Cosiso' iinpitarë chachin Iquipitoquë pa'mantapi. Ya'ipi ca'taninsopitanta', pa'mantapi.

### *Cosi iinpita napopiso'*

<sup>15</sup> Cacopo chiminpachina Cosi iinpitaso', ina të'huatatona inahua capini ninontopi: “Iráca aparisitërehuaso marë' taponá Cosi no'huitonpoa yai'huëretápirinpoahuë',” nitopi. <sup>16-17</sup> Ina yonquiatona', iso pochin nontacaiso marë' a'napita a'papi: “Co'huara tata chimiyantëraponhuë', camairincoi nonta'huainquënso': 'Iyaparinpita aparisitopirinënguënhuë', co noyahuë' nica-tona oshahuanpiso', Yosë marë' naniantëquë', itoco', itërincoi. Napoaton, quiyarionta nontarainquën nanan anoyataancoiso marë'. Quiyanta', tatanpoa chinotërinso Yosë chachin imarai ni'ton, inapotocoi,” itopi. Napo nontasoi', Cosiso na'nërarin.

<sup>18</sup> Naporo chachin iinpitanta', canquipi. Canquihuachinara, isonpi quëran no'paquë huarë' monshorahuatona', mohaipi. Mosharahuatona', itopi:

—Ma'tana iya, ya'huarai. Hua'anëntatoncoi yacamaihuatancoi, inapotocoi, itopi.

<sup>19</sup> Napotopirinahuë', Cosiriso itapon:

—Ama iyaro'sa pa'yancosohuë'. Caso piyapico ni'to, co nanitërahuë' Yosë ya'huërenamën pochin nica'huaso'. <sup>20</sup> Canpitaso mini, ma'sha onpotamacoso yonquipiramahuë', Yosëso nipirinuë', inaporamaso anoyatërin. Ama notohuaro' piyapi'sa taquicaiso marëhuë', inaporin. <sup>21</sup> Napoaton ama pa'yancosohuë'. Carinquëma cosharo quëtáponquëma'. Hui'namapitanta quëtápo. Naponontaton, Cosiso iinpita asanocancanin. Noyasha nontërin.

### *Cosi chimininso'*

<sup>22</sup> Cosiso iinpitarë chachin, Iquipitoquë ya'huëhuantopi huachi. Inaso', pasa shonca pi'i icanin. <sup>23</sup> Hua'qui ya'huaton, Iprain hui'ninpita ni'nin. Inahuanta hui'nahuanpiso shi'ahuainpitaquë huarë', ni'nin. Naporahuaton Manasisi shiin Maquiri itopiso hui'ninpitanta', macaton aso'sorin. Ina marë' to'topitënguë ahuënsëra'piarin.

<sup>24</sup> A'na tahuëri Cosiso', iinpita itapon: “Co hua'quiya quëranhuë', chiminapo huachi. Napoaponahuë', Yosëso catahuainquëmaso marë' o'mararin. Iso no'pa quëran ocoiarinquëma'. Apraan, Isaco, Cacopo, inapita quëtacaso marë' sha'huitërinso no'paquë, quëpantarinquëma',” itërin. <sup>25</sup> Ina quëran iinpita camairin: “Yoscoarë' ta'toma', nohuantërahuëso nitoco,” itërin. Napotohuachina: “Yoscoarë' nohuantëranso', nisarai,” itopi. Naporo' Cosiri itapon: “Tëhuënhachin Yosë o'mararin catahuainquëmaso marë'. Ina tahuëri nanihuachin, nansënëhuë isëquëran quëpanantamaso ya'huërin,” itërin. <sup>26</sup> Pasa shonca pi'ipitaso', Cosi Iquipitoquë chiminin. Chiminpachina, nonën ama chanatacaso marëhuë taparahuatona', a'na atahuaruquë po'mopi. Ina pochin Cacopo hui'ninpita nipi.

## Matio ninshitërinpoa' Quisocristo naporinso' nitotacaso marë'

*Quisocristo shimashonënpita*  
(Lucas 3.23-38)

<sup>1</sup> Quisocristo nanamën sha'huitaranquëma'. Inaso' Yosë hui'nin. Iráca quëran huarë' Yosë yonquirin ina a'paimacaso marë'. Tapico chachin Quisocristo shimashonën. Apraanconta' shimashonën chachin. Ya'ipi shimashonënpita iráca ya'huëpiso' sha'huichinquëma', nitotoco'.

<sup>2</sup> Iráca Apraan hui'nahuanpachina, Isaco itopi. Ina quëran Isaconta' hui'nahuanpachina, Cacopo itopi. Cacoposo' na'a hui'ninpita ya'huëtërin. A'naso' Cota itopi. <sup>3</sup> Cotanta' hui'nahuanpachina, Parisë, Saro, inapita itopi. Tamara hua'huinpita inahuaso'. Ina quëran Parisë hui'nahuanpachina, Isromo itopi. Inanta' hui'nin ya'huëtöhuachina, Aramo itopi. <sup>4</sup> Aramonta' hui'nahuanpachina, Aminatapo itopi. Ina hui'nin Nasono itopi. Nasononta' hui'nahuanpachina, Sarëmon itopi. <sup>5</sup> Sarëmon yasa'apachina, Nacapa manin. Hui'nin ya'huëtöhuachina, Pooso itopi. Poososo' Rota macaton, hui'nahuanin. Opito itopi. Opitonta' hui'nahuanpachina, Quisi itopi. <sup>6</sup> Quisinta' hui'nahuanpachina, Tapi itopi. Inaso' copirno ya'conin. Ina quëran Oriasëco' sa'in masahuaton, hui'nahuanin. Saromon itopi.

<sup>7</sup> Saromon hui'nin Nopoamo itopi. Ina hui'nin Apiasë itopi. Apiasënta' hui'nahuanpachina, Asa itopi. <sup>8</sup> Asa hui'nin Cosahuato itopi. Cosahuatonta' hui'nahuanpachina, Coramo itopi. Ina hui'nin Osiasë itopi. <sup>9</sup> Osiasënta' hui'nahuanpachina, Cotamo itopi. Ina hui'nin Acaso itopi. Acasonta' hui'nahuanpachina, Isiquiasë itopi. <sup>10</sup> Ina hui'nin Manasisë itopi. Inanta' hui'nahuanpachina, Amon itopi. Amon hui'nin Cosiasë itopi. <sup>11</sup> Ina hui'nin Quiconiasë itopi. Iinpitanta' ya'huërin. Naporo' cotioro'saso', inimicoro'sari Papironia quëran huëcatona', canaipi. Minsërahuatona', napopinchin ya'huëpi'pa' quëpapi asacatacaiso marë'.

<sup>12</sup> Ina piquëran Quiconiasë hui'nahuanpachina, Saratiri itopi. Ina hui'nin Soropapiri itopi. <sup>13</sup> Inanta' hui'nahuanpachina, Apioto itopi. Apioto hui'nin Iriaquimo itopi. Ina hui'nin Asoro itopi. <sup>14</sup> Asoronta' hui'nahuanpachina, Satoco itopi. Satoco hui'nin Aquimo itopi. Ina hui'nin Irioto itopi. <sup>15</sup> Iriotonta' hui'nahuanpachina, Iriasaro itopi. Iriasaro hui'nin Matan itopi. Ina hui'nin Cacopo itopi. <sup>16</sup> Cacoponta' hui'nahuanpachina, Cosi itopi. Cosi yasa'apachina, Maria manin. Ina hua'huinso' Quisoso, Cristo itopiso'.

<sup>17</sup> Nani Quisocristo shimashonënpita sha'huitëranquëma'. Apraan quëran Tapi copirno ya'conaquë huarë' shonca catapini shimashonënpita ya'huëtërin. Ina quëran Papironiaquë quëpai huarë' shonca catapini shimashonënpita ninshitëntaranquëma'. Ina quëran Quisocristo nasitaquë huarë', shonca catapini chachin shimashonënpita ninshitëntaranquëma huachi.

*Quisocristo nasitërinso'*  
(Lucas 2.1-7)

<sup>18</sup> Apira Quisocristo nasitërinso' sha'huichinquëma', nitotoco'. Naporo tahuëri'sa' Cosiso', nani Maria nontërin macacaso marë'. Napoaponahuë' co'huara mashatërasohuë', Ispirito Santo nohuanton inaora cayorin. <sup>19</sup> Cosi nitotahuaton, pa'yanin. Noya quëmapi ni'ton, yonquiarin. “¿Ma'cha onpo'iya? Maria nani hua'hua ma'patërin. Co maca'huaso' ya'huërinhuë'. Co piyapi'sa' sha'huitarahuë', Maria tapanpachin. Coisëichin

sha'huitahuato, co masarahuë'," ta'ton, yonquirárin. <sup>20</sup> Huë'ëso', Yosë anquëninëni ya'notimarin nontacaso marë'.

—Tashita Cosi. Carinquën nohuitëranquën. Quëmaso' Tapico' shinquën. Pi'pian sha'huitaponquën o'marahuë. Maria noya maquë'. Co quëmapiri së'huarinhüë'. Ispirito Santo nohuanton, inaora cayorin. Napoaton noya maquë'. <sup>21</sup> Huaicaso' nanihuachin, quëmapia'huaya nasitapon. Nasitohuachin, Quisoso itëquë'. Piyapinënpita oshanëna' inquitaton, nicha'ësarín ni'ton, ina nininën acotëquë', itërin anquë'niri. Itahuaton, panantarin huachi.

<sup>22</sup> Iráca Yosë nohuanton, pënëntona'pi ninorin. Ninoton, Yosë quiricanënuë chachin ninshitërin:

<sup>23</sup> "A'na tahuëri nanon inaora cayoapon.

Co quëmapiri së'huapirinhüë', napoapon.

Quëmapia'huaya huaihuachin, Imanino itapi," tënin.

Yosë chachin o'maton, yacaparínpoa', tapon naporin. Ina pochin nasitimahuachina, iráca ninopiso' nanirin huachi.

<sup>24</sup> Cosiso' capayatahuaton, Sinioro anquëninën natëton, Maria manin huachi.

<sup>25</sup> Macaponahuë', co ichihuë'ërinhuë'. Hua'huin nasitërin piquëran huarë' ichihuë'ërin. Quëmapia'huaya nasitohuachina, Quisoso itopi.

## 2

### *Tayora nitotona'piro'sa' quënanpiso'*

<sup>1</sup> Quisososo' Pirinquë nasitërin. Cotia parti chachin nasitërin. Naporo' Irotisëri inaquë hua'anëntërin. Ina quëran tayora nitotona'piro'sa' canquiipi. Pi'i pipirinso parti quëran huë'pi. Canquiuhachinara, Quirosarinquë, natantiipi:

<sup>2</sup> —¿Insëquëta' nasha copirno nasitërin? Cotio copirno ya'conacaso' nani nasitërin ipora. Ya'huërai parti ya'huasocoi, nasha tayora ya'norinso' quënanai. Ina nicatoi: "Yosëri a'paimarinso' nasitërin huachi," ta'toi, huë'nai ina chinotapoi, itëra'piapi.

<sup>3</sup> Ina natantahuaton, copirno Irotisë pa'yanin. Quirosarinquë ya'huëpisopitanta' pa'yanpi. <sup>4</sup> Copirno pa'yanaton, cotio maistro'sa', corto hua'ano'sa', inapita amatërin. Amatahuaton, natanin.

—¿Insëquëta' Cristo Yosëri a'paimarinso' nasitapon? itërin.

<sup>5</sup> —Cotia parti chachin nasitapon. Pirinquë nasitapon, itopi. Iráca pënëntona'pi ninoton, Yosë quiricanënuë ninshitërin.

<sup>6</sup> "Cotiaquë a'na ninano' ya'huërin, Pirin itopiso'.

Co panca ninanoyahuë' niponahuë', inaquë a'na copirno nasitapon.

Na'a copirnoros'a' Cotia parti ya'huëpirinahuë', inaso' chini chiniquën nanantapon.

Ya'ipi piyapinënpita israiro'sa' itopiso' hua'anëntapon," tënin Yosë, itopi.

<sup>7</sup> Copirnosos' natanahuaton, co a'ninquëchin yanatantërinhuë'. Po'oana quëran tayora nitotona'piro'sa' amatërin. Huë'pachinara, inaora quëparahuaton, nontërin:

—¿Ma yoquiquëta' nasha tayora ya'norin? itërin.

Sha'huitohuachinara, itantarin:

<sup>8</sup> —Pirin'pa' nasha copirno nasitërin ipora. Inatohua' paatoma', noyá yoníco'. Hua'huasha quënanpatama', huënantatoma', sha'huitiintaco canta' paato chinochi, itërin nonpintaton.

<sup>9</sup> Ina natanahuatona', pa'pi huachi. Pa'sapirinhüë', a'nanaya tayora quënaantapi. Ya'huëpiquë ni'piso chachin inápaquë paaton, quëchitërarin. Hua'huasha yacapatërinquë chachin tayora chiniconin. <sup>10-11</sup> Ina ni'sahuatona', pa'pi pa'yatopi. Capa cancantatona', pëiquë ya'conpi. Inaquë hua'huasha quënanconpi. A'shionta' ya'huarin, Maria itopiso'. Hua'huasha quënanahuatona', isonconahuatona', chinotopi. Ina quëran caposoa'huayanënpita i'soatahuatona', ma'sha pa'ton nininso' quëtopi. Oro, yonarin

pochin pimóchin nininso', yaqui' pimóchin nininso' inapita quëtopi. <sup>12</sup> Ina quëran tashi' huë'ësoi', Yosë nohuanton, hua'napi.

—Ama copirno ya'huërinquë pantatoma', sha'huitocosohuë', itërin anquënniri. Napoaton a'na ira pa'tahuatona', ya'huëpi'pa' canconpi huachi.

### *Iquipito'pa' ichita'apiso'*

<sup>13</sup> Tayora nitotona'piro'sa' pa'pachinara, Yosë anquënninëni huë'ënnquë Cosi ya'notahuaton itapon:

—Copirno nani chinotërin hua'huasha tëpacaso marë'. Apira sontaro'sa' a'pararin ina yonicaiso marë'. Napoaton a'naroáchin ichita'aquë'. A'shinë chachin Iquipito'pa' quëpaquë'. Inaquë yacapatëquë'. Noya huënantacaso' nipachin, sha'huitantarannquë, itërin anquënniri.

<sup>14</sup> Natanahuaton, a'naroáchin Cosi huënsëintarin. Tashi' nipirinnhuë', hua'huasha quëparin. A'shinë chachin ichita'arahuatona', Iquipito'pa' pa'pi. <sup>15</sup> Irotisë chiminaquë huarë' inaquë ya'huëpi. Iráca Yosë nohuanton, pënëntona'pi ninorin: “Hui'nahuë Iquipito'pa' yacapatopirinnhuë', ina quëran ocoiarahuë,” tënin Yosë. Hui'nin chachin Iquipitoquë yacapatohuachina, ninorinso' nanirin huachi.

### *Hua'huasharo'sa' tëpapiso'*

<sup>16</sup> Copirno Irotisëso' tayora nitotona'piro'sa' ninarápirinnhuë', co ya'nopihuë'. “Non-pintërinaco ipora,” ta'ton, chiniquënn no'huitërin. No'huitaton, sontaro'sa' Pirin'pa' a'parin quëmapia'huaro'sa' tëpacaso marë'. “I'huá chachin tayora ya'norin ni'ton, co canopia'huaro'saráchin tëpacaso' ya'huërinhuë'. Cato' pi'ipitërinquë huarë' tëpaco',” itahuaton, a'parin. Sontaro'saso' pa'sahuatona', ya'ipi quëmapia'huaya Pirinquë ya'huërinso'pita tiquipi. Ya'cariyanta' yonitona', cato' pi'ipitërinquë huarë' tëpapi.

<sup>17-18</sup> Iráca ninoton, Yosë quiricanënnquë Irimiasë ninshitërin:

“Namaquë na'nërinso' natanpi. Naquira na'nërárin, ayanárin.

Hua'huinpitaco' yonquiaton, na'nërarin.

‘Ama sëtëquësosohuë’, itopirinnahuë',

nani chiminpi ni'ton, sëtárin,” tënin.

Iráca naporinso pochachin iporanta' hua'huaro'sa' tëpapi ni'ton, a'shina' na'nërápi.

<sup>19</sup> Naporinso' Cosiso' Iquipitoquë yacapatarin. Irotisë chiminpachina, Yosë anquënninëni ya'notantarin. Hua'narinso pochin Cosiri quënnanin.

<sup>20</sup> —Hua'huasha tëpana'pi nani chiminpi ni'ton, israiro'sa' ya'huëpiquë panantaquë'. Hua'huasha a'shinë chachin quëpantaquë', itërin.

<sup>21</sup> Ina natanahuaton, natërin. Quisoso a'shinë chachin quëparahuaton, inatohua' panantarin. <sup>22</sup> Canconahuaton, nanan natantërin. “Irotisë hui'nin ya'huëre' hua'anëntantarin. Ariquirao itopisoari pa'pin ya'huëretërin,” topi, natantërin. Ina të'huataton, co nohuantërinhuë' inatohua' ya'huëcaso'. Naporahuaton, hua'nantarin.

—Ama copirno ya'huërinquë chachin panantaquësosohuë', itërin anquënniri. Ina natanahuaton, Cariria parti pa'nin ya'huëcaso marë'. <sup>23</sup> Inatohua' a'na ninano' ya'huërin, Nasarito itopiso'. Inaquë ya'huërarin. Iráca pënëntona'piro'sa' ninopi. “Cristo huë'pachin, Nasarito piyapi itapona’,” topi. Napoaton Yosë nohuanton, inaquë ya'huaton, hui'napitërin huachi.

## 3

### *Coansha Paotista pënëntërinso'*

*(Marcos 1.1-8; Lucas 3.1-9, 15-17; Juan 1.19-28)*

<sup>1</sup> Naporinso' tahuëri'sa' Coansha Paotista pënëntarin. Cotia parti pancana inotëro' ya'huërin. Co inaquë piyapi'sa' ya'huëpihuë'. Inaquë ya'huaton, Yosë nanamën sha'huirarin. Na'a piyapi'sa' huë'pi natanapona':

<sup>2</sup> —Yosë hua'anëntiinpoaso' tahuëri nani ya'cariarinpoa'. Napoaton co noyahuë' yonquiramasopita naniantatoma', Yosë chachin tahuërétantaco huachi, itarin. Nani tahuëri ina pochin pënénárin.

<sup>3</sup> Iráca Yosë nohuanton, Isaiasë ninorin. Ninshitaton, naporin:

“Inotëro parti a'na quëmapi pënéntápon: ‘Sinioro o'macaso tahuëri naniriarin ni'ton, yonquico'. Ni'co'. Hua'an chiníquën nanantona'pi ni'ton, a'na parti yapa'pachina, comisionën a'parin ira tapatacaso marë'.

Ira otëërin noya pa'tacaiso marë'.

Inapochachin iporaso' cancanëma' anoyatoco' Sinioro o'main,' tapon ina quëmapi, pënëntohuachin,” ténin.

Coansha pënéntacaso' ninoton, naporin.

<sup>4</sup> Coanshaso' co noyápiachin a'morinhuë'. Ponira pochin a'morin, camiyo anporo quëran nipiso'. Sha'huëtë quëran nitonporin. Sëquërë pochin nininso' macaton, ca'nin. Ninoi' quënanpachina, irorin. <sup>5-6</sup> Inaquë na'a piyapi'sa' huë'pi natanacaiso marë'. Quirosarin quëran huë'pi. Ya'ipi Cotia parti quëran huëcatona', natanpi. Cortanii' ya'cariya quëraonta' huë'pi. A'naya a'naya huëcatona':

—Tëhuëenchachin co noyahuë' nicato, oshahuanahuë. Catahuaco Sinioro naporahuëso nanianchi, itopi Yosë nontatona'. Ina topachinara, Coanshari Cortaniiquë aporintërin.

<sup>7</sup> Ina quëran na'a parisioro'sa', satorio'sa', inapitanta huë'pi.

—Quiyanta' aporintocoi, itopirinhue', Coansha co nohuantërinhuë':

—¿Canpitaso' ya'huan pochin cancantatoma', yanonpinama! “Yosë isoro'pa' ana'intohuachin, cha'ëpoi,” topiramahuë'. Co topinan cha'ësaramahuë'. <sup>8</sup> Co noyahuë' yonquiramasopita naniantatoma', noya nico huachi. <sup>9</sup> Ama canpitaora ninonpintocohuë'. “Apraan shinpitacoi ni'toi, Yosë piyapinënpitacoi,” ama tocosohuë'. Yosë nohuantërin naporini, iso na'piro'santa' Apraan shinpita atarantacaso' nanichitonhuë'. <sup>10</sup> Nani Yosë yonquirin oshahuano'sa' ana'intacaso'. Ni'co'. Nararo'sa' co noya nitohuachinahuë', a'nërë'. Itëquënpitarë chachin ocoirahuatë', pënquë të'yatërë' huiquitacaso marë'. <sup>11</sup> Co noyahuë' yonquiramasopita naniantohuatama', i'quë aporintaranquëma'. Ca piquëranso nipirinhue' a'na quëmapi huë'sarin. Inaso' chini chiníquën nanantërin. Caso' co pi'pian tëranta' ina pochin chiníquën nanantërahuë'. Co maquëyancohuë' ni'to, co sapatën quëpaca'huaso tëranta' nanitarahuë'. Inaso' huë'pachin, a'naquëma' Ispirito Santo aya'coancantarinquëma'. A'naquëmaso nipirinhue' pënquë chiníquën ana'intarinquëma'. <sup>12</sup> Cayarinso' manëso pochin nisarin. Arosë mapatëra, to'norarë'. Ina quëran pintiarahuatë', pëiquë acorë'. Sha'huëtënso nipirinhue', pënquë ahuiquitërë'. Inaso' co onporonta' tacopiarinhue', ténin Coansha.

### *Quisoso aporihuaninso'*

*(Marcos 1.9-11; Lucas 3.21-22)*

<sup>13</sup> Ina quëran Quisoso Cariria quëran huë'nin. Cortaniquë canquirahuaton, Coansha nontërin aporintacaso marë'.

<sup>14</sup> Napotopirinhue', co nohuantërinhuë'.

—¿Ma'marëta' napotiiranco? Co aporinta'huanquënso' ya'huërinhuë'. Quëma aporintoco tëhuëenchinso', itërin.

<sup>15</sup> Napotopirinhue', Quisosori itërin:

—Yosë nohuantërin ni'ton, ya'ipi natëca'huaso' ya'huërin. Napoaton noya quëma aporintoco, itërin. Ina natanahuaton:

—Noyahua', itahuaton, i'quë aporintërin. <sup>16</sup> Ina quëran nonshiaso chachin a'naroáchin inápaquë pi'iro'të' ni'soatërin, ni'nin. Ispirito Santo nëpë pochin nohuaraimarahuaton, Quisoso ya'coancantomiatërin. <sup>17</sup> Naporo' inápa quëran Yosë noninso' natanpi.

—Isoso' ca hui'nahuë chachin, na'con nosororahuëso'. Noya ni'nahuë, ténin.



## 4

*Sopairi Quisoso tēnirinsō'**(Marcos 1.12-13; Lucas 4.1-13)*

<sup>1</sup> Ina quēran Ispirito Santori Quisoso quēparin inotēro parti sopairi tēnicaso marē'.

<sup>2</sup> Catapini shonca tahuēri tashirē chachin inaquē ya'huaponahuē', co manta' ca'ninhuē'. Ina piquēran tanarin huachi. <sup>3</sup> Naporō' sopairi huēcapiarin.

—Tēhuēnchachin Yosē hui'ninquēn nipatan, iso na'piro'sa quēran cosharo' atarantēquē', itopirinhūē',

<sup>4</sup>—Inca, co nohuantērahuē'. Yosē quiricanēnquē pēnēninpoa'. “Co cosharoriáchin piyapi ananpirinhūē'. Ya'ipi Yosē noninsō' natēhuachin tēhuēchinso', nanpiarin,” tēnin, itērin.

<sup>5</sup> Ina quēran Quirosarin'pa' sopairi quēparin. Yosē chinotopiso pēi' a'canpiso aipi quēpantarahuatōn, itērin:

<sup>6</sup>—Quēmaso' Yosē hui'ninquēn nipatan, no'paquē niiquē'. Quiricanēn quēran nani sha'huitērinquēn.

“Yosē anquēninēnpita a'patimarinquēn a'paiinquēnso marē' ni'ton, co ma'sha onpoaranhuē'.

Imirina quēran masarinēnquēn

ama na'piquē tēranta' ya'quiamaso marēhuē',”

tēnin ni'ton, no'paquē niiquē' a'pai'inēnquēn, itērin sopairi.

<sup>7</sup>—Inca co nohuantērahuē'. Yosē quiricanēnquē pēnēninpoa'. “Ama Yosē tēniquēsōhuē'. Ama camaiquēsōhuē'. Ina nohuantērinsoáchin yonquicaso' ya'huērin,” tēnin quiricanēnquē, itērin Quisosori.

<sup>8</sup> Ina quēran a'na motopi'pa' sopairi quēpantarin. Inatohua quēran ya'ipi ninanoro'sa', ma'shanēnpita, inapita a'notērin. Noyápiachin nininsopita ya'ipiya quēnanin.

<sup>9</sup>—Natēhuatanco, carinquēn catahuanquēn, ya'ipi isopita hua'anēntapon. Isonahuatōn, chinotoco chiníquēn nanan quēchinquēn huachi, itērin sopairi.

<sup>10</sup>—Inca co nohuantērahuē'. Quēmaso' sopai hua'anquēn. Patoco huachi. Yosē quiricanēn quēran sha'huitērinpoa': “Sinioroíchin chinotēquē'. Inasáchin natēcaso' ya'huērin,” tēnin, itērin Quisosori.

<sup>11</sup> Napotohuachina, sopairi patērin. Patohuachina, anquēniro'sari huēcapiamarahuatōna', nocomaimapi.

*Quisoso pēnētacasō' caniaritērinso'**(Marcos 1.14-15; Lucas 4.14-15)*

<sup>12</sup> Ina piquēran Coansha tashinan pēiquē po'mopi. Pēnētērinso marē' napotopi. Ina natanahuatōn, Quisoso pa'nin Cariria parti. <sup>13</sup> Inatohua' pacaponahuē', co huachi Nasaritoquē ya'huērinhuē'. Sono' yonsanquē paaton, Capinaomoquē yacapatōnin. Saporonoro'sa', nipitariro'sa', inapita iráca ya'huēpiquē yacapatōnin. <sup>14</sup> Iráca chachin Yosē nohuanton, Isaiasē ninorin. Ninshitaton, naporin:

<sup>15</sup> “Na'a piyapiro'sa' Cariria parti ya'huēpiso', imasapi.

Inapitaso', Cortanii' aquētēran ya'huēpi, marē Pancai' ya'cari'.

Inaquē saporonoro'sa', nipitariro'sa', inapita ya'huēpi.

Inaquē inpioro'santa' ya'huēpi.

<sup>16</sup> Inapitaso' co Yosē nohuitatonaraihuē', tashi pochin cancantopi.

Chimínpachina', parisitomiatacaiso' ya'huēpirinhūē',

Yosēri a'pintērinso pochin nanamēn anitotarín noya cancantacaiso marē'.

Tahuēri pochin a'pintarin huachi,” tēnin iráca.

Naporinso chachin Quisoso inatohua' paaton, a'chinarin.

<sup>17</sup> Naporō quēran huarē' Quisosori pēnēnarin.

—Iso tahuēri'sa' Yosē yahua'anēntarinquēma'. Napoaton ya'ipi co noyahuē' yonquiramasopita naniantatoma', Yosē chachin tahuērētaantaco huachi, itēra'piarin pēnēnatōn.

*Sami camayoro'sari imapiso'*  
(Marcos 1.16-20; Lucas 5.1-11)

<sup>18</sup> Cariria sono' yonsanquë pa'sahuaton, cato' sami camayoro'sa' quënanconin. A'naso' Simon. Pitro itopi anta'. Iinso' Antërisë itopi. Ritinënapita të'yatapi sami macacaiso marë'.

<sup>19</sup> —Huëco' iyaro'sa', imaquico a'chinchinquëma'. Sami manamaso pochachin piyapi'sa' masarama' Yosë imacaiso marë', itërin Quisosori.

<sup>20</sup> Napotohuachina, ritinënapita patahuatona', Quisoso imasapi huachi. <sup>21</sup> Ina quëran amasha pa'sahuaton, catoya'pi quënancoantarín. Santiaco, Coansha inapita itopiso'. Pa'pinarë' potiquë huënsëatona', ritinënapita pasonapi. Pa'pinaso' Sipitio itopi.

—Huëco' imaquico, itohuachina, <sup>22</sup> potinëna', pa'pina' inapita patahuatona', Quisoso imasapi huachi.

*Na'a piyapi'sa' a'chintërinso'*  
(Lucas 6.17-19)

<sup>23</sup> Ya'ipi Cariria parti paaton, niyontonpiso pëiro'saquë pënëna'piarín. Noya nanan a'chinatón: “Yosë yahua'anëntërinquëma',” itëra'piarín. Naporahuaton, na'a cania'piro'sa' a'naroáchin anoyatërin. Nisha nisha caniori maninsopita anoyatëra'piarín. <sup>24</sup> Ya'ipi Siria partinta', nahuinin ni'ton, notohuaro' cania'piro'sa' quëpi Quisosori anoyatacaso marë'. Nisha nisha canio inquitëra'piarín. A'naquëonta' sopairi ya'coancantërin ni'ton, co huachi inaora yonquirinso' yonquirinhuë'. Tocona'piro'sa', apiaro'sa' inapitanta' quëpapi Quisosori anoyatacaso marë'. Quëpachinara, ya'ipi anoyatëra'piarín.

<sup>25</sup> Hua'huayatërahuë' piyapi'sari Quisoso imasapi huachi. Cariria quëran, Ticaporisë quëran, Quirosarin quëran, Cotia parti quëran, Cortanii' aquëtëran quëran, inaquëranpita huë'pi Quisoso natanacaiso marë'.

## 5

*Panënuquë a'chininso'*

<sup>1-2</sup> Ina quëran notohuaro' piyapi'sa' niyontonpi. Inapita quënanahuaton, Quisoso panënuquë pa'sahuaton, huënsëconin. Imarinsopitari tancapitohuachinara, na'con a'chintárin.

*Noya cancantopisopita*  
(Lucas 6.20-23)

<sup>3</sup> “Natanco iyaro'sa' a'chinchinquëma'. Yosë huëntonënuquë yaya'conpatama', iso pochin cancantacaso' ya'huërin. ‘Caora co nanitërahuë' noya nica'huaso'. Catahuaco Sinioro,' topatama', Yosë noya ni'sarínquëma' ni'ton, noya cancantarama'. Hua'anëntërinquë chachin aya'conarínquëma'.

<sup>4</sup> Sëtohuatama', Yosë achinicananarínquëma'. Oshanëma' yonquiatoma', cancanëma quëran huarë' sëttohuatama', Yosë noya ni'sarínquëma'. Catahuarínquëma' noya cancantacamaso marë'.

<sup>5</sup> Sano piyapi nipatama', Yosë noya ni'sarínquëma'. Naporahuaton, a'na tahuëri nasharo'paquë ya'huëmiatarama'.

<sup>6</sup> Tanarëso pochín, yamororëso pochín cancantatoma', Yosë na'con nohuantoco'. Ina pochín cancantacasoáchin nohuantohuatama', noya ni'sarínquëma'. Catahuarínquëma' ina pochín cancantacamaso marë'. Sano cancantarama'.

<sup>7</sup> A'napita nosorohuatama', Yosë nosoroarínquëma' canpitanta'. Noya cancantarama'.

<sup>8</sup> Ya'ipi cancanëma quëran imapatama', Yosë nohuitarama'. Naporahuaton, a'na tahuëri ina quënancontahuatama', noyá nohuitarama'.

<sup>9</sup> Isoro'paquë na'a piyapi'sa' nino'huipirínahuë', canpitari catahuaco' noya ni-nonchina'. Ina marë' Yosë noya ni'sarínquëma'. Hui'nin pochín cancantiarínquëma'.

<sup>10</sup> Yosë natëramaso marë' aparisito huachinënquëma', Yosë noya ni'sarinquëma'. Hua'anëntërinquë chachin nani aya'coninquëma'. A'na tahuëri inápaquë ya'huëcontarama'.

<sup>11</sup> Imaramacoso marë' a'naquën no'huiarinënquëma', ahuëarinënquëma', pinosarinënquëma', nisha nisha nonpinapiarinënquëma'. Napotopirinënquëmahuë', ama sëtocosohuë'. Ina marë' Yosë noya ni'sarinquëma' ni'ton, nóya cancantoco'. <sup>12</sup> Iracanta' Yosë piyapinënpita pënënto huachinara, a'naquëni inapochachin no'huipi. Napoaton a'napita no'huihuachinënquëma', noya cancantoco'. Parisitëramaso marë' Yosë'pa' na'con acanaarinquëma'. Ina yonquiatoma', capa cancantoco',” itërin Quisosori.

*Yamora pochin nininso'*

*(Marcos 9.50; Lucas 14.34-35)*

<sup>13</sup> Ina quëran itantarin:

“Canpitaso' iyaro'sa', yamora pochin nicatoma' a'napita catahuamaso' ya'huërin. Napoaponahuë', yamora chimipitë pochin nicatoma co a'napita catahuahuatamahuë', co huachi insonta natëarinquëmahuë'.

<sup>14</sup> Isoro'paquë ya'huëpisopita tashinanquë pa'nëso pochin nisapirinahuë', canpitari a'pintatë pochin nitarama'. Ni'co' iyaro'sa'. Ninano' panëinquë ya'huëhuachina, ya'ipi piyapi'sari quënanpi. <sup>15</sup> Nanparionta' i'chinpihuatëra, co caconquë ocohuëtërehuë'. A'ninquëchin acorë' pëi' acoana a'pinacaso marë'. Piyapi'sa' inaquë ya'huëhuachinara, noya quënantopi. <sup>16</sup> Inapochachin canpitanta' a'pininso pochin nicatoma', noyasáchin nico'. A'napita nicatënënquëma': ‘Ma noya Tata Yosëri catahuarin ni'ton, noya nisapi,' tosapì,” tënin.

*Iráca pënëntopiso'*

<sup>17</sup> Ina quëran itaantarin:

“Iráca Moisësë, pënëntona'piro'sa', inapita na'con pënëntopi. Pënëntatona', ninshitopi. Co ina naniantacaso' ya'huërinhuë', tënahuë. Ya'ipi inapita ninopiso' nani-caso marë' o'marahuë. Ma'sona tapon naporinsopita no'tëquën sha'huichinquëma'. <sup>18</sup> Tëhuëenchachin itëranquëma'. Isoro'pa' ta'huantaquë huarë' Yosë quiricanën iráca ninshitopiso' ya'huápon. Co a'na hui'sharinso tëranta' topinan quëran ninshitopihuë'. Ya'ipi ninorinso' naniarin huachi. <sup>19</sup> Napoaton pi'pian tëranta' co natëhuatamahuë', co Yosë noya ni'sarinquëmahuë'. Hua'anëntërinquë co acanarinquëmahuë'. Piyapi'sa' a'chintatoma': ‘Ama natëquësosohuë', itohuatama', co noya a'chinaramahuë'. ‘Natëcaso' ya'huërin,' itohuatama', noya a'chinarama'. Natëhuatama', Yosë noya ni'sarinquëma'. Hua'anëntërinquë acanamiatarinquëma'. <sup>20</sup> Cotio maistro'sa', parisioro'sa', inapita Yosë quiricanën noya nitotaponaraihuë', co cancanëna quëran imapihuë'. Canpitanta' co ya'ipi cancanëma quëran huarë' imapatamahuë', co onporonta' Yosë hua'anëntërinquë ya'conaramahuë',” tënin.

*Co no'huitacaso' ya'huërinhuë'*

*(Lucas 12.57-59)*

<sup>21</sup> Ina quëran itaantarin:

“Iráca pënëntopiso' nani nitotërama'. Mashocoro'sa' iráca pënënpi. ‘Ama piyapi tēpacosohuë'. Tēpahuatama', hua'ano'sa' ana'intinquëmaso' ya'huërin,' topirinahuë'. <sup>22</sup> Co tēpatërëso marëáchin ana'intinpoaso' ya'huërinhuë', tēnahuë. A'na piyapi no'huihuatama', ana'intarinquëma'. Pinotohuatamanta', cotio ansiano'sa' ana'inchinquëma'. Cancanëma quëran huarë' no'huitoma', ‘Quëmaso' sopainquën,' itohuatama', pëinquë chachin parisitacaso' ya'huërin, tēnahuë.

<sup>23</sup> Napoaton, iyaro'sa', a'naroáchin nanan anoyatacaso' ya'huërin. Yosë yachinotohuatama', yonquico'. Pi'pian tëranta' nanan ya'huëhuachin, <sup>24</sup> a'naroáchin paatoma',

anoyatoco'. Nani nanan anoyatohuatama', naporu huarë' Yosë pëinënquë paantaco'. Yosë chinotatoma' ma'sha yaquëtëramaso', quëtoco huachi.

<sup>25</sup> Ni'co'. Nihuitëramaso marë' yaquëpahuachinënquëma', a'naroáchin nanan anoyatoco'. Co anoyatohuatamahuë', coisëquë quëparinënquëma'. Coisëquë quëpahuachinënquëma', sontaro'saquë yo'coaninënquëma', tashinan pëiquë po'moarinënquëma'. <sup>26</sup> Inaquë po'mohuachinënquëmaso', ya'ipiya pahuërëtaquë huarë' pipiarama', ténin Quisoso.

### *Monshihuaninso'*

<sup>27</sup> Ina quëran itantarin:

‘Isonta' iráca pënëntopiso'. ‘Sa'ama' ya'huëtohuachinquëma', ama monshihuan-cosohuë', ténin iráca, natantërama'. <sup>28</sup> Nipirinhüë', co monshihuanpiso marëáchin ana'intacaso' ya'huërinhuë', ténahuë. A'na sanapi cancanëna quëran noyahuachina', ina marënta' oshahuanapi. Nani monshitërinso pochin Yosëri ni'sarin.

<sup>29</sup> Napoaton, ya'pirama quëran quënanamaso marë' co noyahuë' yonquihuatama', pa'pi co noyahuë' nisarama'. Ya'pirama' ocoirama' naporini, noya noya niitomahuë'. Somaraya nipomarahuë', co parisitopiquë pa'itomahuë'. Cato' quëran chachin noya ni'tapomarahuë' parisitopiquë tē'yatohuachinënquëma', pa'pi co noyahuë' nisarama'. <sup>30</sup> Imirama quëran pi'pian tēranta' co noyahuë' nipatama', oshahuanama'. Ninishitëmiratërama' naporini, noya noya niitomahuë'. Apia nipomarahuë', co parisitopiquë pa'itomahuë'. Imirama' nishitëramaso pochin cancantatoma', ya'ipi aoshahuaninquëmaso' a'poco', ténin.

### *Sa'ahuano'sa' pënëninso'*

*(Mateo 19.9; Marcos 10.11-12; Lucas 16.18)*

<sup>31</sup> Ina quëran itaantarín:

‘Isonta' iráca pënëntopiso'. ‘A'na quëmapi sa'in yatē'yatohuachin, co topinan tē'yatacaso' ya'huërinhuë'. Coisëquë paaton, quirica aninshichin: “Iso sanapi nani tē'yatërahuë huachi,” ta'caso aninshichin. Ina quëran sanapi quëtacaso' ya'huërin, topi. <sup>32</sup> Caso nipirinhüë' nisha pënënanquëma'. Co sa'ama monshihuanpachinahuë', co onporonta' tē'yatamaso' ya'huërinhuë', ténahuë. Topinan tē'yatohuatama', oshahuanarama'. Ina sanapinta' so'yantahuachin, monshihuaninso pochin nisarin. Nasha so'ionta', monshin pochin nisarin. Co onporonta' tē'yatacaso' ya'huërinhuë', ténahuë,” ténin.

### *No'tëquënáchin nonacaso' ya'huërinso'*

<sup>33</sup> Ina quëran itaantarín:

‘Isonta' shimashonëmapita iráca pënënpiso'. ‘Yoscoarë' no'tëquë nontaranquën, itohuatëra, no'tëquë nontacaso' ya'huërin, Yosë ana'intoahuachinpoa'. Ina pochin nonpatëra, sha'huitëranso chachin nicacaso' ya'huërin, topi. <sup>34</sup> Nipirinhüë', carinquëma' sha'huichinquëma'. No'tëquënáchin nonpatëra, co Yoscoarë' ta'caso' ya'huërinhuë'. Co onporonta' nonpinacaso' ya'huërinhuë', ténahuë. A'naquënsó' yanonpinatona', taponá: ‘Pi'iro'të' ya'huërin ni'ton, no'tëquë nontëranquën, toconpi. ‘Ina pochin nontato, nonpintohuatëra, co Yosë ana'intarincohuë', topirinahuë'. Pi'iro'tënta' Yosëri ninin. Inaquë ya'huaton, ya'ipiya hua'anëntarin. Napoaton co ina pochin nonacaso' ya'huërinhuë'. <sup>35</sup> A'naquëonta' taponá: ‘Isoro'pa' ya'huërin ni'ton, no'tëquë nontëranquën, topi. Yanonpinatona', napopirinahuë'. Isoro'panta' Yosëri ninin. Chini chiniquë nanantaton, isëquënta' hua'anëntërinpoa'. ‘Quirosarin ya'huërin ni'ton, no'tëquë nontëranquën, toconpi a'naquëonta'. A'na tahuëri inaquë Yosëri a'paimarinso' hua'anëntapon huachi. Napoaton co ina pochin nonacaso' ya'huërinhuë'. <sup>36</sup> ‘Moto' ya'huëtërinco ni'ton, no'tëquë nontëranquën, topi a'naquëonta' yanonpinatona'. Ama ina pochin noncosohuë'. Acatohuatamara, co nanitëramahuë' a'na ainëma tēranta' ayararintantacaso'. Yosëichin nanitërin. <sup>37</sup> Ma'sona tēranta' iyaro'sa' nonpatama', no'tëquënáchin nonco'. ‘Pa'sarahuë', topatama', paco'. ‘Co pa'sarahuë', topatama', ama pacosohuë'.

No'tëquénáchin nonpatama', co Yoscoarë' ta'caso' ya'huërinhuë'. Pi'pisha tëranta' piyapi nonpintohuatama', sopai nohuanton napoarama', tënahuë," tënin Quisoso.

*Yai'huërëtopiso'*  
(Lucas 6.29-30)

<sup>38</sup> Ina quëran a'chintaantarín:

“Isonta' iráca pënëntopiso'. ‘A'na piyapi a'nari ahuëaton, tapirayahuachin, coisëquë quëpaquë'. Inaquë no'tëquën i'huërëchin. Inanta' tapirayacaso' ya'huërin. Natëonta' nipantohuachin, coisëquë quëpaquë' i'huërëchin,' topi. <sup>39</sup> Napopirinahuë', carima' sha'huichinquëma'. Co canpita capiniso' nii'huërëtacaso' ya'huërinhuë', tënahuë. Ma'sha onpotohuachinënquëma', ama no'huicosohuë'. Panpirayahuachinënquëma', ama manta' i'huërëtocosohuë'. Naquëranchin panpiantahuachinquëma', co naporo tëranta' no'huicaso' ya'huërinhuë'. <sup>40</sup> A'naquën no'huitënquëma', coisëquë quëparinënquëma'. ‘A'moranso quëtoco,' itohuachinënquëma', quëtoco'. Aipi a'moransonta' quëpatopirinënquëmahuë', co no'huicaso' ya'huërinhuë'. <sup>41</sup> Inso tëranta' camaiatënquëma': ‘Pë'pëtonëhuë macaton, a'na quiromitro pochin quëpatoco,' itohuachinquëma', ama no'huicosohuë'. ‘Noyahua'. Nohuantohuatan, cato' quiromitro quëpachinquën,' itoco'. <sup>42</sup> A'naquën: ‘Ma'sha quëtoco,' itohuachinënquëma', ama apiratomahuë', quëtoco'. ‘Canta' ma'sha a'nanco, topirahuë', itohuachinënquëmanta', a'nanco'. Onpopionta' nosoroatë' catahuacaso' ya'huërin,” tënin.

*Inimicoro'santa' nosorocaso' ya'huërinso'*  
(Lucas 6.27-28, 32-36)

<sup>43</sup> Ina quëran a'chintaantarín:

“Isonta' iráca pënëntopiso'. ‘Canpita capini ninosoroco'. Inimiconëmapitaso nipirinhuë', co nosorocaso' ya'huërinhuë', topi. <sup>44</sup> Nipirinhuë' carima' sha'huichinquëma'. Inimiconëmapitanta' iyaro'sa', nosoroco'. Aparisitopirinënquëmaonta', nosorocaso' ya'huërin. Inapita marënta' noya Yosë nontoco' inahuanta' catahuain. <sup>45</sup> Inapotohuatama', Yosë pochin cancantarama'. Inaso' ya'ipi piyapi'sa' nosororin. Ina nohuanton, pi'i, o'nan, inapita ya'huërin noya nanpicaso marë'. Co imarinsopita maréáchin pi'i a'pininhuë'. Noya nipisopita, oshahuano'santa', ya'ipiya a'pintërin. Naporahuaton, o'naonta' napopianachin acotërinpoa' ma'sha apapotacaso marë'. <sup>46</sup> Nipayaramasopitaráchin nosorohuatama', co ina marë' Yosë acanaarinquëmahuë'. Copirno marë' coriqui ma'patona'piro'santa' nipayapisopita nosoropi. <sup>47</sup> Iyamaráchin noya nontohuatama', co noya noya ninamahuë'. Co Yosë nohuitopisopitahuënta' inahua capini noya ninontopi. Napoaton canpitaso' nisha piyapiro'santa' noya nontoco'. <sup>48</sup> Tata Yosë pochin cancantacaso' ya'huërin. Inaso noyasáchin ninin ni'ton, canpitanta' ina pochin cancantatoma', noyasáchin nico," tënin.

## 6

*A'napita catahuacaso' ya'huërinso'*

<sup>1</sup> Naquëranchin Quisoso pënëntaantarín:

“A'naquënso' piyapi'sari noya nicacaiso marë' noya Yosë imapisopita pochin ya'nopirinahuë', co tëhuëenchachin cancanëna quëran huarë' Yosë yonquipihuë'. Ina pochin nipatama', co inápaquë Tata Yosë acanaarinquëmahuë'. Ama iyaro'sa' inapita pochin nicosohuë'. <sup>2</sup> Ma'sha sa'ahuario'sa' quëtohuatama', ama a'ninquëchin quëtocosohuë'. A'naquën niyontonpiso pëiquë ya'conahuatona', coriqui sa'ahuario'sa marë' quëtopirinahuë', a'ninquëchin quëtopi. ‘Ina marë' noya ni'sarinacoi,' ta'tona', napopi. Cachiquënta' coriqui quëtopi piyapi'sari nicacaiso marë'. Co tëhuëenchachin nosoroaponaraihuë', napopi. Piyapi'sariso' noya ni'pirinahuë', Yosëriso' co noyahuë' ni'nin. Co inápaquë acanaarinhuë', tënahuë. <sup>3</sup> Canpitaso nipirinhuë', sa'ahuario'sa'



ma'sha quëtohuatama', ama a'ninquëchin quëtocosohuë'. Ama nipayaramaso tëranta' sha'huitocosohuë'. <sup>4</sup> Co piyapi'sa' nitotopirinahuë', Tata inápaquë ya'huërinso' ni'sarinquëma'. Ina acanaarinquëma',” itërin.

*Yosë nontacaso' a'chininso'*  
(Lucas 11.2-4)

<sup>5</sup> Ina quëran itaantarín:

“Yosë nontohuatama', ama nonpina'piro'sa pochín nicosohuë'. Inapitaso' niyontopiso pëiquë huanirahuatona', na'con Yosë nontopirinahuë', co cancanëna quëran huarë' nontopihuë'. Cachiquënta' a'ninquëchin Yosë nontopirinahuë', piyapi'sari noya nicacaiso marë' napopi. Co tëhuënhachín Yosë yonquipihuë'. Piyapi'sari noya ni'pirinahuë', Yosëriso' co acanaarinhuë'. <sup>6</sup> Canpitaso nipirinhuë' Yosë yanontohuatama', canpitaoráchin onpopiyanquë tëranta' Yosë nontacaso' ya'huërin. Quëmaoraíchin Yosë nontëquë'. Co quënanpiranhuë', nataninquën. Co piyapi'sa' natanpirinënquënhuë', Yosëso' noya natanatënquën, acanaarinquën.

<sup>7</sup> Yosë nontohuatama', ama inachín inachín nontocosohuë'. Co Yosë imapisopitahuë' ina pochín yonquipi. 'Hua'quí' nontohuato, natanatonco catahuarinco,' topirinahuë'. Co Yosë nohuitatonahuë', napopi. <sup>8</sup> Ama inapita pochín cancantocohuë'. Co'huara Yosë nonchátërasënquëmahuë', ya'ipi pahuantërinquëmasopita nitotërin. <sup>9</sup> Napoaton Yosë yanontohuatama', iso pochín nontoco':

'Tata Yosë, quëmaso inápaquë ya'huapónahuë', natanancoi.

Quëmasáchin noya noyanquën ni'ton, ya'ipi piyapi'sa' chinochinënquën.

<sup>10</sup> Chini chiníquën nanantëran ni'ton, ya'ipicoi natëiinquën.

Inápaquë no'tëquën natërinënquënso pocháchín catahuacoí quëma nohuantëransoráchin nii.

<sup>11</sup> Nani tahuëri catahuacoí cosharo' ya'huëchincoi.

<sup>12</sup> Co noyahuë' nicatoi, oshahuanai. Nosoroatoncoi, oshanëhuëi inquitocoi.

A'napita ma'sha onpotohuachincoi, nanan anoyatëraisó pocháchín oshanëhuëi inquitatoncoi, anoyacancantocoi.

<sup>13</sup> Co noyahuë' yonquihuatoí, catahuacoí a'naroáchin nanianchii.

Catahuacoí ama sopai minsëincoisohuë'. [Quëmasáchin hua'anëntarancoi. Ya'ipi nanitaparan. Ipora quëran huarë' ya'ipiya natëinënquën. Amen,] itoco' Yosë nontohuatama'.

<sup>14</sup> A'naquën ma'sha onpotopirinquëmaonta', noya nontacaso' ya'huërin. Nanan anoyatohuatama', Tata Yosënta' canpita oshanëma' inquitarinquëma'. <sup>15</sup> Co nanan anoyatohuatamahuë', Yosënta' co oshanëma' inquitarinquëmahuë',” itërin Quisosori.

*Co coshatatonaraihuë', Yosë nontopiso'*

<sup>16</sup> Ina quëran itaantarín:

“Ama nonpina'piro'sa pochín nicosohuë'. A'naquën Yosë nontacaso marë' ya'ipi tahuëri co manta' coshatërinhuë'. Naporahuaton, co nitapamantarínhuë'. Sëtërëso pochín ya'norín a'napita nitotacaiso marë'. Co cancanën quëran chinotaponahuë', a'napitari nicacaiso marë' naporín. Ni'pachinara: 'Ma noya Yosë chinotërin,' topi. Piyapi'sari noya ni'pirinahuë', co huachi Yosëri acanaarinhuë'. <sup>17</sup> Canpitaso nipirinhuë' Yosë nontacaso marë' co coshatohuatamahuë', ama piyapi'sa' sha'huitocosohuë'. Noya ihuiantahuatoma', nitapaco'. <sup>18</sup> Ama a'napita nitotacaiso marëhuë' inapoco'. Tata Yosëíchin nitotarín. Co quënanpirëhuahuë', ya'ipiya ni'sarinpoa'. Ina marë' inápaquë acanaarinquëma',” itërin.

*Canamiatërëhuaso'*  
(Lucas 12.33-34)

<sup>19</sup> Ina quëran itaantarín:

“Ama iyaro'sa' ma'sharáchin yonquicosohuë'. Ama na'con coriqui, ma'sha, inapita yontoncosohuë'. Isoro'paquë ya'ipi ma'sha a'naroáchin mocarin, chanatërin. No'soni pë'yarín. Chi'chirotërin. Ihuatëro'sa' ya'conatona', ihuarinënpoa'. Naporin. Napoaton, isoro'paquë ya'huërsopita co ya'huëmiatërinhuë'. <sup>20</sup> Inápaquë ya'huërsopitaso nipirinhüë', ya'huëmiatarin. Yosë na'con yonquiatoma', noya nico'. Ina marë' na'con sacatoco' inápaquë acanamiachinquëma'. Inatohua' co manta' mocaponhuë'. Co no'soni pë'yaponhuë'. Co chi'chirotaponhuë'. Co ihuatëro'sa' ya'conatona' ihuaponënpoahuë'. Napoapon. <sup>21</sup> Ma'sharáchin nohuantohuatama', co Yosë yonquiamahuë'. Nipirinhüë' Yosë na'con na'con nohuantohuatama', ina na'con na'con yonquiamama',” ténin Quisoso.

*Nitapicancaninso'*

*(Lucas 11.34-36)*

<sup>22-23</sup> Ina quëran a'chintaantarín:

“Ya'piranpo quëran ma'sha quënanë'. Co pëtorayatohuatërahuë', noya ni'tërë'. Nitapirayahuatëra, co manta' quënantërëhuë'. Canpitanta' ya'ipi cancanëma quëran Yosë yonquihuatama', tahuëri pochín cancantarama'. Nipirinhüë', ma'sharáchin yonquihuatama', tashi pochín cancantarama'. Nitapicancanpatama', aquë aquëtë co noyahuë' cancantarama huachi,” itërin.

*Coriquiráchin yonquipisopita*

*(Lucas 16.13)*

<sup>24</sup> Ina quëran itaantarín:

“A'na piyapi cato' patron ya'huëtohuachina, nisha nisha camaitopi ni'ton, co nanitërinhuë' cato chachín natëcaso'. A'naso' nohuantaton, noya natëarin. A'naso nipirinhüë' co onpopinchín nohuantatonhuë', co natëarinhuë'. Inapochachín canpitanta' coriquiráchin cancantohuatama', co nanitaramahuë' Yosë natëcamaso'” ténin.

*Yosë noya a'pairinpoaso'*

*(Lucas 12.22-31)*

<sup>25</sup> Ina quëran itaantarín:

“A'naquënsó' ma'sharáchin yonquipi. Capacaiso', o'ocaiso', a'mocaiso', inasáchin yonquipi. ‘Nani ma'sha ya'huëtohuachinco, nóya ya'huarahüë huachi,’ topirínahuë'. Ama iyaro'sa' ina pochín cancantocosohuë'. Co capacaso marëáchin isoro'paquë acorinpoahuë'. A'mocasonta', co onpopinchín yonquicaso ya'huërinhuë'. Yosë na'con na'con yonquihuatëhua', catahuarinpoa noya ya'huëcaso'. <sup>26</sup> Ni'co'. Inairaro'sa' co manta' sha'pihuë'. Co ma'sha sha'piso' macatona', pëinënaquë acopihuë'. Napoaponahuë', Tata Yosëri catahuarín. Ina nohuanton, cosharo' quënanpi. ¡Canpitaso' inapita quëran noya noya ni'ninquëma'! <sup>27</sup> Chiminacaso nanihuachín co napion ancantopiramahuë', co a'na tahuëri tëranta' nanitaramahuë' ana'huëcamaso'.

<sup>28</sup> Nitapacamasonta', co aquëtë yonquicamaso ya'huërihuë'. Ni'co'. Yancoro'sa' topinan noya papotopi. Co sacatopihuë'. Co manta' a'mocaiso nipihuë'. Nipirinhüë', noyápiachín yancotopi. <sup>29</sup> Iráca copirno Saromon nani ma'sha ya'huëtërin. ‘¡Ma noyápiachíncha a'morín paya!’ topi. Yancoro'saso nipirinhüë', ina quëran noya noya ya'nopi. <sup>30</sup> Pacatoro quëran huarë' Yosëri yonquirín. A'na tahuëríchin ya'huëpirinhüë', ahuiwachina, ahuiquitëre huachi. Co hua'qui' ya'huëpirinhüë', Yosëri yonquirín. Ina nohuanton, noya papotërin. Canpitaso' ina quëran na'con na'con yonquirinquëma'. ¿Onpoatomata' nipachín, co natëramahuë'? ‘Yosë catahuarínco mini,’ ta'caso nipirinhüë'.

<sup>31</sup> Ama ma'sha yonquiatoma', pa'yancosohuë'. ‘¿Ma'cha ca'në'poya? ¿Ma'cha o'orë'poya? ¿Ma'cha a'morë'poya?’ ama tocosohuë'. <sup>32</sup> Co Yosë imapisopitahuë' ina pochín yonquipi. Ma'sharáchin yonquipi. Canpitaso nipirinhüë' tatanëma' inápaquë ya'huërsinso' yonquirinquëma'. Ya'ipi pahuantërinquëmasopita nani nitotërin. <sup>33</sup> Napoaton Yosë na'con na'con yonquico'. A'napitanta' catahuaco' hua'anëntërinquë ya'conacaiso marë'. Yosë nontoco'

noyasáchin yonquicamaso marë'. Ina pochin cancantohuatama', catahuarinquëma'. Ina nohuanton, ma'sha pahuantërinquëmasopita ya'huëtarinquëma'. <sup>34</sup> Napoaton ama tashiraya ma'sha onpoamaso' yonquiatoma', pa'yancosohuë'. Tashirayanta' ma'sha onpohuatama', pa'yanacaso ya'huapon ni'ton, co ipora quëranchin ina yonquiatoma co napion ancantápamaso ya'huërinhuë'," ténin Quisoso.

## 7

*Nocantoro'sa' pënëninso'*  
(Lucas 6.37-38, 41-42)

<sup>1</sup> Naquëranchin Quisoso pënëntaantarín.

“Ama iyaro'sa' a'napita nocancosohuë'. ‘Paso' quëmapi co noyahuë',’ ama tocosohuë', Yosë ana'intochinquëma'. <sup>2</sup> A'napita pinopatama', Yosënta' co noyahuë' ni'sarinquëma'. Piyapi chiníquën nonapihuatama', Yosënta' chiníquën ana'intarinquëma'. Piyapi noya yonquirapihuatama', Yosënta' noya ni'sarinquëma'. <sup>3-5</sup> Co iyaparin nocanacaso ya'huërinhuë'. Inaso pi'pian co noyahuë' nipachin, mo'shiri ya'conayatërinso pochin ninin ni'ton, nocanan. Quëmanta' co noyahuë' ninan ni'ton, narasëratë' nani noyá ya'copirayarinquënso pochin nipiranhuë', naporan. Napoaton ‘carinquën noya nicatënquën mo'shi ocoichinquën,’ co itamaso ya'huërinhuë'. Napotohuatan, nonpinan. Narasëratë' niocoitëquë'. Ina quëran noya quënantaran. Naporo huarë' nanítaran iyaparin mo'shi ocoitacaso',” itërin.

<sup>6</sup> Ina quëran itaantarín:

“Isonta' a'chinchinquëma'. Ni'niro'sa', coshiro'sa', inapita co yonquipihuë'. Huirina'pi pa'ton nininso' co quëtacaso' ya'huërinhuë'. No'paquë acorama' naporini, i'nachitonahuë'. Ina quëran canpitanta' yaquëtëitëinquëmahuë'. A'naquën piyapi'santa' ni'niro'sa' pochin cancantopi ni'ton, Yosë nanamën a'chintohuatama', chiníquën no'huiarinëinquëma'. Co pi'pisha tëranta' nohuantohuachinahuë', tananpitoco',” itërin.

*Yosë nontacaso' ya'huërinso'*  
(Lucas 11.9-13; 6.31)

<sup>7</sup> Ina quëran itaantarín:

“Nani tahuëri Yosë nontoco' nata'inquëma'. Pahuantërinquëmaso' nipatama', quëtarinquëma'. Ma'sha yonirëso pochin cancantatoma', nontáco' catahuainquëma'. Ya'coana pi'nirëso pochin cancantatoma', nontoco' aya'coinquëma'. <sup>8</sup> Tëhuëenchachin ma'sha nitohuatama', quëtarinquëma'. Hua'qui' ma'sha yonípatama', quënanarama'. Ya'coana pi'nirëso pochin nipatama', i'soatarinquëma'.

<sup>9</sup> Hui'nama' tanaton cosharo' natanpachinquëma', co na'pi quëtëramahuë'. <sup>10</sup> Sami nayahuachina', co ya'huan quëtëramahuë'. Sami quëtërama'. <sup>11</sup> Canpitaso' co noyahuë' yonquiapomarahué', hui'nama' nosororama'. Noya ma'sha quëtërama'. Yosëso' noya noya ni'ton, na'con na'con nosororinquëma'. Inápaquë ya'huaponahuë', hui'ninpita pochin ni'ninquëma'. Nontohuatama', noya nininso' quëtarinquëma'. Catahuarinquëma' noya cancantacamaso marë'.

<sup>12</sup> Noya ninosorocaso' ya'huërin. Canpitaso' nohuantërama' a'napita nosoroinëinquëmaso'. Napoaton canpita nohuantëramaso chachin inapitanta' nosoroco'. Ninosoroatoma', nicatahuaco'. Yosë nohuanton, Moisésë, pënëntona'piro'sa', inapita na'con pënënpirinëinquëmahuë', ninosorocaso' na'con na'con nohuantërin. Ninosorohuatama', noya imasarama', ténahuë',” itërin Quisosori.

*Cato' ira ya'huërinso'*  
(Lucas 13.24)

<sup>13-14</sup> Ina quëran itaantarín:

“Ni'co'. Cato' ira ya'huërin. A'naso' pancana. Co sacaihuë' pa'tacaso' ni'ton, na'a piyapi'sa' ina pa'tapi. Ya'coanamënso' pancana nipirinhüë', ina pa'tohuatama', parisitopiquë paatoma', parisitomiátápoma'. A'na iraso nipirinhüë', sacai pochin pa'tacaso'. Ya'coanamënso' yamianasha'huaya. Caraíchin piyapi'sa' ina quënanpi. Inaquë ya'conpatama', nanpimiatarama'. Ina ira pa'toco'. Sacai' Yosë imacaso' niponahuë', chiniquën cancantatoma', imaco huachi,” tënin Quisoso.

*Nisha a'china'piro'sa'*  
(Lucas 6.43-44)

<sup>15</sup> Ina quëran itaantarín:

“Ni'cona iyaro'sa' nonpin nanan pënëntona'piro'sa' nonpintochinënquëma'. 'Quiyanta' imarai,' itopirinënquëmahuë', co cancanëna quëran imapihuë'. Tanan ni'ni' yamap-intërinso pochin cancantatona', yatapicancaninquëma'. Co no'tëquën a'chinpihuë'. <sup>16</sup> Napoaton noya yonquico'. Noya cancantohuachina', noya nisapi. Co noyahuë' cancantohuachina', co noyahuë' nisapi. Co no'tëquën a'chintarinënquëmahuë'. Ni'co'. Sharo'sa' nitërin quëran nohuitërehua'. So'huanpiso', co misëra nitërinhuë'. ¡Shihuarionta' co quëpa nitërinhuë'! <sup>17</sup> Nara noya nipachina, noya nitërin. Co noyahuë' nipachina, co noya nitërinhuë', napoonin. <sup>18</sup> Nitacaso' nara nipachina, inachachin noya nitërin. A'naso nipirinhüë', co nitacaso' narahuë' ni'ton, co onporonta' noya nitërinhuë'. <sup>19</sup> Co noya nitohuachinhüë', a'nëhuachinara pënquë ahuiquitopi huachi. <sup>20</sup> Nitërin quëran nara nohuitërehua'. Inapochachin a'china'piro'sa' nohuitarëhua'. Noya cancantohuachina', noya nisapi. Co noyahuë' cancantohuachina', co noyahuë' nisapi. Co no'tëquën a'chinapihuë',” itërin.

*Yosë huëntonëquë ya'conpisopita*  
(Lucas 13.25-27)

<sup>21</sup> Ina quëran itaantarín:

“Na'a piyapi'sa': 'Sinioro, Sinioro,' itopirinacohuë', a'naquën co cancanëna quëran imarinacohuë' ni'ton, co Yosë hua'anëntërinquë ya'conapihuë'. Yosë natëpisopitaráchin inatohua' ya'huëcontapi huachi. <sup>22</sup> Ayaro' tahuëri nanihuachin, na'a piyapi'sa' non-taponaco: 'Quëma nanamën Sinioro sha'huirai. Quisoso nanan quëtërincoi, ta'toi sopairo'sa' a'parai. Quëma pochin sacai' nininsopita ninai,' itaponaco. <sup>23</sup> Cariso nipirinhüë' itapo: 'Yanonpintatomaco, napopiramahuë', co noyahuë' cancantërama'. Co piyapinëhuëpitanquëmahuë'. Co onporonta' imaramacohuë'. ¡Paco huachi!' itapo,” itërin Quisosori.

*Cato' pëirínso'*  
(Marcos 1.22; Lucas 6.47-49)

<sup>24</sup> Ina quëran pënëntaantarín:

“Na'acquëma' natanamacoso marë' huë'nama'. Natëhuatamaco, a'na quëmapi pochin nisarama'. Ina quëmapišo', natëricho quëran yapëirin. Yapëihuachina, noya yonquia-ton, noya pëiaquë yonirin. Na'pitë' quënanahuaton, inaquë noya pëirin. <sup>25</sup> Chiniquën o'nanpachina, panca ihuan pa'nin. Pamatohuachina, opotopirinhüë', co anotërinhuë'. Chini' naponahuë', co tē'yatërinhuë'. Panca ihuantaponahuë', na'pitëquë pëirin ni'ton, noya huanirin. Co tē'yatërinhuë'. <sup>26</sup> A'naquënso nipirinhüë' yapëihuachina, co noya yonquirinhüë'. 'Inotëquë tēranta' pëi'i,' ta'ton, inaquë pëipirinhüë'. <sup>27</sup> Ina quëran panca o'nanin huachi. Pamatohuachina, chiniiri tē'yatërin. Panca ihuantohuachina, pëi' a'naroáchin tē'yatërin. Ya'ipi noyá quiquirin huachi,” itërin Quisosori.

<sup>28</sup> Ya'ipi piyapi'sa' natanahuatona', pa'yanpi. “¡Ma noyacha a'chintërinpoa paya! <sup>29</sup> Co hua'anhuë' naponahuë', chiniquën nanantaton, a'chintërinpoa'. Co cotio maistro'saso' ina pochin a'chinpihuë',” topi.

## 8

*Chana caniori maninso'*  
(Marcos 1.40-45; Lucas 5.12-16)

<sup>1</sup> Ina quëran panën quëran nohuaramahuachinara, na'a piyapi'sari imasapi.  
<sup>2</sup> Pa'sapirinahuë', a'na cania'pi huë'nin, chana caniori maninso'. Nacapirahuaton, Quisoso nantëntaquë isonin quëran, itapon:

—Nohuantohuatan Sinioro, quëma nanitëran anoyatancoso'. Anoyatoco topirahuë', itërin. <sup>3</sup> Quisosori së'huarahuaton, itërin:

—Nohuantërahuë mini, iyasha. ¡Noyatëquë huachi! itërin. Itohuachina, a'naroáchin noyatërin. Canio inquirin huachi.

<sup>4</sup>—Ama piyapi'sa' sha'huitëquësuhuë'. Corto hua'an ya'huërinquë paaton, noyatëranso' a'notonquë' ni'inquën. Naporahuaton, ma'sona Moisésë sha'huirinsó' quëpaquë' noyatëranso' nitotacaiso marë', itërin. Napotohuachina, pa'nin huachi.

*Capitan piyapinën anoyatërinso'*  
(Lucas 7.1-10)

<sup>5</sup> Ina quëran Capinaomoquë paantarin. Canconpachina, a'na Noma capitani huëcapairahuaton:

<sup>6</sup>—Piyapinëhuë Sinioro chiníquën caniorin. Pëinëhuëquë quëhuénárin. Co huachi nanitërinhuë' iratacaso'. Pa'pi parisitarin, itiirin.

<sup>7</sup>—Noyapa', pa'sarahuë anoyatapo, itërin.

<sup>8</sup>—Quëmaso' Sinioro noya noyanquën. Co caso' quëma pochincohuë'. Co pëinëhuëquë huarë' huëcamaso' ya'huërinhuë'. Topinan camaiquë' noyachin, ténahuë. <sup>9</sup> Caso' hua'anëhuë natërahuë. Capitanco ni'ton, sontaro'sa' natërinaco canta'. “Paquë’,” itohuatëra, pa'nin. “Huëquë’,” itohuatëra, huë'nin. Piyapinëhuëpitanta' camairahuë. “Sacatëquë’,” itohuatëra, sacatarin. Inapochachin quëmanta' topinan camaihuatan, a'naroáchin piyapinëhuë noyatarin ténahuë, itërin.

<sup>10</sup> Quisosori natanahuaton, pa'yatërin. Napoaton piyapi'sa' itapon:

—¡Ma noyacha iso quëmapi natërinco paya! Nisha piyapi niponahuë', israiro'sa quëran noya noya natërinco. <sup>11</sup> Iporaso huachi nisha nisha parti quëran huë'sapi. Nisha piyapi'sa' niponarahue', imatona', Yosë hua'anëntërinquë ya'conapi. Inápaquë pa'pachina', Apraan, Isaco, Cacopo, inapita nohuitapi. Inapitarë' huënsëapi coshatacaiso marë'. Nóya ya'huërapí huachi, ténahuë. <sup>12</sup> A'naquëmaso nipirinhue', “Quiyanta' Yosë piyapinënpitacoi,” topiramahuë', co natëramahuë' ni'ton, co hua'anëntërinquë ya'conaramahuë'. Tashinanquë të'yatarinquëma'. Inaquë na'nëarama', chiníquën parisitarama huachi, itërin Quisosori.

<sup>13</sup> Ina quëran capitan itantarin:

—¡Ya'huëranquë iyasha paantaquë! Natëranco ni'ton, apiramiachin piyapinën noyatarin, itërin.

Naporo chachin piyapinën noyatërin. Paantahuachina, sano quënanconin huachi.

*Pitro a'shatën a'naroáchin anoyatërinso'*  
(Marcos 1.29-31; Lucas 4.38-39)

<sup>14</sup> Ina quëran Pitro pëinënquë pa'pi. A'shatën chiníquën sapoton, quëhuénárin, quënanconpi. <sup>15</sup> Quisosori maimirarahuatón, a'naroáchin anoyatërin. Co huachi saporinhuë'. Huanirahuaton, inari chachin a'carin, o'shitërin, napotërin.

*Na'a cania'piro'sa' anoyatërinso'*  
(Marcos 1.32-34; Lucas 4.40-41)

<sup>16</sup> I'huanahuanquë yatashirahuaso', na'a piyapi'sa' huëcatona', cania'piro'sa' quëpi Quisosori anoyatacaso marë'. A'naquën sopairi ya'coancantërin ni'ton, co inaora yonquirinso' yonquirinhue'. Quisosori topinan noncharapirinhue', sopairo'sa' pipipi.



Ya'ipi cania'piro'sa' anoyatërin. <sup>17</sup> Iráca Isaiasë ninoton, ninshitërin. “Canipirëhuahuë', anoyatarinpoa'. Canio inquitarinpoa',” tënin. Cania'piro'sa' anoyatohuachina, ni-norinso' nanirin huachi.

*Ya'ipi cancanëna quëran imacaiso' ya'huërinso'*  
(Lucas 9.57-62)

<sup>18</sup> Notohuaro' piyapi'sa' niyontonpachinara, ca'tano'sanënpita itërin:

—Poti maconco'. Aquëtëran pa'ahua', itapirinhüë', <sup>19</sup> a'na cotio maistrori nontiirin.

—Canta' Maestro imainquën. Insëquësona pa'patan, canta' pa'i, topirahuë', itërin.

<sup>20</sup> —Sacai' imancoso' iyasha, tënahüë. Anashiro'sa', huë'ëshinantëna ya'huëtöpi, inaquë huë'ëpi. Inairaro'santa' pë'pëtëna ya'huëtöpi. Caso nipirinhüë' Yosë quëran quëmapico niporahuë', co pëi' ya'huëtërincohuë'. Pa'sápato, co ya'huëmiatërahuë', itërin.

<sup>21</sup> A'na imarinsoarinta' huëcapairahuaton, itiirin:

—Canta' oshaquëran imamiachinquën, topirahuë', co apira nanitërahuë'. Tatahuë nani noyá mashotërin. Chiminpachin, cari pa'pitarahuë. Ina quëran imamiataranquën, itopirinhüë'.

<sup>22</sup> Quisosori itërin:

—A'naquën co nohuantopihuë' imainacoso'. Chimipi pochin cancantöpi. Inapitari pa'pichina'. Quëmaso nipirinhüë' ca na'con na'con yonquiatonco, imaco, itërin.

*Ihuan a'parinso'*

(Marcos 4.35-41; Lucas 8.22-25)

<sup>23</sup> Ina quëran Quisoso potiquë ya'conin. Ya'conpachina, ca'tano'sanënpitanta' ya'conpi anta'. <sup>24</sup> Paaquëya', a'nanaya panca ihuani manin. Panca sono' ni'ton, co'sacairi poti opoto opototahuaton, yamëntaitapirinhüë'. Ya'huërë Quisososo' huë'ërarin.

<sup>25</sup> Napohuachina, ca'tano'sanënpitari ochinanpi.

—¡Catahuacoi Siniro! ¡Chimiitarihua' canpoaso'! itöpi.

<sup>26</sup> —¿Onpoatomata' të'huaramaso'? ¿Co noya natëyatëramacohüë' ti? itërin. Ina quëran huënsëintarahuaton, ihuan a'parin. Sononta' nontërin.

—Sanoquë', itohuachina, a'naroáchin co'sacai' sanoirin. <sup>27</sup> Ina nicatona', ca'tano'sanënpita pa'yanpi.

—¿Ma quëmapicha isoso' ni'ton, ihuan a'parin paya? Sononta' a'naroáchin asanoirin, nitöpi.

*Sopairo'sari ya'coancantöpi*

(Marcos 5.1-20; Lucas 8.26-39)

<sup>28</sup> Ina quëran aquëtëran canconpi. Inaso no'pa' Catara parti itöpi. Inaquë cato' quëmapa ya'huëpi. Na'a sopairo'sari ya'coancantöpi ni'ton, co huachi yonquipihuë'. Pa'pi hua'yantöpi. Na'pi naninquë chimipiro'sa' po'mopiquë ya'huërapi. A'naroáchin yaahuëtöpi ni'ton, co inataquëchin pa'pihuë'. Quisoso nonshihuachina, sopairo'sari ya'coancantërin sopita na'pi nanin quëran pipirahuatona', huë'sapi nacapirin. <sup>29</sup> Quisoso quënanahuatona', chiniquën nontapi.

—Nohuitërainquën Siniro. ¿Ma'ta' onpotaponcoi? Quëmaso' Yosë hui'ninquën ni'ton, co'huara ayaro' tahuëri naniyatërasohüë', ¿aparisitarancoi ti? itöpi.

<sup>30</sup> Ina ya'cariya na'a coshiro'sa' ya'huërin. Huëntonën coshatapi. <sup>31</sup> Inapita quënanahuatona', itaantapi:

—Yaocoihuatancoi, coshiro'saquë tëranta' a'paco ya'coanta'ii, itantapi.

<sup>32</sup> —Inta nipachin, inaquë paatoma' ya'conco', itohuachina, quëmapa'sa quëran pipirahuatona', coshiro'saquë ya'conconpi. Inaquë ya'conpachinara, coshiro'santa' hua'yantatona', a'naroáchin tahuan pa'töpi. Panca sonoquë niitahuatona', inaquë chimiitöpi.

<sup>33</sup> Ina ni'sahuatona', a'paina'piro'saso' pa'yanpi. Pa'yanatona ninano'pa' ta'api. Inaquë ya'ipiya sha'huiconpi.

—Sopairo'saso' quëmapi'sa quëran pipirahuatona', coshiro'saquë ya'conconpi. Napo-huachinara, hua'yantatona', tahuan pa'topi. Ya'ipi chimiitopi, itopi. <sup>34</sup> Natanahuatona', na'a piyapi'sa' huë'pi Quisoso nicacaiso marë'. Nani ni'pachinara, të'huatatona':

—A'na parti paquë', itopi.

## 9

### *Apia anoyatërinso'*

*(Marcos 2.1-12; Lucas 5.17-26)*

<sup>1</sup> Napotohuachinara, potiquë ya'coantarahuatona', aquëtëran pëntoantapi. Quisoso ninanonëinquë chachin paantapi. <sup>2</sup> Inaquë catapini quëmapi'sari huëcatona', apia quëpi. Pë'sara'huaya pochin niniinquë quëpi. Hua'gui' co nanitërinhuë' huanicaso', quëhuënarin. “Ma noya isopita natërinaco,” ta'ton, Quisosori cania'pi itërin:

—¡Noya cancantëquë', apia'hua! Apiramiáchin quëma oshanën inquitaranquën, itërin.

<sup>3</sup> Ina natanahuatona', cotio maistro'sa' yonquipi. “¿Ma quëmapita' isoso'? ‘Oshanën inquitaranquën,’ ta'ton, Yosë yaya'huërëtërin,” topi, yonquiatona'. <sup>4</sup> Topinan yonquinëna quëran napoápirinahuë', Quisosori nitotaton.

—¿Onpoatomata' co noyahuë' yonquirapiramaco? <sup>5</sup> Canpitaso naporama': “Piyapinpoa a'napita oshanën inquitacaso', co nanitërehuahuë'. Apia camaiatë': ‘Huanirahuaton, noya paquë huachi,’ itacasonta' co nanitaparëhuahuë’,” tënama'. <sup>6</sup> Caso nipirihuë' Yosë quëran quëmapico ni'to, nanan quëtërinco piyapi'sa' oshanëna' inquitahuaso marë'. Canpitanta' ina nitotacamaso marë' iso apia anoyatarahuë, itërin. Ina quëran apia itantarin:

—Huaniquë' apia'hua. Pë'sara'huaya masahuaton, ya'huëranquë paquë', itërin.

<sup>7</sup> Itohuachina, a'naroáchin huanirahuaton, ya'huërin'pa' pa'nin huachi. <sup>8</sup> Piyapi'sa' ina nicatona', pa'yanpi.

—¡Ma noyacha Yosëri catahuarin paya! Piyapi niponahuë' chiniquën nanan quëtërin paya, topi.

### *Matio imarinso'*

*(Marcos 2.13-17; Lucas 5.27-32)*

<sup>9</sup> Ina quëran Quisoso paantarahuaton, Matio quënanconin. Coriqui Noma copirno marë' ma'patërinquë huënsëarin. Quisosori itapon:

—Huëquë' iyasha imaco, itërin. Itohuachina, a'naroáchin huanirahuaton, imarin.

<sup>10</sup> Naporo' tahuëri ina pëinëinquë Quisoso ca'tano'sanënpitarë' coshatapatapi. Na'a piyapi'sa' huë'pi Quisosorë' coshatatona' nohuitacaiso marë'. A'naquënsa' copirno marë' coriqui ma'patona'piro'sa'. A'naquëonta' oshahuano'sa' itopiso'. <sup>11</sup> Parisioro'saso' ina ni'sahuatona', Quisoso ca'tano'sanënpita itonpi:

—¿Onpoatonta' maistrone' oshahuano'sapitarë' coshatarin? Copirno marë' coriqui ma'patona'piro'santa' co noyahuë' nipirinahuë', inapitarë' coshatarin, itopi.

<sup>12</sup> Natanahuaton, Quisosori itërin:

—Isopitaso' tëhuënychachin nohuantopi imainacoso'. Ni'co'. Cania'piro'saso' notoro nohuantopi. Nipirihuë', “Co caniorahuë’,” topatëraso', co notoro nohuantërehuë'.

<sup>13</sup> Oshahuano'sa' pënéna'huaso marë' o'marahuë. “Co noyahuë' yonquiramasopita naniantatoma', Yosë chachin tahuërëtantaco’,” itërahuë. A'napitaso': “Quiyaso' co oshahuancoihuë’,” topiso marë' co na'con a'chintërahuë'. Paatoma', Yosë quiricanën noya nitotoco' no'tëquën yonquicamaquë. Inaquë iráca ninshitopi: “A'naquën topinan quëran chinotatonaco oshanëna marë' ma'sha tëpapirinahuë', co a'napita nosoropihuë'. Nosorotacaso' na'con na'con nohuantërahuë’,” tënin Yosë, itërin Quisosori.

*Nasha nanan a'chininso'*  
(*Marcos 2.18-22; Lucas 5.33-39*)

<sup>14</sup> Ina quëran Coanshari a'chintërsopita huëcatona', Quisoso nontiipi:

—Quiyaso' a'na tahuëri co coshatatoihuë', Yosë nontarai. Parisioro'santa' inapopi. Quëma imarinënsopitaso nipirinhüë', noya coshatapi, o'osapi, inapopi. ¿Onpoatonta' co quiya pochin imarinënhüë'? itiipi.

<sup>15</sup> —Ca ya'huarahuë ni'ton, co sëtöpihuë'. Ni'co'. Quëmapi sa'acaso marë' piyapi'sa' amatohuachina, capa cancantopi. Nipayarinsopita huë'pachinara, inapitarë' coshatatona', capa cancantapi. ¡Co sëtacaiso' ya'huërinhuë'! A'na tahuëriso nipirinhüë' inimiconënpitari huëcatona', sa'ana'pi masapi. Quëpatohuachina', co huachi coshatacaiso' yonquiapihuë'. Sëtapi huachi. Inapochachin canta' mapachinaco, imarinacosopita sëtapi. Sëtatona', co huachi coshatacaiso' yonquiatonahuë', Yosë nontápona', itërin Quisosori.

<sup>16</sup> Ina quëran a'chintaantarín.

—Ni'co'. A'morëso noyá mocahuachina, co nasha në'mëtëquë pa'pitërehüë'. Nasha në'mëtëquë pa'pitëre' naporini, naquëranchin noshataton, aquëtë chachin napointonhuë'. <sup>17</sup> Sha'moronta' yonquico'. Huino sha'moro' nipachina, co sha'huëtë' morsa mocaró' nininquë ta'panëhuë'. Sa'potohuachina, a'naroáchin nopoitërin. Nopoitohuachina, huino chiniarë'. Morsanta' tapirë'. Sha'moro' huinoso' nasha morsaquë ta'panë'. Huino, morsanta' noya nisarin, ténin Quisoso. (Iráca inachitopiso' naniantatona', nasha nanan imacaso' ya'huërin, tapon naporin.)

*Sanapi anoyatahuaton, Cairo hui'nin ananpitaantarínso'*  
(*Marcos 5.21-43; Lucas 8.40-56*)

<sup>18</sup> A'chinaquëya', a'na cotio hua'an huë'nin. Quisoso notënanquë isonquirin.

—Hui'nahuë apira chiminin. Huëcaton, Sinioro, së'huaquiquë' nanopianta'in, topirahuë', itiirin.

<sup>19</sup> —Noyapa', tosahuaton inarë chachin pa'nin. Ca'tano'sanënpitanta' pa'pi. <sup>20-21</sup> Paaquëya', a'na sanapiri imaquiarin. Hua'gui' panca huënai' a'parin. Nani shonca cato' pi'ipi co sanorinhüë'. Parisitárin. “A'morinso tëranta' së'huatohuato, anoyataponco,” ta'ton pinën quëran imaquiarin. Imaqiton, a'morinso' huirotëínchin së'huaquirin.

<sup>22</sup> Quisosori tahuëretahuaton, sanapi quënanin.

—Noya cancantëquë', imoya. Natëranco ni'ton, noyataran, itërin. Naporo chachin noyatërin. Huënai' no'narin huachi.

<sup>23</sup> Ina quëran hua'an pëinënquë canconpi. Na'a piyapi'sa' quënanconpi, na'nërapi, ayanápi. Quinatoro'santa' quënanconpi. Huinatacaiso marë' huë'pirinahuë', <sup>24</sup> Quisosori itapon:

—Ya'ipinquëma' pipico'. Co sanapia'hua chimininhuë'. Topinan huë'ësárin, itërin.

—Co huë'ërinhuë'. Nani chiminin, itatona' tëhuapi. <sup>25</sup> Ya'ipi piyapi'sa' aipiran a'parahuaton, acoana chimipi ya'huërinquë ya'conin. Maimirarahuaton, ananpitaantarín. A'naroáchin huanirin huachi. <sup>26</sup> Napohuachina, ya'ipi parti nanan nahuinin.

*Cato' somaraya anoyatërinso'*

<sup>27</sup> Ina quëran pipirahuaton pa'sapirinhüë', cato' somarayari imaquiapi. Co manta' quënantopihuë'. Quisoso imaratona', chiniquën nontapi.

—¡Nosorocoi Sinioro! Quëmaso' Tapico' shinquën. Yosë a'paimarinquën ni'ton, nosoroatoncoi anoyatocoi, topiraihuë', itopi.

<sup>28</sup> Pëiquë canconahuatona', Quisoso ya'conin. Somarayo'santa' ya'conpachinara, Quisosori itërin:

—Cari nanitato anoyatërahuëso' ¿natërama' ipora ti? itërin.

—Natërainquën mini Sinioro. Ya'ipiya nanitapanan tënai, itopi.

<sup>29</sup> Napotohuachinara, së'huarayarahuaton, itërin:

—Natëramaco ni'ton, apiramiáchin anoyataranquëma', itërin.

<sup>30</sup> Napotohuachina a'naroáchin quénantopi.

—Anoyatëranquëmaso' iyaro'sa', ama insonta' sha'huitocosohuë', itopirinhüë',  
<sup>31</sup> pipirahuatona', na'a piyapi'sa' sha'huitëra'piapi.

—Quisoso anoyarayatërincoi. Noya huachi quénantërai, itëra'piapi. Ya'ipi parti quëran natantopi.

*Në'huëya anoyatërinso'*

<sup>32</sup> Ina quëran pa'pachina, a'napitanta' canquiipi. Në'huëya quëpi. Sopai nohuanton, co nanitërinhuë' nonacaso'. <sup>33</sup> Quisosori nosoroaton, sopai a'patërin. A'patohuachina, a'naroáchin noyatërin. Noya nonsarin huachi. Piyapi'sari ni'pachinara, pa'yanpi.

—Co onporonta' iso pochin ni'chinëhuahuë'. Iráca quëran huarë' co insonta' isëquë naporinhüë', topi.

<sup>34</sup> Parisioro'saso nipirinhüë', co yanatëpihuë'.

—Sopai hua'ani catahuarin ni'ton, nanitërin sopairo'sa' a'pacaso', toconpi.

*Piyapi'sa' nosororinso'*

<sup>35</sup> Ina quëran Quisoso pa'sápaton, nisha nisha ninanoro'saquë a'chintëra'piarin. Niyon-tonpiso pëiro'saquë noya nanan sha'huitëra'piarin.

—Yosë yahua'anëntërinquëma', itëra'piarin. Insëquësona pa'pachina, ya'ipi cania'piro'sa' anoyatëra'piarin. Nisha nisha canio inquitërin. <sup>36</sup> Paaton, notohuaro' piyapi'sa' quënanin. Co Yosë yonquiatonahuë', co napion cancantopi. Ohuicaro'sa pochin inahuaso', co incari tëranta' a'pairinhüë'. “¿Incha catahuaincoi paya?” ta'tona', nisha nisha yonquiipi. Napoaton Quisosori nosororin. <sup>37</sup> Nosoroaton, ca'tano'sanënpita itërin:

—Notohuaro' piyapi'sa' ya'huëpirinahuë', co incariso tëranta' catahuarinhüë' Yosë hua'anëntërinquë ya'conacaiso marë'. Isoro'pa' panca imin pochin ninin. Cayarinso' manëso pochachin piyapi'sa' manë' Yosë imacaiso marë'. Notohuaro' piyapi'sa' ya'huaponaraihuë', caraíchin pënëntapi Yosë imacaiso marë'. <sup>38</sup> Napoaton Yosë nontoco' a'napitanta' a'pa'in pënëchina'. Ina sha'huitërinpoa' a'chinacaso marë', itërin Quisosori.

## 10

*Shonca cato' ca'tano'sanënpita acorinso'*  
*(Marcos 3.13-19; Lucas 6.12-16)*

<sup>1</sup> Shonca cato' quëmapi'sa' Quisosori nani huayonin na'con na'con a'chintacaso marë'. Inapitaso', ca'tano'sanënpita itopi. Ayontonahuaton, chiniquën nanan quëtërin sopairo'sa' a'pacaiso marë'. Ina nohuanton, nisha nisha caniori maninsopitanta' anoyatapi.

<sup>2</sup> Shonca cato' acorin paatona' nanamën a'chinacaiso marë'. Simon'ton acorin. Pitro itopi anta'. Iionta' acorin, Antërisë itopiso'. Santiago, Coansha, inapitanta' acorin. Sipitio hui'ninpita inahuaso'. <sup>3</sup> Pinipi, Partoromi, Tomasë, Tatio, inapitanta' nohuantaton, acorin. Mationta' coriqui Noma copirno marë' ma'patopirinhüë', acorin ca'tanacaso marë'. Arpio hui'nionta' acorin, Santiago itopiso'. <sup>4</sup> A'na Simonta' acorin. Inaso', copirno no'huina'piro'sa' imapirinhüë', iporaso' Quisoso imasarin huachi. Cotasë Iscariotinta' acopirinhüë', a'na tahuëri inari sha'huirapiarinso'.

*A'chinacaiso marë' a'parinso'*  
*(Marcos 6.7-13; Lucas 9.1-6)*

<sup>5</sup> Nani shonca catoya'pi acohuachina, sha'huitërin: “Paatoma' iyaro'sa' noya pënëntoco'. Ama nisha piyapiro'sa' ya'huëpiquë pacosohuë'. Samaria ninanoro'saquënta' ama pacosohuë'. <sup>6</sup> Israiro'sa' a'chintonco'. Inapitaso', ohuicaro'sa' chihuëpiso pochin ni'tona', co Yosë yonquipihuë'. Napoaton pënënacaso' ya'huërin. <sup>7</sup> Paatoma', a'chintoco': 'Iso tahuëri'sa' Yosë hua'anëntarinpoa', itoco'. <sup>8</sup> Cania'piro'sa' a'naroáchin anoyatoco'. Chimipiro'santa', ananpitaantaco'. Chana caniori maninsonta'

quënanpatama', anoyatoco'. A'napitanta' sopairo'sari ya'coancantopi ni'ton, pa'pi hua'yantopi. Quënanpatama', sopairo'sa' a'patoco' piyapi'sa' noyachina'. Co manta' pahuëretapomarahüë', Yosëso' inaora nohuanton, catahuarinquëma' ni'ton, ama pahuëre nitocosohüë'.

<sup>9</sup> A'chinacamaso marë' pa'patama', ama manta' coriqui quëpacosohüë'. <sup>10</sup> Ama pë'pëto, pitana, sapatë', inapita quëpacosohüë'. Ama a'moramaso tëranta' cato' quëpacosohüë'. 'Asacatohuatëra, a'cacaso' ya'huërin,' topi. Napoaton a'chintohuatama', a'caarinëinquëma', catahuaarinëinquëma' ama ma'sha pahuantinquëmaso marëhuë'.

<sup>11</sup> Nisha nisha ninanoquë a'chintoco'. Ninanoquë canconpatama', insosona noya natanpachinquëma', ina pëinëinquë yacapaco'. Inaquë yacapatohuatama', inaquësáchin ya'huëco'. <sup>12</sup> Pëinënaquë ya'conpatama', 'Yosë catahuainquëma', itoco'. <sup>13</sup> Noya nohuantohuachinëinquëmaso', Yosëri catahuarin. Nipirinhüë', co noyahuë' nontohuachinëinquëmaso', co Yosëri catahuarinhüë'. <sup>14</sup> Insëquësona pa'patama', 'Ama isëquë huëcosohüë'. Co yanatanainquëmahuë', itohuachinëinquëma', patoco'. Yapa'patama', pënëco'. 'Nani sha'huitopiranquëmahuë'. Co nohuantëramahuë' ni'ton, canpitaora tëhuënëmaquë nina'intarama', itoco'. Ina quëran a'na parti paco huachi. <sup>15</sup> Tëhuënchachin itëranquëma'. Ayaro' tahuëri nanihuachin, inapitaso' chiniquën parisitapi. Iráca Sotomaro'sa', Comoraro'sa', inapita pa'pi co noyahuë' cancantopi ni'ton, Yosëri chiniquën ana'intërin. Co natërincosopitasohüë' nipirinhüë', chini chiniquën ana'intarin huachi,' itërin Quisosori.

### *Aparisitacaiso' ninorinso'*

<sup>16</sup> Ina quëran itaantarin:

"Ni'co' iyaro'sa'. Ohuicaro'sa' co nanitopihuë' nia'paicaiso'. A'naroáchin huëntonën ni'niro'sari mapi. A'chintohuatama', a'naquën piyapi'sa' ni'niro'sa' pochin cancantona', no'huiarinëinquëma'. Napoaton noya yonquico'. No'huipirinëinquëmaonta', ama no'huicosohüë'. Noya cancantatoma', sanoanan quëran nontoco'. <sup>17</sup> Ni'cona iyaro'sa', piyapi'sa' a'naroáchin ano'huitotama'. A'naquën no'huitënëinquëma', masarinëinquëma'. Mapachinëinquëma', coisëquë quëpaarinëinquëma'. Niyontonpiso pëiro'saquënta' huihuiarinëinquëma'. <sup>18</sup> Imaramacoso marë' hua'ano'sa' ya'huërinquë sha'huirapiarinëinquëma'. Copirnorosaquënta' quëpaarinëinquëma'. Ca nohuanto, inaquë quëpaarinëinquëma' nanamëhuë sha'huitacamaso marë'. Inaquë nisha piyapiro'santa' a'chintarama'. <sup>19</sup> Inaquëpita quëpahuachinëinquëma', ama pa'yancosohüë'. '¿Ma'cha tonopoya?' ama tocosohüë'. Naporo' Yosë anitotarinquëma' no'tëquën a'panitacamaso marë'. <sup>20</sup> Co canpitaora yonquinëma quëran nonsaramahuë'. Ispirito Santo ayonquiarinquëma' noya nonacamaso marë'.

<sup>21</sup> A'naquën imasarinaco. A'naquënso nipirinhüë' co nohuantarinacohüë' ni'ton, quëmopinënpita capini nino'huiapi. A'naquën iin chachin niponahuë', sha'huirapiarin tëpacaiso marë'. A'naquëonta' hui'nin niponahuë', imapachinco, pa'pini chachin sha'huirapiarin. A'naquëonta' a'shin chachin, pa'pin chachin niponahuë', imapachinaco, hui'ninpitari sha'huirapiapi. <sup>22</sup> Imaramaco ni'ton, na'a piyapi'sa' no'huiarinëinquëma'. Nipirinhüë', co a'pohuatamacohüë', nicha'ësarinquëma huachi. <sup>23</sup> Aparisitohuachinëinquëma', a'na ninanoquë paantaco'. Inaquënta' a'chiantaco'. Na'a ninanoro'sa' Cotia parti ya'huërin. Co ya'ipi ninanoro'saquë pa'shatërasëinquëmahuë', canta' o'mantararahüë. Yosë quëran quëmapico ni'to, a'na tahuëri o'mantarahuë Yosë hua'anëntërinso' acocahuaso marë'.

<sup>24</sup> Ni'co'. Patron ya'huëhuachina, co piyapinënpitaso' chini chiniquën nanantërinhuë'. Canta' canpita maistrone'maco ni'ton, chini chiniquën nanantërahuë. <sup>25</sup> Napoaton no'huihuachinëinquëma', co ina marë' sëtacaso' ya'huërinhuë'. Nani no'huirinaco canta'. 'Sopainquën,' itërinaco ni'ton, canpitanta ina pochachin nontarinëinquëma', itërin Quisosori.



*Yosë të'huatacaso' ya'huërinso'*  
(Lucas 12.2-9)

<sup>26</sup>Ina quëran itantarin:

“Piyapi'sa' no'huipirinënquëmahuë', ama iyaro'sa' të'huatocosohuë'. Iporaso' ma'sha noyá po'opinan pochin ni'ton, co insonta' nitotërinhuë'. A'na tahuëriso nipirinhuë' ya'ipiya nitotapi. <sup>27</sup>Iporaso' co ya'ipi piyapi'sa' a'chintarahuë'. Carayanquëma tëranta' canpitaora quëparahuatënquëma', na'con a'chintaranquëma'. A'na tahuëriso nipirinhuë' ya'ipi piyapi a'ninquëchin sha'huitoco' nitochina'. <sup>28</sup>Ama piyapi'sa' të'huatocosohuë'. Tëpapurinënquëmaonta', co hua'yanëma' matarinënquëmahuë'. Yosë tëhuënchinsó' të'huatacaso' ya'huërin, ténahuë. Ina nohuanton, chiminë'. Co noyahuë' nipachina', pënquë chachin a'paarin huachi. Inatohua' hua'yanënarë chachin parisitomiatapi huachi. Napoaton Yosë na'con na'con të'huatacaso' ya'huërin. Co piyapi'sa' të'huatacaso' ya'huërinhuë'.

<sup>29</sup>Yosëso' a'pairinquëma'. Ni'co'. Inairaro'sa' co pa'tonhuë'. Cato nipirinhuë', a'na soroíchín pa'tërin. Napoaponahuë', co a'naya tëranta' Yosëri naniantërinhuë'. Co ina nohuantohuachinhuë', co chimininhuë'. <sup>30-31</sup>Canpoaso nipirinhuë' na'con na'con a'pairinpoa'. Ya'ipinpoa' a'naya a'nayanpoa' yonquirinpoa'. Ainënpoa' hua'huayátërahüë nipirinhuë', ya'ipiya pichirin. Napoaton ama të'huacosohuë'. Ni'sárinpoa'.

<sup>32</sup>‘Quisoso imarahuë', topatama', ayaro' tahuëri carinquëmanta' nohuantaranquëma'. ‘Imarinaco mini,’ itarahuë Tata Yosë. <sup>33</sup>Nipirinhuë', ‘a'porahuë huachi,’ topatamaso', carinquëmanta' a'poaranquëma'. ‘Co imarinacohuë', itarahuë Tata Yosë,” ténin Quisoso.

*Nisha nisha Quisoso yonquirapipiso'*  
(Lucas 12.51-53; 14.26-27)

<sup>34</sup>Ina quëran pënëantarin:

“ ‘Cristo o'mahuachin, ya'ipiya nohuantatona', noya ya'huapi,' topiramahuë', co ya'ipiya nohuantarinacohuë' ni'ton, nino'huiapi. <sup>35</sup>Ipora quëran huarë' a'na pëiquë ya'huëpisopita nisha nisha yonquiapi. A'na pëiquë pa'pin nohuantarin. Hui'ninso nipirinhuë' co nohuantarinhuë'. A'na pëiquënta' hui'nin nohuantarin. Pa'pinso nipirinhuë' co nohuantarinhuë'. Sanapi'santa' nisha nisha yonquiapi. A'shin co nohuantarinhuë'. Hua'huinso nipirinhuë' nohuantarin. A'shatën nohuantapirinhuë', notainso' co nohuantarinhuë'. Napoapona'. <sup>36</sup>Imaramacoso marë' quëmopinëma chachin no'huiarinënquëma'. Co nishahuë' niponaraihuë', inimiconën pochin ni'sarinënquëma'.

<sup>37</sup>Yaimapatamaco, ca na'con na'con nosoroco. Tatama', mamama', hui'nama' inapita co onpopinchin nosorocaso' ya'huërinhuë'. Co na'con na'con nosorohuatamacohuë', co tëhuënchachin imaramacohuë' ténahuë. <sup>38</sup>Imapatamaco, a'napita aparisitarinënquëma'. Yatëpapurinënquëmaonta', imamiatoco. Corosëquë chiníquën parisitëre'. Inapochachin canpitanta' imapatamaco, aparisitarinënquëma'. Co ahuantohuatamacohuë', co tëhuënchachin imaramacohuë'. <sup>39</sup>Noya nanpicamasoáchin yonquihuatama', topinan quëran nanpiarama'. Chiminpatama', parisitomiatarama'. Nipirinhuë', imaramacoso marë' aparisitohuachinënquëma', noya cancantoco'. Tëpapurinënquëmaonta', noya noya nanpimiatontarama',” itërin.

*Yosëri acanarinso'*  
(Marcos 9.41)

<sup>40</sup>Ina quëran pënëantarin: “Insosona noya natanpachinquëma', noya natanarinaco canta'. Yosë a'paimarinco ni'ton, Yosë nanamën chachin imasapi huachi.

<sup>41</sup>A'chinamaso marë' Yosë noya ni'sarinquëma'. Inápaquë acanaarinquëma'. A'naquën natanpachinënquëma', ‘Yosë nanamën chachin a'chintarinpoa', ta'tona', noya natanarinënquëma'. Ina marë' inapitanta' inápaquë canarapi. Tëhuënchachin noya piyapi'sa' catahuacaso' ya'huërin. ‘Yosë imarin ni'ton, noya quëmapi inaso',

ta'toma', catahuaco'. Ina marè' Yosè acanaarinquëma'. <sup>42</sup> Inso tëranta' imarincoso co chiníquën nanantopirinhuë', inanta' nosorocaso' ya'huërin. Imarincoso marè' i'sha tëranta' o'shitohuatama', inápaquë Yosè acanaarinquëma'. Tëhuëenchachin noya i'huëretarinquëma'," itërin Quisosori.

## 11

### *Coansha Paotistari piyapi a'parinso'* (Lucas 7.18-35)

<sup>1</sup> Nani ca'tano'sanënpita sha'huitahuaton, a'chinacaso marè' pa'nin huachi. Nisha nisha ninanoquë pa'sahuaton, a'china'piarin. Pënëna'piarin.

<sup>2</sup> Coansha Paotistaso nipirinhuë', naporò' tashinan pëiquë ya'huárin. Inaquë ya'ipi Quisoso naporinso' natantërin. Ina natantaton, cato' imarinsopita a'parin Quisoso natanacaiso marè'. <sup>3</sup> Canconpachinara, Quisoso natanatona':

—Coansha Paotista a'parincoi ni'ton, natana'huainquënso marè' huë'nai. I'huá chachin inaso', na'con sha'huitërincoi. “A'na tahuëri Cristo o'mararin, Yosëri a'paimarinso',” itërincoi. ¿Quëmaso' inanquën nimara, ti? ¿Pahuanarin o'macaso' nica? Co nitotatoihuë', natanapoinquën huë'nai. Sha'huitocoi quiyanta' Coansha sha'huitoanta'ii, itopi.

<sup>4-5</sup> Napotohuachinara, Quisosori itërin:

—Nani ma'sha ni'nama', natanama'. Somaraya nininsopita huë'pachinara, ca nohuanto, ni'topi. Apiaro'santa' a'naroáchin anoyatërahuë. Noya iratopi ni'nama'. A'naquëonta' chana caniori maninsopita anoyatërahuë. Në'huëro'santa' ca nohuanto, noya natantopi. Chiminpisopitanta' ananpitaantarahuë. Notohuaro' piyapi'sa' co Yosë nohuitatonaraihuë', nosorotápirinahuë', iporaso huachi noya nanan a'chintarahuë natanama'. Paatoma', ya'ipiya Coansha sha'huitonco' no'tëquën nitochin. <sup>6</sup> Insosona ya'ipi cancanëna quëran natëmiatohuachinaco, nóya cancantapi, itërin Quisosori.

<sup>7</sup> Ina natanahuatona', Coansha sha'huitapona' pa'pi. Nani pa'pachinara, Quisosori piyapi'sa' a'chintantarin.

—Natanco iyaro'sa' Coansha yonquiato a'chinchinquëma'. I'hua inotëro parti ina nicapoma' pa'patamara, inaso Yosè marè chiníquën huanirin quënanconama'. Co piquira ihuani onororinso pochin niconinhuë'. <sup>8</sup> Co inaso ma'huano'sa' pochin noyápiachin a'morinhuë'. Noyápiachin a'mopisopitaso', copirnoros'a' pëinënaquë ya'huëpi. Coanshaso nipirinhuë', co nani ma'sha ya'huëtërinhuë'. <sup>9</sup> Pënëntërinso' natanacamaso marè' pa'nama', ténahuë. Coansha tëhuëenchachin nóya pënëntërin. Co topinan quëran pënëntërinhuë'. Yosëri chachin a'parin pënëntacaso marè'. <sup>10</sup> Iráca quiricanënuquë ninoton Yosëri hui'nin sha'huitërin.

“Co'huara pa'shamátërasënuquënhuë', comisionëhuë'ton a'pararahuë piyapi'sa' ayonquicaso marè',” itërin.

Coansha ninoton, naporin.

<sup>11</sup> “Iráca quëran huarè' na'a piyapi'sa' pënëntopirinahuë', Coansha Paotistaso' noya noya pënëntërin. Pënëntërinso' noya, nipirinhuë', inso tëranta' imapachinaco, noya noya nisarín. Yosè hua'anëntërinquë chachin ya'conarin huachi, ténahuë.

<sup>12</sup> Coansha pënëntërin quëran huarè' na'a piyapi'sa' huë'sapi natanacaiso marè'. A'naquënso nipirinhuë' co nohuantopihuë' Yosè hua'anëntërinquë ya'conacaiso'. Co nohuantatonaraihuë', nohuantopisopita aparisitopi. Chiníquën cancantopisopitaso nipirinhuë', onpopionta' ya'conapi. <sup>13</sup> Iráca quëran huarè' Moisésë, pënëntona'piro'sa', inapita ninopi. ‘Yosè yahua'anëntërinpoa'. A'na tahuëri ina marè' acorinso' a'paimararin,’ topi. Coanshanta' ninotona', ninshitopi: ‘Co'huara Siniro tahuërinën naniyatërasohuë', Iniasë huëantarín pënëntacaso marè’, topi. <sup>14</sup> Napopiso chachin Coansha pënëntarin

huachi. Iniasë pochin cancantaton, pënëntarin, ténahuë. Nohuantohuatama', natëco'.  
<sup>15</sup> Huëratëhuanpatama', noya natanatomaco, yonquico'.

<sup>16</sup> Iporaso' piyapi'sa' nisha nisha yonquipi. Hua'huaro'sa pochin cancantopi. Hua'huaro'sa' cachiquë ya'nipihuachinara, a'naquën taponá: 'Huëco' pita pochin ni'tëhua', ya'nipiahua', ta'tona', <sup>17</sup> quinatapirinahuë', co a'napita nohuantopihuë' nansacaiso'. Ina quëran co nohuantohuachinarahuë', tantapona': 'Inta nipachin, huëco' chimipi pa'pitopiso pochin ni'tëhua', ya'nipiahua', nitantapi. Na'nëpirinahuë', co a'napita nohuantopihuë' na'nëcaiso'. Inapochachin canpitanta' ipora nisha nisha yonquirama'. <sup>18</sup> Coansa Paotistaso' pënëntapon, co aquëtë' cosharo' yonquirinhuë'. Co noya coshatërinhuë'. Co pi'pian tëranta' huino o'orinhuë'. Napopirinhuë': 'Inaso' Sopairi ahua'yantërin ni'ton naporin,' tënama'. <sup>19</sup> Caso nipirinhuë', Yosë quëran quëmapico niporahuë' coshatërahuë', o'orahuë. Ina marë' pinoramaco canta'. 'Quisoso coshatárin, o'opatárin. Oshahuano'sarë' nipayarin. Copirno marë' coriqui ma'patona'piro'sarënta' nipayarin,' toconama'. Nisha nisha yonquiconama'. A'naquënso nipirinhuë' noya yonquiatona', Yosë natëapi huachi. No'tëquën pënënahué ni'ton, no'tëquën yonquiapi huachi," ténin Quisoso.

*Nisha nisha ninanoquë ya'huëpisopita pënëninso'*  
*(Lucas 10.13-15)*

<sup>20</sup> Nisha nisha ninanoro'saquë nani pënëntërin. Inaquë na'a cania'piro'sa' a'naroáchin anoyatërin. Ya'huëhuano'saso' nicaponaraihuë', inachachin inachachin yonquiantapi. Co oshanëna' yaa'popihuë'. Napoaton chiníquën pënënin. <sup>21</sup> Corasinoquë ya'huëpisopita, Pitsaitaquë ya'huëpisopita, inapita yonquiaton, itapon:

"¡Ma'huántacha canpitaso' nisarama paya! Na'con pënënpiranquëmahuë', co natëramacohuë'. Ina marë' parisitarama'. Na'con nitotopiramahuë', co yaimaramacohuë'. Tiroquë, Sitonquë, inaquëpitaso nipirinhuë' co pënëntërahuë'. Co inaquë cania'piro'sa' a'naroáchin anoyatërahuë'. Inaquë naporahuë naporini, oshanëna marë' sëchitonahuë'. Sa'catën nininso a'motona', huarianoquë nipashimotochitonahuë'. Co noyahuë' yonquipisopitanta', nianchitonahuë'. <sup>22</sup> Napoaton ayaro' tahuëri nanihuachin, canpitaso' Yosë chini chiníquën ana'intarinquëma'. Inapitaso' co onpopinchin ana'intarinhue'. <sup>23</sup> Capinaomoquë ya'huëramasopitanta' co no'tëquën yonquiramahuë'. 'Noyacoi ni'toi, Yosë'pa' pa'sarai,' ¿topiramahuë' ti? Co ina marë' inatohua' pa'saramahuë'. Parisitopiquë pa'miatarama huachi. Hua'qui' a'chintëranquëma'. Na'a cania'piro'sa' a'naroáchin anoyatërahuë. Nani nicapomarahue', co yaimaramacohuë'. Sotomaquë naporahuë naporini, inapitaso natëitonacohuë'. Co oshanëna marë' Yosëri ata'huanchitonahuë'. Ipora huanta' ya'hua'itonahuë'. <sup>24</sup> Ayaro' tahuëri nanihuachin, canpitaso' chini chiníquën ana'intarinquëma'. Sotomaro'saso nipirinhuë', co onpopinchin ana'intarinhue', ténahuë," itërin Quisosori.

*Quisoso asanocancaninpoaso'*  
*(Lucas 10.21-22)*

<sup>25</sup> Naporo' noya cancantaton, Yosë nontërin:

"¡Ma noyacha Tata yonquiran paya! Quëmaso' chini chiníquën nanantëran. Inápaquë ya'huërinso'pita, isoro'paquë ya'huërinso'pita, ya'ipiya hua'anëntëran. A'naquën Tata nani ma'sha nitotaponaraihuë': 'Quiyaora noya noya nitotarai,' topiso marë', co nanamën anitotëranhuë'. Imarinacosopitaso nipirinhuë', co onpopinchin nitotaponaraihuë': 'Catahuaco Sinioro co caora nanitërahuë', topachinara, quëma nanamën chachin anitotëran. Ina marë: 'Yosparinquën,' itëranquën. <sup>26</sup> Quëmaora nohuanton Tata naporan," itërin.

<sup>27</sup> Ina quëran piyapi'sa' a'chintantarin.

"Tata Yosë nohuanton, pënëntarahuë. Ya'ipi nanamën anitotërinco piyapi'sa' a'chintaca'huaso marë'. Hui'ninco ni'ton, inasáchin noya nohuitërinco. Inapochachin

Tata Yosë nohuitërahuë. Casáchin noya nohuitërahuë. A'naquëonta' cari anohuito huato, nohuitapi anta'. <sup>28</sup> Huëco' casáchin imaco catahuainquëma'. Isoro'paquë ma'sha onporama' ni'ton, sëtarama'. Naporahuaton, nisha nisha yanatëpiramahuë', co canpitaora nanitëramahuë' noya cancantacamaso'. Pë'pëto quëquën quëparamaso pochin ninatanama ni'ton, napion cancantërama'. Napoaton huëco' catahuainquëma' sano cancantacamaso marë'. <sup>29</sup> Co carinquëma' nocananquëmahuë'. Sanoanan quëran pënënanquëma'. Casáchin natanco a'chinchinquëma'. Nani tahuëri catahuanquëma' noya cancantacamaso marë'. Ina pochin imapatamaco, sano cancantarama huachi. <sup>30</sup> Ma'sona nicacaso sha'huitohuatëinquëma', catahuanquëma' noya nicacamaso'. Catahuanquëma' ni'ton, co sacaihuë' imasaramaco huachi," itërin Quisosori.

## 12

### *Chinoto tahuëri naporinso'*

*(Marcos 2.23-28; Lucas 6.1-5)*

<sup>1</sup> A'na chinoto tahuëri nanihuachina, Quisoso ca'tano'sanënpitarë' pa'sapi. Tricoro' pëntontapi. Ca'tano'sanënpita tanatona', papona pochin a'naya a'naya trico moto maraapi. I'shorayarahuatona', ca'pi. <sup>2</sup> Ina ni'sahuatona parisioro'saso':

—iNi'quë' Maestro! Chinoto tahuëri nipirinhüë', ca'tano'sanënpita tricoraya i'shorayapi, co ipora tahuëri pi'pisha tëranta' sacatacaso ya'huërinhuë'. Co Moisésë pënëntërinso' natëpihuë', itopi.

<sup>3</sup> Napotohuachinara, itërin:

—Yosë quiricanën ¿co nontëramahuë' ti? Iráca Tapi tanahuachina, <sup>4</sup> Yosë pëinëncuë ya'conin. Inaquë ya'conahuaton, pan Yosë marë' acopiso' ca'nin. Ca'taninsopitanta' tanatona', ca'pi. Corto hua'ano'saráchin ina pan capacaiso nipirinhüë', Tapi ca'nin. Ca'pirinhüë', co ina marë' Yosëri ana'intërinhuë'. <sup>5</sup> Isonta' yonquico'. Nani chinoto tahuëri corto hua'ano'sa' Yosë pëinëncuë sacatopi. Piyapi'sa' oshanëna marë' ohuicaro'sa' tëpapi. Sacatopirinhüë', co ina marë' oshahuanpihuë'. ¿Co inanta' nontëramahuë' ti? <sup>6</sup> Yosë pëinën noya nipirinhüë', caso' chini chiniquën nanantato, noya noya a'chintaranquëma'. <sup>7</sup> Yosë chachin naporin: “Piyapi'sa' nosorocamaso' na'con na'con nohuantërahuë. Ma'sha oshanëma marë' tëparahuatoma ya'ipi ahuiquitamaso', co onpopinchin nohuantërahuë,” tënin quiricanëncuë. Nontopiramahuë', co natantochináchinhüë' cancantërama'. No'tëquën yonquirama' naporini, co topinan quëran sha'huirapiitomahuë'. <sup>8</sup> Yosë quëran quëmapico ni'to, chiniquën nanantërahuë. Chinoto tahuëri ma'sona noya nicacaso' sha'huichinquëma'. Co nicacaso huë nininsonta' sha'huichinquëma', itërin.

### *Imirin tachitërinso'*

*(Marcos 3.1-6; Lucas 6.6-11)*

<sup>9</sup> Ina quëran paantarahuaton, niyontonpiso pëiquë ya'conconin. <sup>10</sup> Inaquë a'na quëmapico quënanconin. A'na imirin tachitërin ni'ton, co pi'pisha tëranta' nanitërinhuë' së'quëtacaso'. “Ipora tahuëri co cania'piro'sa' anoyatacaso ya'huërinhuë',” ta'tona', parisioro'sari ni'sapi. Quisoso yasha'huirapitona', itapona':

—Chinoto tahuëri nipirinhüë', ¿noya cania'piro'sa' anoyatacaso' ti? itopi.

<sup>11</sup> —Ni'cochi iyaro'sa', ohuicaro'sa' pë'tahuahuatamara, a'naya tëranta' panca nanincatëquë anotohuachina, ocoirama'. Chinoto tahuëri nipirinhüë', masahuatoma', ocoirama'. <sup>12</sup> Piyapi'saso nipirinhüë' noya noya ni'ton, na'con na'con nosorocaso' ya'huërin. Napoaton chinoto tahuërinta' piyapi'sa' catahuacaso' ya'huërin, itërin.

<sup>13</sup> Napotahuaton, apia nontërin.

—Imiran iyasha ihuëquë', itërin. Natëton ihuëpachina, a'naroáchin noyatërin. A'na imirin pochachin niantarin. <sup>14</sup> Ina nicatona parisioro'saso' pipipi. Pipirahuatona', Quisoso tëpacaiso marë' yonquipi huachi.

*Iráca ninorinso'*

<sup>15</sup> Ina nitotaton, Quisoso a'na parti pa'nin. Na'a piyapi'sari imasarin. Cania'piro'sa' huë'pachinara, ya'ipiya anoyatërin.

<sup>16</sup> —Ama a'napita sha'huitocosohuë', itërin. <sup>17</sup> Iráca Quisoso ninoton, Isaiasë ninshitërin. Yosë yonquirinso chachin ninshitaton, naporin:

<sup>18</sup> “Iso quëmapi nani acorahuë nisha nisha piyapi'sa' nicha'ëcaso marë'. Noya natëarinco. Na'con nosoroato, nóya ni'nahuë.

Ispiritonëhuë chachin aya'coancantarahuë.

Nisha piyapiro'santa' no'tëquën a'chintahuaton, anoyacancantarin.

<sup>19</sup> Co no'huiarinhuë'. Co chiniquën nonsarinhuë'.

Co cachiquë paaton, piyapi'sa' ano'huitarinhuë'.

<sup>20</sup> A'naquën piquira yanopantërinso pochin nicatona', co huachi chiniquën cancantopi-huë'. Inapitaso' achinicananarin.

Nanparin yatacopirinso pochin cancantatona', pi'pianchin Yosë shia'popi. Co inapitanta' no'huiarinhuë'.

No'tëquën a'chintahuaton, na'a piyapi'sa' anoyacancantarin. Inapotaton, sopai minsëarin huachi.

<sup>21</sup> Nisha nisha piyapi'sari natanahuatona': ‘Inasáchin nicha'ësarinpóa', tosapi huachi,’ ténin Yosë quiricanënguë.

Iráca Isaiasë ninorinso chachin nanirin ni'ton, Quisosori sanoanan quëran piyapi'sa' pënënarin.

*Sopai hua'an minsërinso'*

(*Marcos 3.20-30; Lucas 11.14-23; 12.10*)

<sup>22</sup> Ina quëran a'na quëmapi quëpi Quisosori anoyatacaso marë'. Sopairi ya'coancantërin ni'ton, co nanitërinhuë' nonacaso'. Co quënantacaso tëranta' nanitërinhuë'. Sopai a'parahuaton, a'naroáchin anoyatërin. Noya ni'tërin. Nonacasonta' nanitërin huachi. <sup>23</sup> Ina ni'sahuatona', piyapi'sa' pa'yanpi. “¡Ma'pitacha nanitaparín paya! Isoso' Tapico' shiin, ¿Yosëri a'paimarinso' nimara ti?” nitopi.

<sup>24</sup> Parisioro'sariso nipirinhüë', co natëpihuë': “Sopairo'sa' hua'an Piirsipo\* itopisoari catahuarin ni'ton, nanitaparín sopairo'sa' a'pacaso'. Co inari catahuarinhüë' naporini, co nanichitonhuë',” topi.

<sup>25</sup> Topinan yonquirapirinhüë', inaora yonquinën quëran Quisosori nitotaton, itërin: “Ni'co'. Ninanoquë ya'huëpisopita nino'huipi naporini, yanquë'itonahuë'. Co huachi inaquë ya'huë'itonahuë'. Huëntonënguë ya'huëpisopitanta' nino'huipi naporini, inapitanta' yanquë'itonahuë'. <sup>26</sup> Inapochachin Satanasë sopairo'sarë' nino'huipi naporini, co huachi hua'an niitonhuë', co huachi piyapi'sa' hua'anëntacaso' nanichitonhuë'. <sup>27</sup> ‘Piirsipo catahuarinquën,’ itopiramacohüë', co no'tëquën yonquiramahüë'. Co ina catahuarincohüë'. A'naquën a'chintëramasoarinta' sopairo'sa' yaa'papi. Satanasë catahuarinco ni'quëhuarë', inapitanta' inari catahuarin. Inapita natanco' macariso' catahuarinso' sha'huichinquëma'. <sup>28</sup> Caso nipirinhüë', Ispirito Santo catahuarinco sopairo'sa' a'paca'huaso'. Napoaton Yosë chachin a'paimarinco hua'anënta'huanquëmaso marë', ténahuë.

<sup>29</sup> Quëmapi chiniquën nipachina, pëinën noya a'pairin. Co insonta ya'conaton ma'shanën mataponhuë'. A'naso nipirinhüë' ina quëran chini chiniquën ni'ton, huëcapairahuaton minsëquirin. Tonporahuaton, ma'shanënpita quiquitërin.

<sup>30</sup> Co imapatamacohüë', inimicotaramaco. Co catahuahuatamacohüë', sopai natëarama huachi. Piyapi'sa' anishacancantarama' ama Yosë imacaiso marëhuë'.

<sup>31</sup> Napoaton itaranquëma': Co noyahuë' nipatama', oshahuanarama'. Pinótohuatamanta oshahuanarama'. Oshanëma marë' sëtohuatama', Yosë oshanëma'

\* **12:24** Piirsiposo': Satanasë tapon naporin.



inquitaringuëma'. Ya'ipi co noyahuë' ninamasopita inquitaringuëma'. Ispirito Santoíchin pinotoma' oshahuanpatama' tēhuēnchinso', co inquitaringuëmahuë'. <sup>32</sup> Caso' Yosë quëran quëmapico nipirahuë pinopatamaco, ina marë' oshahuanpiramahuë', oshanëma marë' sētohuatama', inquitaringuëma'. Nipirinhue', Ispirito Santo pinopatama', co oshanëma' inquitaringuëmahuë'. Co onporonta' inquitaringuëmahuë', itërin Quisosori.

*Nara pochin nininso'*

*(Lucas 6.43-45)*

<sup>33</sup> Ina quëran itaantarín: “ ‘Nara noya nipachina, noya nitërin. Co noya nito-huachinahuë', napoonin,' topi. Nitërin quëran nara nohuitëre'. Inapochachin piyap-ipoanta' ninëhua'. Noya yonquihuatëhua', no'tëquën nonaríhua'. <sup>34</sup> Canpitaso nipir-ínhuë', ya'huan pochin cancantatoma' yanonpinama'. Co noyahuë' yonquiatoma', co nanitëramahuë' noya nonacamaso'. Onpopinsona cancantëramaso', nonama quëran piyapi'sa anitotarama'. <sup>35</sup> Noya cancantohuatëhua', noyasáchin nonaríhua'. Co noy-ahuë' cancantohuatëhua', co noyahuë' nonaríhua'. <sup>36-37</sup> Noya cancantohuatama', noya nonsarama'. Ayaro' tahuëri Yosë noya ni'saringuëma'. Co noyahuë' cancantohu-atama', co noyahuë' nonsarama'. Ina marë' ayaro' tahuëri ana'intaringuëma'. Ayaro' tahuëri nanihuachin, Yosë nontaringuëma'. Ya'ipi nonamasopitanta' aipitaringuëma'. A'naquëma' co noyahuë' nonpatama', ‘Co yonquiatohuë', naporahuë', itopiramahuë', ina marënta' ana'intaringuëma', tēnahuë. Co noyahuë' cancantohuatama', no'tëquën ana'intaringuëma huachi,” itërin Quisosori.

*Yosë pochin nicacaso' nohuantopiso'*

*(Marcos 8.12; Lucas 11.29-32)*

<sup>38</sup> Ina quëran parisoro'sa', cotio maistro'sa', inapita huë'pachinara, Quisoso nontiipi: –Yosë pochin niquë' ni'ínquën. Ina ni'patoí, natëarainquën, itiipi.  
<sup>39</sup> –Canpitaso' co noyahuë' cancantërama'. Co pi'pisha tëranta' Yosë yanatëramahuë'. “Yosë pochin niquë' ni'ínquën,” itopiramacohuë', co Yosë nohuantërinhuë'. Isoíchin anitotaringuëma'. A'na tahuëri Conasë pochin nisarahuë. <sup>40</sup> Iráca Conasë marëquë tē'yaitohuachinara, panca sami pochin nininsoari mi'tërin. Cara tahuëri tashirë chachin inaquë ya'huapirinhue'. Ina quëran Yosë nohuanton, cha'ërin. Inapochachin canta' Yosë quëran quëmapico ni'to, chiminpato, cara tahuëri tashirë chachin acoporo' ya'huaporahuë', cha'ësarahuë huachi. <sup>41</sup> Conasë cha'ërahua-ton, Ninihuiquë pa'nin. In-aquë pënëntohuachina, co noyahuë' yonquipisopita naniantopi. Napoaton ayaro' tahuëri inapita nontarinënguëma'. “¿Onpoatomata' co canpitaso' natëramahuë'?” itaponënguëma'. Caso' chiníquën nanantato, noya noya pënënpiranquëmahuë', co yanatëramacohuë'. Napoaton ayaro' tahuëri Yosë na'con ana'intaringuëma'. <sup>42</sup> Inapochachin iráca Saromon hua'anëntapon, copirno sanapi nininso' sor parti quëran huë'nin ina nontacaso marë'. “Ya'ipi nitotërin,” ta'ton, huë'nin natanapon. Napoaton ayaro' tahuëri ina atapanaringuëma'. Saromon quëran caso' na'con na'con nitotato, noya noya a'chintopiranquëmahuë', co yanatëramacohuë' ni'ton, Yosë chiníquën ana'intaringuëma', itërin Quisosori.

*Sopairi ya'coancantantarínso'*

*(Lucas 11.24-26)*

<sup>43</sup> Ina quëran Quisosori a'chintaantarín. “A'na quëmapi sopairi ya'coancantopirinhue', ina quëran pipirín. Pipihuachina, inotëro' parti pa'sárin. Insëquësona ya'huëcaso marë' yonisapirinhue', co quënaninhue'. <sup>44</sup> Napoaton ina quëmapiquë chachin huëantarín. Inaso' co Yosë yonquiatonhuë', topinan ya'huárin quënanquiantarín. Noya ya'huëantachinachin ni'ton, sopairi yaya'coancantantarín. <sup>45</sup> Napoaton paantarahuaton, canchisë sopairo'sa' maantarín. Aquë aquëtë' co noyahuë' nipisopita maantarín. Posa

sopairo'sari chachin quëmapi ya'coancantantapi. Napoaton aquë aquëtë' co noyahuë' yonquirin huachi. Inapochachin ipora na'a piyapi'sa' sopai natëtona', co noyahuë' cancantopi. Ina quëran: 'Co huachi sopai natëarahuë', taponaraihuë', co Yosë yonquiatonahuë', oshaquëran aquë aquëtë' co noyahuë' cancantaantapi huachi," itërin Quisosori.

*Quisoso quëmopinënpita pochin nininsopita  
(Marcos 3.31-35; Lucas 8.19-21)*

<sup>46</sup> Piyapi'sa' nontaso', a'shin, iinpita, inapita huë'pi. Quisoso yanontopirinahuë', na'a piyapi'sa' yamorapi ni'ton, co nanitopihuë' ya'conacaiso'. Aipiran huaniápirinahuë',  
<sup>47</sup> a'na quëmapi sha'huitërin:

—Ni'quë' Maistro. Mamaparin, iyaparinpita, inapita huëcatona', aipiran huanirapi. Yanontërinënquën, itërin, <sup>48</sup> Napotopirinhuë', Quisosoriso' itapon:

—Mamahuë, iyahuëpita, inapita pochin ni'nahuësopita sha'huichinquën nitotëquë', itahuaton, <sup>49</sup> imirin quëran tasatërin:

—Isopita imarinaco ni'ton, iyahuëpita pochin nicato, nosororahuë. <sup>50</sup> Yosë natëpisopita iyahuëpita pochin ni'nahuë. Sanapi'santa' Yosë nanamën natëhuachina', oshihuëpita pochin ni'nahuë. Payaro'santa' Yosë imapachina', mamahuë pochin ni'nahuë, itërin.

## 13

*Pa'sarayarinsó'*  
(Marcos 4.1-9; Lucas 8.4-8)

<sup>1</sup> Naporo' tahuëri pëi quëran pipirahuaton, sono' yonsanquë huënsëconin. <sup>2</sup> Inaquë notohuaro' piyapi'sa' niyontonpi natanacaiso marë'. Hua'huayatërahuë' tancapitohuachinara, potiquë ya'conahuaton, huënsëmarin. Ii' yonsánshaquë huarë' piyapi'sa' yamorapi. <sup>3</sup> Nisha nisha pënënto nanan a'chintërin. Ma pochinsona nininsopita a'chintárin ayonquicaso marë'.

A'chintaton, itapon: "A'na quëmapi sha'tapon pa'sarin. <sup>4</sup> Tricoraya iminquë pa'sarayarín papotacaso marë'. Pa'sarayahuachina, a'naquën ya'pirin iraquë huarë' pa'sarayarín. Iraquë huarë' anotërin ni'ton, inairaro'sari huëcapairahuatona', pë'yaquipi huachi. <sup>5</sup> A'naquën ya'pirin na'piroquë pa'sarayarín, pi'pian pi'pian no'pa' ya'huërinquë. Shimënsin no'pa' ni'ton, shiarahuaton, papotopirinhuë'. <sup>6</sup> Pi'iri chiníquën pi'cahuachina, yaahirin. Pi'pishara'huaya itëhuanin ni'ton, ahuirin huachi. <sup>7</sup> A'naquën ya'pirionta' nahuanoquë pa'sarayarín. Inaquë papotopirinhuë', nahuano'sarinta' papotërin. A'shinahuatona', imotërin huachi. Napoaton co nitërinhuë'. <sup>8</sup> A'naquënso nipirinhuë' noyaro'paquë pa'sarayarín. Inaquë noya papotërin. A'shinpachina, sha'nin quëran na'con na'con nitërin. A'naquën cara shonca, cara shonca nitërin. A'naquën saota shonca, saota shonca nitërin. A'naquën pasa, pasa nitërin. <sup>9</sup> Huëratëhuanpatama', noya natanatomaco, yonquico'," itërin Quisosori.

*Pënënto nananquë a'chininsó'*  
(Marcos 4.10-12; Lucas 8.9-10)

<sup>10</sup> Ina quëran ca'tano'sanënpitari ya'caritahuatona', natanpi. "¿Onpoatonta' Maistro piyapi'sa' a'chintohuatana, pënënto nanan quëran a'chintëran?" itopi.

<sup>11</sup> "Yosë hua'anëntërinso' co insonta' inaora yonquinën quëran nitotërinhuë'. Canpitaso' ya'ipiya a'chintaranquëma'. A'napitaso nipirinhuë' co ya'ipi a'chintarahuë'. Pënënto nanan quëransáchin a'chintarahuë. <sup>12</sup> Insosona noya natanpachinaco, Yosëri catahuarin noya yonquicaso marë'. Na'con na'con nitotapi. A'napitaso nipirinhuë' co yanatëhuachinacohuë', Yosëri tananpitarin ni'ton, ya'ipiya naniantapi huachi. <sup>13</sup> Napoaton inapita huë'pachinara, sacai pochin a'chintërahuë. Natanaponaraihuë', co natëapihuë'. Nicaponaraihuë', co yonquiapihuë'. <sup>14</sup> Iráca Isaiasëri ninoton, naporin:

‘Natanapomarahué’, co natëtaramahuë’.

Nicapomarahuénta’ co tëhuënchachin quënanaramahuë’.

<sup>15</sup> Isopitaso’ co natantochináchinhuë’ cancantopi.

Në’huëya pochin cancantatona’, co yanatantopihuë’.

Tanshirinso pochin cancantatona’, co yaquënantopihuë’.

Noya ni’pi naporini, quënanchitonahuë’.

Noya natanpi naporini, cancanëna quëran nataintonahuë’.

Co noyahuë’ yonquipisopita naniantatona’ imarinaco naporini, anoyacancanchitohué’, tënin Yosë iráca.

Ipora huanta’ na’a piyapi’sa’ ina pochin cancantopi.

<sup>16</sup> Canpitaso nipirinhué’, ma noya Yosë catahuarinquëma’ ni’ton noya ni’namaco. Noya natanamaco. Napoaton noya cancantarama’. <sup>17</sup> Iráca quëran huarë’ na’a pënëntona’piro’sa’, noya piyapi’sa’, inapita canpita ni’namasopita yani’pirinahuë’, co ni’pihuë’. A’chintëranquëmasopitanta’ yanatanpirinahuë’, co natanpihuë’,” itërin Quisosori.

### *Tricoraya tapon naporinso’*

*(Marcos 4.13-20; Lucas 8.11-15)*

<sup>18</sup> Ina quëran ca’tano’sanënpita a’chintaantarin. “Natanco iyaro’sa’. Sha’tona’pi sha’ninso pochin nininso’ a’chintanta’inquëma’ no’tëquën nitotacamaso marë’.

<sup>19</sup> Tricoraya pa’sarayarëso pochin Yosë nanamën ya’ipi parti a’chintëre’. ‘Yosë yahua’anëntarinquëma’, topachina, a’naquën piyapi’sa’ ira pochin nipi. Nanamën natanpirinahuë’, co yonquipihuë’. Inairaro’sari huëcapairahuatona’, pë’yaquipiso pochin a’naroáchin sopai huë’nin. Huë’sahuaton, Yosë nanamën natanpiso’ osëre’tiirin. Ananiantërin huachi. <sup>20</sup> A’naquën piyapi’saso nipirinhué’, na’piro pochin niconpi. Yosë nanamën natanahuatona’, a’naroáchin pa’yatatona’, natëpirinahuë’, <sup>21</sup> co cancanëna quëran huarë’ natëpihuë’. Co chiniquën cancantatonaraihuë’, co natëmiatopihuë’. Ma’sha onpohuachinara, a’naroáchin yaa’popi. Imapiso marë’ aparisitohuachinara, a’popi huachi. <sup>22</sup> A’naquën piyapi’santa’ nahuano’ ya’huërinso pochin niconpi. Yosë nanamën natanpachinara, yaimapirinahuë’, ma’sharáchin yonquiatona’, naniantopi. ‘Na’a coriqui, ma’sha, inapita ya’huëtohuachincoi, nóya cancantarai,’ topirinahuë’, co ina quëran noya cancantacasohué’ nipirinhué’. Napoaton nahuano’sari imotërinso pochin, ma’sharáchin yonquiatona’, Yosë nanamën naniantopi. Co imamiatopihuë’. <sup>23</sup> A’naquën piyapi’saso nipirinhué’, noyaro’pa pochin nipi. Yosë nanamën natanahuatona’, cancanëna quëran huarë’ natëpi. Cara shonca, cara shonca nitërinso pochin a’naquën noyamiáchin imapi. A’naquëonta’ saota shonca, saota shonca nitërinso pochin noya imapi. A’naquëonta’ pasa, pasa nitërinso pochin ya’ipi cancanëna quëran imatona’, noya noya imapi huachi,” itërin.

### *Pacatëro’ sha’ninso’*

<sup>24</sup> Ina quëran a’chintaantarin: “A’nanta’ iyaro’sa’, a’chintaanta’inquëma’ Yosë hua’anëntërinso’ nitotacamaso marë’. A’na patron iminpachina, noya trico sha’nin.

<sup>25</sup> Ina quëran tashihuachina, huë’ësoi’ inimico huë’nin. Huë’sahuaton, inaquë chachin pacatëro’ trico pochin ya’norinso’ sha’quirin anta’. Trico sha’ninso’ huancanaya ina huancanaya sha’quirin. Nani sha’pachina, pa’nin. Co incari tëranta’ ni’ninhuë’. <sup>26</sup> Inanta’ pichopitahuaton, tricorë’ napopianachin ya’norin. Cato chachin a’shinaponahuë’, pacatëroso’ co nitërinhuë’. Naporo huarë’ nohuitopi huachi. ‘Isoso’ co tricohuë’, pacatëro’, topi. <sup>27</sup> Ina ni’sahuatona’, piyapinëpitari sha’huitonpi. ‘Noyarayasachin asha’topiranahuë’, ¿onporahuatonta’ ina huáncana ina huancánachin pacatëro’ papotërin?’ itonpi. <sup>28</sup> ‘Inimiconëhuë naporin,’ itërin patronëhari. Napohuachina, piyapinëpitari itapona’: ‘Nohuantohuatan, paatoí hua’chi’i,

topiraihuë'; itopi. <sup>29</sup> 'Ama napotocosohuë'. Ipora hua'tohuatama', triconta' ocoiarama'. <sup>30</sup> Tananpitoco' cato chachin a'shiina'. Nani macacaso' nanihuachin, sacatoro'sa' sha'huitarahuë. Pacatëro'ton masahuatoma', tonpoco' pënuquë ahuiquitacaso marë'. Ina quëran tricosachin masahuatoma', pëinëhuëquë acotoco huachi, itarahuë,' tënin patron," itërin Quisosori.

*Mostasaraya pochin nininso'*  
(*Marcos 4.30-32; Lucas 13.18-19*)

<sup>31</sup> Ina quëran itaantarin: "Yosë hua'anëntërinso' a'chintaanta'inquëma'. Mostasaraya pochin ninin. Inaso ya'pirin pi'pira'huaya niponahuë', <sup>32</sup> iminquë sha'patëra papotohuachina, panca ta'an ninin. Nani a'shinpachina, inairaro'sa' huëcatona', inaquë pëirin," itërin. (Inapochachin caniaritapon, caraíchin piyapi Yosë imapirinahuë', a'na tahuëri notohuaro' piyapi'sa' Yosë imasapi.)

*Pan ahuëpocatërinso pochin nininso'*  
(*Lucas 13.20-21*)

<sup>33</sup> "Naquëranchin iyaro'sa' Yosë hua'anëntërinso' a'chintaanta'inquëma'. Pan ahuëpocatërinso pochin ninin anta'. A'na sanapi pan nipachina, cara shonca quiro pochin trico no'mo' manin. Masahuaton, pi'pian tëranta' pan ahuëpocatërinso' ayontohuachina, ya'ipiya së'cotaton, ahuëpocatërin huachi," itërin Quisosori.

*Ma'pochinsona nininso'*  
(*Marcos 4.33-34*)

<sup>34</sup> Notohuaro' piyapi'sa' niyontonpachinara, na'a pënënto nanan sha'huitërin. Ma'pochinsona nininsoáchin sha'huitërin. <sup>35</sup> Iráca pënëntona'piri ninoton, ninshitërin. "Piyapi'sa' a'chintahuato, ma'pochinsona nininso' a'chintarahuë. Isoro'pa' ninin quëran huarë' co piyapi'sa' nitotopirinahuë', a'chintarahuë huachi," tënin iráca ninoton. Naporinso chachin ina pochin Quisosori a'chintarin.

*Pacatëro' tapon naporinso'*

<sup>36</sup> Ina quëran piyapi'sa' patahuaton, pëiquë ya'conconin. Inaquë ca'tano'sanënpitari itapona': "Achin sacai' pochin pënënto nanan a'chintopirancoihuë'. Pacatëro' sha'piso' co nitotëraihuë'. ¿Ma'ta' tapon naporan? A'chintantacoi nitochii," itopi. <sup>37</sup> "Inta nipachin, a'chinchinquëma'. Patron asha'tërinso pochin piyapi'sa' a'chintërahuë. Yosë quëran quëmapico ni'to, nanamën a'china'huaso marë' o'marahuë. <sup>38</sup> Isoro'pa' panca imin pochin ninin. Yosë hua'anëntërinquë ya'conpisopitaso' noya ya'pirin pochin nipi. Sopai natëpisopitaso nipirinhuë', pacatëro' pochin niconpi. Co noyahuë' cancantatona', sopai natëpi. <sup>39</sup> Inimico pacatëro' sha'ninso pochin sopai chachin nohuanton, co noyahuë' nipi. Nitërinso' manëso pochachin ayaro' tahuëri naniriarin. Nanihuachin, anquëniro'sa' o'maapi piyapi'sa' macacaiso marë'. <sup>40</sup> Pacatëro' ahuiquitëresó pochin ayaro' tahuëri pënuquë ana'intacaso' ya'huërin. <sup>41</sup> Anquëniro'sa' a'pahuato, ya'ipi co noyahuë' nipisopita ayontonapi huachi. Anishacancantona'piro'santa' masapi. <sup>42</sup> Inapita masahuatona', pënuquë të'yatapi. Inaquë chiniquën parisitatona', na'nërápona'. <sup>43</sup> Yosë natëpisopitaso nipirinhuë', nóya ni'sarin. Pi'i a'pininso pochin Yosë hua'anëntërinquë ya'noapi. Huëratëhuanpatama', noya natanatomaco, yonquico'," itërin Quisosori.

*Oro pochin nininso'*

<sup>44</sup> Ina quëran itaantarin: "Isonta' a'chinchinquëma' Yosë hua'anëntërinso' nitotacamaso marë'. A'na quëmapi ya'huëpirinhuë'. A'na no'pa' pa'taton, oro pochin nininsopita quënanconin. Acoporo' ya'huëpirinhuë', quënanconin. Pa'yataton, imotantarahuaton, pa'nin huachi. Ya'ipi ma'shanënpita pa'anahuaton, coriqui canarin quëran, ina no'pa' pa'anconin huachi. 'Quënanahuëso' noya nóya,' ta'ton, ina na'con na'con nohuantërin,"

tënin. (Inapochachin Yosë hua'anëntinquëmaso' na'con na'con nohuantoco', tapon naporin.)

### *Huirina'pi pa'ton nininso'*

<sup>45</sup> Ina quëran itaantarin: “A'nanta' a'chinchinquëma' Yosë hua'anëntërinso' nitotacamaso marë'. A'na quëmapi pa'sárin huiri na'pira'huayaro'sa' pa'ton nininso' yonicaso marë'. <sup>46</sup> A'na tahuëri noya noya nininso' quënanin huachi. Na'con pa'tërin ni'ton, ya'ipi ma'shanënpita pa'anahuaton coriqui canarin quëran pa'anconin. ‘Ina na'con na'con nohuantërahuë', ta'ton, pa'anin huachi,” itërin.

### *Sami pochin nininso'*

<sup>47</sup> Ina quëran itaantarin: “A'nanta' a'chintaanta'inquëma' Yosë hua'anëntërinso' nitotacamaso marë'. Sami manëso pochin ninin. Panca riti marëquë të'yatohuatëra, notohuaro' sami manë'. Nisha nisha manë'. <sup>48</sup> Na'a sami ya'conpachina, yonsanquë oshirë'. Ina quëran sami camayoro'sa' huënsërahuatona', sami nisha nisha huayonapi. Noya sami i'mëquë po'morapi. Napoonin nininsopitaso nipirihuë', të'yatopi. <sup>49</sup> Ayaro' tahuëri inapochachin nisarín. Anquëniro'sa' o'marahuatona', ya'ipi piyapi'sa' nisha nisha huayonapi. Yosë yonquipisopita noya acoapi. A'naquënsó nipirihuë', co noyahuë' cancantopi ni'ton, <sup>50</sup> pënquë të'yatapi. Inaquë chiníquën parisitatona', na'nërápona huachi,” itërin Quisosori.

<sup>51</sup> Ina quëran ca'tano'sanënpita natanin:

—Nani a'chintëranquëmaso' ¿nitotërama' ti? itërin.

—Nani nitotërai, itopi.

<sup>52</sup> —Yosë quiricanën nani nitotarama'. Yosë hua'anëntërinso' a'chintëranquëma' ni'ton, pëi' hua'anën pochin nisarama'. Pëi' hua'anën noya nipachina, ya'ipi pëinënquë ya'huëpisopita noya nocomarin. Nani na'con a'chintëranquëma' Yosë nanamën a'chinacamaso marë'. Iráca ninshitopiso' nitotërama'. Naporahuaton, a'nanta' nashamiachin a'chintëranquëma'. Ya'ipiya nitotatoma', a'chintëra'piarama', itërin Quisosori.

### *Nasaritoquë paantarínso'*

*(Marcos 6.1-6; Lucas 4.16-30)*

<sup>53</sup> Nani a'chintohuachina, pa'nin huachi. <sup>54</sup> Ya'huërinquë chachin paantarahuaton, niyontopiso pëiquë a'chintarin. Piyapi'sa' natanahuatona', nisha nisha yonquiatona', ninontopi.

—¡Ma'pítacha nitotërin paya! ¿Macariso' a'chintomara? Piyapi'sa' a'naroáchin anoyatërin. ¿Onporahuatoncha nani ma'sha nanitaparin nicaya? <sup>55</sup> Hua'huatapon quëran huarë' nohuitërehua'. Pa'pinso' nontëcamayo. A'shinso' Maria itopi. Iinpitanta' nohuitërehua'. Santiago, Cosi, Simon, Cotasë, inapita itopi. <sup>56</sup> Oshinpitanta' isëquë ya'huarin. Co Quisoso chiníquën nanantërinhuë'. ¿Onporahuatonta' nipachin ina pochin nitotërin? nitopi.

<sup>57</sup> Co natëtonaraihuë' tëhuapi. Napohuachinara, Quisosori itërin:

—Íráca quëran huarë' napopi. “Ya'ipi piyapi'sari pënëntona'pi noya natanpi. Nínanonënquë ya'huëpisopitaso nipirihuë', co noyahuë' natanpi. Co quëmopinënpitari tëranta' yanatëpihuë',” topi iráca. No'tëquën napopi, tënin Quisoso.

<sup>58</sup> “Co Yosë quëran o'marinhuë',” ta'tona', co cancanëna quëran huarë' natëpihuë' ni'ton, co na'a piyapi'sa' a'naroáchin anoyatërinhuë'. Caraíchín cania'piro'sa' anoyatërin.

## 14

### *Coansha Paotista tēpapiso'*

*(Marcos 6.14-29; Lucas 9.7-9)*



1 Ya'ipi Quisoso naporinso' nahuinin. Cariria hua'an Irotisë itopisonta' natantërin.  
2 “Ma'pitacha nanitapaton, cania'piro'sa' a'naroáchin anoyatërin paya. Coansha Paotistaco' nanpiantarinso' tēnahuē,” itërin piyapinpita nontaton. I'huamiáchin Coansha atēpataton, naporin.

3-4 I'hua chachin Coansha narpiso', Irotisë co noyahuē' ninin. Iin sa'in osërëtatton, manin. Pinipi sa'in chachin osërëterin, Irotiasa itopiso'. Napoaton Coansha Paotistari chiníquën pēnēnin. “Yosë co nohuantërinhuē' iyaparin sa'in osërëtatton macamaso',” itërin. Napotohuachina, chiníquën no'huitaton, sontaro'sa' camairin macacaiso marë'. Masahuatona', tashinan pēiquē po'mopi.

5 Chiníquën no'huiton, yatēpapirinhue', piyapi'sa' tē'huatërin. “Yosëri chachin Coansha a'parin pēnēnpoaso marë',” ta'tona', noya ni'pi. Inapita tē'huataton, co atēpatërinhuē'.  
6 Ina quëran hua'huatërinso' tahuëri nanihuachina, pita ninin. Na'a piyapi'sa' amatërin. Naporo' Irotiasa hua'huin ya'conahuaton, ya'ipi piyapi'sa' ni'tërantapaquē nansararin. Nanon nansarinso' ni'sahuaton, hua'ani pa'yatërin: 7 “Ma'sona tëranta', apia'hua, nohuantohuaton, nico quëchinquën. Yoscoarë' quëchinquën,” itërin. 8 Itohuachina, a'shin paahuarin.

—¿Ma'ta' mama ma'pai? itoonin.

—“Coansha anishitëconotahuaton, motën quëtoco,” itëquë', itërin a'shini. Manorahuaton, hua'an ya'huërinquë paantarin.

—Coansha motën nohuantërahuë. Sēnanquë acorahuaton, apiramiáchin quëtoco, itoonin.

9 Natanahuaton, hua'an sëtërin. “Coansha noya quëmapi,” ta'ton, co huachi yonquirinhue' tēpacaso'. Co yatēpapirinhue', “Ya'ipi piyapi'sa' nataninaco, Yoscoarë' itërahuë,” ta'ton, sontaro'sa' a'parin tēpacaiso marë'. 10 Pa'sahuatona', tashinan pēiquë nishitëconotonpi. 11 Motën sēnanquë acorahuatona', nanon quëtopi. Nanonta' a'shin quëtoonin.

12 Napotohuachinara, imarinsopita natantahuatona' huë'pi. Nonën quëparahuatona', pa'pitopi. Ina quëran Quisoso sha'huitonpi.

*Cosharo' ana'atërinso'*  
(*Marcos 6.30-44; Lucas 9.10-17; Juan 6.1-14*)

13 Coansha tēpapiso' natantahuaton, Quisoso piyapi'sa' patërin. Potiquë ya'conahuaton, co piyapi ya'huërinquëhuë' pa'nin. Piyapi'sa' natantahuatona', imapi. Ira pa'tatona', inahua'ton canconpi. 14 Quisososo canconahuaton nonshipirinhue', notohuaro' piyapi'sa' quënanconin. Quënanconahuaton, na'con nosororin. Noya nontaton, ya'ipi cania'piro'sa' anoyatërin. 15 I'huararahuaso', ca'tano'sanënpitari itiipi:

—Nani i'huarin. Co manta' isëquë ya'huërinhuë'. Piyapi'sa' a'paquë' ninanoro'saquë pa'ina'. Inaquë coshoro' pa'anatona' ca'ina', itopirinhue'.

16 —Co iyaro'sa' pacacaiso' ya'huërinhuë'. Canpitari a'caco', itërin Quisosori.

17 —Capa isëquë capacaso'. A'natërapoíchin pan, catoíchin sami, inaíchin ya'huëtërincoi, itopi.

18 —Inaya tëranta' quëshico, itohuachina, quëshiiipi.

19 Ina quëran piyapi'sa' sha'huitërin pastoquë huënsëcaiso marë'. Nani huënsëhuachinara, Quisosori a'natërapoya pan, catoya sami, inapita manin. Masahuaton, inápaquë nē'pëtahuaton, Yosë nontërin. “Yosparinquën, Tata,” itahuaton, pan, sami, inapita sē'panahuaton, ca'tano'sanënpita quëtërin.

—Piyapi'sa' quëtonco' ca'ina', itohuachina, quëtëra'piapi. 20 Ya'ipi piyapi'sa' coshatopi. Natëaquë huarë' coshatopi. Ina quëran pē'sotopiso' mapi. Shonca cato' i'më' mëntatopi.  
21 A'natërápo huaranca pochin quëmapi'sa' coshatopi. Sanapi'santa' hua'huinarë chachin coshatopi anta'.

*Ii' aipi i'narinso'**(Marcos 6.45-52; Juan 6.16-21)*

<sup>22</sup> Ina quëran ca'tano'sanënpita sha'huitërin. “Potiquë ya'conahuatoma', aquëtëran paco'. Nani piyapi'sa' nontohuato, canta' pa'sarahuë,” itohuachina, pa'pi huachi. Ina quëran piyapi'sa' nontërin. <sup>23</sup> Nani nontohuachina, panënuë inaora pa'nin Yosë nontacaso marë'. Inaquë Yosë nontaso', tashitërin. <sup>24</sup> Ca'tano'sanënpitaso nipirinhüë', sono' huancanai' tashitopi. Ya'ipi tashi' maitopirinahuë', panca ihuan nacapiatona', co nanitopihüë' chiniquën paacaiso'. Poti opoto opototarín. <sup>25</sup> Co tahuëriyátërasohüë', Quisoso huë'sapirinhüë', co nitotopihüë'. I' aipi i'narahuatón, no'pa pochín pa'tarin. Poti ya'cariarin. <sup>26</sup> Ca'tano'sanënpitari quënanpirinhüë'. Ii' aipi i'narinso' ni'sahuatona', pa'yanpi. “Hua'yan” ta'tona', “ëë” topi. Chiniquën pa'yanpirinhüë', <sup>27</sup> a'naroáchin Quisosori nontërin.

—¡Co'ta ca huë'sarahuë. Ama pa'yancosohüë'! Chiniquën cancantoco', itërin.

<sup>28</sup> Ina natanahuaton, Pitrori itërin:

—Quëma Siniro ni'quëhuarë', sha'huitoco pa'i. Canta' i' pa'tato nacapi'inquën, itërin.

<sup>29</sup> —Noyapa', huëquë', itohuachina, Pitro poti quëran nohuaraitahuaton, ii' aipi huanirin. Quisosoíchin yonquiatón, amasha huancanaimiachín noya pa'sapirinhüë'. <sup>30</sup> Ihuaní chiniquën aco'sacaitërinso ni'sahuaton, të'huatërin. Napohuachina acopoi' pa'sapirinhüë':

—¡Catahuaco Siniro! itërin.

<sup>31</sup> A'naroáchin Quisosori maimirarin. Oshirahuaton, ahuaníintarin:

—Co ya'ipi cancanën quëran natërancohuë' ni'ton, acopoi' pa'sapiranhuë'. ¿Onpoatonta' co noya natërancohuë'? itërin.

<sup>32</sup> Ina quëran potiquë quësahuaton, ichiya'conin. Ya'conpachina, a'naroáchin ihuan sanorin. <sup>33</sup> Napohuachina, na'con yonquipi.

—Quëmaso' Siniro tëhuënhachín Yosë hui'ninquën, ta'tona' chinotopi.

*Na'a cania'piro'sa' anoyatërinso'**(Marcos 6.53-56)*

<sup>34</sup> Ina quëran aquëtëran canconahuatona', Quinisariti parti nonshipi. <sup>35</sup> Ya'huëhuano'sari nohuitahuatona', nanan a'papi. “Quisoso nani canquirin,” topachinara, na'a cania'piro'sa' quëpi anoyatacaso marë'. Nisha nisha parti quëran huë'pi. <sup>36</sup> “Quëma a'moranso' huirotën tëranta' së'huatona', noyachina,” itopi. “Inta nipachín së'huaina,” topachina, së'huapi. Insoarisona së'huahuachina, a'naroáchin noyatopi.

**15***Shimashonënapita napopiso'**(Marcos 7.1-13)*

<sup>1</sup> Ina quëran a'naquën parisioro'sa', cotio maistro'sa', inapita Quirosarin quëran huë'pi Quisoso natanacaiso marë'.

<sup>2</sup> —¿Onpoatonta' ca'tano'sanënpita co quiya pochín nipihüë'? Iráca shimashonënpoa' inachintopiso' a'chintërinënpoa'. “Co'huara coshachatërasëmahüë', i'shaquë pi'pian niopoimiratoco' ama oshahuanacaso marëhuë',” topi iráca. Quëmaso nipirinhüë' co ina pochín nicacaso' a'chintëranhuë', itopi.

<sup>3</sup> Napotohuachinara, Quisosori itërin:

—¿Onpoatonta' canpitanta' shimashonënpoa' inachintërinso' natëtoma', co Yosë pënëntërinso' natëramahuë'? <sup>4</sup> Quiricanën quëran pënëninpoa'. “Tatama', mamama', inapita noya nicatoma natëco',” ténin. Naporahuaton, “Inso tëranta pa'pina', a'shina' inapita co noyahuë yonquirapitona' no'huihuachina', tēpaco',” ténin Yosë iráca.

<sup>5</sup> Canpitaso nipirinhüë' nisha a'chinama'. “Ma'sha ya'huëtërinco'so' nani acorahuë Yosë

quëta'huaso marë'," topatëra, co tatanpo' quëtacaso' ya'huërinhuë', toconama'. Napoaton tatama' ma'sha pahuantohuachinara, apiratatoma', co quëtëramahuë'. <sup>6</sup> "Co quëtacaso' ya'huërinhuë'," toconama'. Ina pochin a'chinatoma', co Yosë quiricanën natëramahuë'. <sup>7</sup> "Yosë imarai," topiramahuë', co imaramahuë'. ¡Canpitaso' nonpintëinquëma! Iráca Isaiasë ninshitaton, no'tëquën ninorinquëma'.

<sup>8</sup> Yosë naporin: "Isopita piyapi'sa' nanamëna quëran noya nontopirinaohuë', co cancanëna quëran imarinaohuë'. Co ca pochin cancantopihuë'.

<sup>9</sup> "Yosë pënëntërinso' a'chinarai,' topirinahuë', inahua yonquinëna quëran a'chinpi. Napoaton topinan quëran chinotërinaco," tënin Yosë.

Iráca Isaiasë ninshitaton naporin, itërin Quisosori.

*Onporahuatëhuasona oshahuanëhuaso'*

*(Marcos 7.14-23)*

<sup>10</sup> Ina quëran piyapi'sa' përasahuaton, a'chintërin.

—Ya'ipinquëma' natanco no'tëquën yonquicamaso marë'. <sup>11</sup> Coshatëreso marë' co oshahuanëhuë'. Cancanënpoa quëran yonquirëso marë' oshahuanëhuaso'. Tëhuëinchachin co noyahuë' nonpatëra, oshahuanë', itërin.

<sup>12</sup> Ina quëran ca'tano'sanënpitari sha'huitiirin.

—Achin Maistro pënënancoi ni'ton, parisioro'sa' no'huirinëinquën, itopi.

<sup>13-14</sup> —Ama ina marë' pa'yancosohuë'. Oshaquëran Yosëri ana'intarin. Ni'co'. Ma'sha sha'patëra, co pacatëro' pa'ararëhuë'. Ocoirahuatë' të'yatëre'. Inapochachin co nanamën imapisopitahuë' Yosëri a'poarin. Inapitaso' somaraya pochin cancantopi. Somarayaso' co nanitërinhuë' a'na somaraya noya quëpacaso'. Quëparin naporini, cato chachin panca naninquë anochitonahuë', itërin Quisosori.

<sup>15</sup> —Achin Maistro a'chintërancoiso', a'chintaantaco quiyanta' no'tëquën nitochii, itërin Pitrori.

<sup>16</sup> —¿Co canpita tëranta' yonquiyatëramahuë' ti? Inta nipachin, a'chinchinquëma'.

<sup>17</sup> Nani ma'sha ca'nëhuaso marë', co ina marë' oshahuanëhuahuë'. Co cosharo' cancanënpoaquë ya'coninhuë'. Chi'chirinamënpoaquë ya'conin. Ina quëran inquietarëhua'. ¿Co ina nitotëramahuë' ti? <sup>18</sup> Napoaponahuë', cancanëma quëran co noyahuë' yonquihuatamara, co noyahuë' nonama'. Ina marë' oshahuanama'. <sup>19</sup> Co noyahuë' yonquihuatamara, tëpatërama', nitëhuananpitërama', monshihuanacasoáchin yonquirama', ihuatërama', nonpintërama', pinotërama'. <sup>20</sup> Ina pochin cancantohuatamara, oshahuanamaso'. Co i'shaquë niopoimiratarihuarahuënta', coshatohuatëhuara, co ina marë' oshahuanëhuahuë'. Cancanënpoa quëran nóya yonquicaso' ya'huërin. Ina Yosë nohuantërin, itërin Quisosori.

*Nisha sanapi natëtërinso'*

*(Marcos 7.24-30)*

<sup>21</sup> Ina quëran Cotia parti quëran pipirahuaton, Tiro, Siton, inapita parti pa'nin.

<sup>22</sup> Naporo' a'na Canaan sanapi inaquë ya'huërinsoari huëcapairahuaton, chiniquën itapon: —¡Nosoroco, Sinioro! Quëmaso' Tapico' shinquën ni'ton, Yosë chachin acorinquën piyapi'sa' catahuamaso marë' ténahuë. Hua'huahuë parisitárin. Sopairi ya'coancantaton, chiniquën aparisitarin. Inquitoco, topirahuë', itërin.

<sup>23</sup> Quisososo' co a'panitaponahuë' pa'sapirinhue', sanapiriso' imaraton:

—Nosoroco Sinioro, itërarin. Ina ni'sahuatona', ca'tano'sanënpitari pi'pian no'huipi.

—Iso sanapi a'paquë' pa'in. Imaqitonpoa', pinatano' níriarin, itopi.

<sup>24</sup> Napotohuachinara, sanapi itërin:

—Quëmaso' imoya nisha piyapinquën. Israiro'sa' catahua'huaso marë' Yosë a'parinco. Inahuaso Yosë piyapinënpita nipirinahuë', ohuica chihuërinso pochin nipi ni'ton, catahuarahuë', itërin.

<sup>25</sup> Sanapiso nipirihuë', isonquirahuaton moshaquirin.

—Nisha sanapico nipirahuë', canta' Siniro catahuaco, topirahuë', itërin.

<sup>26</sup> —Ni'quë' imoya. Hua'huaro'sa' a'cahuatëra, co cosharonën osëretahuatë' ni'nira a'carëhuë', itërin Quisosori.

<sup>27</sup> —Naporin mini Siniro. Napoaponahuë', pi'pian tëranta' cosharo' atatohuachina, ni'nira'huayari capitërin ni'ton, quiyanta' catahuacoi, topirahuë', tënin.

<sup>28</sup> —¡Ma noya imoya natëranco! Ya'ipi cancanën quëran huarë' natëranco ni'ton, hua'huan anoyachinquën, itërin. Napotohuachina, a'naroáchin hua'huin noyatërin huachi.

*Nisha nisha cania'piro'sa' anoyatërinso'*

<sup>29</sup> Ina quëran Cariria sono' yonsanquë pa'sahuaton, a'na panënuquë pantarin. Inaquë huënsëconin. <sup>30</sup> Napohuachina, notohuaro' piyapi'sa' huë'pi. Nisha nisha caniori manin-sopita quësapi. A'naquën sonpacha, a'naquën somaraya. Apiaro'sa', në'huëyaro'sa', inapita quësahuatona', Quisoso pirayan acoipi. Inaquë acoihuachinara, ya'ipimiachin anoyatërin. <sup>31</sup> Piyapi'sari ni'sahuatona', pa'yatopi. “Ni'co'. Në'huëyaro'sa' nonsapi. Apiaro'sa' nani noyatopi. Sonpacharo'sa' noya iratopi. Somarayaro'santa' noya quënantopi. ¡Ma noyacha Yosëso paya! ¡Ma noyacha ni'ton, piyapinënpitanpoa catahuarinpoa paya!” topi.

*Cosharo' ana'atantarinsó'*  
(*Marcos 8.1-10*)

<sup>32</sup> Ina quëran ca'tano'sanënpita përasahuaton, itapon:

—Piyapi'sa' nosororahuë. Nani cara tahuëri pochin natanarinaco ni'ton, co huachi manta' cosharo' ya'huëtopihuë' capacaiso'. Co topinan yaa'parahuë', tanari canahuachina', itërin.

<sup>33</sup> —Pa'pi notohuaro' piyapi'sa' yamorapi. ¿Intohuacha cosharo' macatë' isonapo' piyapi a'carë nicaya? Co pëi' isëquë ya'huërinhuë', itopi.

<sup>34</sup> —¿Onpo panta' ya'huëtërinquëma'? itohuachina, —Canchisëíchin pan, caraíchin sami, inaíchin ya'huëtërincoi, itopi.

<sup>35</sup> Ina quëran piyapi'sa' sha'huitërin no'paquë huënsëcaiso marë'. Sha'huitohuachinara, huënsëpi. <sup>36</sup> Nani huënsëhuachinara, canchisë pan, sami, inapita masahuaton, Yosë nontërin. “Yosparinquën Tata,” itërin. Ina quëran së'panahuaton, ca'tano'sanënpita quëtërin piyapi'sa' quëtacaiso marë'. Ya'ipi quëtëra'piapi.

<sup>37</sup> Nani quëtohuachinara, ya'ipiya natëaquë huarë' coshatopi. Ina quëran pë'sotopiso' masahuatona', canshisë i'më' mëntatopi. <sup>38</sup> Catapini huaranca quëmapi'sa pochin coshatopi. Sanapi'santa' hua'huinarë chachin coshatopi. <sup>39</sup> Ina quëran piyapi'sa' nontahuaton, potiquë ya'conin. Aquëtëran pëntonahuaton, Macatan parti canconin.

## 16

*Quisoso sacai' nininso' nicacaso' nohuantopiso'*  
(*Marcos 8.11-13; Lucas 12.54-56*)

<sup>1</sup> Ina quëran parisioro'sa', satoro'sa' inapita Quisoso nontacaiso marë' huë'pi. Nonpintatona', nontopi atëhuëcaiso marë'. “Yosë a'paimahuachinquën, sacai' nicacaso nininso' niquë'. Quiyanta' ina nicatoi, natëinquën,” itiipi.

<sup>2</sup> “¿Onpoatomata' iyaro'sa' co no'tëquën yonquiramahuë'? Ni'co'. O'nan nitoninorama. I'huanahuanquë noyapihuayanchin nipachina, ‘Tashiraya noyahuantapon,’ tënama'.

<sup>3</sup> Tashiramiachin chistro yaratohuachinaso', ‘Ipora tahuëri o'nanapon nimara,’ tënama'. Ina nitotapomarahüë', ¿onpoatomata' ipora chachin naporahuësopita co yonquiramahuë'?

<sup>4</sup> Ipora ya'huëramasopita co noyahuë' cancantërama'. Nitëhuananpitopisopita pochin cancantatoma', co pi'pisha tëranta' Yosë yanatëramahuë'. ‘Sacai' nicacaso nininso' niquë' natëinquën,’ itopiramacohüë', co Yosë nohuantërinhuë'

ina pochin nica'huaso'. Isoíchin anitotarinquëma'. A'na tahuëri canpita nitotacamaso marë', Conasë pochin nisarahuë" itërin. Ina quëran patërin huachi.

*Parisioro'sa'yanonpinpiso'*

*(Marcos 8.14-21)*

<sup>5</sup> Ca'tano'sanënpita sono aquëtëran pëntonpirinahuë', naniantopi pan quëpacaiso'. <sup>6</sup> Ina quëran Quisosori itërin:

—Parisioro'sa', satoro'sa' inapita, pan ahuëpocatërinso' pochin ya'huëtopi. Ama iyaro'sa' ina nohuantocosohuë', itërin.

<sup>7</sup> Natanahuatona', ca'tano'sanënpita capini ninontopi.

—¿Onpoatonta' naporin? tënin a'naso'.

—Ahuën. Capa pan. Co quënëhuahuë' ni'ton, napotërinpoa' nimara, tënin a'nanta'.

<sup>8</sup> Ninontopiso' nitotaton, Quisosori itërin:

—¿Onpoatonta' "capa pan," toconama'? Tëhuëenchachin co noya natëyatëramacohuë'.

<sup>9</sup> A'chintápiranquëmahuë', ¿ipora huanta' co yonquiramahuë' ti? Yonquico' iyaro'sa'. I'hua chachin a'natërápo painchin nipirinhüë' a'natërápo huaranca piyapi ananitërahuë'. ¿Ina naniantërama' ti? Naporo' pë'sotopiso' shonca cato' i'më' mëntatërama'. <sup>10</sup> Ina quëran canchisë painchin nipirinhüë', catapini huaranca quëmapi'sa' ananitërahuë'. Naporo' canchisë i'më' pë'sotopiso' manama'. <sup>11</sup> ¿Onpoatomata' co yonquiramahuë'? "Pan ahuëpocatërinso pochin ya'huëtopiso' ama nohuantocosohuë'," itohuatënnquëmara, co cosharo' yonquiato naporahuë', itërin.

<sup>12</sup> Naporo huarë' yonquipi huachi: "Co pan chachin yonquiaton, naporinhüë'. Parisioro'sa', satoro'sa' inapita a'chinpiso' yonquiaton, pënëninpoa'. Pi'pisha pan ahuëpocatërinso' së'yonpachinara, a'naroáchin së'cotërin. Inapochachin inapitanta' co no'tëquën a'chinatonaraihuë', piyapi'sa' anishacancantopi, tapon napotërinpoa'," topi.

*Pitro natëtërinso'*

*(Marcos 8.27-30; Lucas 9.18-21)*

<sup>13</sup> Ina quëran Sisaria Pinipo parti pa'pi. Inaquë ca'tano'sanënpita itapon:

—Nani ma'sha nanitaparahuëso marë', ¿inpochinta' piyapi'sa' cancantërinaco? itërin.

<sup>14</sup> —Nisha nisha cancantiarinën: "Coansha Paotistaco' naniantarinso' ni'ton, naporin," topi a'naquën. "Co inahuë'. Iniasëco' naniantamara," topi a'naquëonta'. "Pënëntona'pi iráca chiminpirinhüë', naniantarinso' nimara, tomantatona', Irimiasë nimara," topi a'napitanta', itopi.

<sup>15</sup> —¿Canpitapo'? ¿Incota tënama'? itërin. Itohuachina, <sup>16</sup> Simon Pitrori itërin:

—Quëmaso' Cristo. Yosë hui'nin chachinquën. Ina nanpitan, a'paimarinquën, itërin.

<sup>17</sup> —Ma noyacha iyasha Yosë catahuarinquën ni'ton, naporan. Napoaton noya cancantëran. Co quëmaora yonquinën quëran nitotëranhuë'. Tata Yosë chachin anitotërinquën. Quëmaso' Conasë hui'ninquën. Simon itopirinënnquënhüë', <sup>18</sup> nasha nininën acochinquën. Pitro itaranquën. Ca nohuanto, na'pitëquë noya pëipiso pochin na'a piyapi'sa' a'chintaran imainacoso marë'. A'chintohuatan, huëntonëhuëquë aya'conarahuë. Oshaquëran na'asarama huachi. Co chimirin tëranta' minsëarinquëmahuë'. <sup>19</sup> A'na tahuëri chiniquën nanan quëchinquën a'napita a'chintacamaso marë'. Yosë huëntonënnquë ya'conacaiso' a'chintaran. Ya'coana niahuiquë i'soatëresó pochin piyapi'sa' catahuaran ya'conacaiso marë'. Ina quëran ma'sona noya nicacaiso' a'chintaran. Insosona co yanatëhuachinquënhüë', sha'huitëquë': "Tëhuëenchachin co Yosë ya'huërin'pa' pa'saranhuë'," itëquë'. Yosërinta' inachachin sha'huitarin. A'naquënso nipirinhüë', noya natanpi quëran cha'ësapi huachi. Yosërinta' noya ni'sarin. Natërinaco ni'ton, oshanëna' Yosëri inquitarin. Napoaton huëntonënnquë ya'conapi huachi, itërin.



<sup>20</sup> Ina quëran ya'ipi ca'tano'sanënpita itapon: “Ca mini Cristoco. Yosë chachin acorinco piyapi'sa' nicha'ëca'huaso marë'. Ina nitotapomarahuë', ama iporasos' a'napita sha'huitocosohuë'” itërin.

*Chiminacaso' ninorinso'*  
(*Marcos 8.31-9.1; Lucas 9.22-27*)

<sup>21</sup> Naporo quëran huarë' chiminacaso' ninoton, ca'tano'sanënpita sha'huitërin:

—Quirosarinquë pa'pato, na'con parisita'huaso' ya'huërin. Cotio ansiano'sa', corto hua'ano'sa', cotio maistro'sa', inapita co huachi quë'yaarinacohuë'. Tëpaarinaco. Chiminaporahuë', cara tahuëri quëran Yosë ananpitaantarinco, itërin. <sup>22</sup> Ina natanahuaton, a'naroáchin Pitrori amasha quëparahuaton, chiníquën pënënin:

—¡Ama Siniro napoquësosohuë'! Ama Yosë nohuanchinsosohuë', itopirinhue',

<sup>23</sup> Quisosori tahuërëtahuaton, itërin.

—¡Ta'tëquë' iyasha! Sopai nohuanton, napotëranco. ¿Yaanishacancantëranco ti? Co Yosë pochin yonquiranhue'. Piyapinquën ni'ton, quëmaora nohuantëransoachin yonquiran, itërin Quisosori.

<sup>24</sup> Ina quëran ya'ipi ca'tano'sanënpita itërin:

—Yaimapatamaco, canpitaora nohuantëramaso' naniantatoma', Yosë nohuantërinso'áchin imaco'. Corosëquë chiníquën parisitëre'. Canpitanta' parisitapomarahuë', imamiatoco. <sup>25</sup> Noya nanpicamasoáchin yonquihuatama', topinan quëran nanpiarama'. A'na tahuëri chiminpatama', parisitomiatarama'. Nipirinhue', casáchin yonquihuatamaco, parisitapomarahuë' co topinan quëran nanpiaramahuë'. Yosë'pa' nanpimiatarama'. <sup>26</sup> Ya'ipi ma'sha isoro'paquë ya'huërinso'pita canapiramahuë', co hua'yanëma' cha'ëpachinhue' topinan quëran nisarín. ¡Onponta' pahuërëtapiramahuë', co huachi hua'yanëma' nanitarinhue' cha'ëcaso'! <sup>27</sup> Yosë quëran quëmapico ni'to, a'na tahuëri o'mantararahuë. Tatahuë huënaratërinso pochin canta' huënaratarahuë. Anquëniro'sapitarë'co o'mantararahuë. Naporo' coisë pochin no'tëquën sha'huitarahuë huachi. Noya nipachina', noya acoarahuë. Co noyahuë' nipachina', ana'intarahuë huachi. <sup>28</sup> Tëhuë'nchachin isoro'pa' hua'anëntapo. A'naquëma' co'huara chimiyantërasë'nquëmahue', hua'anëntarahuë'so' ni'sarama', itërin.

## 17

*Nisha pochin ya'norinso'*  
(*Marcos 9.2-13; Lucas 9.28-36*)

<sup>1</sup> Saota tahuëri quëran Quisoso pa'nin motopi'pa'. Pitro, Santiago, Coansha, inapitaráchin quëparin. <sup>2</sup> Inapitari nicasoi', nisha pochin ya'norin. Ya'ipi ya'pirin pi'i pochin a'pinin. A'morinso' huënaráchin huënaráchin ninin. <sup>3</sup> A'nanaya Moisésë, Iniasë, inapita quënanpi. Iráca ayapirinhue', Yosë nohuanton, ya'noantatona'. Quisosorë' ninontapi.

<sup>4</sup> Ina ni'sahuaton, Pitrori itërin:

—¡Ma noya Siniro isëquë huë'nëhua'! Nohuantohuaton, cara imënamëa'huaya nii, a'nara' quëma marë', a'nanta' Moisésë marë', a'nanta' Iniasë marë', topirahuë', itërin.

<sup>5</sup> Nonaquëya', chitorori imotërin. Huënaráchin huënaráchin ninin. Chitoro' huáncana quëran Yosëri sha'huitërin: “Isoso' ca hui'nahuë, na'con nosororahuë'so'. Nóya ni'nahuë. Ina noya natanco'” itërin.

<sup>6</sup> Ina natanahuatona', chiníquën pa'yanpi. Isonahuatona', nipa'copirayatopi. Monshoápirinhue', <sup>7</sup> Quisosori së'huaquirahuaton:

—Ama huachi iyaro'sa' pa'yancosohuë'. Huaniantaco', itërin.

<sup>8</sup> Napotohuachina në'pëtintapirinhue', Quisosoráchin quënanpi.

<sup>9</sup> Ina quëran motopi quëran nohuaramapona pochin, Quisosori itërin:

—Achín ni'namaso', ama insonta' sha'huitocosohuë'. Yosë quëran quëmapico ni'to, a'na tahuëri nanopiantarahuë. Naporo huarë' a'napita sha'huitoco', itërin.

<sup>10</sup> —Pi'pian Siniro yanatanainquën. Maistro'sa' Yosë quiricanën a'chinpachinara, napopi: “Co'huara Cristo o'mayatërasohuë', Iniasë'ton huëantarin,” topi. ¿Onpoatonta' napopi? itërin ca'taninsopitari.

<sup>11</sup> —No'tëquën napopi. “Noya ayonquiantacaso marë' huëantapon,” tënin pënëntona'pi ninoton. <sup>12</sup> Carimaso nipirihuë' sha'huitaranquëma'. Nani mini huëantapirihuë', co nohuitopihuë'. Co yanatëtonaraihuë', inahuara yonquinëna quëran no'huipi. Canta' Yosë quëran quëmapico nipirahuë', inapochachin aparisitarinaco, itërin Quisosori.

<sup>13</sup> Napotohuachina, ca'tano'sanënpita yonquipi huachi: “Tëhuënhachin i'hua Coansha Paotista pënëntërin. Iniasë pënëntërinso pochachin pënëntopirihuë', co yanatëpihuë',” topi yonquiatona'.

*Hua'huasha hua'yantërinso'*  
(*Marcos 9.14-29; Lucas 9.37-43*)

<sup>14</sup> Nani nohuaraimantahuachinara, na'a piyapi'sa' quënanquimarin. A'na quëmapiso' huë'sahuaton, isonquirin.

<sup>15</sup> —Hui'nahuë Siniro nosorotoco. Chiníquën parisitarin. Sopai nohuanton, no'paquë nitë'yatahuaton, sa'po sa'po niconin. Pacoro pacorotarin. A'na tahuëri pënquë anotërin. A'na tahuëri i'quë nitë'yaitërin. Naporárin. <sup>16</sup> Ca'tano'sanënpita sha'huitato: “Sopai inquitoco,” itopirahuë', co nanitopihuë', itërin.

<sup>17</sup> —¡Ma'huantacha ninama paya! Canpitaso' co Yosë natëramahuë'. Co natëtochináchinhuë' cancantërama'. Nani hua'qui' a'chintopiranguëmahuë', ¿onporo huarëta' yanatëramaco? itahuaton, —Hua'huasha quëshico, itërin Quisosori.

<sup>18</sup> Quëntahuachina, Quisosori sopai nontërin. “Iso hua'huasha tananpitëquë'. Pipimi-atëquë huachi,” itohuachina, a'naroáchin sopai pipirin. Hua'huasha noyatërin huachi.

<sup>19</sup> Ina quëran inaora ya'huaso', ca'tano'sanënpitari natanquirin.

—¿Onpoatonta' Siniro co quiyariso' nanitëraihuë' inquitahuaiso'? itopi.

<sup>20</sup> —Co ya'ipi cancanëma quëran huarë' natëramacohuë' ni'ton, co nanitëramahuë'. Natëramaco naporini, catahuaitënquëmahuë'. Yosëso' ya'ipiya nanitaparin. Pi'pian tëranta' ina natëtoma', nontohuatama', catahuarinquëma'. Nani ma'sha nanitaparama'. “Yosë nohuanton, iso motopi ya'huinca'in,” tënama' naporini, ina nohuanton, ya'huincaitonhuë'. Inapochachin ya'ipi cancanëma quëran natëramaco naporini, sacai' nininso' catahuaitënquëmahuë'. [<sup>21</sup> Isanpi sopaiso nipirihuë' sacai' inquitacaso'. Ayono nicatë chiníquën Yosë nontaquë huarë', inquitëre', itërin.]

*Chiminacaso' ninoantarinso'*  
(*Marcos 9.30-32; Lucas 9.43-45*)

<sup>22</sup> Cariria parti papona pochin, Quisosori ca'tano'sanënpita sha'huitaantarin:

—Yosë quëran quëmapico nipirahuë', piyapi'sa' masarinaco. Sha'huirapihuachinaco, masarinaco. <sup>23</sup> Mapachinaco, tëpaarinaco. Chiminaporahuë', cara tahuëri quëran Yosë ananpitaantarinco huachi, itërin. Natanahuatona', pa'pi, sëtopi.

*Coriqui Yosë pëinën marë' quëtopiso'*

<sup>24</sup> Capinaomoquë canconpachinara, a'naquën Yosë pëinën marë' coriqui ma'patona'piro'sa' huë'pi. Huëcatona', Pitro itiipi:

—Yosë chinotopiso pëi' tapacaso marë' ya'ipinpoa' pi'pian coriqui quëtacaso' ya'huërin. ¿Quëma maiströnënso' co pahuëretërinhuë' ti? itopi.

<sup>25</sup> —Pahuëretërin mini, itërin Pitrori.

Ina quëran pëiquë ya'conpachina, inaquë Quisoso quënanconin. Co'huara sha'huichátërasohuë', inari ninoton, itërin:

—Pi'pian iyasha naitainquën. Copirnoros' coriqui nohuantohuachinara, ¿inpitata' ma'parin? ¿Quëmopinënpita quëran huarë' ma'parin to? itërin.

<sup>26</sup> —Co quëmopinënpitaso' ma'parinhuë'. Nisharo'saráchin ma'parin, itërin Pitrori.

—No'tëquën naporan. Napoaton co hui'ninpitariso' quëtacaso' ya'huërinhuë'. Inapoc-hachin Yosë pëinënquë nicacaso' ya'huërin. Co caso' quëta'huasohuë' nipirahuë', <sup>27</sup> ama no'huitacaiso marëhuë' carinta' quëchi. Sono' yonsanquë pa'sahuaton, yo'natëquë'. Ya'nan ohuararanso' sami nanamënquë ni'quë'. Inaquë coriqui quënanaran. Masahuaton, quëtonquë'. Catoënpo marë' naniarin, itërin. Pitro pa'sahuaton, Quisoso ninorinso chachin quënanconin huachi.

## 18

*Chini chiniquën nanantërinso'*  
(*Marcos 9.33-37; Lucas 9.46-48*)

<sup>1</sup> Ina quëran ya'ipi ca'tano'sanënpitari paahuarahuatona', Quisoso natanpi.

—A'na tahuëri Yosë isoro'paquë hua'anëntohuachin, ¿insota' chini chiniquën nanantarin? itopi.

<sup>2</sup> Ina natanahuaton, a'na hua'huasha përasahuaton, huancánachin ahuanirin.

<sup>3</sup> —Natanco iyaro'sa' pi'pian a'chinchinquëma'. Co no'tëquën yonquiyátëramahuë'. Hua'huasharo'sa' yonquico'. Co chiniquën nanan nohuantopihuë'. Co a'napita nocanpihuë'. Co inapita pochin cancantohuatamahuë', co onporonta' Yosë hua'anëntërinquë ya'conaramahuë'. <sup>4</sup> Hua'an pochin cancantacamaso' naniantatoma', hua'huasha pochin sano cancantoco'. Ina quëran Yosë noya noya ni'sarinquëma huachi. <sup>5</sup> Imaramaco ni'ton, ya'ipiya nicatahuacaso' ya'huërin. Hua'huaro'santa' nosorohuatama', canta' nosoroaramaco. Ya'ipi hua'huaro'sa pochin cancantopisopitanta', noya ni'co'.

*Anishacancantërinso'*  
(*Marcos 9.42-48; Lucas 17.1-2*)

<sup>6</sup> “Hua'huasha natërinco'so' anishacancantohuatama', Yosë chiniquën ana'intarinquëma'. A'naquëonta' imasapirinacohuë', co chiniquën cancanchatërapihuë'. Inapitanta' anishacancantohuatama', ana'intarinquëma'. Co'huara inapita anishacancanchatërapomahuë', marëquë chimiitërama' naporini, noya noya niitomahuë'. Pancara'piquë a'sonconotahuatënëinquëma', të'yaitërinëinquëma' naporini, co aquëtë' oshahuaintomahuë'. Piyapi anishacancantacaso', pa'pi co noyahuë'. <sup>7</sup> Isoro'paquë sacai' Yosë imacaso'. Nisha nisha ya'huërin piyapi'sa' anishacancantacaiso'. Ina marë' oshahuanpi. Anishacancantona'piso nipirinhüë', na'con na'con oshahuanin. Yosëri chiniquën ana'intarin ni'ton, ¡ma'huantacha nisarin paya!

<sup>8</sup> Napoaton imirama quëran, nantëma quëranhuë nipon co noyahuë' nipatama', oshahuanama'. Ninishitëimiratërama', ninishitërantëtërama', ninapotërama naporini, noya noya niitomahuë'. Tantoimira, tantorancha nipomarahüë', Yosë'pa' paatoma', co parisitopiquë pa'itomahuë'. Imirama', nantëma', inapita nishitëtëramaso pochin cancantatoma', ya'ipi aoshahuaninquëmaso' a'poco'. <sup>9</sup> Ya'pirama quëran quënanamaso marë' co noyahuë' yonquihuatama', pa'pi co noyahuë' nisarama'. Ya'pirama' ocoirama' naporini, noya noya niitomahuë'. Somaraya nipomarahüë', co parisitopiquë pa'itomahuë'. Cato quëran chachin noya ni'tapomarahüë' parisitopiquë të'yatohuachinëinquëma', pa'pi co noyahuë' nisarama',” itërin.

*Ohuica chihuërinso pochin nininso'*  
(*Lucas 15.3-7*)

<sup>10</sup> Ina quëran Quisosori itaantarin: “Ama a'na hua'huasha tëranta' nocancosohuë'. Inahuanta' Yosëri nosororin. Nani anquëniro'sa' sha'huiterin a'naya a'naya a'paicaiso marë'. Tata Yosë'pa' ya'huatona', Yosë nontapi. [ <sup>11</sup> Na'a piyapi'sa' co noyahuë' cancantatona', chihuëpiso pochin nipi. Yosë quëran quëmapico ni'to, o'marahüë inapita nicha'ëca'huaso marë'. ]

<sup>12</sup> Ni'co'. A'na quëmapi pasa ohuicaro'sa' pë'tahuarin. Ya'ipiya nosororin. Pastoquë coshatacaiso marë' quëparinquë a'naya tëranta' chihuëhuachina, yonípon pa'nin. A'napitaso' inaquëranchin patahuaton, hua'qui' yonisarín. <sup>13</sup> Quënanahuaton, pa'yatarin. Ison shonca iscon ohuicanënpita co chihuëpirinahuë', co inapitaráchin yonquirinhuë'. A'naíchin chihuërinso' quënanahuaton, na'con na'con pa'yatërin. <sup>14</sup> Inapochachin Tata inápaquë ya'huërinso' nosororinquëma'. Hua'huaro'santa' nosororin. Co nohuantërinhuë' a'naya tëranta' parisitopiquë paacaiso'," ténin.

*Nanan anoyatacaso' ya'huërinso'*  
(Lucas 17.3)

<sup>15</sup> Ina quëran Quisosori pënëantarín. "Imapatamaco, iyaparima pochín ninicamaso' ya'huërin. A'naquën ma'sha onpotohuachinquën, quëmaora paaton, nanan anoyatëquë'. Ina quëran oshaquëran pënëinquë' noya yonquianta'in. Noya natëhuachinquën, oshanën marë' tëhuënhachin sëtohuachin, noya cancantaantarín. Iyaparima pochín ninosoroantarama huachi. <sup>16</sup> Nipirinhuë', co yanatëhuachinquënhuë', a'na ya'pihuë nipon, catohuë nipon pënënanso natanacaiso marë' quëparahuaton, nontoantaquë'. Iyaro'sa' quëparansopitanta' noya nataina' ama pi'pian tëranta' nonpinacaso marëhuë'. Inapitarinta' pënëina'. <sup>17</sup> Co inapita tëranta' yanatëantahuachinhuë', ya'ipi imaramasopita niyontonpachina', ya'ipiya sha'huitëquë' inahuarinta' nanan anoyachina'. Inapitarinta' pënëantapirinahuë', co inapita tëranta' yanatantahuachinhuë', ama huachi iyama pochín ni'cosohuë'. Co imarinso pochínhuë nipon, Noma copirno marë' coriqui ma'patona'pi pochín nipon ni'co huachi.

<sup>18</sup> Oshahuanacaso' co yananiantohuachinhuë', sha'huitëquë': 'Tëhuënhachin iyasha oshahuanan. Co naniantëranhuë' ni'ton, co Yosë inquitaringuënhuë', itëquë'. Yosërinta' inachachin napotapon. Nipirinhuë', oshanën marë' sëtatón Yosë yonquiantahuachin, noyatapon. 'Oshanën iyasha Yosë inquitaringuën,' itëquë'. Yosërinta' oshanën inquitatón, noya ni'sarin huachi.

<sup>19</sup> Catoyanquëma tëranta' napopianachin yonquiatoma Yosë nontohuatama', Yosë natanatënguëma', catahuaringuëma'. <sup>20</sup> Chinotamacoso marë' niyontonpatama', canpitaro'co ya'huarahuë. Carayanquëma tëranta' niyontonpatama', canta' inaquë ya'huërarahuë," ténin Quisoso.

<sup>21</sup> Ina quëran Pitrori itërin:

—A'na iyahuë Siniro ma'sha onpotohuachinco, nanan anoyachi, ténahuë. Nipirinhuë', naquëranchin naquëranchin ma'sha onpotohuachinco, ¿onpo onporota' nanan anoyachi? ¿Canchisëro' pochín nimara ti? itërin.

<sup>22</sup> —Co canchisëroichin nanan anoyatacaso' ya'huërinhuë'. Canchisë shonca canchisëro'\* anoyatoco', itërin Quisosori.

*Co nanan anoyatona'pihuë'*

<sup>23</sup> Ina quëran itaantarín:

"Yosë hua'anëntërinso' a'chinchinguëma', natanco'. A'na hua'an naporinso pochín ninin. Na'a piyapinënpitari nihuirin ni'ton, a'naya a'naya amatërin natanacaso marë'. <sup>24</sup> Napohuachina, a'nara' quëntapi na'a huaranca nihuirinso'. Co apira pahuëretochináchinhuë' nihuitërin. <sup>25</sup> 'Hua'huayátërahuë nihuirinco ni'ton, co onporonta' nanitarinhuë' pahuëreincoso', ta'ton, inpriatonën itapon: 'Iso quëmapi co nanitërinhuë' pahuëreincoso'. Chiminaquë huarënta' sacatopirinhuë', co onporonta' pahuërarincohuë'. Napoaton ya'ipi ma'shanënpita matonquë'. Ina quëran inaora chachionta' pa'anquë'. Sa'in, hui'ninpitare chachin pa'anquë' pi'pian tëranta' cana'i, itërin hua'ani. <sup>26</sup> Ina natanahuaton, nihuitona'pi chiníquën pa'yanin. Isonahuaton, nohuantaso' mosharin. 'Nosoroco siniro oshaquëran ya'ipiya pahuëre'inquën. Ama

\* **18:22** Canchisë shonca canchisëro' topachina: Onponta nanan anoyatacaso' ya'huërin, tapon napotërin.

pa'ancoisohuë'; itërin. <sup>27</sup> Napotohuachina, hua'ani nosororin. Nosoroaton, ya'ipi nihuirinso' ayataton noya a'parin huachi.

<sup>28</sup> Nihuitona'piso nipirinhüë' pipirahuaton, a'na iin pi'pian nihuirinso' quënanconin. Pasa tahuëri sacatohuachina canarinsoichin nihuipirinhüë', maconorahuaton, chiniquën no'huirin. 'Ya'ipi nihuirancoso' apiramiáchin pahuërëco huachi,' itërin.

<sup>29</sup> Ina quëmapinta' isonahuaton, na'con mosharin. 'Nosoroco iyasha oshaquëran ya'ipi pahuërëaranquën,' itopirinhüë', <sup>30</sup> co pi'pian tëranta' nosororinhüë'. Tashinan pëiquë apo'motërin. 'Pahuërëtaquë huarë' pipiin,' itërin. <sup>31</sup> Hua'an piyapinënpitaso' ina ni'sahuatona', no'huitori. '¡Ma'huantacha ninin paya! Co pi'pian tëranta' nosororinhüë'; ta'tona', hua'anëna ya'ipiya sha'huitorpi. <sup>32</sup> Ina natanahuaton, nihuitona'pi amataantarin. '¡Quëmaso' pa'pi co noyahuë' cancantëran! "Nosoroco," itëranco ni'ton, hua'huayátërahuë' nihuipirancohuë', ya'ipiya topinan ayatëranquën. <sup>33</sup> Carinquën nosororinquënso pochachin a'na iyasha nosorocamaso nipirinhüë', ¿co pi'pian tëranta' nosororanhüë' ti?' itërin. <sup>34</sup> Ina quëran chiniquën no'huitor, sontaro'sa' amatahuaton, tashinan pëiquë apo'motërin anta'. 'Pahuërëinco huarë' chiniquën aparisitëquë', itërin," tënin.

<sup>35</sup> Ina quëran itaantapon:

—Inapochachin Tata Yosë na'con nosoroatënuëma', ya'ipi oshanëma' yainquitopirinquëmahüë', co canpita capini nanan anoyatohuatamahüë', co oshanëma' inquitarinquëmahüë'. Chiniquën parisitarama'. Ya'ipi cancanëma quëran huarë' nanan anoyatacaso' ya'huërin, itërin Quisosori.

## 19

### *Sa'ahuano'sa' pënëninso'*

*(Marcos 10.1-12; Lucas 16.18)*

<sup>1</sup> Nani a'chinahuaton, Cariria quëran pipirin. Cortanii' aquëtëran paaton, Cotia parti cancoantarin huachi. <sup>2</sup> Notohuaro' piyapi'sari imasapi. Inaquë na'a cania'piro'sa' anoyatërin.

<sup>3</sup> Ina quëran a'naquën parisioro'santa' huë'pi. Nonpintatona', atëhuëcaiso marë' nontiipi:

—¿Noya ipora sa'ango' tē'yatacaso' ti? itiipi.

<sup>4</sup> —¿Ma'ta' Yosë quiricanën quëran sha'huitorinpoa'? Iráca ya'nan piyapi nipon, catoíchin Yosëri ninin. A'na quëmapi, a'na sanapi, inaíchin ninin. <sup>5</sup> "Napoaton quëmapi sa'apachina, pa'pin, a'shin, inapita patahuaton, sa'inë' nichinpitacaso' ya'huërin. Cato' piyapi nipirinhüë', a'naíchin pochin Yosëri ni'nin," tënin. <sup>6</sup> Catoya'pi nipirinhüë', a'naíchin pochin ni'nin. Nani Yosëri asë'quërin ni'quëhuarë', co onporonta' sa'ama' tē'yatacaso' ya'huërinhuë', tēnahuë, itërin Quisosori.

<sup>7</sup> —¿Onpoatonta' nipachin, iráca Moisésëso' pënëninpoa' sa'ango' tē'yatacaso'? "Sa'ango' yatē'yatohuatëra, coisëquë aninshitahuatë', tē'yatërë'," tënin, itopi parisioro'sari.

<sup>8</sup> —Co tē'yatacaso' pënëninquëmahüë'. Co natantochináchinhüë' cancantërama' ni'ton, napotërinquëma'. "Coisëquë ninshitaquë huarë' tē'yatërë'," itopirinquëmahüë', ya'nan nipon quëran huarë' co Yosë nohuantërinhuë' sa'ama' tē'yatacaso'. <sup>9</sup> Napoaton carinquëma' pënëinquëma'. Co sa'ama' monshihuanpirinhüë', tē'yatohuatama', oshahuanama'. Ina quëran a'na sanapi mapatama', co inaso' sa'amahuë'. Monshitëramaso pochin Yosëri ni'nin, itërin.

<sup>10</sup> Ina natanahuatona', ca'tano'sanënpitari itapona':

—Ina pochin ni'quëhuarë', co noyahuë' sa'acaso' nimara, itopi.

<sup>11</sup> —A'naquën mini Yosë nohuanton co sa'apihuë'. Na'con na'conso nipirinhüë' noya sa'acaso'. <sup>12</sup> A'naquën hua'huatapona quëran huarë' inachin co nanitopihuë' sa'acaiso'. A'naquëonta' a'napitari ma'sha onpotërin ni'ton, co huachi nanitopihuë'. A'naquëonta'



na'con na'con Yosë marë' yasacatatona', co sa'apihuë'. Ina pochin nicacamaso' nohuan-tohuatama', inapoco', itërin Quisosori.

*Hua'huaro'santa' nosororinso'*  
(*Marcos 10.13-16; Lucas 18.15-17*)

<sup>13</sup> Ina quëran hua'huaro'sa' quëpi Quisosori së'huamotocaso marë'. Inapotahuaton, inapita marë' Yosë nontërin. Na'a hua'huaro'sa' quëntapirinahuë', ca'tano'sanënpitari co nohuantopihuë':

—Ama napotocosohuë'. Quisoso apinama', itopi. <sup>14</sup> Quisososo nipirinhüë' tënin:

—Tananpitoco' hua'huaro'santa' huë'ina'. Ama a'pacosohuë'. Hua'huaro'sa' a'naroáchin yaimarinaco. Inapita pochin cancantohuatama', Yosë hua'anëntërinquë ya'conarama', itahuaton, <sup>15</sup> hua'huaro'sa' së'huamotorahuaton, Yosë nontërin noya ya'huëcaiso marë'. Nani Yosë nontohuachina, pa'nin huachi.

*Ma'huan yaimarinso'*  
(*Marcos 10.17-31; Lucas 18.18-30*)

<sup>16</sup> Ina quëran a'na quëmapiri huëcapairin.

—¿Ma'ta' Maestro caso' nii nanpimiata'huaso marë'? Sha'huitoco canta' noya nii, itërin.

<sup>17</sup> —¿Ma'marëta' noya nininso' natananco? Yosëichin noya noyaso'. Nanpimiatamaso' nohuantohuaton, pënëntërinso' natëquë', itërin.

<sup>18</sup> —¿Insopitata' natëca'huaso' ya'huërin? itërin ma'huani.

—“Ama piyapi tëpaquësosohuë'. Nani sa'an ya'huëtohuachinquën, ama monshihuanquësosohuë'. Ama ihuatëquësosohuë'. Ama nonpinapiquësosohuë'. <sup>19</sup> Tata natëquë'. Mamanta' natëquë'. Quëmaora ninosororanso pochachin a'napitanta' nosoroquë',” itërin Quisosori.

<sup>20</sup> —Hua'huatapo quëran huarë' inapita natërahuë. ¿Ma'ta' pahuantarinco nica'huaso'? itaantarin ma'huani.

<sup>21</sup> —Yosë pochachin cancantamaso' nohuantohuaton, ya'ipi ma'shanënpita pa'anconahuaton, coriqui canaranso' sa'ahuaro'sa' quëtëquë'. Ina quëran imaco huachi. Co huachi ma'sharáchin yonquihuatanhuë', inápaquë canamiataran, itërin Quisosori.

<sup>22</sup> Ina natanahuaton, co huachi noya cancantërinhuë'. “Hua'huayátërahuë ma'sha ya'huëtërinco,” ta'ton, sëtërin. Sëtatón, pa'nin huachi.

<sup>23</sup> Nani pa'pachina, ca'tano'sanënpita itërin:

—Sacai quëran ma'huano'sa' Yosë hua'anëntërinquë ya'conapi. <sup>24</sup> Ni'co' iyaro'sa'. Nahuan huëratën pi'pira'huaya naninën ya'huëtërin. Camiyoso panca masho ni'ton, sacai' inaquë ya'conacaso'. Ma'huano'saso' ina quëran saca sacai Yosë hua'anëntërinquë ya'conacaiso', itërin.

<sup>25</sup> Ina natanahuatona', pa'yanpi.

—Napoahuarë' ¿cha'ërë'po ta'ma a'naya tëranta nica? nitopi.

<sup>26</sup> Ya'ipiya notëërahuaton, itapon:

—Co insonta' inaora nanitërinhuë' cha'ëcaso'. Yosëichin nanitërin anoyacancantinquëmaso'. Ya'ipiya nanitaparín, itërin.

<sup>27</sup> —Ni'quë' Maestro. Quiyaso' ya'ipi ma'shanëhuëi patahuatoi, imasarainquën. ¿Ma'ta' ina marë' canapoi? itërin Pitrori.

<sup>28</sup> —Tëhuëenchachin iyaro'sa' canaarama'. Yosë quëran quëmapico ni'to, a'na tahuëri ya'ipiya anoyatarahuë. Naporo' noya noya ya'noato, hua'anëntacaso' shiraquë huënsëarahuë. Inaquë coisë pochin no'tëquën sha'huitarahuë. Canpitanta' acoaranquëma' ya'ipi israiro'sa' shonca cato' huënton chachin nininso' hua'anëntacamaso marë'. Shonca catonquëma' napoarama'. <sup>29</sup> A'naquëma mini imamacoso marë' ma'shanëma' patarama'. Ina marë' Yosë acanaarinquëma'. A'naquëma' pëinëma', iyaparima', oshiparima', tataparima', mamaparima', sa'ama', hui'nama', no'panëma' inapita patarama' a'chinacaso marë'. Inapohuatama', a'naíchin marë' pasa aquëtë canarëso pochin quëtarinquëma'. Ina quëran a'na tahuëri Yosë'pa' nanpimiatarama'.

<sup>30</sup> A'naquënso ipora chiníquën nanantopirinahuë', a'na tahuëri topinan piyapi pochin nisapi. A'naquënso nipirinhüë' ipora topinan piyapi pochin nīcaponaraihuë', a'na tahuëri chiníquën nanantapi, itërin Quisosori.

## 20

### *Sacatoro'sa' canapiso'*

<sup>1</sup> “Natanco iyaro'sa', Yosë hua'anëntërinso' a'chintaanta'inquëma'. A'na quëmapi ya'huërin, pancana no'pa' hua'anëntërinso'. Inaquë opasáchin sha'nin. Panca imin ya'huëtërin ni'ton, piyapi'sa' nohuantërin iminënquë asacatacaso marë'. Tashiramiachin pa'nin sacatoro'sa' yonípon. <sup>2</sup> A'naquën quënanconahuaton: ‘Sacatoco’, itohuachina, natanpi. ‘¿Onpo marëta' asacatarancoi?’ itohuachinara: ‘A'napita canapiso nápo' pahuërëaranquëma’, itërin. ‘Noyahua’. Ina nápo marë' ni'quëhuarë', sacatarai, topachinara, iminënquë a'parin sacatacaiso marë'. <sup>3</sup> Ina quëran yono pi'iriahuasos', cachiquë paantarin a'na sacatoro'sa' yoniantacaso marë'. A'naquën quënancoantarin. <sup>4</sup> ‘Canpitanta' iminëhuëquë sacatoco' no'tëquën pahuërë'inquëma’, itohuachina: ‘Noyahua’. Sacachii nipachin, ta'tona', inahuanta' paantapi sacataponá'. <sup>5</sup> Ina quëran camotëchin naquëranchin cachiquë paantarahuaton, a'napitanta' iminënquë a'parin sacatacaiso marë'. Tëhuërënahuasos', inapotaantarin. <sup>6</sup> I'huaraya huarë' naquëranchin cachiquë paantarahuaton, quëmapi'sa' quënancoantarin. ‘¿Onpoatomata' topinan huanirama? ¿Ya'ipi tahuëri ipora co sacatëramahuë' pa?’ itoonin. <sup>7</sup> ‘Co sacachátëraraihuë'. Co inso tëranta' camairincoihuë' ni'toi, ninaarai, itopi. ‘Inta nipachin, canpitanta' iminëhuëquë sacatoco’, itërin. A'na oraíchín pi'i ya'conacaso' nisapirinhüë', pa'pi sacataponá'.

<sup>8</sup> Nani tashihuachina, hua'anëni inpriatonën sha'huitërin: ‘Ya'ipi sacatoro'sa' amatahuaton, pahuërëquë'. I'huaraya huarë' sacatërinso'pita'ton pahuërëquë’, itërin. <sup>9</sup> A'na oraíchín sacatopirinahuë', huë'pachinara, ya'ipi tahuëri nanirinsos' pahuërërin. <sup>10</sup> Tashiramiachin sacatopisopita ina ni'sahuatona', yonquiapi: ‘Na'con na'con canpoaso' pahuërëarinpoa’, ta'tona', huë'pirinhüë'. Ina nápo chachin pahuërërin anta'. <sup>11</sup> Coriqui ma'pataponaraihuë', hua'anën no'huiconpi. <sup>12</sup> ‘Pasopitasos', a'na oraíchín sacatopi. Quiyaso nipirinhüë', ya'ipi tahuëri sacatërai. Tashiramiachin quëran huarë' pi'i pi'carincoi. Hua'qui' sacatopiraihuë', napopianachin pahuërërancoi. Co no'tëquën pahuërërancoihuë’, itërin a'nari. <sup>13</sup> ‘Co'chi iyasha nonpintëranquëmahuë' paya. Ina nápo coriqui marë' ya'ipi tahuëri sacatarai, itëramaco ni'ton, no'tëquën pahuërëranquëma'. <sup>14</sup> Canaransos' masahuaton, paquë huachi. A'napitasos' co hua'qui' sacatopirinahuë', caora nohuanto, ya'ipi tahuëri nanirinsos' pahuërërahuë. <sup>15</sup> Caoranquën coriqui ni'ton, onposona nohuantohuato, inanapo pahuërëta'huasos' ya'huërin. Inapita nosoroato, pahuërërahuësos' marë' ¿no'huiramaco ti?’ itahuaton, a'parin huachi. <sup>16</sup> Tëhuëenchachin a'naquënso' ipora co piyapi'sari noya ni'pirinhüë', a'na tahuëri Yosëri nóya ni'sarin. A'naquënso' nipirinhüë' ipora piyapi'sari noya ni'pirinhüë', a'na tahuëri co Yosëri noya ni'sarinhuë’, itërin Quisosori.

### *Chiminacaso' sha'huitantarinsos'* (*Marcos 10.32-34; Lucas 18.31-34*)

<sup>17</sup> Ina quëran Quirosarinquë paantapi. Paponá pochín ca'tano'sanënpita amashamiachin quëparahuaton, inapitaráchin sha'huitantarín.

<sup>18</sup> —Natanco iyaro'sa'. Quirosarinquë paantarëhua'. Inatohua' Yosë quëran quëmápicos' nipirahuë', sha'huirapiarinaco. Cotio hua'ano'sa', maistro'sa', inapita masahuatonaco: “Tëpacasos' ya'huërin,” tosapi. <sup>19</sup> Ina tosahuatona', nisha piyapiros' sa' sha'huitapi aparisitīnacoso marë'. Tëhuarahuatonaco, chiníquën huīhuīarinaco. Huīhuītonaco, pë'shaarīnacos'. Ina quëran corosëquë apatanantarīnacos' chimīna'huasos' marë'. Chiminaporahuë', cara tahuëri quëran nanpiantarahuë huachi, itaantarin.

*Santiago, Coansha inapita nohuantopiso'*  
(*Marcos 10.35-45*)

<sup>20</sup> Ina quëran cato' ca'tano'sanënpita huë'pi Quisoso nontacaiso marë'. Sipitio hui'ninpita inahuaso'. A'shinë chachin huë'pi. A'shinso' isonahuaton:

Pi'pian Siniro nonchinquën, topiraihuë', itërin.

<sup>21</sup> —¿Ma'ta' imoya nohuantëran? itërin Quisosori. —Hua'an ya'conpatan, hua'huahuëpita chiniquën nanan quëtëquë', topirahuë'. Quëma pirayan ahuënsëquë', a'nara' inchinan quëran, a'nanta' ahuënan quëran ahuënsëquë', itërin.

<sup>22</sup> —Canpitaso' co ya'ipi nitochátëramahuë' ni'ton, co no'tëquën yonquiramahuë'. Máin o'orëso pochin chiniquën parisitarahuë. Canpitanta' aparisitohuachinënuquëma', ¿ahuantapoma' ti? itërin.

—Ahuantarai, topi cato chachin.

<sup>23</sup> —Imaramaco ni'ton, canpitanta' parisitapoma mini. Napoaponahuë', co caso' nanitërahuë' chiniquën nanan quëta'huanquëmaso'. Tata Yosëichin nanitërinso'. Inari nohuantërinso' acoarin. Nani inapita marë' taparin huachi, itërin.

<sup>24</sup> Ina quëran oshaquëran a'napita ca'tano'sanënpitari natanpi. “Chini chiniquën nanantacaiso' ¿nohuantopi ti?” ta'tona', no'huipi. <sup>25</sup> Quisososo nipirinhüë', ya'ipi ca'tano'sanënpita përasahuaton, pënënin:

—Nisha piyapiro'sa' chiniquën nanantacaiso' pa'yatopi. Hua'ano'saso' chiniquën nanantatona', piyapinënpita no'huiana quëran camaipi. <sup>26</sup> Canpitaso nipirinhüë' ama inapita pochin cancantocohüë'. Yosë huëntonënuquë ya'conpatëra, co chiniquën nanantacaso' nohuantërehüë'. Noya noya iyaro'sa' yanipatama', ya'ipi piyapi'sa' catahuaco'.

<sup>27</sup> Piyapinë pochin cancantoco'. Catahuacasoáchin yonquihuatama', Yosë noya noya ni'sarinquëma'. <sup>28</sup> Canta' Yosë quëran quëmapico niporahuë', co a'napita camaica'huaso marë' o'marahuë'. Piyapi'sa' catahuaca'huaso marë' o'marahuë. Chiminarahüë na'a piyapi'sa' nicha'ëca'huaso marë', itërin Quisosori.

*Somaraya nininso'*

(*Marcos 10.46-52; Lucas 18.35-43*)

<sup>29</sup> Paantarahuatona', a'na ninanoquë canconpi, Quirico itopiso'. Ina quëran pipihuachina, notohuaro' piyapi'sari imasapi. <sup>30</sup> Cato' quëmapi'saso nipirinhüë', ira yon-sanguë huënsëapi. Somaraya ni'tona', inaquë huënsërapicoriqui ma'patacaiso marë'. “Quisoso na'huërarin,” topachinara, chiniquën përapipi.

—¡Nosorocoi Siniro! Quëmaso' Tapico' shinquën. Yosë a'paimarinquën ni'ton, nosorocoi quiyanta' topiraihuë', itopi. <sup>31</sup> A'naquëni natanahuatona', no'huipi: “Ta'toco',” itopirinhüë', aquëtë chachin chiniquën nontopi.

—¡Onpopionta' Siniro nosorocoi quiyanta' topiraihuë'! itantapi.

<sup>32</sup> Napotohuachinara, Quisososo chiniconahuaton:

—Sha'huitoco' huë'ina', itërin. Huë'pachinara:

—¿Ma'ta' iyaro'sa' onpochinquëma'? itërin.

<sup>33</sup> —Anoyarayatocoi Siniro quiyanta' ni'chii, itopi.

<sup>34</sup> Itohuachinara, nosoroaton, së'huarayarin. A'naroáchin noya ni'topi. Inapotohuachina, Quisoso imapi huachi.

## 21

*Quirosarinquë canconinso'*

(*Marcos 11.1-11; Lucas 19.28-40; Juan 12.12-19*)

<sup>1</sup> Nani Quirosarinquë ya'caritahuatona', Oriposë panënuquë canconpi. Ina ya'cariya a'na ninano' ya'huërin, Pitipaqui itopiso'. Inaquë canconahuaton, cato' ca'tano'sanënpita sha'huitërin:

<sup>2</sup> —Paso' ninanoquë paco'. Pëi' ya'natimarinquë canconpatama', mora hua'huinë chachin a'sonpinan quënanconarama'. Hua'huinso', hui'napishin. Cato chachin i'quiritahuatoma', quëshico. <sup>3</sup> “¿Onpotaomata' i'quiritaramaso'?” itohuachinënquëma', “Siniiori nohuantërin. Apira isëquë acoquiantarai,” itoco'. “Quëpaquë' nipachin,” itohuachinënquëma', quëshico, itërin.

<sup>4-5</sup> Iráca Yosë nohuanton pënëntona'piri ninshitaton tapon: “Quirosarinquë ya'huëpisopita sha'huitëquë':  
'Ni'co' iyaro'sa'. Hua'anëma' huë'sarin catahuainquëmaso marë', Yosë a'patimarinquëmaso'.

Chiníquën nanantaponahuë', topinan piyapi pochin cancantaton, mora hui'napishin aipi huënsëriarin, itëquë',” tënin.

Iráca ninorinso chachin Quisoso mora aipi paacaso yonquirin.

<sup>6</sup> Ca'tano'sanënpitaso pa'sahuatona', Quisosori camairinso chachin nipi. <sup>7</sup> I'quiritahuatona', cato chachin quëntapi. Mora aipi a'mopiso' huëtohuachinara, ina aipi Quisoso huënsërahuatón, pa'sarin. <sup>8</sup> Na'a piyapi'sa' quëchitahuatona', a'mopiso' iraquë huëtopi. A'naquëonta' panpë mono pochin nininso' masahuatona', no'paquë huëtopi. Inaquë Quisoso pa'sarin huachi. <sup>9</sup> A'naquën quëchitërapí. A'naquëonta' imasapi. Papona pochin chiníquën nonsapi:

—¡Nicha'ëcoi Tata Yosë! ¡Ma noyacha Quisososo paya! Tapico shiin inaso'. ¡Quëmari chachin chiníquën nanan quëtëran! ¡Quëma nohuanton, israiro'sacoi hua'anëntarincoi! itopi.

<sup>10</sup> Quirosarinquë canconpachina, ya'huëhuano'sa' pa'yanatona', noncaroapi.

—¿Ma piyapita' isoso'? topachinara, <sup>11</sup> —Co'ta Quisoso, Cariria parti ya'huërinso'. Nasarito quëran huëcaton, na'con pënëntërin, itopi.

*Nipa'antopisopita Yosë chinotopiso pëi quëran a'parinso'*  
(*Marcos 11.15-19; Lucas 19.45-48; Juan 2.13-22*)

<sup>12</sup> Ina quëran Yosë chinotopiso pëiquë paaton, ya'conconin. Inaquë na'a nipa'antopisopita quënanconahuaton, a'parin. A'naquën coriqui nicanpiarapirinahuë', misanënapitanta' pitara'piarin. Nëpë' pa'aninsopitanta' a'paton, huënsëpiso' pitarin.

<sup>13</sup> —Yosë quiricanën quëran pënëninpoa'. “Ca nohuanto, pëinëhuë ya'huërin piyapi'sa' nontinacosó marë',” tënin Yosë. Canpitaso nipirinhue', ihuatëro'sa' ya'huëpique pochin nitërama', itërin Quisosori.

<sup>14</sup> Ina quëran na'a cania'piro'sa' Yosë chinotopiso pëiquë ya'conpi Quisosori anoy-atacaso marë'. A'naquën somaraya nininso'. A'naquëonta' apiaro'sa'. Inapita huë'pachinara, a'naroáchin anoyatërin. <sup>15</sup> Cotio maistro'sa', corto hua'ano'sa', inapitaso' ni'sápi. Hua'huaro'saso nipirinhue' pa'yatatona', chiníquën nonsapi. “¡Ma noyacha Quisososo paya! Tapico' shiin inaso'. Yosë chachin a'patimarinpoaso',” tosapi. Ina natanahuatona', hua'ano'sari no'huipi. <sup>16</sup> No'huitona', Quisoso itopi:

—Isopita napopiso' ¿co natananhue' ti? itopi.

—Natanahuë mini. No'tëquën nonsapi. Yosë quiricanënquë naporin:

“Quëma nohuanton, hua'huaro'sa' nóya nonapiarinënquën.  
Sho'shopia'huaro'sa' niponaraihuë', ‘Ma noyanquëncha quëmaso paya,’ itarinënquën,” tënin, itërin Quisosori.

<sup>17</sup> Ina tosahuaton, Pitaniaquë pa'nin. Inaquë huë'ëpatërin.

*Iquira nara ahuirinso'*  
(*Marcos 11.12-14, 20-26*)

<sup>18</sup> Tashiramiachin ninanoquë paantapon pochin, Quisoso tanarin. <sup>19</sup> Aquë quëran iquira nara quënanin, ira yonsanquë huanirinso'. “Inaya tëranta' nitërinso' ma'to

ca'i," ta'ton pa'pirinhuë'. Na'con monohuanaponahuë', co manta' nitërinhuë'. Ina ni'sahuaton:

—Ama huachi iso nara nichinsohuë', tënin Quisoso. Napohuachina, nara a'naroáchin ahuirin. <sup>20</sup> Ina ni'sahuatona', ca'tano'sanënpita pa'yanpi.

—¿Onporahuatonta' Maistro, iso nara a'naroáchin ahuirin? itopi.

<sup>21</sup> —Tëhuë'nchachin Yosë ya'ipi nanitaparín. Ina nontohuatama', ya'ipi cancanëma quëran natëco'. “Co Yosë catahuarincohuë',” ama tocosohuë'. Ya'ipi cancanëma quëran ina natëhuatama', sacai' nininso' nanitaparama' canpitanta'. “Yosë nohuanton, iso motopi nichihuincarahuatón marëquë niichin” tënama' naporini, ina nohuanton, inapo'itonhuë'. <sup>22</sup> Yosë nontohuatama', noya natëco'. “Tëhuë'nchachin Yosë catahuarinco,” topatama', na'con catahuarinquëma'. Ma'sona tëranta' nipatama', acotarinquëma', tënin.

### *Chiniquën nanantërinso'*

*(Marcos 11.27-33; Lucas 20.1-8)*

<sup>23</sup> Ina quëran Yosë chinotopiso pëiquë paantarín piyapi'sa' a'chintantacaso marë'. A'chinaquëya', cotio ansiano'sa', corto hua'ano'sa', inapita huë'pi.

—¿Onporahuatonta' chiniquën nanantatón, nipa'antopisopita a'paran? ¿Inta' nanan quëtërinquën ina pochín nicacaso'? Sha'huitocoi, itopi.

<sup>24</sup> —Inta nipachín, carinquëmanta' natainquëma'. Ina sha'huitohuatamaco, nanan quëtërinco'so' sha'huitaranquëma'. <sup>25</sup> ¿Incarita' Coansha nanan quëtërin piyapi'sa' aporintacaso marë'? ¿Yosëri nanan quëtërin, piyapi'sari nica? ¿Ma'ta' tënama' canpita? Sha'huitoco carinquëmanta' nanan quëtërinco'so' sha'huichinquëma', itërin Quisosori.

Natanahuatona', inahua capini ninontapi.

—¿Ma'ta' itahua'? “Yosëri nanan quëtërin aporintacaso',” itohuatëhua', “¿Onpoatomata' nipachín co natëramahuë'?” itarínpoa'. <sup>26</sup> Nipirinhuë', “Co Yosëri nanan quëtërinhuë'. Piyapiri quëtërin,” itohuatëhua', na'a piyapi'sa' no'huiarinënpoa'. “Yosëri a'parín pënëntacaso marë',” topi ya'ipiya, nitopi.

<sup>27</sup> Nani ninontohuachinara, Quisoso itapona':

—Ahuën. Co quiyaso' nitotëraihuë'. ¿Incariso' Coansha nanan quëtomara? Co nitotëraihuë', toconpi.

—I'yan, napoahuarë' co carinquëmanta' insosona nanan quëtërinco'so' sha'huitaranquëmahuë', itërin Quisosori.

### *Cato' hui'napi'sa' napopiso'*

<sup>28</sup> Ina quëran itaantarín:

—Apira iyaro'sa' a'chintaanta'inquëma' yonquico'. A'na quëmapi ya'huërin opa sha'na'pi. Inaso', Cato' hui'nin ya'huëtërin. A'naso' sha'huitërin: “Ipora tahuëri, conpa, iminquë sacatonquë',” itopirinhuë', <sup>29</sup> “Inca tata, co yasacatërahuë',” itërin. Napotaponahuë', oshaquëran yonquiantarin. Noya cancantatón, sacatapon pa'nin. <sup>30</sup> A'na hui'nionta' camairín iminquë sacatacaso'. “Noyahua'. Pa'i nipachín canta' sacachi,” itaponahuë', co pa'ninhuë'. <sup>31</sup> Cato' hui'nin chachín sha'huitopirinhuë', ¿insoarita' natërinso'? itërin Quisosori.

—Ya'nan camairinso' pa'pin natëton, sacatërin, itopi.

—No'tëquën naporama'. A'naso' “Pa'i nipachín,” taponahuë', co pa'ninhuë'. Inapochachín copirno marë' coriqui ma'patona'piro'sa', monshihuana'piro'sa', inapita co noyahuë' yonquipirinahuë', iporaso' ina naniantahuatona', Yosë imasapi. Imatona', tëhuë'nchachín hua'anëntërinquë ya'conapi. Canpitaso nipirinhuë' co yaya'conamahuë'.

<sup>32</sup> Coansha Paotista pënënpirinquëmahuë', co yanatëramahuë'. Noya cancantamaso marë' a'chintopirinquëmahuë', co yanatëramahuë'. Copirno marë' coriqui ma'patona'piro'sa', monshihuana'piro'sa', inapitaso nipirinhuë' a'naroáchin natëtona', noya cancantopi. Ina nicapomarahuë', co yonquiramahuë'. Co natëtochináchinhuë' cancantërama', itërin.



*Inpriatoro'sa' co noyahuë' yonquipiso'*  
(*Marcos 12.1-12; Lucas 20.9-19*)

<sup>33</sup> Ina quëran itaantarín: “A'nanta' pënënto nanan, a'chinchinquëma', natanco'. A'na quëmapi pancana imianatërin. Inaquë oparachin sha'nin. Nani pairapirahuaton, na'pi quëran nanpi ninin opa to'poitona' huino nicacaiso marë'. Naporahuaton, tori ninin. Inaquë piyapinën ya'huaton nocorarin ama ihuacaiso marëhuë'.

Nani tiquihuachina, inpriatoro'sa' acorin a'paicaiso marë'. ‘Sacatëramaso marë' patoma nitërinso' canpitaoranquën marë' maco'. Patomachin canta' acotoco,' itërin. Itahuaton, a'na parti pa'nin huachi. <sup>34</sup> Ina quëran nani nitohuachina, aquë ya'huërin quëran piyapinënpita a'parin patoma nitërinso' ma'pacaiso marë'. <sup>35</sup> A'papurinhuë', inpriatonënpitari masahuatona', ahuëpi. A'naso' tëpapi. A'nanta' na'piquë të'yaratona', tëpapi. <sup>36</sup> Naquëranchin hua'anëni a'napita a'paantarín. Na'a piyapinënpita a'paantapirinhuë', inachachin nitantapi. Ahuëantarahuatona', topinan a'paantapi.

<sup>37</sup> Ina quëran hua'anënso' yonquiantarin. ‘¿Ma'cha onpochiya? Na'aya'pi a'papurahuë', co manta' quëtopihuë'. Hui'nahuë chachin nipachin a'pa'i. Ina tëhuënchinso' natëapona' nimara,' ta'ton, hui'nin chachin a'papurinhuë'. <sup>38</sup> Ya'caritëraso', inpriatoro'sari quënanpi. ‘Ni'cochi. Hui'nin chachin huë'sarin huachi. Pa'pin chiminpachin, iso no'pa chachin hua'anëntapon. Huëco' tëpa'ahua' ya'ipi ma'shanënpita matahua', nitopi. <sup>39</sup> Naporahuatona', hua'anën hui'nin mapi. Masahuatona', aipiran të'yatopi. Ina quëran tëpapi huachi.

<sup>40</sup> Napotohuachinara, ¿ma'ta' onpotintapon hua'anëni, hui'nin chachin tëpatopi ni'quëhuarë'?” itërin Quisosori.

<sup>41</sup> —Pa'pi co noyahuë' nipi ni'ton, chiniquën no'huiton, a'naroáchin tëpapon. Ina quëran nasha inpriatoro'sa' acoantarín. Inapitaso' opa nitohuachin, no'tëquën quëtapi huachi, itopi.

<sup>42</sup> —Íráca Yosë quiricanënuë ninshitërinso' ¿co nontëramahuë' ti? Ninshitaton, naporin:

“Na'pi quëran yapëihuachina, a'na na'pi quënanpirinahuë', pëina'piro'sa' co nohuantopihuë'. ‘Napoonin,' ta'tona', të'yatopirinahuë'.

Hua'anëni maantarahuaton, ‘Iso na'pi na'con na'con nohuantërahuë pëica'huaso marë', ta'ton, noya acoantarín.

Yosëri chachin inapotërin. Napoaton ‘ma noya' tënëhua', tënin quiricanënuë.

<sup>43</sup> Napoaton itaranquëma', Yosë yahua'anëntopirinquëmahuë', co nohuantëramahuë' ni'ton, a'poarinquëma'. Nisha piyapiro'sa' piyapinënpita pochin ni'sarin. Inapitaso' noya natëapi. [ <sup>44</sup> Ina na'pi i'patohuatëra, anotatë' ya'panë'. A'na tahuëriso nipirinhuë' ina na'piri chachin anoantohuachin, a'naquën ni'sharianin,] itërin Quisosori.

<sup>45</sup> Natanahuatona', cotio hua'ano'sa', parisioro'sa', inapita yonquipi. “Canpoa' chinotatonpoa' pënënarínpoa',” ta'tona', no'huipi. <sup>46</sup> No'huitona' tashinan pëiquë yapo'mopirinahuë', piyapi'sa' të'huatatona', co mapihuë'. Notohuaro' piyapi'sa' Quisoso noya natanpi. “Yosëri chachin acorin pënëinpoaso marë',” topi. Napoaton cotio hua'ano'sa' co nanitopihuë' Quisoso macacaiso'.

## 22

*Coshatacaso marë' amatërinso'pita*  
(*Lucas 14.15-24*)

<sup>1</sup> Ina quëran a'na pënënto nanan ya'huëre', sha'huitaantarín:

“Yosë hua'anëntërinso' a'chintaanta'inquëma'. <sup>2</sup> A'na copirno naporinso pochin ninin. Inaso', hua'huayátërahuë piyapi'sa' hua'anëntërin. Hui'nin yasa'apachina, panca pita nisarín. <sup>3</sup> Napoaton piyapinënpita a'parin piyapi'sa' sha'huitacaiso marë'. Sha'huitopirinahuë', co nohuantopihuë' huëcacaiso'. <sup>4</sup> Copirnosonatanahuaton,

a'napita piyapinēnpita a'paantarin: 'Sha'huitonco' manóton huē'ina'. Nani ohuacaro'sa' amoshin nipisopita atēpatērahuē capacaso marē'. Nani ya'ipi taparahué. Huēco huachi ca'ahua', itonco', itahuaton a'parin. <sup>5</sup> Pa'sahuatona', sha'huitaantapirinahuē'. 'Co'chi nanitēraihuē paya,' toconpi a'naya a'naya. A'naso' iminquē pa'nin. A'nanta' ma'sha pa'anapon pa'nin. <sup>6</sup> A'naquēniso', piyapinēnpita masahuatona ahuēpi. Inapotatona' tēpapi. <sup>7</sup> Copirnosó' natantahuaton, chiníquēn no'huitērin. Sontaro'sa' a'parin ana'intacaiso marē'. Piyapinēnpita tēpatopi ní'ton, inahuanta' sontaro'sari tēparin. Napotahuatona' pēinēnapita ahuiquitopi. <sup>8</sup> Piyapinēnpita amatantarahuaton, sha'huitērin. 'Pita marē' nani tapapirahuē'. Amatērahuēsopitaso' co inashitopihuē' isēquē nicacaiso ní'ton, co huachi inapita yonquirahuē. <sup>9</sup> A'na ira a'na ira pa'tatoma', a'napita piyapi'sa' quēnanpatama', sha'huitonco' huē'ina'. Inso tēranta' quēnanpatama', sha'huitoco' huē'ina'. Hui'nahuē sa'acaso marē' noya pita nisarahuē,' itērin. <sup>10</sup> Piyapinēnpita pa'sahuatona', na'a piyapi'sa' sha'huitēra'piapi. Noya nipisopita, co noyahuē' nipisopitanta' sha'huitēra'piapi. Pita pēi' noyá ya'sotopi.

<sup>11</sup> Ya'conahuaton copirnosó', a'naya a'naya noya nontērin. A'na quēmapiso nipirinhué', co noya nitaparinhué' pita pēiquē ya'conacaso marē'. <sup>12</sup> Ina ní'sahuaton, copirnorí itērin: '¿Onpoatonta' iyasha co noya nitapaponahuē' ya'conan?' itērin. Napotopirinhué', co manta' tēninhué'. Tapanaton, ta'tárin. <sup>13</sup> 'Iso quēmapi masahuatoma', tonpoco'. Pa'on, tanpaquēn, inapita noyá tonpoco'. Nani tonporahuatoma', tashinanquē tē'yatoco'. Inatohua' piyapi'sa' na'nērapí, chiníquēn parisitapi huachi,' itērin piyapinēnpita. <sup>14</sup> Inapochachin notohuaro' piyapi'sa' Yosēri amatērin huēntonēnquē ya'conacaiso marē'. Na'a natanpirinhué', caraíchín huayonin," itērin.

### *Coriqui ma'patērinso'*

*(Marcos 12.13-17; Lucas 20.20-26)*

<sup>15</sup> Parisioro'sa' natanahuatona', ninontopi. "Huēco' nonpintatēhua', nisha nisha natahuan'. Co no'tēquēn a'panihuachinpoahuē', sha'huirapiahua'," nitopi. <sup>16</sup> Napoaton a'naquēn a'papi Quisoso natanacaiso marē'. Irotisē pa'yatopisopitanta' caraya pa'pi. Canconahuatona', noyásha nontonpi nonpintacaiso marē'.

—Quēmaso' Maistro, noyanquēn. Co onporonta' nonpinanhue'. Yosē pēnēninpoaso' no'tēquēn a'chintērancoi. Piyapi'sa' no'huipirinēnquēonta', co ina yonquiranhue'. Co hua'an tēranta' tē'huatēranhue'. <sup>17</sup> Napoaton yanatanainquēn. Noma copirnosó' nisha piyapi niponahuē', ya'ipinpoa' hua'anēntērinpoa'. Nani pi'ipi coriqui ma'painpoaso marē' comisionēnpita a'parin. Huē'pachina, ¿noya ipora quētacaso', tí? ¿Ma'ta' Yosē nohuantērin nica'huaiso'? Sha'huitocoi nitochii, itopi.

<sup>18</sup> Yanonpintopiso' nitotaton, Quisosori itērin:

—¿Canpitaso' nonpintēnquēma'! ¿Ma'marēta' yaatēhuēramaco? <sup>19</sup> Noma coriqui a'notoco ní'i, itērin. Napotohuachina, a'notopi.

<sup>20</sup> —¿Inta' isoso' nonanpiso'? itohuachina, —Noma copirno, itopi.

—¿Inta' nininēonta' isēquē ninshitopi? itantarin.

<sup>21</sup> —Noma copirno chachin, itopi.

—Copirno coriquinēn ní'quēhuarē', quētantaco'. Naporahuaton, Yosē nininpoa' ní'ton, hua'anēntērinpoa'. Ya'ipi cancanēma quēran ina natēcaso' ya'huērin, itērin.

<sup>22</sup> Natanahuatona', pa'yanpi. "¡Ma noyacha a'paniripoa paya!" ta'tona', patopi huachi.

### *Piyapi'sa' nanpiantarapiso'*

*(Marcos 12.18-27; Lucas 20.27-40)*

<sup>23</sup> Naporó' tahuēri a'napita cotio hua'ano'sa' huē'pi, satoro'sa' itopiso'. Inapitaso' nisha a'chinpi. "Piyapinpoa' chiminpatēhua', co onporonta' nanpiantarihuahuē'," toconpi. Inapitanta' Quisoso yanonpintatona', huēcapiapi.

<sup>24</sup> —Íráca Maistro Moisësë pënëninpoa': "Quëmapi sa'aponahuë co hui'nin ya'huëyátërasohuë' sa'in ayananpihuachin, ina iini chachin imoroën maantacaso' ya'huërin. Hui'nahuanpachin, iinco' apoin inari ya'huërëtacaso marë'. Ina quëran mashotohuachin, ma'shanën, no'panën, inapita maantarin," ténin Moisësë. <sup>25</sup> Canchisë iyaro'sa' iráca ya'huërin. Paninanso' sa'apirinhüë'. Co hui'nin ya'huëyátërasohuë', sa'in ayananpirin. <sup>26</sup> Ina iini chachin maantarin. Moisësë téninso chachin manin. Inanta' co hui'nin ya'huëyátërasohuë', chimiantarin. A'na iionta' inapoantarin. Canchisë iinpita chachin inapoantapi. Co a'naya tëranta' hui'nina ya'huëchátërasohuë', ya'ipi taquipi. <sup>27</sup> Ina quëran sanapinta' chiminin huachi. <sup>28</sup> Canchisë chachin ina sanapiáchin mapirinhüë', nanopiantacaso tahuëri nanihuachin, ¿inquën chachincha sa'in ninë' poya? itopi.

<sup>29</sup> —Canpitaso' co no'tëquën yonquiramahuë'. Yosëso' chini chiníquën nanantopirinhüë', co nohuitëramahuë'. Quiricanëonta' co nitotëramahuë'. Napoaton co nanitëramahuë' no'tëquën yonquicamaso'. Yosëso' ya'ipiya nanitaparin. <sup>30</sup> Chiminpisopita nanopiantahuachina', co huachi sa'asapihuë'. Sanapi'santa' co huachi so'yaapihuë'. Anquëniro'sa pochin nisapi. <sup>31</sup> Chiminpisopita tēhuëinchachin nanopiantarapi. Moisësë nontohuachina, Yosëri chachin sha'huitërin. <sup>32</sup> "Caso' Yosëco. Apraan chinotarainco. Isaco, Cacopo, inapitanta' chinotarainaco," itërin. Cara chachin iráca chiminpirinhüë', naporin. Nanpispitaráchin Yosë chinotapi. Napoaton inapitanta' chiminpirinhüë', Yosë marëso nanopirápi, itërin Quisosori.

<sup>33</sup> Piyapi'sa' ina natanahuatona', pa'yanpi. "¡Ma noyacha a'chintërinpoa paya!" topi.

*Yosë na'con na'con nohuantërinso'*  
(Marcos 12.28-34)

<sup>34</sup> Natanahuatona', parisioro'santa' niyontonpi. "Quisoso no'tëquën a'panitaton, satoro'sa' atapanin ni'ton, co huachi yanatanpihuë'," ta'tona', niyontonpi ina nontantacaiso marë'. <sup>35</sup> A'na maistro iráca nanan noya nitotërinso' huë'sahuaton, Quisoso nontiirin atëhuëcaso marë'.

<sup>36</sup> —Pi'pian Maistro yanatananquën. Yosë na'con pënëninpoa'. ¿Ma'ta' na'con na'con nohuantërin nicacaso'? itiirin.

<sup>37</sup> —Inta nipachin sha'huichinquën. Yosëso' Siniro ni'ton, hua'anëntërinpoa'. Ina na'con nosorocaso' ya'huërin. "Ya'ipi cancanëma quëran, ya'ipi hua'yanëma quëran, ya'ipi yonquinëma quëran, ya'ipi inaquëranpita nosoromiatoco'," ténin. <sup>38</sup> Ina na'con na'con nohuantërin. <sup>39</sup> Isonta' Yosë nohuantërin: "Quëmaora ninosororanso pochachin a'napitanta' nosoroco'," ténin. <sup>40</sup> Moisësë, pënëntona'piro'sa', inapitaso' na'con pënëntopirinhüë', nosorocaso' na'con na'con nohuantopi. Napoaton nosorohuatama', Yosë yonquirinso chachin imasarama', itërin Quisosori.

*Yosëri a'paimarinso'*  
(Marcos 12.35-37; Lucas 20.41-44)

<sup>41</sup> Parisioro'sa' nani niyontonpi ni'ton, Quisosorinta' natanarin no'tëquën ayonquicaso marë'.

<sup>42</sup> —Íráca Yosë quiricanënuë sha'huitërinpoa'. "A'na tahuëri a'na quëmapi acoarahuë piyapi'sa' nicha'ëcaso marë'. Inaso' Cristo itopiso'," ténin Yosë. ¿Inta' shiin inaso'? itërin Quisosori.

—Tapico' shiin inaso', topi parisioro'sa'.

<sup>43-44</sup> —Naporinchi paya. Inaso nipirinhüë', iráca Ispirito Santo nohuanton, Tapiri chachin Cristo ninoton, ninshitërin:

"Yosëri Sinioronëhuë sha'huitërin. 'Inchinanëhuë quëran huënsëquë' inimiconënpita cari minsëchinquën, itërin Yosëri," ténin Tapi.

<sup>45</sup> Shia'huain niponahuë', Cristo yonquiaton, "Sinioronëhuë," ténin. ¿Onpoatonta' naporin? itërin Quisosori.

<sup>46</sup> Natanaponaraihuë', co manta' a'panitopihuë'. "Yosë hui'nin chachin ni'ton, Tapiri Cristo chinotërin," ta'caiso nipirinhüë', co yanatëpihuë'. Napoaton naporo quëran huarë' tapanatona', co huachi nohuantopihuë' Quisoso natanacaiso'.

## 23

*Parisioro'sa', cotio maistro'sa', inapita chiniquën pënëninso'*  
(*Marcos 12.38-40; Lucas 11.37-54; 20.45-47*)

<sup>1</sup> Ina quëran piyapi'sa' a'chintantarin. Ca'tano'sanënpitanta' natanapi. <sup>2</sup> "Tëhuë'nchachin iyaro'sa', cotio maistro'sa', parisioro'sa', inapita na'con a'chintatënë'nquëma': 'Moisësë pënëninpoaso' no'tëquën a'chinchinquëma', topi. <sup>3</sup> Yosë nanamën a'chintohuachinë'nquëma', noya natëco'. Nipirinhüë', ama inapita nonancosohüë'. Inahuaso' pënënpirinë'nquëmahuë', co cancanëna quëran imapihuë'. <sup>4</sup> Ni'co'. Panca pë'pëto quëpahuatëra, sacai' iratacaso'. Inapitaso' inapochachin a'chintërinë'nquëma'. Co Yosë quiricanë'náchin a'chinpihuë'. Inahuara yonquinëna quëraonta' nisha nisha pënëntopi. Panca pë'pëto apë'pëtëreso pochin nitërinë'nquëma'. A'chintopirinë'nquëmahuë', inahuara chachionta' co natëpihuë'. <sup>5</sup> Pi'pian Yosë quiricanën ninshitahuatona', tē'yainaquë achinpi piyapi'sari nicacaiso marë'. Naporahuatona', naporopi a'mopi nohuitacaiso marë'. 'Inapohuatëhua', piyapi'sa' noya ni'sarinënpoa', ta'tona', napopi. Napoaponaraihuë', co aquëtë' Yosë yonquipihuë'. <sup>6</sup> Pita nipachina, huancánachin yahuënsëconpi. Niyontonpiso pëiquë ya'conpachinara, hua'ano'sapitarë' yahuënsëconpi. <sup>7</sup> Cachiquë pa'pachinara, na'a piyapi'sari noya nontopi. 'Huë'cama maistro,' itohuachinara, pa'yatopi.

<sup>8</sup> Canpitaso nipirinhüë', ama maistro itiinëmaso nohuantocosohüë'. Ya'ipinquëma' iyama pochin nisarama'. Casáchin no'tëquën a'chintëranquëma'. <sup>9</sup> Ama a'na piyapi na'con na'con pa'yatocosohüë'. 'Quëmaso' tata pochin ni'nanquën. Natëaranquën huachi,' ama itocosohüë'. Yosëíchin natëcaso' ya'huërin. Inaso' tatanënpoa' inápaquë ya'huërinso'. <sup>10</sup> Ama hua'an pochin chiniquën nanan nohuantocosohüë'. 'Ca natëco,' ama tocosohüë'. A'naíchin hua'an ya'huëtërinquëma', Cristo itopiso'. <sup>11</sup> Yosë huëntonë'nquë ya'conpatëra, co chiniquën nanantacaso' ya'huërinhuë'. Noya noya yanipatama', ya'ipi piyapi'sa' catahuaco'. <sup>12</sup> 'Caso' noya noyaco,' topatama', Yosë atapanarinquëma'. Nipirinhüë', 'Caora co nanitërahuë' noya nica'huaso'. Catahuaco Sinioro,' topatama', Yosë catahuaarinquëma'. Noya noya acoarinquëma', itërin.

<sup>13</sup> Ina quëran Quisosori cotio maistro'sa', parisioro'sa inapita pënënaton itapon:

"Cotio maistro'sanquëma', parisioro'sanquëma', canpitaso nonpintë'nquëma ni'ton, ¡ma'huantacha nisarama paya! Co no'tëquën a'chinamahuë' ni'ton, Yosë iranën ya'copiatë pochin nitërama'. Co no'tëquën Yosë imatomahuë', co canpita tëranta' Yosë hua'anëntërinquë ya'conaramahuë'. A'napitanta' yaya'conpirinahuë', co catahuaramahuë' ya'conacaiso'. Canpita nonaninë'nquëma' ni'ton, inapitanta' co ya'conpihuë'. [ <sup>14</sup> Canpitaso nonpintë'nquëma ni'ton, ¡ma'huantacha nisarama paya! Quëyoronos'a' nonpintërama'. Noya nontapomarahüë', a'naya a'naya nonpintatoma', ma'shanënapita matërama'. Ina quëran niyontonpiso pëiquë ya'conpatamara, hua'qui' Yosë nontapomarahüë', co cancanëma quëran imaramahuë'. Ina marë' aquë aquëtë' ana'intarinquëma'. ]

<sup>15</sup> Canpitaso' nonpintë'nquëma ni'ton, ¡ma'huantacha nisarama paya! Nisha piyapi'sa' a'chintacamaso marë' ira iratërantarama'. Aquë paatoma', a'naya a'naya a'chintërama' canpita pochin yonquicaiso marë'. Natëhuachinë'nquëma', aquë aquëtë' co noyahuë' cancantapi. Ya'ipinquëma' parisitopiquë pa'sarama huachi.

<sup>16</sup> ¡Ma'huantacha nisarama paya! A'napita yaa'chintopiramahuë', co no'tëquën yonquiatomahuë', somaraya pochin cancantërama'. Somaraya nininso' co pi'pian tëranta' nanitërinhuë' a'napita quëpacaso'. Inapochachin canpitaso' co Yosë nohuitatomahuë',



co nanitëramahuë' a'napita a'chintacamaso'. 'Yoscoarë' topatëra, no'tëquën nontacaso' ya'huërin,' topi ya'ipi piyapi'sa'. Canpitaso nipirinhue' nisha nisha tënama'. 'Yosë chinotopiso pëi' ya'huërin ni'ton, no'tëquën nontaranquën,' itopiramahuë', nonpinpatamanta', 'Co ina marë' Yosë ana'intarinpoahuë', toconama'. 'Yosë chinotopiso pëiquë oro ya'huërin ni'ton, no'tëquën nontaranquën, topatëra, naporu huarë' no'tëquën nontacaso' ya'huërin,' topiramahuë'. <sup>17</sup> Co no'tëquën yonquiramahuë'. Yosë chinotopiso pëi' mini oro quëran noya noya ninin. Oro inaquë ya'huërinso' co aquëtë' yonquicaso' ya'huërinhuë'. Co chinotopiso' pëiquë ya'huërinhuë' naporini, co Yosëri noya ni'itonhuë'. <sup>18</sup> Yosë chinotopiso pëiquë artaro ya'huërin. Inaquë ma'sha acopi Yosë chinotacaiso marë'. 'Artaro ya'huërin ni'ton, no'tëquën nontaranquën,' tapomarahue', nonpinpatamanta', 'Co ina marë' Yosë ana'intarinpoahuë', toconama'. 'Ma'sha inaquë acopiso' ya'huërin ni'ton, no'tëquën nontaranquën, topatëra, naporu huarë' no'tëquën nontacaso' ya'huërin,' topiramahuë'. Yanonpinatoma', naporama'. <sup>19</sup> Somaraya pochin cancantatoma', co no'tëquën yonquiramahuë'. Co ma'sha acopiso' aquëtë' yonquicaso' ya'huërinhuë'. Artaro mini ma'sha acopi quëran noya noya ninin. Artaroquë acopi ni'ton, Yosëri noya ni'nin. <sup>20</sup> 'Artaro ya'huërin ni'ton, no'tëquën nontaranquën,' topatama', ya'ipi inaquë acopisopitanta' yonquicaso' ya'huërin. <sup>21</sup> 'Yosë chinotopiso pëi' ya'huërin ni'ton, no'tëquën nontaranquën,' topatama', Yosë inaquë ya'huërinso' yonquicamaso' ya'huërin. <sup>22</sup> Inapochachin 'Pi'iro'të' ya'huërin ni'ton, no'tëquën nontaranquën,' topatamanta', co pi'iro'të'achin yonquicaso' ya'huërinhuë'. Yosë inaquë ya'huaton, hua'anëntarinpoa'. Inanta' yonquicamaso' ya'huërin.

<sup>23</sup> Canpitaso nonpintënuëma ni'ton, jma'huantacha nisarama paya! 'Nani ma'sha quëran, diesmo Yosë quëtacaso' ya'huërin,' itërinpoa' Moisésë. Ina natëpiramahuë', nonpintënuëma' canpitaso'. Napoaton ma'sha sha'patamara, pi'pian quëtërama'. Ya'ipi cosharo apimotacaso marë' sha'nama' quëran huarë' diesmo quëtërama'. Inaso' noya nipirinhue', Yosë na'con na'con nohuantërinso' naniantërama'. Co no'tëquën nonamahuë'. Co sa'ahuaros' nosororamahuë'. Naporahuaton, co cancanëma quëran huarë' Yosë natëramahuë'. Ina marë' ana'intarinquëma'. <sup>24</sup> Somaraya pochin cancantatoma', co no'tëquën a'chinamahuë'. Ni'co'. Canpitaso' yao'opatamara, ama o'oso tëranta' o'ocamaso marëhuë' noyá panshairama'. Napoapomarahue', camiyo a'naroáchin mitëramaso pochin ninama'. Yosë na'con na'con nohuantërinso', co natëramahuë'.

<sup>25</sup> Canpitaso' nonpintënuëma ni'ton, jma'huantacha nisarama paya! Tëhuënhachin yanonpinama'. Ni'co'. A'naquën minë', sënan, inapita pa'mohuachinara, aipiáchin pa'mopi. Acoposo nipirinhue', në'huënantëtërin. Inapochachin canpitaso' piyapi'sa' noya nicainënuëmasoachin yonquipiramahuë', acopo' cancanëma quëranso', co noya yonquiramahuë'. Nonpinatoma', yaihuatërama'. Ma'sharáchin nohuantatoma', co Yosë nohuantërinso' ninamahuë'. Ina marë' Yosë ana'intarinquëma'. <sup>26</sup> Canpitaso parisioro'sanquëma', somaraya pochin cancantërama'. ¿Onporahuatomacha co no'tëquën yonquiramahuë' paya? Cancanëma'ton anoyatoco'. Ina quëran noya cancantatoma', noya nisarama huachi.

<sup>27</sup> Canpitaso' nonpintënuëma ni'ton, jma'huantacha nisarama paya! Yosë quiricanën a'champiramahuë', yanonpinama'. Ni'co'. Chimipi na'pi naninquë po'mohuatëra, aipiran quëran huiríchinquë pashitëré'. Noyápiachin ya'nopirinhue', acoposo' nansë, nosha chanatërinso', inapita co nishinahuën' nisarin. <sup>28</sup> Inapochachin canpitaso' ninama'. Piyapi'sa' noya nicatënuëma': 'Ma noya maestro'sa' Yosë natëpi,' topirinhue'. Acopo' cancanëma quëranso nonpinatoma', pa'pi co noyahuë' cancantërama'.

<sup>29</sup> Canpitaso' nonpintënuëma ni'ton, jma'huantacha nisarama paya! Iráca Yosë piyapinënpita pënëntohuachinara, shimashonëmapitari no'huitona', tëpapi. Ipora canpitaso', pa'pitopiquë pëirapirama'. Noya quëmapi'santa pa'pitopiso', yancoro'sa' shara-



pirama'. Ama naniantacaso marëhuë' napotërama'. <sup>30</sup> Inapotatoma' naporama': 'Iráca chachin ya'huërai naporini, co quiyariso' tēpa'itohuë', topiramahuë', <sup>31</sup> shimashonëma' quēpatoma', canpitanta' tēpatona'piro'sa pochin cancantarama'. <sup>32</sup> Inapita pochin cancantatoma', co noyahuë' nisarama'. Na'con na'con oshahuanarama'.

<sup>33</sup> ¡Ya'huan pochin cancantatoma', pa'pi co noyahuë' nisarama'! ¿Onporahuatomacha pën quëran cha'ërë'ponquëmaya? Co cha'ësaramahuë'. <sup>34</sup> Napoaton pënëntona'piro'sa' a'pataranquëma'. No'téquën yonquina'piro'sa', a'china'piro'sa' inapita a'pataranquëma' a'chintinënquëmaso marë'. No'téquën pënënaponënquëma' nipirinhüë', no'huiarama'. A'chintopirinhüë', a'naquën tēpaarama'. A'naquën niyontonpiso pëiquë chiníquën huihuiarama'. Nisha nisha ninanoquë imatoma', aparisitarama'. A'naquëonta' corosëquë patanantatoma', tēpaarama'. <sup>35</sup> Iráca quëran huarë' noya quëmapi'sa' pënëntopirinhüë', na'a tēpapi. Apiri'ton noya quëmapi nipirinhüë', iini tēparin. Ina piquëran a'naya a'naya noya pënëntopirinhüë', tēpara'piapi. Na'a pi'ipi napopi. Napoin quëran Sacariasë tēpapi anta'. Piriquiasë hui'nin inaso'. Yosë chinotopiso pëi i'iratëquë artaro ya'huërinso aquëcha tēpapi. Canpitaso' ina nitotapomarahüë', co natantochináchinhüë' cancantërama'. Napoaton Yosë chiníquën ana'intarinquëma'. <sup>36</sup> Iráca quëran huarë' shimashonëmapita co noyahuë' cancantopi. Ipora canpitanta' inapita pochachin cancantarama' ni'ton, Yosë na'con ana'intarinquëma huachi, tēnahuë', itërin.

*Quirosarinquë ya'huëpisopita yonquiaton, Quisoso sëtërinso'*  
(Lucas 13.34-35)

<sup>37</sup> Ina quëran taantarin: “¡Ya'ipi Quirosarinquë ya'huëramasopita yonquiatënquëma', chiníquën sëtërahuë! Na'a pënëntona'piro'sa' Yosë a'patërinquëma' pënëinënquëmaso marë'. A'papirinhüë', tēparama'. A'naquën na'piquë tē'yaratoma', tēparama'. Ya'ipinquëma' nosoroatënquëma', na'aro' yacatahuapiranquëmahüë', co ca tēranta' nohuantëramacohüë'. Atari hua'huin to'cohuëtërinso pochin yapa'poyapiranquëmahüë', co nohuantëramacohüë'. <sup>38</sup> Napoaton Tata Yosë patarinquëma'. Chinotëramaso pëinta' patarin. Co huachi catahuaarinquëmahüë' ni'ton, noquitarama huachi. <sup>39</sup> Canta', co huachi quënanaramacohüë'. O'manta'huaso' tahuëri huarë' quënaantaramaco. Naporo': ‘¡Ma noyanquëncha quëmaso paya! Sinioro chachin a'paimarinquën,' itaramaco huachi,” itërin Quisosori.

## 24

*Yosë chinotopiso pëi' ohuatapiso'*  
(Marcos 13.1-2; Lucas 21.5-6)

<sup>1</sup> Ina quëran Yosë chinotopiso pëi quëran pipihuachinara, ca'tano'sanënpitari itapona': —Ni'quë' Maestro. Ma noyápiachin Yosë chinotopiso pëi', itopi.  
<sup>2</sup> —Iporaso' ya'ipiya noyápiachin ni'piramahuë', a'na tahuëriso' ya'ipiya ohuatapi. Co a'na na'piya tēranta' niya'huiritarinhüë', itërin Quisosori.

*Ayaro' tahuëri ya'caritërinso'*  
(Marcos 13.3-23; Lucas 21.7-24; 17.22-24)

<sup>3</sup> Ina quëran Oriposë panënquë pa'sahuaton, inaquë huënsëconin. Ca'tano'sanënpitaráchin ya'huëpi. Inapitari huëcapairahuatona', itiipi:  
—¿Onporota' Maestro ohuatapi? Ayaro' tahuëri ya'caritohuachin, ¿ma'ta' onporahuachina' nitotapoi? ¿Onporota' o'mantararan? Inapita sha'huitocoi quiyanta' nitochii, itopi.

<sup>4</sup> —Ni'cona iyaro'sa' nonpintochinënquëma'. <sup>5</sup> A'naquën huëcapona'. “Caso' Cristoco. Yosë chachin a'paimarinco,” tosapi. Nonpintë' nipirinhüë', na'a piyapi'sari imasapi.

<sup>6</sup> Nisha nisha parti piyapi'sa' nino'huiapi. Niahuërahuatona', quira nisapi. Ina natanpatama', ama pa'yancosohuë'. Yosë nohuanton, naporapi. Napoaponahuë', co isoro'pa' ta'huanchátëraponhuë'. <sup>7</sup> Nisha nisha nananguë nonpisopita nino'huitona', quira nisapi. Copirnoros'a capini nino'huitona', piyapinënpita camairapi quira nicacaiso marë'. Nisha nisha parti cosharo' pahuanpachin, tanari piyapi'sa' tiquirarin. Naporahuaton, a'na parti a'na parti ocohua pa'sarin. <sup>8</sup> Ni'co'. Sanapi yahuaihuachina, iquitárin, co a'naroáchin huairinhuë'. Inapochachin ayaro' tahuëri ya'caritohuachin, piyapi'sa' parisitaponaraihuë', co isoro'pa' ta'huanchátëraponhuë'.

<sup>9</sup> "Naporos' tahuëri'sa' co noya piyapi'sahuë' masarinënguëma'. Imaramacoso marë' aparitarinënguëma'. Nisha nisha piyapi'sa' no'huairinënguëma'. A'naquëma' tëpararinënguëma'. <sup>10</sup> Inapohuachina', na'a piyapi'sa' imasapirinacohuë', co ahuantatonaraihuë', Yosë naniantapi. Pipirahuatona', imarinosopita no'huitona', sha'huirapirapi. <sup>11</sup> A'naquëonta' nonpin nanan pënëntapona'. Nonpinapirinahuë', na'a piyapi'sari natëtona', nonpin nanan imasapi huachi. <sup>12</sup> Piyapi'sa' pa'pi co noyahuë' cancantatona', na'con na'con oshahuanapi. Co huachi ninosoroapihuë'. <sup>13</sup> Canpitaso nipirinhuë' noya ahuantoco'. Co a'pohuatamacohuë', noya nicha'ësaranquëma huachi. <sup>14</sup> Yosë hua'anëntërinquë ya'conacaso' a'chintëranquëma'. Ina nanan chachin ya'ipi parti a'chinacaso' ya'huërin. Ya'ipi piyapi'sa' nitochina'. Ya'ipi parti a'chintohuachina', naporos' ayaro' tahuëri naniarin huachi.

<sup>15</sup> Iráca Naniri ninoton, ninshitërin. 'A'na tahuëri inimicoros'a' Yosë pëinënguë ya'conahuatona', tapiapona'. Pa'pi co noyahuë' nitatona' inapotohuachina', co huachi inaquë Yosë chinotapihuë', tënin. No'tëquën ninorin ni'ton, ina quirica nontohuatama', noya yonquico'. <sup>16</sup> Naniri ninorinso' nanihuachin, Cotia parti ya'huëramasopita motopi'pa' manóton ta'aco', chiníquën aparisitochinënguëma'. <sup>17</sup> Pëinëma aipi ya'huëhuatama', ama ma'shanëmapita quëpacaso marë' ya'concosohuë'. A'naroáchin topinan ta'aco'. <sup>18</sup> Iminëmaquë sacatasënguëma' nipachin, ama a'moramaso tëranta' maquintacosohuë'. Manóton ta'aco'. <sup>19</sup> Naporos' tahuëri'sa' cayoronos'a', sho'shopia'hua ya'huëtopiso', inapitaso' sacai quëran ta'arapi ni'ton, parisitapona'. ¡Ma'huantacha nisapi paya! <sup>20</sup> Yosë nontoco' ama o'nápiquë ta'acaso' ya'huë'insohuë'. O'napiquëhuë nipon, chinoto tahuërihuë nipon, saca sacai' ta'acaso'. <sup>21</sup> Ina quëran piyapi'sa' chini chiníquën parisitapi. Isoro'pa' ya'huërin quëran huarë' co ina pochin parisichátërapihuë'. Ina piquëraonta' co onporonta' ina pochin parisitantarapihuë'. <sup>22</sup> Yosë nohuanton, co hua'qui' aparisitapihuë'. Hua'qui' aparisitapi naporini, ya'ipi piyapi'sa' taqui'itonahuë'. Nipirinhuë', piyapinënpita nosoroaton, co nohuantërinhuë' hua'qui' aparisitacaiso'. Huayoninsopita nicha'ësarín huachi.

<sup>23</sup> Naporos' tahuëri'sa' nisha nisha sha'huitarinënguëma'. '¡Ni'cochi, Cristo nani huë'nin! Pasëquë ya'huarin,' itohuachinënguëma', ama natëcosohuë'. <sup>24</sup> Na'a nonpin nanan pënëntona'piros'a' huëcapona'. 'Caso' Cristoco' tosapi a'naquën. 'Caso' ninotona'pico,' tosapi a'naquëonta'. Sacai' nininsopita nisapi piyapi'sa' nonpintacaiso marë'. Huayoninsopitanta' nonpintochinaichin nisapi. <sup>25</sup> Nani sha'huitëranquëma' ama naporos' tahuëri nonpintinënguëmaso marëhuë'. <sup>26</sup> 'Huëco' inotëro parti pa'ahua'. Inatohua' Cristo ya'huarin,' itohuachinënguëma', ama pacosohuë'. 'Paso' pëiquë ya'huërarín,' itohuachinënguëmanta', ama natëcosohuë'. <sup>27</sup> Yosë quëran quëmapico ni'to, a'na tahuëri o'mantararahuë. O'mantahuato, ya'ipi piyapi'sa' ni'sarinaco. O'cori' huënsha' topachina, ya'ipi parti a'pintërin. Inapochachin a'na tahuëri huënaráchin huënaráchin o'mantararahuë, ni'saramaco. <sup>28</sup> Ma'sharos'a' chiminpachina, a'naroáchin tamëros'ari huëcapairín,' itërin Quisosori. (Cristo o'mantahuachin, ya'ipiya nitotapi, tapon naporin.)

*O'mantacaso' tahuëri*

*(Marcos 13.24-37; Lucas 17.26-30, 34-36; 21.25-33)*

<sup>29</sup> “Nani parisitohuachina', pi'i tashiarin. Yoquinta' co huachi a'pinarinhuë'. Naporahuatón, na'a tayloraro'sa' anotarín. Ya'ipi inápaquë ya'huërin sopitanta' nacon nacontapon. <sup>30</sup> Naporo' o'mantararahuë. Yosë quëran quëmapico ni'to, inápa quëran o'mantararahuë huachi. Nisha nisha nananquë nonpisopita: ‘Ana'intarinpoa', ta'tona' pa'yanapi, na'nëapi, napoapi. Chiníquën nanantato, chitoro' huáncana o'mantararahuë, ni'sarinaco. Huënaráchin huënaráchin ya'noarahuë. <sup>31</sup> O'mantarahuato, na'a anquëniro'sa' a'pararahuë. Panca tronpita pihuitona', ya'ipi parti pa'sapi huayonahuësopita ayontonacaiso marë'.

<sup>32</sup> Iquira nara papotërin quëran nitotoco'. Ta'amën monoantahuachina, ‘Nani o'napi naniriarin huachi,' topi. <sup>33</sup> Inapochachin nani ma'sha onporahuachina', nitotarama'. ‘O'mantacaso' tahuëri naniriarin huachi,' tosarama'. <sup>34</sup> No'tëquën sha'huitëranquëma'. Co'huara cotioro'sa' huënton ta'huanchatërasoihuë', nani ma'sha onporapi. <sup>35</sup> Isoro'pa' ta'huantarin. Pi'iro'tënta' ta'huantarin. Ca nanamëhuëso nipirinhüë' co onporonta' ta'huantarinhuë'. No'tëquën nonahuë ni'ton, ya'ipi sha'huitëranquëmaso chachin naniarin huachi.

<sup>36</sup> Ma tahuërisona o'mantaca'huasoso nipirinhüë', co insonta' nitotërinhuë'. Anquëniro'santa' co nitotapihuë'. Yosë hui'ninco niporahuë', co ca tëranta' nitotërahuë'. Tata Yosëíchin nitotërinso'.

<sup>37-39</sup> Iráca Noi nanpiso', na'a piyapi'sa' co Yosë natëpihuë'. Topinan ya'huëcaisoráchin cancantopi. Coshatápi, o'osápi, sa'asápi, hui'ninapitanta' aso'yarápi. Napoatona', co Yosë yonquipihuë'. Noiso nipirinhüë', Yosë natëton, panca nancha ninin. Nani tinihuachina, inaquë ya'conin. A'napitaso' co yonquipirinhüë', a'nanaya panca pama pa'sarin. Naporo' ya'ipiya chimiitopi huachi. Inapochachin canta' Yosë quëran quëmapico ni'to, a'nanaya o'mantararahuë. Na'a piyapi'sa' co yonquipirinhüë', o'mantararahuë. <sup>40</sup> Naporo' cato' quëmapi'sa' ina iminquëáchin sacatapirinhüë', a'nara' quëpantarahuë. A'naso nipirinhüë' patarahuë. <sup>41</sup> Cato' sanapi'sa' inaquëráchin shi'shi' pë'sanapirinhüë', a'nara' quëpantarahuë. A'naso nipirinhüë' patarahuë.

<sup>42</sup> Ama huë'ërëso pochin cancantatoma', naniantocoso'huë'. Onporosona o'maca'huaso' tahuëri nanihuachin, co nitotaramahuë'. <sup>43</sup> Ni'co'. Ihuatë' a'nanaya huë'pachina, pëiquë ya'conin. Hua'anën co nicasohüë', ma'sha ihuarin. Onporosona huëcacaso' nitotërin naporini, hua'anëni ninaitonhuë', co pëinënuquë ya'conacaso' nanichitonhuë'. <sup>44</sup> Inapochachin canpitanta' ninatomaco, ya'huëco'. Hua'quihuato: ‘Co yao'marinhuë', ama tocosohüë'. Co nitotasënuquëmahüë', a'nanaya o'mantararahuë,” itërin.

*Inpriato naporin quëran a'chininso'*  
(Lucas 12.41-48)

<sup>45</sup> Ina quëran itaantarin: “Ni'co', iyaro'sa'. O'maca'huaso' tahuëri a'na patron pochin nisarahuë. Inaso' aquë yapa'pachina, inpriatonën sha'huitërin. ‘Piyapinëhuëpita noya ni'quë'. Cosharo', ma'sha, inapita pahuantohuachina', quëtëra'piaquë', itahuaton, pa'nin. <sup>46</sup> Inpriatoso' noya yonquihuachin, no'tëquën natëtarin. Patronëni huëcapaintahuachin, noya ni'sarin. Ina marë' noya cancantarin. <sup>47</sup> Noya natërin ni'ton, acoarin ya'ipi ma'shanënpita a'paicaso marë'. <sup>48</sup> Nipirinhüë', inpriatonën co noyahuë' cancantohuachin, tapon: ‘Patron hua'quirarin. Co a'naroáchin huënantaponhuë', ta'ton, <sup>49</sup> piyapinënpita ahuëapon. Pita nicacasoáchin cancantapon. No'pirápon. <sup>50</sup> Napoaso', patronëni quënanquintapon. Co nitotasohüë', a'nanaya canquipon. <sup>51</sup> Co natërinhuë' ni'ton, chiníquën ana'intarin. Nonpintëro'sa' ana'intopiso pochin nitapon. Inaquë co napion ancantaton, na'nërápon,” tënin Quisoso.

## 25

*Sanapi nipayarinsopita*

<sup>1</sup> Naquëranchin Quisosori pënëantarin:

“Yosë hua'anëntërinso' a'chintanta'inquëma', noya natanco. Hua'an sa'arinso pochin ninin. Inaso aquë quëran huë'sarin. Onporosona canquicaso' co nitotopihuë'. Tahuëri nanihuachina, sanapi nipayarinsopita ninarapi hua'an huëcacaso'. 'Hua'qui quëran canquipon nimara,' ta'tona', shonca nano'sa' nanparinënarë chachin ninarapi. <sup>2-4</sup> A'natërápo sanapiíchin noya yonquipi. Quirosin pochin orotërinso' ta'pantatona', mëntaiquë huarë' quëpapi. Naporahuatona', a'naya a'naya potiriaquë quëpapi. A'natërápo sanapi'saso nipirinhüë' co yonquiatonahuë', co aquëtë' quëpapihuë'. <sup>5</sup> Hua'an hua'quirin ni'ton, tashitopi. Yahuë'ëtona', ya'ipimiáchin huë'ëpi. <sup>6</sup> Huë'ësoi', yono tashi' a'nanaya chiníquën noninso' natanpi. '¡Ma'tana, huë'sarin huachi! ¡Huënsëco' pa'ahua' nacapia'ahua!' nitopi. <sup>7</sup> A'naroáchin shonca nano'sa chachin capayatahuatona', nanparinënapita taparapi noya orotacaso marë'. <sup>8</sup> Noya yonquirinsopitaso' ta'pantohuachinara, noya orotërin. A'napitaso nipirinhüë' i'chinpitopirinhüë', yatacopiconpi. Napohuachinara: 'Ta'pantocoi quiyanta' i'chinpi'i. Nani quiyaso' tacopiarin,' topirinhüë'. <sup>9</sup> 'Co'chi nanitëraihuë' ta'panta'huainquëmaso paya. Inapohuato, co huachi quiyanta' orotarinhüë'. Ya'ipinpoa' tacopianarigua'. Manóton paatoma', pa'anconco,' itopi. <sup>10</sup> Napotohuachinara, a'natërápo chachin manotona pa'pi quirosin pochin nininso' pa'anapona'. Pa'pirinhüë', co'huara huëntayátërasoihuë', hua'an canquirin. A'natërápo nano'sa' noya yonquirinsopitaso' imatona', pëiquë ya'conpi. Inaquë sa'acaso marë' pita nisapi. Nani ya'conpachinara, oncotopi. <sup>11</sup> Ina quëran co yonquirinsopitasohüë' huënantatona': '¡I'soatocoi siniro quiyanta' ya'coin!' itopirinhüë'. <sup>12</sup> Hua'ani co nohuantërinhuë'. 'Co canpitaso' piyapinëhuëpitanquëmahüë'. Co nohuitëranquëmahüë', ta'ton co aya'coninhüë'.

<sup>13</sup> Napoaton canpitanta' noya yonquiatoma', o'manta'huaso' tahuëri ninaco'. Onporoso' nanipon nimara, co nitotëramahuë'. Ni'cona patontatënquëma',” itërin.

*Canacaso marë' coriqui quëtërinso'*  
(Lucas 19.11-27)

<sup>14</sup> Ina quëran itaantarin: “Isonta' iyaro'sa' a'chinchinquëma' Yosë hua'anëntërinso' nitotamaso marë'. A'na quëmapi aquë yapa'sarinso pochin ninin. Yapa'pachina, inpriatonënpita amatërin camaicaso marë'. Huë'pachinara, itapon: 'Aquë pa'pato, oshaquëran huënantarahüë. Inatohua' ya'huasoco, noya sacatoco'. Apira coriqui quëchinquëma' ina quëran na'con na'con canaca'huaso marë'. Ma'sha pa'anatoma', oshaquëran ana'atoco,' itërin. <sup>15</sup> Itahuaton, a'naya a'naya quëtëra'piarin. Co napopianachin quëtërinhuë'. Nanitinpichin tantiaton, nisha nisha quëtërin. A'naso' a'natërápo huaranca coriqui oro quëran nininso' quëtërin. A'naso' cato huaranca quëtërin. A'nanta' huaranca quëtërin. Nani inpriatonënpita quëtahuaton, pa'nin huachi. <sup>16</sup> A'natërápo huaranca ma'patona'piso' a'naroáchin natërin. Paaton, na'a ma'sha pa'anin. Ina quëran inapita pa'anaton, na'con na'con coriqui canarin. Nani tahuëri inapoaton, oshaquëran a'natërápo huaranca aquëtë' canaantarin. <sup>17</sup> Cato huaranca quëtërinsona' noya sacatërin. Inanta' ma'sha pa'anahuaton, cato huaranca aquëtë' canantarin. <sup>18</sup> Huaranca ma'parinsoso' nipirinhüë', co yanatërinhuë'. No'paquë ihuatahuaton, coriquinën pa'pitërin inaquë tapacaso marë'.

<sup>19</sup> Hua'qui quëran hua'anëna huënantarahuaton, inpriatonënpita amataantarin nontacaso marë'. <sup>20</sup> A'natërápo huaranca ma'patona'piso huë'sahuaton, coriqui a'notiirin. 'Ni'quë' siniro, a'natërápo huaranca quëtëpirancohuë', ina quëran a'natërápo huaranca aquëtë' nani canarahüë,' itiirin. <sup>21</sup> '¡Ma noyacha sacatëran paya! Natëranco ni'quëhuarë', chiníquën nanan quëchinquën na'con hua'anëntamaso marë'. Pëinëhuëquë huëquë', noya cancantahua', itërin hua'anëni. <sup>22</sup> Ina quëran a'nanta' huë'nin: 'Ni'quë' siniro, cato huaranca quëtëpirancohuë', nani cato huaranca aquëtë' canarahüë,' itiirin. <sup>23</sup> '¡Ma



noyacha quëmanta' sacatëran paya! Natëranco ni'quëhuarë', nanan quëchinquën na'con hua'anëntacaso marë'. Pëinëhuëquë huëquë', noya cancantahua', itërin inanta' hua'anëni.

<sup>24</sup> Piquëran quëtërinso nipurinhuë', huë'sahuaton itiirin: 'Quëmaso' siniro co nosororancoihuë'. Co quëmaora shacaponahuë', nitërinso' manan. Co sacataponahuë', canaran. <sup>25</sup> Napoaton tē'huatatēnquën, co sacatërahuë'. Coriqui quëtërancoso' acoporquë po'orahuë. Ma'tana ya'huarin,' itahuaton, coriqui a'notërin. <sup>26</sup> Napotohuachina, co noya ni'ninhuë'. 'Quëmaso' co noyanquënhuë'. Chiroton, co natërancohuë'. Co no'tëquën yonquiranhuë'. "Co sacataponahuë' canaran," ¿itëranco ti? <sup>27</sup> ¿Onpoatonta' nipachin, co bancoquë acoranhuë'? Inaquë acoran naporini, pi'pian tēranta' canaitohuë', itërin. <sup>28</sup> Ina quëran a'na piyapinën sha'huitërin. 'Iso quëmapi topinan quëran coriqui quëtërahuë. Osërëtahuaton, paso' quëmapi na'con na'con canarinso', quëtëquë'. <sup>29</sup> Noya natërinco ni'ton, na'con na'con quëtantarahuë. Co manta' pahuantarinhuë'. A'na nopyurinhuë' co natërincohuë' ni'ton, pi'pian ya'huëtërinso tēranta' osërëtarahuë. <sup>30</sup> Naporahuaton co noyahuë' ni'ton, aipiran tashinantërinquë tē'yatoco'. Inatohua co napion ancantaton na'nërápon,' tēnin," itërin Quisosori.

*Nisha nisha nananquë nonpisopita ana'intërinso'*

<sup>31</sup> Ina quëran itaantarin: "Yosë quëran quëmapi co ni'to, a'na tahuëri o'mantararahuë hua'anënta'huaso marë'. Ya'ipi anquëniro'sapitarë'co chachin o'mantararahuë. Huënaráchin huënaráchin ya'norahuato, hua'anënta'huaso' shiraquë huënsëarahuë coisë pochin nica'huaso marë'. <sup>32</sup> Yosë nohuanton, nisha nisha nananquë nonpisopita niyontonapi. Niyontonpachina', pē'tahuatona'pi pochin nisarahuë. Ni'co'. Tahuëri nipachina, ohuicaro'sa', chiporo'sa' napopianachin pa'sapi coshatacaiso marë'. Inaquëráchin ya'huëpirinahuë', tashihuachina, nisha nisha acorin huachi. <sup>33</sup> Ohuicaro'sa' inchinanën quëran acorahuaton, chiporo'saso' ahuënanën quëran acorin. Inapochachin canta' ya'ipi piyapi'sa' nisha nisha acoarahuë. Noya cancantopisopita inchinanëhuë quëran acoarahuë. Co noyahuë' cancantopisopitaso nipirinhuë', ahuënanëhuë quëran acoarahuë. <sup>34</sup> Ina quëran inchinanëhuë quëran acorahuësopita itarahuë: 'Ya'ipinquëma' huëcatoma', Yosë hua'anëntërinquë ya'conquico'. ¡Ma noyacha Tata Yosë nosororinquëma paya! Isoro'pa' ninin quëran huarë' yonquirinquëma' hua'anëntërinquë aya'coinquëmaso marë'. <sup>35</sup> Canpitaso' noya nosororamaco. Tanahuatëra, a'caramaco. Yamorohuatëra, o'shitëramaco. Ya'huëramataquëchi na'huëpatëra, noya nontëramaco. Pëinëmaquë chachin aya'conamaco. <sup>36</sup> Capa a'moca'huaso' nipachina, quëtëramaco. Caniohuatërantá', huëcatoma', nosoroquiramaco. Tashinan pëiquë ya'huasoconta', ni'quiramaco. Napoaton huëco huachi, noya ya'hua'ahua', itarahuë. <sup>37</sup> Naporó' inapitaso' natanarinaco: '¿Onporota' Siniro tanaran nicatëinquën, a'carainquën? ¿Onporota' yamororan ni'ton, o'shitërainquën? <sup>38</sup> ¿Onporota' pëinëhuëiquë aya'conainquën? ¿Onporota' a'mocamaso' pahuantërinquën ni'ton, quëtërainquën? <sup>39</sup> ¿Onporota' canioran ni'ton, nosoroquirainquën? ¿Onporota' tashinan pëiquë parisitëran, ni'conainquën? ¿Onporóchana napotërainquën nicaya? Co yonquiraihuë', itarinaco. <sup>40</sup> 'Co'ta, imarinosopita parisitohuachinara, catahuarama'. Topinan piyapi'sa', sa'ahuaros'a', inapita ma'sha pahuantohuachinara, quëtërama'. Imatomaco, a'napita catahuarama' ni'ton, canta' catahuaramacoso pochin ni'nahuë', itarahuë.

<sup>41</sup> Ahuënanëhuë quëran acorahuësopitaso nipirinhuë', sha'huitarahuë: 'Ya'ipinquëma' paco huachi. Tata Yosë co noyahuë' ni'ninquëma' ni'ton, ana'intarinquëma huachi. Panca pën nani acorin sopairo'sa' ana'ntacaso marë'. Inaquë pën co onporonta' tacopiarinhuë'. Inaquë paco' canpitanta'. <sup>42</sup> Tanapirahuë', co a'caramacohuë'. Yamoropirahuë', co o'shitëramacohuë'. <sup>43</sup> Ya'huëramataquëchin na'huëpatëra, co pëinëmaquë aya'conamacohuë'. Capa a'moca'huasonta' nipirinhuë', co quëtëramacohuë'. Canipirahuë', co huëcatoma' nosororamacohuë'. Tashinan pëiquë ya'huëpirahuë', co



ni'quiramacohuë', itarahuë. <sup>44</sup> Ina quëran natanarinaco: '¿Onporota' Siniro tanapiranhuë' co a'carainquënhuë'? ¿Onporota' yamoropiranhuë' co o'shitërainquënhuë'? ¿Onporota' co pëinëhuëiquë aya'conainquënhuë'? ¿Onporota' a'mocaso' pahuantopirinquënhuë', co quëtërainquënhuë'? ¿Onporota' caniopiranhuë' co nosororainquënhuë'? ¿Onporota' tashinan pëiquë parisitopiranhuë' co catahuarainquënhuë'? Co onporonta' ina pochin ni'nainquënhuë', itarinaco. <sup>45</sup> 'Co'ta imarinosopita parisitopirinahuë', co catahuaramahuë'. Sa'ahuario'sa' ma'sha pahuantopirinahuë', co quëtëramahuë'. Co inapita nosororamahuë' ni'ton, co canta' nosororamacohuë', itarahuë. Itahuato, a'pararahuë huachi. <sup>46</sup> Parisitopiquë pa'sahuatona', inaquë ya'huëmiatapi huachi. Noya nipisopitaso nipirinhüë', Yosë pochin nanpimiatapi huachi," itërin Quisosori.

## 26

### *Quisoso macacaiso marë' chinotopiso'* (Marcos 14.1-2; Lucas 22.1-2; Juan 11.45-53)

<sup>1</sup> Nani a'chintohuachina, ca'tano'sanënpita itapon:

<sup>2</sup> —Cato' tahuëri pahuanarin Pascoa nanicaso', nani nitotërama'. Naporo' Yosë quëran quëmapico niporahuë', masarinaco. Masahuatonaco, corosëquë patanantarinaco, itërin.

<sup>3</sup> Ina quëran corto hua'ano'sa', cotio ansiano'sa', inapita Caihuasë pëinëquë niyontopi. Inaso' corto hua'an, chini chiniquënanantërin. <sup>4-5</sup> Inaquë niyontonahuatona', ninontapi Quisoso tēpacaiso marë'.

—Ama pita tahuëri chachin maahuasohuë', piyapi'sa' no'huihuachinēnpoa'. Quisoso pa'yatapi ni'ton, ahuëarinēnpoa'. Napoaton po'oana quëran maahua', nitopi.

### *Hua'saiquë opomototërinso'* (Marcos 14.3-9; Juan 12.1-8)

<sup>6</sup> Quisososo nipirinhüë' Pitaniaquë pa'nin. Simon pëinëquë coshatapatarin. Ina Simon chana caniori mapirinhüë', anoyatërinso'. <sup>7</sup> Misaquë coshataso', a'nara' sanapi huë'nin. Potiria'huaya huirina'pi quëran nipiso' quënin. Inaquë pimo hua'sai' na'con pa'tërinso' ya'huërin. Quisoso nosoroaton, opomototërin. <sup>8</sup> Ina nicatona ca'tano'sanënpitaso', no'huitopi. No'huitatona ninontopi.

—¿Onpoatonta' iso hua'sai' pa'ton nipirinhüë' chiniarin? <sup>9</sup> Pa'anin naporini, na'con coriqui canaton sa'ahuario'sa' quëtacaso' ya'huëchitonhuë', nitopi.

<sup>10</sup> Quisosori natanahuaton, itërin:

—¿Ma'marëta' iso sanapi no'huirama'? Tananpitoco'. Na'con nosoroatonco, inapotërinco. <sup>11</sup> Nani tahuëri sa'ahuario'saso' ya'huërapa. Caso nipirinhüë', co hua'quiyahuë' canpitaco ya'huarahuë'. <sup>12</sup> Co'huara chimiyantërasocohuë', nosoroatonco, nonëhuë hua'saiquë opotërinco pa'pitanacoso marë'. <sup>13</sup> No'tëquënan itaranquëma'. Ya'ipi parti noya nanan sha'huihuachina', iso sanapi napotërinco' sha'huirapi anta'. Co naniantapihuë', itërin.

### *Cotasëri sha'huirapirinsó'* (Marcos 14.10-11; Lucas 22.3-6)

<sup>14</sup> Ina quëran, Cotasë Iscarioti pa'pi co noyahuë' yonquirin. Quisoso ca'tanaponahuë', yasha'huirapirin. Corto hua'ano'sa' ya'huërinquë pa'sahuaton, itoonin:

<sup>15</sup> —Po'oana quëran Quisoso a'notohuatëinquëma', ¿onpo coriquita' quëtaramaco? itërin.

—Cara shonca coriqui prata quëran nininso' quëchinquë, itopi. Itohuachinara:

—Noyahua'. Quëtoco nipachin a'nochinquëma', topachina, quëtopi. <sup>16</sup> Naporo quëran huarë' Cotasë yonquirarin po'oana quëran a'nocaso marë'.

### *Pascoa tahuëri coshatopiso'* (Marcos 14.12-25; Lucas 22.7-23; Juan 13.21-30; 1 Corintios 11.23-26)

17 Pascoa tahuëri nipachina, nisha pan ca'pi, co ahuëpocatopisohuë'. Ina tahuëri nanihuachina, ca'tano'sanënpitari huëcapaipi.

—¿Intohuata' Maistro paatoi, Pascoa cosharo' nii capacaso marë'? itopi.

18 —Ninanoquë paco'. Inaquë a'na quëmapi quënanconarama'. Ina quënanconpatama', sha'huitoco'. “Maistro a'parincoi ni'ton, huë'nai. Naporin: ‘Yosë ninorinso' nani naniriarin ni'ton, quëma pëinënuë Pascoa cosharo' ca'tano'sanëhuëpitarë'co chachin coshatarai, tënin, itonco',” itërin Quisosori.

19 Pa'pachinara, Quisosori sha'huitërinso chachin quënanconpi. Quëmapi quënanconahuatona', nontopi. Nani natanconpachinara, inaquë Pascoa cosharo' nipi capacaiso marë'.

20 Nani tashihuachina, Quisoso ca'tano'sanënpitarë chachin huë'pi. Huë'sahuatona', misaquë huënsëquipi. 21 Coshatapona pochin itërin:

—No'tëquën ipora itaranquëma'. Shonca catonquëma' ca'tanpiramacohuë', a'naquëma' sha'huirapiramaco, itërin.

22 Natanahuatona', sëtopi. Sëtatona', a'naya a'nayari Quisoso natanpi.

—¿Incoita' Siniro, yasha'huirapirainquën? ¿Co cahuë' nimara ti? itopi a'naya a'nayari.

23 —Tëhuëinchachin a'naquëma' yasha'huirapiramaco. Ina sënanquërächin i'shiaton carë' caponahuë', yasha'huirapirincos. 24 Yosë quiricanën quëran ninorincoso chachin chiminarahuë. Yasha'huirapirincoso nipirinhüë', ma'huantacha nicapon paya. Co nasitërinhuë' naporini, noya noya niitonhuë', itërin.

25 Itohuachina, Cotasërinta' itërin:

—¿Incoita' Maistro, yasha'huirapirainquën? ¿Co cahuë' nimara ti? itohuachina, — Quëma chachin mini, itërin.

26 Coshatasoi', pan masahuaton Yosë nontërin. “Yosparinquën, Siniro” itahuaton, së'panin. Ina quëran ca'tano'sanënpita quëtërin.

—Ca'co' iyaro'sa'. Ca nonëhuë pochin iso', itërin.

27 Minënta' masahuaton, “Yosparinquën Siniro,” itahuaton, inanta' quëtërin.

—Ya'ipinquëma' o'oco'. 28 Ca huënainëhuë pochin iso'. Huënainëhuë pa'sarin ni'ton, nasha quëran canpitarë' Yosë anoyatërinso' sha'huichinquëma' imacamaso marë'. Chiminarahuë na'a piyapi'sa' oshanëna' inquita'huaso marë'. 29 Co huachi opai' o'oantarahüë'. Chiminarahuë huachi. A'na tahuëri Tata Yosë hua'anëntërinso' nanihuachin, canpitaro'co nasha pochin o'oantarahüë. Naporo' noya noya cancantarihua huachi, itërin.

*Pitrori nonpinapicaso' ninorinso'*

*(Marcos 14.26-31; Lucas 22.31-34; Juan 13.36-38)*

30 Ina quëran Yosë cantanën cantarahuatona', pipipi. Pipirahuatona', Oriposë panënuë pa'pi huachi. 31 Inaquë Quisosori itërin:

—Iráca quiricanënuë ninoton, Yosë naporin: “Ca nohuanto, a'paitona'pi tēpaapi. Tēpahuachina', ohuicanënpita yanquëërapi,” tēnin. Inapochachin yatēpahuachinaco, ya'ipinquëma' co chiniquën cancantatomahuë', ta'ananpiaramaco. Ipora tashi chachin napoarama'. 32 Chiminaporahuë', Yosë ananpitaantarincos. Ananpitaantahuachinco, ca'ton Cariria'pa' pa'sarahüë. Inatohua' niquënantarihua', itërin.

33 —A'napita ta'ananpipirinënuëonta', co caso' ta'arahüë', tēnin Pitro.

34 —No'tëquën iyasha, itëranquën. Ipora tashi chachin co'huara atari përashatërasohüë', cararo' nonpinapiaranco. “Co caso' Quisoso nohuitërahüë',” toconapon, itërin Quisosori.

35 —Co Siniro napoarahüë'. Quëma imasaranquën ni'ton, yatëpapurinacohüenta' co onporonta' nonpinapiaranquënhüë', itaantarin Pitrori. Inachachin topi ya'ipiya.

*Quisoso sëtaton, Yosë nontërinso'*

*(Marcos 14.32-42; Lucas 22.39-46)*

<sup>36</sup> Ina quëran, Quisimani nararo itopiquë canconpi. Inaquë ca'tano'sanënpita sha'huitërin.

—Isëquë huënsëtaco'. Pasëyáquë pa'sarahuë Yosë nontapo, itërin.

<sup>37</sup> Caraíchin ca'tano'sanën amashamiachin quëparin. Pitro, Sipitio hui'ninpita inapitaíchin quëparin. Naporó' sëtaton, co napion cancantërin.

<sup>38</sup> —Pa'pi sëtërahuë. Chiminchináchin sëtërahuë. Isëquë huënsëtaco'. Ama huë'ëtomarahuë', ni'táco', itërin.

<sup>39</sup> Amashamiachin pa'sahuaton, isonconin. No'paquë huarë' monshomarahuaton, Yosë nontërin: “Quëma nohuantohuatan Tata, nicha'ëco ama ma'sha onpo'isohuë'. Main o'orëso pochin parisita'huaso' ya'huërin. Co parisita'huaso' nohuantopirahuë', quëma nohuantohuatan, noya, ténahuë. No'tëquën yanatëranquën,” itërin.

<sup>40</sup> Ina quëran huënantapirinhüë', cara chachin huë'ësápi quënanquintarin.

—Iya Pitro, ¿co a'na ora tëranta' nanitëramahuë' ni'tamaso' ti? <sup>41</sup> Ama huë'ëtomahuë', ni'táco'. Yosë nontoco' ama sopai minsëinquëmaso marëhuë'. Cancanëma quëranso mini Yosë yanatëpiramahuë', co canpitaora chiníquën cancantaramahuë', itërin.

<sup>42</sup> Ina quëran paantarahuaton, Yosë nontaantarin.

—Nohuantohuatan Tata, nicha'ëco ama ma'sha onpo'isohuë'. Nipirinhüë' co nohuantohuatanhuë', ma'sona yaonpotohuatanconta' noya, ténahuë. No'tëquën yanatëranquën, itaantarin.

<sup>43</sup> Ina quëran huënantapirinhüë', naquëranchin huë'ëantapi, quënanquintarin. Huë'ëi' iquitatona', huë'ësápi. <sup>44</sup> Tananpitahuaton, paantarin. Paantarahuaton, inachachin Yosë itantarin. Nani cararo' inachachin Yosë nontërin. <sup>45</sup> Ina quëran huënantahuaton, itërin:

—¿Ipora huanta' huë'ësarama' ti? Nani ora nanirin huachi. Yosë quëran quëmapico nipirahuë', sha'huirapiarinco oshahuano'sa' macainacoso marë'. <sup>46</sup> Huënsëco huachi pa'ahua'. Ni'co', sha'huirapirincoso' nani canquiarin, itërin.

### *Quisoso mapiso'*

*(Marcos 14.43-50; Lucas 22.47-53; Juan 18.2-11)*

<sup>47</sup> Nontaso chachin, Cotasë canquirin. Inanta' Quisoso ca'tanaponahuë', yasha'huirapirin. Inarë' na'a piyapi'sa' huë'sapi, corto hua'ano'sa', cotio ansiano'sa', inapitari a'papisopita. Sahuëni, shonqui, inapita së'quërahuatona' huë'sapi. <sup>48</sup> Co'huara canshatërasoihuë', Cotasëri nani sha'huitërin Quisoso nohuitacaiso marë'.

“Insosona apinohuato, ina Quisososó'. Máco huachi,” itërin.

<sup>49</sup> Ina quëran ya'yoranquiraahuaton:

—Tashita Maistro, itiirahuaton, apinorin.

<sup>50</sup> —Ma'sona yaninanso' iyasha, manóton niquë', itërin Quisosori. Ina quëran piyapi'sari chiníquën masapi huachi.

<sup>51</sup> Ca'tano'sanënpita inaquë huaniapi. A'nara' sahuëninën ocoirahuaton, corto hua'an inpriatonën ahuërin. Ahuëaton, nishitëhuëratëterin. <sup>52</sup> Quisososó' nipirinhüë' co nohuantërinhuë'.

—Sahuëninën iyasha, po'moantaquë'. Hua'naquë tēpatohuatama', hua'na quëran chachin tēpainëmaso' ya'huërin. <sup>53</sup> Tatahuë nontërahuë naporini, shonca cato huaranca anquëniro'sa' a'patimaitoncohuë'. A'naroáchin catahuaitonacohuë'. ¿Co ina nitotëranhuë' ti? <sup>54</sup> Napoaponahuë', co nohuantërahuë' cha'ëca'huaso'. Nicha'ërinaco naporini, co huachi ninorinacoso' naniitonhuë'. Yosë nohuanton, chiminarahuë, itërin ca'tano'sanënpita.

<sup>55</sup> Ina quëran piyapi'sa' itapon:

—Sahuëni, shonqui, inapita së'quërahuatoma', huëcapairamaco. Tēpatona'pi pochin cancantatomaco, ¿yamanamaco ti? Co'tana nani tahuëri Yosë chinotopiso pëiquë huënsëato,

a'chinárahüë. Nicapomaracohüë', co manamacohüë'. <sup>56</sup> Napoaponahuë', Yosë nohuan-ton, iporaso' masaramaco. Quiricanën quëran ninorinacoso chachin masaramaco, itërin.

Ina quëran ya'ipi ca'tano'sanënpitari ta'ananpipi huachi.

*Corto hua'ano'saquë quëpapiso'*

*(Marcos 14.53-65; Lucas 22.54-55, 63-71; Juan 18.12-14, 19-24)*

<sup>57</sup> Nani masahuatona', corto hua'an chini chiniquën nanantërinso' ya'huërinquë quëpapi, Caihuasë itopiso'. Inaquë cotio maistro'sa', ansiano'sa', inapita nani niyon-tonpi. <sup>58</sup> Pitroso nipirinhüë', aquë quëran imaquiarin. I'iratëquë huarë' imaquirin. Pairaanaquë ya'conahuaton, ponisiaro'sapitarë' huënsëquirin. “¿Ma'ta' onpotapona'? Tëpapona' nimara,” ta'ton, ni'sárin.

<sup>59</sup> Corto hua'ano'sa', cotio hua'ano'sa' inapitari yatëpapi ni'ton, a'naya a'naya yonípi Quisoso sha'huirapicaíso marë'. <sup>60</sup> Na'a piyapi'sari nonpinapiponaraihuë', nisha nisha nonconpi. Napoyan quëran catoya'piri huë'sahuatona', sha'huirapipi.

<sup>61</sup> —I'hua chachin Quisoso noninso' natanai. “Yosë chinotopiso pëi' ata'huantahuato, caora nanitërahüë anoyatanta'huaso'. Cara tahuëri quëran anoyatantarahuë,” toconin, itopi.

<sup>62</sup> Corto hua'an chini chiniquën nanantërinsoari huanirahuaton, Quisoso itapon:

—¿Co manta' ténanhuë' ti? ¿Ma'ta' taponá' isopita nonapiarinëinquën? itërin.

<sup>63</sup> Quisososo nipirinhüë' co manta' téninhüë', ta'tárin. Ina quëran corto hua'ani itantarin:

—“Yosë ni'sárinco co nonpinahuë’,” ta'ton, no'tëquën sha'huitocoi. ¿Quëmaso' Cristo, Yosë hui'ninquën chachin ti? itërin.

<sup>64</sup> —Ca mini inaco. Yosë quëran quëmapico ni'to, a'na tahuëri niantaramaco. Inápaquë pa'pato, Yosë inchinanën quëran ahuënsëarincó. Ina quëran chitoro' huancana o'mantararahuë niantaramaco, itërin.

<sup>65</sup> Corto hua'anso natanahuaton, chiniquën no'huitërin. Inapoaton a'morinso osharin.

—“¿Caso' Yosë hui'ninco,” toconin! Nani natanama'. Inaora chachin sha'huitërinpoa' ni'ton, co a'napita sha'huitinpoaso' nohuantarihuahuë'. <sup>66</sup> ¿Ma'ta' onpotahua' Quisoso? ténin.

—Pa'pi co noya quëmapihuë' ni'ton, tēpacaso' ya'huërin, topi ya'ipiya.

<sup>67</sup> Ina quëran ipirayatahuatona', ahuëpi. A'naquëninta' tonporayatahuatona', chiniquën panpirayapi.

<sup>68</sup> —¿Inta' ahuërinquën? Quëmaso' Cristonquën nipatan, ninoton no'tëquën sha'huitocoi, itopi.

*Pitrori nonpinapirinso'*

*(Marcos 14.66-72; Lucas 22.56-62; Juan 18.15-18, 25-27)*

<sup>69</sup> Napotasoi, Pitroso' i'iratëquë huënsëarin. A'na cosonari huë'sahuaton, itiirin.

—Quëmanta' Quisoso Cariria quëran huë'ninso' ca'tanan, itopirinhüë'.

<sup>70</sup> —¿Ma quëmapita' napotaranso'? Co caso' ina nohuitërahüë', itërin. Ya'ipiya natanpi.

<sup>71</sup> Ina quëran pa'sahuaton, ya'coanaquë huaniso', a'na cosonarinta' quënanquiantarin. Quënanahuaton, huanipapisopita itapon:

—Iso quëmapi Quisoso Nasaritoquë ya'huërinso' ca'tanin anta', itaantapirinhüë'.

<sup>72</sup> —¿Co'chi nohuitërahüë' paya! Yosë ni'sárinco, co nohuitërahüë', taantarin Pitro.

<sup>73</sup> Ina quëran hua'quimiachin nisahuaso', a'napitarinta' itaantapi:

—Tëhuëinchachin quëmanta' Quisoso ca'tanan. Cariria piyapi pochin nonan quëran nohuitërainquën, itopi.

<sup>74</sup> —¿Co'chi iyaro'sa' paya! Yosë ni'sárinco, co cariso' nohuitërahüë'. Nonpintohu-atënuquëmaso', Yosë ana'inchinco, ténahuë', itërin.

Naporo chachin atari përarin. <sup>75</sup> Ina natanahuaton, Quisosori napotërinso' yonquirin: “Co'huara atari përashatërasohuë', cararo' nonpinapiaranco,” itërinco, ta'ton, aipiran pipirin. Inaquë chiníquën sëtatón, na'nërin.

## 27

### *Piratoquë quëpapiso'*

*(Marcos 15.1; Lucas 23.1-2; Juan 18.28-32)*

<sup>1</sup> Tahuërianpitohuachina, ya'ipi corto hua'ano'sa', cotio ansiano'sa', inapita napopi-anachin yonquipi Quisoso atëpatacaiso marë'. <sup>2</sup> Ina quëran noyá tonporahuatona', Pirato ya'huërinquë quëpapi. Inaso' hua'an, Noma copirnorí acorinso'.

### *Cotasë nitëparinso'*

*(Hechos 1.18-19)*

<sup>3</sup> Cotasëso' nani sha'huirapiponahuë', Quisoso tonpopinan quëpahuachinara, ni'sárin. Ina ni'sahuaton, yonquirin huachi. “Ma'tana tëpacaiso marë' quëparapi. ¿Onpoatocha sha'huirapirahuë' paya?” ta'ton, sëtërin. Corto hua'ano'sa' ya'huëpiquë paantarahuaton, cara shonca coriqui prata quëran nininso' quëtopiso' yayo'coantapirinhuë'.

<sup>4</sup> —Co huachi iso coriqui nohuantërahuë'. Pa'pi co noyahuë' ninahuë. Quisoso nóya quëmapi nipirinhuë', sha'huirapirahuë. Ina marë' oshahuanahuë, itoonin.

—¿Ma'marëta' ina sha'huitërancoi? Co quiyaso' ina yonquirahuë'. Quëma naporanso', itopi.

<sup>5</sup> Napotohuachinara, Yosë chinotopiso pëiquë chachin coriqui të'yatonahuaton, pipirin. Pa'sahuaton, nihuëinquëconorahuaton, nitëparin.

<sup>6</sup> Ina quëran corto hua'ano'saso' coriqui maantarahuatona':

—Tëpacaiso marë' pahuëretopiso' ni'ton, co Yosë marë' acocaso' ya'huërinhuë'. Inaquë acohuatëhua', co Yosë pënëntërinso' natëarihuahuë', ta'tona', co inaquë acopihuë'.

<sup>7</sup> —Iso coriquiquë no'pa' pa'ahuan' nisha piyapi'sa' pa'pitacaso marë', topachinara:

—Noyahua', topi ya'ipiya. Napoaton pa'sahuatona', ina coriquiquë no'pa' pa'anpi. “Tëshitona'pi no'panën,” itopiso' pa'anpi. Inaquë nisharo'sa chiminpachinara, pa'pitopi.

<sup>8</sup> Napoaton ipora huanta' ina po'oroso': “Huënai' No'pa',” itopi. <sup>9</sup> Iráca Irimiasë ninoton, Yosë quiricanëinquë ninshitërin. “Cara shonca coriqui prata quëran nininso' quëtapí. Ina nápo' cotioro'sa' nohuantopi ni'ton, quëtapí. Ina coriqui chachin maantarahuatona', <sup>10</sup> tëshitona'pi no'panën pa'anapi. Yosë sha'huitërinco chachin napoapi,” tënin, ninshitatón. Naporinso chachin ina nápo' coriqui masahuatona', no'pa' pa'anpi.

### *Pirato naporinso'*

*(Marcos 15.2-5; Lucas 23.3-5; Juan 18.33-38)*

<sup>11</sup> Quisososo' Pirato notënanquë huaniárin.

—¿Quëmaso' cotioro'sa' copirnonquën ti? itërin Piratori.

—Ca mini inaco, itërin Quisosori.

<sup>12</sup> Corto hua'ano'sa', cotio ansiano'sa', inapitari na'con nonpinapipirinahuë', co manta' tëninhuë'.

<sup>13</sup> —Na'con nonapirinëinquën, ¿co natananhuë' ti? itopirinhuë' Piratori.

<sup>14</sup> Co manta' tëninhuë'. Co pi'pisha tëranta' a'panitërinhuë'. “Ma quëmapita' isoso' ni'ton, co manta' yaa'panitërinhuë',” tënin Pirato yonquiatón.

### *Quisoso tëpacaiso' sha'huirinso'*

*(Marcos 15.6-20; Lucas 23.13-25; Juan 18.38-19.16)*

<sup>15</sup> Nani Pascoa tahuëri Piratoso', a'nara' apina'pi tashinan pëi quëran ocoirin. Insosona piyapi'sari nohuantopiso' ocoirin. <sup>16</sup> Tashinan pëiquë a'na apina'pi ya'huarin. Inaso' pa'pi co noyahuë'. Ya'ipi parti nahuiantërinso'. Parapasë itopi. <sup>17</sup> Piyapi'sa' huë'pachinara, Piratori itërin:



—Ipora Pascoaquënta' a'nara' apina'pi ocoianta'i, topirahuë'. ¿Insota' nohuantërama' ocoica'huaso'? Cato' ya'huapi. A'naso' Parapasë. A'nanta' Quisoso, Cristo itopiso'. ¿Insochachinta' nohuantërama' ocoica'huaso'? Canpita huayonco', itërin.

18 “Cotio hua'ano'sari co quë'yatonahuë', Quisoso mapi,” ta'ton, Piratori napotërin.

19 Hua'an shiranënquë huënsëaso', sa'ininta' nanan a'patiirin Quisoso ocoicaso marë'. “Achín tashi' a'ninquëchin hua'narahuë. Quisoso hua'nato, chiníquën pa'yanahuë. Inaso' noya quëmapi. Co manta' onporinhuë' ni'ton, nicha'ëquë'. Co tēpacaso' ya'huërinhuë',” itërin sa'ini. Ina marënta' Piratori co yatēparinhuë'.

20 Corto hua'ano'sa', cotio ansiano'sa', inapitaso nipirinhüë', a'naya a'naya piyapi'sa' sha'huitëra'piapi:

—“Parapasë ocoirahuaton, Quisoso atēpatëquë',” itoco', itëra'piapi. 21 Ina quëran Piratori natanin huachi.

—¿Insochachinta' ocoi'i? itaantarín. Napotaantahuachina:

—¡Parapasë ocoitocoi! itopi.

22 —¿Ma'ta' onpochi nipachin Quisoso, Cristo itopiso'? itohuachina:

—¡Corosëquë patanantëquë' chimi'in! tosapi ya'ipiya.

23 —¿Ma'marëta' tēpa'i? ¿Ma'ta' onporin? itopirinhüë', aquëtë chachin chiníquën itantapi:

—¡Corosëquë patanantëquë' chimi'in! itaantapi.

24 Napotihuachinara, nisha yonquirin huachi. “Piyapi'sa' co yanatërinacohüë'. Chiníquën no'huitatona', yaahuërinaco,” ta'ton, co huachi yonquirinhüë' Quisoso ocoicaso'. Napoaton i'sha masahuaton, piyapi'sa' ni'tërantapaquë hui'sërin.

—Iso quëmapiso' noya. Co manta' onporinhuë', tēnahuë. Co ca nohuanto, tēpaapihuë'. Co ina marë' ana'intincoso' ya'huërinhuë'. Canpita yonquiramaso', itahuaton, hui'sërin.

25 —Tēhuëchachin quiya yonquirai tēpaca'huaiso'. Yosë yaana'intoahuachincoi, hui'nahuëipitarë'coi chachin ana'inchincoi, topi.

26 Napohuachinara, Pirato camaitërin Parapasë ocoicaiso'. Quisososo nipirinhüë' chiníquën ahuihuitërin. Chiníquën huihuitona', pë'sha pë'shatopi. Nani huihuihuachinara, sha'huitërin corosëquë patanantacaiso marë'.

27 Sha'huitoahuachina, Pirato pëinënquë quëpapi. Inaquë notohuaro' sontaro'sa' niyon-tonpi tēcariatona' tēhuacaiso marë'. 28 Ai'nannpiratahuatona', quëhuanën miachin hua'an a'morinso pochin nininso' a'motopi tēhuacaiso marë'. 29 Yancotënta' nahuan quëran nicatona', ayancotopi. Ina quëran tēhuacaiso marë napotopi:

—Ma'tana huaranën maquë huachi, itatona', piquiranan asë'quëëpi. Naporahuatona' ina notënanquë isonpi:

—Hua'qui tahuëri nanpitan cotioro'sa' hua'anëntëquë', itopi.

30 Ina quëran iraiquë ipitopi. Piquirananta' matantarahuatona', ahuëmotopi.

31 Inapotatona', tēhuapi. Nani tēhuahuachinara, a'motopiso' ocoitahuatona', a'morinso chachin a'motantapi. Ina quëran corosëquë patanantacaiso marë' quëpapi huachi.

### *Corosëquë patanantopiso'*

*(Marcos 15.21-32; Lucas 23.26-43; Juan 19.17-27)*

32 Ninano quëran pipirahuatona', a'na quëmapi nacapipi, Siriniquë ya'huërinso'. Simon itopi. Ina masahuatona', corosë Quisoso quëparinso' sontaro'sari apitëntopi. Inari quëpatërin.

33 Pa'sahuatona', panëa'hua Corocota, itopiquë canconpi. Corocotaso': “Nansë Moto’,” tapon naporin. 34 Inaquë canconahuatona', huino ma'sha pinshiinë' ayontahuatona', o'shitopirinhüë', pi'pisha pi'nirahuaton, co o'orinhüë'.

<sup>35</sup> Ina quëran sontaro'sari corosëquë patanantopi. Nani patanantahuatona', ninontopi. “Huëco', nicanatëhua' Quisoso a'morinsopita maahua',” nitatona', ya'nipirapi. Naporahuatona', a'naya a'naya mapi. <sup>36</sup> Nani masahuatona', inaquë huënsëapi nicacaiso marë'. <sup>37</sup> Onporinso marësona tëparapisonta' ninshitopi.

ISOSO' QUISOSO, COTIORO'SA' COPIRNO

ta'caso', ninshitopi. Inapotahuatona', corosëquë chachin motën pëtëcha achinpitopi.

<sup>38</sup> Ina pirayan cato' apiro'santa' patanantopi. Nisha patanantopi. A'nara' inchinan quëran, a'nanta' ahuënan quëran acopi. <sup>39</sup> Piyapi'sa' na'huëpona pochin, Quisoso tëcariatona', tëhuaconpi.

<sup>40</sup> —¿Nani ma'sha nanitaparan ti? I'hua naporan: “Yosë chinotopiso pëi' ata'huantohuato, cara tahuëri quëran anoyatantarahüë,” tënan. Inta nipachin cha'ëquë'. Yosë hui'ninquën chachin nipatan, corosë quëran nohuararahuatón cha'ëquë', itoonpi.

<sup>41</sup> Inapochachin corto hua'ano'sa', cotio maistro'sa', cotio ansiano'sa', inapitarinta' tëhuatona', itapona':

<sup>42</sup> —A'napitaso' yanicha'ëponahuë', inaora chachinso' co nanitërinhuë' cha'ëcaso'. Israiro'sa' copirno nipachin, corosë quëran nohuarain nicanatëhua' natëahua'. <sup>43</sup> “Yosë hui'ninco chachin ni'ton, catahuarinco,” topirinhüë'. Yacatahuahuachin, apiramiáchin nicha'ëin, nitopi.

<sup>44</sup> Ina pirayan patanantopisopitanta' Quisoso no'huipi.

*Quisoso chiminiso'*

*(Marcos 15.33-41; Lucas 23.44-49; Juan 19.28-30)*

<sup>45</sup> Camotëchin nisahuaso', ya'ipi parti tashirarin. I'huaraya huarë' yono tashi pochin nissarin. <sup>46</sup> Naporó' Quisoso chiníquën nonin. *Iri, Iri, ¿nama sapacatani?* tënin. Inaora nananquë nonaton, naporin. “¿Onpoatonta' Tata patëranco?” tapon naporin.

<sup>47</sup> A'naquën huanipapisopita natanahuatona':

—Iniasë përasamara, topi.

<sup>48</sup> A'naso' manorahuaton, pi'shiro pochin nininso' maconin. Ina masahuaton, huino áin nininso' asë'cotëtahuaton, piquirananguë achinpitërin. Achinpitahuaton, ihuëtërin o'ocaso marë'. <sup>49</sup> A'napitariso nipirinhüë' itapona':

—Tananpitëquë' nia'ahua'. Iniasëri o'maton nicha'ëpon nimara, nitopi.

<sup>50</sup> Quisoso nipirinhüë' chiníquën nonsahuaton, chiminin huachi. <sup>51</sup> Naporó' Yosë chinotopiso pëiquë tanontën në'mëtë' patonpiso' noshatërin. Inaora noshataton, catotë huarë' ninin. Inapa quëran no'paquë huarë' noshatamarin. Naporahuaton, panca ocohua pa'nin. Na'piro'sa' inaora nopaatërin. <sup>52</sup> Nopaatohuachina, a'naya a'naya pa'pitopiso' nii'soatërin. A'naquën Yosë imarinsopita iráca ayapirinhüë', nanpiantapi huachi. <sup>53</sup> Quisoso nanpiantarinso' piquëran inapitanta' pa'pitopi quëran pipirahuatona', Quirosarinquë pa'sapi. Na'a piyapi'sari quënanpi.

<sup>54</sup> Quisoso chiminpachina, capitanso sontaronënpitarë chachin ni'sapi. Ocohua pa'ninso', na'piro'sa' nopaatërinso', inapita ni'sahuatona', pa'pi pa'yanpi.

—Tëhuëchachin iso quëmapiso', Yosë hui'nin, topi.

<sup>55</sup> Sanapi'sa' Cariria quëran huë'pisopitanta', aquë quëran notëërapí. Inapitaso' Quisoso imaquipi nocomacaiso marë'. Iporaso' chiminiso' ni'sapi anta'. <sup>56</sup> A'naso' Maria Mactarina itopiso'. A'nanta' Maria. Inaso' Santiago, Cosi, inapita a'shin. A'nanta' Sipitio hui'ninpita a'shin. Inapitaso' aquë quëran notëërapí.

*Na'pi naninquë po'mopiso'*

*(Marcos 15.42-47; Lucas 23.50-56; Juan 19.38-42)*

<sup>57</sup> I'huararapaso', a'na ma'huan Cosi itopiso huë'nin. Inaso', Arimatiaquë ya'huërin. Quisoso imarin anta'. <sup>58</sup> Pirato ya'huërinquë pa'nin Quisoso nonën natantacaso marë'. “Quëtoco cari quëpa'i,” itoonin. Napotohuachina, “Noyahua'. Quëpaquë' nipachin,”

itahuaton, sontaro'sa' a'parin nonën anohuaratacaiso marë'. Anohuararahuatona', quëtopi. <sup>59</sup> Nonën masahuaton, noya morinquë so'quëetahuaton, <sup>60</sup> na'pi nanin nasha nininquë po'morin. Inaora marë' pa'anpirinhuë', inaquë po'morin. Ina quëran pancara'pi masho pitarahuatona', pa'copitopi. Pa'copitahuatona', patopi huachi. <sup>61</sup> Maria Mactarina, a'na Maria, inapitaso nipirinhue' na'pi nanin notënanquë chachin huënsëapi.

### *Sontaro'sari a'paipiso'*

<sup>62</sup> Tahuëririnquë chinoto tahuëri marë' nani tapahuachinara, corto hua'ano'sa', parisioro'sa', inapita niyontonahuatona', pa'pi Pirato nontacaiso marë'.

<sup>63</sup> —Sinioro hua'an, Quisosocoso' nonpintë', tënai. Nani yonquirai. Co'huara chimiyantëraophonhuë', piyapi'sa' sha'huitërin. “Tëpahuachinaco, cara tahuëri quëran nanopiantarahuë,” toconin. <sup>64</sup> Napoaton sontaro'sa' a'paquë' na'pi naninquë a'paicaiso marë'. Cara tahuëri chachin noya a'pai'ina', ama nonën quëpacaiso marëhuë'. Ca'taninsopitari quëpahuachina': “Nani nanopiantarin huachi,” toconapona'. Napo-huachina', aquë aquëtë' piyapi'sa' nonpintapi, itopi.

<sup>65</sup> —Inta nipachin, sontaro'sa' ya'huarin. Canpitari chachin paatoma', inapita quëpaco' noya ni'ina'. Ama piyapi'sari huëcatona' quëpacaiso marëhuë' inapo'ina', itërin Piratori.

<sup>66</sup> Napoahuachina, pa'pi. Pancara'pi to'ni pochin nininquë noyá pa'pirapitopi. Napotahuatona', sontaro'sa' acopi.

—Noya a'paico', itahuatona' patopi huachi.

## 28

### *Quisoso nanopiantarinso'*

*(Marcos 16.1-8; Lucas 24.1-12; Juan 20.1-10)*

<sup>1</sup> Chinoto tahuëri piquëran Maria Mactarina, a'na Mariarë' naquëranchin paantapi po'mopiquë nicacaiso marë'. Tomio tahuëri tashíramiachin na'pi nanin'pa' pa'sapirinhue'. <sup>2</sup> A'nanaya panca ocohua pa'nin. Sinioro anquëninëni inápa quëran o'marahuatona', pancara'pi pa'copitopiso' chi'huincarin. Chi'huincarahuatona', ina aipi huënsërin. <sup>3</sup> Huënaráchin huënaráchin o'cori pochin ya'norin. Huiríchin a'morin. Pi'shiro quëran huiri huiríchin. <sup>4</sup> Ina ni'sahuatona', sontaro'sa' pa'yanpi. Pa'pi të'huatopi. Ropa ropátahuatona', chimipi pochin no'paquë anotopi. <sup>5</sup> Ina quëran sanapi'santa' canqui-huachinara, anquëniri itërin:

—Ama pa'yancosohue'. Quisoso corosëquë patanantopiso' yonisaramaso', nitotërahuë. <sup>6</sup> Co huachi isëquë ya'huërinhuë'. Sha'huitërinquëmaso chachin nani nanopiantarin. Huëco' ni'quirico' po'mopiquë. Capa huachi. <sup>7</sup> Manóton paatoma', ca'tano'sanënpita sha'huitonco': “Nani nanopiantarin. Ina'ton Caririaquë pa'sarin. Inatohua' quënancoantarama,” itonco'. Nani sha'huitëranquëma', itërin anquëniri.

<sup>8</sup> Natanahuatona', a'naroáchin na'pi nanin quëran pipipi. Pa'pi pa'yanpirinhue'. Nóya cancantatona' ta'api ca'tano'sanënpita sha'huitacaiso marë'. <sup>9</sup> Pa'sapirinhue', a'nanaya iraquë chachin Quisosori ya'notërin.

—Huë'cama imoyaro'sa', itërin. Ina nohuitatona', ya'carionpi. Monshorahuatona', nantën iporantërahuatona', chinotopi.

<sup>10</sup> —Ama huachi pa'yancosohue'. Paatoma', iyahuëpita sha'huitonco' Cariria'pa' pa'ina'. Inatohua' quënancoantarinaco, itahuaton, pa'nin huachi.

### *Sontaro'sa' napopiso'*

<sup>11</sup> Sanapi'sa' paasoi', sontaro'santa' ninanoquë pa'pi corto hua'ano'sa' sha'huitacaiso marë'. “Quisoso pa'pitopiquë noya ni'sapirinhue', a'nanaya panca ocohua pa'nin. Naporó' anquëni ya'norahuaton, pancara'pi pa'copitopiso' chi'huincarin. Ni'pirinhue', Quisoso nonën capa huachi,” itonpi. <sup>12</sup> Ina quëran corto hua'ano'sa', cotio ansiano'sa'

inapita niyontonahuatona', ninontápi. Nani ninontohuachinara, sontaro'sa' amatantarahuatona', na'con coriqui quètopi.

<sup>13</sup> —Piyapi'sa' sha'huitoco': "Yono tashi' Quisoso ca'tano'sanènpita huè'pi. Huè'èsocoi, nonèn quèpapi," itoco'. <sup>14</sup> Hua'anèma' natantaton ina marè' no'huihuachinquèma', quiyari anoyatarai ama ana'intinquèmaso marèhuè', itopi.

<sup>15</sup> —Noyahua'. Napo'i nipachin, tosahuatona', coriqui ma'patopi. Pa'sahuatona', piyapi'sa' nonpintopi. Cotio hua'ano'sari sha'huitopiso chachin nonpinpi. Ipora huanta' na'a cotioro'sa' ina nonpin nanan natèpi.

*Ca'tano'sanènpita a'chinacaiso marè' sha'huitèrinso'*  
(*Marcos 16.14-18; Lucas 24.36-49; Juan 20.19-23*)

<sup>16</sup> Ina quèran shonca a'na ca'tano'sanènpitaso' pa'pi Cariria'pa'. A'na panènquè pa'pi, Quisosori sha'huitèrinquè chachin. <sup>17</sup> Inaquè Quisoso quènanconahuatona', chinotopi. A'naquènso nipirinhue' pi'pian co natèrinhue'. "Co inahuè' nimara," topirinhue'.

<sup>18</sup> Quisosori ya'carirahuaton, itapon:

—Tata Yosè nohuanton, chini chiniquèn nanantèrahuè. Inápaquè ya'huèrinsopita, isoro'paquè ya'huèrinsopita, ya'ipiya hua'anèntarahuè. <sup>19</sup> Napoaton canpita paatoma', ya'ipi piyapi'sa' a'chintoco'. Nisha nisha nananquè nonpisopita a'chintoco' imainaco. Insosona natèhuachinaco, i'què aporintoco'. "Tata Yosè, Hui'nin, Ispirito Santo inapita nanan quètèrincoi ni'ton, aporintaranquèn," itahuatoma', aporintoco'. <sup>20</sup> Ina quèran ya'ipi sha'huitèranquèmaso' a'chintoco' natèinaco. Insèquèsona pa'patama', carinquèma' ca'tanaranquèma'. Nani tahuèri catahuanquèma'. Ayaro' tahuèri naniquè huarè' ca'tanaranquèma'. Co onporonta' pataranquèmahuè', itèrin Quisosori. Nani huachi.

## Marco ninshitérinpoa' Quisocristo naporinso' nitotacaso maré'

### *Coansha Paotista pënëntërinso'*

*(Mateo 3.1-12; Lucas 3.1-9, 15-17; Juan 1.19-28)*

<sup>1</sup> Apira iyaro'sa', Quisocristo nanamën ninshitaranquëma'. Inaso' Yosë hui'nin chachin. Iráca isoro'paquë o'marin nicha'ëinpoaso maré'.

<sup>2</sup> Isaiasë pënëntona'pi ninoton Yosë quiricanënquë ninshitérinso chachin o'marin. Inaquë Yosëri hui'nin itapon:

“Co'huara pa'shamátërasënquënhuë', comisionëhuë'ton a'pararahuë piyapi'sa' ayonquicaso maré'.

<sup>3</sup> Inotëro parti ina quëmapi pënëntápon: ‘Ni'co' iyaro'sa'.

Hua'an chiníquën nanantona'pi ni'ton, a'na parti yapa'pachina, comisionën a'parin ira tapatacaso maré'. Ira otëërin noya pa'tacaso maré'.

Inapochachin iporaso' cancanëma' anoyatoco' Siniro o'main,' itarin,” ténin ninshita-ton.

<sup>4</sup> Ninorinso chachin Coansha huë'nin pënëntacaso maré'. Inotëro' parti ya'huaton, piyapi'sa' pënénárin. “Co noyahuë' yonquiramasopita naniantatoma', Yosë chachin tahuëretantaco' oshanëma' inquichinquëma'. Ina quëran aporihuanco',” itarin. Napotahuaton, na'a piyapi'sa' aporintarin. <sup>5</sup> Inaquë notohuaro' piyapi'sa' huë'pi natanapona'. Quirosarin quëran huë'pi. Ya'ipi Cotia parti quëran huëcatona', natanapi. “Tëhuëchachin co noyahuë' nicatoi, oshahuanai. Catahuaco' Siniro ina nanianchüi,” topachinara, Cortaniquë Coanshari aporintërin. <sup>6</sup> Co inaso' noyápiachin a'morinhuë'. Ponira pochin camiyo anporo quëran nipiso' a'morin. Sha'huëtë quëran nitonporin. Sëquëre pochin nininso' macaton, inaya tëranta' ca'nin. Ninoi' quënanpachina, irorin. Piyapi'sa' pënënpachina, itapon: <sup>7</sup> “Ca piquëran a'na quëmapi huë'sarin chini chiníquën nanantërinso'. Caso' co pi'pian tëranta' ina pochin chiníquën nanantërahuë'. Co maquëyancohuë' ni'ton, co sapatën i'quirita'huaso tëranta' nanitarahuë'. <sup>8</sup> Caso' i'quë aporintëranquëma'. Inaso nipirinhüë' Ispirito Santo aya'coancantarinquëma',” itërin.

### *Quisoso aporihuaninso'*

*(Mateo 3.13-17; Lucas 3.21-22)*

<sup>9</sup> Naporo tahuëri'sa' Quisoso Cariria parti quëran huë'nin. Nasaritoquë ya'huëpirinhüë', Coansha pënëntarinquë huë'nin. Huë'pachina, Coanshari Cortaniquë aporintërin.

<sup>10</sup> Ii' quëran nonshihuachina, a'naroáchin inápaquë pi'iro'të' ni'soatërin. Ispirito Santonta', nëpë pochin nohuaraimarin, ni'nin. Nohuaraimarahuatón, Quisoso ya'coancantomiatërin. <sup>11</sup> Naporo' inápa quëran Yosëri itapon: “Quëmaso' hui'nahuë'nquën chachin ninan. Na'con nosoroatënquën, noya ni'nanquën,” itërin.

### *Sopairi ténirinso'*

*(Mateo 4.1-11; Lucas 4.1-13)*

<sup>12</sup> Ina quëran Ispirito Santori inotëro parti co piyapi ya'huërinquëhuë' a'parin.

<sup>13</sup> Inatohua' catapini shonca tahuëri ya'huërin. Tanan ni'niro'sapitarë' ya'huërin. Sopai hua'aninta' huëcaparahuatón, ténirin. Sha'huitápirinhüë' ama Yosë natëcaso marëhuë'. “Inca, co nohuantërahuë',” ténin. Nani sopai pa'pachina, anquëniro'sari o'marahuatona', Quisoso nocomaimapi.

### *Noya nanan sha'huicaso' caniaritërinso'*

*(Mateo 4.12-17; Lucas 4.14-15)*



<sup>14</sup> Ina quëran Coansha tashinan pëiquë po'mopi. Ina natantahuaton, Quisoso pa'nin Cariria parti pënëntapon. Noya nanan Yosë noninso' sha'huirarin: <sup>15</sup> “Nani tahuëri nanirin huachi. Iso tahuëri'sa' Yosë yahua'anëntarinquëma'. Napoaton ya'ipi co noyahuë' yonquiramasopita naniantatoma', Yosë chachin tahuërétantaco'. Naporahuaton noya nanan natëco' Yosë nicha'ëinquëma',” itërarin.

*Sami camayoro'sari imapiso'*  
(Mateo 4.18-22; Lucas 5.1-11)

<sup>16</sup> Ina quëran Cariria sono' yonsanquë pa'sahuaton, cato' sami camayoro'sa' quënanconin. A'naso' Simon itopi. Inë' riti tē'yatapi sami macacaiso marë'. Iinso' Antërisë itopi.

<sup>17</sup> —Huëco' iyaro'sa', ca imaco a'chinchinquema'. Sami manamaso pochachin piyapi'sa' masarama' Yosë imacaiso marë', itërin Quisosori.

<sup>18</sup> Napotohuachina, ritinëna' patahuatona' Quisoso imapi huachi.

<sup>19</sup> Amashamiachin Santiaco, Coansha, inapitanta' quënancoantarin. Sipitio hui'ninpita inahuaso'. Pa'pinarë' potiquë huënsëatona', ritinëna' pasonapi. <sup>20</sup> “Huëco' pa'ahua', ca imaco,” itohuachina, pa'pin, inpriatonënpita, inapita potiquë patahuatona', Quisoso imapi.

*Sopai a'parinso'*  
(Lucas 4.31-37)

<sup>21</sup> Ina quëran Capinaomoquë canconpi. Chinoto tahuëri nanihuachina, cotioro'sa' niyontonpiso pëiquë ya'conin. Inaquë a'chinarin. <sup>22</sup> Chiníquën nanantona'pi pochin a'chinarin. Co cotio maistro'sa pochin a'chininhuë'. Napoaton a'chininso' natanahuatona', piyapi'sa' pa'yanpi: “¡Ma'pitacha Quisoso nitotërin paya!” topi. <sup>23</sup> Naporo' a'nara' quëmapi inaquë ya'huërin. Sopairi ya'coancantaton, camairin ni'ton, pa'pi co noyahuë' yonquirin. Quisoso quënanahuaton, chiníquën nontërin. Sopairi chachin anonin.

<sup>24</sup> —¡Tananpitocoi! Quëmaso' Quisosonquën, Nasaritoquë ya'huëran. Nohuitërainquën. Yosë quëran o'maton noya ninan. ¿Ma'ta' quëma onpotaponcoi? ¿Ata'huantaponcoi ti? itërin.

<sup>25</sup> Itohuachina, Quisosori itapon:

—¡Ta'tëquë! ¡Iso quëmapi quëran pipimiatëquë! itërin.

<sup>26</sup> Napotohuachina, quëmapi chiníquën apa'tanin. Naporahuaton chiníquën “yai” ta'so chachin, sopai pipirin. <sup>27</sup> Ya'ipi piyapi'sa' pa'yanahuatona', ninontapi:

—¿Ma'pítata' ni'sarëhuaso'? Quisososo' co a'napita pochin a'chininhuë'. Chini chiníquën nanantaton, sopairo'sa quëran huarë' camaihuachina, natëpi, topi.

<sup>28</sup> Shiarahuaton, Quisoso naporinso' ya'ipi Cariria parti nahuinin.

*Simon Pitro a'shatën anoyatërinso'*  
(Mateo 8.14-15; Lucas 4.38-39)

<sup>29</sup> Ina quëran niyontonpiso pëi quëran pipirahuatona', Simon, Antërisë, inapita ya'huëpiquë pa'pi. Santiaco, Coansha, inapitanta' pa'pi. <sup>30</sup> Simon a'shatën chiníquën sapoton, quëhuënarin ni'ton, Quisoso sha'huitopi. “A'shacha saporin ta'a,” itopi.

<sup>31</sup> Inaquë paaparahuaton, maimirarahuaton, opatërin. Naporo chachin sapo otanotërin. Otanotahuaton, inari chachin a'carin, o'shitërin, napotërin.

*Na'a cania'piro'sa' anoyatërinso'*  
(Mateo 8.16-17; Lucas 4.40-41)

<sup>32</sup> I'huanahuanquë nani pi'i ya'conahuaso', na'a cania'piro'sa' quëpi. Sopairi ya'coancantërinso'pita' quëpi. <sup>33</sup> Ya'ipi ya'huëhuano'santa', ninano' ya'coanaquë niyontonpi Quisoso nicacaiso marë'. <sup>34</sup> Naporo' notohuaro' cania'piro'sa' anoyatërin. Nisha nisha caniori maninsopita anoyatërin. Na'aya'pi sopairo'sari ya'coancantërinso'pita'

inquitërin. Sano yonquipi huachi. Sopairo'sari ina nohuitatona', yasha'huipirinahuë', Quisoso co nohuantërinhuë' ni'ton, ta'topi huachi.

*Caririquë a'chintëra'piarinso'*  
(Lucas 4.42-44)

<sup>35</sup> Tahuëririnquë co'huara noya huënihuayantërasohuë', Quisoso huënsërahuaton ninano quëran pipirin. Co piyapi ya'huërinquëhuë' Yosë nontacaso marë' inaoraíchín pa'nin. <sup>36</sup> Simonso' capayatopirinhuë', co Quisoso quënanatonhuë', a'napitarë chachin pa'nin yonípon. <sup>37</sup> Quisoso quënanconahuatona':

—Notohuaro' piyapi'sa' yonissarinënguën, itopi. Itopirinahuë', Quisosori itërin:

<sup>38</sup> —Huëco' iyaro'sa', a'na partinta' pa'ahua'. Ya'cariya ninanoro'saquë pa'ahua'. Inaquënta' pënënta'huaso' ya'huërin. Ina marë' Yosë a'paimarinco ni'ton, huë'sarahuë, itërin.

<sup>39</sup> Ina quëran ya'ipi Cariria parti pa'sahuaton, niyontonpiso pëiro'saquë pënëntëra'piarin. Naporahuaton, sopairo'sari ya'coancantërinso'pita inquitëra'piarin.

*Chana caniori maninso'*  
(Mateo 8.1-4; Lucas 5.12-16)

<sup>40</sup> Naporó' a'na quëmapi huë'nin, chana caniori maninso'. Quisoso huëcapairahuaton, isonquirin. Isonahuaton, itapon:

—Nohuantohuaton, nanitëran anoyatancoso'. Anoyatoco topirahuë', itërin.

<sup>41</sup> Quisosori nosoroaton, së'huarin.

—Nohuantërahuë mini iyasha. ¡Noyatëquë huachi! itërin.

<sup>42</sup> Itohuachina, a'naroáchin canio inquirin. <sup>43-44</sup> Naporó chachin Quisosori chiníquën pënënin.

—¡Ama insonta' sha'huitëquësosohuë'! Corto hua'ainchin sacatërinquë paaton, noyatëranso' a'notonquë' ni'inquën. Naporahuaton, Moisésë sha'huirinsó' quëpaquë' noyatëranso' nitotacaiso marë', itërin. Ina quëran a'parin huachi.

<sup>45</sup> Napotopirinhuë', papon pochin ya'ipi piyapi sha'huitëra'piarin. “Quisoso anoyatërinco,” itëra'piarin. Ya'ipi naporinsó' nahuinin. Napoaton piyapi'sa' ni'tërantapaquë co huachi Quisoso iratërinhuë'. Co huachi nanitërinhuë' a'ninquëchin ninanoro'saquë pacacaso'. Co piyapi'sa' ya'huërinquëhuë' ya'huërárin. Ina nìponahuë', ya'ipi parti quëran huë'pi nicapona'.

## 2

*Apia anoyatërinso'*  
(Mateo 9.1-8; Lucas 5.17-26)

<sup>1</sup> Cara tahuëri quëran pochin Capinaomoquë huëantarín. “Pëinënguë Quisoso ya'huarin,” topi. <sup>2</sup> Natantahuatona', notohuaro' piyapi'sa' niyontonpi. Pëi' ya'sotahuatona', ya'coana aquëtëran huarë' yamopi. Yosë nanamën sha'huirarin, natanapi. <sup>3</sup> Naporó chachin catapini quëmapi'sa' huëcatona', apia pë'sara'huayaquë quëshipi. Hua'qui' co nanitërinhuë' huanicaso', quëhuënarín. <sup>4</sup> Quisosoquë yaquëpapirinahuë', hua'huayátërahuë piyapi'sa' ni'ton, co nanitopihuë' ya'conacaiso'. Ya'shotopi. Napoaton pëi' nanpëtahuatona', a'canpiso pi'pian o'quirahuatona', pë'sara'huayarë chachin anohuaramapi. Quisoso pirayan acomapi huachi. <sup>5</sup> Quisosori ni'sahuaton, “Ma noya isopita natërinaco,” ta'ton, apia itapon:

—Oshanën apia'hua inquitaranquën huachi, itërin.

<sup>6</sup> A'naquën cotio maestro'sa' inaquë huënsëpisopitaso', cancanëna quëran yonquirápi: <sup>7</sup> “¿Ma quëmapita' isoso' Yosë yaya'huërëtërin? Co ínsonta' nanitërinhuë' oshanënpoa' inquitinpoaso'. Yosëíchín nanitërinso',” topi yonquiatona'. <sup>8</sup> Topinan yonquirapirinahuë', yonquipiso nitotaton Quisosori itapon:

—¿Onpoatomata' co noyahuë' yonquirapiramaco? <sup>9</sup> Canpitaso naporama': "Piyapinpoa a'napita oshanën inquitacaso', co nanitërëhuahuë'. Apia camaiatë': 'Huaniquë' apia'hua. Pë'sara'huanën masahuaton, noya paquë huachi,' itacasonta' co nanitaparëhuahuë'," tënana'. <sup>10</sup> Caso nipirihuë' Yosë quëran quëmapico ni'to, nanan quëtërinco piyapi'sa' oshanëna' inquitahuaso marë'. Canpitanta' ina nitotacamaso marë' iso apia anoyatarahuë, tënin.

<sup>11</sup> Ina quëran apia itantarin:

—¡Huaniquë' apia'hua! Pë'sara'huayanën masahuaton, ya'huëranquë paquë huachi, itërin. <sup>12</sup> Itohuachina, a'naroáchin noyatahuaton, huanirin. Pë'sara'huaya masahuaton, ya'huërinquë paantarin. Ina ni'sahuatona', piyapi'sa' pa'yanpi.

—¡Ma noyacha Yosëso ni'ton, a'naroáchin anoyatërin paya! Co onporonta' ina pochin ni'chinëhuahuë', topi.

### *Nihuri Quisoso imarinso'*

*(Mateo 9.9-13; Lucas 5.27-32)*

<sup>13</sup> Naquëranchin panca sono' yonsanquë Quisoso paantarin. Inaquë hua'huayátërahuë piyapi'sa' huë'pachinara, a'chintarin. <sup>14</sup> Ina quëran na'huëpon pochin, Nihui quënanconin. Arpio hui'nin inaso'. (Matio itopi anta'.) Coriqui Noma copirno marë' ma'patërinquë huënsëarin. Quisosori itapon:

—Huëquë' iyasha imaco, itërin. Itohuachina, huanirahuaton Quisoso imasarin huachi.

<sup>15</sup> Ina quëran pëinënquë Quisoso quëparin coshatacaso marë'. Ca'tano'sanënpitarë' coshatapatapi. Na'a piyapi'sa' huë'pi coshatatona' Quisoso nohuitacaiso marë'. A'naquën copirno marë' coriqui ma'patona'piro'sa'. A'napitanta' oshahuano'sa' itopiso'. Inahuanta' Quisoso yaimápi. <sup>16</sup> A'naquëonta' cotio maistro'sa', parisioro'sa', inapitari ni'sahuatona', ca'tano'sanënpita natanpi:

—¿Onpoatonta' maistrone'ma' oshahuano'sapitarë' coshatarin? Copirno marë' coriqui ma'patona'piro'santa' co noyahuë' nipirihuë', inapitarë' coshatarin, itopi.

<sup>17</sup> Natanahuaton, Quisosori itapon:

—Isopitaso' tëhuënhachin nohuantërinaco imainacoso'. Ni'co'. Cania'piro'saso' notoro nohuantopi. "Co caniorahuë'," topatëraso', co notoro nohuantërëhuë'. Inapochachin canta' oshahuano'sa' pënëna'huaso marë' o'marahuë. "Co noyahuë' yonquiramaso-pita naniantatoma', Yosë chachin tahuërëtantaco'," itërahuë. A'napitaso nipirihuë': "Quiyaso' noyaco'i," topiso marë' co na'con a'chintërahuë', itërin.

### *Nasha nanan a'chininso'*

*(Mateo 9.14-17; Lucas 5.33-39)*

<sup>18</sup> Naporor' Coansha Paotista imapisopitaso ayonatona', Yosë nontapi. Parisio imapisopitanta' inapoapi. Napohuachinara, a'naquëni paaparahuatona', Quisoso natanpi:

—Coansha imapisopitaso' ayonatona', Yosë nontapi. Inapochachin parisio imapisopitanta' nisapi. ¿Onpoatonta' imarinënsopitaso' co inapopihuë'? itopi.

<sup>19</sup> —Ca ya'huarahuë ni'ton, co sëtopihuë'. Ni'co'. Quëmapi sa'acaso marë' piyapi'sa' amatohuachina, coshatatona', capa cancantopi. Nipayarinsopita huë'pachinara, coshatopi.

<sup>20</sup> A'na tahuëriso nipirihuë' inimiconënpitari sa'ana'pi masapi. Quëpatohuachina', sëtapihuachi. Co huachi yonquiapihuë' coshatacaiso', tënin.

<sup>21</sup> Itahuaton: "Ni'co'. A'morëso noyá mocahuachina, co nasha në'mëtëquë pa'pitërehuë'. Nasha në'mëtëquë pa'pitëre' naporini, naquëranchin panca panca noshataanta'itonhuë'. <sup>22</sup> Sha'moronta' yonquico'. Huino sha'moro' nipachina, co sha'huëtë' morsa moco' ninqüë ta'panëhuë'. Inaquë ta'panë' naporini, a'naroáchin nopoitaton, nichinia'itonhuë'. Naporahuaton morsanta' tapiitonhuë'. Napoaton sha'moro' huinoso' nasha morsaquë ta'panë'. Huino, morsanta' noya nizarin huachi," itërin Quisosori. (Iraca inachintopiso' naniantatona', nasha nanan imacaso' ya'huërin, tapon napotërin.)

*Chinoto tahuëri naporinso'*  
(Mateo 12.1-8; Lucas 6.1-5)

<sup>23</sup> Ina quëran a'na chinoto tahuëri nanihuachina, tricoro' Quisoso pëntontarin. Ca'tano'sanënpitaso papona pochin, a'naya a'naya trico moto maraapi. <sup>24</sup> Ina nicatona parisioro'saso':

—¡Ni'quë', Maistro! Chinoto tahuëri nipirinhüë', ca'tano'sanënpita tricoraya i'shorayarapi. Co ipora tahuëriso' pi'pisha tëranta' sacatacasohüë' nipirinhüë'. ¿Onpoatonta' co Moisésë pënëntërinso' natëpihuë'? itopi.

<sup>25-26</sup> —Yosë quiricanën ¿co nontëramahuë' ti? Iráca Tapi tanahuachina, Yosë pëinënquë ya'conin. Apiataro corto hua'an ni'so' ya'conahuaton, pan Yosë marë' acopiso' ca'nin. Ca'taninsopitanta' quëtërin, ca'pi anta'. Corto hua'ano'sáchin ina pan capacaso nipirinhüë', co ina marë' Yosëri no'huirinhüë', itërin.

Ina quëran itantarin: <sup>27</sup> —Piyapi'sa' nosoroaton, chinoto tahuëri acorin noya ya'huëcaiso marë'. Co tahuëri chinotacaso' na'con na'con yonquirinhüë'. Piyapi'sa' na'con na'con nosororin. <sup>28</sup> Yosë quëran caso quëmapico ni'to, chiníquën nanantërahüë. Ma'sona noya nicacaso' sha'huichinquëma'. Chinoto tahuëri ma'sona co nicacasonta' sha'huichinquëma', itërin.

### 3

*Imirin tachitërinso'*  
(Mateo 12.9-14; Lucas 6.6-11)

<sup>1</sup> Naquëranchin niyontonpiso pëiquë Quisoso ya'conconin. Inaquë apia quënanconin. Imirin tachitërin ni'ton, co nanitërinhuë' së'quëtacaso'. <sup>2</sup> “Chinoto tahuëri anoyatomara,” ta'tona', parisioro'sari ni'sápi sha'huirapicaíso marë'. <sup>3</sup> Naporo' apia itapon:

—Huë'sahuaton, huancánachin huaniquë', itërin.

<sup>4</sup> Inaquë nipachina, piyapi'sa' itapon:

—Chinoto tahuëri noya nicacaso' ya'huërin. Co ahuëtacaso', co tëpatacaso', co inapita nicacaso' ya'huërinhuë'. Cania'pi tananpituhatoso', co nosoroarahüë'. Nipirinhüë', nosoroato anoyata'huaso' ya'huërin, ténahuë caso'. ¿Ma'ta' tënama canpitaso'? itërin.

Natanaponarahüë', co manta' topihuë'. <sup>5</sup> Co a'panitohuachinarahuë', a'naya a'naya ni'sarin. Co natantochináchinhüë' cancantopi ni'ton, no'huirë pochin cancantaton, co noyahuë' ni'nin. “Co nosoropihuë',” ta'ton, pa'pi sëtërin.

—Imiran iyasha ihuëquë', itërin. Ihuëhuachina, a'naroáchin noyatërin. <sup>6</sup> Parisioro'saso' no'huitatona', pipipi. Irotisë piyapinënpita quënanconahuatona', ninontopi Quisoso tëpacaiso marë'.

*Sono' yonsanquë a'chininso'*

<sup>7</sup> Quisososo' panca sono' yonsanquë paantarin. Ca'tano'sanënpitarë' pa'nin. Na'a piyapi'sari imasapi. A'naquën Cariria parti quëran huë'pi. <sup>8</sup> A'naquëonta' Cotia parti quëran huë'pi. Quirosarin quëran, Itomia quëran, Cortanii' aquëtëran quëran, Tiro quëran, Siton quëran, ina quëranpita hua'huayátërahüë' huë'pi. Quisoso naporinso' natantahuatona', nicapona' huë'pi. <sup>9-10</sup> Na'a piyapi'sa' nani anoyatërin ni'ton, ya'ipi cania'piro'sa' huë'sapi. Na'a piyapi'sa' ni'ton, ya'sëratërarahuatona', huë'sapi Quisoso së'huacaiso marë'. “Së'huahuato, anoyatarinco,” ta'tona', naporapi. Napoaton ca'tano'sanënpita itapon: “Poti amasha quëpaco' inaquë huënsëato a'chinchí. Notohuaro' piyapi ni'ton, ya'quëëtohuachinaco,” itërin.

<sup>11</sup> Sopairo'sari ya'coancantërinso' huë'pi. Quisoso quënanahuatona', nocotapataquëchin isonquipi.

—¡Quëmaso' Yosë hui'ninquën! itopi chiníquën nontatona'. <sup>12</sup> Inariso nipirinhüë', chiníquën pënënin: “¡Ama piyapi'sa' anohuitocosohüë'!” itërin.

*Shonca cato' ca'tano'sanënpita acorinso'*  
(*Mateo 10.1-4; Lucas 6.12-16*)

<sup>13</sup> Ina quëran Quisoso a'na motopia'huaquë paantarin. Nohuantërsopita përapachina, paapapi. <sup>14</sup> Na'a a'chintërsopita ya'huëpirinahuë', shonca cato' quëmapi'sa' huay-onahuaton, acorin. “Nani tahuëri iyaro'sa' ca'tanco a'chinchinquëma'. Ina quëran a'pararanquëma' piyapi'sa' pënënacamaso marë'. <sup>15</sup> Chiniquën nanan quëchinquëma' sopairo'sa' a'pacamaso marë',” itërin. <sup>16</sup> Shonca cato' ca'tano'sanënpita acorin. A'naso' Simon. Nisha nininën acotërin. Pitro itërin. <sup>17</sup> Santiago, Coansha, inapitanta' acorin. Sipitio hui'ninpita inahuaso'. Nisha nininën inapitanta' acotaantarin. Poaniquisë itërin. (“Huirä pochin,” tapon napotërin.) <sup>18</sup> Antërisë, Pinipi, Partoromi, Matio, Tomasë, Tatio, inapitanta' acorin. A'nanta' Santiago itopi. Arpio hui'nin inaso'. A'na Simonta' acorin. Iräca copirno no'huina'piro'sa' imapirinhuë', iporaso' Quisoso imasarin huachi. <sup>19</sup> Cotasë Iscariotinta' acopirinhuë', a'na tahuëri inari sha'huirapiarinso'.

*Sopai hua'an minsërinso'*  
(*Mateo 12.22-32; Lucas 11.14-23; 12.10*)

<sup>20</sup> Ina quëran a'na pëiquë pa'pi. Naquëranchin notohuaro' piyapi'sari huëcapaiantapi ni'ton, co nanitopihuë' capacaiso tëranta'. <sup>21</sup> Quisoso quëmopinënpitari natantahuatona', “Nani hua'yantërin,” topi. Napoaton Quisoso quëpacaiso marë' huëcapaipirinahuë'.

<sup>22</sup> Cotio maestro'santa' Quirosarin quëran o'marahuatona', taponä: “Sopai hua'an Piirsipo itopisori ya'coancantërin ni'ton, nani ma'sha nanitaparin. Inari chiniquën nanan quëtërin sopairo'sa' a'pacaso marë',” toconpi.

<sup>23</sup> Quisososos nipirinhuë' piyapi'sa' përasahuaton, pënënto nanan sha'huitërin ayon-quicaso marë'. “Sopairo'sa' capini co onporonta nia'pacaiso ya'huërinhuë'. <sup>24</sup> Ni'co'. Ninanoquë ya'huëpisopita nino'huipi naporini, yanquë'itonahuë'. Co huachi inaquë ya'huë'itonahuë'. <sup>25</sup> Quëmopinëna capininta' nino'huipi naporini, inapitanta' yanquë'itonahuë'. <sup>26</sup> Inapochachin Satanäsë sopairo'sarë' nino'huipi naporini, co huachi hua'anëna niitonhuë'. Co huachi chiniquën nanan ya'huëchitonhuë'.

<sup>27</sup> Quëmapi chiniquën nipachina, pëinën noya a'pairin. Co insonta' nanitërinhuë' ya'conaton ma'shanënpita matacaso'. A'nariso nipirinhuë' ina quëran chini chiniquën ni'ton, huëcapairahuaton minsëirin. Tonporahuaton, ma'shanënpita quiquitërin huachi.

<sup>28</sup> Oshanëma marë' sëtohuatama', Yosë ya'ipi oshanëma' inquitaringuëma'. Pinopatama', inanta' inquitaringuëma'. <sup>29</sup> Nipirinhuë', Ispirito Santo pinotoma' oshahuanpatama', ina oshanëmaso' co inquitaringuëmahuë'. Onpopionta' ana'intinguëmaso' ya'huërin,” itërin.

<sup>30</sup> “Sopairi ya'coancantërin,” topiso marë' Quisoso napopënëntërin.

*Quëmopinënpita pochin nininsopita*  
(*Mateo 12.46-50; Lucas 8.19-21*)

<sup>31</sup> Ina quëran a'shin, iinpita, oshinpita, inapita canquiponaraihuë', co ya'conpihuë'. Aipiran huanirahuatona', Quisoso amatopi. <sup>32</sup> Quisoso ahuananapitona', tahuishin miächin huënsëpisopitari sha'huitopi:

—Ni'quë' Maestro. Mamaparin, iyaparinpita, oshiparinpita, inapita huëcatona', aipiran huanirapi. Yanontërinënuquën, itopirinahuë'.

<sup>33-34</sup> —Mamahuë, iyahuëpita, oshihuëpita inapita pochin ni'nahuësopita sha'huichinquëma' nitotoco', itërin.

Piyapi'sa' tahuishin miächin huënsërantapaiso' ni'sarin quëran itantapon:

—Isopita imarinaco ni'ton, iyahuëpita, oshihuëpita, mamahuë, inapita pochin nicato nosororahuë. <sup>35</sup> Yosë natëpisopita iyahuëpita pochin ni'nahuë. Sanapi'santa' Yosë nanamën natëhuachina', oshihuëpita pochin ni'nahuë. Payaro'santa' imapachinaco, mamahuë pochin ni'nahuë, itërin.



## 4

*Pa'sarayarin quëran a'chininso'*  
(Mateo 13.1-9; Lucas 8.4-8)

<sup>1</sup> Naquëranchin sono' yonsanquë Quisoso a'chiantararin. Inaquë notohuaro' piyapi'sa' niyontonpi natanacaiso marë'. Hua'huayatërahuë' tancapitohuachinara, potiquë ya'conahuaton, huënsëmarin. Inaquë yanponapirarin. Ya'huërë' piyapi'saso' ii' yonsanquë yamorapi. <sup>2</sup> Nisha nisha pënënto nanan a'chintarin. Ma pochinsona Yosë nanamën nininso' ayonquicaso marë' a'chintarin.

<sup>3</sup> A'chintaton, itapon: "Natanco a'chinchinquëma'. A'na quëmapi sha'tapon pa'sarin. <sup>4</sup> Na'a trico pa'sarayarin papotacaso marë'. Pa'sarayahuachina, a'naquën ya'pirin iraquë huarë' anotërin ni'ton, inairaro'sari huëcapairahuatona', pë'yaquipi. <sup>5</sup> A'naquën ya'pirin na'piroquë pa'sarayarin, pi'pian pi'pian no'pa' ya'huërinquë. Inaquë, shiarahuaton, papotopirinhüë'. <sup>6</sup> Pi'iri chiniquën picahuachina, yaahuirin. Pi'pishara'huaya itëhuanin ni'ton, ahuirin huachi. <sup>7</sup> A'naquën ya'pirionta' nahuanoquë pa'sarayarin. Inaquë papotopirinhüë', nahuano'santa' papotërin. Shia a'shinahuatona', imotërin. Napoaton co nitërinhuë'. <sup>8</sup> A'naquënso nipirinhüë' noyaro'paquë pa'sarayarin. Inaquë noya papotërin. A'shinpachina, sha'nin quëran na'con na'con nitërin. A'naquën ya'pirin cara shonca, cara shonca nitërin. A'naquëonta' saota shonca, saota shonca nitërin. A'naquënso' pasa, pasa nitochanin," itërin.

<sup>9</sup> Itahuaton: "Huëratëhuanpatama', noya natanatomaco, yonquico'," itaantararin.

*Pënënto nananquë a'chininso'*  
(Mateo 13.10-17; Lucas 8.9-10)

<sup>10</sup> Niyontonpisopita pa'pachinara, a'naquën imapisopita co pa'pihuë'. Shonca cato' ca'tano'sanënpitarë chachin co pa'pihuë'. "Apira a'chintërancoiso' co noya nitotëraihuë'. ¿Ma'ta' tapon naporan?" itopi. <sup>11</sup> Itohuachinara, Quisosori itapon: "Onpopinsona Yosë hua'anëntërinso' co a'napita nitotopihuë'. Co imarinacohuë' ni'ton, co nitotopirinhüë', canpitaso' carinquëma' a'chinchinquëma'. Yosë nanamën no'tëquën nitotacamaso marë' a'chinchinquëma'. A'napitaso nipirinhüë' pënënto nanan quëransáchin a'chintarahüë. <sup>12</sup> Inapitaso' co yanatërinacohuë' ni'ton, natanaponaraihuë', co natëtapihuë'. Ma'sona ninahuësonta' nicaponaraihuë', co yonquiapihuë'. Imarinaco naporini, oshanëna' inquitahuato anoyacancanchitohüë'," itërin.

*Tricoraya tapon naporinso'*  
(Mateo 13.18-23; Lucas 8.11-15)

<sup>13</sup> Naquëranchin Quisosori ca'tano'sanënpita itantapon: "Achin sha'huitëranquëmaso' ¿co nitotëramahuë' ti? Co inaya tëranta' nitotohuatamahuë', ¿onporahuatomacha ya'ipiya nitotërë'pënuëmaya? Carinquëma' nipachin anitochinquëma'. <sup>14</sup> Tricoraya pa'sarayarëso pochin Yosë nanamën ya'ipi parti a'chinë'. <sup>15</sup> A'naquën piyapi'sa' iraquë huarë' pa'sarayarinso pochin nipi. Yosë nanamën natanpirinhüë', a'naroáchin Satanasë huë'nin. Yosë nanamën natanpiso' osëretëirin. Ama natëcaiso marëhuë' ananiantërin. <sup>16</sup> A'naquën piyapi'santa' na'piroquë pa'sarayarinso pochin nipi. Yosë nanamën natanahuatona', a'naroáchin pa'yatatona', natëpirinhüë', <sup>17</sup> co cancanëna quëran huarë' natëpihuë'. Co chiniquën cancantatonahuë', co natëmiatopihuë'. Yosë nanamën yaimapi ni'ton, a'napitari tëhuapi, no'huipi, napotopi. Napohuachinara, Yosë nanamën yaa'popi. Ma'sha onpohuachinara, a'naroáchin nanamën a'popi. <sup>18</sup> A'naquën piyapi'santa' nahuanoquë pa'sarayarinso pochin nipi. Yosë nanamën natanpirinhüë', <sup>19</sup> ma'sharáchin yonquipi. 'Na'a coriqui, ma'sha, inapita ya'huëtohuachincoi, noya cancantarai,' topi. Napoaton nahuano'sari imotërinso pochin, nani ma'sha nohuantatona', Yosë nanamën naniantopi. Co imamiatopihuë'. <sup>20</sup> A'naquënso nipirinhüë' noyaro'paquë pa'sarayarinso pochin nipi. Yosë nanamën noya natanpi.

Natanahuatona', cancanëna quëran natëpi. Sharo'sa' nisha nisha nitërinso pochin natëtopi. A'naquën ya'pirin cara shonca, cara shonca nitërinso pochin noyamiachin imapi. A'naquëonta' saota shonca, saota shonca nitërinso pochin noya imapi. A'naquënso' pasa, pasa nitërinso pochin ya'ipi cancanëna quëran imatona', noya noya imapi huachi," itërin.

*Nanparin pochin nininso'*  
(Lucas 8.16-18)

<sup>21</sup> Naquëranchin Quisosori itaantaran: "Ni'co' iyaro'sa'. Nanparin i'chinpihuatëra, ¿co i'mëanaquë po'morëhuë' pa'? Co pë'saraanaquë tëranta' acorëhuë'. Nanparin aconanquë acorë' noya a'pinacaso marë'. <sup>22</sup> Iporaso' ma'sha noyá po'opinan pochin ni'ton, co in-sonta' nitotërinhuë'. A'na tahuëriso nipirinhue' ya'ipiya nitotapi. <sup>23</sup> Huëratëhuanpatama', noya natanatomaco, yonquico'," itërin.

<sup>24</sup> Ina quëran napotaantaran: "Natanpatama', noya yonquico'. Onpopinsona a'napita nitohuatama', inapochachin Yosënta' nitarinquëma'. Aquë aquëtë chachinhue' nïpon quëtëtarinquëma'. <sup>25</sup> Noya natëhuatama', na'con na'con nitotarama'. A'naquënso nipirinhue', 'Nani nitotërahuë', topirinhue', co yanatëpihuë'. Napoaton Yosëri tananpitarin. Inapotohuachina, pi'pian tëranta' nitotopiso', ya'ipiya naniantapi," itërin.

*Ya'pirin papotërin quëran a'chininso'*

<sup>26</sup> Ina quëran napotaantaran:

"Yosë hua'anëntërinso' a'chinchinquëma'. Iminquë sha'tërëso pochin ninin. <sup>27</sup> Sha'tërinso piquëran tashihuachina, hua'anën huë'ërin. Tahuërihuachina, huënsëantaran. Nani tahuëri naporárin. Oshaquëran sha'ninso' pichopitahuaton, papotërin. Onporohuatonso' papotërinso' co nitotërinhuë'. <sup>28</sup> Sha'pachina, inaora nohuanton, no'pa quëran papotërin. Nani a'shinpachina, huënsharatërin. Nani huënsharatahuaton, nitërin. <sup>29</sup> Ya'pirin cayahuachina, nani noya macacaso' ni'ton, manin huachi," tënin. (Inapochachin Yosë nanamën sha'huitohuatëhua', ina nohuanton, oshaquëran a'naquën natëtopi.)

*Mostasaraya pochin nininso'*  
(Mateo 13.31-32; Lucas 13.18-19)

<sup>30</sup> Ina quëran sha'huitantaran:

"¿Ma'pochinta' Yosë hua'anëntërinpoaso' ninin? ¿Ma quërantá' nanitëre' ina yon-quicaso'? <sup>31</sup> Mostasaraya no'paquë sha'nëso pochin ninin. Mostasarayaso' hua'huishin. A'napita ya'pirin quëran pi'pi pi'pishara'huaya. <sup>32</sup> Pi'pira'huaya nïponahuë', sha'patëra, panca panca papotërin. A'napita sharo'sa quëran panca panca ta'an ninin. Panca së'patohuachina, inairaro'sa' na'iyatona', inaquë pëipi," itërin.

*Ma'pochinsona nininso'*  
(Mateo 13.34-35)

<sup>33</sup> Ina pochin Quisosori piyapi'sa' a'chintarin. Na'a pënënto nanano'sa quëran ayonquiarin. Natantiinpichin a'chintarin. <sup>34</sup> Napoaponahuë', pënënto nanan quëransáchin a'chintërin. Ina quëran ca'tano'sanënpitaráchin ya'huëhuachinara, oshaquëran a'chintantaran no'tëquën yonquicaiso marë'.

*Ihuan a'parinso'*  
(Mateo 8.23-27; Lucas 8.22-25)

<sup>35</sup> Naporo' tahuëri chachin nani tashirarapaso', ca'tano'sanënpita itapon:  
—Sono aquëtëran pa'ahua', itërin.

<sup>36</sup> Nani piyapi'sa nontahuaton, Quisoso potiquë ya'comarin. Napohuachina, ca'tano'sanënpitarë chachin pa'pi. Naporo' a'napitanta' nisha potiro'saquë pa'pi. <sup>37</sup> Paaquëya', panca ihuani manin. Co'sacairi poti opoto opototahuaton, nani

yamëntairapirinhüè'. <sup>38</sup> Ya'huèrè Quisososo', huanconënquë motonan motoantahuaton, huè'ërarin. Ca'tano'sanënpitari ochinanpi:

—¡Catahuacoi Maistro chimiitarihua! ¿Co ina yonquiranhuè' ti? itopi.

<sup>39</sup> Huanintarahuatón, ihuan a'parin. Sononta' camaiton:

—¡Sanoquë! ¡Copi tëquë huachi! itërin. Itohuachina, ihuan copitënin. A'naroáchin sanoirin.

<sup>40</sup> —¿Onpoatomata' të'huataramaso'? ¿Co Yosë natëyatëramahuè' ti? itërin.

<sup>41</sup> Pa'pi pa'yanahuatona', ninontopi:

—¿Ma quëmapicha isoso' ni'ton, ihuan a'parin nicaya? Sononta' a'naroáchin asanoirin, nitopi.

## 5

### *Sopairo'sari ya'coancantërinso'* (Mateo 8.28-34; Lucas 8.26-39)

<sup>1</sup> Ina quëran, sono' aquëtëran Quirasa parti itopiquë canconpi. <sup>2</sup> Quisoso nani nonshihuachina, a'na quëmapiri na'pi nanin quëran pipirahuaton, nacapirin. Sopairi ya'coancantërin ni'ton, co huachi noya yonquirinhüè'. Hua'yantërin. <sup>3</sup> Na'pi naninquë chimipiro'sa' po'mopiquë ya'huërin. Pa'pi chiniquën ni'ton, co catinaquë tëranta' nanitopihüè' tonpocaiso'. <sup>4</sup> Na'aro' catinaquë tanpaquën tonpotahuatona', pa'on tonpotopirinhüè', oshitërachinin. Co incariso tëranta' nanitërinhuè' minsëcaso'. <sup>5</sup> Nani tashi', nani tahuëri iratárin. Na'pi naninquë, motopiquë inaquëpita pa'sápaton, chiniquën yaitárin. Na'piquë nipë'sharárin. <sup>6</sup> Quisoso aquë quëran quënanahuaton, ta'aquirin. Quisoso nocotapataquë isonquirahuaton, mosharin. <sup>7-8</sup> Napohuachina, Quisosori nosoroaton, a'naroáchin sopai nontërin.

—¡Iso quëmapi quëran pipico huachi! itërin. Ina natanahuaton, sopairi chiniquën a'panirin.

—¿Ma'ta' yaonpotarancoi? Quëmaso' Quisasonquën, Yosë hui'ninquën ni'ton, chini chiniquën nanantëran. Yosë marë' ama apira aparisitocoisohüè', itërin.

<sup>9</sup> —¿Ma'ninquënta' quëmaso'? itërin Quisosori.

—Na'acoi ni'toi, “na'a huaranca,” itërinacoi. <sup>10</sup> Ama a'na parti a'pacoisohüè', tosapi.

<sup>11</sup> Ina ya'cariya notohuaro' coshiro'sa' panënquë coshatapi.

<sup>12</sup> —A'pacoí coshiro'saquë tëranta' ya'coanta'ii, tosapi.

<sup>13</sup> —Inta nipachin, inaquë paatoma' ya'conconco', itërin. Itohuachina, sopairo'sa' pipirahuatona', coshiro'saquë ya'conconpi. Ina quëran ya'ipi coshiro'sa', cato huaranca pochin nipirinhüè', hua'yantatona' ta'api. Tahuan pa'tatona', sonoquë niitopi. Inapoa-tona', taquiitopi.

<sup>14</sup> Coshi a'paina'piro'saso' ni'sahuatona', ta'arë'nachin ninanoquë ya'huëpisopita sha'huitonpi. Ninano pirayan ya'huëpisopitanta' a'naya a'naya sha'huitëra'piapi. Natan-tahuatona', “¿Ma'ta' onpocaiso'?” ta'tona', pa'pi nicapona'. <sup>15</sup> Quisosoquë canquirahuatona', quëmapi hua'qui' hua'yantërinso' quënanquipi. Nani a'moanaton, noya huënsërarin. Na'a sopairo'sari ya'coancantopirinhüè', noya yonquiantarin. Co huachi hua'yantërinhuè'. Napoaton pa'yanpi. <sup>16</sup> “Quisosori anoyatërin. Sopairo'sa' a'pahuachina, coshiro'saquë ya'conconpi. Inapohuachinara, tahuan pa'tahuatona', sonoquë taquiitopi huachi,” itopi ni'pisopitari. <sup>17</sup> Natanahuatona', piyapi'sa' të'huatopi: “A'na parti paquë’,” itopi Quisoso nontatona'.

<sup>18</sup> Quisoso potiquë ya'conaso', hua'yantërinsoari huëcapairahuaton, itapon: “Canta' imainquën,” itërin. <sup>19</sup> Quisososo nipirinhüè' co nohuantërinhuè'.

—Ya'huëranquë iyasha paantaquë'. Quëmopinënpita sha'huitonquë'. “Siniro noyá anoyatërinco. Na'con nosororinco,” itëquë', itërin Quisosori.

<sup>20</sup> Napotihuachina, pa'nin. Ticaporisë parti sha'huirap'iarin. “Quisoso nóya anoyatërinco,” itëra'piarin. Natanahuatona', “¡Ma'pitacha sha'huirin paya! ¡Ma noya catahuarin!” topi ya'ipiya.

*Sanapi anoyatahuaton, Cairo hui'nin ananpitaantarinso'*  
(Mateo 9.18-26; Lucas 8.40-56)

<sup>21</sup> Quisososo' pëntonquiantarahuaton, na'a piyapi'sa' quënanquirin. Sono' yonsanquë huëcapairahuatona', tancapitopi. <sup>22</sup> Naporo' a'na cotio hua'an Cairo itopiso huë'nin. Inaso', niyontonpiso pëi' hua'an ya'conin. Quisoso quënanquirahuaton, nantën pirayan isonquirin:

<sup>23</sup> —¡Hui'nahuë Siniro, chiminarin! Huëquë'. Së'huaquiton, anoyatoco, chiminpachin, itárin.

<sup>24</sup> —Inta nipachin, tosahuaton, imarin. Na'a piyapi'santa' imasapi ni'ton, Quisoso ya'quëëtëra'pi. <sup>25</sup> Paaquëya', a'na sanapiri imaquiarin, hua'qui' panca huënai' a'parinso'. Nani shonca cato' pi'ipi co sanorinhuë'. <sup>26</sup> Na'a notoro'sari nonënpirinahuë', na'con parisitárin. Nani ya'ipi coriquinën i'quiaponahuë', co manta' noyatërinhuë'. Aquëtë chachin nizarin. <sup>27-28</sup> Quisoso nahuininso' natantahuaton, pinën quëran imaquiarin. “A'morinso tëranta' së'huahuato, anoyatarinco,” ta'ton, piyapi'sa' ya'sëratërarahuaton, a'morinso' së'huatiirin. <sup>29</sup> Naporo' a'naroáchin huënai' no'narin. Canio quëran nani noyatërin ninatanin. <sup>30</sup> Quisososo' co quënanaponahuë', inaora nitotërin. “A'naso' natëtonco, së'huaquirinco. Ca nohuanto noyatërin,” ta'ton, a'naroáchin tahuërëtahuaton, natantërin:

—¿Inta' a'morahuëso' së'huatërinco? ténin.

<sup>31</sup> —Ni'quëchi Maestro, notohuaro' piyapi'sa' ya'quëëtäpirinënquënhuë', “¿Inta' së'huarinco?” ¿tënan ti? itërin ca'tano'sanënpitari.

<sup>32</sup> Itopirinahuë', Quisososo' a'naya a'naya ni'sarin. “¿Inta' së'huarinco?” ta'ton, ni'sárin. <sup>33</sup> Napotihuachina, sanapiso' “Nani anoyatërinco,” ta'ton, ropa ropatërarin quëran Quisoso huëcapairin. Isonquirahuaton, no'tëquën sha'huitërin. “Hua'qui' caniorahuë ni'ton, së'huaranquën Siniro. Së'huatënquën, a'naroáchin noyatërahuë huachi,” ténin.

<sup>34</sup> —Natëranco ni'ton, nani imoya, anoyatëranquën. Nani noyatëran ni'ton, noya paquë huachi, itërin.

<sup>35</sup> Ina nontaso chachin, Cairo pëinën quëran huë'sahuatona', sha'huitipi.

—Hui'nán nani chiminin huachi. ¿Ma'marëta' topinan quëran Maestro quësaran? itipi.

<sup>36</sup> Quisososo nipirinhuë' piyapi'sa' noninso' natanaponahuë', co ina yonquirinhuë'.

—Ama iyasha pa'yanquësuhuë'. Natëco, itërin.

<sup>37</sup> “Ama a'napitaso' huë'inasuhuë',” topachina, Pitro, Santiago, Coansha, inapitaráchin pa'pi. Coanshaso' Santiago iin. <sup>38</sup> Cairo pëinënquë canconahuatona', na'a piyapi natanconpi. Chiníquën na'nëtona', ayanápi. <sup>39</sup> Ya'contarahuaton, inapita itapon:

—¿Onpoatomata' na'nëtoma', noncaroaramaso'? Co sanapia'hua chimininhuë'. Huë'ësárin, itërin Quisosori.

<sup>40</sup> Naporinso' natanahuatona', piyapi'sari tēhuapirinahuë'. Quisosoriso' inapita ocoirahuaton, pa'pin, a'shin, cara ca'tano'sanën, inapitaráchin quëparin. Sanapia'hua ya'huërinquë ya'concontarin. <sup>41</sup> Maimirarahuatón, inaora nananquë:

—*Tarita comi*, itërin. “Huënsëquë' apia'hua,” tapon napotërin. <sup>42</sup> A'naroáchin sanapia'hua huënsërahuaton, huanirin. Nani shonca cato' pi'ipitërin ni'ton, noya iratërin. Ina ni'sahuatona', ya'ipi piyapi'sa' pa'pi pa'yanpi. “¡Ma'pítacha nitotaton, ananpitaantarín paya!” topi. <sup>43</sup> Quisososo nipirinhuë', “Ama a'napita sha'huitocosuhuë',” itahuaton, “Nanon a'caco',” itërin.

## 6

*Nasaritoquë paantarinsò'**(Mateo 13.53-58; Lucas 4.16-30)*

<sup>1</sup> Ina quëran pipirahuaton, ya'huërin'pa' paantarinsò'. Ca'tano'sanënpitarinta' imapi.  
<sup>2</sup> Chinoto tahuëri nanihuachina, niyontonpiso pëiquë a'chinarinsò'. Na'a piyapi'sari natanahuatona', pa'yanpi. Pa'yanatona', inahua capini ninontapi:

—¡Ma'pítacha Quisoso nitotërin paya! ¿Macarinsò' a'chintomara? Noya noya yonquirinsò'. Piyapi'sa' a'naroáchin anoyatërin. ¿Onporahuatoncha nani ma'sha nanitaparinsò' nicaya?

<sup>3</sup> Hua'huatapon quëran huarë' nohuitërehua'. ¿Co'na nontëcamayo inaso'? A'shinsò' Maria itopi. Iinpítanta' nohuitërehua'. Santiaco, Cosi, Cotasë, Simon, inapita itopi. Oshinpítanta' isëquë canpoarë' ya'huarinsò'. Co Quisoso chiníquën nanantërinhuë'. Canpoa pochachinsò' inanta', ta'tona', “¡Macari natëapon!” topi. <sup>4</sup> Napohuachinara, Quisosori itapon:

—Ya'ipi piyapi'sari pënëntona'pi noya natanpi. Ninanonënnquë ya'huëpisopitarinsò' nipirinhuë', co noyahuë' natanpi. Quëmopinënpita, huëntonënnquë ya'huëpisopita, inapítanta' co noyahuë' ni'pi, topi iráca. No'tëquën napopi, téninsò' Quisoso. <sup>5</sup> Co cancanëna quëran huarë' natëpihuë' ni'ton, co nanitërinhuë' aquëtë huarë' Yosë pochinsò' nicacasò'. Caraíchin cania'piro'sa' së'huarahuaton, anoyatërin. <sup>6</sup> “¿Onpoatoncha isopita co yanatërinacohuë' nicaya?” téninsò', yonquiapon.

*Ca'tano'sanënpita a'chinacaisò marë' a'parinsò'**(Mateo 10.5-15; Lucas 9.1-6)*

Ina quëran ya'cariya ninanoro'saquë pa'sahuaton, piyapi'sa' a'chintarinsò'.  
<sup>7</sup> Naporahuaton, shonca cato' ca'tano'sanënpita përasahuaton, sha'huitërin paatona' a'chinacaisò marë'. Catoya catoya a'parinsò'. Chiníquën nanan quëtërin sopairo'sa' a'pacaisò marë'.

<sup>8</sup> —Pa'patama', ama ma'sha quëpacosohuë'. Ama cosharo', pë'pëto, coriqui, inapita tëranta' quëpacosohuë'. Pitanaráchin quëpaco'. <sup>9</sup> Sapatë' po'morahuatoma', a'moramazorë' quëmaráchin paco'. <sup>10</sup> Inso pëiquësona yacapatohuatama', ina pëiquëráchin ya'huëco'. Ina ninano quëran pipiamaquë huarë' inaquë ya'huëco'. <sup>11</sup> A'na ninanoquë ya'huëpisopita no'huitënnënnquëma': “Ama isëquë huëcosohuë'. Co yanatanainquëmahuë',” itohuachinënnquëma', patoco'. Yapa'patama', pënëncò': “Nani sha'huitopiranquëmahuë'. Co nohuantëramahuë' ni'quëhuarë' canpitaora tëhuënnëmaquë nina'intarama',” itoco'. Tëhuënnchachinsò' Yosëri chiníquën ana'intarinsò' huachi, itërin Quisosori.

<sup>12</sup> Ina quëran ca'tano'sanënpita pa'sahuatona', piyapi'sa' pënëna'piapi: “Ya'ipi co noyahuë' yonquiramasopita naniantatoma', Yosë chachinsò' tahuërëtantaco huachi,” itëra'piapi. <sup>13</sup> Naporahuatona', na'a piyapi'sa' sopairo'sari ya'coancantërinso inquitopi. Na'a cania'piro'santa' tomaquë pashitatona', anoyatopi.

*Coansha Paotista tëpapiso'**(Mateo 14.1-12; Lucas 9.7-9)*

<sup>14</sup> Ya'ipi Quisoso naporinsò' nahuininsò'. Piyapi'sa' natanahuatona', nisha nisha yonquipi. Cariria hua'aonta' natantërin, Irotisë itopiso'. I'huamiáchin inari sontaronënpita camaiton, Coansha Paotista atëpatërin ni'ton, yonquiárin: “Ina quëmapiso' Coansha. I'hua chiminaponahuë', nanpiantarinsò'. Napoaton nani ma'sha nanitaparinsò',” téninsò'.

<sup>15</sup> “Co inahuë'. Iniasë pënëntona'pi ipora,” topi a'naquëonta'.

“Co inahuë'. Ninotona'pi iráca ya'huërinso' nimara,” topi a'naquëonta'.

<sup>16</sup> Irotisëso nipirinhuë', co nisha nisha yonquirinhuë'.

—Inaso' tëhuënnchachinsò' Coansha. Anishitëconotopirahuë', nanpiantarinsò', téninsò'.

<sup>17-19</sup> I'hua chachinsò' Coansha nanpiso', Irotisë co noyahuë' nininsò'. Iin sa'in osëretërin. Pinipi sa'in chachinsò' osëretaton, maninsò', Irotiasa itopiso'. Napoaton Coanshari chiníquën



pënënin. “Co Yosë nohuantërinhuë' iyaparin sa'in osërëtatón macamaso',” itërin. Napotërinso marë' Irotiasaso' co quëyatónhuë', onpopionta yatëparin. Ina nohuantón hua'anso', sontaro'sa a'parin. Coansha macacaiso marë'. Masahuatóna tashinan pëiquë po'mopi. Inapotahuatóna, catinaquëtopi.

<sup>20</sup> Irotisëriso' Coansha noya natanin. “Nóya quëmapi inaso'. Co oshahuanhuë',” ta'ton, co nohuantërinhuë' atëpatacaso'. Coanshari pënënpachina, nisha nisha yonquiaponahuë', noya natanin. <sup>21</sup> Ina quëran hua'huatërinso' tahuëri nanihuachina, pita ninin. Na'a piyapi'sa' amatërin. Coisëro'sa', capitano'sa', ma'huano'sa' Caririquë ya'huëpisopita, inapita amatërin. Naporo' tahuëri Irotiasa chinotërin Coansha atëpatacaso'. <sup>22</sup> Coshatasoi', hua'huin ya'conahuatón, nansararin. Nanon nansarinso' ni'sahuatóna', ya'ipiya quëran pa'yatopi. Hua'an mashorinta' pa'yatërin.

—Ma'sona nohuantëranso' apia'hua, nico quëchinquën. <sup>23</sup> Yoscoarë' quëchinquën. Ma'sona tëranta' nipatanco, quëtaranquën. Pancana no'pa' hua'anëntërahuë. Patomaquë huarë' quëtaranquën, itërin hua'ani na'aro nontatón. <sup>24</sup> Napotápachina, a'shin paahuarin.

—¿Ma'ta' mama ma'pai? itoonin.

—“Coansha nishitëconotahuatón, motën quëtoco,” itëquë', itërin.

<sup>25</sup> Manorahuatón, hua'an ya'huërinquë paantarin.

—Coansha motën nohuantërahuë. Sënanquë acorahuatón, apiramiáchin quëtoco, itërin.

<sup>26</sup> Ina natanahuatón, hua'an pa'pi sëtërin. Napoaponahuë', “Ya'ipi piyapi'sa' nataninaco, Yoscoarë' itërahuë,” ta'ton, co yanonpintërinhuë'. <sup>27</sup> Ina quëran sontaro sha'huitahuatón, a'parin Coansha motën macacasó marë'. Inaso pa'sahuatón, tashinan pëiquë nishitëconotërin. <sup>28</sup> Sënanquë motën acorahuatón, nanon quëtërin. Nanonta' a'shin quëtonin.

<sup>29</sup> Imarinsopitaso', natantahuatóna huë'pi. Nonën quëparahuatóna', pa'pitopi huachi.

*Cosharo' ana'atërinso'  
(Mateo 14.13-21; Lucas 9.10-17; Juan 6.1-14)*

<sup>30</sup> Ina quëran ca'tano'sanënpita huëantarahuatóna', Quisoso sha'huitiipi. “Nani a'chintëra'piarai. Cania'piro'santa' anoyatërai. Noya natanpi,” itiipi. <sup>31</sup> Na'a piyapi'sa' huë'sapi Quisoso nicapona'. Ina quëran paantapi. A'napita ya'huë'rë' huëantapi, ina quëran paantapi. Naporápi ni'ton, Quisoso ca'tano'sanënpitarë chachin co capacaiso tëranta' nanitopihuë'.

—Huëco' iyaro'sa'. Co piyapi ya'huërinquëhuë' pa'ahua'. Pi'pian chinotahua', itërin ca'tano'sanënpita. <sup>32</sup> Itohuachina, potiquë ya'conahuatóna', pa'pi. Co piyapi ya'huërinquëhuë' pa'sapirinahuë'. <sup>33</sup> Pa'pachinara, na'a piyapi'sari notëërapí. Quisoso nohuitahuatóna', na'a paahuapi. Nisha nisha ninano quëran pa'pi. Ira pa'tatóna', ta'arahuatóna', inahua'ton canconpi. Co'huara Quisoso canshátërasohuë', canconpi. <sup>34</sup> Na'a piyapi'sa' yamorapi. Nonshirahuatón, Quisosori quënanconin. “Isopitaso' ohuicaro'sa' co macari a'pairinsohuë pochin nisapi,” ta'ton, nosororin. Nosoroaton, na'con a'chintaantarin. <sup>35</sup> Nani i'huararahuasó', ca'tano'sanënpitari Quisoso huëcapairahuatóna', itopi:

—Nani Maistro i'huarin. Co manta' isëquë ya'huërinhuë' ni'ton, <sup>36</sup> piyapi'sa' a'paquë' pa'ina'. Isosha'huaya pëiro'sa' ya'huërin. Ninanoro'santa' co aquëyahuë'. Inatohua' coshoro' pa'anatóna', ca'ina', itopirinahuë'.

<sup>37</sup> —Canpitari a'caco', itërin Quisosori.

—Cato pasa tahuëri sacatatë' coriqui canarëso pochin nininquë pan pa'anahuatói, ¿a'ca'ii ti? itopi.

<sup>38</sup> —¿Onpo panta' ya'huëtërinquëma'? Paatoma', ni'conco', itërin. Pa'sahuatóna', ni'conpi.

—A'natërapoya pan, catoyachin sami, inaíchin ya'huëtërincoi, itiipi.

<sup>39</sup> Itohuachinara, piyapi'sa' sha'huitërin pastoque huënsëcaiso'. <sup>40</sup> A'naquën a'natërápo shonca, a'natërápo shonca, a'naquën pasa, pasa huënsëpi. <sup>41</sup> Ina quëran a'natërapoya pan, catoya sami, inapita ma'parin. Inápaquë në'pëtahuaton, Yosë nontërin. “Yosparinquën, Tata,” itahuaton, pan sè'panin. Ina quëran ca'tano'sanënpita quëtërin piyapi'sa' quëtacaiso marë'. Sami sè'paninsonta' quëtëra'piapi. Inaíchin nipirinhue', ya'ipi piyapi ananitërin. <sup>42</sup> Ya'ipi piyapi'sa' natëaquë huarë' coshatopi. <sup>43</sup> Ina quëran pan, sami, inapita pë'sotopiso' maantapi. Shonca cato' i'më' amëntatopi. <sup>44</sup> A'natërápo huaranca quëmapi'sa' naporo' coshatopi.

### *I aipi i'narinso'*

*(Mateo 14.22-27; Juan 6.16-21)*

<sup>45</sup> Ina quëran ca'tano'sanënpita itapon: “Potiquë ya'conahuatoma', aquëtëran paco'. Apira canta' pa'sarahuë. Pitsaita'pa' pa'ahua,” itërin. Ca'tano'sanënpita nani pa'pachinara, piyapi'sa' nontarin ya'huëpi'pa' paacaiso marë'. <sup>46</sup> Nani nontohuachina, inaora pa'nin a'na motopia'huayaquë Yosë nontacaso marë'. <sup>47</sup> Tashiuhachina, ca'tano'sanënpitaso' potiquë pa'sapirinahuë', sono' huáncoanai' tashitopi. Quisososo' inaoraíchin quëparitërin. <sup>48</sup> Ca'tano'sanënpita ya'ipi tashi' maitopirinahuë'. Ihuan nacapiatona', co nanitopihuë' chiníquën pacacaiso'. Canotopi huachi. Ina ni'sahuaton, co tahuëriyatërasohuë', Quisoso pa'nin. I aipi i'narahuaton, no'pa pochin pa'tarin. Poti nani icantaponahuë', na'huëtatë pochin nisarín. <sup>49</sup> I aipi pa'sarinso' quënanahuatona', pa'yanpi. “Hua'yan” ta'tona', “ëë” topirinahuë'. <sup>50</sup> Ya'ipiya quëran ni'sahuatona', të'huatopi. Nipirinhue', a'naroáchin Quisosori itërin:

—Co'ta ca huë'sarahuë. Ama pa'yancosohuë'. Chiníquën cancantoco', itërin.

<sup>51</sup> Ina quëran potiquë ya'conapatërin. Ya'conpachina, ihuan sanorin huachi. Ca'tano'sanënpita pa'yanpi: “¿Onporahuatoncha nanitaparín nicaya?” topi yonquiatona'.

<sup>52</sup> Nani pan ana'atërinso' nicaponaraihuë', co ina yonquipihuë'.

### *Quinisariti parti pa'ninso'*

*(Mateo 14.34-36)*

<sup>53</sup> Aquëtëran canconahuatona', Quinisariti parti nonshipi. Yonsanquë poti a'sonpi. <sup>54</sup> Nonshiaso chachin, a'naroáchin piyapi'sari Quisoso nohuitopi. <sup>55</sup> Manorahuatona', ya'ipi ina parti pa'sahuatona', pëiro'saquë pa'pi. Na'a cania'piro'sa' pë'sara'huayaquë quëpi anoyatacaso marë'. “Pasëquë Quisoso ya'huarin,” itohuachinara, inaquë quëpi. <sup>56</sup> Intohuaso tëranta' Quisoso pa'pachina, inatohua' cania'piro'sa' quëparapi. Nisha nisha ninanoquë pa'sarin. A'naquën pancana. A'naquën caraíchin piyapi ya'huëpirinhue', insëquësona pa'pachina, cachiquë cania'piro'sa' acopi. “Quëma a'moranso' huirotën tëranta' sè'huatona', noyachina',” tosapi. “Inta nipachin, sè'huaina',” topachina, sè'huapi. Insoarisona sè'huahuachina', a'naroáchin noyatopi huachi.

## 7

### *Cotio mashocoro'sa' napopiso'*

*(Mateo 15.1-9)*

<sup>1</sup> Ina quëran a'naquën parisioro'sa', cotio maestro'sa', inapita Quirosarin quëran o'mapi Quisoso natanacaiso marë'. <sup>2-3</sup> Quisoso ca'tano'sanënpita coshataso', quënanquipi. A'naquën co niopoimirataponaraihuë' coshatapi. Parisioro'saso' co'huara coshachatëraponahuë', pi'pian i'shaquë niopoimiratopi. Ya'ipi cotioro'sa' ina pochin yonquipi. “Co inapohuatëhuahuë', oshahuanaríhua',” tëcatona' napopi. Shimashonëna' inachintopiso' ni'ton, inapopi. <sup>4</sup> Mircatoquë pa'pi quëran yacoshatohuachinara, i'quë niopoimiratopi. Na'a nisha nisha inachintopisopita ya'huëtopi. Minëro'sa', i'sha ta'painano'sa', hua'na yonsharo'sa', pë'sararo'sa', inapita pa'mopi. <sup>5</sup> Napoaton parisioro'sa', cotio maestro'sa' inapitari Quisoso natanpi.

—¿Onpoatonta' Maistro quëma a'chintëransopitaso', co niopoimirataponaraihuë' coshatapi? Shimashonënpoa' inachintopirinahuë', inahuaso' co napopihuë', itopi.

<sup>6</sup> —Co no'tëquën iyaro'sa' yonquiramahuë'. “Yosë imarai,” topiramahuë', co imaramahuë'. Canpitaso' nonpintënquëma'. Iráca Yosë quiricanënquë Isaiasë no'tëquën ninorinquëma':

“Isopita piyapi'saso' nanamëna quëran noya nontopirinacohuë', co cancanëna quëran imarinacohuë'.

<sup>7</sup> “Yosë pënëntërinso' a'chinarai,' topirinahuë', inahuara yonquipiso' nia'chintapi. Napoaton topinan quëran chinotërinaco,” ténin Yosë. Iráca Isaiasë ninshitaton, naporin. <sup>8</sup> Inapochachin canpitanta' Yosë pënëninpoaso' naniantahuatoma', piyapi'sa' a'chinpiso' natërama huachi, itërin.

<sup>9</sup> Naquëranchin itantarin:

—Tehuënachin Yosë pënëntërinso' a'porama' shimashonëma' napopiso' natëcamaso marë'. <sup>10</sup> Ni'co'. Moisésë iráca pënëntaton, naporin: “Tatama', mamama', inapita noya natëtoma', catahuaco'. Inso tëranta pa'pina', a'shina' inapita co noyahuë yonquirapitona' no'huihuachina', tëpaco',” ténin. <sup>11</sup> Canpitaso nipirinhaü' nisha a'chinama'. A'chinatoma', naporama': “A'naquën nanitërin pa'pina', a'shina' apiratacaso'. ‘Ma'sha ya'huëtërinco' nani acorahuë Yosë quëta'huaso marë',’ topatëra, co tatama', mamama' inapita quëtacaso' ya'huërinhuë',” toconama'. Napoaton tatama', mamama' inapita ma'sha pahuantohuachinara, apiratatoma', co quëtëramahuë'. <sup>12</sup> “Co quëtacaso' ya'huërinhuë',” toconatoma', co catahuaramahuë'. <sup>13</sup> Ina pochin nia'chintatoma', co Yosë quiricanën natëramahuë'. Hui'namapitanta' a'chintërama' inapochachin nicacaiso marë'. Inapochachin pochin na'con nisha nisha nia'chintërama', itërin Quisosori.

*Onporahuatëhuasona oshahuanëhuaso'*  
(Mateo 15.10-20)

<sup>14</sup> Naquëranchin piyapi'sa' përasahuaton, a'chintantarin.

—Ya'ipinquëma' natanco no'tëquën yonquicamaso marë'. <sup>15</sup> Co manta' ma'sha ya'huërinhuë' nonënpoaquë ya'conahuaton, aoshahuaninpoaso'. Cancanënpoa quëran pipirinso' tējuënachinso' aoshahuaninpoa'. [ <sup>16</sup> Huëratëhuanpatama', noya natanatomaco, yonquico', itërin.]

<sup>17</sup> Nani a'chintohuachina, piyapi'sa' patahuaton, pëiquë ya'conconin. Ca'tano'sanënpitanta' ya'conpi. Nani ya'conpachinara: “Achin naporanso' co nitotëraihuë'. ¿Ma'ta' tapon naporan?” itopi.

<sup>18-19</sup> —¿Co canpita tëranta' nitochátëramahuë' ti? Inta nipachin, a'chintanta'inquëma'. Nani ma'sha ca'nëhuaso marë' co ina marë' oshahuanëhuahuë'. Co cosharo' cancanënpoaquë ya'coninhuë'. Chi'chirinamënpoaquë ya'conin. Ina quëran inquietarë'. Napoaton ya'ipi cosharo' noya capacaso'. Coshatërehuaso marë' co oshahuanëhuahuë', itërin. <sup>20</sup> Ina quëran itaantarin:

—Cancanëma quëran co noyahuë' yonquihuatomara, co noyahuë' ninama'. Ina marë' oshahuanama'. <sup>21</sup> Acopo' cancanëma quëran co noyahuë' yonquiramasopita pipirin. Co noyahuë' yonquihuatama', monshihuanama', ihuatërama', tëpatërama'. <sup>22</sup> Nitëhuananpitërama'. Pa'yatacasoráchin cancantërama'. A'napita ma'shanën noyaparama'. Co noyahuë' ninama'. Nonpinama'. Nisha nisha co noyahuë' ninamaso' co yaa'poramahuë'. Apirarama'. Pinotërama'. “Caso' co a'napita pochincohuë'. Noya noyaco,” toconama'. Co yonquinahuanhuë' ninama'. <sup>23</sup> Co noyahuë' yonquihuatomara, ina pochin ninama'. Ina marë' oshahuanama', itërin Quisosori.

*Nisha sanapi natëtërinso'*  
(Mateo 15.21-28)

<sup>24</sup> Ina quëran pipirahuaton, nisha piyapi'sa' ya'huëpiquë pa'nin. Tiro, Siton, inapita ya'cariya paaton, a'na pëiquë ya'conconin. “Ama isëquë huë'nahuëso' a'napita

sha'huitocosohuë'," itopirinhue', a'naroáchin ya'ipi nahuinin. <sup>25-26</sup> Inaquë a'na sanapi ya'huërin. Co cotio sanapihue'. Nisha piyapi. Siropinisia parti hua'huatërin. Hua'huinso' parisitärin. Sopairi ya'coancantërin ni'ton, co inaora yonquirinso' yonquirinhue'. Quisoso huë'ninso' natantahuaton, paaparin. Paaparahuaton, Quisoso nantën pirayan isonconin.

—Hua'huahuë Siniro parisitärin. Sopairi ya'coancantaton, chiníquën aparisitarin. Inquitoco, topirahuë', itiirin.

<sup>27</sup> —Ni'quë' imoya. Hua'huaro'sa' a'cahuatëra, co cosharonën osërëtahuatë', ni'nira a'carëhuë'. Hua'huaro'sa'ton coshachin noya natëaquë huarë', itërin Quisosori.

<sup>28</sup> —Naporin mini Siniro. Napoaponahuë', hua'huaro'sa' pi'pian tëranta' atatohuachinara, ni'niraro'sarinta' capitërin ni'ton, quiyanta' catahuacoi topirahuë', itërin.

<sup>29</sup> —¡Naporinchi paya! Ma noya natëranco ni'ton, ya'huëran'pa' paantaquë'. Nani sopai hua'huan quëran pipirin, itërin.

<sup>30</sup> Sanapiso pëinënuquë canconahuaton, hua'huin noya quëhuëánin quënanconin. Nani sopai pipirin huachi.

### *Në'huëro'sa' anatantërinso'*

<sup>31</sup> Quisoso Tiro quëran pipirahuaton, Sitontaquëchin na'huërin. Ina quëran Ticaporisëquë canquirin. Inaso no'pa' Cariria sono yonsanquë ya'huërin. <sup>32</sup> Inaquë a'nara apia quëpi Quisosori anoyatacaso marë'. Noyá në'huërin. Naporahuaton, pa'pi icotë' ninin. "Iso quëmapi së'huaquë' noyachin topiraihuë'," itopi. <sup>33</sup> Napotohuachinara, apiaráchin amashamiachin quëparin. Quëparahuaton, imirin quëran icarahuëratërin. Ina quëran niipiimiratahuaton, nënërain së'huatërin. <sup>34</sup> Inápaquë në'pëtahuaton, sëtërin quëran panca nii o'huarin. Ina quëran Yosë nontahuaton: "¡Ipata!" itërin. "¡Në'huëranso' iniquiquë!" tapon napotërin.

<sup>35</sup> Naporo' në'huërinso' inquirin huachi. Nënërinta' noyatahuaton, noya nonin huachi. <sup>36</sup> Quisosori piyapi'sa' pënënin: "Ama a'napita sha'huitocosohuë'," itërin. Itopirinhue', piyapi'saso' pa'sahuatona', sha'huirapiapi. Na'con na'con pënënpirinhue', aquë aquëtë huarë' sha'huirapiapi. <sup>37</sup> "¡Ma'pitacha Quisoso nitotërin paya! Në'huëro'sa' anoyatohuachina, noya natantopi huachi. Co nonpirinahuënta', a'naroáchin anoyatërin ni'ton, noya nonsapi. ¡Ya'ipichi noya ninin paya!" topi.

## 8

### *Cosharo' ana'atantarinso'* (Mateo 15.32-39)

<sup>1</sup> Naporo' tahuëri'sa' na'a piyapi'sa' niyontoantapi. Capa coshoro' nipachina, Quisosori ca'tano'sanënpita përarin. Huë'pachinara, itërin:

<sup>2</sup> —Piyapi'sa' nosororahuë. Nani cara tahuëri natanarinaco ni'ton, co huachi manta' coshoro' ya'huëtopihue'. <sup>3</sup> A'naquën áquë quëran huë'pi ni'ton, co topinan yaa'parahuë' tanari canahuachina', itërin.

<sup>4</sup> —Capa pëiro'sa' isëquë. Notohuaro' piyapi'sa' ya'huapi. ¿Onpotahuatëcha isonapo' piyapi a'carë paya? itopi ca'tano'sanënpitari.

<sup>5</sup> Napotohuachinara, Quisosori natanin:

—¿Onpo panta' ya'huëtërinquëma'? itohuachina:

—Canchisëyachin ya'huëtërincoi, itopi.

<sup>6</sup> Ina quëran piyapi'sa' sha'huitërin no'paquë huënsëcaiso'. Nani huënsëhuachinara, pan ma'patërin. "Yosparinquën, Tata," itahuaton, pan së'panin huachi. Së'panahuaton, ca'tano'sanënpita quëtërin piyapi'sa' quëtacaiso marë'. Ya'ipi piyapi'sa' quëtëra'piapi.

<sup>7</sup> Caraíchin saminta' ya'huëtöpi. Ina marënta' "Yosparinquën Tata," itahuaton, ca'tano'sanënpita sha'huitërin piyapi'sa' quëtacaiso'. <sup>8</sup> Nani quëtöhuachinara, natëaquë huarë' coshatopi. Pë'sotopisonta' masahuatona', canchisë i'më' amëntatopi. <sup>9</sup> Catapini

huananca piyapi'sa' pochin coshatopi. Nani coshatohuachinara, piyapi'sa' nontërin pacacaiso marë'. <sup>10</sup> Nani nontohuachina, potiquë ya'conin. Ca'tano'sanënpitarë' pa'sahuatona', Tarmanota parti chinpiconpi.

*Sacai' nininso' nicacaso' nohuantopiso'*

*(Mateo 16.1-4; Lucas 12.54-56)*

<sup>11</sup> Inaquë parisioro'sa' huë'sahuatona', Quisoso nontiipi atëhuëcaiso marë'. “Yosë a'paimahuachinquën, sacai' nininso' niquë' quiyanta' nicatëinquën natëiinquën,” itopirinahuë'. <sup>12</sup> Chiniquën sëtatón, itapon:

—¿Ma'marëta' yani'nama'? “Sacai' nininso' niquë' ni'inqüën,” itopiramacohuë', co Yosë nohuantërinhuë' a'nota'huanquëmaso', itërin.

<sup>13</sup> Ina quëran potiquë ya'coantarahuaton, aquëtëran paantarin.

*Parisioro'sa' yanonpinpiso'*

*(Mateo 16.5-12)*

<sup>14</sup> Pëntonpirinahuë', ca'tano'sanënpita naniantopi cosharo' quëpacaiso'. A'naíchin pan potiquë ya'huëtopi. <sup>15</sup> Quisosoriso nipirinhuë' pënënarín:

—Ni'cona iyaro'sa'. Pan ahuëpocatërinso pochin parisioro'sa' ya'huëtopi. Irotisë imapisopitanta' ya'huëtopi. Ama iyaro'sa' ina nohuantocoso'huë', itërin.

<sup>16</sup> Natanahuatona', ca'tano'sanënpita capini ninontapi. “Capa pan. Co ya'huëtërinpoahuë'. Napoaton naponontërinpoa’,” nitopi.

<sup>17</sup> Ninontopiso' nitotaton, Quisosori itapon:

—¿Onpoatonta “capa pan,” toconama'? ¿A'chintápiranquëmahuë', co ipora huanta' yonquiyatëramahuë' ti? ¿Co natantochináchinhuë' cancantërama' nica? <sup>18</sup> Noya natanapomarahuë', ¿onpoatomata' co yonquiramahuë'? Nicapomarahuë', ¿onpoatomata co natëtëramahuë'? <sup>19</sup> I'hua chachin a'natërapóchin pan nipirinhuë', a'natërápo huananca piyapi'sa' ananitërahüë. ¿Onpo i'mëta' naporó' pë'sotopiso' amëntatërama'? itërin.

—Shonca cato' i'më', itopi.

<sup>20</sup> —Panso' canchisëíchin nipirinhuë', catapini huananca piyapi ananitahuato, ¿onpo i'mëta' pë'sotopiso'? itaantarin.

—Canchisë i'më', itopi.

<sup>21</sup> —Napoaton co pan yonquiato, pënënarinquëmaso', ¿Co nitochátëramahuë' ti? itërin Quisosori.

*Somaraya anoyatërinso'*

<sup>22</sup> Ina quëran Pitsaitaquë chinpiconpi. Inaquë somaraya nininso' Quisosoquë quëpi. “Së'huaquë' Siniro noyachin,” itopi. <sup>23</sup> Itohuachinara, maimirarahuatón, ninano aipiran quëparin. Iroiquë pashirayatërin. Nani së'huarayarahuatón:

—¿Ma'ta' iyasha quënanan? itërin.

<sup>24</sup> —Piyapi ni'pirahuë', co a'ninquëchin ni'nahuë'. Pa'sapirinahuë', nararo'sa pochin ni'nahuë', itërin.

<sup>25</sup> Naquëranchin së'huarayantahuachina, noya ni'tërin. Nani noyatërin ni'ton, ya'ipi a'ninquëchin quënanin huachi.

<sup>26</sup> —Ya'huëran'pa' iyasha no'tëëquë'. Ama ninanoquë paquësohuë', itërin Quisosori.

*Pitro natëtërinso'*

*(Mateo 16.13-20; Lucas 9.18-21)*

<sup>27</sup> Ina quëran Quisoso paantarahuaton, Sisaria Pinipi parti pa'sarin nisha nisha ninanoquë a'chinacaso marë'. Papon pochin, ca'tano'sanënpita itapon:

—Nani ma'sha nanitaparahuë' ni'to, ¿in pochinta piyapi'sa' cancantiarinaco? itërin.

<sup>28</sup> —Nisha nisha yonquirapirinëinquën. “Coansha Paotistaco' nanpiantarinso' ni'ton, naporin,” topi a'naquën. “Co inahuë'. Iniasëco' nanpiantamara,” topi a'naquëonta'. “Ninotona'pi iráca chiminpirinhuë', nanpiantarinso' nimara,” topi a'napitanta', itopi.



- <sup>29</sup>—Canpitaso nipirinhüè', ¿ma'ta' yonquirama'? itërin.  
 —Quëmaso' Cristo, Yosë chachin a'paimarinquën, itërin Pitrori.  
<sup>30</sup>—Ama ina a'napita sha'huitocosohüè', itërin Quisosori.

*Chiminacaso' ninorinso'*  
*(Mateo 16.21-28; Lucas 9.22-27)*

<sup>31</sup> Naporu quëra huarë' chiminacaso' ninoton, ca'tano'sanënpita sha'huitërin.

—Yosë quëran quëmapico niporahuë', na'con parisita'huaso' ya'huërin. Cotio ansiano'sa', corto hua'ano'sa', cotio maistro'sa', inapita co huachi nohuantarinacohüè'. Tëpararinaco. Chiminaporahuë', cara tahuëri quëran nanpiantarahüè, itërin Quisosori. <sup>32</sup> No'tëquën sha'huitochinarin. Ina natanahuaton, Pitrori amashamiachin quëparahuaton:

—¡Ama, Siniro, napoquësohüè'! itërin. <sup>33</sup> Quisososo nipirinhüè' tahuërërahuatón, ya'ipi ca'tano'sanënpita ni'sarin.

—¡Ta'tëquë' iyasha! Sopai nohuantón, napotëranco. Co Yosë pochin yonquiranhüè'. Piyapinquën ni'tón, quëmaora nohuantëransoachin yonquiran, itërin.

<sup>34</sup> Na'a piyapi'sa' ya'cariya huaniapi.

—Amashamiachin huëco' iyaro'sa', a'chinchinquëma', itohuachina, huë'pi natanacaiso marë'. Ca'tano'sanënpitanta' natanapi.

—Yaimapatamaco, canpitaora nohuantëramaso' naniantoco'. Yosë nohuantërinso'ráchin imaco huachi. Corosëquë chiníquën parisitëre'. Inapochachin canpitanta' parisitapomarahüè', imamiatoco. <sup>35</sup> Noya nanpicamasoráchin yonquihuatama', topinan quëran nanpiarama'. A'na tahuëri chiminpatama', parisitomiatarama'. Nipirinhüè', casáchin yonquihuatamaco, noya nanan a'chinamaso marë' parisitapomarahüè', co topinan quëran nanpiaramahuë'. Yosë'pa' nanpimiatarama huachi. <sup>36</sup> Ya'ipi ma'sha isoro'paquë canapiramahuë', co hua'yanëma' cha'ëpachinhüè', topinan quëran napoarama'. <sup>37</sup> ¡Onponta' pahuërëtapiramahuë', co huachi hua'yanëma' nanitarinhüè' cha'ëcaso'! <sup>38</sup> Ipora tahuëri'sa' ya'huëpisopita co noyahuë' nipi. Nitëhuananpitopisopita pochin cancantopi. Tapayatomaco a'pohuatamaco, a'na tahuëri carimanta' tapayatënuëma', a'poaranquëma'. Nanamëhuë a'pohuatama', carimanta' o'mantahuato, a'poaranquëma'. Yosë quëran quëmapico ni'to, a'na tahuëri o'mantararahüè. Tatahuë pochin huënaratahuato, noya anquëniro'sapitaro'co o'mantararahüè, itërin.

## 9

<sup>1</sup> Ina quëran itaantarin:

—Tëhuëenchachin iyaro'sa' Yosë isoro'pa' hua'anëntapon. Chiníquën nanantaton hua'anëntapon, ni'sarama'. A'naquëma' co'huara chimiyantërasënuëmahüè', ni'sarama', itërin.

*Quisoso nisha pochin ya'norinso'*  
*(Mateo 17.1-13; Lucas 9.28-36)*

<sup>2</sup> Saota tahuëri quëran Quisoso motopiquë pa'nin. Pitro, Santiaco, Coansha, inapitaráchin quëparin. Inapita nicasoi', nisha pochin ya'norin. <sup>3</sup> A'morinso' huënaráchin huënaráchin ninin. Co inso tëranta' nanitërinhuë' pë'sainaton, ina pochin huiríchin aco-caso'. Huirí huiríchin inaso'. <sup>4</sup> A'nanaya Iniasë, Moisésë, inapita quënanpi. Iráca ayapirinhüè', Yosë nohuantón ya'noantapi. Quisosorë' ninontapi. <sup>5-6</sup> Ina ni'sahuatona', Pitro, Santiaco, Coansha, cara chachin pa'yanpi. Na'con pa'yanaton, Pitrori itapon:

—¡Ma noyacha Maistro isëquë huë'nëhua paya! Cara imënamëa'huaya nii, topirahuë', a'nara' quëma marë', a'nanta' Moisésë marë', a'nanta' Iniasë marë', itërin. Napoaponahuë', co yonquiatonhuë' naporin.

<sup>7</sup> Naporro' chitorori imotërin. Chitoro' huáncana quëran Yosëri sha'huitërinso' natanpi. "Isoso' ca hui'nahuë, na'con nosororahuëso'. Ina natanco'," itërin. <sup>8</sup> Napotaso chachin ca'tano'sanënpitari ni'sapirinahuë', co a'napitaso' quënanpihuë'. Quisosoráchin quënanpi.

<sup>9</sup> Motopi quëran nohuaramapona pochin, Quisosori itërin: "Achin ni'namaso' ama insonta' sha'huitocosohuë'. Yosë quëran quëmapico ni'to, a'na tahuëri nanopiantarahuë'. Naporro huarë' a'napita sha'huitoco'," itërin. <sup>10</sup> Napoaton co insonta' sha'huitopihuë'. Inahua capini ninontapi. "¿Onporahuatonta' nanopiantaponso'?" nitopi. <sup>11</sup> Achin Iniasë quënanpi ni'ton, inanta' yonquiapi.

—Pi'pian Siniro yanatanainquën. Cotio maistro'sa' Yosë quiricanën a'chinpachinara, napopi: "Co'huara Cristo o'mayatërasohuë', Iniasë'ton huëantarin," topi. ¿Onpoatonta' napopi? itopi.

<sup>12-13</sup> —No'tëquën napopi. "Yosë nanamën ayonquiantacaso marë' huëantapon," tënin pënëntona'pi. Naporinso chachin. Nani mini huëantapirinhuë', co nohuitopihuë'. Co yanatanatonahuë', inahua yonquinëna quëran no'huipi. Yosë quiricanënuë naporinso chachin nitopi. Canta' Yosë quëran quëmapico niporahuë', inapochachin no'huiarinaco. Aparisitarinaco. Yosë quiricanënuë iráca ninorin ni'ton, parisita'huaso' ya'huërin, itërin Quisosori.

*Hua'huasha hua'yantërinso'*  
(Mateo 17.14-21; Lucas 9.37-43)

<sup>14</sup> Ina quëran motopi quëran nohuaramarahuatona', a'napita ca'tano'sanënpita quënanquimantapi. Cotio maistro'sarë' chiníquën ninontapi. Na'a piyapi'sa' yamorapi ni'quimapi. <sup>15</sup> Quisoso quënanahuatona' ya'ipiya quëran ta'arë'nachin nacapi. Pa'yatatona: "Thuata Maistro," itoonpi.

<sup>16</sup> Ina quëran Quisosori natanin:

—¿Ma'ta' ninontapiramahuë'? itërin. <sup>17</sup> A'na quëmapiri itapon:

—Hui'nahuë Maistro quënanahuë, anoyatoco topirahuë'. Sopairi ya'coancantërin ni'ton, co huachi nanitërinhuë' nonacaso'. <sup>18</sup> Insëquësona sopairi mapachina, no'paquë nitë'yatahuaton, sa'po sa'po niconin. Ninaquërarahuaton, pacororárin. Ca'tano'sanënpita natanpirahuë' inquitacaiso marë', co nanitopihuë', itërin.

<sup>19</sup> —¿Ma'huantacha ninama paya! Canpitaso' co Yosë natëramahuë'. Co natan-tochináchinhuë' cancantërama'. Nani hua'qui' a'chintopiranquëmahuë', ¿onporo huarëta' yanatëramaco? Hua'huasha quëshico, itërin Quisosori.

<sup>20</sup> Napohuachina, quëshipi. Quisoso quënanahuaton, sopai no'huitaton, hua'huasha ahua'yantërin. No'paquë atatahuaton, asocoro asocorotarin. Sa'po sa'po niconin.

<sup>21</sup> —¿Onporo quëran huarëta' hui'nán naporin? itërin.

—Hua'huatapon quëra huarë' naporin. <sup>22</sup> Na'aro' pënquë sopairi të'yatërin. I'quënta' të'yaitërin tëpacaso marë'. Nosorocoi, Siniro. Nanitohuatan, anoyatëquë', itërin.

<sup>23</sup> —"Nanitohuatan," ¿itëranco ti? Yosë natëhuatëra, ya'ipiya nanitaparë', itërin Quisosori.

<sup>24</sup> —Tëhuënhachin Siniro natëpiranquënhuë'. ¿Catahuaco noya noya natëinquën! itaantarin pa'pini.

<sup>25</sup> Na'a piyapi'sa' niyontonquirapi ni'sahuaton, a'naroáchin sopai itapon:

—Quëmaso' sopainquën. Piyapi ya'coancantohuatana, anë'huëran. Napoaton carinquën napotaranquën. Iso hua'huasha quëran pipirahuaton, ama huachi onporonta' ya'coancantantaquësuhuë', itërin.

<sup>26</sup> Napotohuachina, Sopai chiníquën "yai" tahuaton, hua'huasha ahua'yantaantarin. Inapotahuaton, chimipi pochin patërin. Napoaton: "Nani chiminin," topirinahuë',

<sup>27</sup> Quisosori maimirarahuatón, opatohuachina, huanirin huachi.

<sup>28</sup> Ina quëran Quisososo' ca'tano'sanënpitarëachin pëiquë ya'conconpi.

—¿Onpoatonta' Maistro quiyariso' co nanitëraihuë' inquita'huaiso'? itopi.

<sup>29</sup> —Isanpi sopaiso', sacai' inquitacaso'. Chiníquën Yosë nontaquë huarë', inquitërë', itërin Quisosori.

*Chiminacaso' ninoantarinsó'*  
(Mateo 17.22-23; Lucas 9.43-45)

<sup>30</sup> Ina quëran paantarahuatona', Cariria parti pa'sapi. “Ama huë'nahuëso' piyapi'sa sha'huitocosohuë',” ténin Quisoso. <sup>31</sup> Ina quëran ca'tano'sanënpita a'chintaton, napotërin: —Yosë quëran quëmapico nipirahuë', piyapi'sa' masarinaco. Sha'huirapihuachinco, masarinaco. Mapachinaco, tëpararinaco. Chiminaporahuë', cara tahuëri quëran nantantarahuë', itërin. <sup>32</sup> Natanaponaraihuë', co natëtacaiso' nanitopihuë'. “¿Onpoatonta' ina pochin nontërinpoa'?” topi yonquinëna quëran. Naporahuaton të'huatatona', co nohuantopihuë' natanacaiso'.

*Chini chiníquën nanantërinso'*  
(Mateo 18.1-5; Lucas 9.46-48)

<sup>33</sup> Ina quëran Capinaomoquë canconpi. Pëiquë ya'conpachinara, ca'tano'sanënpita itapon:

—¿Ma'ta' iraquë huëcapoma pochin ninontëriarama'? itohuachina, <sup>34</sup> co manta' topihuë'. “¿Inquënpocha ipora chini chiníquën nanantarihua nicaya?” nitopi ni'ton, co yasha'huitopihuë'. <sup>35</sup> Napoaton inaquë huënsërahuaaton:

—Huëco' iyaro'sa' shonca catonquëma chachin natanquico pënëinquëma'. Inquëmasona' chini chiníquën nanantamaso' nohuantohuatama', topinan piyapi pochin cancantatoma', ya'ipi piyapi'sa' catahuaco', itërin.

<sup>36</sup> Ina quëran hua'huasha maimirarahuaaton, huancánachin ahuanirin. Ina iporahuaton, ca'tano'sanënpita itapon:

<sup>37</sup> —Ca imaramaco ni'ton, hua'huasha tëranta' nosorohuatama', nosoroaramaco canta'. Nosorohuatamaco, co casáchin nosoroaramacohuë'. Yosënta' nosoroarama'. Inaso' isoro'paquë a'paimarinco, itërin.

*Yosëri acanarinso'*  
(Mateo 10.42; Lucas 9.49-50)

<sup>38</sup> A'na tahuëri Coanshari itapon:

—A'na quëmapi, Maistro, ni'nai. “Quisoso nanan quëtërinco,” ta'ton, sopairo'sa' a'pararin. Inaso' nipirihuë', co quiya pochin imarinquënhuë' ni'ton, co nohuantëraihuë'. “Ama inapotëquësohuë',” itërai, ténin.

<sup>39</sup> —Tananpitoco' iyaro'sa'. “Quisoso nanan quëtërinco,” ta'ton piyapi anoyatohuachina, inaso' noya. Co sha'huirapiincoso' nanitaponhuë'. <sup>40</sup> Insosona co inimitotihuachinpoahuë', catahuarinpoa'. <sup>41</sup> Caso Cristoco. Imaramacoso marë' piyapi catahuahuachinquëma', Yosë nitotërin. I'sha tëranta' o'shitohuachinëinquëma', ina marë' a'na tahuëri acanaarin. Tëhuënhachin noya i'huërëtarin, itërin Quisosori.

*Anishacancantërinso'*  
(Mateo 18.6-9; Lucas 17.1-2)

<sup>42</sup> Ina quëran itaantarin: “Hua'huasha natërinco'so' anishacancantohuatama', Yosë chiníquën ana'intarinquëma'. A'naquëonta' imasapirinacohuë', co chiníquën cancanchatërapihuë'. Inapitanta' anishacancantohuatama', Yosë ana'intarinquëma'. Co'huara inapita anishacancanchatërapomahuë', pancara'pique a'sonconotahuatënëinquëma', marëquë të'yaitërinëinquëma' naporini, noya noya niitomahuë'. Piyapi anishacancantacaso', pa'pi co noyahuë' ténahuë. <sup>43-44</sup> Ma'sona tëranta' iyaro'sa' anishacancantohuachinquëma', a'poco'. Iso pochin yonquico'. A'na imirama quëran co noyahuë' nipatama', oshahuanama'. Ninishitëimiratërama' naporini, tantoimiraya nipomarahuë', Yosë'pa' pa'itomahuë'. Cato imirarë'quëma chachin parisitopiquë pa'patamaso', pa'pi co noyahuë' nisarama'. Inaquëso' pën

co onporonta' tacopiarinhuë'. <sup>45-46</sup> Nantëma' ya'huëtërinquëma' iratacaso marë'. Nipirinhüë', ma'sona marë tëranta' co noyahuë' yonquiatoma', iratohuatama', na'con oshahuanama'. Ninishitërantëtërama' naporini, noya noya niitonhuë'. Tantorantë' nipomarahüë', Yosë'pa' pa'itomahuë'. Catorantë'quëma chachin parisitopiquë pa'patamaso', pa'pi co noyahuë' niitonhuë'. <sup>47</sup> Ya'piramanta' ya'huëtërinquëma' noya ni'tacaso marë'. Nipirinhüë', ya'pirama quëran quënanatoma' co noyahuë' yonquihuatama', oshahuanarama'. Ya'pirama' ocoirama' naporini, a'na quëran somaraya nipomarahüë', Yosë hua'anëntërinquë pa'itomahuë'. Cato quëran chachin ni'tapomarahüë', parisitopiquë të'yatohuachinquëma', pa'pi co noyahuë' nisarama'. Ma'sona tëranta' anishacancantohuachinquëma', a'naroáchin naniantoco' ama parisitopiquë paacamaso marëhuë'. <sup>48</sup> Inaquë chiniquën parisitápoma'. Co shonaro'sa tëranta' chiminaponhuë'. Pën co onporonta' tacopirarinhuë'.

<sup>49</sup> Pënuquë ahuiquitëreso pochin Yosëri ya'ipi piyapi'sa' tënarin noya noya cancantacaiso marë'. <sup>50</sup> Yamora noya acashicaso' niponahuë', chiminpachina co huachi noyatërinhuë'. Canpitaso nipirinhüë', yamora cosharo' noya acashirinso pochin nico'. Noya nini'toma', ya'huëco', itërin.

## 10

### *Sa'ahuano'sa' pënëninso'*

*(Mateo 19.1-12; Lucas 16.18)*

<sup>1</sup> Capinaomo quëran pipirahuaton, Cotia parti paantarin. Naporahuaton, Cortanii' aquëtëran pa'nin. Inaquë naquëranchin na'a piyapi'sari huëcapapi. Quisosori a'chintantarin. Nani tahuëri huë'pachinara, noya a'chintarin. <sup>2</sup> Parisioro'santa' Quisoso ya'carirahuatona', atëhuëcaiso marë' natanquipi:

—¿Noya ipora sa'anpo' të'yatacaso' ti? itiipi.

<sup>3</sup> —¿Ma'ta' iráca Moisésë pënëntërin? itërin Quisosori.

<sup>4</sup> —“Sa'anpo' yatë'yatohuatëra, coisëquë aninshitëre': 'Nani sa'ahuë të'yatarahuë', ta'caso' aninshitëre'. Ina quëran noya të'yatacaso huachi,” tënin Moisésë, itopi.

<sup>5</sup> —Co të'yatacaso' pënëninquëmahuë'. Canpitaso' co natantochináchinhuë' cancantërama' ni'ton, Moisésë napopënëninquëma'. <sup>6</sup> Napoaponahuë' ya'nan piyapi nicapon, cato' piyapiíchin Yosëri ninin. A'na quëmapi, a'na sanapi, inaíchin ninin. <sup>7</sup> Napoaton quëmapi sa'apachin, pa'pin, a'shin, inapita patahuaton, sa'inë' nichinpitacaso' ya'huërin. <sup>8</sup> Cato' piyapi nipirinhüë', a'naíchin pochin nipi. Catoya'pi nipirinhüë', a'naíchin pochin Yosëri ni'nin. <sup>9</sup> Nani Yosëri asë'quërin ni'quëhuarë', co onporonta' sa'ama' të'yatamaso' ya'huërinhuë', itërin Quisosori.

<sup>10</sup> Nani pëiquë ya'conpachina, naquëranchin ca'tano'sanënpitari itapona':

—Achin naporanso' a'chintantacoí nitochii, itopi.

<sup>11</sup> —Sa'ama' të'yatatoma', a'na sanapi mapatama', inaso' co sa'ama chachinhuë' ni'ton, monshitëramaso pochin Yosëri ni'nin. Ina marë' oshahuanarama'. <sup>12</sup> Inapochachin sanapi'santa', so'in ta'ananpirahuaton, a'na quëmapi so'yatohuachin, inaso' co so'inhuë'. Monshin pochin Yosëri ni'sarin. Ina marë' oshahuanarin, itërin.

### *Hua'huaro'sa marë' Yosë nontërinso'*

*(Mateo 19.13-15; Lucas 18.15-17)*

<sup>13</sup> Ina quëran hua'huaro'sa' quëpi Quisosori së'huamotocaso marë'. Inapotahuaton, inapita marë' Yosë nontërin. Hua'huaro'sa' quëpisopita ca'tano'sanënpitari yaa'papurinahuë'. <sup>14</sup> Ina ni'sahuaton, Quisosori co noyahuë' ni'nin.

—Tananpitoco' iyaro'sa' hua'huaro'santa' huë'ina'. Ama a'pacosohuë'. Hua'huaro'sa pochin cancantopisopita Yosë hua'anëntërinquë ya'conapi. <sup>15</sup> Tëhuëchachin carinquëma' itaranquëma', hua'huaro'sa' a'naroáchin yaimarinaco. Co'so' inapita pochin cancantohuatamahuë', co onporonta' Yosë hua'anëntërinquë ya'conaramahuë', itërin.

<sup>16</sup> Ina quëran hua'huaro'sa' iporin. Së'huamotorahuaton, inapita marë' Yosë nontërin noya ya'huëcaiso marë'.

*Ma'huan yaimarinso'*

*(Mateo 19.16-30; Lucas 18.18-30)*

<sup>17</sup> Ina quëran Quisoso yapaantarapirihuë'. A'nara quëmapi ta'aquirahuaton, isonquirin.

—Quëmaso' Maistro noyanquën. ¿Ma'ta' caso' onpo'i nanpimiata'huaso marë'? Sha'huitoco canta' noya nii, itiirin. <sup>18</sup> —¿Ma'marëta' “Quëmaso' noyanquën” itëranco? Yosëichin noyaso'. <sup>19</sup> Iráca pënëntërinso' nani nitotëran. “Ama piyapi tēpacosohuë'. Ama nitēhuananpitocosohuë'. Ama ihuatocosohuë'. Ama ninonpinapicosohuë'. Ama nonpincosohuë'. Tatama' natëco'. Mamamanta' natëco',” tēnin Yosë pënëntaton, itërin Quisosori.

<sup>20</sup> —Co manta' Maistro onporahuë'. Hua'huatapo quëran huarë' ya'ipi inapita natërahuë, itërin.

<sup>21</sup> Ina natanahuaton, nirayarin. “Tēhuēnchachin noya yonquirin,” ta'ton nosororin.

—Isonta' iyasha Yosë nohuanterin ta'a. Paquë'. Ya'ipi ma'shanēnpita pa'anahuaton, coriqui canaranso' sa'ahuaro'sa' quëtëquë'. Ina quëran huëquë' imaco huachi. Inapohuatan, a'na tahuëri Yosë'pa' canamiataran, itërin.

<sup>22</sup> Ina natanahuaton, co huachi noyahuë' cancantërin. “Hua'huayatërahuë' ma'sha ya'huëtërinco,” ta'ton sëtërin. Sëtatón, pa'nin huachi.

<sup>23</sup> Ina quëran Quisosori ca'tano'sanēnpita ni'sahuaton, itapon:

—Pa'pi sacai ma'huano'sa' Yosë hua'anëntërinquë ya'conacaiso', itërin.

<sup>24</sup> Ina natanahuatona': “¡Ma'pitacha naporin paya!” nitopi ca'tano'sanēnpita.

—Tēhuēnchachin iyaro'sa' ma'sharáchin yonquihuatëra, sacai' Yosë hua'anëntërinquë ya'conacaso'. <sup>25</sup> Ni'co'. Nahuan huëratën pi'pira'huaya naninën ya'huëtërin. Camiyoso panca masho ni'ton, co pi'pisha tēranta' nanitërinhuë' inaquë ya'conacaso'. Ina quëran saca sacai' ma'huano'saso' Yosë hua'anëntërinquë ya'conacaiso', itaantarín.

<sup>26</sup> Ina natanahuatona', pa'yanpi:

—Napoahuarë', ¿incha nica cha'ërë'poya? nitopi. <sup>27</sup> Ya'ipiya notëërahuaton, Quisosori itapon:

—Co insonta' inaora nanitërinhuë' cha'ëcaso'. Yosëichin nanitërin anoyacancantín-quëmaso'. Ya'ipiya nanitaparín, itërin.

<sup>28</sup> —Ni'quë' Maistro. Quiyaso' nani ya'ipi ma'shanëhuëi huëshirahuatoi, imarainquën, itërin Pitrori.

<sup>29</sup> —Tēhuēnchachin iyaro'sa' imamacoso marë' nani ma'sha patohuatama', na'con na'con Yosë catahuarinquëma', tēnahuë. A'naquëma' mini nanamëhuë a'chinacamaso marë' co huachi ya'huëmiataramahuë'. A'naquëma' pëinëma', iyaparima', oshiparima', tatama', mamama', hui'nama', no'panëma', inapita patërama'. <sup>30</sup> Ca imamacoso marë' napohuatama', Yosë na'con na'con quëtantarinquëma'. Isoro'paquë chachin pasaro' aquëtë pochín pëiro'sa', iyaro'sa', oshiro'sa', mamaro'sa', hua'huaro'sa', no'paro'sa' inapita quëtarinquëma'. Noya cancantarama'. Napoaponahuë', aparisitarinēnquëma anta'. A'na tahuëriso huachi Yosë'pa' nanpimiatarama'. <sup>31</sup> A'naquën ipora chiníquën nanantopirínahuë', a'na tahuëri topinan piyapi pochín nisapi. A'naquënso nipirínahuë', ipora topinan piyapi pochín nicaponahuë', a'na tahuëri chiníquën nanantapi, itërin Quisosori.

*Chiminacaso' sha'huiantarinso'*

*(Mateo 20.17-19; Lucas 18.31-34)*

<sup>32</sup> Ina quëran ira pa'tahuatona', Quirosarin'pa' paantarapi ni'ton, ca'tano'sanēnpita pa'yanpi. Imapisopitanta' tē'huatopi. Quisososo nipirínahuë', quëchitërarín. Naquëranchin ca'tano'sanēnpita amashamiachin quëparahuaton, ma'sona onpocaso' sha'huitaantarín.



<sup>33</sup> “Noya iyaro'sa' natanco'. Iporaso' Quirosarin'pa' pa'sarëhua'. Inatohua' nani ma'sha onpotarinaco. Yosë quëran quëmapico nipirahuë', inaquë sha'huirapiarinaco. Corto hua'ano'sa', cotio maistro'sa', inapita masahuatonaco, “Tëpacaso' ya'huërin,' tosapi. Ina tosahuatona', nisha piyapi'saquë yo'coaninaco tēpainacoso marë'. <sup>34</sup> Inapita tēhuarahuatonaco, ipitarinaco. Chiníquën huihuiarinaco, pē'shararinaco. Ina quëran tēpararinaco. Chiminaporahuë', cara tahuëri quëran nanpian tarahuë,” itantarin.

*Santiago, Coansha, inapita nohuantopiso'*  
(Mateo 20.20-28)

<sup>35</sup> Ina quëran Santiago, Coansha, inapita Quisoso huëcapaipi. Sipitio hui'ninpita inahuaso'.

—Pi'pian Maistro natainquën, topiraihuë', itopi.

<sup>36</sup> —¿Ma'ta' iyaro'sa' nohuantërama'? itërin.

<sup>37</sup> —A'na tahuëri noya noya hua'anëntaran. Hua'an ya'conpatan, chiníquën nanan quëtocoi. A'naso' quëma inchinan quëran ahuënsëquë', a'nanta' ahuënan quëran ahuënsëquë', topiraihuë', itopi.

<sup>38</sup> —Canpitaso' co no'tëquën yonquiátëramahuë'. Co ya'ipi nitochátëramahuë'. Chiníquën iyaro'sa' parisitarahuë. Main o'orëso pochin pa'pi parisitarahuë. I'quë ya'coitëreso pochin aparisitarinaco. Canpitanta' aparisitohuachinënquëma', ¿ahuantapoma' ti? itërin.

<sup>39</sup> —Ahuantarai, itopi cato chachin.

—¡Naporinchi paya! Ca pochin mini canpitanta' main o'orëso pochin parisitarama'. I'quë ya'coitëreso pochin parisitarama'. <sup>40</sup> Napoaponahuë', co caso' nanitërahuë' chiníquën nanan quëta'huanquëmaso'. Tata Yosëichin nanitërinso'. Inari nohuantërinso' aparisitopita inchinanëhuë quëran ahuënsëarin. Nani inapita marë' taparin huachi, itërin.

<sup>41</sup> Chiníquën nanan nohuantopiso' natanahuatona', a'napitariso' no'huipi. <sup>42</sup> Quisososo nipirihuë', ya'ipi ca'tano'sanënpita përasahuaton, pënënin.

—Co Yosë imapisopitahuë' chiníquën nanantacaiso' pa'yatopi. Hua'an ya'conpachinara, chiníquën nanantatona', yacamaitopi. Piyapinënpitanta' aparisitopi.

<sup>43</sup> Canpitaso nipirihuë', ama inapita pochin cancantocosohuë'. Yosë hua'anëntërinquë ya'conpatëra, co chiníquën nanantacaso' nohuantërehuë'. Noya noya yanipatama', ya'ipi piyapi'sa' catahuaco'. <sup>44</sup> Topinan piyapi pochin cancantoco'. Catahuacasoáchin yonquihuatama', Yosë noya nicatënquëma', chiníquën nanan quëtarinquëma'. <sup>45</sup> Canta' Yosë quëran quëmapico niporahuë', co a'napita camaica'huaso marë' o'marahuë'. Piyapi'sa' catahuaca'huaso marë' o'marahuë. Chiminarahuë na'a piyapi'sa' nicha'ëca'huaso marë', itërin Quisosori.

*Somaraya anoyatërinso'*  
(Mateo 20.29-34; Lucas 18.35-43)

<sup>46</sup> Ina quëran paantarahuatona', Quiricoquë canconpi. Ca'tano'sanënpitarë chachin pipihuachinara, na'a piyapi'sarinta' imasapi. Naporo' a'na somaraya ira yonsanquë huënsëarin quënanconpi. Timio hui'nin ni'ton, Partimio itopi. Somaraya ni'ton, nani tahuëri coriqui topinan ma'patárin. <sup>47</sup> “Quisoso Nasaritoquë ya'huërinso' huë'sarin,” topi, natantërin. Ina natantaton:

—¡Nosoroco Siniro! Quëmaso' Tapico' shinquën ni'ton, nosoroco canta', itërin chiníquën nontaton.

<sup>48</sup> A'napitari natanahuatona', no'huipi.

—Ta'tëquë', itopirihuë', aquë aquëtë chachin chiníquën nontantarin.

—¡Nosoroco canta'! Quëmaso' Tapico' shinquën ni'ton, onpopionta' nosoroco, itantarin.

<sup>49</sup> Quisososo' natanahuaton, chiniconin:

—Sha'huitoco' huë'in, itërin. Napotihuachina, sha'huitopi.

—Noya cancantëquë' iyasha. Nani përarinquën ni'ton, Quisoso nonttiquë', itopi.  
<sup>50</sup> A'morinso' të'yatahuaton, a'naroáchin Quisosoquë pa'nin.  
<sup>51</sup> —¿Ma'ta' iyasha, onpochinquën? itërin Quisosori.  
 —Anoyarayatoco Maistro canta' noya ni'tanta'i, itërin.  
<sup>52</sup> —Inta nipachin, noya paquë'. Natëranco ni'ton, carinquën anoyataranquën, itërin.  
 Napotohuachina, noya ni'tërin. Noyatahuaton, Quisoso imarin.

## 11

### *Quirosarinquë canconinso'*

(Mateo 21.1-11; Lucas 19.28-40; Juan 12.12-19)

<sup>1</sup> Quirosarinquë ya'caritohuachinara, Pitipaqui'pa' canconpi. Ina ya'cariya Pitania ya'huërin anta'. Oriposë panënuquë canconahuaton, cato' ca'tano'sanën sha'huitahuaton, a'parin.

<sup>2</sup> —Paso' ninanoquë paco'. Canconpatama', a'nara' mora hui'napishin a'sonpinnan quënanconarama'. Co incari tëranta' huënsëchätërarinhuë'. I'quiritahuatoma', quëshico.

<sup>3</sup> “¿Onpotaomata' i'quiritarama'?” itohuachinënuquëma': “Siniorori nohuantërin. Apira isëquë acoquiantarai,” itoco', itërin Quisosori.

<sup>4</sup> Pa'sahuatona', mora a'sonpinnan ya'coanaquë quënanconpi. Cachi yonsanquë huani-rarin. Quënanahuatona', i'quiritonpi.

<sup>5</sup> —¿Onpotaomata' moraso' i'quiritarama'? itopi inaquë ni'sapisopitari.

<sup>6</sup> “Siniorori nohuantërin,” itohuachina: “Inta nipachin, quëpaquë’,” itopi.

<sup>7</sup> Napotohuachinara, Quisosoquë quëpi. A'mopiso' masahuatona', mora aipi huëtopi. Nani huëtohuachinara, ina aipi Quisoso huënsërahuaton, pa'sarin. <sup>8</sup> Na'a piyapi'sa' quëchitahuatona', cachiquë a'mopiso' huëtopi. A'napitanta', panpë mono pochin nininsopita nishitëtahuatona', no'paquë huëtërantapi. Inataquëchin Quisoso pa'sarin huachi.

<sup>9-10</sup> Piyapi'sa' quëchitërapipi. A'naquëonta' Quisoso imasapi. Ya'ipi piyapiri pa'yatatona', chiniquënon sapi.

—¡Nicha'ëcoi Tata Yosë! ¡Ma noyacha Quisososo paya! Tapico' shiin inaso'. ¡Quëmari chachin chiniquënon nanan quëtëran! ¡Quëma nohuanton, israiro'sacoi hua'anëntarincoi! tosapi.

<sup>11</sup> Quirosarinquë canconahuaton, Yosë chinotopiso pëiquë no'tëërin. Ya'ipi ma'sha inaquë ni'sárin. Nani i'huarin ni'ton, pipiantarin. Shonca cato' ca'tano'sanënpitarë chachin Pitania'pa' pa'pi.

### *Iqira nara yanicaso marë' sha'huitërinso'*

(Mateo 21.18-19)

<sup>12</sup> Tahuëririnquë Pitania quëran huënantarahuaton, Quisoso tanarin. <sup>13</sup> Aquëran iqira nara quënanin. Na'a monohuanin ni'ton: “Inaya tëranta' nitërinso' ca'i,” ta'ton, paahuapirinhuë', co manta' nitërinhuë'. Monoquënachin quënanconin. Co tahuërinën naniyatërarinhuë' ni'ton, co nitërinhuë'.

<sup>14</sup> —Ama huachi iso nara nichinsohuë'. Co huachi insoari tëranta' nitërinso' caponhuë', tënin Quisoso. Ca'tano'sanënpitarinta' natanapi.

### *Nipa'antopisopita Yosë chinotopiso pëi quëran a'parinso'*

(Mateo 21.12-17; Lucas 19.45-48; Juan 2.13-22)

<sup>15</sup> Ina quëran Quirosarinquë canconpi. Yosë chinotopiso pëiquë ya'conahuatona', na'a nipa'antopisopita quënanconpi. Quisosori quënanconahuaton, co noyahuë' ni'nin. Napoaton a'parin. A'naquë inaquë coriqui nicanpiarapirinahuë', misanënpita pita-ton, ohuëretëra'piarin. Nëpë' pa'anpisopitanta' a'parahuaton, huënsëpiquë të'yatërin.

Ina quëran ya'ipi piyapi'sa' pënënin. <sup>16</sup> “Ama nisha nisha ma'sha Yosë pëinëncuë quëntacosohuë',” tënin. Ina quëran a'chintaton, itapon:

<sup>17</sup> —Yosë quiricanëncuë ninshitërinpoa'. “Ca nohuanto, pëinëhuë ya'huë'in nontiinacoso marë'. Ya'ipi piyapi'sa' nisha nisha nanancuë nonpisopita nontiinacoso marëáchin acotëranquëma',” tënin Yosë. Canpitaso nipirinhüë', ihuatëro'sa' ya'huëpique pochin atarantërama', itërin Quisosori.

<sup>18</sup> “¡Ma'pitacha nitotërin paya!” topi ya'ipi piyapi'sa'. Napoaton corto hua'ano'sa', cotio maistro'sa', inapitanta natanahuatona', t'ë'huatopi. “Ya'ipi piyapi'sari yaimapi,” ta'tona', Quisoso t'ëpacaiso' chinotopi. <sup>19</sup> Yatashirahuaso', Quisososo' ca'tano'sanënpitarë chachin ninano quëran pipiantapi.

*Iqira nara ahuirinso'*  
(Mateo 21.20-22)

<sup>20</sup> Tahuëririnque tashiramiachin huënantarahuatona', iqira nara ni'quiantapirinahuë', nani ahuirin. Itën quëran huarë' ahuirin. <sup>21</sup> Ina ni'sahuaton, Pitro yonquirin.

—Ni'quëchi Maestro. Iqira nara i'huara sha'huitëranso' nani ahuirin huachi, itërin.

<sup>22</sup> —Ya'ipi cancanëma quëran Yosë natëco'. <sup>23</sup> Inaso', ya'ipi nanitaparin. Ina non-tohuatama', chiniquën natëco': “Co Yosë catahuarincohuë',” ama tocosohuë'. Ya'ipi cancanëma quëran ina natëhuatama', catahuarinquëma'. “Yosë nohuanton, iso motopi marëquë nichì'huincain,” tënama' naporini, ina nohuanton nichì'huincaitonhuë'. <sup>24</sup> Napoaton Yosë nontatoma' ma'sona nipatama', natëco'. “Tëhuëncachin Yosë catahuarinco,” topatama', catahuaarinquëma' tënahuë. <sup>25</sup> Noya cancantatoma', Yosë nontoco'. A'na piyapi ma'sona tëranta' onpotohuachinquëma', canpitarinta' pi'pian tëranta' no'huihuatama', ina naniantoco'. Ya'ipi cancanëma quëran huarë' nanan anoyatoco' Tata Yosë oshanëma' inquichinquëma'. [<sup>26</sup> Co nanan anoyatohuatamahuë', Tata Yosënta' co oshanëma' inquitarinquëmahuë',] itërin Quisosori.

*Chiniquën nanantërinso'*  
(Mateo 21.23-27; Lucas 20.1-8)

<sup>27</sup> Ina quëran Quirosarinque huëantapi. Yosë chinotopiso pëiquë ya'concoantahuachina, cotio ansiano'sa', corto hua'ano'sa', cotio maestro'sa' inapitari huëcapaipi.

<sup>28</sup> —¿Onporahuatonta' chiniquën nanantaton, nipa'antopisopita a'paran? ¿Inta' nanan quëtërinquën ina pochin nicacamaso'? Sha'huitocoi, itopi.

<sup>29</sup> —Inta nipachin, carinquëmanta' natinquëma'. Ina sha'huitoatuamaco, insosona nanan quëtërinco'so' sha'huitaranquëma'. <sup>30</sup> ¿Incarita' Coansha nanan quëtërin piyapi'sa' aporintacaso marë'? ¿Yosëri nanan quëtëca, piyapi'sari nica? ¿Ma'ta' tënama' canpita? Sha'huitoco carinquëmanta' nanan quëtërinco'so' sha'huichinquëma', itërin Quisosori.

<sup>31</sup> Natanahuatona', inahua capini nisha nisha ninontapi. “¿Ma'ta' itahua? ‘Yosëri nanan quëtërin,’ itohuatëhua', a'paniarinpoa'. ‘¿Onpoatomata' nipachin co ina natëramahuë?’ itarinpoa'. <sup>32</sup> Nipirinhüë', ‘Co Yosëri nanan quëtërinhuë'. Piyapiri quëtërin,’ itohuatëhua', na'a piyapi'sa' no'huiarinënpoa'. ‘Yosëri Coansha a'parin pënëntacaso', topi ya'ipi piyapi,” nitopi. <sup>33</sup> Nani ninontohuachinara, Quisoso itapona':

—Ahuën. Co quiyaso' nitotëraihuë'. ¿Incariso' Coansha nanan quëtomara? Co nitotëraihuë' ta'a, toconpi.

—Noyapa'. Napoahuarë', co carinquëmanta' insosona nanan quëtërinco'so' sha'huitaranquëmahuë', itërin Quisosori.

## 12

*Inpriatoro'sa' co noyahuë' yonquipiso'*  
(Mateo 21.33-46; Lucas 20.9-19)

<sup>1</sup> Ina quëran Quisosori pënënto nanan sha'huitaantaran:

“A'na quëmapi pancana iminaton, oparotërin. Nani pairapirahuaton, na'pi quëran nanpi ninin opa to'poitona', huino nicacaiso marë'. Naporahuaton, na'pi quëran chachin tori ninin. Inaquë piyapinën ya'huaton, nocorarin ama ihuacaiso marëhuë'. Nani tiquihuachina, inpriatoro'sa' acorin a'paicaiso marë'. ‘Sacatëramaso marë' nitërinso' patomachin canpitaora marë' maco'. Patomachin canta' acotoco,' itërin. Itahuaton, a'na parti pa'nin. <sup>2</sup> Nitërinso' nani cayahuachina, piyapinën a'parin patoma nitërinso' ma'pacaiso marë'. <sup>3</sup> A'papurinhuë', inpriatonënpitari masahuatona', ahuëpi. Ahuërahuatona', topinan a'paantapi. <sup>4</sup> Naquëranchin hua'anëni a'na piyapinën a'paantapirinhuë', inanta' motën pë'shatahuatona', chiniquën no'huipi. <sup>5</sup> Ina quëran a'nanta' a'paantapirinhuë', inaso' huachi tëpapi. Ina quëran na'a a'paantapirinhuë', a'naquën ahuëpi, a'naquën tëpapi.

<sup>6</sup> Napotohuachinara, hua'anëni yonquiantarin. ‘¿Ma'cha onpochiya? Na'aya'pi a'papurahuë', co manta' quëtopyahuë'. Hui'nahuë na'con nosoropirahuë', ina huachi a'paarahuë. Ina tēhuënchinso' natēpona' nimara,' ta'ton, hui'nin chachin a'parin. <sup>7</sup> Inpriatonënpitaso nipirinhuë', hui'nin quënanahuatona' ninontopi. ‘Paso' hui'napi a'na tahuëri pa'pin chiminpachin, ya'ipi hua'anëntarin huachi. Huëco' tēpa'ahua'. Ya'ipi ma'shanënpita canpoari matahua,' nitopi. <sup>8</sup> Naporahuatona', hui'nin masahuatona', tēpapi. Aipiran tē'yatopi.

<sup>9</sup> Pa'pin natantohuachin, ¿ma'ta' onpotintapon hui'nin chachin tēpatopi ni'quëhuarë'? Chiniquën no'huiton, inpriatonënpita tēpapon. Ina quëran nasha inpriatoro'sa' acoantapon, tēnahuë.

<sup>10</sup> Iráca Yosë nohuanton, ninorin. Quiricanënuquë ninshitërinso' ¿co nontëramahuë' ti? Ninshitaton, naporin:

‘Na'pi quëran yapëihuachina, a'na na'pi ya'huëpirinhuë', sacatoro'sari co nohuantopyahuë'. “Nagoonin,” ta'tona', tē'yatopirinahuë'.

Hua'anëni maantarahuaton: Iso na'pi mini na'con na'con nohuantërahuë pëica'huaso marë', ta'ton, noya acoantarin.

<sup>11</sup> Yosë chachin naporin.

Napoaton ¡Ma noyacha inaso' ninin paya! tēnëhua', tēnin quiricanënuquë,” itërin Quisosori.

<sup>12</sup> Natanahuatona', cotio hua'ano'sari chiniquën no'huipi. “Chinotatonpoa' pënënarinpoa',” ta'tona' Quisoso yamapirinahuë' tashinan pëiquë po'mocaiso marë'. Piyapi'sa' niyontonpisopita tē'huatatona', co mapihuë'. Patopi huachi.

*Copirno marë' coriqui ma'patërinso'*

*(Mateo 22.15-22; Lucas 20.20-26)*

<sup>13</sup> Ina quëran hua'ano'sari yonquipi Quisoso nonpintacaiso marë'. Napoaton a'naquën parisioro'sa' a'papi. Caraíchin Irotisë imarinsopitanta' a'papi. Yapa'pachinara, itapona': “Paatoma', nisha nisha natanco'. Co no'tëquën a'panihuachinquëmahuë', sha'huirapiahua',” itatona', a'papi. <sup>14</sup> Canconahuatona', noyásha nontonpi nonpintacaiso marë'.

—No'tëquën Maistro nontërancoi. Co piyapi'sa' pa'yatiinënuquënso marë' a'chinanhuë'. Co hua'an tēranta' tē'huatëranhuë'. Yosë nohuantërinso' no'tëquën a'chintërancoi. Napoaton yanatanainquën. Noma copirno nisha piyapi niponahuë', ya'ipinpoa' hua'anëntërinpoa'. Coriqui ma'painpoaso marë' comisionën a'parin. Huë'pachin, ¿noya ipora quëtacaso' ti? ¿Ma'ta' Yosë nohuantërin nica'huaiso'? Sha'huitocoi nitochii, itopi.

<sup>15</sup> Yanonpintopiso' nitotaton, Quisosori itërin:

—¡Canpitaso' nonpintënuquëma'! ¿Ma'marëta' yaatëhuëramaco? Noma coriqui quëshico ni'i, itërin.

<sup>16</sup> Napotohuachina, quëtopyi.

—¿Inta' isoso' nonanpiso'? itohuachina, —Noma copirno, itopi.

—¿Inta' nininëonta' isëquë ninshitopi? itantarín.

—Noma copirno chachin, itantapi.

<sup>17</sup> —Copirno ma'shanën ni'quëhuarë' inachachin quëtantaco'. Naporahuaton, Yosëso nininpoa' ni'ton, hua'anëntërinpoa'. Ya'ipi cancanëma quëran ina natëcaso' ya'huërin, itërin.

Natanahuatona', pa'yanpi. “¡Ma noyacha a'panirinpoa paya!” nitopi.

### *Piyapi'sa' nanopiantarapiso'*

*(Mateo 22.23-33; Lucas 20.27-40)*

<sup>18</sup> Ina quëran a'napita cotio hua'ano'sa' ya'huërë' huë'pi, satorioso'sa' itopiso'. Inapitaso' nisha a'chinpi. “Piyapinpoo' chiminpatëhua', co onporonta' nanopiantarihuahuë'” toconpi. Inahuanta' Quisoso yanonpintatona', iráca napopiso' sha'huitiipi:

<sup>19</sup> —Iráca, Maistro, Moisësë ninshitërin pënëinpoaso marë'. “Quëmapi sa'aponahuë co hui'nin ya'huëyátërasohuë' sa'in ayananpihuachin, ina iini chachin imoroën maantacaso' ya'huërin. Hui'nahuanpachin, iinco' apoin inari ya'huërëtacaso marë'. Ina quëran mashotohuachin, ma'shanën, no'panën, inapita masarin,” tënin Moisësë. <sup>20</sup> Canchisë iyaro'sa' ya'huërin. Paninanso' sa'apirinhüë'. Co hui'nin ya'huëyátërasohuë', sa'in ayananpirin. <sup>21</sup> Ina iini chachin maantarín. Moisësë tëninso chachin manin. Inanta' co hui'nin ya'huëyátërasohuë', chimiantarin. A'na iionta' inapoantarín. <sup>22</sup> Canchisë iinpita chachin inapoantapi. Co a'naya tëranta' hui'nin ya'huëyátërasohuë', ya'ipi taquipi. Ina quëran sanapinta' chiminin. <sup>23</sup> Canchisë iinpita chachin nani mapirinhüë', nanopiantacaso tahuëri nanihuachin, ¿inquën chachincha sa'in ninë'poya? itopi.

<sup>24</sup> —¿Canpitaso' co no'tëquën yonquiramahuë'? Yosëso' chini chiniquën nanantopirinhüë', co nohuitëramahuë'. Quiricanëonta' nontapomarahüë', co cancanëma quëran natëramahuë'. Napoaton co nanitëramahuë' no'tëquën yonquicamaso'. Yosë ya'ipi nani-taparin. <sup>25</sup> Chiminpisopita nanopiantahuachina', co huachi sa'aponahuë'. Sanapi'santa' co huachi so'yaponahuë'. Anquëniro'sa pochachin nisapi huachi. <sup>26</sup> Chiminpisopita tëhuënychachin nanopiantarapi. ¿Co'na ina Moisësë ninshitërinquë nontëramahuë'? Sarsa nara'huaya orotarínso' nicaso', Yosëri nontërin. “Caso' Yosëco. Apraan chinotarínco. Isaco, Cacopo, inapitanta' chinotarínaco,” itërin Yosëri. <sup>27</sup> Nanpirëhuasopitaráchin Yosë chinotarëhua'. Napoaton Apraan, Isaco, Cacopo, inapita nani chiminpirinhüë', nanopiantarapi. Canpitaso' co no'tëquën yonquiramahuë', itërin Quisosori.

### *Yosë na'con na'con nohuantërinso'*

*(Mateo 22.34-40)*

<sup>28</sup> Satorioso'sarë' ninontaso', a'na cotio maistro huë'nin. Natanahuaton: “Ma noyacha Quisososo' nitotërin paya,” ta'ton, itapon:

—Yosë na'con pënëinpoa'. ¿Ma'ta' na'con na'con nohuantërin natëcaso'? itërin.

<sup>29</sup> —Inta nipachin iyasha a'chinchinquën. Yosë quiricanën quëran chachin sha'huitërinpoa'. “Ya'ipi israiro'sanquëma', natanco'. Yosëichin hua'anëntërinpoa'. Inasáchin natërehuaso'. <sup>30</sup> Ina na'con na'con nosorocaso' ya'huërin. Ya'ipi cancanëma quëran, ya'ipi hua'yanëma quëran, ya'ipi yonquinëma quëran, ya'ipi chinirama quëran, ya'ipi inaquëranpita nosoromiatoco'. <sup>31</sup> Isonta' Yosë nohuantërin: Quëmaora ninosororanso pochachin a'napitanta' nosoroco’,” tënin. Nosorotacaso' na'con na'con nohuantërin, itërin Quisosori.

<sup>32</sup> —Tëhuënychachin Maistro no'tëquën nonan. A'naíchin Yosë ya'huërin. Co a'na ya'huërinhuë'. <sup>33</sup> Ya'ipi cancanënpoa quëran, ya'ipi yonquinënpoa quëran, ya'ipi chinirëhua quëran, ya'ipi inaquëranpita nosoromiatacaso' ya'huërin. Naporahuaton, canpoara ninosororëso pochachin a'napitanta' nosorocaso' ya'huërin. Iráca Moisësë



pënëninpoa'. “Yosë yachinotohuatama', oshanëma marë' ma'sha tēpatoma', ahuiquitoco',” itërinpoa'. Inapopirëhuahuë', co Yosë nosorohuatëhuahuë', co piyapi'santa' nosorohuatëhuahuë', Yosëso' co onpopinchin noya ni'sarinpoahuë', itërin.

<sup>34</sup> —No'tëquën iyasha yonquiran ni'ton, pi'pian pahuantarinquën Yosë hua'anëntërinquë ya'conacaso', itërin Quisosori.

Ina quëran ya'ipi piyapi'sa' tapanatona', co huachi nohuantopihuë' nataantacaiso'.

*Yosëri a'paimarinso'*

*(Mateo 22.41-46; Lucas 20.41-44)*

<sup>35</sup> Ina quëran Yosë chinotopiso pëiquë Quisosori piyapi'sa' a'chintaantarin.

—Iráca quiricanën quëran Yosë tapon: “A'na tahuëri a'na quëmapi acoarahuë piyapi'sa' nicha'écaso marë'. Inaso' Cristo,” tënin. Cotio maistro'saso' a'chinpachinara, “Cristoso' Tapi shia'huain,” topi. ¿Onpoatonta' naporin? Ina iyaro'sa' yonquico'. <sup>36</sup> Iráca Ispirito Santo nohuanton, Tapi chachin ninshitërin. Cristo ninoton, naporin:

Yosëri Sinioronëhuë sha'huitërin.

“Inchinanëhuë quëran huënsëquë'

inimiconënpita cari minsëchinquën,” itërin Yosëri, tënin Tapi.

<sup>37</sup> Shia'huain niponahuë', Cristo yonquiaton, “Sinioronëhuë,” tënin Tapi. Piyapi chachin nipirinhue', Tapiri chinotërin. ¿Onpoatonta' naporin? itërin Quisosori. “Yosë hui'nin chachin ni'ton, naporin,” ta'caiso nipirinhue', co manta' topihuë'.

Notohuaro' piyapi'sa' niyontonpisopitaso nipirinhue', nóya natanpi.

*Maistro'sa' pënëninso'*

*(Mateo 23.1-36; Lucas 11.37-54; 20.45-47)*

<sup>38</sup> Ina quëran Quisosori a'chintaantarin. “Ni'cona cotio maistro'sa' nonpin-tochinënuëma'. A'naquën naporopi a'mopi piyapi'sari nohuitacaiso marë'. Ina pochin a'mosahuatona', cachiquë pa'pachinara, na'a piyapi'sari noya nontopi. ‘Huë'cama maistro,' itohuachinara, pa'yatopi. <sup>39</sup> Cotioro'sa' niyontonpiso pëiquë ya'conpachinara, hua'ano'sapitarë' yahuënsëconpi. Pita nipachinara, huancánachin yahuënsëpi. <sup>40</sup> Noya nonaponaraihuë', a'naya a'naya quëyorono'sa' nonpintatona', ma'shanënapita matopi. Ama noninacaiso marëhuë' hua'qui' Yosë nontopirinahuë', co cancanëna quëran natëpihuë'. Ina marë' aquë aquëtë' Yosëri ana'intarin,” tënin.

*Quëyoron Yosë marë' coriqui acorinso'*

*(Lucas 21.1-4)*

<sup>41</sup> Ina quëran coriqui cacon notënanquë Quisoso huënsërin. Piyapi'sa' ni'sárin. Notohuaro' piyapi'sa' huë'sahuatona', coriqui Yosë marë' inaquë po'moquirapi. Na'a ma'huano'saso' na'con coriqui po'morapirinahuë'. <sup>42</sup> Ina quëran a'nara quëyoron huë'nin, sa'ahua nininso'. Catotëra'huayaíchin coriqui po'moquirin, pi'pira'huaya pa'tërinso'. <sup>43</sup> Ca'tano'sanënpita përasahuaton, Quisosori itapon:

—No'tëquën itëranquëma'. Na'a piyapi'sa' na'con coriqui po'morapirinahuë', iso quëyoronso', na'con na'con po'moquirin, ténahuë. <sup>44</sup> Ma'huano'saso' na'a coriquihuanatona', ya'sotopiso' acopi. Iso sanapiso nipirinhue', pi'pian ya'huëcharinso tëranta'tiquirin. Co huachi ya'huëtërinhuë'. Napoaton na'con na'con Yosë quëtërin, ténahuë, itërin.

## 13

*Yosë chinotopiso pëi' ohuatapiso'*

*(Mateo 24.1-2; Lucas 21.5-6)*

<sup>1</sup> Ina quëran Yosë chinotopiso pëi quëran pipihuachinara, a'na ca'tano'sanëni itapon:

—Ni'quë' Maistro. Ma noyápiachin pëipiso'. Pancara'pi quëran nipi, itërin.

<sup>2</sup> —Iporaso' noyápiachin ni'piramahué', a'na tahuëri ya'ipi ohuatapi. Co a'na na'piya tēranta' niya'huiritarinhué', itērin.

*Ayaro' tahuëri ya'caritērinso'*

*(Mateo 24.3-28; Lucas 21.7-24; 17.22-24)*

<sup>3</sup> Ina quēran Oripasē panēnquē pa'sahuaton, inaquē huēnsēconin. Ca'tano'sanēnpitaráchin ya'huēapi. Aquē quēran Yosē chinotopiso pēi' notēerapi. Pitro, Santiago, Coansha, Antērisē, inapitari itapona': <sup>4</sup> “¿Onporota' Maistro ohuatapi? Ya'ipi yata'huantohuachina', ¿onporahuachinata' nitotapoi? Sha'huitocoi quiyanta' nitochi,” itopi.

<sup>5</sup> “Ni'cona iyaro'sa' nonpintochinēnquēma'. <sup>6</sup> A'naquēn huēcaponá', 'Caso' Cristoco. Yosē chachin a'parinco,' tēcaponá'. Nonpintē' nipirinhué', na'a piyapi'sari imapona'.

<sup>7</sup> Nisha nisha parti piyapi'sa' nino'huiapi. Niahuēatona', quira nisapi. Ina natantohuatama', ama pa'yancosohué'. Tēhuēnchachin nisha nisha parti naporapi. Napoaponahué', co isoro'pa' ta'huanchátēraponhué'. <sup>8</sup> Nisha nisha nananquē nonpisopita nino'huitona' quira nisapi. Copirnoros' capini nino'huitona', piyapinēnpita camairapi quira nicacaiso maré'. A'na parti a'na parti ocohua pa'sarin. Cosharo' pahuanpachin, tanari tiquirarin. Ni'co'. Sanapi yahuaihuachina, iquitárin, co a'naroáchin huairinhué'. Inapochachin ayaro' tahuëri ya'caritohuachina, na'con parisitapirinahué', co isoro'pa' ta'huanchátēraponhué'.

<sup>9</sup> Ni'cona canpitanta' naniantotamaco. A'na tahuëri masarinēnquēma'. Imaramacoso maré' coisēquē sha'huirapiarinēnquēma'. Cotio niyontopiso pēiro'saquē huihuiarinēnquēma'. Imaramaco ni'ton, chirinchi hua'ano'sa' ya'huērinquēnta' sha'huirapiarinēnquēma'. Ca nohuanto, inaquē quēpaarinēnquēma' nanamēhué' sha'huitacaso maré'. <sup>10</sup> Co'huara isoro'pa' ta'huanchatērasohué', noya nanan ya'ipi piyapi'sa' sha'huitacaso' ya'huērin. Nisha nisha nananquē nonpisopita nataina'. <sup>11</sup> Mapachinēnquēma', '¿Ma'cha tonopocoya?' ama tocosohué'. Coisē'pa' quēpahuachinēnquēma', naporos' Yosē catahuaarinquēma' noya nonacamaso maré'. Co canpitaora nonsaramahué'. Ispirito Santo ayonquiarinquēma' noya nonacamaso maré'. <sup>12</sup> Naporos' tahuëri'sa' nisha nisha yonquiapi. A'naquēn imasarinaco. A'naquēnso nipirinhué' co nohuantarinacohué' ni'ton, quēmopinēnpita capini nino'huiapi. A'naquēn iin chachin niponahué', sha'huirapiarin tēpacaiso maré'. A'naquēn hui'ninpita imapachinaco, pa'pini chachin sha'huirapiarin. A'naquēn a'shinhué' nipon, pa'pinhué' nipon, imapachinaco, hui'ninpitari chachin sha'huirapiapi tēpacaiso maré'. <sup>13</sup> Imaramaco ni'ton, ya'ipi piyapi'sa' no'huiarinēnquēma'. Napoaponahué', chiminaquē huaré' imamiatohuatamaco, cha'ēsarama huachi. <sup>14</sup> A'na tahuëri inimicoros' Yosē pēinēnquē ya'conahuatona', pa'pi co noyahué' nisapi ni'ton, tapiapona', co huachi inaquē Yosē chinotapihué'. (Ina quirica nontohuatama', noya yonquico'.) Ina ni'patama', naporos' ta'aco'. Cotia parti ya'huēhuatama', motopi'pa' ta'aco'. <sup>15</sup> Pēinēma' a'canamaso' aipi ya'huēhuatama', ama ma'shanēmapita quēpacaso maré' ya'concosohué'. A'naroáchin topinan paco'. <sup>16</sup> Iminēmaquē sacatasēnquēma' nipachin, ama a'moramaso tēranta' maquintacosohué'. Manóton ta'aco'. <sup>17</sup> Naporos' tahuëri'sa' cayoronos', sho'shopia'hua ya'huētopiso', inapita parisitapona'. ¡Ma'huantacha nicapona paya! <sup>18</sup> Yosē nontoco' ama o'napi tahuëri inapocamaso' ya'hué'insohué'. <sup>19</sup> Naporos' tahuëri'sa' piyapi'sa' chini chiníquēn parisitapi. Isoro'pa' ninin quēran huaré' co ina pochin parisichátērapihué'. Ina piquēraonta' co onporonta' ina pochin parisitaantarapihué'. <sup>20</sup> Yosē nohuanton, co hua'qui' aparisitapihué'. Hua'qui' aparisitapi naporini, ya'ipi piyapi'sa' taqui'itonahué'. Nipirinhué', piyapinēnpita nosoroaton, co nohuantērinhué' hua'qui' aparisitacaiso'. Huayoninsopita nicha'ēsarin huachi.

<sup>21</sup> Naporo' tahuëri'sa' nisha nisha sha'huitarinënquëma'. '¡Ni'cochi, Cristo nani huë'nin!' tosapi. A'napitanta' taponá: '¡Ni'cochi, pasëquë ya'huarin!' tosapi. Napotohuachinënquëma', ama natëcosohuë'. <sup>22</sup> Na'a nonpin nanan pënëntona'piro'sa huëcapona'. 'Caso' Cristoco,' tëcapona' a'naquën. 'Caso' ninotona'pico,' tosapi a'naquëonta'. Sacai' nininso' nisapi piyapi'sa' nonpintacaiso marë'. Ni'sahuatona': 'Ma'pitacha nitotërin paya. ¿Yosë quëran o'mamara, ti?' ta'tona', na'a piyapi'sari imasapi. Yosëri huayoninsopita quëran huarë' nonpintochinaichin nisapi. <sup>23</sup> Canpitaso nipirinhüë' ni'cona nonpintochinënquëma'. Nani sha'huitëranquëma' ama naporo' tahuëri'sa' nonpintinënquëmaso marëhuë' itërin Quisosori.

### *Quisoso o'macaso tahuëri*

(Mateo 24.29-35, 42, 44; Lucas 21.25-36)

<sup>24</sup> Ina tosahuaton taantarín: "Ina quëran iyaro'sa' nani chiníquën parisitohuachina', pi'i tashiarín. Yoquinta' co huachi a'pinarinhuë'. <sup>25</sup> Naporahuaton, na'a tayloraro'santa' anotarín. Ya'ipi inápaquë ya'huërinso'pitanta' nacon nacontapon. <sup>26</sup> Naporo' ya'ipi piyapi'sa' ni'sarinaco. Yosë quëran quëmapico ni'to, chitoro' huancana o'mantararahuë. Chiníquën nanantato, huënaráchin huënaráchin ya'noarahuë. <sup>27</sup> O'mantahuato, anquëniro'sa' a'pararahuë Yosëri huayoninsopita ya'ipi parti quëran ayontonacaiso marë'. Pa'sahuatona', nisha nisha parti quëran huarë' ayontonapi huachi.

<sup>28</sup> Iquira nara papotërin quëran, iyaro'sa', nitotoco'. Ta'amënquë monoantahuachina, 'Nani o'napi naniriarín huachi,' topi. <sup>29</sup> Inapochachin nani ma'sha onporahuachina, nitotarama'. 'O'mantacaso' tahuëri naniriarín huachi,' tosarama'. <sup>30</sup> No'tëquën sha'huitëranquëma'. Co'huara cotioro'sa' huënton ta'huanchatërasoihuë', nani ma'sha onporapi. <sup>31</sup> Isoro'pa' ta'huantarín. Pi'iro'tënta' ta'huantarín. Ca nonahuëso nipirinhüë', co onporonta' ta'huantarínhuë'. No'tëquën nonahuë ni'ton, ya'ipi sha'huitëranquëmaso chachin naniarin huachi.

<sup>32</sup> Onporosona o'mantaca'huaso' tahuëri nanihuachin, co insonta' nitotërinhuë'. Co anquëniro'sa' tëranta' nitotapihuë'. Yosë hui'ninco niporahuë', co ca tëranta' nitotërahuë'. Tata Yosëíchin nitotërinso'.

<sup>33</sup> Napoaton ama huë'ërëso pochin cancantatoma', naniantocosohuë'. Onporosona o'mantaca'huaso' tahuëri nanihuachin, co nitotaramahuë'. Yosë nontatoma', ninaco. Noya yonquiatoma', ya'huëco'. <sup>34</sup> A'na quëmapi aquë yapa'ninso pochin nisarin. Yapa'pachina, inpriatonënpita camairín. A'naya a'naya sha'huitërin ma'sona nicacaiso marë'. Ya'coana to'shitona'pinta' sha'huitaton: 'Pëi' noya ni'quë', itërin. <sup>35</sup> Onporosona pëi' hua'anën huënantacaso' co nitotopihuë'. 'Thuaraya huarë' huëcapon nimara. Yonotashi' a'na' huëcapon nimara. Atari përasahuaso', huëcapon nimara. Tashíramiachin huëcapon nimara,' topi. Inapochachin canpitanta' o'manta'huaso tahuëri co nitotatomahuë', nináco. <sup>36</sup> Ni'cona a'nanaya o'mato, huë'ësënquëma' quënanquimatënquëma'. <sup>37</sup> Nani a'chintëranquëma huachi. Ya'ipi piyapi'sa' nitochina'. 'Ama huë'ërëso pochin cancantatomarahuë', ninaco,' itarahuë ya'ipi piyapi'sa',' itërin Quisosori.

## 14

### *Quisoso macacaiso marë' chinotopiso'*

(Mateo 26.1-5; Lucas 22.1-2; Juan 11.45-53)

<sup>1</sup> Cato' tahuëri pahuanarin Pascoa nanicaso'. Naporo' Yosëri iráca nicha'ërinso' yonquiatona', coshatapi. Pan co huëpocatërinsohuë' ca'sapi. Pascoa naniriahuachina, cotio hua'ano'sa', cotio maistro'sa', inapitari chinotapi onporahuatonsona Quisoso macacaiso marë'. Nonpintatona', yatëpapi.

<sup>2</sup> —Ama niyontonpiso tahuëri'sa chachin maahuasohuë', piyapi'sa' no'huihuachinënpoa'. Quisoso pa'yatapi ni'ton, ahuearinënpoa', topi a'naquën.

*Hua'saiquë opomototërinso'*  
(Mateo 26.6-13; Juan 12.1-8)

<sup>3</sup> Quisososo' Pitaniaquë pa'nin. Simon pëinënquë coshatapatarin. Inaso' chana caniori mapirinhüë', anoyatërinso'. Misaquë coshataso', a'nara sanapi huë'nin. Potiria'huaya nishana'pi quëran nipiso' quënin. Inaquë pimo hua'sai' na'con pa'tërinso' ya'huërin. Potiria'huaya oparahuatón, Quisoso motënquë hua'sai' opomototërin. <sup>4</sup> A'naquën no'huitatona', inahua capini ninontapi.

—¿Onpoatonta' iso hua'sai' pa'ton nipirinhüë' chiniarin? <sup>5</sup> Pa'anin naporini, cara pasa tahuëri marë' pahuërëtopiso pochín coriqui canaitonhuë'. Sa'ahuarosa' quëtacaso' ya'huëchitonhuë', nitopi. Ina pochín yonquiatona', sanapi no'huipi.

<sup>6</sup> Quisosoriso nipirinhüë', itapon:

—¿Ma'marëta' iso sanapi no'huirama'? Tananpitoco'. Na'con nosoroatonco, inapotërinco. <sup>7</sup> Nani tahuëri sa'ahuarosaso' isëquë ya'huërapi. Nohuantohuatama', nosoroarama'. Napoaponahuë', caso' co hua'qui' canpitaro'co ya'huarahüë'.

<sup>8</sup> Iso sanapiso' cancanën quëran noya yonquiatón, inapotërinco. Co'huara chimiyantërasocohüë', nosoroatonco, nonëhuë hua'saiquë opotërinco pa'pitinacoso marë'. <sup>9</sup> No'tëquën itaranquëma'. Insëquësona noya nanan sha'huihuachina', iso sanapi napotërinco' sha'huirapi anta'. Co naniantapihuë', tënin.

*Cotasëri sha'huirapirinsó'*  
(Mateo 26.14-16; Lucas 22.3-6)

<sup>10</sup> Shonca catoya'piri Quisoso ca'tanpirinahüë', a'nara' corto hua'ano'saquë pa'nin sha'huirapicaso marë'. Inaso' Cotasë Iscarioti itopi. <sup>11</sup> Natanahuatona', pa'yatopi: “Ina marë' coriqui quëchinquën,” itopi. Ina quëran Cotasë yonquirarin po'oana quëran Quisoso a'nocaso marë'.

*Pascoa tahuëri coshatopiso'*  
(Mateo 26.17-29; Lucas 22.7-23; Juan 13.21-30; 1 Corintios 11.23-26)

<sup>12</sup> Pascoa nanihuachina, nisha pan ca'pi, co huëpocatërinsohuë'. Naporo' tahuëri chachin carniroa'hua iráca tēpapiso pochín tēpaantapi capatona' yonquicaiso marë'. Nani pi'ipiquë cotioro'sa' naporápi ni'ton, ca'tano'sanënpitari Quisoso itapona':

—¿Intohuata' Maistro paatoí Pascoa cosharo' nii capacaso marë'? itopi.

<sup>13</sup> Napotohuachinara, cato' ca'tano'sanënpita nontërin:

—Ninanoquë paco'. Inaquë a'na quëmapí nacapiarama'. Yonquë i'sha chi'yatarin. Ina imaco'. <sup>14</sup> Pëiquë ya'conconpachin, pëi' hua'anën natanconco'. “¿Insëquëta' patoana ya'huërin Pascoa cosharo' capa'huaiso'?” tënin Maistro, itonco'. <sup>15</sup> Napotohuatama', panca patoana inápaquë nininso' a'notarinquëma'. Inaquë misa, huënsënan, inapita ya'huërarin coshatacaso marë'. Nani taparin huachi. Inaquë cosharo' nico' canpoa' capacaso marë', itërin.

<sup>16</sup> Pa'sahuatona', ninanoquë canconpi. Quisosori sha'huitërinso chachin quënanconpi. Inaquë Pascoa cosharo' nipi capacaiso marë'.

<sup>17</sup> Nani tashiro'porapaso', Quisoso shonca cato' ca'tano'sanënpitarë chachin huë'pi.

<sup>18</sup> Misaquë coshataso', Quisosori itapon:

—No'tëquën iyaro'sa' itëranquëma'. A'naquëma' carë' coshatapomarahüë', sha'huirapiaramaco, itërin.

<sup>19</sup> Natanahuatona', sëtopi. Sëtatona', a'naya a'nayari Quisoso natanpi.

—¿Incoita' Siniro yasha'huirapirainquën? ¿Co cahuë' nimara ti? topi a'naya a'naya.

<sup>20</sup> —Shonca catonquëma' ca'tanapomarahüë', a'naquëma' yasha'huirapiramaco. Ina sënanquërächin i'shiaton carë' caponahuë', yasha'huirapirincó. <sup>21</sup> Yosë quiri-canënuquë ninorincoso chachin chiminarahüë. Yosë quëran quëmapico niporahuë',

chiminarahüë. Napoaponahuë', quëmapi yasha'huirapirincoso' ma'huantacha nicapon paya. Co nasitërinhuë' naporini, noya noya niitonhuë', itërin.

<sup>22</sup> Coshatasoi', pan masahuaton, Yosë nontërin. “Yosparinquën Tata,” itahuaton, së'panin. Ina quëran, ca'tano'sanënpita quëtëra'piarin.

—Ca'co' iyaro'sa'. Ca nonëhuë pochin iso', itërin. <sup>23</sup> Minëa'huanta' masahuaton, “Yosparinquën Tata,” itahuaton, inanta' quëtërin. Quëtohuachina, ya'ipi o'opi.

<sup>24</sup> —Ca huënainëhuë pochin iso'. Huënainëhuë pa'sarin ni'ton, nasha quëran canpitarë' Yosë anoyatërinso' sha'huichinquëma' imacamaso marë'. Chiminarahüë na'a piyapi'sa' oshanëna' inquita'huaso marë'. <sup>25</sup> No'tëquën itaranquëma'. Ipora quëran huarë' co huachi opai' o'oantarahüë'. Chiminarahüë huachi. A'na tahuëri Yosë hua'anëntërinso' nanihuachin, nasha pochin nininso' o'oantarahüë. Naporo' noya noya cancantarihua', itërin.

*Pitrori nonpinapicaso' ninorinso'*

*(Mateo 26.30-35; Lucas 22.31-34; Juan 13.36-38)*

<sup>26</sup> Nani Yosë cantanën cantarahuatona', Oripösë panënuë pa'pi. <sup>27</sup> Inaquë Quisosori itapon:

—Tëhuëenchachin ya'ipinquëma' ta'ananpiaramaco. Iráca quiricanënuë ninoton, Yosë naporin. “Ca nohuanto, pë'tahuatona'pi tëpaapi. Tëpahuachina', ohuicanënpita yanquëërapi,” tënin. Ipora tashi chachin napoarama'. <sup>28</sup> Chiminaporahuë', Yosë ananpitaantarinco. Ananpitaantahuachinco, ca'ton Cariria'pa' pa'sarahüë. Inatohua' niquënantarihua', itërin.

<sup>29</sup> —A'napita ta'ananpipirinënuëonta', co caso' ta'arahüë', itërin Pitrori.

<sup>30</sup> —No'tëquën iyasha itaranquën. Ipora tashi chachin co'huara atari catoro' përasatërasohüë', cararo' nonpinapiaranco. “Co caso' Quisoso nohuitërahuë',” toconapon, itërin Quisosori.

<sup>31</sup> —Quëma imasaranquën ni'ton, yatëpapurinacohüenta', co onporonta' nonpinapiaranquënuë', itërin Pitrori.

Inachachin topi ya'ipiya.

*Quisoso sëtaton, Yosë nontërinso'*

*(Mateo 26.36-46; Lucas 22.39-46)*

<sup>32</sup> Ina quëran nararoquë canconpi, Quisimani itopiquë.

—Isëquë iyaro'sa' huënsëtaco'. Yosë nontëri'i, itërin Quisosori.

<sup>33</sup> Pitro, Santiago, Coansha, inapitaíchin amashamiachin quëparin. Naporo' sëtaton, co napion cancantërin.

<sup>34</sup> —Pa'pi sëtërahuë. Chiminchináchin sëtërahuë. Isëquë huënsëtaco'. Ama huë'ëtomarahüë', ni'táco', itërin. <sup>35-36</sup> Amashamiachin pa'sahuaton, isonconahuaton, no'paquë huarë' monshomarin. Inaquë Yosë nontarin. “Quëma nohuantohuatan Tata, nicha'ëco ama ma'sha onpo'isohüë'. Main o'orëso pochin parisita'huaso' ya'huërin. Co parisita'huaso' nohuantaporahuë', quëma nohuantohuatan, ma'sona yaonpotohuatanconta' noya, tënahüë. No'tëquën yanatëranquën,” itërin.

<sup>37</sup> Ina quëran huënantapirinhuë', cara chachin huë'ësápi quënanquintarin.

—¿Onpoatoncha iya Simon, huë'ësan paya? ¿Co a'na ora tëranta' nanitëranhuë' ni'tamaso' ti? <sup>38</sup> Ama huë'ëtomahuë', ni'táco'. Yosë nontáco' ama sopai minsëinquëmaso marëhuë'. Cancanëma quëran Yosë yanatëpiramahuë', co canpitaora chiníquën cancantëramahuë', itërin.

<sup>39</sup> Naquëranchin paantarahuaton, Yosë nontantarin. Inachachin itantarahuaton, <sup>40</sup> huënantapirinhuë', naquëranchin huë'ëantapi quënanquinantarin. Huë'ëi' iquitatona', huë'ësápi. Tapanatona', co nanitopihuë' ma'sha ta'caiso'. <sup>41</sup> Naquëranchin paantarahuaton, Yosë nontantarin. Ina quëran huënantarahuaton, ca'tano'sanënpita itapon:



—¿Ipora huanta' huë'ësarama' ti? Nani huachi. Nani ora nanirin. Yosë quëran quëmapico nipirahuë', sha'huirapiarinco oshahuano'sa' macainacoso marë'. <sup>42</sup> Huënsëco' pa'ahua'. Ni'co'. Sha'huirapiarinco' nani canquiarin, itërin.

*Quisoso mapiso'*

*(Mateo 26.47-56; Lucas 22.47-53; Juan 18.2-11)*

<sup>43</sup> Nonaso chachin, Cotasë canquirin. Inanta' Quisoso ca'tanaponahuë', sha'huirapiarin macacaiso marë'. Notohuaro piyapi'sari imaquiapi. Corto hua'ano'sa', cotio maistro'sa', ansiano'sa', inapitari a'papisopita. Sahuëni, shonqui, inapita së'quëërahuatona', huë'sapi. <sup>44</sup> Co'huara canshátërasoihuë', Cotasëri nani sha'huitërin Quisoso nohuitacaiso marë'. “Apinorahuë quëran Quisoso nohuitatoma', maco'. Noyá tonporahuatoma' quëpaco', ta'ahuachin,” itërin. <sup>45</sup> Canquirahuaton, Quisoso ya'yoranquirin. Ina quëran:

—Tashita Maistro itahuaton, apinoirin. <sup>46</sup> Ina quëran Quisoso chiníquën masapi.

<sup>47</sup> A'naso nipirihuë' sahuëninën ocoirahuaton, corto hua'an inpriatonën ahuërin. Inapotaton, nishitëhuëratëtërin. <sup>48</sup> Quisosori piyapi'sa' itapon:

—Sahuëni, shonqui, inapita së'quëërahuatoma', huëcapairamaco. Matararo pochin cancantatomaco, ¿yamanamaco ti? <sup>49</sup> Co'tana nani tahuëriya Yosë pëinënuë ya'huëato, a'chinárahüë. Nicapomacohuë', co manamacohuë'. Napoaponahuë', Yosë quiricanën quëran ninorinacoso chachin masaramaco, itërin.

<sup>50</sup> Ina quëran ya'ipi ca'tano'sanënpitari ta'anapipi. <sup>51</sup> A'na hui'napiso' sahuanasaquëáchin niso'quëëtahuaton Quisoso imasapirihuë', mapi. Mapirinahuë', <sup>52</sup> sahuanasáchin matohuachinara, i'nanpirapi ta'arin.

*Cotio hua'ano'saquë quëpapiso'*

*(Mateo 26.57-68; Lucas 22.54-55, 63-71; Juan 18.12-14, 19-24)*

<sup>53</sup> Nani Quisoso masahuatona', corto hua'an chini chiníquën nanantërinso' ya'huërinquë quëpapi. Inaquë ya'ipi corto hua'ano'sa', ansiano'sa', cotio maistro'sa', inapita nani niyontonpi. <sup>54</sup> Pitroso nipirihuë', aquë quëran imaquiarin. Corto hua'an i'iratë' pairapirinquë huarë' imaquirin. Inaquë ya'conahuaton, ponisiaro'sapitarë' huënsëaton, napëntarin.

<sup>55</sup> Ya'ipi hua'ano'sari yatëpapi ni'ton, a'naya a'naya Quisoso nonpinapicaiso marë' yonípirinahuë', co quënanpihuë'. <sup>56</sup> Na'a nonpinapiaponaraihuë', nisha nisha nonconpi. Co inachachin nonpihuë'. <sup>57</sup> A'naquë huanirahuatona', taponá:

<sup>58</sup> —I'hua chachin Quisoso naporin, natanai. “Yosë pëinën piyapi'sari nipiso' ata'huantahuato, cara tahuëri quëran anoyatantarahuë. Co piyapi'sari nipisohuë' acoantarahuë,” toconin, itopi.

<sup>59</sup> Napoaponahuë', co inahua tëranta' inachachin nonpihuë'. Nisha nisha nonpi.

<sup>60</sup> Corto hua'an chini chiníquën nanantërinsoari huanirahuaton, Quisoso itapon:

—¿Ma'ta' ta'tona' isopita nonapirinquë? ¿Co manta' tēnanhuë' ti? itërin.

<sup>61</sup> Quisososo nipirihuë', co manta' tēninhuë'. Ta'tárin. Napohuachina, naquëranchin nataantarin:

—¿Quëmaso' Cristo, Yosë hui'ninquë chachin ti? itaantarin.

<sup>62</sup> —Ca mini inaco. A'na tahuëri ni'saramaco. Yosë quëran quëmapico ni'to, Yosë chiníquën nanantaton, inchinan quëran ahuënsëarinco. Ina quëran chitoto' huáncana o'mantarahüë niantaramaco, itërin Quisosori.

<sup>63</sup> Ina natanahuaton Corto hua'anso, chiníquën no'huitërin. A'morinso osharahuaton tapon:

—“¡Caso' Yosë hui'ninco,” toconin! Nani natanëhua'. Co huachi a'napitari sha'huirapicaiso' nohuantarihuahuë'. <sup>64</sup> Nani huachi Yosë yaya'huëretërinso' natanëhua'. ¿Ma'ta' onpotahua' Quisoso? tēnin.

—Pa'pi co noya quëmapihuë' ni'ton, tēpacaso' ya'huërin, topi ya'ipiya.

<sup>65</sup> Naporahuatona', Quisoso ipitopi. Tonporayatahuatona', chiniquën panpirayapi.

—Quëmaso' Cristonquën nipatan, ninoton no'tëquën sha'huitocoi. ¿Inta' ahuërinquën? itoonpi.

Ponisiaro'sarinta' chiniquën ahuërayapi.

### *Pitrori nonpinapirinso'*

*(Mateo 26.69-75; Lucas 22.56-62; Juan 18.15-18, 25-29)*

<sup>66</sup> Pitroso i'iratëquë ya'huëápirinhuë', a'na sanapi huë'nin. Corto hua'an cosonanën inaso'. <sup>67</sup> Pitro napëntaquëya', inari ni'nin. Noya ni'sahuaton:

—Co'ta quëmanta' Quisoso Nasaritoquë ya'huërinso' ca'tanan, itërin.

<sup>68</sup> —¿Ma quëmapita' napotëranso'? Co caso' ina quëmapi nohuitërahuë', itërin. Ina quëran pipirahuaton, paira ya'coanaquë pa'nin. Naporo' atari përarin. <sup>69</sup> Naquëranchin sanapiri quënaantarin. Quënanahuaton, huanipapisopita itapon:

—Iso quëmapi Quisoso ca'tanin anta', itërin.

<sup>70</sup> —¿Co'chi nohuitërahuë paya! itaantarin. Ina quëran a'napitarinta' itaantapona':

—Quëmanta' Cariria piyapi pochin nonan ni'quëhuarë', Quisoso ca'tanan ipora, itopi.

<sup>71</sup> —¿Co'chi nohuitërahuë paya! Yosë ni'sárinco, co cariso' nohuitërahuë'. Nonpintohu-atënuquëmaso', Yosë ana'intarinco, itërin Pitrori.

<sup>72</sup> Naporo chachin atari përaantarin. Atari natanahuaton, Quisosori napotërinso' Pitro yonquirin: “Co'huara atari catoro' përasatërasohuë', cararo' nonpinapiaranco,” itërinco, ta'ton chiniquën sëtërin. Sëtatón, na'nërin.

## 15

### *Piratoquë quëpapiso'*

*(Mateo 27.1-2, 11-14; Lucas 23.1-5; Juan 18.28-38)*

<sup>1</sup> Tahuërianpitoahuachinara, ya'ipi cotio ansiano'sa', cotio maistro'sa', corto hua'ano'sa', inapita niyontonahuatona', ninontopi. Ina quëran Quisoso tonporahuatona', Pirato ya'huërinquë quëpapi.

<sup>2</sup> —¿Quëmaso' cotioro'sa' copirnonquën ti? itërin Piratori.

—Inaco mini, tënin Quisoso.

<sup>3</sup> Ina quëran corto hua'ano'sari na'con nonpinapipirinahuë', co manta' tëninhuë'.

<sup>4</sup> —Nani ma'sha sha'huirapipirinënuquënhuë', ¿co manta' tënanhuë' ti? itaantarin Piratori.

<sup>5</sup> Quisososo nipirinhüë', co manta' tëninhuë'. Napohuachina: “Ma quëmapita' isoso' ni'ton, co manta' tëninhuë',” tënin Pirato yonquiaton.

### *Tëpacaiso marë' sha'huirinso'*

*(Mateo 27.15-31; Lucas 23.13-25; Juan 18.38-19.16)*

<sup>6</sup> Nani Pascoa tahuëri a'nara apina'pi tashinan pëi quëran ocoirin noya pipicaso marë'. Pita tahuëri ni'ton, Noma hua'an napotërin. Insosona piyapi'sari nohuantopiso' ocoirin.

<sup>7</sup> Tashinan pëiquë copirno no'huipisopita ya'huëpi. Copirno piyapinënpita tēpapi ni'ton, tashinan pëiquë po'mopi. A'nara' Parapasë itopiso'. <sup>8</sup> Piyapi'sa' huë'sahuatona', Pirato nontiipi.

—Ipora Pascoaquënta' apina'pi ocoitaantacoi, itopi.

<sup>9</sup> —¿Inta' ocoichinquëma'? Copirnonëma' ocoichinquëma' topirahuë', itërin Piratori.

<sup>10</sup> Corto hua'ano'sari apiratona', Quisoso nani mapi. Ina nitotaton, Piratori naponotërin. <sup>11</sup> Napoaponahuë', corto hua'ano'sari a'naya a'naya piyapi'sa' sha'huitëra'piapi.

—“Co Quisososo' nohuantëraihuë'. Parapasë ocoitocoi,” itoco', itëra'piapi. Napoaton:

—Parapasë ocoitocoi, tosapí.

12 —¿Ma'ta' nipachin Quisoso onpochi: “Inaso' copirnonëhuëi,” tēnamaso'? itërin Piratori. Napotohuachina:

13 —¡Corosëquë patanantëquë' chimiin! itapi chiníquën nontatona'.

14 —¿Ma'marëta' tēpa'i? ¿Ma'ta' onporinso'? itopirinhüë', aquëtë chachin chiníquën itaantapi:

—¡Corosëquë patanantëquë' chimiin! itaantapi.

15 Ina natanahuaton, ama piyapi'sari no'huicaiso marëhuë' Parapasë ocoitërin. Quisososo nimirinhüë', chiníquën ahuihuitërin. Chiníquën huihuitona', pë'sha pë'shatopi. Ina quëran sha'huitërin corosëquë patanantacaiso marë'.

16 Ina quëran sontaro'sari Pirato pëinënquë quëpapi. Pairaanaquë ichiya'conahuatona', ya'ipi sontaro'sa' amatopi. 17 Nani niyontonpachinara, quëhuanën miachin hua'an a'morinso pochin a'motopi tēhuacaiso marë'. Yancotënta' nahuan quëran nicatona', ayancotopi:

18 —¡Hua'qui tahuëri nicacon cotioro'sa' hua'anëntëquë! itoonpi.

19 Piquirananquë ahuëmotopi. Ahuërahuatona', ipitopi. Isonahuatona', nito mosharapi. 20 Inapotatona', tēhuapi. Ina quëran quëhuanën a'motopiso ocoitahuatona', inaora a'morinso chachin a'motaantapi. Inapotahuatona', corosëquë patanantacaiso marë' quëpapi.

### *Corosëquë Quisoso patanantopiso'*

*(Mateo 27.32-44; Lucas 23.26-43; Juan 19.17-27)*

21 Pa'sapirinhüë', a'na quëmapi Sirini parti hua'huatërinso' nacapipi. Iminën quëran huëntararin. Simon itopi. Inaso', cato' hui'ninpita ya'huëtërin, Aricantro, Nopo, inapita itopiso'. Simon nacapirahuatona', sontaro'sari Quisoso corosënën apitëntopi inari quëpatacaso marë'.

22 Pantarahuatona', panëa'huayaquë canconpi huachi, Corocota itopiquë. Corocotaso': “Nansë Moto',” tapon naporin. 23 Huino tanparo nimirio ayontahuatona', yao'shitopirinhüë', co o'orinhüë'. 24 Ina quëran sontaro'sari corosëquë patanantopi.

Nani patanantohuachinara, “Huëco', nicanatëhua', Quisoso a'morinso' maahua',” nitatona' ya'nipirapi. Nicanatona', a'naya a'naya mapi.

25 Yono pi'irirahuaso', corosëquë patanantapi. 26 Onporinso marësona tēparapiso' nani ninshitopi.

### ISOSO' COTIORO'SA' COPIRNO

ta'caso ninshitopi. Motën pëtëcha achinpitopi. 27 Quisoso pirayan cato' apiro'santa' patanantopi. A'nara' inchinan quëran, a'nanta' ahuënan quëran acopi. [ 28 Iráca Yosë quiricanënquë ninorin. “Apiro'sapitarë' acorapi,” tēnin. Naporinso chachin inapitarë' acopi.]

29 Piyapi'sa' na'huëpona pochin Quisoso tēcariatona', tēhuapi.

—“Yosë pëinën ata'huantohuato, cara tahuëri quëran anoyatantarahuë,” tēnan pora.

30 Inta nipachin, corosë quëran nohuararahuatona', cha'ëquë', itoonpi.

31 Inapochachin corto hua'ano'sa', cotio maestro'sa', inapitanta' Quisoso tēhuatona', itapona':

—A'napitaso' nicha'ëponahuë', inaora cha'ëcasoso' co nanitërinhuë'. 32 “Caso' Cristoco, israiro'sa' copirnococo,” toconin. Inta nipachin, corosë quëran nohuarain nicatëhua' natëahua', nitopi.

Ina pirayan patanantopisopitanta' Quisoso no'huipi.

### *Quisoso chimininso'*

*(Mateo 27.45-56; Lucas 23.44-49; Juan 19.28-30)*

<sup>33</sup> Camotëchin nisahuaso', ya'ipi parti tashirin. I'huaraya huarë' yono tashi pochin ninin. <sup>34</sup> Naporo' Quisoso chiníquën nonin. "Iroi iroi ¿nama sapacatani?" tënin. Inaora nananquë nonaton, naporin. "¿Onpoatonta' Tata patëranco?" tapon naporin.

<sup>35</sup> A'naquën huanipapisopitari natanahuatona':

—Natanco'. Iniasë përasamara, topi.

<sup>36</sup> A'na quëmapiso' manorahuaton, pi'shiro pochin nininso' maconin. Main huino asë'cotëtërin. Nara'huayaquë achinpitahuaton, inápaquë ihuëtërin o'ocaso marë'.

—Tananpitëquë'. Corosë quëran anohuaracaso marë', Iniasë huë'samara, tënin.

<sup>37</sup> Ina quëran Quisososo' chiníquën nonsahuaton, chiminin huachi. <sup>38</sup> Naporo' Yosë chinotopiso pëiquë tanontën në'mëtë' patonpiso' noshatërin. Inaora noshataton, catotë huarë' ninin. Inapa quëran no'paquë huarë' noshatomarin. <sup>39</sup> Onporahuatonsona Quisoso chimininso' capitani ni'sahuaton:

—Tëhuëenchachin iso quëmapi Yosë hui'nin, tënin.

<sup>40</sup> Sanapi'santa' aquë quëran notëërapí. A'nara' Maria Mactarina, a'naso' Saroma, a'nanta' Maria. Inaso' Cosi, Santiago, inapita a'shina'. Santiacoso' hua'hua nimirinso'.

<sup>41</sup> Quisoso Caririaquë ni'so', imatona', nocomapiso'. A'napita sanapi'santa' Quisoso notëërapí. I'huamiáchin Quisoso Quirosarinquë huë'pachina, inapitarinta' imaquipi.

### *Na'pi naninquë po'mopiso'*

*(Mateo 27.57-61; Lucas 23.50-56; Juan 19.38-42)*

<sup>42</sup> Ina tashiraya chinoto tahuëri ni'ton, cotioro'sa' tapatapi chinotacaiso marë'. <sup>43</sup> I'huararahuasos', Cosi huë'nin. Inaso' Arimatiaquë ya'huërinso'. Cotio hua'an niponahuë', noya Yosë chinotarin. "A'na tahuëri Yosë o'mararin hua'anëntiinpoaso marë'," tënin yonquiaton. Napoaton co të'huatatonhuë', Piratoquë pa'nin Quisoso nonën ma'patacaso marë'. <sup>44</sup> "Co chimiyántëramarahuë'," ta'ton, capitán amatahuaton, natantërin. "¿Nani Quisoso chiminin?" itërin. <sup>45</sup> "Nani mini chiminin," itërin capitani. Napotohuachina, Cosi itapon: "Nonën quëpaquë' nipachin," itërin. <sup>46</sup> Morin nani pa'anin ni'ton, corosë quëran nonën anohuarahuatona', quëpapi. So'pinahuatona', na'pi naninquë po'mopi. Ina quëran pancara'pi masho pi'napirahuatona', pa'copitopi. <sup>47</sup> Maria Mactarina, a'na Maria (Cosi a'shin nininso'), inapitari ni'sapi. Insëquësona Quisoso acopiso' ni'pi.

## 16

### *Quisoso nanpiantarinso'*

*(Mateo 28.1-10; Lucas 24.1-12; Juan 20.1-10)*

<sup>1</sup> Chinoto tahuëri piquëran Maria Mactarina, Saroma, a'na Maria (Santiago a'shin nininso'), inapita hua'sai' pa'anpi Quisoso nonën pashitonacaiso marë'. <sup>2</sup> Tomio tahuëri tashiramiachin pi'i nëhuëcharirahuaso', na'pi nanin'pa' pa'sapi. <sup>3</sup> Inahua capini ninontërapí.

—Pancara'piguë nanin pa'copitopi pora. ¿Incha iporaso' chi'huincatërë'ponpoya? nitopi.

<sup>4</sup> Canconahuatona', notëëpirinahuë', na'pi panca nipirinhuë', nani chi'huincapi ni'pi. <sup>5</sup> Na'pi naninquë ya'conahuatona', hui'napi pochin nininso' ni'pi. Huiríchin a'morahuaton, inchinan quëran huënsëarin. Ni'sahuatona', pa'yanpi. <sup>6</sup> Pa'yanasoí', inari itërin:

—Ama pa'yancosohuë'. Quisoso Nasaritoquë ya'huërinso' yonisapiramahuë', co huachi isëquë ya'huërinhuë'. Corosëquë chiminaponahuë', nani nanpiantarin. Huëco' po'mopiguë ni'quirico'. Capa huachi. <sup>7</sup> Napoaton paatoma', ca'tano'sanënpita sha'huitonco'. Pitronta' sha'huitonco' nitochin. "Quisoso'ton nani pa'sarin Cariria'pa'. I'hua sha'huitërinquëmaso chachin pa'sarin. Inatohua' quënancoantarama'," itonco', itërin.

<sup>8</sup> Pipirahuatona', na'pi nanin quëran ta'api. Pa'pi pa'yanahuatona', ropa ropátërapì. Co manta' topihuë'. Pa'yanatona', co piyapi'sa' sha'huitopihuë'.

*Maria Mactarina'ton ya'notërinso'*  
(Juan 20.11-18)

[<sup>9</sup> Tomio tahuëri tashiramiachin Quisoso nanpianntarin. Nanpianntarahuatón, Maria Mactarina'ton ya'notërin. Ina sanapi iráca canchisë sopairo'sari ya'coancantopirinahuë', nani Quisosori inquitërin. <sup>10</sup> Nani ni'pachina, pa'nin imapisopita sha'huitacaso marë'. Inapitaso' sëtatona', na'nëapi.

<sup>11</sup> “¡Quisoso nani nanpianntarin! Cari ni'nahuë,” itopirinhuë', co natëpihuë'.

*Catoya'pi ya'notërinso'*  
(Lucas 24.13-35)

<sup>12</sup> Ina piquëran cato' imapisopitanta' ninano quëran pipiapi. Paaquëya', Quisosori nisha pochin ya'notërin. <sup>13</sup> Nani nohuitahuatona', ca'tano'sanënpita sha'huitoantapirinahuë', co inapita tëranta' natëpihuë'.

*Ca'tano'sanënpita ya'notërinso'*  
(Mateo 28.16-20; Lucas 24.36-49; Juan 20.19-23)

<sup>14</sup> Ina quëran shonca a'nara ca'tano'sanënpita misaquë coshatasoi', Quisosori ya'notiirin. “¿Onpoatomata', iyaro'sa', co natëtëramahuë'? Co natantochináchinhuë' cantëtërama nica. ‘Quisoso nani nanpianntarin. Cari ni'nahuë', itopirinëinquëmahuë', co natëtëramahuë',” itërin. <sup>15</sup> Ina quëran itaantarin: “Ya'ipi parti, iyaro'sa', paco'. Ya'ipi piyapi'sa' noya nanan carinquëma' sha'huitëranquëmaso' sha'huitoco'. <sup>16</sup> Insosona noya nanan natëhuachina', cha'ësapi. Aporihuanahuatona', imapachinaco, cha'ësapi huachi. Co nanamëhuë natëhuachinahuë', Yosëri ana'intarin. <sup>17</sup> Natëhuatama', nani ma'sha nisarama' piyapi'sa' nitotacaiso marë'. Chiniquën nanan quëchinquëma' sopairo'sa' a'pacamaso marë'. Nisha nisha nananquë nonsarama'. <sup>18</sup> Ya'huan mapatama', co manta' onpotarinquëmahuë'. Sonimaonta' nipirinhuë' o'opatama', co chiminaramahuë'. Cania'piro'sa' topinan së'huahuatama', noyatapona',” itërin Quisosori.

*Inápaquë panantarinso'*  
(Lucas 24.50-53)

<sup>19</sup> Nani ca'tano'sanënpita nontohuachina, inápaquë Siniro Quisoso panantarin. Yosëri quëpantarahuatón, inchinanën quëran ahuënsërin. <sup>20</sup> Ina quëran ca'tano'sanënpita pa'sahuatona', Quisoso nanamën sha'huirapi. Siniorori chachin catahuarin ni'ton, ya'ipi parti sha'huirapi. Yosë nohuantón, piyapi a'naroáchin anoyatopi. Nani ma'sha nanitapapi ayonquicaiso marë'. Ina ni'sahuatona', “No'tëquën nontërinpoa',” topi ya'ipi piyapi'sa'. Nani huachi.]



## Nocasë ninshitërinpoa' Quisocriso naporinso' nitotacaso marë'

### *Ma'marësona ninshitërinso'*

<sup>1</sup> Quisocriso isoro'paquë o'maton, nóya ninin. Na'a piyapi'sari ina naporinso' nani ninshitopi. <sup>2</sup> Ca'tano'sanënpitaso' iráca quëran huarë' imatona', naporinso' ni'pi. Nani ya'ipi no'tëquën sha'huitërinacoi. <sup>3</sup> Canta' ya'ipi nanamën nitotërahuë. Hua'qui' natanato, nani noyá nitotërahuë. Napoaton, iya Tiohuero ninshichinquën, ténahuë. Quëmaso' pa'pi noya piyapinquën ni'ton, ninshitaranquën. Ya'nan nininso quëran huarë' ya'ipiya ninshitaranquën. <sup>4</sup> Na'a piyapi'sa' nani sha'huitopirinëinquënhuë', iporaso' carionta' ninshitaranquën no'tëquën nitotamaso marë'.

### *Coansha Paotista nasitacaso' ninorinso'*

<sup>5</sup> Iráca Irotisë Cotia parti hua'anëntaso', a'na corto hua'an ya'huërin, Sacariasë itopiso'. Ina huëntoa'huanënso', Apiasë huëntoa'hua, itopi. Sa'inso' Isapira itopi. Inanta' Aaron shiin, iráca corto hua'an ya'coninso'. <sup>6</sup> Cato chachin noya Yosë imapi. Ya'ipi pënëntërinso' no'tëquën natëpi. <sup>7</sup> Sa'inso nipirinhüë' co hua'huana'pihuë'. Co a'naya tëranta' hua'huin ya'huëtërinhuë'. Nani paiya. So'ionta' nani mashoya.

<sup>8</sup> A'na tahuëri Sacariasë huëntoa'huanën Yosë chinotopiso pëiquë pa'pi sirihuitacaiso marë'. Naporo' tahuëri sirihuitacaiso' ya'huërin. <sup>9</sup> Cotioro'sa' inachintopiso' imatona', Sacariasë huayonpi yonarin pochin nininso' a'pëcaso marë'. Acohuana ya'conahuaton, pimóton nininso' a'përin Yosë yonquicaiso marë'. <sup>10</sup> A'pëso', na'a piyapi'sa' aipiran huanirahuatona', Yosë nontapi. <sup>11</sup> Naporo' acohuana Sinioro anquëninëni ya'notimarin. Misa'huaya inchinan quëran huanitimarin. <sup>12</sup> Anquëni quënanahuaton, pa'yanin. Pa'pi të'huarin. <sup>13</sup> Anquënriso nipirinhüë' noya nontërin.

—Ama pa'yanquësohuë'. Quëmaso' Sacariasëinquën, nohuitëranquën. Hua'qui' hui'nahuanacaso' nohuantopiranhuë'. Ina marë' Yosë nontëranso' nataninquën. Sa'an hua'huarin. Huaihuachin, nininën cari sha'huitaranquënso' acotëquë'. Coansha itëquë'. <sup>14</sup> Nasitohuachin, noya cancantaran. Na'a piyapi'sari pa'yatapi. <sup>15</sup> Inaso' nóya quëmapi nipon. Yosëri catahuaarin ni'ton, noya noya nisarin. Naporahuaton, co pi'pian tëranta' main o'oponhuë'. Co'huara nasichátëraponhuë', Ispirito Santori ya'coancantarin. Inasáchin natëarin. <sup>16</sup> Mashotohuachin, pënëntapon. Pënëntohuachin, na'a israiro'sa' Yosë yonquiantapi. <sup>17</sup> Iráca Iniasë pënëntërinso pochin nóya pënëntarin. Ina pochin chiníquën nanantarin inanta'. Sinioro yao'mahuachin, pënëntapon. Pënëntohuachin, quëmapi'sa' hui'ninpitare' noya ninontantapona'. Iporaso' a'naquën co Yosë natëpirinahuë'. Ina natanahuatona', no'tëquën yonquiapona'. Inari a'chintohuachin, Sinioro nohuantapona huachi, itërin anquënniri.

<sup>18</sup> —Caso' mashoyaco. Sa'ahuënta' nani paiya. ¿Inaporo'pocoita'ma nica? ¿Onporahuatota' no'tëquën nitochi? ténin Sacariasë.

<sup>19</sup> —Caso' Capirico. Yosë ya'huërin quëran o'marahuë. Ina a'paimarinco nonta'huanquënso marë'. Noya nanan sha'huitopiranquënhuë'. <sup>20</sup> Co natërancohuë' ni'quëhuarë', hua'qui' co nonsaranhuë'. Hui'nan nasitaquë huarë' co nonacamaso' nanitaranhuë'. Napoaponahuë', no'tëquën nontëranquën. Hui'nahuanaran. Tahuërinën nanihuachin, sa'an huaiarin, itërin anquënniri.

<sup>21</sup> Piyapi'saso nipirinhüë' Sacariasë ninatona': “¿Onpoatonta' hua'quiarin?” topi. <sup>22</sup> Ina quëran acohuana quëran pipipirinhüë', co huachi nanitërinhuë' nonacaso'. Imirin quëran anquitaponahuë', co nanitërinhuë' piyapi'sa' nontacaso'. “Acohuana ya'conin quëran, Yosë nohuanton, hua'narëso pochin quënamara,” topi.

<sup>23</sup> Nani Yosë chinotopiso pëiquë sirihuitohuachina, Sacariasëso' ya'huërin'pa' paan-tarin. <sup>24</sup> Ina quëran co hua'quiya quëranhuë' sa'in cayorin huachi. A'natërâpo yoqui pochin co intoaso' pa'ninhuë'. Pëinënquë ya'huárin. <sup>25</sup> “Ma noyacha Yosë catahuarinco ni'ton, hua'huanarahuë paya. Ina nohuanton, co huachi tapan ya'huëtarincohuë'” ténin yonquiaton.

### *Anquënniri Maria nontërinso'*

<sup>26</sup> Nani saota yoquitohuachina, naquëranchin anquëni isoro'paquë o'mantarin, Capiri itopiso'. Nasaritoquë Yosëri a'paimarin, Cariria parti ya'huërinso'. <sup>27</sup> Inaquë a'nara nanon ya'huërin, Maria itopiso'. Cosiri nani nontërin macacaso marë'. Tata masho Tapi shiin inaso'. <sup>28</sup> Anquëni o'marahuaton, Maria itapon:

—I'huata Maria. Sinioro noya ni'ninquën. Ina chachin catahuarinquën, itërin.

<sup>29</sup> Ina natanahuaton, Maria pa'yanin: “¿Ma'marëta' napotërinco?” ténin yon-quinënquë.

<sup>30</sup> —Ama Maria, pa'yanquësuhuë'. Yosë noya ni'ninquën. <sup>31</sup> Natanco sha'huichinquën. Quëmaso' hua'huanaran. Quëmapia'huaya huaihuatan, Quisoso itëquë'. <sup>32-33</sup> Mashotohuachin, chiníquën nanantarin. Inaso' Yosë hui'nin. Yosë nohuanton, copirno ya'conarin. Iráca Tata masho Tapi israiro'sa' noya hua'anëntopirinhuë'. Ina quëran chiminin. Iporaso nipirinhuë' hua'huani hua'anëntomiatarin. Co onporonta' pipirarinhuë', itërin anquënniri.

<sup>34</sup> —¿Onporahuatota' hua'huanapo? Co caso' quëmapi së'huayátërarincohuë', itërin Mari-ari.

<sup>35</sup> —Ispirito Santo nohuanton, quëmaora hua'huanaran. Yosë topinan yonquiarapir-inquënhuë', cayoaran. Napoaton hua'huan, Yosë hui'nin chachin nisarin. Co pi'pisha tëranta' oshahuanaponhuë'. <sup>36</sup> Ni'quë'. Quëmopinën Isapira itopiso' paiya niponahuë', Yosë nohuanton nani cayorin. Co hua'huana'píhuë' niponahuë', nani saota yoquitarin. Quëmapia'huaya huaipon. <sup>37</sup> Yosë ya'ipi nanitaparin, itërin anquënniri.

<sup>38</sup> —Inta nipachin. Yosëíchin caso' natëarahuë. Ina nohuanton, hua'huahuë ya'huë'in nipachin, ténin Maria.

Napotohuachina, anquëni pa'nin.

### *Isapira nicapon pa'ninso'*

<sup>39</sup> Ina quëran manorahuaton, Mariaso' Cotia motopiro'sa parti pa'nin quëmopinën nicapon. Inaquë canconahuaton, <sup>40</sup> Sacariasë pëinënquë ya'conconin. Isapira quënanconahuaton, —I'huata a'shacha, itërin. <sup>41</sup> Ina natanahuaton, hua'huin yo'namënquë to'mo to'mótarin. Isapiranta' nóya cancantërin. Ispirito Santori noyá ya'coancantërin ni'ton, <sup>42</sup> pa'yataton, chiníquën itapon:

—I'huata hua'huata'hua. ¡Ma noya Yosë catahuarinquën! A'napita sanapi'sa quëran noya noya ni'ninquën. Hua'huaonta' noya noya ni'sarin. <sup>43</sup> Inaso' ya'ipiya hua'anëntarinpoa'. Co caso' chiníquën nanantopirahuë', ¡ma noyacha ina a'shinquën nipirahuë', nicaponco huë'nan paya! <sup>44</sup> Quëma nontohuatancora, a'naroáchin hua'huahuënta' yo'namëhuëquë to'mo to'mótarin. Noya cancantaton, naporin. <sup>45</sup> “Yosë no'tëquën nontërinco,” ténanso marë' inaso' noya ni'ninquën. Sha'huitërinquënso chachin acotarinquën, itërin Isapirari.

<sup>46</sup> Ina quëran Maria tapon:

“Ma noyacha Tata Yosëso paya, ténahuë canta'.

<sup>47</sup> Anoyacancantërinco ni'ton, nóya cancantërahuë.

<sup>48</sup> Topinan piyapico nipirahuë', yonquirinco.

Ipora quëran huarë' na'a piyapi'sa' nohuitarinaco. ‘Ma noyacha Yosëri catahuarin paya,’ tosapi.

<sup>49</sup> Yosëso' ya'ipi nanitaparin. Inaso' nóya catahuarinco.

Noya noya ninin.

<sup>50</sup> Iráca chinotopisopitanta' nosororin.

Ipora huanta' ina chinotohuatēhua', nosoroarinpoa'.

<sup>51</sup> Chiníquēn nanantaton, nani ma'sha ninin.

Nocantopisopita atapanin.

<sup>52</sup> Copirnorosanta' co noyahuē' nipachinara, ocoirin.

Topinan piyapi'sa' ya'huērē' noya acorin.

<sup>53</sup> Pahuantērinsopita catahuarin nóya ya'huēcaiso marē'.

Ma'huano'saso nipirihuē', topinan a'parin.

<sup>54</sup> Israiro'sa' na'con catahuarin.

Piyapinēnpita ni'ton, nosororin.

<sup>55</sup> Iráca Apraan nontaton, 'Nosororanquēn. Quēma shiparinpitanta' nosoroato, catahuaarahué', itērin Yosēri.

Ina yonquiaton, ipora catahuarinpoa huachi," tēnin Maria.

<sup>56</sup> Cara yoqui pochin inaquē yacapatērin. Ina quēran ya'huērin'pa' paantarin.

### *Coansha Paotista nasitērinso'*

<sup>57</sup> Isapira nani tahuērinēn nanihuachina, huairin. Quēmapia'huaya huairin.

<sup>58</sup> Quēmopinēnpita, ya'cariya ya'huēpisopita, inapita natantopi. "¡Ma noya Yosēri catahuarin ni'ton, noya huairin! ta'tona'," nóya cancantopi. <sup>59</sup> Hua'huasha posa tahuēritohuachina, marca yaacotopi.

"Niapoquē'. Sacariasē itēquē'," itopi a'naquēni. <sup>60</sup> A'shinso nipirihuē', co nohuantērinhuē'.

—Coansha itarai, tēnin.

<sup>61</sup> —Ama nisha nininēn acotēquēsohué'. Quēmopinēnáchin apoquē'. Ina noya, itopi.

<sup>62</sup> Ina quēran pa'pin ipora huanta' nē'huē ni'ton, imirin quēran tasatopi nininēn nitotacaiso marē'. <sup>63</sup> Pa'pinso' quirica ma'patahuaton, ninshitērin. "Coansha itarahué'," tēnin ninshitaton. Ina nicatona': "¡Ma'pitacha yonquirin paya!" topi. <sup>64</sup> Naporo' nē'huērinso' inquirahuaton, a'naroáchin noantarín huachi. "¡Ma noyacha Tata Yosēso' ni'ton, catahuarinco paya!" tēnin. <sup>65</sup> Ina ni'sahuatona', piyapi'sa' pa'yanpi. Ya'ipi Cotia parti nanan nahuinin. <sup>66</sup> Ina natanatona', yonquiapi. "¿Ma'ta' onpoapon iso hua'huasha ni'ton, ipora quēranchin Yosēri na'con na'con catahuararin?" topi.

### *Sacariasē ninorinso'*

<sup>67</sup> Ina quēran Ispirito Santori noyá ya'coancantohuachina, Sacariasēnta' tapon:

<sup>68</sup> "¡Ma noyacha Tata Yosēso' hua'anēntērinpoa paya!

Piyapinēnpitanpoa' yonquiatonpoa', nicha'ēsarinpoa'.

<sup>69</sup> Ina nohuanton, Tata masho Tapi shiin chachin nicha'ēsarinpoa'.

Inaso' chini chiníquēn nanantapon.

<sup>70</sup> Iráca quēran huarē' pēnēntona'piro'sa' ninopi.

Yosē nohuanton, sha'huitērinēnpoa':

<sup>71</sup> 'A'na tahuēri nicha'ēsaranquēma'. Co huachi inimicoro'sa' minsēarinēnquēmahuē'.

No'huipirinēnquēmahuē', nicha'ēsaranquēma', tēnin Yosē, topi.

<sup>72</sup> Iráca shimashonēnpoa' nosoroaton, naporin. Ipora huanta' nosororinpoa'.

Sha'huitērinso' co Yosēri naniantērinhuē'.

<sup>73</sup> Tata masho Apraan sha'huitērinso' yonquirárin.

<sup>74</sup> Napoaton nicha'ēsarinpoa'. Co huachi inimiconēnpoa' minsēarinēnpoa'.

Ina quēran co tē'huatatēhuahuē', Yosē chinotarihua'.

<sup>75</sup> Ina pochin cancantatēhua', inasáchin chinotarihua'.

Chiminaquē huarē' nóya nisarihua'.

<sup>76</sup> Quēmanta', conpa, Yosē a'paarinquēn piyapinēnpita pēnēnacaso marē'.

Sinioro isoro'paquē yao'marin ni'ton, pēnēntaran piyapi'sari natēcaiso marē'.

<sup>77</sup> Yosë piyapinēnpita itapon:  
‘Oshanēma' inquitatēnquēma',  
Sinioro anoyacancantarinquēma', itaran.

<sup>78</sup> Yosë nosoroatonpoa', inápa quëran a'pintimarinpoa'.  
Pi'i a'pintērinpoaso pochin no'tēquēn anitotērinpoa'.

<sup>79</sup> Tashinan pochin cancantopirēhuahuē',  
a'pintatē pochin nitarinpoa' noya nanpicaso marē'.  
Anoyacancantohuachinpoa', sano cancantarihua',” tēnin Sacariasē.

<sup>80</sup> Ina quëran hui'ninso' so'sorahuaton, hui'napitarin huachi. Yosë yonquiarin  
ni'ton, chiniquēn cancantarin. Inotēro parti ya'huéárin. Ina quëran oshaquëran Yosëri  
sha'huitērin israiro'sa' pēnēnacaso marē'.

## 2

### *Quisoso nasitērinso'* *(Mateo 1.18-25)*

<sup>1</sup> Naporo' tahuēri'sa' Noma copirno nanan a'parin, Aocosto itopiso'. Ya'ipi parti  
a'parin. “Ya'ipinquēma' paco'. Quiricaquē nininēma' niacotoco',” tēnin. <sup>2</sup> Naporo  
huarē' ya'ipi piyapi'sa' pichirapi. Sirinioso' Siria parti hua'anēntohuachina, naporin.  
<sup>3</sup> Natanahuatona', ya'ipi piyapi'sa' pa'pi nininēna' niacotacaiso marē'. Hua'huatopiso'  
ninanonēnaquē pa'pi. Nisha nisha pa'pi.

<sup>4</sup> Cosiso' Cariria parti ya'huērin. Nasaritoquē ya'huēpirinhuē', ina quëran pipirahu-  
aton, Cotia parti pa'nin. Inaquē canconahuaton, Pirin'pa' pa'nin. Iráca Tata masho  
Tapi inaquē hua'huatērin. Ina shiin ni'ton, inaquē pa'nin nininēn niacotacaso marē'.

<sup>5</sup> Mariarē chachin pa'nin. Nani ina macacaso marē' nontaponahuē', Yosë nohuanton,  
inaora cayorin. <sup>6</sup> Nani naniarin huaicaso' ni'ton, inatohua' ni'so', huairin. <sup>7</sup> Paninan  
huairin, quēmapia'huaya. Nē'mētērinquē so'quēētahuaton, nona'huayaquē acorin, ohuaca  
coshatērinquē. Huē'écaiso' pēi' nani ya'sotopi ni'ton, co inaquē huē'ēpatērinhuē'. Napoa-  
ton nona'huayaquē hua'huin acorin.

### *Ohuica pē'tahuana'piro'sa' quēnanpiso'*

<sup>8</sup> Naporo' tashi' ohuica pē'tahuana'piro'sa' pastoquē ya'huērapi. Pirin ya'cariya  
ya'huērapi. Tashirē chachin ohuicanēnapita a'pairapi. <sup>9</sup> Inaquē ni'soi', a'nanaya Sin-  
ioro anquēninēni ya'notimarin. Huēnaráchin huēnaráchin a'pintimarin. Yosë pochin  
a'pinin. Anquēni quēnanahuatona', quēmapi'sa' pa'yanpi. <sup>10</sup> Anquēniriso' itapon: “¡Ama  
pa'yancosohuē'! Noya nanan sha'huichinquēma' ya'ipi piyapi'sa' noya cancanta-  
caiso marē'. <sup>11</sup> Ipora tashi' a'nara quēmapia'huaya Pirinquē nasitērin. Inaso' Cristo,  
Yosëri a'paimarinso'. Sinioro ni'ton, chinotacaso' ya'huērin. Nani o'marin piyapi'sa'  
cancanēna' anoyatacaso marē'. <sup>12</sup> Inaquē pa'patama', hua'huishin quēnanconarama'.  
Nē'mētērinquē so'quēētahuatona', ohuaca coshatērinquē acopi. Ina quëran nohuitarama',”  
itērin.

<sup>13</sup> Ina quëran a'naroáchin na'a anquēniro'sari ya'notantapi. Yosë chinotatona', itapona':

<sup>14</sup> “¡Ma noyacha Yosëso paya! Inápaquē ya'huaponahuē', piyapinquēma' yonquirin-  
quēma'.

Cancantatoma ina yanatēramasopitaso' sano cancantarama',” itopi anquēniro'sari.

<sup>15</sup> Nani inápaquē panantahuachinara, pē'tahuatona'piro'sa' ninontopi.

—Pirin'pa' pa'ahua' nipachin. Sinioro anitotērinpoaso' nia'ahua', nitopi.

<sup>16</sup> Manorahuatona', pa'pi. Canconahuatona', hua'huasha, Maria, Cosi, inapita  
quēnanconpi. Hua'huasha ohuaca coshatērinquē quēhuéánin. <sup>17</sup> Nani ni'sahuatona',  
na'a piyapi'sa' sha'huitēra'piapi. “Quēmapia'huaya nani nasitērin. Inaso' Cristo, Yosëri  
a'paimarinso'. Anquēni sha'huitimarincoi,” itēra'piapi. <sup>18</sup> Natanahuatona', “Ma'pítacha  
itērinpoa' paya,” topi ya'ipi piyapi. <sup>19</sup> Mariaso nipirinhue' naporinso' na'con yonquirárin.

<sup>20</sup> Ina quëran pë'tahuatona'piro'sa' paantapi. “Ma'pítacha natanëhua paya. Ma'pítacha ni'nëhua paya. Anquëniro'sa' itërinpoaso chachin quënanëhua'. ¡Ma noyacha Tata Yosëso paya!” topi.

*Yosë chinotopiso pëiquë quëpapiso'*

<sup>21</sup> Hua'huasha posa tahuëritohuachina, marca acotopi. Naporo' nininën acotopi huachi. Quisoso itopi. Co'huara Maria hua'huayantërasohuë', anquëniro sha'huitërin ina nininën acocaso' ni'ton, napotopi.

<sup>22</sup> Moisësë iráca pënëntërin: “Sanapi huaihuachin, a'na yoqui pochin nina'in. Ina quëran Yosë chinotopiso pëiquë ya'coanta'in,” tënin. Cotioro'sa' napopiso chachin a'na yoqui pochin nanihuachina, Maria, Cosi inapitaso Quirosarin'pa' paantapi pënëntërinso' natëcaso marë'. Naporo' hua'huin Yosë chinotopiso pëiquë quëpapi inaquë Yosë nontacaiso marë'. “Iso hua'huasha, Sinioro, noya a'paiquë' quëma piyapinën niin,” itopi. <sup>23</sup> “Paninanso' quëmapi nipachin, Yosë piyapinën ninin,” tënin Moisësë iráca pënëntatón. Napoaton ina pochin nontërin. <sup>24</sup> Naporo' cato' nëpëhuë napon, cato' pë'tahua nëpëa'huahuë napon atëpatopi Yosë chinotacaiso marë'. Inanta' Moisësë pënëntërin ni'ton, inapopi.

<sup>25</sup> Quirosarinquë chachin a'na quëmapi ya'huërin, Simion itopiso'. Nóya quëmapi inaso'. Nani tahuëri Yosë chinotërin. “A'na tahuëri Yosë nicha'ësarinpóa',” ta'ton, Cristo a'paimacaso' ninarárin. Ispirito Santori noyá ya'coancantërin. <sup>26</sup> Ina nohuanton, Simion nani ninorin. “Siniorori a'paimarinso' nohuitapo. Co'huara chimiyantërapohuë', Cristo o'mararin, ni'sarahuë,” tënin yonquiaton. <sup>27</sup> Naporo' tahuëri Ispirito Santo nohuanton, Yosë chinotopiso pëiquë pa'nin anta'. Cosinta' sa'inë chachin inaquë nisapi. Pënëntopiso' natëtona', inaquë Quisoso'huaya quëpapi ni'ton, Simioni quënanconin. <sup>28</sup> Hua'huasha quënanahuaton, Simion nóya cancantërin. Iporahuaton, Yosë nontërin.

<sup>29</sup> “¡Ma noyanquëncha quëmaso', Sinioro, ni'ton, a'paimaranso' nani anohuitëranco paya! Napoaton noya ipora caso' chimiin, tënahuë. Sha'huitërancoso chachin nanirin huachi.

<sup>30</sup> Iso hua'huasha nani ni'nahuë. Nicha'ëincoiso marë' a'paimaran.

<sup>31</sup> Ya'ipi piyapi'sa' yonquiaton, a'paimaran.

<sup>32</sup> Nisha nisha nananquë nonpisopita a'pintarin no'tëquën yonquicaiso marë'.

Israiro'santa' catahuaarin. Piyapinënpita ni'ton, noya noya acorarin,” itërin.

<sup>33</sup> Ina natanahuaton, “¡Ma'pítacha naporin paya!” tënin Cosi. Marianta' inachachin yonquirin.

<sup>34</sup> —Yosë noya a'painquëma', itërin Simioni. Ina quëran a'shin itantapon:

—Hua'huan mashotohuachin, ya'ipi israiro'sa' pënënarin. Natanahuatona', a'naquën natëtona', noya cancantapi. A'naquënso nipirihuë' co nohuantapihuë' ni'ton, anotëreso pochin nisapi. Yosë nohuitacaiso marë' no'tëquën pënëntapirihuë', chiniquën no'huipi.

<sup>35</sup> Inahuara cancanëna quëran nisha nisha yonquiapirinahuë', inari a'ninquëchin anitotarin. Hua'huan no'huihuachina', quëmaso' chiniquën sëtaran. Sahuëniquë ohuaninënposo pochin sëto ya'coancantarinquën huachi, itërin.

<sup>36</sup> A'na sanapinta' inaquë ya'huërin, Ana itopiso'. Inaso' Panino hui'nin, Asirë huëntonquë ya'huërinso'. Yosë nohuanton, nitoninorin. Nani paiya. Nanon napon, a'na quëmapi manin. Canchisë pi'ipiachin niquëpasoi', <sup>37</sup> so'ini ayananpirin ni'ton, nani hua'qui' quëyoronin. Nani posa shonca catapini pi'ipitërin. Yosë chinotopiso pëiquë ya'huëmiatërin. Tahuërirë chachin, tashirë chachin Yosë chinotërin. Apira apira Yosë yonquirin. Co cosharo' yonquiatonhuë', Yosë nontárin. <sup>38</sup> Naporo' inanta' huëcaton, Quisoso'huaya ni'nin. Noya cancantaton, Yosë nontërin.

—Iso hua'huasha nasitërinso marë': “Yosparinquën Sinioro,” itëranquën, tënin. Ina quëran Yosë imapisopita sha'huitërin.

—Yosë nohuanton, a'paimarinso' nani nasitërin. Inaso' nicha'ësarinpóa', itërin. Na'a Quirosarinquë ya'huëpisopita ina ninarapi ni'ton, napotërin.



*Nasaritoquë pantapiso'*

<sup>39</sup> Ya'ipi iráca pënëntërinso' nani natëhuachinara, Cosiso sa'inë chachin Cariria parti paantarín. Nasaritoquë ya'huantarín. <sup>40</sup> Quisoso so'sorahuaton, chinirarin. Nóya yonquirín. Yosëri na'con catahuarin.

*Hui'napitahuaton, Yosë chinotopiso pëiquë pa'ninso'*

<sup>41</sup> Nani Pascoa tahuëri a'shin, pa'pin, inapita Quirosarínquë pantapi. <sup>42</sup> Quisoso shonca cato' pi'ipitohuachina, naquëranchin pantapi cotio niyontopiso tahuëri na'huëcaiso marë'. <sup>43</sup> Nani na'huëhuachinara, ya'huëpi'pa' pa'mantapirínahuë', Quisososo' co pa'marínhuë'. Hui'napi nipónahuë', inaquë inaora quëparitërin. A'shinso' co nitotërinhuë'. Cosinta' co nitotërinhuë'. <sup>44</sup> Na'a piyapi'sa' pa'sapi ni'ton, "Nisha huë'sarin," ta'tona', a'na tahuërira' iratopirínahuë'. I'huanahuanquë Quisoso yonisápirínahuë', co quënanpihuë'. Quëmopinënpita, nohuitopisopita, inapita natanpirínahuë', <sup>45</sup> co quënanpachinarahuë', yonicaiso marë' inatohua chachin paantapi.

<sup>46</sup> Cara tahuëri quëran Yosë chinotopiso pëiquë quënanpi huachi. Maistro'sa' a'chinpiquë huënsërahuaton, a'chinpiso' natanarin. Natanahuaton, natantaantarín anta'. <sup>47</sup> Na'a piyapi'sa' natanpi. "Ma noyacha yonquirín paya. Nóya a'panitërin," topi.

<sup>48</sup> Inaquë quënanahuatona', a'shinso' pa'yanin.

—¿Onpoatonta' hua'hua napotërancoi? Ni'quë'. Pa'yanatoi, cara tahuëri yonisápirínquënhuë', ipora huarë' quënanainquënhuachi, itërin.

<sup>49</sup> —¿Onpoatonta' yonisápirímacohuë'? Tatahuë pëinëinquë ya'huëca'huaso' ¿co nitotëramahuë' ti? itërin.

<sup>50</sup> Natanaponahuë', ma'sona tapon naporínso' co nitotopihuë'.

<sup>51</sup> Ina quëran pipihuachina, a'shin, pa'pin inapitarë' Nasaritoquë paantarín. Inaquë paaton, a'shin, pa'pin, inapita noya natërin huachi. Naporínso' a'shini cancanën quëran yonquirárin. <sup>52</sup> Naporahuaton, Quisoso hui'napitarín huachi. Noya noya yonquirín. Yosëri noya ni'nin. Piyapi'sarinta' noya ni'pi.

**3***Coansha Paotista pënëntërinso'*

*(Mateo 3.1-12; Marcos 1.1-8; Juan 1.19-28)*

<sup>1</sup> Naporó tahuëri'sa' Tipirio itopiso', Noma copirno ya'conin. Nani shonca a'natërápo pi'ipi hua'anëntarin. Ponsio Piratonta' Cotia parti hua'anëntarin. Irotisëso', Cariria parti hua'anëntarin. Iin Pinipi itopisonta', Itoria parti, Traconiti parti, inapita parti hua'anëntarin. Nisaniasëso' nipirínhuë', Apirinia parti hua'anëntarin. <sup>2</sup> Anasë, Caihuasë, inapita corto hua'an chini chiníquën nanantërinso' ya'conpi. Naporó' Coansha pënëntarin. Sacariasë hui'nin inaso'. Inotëro' parti ya'huaso', Yosëri sha'huitërin paaton pënëntacaso marë'. <sup>3</sup> Napoaton ya'ipi Cortanii' parti pa'taton, pënëntárin.

—Co noyahuë' yonquiramasopita naniantatoma', Yosë tahuëretantaco' oshanëma' inquichinquëma'. Ina quëran aporintaranquëma', itëra'piarin. <sup>4</sup> Iráca Isaiasë ninorin. Ninshitatón, naporin:

"Inotëro parti a'na quëmapi pënëntápon.

'Sinioro o'macaso' tahuëri yonquico'. Ni'co'. Hua'an chiníquën nanantona'pi ni'ton, a'na parti yapa'pachina, comisionën a'parin ira tapatacaso marë'.

Ira otëërin noya pa'tacaso marë'.

<sup>5</sup> Iconantëro'sa' amëntarotarin. Panëno'sa' taparoarin. Co'shoninsopita otëarin.

Tomashin acoarin. Ira noya tapahuachina, hua'an pa'nin huachi.

Inapochachin iporaso' co noyahuë' yonquiramasopita naniantatoma', cancanëma' anoyatoco' Sinioro o'main.

<sup>6</sup> Ya'ipi piyapínpoa' nicha'ëinpoaso marë' o'mararin, tapon ina quëmapi pënëntohuachin," tënin Isaiasë iráca ninoton.

Naporinso chachin Coansha pënëntarin.

<sup>7</sup> A'naquën aporihuanacaiso marë' huë'pirinahuë', Coanshariso', co yaaporintërinhuë':  
—Canpitaso' ya'huan pochin cancantatoma', yanonpinama'. “Yosë isoro'pa' ana'intoahuachin, cha'ëpoi quiyanta',” ¿topiramahuë ti? Topinan aporihuanpatama', co cha'ësaramahuë'. <sup>8</sup> Co noyahuë' yonquiramasopita naniantatoma', noya nico'. Ama ninonpintocosoahuë'. “Quiyaso' Apraan shinpitacoi ni'toi, Yosë piyapinënnpitacoi,” ama tocosohuë'. Yosë nohuantërin naporini, iso na'piro'santa' Apraan shinpita atarantacaso' nanichitonhuë'. <sup>9</sup> Nani Yosë yonquirin oshahuano'sa' ana'intacaso'. Ni'co'. Nararo'sa' co noya nitohuachinahuë', nicosotërë'. Nicosotahuatë', pënquë të'yatërë' huiquitacaso marë'. Inapochachin canpitanta' co noyahuë' nipatama', chiníquën ana'intarínquëma', ténin.

<sup>10</sup> —¿Ma'ta' onpo'ii nipachin? itopi.

<sup>11</sup> —Piyapi'sa ma'shari pahuantohuachina, ama apiratocosoahuë'. Cato' a'mocamaso ya'huëtohuachinquëma', a'nara' quëtoco' a'mo'in. Tanahuachina', a'caco' ca'in, itërin Coanshari. <sup>12</sup> A'napitanta' aporihuanacaiso marë' huë'pi. Inapitaso' coriqui copirno marë' ma'patona'piro'sa'.

—¿Ma'ta' maistro quiyaso' onpo'ii? itiipi.

<sup>13</sup> —No'tëquën coriqui ma'patoco'. Ama nonpinatoma', na'con na'con ma'patocosoahuë', itërin.

<sup>14</sup> Sontaro'santa' huë'pi.

—¿Ma'ta' quiyanta' onpo'ii? itiipi.

—Ama piyapi ahuëatoma', coriqui matocosoahuë'. Ama canacaso marë' nonpinapicosoahuë'. Nani pahuërëhuachinquëma', ama na'con na'con nohuantocosoahuë', itërin.

<sup>15</sup> Piyapi'saso' yonquirapirinahuë'. “¡Ma noyacha Coanshaso' pënëntërin paya! Inaso' Cristo nimara. Nicha'ëinpoaso marë' ¿Yosëri a'paimamara ti?” topi. <sup>16</sup> Ina natanahuaton, Coanshari itërin:

—Aporintëranquëma mini nipirinhue', co caso' Cristocohue'. Ca piquëran inaso' huë'sarin. Inaso chini chiníquën nanantërin. Caso' co pi'pisha tëranta' ina pochin chiníquën nanantërahuë'. Co maquëyancohuë' ni'ton, co sapatën i'quirita'huaso tëranta' nanitarahuë'. Inaso' huë'pachin, a'naquëma' Ispirito Santo aya'coancantarinquëma'. A'naquëmaso nipirinhue', pënquë chiníquën ana'intarínquëma'. <sup>17</sup> Cayarinso' manëso pochin nizarin. Arosë mapatëra, to'norarë'. Ina quëran pintiarahuatë', pëiquë acorë'. Sha'huëtënso nipirinhue' pënquë ahuiquitëre'. Inapochachin ana'intoahuachinquëma', co onporonta' pën tacopiarinhue', ténin Coansha. <sup>18</sup> Nani tahuëri ina pochin piyapi'sa' pënënarín. Yosë nanamën a'chintárin.

<sup>19</sup> Irotisënta' hua'an nipirinhue' pënënin. “Quëmaso' pa'pi co noyahuë' ninan. Naporahuaton, iyaparin sa'in osëretaton, manan. Pinipi sa'in chachin manan. Irotiasa itopiso'. Ina marë' oshahuanan,” itërin. <sup>20</sup> Napotohuachina, Irotisëso' aquë aquëtë' co noyahuë' yonquiaton, Coansha tashinan pëiquë apo'motërin.

### *Quisoso aporihuaninso'*

*(Mateo 3.13-17; Marcos 1.9-11)*

<sup>21</sup> Co'huara apo'mochatërasohue', Coanshari piyapi'sa' aporintahuachina, Quisosonta' huë'nin aporihuanacaso marë'. Nani aporihuanahuaton, Yosë nontërin. Nontaso', pi'iro'të' ni'soatërin. <sup>22</sup> Ispirito Santo nëpë pochin nohuaraimarahuaton, Quisoso ya'coancantomiatërin. Naporo' inápa quëran Yosëri itërin:

—Quëmaso' hui'nahuënquën chachin ninan. Na'con nosoroatënquën, nóya ni'nanquën, itërin.

### *Quisoso shimashonënpita ya'huërinso'*

*(Mateo 1.1-17)*

<sup>23</sup> Ya'nan pënëntapon, Quisoso cara shonca pi'ipitërin. Cosi hui'nin, topirinahuë'. Cosi pa'pinso' Iri itopi. <sup>24</sup> Iri pa'pinta' Matato itopi. Ina pa'pinso' Nihui itopi. Nihui pa'pinta' Miriqui itopi. Ina pa'pinso' Cana itopi. Cana pa'pinta' Cusi itopi. <sup>25</sup> Cusi pa'pinso' Matatiasë itopi. Ina pa'pinta' Amosë itopi. Amosë pa'pinso' Naomo itopi. Ina pa'pinta' Isiri itopi. Isiri pa'pinso' Nacai itopi. <sup>26</sup> Ina pa'pinta' Maato itopi. Maato pa'pinso' Matatiasë itopi. Ina pa'pinta' Simi itopi. Simi pa'pinso' Cosico itopi. Ina pa'pinta' Cota itopi. <sup>27</sup> Cota pa'pinso' Coanan itopi. Ina pa'pinta' Nisa itopi. Nisa pa'pinso' Soropapiro itopi. Ina pa'pinta' Saratiro itopi. Ina pa'pinso' Niri itopi. <sup>28</sup> Niri pa'pinta' Miriqui itopi. Miriqui pa'pinso' Ati itopi. Ina pa'pinta' Cosamo itopi. Cosamo pa'pinso' Irmatamo itopi. Ina pa'pinta' Iri itopi. <sup>29</sup> Iri pa'pinso' Cosoi itopi. Ina pa'pinta' Irisiro itopi. Ina pa'pinso' Corimo itopi. Ina pa'pinta' Matato itopi. Ina pa'pinso' Nihui itopi. <sup>30</sup> Nihui pa'pinta' Simion itopi. Ina pa'pinso' Cota itopi. Ina pa'pinta' Cusi itopi. Cusi pa'pinso' Conamo itopi. Ina pa'pinta' Iriaquimo itopi. <sup>31</sup> Ina pa'pinso' Miria itopi. Ina pa'pinta' Mina itopi. Ina pa'pinso' Matata itopi. Ina pa'pinta' Natano itopi. Ina pa'pinso' Tapi itopi. <sup>32</sup> Tapi pa'pinta' Quisi itopi. Ina pa'pinso' Opito itopi. Ina pa'pinta' Pooso itopi. Ina pa'pinso' Sara itopi. Sara pa'pinta' Nasono itopi. <sup>33</sup> Nasono pa'pinso' Aminatapo itopi. Ina pa'pinta' Atamino itopi. Ina pa'pinso' Arni itopi. Arni pa'pinta' Isromo itopi. Isromo pa'pinso' Parisë itopi. Ina pa'pinta' Cota itopi. <sup>34</sup> Ina pa'pinso' Cacopo itopi. Cacopo pa'pinta' Isaco itopi. Isaco pa'pinso' Apraan itopi. Apraan pa'pinta' Tari itopi. Ina pa'pinso' Nacoro itopi. <sup>35</sup> Nacoro pa'pinso' Siroco itopi. Ina pa'pinta' Nacao itopi. Nacao pa'pinso' Parico itopi. Ina pa'pinta' Ipiri itopi. Ipiri pa'pinso' Sara itopi. <sup>36</sup> Ina pa'pinta' Cainano itopi. Cainano pa'pinso' Arapasato itopi. Ina pa'pinta' Simo itopi. Simo pa'pinso' Noi itopi. Noi pa'pinta' Namico itopi. <sup>37</sup> Namico pa'pinso' Matosarino itopi. Ina pa'pinta' Inoco itopi. Inoco pa'pinso' Carito itopi. Ina pa'pinta' Marariro itopi. Ina pa'pinso' Cainano itopi. <sup>38</sup> Ina pa'pinta' Inosë itopi. Inosë pa'pinso' Sito itopi. Ina pa'pinta' Atan itopi. Atanso' Yosëri ninin.

## 4

### *Sopairi tënirinsò'*

*(Mateo 4.1-11; Marcos 1.12-13)*

<sup>1</sup> Quisoso Cortani quëran pipirahuaton, huëantarin. Ispirito Santori noyá ya'coancantërin. Inasáchin natërin. Naporo' ina nohuanton, inotëro parti pa'nin.

<sup>2</sup> Inaquë catapini shonca tahuëri ya'huërarin. Naporo' sopairi huëcapairahuaton, sha'huitopirinhüë' ama Yosë natëcaso marëhuë'. Catapini shonca tahuëri ya'huaponahuë', co manta' ca'ninhüë'. Ina piquëran tanarin. <sup>3</sup> Tanahuachina, sopairi itërin:

—Tëhuëinchachin Yosë hui'ninquën nipatan, iso na'pi cosharo' atarantëquë', itopirinhüë'.

<sup>4</sup>—Inca co nohuantërahuë'. Yosë quiricanënguë pënëninpoa': "Co cosharoriáchin piyapi ananpirinhüë'. Ya'ipi Yosë nanamën natëhuachin tëhuëinchinso' nanpiarin," tënin, itërin.

<sup>5</sup> Ina quëran a'na motopi'pa' sopairi quëparin. Ya'ipi ninanoro'sa', ma'shanënpita, inapita a'notërin. A'naroáchin noyápiachin nininsopita, ya'ipi quënanin.

<sup>6</sup>—Ya'ipi isopita hua'anëntato, carinquën quëchinquën inapita hua'anëntamaso marë'. Chiniquën nanan quëchinquën. Insosona nohuantërahuëso' nanitërahuë quëta'huaso'.

<sup>7</sup> Isonahuaton, chinotohuatanco, catahuaaranquën ya'ipiya hua'anëntamaso', itërin.

<sup>8</sup>—Inca co nohuantërahuë'. Yosë quiricanënguë sha'huitërinpoa'. "Sinioroíchin chinotëquë'. Inasáchin natëcaso' ya'huërin. Inaso' hua'anëntërinpoa'," tënin, itërin Quisosori.

<sup>9</sup> Ina quëran Quirosarin'pa' quëpaantarin. Yosë chinotopiso pëi a'canpique huarë' quëparahuaton:

—Tèhuenchachin Yosë hui'ninquën nipatan, no'paquë niiquë'. <sup>10</sup> Quiricanënguë nani sha'huitërinquën:

“Yosë, anquëninënpita a'patimarinquën, co ma'sha onpoaranhuë'.

<sup>11</sup> Imirina quëran masarinënguën ama na'piquë tëranta' ya'quiamaso marëhuë',” tënin ni'ton, no'paquë niiquë' a'painënguën, itërin sopairi.

<sup>12</sup> —Inca co nohuantërahuë'. Yosë quiricanënguë pënëninpoa'. “Ama Yosë tëniquësokuë'. Ama camaiquësokuë'. Ina nohuantërinsoáchin yonquicaso' ya'huërin,” tënin, itërin Quisosori.

<sup>13</sup> Nani hua'qui' sopairi sha'huitopirinhue', co yanatërinhuë'. Napoaton patërin. “A'na tahuëri minsëapo nimara,” ta'ton, pa'nin huachi.

*Quisoso pënëntacaso caniaritërinso'*  
(Mateo 4.12-17; Marcos 1.14-15)

<sup>14</sup> Ina quëran Cariria parti Quisoso paantarin. Ispirito Santori noyá ya'coancantërin ni'ton, catahuarin nóya nicacaso'. Ya'ipi naporinso' nahuinin. <sup>15</sup> Nisha nisha niyonton-piso pëiquë a'china'piarin. A'chinpachina: “Ma noyacha yonquirin paya,” topi.

*Nasaritoquë paantarinso'*  
(Mateo 13.53-58; Marcos 6.1-6)

<sup>16</sup> Ina quëran Nasaritoquë paantarin. Inaquë so'sorin. Chinoto tahuëri nanihuachina, niyontonpiso pëiquë pa'nin. Nani simana inaquë pa'nin ni'ton, naporinso' paantarin. Inaquë ya'conahuaton, Yosë quiricanë nontacaso marë' huanirin. <sup>17</sup> Isaiasë pënëntërinso' quirica quëtohuachina, manin. Oporinahuaton, nontërin natanacaiso marë'.

<sup>18</sup> “Siniro ispiritonën ya'coancantërinco ni'ton, noya catahuarinco.

Na'a piyapi'sa' co Yosë nohuitatonahuë', nosorotopi.

Napoaton Yosë acorinco noya nanan a'chinta'huaso marë'.

Sopairi minsëpirinhue', ocoiarahuë noya yonquicaiso marë'.

Somaraya nininsopita anoyatarahuë.

Parisitapisopita nicha'ësarahuë.

<sup>19</sup> Ipora tahuëri'sa' Yosë nosoroatënguëma', nicha'ësarinquëma huachi, ténahuë. Ina sha'huica'huaso marë' acorinco,” tënin Isaiasë, itërin quirica nontaton.

<sup>20</sup> Quirica so'nanahuaton, niyontonpiso' pëiquë catahuatona'pi quëtaantarin. Ina quëran huënsëhuachina, ya'ipi inaquë ya'huëpisopitari ni'sápi. <sup>21</sup> —Tèhuenchachin iyaro'sa' iráca Isaiasë ninorincoso chachin, Yosë a'paimarinco nicha'ëca'huanquëmaso marë', itërin Quisosori.

<sup>22</sup> Ya'ipiya natantapi. “Ma'pítacha nitotaton, naporin paya. Nóya a'chintërinpoa',” ta'tona':

—¿Co'na iso' Cosi hui'ninhue'? topi.

<sup>23</sup> Ina quëran Quisosori itaantarin:

—Iráca quëran huarë' napopi: “Nitoanoyatohuaton, quëma'ton nianoyatëquë' ni'ii,” topi. Ina pochin canpitanta' yonquirama' ténahuë. “Capinaomokuë na'a cania'piro'sa' a'naroáchin anoyatëran ni'quëhuarë', isëquënta' anoyatëquë' ni'ii,” itaramaco, tënin. <sup>24</sup> Ina quëran itaantarin:

—Co yanatëtomacohue', napotëramaco. Ni'co'. Pënëntona'pi pënëntohuachina, nisha nisha parti noya natanpi. Ninanonënguë ya'huëpisopitariso nipirinhue', co noya natanpihuë'. <sup>25</sup> Tèhuenchachin iráca Iniasë pënëntona'pi nanpipon, cara pi'ipi miria co pi'pian tëranta' o'naninhue'. Ya'ipi parti tanarotopi. Naporinso' na'a quëyorono'sa' Israiroquë ya'huëpirinhue', <sup>26</sup> co Yosëri catahuarinhue'. A'na quëyoronso nipirinhue' Saripitaquë ya'huërin, Siton parti ya'huërinso'. Nisha sanapi niponahuë', Yosëri catahuarin. Inaquë Iniasë a'parin cosharonën ana'atacaso marë'. <sup>27</sup> Irisio pënëntona'pinta' nanpiso',

na'a chana caniori maninsopita Israiro no'paquë ya'huëpirinahuë', co a'naya tëranta' anoyatërinhuë'. Namanoso' Siria piyapi niponahuë', Yosë nohuanton, anoyatërin. A'naroáchin canio inquirin, ténin Quisoso.

<sup>28</sup> Ina natanahuatona', ya'ipi piyapi'sa' chiníquën no'huitopi. <sup>29</sup> Manorahuatona', ninano quëran quëpapi. Ina yonsanquë tahuan ya'huërin. Inatohua' quëpapi të'yatacaiso marë'. <sup>30</sup> Yatë'yatopirinahuë', Quisososo' huancánachin paaton, noya cha'ërin.

*Sopai a'parinso'*  
(*Marcos 1.21-28*)

<sup>31</sup> Ina quëran Cariria parti paantarín. Capinaomoquë paaton, chinoto tahuëri a'chiantarin. <sup>32</sup> Chiníquën nanantona'pi pochín a'chinarín ni'ton, natanahuatona', pa'yanpi. “Ma noyacha a'chintërinpoa paya,” topi.

<sup>33</sup> Niyontonpiso pëiquë chachín a'na quëmapi ya'huërin. Sopairi ya'coancantërin ni'ton, pa'pi co noyahuë' yonquirin. Quisoso quënanahuaton, chiníquën nontërin. Sopairi chachín ichinonin.

<sup>34</sup> —¡Tananpitocoi! ¿Ma'ta' onpotaponcoi? ¿Ata'huantaponcoi ti? Nohuitërainquën. Quëmaso' Quisosoquën, Nasaritoquë ya'huëran. Yosë quëran o'maton, noya noya ninan, itërin.

<sup>35</sup> Itohuachina, Quisosori itërin:

—¡Ta'tëquë! Iso quëmapi quëran pipimiatëquë', itërin.

Sopaiso' quëmapi no'paquë të'yatahuaton, pipirin. Co manta' onpotërinhuë'. <sup>36</sup> Ya'ipi piyapi'sa' nicatora', pa'yanpi.

—¡Ma'pítacha Quisoso nitotërin paya! Chiníquën nanantaton, sopairo'sa' ocoirin. Camaihuachina pipipi, nitopi.

<sup>37</sup> Quisoso naporinso', ya'ipi parti nahuinin.

*Simon Pitro a'shatën a'naroáchin anoyatërinso'*  
(*Mateo 8.14-15; Marcos 1.29-31*)

<sup>38</sup> Ina quëran niyontonpiso pëi quëran pipirahuaton, Simon pëinënuquë pa'nin. Simon a'shatën chiníquën saporin ni'ton, Quisoso sha'huitopi. “A'shacha chiníquën saporin ta'a. Quëmari anoyatëquë' topiraihuë',” itopi. <sup>39</sup> Inaquë paaparahuaton, sapo a'naroáchin inquitërin. Noyatërin huachi. Nani noyatahuaton, inari chachín a'carin, o'shitërin, napotërin.

*Na'a cania'piro'sa' anoyatërinso'*  
(*Mateo 8.16-17; Marcos 1.32-34*)

<sup>40</sup> I'huanahuanquë pi'i yaya'conahuaso', na'a cania'piro'sa' nisha nisha caniori maninsopita Quisoso quëshipi. Napohuachinara, a'naya a'naya së'huarahuaton, ya'ipiya anoyatërin. <sup>41</sup> Sopairi ya'coancantërin sopitanta' quëntapi. Quisosori nontohuachina, sopairo'sa' pipipi. Yapipihuachina', chiníquën nontapi.

—Quëmaso' Yosë hui'ninquën, itopi. Yosëri a'paimarinso' nitotatona', napotopi. Napoaton Quisosori itapon: “Ta'tëquë'. Ama insonta' sha'huitëquësohuë',” itohuachina, ta'topi huachi.

*Nisha nisha parti a'chininso'*  
(*Marcos 1.35-39*)

<sup>42</sup> Tahuëririnquë tashiramiachin Quisoso huënsërahuaton, pa'nin. Ninano quëran pipirahuaton, co piyapi ya'huërinquëhuë' pa'pirinhuë'. Na'a piyapi'sa' ina yonípona' pa'pi. Quënanahuatona', “Ama paquësohuë'. Isëquë ya'huaton, a'chintocoi,” itopirinahuë', co nohuantërinhuë'.

<sup>43</sup> —Nisha nisha ninanoro'saquë paca'huaso' ya'huërin. Inaquënta' Yosë nanamën a'chínchi hua'anëntërinquë ya'coina'. Ina marë' Yosë a'paimarinco, itërin.



<sup>44</sup> Ina quëran ya'ipi cotioro'sa' ya'huërin parti pa'sahuaton, niyontonpiso pëiro'saquë a'chinarin.

## 5

### *Sami macacaiso marë' Quisosori catahuarinso'*

*(Mateo 4.18-22; Marcos 1.16-20)*

<sup>1</sup> Ina quëran Quisoso Quinisariti sono' yonsanquë a'chinarin. Na'a piyapi'sa' yamorapi. Yosë nanamën natanacaiso marë' huë'pi. Chiníquën ya'quëëtopi.

<sup>2</sup> Napotohuachinara, cato' poti ni'nin, yonsanquë oshipiso'. Hua'anënpitaso' nonshirahuatona', ritinëna pa'moapi. <sup>3</sup> A'na potiso' Simonquën. Inaquë ya'conahuaton, "Amasha paquë'," itërin. Itohuachina, amasha pa'nin. Inaquë huënsërahuaton, piyapi'sa' a'chintaantarin. <sup>4</sup> Nani a'chinpachina, Simon itapon:

—Huëquë' iyasha, amasha anpoquë pa'ahua'. Inaquë ritinëma të'yatoco' sami macaquëma', itërin.

<sup>5</sup> —Capa sami Maistro. Ya'ipi tashi' të'yatopiraihuë', co manta' manaihuë'. Nipirinhüë', quëma sha'huitëranco ni'quëhuarë', naquëranchin të'yatanta'i, itërin Simoni.

<sup>6</sup> Ina quëran të'yatohuachinara, notohuaro' sami mapi. Hua'huayatërahuë' ni'ton, riti yaoquirin. <sup>7</sup> Amiconënpita a'na potiquë ya'huërinso' imirin quëran anquitërin huëcatona' catahuacaiso marë'. Napotohuachinara, huë'pi. Cato' potiquë chachin sami amëntatopi. Napohuachinara, yayancominapipi. <sup>8-9</sup> Ina nápo' sami ma'ton, Simon Pitro pa'yanin. Quisoso nantën pirayan isonahuaton, itërin:

—¡Ma'pítacha Siniro nanitaparan paya! Caso' oshahuanco ni'to, co ya'cariancoso' ya'huërinhuë', itërin.

<sup>10</sup> Amiconënpitanta' pa'yanpi, Santiaco, Coansha inapita itopiso'. Sipitio hui'ninpita inahuaso'. Ina quëran Simon nontaton, Quisosori itapon:

—Ama iyasha pa'yanquësohuë'. Nani catahuanquën sami macamaso'. Ipora quëran huarëso nipirinhüë', catahuanquën piyapi'sa' macamaso marë'. Inapitanta' imainacoso marë' masaran, itërin.

<sup>11</sup> Ina quëran nonshirahuatona', ma'shanënapita patahuatona', Quisoso imapi huachi.

### *Chana caniori maninso'*

*(Mateo 8.1-4; Marcos 1.40-45)*

<sup>12</sup> Ina quëran a'na ninanoquë paantapi. Inaquë a'na quëmapi ya'huërin, chana caniori maninso'. Noshinën noyá pë'yatërin. Quisoso nantën pirayan isonahuaton, itapon:

—Nohuantohuatan Siniro, nanitëran anoyatancoso'. Anoyatoco topirahuë', itërin.

<sup>13</sup> Quisosori së'huarahuatona', itapon:

—Nohuantërahuë mini. Apiramiáchin anoyataranquën, itërin.

Itohuachina, a'naroáchin canio inquirin.

<sup>14</sup> —Ama iyasha piyapi'sa' sha'huitëquësohuë'. Corto hua'ainchin sacatërinquë paaton, noyatëranso' a'notonquë' ni'inquën. Naporahuaton, ofrenda Moisésë camaitërinso' quëpaquë' noyatëranso' nitotacaiso marë', itërin.

<sup>15</sup> Napotopirinhüë', ya'ipi parti nahuinin. Ina quëran hua'huayatërahuë' piyapi'sa' huë'pi Quisoso natanacaiso marë'. Cania'piro'santa' huë'pi anoyatacaso marë'.

<sup>16</sup> Quisososo nipirinhüë', apira apira piyapi'sa' patërin. Co piyapi ya'huërinquëhuë' pa'nin Yosë nontacaso marë'.

### *Apia anoyatërinso'*

*(Mateo 9.1-8; Marcos 2.1-12)*

<sup>17</sup> A'na tahuëri Quisoso a'chinaso', parisioro'sa', cotio maistro'sa', inapitanta' inaquë chachin huënsëapi. Inapitaso nisha nisha ninano quëran huë'pi. Cariria parti quëran, Cotia parti quëran, Quirosarin quëran, ina quëranpita huë'pi. Nani a'chintohuachina,

cania'piro'sa' anoyatërin. Yosëri catahuarin ni'ton, na'a cania'piro'sa' a'naroáchin anoyatërin. <sup>18</sup> Ina quëran catapini quëmapi'sa huëcatona', apia pë'sara'huaya pochin nininquë quëpi. Hua'qui' co nanitërinhuë' huanicaso', quëhuëánin. Quisoso ya'huëarinquë yapo'mopirinahuë'. <sup>19</sup> Hua'huayatërahuë' piyapi'sa' ya'sopi ni'ton, co nanitopihuë' ya'conacaiso'. Napoaton pëi' nanpëtahuatona', a'canpiso' pi'pian o'quirahuatona', pë'sara'huayarë chachin anohuaramapi. Huancanachin Quisoso pirayan acomapi. <sup>20</sup> “Ma noya isopita natërinaco,” ta'ton, Quisosori apia itapon:

—Oshanën apia'hua inquitaranquën, itërin.

<sup>21</sup> Ina natanahuatona', cotio maistro'sa', parisioro'sa', inapita yonquipi. “¿Ma quëmapita' isoso'? Yosë yaya'huërëterin. Co insonta' nanitërinhuë' oshanënpoa' inquitinpoaso'. Yosëíchin nanitërinso',” topi yonquiatona'.

<sup>22</sup> Topinan yonquiarapirinahuë', inaora yonquinën quëran Quisoso nitotërin.

—¿Onpoatomata' co noyahuë' yonquirapiramaco? <sup>23</sup> Canpitaso naporama': “Piyapinpoa a'napita oshanën inquitacaso', co nanitërehuahuë'. Apia camaiatë': ‘Huanirahuaton, noya paquë', itacasonta' co nanitaparëhuahuë',” tënana'. <sup>24</sup> Caso nipirinhue', Yosë quëran quëmapico ni'to, nanan quëtërinco piyapi'sa' oshanëna' inquita'huaso marë'. Canpítanta' ina nitotacamaso marë' iso apia anoyatarahuë', tënin.

Ina quëran apia itantapon:

—Huaniquë', apia'hua. Pë'sara'huaya masahuaton, ya'huëranquë paquë', itërin.

<sup>25</sup> Itohuachina, a'naroáchin huanirin. Ya'ipi piyapi'sari ni'pi. “¿Ma noyacha Yosëso' ni'ton, anoyatërinco paya!” tënin. Pë'sara'huayanën masahuaton, ya'huërinquë pa'nin.

<sup>26</sup> Ina nicatona' piyapi'saso' pa'yanpi.

—Ma noyacha Yosëri catahuarin ni'ton, a'naroáchin anoyatërin paya. Ma'pítacha ipora ni'nëhua paya, nitopi.

### *Nihui Quisoso imarinso'*

*(Mateo 9.9-13; Marcos 2.13-17)*

<sup>27</sup> Ina quëran Quisoso paantarahuaton, a'na quëmapi quënanconin, Nihui itopiso'. (Inachachin Matio itopi anta'.) Coriqui Noma copirno marë' ma'patona'pi inaso'. Coriqui ma'patërinquë huënsëarin.

—Huëquë' iyasha imaco, itërin.

<sup>28</sup> Napotohuachina, a'naroáchin huanirin. Ma'shanënpita patahuaton, Quisoso imarin.

<sup>29</sup> Ina quëran na'a amiconënpita amatërin pëinëinquë coshatacaiso marë'. Quisoso nohuitacaiso marë' amatërin. Na'a copirno marë' coriqui ma'patona'piro'santa' huë'pi.

<sup>30</sup> Ca'tano'sa' inaquë ni'sahuatona', cotio maistro'sa', parisioro'sa', inapitari no'huipi. No'huitona' itapona':

—¿Onpoatomata' oshahuano'sarë'quëma' coshatarama', o'opatarama', naporama'? Coriqui ma'patona'piro'santa' co noyahuë' nipirinahuë', inapitarë'quëma' coshatarama', itopi.

<sup>31</sup> Natanahuaton, Quisosori itërin:

—Isopitaso' tēhuëinchachin nohuantërinaco imainacoso'. Ni'co'. Cania'piro'sa' notoro nohuantopi. “Co caniorahuë',” topatëra, co notoro nohuantërehuë'. <sup>32</sup> Oshahuano'sa' pënëna'huaso marë' o'marahuë. “Co noyahuë' yonquiramasopita naniantatoma', Yosë tahuërëtantaco',” itërahuë. A'napitaso': “Quiyaso' noyaco'i,” topiso marë' co na'con a'chintërahuë', itërin.

### *Nasha nanan a'chininso'*

*(Mateo 9.14-17; Marcos 2.18-22)*

<sup>33</sup> Ina quëran piyapi'sari itaantapi:

—Coansha imarinsopitaso', co coshatatonaraihuë' Yosë nontapi. Parisio imarinsopitanta', inapochachin nipi. Quëma imarinënsopitaso nipirinhüë', noya coshatapi, o'osapi, naporapi, itopi.

<sup>34</sup> —Ca ya'huarahüë ni'ton, co sëtöpihuë'. Ni'co'. Quëmapi sa'acaso marë' piyapi'sa' amatohuachina, capa cancantopi. Nipayarinsopita huë'pachina', noya coshatopi. <sup>35</sup> A'na tahuëriso nipirinhüë' inimiconënpitari huëcatona', sa'ana'pi masapi. Quëpatohuachina', co huachi coshatacaiso' yonquiatonahuë' sëtapi. Inapochachin canta' mapachinaco, imarinacosopita sëtapona'. Sëtatona' co huachi coshatacaiso' yonquiatonahuë', Yosë nontápona', tënin.

<sup>36</sup> Ina quëran pënënto nanan a'chintaantarín.

—Ni'co'. A'moramaso irácaya nininso' noshatohuachina, co nasha a'morëso yanorëhuë' pa'pitacaso marë'. Nasha a'morëso yanohuatëra, tapirë'. Naporahuaton, nasha në'mëtëquë pa'pitothuatëra, co inashitërinhuë'. <sup>37</sup> Huino sha'moronta' yonquico'. Sha'moro' nipachina, co sha'huëtë' morsa mocaro' nininguë ta'panëhuë'. Sa'potohuachina, a'naroáchin nopoitërin. Nopoithuachina, huino chiniarë'. Morsanta' tapirë'. <sup>38</sup> Sha'moro' huinoso' nasha morsaquë ta'panë'. Huino, morsanta' noya nisarín. <sup>39</sup> Huino hua'qui' acopiso' o'opachinara, co nasha nipiso' nayapihuë'. “Hua'qui' acopiso' noya noya,” topi, itërin Quisosori.

## 6

### *Chinoto tahuëri naporinso'*

*(Mateo 12.1-8; Marcos 2.23-28)*

<sup>1</sup> A'na chinoto tahuëri nanihuachina, Quisoso ca'tano'sanënpitarë' pa'sarin. Tricoro' pëntontapona pochín, ca'tano'sanënpita a'naya a'naya trico moto maraapi. I'shorayarahuatona', caraapi. <sup>2</sup> Parisioro'sari ni'sahuatona', itopi:

—¿Onpoatomata' chinoto tahuëri nipirinhüë' tricoraya i'shorayarama'? Co ipora tahuëri sacatacasohüë' nipirinhüë'. ¿Onpoatomata' Moisésë pënëntërinso' co natëramahuë'? itopi.

<sup>3-4</sup> Itohuachinara, Quisosori itërin:

—Yosë quiricanën ¿co nontëramahuë' ti? Iráca Tapi tanahuachina, Yosë pëinënquë ya'conahuaton, pan Yosë marë' acopiso' ca'nin. Ca'taninsopitanta' tanapi ni'ton, quëtërin, ca'pi anta'. Corto hua'ano'saráchin ina pan capacaiso nipirinhüë', Tapiso' ca'nin, itërin.

<sup>5</sup> Ina quëran itantarín:

—Yosë quëran quëmapi co ni'to, chiníquën nanantërahuë. Ma'sona chinoto tahuëri noya nicacaso' sha'huichinquëma', itërin.

### *Imirin tachitërinso'*

*(Mateo 12.9-14; Marcos 3.1-6)*

<sup>6</sup> Ina quëran chinoto tahuëri naniantahuachina, niyontonpiso pëiquë paantahuaton, Yosë nanamën a'chiantarin. Inaquë a'na quëmapi ya'huërin. Inchinan imirin tachitërin ni'ton, co nanitërinhuë' së'quëtacaso'. <sup>7</sup> “Chinoto tahuëri nipirinhüë', Quisosori anoyatapon nimara,” ta'tona', cotio maestro'sa', parisioro'sa', inapitari ni'sápi sha'huirapicaiso marë'. <sup>8</sup> Topinan yonquiarapirinahuë', Quisosori ninorín. Napoaton apia itërin:

—Huë'sahuaton huancánachin huaniquë', itërin.

Napotohuachina, huanirahuaton, inaquë pa'nin. <sup>9</sup> Inaquë huanihuachina, Quisosori cotio maestro'sa', parisioro'sa', inapita itërin:

—Chinoto tahuëri noya nicacaso' ya'huërin. Ahuëtacaso', tëpatacaso', co inapita nicacaso' ya'huërinhuë'. Cania'pi tananpitothuatoso', co nosoroarahüë'. Napoaton anoyatacaso' ya'huërin, tënahüë caso'. ¿Ma'ta' canpitaso' tënama'? itërin Quisosori.

<sup>10</sup> Napotopirinhüë', co manta' topihüë'. Co a'panitohuachinarahuë', a'naya a'naya ni'sarin quëran apia itërin:

—Imiran iyasha ihuëquë', itërin. Natëton, ihuëhuachina, a'naroáchin noyatërin. <sup>11</sup> Ina marë' ni'sapisopitari chiníquën no'huitona', inahuara capini ninontopi onporahuaton-sona Quisoso ma'sha onpotacaiso'.

*Shonca cato' ca'tano'sanënpita acorinso'*  
(Mateo 10.1-4; Marcos 3.13-19)

<sup>12</sup> Ina quëran Quisoso a'na motopia'huaquë paantarin Yosë nontacaso marë'. Ya'ipi tashi' Yosë nontarin. <sup>13</sup> Tahuërihuachina, imarinsopita përarin. Huë'pachinara, shonca cato' acorin na'con na'con a'chintacaso marë'. “A'chinacaso marë' a'parahuësopita itaranquëma',” itërin. <sup>14</sup> A'naso' Simon. Nisha nininën acotërin. Pitro itërin. Iionta' acorin, Antërisë itopiso'. Santiago, Coansha, Pinipi, Partoromi, <sup>15</sup> Matio, Tomasë, inapitanta' acorin. A'na Santiacanta' acorin. Arpio hui'nin inaso'. A'nanta' Simon itopi. Inaso' copirno no'huina'piro'sa' imapirinhüë', iporaso' Quisoso imasarin huachi. <sup>16</sup> Ina quëran cato' Cotasë acorin. A'naso' Santiago hui'nin. A'nanta' Cotasë Iscarioti. Inanta' Quisosori acopirinhüë', a'na tahuëri sha'huirapiapon. Inapita Quisosori acorin ca'tanacaiso marë'.

*Na'a piyapi'sa' a'chintërinso'*  
(Mateo 4.23-25)

<sup>17</sup> Inapitarë' nohuaraimarahuatón, pastoquë huanirin. Na'a imarinsopita inaquë ya'huapi. Notohuaro' piyapi'santa' huë'pi Quisoso natanacaiso marë'. Quirosarin quëran huë'pi. Ya'ipi Cotia parti quëran huë'pi. Marë yonsan quëraonta' huë'pi. Tiro, Siton, inapita ya'cariya ya'huëpisopitanta' huëcatona', noya natanpi. Cania'piro'santa' quëpi anoyatacaso marë'. <sup>18</sup> A'naquëonta' sopairi ya'coancantërin ni'ton, parisitápirinahuë', inapitanta' anoyatërin. <sup>19</sup> Ya'ipiya Quisoso së'huacaiso' nohuantopi. Së'huahuachinara, ina nohuanton, a'naroáchin noyatopi.

*Noya cancantopisopita*  
(Mateo 5.1-12)

<sup>20</sup> Ina quëran ca'tano'sanënpita notëërahuatón, a'chintërin:

“Canpitaso' co na'a ma'sha ya'huëtopirinquëmahüë', Yosë noya ni'sarinquëma'. Catahuarinquëma' noya cancantacamaso'. Hua'anëntërinquë chachin aya'conarinquëma'.

<sup>21</sup> Iporaso' tanapomarahüë', Yosë'pa' co onporonta' tanararamahuë'. Sano cancantarama'.

Isoro'paquë na'nëpiramahuë', inapaquëso' capa cancantarama'.

<sup>22</sup> Yosë quëran quëmapico ni'to, imaramaco. Imaramacoso marë' a'naquën no'huiarinëinquëma'. Co huachi quë'yarinëinquëmahüë'. Pinosarinëinquëma'. Nonpinapiarinëinquëma'. Napotopirinëinquëmahüë', ama sëtocosohüë'. Ina marë' Yosë noya ni'sarinquëma ni'ton, nóya cancantoco'. <sup>23</sup> Iráca Yosë piyapinënpita pënëntohuachinara, shimashonëmapitari inapochachin no'huipi. Napoaton a'napita no'huihuachinëinquëma', noya cancantoco'. Parisitëramaso marë' Yosë'pa' na'con canaarama'. Ina yonquiatoma', capa cancantoco'.

<sup>24</sup> A'naquëmaso' nani ma'sha ya'huëtopirinquëmahüë', jma'huantacha nisarama paya! ‘Noya cancantarëhua’, topiramahuë', Yosëso' co noya ni'sarinquëmahüë'.

<sup>25</sup> Iporaso' noya coshatapiramahuë', jma'huantacha nisarama paya! A'na tahuëriso' co manta' ya'huëtarinquëmahüë'.

Iporaso' capa cancantapiramahuë', jma'huantacha nisarama paya! A'na tahuëriso' sëtatoma', na'nëarama'.

<sup>26</sup> Noyasáchin nontinēnquēmaso' pa'yatohuatama', jma'huantacha nisarama paya! Iráca nonpin nanan pēnēntona'piro'sa pēnēntohuachinara, shimashonēmapitari pa'yatopi. Inapochachin iporanta' a'naquēma' niantarama'. Yosēso nipirinhue' ana'intarinquēma' itērin.

*Inimicoro'santa' nosorocaso' ya'huērin*

*(Mateo 5.38-48; 7.12)*

<sup>27</sup> Ina quēran itaantarín:

“Carinquēma' iyaro'sa', pēnēinquēma' natanco. Ya'ipi piyapi'sa' nosorocaso' ya'huērin, tēnahue'. Inimiconēmapitanta' nosoroco'. No'huipirinēnquēmaonta', ama i'huērētocosohue'. Catahuaco'. <sup>28</sup> Pinopirinēnquēmaonta', noya nontoco'. Co quē'yapirinēnquēmaonta', ama no'huicosohue'. Yosē nontoco' inahuanta' catahuain. <sup>29</sup> Panpirayahuachinquēn, ama manta' i'huērētēquēsohue'. Naquēranchin panpiantahuachinquēn, co naporō tēranta' no'huicaso' ya'huērinhuē'. A'moranso' matohuachinquēn, tananpitēquē' quēpa'in. Aipi a'moransonta quēpatohuachinquēn, ama no'huiquēsohue'. <sup>30</sup> 'Ma'sha quētoco', itohuachinquēn, ama apiraquēsohue'. Quēpatohuachinquēn, ama ma'pataantaquēsohue'. <sup>31</sup> Noya ninosorocaso' ya'huērin. Canpita nohuantērama' a'napita nosoro'inquēmaso'. Napoaton canpita nohuantēramaso chachin a'napitanta' nosoroco'. Ninosoroatoma', nicatahuaco'.

<sup>32</sup> Amiconēmapitaráchin nosorohuatama', co noya noya nisaramahuē'. Oshahuano'sa tēranta' inahua capini ninosoropi. <sup>33</sup> Noya nontērinquēmasopitaráchin catahuahuatama', co noya noya nisaramahuē'. Oshahuano'sa tēranta' inahua capini nicatahuapi. <sup>34</sup> No'tēquēn pahuērētopisopitarachin coriqui a'nanpatama', co noya noya nisaramahuē'. Oshahuano'sa tēranta' inahua capini nia'nanpi. 'Oshaquēran niquētanta'a', ta'tona', nia'nanpi. <sup>35</sup> Canpitaso nipirinhue' inimiconēmanta' nosoroco'. Inapitanta' catahuaco'. Piyapi'sa' pahuantohuachina', coriqui a'nanco'. 'Co i'huērētaponcohuē' nimara,' tapomarahuēnta', a'nanco'. Ina pochín nipatama', Yosē'pa' na'con canaarama'. Yosē pochachin cancantarama'. Inaso' ya'ipi piyapi'sa' nosoroaton, catahuarin. Oshahuano'santa' nosororin. Co 'Yosparinquēn,' itopirinahuē', catahuarin. <sup>36</sup> Tata Yosēri ya'ipi piyapi'sa' nosororin. Inapochachin canpitanta' a'napita nosoroco', itērin.

*Nocantopisopita pēnēninsó'*

*(Mateo 7.1-5)*

<sup>37</sup> Ina quēran itaantarín:

“Ama iyaro'sa' a'napita nocancosohue'. 'Caso' noya piyapico. Paso' piyapi co noyahuē' ni'ton, ana'intacaso' ya'huērin,' topi a'naquēn. Ama ina pochín noncosohue', Yosē ana'intochinquēma'. A'napita pinotoma' sha'huirapihuatama', Yosēnta' inapochachin sha'huirapitēnquēma', ana'intarinquēma'. A'napita ma'sha onpotohuachinquēma', nanan anoyatoco'. Canpitanta' oshanēma' Yosē inquichinquēma'. <sup>38</sup> Ama a'napita apiratocosohue'. Ma'sha quētoco'. Ina marē' canpitanta' Yosē acanaarinquēma'. Co manta' nonpintarinquēmahuē'. Piyapi'sa' nosoroatoma' catahuahuatama', Yosēnta' na'con na'con catahuarinquēma'. Apirahuatama', canpitanta' co Yosē catahuarinquēmahuē', tēnin.

<sup>39</sup> Ina quēran pēnēnto nanan sha'huitērin yonquicaiso marē': “Somaraya nipachina, co nanitērinhuē a'na somaraya nininsó' quēpacaso'. Quēparin naporini, cato chachin panca naninquē anochitonahuē'. <sup>40</sup> Maistroso' noya noya nitotaton, a'napita a'chintērin. Natanpisopitaso' co na'con na'con nitotopihuē'. Nani ya'ipi a'chintohuachina, maistrone'na pochín nisapi.

<sup>41-42</sup> Co iyaparin nocanacaso ya'huērinhuē'. Inaso pi'pian co noyahuē' nipachin, mo'shiri ya'conyatērinso pochín ninin ni'ton, nocanan. Quēmanta' co noyahuē' ninan ni'ton, narasēratē' nani noyá ya'copirayarinquēnso pochín nipiranhue', naporan. Napoaton 'carinquēn noya nicatēnquēn mo'shi ocoichinquēn,' co itamaso ya'huērinhuē'.



Napotohuatan, nonpinan. Narasëratë' niocoitëquë'. Ina quëran noya quënantaran. Naporo huarë' nanitaran iyaparin mo'shi ocoitacaso'," itërin.

*Nara pochin nininso'*  
(Mateo 7.17-20; 12.34-35)

<sup>43</sup> Ina quëran itantarin:

"Nara co noyahuë' nipachina, napoonin nitërin. Noya naraso nipirinhue' noya nitërin.  
<sup>44</sup> Nitërin quëran nara nohuitëre'. So'huanpiso' co misëra nitërinhuë'. Shihuarionta' co quëpa nitërinhuë'. <sup>45</sup> Inapochachin piyapi'sa' nipi. Noya yonquihuachinara, noya nipi. Co noyahuë' yonquihuachinara, co noyahuë' nipi. Ma'sona yonquihuachinara, ina chachin nonpi," itërin.

*Cato' pëirinsó'*  
(Mateo 7.24-27)

<sup>46</sup> Ina quëran itantarin:

"A'naquëma' 'Sinioro, Sinioro,' itapomaracohue', ¿onpoatonta' co natëramacohue'?  
<sup>47</sup> Na'aquëma' natanamacoso marë' huë'nama'. Natëhuatamaco, a'na quëmapi pochin nisarama'. <sup>48</sup> Inaso', natëricho quëran yapëirin. Yapëihuachina, noya yonquiaton, noya pëiaquë yonirin. Na'pitë' quënanahuaton, na'pitëquë chachin natëricho quëran pëirin. Pamatohuachina, opotopirinhue', co anotërinhuë'. Chini' niponahuë', co yatë'yatërinhuë'. <sup>49</sup> A'naquënso nipirinhue' yapëihuachina, co noya yonquirinhue'. Inotëquë tëranta' pëi'i, ta'ton, inaquë pëirin. Ina quëran pamatohuachina, chiniiri a'naroáchin të'yatërin. Ya'ipi noyá quiquirin. Inapochachin topinan natanpatamaco, co natëhuatamacohue', co cha'ësaramahuë'," itërin.

## 7

*Capitan piyapinën anoyatërinso'*  
(Mateo 8.5-13)

<sup>1</sup> Piyapi'sa' a'chintahuaton, Quisoso Capinaomoquë pa'nin. <sup>2</sup> Inaquë a'na Noma capitan ya'huërin. A'na piyapinën chiniquën canioton, yachiminin. Hua'anëni noya nosororin. <sup>3</sup> Quisoso canquirinso' natantahuaton, cotio ansiano'sa' amatërin. "Paatoma', Quisoso sha'huitonco' huë'in piyapinëhuë anoyachinco," itahuaton, a'parin.  
<sup>4-5</sup> Inapitaso Quisosoquë canconahuatona', itapona':

—Paso' capitan amatërinquën. Inaso' nisha piyapi niponahuë', nóya quëmapi. Nosororinpoa'. Inaora coriquinën quëran niyontona'huaiso pëi' ninin Yosë yonquica'huaiso marë'. Napoaton huëquë' piyapinën anoyatëquë', chiminpachin, itopi.

<sup>6-7</sup> Ina natanahuaton, inapitarë' pa'nin. Capitan pëinënquë ya'caritërahuaso', amiconënpitari nacapipi. Capitani a'parin Quisoso nontacaiso marë'. "Capitan nanan a'patërinquënso' sha'huichinquën. Naporin: 'Caso' Sinioro nontaponquën yapa'pirahuë'. Tapanato, co pa'nahuë'. Co caso' quëma pochin noyacohue'. Co pëinëhuëquë tëranta' ya'conamaso' ya'huërinhuë'. Topinan camaiquë' piyapinëhuë noyachin. <sup>8</sup> Canta' hua'anëhuë natërahuë. Capitanco ni'to, sontaro'sa' camaihuatëra, natërinaco. "Paco'," itohuatëra, pa'pi. "Huëco'," itohuatëra, huë'pi. Piyapinëhuëpitanta' camairahuë. "Sacatoco'," itohuatëra, sacatopi. Napoaton natëranquën, tënin capitan," itiipi.

<sup>9</sup> Quisoso natanahuaton, pa'yatërin. Ina quëran tahuërëtahuaton, piyapi'sa' itapon:

—¡Ma noya ina quëmapi natërinco paya! Nisha piyapi niponahuë', israiro'sa quëran noya noya natërinco. Napoaton ca nohuanto, apiramiachin piyapinën noyatarin, tënin.

<sup>10</sup> Napotohuachina, capitan amiconënpita ayancoantapi. Cania'pi nani noyatërin quënanconpi huachi.

*Hui'napi ananpitaantarinsó'*

<sup>11</sup> Ina quëran Quisoso Nainquë ca'tano'sanënpitarë' pa'nin. Na'a piyapi'sari imasapi. <sup>12</sup> Ninano ya'coanaquë ya'caritërahuaso', na'a ya'huëhuano'sa nacapipi. Chimipi pa'pitacaiso marë' quësapi. Hui'napi niponahuë', a'shin ayananpirin. A'shini imasarin. Inaíchín hua'huin nipirinhüë', chiminin. So'ionta' iráca ayarin ni'ton, sa'ahua paiya inaso'. <sup>13</sup> Ina quënanahuaton, Quisosori nosororin.

—Ama imoya na'nëquësohuë', itërin.

<sup>14</sup> Napotahuaton, chimipi acopiquë së'huaconin. Së'huarahuachina, quëparapisopita huanipi. Napohuachina, chimipi itapon:

—Huënsëquë' apia'hua, itërin.

<sup>15</sup> Napotohuachina, nanpiantarahuatón huënsërin. Ina quëran nonsarin. Quisosori a'shin itapon: “Ya'huëranquë imoya quëpaantaquë,” itërin. <sup>16</sup> Ina nicatora', ya'ipi piyapi'sa' pa'yanpi.

—¡Ma noyacha Tata Yosëso paya! Ma noya quëmapí a'patimarinpoa' pënëinpoaso marë'. Nani ma'sha nanitaparín, topi.

Ina quëran taantapi:

—Yosë co naniantërinpoahuë'. Catahuarinpoa huachi, topi.

<sup>17</sup> Ananpitaantarínso' ya'ipi Cotia parti nahuinin. Ya'ipiya natantopi.

### *Coansha Paotistari a'parinsopita*

*(Mateo 11.2-19)*

<sup>18-19</sup> Coansha imarinsopitaso', Quisoso naporínso' sha'huitonpi. Inaso' natanahuaton, yonquiárin. “Quisososo' Yosëri a'paimarinso' nimara. ¿Pahuanarin o'macaso' nica?” ta'ton, cato' imarinsopita a'parin Quisoso natanacaiso marë'. <sup>20</sup> Paatona quënanconpachinara, itapona':

—Coansha Paotista a'pairincoi natana'huainquënso marë'. ¿Quëmaso' Cristonquën? ¿Pahuanarin inaso' o'macaso' nica? Co nitotëraihuë'. Sha'huitocoi quiyanta' nitochii, itiipi.

<sup>21</sup> Naporo chachin na'a cania'piro'sa' ya'huapi, nisha nisha caniori maninsopita. Quisosori a'naroáchin anoyatërin. Sopairo'sari ahua'yantërinso'pita' huë'pachinara, sopairo'sa' a'patërin. Naporahuaton, ina nohuanton, somaraya nininsopitanta' ni'topi.

<sup>22</sup> —Ni'co' iyaro'sa'. Ca nohuanto, somaraya nininsopita ni'topi. Apiaro'santa' a'naroáchin anoyatërahuë. Noya iratopi. Chana caniori maninsopitanta' anoyatërahuë. Në'huëro'santa' në'huëpiso' inquitërahuë. Chiminpisopita ananpitaantarahuë. Notohuaro' piyapi'sa' co Yosë nohuitatonaraihuë' nosorotápirinahuë', noya nanan a'chintarahuë. Ya'ipi nani ni'nama', nani natanama'. Paatoma', Coansha sha'huitonco' no'tëquën nitochin. <sup>23</sup> Ya'ipi cancanëma quëran natëhuatamaco, noya cancantarama'. Co nisha nisha yonquiamacoso' ya'huërinhuë', itërin Quisosori.

<sup>24</sup> Ina natanahuatona', Coansha sha'huitapona' pa'pi. Nani paantahuachinara, Quisoso a'chiantarin. “Coansha yonquiato a'chinchinquëma'. I'hua inotëro parti ina nicapoma' pa'patamara, inaso Yosë marë chiniquën huanirin quënanconama'. Co piquira ihuani onororínso pochin niconinhüë'. <sup>25</sup> Co inaso ma'huano'sa pochin noyápiachin a'morinhüë'. Noyápiachin a'mopisopita, capa cancantacaisoráchin cancantopisopita, inapitaso' copirno pëiro'saquë ya'huëpi. Coanshaso nipirinhüë' co ina pochin nininhüë'. <sup>26</sup> Pënëntërinso' natanacaso marë' pa'nama'. Coansha tëhuëchachin nóya pënëntërin. Co topinan quëran pënëntërinhuë'. Yosëri chachin a'parin pënëntacaso marë'. <sup>27</sup> Iráca quiricanënuquë ninorin:

‘Co'huara a'pamayátërasënuquënhüë', comisionëhuë a'pararahüë.

Paaton, pënëntapon noya natanainënuquënso marë', itërin Yosëri hui'nin nontaton.

Coansha ninoton, naporin. <sup>28</sup> Iráca quëran huarë' na'a piyapi'sa' pënëntopirinahuë', Coanshaso' noya noya pënëntërin. Inaso noya pënëntopirinahuë', inso tëranta' imapachinaco, ina quëran noya noya nisarin. Yosë hua'anëntërinquë chachin ya'conarin, tënahüë,” itërin.

<sup>29</sup> Nani na'a piyapi'sari Coansha noya natanpi. Copirno marë' coriqui ma'patona'piro'santa' "Yosë noninso' no'tëquën pënëninpoa'," ta'tona', aporihuanpi. <sup>30</sup> Parisioro'saso nipirinhüë', co nohuantopihuë' Yosë nanamën natëcaiso'. Coansha no'tëquën pënëntopirinhüë', topinan quëran natanpi. Napoaton co aporihuanpihuë'. Cotio maistro'sarinta' co yanatëpihuë'.

<sup>31</sup> Naquëranchin Quisoso taantarín: "Iporaso' piyapi'sa' nisha nisha yonquipi. ¿Ma pochinta' niconpi? <sup>32</sup> Hua'huaro'sa pochín cancantopi, ténahuë. Hua'huaro'sa' cachiquë ya'nipihuachinara', a'naquën taponá: 'Huëco' pita pochín nicatëhua' ya'nipiahua', ta'tona', quinatopirinhüë', co a'napitaso' nohuantopihuë' nansacaiso'. Ina quëran tantapona': 'Inta nipachín, huëco', chimipi pa'pitopiso pochín nicatëhua' ya'nipiahua', nítantapi. A'naquën sëtatona' na'nërápírinahuë', co a'napitaso' nohuantopihuë' na'nëcaiso'. <sup>33</sup> Inapochachín ipora nisha nisha yonquirama'. Coansha Paotistaso' huëcapon, co aquëtë' cosharo' yonquirinhüë'. Co pi'píán tëranta' huino o'orinhüë'. Napopirinhüë', 'Sopai nohuanton, naporín,' toconama'. <sup>34</sup> Ina quëran caso' Yosë quëran quëmapico ni'to, coshatërahuë, o'orahuë. Ina marë' pinoramaco. 'Quisoso coshatárin. O'opatárin. Oshahuano'sarë' nipayarin,' toconama'. Nisha nisha yonquiconama'. <sup>35</sup> A'naquënso nipirinhüë', noya yonquiatona', Yosë natëapi. Pënëntërahuëso' natanahuatona', no'tëquën yonquiapi huachi," ténin Quisoso.

*Sanapi co noyahuë' yonquirinsopita naniantërinso'*

<sup>36</sup> Ina quëran a'na parisio quëmapiri Quisoso amatërin. "Pëinëhuëquë huëquë' coshatahua'," itërin. Itohuachina, pa'nin. Pëinënguë ya'conconahuaton, misaquë huënsëconin. <sup>37</sup> A'na sanapi natantahuaton, inaquë huë'nin. Inaso' oshahuana'pi itopiso'. Pimo hua'sai' potiria'huaquë quënin. <sup>38</sup> Quisoso ya'yoranconahuaton, oshanën marë' sëtaton na'nërin. Na'nëhuachina, na'nëinën quëran Quisoso nantëquën shipitërin. Ainën quëran amirantërahuaton, apinorantërin. Ina quëran pimo hua'saiquë pashirantëtërin. <sup>39</sup> Ina ni'sahuaton, pëi' hua'anëni co noyahuë' ni'nin. Inaora yonquinën quëran yonquirarin. "Quisoso pënëntona'pi naporini, iso sanapi nohuichitonhuë'. Oshahuan ni'ton, co së'huacaso' nohuanchitonhuë'," ténin yonquiaton. <sup>40</sup> Yonquirinso' nitotaton, Quisosori itërin:

—Iya Simon, pi'píán yasha'huitëranquën, itërin.

—Inta Maestro sha'huitoco, itërin inarinta.

<sup>41</sup> —Cato' quëmapi ya'huëpirinhüë'. Cato chachín patron nihiupi. A'naso' a'natërápo pasa tahuëri canarëso' nihuitërin. A'nanta' a'natërápo shonca tahuëri canarësoíchin nihuitërin. <sup>42</sup> Capa coriqui pahuërëtacaso' ni'ton, cato chachín nihuitopiso' ayatërin. Topinan ayatërin. ¿Insoarita' patronën na'con na'con nosoroarin? ¿Ma'ta' quëma yonquiran? itërin Quisosori.

<sup>43</sup> —Na'con na'con ayatërinsoari na'con na'con nosoroarin, topirahuë', ténin.

—Ina mini. No'tëquën yonquiran, ténin.

<sup>44</sup> Ina tosahuaton, sanapi tahuërëtahuaton, Simon itërin:

—Iso sanapi ni'quë'. Quëma pëinënguë ya'conpirahuë', co inachintërëhuaso' ninanhuë'. Co i'sha tëranta' quëtërancohuë' nipa'morantëcaso marë'. Iso sanapiso nipirinhüë' na'nëinën quëran pa'morantërinco. Ainën quëran amirantërinco. <sup>45</sup> Canquipirahuë', co apinorancohuë'. Iso sanapiso nipirinhüë' apinorantërinco. <sup>46</sup> Ni'toro'sa' huë'pachina, noya hua'saiquë pashimototacaso' ya'huëpirinhüë', quëmaso' co pashimototërancohuë'. Iso sanapiso nipirinhüë' nóya nícatonco, pimo hua'saiquë pashirantëtërinco. <sup>47</sup> Tëhuënhachín na'con oshahuanpirinhüë', oshanën inquitarahüë. Napoaton na'con na'con nosororinco, ténahuë. A'naquënso nipirinhüë', "Co aquëtë' oshahuanahuë'," ta'tona', co onpopinchín nosororincohuë', ténin.

<sup>48</sup> Ina quëran sanapi itapon:

—Oshanën imoya inquitëranquën huachi, itërin.

<sup>49</sup> A'napitaso' natanahuatona', ninontopi.

—¿Ma quëmapita' isoso'? ¿Oshanëna quëran huarë' inquitacaso' nanitërin ti? nitopi.

<sup>50</sup> Quisososo nipirinhüë' sanapi itantapon:

—Natëranco ni'ton, Yosë nicha'ërinquën. Noya paquë huachi, itërin.

## 8

### *Sanapi'sa' Quisoso catahuapiso'*

<sup>1</sup> Ina quëran nisha nisha ninanoquë Quisoso pa'nin a'chinapon. A'naquën pancana, a'naquën co pancanayahüë' niponahuë', inaquënta' paaton, noya nanan a'chinarin. “Yosë yahua'anëntërinquëma',” itëra'piarin. Shonca cato' ca'tano'sanënpitari imasapi. <sup>2</sup> A'naquën sanapi'santa' imasapi, canio quëran anoyatërin sopita. A'napitanta' sopairo'sari ya'coancantohuachinara hua'yantopirinhüë', nani anoyatërin. A'naso' Maria Mactarina itopi. Canchisë sopairo'sari ya'coancantopirinhüë', Quisosori inquitërin. <sup>3</sup> Coananta' imarin. Cosa sa'in inaso'. So'inso' ya'ipi Irotisë ma'shanënpita a'pairin. Sosananta' imarin. Inapita imatona', inahuara coriquinëna quëran cosharo' pa'anpi Quisoso, ca'tano'sanënpita, inapita coshatacaiso marë'.

### *Sha'tona'pi pochin nininso'*

*(Mateo 13.1-9; Marcos 4.1-9)*

<sup>4</sup> Nisha nisha ninano quëran huë'pi Quisoso natanacaiso marë'. Notohuaro' niyonton-pachinara, pënënto nanan sha'huitërin.

<sup>5</sup> —A'na quëmapa sha'tapon pa'nin. Tricoraya iminquë pa'sarayarin papotacaso marë'. Pa'sarayahuachina, a'naquën iraquë huarë' anotërin. Inaquë piyapi'sa' iratatona', i'natopi. Inairaro'santa' huë'sahuatona', pë'yaquipi. <sup>6</sup> A'naquën ya'pirinso' na'piroquë anotërin. Inaquë papotopirinhüë', shimënschin no'pa' ni'ton, ahuirin. <sup>7</sup> A'naquëonta' nahuanoquë anotërin. Inaquë papotopirinhüë', nahuano'santa' papotërin. A'shinahuatona, imotërin. Napoaton co nitërinhuë'. <sup>8</sup> A'naquënso nipirinhüë' noyaro'paquë anotërin. Inaquë noya papotërin. A'shinpachina, sha'nin quëran na'con na'con nitaton, pasa, pasa nitërin, itërin.

Ina quëran taantarin: —Huëratëhuanpatama', noya natanatomaco, yonquico', itërin Quisosori.

### *Pënënto nananquë a'chininso'*

*(Mateo 13.10-17; Marcos 4.10-12)*

<sup>9</sup> Napotohuachina, ca'tano'sanënpitari itapona': “Achin Maistro naporanso', co nitotëraihüë'. ¿Ma'ta' tapon naporan?” itopi. <sup>10</sup> “Yosë hua'anëntërinso' co a'napita nitotopihüë'. Canpitaso nipirinhüë' ya'ipiya a'chinchinquëma' Yosë nanamën no'tëquën nitotacamaso marë'. A'napitaso nipirinhüë' co ya'ipiya a'chintarahüë'. Pënënto nananquësáchin a'chintarahüë' ni'ton, natanaponaraihüë', co nitotapihüë'. Ma'sona ninahuësonta' nicaponaraihüë', co yonquiapihüë',” itërin.

### *Tricoraya tapon naporinso'*

*(Mateo 13.18-23; Marcos 4.13-20)*

<sup>11</sup> Ina quëran itaantarin: “Achin naporahuëso' iyaro'sa', a'chintanta'inquëma' nitotoco'. Yosë nanamën a'chinpatëhua', tricoraya pa'sarayapiso pochin ninëhua'.

<sup>12</sup> A'naquën piyapi'sa' ira pochin nipi. Yosë nanamën natanpirinhüë'. Inairaro'sari huëcapairinso pochin a'naroáchin sopai huë'nin. Yosë nanamën natanpiso' osëre'tiirin. Ama natëcaiso marëhuë' ananiantërin. Natëpi naporini, Yosëri cancanëna' anoyachitonhuë'. <sup>13</sup> A'naquëonta' na'piro pochin nipi. Yosë nanamën natanahuatona', a'naroáchin pa'yatatona', natëpirinhüë'. Co chiniquën cancantatonahuë', co natëmiatopihüë'. Ma'sha onpohuachinara, Yosë a'popi. <sup>14</sup> A'naquëonta' nahuano'sa' ya'huërinquë pochin nipi.

Yosë nanamën natanpirinahuë'. Isoro'paráchin yonquiatona', co nanamën yonquipihuë'. Coriquiráchin cancantopi. Nípa'yatacasoáchin yonquirapi. Nahuano'sari imotërinso pochin ma'sharáchin yonquiatona', Yosë nanamën naniantopi. Co huachi natëpihuë'. <sup>15</sup> A'naquën piyapi'saso nipirinhue' noyaro'pa pochin nipi. Yosë nanamën noya natanpi. Natanahuatona', noya cancantatona', natëtopi. No'tëquën yonquiatona', natëmiatopi. Ma'sha onpoaponaraihuë', co a'popihuë'. Ya'ipi cancanëna quëran imatona' noya noya nisapi," tënin.

*Nanparin pochin nininso'*  
(*Marcos 4.21-25*)

<sup>16</sup> Ina quëran a'chintaantarín:

“Nanparin i'chinpihuatera, co i'mëanaquë po'morëhuë'. Co pë'saraanaquë acorëhuë'. Nanparin aconanquë acorë' noya a'pinacaso marë'. Piyapi'sa' huë'pachinara, noya quënantopi. Inapochachin Yosë nanamën sha'huitahua' a'napitanta' nitochina'. <sup>17</sup> Iporaso' ma'sha noyá po'opinan pochin ni'ton, co insonta' nitotërinhuë'. A'na tahuëriso nipirinhue' ya'ipiya nitotapi.

<sup>18</sup> Napoaton noya natanco'. Noya natëhuatama', na'con na'con nitotarama. A'naquënso nipirinhue', 'Nani nitotërahuë', topirinhue', co yanatëpihuë' ni'ton, pi'pian tëranta' nitotopiso' Yosëri ananiantarin," itërin.

*Quisoso quëmopinënpita*  
(*Mateo 12.46-50; Marcos 3.31-35*)

<sup>19</sup> Ina quëran Quisoso a'shin, iinpita, inapita huë'pi. Quisoso yanontopirinhue', na'a piyapi'sa' yamopi ni'ton, co nanitopihuë' ya'conacaiso'. <sup>20</sup> Napoaton a'naquëni sha'huitërin.

—Ni'quë' Maistro. Mamaparin, iyaparinpita, inapita huëcatona', aipiran huaniapi. Yanontërinënuquën, itopirinhue', Quisososo' tapon:

<sup>21</sup> —Yosë natëpisopita iyahuëpita pochin ni'nahuë. Sanapi'santa' Yosë nanamën natëhuachina', mamahuë pochin ni'nahuë, itërin.

*Ihuan a'parinso'*  
(*Mateo 8.23-27; Marcos 4.35-41*)

<sup>22</sup> Ina quëran a'na tahuëri ca'tano'sanënpita itapon:

—Aquëtëran pa'ahua', itërin.

Potiquë ya'conahuatona', pëntonapi. <sup>23-24</sup> Quisososo' nipirinhue', huanconënuquë huë'ërarín. Paaquëya', panca ihuaní manín. Co'sacairi potinën opoto opototahuaton nani yamëntaitapirinhue', ca'tano'sanënpitari pa'yanatona', ochinanpi.

—¡Maistro, Maistro, chimiitarihua'! Catahuacoí, itopi.

Quisososo' huënsërahuaton, ihuan a'parín. Sononta' panca co'sacaitapirinhue', asanoirin. A'naroáchin copitënin.

<sup>25</sup> —¿Onpoatomata' co natëramacohuë? itërin. Inapitaso nipirinhue' pa'yanatona', ninontapi.

—¿Ma quëmapicha isoso' ni'ton, ihuan a'parín nicaya? Sononta' a'naroáchin asanoirin, nitopi.

*Sopairo'sari ya'coancantërinso'*  
(*Mateo 8.28-34; Marcos 5.1-20*)

<sup>26</sup> Ina quëran Cariria sono' aquëtëran canconpi, Quirasa parti itopiquë. <sup>27</sup> Quisoso nonshiconpachina, a'na quëmapiri nacapirin, na'a sopairo'sari ya'coancantërinso'. Ya'coancantopi ni'ton, co huachi yonquirinhue'. Hua'qui' co manta' a'morinhue'. Co huachi pëiquë ya'huërinhuë'. Na'pi naninquë chimipiro'sa' po'mopiquë ya'huárin. <sup>28-29</sup> Na'pochuachina catinaquë tanpaquën tonporahuatona', pa'onta' tonpotopirinhue', oshitërachinin. Sopai nohuanton, co piyapi ya'huërinquëhuë' ta'antarín. Quisoso



quënanahuaton, nantëntaquë isonquirahuaton, monshorarin. Napohuachina, Quisosori nosoroaton, a'naroáchin sopai itërin:

—Iso quëmapi quëran pipico huachi, itërin. Ina natanahuaton, chiníquën nonin.

—¿Ma'ta' yaonpotarancoi? Quëmaso' Quisosonquën. Yosë hui'ninquën. Yosë marë' ama aparisitocoisohuë', itërin.

<sup>30</sup> —¿Ma'ninquënta' quëmaso'? itërin.

—Na'a huaranca itërinacoi, topi.

Hua'huayatërahuë' sopairo'sari ya'coancantopi ni'ton, ina pochin ninihuanin.

<sup>31</sup> “Ama parisitopiquë a'pacoisohuë',” itantapi. <sup>32</sup> Ina ya'cariya na'a coshiro'sa' ya'huërin. Panënuquë coshatapi. “Coshiro'saquë tëranta' a'paco'i ya'coanta'ii,” itantapi. “Inta nipachin, inaquë ya'conco',” itërin. <sup>33</sup> Itohuachina, quëmapi quëran pipirahuatona', coshiro'saquë ya'conconpi. Inaquë ya'compachinara, coshiro'santa' hua'yantatona', a'naroáchin tahuan pa'topi. Panca sonoquë niitatona', inaquë chimiitopi.

<sup>34</sup> Ina ni'sahuatona', coshi a'paina'piro'saso' ta'api. Ninanoquë canconahuatona', sha'huiconpi. Ninano pirayan ya'huëpisopitanta' a'naya a'naya sha'huitëra'piapi. <sup>35</sup> Natanahuatona', “¿ma'ta' onpocaiso'?” ta'ona', pa'pi nicapona'. Canquirahuatona', quëmapi hua'qui' hua'yantërinso' quënanquipi. Iporaso' Quisoso ya'cariya huënsëarin. Nani a'moanahuaton, noya yonquirin huachi. Co huachi hua'yantërinhuë'. Ina nica-tona', pa'yanpi. <sup>36</sup> “Quisosori anoyatërin. Sopairo'sa' a'patahuaton, anoyatërin huachi. Co huachi hua'yantërinhuë',” topi ni'pisopitari. <sup>37</sup> Natanahuatona', ya'huëhuano'saso' pa'pi të'huatopi. Të'huatona', Quisoso itopi: “A'na parti paquë,” itopi. Itohuachinara, potiquë ya'coantarin. <sup>38</sup> Yapa'pachina, quëmapi achin hua'yantërinso' itërin: “Canta' imainquën, topirahuë',” itërin.

—Ama huëquësohuë'. <sup>39</sup> Ya'huëranquë paantaton, piyapi'sa' sha'huitonquë': “Yosë noyá anoyatërinco,” itëquë', itërin Quisosori.

Napotohuachina, pa'nin. Ya'ipi ninanonënuquë sha'huitëra'piarin. “Quisoso noyá anoyatërinco,” itëra'piarin.

*Sanapi anoyatahuaton, Cairo hui'nin ananpitaantarinso'*

*(Mateo 9.18-26; Marcos 5.21-43)*

<sup>40</sup> Quisoso aquëtëran pëntoantarahuaton, na'a piyapi'sa' quënanconin. Inaquë ninarapi ni'ton, canconpachina nóya nontopi. <sup>41</sup> Naporo' a'na cotio hua'an cairo itopiso huë'nin. Inaso' niyontonpiso pëi' hua'an ya'conin. Quisoso quënanquirahuaton, nantën pirayan isonquirin. “A'naroáchin Sinioro pëinëhuëquë huëquë'. <sup>42</sup> Hui'nahuë yachiminarin,” itiirin. A'naíchin hui'nin ya'huëtërinso' chiníquën caniorin. Shonca cato' pi'ipitërin. Napotohuachina, inarë' pa'nin. Na'a piyapi'sari imasapi ni'ton, Quisoso ya'quëëtërapí.

<sup>43</sup> Paaquëya', a'na sanapiri imaquiarin. Hua'qui' panca huënai' a'parárin. Nani shonca cato' pi'ipi co sanorinhuë'. Na'a notoro'sari nonënpirinahuë'. Ya'ipi coriqui i'quiaponahuë', co manta' noyatërinhuë'. <sup>44</sup> Quisoso pinën quëran huëcaton, a'morinso' huirotëínchin së'huaquirin. Së'huahuachina, a'naroáchin huënai' no'narin.

<sup>45</sup> —¿Inta' së'huarincos? tënin Quisoso. “Co carinquënso' së'huaranquënhuë',” topi ya'ipiya. —Ni'quëchi Maistro, notohuaro' piyapi'sa' ya'quëëtäpirinënuquënhuë': “¿Inta' së'huarincos?” ¿tënan ti? itërin Pitrori.

<sup>46</sup> —A'naso' natëtonco, së'huarincos. Së'huahuachincora, nitotërahuë. Ca nohuanto, noyatërin, tënin.

<sup>47</sup> “Nani nitotërin,” ta'ton, sanapi huë'nin. Pa'yanaton, ropa ropatëriarin. Isonquirahuaton, Quisoso itapon: “Hua'qui' caniorahuë ni'ton, së'huaranquën Sinioro. Së'huahuatënuquëra, a'naroáchin noyatërahuë,” tënin. Ya'ipi piyapi'sa' natanpi.

<sup>48</sup> —Natëranco ni'ton, nani imoya anoyatëranquën. Noya paquë huachi, itërin.

<sup>49</sup> Quisoso nonaquëya', a'na quëmapi Cairo pëinën quëran huë'nin.

—Hui'nan nani chiminin. Ama huachi Maistro apiquësohuë', itërin.

<sup>50</sup> Quisososo' natanaponahuë', itapon:

—Ama iyasha pa'yanquësohuë'. Natëco, hui'nan noyachin, itërin.

<sup>51</sup> Pëinënquë canconahuaton, ya'conconin. Pa'pin, a'shin, Pitro, Coansha, Santiago, inapitaichin quëparin. “Ama a'napitaso' huë'inasohuë',” tënin. <sup>52</sup> Na'a piyapi'sa' na'nëtona', ayanápi.

—Ama na'nëcosohuë'. Co sanapia'hua chimininhue'. Huë'ësárin, itërin Quisosori.

<sup>53</sup> —Co huë'ërinhuë'. Nani chiminin huachi, itatona', tëhuapi. <sup>54</sup> Quisososo nipirinhue' sanapia'hua maimirarahuatón:

—Huënsëquë', apia'hua, itërin.

<sup>55</sup> A'naroáchin nanopiantarahuatón, huanirin. “Nanon a'caco',” tënin Quisoso. <sup>56</sup> A'shin, pa'pin, inapita pa'yanpi. “Ma'pitacha nitotaton, ananpitaantaran paya,” itopirinhue', “Ama a'napita sha'huitocohuë',” itërin Quisosori.

## 9

### *A'chinacaso marë' a'parinso'*

*(Mateo 10.5-15; Marcos 6.7-13)*

<sup>1</sup> Shonca cato' quëmapi'sa' Quisosori nani huayonin na'con na'con a'chintacaso marë'. Ca'tano'sanënpita itopi. Ayontonahuaton, chiniquën nanan quëtërin sopairo'sa' a'pacaiso marë'. Ina nohuantón, nisha nisha caniori maninsopitanta' anoyatapi. <sup>2</sup> “Paatoma' iyaro'sa', piyapi'sa' a'chintonco'. ‘Yosë yahua'anëntarinquëma'. Huëntonënquë ya'conpatama', noya catahuarinquëma' itoco'. Cania'piro'santa' anoyatoco'. Carinquëma catahuaranquëma' anoyatacamaso marë',” itërin. <sup>3</sup> —Pa'patama', ama manta' quëpacosohuë'. Pitana, pë'pëto, pan, coriqui, inapita ama quëpacosohuë'. Ama a'moramaso tëranta' cato' quëpacosohuë'. <sup>4</sup> Inso pëiquësona yacapatohuatama', ina pëiquërächin ya'huëco'. Ina ninano quëran pipiamaquë huarë' inaquë ya'huëco'. <sup>5</sup> A'na ninanoquë pa'patama', “Ama isëquë huëcosohuë'. Co yanatanainquëmahuë',” itohuachinënuëma', patoco'. Yapa'patama', pënenco'. “Nani sha'huitopirainquëmahuë'. Co nohuantëramahuë' ni'ton, canpitaora tëhuënëmaquë nina'intarama',” itoco'. Ina quëran a'na parti paco', itërin Quisosori.

<sup>6</sup> Ina quëran ca'tano'sanënpitari pa'sahuatona', noya nanan a'china'piapi. Nisha nisha ninanoquë pënëna'piapi. Na'a cania'piro'sa' anoyatopi.

### *Coansha Paotista tëpapiso'*

*(Mateo 14.1-12; Marcos 6.14-29)*

<sup>7</sup> Napopiso' ya'ipi parti nahuinin. Cariria hua'an Irotisë itopisonta' natantërin. Natan-tahuaton, nisha nisha yonquirin. “¿Inta' Quisososo?” itohuachinara, “Coansha Paotista nanopiantarinso' nimara,” topi a'naquën. <sup>8</sup> “Co inahuë'. Iniasë ya'noantarinso' nimara,” topi a'naquëonta'. “Co inahuë'. A'na pënëntona'pi iráca chiminpirinhue', nanopiantarinso' ipora,” topi a'napitanta'.

<sup>9</sup> Ina natanaton, hua'ani itërin:

—Cari Coanshaso' atëpatërahue', nishitëconotopi. Ina quëmapiso nipirinhue', nani ma'sha nanitaparin, natantërahue'. ¿Inta' inaso' nimara? Canta' nohuichi, ta'ton ya'nipishahuë' yani'nin.

### *Cosharo' ana'atërinso'*

*(Mateo 14.13-21; Marcos 6.30-44; Juan 6.1-14)*

<sup>10</sup> Ca'tano'sanënpita huëantarahuatona', Quisoso sha'huitiipi. “Nani a'chinai. Cania'piro'santa' anoyatërai,” itiipi. Napotohuachinara: “Huëco' iyaro'sa' canpoara pa'ahua',” itërin Quisosori. Itohuachina, Pitsaitaquë pa'pi. <sup>11</sup> Na'a piyapi'sari natanahuatona', imapi. Canquihuachinara, Quisosori noya nontërin. Yosë hua'anëntërinquë ya'conacaiso' a'chintarin. Nani a'chintahuaton, cania'piro'sa' a'naroáchin anoyatërin.

<sup>12</sup> Nani i'huararahuasos', ca'tano'sanënpitari itiipi:

—Nani i'huarin. Co manta' isëquë ya'huërinhuë'. Piyapi'sa' a'paquë' pa'ina'. Isoshara'huaya ninanoro'sa', pëiro'sa', inapita ya'huërin. Inaquë cosharo' pa'anatona', ca'ina'. Naporahuatona', inaquë huë'ëpachina', itopi.

<sup>13</sup> —Canpitari a'caco', itërin Quisosori.

—Capa isëquë capacaso'. A'natërapoya pan, catoya sami, inaíchin ya'huëtërincoi. Notohuaro piyapi'sa' ya'huërin. Quiya pa'anahuato, ¿ina nápo' ya'pi a'ca'ii ti? itopi.

<sup>14</sup> A'natërápo huaranca pochin quëmapi'sa' ya'huëpi ni'ton, napopi. Ina quëran ca'tano'sanënpita itërin:

—Piyapi'sa' sha'huitoco' huënsë'ina'. A'natërápo shonca, a'natërápo shonca pochin huënsë'ina', itërin.

<sup>15</sup> Sha'huitohuachinara, ya'ipiya huënsëpi. <sup>16</sup> Nani huënsëhuachinara, Quisosori a'natërapoya pan, catoya sami, inapita ma'patërin. Inápaquë në'pëtahuaton, Yosë nontërin: “Yosparinquën, Tata,” itahuaton, pan, sami, inapita së'panahuaton, ca'tano'sanënpita quëtërin. “Piyapi'sa' quëtonco' ca'ina',” itërin. <sup>17</sup> Quëtohuachinara, ya'ipi piyapi'sa' coshatopi. Natëaquëhuarë' coshatopi. Ina quëran ca'tano'sanënpitari pë'sotopiso' masahuatona', shonca cato' i'më' amëntatopi.

### *Pitro natëtërinso'*

*(Mateo 16.13-19; Marcos 8.27-29)*

<sup>18</sup> A'na tahuëri Quisoso inaora pa'nin Yosë nontacaso marë'. Ca'tano'sanënpitaráchin inaquë ya'huëpi. Nani Yosë nontohuachina, Quisosori itërin:

—Nani ma'sha nanitaparahuë ni'to, ¿in pochinta' piyapi'sa' cancantiarinaco? itërin.

<sup>19</sup> —“Coansha Paotistaco' nanopiantarinso',” topi a'naquën. “Co inahuë'. Tata Iniasëco' nanopiantarinso',” topi a'naquëonta'. “Co inahuë'. A'na pënëntona'pi iráca chiminpirinhuë', nanopiantarinso' nimara,” topi a'napitanta', itopi.

<sup>20</sup> —Canpitaso nipirinhue' ¿ma'ta' yonquirama'? itërin Quisosori.

—Quëmaso' Cristo, Yosë a'paimarinquënso', itërin Pitrori.

### *Chiminacaso' ninorinso'*

*(Mateo 16.20-28; Marcos 8.30-9.1)*

<sup>21</sup> Pitrori napotopirinhue': “Ama inaso' ipora a'napita sha'huitocosohue',” itahuaton, sha'huitërin: <sup>22</sup> —Yosë quëran quëmapico niporahuë', na'con parisita'huaso' ya'huërin. Cotio ansiano'sa', corto hua'ano'sa', cotio maistro'sa', inapita co huachi quë'yaponacohue'. Tëpararinaco. Napoaponahuë', cara tahuëri quëran Yosë ananpitaantarinco, itërin.

<sup>23</sup> Ina quëran piyapi'sa' pënëantarin.

—Yaimapatamaco, canpitaora nohuantëramaso' naniantoco'. Yosë nohuantërinso'áchin imaco huachi. Corosëquë chiníquën parisitëre'. Canpitanta' parisitapomarahue', nani tahuëri imamiatoco. <sup>24</sup> Noya nanpicamasoáchin yonquihuatama', topinan quëran nanopiamama'. A'na tahuëri chiminatoma', parisitomiatarama'. Nipirinhue', casáchin yonquihuatamaco, parisitapomarahue', co topinan quëran nanopiamamahue'. Yosë'pa' nanopimiatarama'. <sup>25</sup> Ya'ipi ma'sha isoro'paquë canapiramahuë', co hua'yanëma' cha'ëpachinhue', co canamiataramahue'. ¿Onponta' pahuëretapiramahuë', co huachi hua'yanëma' nanitarinhue' cha'ëcaso'!

<sup>26</sup> Imapatamaco, tëhuaponënuëma'. Tapayatomaco a'pohuatamaco, a'na tahuëri carinquëmanta' a'poaranquëma'. Nanamëhuë a'pohuatama', carinquëmanta' o'mantahuato, a'poaranquëma'. Yosë quëran quëmapico ni'to, o'mantararahue'. Tata huënaratërinso pochin canta' huënaratarahuë. Noya anquëniro'sapitaro'co o'mantararahue'. <sup>27</sup> No'tëquën itaranquëma'. Yosë isoro'pa' hua'anëntapon. A'naquëma' co'huara chimiantërasënuëmahue', hua'anëntërinso' ni'sarama', itërin.

*Nisha pochin ya'norinso'*  
(Mateo 17.1-8; Marcos 9.2-8)

<sup>28</sup> Posa tahuëri quëran Quisoso motopiquë pa'nin. Pitro, Coansha, Santiaco, inapitaráchin quëparahuaton, Yosë nontacaso marë' pa'nin. <sup>29</sup> Yosë nontaso', nisha pochin ya'norin. A'morinsonta' huënaráchin huënaráchin ninin. Hui huiríchin. <sup>30-31</sup> A'nanaya Moisësë, Iniasë, inapita ya'nopi. Inahuanta' huënaráchin huënaráchin nipi. Quisosorë' ninontapi. “Quirosarinquë pa'pato, tëpararinaco,” itërin Quisosori. <sup>32</sup> Ca'tano'sanënpitaso nipirinhuë' huë'ëi' iquitatona', yahuë'ëpirinahuë'. Capayatantahuachinara, Quisoso huënaráchin nininso' quënanpi. Moisësë, Iniasë, inapitanta' quënanpi. <sup>33</sup> Inapitaso' yapanantahuachinara, Pitrori itapon:

—¡Ma noyacha Maestro isëquë huë'nëhua paya! Cara imënamëa'huaya nii, a'nara' quëma marë', a'nanta' Moisësë marë', a'nanta' Iniasë marë', topirahuë', itërin.

Co yonquiatonhuë', napotërin. <sup>34</sup> Napotaquëya', chitorori imotërin. Ya'ipiya imotërin ni'ton, pa'yanpi. <sup>35</sup> Chitoro' huancana quëran Yosëri nontërinso' natanpi. “Isoso' hui'nahuë huayonahuëso'. Ina natanco',” itërin.

<sup>36</sup> Nani nontohuachina, ni'sápirinahuë', co a'napita quënanpihuë'. Quisosoráchin quënanpi. Ina yonquiatona', co manta' topihuë'. Nani ni'pirinahuë', naporo tahuëri'sa' co insonta' sha'huitopihuë'.

*Hua'huasha hua'yantërinso'*  
(Mateo 17.14-21; Marcos 9.14-29)

<sup>37</sup> Tahuëririnquë motopi quëran nohuaraimantarahuatona', na'a piyapi'sa' quënanquimapi. Quisoso yonípona' huë'pi. <sup>38</sup> A'nariso' nontiiirin.

—Huëquë' Maestro, hui'nahuë nitiico. Inaíchin hui'nahuë nipirinhuë', <sup>39</sup> a'nanaya sopairi ya'coancantohuachina, “yai” tosahuaton no'paquë nitë'yatërin. Sa'po sa'po niconin. Pacororárin. Napoin quëran sopairi patohuachina, pa'pi iquirorin. <sup>40</sup> Ca'tano'sanënpita nontato: “Sopai inquitoco’,” itopirahuë', co nanitopihuë', itërin.

<sup>41</sup> —¡Ma'huantacha ninama paya! Canpitaso' co Yosë natëramahuë'. Co natan-tochináchinhuë' cancantërama'. Nani hua'qui' a'chintopiranquëmahuë', ¿onporo huarëta' yanatëramaco? tënahüë. Hui'nán quëshico, itërin Quisosori.

<sup>42</sup> Inaquë quëntapirinhuë', no'paquë sopairi ataatarin. Apacoroantarín. Quisosori ni'sahuaton, sopai itërin: “Hua'huasha tananpitëquë'. Pipimiatëquë huachi,” itërin. A'naroáchin sopai pipirin. Hua'huasha noyatërin huachi. “Pëinëinquë iyasha quëpantaquë',” itërin. <sup>43</sup> Ya'ipi piyapi'sari nicatona', pa'yanpi. “¡Ma noyacha Yosëri catahuarin ni'ton, sopai a'parin paya!” topi.

*Chiminacaso' ninoantarínso'*  
(Mateo 17.22-23; Marcos 9.30-32)

Ya'ipi piyapi'sari pa'yanatona', anoyatërinso' yonquirápirinahuë', ca'tano'sanënpita itantarín:

<sup>44</sup> —Noya natanco iyaro'sa'. Yosë quëran quëmapico niporahuë', a'na tahuëri sha'huirapihuachinco, piyapi'sa' masarinaco. Ina yonquiráco', itërin.

<sup>45</sup> Natanaponaraihuë', co nanitopihuë' natëtacaiso'. “¿Onpoatonta' ina pochin nontërinpoa'?” topi yonquinëna quëran. Naporahuaton, të'huatona' co nohuantopihuë' natanacaiso'.

*Chini chiníquën nanantërinso'*  
(Mateo 18.1-5; Marcos 9.33-37)

<sup>46</sup> Ina quëran ca'tano'sanënpita capini ninontatona', “¿Inquënpocha chini chiníquën nanantëre'pëhuaya?” nitopi. <sup>47</sup> Co natanaponahuë', inaora yonquinën quëran Quisoso nitotërin. Napoaton hua'huasha maimirarahuatón, ya'cariya ahuanirin.

<sup>48</sup> —Ama chiníquën nanantacamaso' yonquicosohuë'. Imaramaco ni'ton, hua'huasha nosorohuatama', nosoroaramaco canta'. Nosorohuatamaco, co casáchin nosoroarama-cohuë'. Yosënta' nosoroarama'. Inaso' isoro'paquë a'paimarinco. Hua'huaro'sa pochin cancantopisopita Yosëri noya noya ni'nin, itërin Quisosori.

*Pi'pian nisha imarinso'*  
(Marcos 9.38-40)

<sup>49</sup> A'na tahuëri Coanshari itapon:

—A'na quëmapi Maistro ni'nai. “Quisoso nanan quëtërinco,” ta'ton sopairo'sa' a'pararin. Inaso nipirinhüë', co quiya pochin imarinquënhüë' ni'ton, co nohuantëraihuë'. “Ama inapoquësöhuë’,” itërai, itërin.

<sup>50</sup> —Tananpitoco' sopai a'pa'in. Insosona co inimicotohuachinpoahuë', catahuarinpoa', itërin Quisosori.

*Santiago, Coansha inapita pënëninso'*

<sup>51</sup> Nani ya'caritëriarin Quisoso inápaquë panantacaso'. Napoaton “Onpopionta' Quirosarinquë pa'sarahuë huachi,” tënin. <sup>52</sup> Yapaaton, catoya'pi a'parin. “Paso' ninanoquë pa'i, topirahuë'. Paatoma', natantonco' huë'ëpataquëhua’,” itërin Quisosori. Inaquë Samaria piyapi'sa' ya'huëpi. <sup>53</sup> Natanahuatona', co Quisoso huëcacaso' nohuantopihuë'. Quirosarinquë pa'sarin ni'ton, co nohuantopihuë'. <sup>54</sup> Ina marë' Santiago, Coansha, inapita no'huitopi.

—¿Ma'ta' Siniro onpochii? Yosë nonchii inápa quëran pën a'paimaton isopita ahuiquichin topirahuë', itopi.

<sup>55</sup> Tahuëretahuaton: —Ama iyaro'sa' napocosohuë'. Tananpitoco', itërin. <sup>56</sup> Ina quëran a'na ninanoquë paantarin.

*Ya'ipi cancanën quëran imacaso' ya'huërinso'*  
(Mateo 8.19-22)

<sup>57</sup> Papon pochin a'na quëmapi nontiiirin:

—Canta' Siniro imainquën. Insëquësona pa'patan, canta' pa'i, topirahuë', itërin.

<sup>58</sup> —Sacai' imancoso', tënahuë. Ma'sha tananquë ya'huërinso'pita huë'ëshinantëna ya'huëtopi huë'ëcaiso marë'. Inairanta' pë'pëtën ya'huëtërin. Caso nipirinhüë' Yosë quëran quëmapi niporahuë', co pëi' ya'huëtërincohuë'. Pa'sápato, co ya'huëmiatërahuë', itërin.

<sup>59</sup> A'nanta' huë'pachina: —Imaquico, itopirinhüë'.

—Oshaquëran Siniro imainquën. Tatahuë nani noyá mashotërin. Chiminpachin, cari pa'pitarahuë. Ina quëran imainquën, topirahuë', itërin.

<sup>60</sup> —A'naquën co nohuantopihuë' imainacoso'. Chimipi pochin cancantopi. Inapitari pa'pichina', tënahuë. Quëmaso nipirinhüë', ca na'con na'con yonquiatonco Yosë yahua'anëntërinpoaso' sha'huiquë', itërin Quisosori.

<sup>61</sup> A'na quëmapi nontiiirin:

—A'na tahuëri Siniro imasaranquën, topirahuë'. Ipora quëmopinëhuëpita nontëri'i. Nani nontohuato imainquën, itopirinhüë', <sup>62</sup> Quisosori itërin:

—Ama iyasha, nisha nisha yonquiquësöhuë'. Ni'quë'. A'nëtohuatëra, noya nicatë' ahuëhuatëra, no'tëquën ahuë'rë'. Niquë notëtahuatë' ahuëhuatëraso', co noya ahuë'rëhuë'. Inapochachin nisha nisha yonquihuatama', co nanitaramahuë' Yosë hua'anëntërinso' no'tëquën imacamaso', itërin.

## 10

*Canchisë shonca catoya'pi a'parinso'*

<sup>1</sup> Ina quëran a'napitanta' sha'huitërin pënëntacaiso'. Canchisë shonca cato' quëmapi'sa' huayonahuaton, catoya catoya a'parin. Nisha nisha ninanoquë a'parin. Oshaquëran



ina ninanoro'saquë chachin pa'sarin ni'ton, inapita'ton a'parin pënëntacaiso marë'. Yapa'pachinara itapon:

<sup>2</sup> “Tëhuëenchachin iyaro'sa', isoro'pa' panca imin pochin ninin. Cayarinso' manëso pochachin piyapi'sa' manë' Yosë imacaiso marë'. Na'a piyapi'sa' ya'huëpirinahuë', caraíchin pënëntarin. Napoaton Yosë nontoco' a'napitanta' a'pa'in pënëchina'. Inaso' ya'ipiya hua'anëntarin. <sup>3</sup> Iporaso' a'paranquëma'. Ni'co'. Carniroa'huaro'sa' co nanitopi-huë' nia'paicaiso'. A'naroáchin tanan ni'niro'sari manin. A'naquën piyapi'sa' ni'niro'sa pochin cancantatona', no'huiponënuëma'. <sup>4</sup> Pa'patama', ama manta' quëpacosohuë'. Pë'pëto, coriqui, sapatë co inapita tëranta' quëpacaso' ya'huërinhuë'. Piyapi'sa' nacapi-huatama', ama hua'qui' nontocosohuë'. Manóton paco'. <sup>5</sup> A'na pëiquë canconpatama', hua'anën nontoco': 'Thuata iya. Yosë catahuainquëma', itoco'. <sup>6</sup> Noya nontohuachinënuëma', Yosëri catahuaarin mini. Co'so' noya nontohuachinënuëmahuë', co Yosëri catahuaarinhuë'. <sup>7</sup> Nohuantohuachinënuëma', ina pëinënuë yacahuaco'. A'cahuachinënuëma', ca'co'. O'shitohuachinënuëma', o'oco'. A'chintarama' ni'ton, topinan ca'co'. Ama nisha nisha pëiquë yaca yacapatërantacosohuë'. <sup>8</sup> A'na ninanoquë pa'patama', noya nontohuachinënuëma', inaquë a'chintoco'. Ma'sona a'cahuachinënuëma', ca'co'. <sup>9</sup> Cania'piro'sa' inaquë ya'huëhuachina', anoyatoco'. 'Iso tahuëri'sa' Yosë yahua'anëntarinquëma', itoco'. <sup>10</sup> A'naquën piyapi'saso nipirinhuë' co nohuantarinënuëmahuë'. Ina ninanoquë canconpatama', cachiquë paatoma', pënëntoco'. <sup>11</sup> 'Nani sha'huítopyirainquëmahuë'. Co nohuantëramahuë' ni'ton, canpitaora tëhuënëmaquë nina'intarama'. Co natëpiramahuë', Yosëso' yahua'anëntarinquëma', itoco'. <sup>12</sup> Ayaro' tahuëri nanihuachin, inapitaso' chiniquën parisitapi, ténahuë. Iráca Sotomaro'saso' pa'pi co noyahuë' nipi ni'ton, Yosëri chiniquën ana'intërin. Co natërinacosopitaso nipirinhuë', chini chiniquën ana'intarin huachi,' itërin.

*Nisha nisha ninanoquë ya'huëpisopita pënëninso'*  
(Mateo 11.20-24)

<sup>13</sup> Ina quëran Quisoso taantarín: “Corasinoquë, Pitsaitaquë inaquëpita ya'huëramaso', jma'huantacha nisarama paya! Na'con pënënpiranquëmahuë', co natëramacohuë'. Ina marë' parisitarama'. Tiroquë, Sitonquë, inaquëpitaso nipirinhuë' co pënëntërahuë'. Co inaquë cania'piro'sa' a'naroáchin anoyatërahuë'. Inaquë naporahuë naporini, oshanëna marë' sëtatona', sa'catën nininso' a'moitonahuë'. Huarianoquënta nipa'samototatona' co noyahuë' yonquipisopita nianchitonahuë'. <sup>14</sup> Napoaton iyaro'sa' ayaro' tahuëri nanihuachin, Yosë chini chiniquën ana'intarinquëma'. Tiroquëso', Sitonquëso', co onpopinchin ana'intarinhuë'. <sup>15</sup> Capinaomoquë ya'huëramasopitanta' co no'tëquën yonquiramahuë'. 'Noyacoi ni'toi, Yosë'pa' pa'sarai, ¿topiramahuë' ti? Co inatohua' pa'saramahuë'. Parisitopiquë tëhuëchinso' pa'miatarama huachi,' ténahuë,' itërin.

<sup>16</sup> Ina quëran yaa'parinsopita itaantarín:

“Iporaso' pënëntacamaso marë' a'pararanquëma'. Ca ya'huërenamëhuë pënëntarama'. Noya natanpachinquëma', natanarinaco canta'. Co'so' nohuantohuachinënuëmahuë', co canta' nohuantarinacohuë'. Co nohuantohuachinacohuë', co Yosënta' nohuantapihuë',” itërin Quisosori. Itohuachina, pa'pi huachi. Nisha nisha ninanoquë pënëntëra'piapi.

*A'parinsopita huëantapiso'*

<sup>17</sup> Nani pënëntohuachinara, canchisë shonca catoya'pi chachin nóya cancantatona', Quisosoquë huëantapi.

—Sopairo'santa' Sinioro nontërai. “Quisoso nanan quëtërincoi ni'ton, a'parainquën,” itohuatëira, pipipi, itopi.

<sup>18</sup> Napotohuachinara, Quisosori itërin;

—Sopai hua'an chachin iráca inápaquë ya'huëpirinhuë', Yosëri të'yatërin. O'cori pochin a'naroáchin anotërinso' ni'nahuë. <sup>19</sup> Nani nanan quëtëranquëma' canpitanta' sopai minsëcamaso marë'. Ca yonquiatomaco, sopairo'sa' nontohuatama', patarinquëma'. Ya'huan, yonpinca inapita i'natohuatama', co manta' onpotarinquëmahuë'. Ya'huan yaquëtërinposo pochin sopainta' yaacoringuëma'. Canpitariso nipirinhuë' minsëarama'. Co manta' nanitarinhuë' minsëinquëmaso'. <sup>20</sup> Sopairo'sa' a'papiramahuë', ama ina marëáchin noya cancantocosohuë'. Imaramaco ni'ton, Yosë'pa' pa'sarama'. Inatohua' nininëma' nani ninshitërinquëma'. Ina marë' tëhuënchinso' nóya cancantoco', itërin.

*Tata Yosë anitotërinpoaso'*  
(Mateo 11.25-27; 13.16-17)

<sup>21</sup> Naporo' Ispirito Santo nohuanton, Quisoso nóya cancantërin. Noya cancanta-ton, Yosë nontarin. “Ma noyacha, Tata, yonquiran paya. Quëmaso' chini chiniquën nanantëran. Inápaquë, isoro'paquë, ya'ipi parti hua'anëntaran. Quëma nohuanton, a'naquën nani ma'sha nitotaponaraihuë', co nanamën nitotopihuë'. ‘Quiyaora noya noya nitotarai,’ topiso marë', co nanamën anitotëranhuë'. Imarinacosopitaso nipirinhuë' catahuan. ‘Catahuaco Siniro co caora nanitërahuë’, itohuachinën, quëma nanamën chachin anitotëran. Ina marë' Tata, ‘Yosparinquën,’ itëranquën,” tënin, Yosë nontaton.

<sup>22</sup> Ina quëran a'parinsopita itantarin. “Tata Yosë nohuanton, chiniquën nanantërahuë. Ya'ipi nanamën anitotërinco piyapi'sa' a'chinta'huaso marë'. Hui'ninco ni'to, tatahuësáchin noyá nohuitërinco. Inapochachin canta' Tata Yosë nohuitërahuë. Casáchin noyá nohuitërahuë. A'naquën piyapi'santa' caora nohuanto, anohuitërahuë. Inapitanta' Yosë nohuitapi huachi,” itërin.

<sup>23</sup> Nani a'chintohuachina, ca'tano'sanënpita amasha quëparahuaton, sha'huitërin: “Isoro'paquë o'mato, nani ma'sha ninahuë. Ma noya Yosë nosororinguëma' ni'ton, ni'nama'. <sup>24</sup> Iráca quëran huarë' na'a copirnoros'a', pënëntona'piros'a', inapita ni'namasopita yani'pirinahuë', co ni'pihuë'. A'chintëranquëmasopitanta' yanatanpirinahuë', co natanpihuë’,” itërin.

*Nosorotona'pi naporinso'*

<sup>25</sup> Ina quëran a'na maistro iráca nanan noya nitotërinso' huanirahuaton, Quisoso ténicaso marë' itapon:

—¿Ma'ta' Maistro onpo'i nanpimiata'huaso marë'? itërin.

<sup>26</sup> —Iráca Yosë quiricanën quëran ninshitaton, pënëninpoa'. ¿Ma'ta' tënin? itërin.

<sup>27</sup> —“Tata Yosë hua'anëntërinpoa'. Ina nosoroco'. Ya'ipi cancanëma quëran, ya'ipi hua'yanëma quëran, ya'ipi chinirama quëran, ya'ipi yonquinëma quëran, ya'ipi inaquëranpita nosoromiatoco'. Isonta' Yosë nohuantërin: Quëmaora ninosororanso pochachin a'napitanta' nosoroco’,” tënin, itërin.

<sup>28</sup> —No'tëquën naporan. Ina pochin nipatan, Yosë pochin cancantaton, nanpimiataran huachi, itërin Quisosori.

<sup>29</sup> —Ina nitotaporahuë', ¿ma'ta' onpo'i? ¿Inpitaquë huarëta' nosoro'i? itaantarin.

<sup>30</sup> —Inta nipachin a'chinchinquën. A'na cotio quëmapi Quirosaringuë ya'huërin. A'na tahuëri Quiricoquë pa'sapirinhuë'. Paaso', tëpatoro'sari mapi. Ahuëatona', ihuapi. Ai'nanpiratopi. Yachimiánin patopi. <sup>31</sup> Ina quëran cotio corto hua'an ina ira chachin pa'tapirinhuë'. Quëmapi quënanconaponahuë', pëshonanpirahuaton na'huëtërin. <sup>32</sup> Ina piquëran a'na quëmapi' pa'sarin. Inaso' Nihui huënton quëmapi ni'ton, corto hua'an catahuaninso'. Inarinta' quënanconaponahuë', inapotaantarin. <sup>33</sup> Ina quëran Samaria quëmapi'rinta' quënancoantarin. Inaso' nisha quëmapi niponahuë', nosororin. <sup>34</sup> Ya'cariconahuaton, catahuanin. Pë'shapiso' tomaquë, huinoquë, inaquëpita pashitërin. Inapotahuaton tonpotërin. Ina quëran inaora moranënuquë acorahuaton, huë'ëpatacasos pëiquë quëparin. Inaquë a'pairin. <sup>35</sup> Tahuëriringuë catotë' coriqui prata quëran nininso'

pëi' hua'anën quëtërin. “Paso' ninanoquë pa'sarahuë. Quëmari a'paiquë'. Coriqui pahuanpachin, quëmaora coriquinën castaquë'. Huënantahuato, i'huërchinquën,” itërin.  
<sup>36</sup> Ni'quë' iyasha. Caraya'piri ahuëpiso' quënanconpi. ¿Insoarita' iin pochin nosororin? itërin Quisosori.

<sup>37</sup> —Nisha piyapiri nosororinso', tënin.

—Ina mini. Paaton, quëmarinta' inapochachin nosoroquë', itërin.

### *Marta, Maria, inapita napopiso'*

<sup>38</sup> Ina quëran paantahuaton, a'na ninanoquë canconin. Inaquë Marta ya'huërin:

—Huëquë' Siniro ni'quicoi, itohuachina, ya'conapatërin. <sup>39</sup> Martaso' cain ya'huëtërin, Maria itopiso'. Quisoso huë'pachina, ya'cariya huënsëquirin. A'chininso' noya natanarin.

<sup>40</sup> Martaso nipirinhüë' cosharo nicaton sacatárin. Nisha nisha yonquiaton, Quisoso huëcapairin:

—Caihuë Siniro topinan huënsëárin. Caora cosharo' nisarahuë. Sha'huitëquë' catahuainco, itërin.

<sup>41</sup> —Imoya. Nisha nisha ma'sha yonquiaton, co noya cancantëranhuë'. <sup>42</sup> Casáchin natancoso' na'con na'con nohuantërahuë. Mariaso' natanatonco, noya noya nisarin. Na'con yonquirinco ni'ton, noya cancantomiatarin tënahüë, itërin Quisosori.

## 11

### *Yosë nontacaso' a'chininso'* *(Mateo 6.9-15; 7.7-11)*

<sup>1</sup> A'na tahuëri Quisoso Yosë nontárin. Nani nontohuachina, ca'tano'sanëni itërin:

—A'chintocoi Siniro Yosë nonta'huaiso'. Coanshaso' imarinsopita a'chintërin. Quiyanta' a'chintocoi nitochii, itërin.

<sup>2</sup> —Inta nipachin a'chinchinquëma'. Yosë yanontohuatama', iso pochin nontoco': “Tata Yosë, quëmasáchin noya noyanquën ni'ton, ya'ipi piyapi'sa' chinochinënquën. Chini chiníquën nanantëran ni'ton, ya'ipicoi natëiinquën.

<sup>3</sup> Nani tahuëri catahuacoi cosharo' ya'huëchincoi.

<sup>4</sup> Co noyahuë' nicatoi, oshahuanai. Nosoroatoncoi, oshanëhuëi inquitocoi. A'napita ma'sha onpotohuachincoi, nanan anoyatëraiso pochachin oshanëhuëi inquitatoncoi anoyacancantocoi.

Co noyahuë' yonquihuatoi, catahuacoi a'naroáchin nanianchii,” itoco', Yosë nontohuatama', tënin.

<sup>5</sup> Ina quëran a'chintantarin.

—Ni'co' iyaro'sa'. Ni'toro'sa' huë'pachinara, capa a'cacaso' nipachina, a'na piyapi pëinënquë pa'në'. Yono tashi' nipirinhüë', ma'sha nitonë'. “Cara pan quëtoco iyasha.

<sup>6</sup> Nipayaraiso' huë'pirinhüë', co manta' a'ca'huaso' ya'huëtërincohuë',” tënë'. <sup>7</sup> Yono tashi' ni'ton, co nohuantaponhuë' nimara. “Paquë' iyasha. Nani ya'coana oncotërahuë. Hui'nahuëpitanta' huë'ësápi. Co nanitërahuë' quëta'huanquënso',” tapon nimara.

<sup>8</sup> Nipayarinso' niponahuë', co nohuantopirionta', naquëranchin naquëranchin nitantahuachina, huënsëintarahuaton, quëtapon. <sup>9</sup> Napoaton Yosë na'con nontoco'.

Pahuantërinquëmaso' nipatama', quëtarinquëma'. Ma'sha yonirëso pochin cancantatoma', nontáco' catahuainquëma'. Ya'coana pi'nirëso pochin cancantatoma', nontoco' aya'coinquëma' <sup>10</sup> Tëhuëenchachin ma'sha nitohuatama', quëtarinquëma'. Hua'qui' ma'sha yonípatama', quënanarama'. Ya'coana pi'nirëso pochin nipatama', i'soatarinquëma'.

<sup>11</sup> “Hui'nama' tanaton, ‘Sami nayahüë,’ itohuachinquëma', co ya'huan quëtaramahuë'. Co insonta' nohuantërinhuë' hui'nin inapotacaso'. <sup>12</sup> Ataricayonta' natanpachinquëma', co yonpinca quëtaramahuë'. Noya cosharo' quëtarama'. <sup>13</sup> Canpitaso' co noyahuë' yonquiapomarahüë', hui'nama' nosororama'. Noya ma'sha quëtërama'.

Yosëso' noya noya ni'ton, na'con na'con nosororinquëma'. Inápaquë ya'huapona'huë',

hui'ninpita pochin ni'ninquëma'. Nontohuatama', 'Ispirito Santo aya'coancantoco,' itohuatama', aya'coancantarinquëma',” itërin.

*Sopai hua'an minsërinso'*

*(Mateo 12.22-30; Marcos 3.19-27)*

<sup>14</sup> Ina quëran a'na quëmapi huë'nin. Sopairi ya'coancantërin ni'ton, co nanitërinhuë' nonacaso'. Quisosori quënanahuaton, sopai a'patërin. Nani a'patohuachina, noya nonin huachi. Piyapi'sari nicatona', pa'yanpi. “¡Ma noyacha ni'ton, a'naroáchin sopai a'parin paya!” topi. <sup>15</sup> A'naquënso nipirinhue' nisha yonquipi. “Sopairo'sa' hua'anën Piirsipo itopisoari catahuarin ni'ton, nanitaparín sopai a'pacaso',” toconpi.

<sup>16</sup> A'napitarinta' Quisoso itapona': “Yosë pochin niquë' ni'iinquën,” itonpi. Tënicaiso marë' napotopi. <sup>17-18</sup> Quisososo nipirinhue' yonquipiso' nitotaton, itërin:

“Co Satanase' catahuarincohuë' sopairo'sa' a'paca'huaso'. Inaso' sopairo'sa' hua'anën ni'ton, co sopairo'sa' no'huirinhue'. Nino'huipi naporini, co huachi hua'anëna nicacaso nanichitonhuë'. Ni'co'. Ninanoquë ya'huëpisopita nino'huipi naporini, yanquë'itonahuë'. Quëmopinëna capininta' nino'huipi naporini, yanquë'itonahuë'.

<sup>19</sup> A'naquën a'chintëramasoarinta' sopairo'sa' yaa'papi. Piirsipo catahuarinco tënama' ni'quëhuarë', inapitanta' inari catahuarin. Napoaton inapita natanpatama', co no'tëquën yonquiatomahuë' naporamaso sha'huitarinquëma'. <sup>20</sup> Caso nipirinhue', Yosë catahuarinco sopairo'sa' a'paca'huaso'. Ina nohuanton, a'parahuë. Napoaton Yosë chachin a'paimarinco hua'anënta'huanquëmaso marë', tënhuë.

<sup>21</sup> Quëmapi chiníquën nipachina, pëinën noya a'pairin. Sahuëni, shonqui, inapita ya'huëtërin ni'ton, co insonta' nanitërinhuë' ma'shanënpita ihuacaso'. <sup>22</sup> A'naso nipirinhue' ina quëran chini chiníquën ni'ton, huëcapairahuaton minsërin. Sahuëni, shonqui, inapita matahuaton, ma'shanënpitanta' quiquitërin.

<sup>23</sup> Insosona co imapachincohuë', inimicotarinco. Co catahuahuachincohuë', piyapi'sa' anishacancantarin ama Yosë imacaiso marëhuë',” itërin.

*Sopairi ya'coancantaantarinsó'*

*(Mateo 12.43-45)*

<sup>24</sup> Naquëranchin a'chiantaton, itaantapon:

“A'na quëmapi ya'huërin. Sopairi ya'coancantopirinhue', ina quëran pipirin. Pipihuachina, inotëro parti pa'sárin. Insëquësona ya'huëcaso marë' yonisapirinhue', co quënaninhue'. Napoaton ina quëmapiquë chachin huëantarín. <sup>25</sup> Inaso' co Yosë yonquiatonhuë', topinan ya'huárin quënanquiantarin. Noya ya'huëantachinachin ni'ton, yaya'coancantantarin. <sup>26</sup> Napoaton paantarahuaton, canchisë sopairo'sa' aquë aquëtë' co noyahuë' nipisopita maantarin. Posa sopairo'sari chachin quëmapi ya'coancantantapi. Inaquë ya'huápi. Quëmapi aquë aquëtë' co noyahuë' yonquirin huachi,” itërin.

*Noya cancantopisopita*

<sup>27</sup> Na'a piyapi'sa' natanapi. A'na sanapiso' natanahuaton, itërin:

—Ma noya a'chintërancoi. Mamaparinquën hua'huarinquën ni'ton, ma noya Yosëri ni'nin. ¡Aso'sorinquën ni'ton, nóya cancanchin! tënhuë, tënin chiníquën nonaton.

<sup>28</sup> Inaso napopirinhue', Quisosori itapon:

—Yosë nanamën natanahuatona natëpisopita tëhuënchinsó', noya noya cancantapona' tënhuë, itërin.

*Yosë pochin nicacaso' nohuantopiso'*

*(Mateo 12.38-42; Marcos 8.12)*

<sup>29</sup> Na'con na'con piyapi'sa' huë'pachinara, itantarin: “Iporaso' na'a piyapi'sa' co noyahuë' yonquipi. ‘Yosë pochin niquë' ni'iinquën. Ina ni'patoi natëarainquën,' itopirínacohue', co Yosë nohuantërinhuë' ina pochin nica'huaso'. Isoíchin anitotaranquëma'.

A'na tahuëri Conasë naporinso pochin nisarahuë. <sup>30</sup> Ninihuiquë ya'huëpisopita co noyahuë' nipachinara, Yosëri a'parin pënënacaso marë'. Canta' Yosë quëran quëmapico ni'to, pënënaranguëma' Yosë ayonquianta'huanquëmaso marë'. <sup>31-32</sup> Ayaro' tahuëri nanihuachin, Ninihuiquë ya'huëpisopita sha'huirapiarinënguëma'. 'Conasë pënënpachincoi, oshanëhuëi marë' sëtërai. Ina naniantatoi, Yosë yonquirai. Canpitaso nipirinuë' noya noya nininso' natanpiramahuë', co natëtëramahuë'. Napoaton na'con na'con oshahuanama', itarinënguëma'. Inapochachin Saromon hua'anëntohuachina, Sor parti quëran sanapi copirno huë'nin ina natanacaso marë'. 'Ya'ipi nitotërin,' ta'ton, natanapon huë'nin. Napoaton ayaro' tahuëri inanta' atapanarinquëma'. Saromon quëran caso' na'con na'con nitotopirahuë', co yanatëramacohuë'. 'Ina marë' na'con na'con oshahuanama', itarinënguëma', itërin.

*A'pininso pochin nininso'*  
(Mateo 5.15; 6.22-23)

<sup>33</sup> "Nanparin i'chinpihuatëra, co ma'sha acohuana po'orëhuë'. Co i'mëanaquë po'morëhuë'. Nanparin aconanquë acorë'. Ina quëran piyapi'sa' huë'pachina', noya quënantopi. <sup>34</sup> Ya'piranpo' nanparin pochin ninin. Ina quëran ma'sha quënanë'. Noya ya'piranpo' nipachina, noya quënantërë'. Ya'piranpo' co noyahuë' nipachina, co noya quënantërëhuë'. Inapochachin noya yonquihuatëra, noya cancantërë'. Co noyahuë' yonquihuatëra, tashi pochin cancantërë'. <sup>35</sup> Napoaton, ni'cona tashi pochin cancantotama'. No'tëquën a'chintopiranquëmahuë', co noya natanpatamahuë', tashi pochin cancantarama'. <sup>36</sup> Noyasáchin yonquihuatama', co tashi pochin cancantaramahuë'. Nanparin noya orotërinso pochin nisarama'. Noyápiachin cancantarama', itërin.

*Parisioro'sa', cotio maistro'sa', inapita pënëninso'*  
(Mateo 23.1-36; Marcos 12.38-40; Lucas 20.45-47)

<sup>37</sup> Nani a'chintohuachina, a'na Parisiori amatërin coshatacaso marë'. Ina pëinëncuë pa'sahuaton, coshatacaso marë' huënsërin. <sup>38</sup> Parisioro'saso' yacoshatohuachinara, i'shaquë pi'pian niopimiratopi. "Inapohuatëhua', oshanënpoa' inquirarëhua'," topi. Quisososo nipirinuë' yacoshatohuachina, co ina pochin nininhuë'. Ina marë' pëi' hua'anën pa'yanin. "¿Onpoatonta' topinan coshatarin?" ta'ton, yonquirarin. <sup>39</sup> Yonquirinso' Quisosori ninoton, itërin:

—Canpitaso' aipi quënanamasoráchin yonquipiramahuë', Yosëso' acopo' cancanëma quëran yonquiramasopita ni'nin. Ni'co'. A'naquën minë', sënan, inapita pa'mohuachinara, pinënáchin pa'mopipi. Acoposo nipirinuë' në'huënantëtërin. Inapochachin canpitaso' cancanëma quëran co noyahuë' yonquirama'. Piyapi'sa' nonpintatoma', yaihuarama'. Pa'pi co noyahuë' cancantërama'. <sup>40</sup> Co no'tëquën yonquiramahuë'. Co nonënpóáchin Yosë acotërinpoahuë'. Cancanënpóanta' acotërinpoa'. <sup>41</sup> Cancanëma quëran huarë' sa'ahuario'sa' catahuaco'. Nosorohuatama', noyápiachin cancantarama'.

<sup>42</sup> "Parisioro'sanquëma', jma'huantacha canpitaso' nisarama paya! 'Nani ma'sha canarëhua quëran, diesmo Yosë quëtacaso' ya'huërin,' itërinpoa' Moisésë. Ina natëpiramahuë', co noya ninamahuë'. Nani ma'sha sha'nama quëran, diesmo quëtërama'. Ya'ipi cosharo' apimotacaso marë' sha'namaso manama quëran huarë', diesmo quëtërama'. Napoaponahuë', co Yosë nosororamahuë'. Piyapi'santa' yanonpintërama'. Ina marë' Yosë ana'intarinquëma'. Diesmo Yosë quëtacaso' noya nipirinuë', nosorocaso' na'con na'con nohuantërin.

<sup>43</sup> Parisioro'sanquëma', jma'huantacha canpitaso' nisarama paya! Niyontonpiso pëiquënta' piyapi'sa' nocanama'. Hua'ano'sapitarë'quëma' yahuënsëconama'. 'Ma noyacha canpitaso' nitotërama', itohuachinënguëmara, pa'yatërama'. Cachiquë pa'patamara: 'Huë'cama maistro,' itohuachinënguëmara, pa'yatërama'.



<sup>44</sup> ¡Ma'huantacha canpitaso' nisarama paya! Chimipi pa'pitopiso pochin niconama'. Co corosë acotohuachinarahuë', acopo' co nishinahuën' nisarinsö co nitotatonaraihuë', piyapi'sari i'natopi," itërin Quisosori parisioro'sa' nontaton.

<sup>45</sup> A'na cotio maistrori natanahuaton, no'huirin.

—Ina pochin pënëntaton Maistro, quiyanta' anatantarancoi, itërin.

<sup>46</sup> Napotohuachina, cotio maistro'santa' pënënaton, itapon:

—¡Ma'huantacha canpitanta' nisarama paya! Na'con piyapi'sa' pënëpiramahuë', nani ma'sha natëcaiso' sha'huitërama' ni'ton, panca pë'pëtërëso pochin ninatanpi. A'chintopiramahuë', co pi'pisha tëranta' catahuaramahuë' natëcaiso'.

<sup>47</sup> “Íraca pënëntona'piro'sa' pënëntopirinahuë', canpita shimashonëmapitari co natëtonaraihuë', tëpapi. Canpitanta' pa'pitopiso' pëirapipiramahuë', co natëramahuë'. Ina marë' canpitanta' Yosë ana'intarinquëma' ni'ton, ¡ma'huantacha nisarama paya!

<sup>48</sup> Shimashonëma pochin cancantatoma', inapitari tëpatona pa'pitopiso', canpitari topinan quëran pëirapirama'. Co natëramahuë'.

<sup>49</sup> Yosë no'tëquën ninorinquëma'. Íraca chachin naporin: ‘Na'a quëmapi'sa' a'pararahuë pënëinëinquëmaso marë'. A'chintapirinëinquëmahuë', no'huitoma', ahuëarama'. A'naquën tëpaarama', itërinquëma'. <sup>50-51</sup> Isoro'pa' ninin quëran huarë' noya quëmapi'sa' pënëntopirinahuë', na'a tëpapi. Apiri'ton noya quëmapi nipirinahuë', iini tëparin. Ina piquëran a'naya a'naya noya pënëntopirinahuë', tëpara'piapi. Na'a pi'ipi napopi. Napoin quëran Sacariasë tëpapi anta'. Yosë chinotopiso pëiquë chachin tëpapi. Canpitaso nipirinahuë' ina nitotapomarahuë', co natantochináchinhuë' cancantërama'. Napoaton Yosë na'con na'con ana'intarinquëma'.

<sup>52</sup> ¡Ma'huantacha cotio maistro'sanquëma' nisarama paya! Niahui osërëtërëso pochin co Yosë nanamën no'tëquën a'chintëramahuë' ni'ton, piyapi'sa' co Yosë nohuitopihuë'. Co canpita tëranta' Yosë huëntonëinquë ya'conamahuë'. A'napitanta' yaya'conpirinahuë', co nohuantëramahuë'. Ina marë' Yosë ana'intarinquëma'," itërin Quisosori.

<sup>53</sup> Nani tonitohuachina, parisioro'sa', cotio maistro'sa', inapitaso' chiníquën no'huitopi. No'huitatona', nisha nisha Quisoso natanpi atëhuëcaiso marë'. <sup>54</sup> “Co no'tëquën nonpachinhuë', sha'huirapiahua'," nitopi.

## 12

### *Parisioro'sa' yanonpinpiso'*

<sup>1</sup> Hua'huayatërahuë' piyapi'sa' niyontonpi Quisoso natanacaiso marë'. Na'a huaranca yamorapi ni'ton, niya'quëtapi. Ca'tano'sanënpita a'chintaton, itapon: “Tëhuënchachin iyaro'sa', parisioro'sa' yanonpinpi. Napoaton a'chinpiso', pan ahuëpocatërinso pochin niconaton a'naroáchin piyapi'sa' yanonpintopi. Ni'cona nonpintochinëinquëma'.

<sup>2</sup> A'naquën po'oana quëran ma'sha nipi. Ma'sha po'orëso pochin nipirinahuënta', a'na tahuëriso' ya'ipi piyapi'sari nitotapi. <sup>3</sup> Tashi' napopiramahuë', naporamaso' tahuëri anitotapi. Pëi' acoana nisacarotopiramahuë', a'na tahuëriso', naporamaso' a'ninquëchin sha'huitapi. Ya'ipi piyapi'sa' nitotapi huachi," tënin.

### *Yosë të'huatacaso' ya'huërinso'*

#### *(Mateo 10.28-31)*

<sup>4</sup> Ina quëran itaantarin: “Ama iyaro'sa', piyapi'sa' të'huatocosohuë'. Tëpaporinëinquëmaonta', co hua'yanëma' matarinëinquëmahuë'. <sup>5</sup> Yosë tëhuënchinsö' të'huatacaso' ya'huërin, tënahuë. Co noyahuë' nipatama', Yosë hua'yanëma' matahuatëinquëma', parisitopiquë a'pamiatarinquëma'. Napoaton ina na'con na'con të'huatoco'. Co piyapi'sa' të'huatacaso' ya'huërinhuë'.

<sup>6-7</sup> Yosëso' a'pairinquëma'. Ni'co'. Inairaro'sa' co pa'tonhuë'. A'natërápo nipirinhuë', catotë' coriquia'huaíchin pa'tërin. Napoaponahuë', co a'naya tëranta' Yosëri naniantërinhuë'. Canpitaso' na'con na'con yonquirinquëma'. Noya noya a'pairinquëma'.

Noyá nohuitërinquëma'. Ainëma' hua'huayátërahuë nipirinhüë', ya'ipi pichirin. Napoaton ama të'huacosohüë'. Ni'sárinquëma', itërin.

*Quisocriso imarëhuaso' sha'huicaso' ya'huërinso'*  
(Mateo 10.32-33; 12.32; 10.19-20)

<sup>8</sup> Ina quëran taantarín: “Tëhuëenchachin iyaro'sa', 'Quisoso imarahuë', topatama', ayaro' tahuëri canta' nohuantaranquëma'. 'Imarínco mini,' itarahuë Yosë'pa'. Anquëniro'santa' natanapi. <sup>9</sup> Nipirinhüë', Yosë quëran quëmapico nipirahuë' a'pohuatamaco, carinquëmanta' a'poaranquëma'. 'Co nohuitërinacohüë', itarahuë. Anquëniro'santa' natanapi.

<sup>10</sup> A'naquën no'huitonaco, pinorínaco. Ina quëran oshanëna marë' sëtohuachina', Yosëri oshanëna' inquitarin. Nipirinhüë' Ispirito Santo pinotona' oshahuanpiso', co onporonta' inquitarinhuë'.

<sup>11</sup> A'na tahuëri mapachinëinquëma', cotio niyontonpiso pëiquë quëparinëinquëma'. Hua'ano'sa', coisëro'sa', inapitaquë sha'huirapihuachinëinquëma', '¿Ma'cha tonopocoya?' ama tocosohüë'. <sup>12</sup> Naporo' Ispirito Santo catahuaarinquëma' noya a'panitacamaso', itërin Quisosori.

*Nani ma'sha nohuantopiso'*

<sup>13</sup> Na'a piyapi'sa' natanaso', a'nari huëcapairin.

—Maistro, tatahuë nani chiminín. Nani ma'sha ya'huëtopirinhüë', patërin. Iyahuëso' nipirinhüë' apiratërinco. Co nohuantërinhuë' patomatiincoso'. Sha'huitëquë' patomachinco, itërin.

<sup>14</sup> —Co coisë pochín nica'huaso' ya'huërinhuë', itërin Quisosori.

<sup>15</sup> Napotahuaton, ya'ipiya pënënin.

—Ama iyaro'sa' ma'sha canacamasoáchin yonquicosohüë'. Co nani ma'sha ya'huëtinquëma' huarë' noya nanpiaramahuë', itërin.

<sup>16</sup> Itahuaton, a'na pënënto nanan sha'huitërin. “Ni'co'. A'na ma'huan ya'huërin. Iminëinquë sha'pachina, hua'huayátërahuë nitërin. <sup>17</sup> Napoaton ya'ipi pëinënpita ya'sotërin huachi. '¿Insëquëcha ma'sha aco'ia?' ta'ton, yonquiárin. <sup>18</sup> Yonqui huachina, tapon: 'Pëiro'sa' i'quitahuato, a'na pëiro'sa' niantarahuë. Panca panca nisarahuë. Inaquë ya'ipi ma'shanëhuëpita acoarahuë. <sup>19</sup> Na'a ma'sha ya'huëtërinco. Co apípora nohuantarahüë'. Co huachi sacatarahuë'. Noya coshatápo. Noya o'opo. Capa cancantato, nóya ya'huápo, tënin yonquinën quëran. <sup>20</sup> Napopirinhüë', Yosëri itërin: 'Quëmaso' co manta' yonquiranhüë'. Ipora tashi chachín ca nohuanto, chiminarán. Nani ma'sha canapiranhüë', ya'ipiya pataran ni'ton, a'napitari mapon,' itërin. <sup>21</sup> Canpitanta' nani ma'sha canapomarahüë', co Yosë yonqui huatamahuë', ina ma'huan pochín nisarama'. Co manta' ya'huëtomiatarinquëmahüë'. Co Yosë'pa' canamiataramahuë', tënin Quisoso.

*Yosë noya a'pairinpoaso'*  
(Mateo 6.25-34)

<sup>22</sup> Ina quëran ca'tano'sanënpita itapon: “A'naquën ma'sharáchin yonquiipi. Capacaiso', o'ocaiso', a'mocaiso', inasáchin yonquiipi. 'Nani ma'sha ya'huëtohuachinco, nóya ya'huarahüë', topirinhüë' yonquinëna quëran. Ama iyaro'sa' ina pochín cancantocoso-hüë'. <sup>23</sup> Yosë chachín ananpirinpoa'. Nonënpoa' quëtërinpoa'. Co capacaso marëáchin isoro'paquë acorinpoahuë'. Noyápiachín a'mocasonta' co onpopinchín yonquicaso' ya'huërinhuë'. Yosë na'con na'con yonqui huatëhua', catahuarinpoa' noya ya'huëcaso'.

<sup>24</sup> Ni'co'. Inairaro'sa' co sha'topihuë'. Co cayarínso' sënapihuë'. Cosharo' tapacaso marë' co pëi' ya'huëtopirinhüë', Yosëri catahuarín. Ina nohuanton, cosharo' ya'huëtopi. Canpitaso' inapita quëran na'con na'con nosororinquëma'. <sup>25</sup> Ama nisha nisha yonqui atoma', napion cancantocoso-hüë'. Chiminacaso' nanihuachín, co huachi a'na ora tëranta' nanpicaso' ya'huërinhuë'. <sup>26</sup> Canpitaora co manta' nanitapapiramahuë'. Yosë nohuanton, noya ya'huërama'. Napoaton sano yonqui atoma', ya'huëco'.

<sup>27</sup> Ni'co'. Yancoro'sa' co sacatopihuë'. Co manta' a'mocaso nipihuë'. Nipirinhüë', noyápiachin yancotopi. Iráca copirno Saromon nani ma'sha ya'huëtërin. 'Ma noyápiachincha a'morin paya,' topi. Yancoro'saso' napoaponahuë', ina quëran noya noya ya'nopi. <sup>28</sup> Pacatoro quëran huarë' Yosëri yonquirin. A'na tahuëriíchin ya'huëpirinhüë', ahuihuachina, ahuiquitëre'. Co hua'qui' ya'huëpirinhüë', Yosëri yonquirin. Ina nohuan-ton, noya papotërin. Canpitaso' ina quëran na'con na'con yonquirinquëma'. Ina nohuan-ton, a'mocamasonta' ya'huëtarinquëma'. ¿Onpoatomata' nipachin co natëramahuë'? 'Yosë catahuarinco mini,' ta'caso nipirinhüë'. <sup>29</sup> Ama ma'sha yonquiatoma', pa'yancosohüë'. '¿Ma'cha ca'në'poya? ¿Ma'cha o'orë'poya?' ama tocosohüë'. <sup>30</sup> Co Yosë imapisopitahuë' ina pochin yonquipi. Ma'sharáchin yonquipi. Canpitaso nipirinhüë', tatanëma' inápaquë ya'huërinso' yonquirinquëma'. Ya'ipi pahuantërinquëmasopita nitotërin. <sup>31</sup> Napoaton Yosë na'con na'con yonquico'. A'napitanta' catahuaco' hua'anëntërinquë ya'conacaiso marë'. Ina pochin cancantohuatama', Yosë catahuarinquëma'. Ina nohuan-ton, ma'sha pahuantërinquëmasopita ya'huëtarinquëma', itërin.

*Canamiatërëhuaso'*  
(Mateo 6.19-21)

<sup>32</sup> Naquëranchin itaantarín:

—Ama iyaro'sa' pa'yancosohüë'. Ohuica pë'tahuana'pi pochin nicato a'pairanquëma'. Caraichinquëma' nipomarahüë', Yosë noya ni'ninquëma'. Hua'anëntërinquë chachin aya'coninquëma'. <sup>33</sup> Ama na'con ma'sha yontoncosohüë'. Ma'sha ya'huëtohuachinquëma', pa'anahuatoma', sa'ahuaros'a' quëtoco'. Inapotohuatama', Yosë acanaarinquëma'. Isoro'paquë ma'sha a'naroáchin mocarin. Ihuarinënpoa'. Ma'shari a'quirin. Inapaquëso nipirinhüë' Yosë acanahuachinpoa', ya'huëtomiatarinpoa'. <sup>34</sup> Ma'sharáchin nohuantohuatama', co Yosë yonquiamahuë'. Nipirinhüë', Yosë na'con nohuantohuatama', ina na'con na'con yonquiamama', itërin.

*Noya ninacaso' ya'huërinso'*

<sup>35-36</sup> Ina quëran taantarín: “Noya yonquiatoma', capayatërëso pochin cancantoco'. Ni'co'. A'na patron sa'acaso marë' pa'nin. Onporosona huënantacaso' co piyapinënpita nitotopihuë'. Napoaton noya nitaparahuatona', nanparin i'champirahuatona', ninarapi. Canquiton, onconan pi'nihuachina, a'naroáchin i'soatacaiso' ya'huërin. <sup>37</sup> Piyapinënpita ninarapi quënanquintahuachina, hua'anëni nóya ni'sarin. Inari chachin nitaparahuaton, cosharo' acotarin piyapinënpita capacaiso marë'. <sup>38</sup> Yono tashihuë nipon, tahuëri ya'carihuë nipon, huënantarin. Co huë'ëponaraihuë' ninarapi quënanquintahuachina, noya ni'sarin. <sup>39</sup> Isonta' yonquico': Ihuatë' a'nanaya huëcaton, pëiquë ya'conin. Hua'anën co nicasohüë', ma'sha ihuarin. Onporosona huëcacaso' nitotërin naporini, hua'anëni ninaitonhuë', co ma'shanënpita ihuaitonhuë'. <sup>40</sup> Yosë quëran quëmapico ni'to, canpitanta' ninatomaco, ya'huëco'. Hua'quihuato: 'Co a'naroáchin o'mantararinhuë', tosapi a'naquën. Co nitotasëinquëmahuë', a'nanaya o'mantararahüë,' itërin Quisosori.

*Inpriato pochin nininso'*  
(Mateo 24.45-51)

<sup>41</sup> Napohuachina, Pitrori natanin:

—¿Ya'ipi piyapi'sa' Sinioro pënënanan? ¿Quiyasáchin nica? itërin.

<sup>42</sup> Napotohuachina:

“Ni'co' iyaro'sa'. O'maca'huaso tahuëri a'na patron pochin nisarahüë. Inaso' aquë yapa'pachina, inpriatonën noya natërinso' sha'huitërin. 'Piyapinëhuëpita noya ni'quë'. Cosharo', ma'sha, inapita pahuantohuachina, quëtëra'piraquë', itahuaton pa'nin. <sup>43</sup> Inpriatoso' noya yonquihuachin, no'tëquën natërin. Patronëni huëcapaintahuachina, noya ni'sarin. <sup>44</sup> Noya natërin ni'ton, acoarin ya'ipi ma'shanënpita a'paicaso marë'. <sup>45</sup> Nipirinhüë', inpriatonën nisha cancantohuachin, tapon: 'Patron hua'quirarin.

Co a'naroáchin huëntaponhuë', ta'ton, piyapinēnpita ahuëapon. Cosonanēnpitanta' ahuëapon. Pita nicacasoáchin cancantapon. No'pirápon. <sup>46</sup> Napoaso', a'nanaya patronēni quēnanquiantapon. Co nitotasohuë', a'nanaya canquipon. Co natērinhuë' ni'ton, ocoirahuaton, chiníquēn ana'intarin. Co natētono'sahuēpitarē chachin ana'intarin.

<sup>47</sup> A'na piyapinēnso' patronēni sha'huitopirinhuë', co yonquirinhuë'. Noya nitotaponahuë', co natērinhuë'. Co ma'shanēnpita noya tapatērinhuë' ni'ton, chini chiníquēn ahuihuitarin. <sup>48</sup> A'naso nipirinhuë' co nitotērinhuë'. Co noyahuë' nipachina, co onpopinchin ahuihuitarinhuë'. Inapochachin canpitanta' na'con a'chintēranquēma' ni'ton, noya natēco'. Na'con nitotohuatama', noya noya natēcaso' ya'huërin," itērin.

*Nisha nisha Quisoso yonquirapipiso'*

*(Mateo 10.34-36)*

<sup>49-50</sup> "Tēhuēnchachin, iyaro'sa', pēn matohuachina, a'naroáchin huiquitērin. Inapochachin piyapi'sa' a'chintohuato, nisha nisha yonquiapi. Na'a piyapi'sa' no'huiarinaco. Caso' chiníquēn parisita'huaso' ya'huërin. Ina yonquiato, sētērahuë'. A'naroáchin nipachin napochinaco. <sup>51</sup> 'Cristo o'mahuachin, ya'ipiya nohuantatona', noya ya'huapona', ¿topiramahuë' ti? Co ya'ipiya nohuantarincohuë'. Pēnēnpato, nisha nisha yonquiapi. A'naquēn nohuantarincaco. A'naquēnso nipirinhuë', co nohuantarincohuë'. <sup>52</sup> Ipora quēran huarē' a'na pēiquē ya'huēpisopita nisha nisha yonquiapi. Catoya'pi nohuantarincaco, caraya'piso nipirinhuë' co nohuantarincohuë' ni'ton, nino'huiapi. <sup>53</sup> A'na pēiquē pa'pin nohuantarincaco. Hui'ninso nipirinhuë' co nohuantarincohuë'. A'na pēiquēnta' hui'nin nohuantarincaco. Pa'pinso nipirinhuë' co nohuantarincohuë'. Sanapi'santa' nisha nisha yonquiapi. A'shin nimara co nohuantarincohuë'. Hua'huinso nipirinhuë' nohuantarincaco. A'shatēn nohuantarincaco. Notainso nipirinhuë' co nohuantarincohuë'," tēnin.

*Ipora ma'sha onporēhuaso' yonquicaso' ya'huërin*

*(Mateo 16.1-4; Marcos 8.11-13)*

<sup>54</sup> Ina quēran ya'ipi piyapi'sa' a'chintantaton, itapon:

"No'tēquēn, iyaro'sa', yonquico'. Pi'i ya'coninso parti tashirotohuachina: 'O'nanapon,' tēnama'. Ina quēran o'nanin. <sup>55</sup> Sor parti quēran chiníquēn ihuantohuachina, 'Huēnoca ya'huëapon,' tēnama'. Naporo' huēnocatērin. <sup>56</sup> Canpitaso' nonpintēnquēma'. O'nan, sēhuēn, inapita noya ninopiramahuë', ¿onpoatonta' ipora chachin naporahuēsopita co yonquiramahuë'?" itērin.

*Nanan anoyatacaso' ya'huërinso'*

*(Mateo 5.25-26)*

<sup>57</sup> "¿Onpoatomata' canpitaora cancanēma quēran co no'tēquēn yonquiramahuë'? <sup>58</sup> Ni'co'. Nihuitēranso marē' yaquēpahuachinēnquēn, a'naroáchin nanan anoyatēquē'. Co anoyatohuatanhuë', coisēquē quēpaarinēnquēn. Coisēquē quēpahuachinēnquēn, sontaroquē yo'coaninēnquēn ni'ton, tashinan pēiquē po'moarinēnquēn. <sup>59</sup> Inaquē po'mohuachinēnquēn, ya'ipiya pahuērētaquē huarē' pipiaran," tēnin Quisoso. (Inapochachin canpitanta' co noyahuë' nipatama', a'naroáchin nanan anoyatoco', Yosē ana'intochinquēma'.)

## 13

*Co noyahuë' yonquipisopita naniantacaso' ya'huërinso'*

<sup>1</sup> Naporo' a'naquēn huē'sahuatona', Quisoso sha'huitiipi: "Caririario'sa' Yosē pēinēnquē chinotatona', ma'sha tēparapirinahuë', Piratori sontaro'sa' a'parin tēpacaiso marē'. Inaquē chachin tēpapi," itiipi.

<sup>2</sup> “A'napita caririario'sa quëran na'con na'con oshahuanpi ni'ton, Yosë nohuanton, ¿tëpapi, topiramahuë' ti? <sup>3</sup> Co inapita na'con na'con oshahuanpihuë'. Canpitanta' co noyahuë' yonquirama'. Co ina naniantohuatamahuë', ana'intarinquëma'. Chiminatoma', parisitomiatarama'. <sup>4-5</sup> Siroiquënta' a'na tori anotaton, shonca posa ya'pi tëparin: 'Inapitanta' na'con na'con oshahuanpi,' ¿topiramahuë' ti? Co naporinhuë', ténahuë caso'. Na'a piyapi'sa' Quirosarinquë inachachin oshahuanpi. Canpitanta' co noyahuë' yonquirama'. Co ina naniantohuatamahuë', chiminatoma', parisitomiatarama',” itërin Quisosori.

*Nara co nitërinsohuë'*

<sup>6</sup> Ina quëran iso pënënto nanan sha'huitërin: “A'na quëmapi iminënquë iquirira naranta' sha'nin. Papotahuaton a'shinaponahuë', hua'qui' co nitërinhuë'. <sup>7</sup> Ina quëran in-priatonën itërin: 'Iso huayo napoonin. Nani a'shinaponahuë', cara pi'ipi co manta' nitërinhuë'. A'nëquë'. ¿Ma'marëta' topinan huanirin?' itopirinhuë', <sup>8</sup> ‘Ama sinioro ipora a'nëquësohuë'. A'na pi'ipira' tananpitëquë'. Iso pi'ipi noya pacarapiarahüë. Apono acotarahüë noya nitacaso marë'. <sup>9</sup> Iso pi'ipi nitapon nimara. Co nitohuachinhuë', sha'huitoco a'nëchinquën, itërin in-priatonëni,” ténin Quisoso.

*Chinoto tahuëri apia anoyatërinso'*

<sup>10</sup> Chinoto tahuëri nanihuachina, niyontonpiso pëiquë pa'sahuaton, piyapi'sa' a'chintarin. <sup>11</sup> Inaquë a'na sanapi quënanconin, apia nininso'. Sopai nohuanton, nani shonca posa pi'ipi monconpirin. Co nanitërinhuë' no'tëpicaso'. <sup>12</sup> Quisosori quënanahuaton, përarin. Huëcapaihuachina:

—Nani imoya noyatëran, itërin.

<sup>13</sup> Së'huapihuachina, a'naroáchin no'tëquën huanirin. “¡Ma noyacha Yosëso' ni'ton, anoyatërinco paya!” ténin. <sup>14</sup> Niyontonpiso pëi' hua'anso nipirinhuë', no'huitërin. Chinoto tahuëri anoyatërin ni'ton, naporin. Napoaton piyapi'sa' itapon:

—Saota tahuëri sacatacaso' ya'huërin. Naporo' huëco' anoyatinquëmaso marë'. Chinoto tahuëriso' co noyahuë' anoyatacaso', itërin.

<sup>15</sup> Quisosori natanahuaton, itapon:

—Canpitaso' nonpintëinquëma'. Co no'tëquën yonquiramahuë'. Ohuaca', mora, inapita pë'tahuahuatama', chinoto tahuërinta' i'quiritërama'. I'sha ya'huërinquë quëparahuatoma', o'shitërama'. <sup>16</sup> Iso sanapiso nipirinhuë' Yosë piyapinën niponahuë', hua'qui' parisitërin. Nani shonca posa pi'ipi Satanasëri aparisitopirinhuë', ipora huarë' nicha'ërahuë. Chinoto tahuërinta' anoyatacaso' ya'huërin ténahuë. ¿Ma'ta' canpitaso' yonquirama'? itërin.

<sup>17</sup> Natanahuatona', inimiconënpitaso' tapanpi. A'napitariso nipirinhuë', pa'yatopi: “¡Ma noyacha Quisoso nanitaparin paya!” topi.

*Mostasaraya pochin nininso'*

*(Mateo 13.31-32; Marcos 4.30-32)*

<sup>18</sup> “¿Ma pochinta' Yosë hua'anëntërinso'? topiramahuë'. A'na pënënto nanan sha'huitanta'inquëma' canpitanta' nitotacamaso marë'. <sup>19</sup> Mostasaraya pochin ninin. Ya'pirin hua'huishin niponahuë', iminquë sha'patëra, panca ta'an ninin. Nani a'shinpachina, inairaro'sa' huëcatona', inaquë pëirin,” ténin. (Inapochachin ya'nan nipon, caraíchin piyapi Yosë imapirinahuë', a'na tahuëri hua'huayátërahuë imasapi huachi.)

*Pan ahuëpocatërinso pochin nininso'*

*(Mateo 13.33)*

<sup>20</sup> Ina quëran itantarin: “¿Ma pochinta' Yosë hua'anëntërinso'? <sup>21</sup> Pan ahuëpocatërinso pochin ninin anta'. A'na sanapi pan nipachina, cato shonca quiro pochin trico no'mo'



manin. Masahuaton, pi'pian tēranta' pan ahuēpocatērinso' ayontohuachina, ya'ipiya sē'cotērin, pan huēpocatērin huachi," tēnin Quisoso.

*Ya'coana pochin nininso'*

*(Mateo 7.13-14, 21-23)*

<sup>22</sup> Ina quēran nisha nisha ninanoquē pa'sahuaton, a'chintēra'piarin. Quirosarinquē huarē' pa'sarin. <sup>23</sup> A'chintohuachina, a'na quēmapiiri itapon:

—¿Onpo piyapita' cha'ēpona'? ¿Caraíchin nimara ti? itērin.

<sup>24</sup> —Yosē huēntonēn pēi pochin ninin. Ya'coananēnso' yamianasha. Na'a piyapi'saso' yaya'conpirinahuē', co noyahuē' cancantatona', co nanitopihuē' ya'conacaiso'. Canpitaso nipirinhue' ipora chachin ya'conacamaso' nohuantoco'. Ama hua'quicosohuē'.

<sup>25</sup> A'na tahuēri hua'anēni ya'coananēn oncotarin huachi. Naporo huarē' aipiran huanirahuatoma', yaya'conpiramahuē'. “I'soatocoi Sinioro,” tosapiramahuē', co nohuantarinhuē'. “Co nohuitēranquēmahuē'. Co canpitaso' piyapinhue'pitanquēmahuē',” itarinquēma'.

<sup>26</sup> “Co'ta nohuitērancoi. Quēmaro'coi coshatērai, o'orai. Quiyataquē a'chinan,” tosapiramahuē'. <sup>27</sup> “Co' mini nohuitēranquēmahuē'. Co noyahuē' ninama' ni'ton, co piyapinhue'pitanquēmahuē'. Paco huachi,” itahuatēnquēma', a'paarinquēma'.

<sup>28</sup> Parisitopiquē pa'sahuatoma', na'nēarama', chiníquēn parisitarama'. Apraan, Isaco, Cacopo, pēnēntona'piro'sa', inapita Yosē hua'anēntērinquē ya'huērapi, ni'sarama'. Canpitaso nipirinhue' co ya'conamahuē' ni'ton, sētarama'. <sup>29</sup> Nisha nisha parti quēran huēcatona', Yosē ya'huērinquē ya'conapi. Inaquē noya coshatēreso pochin nōya ya'huērapi. <sup>30</sup> A'naquēnso' ipora co piyapi'sari noya ni'pirinahuē', a'na tahuēri Yosēri nōya ni'sarin. A'naquēnso' nipirinhue' ipora piyapi'sari noya ni'pirinahuē', a'na tahuēri co Yosēri noya ni'sarinhuē', itērin Quisosori.

*Quirosarinquē ya'huēpisopita yonquiaton, sētērinso'*

*(Mateo 23.37-39)*

<sup>31</sup> Naporo' a'naquēn parisioro'sa' Quisosoquē huē'pi.

—A'naroáchin ta'aquē'. Irotisē yatēparinquēn, itiipi.

<sup>32</sup> —Inca. Co yapa'nahuē'. Irotisēso' pa'pi nonpintē'. Paaton, sha'huitonquē'. Nani Yosē sha'huitērinco ma'sha nica'huaso'. Iporaso' ina natēto, sopairo'sa' a'parahuē. Na'a cania'piro'sa' anoyatarahuē. Cara tahuēríchín pochin pahuanarin tiquia'huaso'. Ina sha'huitonquē' nitochin. <sup>33</sup> Inaso napotopirahuē', ipora tahuēri chachin pipito tashira aquētēran Quirosarinquē nincana'huaso' ya'huērin. Iráca quēran huarē' na'a piyapi'sa' inaquē pēnēntopirinhue', tēpapi. Inaquē canta', tēpainacoso ya'huērin, tēnin.

<sup>34</sup> Ina quēran itantarin: “¡Ya'ipi Quirosarinquē ya'huēramasopita yonquiatēnquēma', chiníquēn sētērahuē! Na'a pēnēntona'piro'sa' Yosē a'patērinquēma' pēnēinēnquēmaso marē'. A'paporinhue', tēparama'. A'naquēn na'pique' tē'yaratoma', tēparama'. Ya'ipinquēma' nosoroatēnquēma', na'aro' yacatahuapiranquēmahuē', co ca tēranta' nohuantēramacohuē'. Atari hua'huin to'cohuētērinso pochin yapa'poyapiranquēmahuē', co nohuantēramacohuē'. <sup>35</sup> Napoaton Tata Yosē patarinquēma'. Co huachi catahuararinquēmahuē'. Co huachi quēnanaramacohuē'. O'manta'huaso' tahuēri huarē' quēnantaramaco. Naporo': “¡Ma noyanquēncha quēmaso paya! Sinioro chachin a'paimarinquēn, itaramaco,” itērin Quisosori.

## 14

*Chinoto tahuēri anoyatantarinsó'*

<sup>1</sup> A'na hua'ani Quisoso amatērin coshatapacaso marē'. Parisio quēmapi inaso'. Amatohuachina, inaquē pa'nin. Chinoto tahuēri ni'ton, a'napitarinta' ni'sapi sha'huirapicaiso marē'. <sup>2</sup> Naporo' a'na cania'pi Quisosoquē huē'nin, panca pomatērinso'. <sup>3</sup> Cotio maistro'sa', parisioro'sa', inapita notēerahuatón, Quisosori itērin:

—¿Noya chinoto tahuëri cania'pi anoyatacaso' ti? ¿Ma'ta' tënama' canpita? itërin.

<sup>4</sup> Natanahuaton, ta'tápi. Co manta' topihuë'. Co a'panitohuachinaraihuë', cania'pi sè'huarahuaton, a'naroáchin anoyatërin. —Noya paquë huachi, itërin. <sup>5</sup> Ina quëran piyapi'sa' pënëantarin.

—¡Hui'nama' posoquë pa'itohuachina, chinoto tahuëri nipirihuë', a'naroáchin ocoirama'! Mora tëranta' pa'itohuachina, ocoirama'. ¿Co ocoiramahuë' nica? itërin.

<sup>6</sup> Parisioro'saso nipirihuë' tapanatona', co nanitopihuë' a'panitacaiso'.

### *Pita pochin nininso'*

<sup>7</sup> Yacoshatohuachinara, na'a piyapi'sa' hua'an pirayan yahuënsëpi. “Hua'an pirayan huënsëhuato, chiníquën nanantona'pi pochin ni'sarinaco,” ta'tona', inaquë huënsëconpi. Ina ni'sahuaton, Quisosori itërin:

<sup>8</sup> —Natanco iyaro'sa' pi'pian pënëinquëma'. Quëmapi yasa'apachina, nipayarinsopita amatërin coshatapacaiso marë'. Inaquë amatohuachinquën, ama hua'ano'sa' pirayan huënsëquësohuë'. Taponá' a'na quëmapi chini chiníquën nanantërinso' huë'sarin.

<sup>9</sup> Huë'pachin, hua'an itarinquën: “Po'shaquë', iso quëmapi huënsë'in. Pasëquë tëranta' huënsëconquë',” itohuachinquën, tapanaran. <sup>10</sup> Napoaton amatohuachinquën, co'inquë huënsëquë'. Hua'an huë'pachin, noya nontarinquën. “Huëquë' iyasha, isëquë noya huënsëiquë',” itohuachinquën, ya'ipi piyapi'sa' noya ni'sarinquën. <sup>11</sup> Inapochachin “Caso' noya noyaco,” topatama', Yosë atapanarinquëma'. Nipirihuë', sano piyapi nipatama', Yosë noya noya acoarinquëma', itërin.

<sup>12</sup> Ina quëran pëi' hua'anën pënënaton, itantarin:

—Ca'painëinquënso marë' piyapi amatohuaton, ama quëmopinënpita, amiconënpita, inapitaráchin amatëquësohuë'. Ma'huano'sa' amatohuaton, inapitanta' amataantahuachinëinquën, i'huërëtarinëinquën. <sup>13</sup> Sa'ahuario'sa', apiaro'sa', sonpacharo'sa', somaraya nininsopita, inapitanta' nosoroaton, amatëquë'. <sup>14</sup> Ina quëran noya cancantaran. Inapitaso' co nanitopihuë' amatanta'inëinquënso'. Co i'huërëtopirinëinquënhuë', Yosëso' i'huërëtarinëinquën. Noya ninan ni'ton, ayaro' tahuëri ananpitaantahuachinquën, acanaarinquën huachi, itërin.

### *Yosëri amatërinso'pita (Mateo 22.1-10)*

<sup>15</sup> Inaquë coshataso', a'naso' natanahuaton, Quisoso itapon:

—Yosë chachin hua'anëntohuachinpoa', nóya coshatarihua'. Noya noya cancantarihua', itërin.

<sup>16</sup> Napotohuachina, pënënto nanan sha'huitërin.

—A'na quëmapi na'a piyapi'sa' amatërin ca'pacaiso marë'. <sup>17</sup> Tahuëri nanihuachina, inpriatonën a'parin sha'huitantacaso marë'. “Huëco huachi. Nani cosharo' taparin,” itërin. <sup>18</sup> Nani amatopirihuë', co huachi nohuantopihuë'. “Co'chi nanitëraihuë' paya,” toconpi a'naya a'naya. “No'pa' pa'anahuëso' nicapo pa'sarahuë. Napoaton co nanitërahuë',” tënin a'na'. <sup>19</sup> “Shonca toro pa'anahuë asacata'huaso marë'. Inapita tënipo pa'sarahuë. Napoaton co ipora nanitërahuë',” tënin a'nanta'. <sup>20</sup> “I'huara sa'arahuë. Napoaton co canta' nanitërahuë',” tënin a'nanta'. <sup>21</sup> Napotohuachinara, inpriatoso ayahuaton hua'anën sha'huitiirin. “Co huachi nohuantopihuë',” itërin. Natanahuaton, no'huitërin. “Manóton paantaquë'. Cachiquë tëranta' paaton, piyapi maconquë'. Sa'ahuario'sa', apiaro'sa', somaraya nininsopita, sonpacharo'sa' inapita maconquë',” itërin. Itohuachina, pa'sahuaton, macontarin. <sup>22</sup> Huënantarahuaton, sha'huitiantarin. “Nani maconpirahuë'. Ipora huanta' pahuanarin piyapi'sa' nanicaso',” tënin inpriatonën. <sup>23</sup> “Ninano quëran pipirahuaton, macoantaquë'. Nisha nisha ira pa'taton,

sha'huitonquë' huë'ina'. Imino'saquë huarë' paaton, maconquë'. Na'a piyapi'sa' no-huantërahuë. <sup>24</sup> Ya'nan amatërahuësopitaso', co huachi ca'painacoso' nohuantërahuë' ni'ton, inapoco',” itërin hua'ani, tënin Quisoso.

*Sacai' imacaso'*  
(Mateo 10.37-38)

<sup>25</sup> Ina quëran Quisoso paantarin. Na'a piyapi'sari imasapirinahuë', tahuërëtahuaton, itapon: <sup>26</sup> “Yaimapatamaco, ca na'con na'con nosoroco. Tatama', mamama', inapita co onpopinchin nosorocaso' ya'huërinhuë'. Sa'ama', hui'nama', iyaparima', oshiparima', inapitanta' co onpopinchin nosorocaso' ya'huërinhuë'. Canpitaora nohuantëramasonta' naniantatoma', casáchin imaco huachi. Co na'con na'con nosorohu-atamacohuë', co tëhuënychachin imaramacohuë'. <sup>27</sup> Imapatamaco, a'napita aparisitarinënguëma'. Yatëpapurinënguëmaonta', imamiatoco. Corosëquë chiníquën parisitëre'. Inapochachin canpitanta' imapatamaco, aparisitarinënguëma'. Co ahuantohuatamahuë', co tëhuënychachin imaramacohuë'. <sup>28</sup> Ni'co' iyaro'sa'. A'na quëmapi panca tori yanipachin, co a'naroáchin nininhuë'. Ya'ipi pa'tërinso'ton yonquirin. <sup>29</sup> Ina quëran coriquinën nanihuachina, pëiarin huachi. Co coriquinën nanihuachinhuë', co pëirinhuë'. Patomaíchin a'canin naporini, a'napitari tëhuaitonahuë'. <sup>30</sup> Ni'co'. Panca yapëipirinhuë', co nanitërinhuë' a'canacaso', ichitonahuë'. <sup>31</sup> Isonta' yonquico'. A'na copirno ya'huërin, shonca huaranca sontaro'sa' camairinso'. Inimiconënso nipirinhuë', cato shonca huaranca sontaro'sa' camairin. Ina napo' huë'pachinara, co a'naroáchin ahüëapon pa'sarinhuë': 'Sacai' minsëcaso', ta'ton, yonquirárin. <sup>32</sup> Co nanitochináchinhuë' nipachina, comisionën a'parin nanan anoyatacaso marë'. <sup>33</sup> Inapochachin pënënanquëma'. Sacai' imamancoso', tënahüë. Napoaton noya yonquiatoma', imaco. Casáchin yonquihu-atamaco, tëhuënychachin noya imasaramaco,” tënin Quisoso.

*Yamora pochin nininso'*  
(Mateo 5.13; Marcos 9.50)

<sup>34-35</sup> Ina quëran taantarin: “Yamora noya acashicaso' niponahuë', chiminpachinaso co huachi cashirinhuë' ni'ton, co huachi ma'marë tëranta noyatërinhuë'. Topinan të'yatëre'. Huëratëhuanpatama', noya natanatomaco, yonquico',” itërin Quisosori. (Canpitanta' co noya cancantohuatamahuë', co Yosë nohuantarinquëmahuë' tapon naporin.)

## 15

*Ohuica chihuërinso pochin nininso'*  
(Mateo 18.10-14)

<sup>1</sup> Nisha nisha piyapi'sa' huë'pi Quisoso natanacaiso marë'. Copirno marë' coriqui ma'patona'piro'sa', oshahuano'sa' itopiso', inapitanta' huë'pi. <sup>2</sup> Ina ni'sahuatona', parisioro'sa', cotio maistro'sa', inapitari no'huipi.

—¿Onpoatonta' Quisoso oshahuano'sa' pa'yatërin? Inapitarë' coshatarin, co napocaso-huë' nipirinhuë', toconpi.

<sup>3</sup> Ina natanahuaton, Quisosori iso pënënto nanan sha'huitërin ayonquicaiso marë': <sup>4</sup> “A'na quëmapi pasa ohuicaros'a' pë'tahuaton, ya'ipiya nosororin. A'naya tëranta' chihuëhuachina, yonípon pa'sarin. A'napitaso' pastoquëranchin patahuaton, hua'qui' yonissarin. Quënanahuë huarë' yonisárin. <sup>5</sup> Quënanahuaton, pa'yatërin. Pitënahuatón, quëmantarin. <sup>6</sup> Pëinënguë canquiantahuachina, nipayarinsopita, ya'cariya ya'huëpisopita, inapita sha'huitërin. 'Ohuicanëhuë chihuëpirinhuë', quënanahuë. Ina marë' nóya cancantahua', itërin. <sup>7</sup> Inapochachin Yosë ni'ninpoa'. Noya piyapi ya'huëhuachin, Yosëri noya ni'sarin. Nipirinhuë', oshahuano'santa' nosororin. A'naya tëranta' co noyahuë' yonquirinso' naniantohuachin, Yosë ya'huërinquënta' capa cancantomiatapi,” itërin Quisosori.

*Coriqui ayatërinso'*

<sup>8</sup> Ina quëran iso pënënto nanan sha'huitantarin: "A'na sanapi shonca coriqui prata quëran nininso' ya'huëtopirinhüë', a'nara' ayatërin. Nanparin i'chinpitahuaton, noyá huitëtërin. Quënanahuë huarë' yonisárin. <sup>9</sup> Quënanahuaton, nipayarinsopita, ya'cariya ya'huëpisopita, inapita sha'huitërin. 'Coriquinëhuë ayatopirahuë', quënanahuë. Ina marë' noya cancantahua', itërin. <sup>10</sup> Inapochachin a'na piyapi tëranta' co noyahuë' yonquirinsopita naniantohuachin, anquëniro'santa' noya cancantapi," itërin.

*Oshahuana'pi huëantarinsó'*

<sup>11</sup> Ina quëran Quisosori itaantarin: "A'na quëmapi cato' hui'ninpita ya'huëtopirinhüë', <sup>12</sup> hua'hua nininsoari pa'pin itërin: 'A'na tahuëri ya'ipi ma'shanënpita iyahuëro'co patomatarancoi. Caso nipirinhüë' apira nohuantërahuë. Ipora tata quëtochanco, topirahuë', itërin. Itohuachina, patoma ma'shanënpita quëtërin. <sup>13</sup> Cara tahuëri quëran pochin hua'hua nininso' yapipirin. Ya'ipi ma'shanënpita pa'anahuaton, coriqui canarinso' masahuaton, aquë pa'nin. Inaquë no'pirárin, nansarárin, monshihuanárin. Na'a coriqui quëparinsó' i'quirin. <sup>14</sup> Nani ya'ipi i'quihuachina, inaquëso' tanarotopi ni'ton, co manta' capacaso' ya'huërinhuë'. Inanta' tanarin. <sup>15</sup> Napoaton a'na patronquë pa'nin. 'Canta' sacachi, topirahuë', itërin. 'Noyahua'. Sacatëquë' nipachin,' itahuaton, pastoquë a'parin coshinënpita a'paicaso marë'. <sup>16</sup> Inaquë paaton, coshiro'sa' a'cararin. Tanaton, coshi ca'ninso' tëranta' nayapirinhüë', co incari quëtërinhuë'. <sup>17</sup> Ina quëran yonquirin. '¡Ma'huántacha ninahuë paya! Tata piyapinënpitaso' noya coshatapi. Caso nipirinhüë' tana yatëparinco ta'a. <sup>18</sup> Paato, tatahuë nonchi: "Co noyahuë' tata ninahuë. Nonpintëranquën. Co Yosë natëtohuë', oshahuanahuë. <sup>19</sup> Co noyahuë' ninahuëso marë' co huachi hui'nán pochin cancantancoso' ya'huërinhuë'. Piyapinën pochin tëranta' ni'co," ichi,' ténin yonquinënquë. <sup>20</sup> Ina quëran pa'pin ya'huërin'pa' paantarin.

Ya'caritëriahuaso', aquë quëran pa'pini quënanin. Quënanahuaton, na'con nosoroaton, ta'aparin. Iporahuaton, apinorin. <sup>21</sup> 'Co noyahuë' ninahuë, tata. Nonpintëranquën. Co Yosë natëtohuë', oshahuanahuë. Co noyahuë' ninahuëso marë' co huachi hui'nán pochin cancantancoso' ya'huërinhuë', itërin pa'pin. <sup>22</sup> Napotopirinhüë', pa'piniso' na'con nosororin. Piyapinënpita camairin. 'Manóton paatoma', noyápiachin nininso' maconahuatoma', a'motoco'. Po'moitëran' noyápiachin nininso' po'motoco'. Sapatënta' matonquë' po'moin. <sup>23</sup> Ina quëran toroa'hua amoshin nininso' ma'toma', tëpaco' ca'ahua'. Capa cancantatëhua', pita niahua'. <sup>24</sup> Iso hui'nahuë chiminin pochin niponahuë', iporaso' ya'noantarin. Ayatë pochin nipirinhüë', iporaso' niantarahuë', itërin. Ina quëran pita nisapi.

<sup>25</sup> Paninanso nipirinhüë', iminquë sacatërin quëran huëntararin. Pëiquë ya'caritëriahuaso', mosica pi'nirapiso natanin. Nansatona', capa cancantapi. <sup>26</sup> Natanahuaton, piyapinën përarin: '¿Onpoatonta' pita nisapi?' itërin. <sup>27</sup> 'Co'ta iya'hua huënantarin. Noya canquintarin ni'ton, tatari pa'yatërin. Toroa'hua amoshin nininso' atëpatërin capacaso marë', itërin. <sup>28</sup> Ina natanahuaton, no'huitërin. No'huitaton, co yaya'coninhüë'. Pa'pini pipirahuaton, itërin: 'Huëquë' conpa capa cancantahua', itopirinhüë'. <sup>29</sup> 'Inca tata. Na'a pi'ipi quëma marë' chiniquën sacatërahuë. Sha'huitohuatancora, ya'ipiya natëranquën. Napoaponahuë', co caso' chipo tëranta' quëtërancohuë' amiconëhuëpita amatahuato capa cancanta'huaiso marë'. <sup>30</sup> Iso hui'nanso nipirinhüë', aquë paaton no'piárin. Monshihuanárin. Coriquinën quëtopiranhüë', ya'ipi i'quirin. Ina quëran huënantahuachina, quëmari nosoroaton, pa'yatëran. Toroa'hua amoshin nininso' atëpatëran coshatacaiso marë', itërin.

<sup>31</sup> Napotohuachina, pa'pini itërin: 'Nosororanquën mini conpa. Quëmaso' co ya'huincaranhuë'. Ya'ipi ma'shanëhuëpita quëchinquën. Ya'ipiya quëmaquën nisarin. <sup>32</sup> Iya'huaso nipirinhüë', nani huënantarin. Chimininso pochin niponahuë',

ya'noantarin. Ayatërëso pochin nitopirëhuahuë', niantarëhua'. Ina marë' noya cancantacasos' ya'huërin,' itërin pa'pini," tënin Quisoso.

## 16

### *Inpriatori nonpintërinso'*

<sup>1</sup> Ina quëran ca'tano'sanënpita a'chintantaton, itapon: "A'na ma'huan ya'huërin. Inprietonën chiniquën nanan quëtërin piyapinënpita camaicaso marë'. Inari asacatërin. Chiniquën nanantaton, nihui'piso' ninshitërin. Inaso nipirinhüë', nonpintaton, inaora marë' coriqui masarin ni'ton, sha'huirapipi. <sup>2</sup> Ma'huanso' natantahuaton, amatërin. 'Quëmaso' nonpintaranco natantërahuë. Coriqui quëtëranquënso' quëmaora marë' manan ni'quëhuarë', ocoiaranquën. Ya'ipi nihuirinacoso' ninshitoco nitochi,' itërin. <sup>3</sup> Inprietonënso' pipirahuaton, yonquirarin. '¿Ma'cha onpo'i nicaya? Hua'anëhuë ocoiarinco. Co nanitërahuë' chiniquën sacata'huaso'. Naporahuaton, tapanato, co nohuantërahuë' coriqui topinan ma'pata'huaso'. <sup>4</sup> Na'a quëmapi'sa' hua'anëhuë nihui'pi. Iporaso' inapita catahuarahuë. Ina quëran hua'anëhuë ocoihuachinco, inahuanta' catahuarinaco nanpica'huaso marë', tënin yonquiaton. <sup>5</sup> Naporahuaton, co'huara hua'ani ocoiyatërasohuë', nihuitopisopita amatërin. A'naya a'naya huë'pi. A'naso' huë'pachina, natanin. '¿Onpota' hua'an nihuiran?' itërin. <sup>6</sup> 'Pasa rata toma' ma'parahuë ni'ton, ina nápo' nihuirahuë', itohuachina, 'Inta nipachin, nihuitëranso quirica masahuaton, a'natërápo shoncaíchin ninshitantaquë', itërin. <sup>7</sup> Ina quëran a'nanta' huë'nin. Huë'pachina, '¿Onpota' quëmanta' nihuitëran?' itërin. 'Trico ma'parahuë ni'ton, pasa costaro marë' nihuirahuë', tënin. 'Inta nipachin, Posa shoncaíchin ninshitantaquë', itërin. Inapotëra'piaton, na'a amiconënpita catahuarin ama na'con pahuëretacaiso marëhuë'. <sup>8</sup> Hua'ani natantahuaton, amataantarin. 'Naquëranchin nonpintantaranco. Nipirinhüë', "ma noyacha yonquiran paya," tënahüë,' itërin hua'anëni. Ni'co' iyaro'sa'. Na'a piyapi'sa' co noyahuë' nipisopita noya yonquipi inaora canacaiso marë'. A'naquëmaso nipirinhüë', imapiramacohüë', co onpopinchin yonquiramahuë' noya nicacamasso marë'.

<sup>9</sup> Coriqui ya'huëtöhuachinquëma', ama canpitaoráchin i'quicosohüë'. A'napita pahuantöhuachina', quëtoco'. Inapohuatama', Yosë'pa' noya ni'sarinquëma'. Chiminpatama', Yosë inápaquë quëpantarinquëma'. Coriquinëma' patopiramahuë', inatohua' noya noya ya'huëcontarama'.

<sup>10</sup> Ni'co' iyaro'sa'. Hua'anëma' sha'huitöhuachinquëma', natëcamaso' ya'huërin. Pi'pian tëranta' sha'huitopirinquëmahüë', natëhuatama', noya ni'sarinquëma'. Chini chiniquën nanan quëtërinquëma'. Co'so' natëhuatamahüë', co chiniquën nanan quëtërinquëmahüë'. 'Nonpintarinco,' ta'ton, co huachi natëarinquëmahüë'. <sup>11</sup> Ya'ipi coriquinëma' canpitaora marë' i'quihuatama', co insonta' inápaquë acanarinquëmahüë'. <sup>12</sup> Iporaso' Yosë nohuanton, ma'sha, coriqui, inapita ya'huëtërinquëma'. A'naninquëmaso pochin quëtërinquëma'. Topinan quëran i'quihuatama', co manta' Yosë'pa' canamiataramahuë'.

<sup>13</sup> Cato' patron camaihuachinquëma', co nanitëramahuë' cato chachin natëcamaso'. A'naso' nohuantatoma', noya natëarama'. A'naso' nipirinhüë' co onpopinchin nohuantatomahuë' co natëaramahuë'. Inapochachin canacamassoáchin yonquihuatama', co nanitaramahuë' Yosë natëcamaso'. Coriquiráchin cancantöhuatama', co Yosë natëaramahuë', itërin Quisosori.

<sup>14</sup> Parisi'oro'sa' coriquiráchin cancantopi. Napoaton Quisoso a'chininso' natanahuatona', tëhuapi. <sup>15</sup> Tëhuapirinhüë', Quisosori itërin: "Canpitaso' Yosë imaramaso pochin nipomarahuë', co tëhuë'nchachin imaramahuë'. Nonpinama'. Yonquiramaso chachin Yosë nitotërin. Piyapi'sa' noya ni'pirinë'nquëmahüë'. Cancanëma quëranso yanonpinama' ni'ton, Yosë co pi'pian tëranta' noya ni'sarinquëmahüë', itërin.

### *Yosë quiricanën quëran pëneninpoaso'*



16 Ina quëran tantarin: “Iráca Moisësë, pënëntona'piro'sa', inapita pënëntopi nani ma'sha natëcaso'. Ina quëran Coansha Paotista huë'pachina, noya nanan sha'huirin Yosë hua'anëntërinquë ya'conacaiso marë'. Yaya'conpispitaso' chiníquën cancantatona', ya'conapi. 17 Quiricanën quëran Yosë no'tëquën pënëninpoa'. Isoro'pa', pi'iro'të', inapita ta'huantapirinahuë', ya'ipi Yosë nanamënso' ya'huëmiatápon. Co a'na hui'sharinso tëranta' topinan quëran ninshitopihuë' ni'ton, ya'ipi naniarin,” ténin.

*Sa'ahuano'sa' pënëninso'*

*(Mateo 19.1-12; Marcos 10.1-12)*

18 Ina quëran Quisosori pënëntarin: “Co sa'ama' të'yatamaso' ya'huërinhuë'. Noya nichinpitacaso' ya'huërin. Napoaton sa'ama' të'yatatoma', a'na sanapi maantahuatama', oshahuanarama'. Monshihuaninso pochin Yosë ni'sarinquëma'. Insosona ina sanapi so'ini të'yatërinso chachin maantahuachina, inanta' monshihuaninso pochin Yosëri ni'sarin,” itërin.

*Ma'huan parisitërinso'*

19 Ina quëran itaantapon: “A'na ma'huan ya'huërin. Nani ma'sha ya'huëtërin. Morin pa'ton nininso' a'morin. Noyápiachin a'moton, nani tahuëri pita pochin nicaton, nóya coshatërin. Co manta' pahuantërinhuë'. 20-21 A'na quëmapinta' inaquë ya'huërin, sa'ahua nininso'. Nasaro itopi. Apia ni'ton, co nanitërinhuë' sacatacaso'. Ma'sha topinan ma'pataton, nanpirin. Ma'huan pëinën aipiran acopi. Ya'coanaquë huënsëarin. Tanaton, ma'huan pë'sotërinso tëranta' nayapirinhuë', co manta' quëttopihuë'. Ta'taráchin niconin ni'ton, ni'niraro'sari huëcatona', irotiipi. 22 Napoin quëran Nasaro chiminin huachi. Chiminpachina, Yosë'pa' anquëniro'sari quëparin. Apraan pantarinquë chachin pantarin. Ina quëran ma'huaonta' chimininpachina, pa'pitopi.

23 Parisitopiquë paaton, parisitárin. Në'përahuaton, aquë quëran Nasaro quënanin. Tata Apraanë' ya'huëarin. 24 Napoaton chiníquën përarin: ‘¡Tata Apraan, nosoroco canta! Pënquë parisitárahue. Nasaro a'patimaco i'sha pi'pian tëranta' api'nichinco,' itopirinhuë'. 25 ‘Co'chi nanitërahue paya. Ni'quë'. Quëmaso' nanpipon, nani ma'sha ya'huëttopirinquënhuë', inasáchin yonquiran ni'ton, iporaso' parisitáran. Nasaroso nipirinhuë' nanpipon, parisitápirinhuë', iporaso' noya ya'huarin huachi. 26 Naporahuaton, Yosë'pa' pa'patëra, co onporonta' pipirëhuë'. Inapochachin parisitopiquënta' pa'patëra, co onporonta' Yosë'pa' pa'nëhuë'. Panca tahuan ya'copitërinso pochin ni'ton, co nanitërhue' pëntonacaso', itërin.

27-28 Napotopirinhuë', itantarin: ‘A'natërápo iyahuëpita ipora ya'huërapí. Nasaro a'paquë' tatahuë pëinënuquë iyahuëpita pënënacaso marë'. Caso' parisitápato, co nohuantërahue' isëquë huëcacaíso', itërin. 29 Napotohuachina, Apraani itërin: ‘Co'ta Yosë quiricanën ya'huëttopi. Inaquë Moisësë, pënëntona'piro'sa', inapita ninshitopi nontatona' nitotacaiso marë'. Inapita natëina', itërin Apraani. 30 ‘Nani nontaponaraihuë', co natëpihuë'. Nipirinhuë', chimininso' nantiantahuaton, pënënconpachin, natëpona' nimara. Co noyahuë' yonquipisopita nantiantatona', Yosë tahuëretantapona' nimara, topirahuë', ténin. 31 ‘Co Yosë quiricanën natëhuachinahuë', chimininsonta' nantiantapirinhuë', co onporonta' natëapihuë', itërin Apraani,” ténin Quisoso.

## 17

*Anishacancantopisopita*

*(Mateo 18.6-7, 21-22; Marcos 9.42)*

1 Ina quëran ca'tano'sanënpita pënëntarin. “Nisha nisha ma'sha ya'huërin anishacancantiinpoaso'. Nipirinhuë', anishacancantona'piso' pa'pi co noyahuë' ni'ton, ¡ma'huantacha nisarin paya! Ina marë' Yosëri chiníquën ana'intarin. 2 Co'huara hua'huaro'sa tëranta' anishacancanchátërasohuë', marëquë chimiitërin naporini, noya

noya niitonhuë'. Pancara'pique a'sonconotahuatona', të'yaitopi naporini, co aquëtë' oshahuaintonhuë'. A'naquënta' imasapirinacohuë', co chiniquën canchatërapihuë'. Hua'huaro'sa' pochin cancantopi. Inapita anishacancantohuachina', Yosëri ana'intarin. <sup>3</sup> Napoaton, ni'cona a'napita anishacancantotama'.

A'na piyapi ma'sha onpotohuachinquëma', pënëncó'. Naporinso marë' sëtöhuachina, nanan anoyatoco'. <sup>4</sup> A'na tahuërimarëáchin canchisëro' napotopirinquëmahuë', canchisëro chachin: 'Co noyahuë' ninahuë ni'ton, sëtërahuë,' itohuachinquëma', nanan anoyataantaco'. Co onporonta' no'huicaso' ya'huërinhuë'," tënin.

*Ya'ipi cancanënpoa quëran natëcaso' ya'huërin*

<sup>5</sup> Ina quëran ca'tano'sanënpitari itopi:

—Catahuacoi Siniro, Yosë noya noya natë'i, itopi.

<sup>6</sup> —Mostasa ya'pirin hua'huishin ninin. Ina pochin pi'pian tëranta' Yosë natëtoma', nontohuatama', noya catahuarinquëma'. "Yosë nohuanton, iso nara no'pa quëran pipirahuaton, marëquë pa'in," tënama' naporini, pa'itonhuë'. "Yosë no'tëquën nontërinco," topatama', sacai' nininso' nanitaparama', itërin.

*Yosë marë' sacatacaso' ya'huërinso'*

<sup>7</sup> Ina quëran itantarin: "Patron ya'huëhuachina, piyapinën camairin. Camaihuachina, iminënquë sacatërin. Pë'tahuanënpitanta' a'pairin. Nani sacatohuachina, imin quëran huënantahuachina, patroni a'naroáchin a'carin, ¿topiramahuë' ti? <sup>8</sup> Co naporinhuë'. Patron'ton yacoshatërin. Napoaton piyapinën sha'huitërin. 'Cosharo' niquë'. Ina quëran nitaparahuaton, o'huintoco ca'i. Nani coshatohuato, o'shitoco,' itërin. Nani coshatohuachina, naporu huarë' piyapinënso' coshatërin. <sup>9</sup> Piyapinën camairin ni'ton, natërin. 'Ma noyanquën ni'ton, natëranco. Ina marë' "Yosparinquën," ' co itërinhuë'. <sup>10</sup> Canpitanta' iyaro'sa', Yosë sha'huitohuachinquëma', natëco'. Nani natëhuatama': 'Topinan piyapinënpoa' ni'tëhua', natërëhua', nitoco'. Ya'ipiya natëcamaso' ya'huërin,' itërin Quisosori.

*Chana caniori maninsopita anoyatërinso'*

<sup>11</sup> Ina quëran Cariria parti na'huëtahuaton, Quirosarinquë pa'sarin. Samaria yonsan ya'cariya pa'nin. <sup>12</sup> Inaquë paaton, a'na ninanoquë canconin. Canconpachina, shonca quëmapi'sa' chana caniori maninsopita quënanconin. Inapitaso' aquëmiáchin huanirahuatona', <sup>13</sup> chiniquën nontopi:

—¿Quiyanta' Maistro nosoroatoncoi anoyatocoi topiraihuë'! itopi.

<sup>14</sup> Napotohuachinara, ni'sahuaton, itapon:

—Paatoma' corto hua'an noyatëramaso a'notonco', itërin. Napotohuachina, pa'pi.

Paasoi', a'nanaya canio inquipi. Noyatopi. <sup>15</sup> A'nara': "Nani noyatërahuë," ta'ton, ayanquintarin. Iratapon pochin "¿Ma noyacha Yosëso' ni'ton, anoyatërinco paya!" tosarín. <sup>16</sup> Quisosoquë huënantahuaton, nantëntaquëchin isonquirin. Isonquirahuaton, "Yosparinquën, Siniro," itërin. Samaria piyapi inaso'.

<sup>17-18</sup> —Shonca ya'pi anoyatopirahuë', a'naíchin huënantahuaton, "Yosparinquën," itërinco. Inaso' nisha piyapi niponahuë', Yosë yonquirin. A'napitaso nipirinhüë' co "Yosparinquën," itërinacohuë', tënin.

<sup>19</sup> Ina quëran itantarin:

—Huanirahuaton iyasha, noya paquë. Yosë natëran ni'ton, noyatomiatëran huachi, itërin.

*Yosë hua'anëntarinso'*  
(Mateo 24.23-28, 36-41)

<sup>20</sup> Ina quëran Parisiuro'sari huëcapairahuatona', itapona':

—¿Onporota' Yosë isoro'paquë hua'anëntarin? itopi.

—Yosë hua'anëntohuachin iyaro'sa', co a'ninquëchin ya'noarinhuë'. <sup>21</sup> “Isëquë ya'huarin,” co taponahuë'. “Pasëquë ya'huarin,” co taponahuë'. Yosë hua'anëntohuachinquëma', ya'coancantarinquëma', itërin.

<sup>22</sup> Ina quëran ca'tano'sanënpita itantarin:

—A'na tahuëri iyaro'sa', panantarahuë. Naporo' nohuantaramaco. Yosë quëran quëmapico ni'to, o'mantararahuë. “Manóton o'manta'in,” tosapiramahuë', co naporo' quënanaramacohuë'. <sup>23</sup> A'naquën yanonpintarinënuëma'. “Nani o'mantarin. Pasëquë ya'huarin,” itarinënuëma' a'naquën. “Patoro'pa' ya'huarin, quiyaso' nitotërai,” itarinënuëma' a'naquëonta'. Ina pochin nontohuachinënuëma', ama natëcosohuë'. Ama inapita imacosohuë'. <sup>24</sup> A'nanaya o'mantararahuë. O'cori' huënsha' topachina, ya'ipi parti a'pintërin. Inapochachin a'na tahuëri ya'ipi piyapi'sa' ni'sarinaco. <sup>25</sup> Iporaso nipirinhüë' chiniquën parisita'huaso' ya'huërin. Na'a piyapi'sa' co nohuantarinacohuë'. No'huiarinaco. <sup>26-27</sup> Iráca Noi pënëntopirinhüë', co natëpihuë'. Co natëtonahuë', topinan ya'huëcaisoráchin cancantopi. Coshatapi, o'osapi, sa'asapi, hui'ninpitanta' aso'yapi. Napoatona', co manta' Yosë yonquipihuë'. Noiso nipirinhüë', Yosë natëton panca nancha ninin. Nani tinihuachina, inaquë ya'conin. A'napitaso' co yonquipirinhüë', a'nanaya panca pacon pa'sarin huachi. Naporo' ya'ipiya chimiitopi. Inapochachin piyapi'sa' topinan ya'huaso'i, a'nanaya o'mantararahuë. <sup>28</sup> Notonta' iráca Sotomaquë ya'huëpirinhüë'. Inaquë a'napitaso' topinan ya'huatona', coshatápi, o'osápi, nipa'antápi, ma'sha sha'sapi, pëiapi. <sup>29</sup> Napoápirinhüë', Noto pipihuachina, naporo tahuëri chachin Yosë nohuanton, inápa quëran pën a'paimarin. A'nanaya ta'huantopi. <sup>30</sup> Inapochachin canta' a'na tahuëri Yosë quëran quëmapico ni'to, ya'noantarahuë.

<sup>31</sup> “Ina tahuëri nanihuachin, co ma'shanëmapita yonquicaso' ya'huaponhuë'. Pëinëma aipi ya'huëhuatama', ama ma'sha macacaso marë tëranta' ya'concosohuë'. A'naroáchin ta'aco'. Iminquë ya'huëhuatama', ama pëinëmaquë paantacosohuë'. Topinan paco'. <sup>32</sup> Iráca Noto sa'in ma'shanënpita yonquiaton, co a'naroáchin ta'arinhuë'. Napoaton co cha'ërinhuë'. Ina yonquico'. <sup>33</sup> Noya nanpicamasoáchin yonquihuatama', topinan quëran nanopiarama'. Chiminpatama', parisitomiatarama'. Nipirinhüë', casáchin yonquihuatamaco, tëpapiirinënuëmaonta', noya noya nanopimiatontarama'.

<sup>34</sup> O'mantahuato, naporo' tashi' cato' piyapi ina pë'saraquëáchin huë'ësapirinhüë', a'nara' imarinco ni'ton, anquëniri inápaquë quëpantararin. A'naso nipirinhüë' patarin. <sup>35</sup> Cato sanapi shi'shi' pë'sanapirinhüë', a'nara' quëpantararin. A'naso nipirinhüë' patarin. [ <sup>36</sup> Cato quëmapi ina iminquëáchin sacatapirinhüë', a'nara' quëpantararin, a'nara' patarin,] ténin Quisoso.

<sup>37</sup> —¿Insëquëta' Siniro napoapi? itopi.

—Ma'sharo'sa' chiminpachina, tamëro'sari huëcapai, itërin. (O'mantahuachin, ya'ipiya nitotapi, tapon naporin.)

## 18

### *Coisë naporinso'*

<sup>1</sup> “Chiniquën cancantatë', apira apira Yosë nontacaso' ya'huërin,” ta'ton, pënënto nanan sha'huitantarin ama amitona' a'pocaiso marëhuë'. A'chintaton, itapon: <sup>2</sup> “A'na ninanoquë a'na coisë ya'huërin. Co manta' Yosë të'huatërinhuë'. Piyapi'santa' co nosororinhüë'. <sup>3</sup> Ina ninanoquë chachin a'na quëyeron ya'huëpirinhüë', inimiconëni na'con ihuarin. Napoaton coisëquë pa'nin. ‘Paso' quëmapi ihuarinco. Sha'huitëquë' quëtanta'inco. Ana'intëquë', itopirinhüë', co nohuantërinhuë' catahuacaso'. Nani tahuëri paantahuaton, inachachin inachachin itantarin. <sup>4</sup> Hua'qui' coisëri co natëpirinhüë', napoin quëran ami ami natanin. ‘Co' mini Yosë të'huatërahuë'. Piyapi'santa' co nosororahuë. <sup>5</sup> Iso quëyeronso nipirinhüë' apinico. Apira apira huëcapaihuachincora, pinatanahuë. Co huachi ahuantërahuë'. Napoaton inimiconën ana'antarahuë', ténin.

<sup>6</sup> Ni'co'. Coisë co noyahuë' niponahuë', napoin quëran quëyoron catahuarin. <sup>7</sup> ¡Yosëso nipirinhuë' nóya ni'ton, huayoninsopita na'con catahuarin! A'napitari aparisito-huachina', Yosëri no'tëquën ana'intarin. Tahuërirë chachin, tashirë chachin ina non-topi ni'ton, catahuaarin. Co naniantarinhüë'. <sup>8</sup> Tahuëri nanihuachin, a'naroáchin ana'intarin. Napoaponahuë' o'mantahuato, ¿na'a ya'pita'ma' natëarinaco quënaimapo to?" itërin Quisosori.

*Cato' piyapi Yosë nontopiso'*

<sup>9</sup> A'naquën piyapi'sa' ya'huëpirinahuë'. "Quiyasáchin no'tëquën Yosë natërai. A'napitaso' co quiya pochin natëpihuë'," toconpi. Napopirinahuë', inapita pënénacaso marë' Quisosori itërin: <sup>10</sup> "Cato' quëmapi Yosë chinotopiso pëiquë Yosë nontacaso marë' pa'pi. A'naso' parisio. A'nanta' coriqui copirno marë' ma'patërinso'. <sup>11</sup> Parisioso' huani-rahuaaton, sacaronquë Yosë nontërin: "Tata Yosë, yanontëranquën. Caso' noyaco. Ina marë' noya ni'nanco ni'ton: "Yosparinquën," itëranquën. Co a'napita pochincóhuë'. Co ihuatërahuë'. Co nonpinahuë'. Co monshihuanahuë'. Paso' quëmapi co noyahuë'. Caso nipirinhuë' co ina pochincóhuë'. <sup>12</sup> Nani simana catoro' ayonarahüë. Ya'ipi canarahüë quëran, diesmo quëma marë' acorahuë,' itërin Yosë nontaton. <sup>13</sup> A'naso nipirinhuë' co ya'caritërinhuë'. Tapanaton, monshoárin. Oshanën marë' sëtërin. "Tata Yosë, caso' oshahuaco. Nosoroatonco, oshanëhuë inquitoco," itërin. <sup>14</sup> Ina oshanën inquitaton, Yosëri noya ni'nin. Parisioso nipirinhuë', co noyahuë' ni'nin. A'napita nocanpatama', a'na tahuëri Yosë atapanarinquëma'. Nipirinhuë': "Caora co nanitërahuë' noya nica'huaso'. Catahuaco Siniro,' topatama', noya acoarinquëma'," tënin Quisoso.

*Hua'huaro'sa' nosororinso'*  
(*Mateo 19.13-15; Marcos 10.13-16*)

<sup>15</sup> Ina quëran hua'huaro'sa' quëpi Quisosori së'huamotocaso marë'. Së'huamotorahuaaton, inapita marë' Yosë nontërin. Hua'huaro'sa' quëpisopita ca'tano'sanënpitari yaa'papirinahuë'.

—Ama napotocosóhuë'. Quisoso apinama', itopi. <sup>16</sup> Quisosoriso nipirinhuë' itërin:

—Tananpítoco' hua'huaro'santa' huë'ina'. Ama a'pacosóhuë'. Hua'huaro'sa pochin cancantohuatama', Yosë hua'anëntërinquë ya'conarama'. <sup>17</sup> Tëhuëenchachin itëranquëma'. Hua'huaro'sa' a'naroáchin yaimarinaco. Co'so' inapita pochin cancantohuatamáhuë', co Yosë hua'anëntërinquë ya'conaramahuë', itërin.

*Ma'huan yaimarinso'*  
(*Mateo 19.16-26; Marcos 10.17-27*)

<sup>18</sup> Ina quëran a'na hua'ani Quisoso huëcapairin.

—Quëmaso' Maistro noyanquën, tënahüë. ¿Ma'ta' caso' nii nanpimiata'huaso marë'? Sha'huítoco canta' noya nii, itiirin.

<sup>19</sup> —¿Ma'marëta' "Quëmaso' noyanquën" itëranco? Yosëíchin noyaso'. <sup>20</sup> Iráca pënëntërinso' nitotëran. "Ama sa'an tēhuananpitéquësóhuë'. Ama piyapi tēpaquësóhuë'. Ama ihuatēquësóhuë'. Ama nonpinapiquësóhuë'. Tata natëquë'. Mamanta' natëquë'," tënin Yosë iráca pënëntaton, itërin.

<sup>21</sup> —Hua'huatapo quëran huarë' ya'ipi inapita natërahuë, itërin.

<sup>22</sup> Ina natanahuaaton, Quisosori itantarin:

—Isonta' Yosë nohuantërin. Paaton, ya'ipi ma'shanënpita pa'anconquë'. Coriqui canaranso' sa'ahuaro'sa' quëtonquë'. Ina quëran imaquico. Inapotohuaaton, Yosë'pa' na'con canamiataran, itërin.

<sup>23</sup> Ina natanahuaaton, co huachi noya cancantërinhuë'. "Hua'huayátërahuë ma'sha ya'huëtërinco," ta'ton, sëtërin. Sëtaton, pa'nin. <sup>24</sup> Napohuachina, Quisosori itërin:

—Sacai quëran ma'huano'sa' Yosë hua'anëntërinquë ya'conapi. <sup>25</sup> Ni'co' iyaro'sa'. Nahuan huëratën pi'pira'huaya naninën ya'huëtërin. Camiyo panca masho ni'ton,

sacai' inaquë ya'conacaso'. Ina quëran saca sacai' ma'huano'sa' Yosë hua'anëntërinquë ya'conacaiso', itërin.

<sup>26</sup> Ina natanahuatona', pa'yanpi.

—¿Incha nica cha'ërë'poya? itopi.

<sup>27</sup> —Co insonta' inaora nanitërinhuë' cha'ëcaso'. Yosëíchin nanitërin anoyacancantinquëmaso'. Ya'ipi nanitaparin, itërin Quisosori.

<sup>28</sup> —Ni'quë' Siniro, quiyaso' ya'ipi ma'shanëhuëi patahuatoi, imasarainquën, itërin Pitrori.

<sup>29</sup> —Tëhuëinchachin iyaro'sa', nani ma'sha patohuatama', na'con na'con Yosë catahuarinquëma', tënahuë. A'naquëma' Yosë hua'anëntërinso' a'chinacamaso marë' pëinëma', sa'ama', iyaparima', tatama', mamama', hui'nama', inapita patarama'. <sup>30</sup> Ca marë' patohuatama', ipora chachin Yosë na'con na'con quëtantarinquëma'. Ina quëran a'na tahuëri Yosë'pa' nanopimiatarama huachi, itërin Quisosori.

### *Chiminacaso' sha'huitantarinso'*

*(Mateo 20.17-19; Marcos 10.32-34)*

<sup>31</sup> Ina quëran ca'tano'sanënpita amashamiachin quëparahuaton, itantarín: “Iporaso', Quirosarinquë paantarëhua'. Inatohua' ya'huasëhua', Yosë quëran quëmapico nipirahuë', nani ma'sha onpotarinaco. Pënëntona'piro'sa' iráca ninshitopiso chachin napotarinaco. <sup>32</sup> Hua'ano'sa' masahuatonaco, nisha piyapi'saquë yo'coaninaco. Tëhuuarinaco, no'huiarinaco, ipitarinaco. <sup>33</sup> Chiníquën huihuirahuatonaco, tëpararinaco. Napoaponahuë', cara tahuëriya quëran nanopiantarahuë,” itërin.

<sup>34</sup> Natanaponarahuë', co nitotopihuë'. Ma'sona tapon naporinso' co yonquipihuë'.

### *Somaraya anoyatërinso'*

*(Mateo 20.29-34; Marcos 10.46-52)*

<sup>35</sup> Ina quëran Quiricoquë ya'caritohuachina, a'na quëmapi quënanconin. Ira yon-sanquë huënsëarin. Somaraya ni'ton, nani tahuëri inaquë huënsëaton, coriqui topin-an ma'patárin. <sup>36</sup> Na'a piyapi'sa' iratapi, natanaton: “¿Inta' huë'sarin?” topachina, <sup>37</sup> “Quisoso Nasaritoquë ya'huërinso' huë'sarin,” itopi. <sup>38</sup> Ina natanahuaton, chiníquën nontërin:

—¡Nosoroco Siniro! Quëmaso' Tapico' shinquën. Yosë a'paimarinquën ni'ton, nosoroco canta', itërin.

<sup>39</sup> A'naquën quëchitopisopitari natanahuatona', no'huipi. “Ta'tëquë,” itopirinahuë', aquëtë chachin chiníquën nontërin.

—Nosoroco Siniro. Quëmaso' Tapico' shinquën. Onpopionta' catahuaco, itantarín.

<sup>40</sup> Quisososo' chiniconahuaton, camaitërin quëcacaiso'. Quëshihuachinara:

<sup>41</sup> —¿Ma'ta' iyasha onpochinquën? itërin.

—Anoyarayato Siniro canta' ni'chi, itërin.

<sup>42</sup> —Noyapa'. Natëranco ni'ton, anoyarayataranquën, itërin.

<sup>43</sup> Itohuachina, a'naroáchin noya ni'tërin. “¡Ma noyacha Yosëso' ni'ton, anoyaray-atërinco paya!” ta'ton, Quisoso imarin. Piyapi'santa' pa'yatatona', “Ma noyacha Yosëso' ni'ton, anoyarayatërin paya,” topi.

## 19

### *Saquio anoyacancantërinso'*

<sup>1</sup> Quiricoquë canconahuaton, ninano huáncana pa'sarin. <sup>2</sup> Inaquë a'na ma'huan ya'huërin. Saquio itopiso'. Inaso', coriqui copirno marë' ma'patona'piro'sa' hua'anën ni'ton, chiníquën nanantërin. <sup>3</sup> Quisoso inaquë huë'pachina, na'a piyapi'sari yamotërapí. Saquionta': “Canta' Quisoso nohuichi,” ta'ton, huë'pirinhuë'. Mo'copiya ni'ton, co nanitërinhuë' quënanacaso'. <sup>4</sup> Napoaton ta'arë'nachin piyapi'sa' na'huëtërahuatón,



naraquë nanpëconin. “Isëquëchin Quisoso huë'sarin,” ta'ton, inaquë huënsëarin Quisoso nococaso marë'. <sup>5</sup> Quisososo' inaquë canconahuaton, në'pëconin.

—Iya Saquio, manóton nohuaraquë'. Ipora tahuëri quëma pëinënquë yacahuaranquën, itërin.

<sup>6</sup> Napotohuachina, manorahuaton, nohuaraimarin. Pa'yataton, “Noya Maistro. Huëquë' ni'quico,” itërin. Ina quëran pëinënquë quëparin. <sup>7</sup> Piyapi'sari quënanahuatona', ninontapi. “¿Onpoatonta' oshahuan pëinënquë yacahuatonin?” nitopi. <sup>8</sup> Saquioso nipirinhuë' Quisoso a'chininso' natanahuaton, noya natërin. Napoaton itapon:

—Nani ma'sha Siniro ya'huëtërinco. Ipora patoma sa'ahuario'sa' quëtarahuë. Iráca a'naya a'naya nonpintato, ihuarahuëso' na'con na'con quëtantarahuë. A'na marëichin nipirinhuë', catapini quëtantarahuë, itërin.

<sup>9</sup> Itohuachina, Quisosori itërin:

—Ipora tahuëri Yosë nicha'ërinquën. Sa'an, hui'nanpita, inapitanta' nicha'ërin. Apraan shinquën ni'ton, nicha'ërinquën. <sup>10</sup> Na'a piyapi'sa' co Yosë natëtonahuë', chihuëpi pochin nipi. Inapita yonica'huaso marë' o'marahuë. Cancanëna' anoyacancanta'huaso marë' o'marahuë, tënin Quisoso.

### *Canacaso marë' coriqui quëtërinso'*

<sup>11</sup> Na'a piyapi'sa' natanapi. Paatona', Quirosarinquë ya'caritërapí. “Ipora tahuëri'sa' Yosë hua'anëntarinpoa huachi,” topi. Napoaton Quisosori a'na pënënto nanan sha'huitërin:

<sup>12</sup> “A'na quëmapi aquë pa'sarin hua'an ya'conacaso marë'. Yapa'pachina, piyapinënpita nontërin: ‘Inatohua' pa'pato, copirno chiniquën nanan quëtërinco naro'pa' hua'anënta'huaso marë'. Oshaquëran chiniquën nanan quëtöhuachinco, huënantarahuë', tosahuaton, <sup>13</sup> shonca inpriatonën amatërin. Huë'pachinara, a'naya a'naya coriqui quëtërin. Napopináchin quëtëra'piarin. ‘Iporaso' aquë pa'sarahuë. Iso coriqui quëchinquëma' ma'sha pa'anatoma', na'con na'con canacamaso marë', itërin. Itahuaton, pa'nin. <sup>14</sup> Piyapinënpitaso nipirinhuë' co nohuantopihuë'. No'huipi. Napoaton comisionënpita a'papi copirno sha'huitacaiso marë'. ‘Ina quëmapi co nohuantëraihuë' hua'anëntiincoiso'. Ama acoquësöhuë', itoonpi.

<sup>15</sup> Copirnosó nipirinhuë' co comisionënpita natëtonahuë', chiniquën nanan quëtërin. Napotohuachina, ya'huërinquë huëntarin. Canquirahuaton, inpriatonënpita amataantarin. Huë'pachinara, ‘¿Onpota' canarama?’ itëra'piarin. <sup>16</sup> A'naso' huë'sahuaton, itërin: ‘Ina nápo' coriqui siniro quëtëranco. Ma'sha pa'anato, nani shoncaro' aquëtë canarahuë', itërin. <sup>17</sup> ‘Ma noya sacatëran. Natëranco ni'quëhuarë', hua'an aco'inquën. Shonca ninanoro'sa' hua'anëntaran,' itërin. <sup>18</sup> Ina quëran a'na inpriatonën huë'pachina, itërin: ‘Ina nápo' coriqui, siniro, quëtëranco canta'. Ma'sha pa'anato, a'natëraporo' aquëtë canarahuë', itërin. <sup>19</sup> ‘Natëranco ni'quëhuarë', quëmanta' hua'an aco'inquën. A'natërápo ninanoro'sa' hua'anëntaran,' itërin.

<sup>20-21</sup> A'nanta' nipirinhuë' huë'sahuaton, itërin: ‘Quëmaso' siniro, co nosororancoihuë' ni'ton, të'huatëranquën. Co sacataponahuë', canaran. Co sha'topiranhuë', nitërinso' manan. Canahuato, topinan osëretarinco, ta'to, co sacatërahüë'. Ina nápo' coriqui quëtëranco'so' panioquë so'pinahuato, taparahüë. Ma'tana ya'huarin,' toconin. <sup>22</sup> ‘Quëmaso' co noyanquënhuë', chiroran. Co pi'pisha tëranta' natërancohuë'. Quëmaora nanamën quëran napotaranquën. Co sacataponahuë', canaran, ¿itëranco ti? <sup>23</sup> ¿Onpoatonta' nipachin co bancoquë acoranhüë'? Inaquë acoran naporini, pi'pian tëranta' canaitohüë', itërin. <sup>24</sup> Ina quëran piyapinënpita sha'huitërin. ‘Iso quëmapi topinan quëran coriqui quëtërahüë. Coriqui osëretahuaton, paso' quëmapi quëtëquë', na'con na'con canarinso', itërin. <sup>25</sup> ‘Co'ta, inaso' nani hua'huayátërahüë coriqui ya'huëtërin. ¿Naquëranchin quëtanta'i ti?’ itërin piyapinëni. <sup>26</sup> ‘Ina mini quëtëquë'.

Noya natërinco ni'ton, na'con ya'huëtarin. Na'con na'con quëtantarahuë. A'naso nipir-inhuë' co natërincohuë' ni'quëhuarë', pi'pian ya'huëtërinso tëranta' osërëtarahuë. <sup>27</sup> Co nohuantërinacosopitaso nipirinhue' maconco'. Isëquë chachin tēpaco', tēnin," itërin Quisosori.

*Quirosarinquë canconinso'*

*(Mateo 21.1-11; Marcos 11.1-11; Juan 12.12-19)*

<sup>28</sup> Ina tosahuaton, paantarin. Quirosarinquë ya'caritëriarin. <sup>29</sup> Ya'caritahuaton, Oriposë panënuquë canconin. Ina ya'cariya cato' ninano' ya'huërin. A'naso' Pitipaquí itopi. A'nanta' Pitania itopiso'. Inaquë canconahuaton, cato' ca'tano'sanën sha'huitërin.

<sup>30</sup> —Paso' ninanoquë paco'. Pëi' ya'natirinquë canconpatama', mora hui'napishin a'sonpinan quënanconarama'. Co incari tëranta' huënsëchátërarinhue'. I'quiritahuatoma', quëshico. <sup>31</sup> “¿Onpotaomata' i'quiritarama'?” itohuachinquëma', “Sinioro nohuantërin,” itoco', itërin.

<sup>32</sup> Itohuachina, pa'pi. Pa'sahuatona', mora a'sonpinan quënanconpi. Quisosori sha'huitërinso chachin quënanconpi. <sup>33</sup> I'quiritaquëya':

—¿Onpotaomata' moraso' i'quiritarama'? itërin hua'anëni.

<sup>34</sup> —Siniorori nohuantërin, itohuachina:

—Inta nipachin, quëpaquë', itërin.

<sup>35</sup> Napotohuachina quëpatopi. Mora aipi a'mopiso' huëtohuachinara, ina aipi Quisoso huënsërahuaton, pa'sarin. <sup>36</sup> Na'a piyapi'sa' quëchitahuatona', a'mopiso' iraquë huëtopi. Chiníquën hua'an pochin nicatona', napotapi. Inaquë Quisoso pa'sarin. <sup>37-38</sup> Oriposë panën quëran nohuarapona pochin, imarinsopita chiníquën nonsapi.

—¡Ma noyacha Quisoso paya! Nani ma'sha nitotërin. Yosë nohuanton, na'a cania'piro'sa' a'naroáchin anoyatërin, ni'nai. Yosëri a'paimarin hua'anëntinpoaso marë'. Siniorori chachin chiníquën nanan quëtërin. ¡Ma noyacha Yosëso paya! Nanan anoyatërinpoa' ni'ton, noya yonquirinpoa', topi. Noya cancantatona', napopi. <sup>39</sup> Parisioro'sari natanahuatona', no'huipi.

—Imarinënsopita Maestro, sha'huitëquë' ta'china', itopi.

<sup>40</sup> —Ta'topi naporini, na'piro'sa' tëranta' chiníquën nointonahuë', tēnin Quisoso.

<sup>41</sup> Ina quëran Quirosarin notënanquë canconpi. Canconpachina, piyapi'sa' yonquiaton, Quisoso sëtërin. Sëtatón, na'nërin. <sup>42</sup> “Hua'qui' pënënpiranquëmahuë', co yanatana-macohuë'. Ipora tëranta' no'tëquën yonquirama' naporini, noya cancanchitomahuë'. Iporaso nipirinhue' co huachi nanitaramahuë'. Co natantochináchinhue' cancantërama'.

<sup>43</sup> Napoaton a'na tahuëri parisitarama'. Inimiconëmapita huëcapairahuatënënuquëma', tancapitarinënuquëma'. Ya'ipi parti quëran ahuearinënuquëma'. Ninano pairapiramaso' inápa niponahuë', ma'sha a'mitë a'mitëtapí ya'conacaiso marë'. <sup>44</sup> Ya'conahuatona', pëinëmapita ohuatapi. Co a'na na'pi tëranta' niya'huiritarinhue'. Ya'ipinquëma' ta'huantarama'. Nicha'ëca'huanquëmaso marë' o'mapirahuë'. Co nohuantëramacohue' ni'ton, Yosë ana'intarinquëma huachi,” tēnin Quisoso.

*Nipa'antopisopita Yosë chinotopiso pëi quëran a'parinso'*

*(Mateo 21.12-17; Marcos 11.15-19; Juan 2.13-22)*

<sup>45</sup> Ina quëran Yosë chinotopiso pëiquë ya'conahuaton, nipa'antopisopita a'parin.

<sup>46</sup> —Yosë quiricanën quëran tapon: “Ca nohuanto, pëinëhuë ya'huë'in piyapi'sa' non-tiinacoso marë',” tēnin Yosë. Canpitaso nipirinhue', ihuatëro'sa' ya'huëpique pochin nitërama', itërin Quisosori. Itahuaton, a'parin.

<sup>47</sup> Ina quëran nani tahuëri inaquë a'chinin. Corto hua'ano'sa', cotio maestro'sa, ninano' hua'ano'sa', inapitaso' no'huitona', Quisoso yatëpapirinhue'. <sup>48</sup> Na'a piyapi'sari nóya natanatona' yamotopi ni'ton, co nanitopihuë' macacaiso'.

## 20

*Chiniquèn nanantërinso'**(Mateo 21.23-27; Marcos 11.27-33)*

<sup>1</sup> Ina quëran Yosë chinotopiso pëiquë paantarahuaton, piyapi'sa' a'chintantarin. Noya nanan pënëntaquëya', cotio ansiano'sa', cotio maestro'sa', corto hua'ano'sa', inapita huë'pi.

<sup>2</sup> —¿Onporahuatonta' chiniquèn nanantaton, nipa'antopisopita a'paran? ¿Inta' nanan quëtërinquèn ina pochin nicacaso'? Sha'huitocoi, itopi.

<sup>3</sup> —Noyapa', carinquëmanta' natainquëma'. Ina sha'huitohuatamaco, canta' insosona nanan quëtërinco'so' sha'huitaranquëma'. <sup>4</sup> ¿Incarita' Coansha nanan quëtërin piyapi'sa' aporintacaso marë'? ¿Yosëri nanan quëtërin, piyapiri nica? ¿Ma'ta' tënama' canpita yonquiatoma'? Sha'huitoco carinquëmanta' nanan quëtërinco'so' sha'huichinquëma', itërin Quisosori.

<sup>5</sup> Natanahuatona', inahua capini ninontopi. “¿Ma'ta' itahua'? ‘Yosëri nanan quëtërin aporintacaso’, itohuatëhua': ‘¿Onpoatomata' nipachin co natëramahuë’?’ itarinpoa'.

<sup>6</sup> Nipirinhuë': ‘Co Yosëri nanan quëtërinhuë'. Piyapiri quëtërin, itohuatëhua', na'a piyapi'sa' chiniquèn no'huiarinënpoa'. Na'piquë të'yaratënënpoa', tëpamarinënpoa'. ‘Yosëri a'parin pënëinpoaso marë’, topi ya'ipiya,” nitopi. <sup>7</sup> Nani ninontohuachinara, Quisoso itapona': “Ahuën. Co quiyaso' nitotëraihuë'. ¿Incariso' Coansha nanan quëtomara? Co nitotëraihuë',” toconpi.

<sup>8</sup> —Napoahuarë', co carinquëmanta' insosona nanan quëtërinco'so' sha'huitaranquëmahuë', itërin Quisosori.

*Inpriatoro'sa' co noyahuë' yonquipiso'**(Mateo 21.33-44; Marcos 12.1-11)*

<sup>9</sup> Ina quëran piyapi'sa' a'chintacaso marë', iso pënënto nanan sha'huitaantarin: “A'na quëmapi pancana iminin. Inaquë opasáchin sha'nin. Nani tiquihuachina, inpriatoro'sa' acorin a'paicaiso marë'. ‘Sacatëramaso marë', nitërinso' patomachin maco'. Patomachin canta' acotoco,’ itërin. Itahuaton, a'na parti pa'nin. Hua'qui' inaquë ya'huërin.

<sup>10</sup> Nitërinso' nani cayahuachina, piyapinën ya'huërin'pa' a'parin. Patoma nitërinso' ma'caso marë' pa'pirinhuë', inpriatonënpitari masahuatona', ahüëpi. Ahüërahuatona', topinan a'papi. <sup>11</sup> Naquëranchin hua'anëni a'na piyapinën a'pantapirinhuë'. Inanta' chiniquèn no'huitona', ahüëantapi. Ahüëatona', topinan a'paantapi. <sup>12</sup> A'nanta' a'pantapirinhuë'. Pë'sharahuatona', a'papi inanta'.

<sup>13</sup> Napoin quëran hua'anëni yonquirin. ‘¿Ma'cha onpochiya? Na'aya'pi a'papihuë'. Ahüërahuatona', topinan a'pairachinpi. Hui'nahuë nosoropirahuë', ina huachi a'paarahüë. Ina natëapona' nimara,' ta'ton, hui'nin chachin a'papihuë'.

<sup>14</sup> Inpriatonënpitaso' hui'nin quënanahuatona', ninontopi. ‘Paso' hui'napi a'na tahuëri pa'pin chiminpachin, iso no'pa chachin hua'anëntapon. Huëco' tëpa'ahua'. Ya'ipi ma'shanënpita canpoari matahua huachi,' nitopi. <sup>15</sup> Naporahuatona', hui'nin masahuatona', aipiran të'yatahuatona', tëpapi.

Pa'pin natantohuachin, ¿ma'ta' onpotintapon, hui'nin chachin tëpatopi ni'quëhuarë'? <sup>16</sup> A'naroáchin huëntarahuatón, inpriatonënpita tëpapon. Ina quëran nasha inpriatoro'sa' acoantapon, ténahuë,” itërin Quisosori.

Ina natanahuatona':

—¿Ama onporonta' napoinsahuë'! topi.

<sup>17</sup> Napohuachinara, nirayarahuaton, itantarin:

—Napopiramahuë', ¿ma'ta' tapon nipachin pënëntona'pi iráca ninorinso'? Ninshitaton, tapon:

“Na'pi quëran yapëihuachina, a'na na'pi ya'huëpirinhuë', pëina'piro'sa' co nohuantopihuë'. ‘Napoonin,' ta'tona', të'yatopirinahuë',

hua'anëni maantarahuatón, 'Iso na'pi mini na'con na'con nohuantërahüë pëica'huaso marë', ta'tón, noya acoantarín.

<sup>18</sup> Ina na'pi i'patohuatëra, anotatë' ya'panë'. A'na tahuëriso nipirinhüë' ina na'pi chachín insosona anoantohuachín, ni'sharianín," itërin Quisosori.

<sup>19</sup> Ina natanatóna', corto hua'ano'sa', cotío maistro'sa', inapitaso' no'huitopi: "Chinotatonpoa', pënënarínpoa'," ta'tóna', yamapirínahuë' tashinan pëiquë po'mocaiso marë'. Piyapi'sa' të'huatatóna', co mapihüë'.

*Copirno marë' coriqui ma'patërinso'*  
(Mateo 22.15-22; Marcos 12.13-17)

<sup>20</sup> Napoaton a'naquën quëmapi'sa' amatahuatóna', itapóna': "Nonpintatoma', Quisosoquë paco'. Yaimaramaso pochín nícátoma', ina nontoco' atëhuëcaso marë'. Ina quëran sha'huirapihuátama', hua'ani sontaro'sa' a'paarin ina macacaso marë'," itopi.

<sup>21</sup> Itohuachínara, pa'pi Quisoso nontapóna':

—Ma noya Maistro nontërancoi. No'tëquën a'chínan. Yosë nanamën no'tëquën a'chintatoncoi, co hua'an tëranta' të'huatëranhüë'. <sup>22</sup> Napoaton yanatanainquën. Noma copirnosó' nisha piyapi niponahuë', ya'ipínpoa' hua'anëntërinpoa'. Coriqui ma'painpoaso marë' comisionën a'parín. Huë'pachína', ¿noya ipora quëtacaso' tí? ¿Ma'ta' Yosë nohuantërin nica'huaiso'? Sha'huitocói nitochíi, itopi.

<sup>23</sup> Quisososo nipirinhüë' yonquípísopita nitotërin.

—¿Onpoatomata' yaatëhuëramaco? <sup>24</sup> Noma coriqui quëshico ni'i, itërin. Napohuachína, quëtopi.

—¿Inta' isoso' nonanpiso'? itohuachína, —Noma copirno, itopi.

—¿Inta' nininëonta' isëquë ninshitopi? itaantahuachína, —Noma copirno chachín, itaantapi.

<sup>25</sup> —Copirno ma'shanën ni'quëhuarë' inachachín quëtaantaco'. Naporahuaton, Yosëso' nininpoa' ni'tón, hua'anëntërinpoa'. Ya'ipi cancanëma quëran ina natëcaso' ya'huërin, itërin.

<sup>26</sup> Na'a piyapi'sari Quisoso yaatëhuëpirínahuë', co nanitopihüë':

—Ma noyacha a'panitërin paya, ta'tóna', co huachi natanpíhuë'.

*Piyapi'sa' nanpíantarapíso'*  
(Mateo 22.23-33; Marcos 12.18-27)

<sup>27</sup> Ina quëran a'napita cotío hua'ano'sa' huë'pi. Satosioro'sa' itopiso'. Inapitaso' nisha a'chínpi. "Piyapínpoa' chimínpatëhua', co onporonta' nanpíantarihuahuë'," toconpi. Inapítanta' Quisoso yanonpintatóna', huëcapaipi.

<sup>28</sup> —Íráca Maistro Moisésë pënëninpoa': "Quëmapi sa'aponahuë co hui'nín ya'huëyátërasohüë' sa'in ayananpíhuachín, ina iíní chachín imóroën maantacaso' ya'huërin. Hui'nahuanpachín, iínco' apoin inari ya'huërëtacaso marë'. Ina quëran mashotohuachín, ma'shanën, no'panën, inapita masarín," tënin Moisésë ninshitaton.

<sup>29</sup> Canchisé iyaro'sa' ya'huërin. Panínanso' sa'apirínhuë'. Co hui'nín ya'huëyátërasohüë', sa'in ayananpírin. <sup>30</sup> Ina iíní chachín imóroën maantarín. Moisésë tëninso chachín manín. Inanta' co hui'nín ya'huëyátërasohüë', chimíantarín. <sup>31</sup> A'na iíonta' inapoantarín. Canchisé iínpita chachín inapoantapi. Co a'naya tëranta' hui'nín ya'huëyátërasohüë', ya'ipi taquípi. <sup>32</sup> Ina quëran sanapínta' chimín huachi. <sup>33</sup> Canchisé iínpitari chachín mapirínahuë', nanpíantacaso' tahuëri naníhuachín, ¿ínquën chachíncha sa'in ninë'poya? itopi.

<sup>34</sup> —Co no'tëquën, iyaro'sa', yonquíramahuë'. Isoro'paquë piyapi'sa' sa'api, so'yapi, inapopi. Ina quëran chimínpi. <sup>35</sup> A'naquën Yosëri noya ni'nínsopita inápaquë pan-tarapí. Nanpíantahuachína', co huachi sa'aponahuë'. Sanapí'santa' co so'yaponahuë'.

<sup>36</sup> Co huachi chimínaponahuë'. Anquëniro'sa pochín nisapi. Nanpíantarapí ni'tón,

Yosë hui'ninpita chachin nisapi. <sup>37</sup> Chiminpisopita tëhuënchachin nanpiantarapi. Ina a'chinchinquëma'. Moisëse chachin ninshitërinso'. Nara'huaya orotarinsó' nicasó', Yosëri nontërin: “Caso' Yosëco. Apraan chinotarinsó. Isaco, Cacopo, inapitanta' chinotarinsó,” ténin Yosë. <sup>38</sup> Nanpirëhuasopitaráchin Yosë chinotarëhua'. Napoaton inapitanta' nani chiminpirinahuë', nanpimiataantapi, itërin Quisosori.

<sup>39</sup> Cotio maistro'sa' natanahuatona', pa'yanpi.

—¡Ma noyacha, Maistro, yonquiran paya! ténin a'na'.

<sup>40</sup> Ina quëran të'huatatona', co huachi nohuantopihuë' nataantacaiso'.

*Yosëri a'paimarinso'*

*(Mateo 22.41-46; Marcos 12.35-37)*

<sup>41</sup> Ina quëran Quisosori itantapon:

—Íraca Yosë quiricanënguë sha'huitërinpoa'. “A'na tahuëri a'na quëmapi acoarahuë piyapi'sa' nicha'ëcaso marë'. Inaso' Cristo,” ténin iráca. Cotio maistro'saso' a'chinpachinara: “Cristoso' Tapico' shiin,” topi. Napopirinahuë', <sup>42</sup> iráca Ispirito Santo nohuanton, Tapiri chachin Cristo ninorin. Sarmoquë ninshitaton, naporin:

Yosëri Sinioronëhuë sha'huitërin: “Inchinanëhuë quëran huënsëquë'

<sup>43</sup> inimiconënpita cari minsëchinquën,” itërin Yosëri, ténin Tapi.

<sup>44</sup> Shia'huain niponahuë', Cristo yonquiaton, “Sinioronëhuë,” ténin Tapi. Piyapi chachin nipirinhuë', Tapiri chinotërin. ¿Onpoatonta' naporin? itërin Quisosori.

*Cotio maistro'sa' yanonpipiso'*

*(Mateo 23.1-36; Marcos 12.38-40; Lucas 11.37-54)*

<sup>45</sup> Ya'ipi piyapi'sa' natantapaquë, ca'tano'sanënpita pënënaton, itapon: <sup>46</sup> “Ni'cona cotio maistro'sa' nonpintochinënguëma'. ‘Noya noyacoí,’ ta'tona', naporopi a'mopi piyapi'sari nicacaiso marë'. Cachiquë pa'pachinara, na'a piyapi'sari nontopi. ‘Huë'cama maistro,’ itohuachinara, pa'yatopi. Niyontonpiso pëiquë ya'conahuatona', hua'ano'sapitarë' yahuënsëconpi. Pita nipachinara, huancánachin yahuënsëconpi. <sup>47</sup> Noya nonaponaraihuë', a'naya a'naya quëyoronos'a' nonpintatona', ma'shanënpita matopi. Ama noninacaiso marëhuë' hua'qui' Yosë nontopirinahuë', co cancanëna quëran natëpihuë'. Ina marë' aquë aquëtë' Yosëri ana'ntarin,” itërin.

## 21

*Quëyoron Yosë marë' coriqui acorinsó'*

*(Marcos 12.41-44)*

<sup>1</sup> Yosë chinotopiso pëiquë a'na cacon ya'huërin. Inaquë coriqui Yosë marë' po'mopi. Quisosori notëërahuatón, na'a ma'huano'sa' ni'nin. Na'con coriqui inaquë po'morapirinahuë'. <sup>2</sup> Ina quëran a'nara quëyoron huë'nin, sa'ahua nininsó'. Catotëra'huayaíchin coriqui po'moquirin. <sup>3</sup> Ina ni'sahuaton, Quisosori itërin:

—No'tëquën itëranquëma', na'a piyapi'sa' na'con coriqui po'morapirinahuë', iso quëyoronso nipirinhuë' na'con na'con po'moquirin. <sup>4</sup> Ma'huano'saso' na'a coriquihuana-tona', ya'sotopisoíchin po'mopi. Iso sanapiso nipirinhuë', pi'pian ya'huëcharinsó', ya'ipi po'moton, tiquirin. Napoaton na'con na'con Yosë quëtërin, ténahuë, ténin Quisoso.

*Yosë pëinën ohuatapiso'*

*(Mateo 24.1-2; Marcos 13.1-2)*

<sup>5</sup> Yosë chinotopiso pëi' nicatona', a'naquën nitapona': —Ma noyápiachin na'pi quëran nipi. A'naquën ninshiyaráchin Yosë marë' acopiso', nitopi. <sup>6</sup> Napohuachinara, Quisosori itërin:

—Íporaso' ya'ipiya noyápiachin ni'piramahuë', a'na tahuëri ya'ipi ohuatapi. Co a'na na'piya tëranta' niya'huiritarinhuë', itërin.



*Ayaro' tahuëri ya'caritërinso'*  
(Mateo 24.3-28; Marcos 13.3-23)

<sup>7</sup> Napohuachina, natanpi:

—¿Onporota' Maistro ohuatapi? Ina tahuëri'sa' naniriahuachin, ¿ma'ta' onporahuachina', nitotapoi? Sha'huitocoi quiyanta' nitochii, itopi.

<sup>8</sup> Napotihuachinara: “Ni'cona iyaro'sa' nonpintochinëinquëma'. A'naquën huëcatona': 'Caso' Cristoco. Yosë chachin a'pairinco,' tosapi. A'napitanta' nonpin nanan sha'huirapi. 'Nani tahuëri naniriarin, nitotërai,' tosapi. Ama inapita imacosohuë'. <sup>9</sup> Nisha nisha parti piyapi'sa' nino'huiapi. Niahüërahuatona', quira nisapi. Ina natanpatama', ama pa'yancosohuë'. Piyapi'sa' co noyahuë' nicatona', na'a quira nisapi. Napoaponahuë', co isoro'pa' ta'huanchätëraponhuë'.

<sup>10</sup> Nisha nisha piyapi'sa' capini quira nisapi. Copirnoros'a' capini nino'huitona', piyapinënpita camairapi quira nicacaiso marë'. <sup>11</sup> A'na parti a'na parti panca ocohua pa'sarin. Cosharori pahuantohuachina', piyapi'sa' tanari tiquirarin. Nisha nisha parti chiniquën canio matarin. Na'a taquirapi. Yosë nohuanton, nisha nisha ma'sha inápaquë ya'noarin. Quënanahuatona', piyapi'sa' pa'yanapi. Ya'ipiya tē'huatapi. Ayaro' tahuëri ya'caritohuachin, ayonquicaiso marë' napaarin.

<sup>12</sup> Co'huara ma'sha onpoyatërasohuë', co noya piyapi'sahuë' masarinëinquëma'. Imaramacoso marë' aparisitarinëinquëma'. Cotio niyontonpiso pëiquë sha'huirapiarinëinquëma'. Tashinan pëiquë po'morarinëinquëma'. Imaramacoso marë' copirno ya'huërinquënta' quëpararinëinquëma'. <sup>13</sup> Naporo' inapitanta' Yosë nanamën sha'huitohuatama', natanapi. <sup>14</sup> Mapachinëinquëma', '¿Ma'cha tonopocoya?' ama tocosohuë'. <sup>15</sup> Catahuanquëma' noya nonacamaso'. Ca nohuanto, noya yonquiarama'. Inimiconënpita co nanitapihuë' a'paniinquëmaso'. <sup>16</sup> Tataparima' co imatonahuë', sha'huirapiarinëinquëma'. Iyaparima', quëmopinëmapita, amiconëmapita, inapita sha'huirapiarinëinquëma'. A'naquëma' tēpararinëinquëma'. <sup>17</sup> Imaramacoso marë' na'a piyapi'sa' no'huiarinëinquëma'. <sup>18</sup> Napoaponahuë', Yosë ni'sarinquëma' Co inquëma tēranta' chimimiataramahüë'. <sup>19</sup> Noya imamiatohuatamaco, cha'ësarama'.

<sup>20</sup> Notohuaro' sontaro'sa' nisha parti quëran huëcatona', Quirosarin tancapitapi. Ina ni'patama', nani tahuëri nanirinsos' nitotarama'. 'Quirosarin ata'huantapi,' tosarama'. <sup>21</sup> Naporo' ta'acaso' ya'huërin. Cotia parti ya'huëhuatama', motopi'pa' ta'aco'. Ninnanoquë ya'huëhuatama', a'naroáchin pipico'. Iminëmaquë ya'huëhuatama', ama ninnanoquë ayancontacosohuë'. <sup>22</sup> Ina tahuëri'sa' nanihuachin, na'con parisitapi. Iráca Yosë quiricanëinquë ninorinsos' chachin naporo huarë' Yosëri chiniquën ana'intarin. <sup>23</sup> Cayorono'sa', hua'huahuano'sa', inapitaso' sacai quëran ta'arapi. ¡Ma'huantacha nisapi paya! Yosëri no'huiton, cotioros'a' ana'intarin. <sup>24</sup> Inimicoros'a' huëcatona', na'a piyapi'sa' sahuëniquë tēparapi. Nisha nisha sontaro'sari ya'huëpiquë quëparapi asacatacaiso marë'. Nisha piyapi'sa' Quirosarinquë ya'conahuatona', camaitapi. Hua'qui' inaquë ya'huapona'. Tahuërinën nanihuachina, Yosë nohuanton, pipiapi.

*Quisoso o'mantacaso' tahuëri*  
(Mateo 24.29-35, 42-44; Marcos 13.24-37)

<sup>25</sup> Ina quëran Yosë nohuanton, pi'i tashiarin. Co huachi yoqui a'pianinhuë'. Tayoraro'sa' inápa quëran anotarín. Marënta' panca co'sacaitapon ni'ton, tēnëntapon. Ya'ipi piyapi'sa' pa'yanapona'. <sup>26</sup> Inápaquë ya'huërin sopitanta' nacon nacontapon. Piyapi'sa' nisha nisha yonquiatona', tē'huatapona'. '¿Ma'cha onporo'poya?' ta'tona', pa'yani yatēpapon. <sup>27</sup> Ina quëran ni'sarinaco. Yosë quëran quëmapico ni'to, chitoro' huancana o'mantararahüë. Chiniquën nanantato, o'mantararahüë. Huënaráchin huënaráchin ya'noarahüë. <sup>28</sup> Napoaton nisha nisha quira nisahuachina', nisha nisha ma'sha onporahuachina', ama pa'yancosohuë'. O'manta'huaso' tahuëri naniriarin

ni'ton, nóya cancantatoma', ninaco. O'mantahuato, noya nicha'ésaranquëma'. Yosë'pa' quëpantaranquëma', itërin Quisosori.

<sup>29</sup> Ina quëran iso pënënto nanan sha'huitërin: "Iquirá nara papotërin quëran nito-toco'. A'napita nararo'santa' yonquico'. <sup>30</sup> Nara ta'amënquë monoantahuachina: 'Nani o'napi naniriarin,' topi. <sup>31</sup> Inapochachin nani ma'sha onporahuachina', nitotarama'. 'O'mantacaso' tahuëri naniriarin. Yosë hua'anëntarínpoa', tosarama'.

<sup>32</sup> No'tëquën itëranquëma'. Co'huara cotioro'sa' huënton ta'huanchatërasohuë', nani ma'sha onporapi. <sup>33</sup> Isoro'pa' ta'huantarin. Pi'iro'tënta' ta'huantarin. Ca nanamëhuëso nipirínhuë' co onporonta' ta'huantarinhuë'. No'tëquën nonahuë ni'ton, ya'ipiya sha'huitëranquëmaso chachin naniarin.

<sup>34</sup> Ni'cona naniantotamaco. Ama pita pa'yatacasoachin cancantocosohuë'. Ama no'pícosohuë'. Ama ma'sharáchin yonquicosohuë'. Ina pochin cancantohuatama', co aquëtë' yonquiaramacohuë'. Co noya ninahuatamacohuë', <sup>35</sup> huënson a'naroáchin ma'sha maninso pochin, a'nanaya o'mantararahuë. Ya'ipi piyapi'sa' a'ninquëchin ni'sarinaco. <sup>36</sup> Napoaton noya cancantatoma', Yosë nontoco' achinincainquëma' cha'ëcamaso marë'. Yosë quëran caso quëmapico ni'to, co imapisopitahuë' ana'intarahuë. Apira apira Yosë nontohuatama', naporo' tahuëri co tapanatomahuë', noya huaniparamaco," tënin Quisoso.

<sup>37</sup> Nani tahuëri Yosë chinotopiso pëiquë a'chinin. Tashi' nipachina, Oripösë panënquë huë'ëcaso marë' pa'nin. <sup>38</sup> Tashiramiachin na'a piyapi'sa' chinotopiso pëiquë pa'pi Quisoso natanacaiso marë'.

## 22

### *Quisoso macacaiso marë' chinotopiso'*

*(Mateo 26.1-5, 14-16; Marcos 14.1-2, 10-11; Juan 11.45-53)*

<sup>1</sup> Cato' tahuëri pahuanarin Pascoa nanicaso'. Naporo' cotioro'sa' niyontonpi Yosëri iráca nicha'ërinso' yonquicaiso marë'. Ina tahuëri nanihuachina, nisha pan ca'pi, co ahuëpocatopisohuë'. <sup>2</sup> Corto hua'ano'sa', cotio maistro'sa', inapitari chinotopi Quisoso tëpacaiso'. Piyapi'sa' të'huatatona', co nanitopihuë' a'ninquëchin macacaiso'.

<sup>3</sup> Shonca catoya'piri Quisoso ca'tanpirinahüë', a'nara' sopairi ya'coancantërin, Cotasë Iscarioti itopiso'. Sopairi ya'coancantohuachina, <sup>4</sup> corto hua'ano'saquë pa'nin. Cotio sontaro'santa' nontërin Quisoso sha'huirapicaso marë'. <sup>5</sup> Natanahuatona', pa'yatopi. Ina marë' coriqui quëtacaiso sha'huitopi.

<sup>6</sup> —Noyapa', ta'ton, Cotasë yonquirarin po'oana quëran a'nocaso marë'.

### *Pascoa tahuëri coshatopiso'*

*(Mateo 26.17-29; Marcos 14.12-25; Juan 13.21-30; 1 Corintios 11.23-26)*

<sup>7</sup> Pascoa tahuëri'sa' nipachina, nisha pan ca'pi, co ahuëpocatopisohuë'. Naporo tahuëri chachin carniroa'hua iráca tëpapiso pochin tëpaantapi yonquicaiso marë'. Nani pi'ipiquë cotioro'sa' naporápi. <sup>8</sup> Quisosonta' yonquirin ina pochin capacaso' ni'ton, Pitro, Coan-sha, inapita sha'huitërin:

—Paatoma', Pascoa cosharo' tapaco' capaquëhuaquë, itërin.

<sup>9</sup> —¿Intohuata' paatoi tapaii? itopi.

<sup>10</sup> —Ninanoquë paco'. Inaquë a'na quëmapi nacapiarama'. Yonquë i'sha chi'yatarin. Ina imaco'. Pëiquë ya'conconpachin, canpitanta' ya'conco'. <sup>11</sup> Pëi' hua'anën quënanconpatama', natanconco'. “¿Insëquëta' patoana ya'huërin Pascoa cosharo' capaca'huaiso'?” tënin Maistro,” itonco'. <sup>12</sup> Napotohuatama', panca patoana a'notarínquëma', inápaquë nininso'. Misa, huënsënan, inapita nani ya'huërarin. Inaquë cosharo' tapaco' canpoa' capaquëhuaquë, itërin Quisosori.

<sup>13</sup> Itohuachina, paatona', ninanoquë canconpi. Quisosori sha'huitërinso chachin quënanconpi. Inaquë Pascoa cosharo' acopi capacaiso marë'.

<sup>14</sup> Ora nanihuachina, Quisoso ca'tano'sanënpitarë' huë'pi. Huëcatona', misaquë huënsëquiipi.

<sup>15</sup> —Apira Pascoa cosharo' ca'sarëhua'. Pa'pi nohuantërahuë canpitaro'co ina capa'huaso'. Ipora tëranta' ca'ahua' co'huara chimianahuë. <sup>16</sup> Yosë natëto, chiminarahuë. Iporáchin Pascoa cosharo' ca'sarahuë. Ina quëran Yosë hua'anëntërinso' naniquë huarë' ca'sarahuë. Naporo' noya noya ya'huarigua', itërin.

<sup>17</sup> Minëa'hua masahuaton, Yosë nontërin. “Yosparinquën, Tata,” itahuaton, ca'tano'sanënpita quëtërin.

—Canpitanta' pi'pian pi'pian o'oco'. <sup>18</sup> Ipora quëran huarë' co huachi huino o'osarahuë'. Yosë isoro'pa' hua'anëntaquë huarë' o'oantarahuë, itërin.

<sup>19</sup> Ina quëran cosharo' masahuaton, “Yosparinquën, Tata,” itahuaton, së'panin. Inapotahuaton, a'naya a'naya quëtërin.

—Ca nonëhuë pochin iso'. Canpita marë' chiminarahuë. Ca chinotatomaco, ca'co', itërin.

<sup>20</sup> Nani coshatohuachinara, ninëa'hua maantarin.

—Huënainëhuë pochin iso'. Huënainëhuë pa'sarin ni'ton, nasha quëran canpitarë' Yosë anoyatërinso' sha'huichinquëma' imacamaso marë'. Huënainëhuë quëran nicha'ësaranquëma'. <sup>21</sup> Napoaponahuë', a'naquëma' carë'quëma chachin coshatapomarahüë', sha'huirapiaramaco. <sup>22</sup> Yosë quëran quëmapico niporahuë', ina nohuanton, chiminarahuë. Napoaponahuë', sha'huirapirincoso', chiniquën parisitapon. Yosëri ana'intarin, tënin Quisoso.

<sup>23</sup> “¿Inquënpoacha yasha'huirapirëhua' nicaya?” nitopi.

### *Chini chiniquën nanantacaso' nohuantopiso'*

<sup>24</sup> Ina quëran inahua capini ninontapi. “¿Inquënpoata' chini chiniquën nanantëre'pëhuaya?” nitopi. Ya'ipiya chiniquën nanan nohuantopi. <sup>25</sup> Napoaton Quisosori itërin: “Nisha piyapi'sa' co Yosë nohuitopihuë'. Hua'anënapita chiniquën nanantatona', piyapinënpita camaipi. ‘Caso' noyaco ni'ton, “a'paitona'pi,” itoco,' toconpi a'naya a'naya. <sup>26</sup> Canpitaso nipirinhüë' ama ina pochin yonquicosohüë'. Insosona chiniquën nanantacaso nohuantohuachin, a'napita na'con na'con catahuacaso' ya'huërin. Hua'an yanipatama', piyapimia pochin cancantoco'. <sup>27</sup> Ni'co'. Hua'anso' huënsërahuaton, coshatarin. Piyapinënpitaso nipirinhüë' sacatapi. Co hua'anën pochin chiniquën nanantopihuë'. Caso nipirinhüë' piyapimia pochin cancantërahuë. Apira apira a'napita catahuarahüë.

<sup>28</sup> Canpitaso' noya imaramaco. Aparisitopirinacohüë', co a'poramacohüë'. <sup>29</sup> Ina marë' Yosë'pa' canaarama'. A'na tahuëri Yosë nohuanton, hua'anëntarahuë. Naporo' canpitanta' acoaranquëma' hua'an pochin nicamaso'. <sup>30</sup> Hua'anëntohuato, carë'quëma' noya coshatërehuaso pochin nóya cancantarama'. Inaquë catahuaramaco ya'ipi israiro'sa' hua'anënta'huaso', itërin.

### *Pitrori nonpinapicaso' ninorinso'*

*(Mateo 26.31-35; Marcos 14.27-31; Juan 13.36-38)*

<sup>31</sup> Ina quëran Simon Pitro pënënin chiniquën cancantacaso marë'.

—Tëhuëchachin iya Simon sopai yaminsërinquëma'. Inari nani Yosë nontërin: “Arosë pintiapiso pochin tëni'i, topirahuë',” itërin. “Inta nipachin tëniriquë',” itërin Yosëri. Napoaton sopai chiniquën sha'huitarinquëma' naniantamacoso marë'. <sup>32</sup> Caso nipirinhüë' iyasha, nani Yosë nontërahuë ama a'poancoso marëhuë'. Napoaton co naniantomiatarancohuë'. Noya imaantahuatanco, iyanpita achinicancanquë', itërin.

<sup>33</sup>—Sinioro, co caso' a'poaranquënhuë'. Tashinan pëiquë po'mohuachinënquën, canta' ya'co'in. Yatëpapirinacohuënta', co të'huatarahuë', tënin Pitro.

<sup>34</sup>—No'tëquën iyasha itaranquën. Ipora tashi chachin, co'huara atari përashatërasohuë', cararo' nonpinapiaranco. “Co caso' Quisoso nohuitërahuë',” toconapon, itërin Quisosori.

*Tëniarinso'*

<sup>35</sup> Ina quëran ya'ipi ca'tano'sanënpita itapon:

—Iráca a'chinacamaso marë' a'paranquëma'. Pa'patamara, coriqui, pë'pëto, sapatë', co inapita tëranta' quëparamahuë'. Topinan pa'patamara, ¿co manta' pahuantërinquëmahuë' ti? itërin.

—Co manta' pahuantërincoihuë'. Noya pa'nai, itopi.

<sup>36</sup>—Iporaso nipirihuë' sacai' nipon. Napoaton ama topinan pacosohuë'. Coriqui, pë'pëto, inapita ya'huëtohuachinquëma', quëpaco'. Co sahuëni ya'huëtohuachinquëmahuë', a'moramaso' pa'anatoma', sahuëni pa'anco'. <sup>37</sup> Iráca Yosë quiricanën quëran ninorinaco. “Apiro'sarë' acorapi,” tënin. Napopiso chachin apiro'sa pochin cancantatonaco, masarinaco. Ya'ipi ninorinacoso' nanicaso ya'huërin, tënin.

<sup>38</sup>—Ni'quë' Maistro. Cato' sahuëni ya'huëtërincoi, itohuachina:

—Tatoco huachi pa'ahua', itërin Quisosori.

*Quisoso sëtaton, Yosë nontërinso'*

*(Mateo 26.36-46; Marcos 14.32-42)*

<sup>39</sup> Ina quëran pipirahuaton, Oriposë panëinquë pa'nin. Nani tashi' inaquë pa'nin. Ca'tano'sanënpitarinta' imapi. <sup>40</sup> Inaquë canconpachinara:

—Yosë nontoco' iyaro'sa', ama sopai minsëinquëmaso marëhuë', itërin.

<sup>41</sup> Ina quëran amashamiachin pa'sahuaton, isonin quëran, inaora Yosë nontërin:  
<sup>42</sup> “Quëma nohuantohuatan Tata, nicha'ëco, ama ma'sha onpo'isohuë'. Main o'orëso pochin parisita'huaso' ya'huërin. Co parisita'huaso' nohuantaporahuë', quëma nohuantohuatan, ma'sona yaonpotohuatanconta' noya, ténahuë. No'tëquën yanatëranquën,” itërin.

[ <sup>43</sup> Nani nontohuachina, anquëni inápa quëran o'marahuaton, achinirin. <sup>44</sup> Ina quëran pa'pi sëtaton, chiníquën Yosë nontaantarín. Oncainën huënai pochin no'paquë hui'shirin.]

<sup>45</sup> Nani Yosë nontohuachina, ca'tano'sanënpita paahuantapirinhüë'. Huë'ësápi quënanconin. Sëtatona', huë'ësápirinahuë'.

<sup>46</sup> —¿Onpoatomata' iyaro'sa' huë'ësárama'? Huënsëatoma' Yosë nontoco' ama sopai minsëinquëmaso marëhuë', itërin.

*Quisoso mapiso'*

*(Mateo 26.47-56; Marcos 14.43-50; Juan 18.2-11)*

<sup>47</sup> Nontaso chachin, na'a piyapi'sa' canquipi. Cotasë quëchitëriarin. Inanta' ca'tanaponahuë', a'notiarin. Quisoso ya'yoranquirahuaton, apinorin.

<sup>48</sup> —Iya Cotasë, Yosë quëran quëmapico nipirahuë', ¿sha'huirapitonco, apinoranco ti? itërin.

<sup>49</sup> Ca'tano'sanënpitari quënanahuatona', “Quisoso yamasapi,” ta'tona', yaahuëtopi.

—¿Sahuëniquë Sinioro ahuëchi? itopirinhüë'.

<sup>50</sup> Co'huara a'panichatërasohuë', a'naso' corto hua'an piyapinën ahuëaton, inchinan huëratën nishitëtin.

<sup>51</sup>—Tananpitëquë' iyasha. Ama ahuëquësohuë', itërin Quisosori.

Ina quëran së'huahuëratërahuaton, a'naroáchin anoyatërin. <sup>52</sup> Naporahuaton, corto hua'ano'sa', capitano'sa', ansiano'sa', inapita itapon:

—Sahuëni, shonqui, inapita së'quëërahuatoma', huëcapairamaco. Tëpatona'pi pochin cancantatomaco, ¿yamanamaco ti? <sup>53</sup> Co'tana nani tahuëri Yosë chinotopiso pëiquë pa'nahuë. Nicapomaracohüë', co manamacohüë'. Napoaponahuë', Yosë nohuanton,

iporaso' masaramaco. Tashi pochin cancantërama' ni'ton, sopai camairinquëma' co noyahuë' nicacaso marë', itërin.

*Pitrori nonpinapirinso'*

*(Mateo 26.57-58, 69-75; Marcos 14.53-54, 66-72; Juan 18.12-18, 25-27)*

<sup>54</sup> Quisoso masahuatona', corto hua'an chini chiniquën nanantërinso' pëinënguë quëpapi. Pitrori aquë quëran imaquiarin. <sup>55</sup> I'iratëquë huarë' imaquirahuaton, pairaanaquë ya'conin. Inaquë ponisiaro'sa' nani a'pëtopi napëntacaiso marë'. Pana yonsanguë huënsërahuaton, inanta' napëntarin. <sup>56</sup> Napëntaquëya', a'na cosonari quënanin. Noya ni'sahuaton:

—Iso quëmapinta' Quisoso imarin, tënin.

<sup>57</sup> —¡Co imoya caso' ina nohuitërahuë'! itërin Pitrori.

<sup>58</sup> Co hua'quiya quëranhuë' a'na quëmapiri niantarin.

—Quëmanta' Quisoso imaran topirahuë', itërin.

—Co'chi iyasha imarahuë' paya, itaantarin.

<sup>59</sup> A'na ora pochin nisahuaso', a'nanta' taantapon:

—Cariria piyapi pochin nonin ni'ton, iso quëmapinta' Quisoso ca'tanin tënahuë, tënin.

<sup>60</sup> —¡Co'chi iyasha paya! Co cariso' nohuitërahuë', itaantarin.

Nonaso', atari përarin. <sup>61</sup> Naporo chachin Quisosori tahuërëtahuaton, Pitro notëërin. Ni'sarin ni'ton, ninorinso' Pitrori yonquirin. “Ipora tashi chachin, co'huara atari përashatërasohuë', cararo' nonpinapiaranco,” ¿itërinco pora? ta'ton, <sup>62</sup> aipiran pipirahuaton, na'nërin. Chiniquën sëtaton, na'nërin.

*Quisoso tëhuapiso'*

*(Mateo 26.67-68; Marcos 14.65)*

<sup>63</sup> Ina quëran ponisiaro'sari Quisoso tëhuapi. Tëhuarahuatona', ahuëpi.

<sup>64</sup> Tonporayatahuatona', panpirayapi.

—¿Inta' ahuërinquën? Ninoquë', itopi.

<sup>65</sup> “¿Quëmaso' hua'anquën ti?” itatona', tëhuapi. Nisha nisha itatona', no'huipi.

*Cotio hua'ano'saquë quëpapiso'*

*(Mateo 26.59-66; Marcos 14.55-64; Juan 18.19-24)*

<sup>66</sup> Tahuërihuachina, cotio ansiano'sa', corto hua'ano'sa', cotio maestro'sa', inapita niyontonpi. Nani niyontonpachina', inaquë Quisoso quëpapi natanacaiso marë'.

<sup>67</sup> —Quëmaso' Cristo Yosë a'paimarinquënso' nipatan, no'tëquën sha'huitocoi nitochii, itopi.

—Sha'huitohuatënguëma', co natëaramacohuë'. <sup>68</sup> Ma'sona tëranta' natanpatënguëma', co a'paniantaramacohuë'. <sup>69</sup> Nipirinhüë', ipora quëran huarë' caso' Yosë quëran quëmapico ni'to, Yosë inchinanën quëran huënsëapo. Inaquë chiniquën nanantarahüë, itërin.

<sup>70</sup> —Napoahuarë' ¿quëmaso' Yosë hui'ninquën ti? itopi.

—Ca mini inaco, itërin.

<sup>71</sup> —Co huachi aquëtë' sha'huirapicaiso' nohuantarihuahuë'. “Ca Yosë hui'ninco,” toconin, nani natanëhua', nitopi.

## 23

*Piratoquë quëpapiso'*

*(Mateo 27.1-2, 11-14; Marcos 15.1-5; Juan 18.28-38)*

<sup>1</sup> Ina quëran pipirahuatona', Piratoquë Quisoso quëpapi. <sup>2</sup> Inaquë sha'huirapipi.

—Iso quëmapi piyapi'sa' nonpintarin. “Noma copirno coriqui yama'pahuachinquëma', ama quëtocosohuë',” toshuaton: “Caso' Cristoco. Yosë a'paimarinco hua'anënta'huaso marë',” toconin, itopi.

<sup>3</sup> —¿Quëmaso' cotioro'sa' copirnonquën ti? itërin Piratori.



—Ca mini inaco, itërin.

<sup>4</sup>Nonapipiso' natanahuaton, ya'ipi cotio ansiano'sa', corto hua'ano'sa' inapita itapon: —Iso quëmapiso' noya, tënahüë. Co manta' onporinhuë'. Co ana'intacaso' ya'huërinhuë', itopirinhuë', <sup>5</sup> aquë aquëtë' no'huitatona', itaantapi:

—A'chintohuachina, piyapi'sa' nisha nisha yonquipi. Naporahuaton, copirno yano'huipi. Ya'ipi parti a'chinárin. Cariria parti quëran huëcaton, ya'ipi Cotia parti pa'tërin. Isëquënta' a'chinarin, itopi.

### *Irotisëquë a'parinso'*

<sup>6</sup> Ina natanahuaton, “¿Cariria parti quëran huë'nin ti?” itërin Piratori. <sup>7</sup> “Ina quëran mini,” itopi. I'huamiáchin Cariria hua'an Quirosarinquë huë'nin ni'tapon, Irotisë itopiso'. Inaquë ya'huarin ni'ton, Quisoso yaa'parin Irotisë nontacaso marë'. “Ina piyapinën ni'ton, inari ana'inchin,” ta'ton, a'parin. <sup>8</sup> Inaquë canconpachina, Irotisëri pa'yatërin. Hua'qui' Quisoso yani'pirinhuë', co nohuichátërarinhuë'. Nani ma'sha naporinso' nani natantërin. “Yosë pochin ninin. Piyapi a'naroáchin anoyatërin,” topi natantërin. “Anoyatohuachin, canta' ni'i,” tënin. <sup>9</sup> Napoaton Quisoso canquihuachina, hua'qui' nontopirinhuë', co a'panitërinhuë'. Na'con natanpirinhuë', ta'tárin. <sup>10</sup> Corto hua'ano'sa', cotio maistro'sa', inapita huëcatona', Quisoso sha'huirapiapirinahuë', co manta' tëninhuë'. <sup>11</sup> Napohuachina, Irotisëri tëhuarin. Sontaronënpitarinta' tëcaripi. Noyápiachin hua'an a'morinso pochin a'motahuaton, Piratoquë a'paantarin. <sup>12</sup> Nani hua'qui' Pirato Irotisëre' nino'huipirinahuë', naporo quëran huarë' co huachi niinimi-cotopihuë', noya ninontantapi.

### *Tëpacaso' sha'huirinso'*

*(Mateo 27.15-26; Marcos 15.6-15; Juan 18.39-19.16)*

<sup>13</sup> Ina quëran Piratori piyapi'sa' amatërin. Corto hua'ano'sa', cotio hua'ano'sa', inapitanta' ayontonahuaton, itërin:

<sup>14</sup> —Canpitaso' na'con Quisoso sha'huirapirama'. “Piyapi'sa' sha'huitarin niahuëcaiso marë',” itopiramacohüë'. Nani hua'qui' nontërahüë, canpitanta' natanama'. Iso quëmapiso' noya. Sha'huirapipiramahuë', co manta' onporinhuë', tënahüë. <sup>15</sup> Irotisënta' inachachin tënin. Napoaton a'patiantarinco. Co tēpacaso' ya'huërinhuë'. <sup>16</sup> Topinan ahuihuitahuato ocoi'i, topirahuë', itërin.

[<sup>17</sup> Nani Pascoa tahuëri a'nara' apina'pi tashinan pëi quëran ocoirin pipicaso marë'. Iso pi'ipinta' a'nara' ocoicaso' ya'huërin.] <sup>18</sup> Piyapi'sariso nipirinhuë' chiniquën nontopi.

—¡Quisososos' tēpaquë! ¡Parapasë ocoitocoi! itopi.

<sup>19</sup> Parapasëso' co noya quëmapihuë'. Tëpatona'pi inaso'. Ninanoquë piyapi'sa' sha'huitërin niahuëcaiso' ni'ton, tashinan pëiquë nani po'mopi. <sup>20</sup> Pirato co nohuantërinhuë' Quisoso tēpacaso'. Napoaton: “Ocoi'i,” tantarin.

<sup>21</sup> Naquëranchin chiniquën nontaantapi.

—¡Corosëquë patanantëquë' chimi'in! ¡Inaquë patanantëquë' chimi'in! itaantapi.

<sup>22</sup> —¿Ma'marëta' atëpachi? Nani natanpirahuë'. Co manta' onporinhuë'. Co tēpacaso' ya'huërinhuë', tënahüë. Topinan ahuihuitahuato, ocoi'i, tënin. Nani cararo' inachachin itaantarin.

<sup>23</sup> “¡Corosëquë patanantëquë' chimi'in!” itaantapi. Chiniquën nontápi ni'ton, “Inta nipachin,” itërin. <sup>24</sup> Napotahuaton, sontaro'sa' sha'huitërin corosëquë patanantacaiso marë'. <sup>25</sup> Parapasëso' tēpatona'pi nipirinhuë', tashinan pëi quëran ocoirin. Piyapi'sari huayonpi ni'ton, ocoirin. Quisososos' nipirinhuë' co ocoirinhuë'. Tēpacaiso marë' sha'huitërin. Cotioro'sa' nohuantopiso chachin ninin.

### *Corosëquë patanantopiso'*

*(Mateo 27.32-44; Marcos 15.21-32; Juan 19.17-27)*

<sup>26</sup> Ninano quëran quëpasoi', a'na quëmapi Simon itopiso' nacapipi. Imin quëran huëntararin. Inaso' Siriniquë ya'huërin. Sontaro'sari masahuatona', corosë apitëntopi. Quisoso pinën quëran quëpatërin.

<sup>27</sup> Na'a quëmapi'sari imasapi. Sanapi'sarinta' imasapi. Quisoso yatëpapiso marë' chiniquën sëtatona', na'nërapi.

<sup>28</sup> Tahuëretahuaton, Quisosori itapon:

—Ama imoyaro'sa' ca marë' na'nëcosohuë'. A'na tahuëri Quirosaringuë ya'huëramasopita na'con parisitarama'. Hua'huamapitanta' parisitapi. Ina yonquiatoma' tëhuëncinso', sëtoco'. <sup>29</sup> Naporos' tahuëri'sa' hua'huahuaninsopita na'con na'con parisitapi. Hua'huinpita yonquiatona', sëtapi. Co hua'huanpihuë' naporini, noya noya niitonahuë'. <sup>30</sup> Piyapi'sa' chiniquën parisitapi ni'ton, “Motopi quëran na'piro'sa' notarintahuatona' imotërinpoa' naporini, noya niitonhuë',” tosapi. <sup>31</sup> Ni'co'. “Nanpimë' co huëyarinhüë', yanimëso nipirinhüë' a'naroáchin huëyarín,” topi. Caso' nanpimë pochin nipirahuë', aparisitarinaco. Canpitaso' yanimë pochin ninama' ni'ton, chini chiniquën aparisitarinënquëma' tënahuë, itërin Quisosori.

<sup>32</sup> Cato' apiro'santa' quëpapi inapitanta' tëpacaiso marë'. <sup>33</sup> Pa'sahuatona', a'na panëa'huayaquë canconpi, “Nansë Moto',” itopiquë. Inaquë canconahuatona', corosëquë patanantopi. Cato' apiro'santa' nisha patanantopi. A'na ahuënan quëran, a'na inchinan quëran. Quisososo' ahuanacanapipi. [<sup>34</sup> Patanantopirinahuë', Yosë nontërin.

—Tëparinacoso marë' Tata, ama ana'intëquësohuë'. Co nohuitatonacohüë', napotarinaco, itërin.]

Ina quëran sontaro'sa capini ninontopi. “Huëco' nicanatëhua' Quisoso a'morinsos' maahua',” nitatona', ya'nipirapi. Naporahuatona', a'naya a'naya mapi. <sup>35</sup> Na'a piyapi'sa' inaquë ni'sapi. Cotio hua'ano'sariso' tëhuapi.

—A'napita nicha'ëponahuë', inaora cha'ëcasoso' co nanitërinhuë'. Inaso' Cristo, Yosëri chachin huayoninsos' nipachin, inaora cha'ë'in, nitopi tëhuatona'.

<sup>36</sup> Sontaro'sarinta' tëhuapi. Ya'cariconahuatona', huino main nininsos' ihuëtopi.

—O'oquë' Maistro. <sup>37</sup> Quëmasos' cotioros'sa' copirnonquën nipatan, corosë quëran nohuararahuatón, cha'ëquë', itoonpi.

<sup>38</sup> Onporinsos marësona tëparapisis' ninshitopi.

ISOSO' COTIORO'SA' COPIRNO

ta'casos ninshitopi. Nani ninshitohuachina, corosëquë chachin motën pëtëcha achin-pitopi.

<sup>39</sup> Cato' apiro'santa' corosëquë parisitapi. Anari Quisosos no'huërin.

—Quëmasos' Cristonquën nipatan, corosë quëran nohuararahuatón, cha'ëquë'. Ina quëran quiyanta' nicha'ëcoi, itërin.

<sup>40</sup> A'narisos nipirinhüë' pënënin:

—Ta'tëquë'. ¿Co pi'pisha tëranta' Yosë të'huatëranhuë' ti? Tëpararinën quëmanta'.

<sup>41</sup> Canposos' co noyahuë' ninë'. Napoaton no'tëquën coisë ana'intarinpo'. Iso quëmapisos nipirinhüë' nóya. Co manta' onporinhüë', itërin.

<sup>42</sup> Ina quëran Quisosos itapon:

—Hua'anëntacasos' caniaritohuatan, yonquicos Sinioros canta', itërin.

<sup>43</sup> —Tëhuëncachin iyasha ipora tahuëri chachin carë'quën Yosë'pa' ya'huëcontaran, itërin.

*Quisosos chimininsos'*

*(Mateo 27.45-56; Marcos 15.33-41; Juan 19.28-30)*

<sup>44</sup> Camotëchin nisahuasos', ya'ipi parti tashiarin. I'huaraya huarë' yonos tashi pochin ninin. <sup>45</sup> Co huachi pi'i a'pininhüë'. Naporos' Yosë chinotopisos pëi' tanontën në'mëtëquë patonpisis' inaora noshatërin. <sup>46</sup> Napohuachina, Quisosos chiniquën nonin.

—Apira Tata chimirahuë. Hua'yanëhuë quëpaquë', itahuaton, chiminin.  
 47 Capitanso' ina ni'sahuaton, Yosë chinotërin:

—Tëhuëenchachin iso quëmapi co manta' onporinhuë', tënin.

48 Na'a piyapi'sa' Quisoso chimininso' ni'sapi. Nani chiminpachina, pa'yanpi. Chiniquën sëtatona', yanquëëpi. 49 Imarinsopitaso' nipirinhue', aquë quëran notëërapì. Sanapi'santa' Cariria parti quëran imaquitona', inaquë ni'sápi.

### *Quisoso pa'pitopiso'*

*(Mateo 27.57-61; Marcos 15.42-47; Juan 19.38-42)*

50-51 A'na cotio hua'an ya'huërin, Arimatiaquë ya'huërinso'. Cosi itopi. Cotio hua'an niponahuë', noya quëmapi. Yosë no'tëquën chinotërin. “A'na tahuëri Yosë acorinso' isoro'paquë hua'anëntapon,” ta'ton, Yosë chinotërin. A'napitari Quisoso yatëpahuachinara, “Ama tëpacosohuë’,” itopirinhue', co yanatëpihuë'. 52 Quisoso chiminpachina, Piratoquë pa'nin. “Quisoso nonën quëtoco quëpa'i,” itohuachina, “Noyahua', quëpaquë',” itërin. 53 Ina natanahuaton, pa'nin. Corosë quëran nonën anohuararahuatona', morinquë so'quëëtopi. So'quëëtahuatona', na'pi naninquë po'mopi. Inaquë co insonta' chimipi po'moyatërarinhue'. Inaquë nonën po'mopi. 54 Ina tashiraya chinoto tahuëri ni'ton, cotioro'sa' tapatapi chinotacaiso marë'. Napoaton pi'i yaya'conahuaso', manorahuatona po'mopi.

55 Sanapi'santa' Cariria quëran imaquipiso' pa'sahuatona', na'pi nanin quënanconpi. Po'mopiso' ni'pi. 56 Nani ni'pachinara, ya'huëpi'pa' paantapi. Inaquë no'morain pimóton nininso' tapapi. Pimo hua'sainta' tapapi Quisoso nonën pashitacaiso marë'. Chinoto tahuëri nanihuachina, chinotopi. Moisésë sha'huirinso chachin chinotopi.

## 24

### *Quisoso nanpiantarinso'*

*(Mateo 28.1-10; Marcos 16.1-8; Juan 20.1-10)*

1 Tomio tahuëri nanihuachina, tashíramiachin sanapi'sa' pa'pi. Pimo hua'sai', no'morain pimóton nininso' inapita quëpatona', na'pi naninquë pa'pi. 2 Canconpachinara, pancara'pi pa'copitopiso' nani chi'huincapi ni'conpi. 3 Na'pi naninquë ya'conpirinahuë', Siniro Quisoso nonën co quënanpihuë'. 4 “¿Onporincha nicaya?” ta'tona', huaniápirinahuë', a'nanaya catoya'piri ya'notimarin. Piyapi pochin niponahuë', a'mopiso' huënaráchin huënaráchin ya'nopi. 5 Sanapi'sa' pa'yanpi. Të'huatatona', monshoapirinahuë', catoya'piri itapona':

—¿Onpoatomata' chimipi po'mopiquë Quisoso yonirama'? Inaso' nanpiárin. 6 Co huachi isëquë ya'huërinhuë'. Nani nanpiantarin. Caririaquë sha'huitërinquëmaso', ¿co yonquiramahuë' ti? 7 “Yosë quëran quëmapi co niporahuë', ina nohuanton, oshahuano'sa' masarinaco. Corosëquë patanantarinaco. Tëpapirinacohuë', cara tahuëri quëran nanpiantarahuë’,” itërinquëma', itopi.

8 Itohuachina, yonquipi. 9 Na'pi nanin quëran pipirahuatona', shonca a'na ca'tano'sanënpita, a'napita imapisopita, inapita sha'huitonpi. “Quisoso nonën capa. ‘Nanpiantarin,’ itërinacoi,” itoonpi. 10 Maria Mactarina, Coana, Maria, Santiago a'shin nininso', a'napita sanapi'santa' napopi. Quisoso ca'tano'sanënpita sha'huitonpirinahuë', co natëpihuë'. 11 “Inahuara yonquinëna quëran napoapi,” toconpi.

12 Pitroso nipirinhue', a'naroáchin na'pi nanin'pa' ta'arin. Monshorahuaton, nëhuëconpirinhue'. Morin so'pinpisoráchin quënanconin. “Capa mini. ¿Ma'ta' onporinso'?” ta'ton, ya'huërin'pa' paantarin.

### *Catoya'pi iratapona pochin quënanpiso'*

*(Marcos 16.12-13)*

<sup>13</sup> Naporo tahuëri chachin cato' imarinsopita Quirosarin quëran pipirahuatona', ninanonëinquë paantapi. Imaosë itopiquë paantapi. Shonca a'na quiromitro pochin aquërinso'. <sup>14</sup> Papona pochin ninontapi.

“Quisoso tēpapi mini. Na'pi naninquë nani po'mopi. Napoaponahuë': ‘Nani nanopiantarin,’ tēnin Maria. ¿Ma'ta' onpocaso'?” nitopi. <sup>15</sup> Ninontasoi', Quisosori chachin ya'cariquirin. Inapitarë' pa'sapirinhuë', <sup>16</sup> Yosë nohuanton co nohuitopihuë'.

<sup>17</sup> —¿Ma'ta' papoma pochin ninontēriarama'? Naporahuaton, ¿onpoatonta sētēramaso pochin ya'norama'? itērin Quisosori.

<sup>18</sup> —Ya'ipi Quirosarinquë ya'huëpisopita nani nitotopirinahuë', quëmasáchin iso tahuëri'sa' napopiso' ¿co nitotomaranquënhuë' ti? itērin Criopasëri.

<sup>19</sup> —¿Ma'ta' onpopiso'? itaantarin Quisosori.

Napotohuachina:

—Co'ta Quisoso Nasaritoquë ya'huërinso' tēpapi. Nóya quëmapi nipirinhüë', tēpapi. Ma noya Yosë nanamën a'chintērincoi. Cania'piro'sa' nosoroaton, a'naroáchin anoyatērin. Yosëri nóya ni'nin. Piyapi'sarinta' noya ni'pirinhüë'. <sup>20</sup> Corto hua'ano'sa', ansiano'sa', inapitari mapi. Masahuatona', Piratoquë quëpapi tēpacaiso marë'. Sha'huirapihuachinara, corosëquë apatanantērin. Nani chiminin. <sup>21</sup> Ina ta'ma' israiro'sacoi nicha'ësarincó, topiraihuë'. Nani chiminin. Nani cara tahuëritērin. <sup>22</sup> Napoaponahuë', a'naquën sanapi'sa' quiya pochachin imapiso' nanan sha'huitatonacoi, a'payaninacoi. Tashíramiachin na'pi naninquë po'mopiquë pa'pirinhüë', <sup>23</sup> co nonën quënanpihuë'. Huëantarahuatona', sha'huitiirinacoi. “Anquëniro'sa' quënanai. ‘Quisoso nani nanopiantarin,’ itērinacoi,” topi. <sup>24</sup> A'napitanta' natantahuatona', na'pi naninquë pa'pi. Sanapi'sa' sha'huitērinacoiso chachin quënanconpirinhüë', co Quisoso quënanpihuë', itopi.

<sup>25</sup> —Canpitaso' co yonquiramahuë'. Iráca quëran huarë' pënëntona'piro'sa' ninopirinhüë', co yanatēramahuë'. <sup>26</sup> Cristo parisitacaso' ya'huërin. Nani parisitohuachina, naporo huarë' Yosë'pa' noya noya acoarin huachi, itērin Quisosori.

<sup>27</sup> Ina quëran Yosë quiricanëinquë ninotona ninshitopiso', a'chintarin. Moisés'ton ninoton, Yosë quiricanëinquë ninshitērin. Ina piquëran na'a pënëntona'piro'sa' ninoantapi. Ya'ipi Cristo ninopiso' no'tëquën a'chintarin.

<sup>28</sup> Ninanonënaquë canconpachinara, Quisoso yana'huëpirinhüë':

<sup>29</sup> —Nani i'huarin. Huëquë' iyasha quiyataquë huë'ëquiquë', itopi. “Noyahua,” tosahuaton, ya'conconin. <sup>30</sup> Yacoshatohuachina', Quisosori pan manin. “Yosparinquë,” Yosë itahuaton, sē'panin. Sē'panahuaton, quëtērin. <sup>31</sup> Pan sē'panaso chachin Yosë nohuanton, Quisoso nohuitopi huachi. Ni'sapirinhüë', ina quëran chachin ayarin. <sup>32</sup> Napohuachina, ninontopi.

—Huëcapon pochin Quisoso chachin nontērinpo'. Ma noya Yosë quiricanën a'chintērinpo'. ¡Ma noyásha natanë paya! nitopi.

<sup>33</sup> A'naroáchin Quirosarinquë paantapi. Ca'tano'sanënpita ya'huërinquë pa'pi. Inaquë a'napita imarinsopitanta' nani huë'pi anta'. Inapitari itapona':

<sup>34</sup> —Tëhuëenchachin Sinioro nanopiantarin. Iya Simon nani ya'notērin, itopi.

<sup>35</sup> Ina quëran catoya'pi canquëpisopitarinta' itapona': “Quiyanta' ni'nai. Paasocoi, ya'notērincoi. Hua'qui' a'chintopirincoihuë', co nohuitëraihuë'. Ina quëran yacoshatohuatoira, pan sē'panin. Sē'panpachina, a'naroáchin nohuitërai,” itopi.

*Ca'tano'sanënpita ya'notērinso'*

*(Mateo 28.16-20; Marcos 16.14-18; Juan 20.19-23)*

<sup>36</sup> Ninontasoi', a'nanaya Quisosori ya'notērin. Huancanachin huanirahuaton:

—Tashita iyaro'sa'. Sano cancantoco', itērin.

<sup>37</sup> Ina quënanahuatona', pa'yanpi. “Hua'yan,” ta'tona', pa'pi tē'huatopi.

<sup>38</sup> —¿Ma'marëta' pa'yanama'? ¿Onpoatomata' nisha nisha yonquirama'? <sup>39</sup> Ca mini. Imirahuë ni'co'. Nantëhuënta' ni'co'. Ohuaninacoso' nicatora', nohuitoco huachi. Co hua'yancohuë'. Së'huaco. Hua'yanso' co nonën ya'huëtërinhuë'. Caso' ya'huëtërinco, itërin.

<sup>40</sup> Ina tosahuaton, imirin, nantën, inapita a'notërin. <sup>41</sup> Ina ni'sahuatona' pa'pi pa'yataponaraihuë', co ya'ipi cancanëna quëran natëyátërapihuë'. “¿Tëhuënhachin nantëpiantarin ti?” topi yonquiatona'.

—¿Ya'huarin capacaso'? itërin Quisosori.

<sup>42</sup> “Ya'huarin,” tosahuatona', sami chinpi së'panpiso' quëtopi. <sup>43</sup> Masahuaton, inapitari nicasoi', ca'nin.

<sup>44</sup> —Nani i'hua chachin iyaro'sa' sha'huitëranquëma'. Yosë quiricanënuë na'con ninorinaco. Moisésë, pënëntona'piro'sa', inapita ninorinaco. Sarmoquënta' ninshitopi. Ya'ipi iráca ninorinacosopita nancasos' ya'huërin ni'ton, iso tahuëri'sa' ina pochin ninahuë, itërin.

<sup>45</sup> Yosë quiricaquë naporinsopita a'chintaantarin. A'chintaton, catahuarin no'tëquën yonquicaíso marë'.

<sup>46</sup> —Íráca ya'ipi ninotonaco, ninshitopi: “Cristo parisitaton, chiminapon. Chiminaponahuë', cara tahuëri quëran nantëpiantarin,” ténin. <sup>47</sup> Ina nanan chachin sha'huicaso' ya'huërin. “Co noyahuë' yonquiramasopita nantëtohuatama', oshanëma' inquitariinquëma',” itoco'. Quirosarinquë'ton sha'huicaso' ya'huërin. Ina quëran nisha nisha nananquë nonpisopita sha'huitacaso' ya'huërin. <sup>48</sup> Canpitaso' ni'namaco. Natanamaco. Ya'ipiya sha'huitonco'. <sup>49</sup> Ispirito Santo a'patimaranquëma' ya'coancantiinquëmaso marë'. Quiricanën quëran tatahuë sha'huitërinquëmaso chachin a'patimaranquëma'. Napoaton isëquë ninaco'. Ispirito Santo ya'coancantohuachinquëma', naporu huarë' nanitaparama' noya noya nicacamaso'. Nani ya'coancantohuachinquëma', noya nanan sha'huitonco huachi, itërin Quisosori.

*Inápaquë panantarinso'*

*(Marcos 16.19-20)*

<sup>50</sup> Ina quëran a'na tahuëri ninano quëran quëparin. Pitaniaquë huarë' canconpachinara, anquirahuaton, Yosë nontërin. “Isopita Tata noya a'paiton, catahuaquë',” itërin.

<sup>51</sup> Nonin quëran chachin inápaquë panantarin. <sup>52</sup> Ina ni'sahuatona', Quisoso chinotopi. Noya cancantatona', Quirosarinquë ayamantapi. <sup>53</sup> Nani tahuëri Yosë chinotopiso pëiquë pa'pi. “Ma noyacha Yosëso paya,” tosápi. Nani huachi.



## Coansha ninshitérinpoa' Quisocristo nohuitatēhua' nanpimiatacaso marë'

### *Iráca Quisocristo Yosë'pa' ya'huërinso'*

<sup>1</sup> Iráca quëran huarë' Yosë noninso' ya'huërin, Quisocristo itëréhuaso'. Tata Yosë' ya'huërin. Yosë pochachin ninin anta'. <sup>2</sup> Co'huara isoro'pa' ya'huëyátërasohuë', Yosë'pa' ya'huërin. <sup>3</sup> Naporo' Yosë yonquirin ya'ipi ma'sha acocaso'. Ina nohuanton, hui'nini acorin. Ya'ipi ma'sha ninin. Co a'naya tëranta' inaora ya'huërinhuë'. Co acorinhuë' naporini, co manta' ya'huë'itonhuë'. <sup>4</sup> Inariáchin ya'ipiya ananpirin. Piyap- inpoanta' a'pintatë pochin a'chintërinpoa' ina nohuitatēhua' nanpimiatacaso marë'. <sup>5</sup> Tashinantërinso' a'pintohuatëra, a'naroáchin tahuëri pochin ninin. Co tashiri tacopitërinhuë'. Inapochachin Quisocristo a'pintërinpoa'. Co noyahuë' nininsopitari yaminsëpirinahüë', co nanitapapihuë'.

<sup>6</sup> A'na quëmapi ya'huërin, Coansha itopiso'. Yosëri a'parin <sup>7</sup> a'pininso' anohuitiinpoaso marë'. Ya'ipi piyapi'sari natëcaiso marë' sha'huirin. <sup>8</sup> Coanshaso' co a'pintërinpoahuë'. Yosëri a'parin a'pininso' anohuitiinpoaso marë'. <sup>9</sup> Sha'huitërinpoaso chachin Quisocristo isoro'paquë o'marin. O'marahuaton, ya'ipi piyapinpoa' a'pintimarinpoa'. Inasáchin no'tëquën anitotërinpoa'.

<sup>10</sup> Isoro'paquë o'marin. Iráca Tata Yosë nohuanton, ya'ipi ma'sha ninin. Inari acopirinhuë', co piyapi'sari nohuitopihuë'. <sup>11</sup> No'panënguë chachin o'mapirinhuë', co piyapinënpitari nohuantopihuë'. Nipirinhuë', <sup>12</sup> Quisocristo cancanën mapatēhua', hui'nin pochin Yosë ni'ninpoa'. Natëréhuasopitarachin huëntonënguë aya'coninpoa'. <sup>13</sup> Ya'ipinpoa' piyapi quëran nasitëréhuaso nipirëhuahuë', co ina quëran Yosë huëntonënguë ya'conëhuahuë'. Co piyapi nanitërinhuë' aya'co'inpoaso'. Co canpoara nohuanton, ya'conëhuahuë'. Yosëíchin aya'coninpoa'. Ina quëran hui'ninpita pochin ni'ninpoa'.

<sup>14</sup> Quisocristo isoro'paquë nasitimarin. Yosë niponahuë', piyapi chachin nasitërin. Canpoarë chachin ya'huërin. Quiyaso' ni'nai. Inaso' nóya, tënai. Yosë pochachin ninin. Inaíchin hui'nin inaso'. Inaora nohuanton nosororinpoa'. No'tëquën nontërinpoa'. <sup>15</sup> Coansharinta' ni'nin. Ni'pachina, piyapi'sa' sha'huitërin: "Thua chachin sha'huitëranquëma'. 'Ca piquëran a'na quëmapi huë'sarin. Co'huara ca nasichátërapohuë', inaso' Yosë'pa' ya'huërin. Napoaton ca quëran chini chiníquën nanantërin inaso', itëranquëma'. Nani o'marin huachi," itërin.

<sup>16</sup> Inaso' pa'pi nosororinpoa'. Nóya ni'ton, nosoroatonpoa', na'con catahuarinpoa'. Co canpoara nanitopirëhuahuë', ina imapatēhua', nani tahuëri catahuarinpoa'. <sup>17</sup> Iráca Yosë nohuanton, Moisésë pënëntërin nani ma'sha natëcaso'. Pënëntopirinhuë', co ya'ipiya anitotërinpoahuë'. Quisocristoso nipirinhuë' nosororinpoa'. No'tëquën nonaton, ya'ipi nanamën anitotërinpoa'. <sup>18</sup> Co inquënpoa tëranta' Yosë quënanëhuahuë'. Hui'niniso nipirinhuë' noyá nohuitërin. Yosë pochachin ni'ton, napopianachin yonquipi. Inasáchin Tata Yosë anohuitërinpoa'.

### *Coansha Paotista sha'huirinso'*

*(Mateo 3.11-12; Marcos 1.7-8; Lucas 3.15-17)*

<sup>19</sup> Coansha pënëntápachina, corto hua'ano'sa', nihuiro'sa', inapita pa'pi Coansha nontacaiso marë'. Cotio hua'ano'sari a'papi ni'ton, Quirosarin quëran pa'sahuatona', Coansha itapona': "¿Inquënta' quëmaso'?" itoonpi.

<sup>20</sup> —Caso co Cristocohuë'. A'naquën napotopirinacohuë', co caso' inacohuë', itërin Coanshari.

21 —Quëmaso' Iniasënquën, iráca ayaponahuë', ¿ya'noantamaranquën ti? itopi.

—Co caso' inacohuë', ténin.

—¿Quëmaso' pënëntona'pi ninaraiso' nimara ti? itaantapi.

—Co inacohuë', ténin.

22 —¿Inquënta' quëmaso' nipachin? Sha'huitocoi hua'ano'sa' sha'huitonta'ii. ¿Ma'marëta' pënëntaran? itaantapi.

23 —Yosë nohuanton, pënëntarahuë. Iráca Isaiasë ninotonco, naporin: “A'na quëmapi inotëroquë pënëntaton, tapon: ‘Ira co'shon co'shon toconin ni'ton, otëëquë' Sinioro o'main,’ ténin. Naporinso chachin canta' piyapi'sa' pënënarahuë. ‘Cancanëma' anoyatoco' Sinioro o'main,’ itarahuë,” itërin Coanshari.

24 Ina quëran Parisioro'sari itantapi:

25 —Co quëmaso' Cristonquënhuë'. Co Iniasënquënhuë'. Co pënëntona'pi ninaraiso' quënhuë' ni'quëhuarë', ¿onpoatonta' nipachin, piyapi'sa' aporintaran? ¿Inta' nanan quëtërinquën aporintamaso'? itërin.

26 —I'quë mini aporintarahuë. Nipirinhue', iporaso' a'na quëmapi ya'huërin, co nohuitëramasohuë'. 27 Inaso' chini chiniquën nanantërin. Caso' co ina pochin chiniquën nanantërahuë'. Co maquëyancohuë' ni'ton, co sapatën i'quirita'huaso tëranta' nani-tarahuë'. Ca piquëran ina pënëntapon, itërin.

28 Naporo' Cortanii' aquëtëran Coansha piyapi'sa' aporintarin, Pitania itopiquë. Inaquë paaparahuatona natanconpi.

### *Quisoso anohuitërinso'*

29 Tahuëririnquë inaquë Quisoso huë'sarin. Coanshari quënanahuaton, piyapi'sa' itërin: “Paso' quëmapi ni'co'. Yosëri a'paimarinso'. Inaso' carniroa'hua pochin nicaton, os-hanënpoa' inquitinpoaso marë' chiminapon. 30 I'hua chachin sha'huitëranquëma'. ‘Ca piquëran a'na quëmapi huë'sarin. Co'huara ca nasichätërapohuë', inaso' Yosë'pa' ya'huërin. Napoaton ca quëran chini chiniquën nanantërin inaso',’ itëranquëma'. Nani o'marin. 31 Co carinta' nohuitopirahuë', nani nohuitërahuë. Yosë a'parinco ya'ipi piyapinënpita anohuita'huaso marë'. Ina marë' pënënato, i'quë aporintarahuë.

32-33 Co Quisoso nohuichatërapohuë', Yosë sha'huitërinco. ‘A'na tahuëri Ispirito Santo nëpë pochin nohuaraimarahuaton, a'na quëmapi motoanshiranënuë chachin huaniti-marin, ni'saran. Quëmaso' i'quë aporintëran. Ina quëmapiso nipirinhue' Ispirito Santo aya'coancantarinquëma', itërinco Yosë. Ispirito Santo inápa quëran o'mahuachina, ni'nahuë. Nëpë pochin ya'noton, Quisoso motoanshiranënuë chachin huanitiimarin.

34 Cari ni'nahuë. Napoaton nani nohuitato, sha'huitëranquëma'. Iso quëmapi Yosë hui'nin, tënahuë,” itërin Coanshari.

### *Ya'nan Quisoso imaraisopita'*

35-36 Tahuëririnquë Quisoso na'huëso', Coanshari quënaantarin. Quënaantarahuaton, catocoi imaraiso' itaponcoi:

—Paso' quëmapi ni'co'. Inaso' carniroa'hua pochin ninin, Yosëri a'paimarinso', itërincoi.

37 Natanahuatoi, Quisoso imarai. 38 Ina quëran tahuëretahuaton, quënanincoi.

—¿Onpoapomata'? itërincoi.

—Yanohuitërainquën Maistro. ¿Insëquëta' ya'huaran? itërai.

39 —Huëco' ni'quico, itërincoi.

Pa'sahuatoi, ya'huërinquë canconai. I'huaraya ni'ton, inaquë i'huatërai. Hua'qui' ninontërai.

40 Catoya'picoi Coansha natanahuatoi, Quisoso imarai. A'naso', Simon Pitro iin Antërisë itopi. 41 Shiarahuaton, iin quënanconin.

—Iya Simon, Cristo nani quënanai, Yosëri a'paimarinso', itërin.

42 Itahuaton, Quisosoquë quëparin. Quisosori notëërahuaton, itërin:

—Carinquën nohuitëranquën. Quëmaso' Simonquën. Coansha hui'ninquën. Nasha nininën acotaranquën. Pitro ichinquën, itërin. Inaora nananquë Sipasë itopi. (Na'pi pochin tapon naporin.)

### *A'napitanta' imapiso'*

<sup>43</sup> Tahuëririnquë Quisoso Caririacuë yapa'sarin. Pa'sahuaton, Pinipi quënanconin.

—Huëquë' iyasha imaco', itërin. Itohuachina, imarin.

<sup>44</sup> Pinipiso' Pitsaitaquë ya'huërin. Ina ninanoquë chachin Antërisë, Pitro, inapitanta' ya'huëpi. <sup>45</sup> Pinipiri Natanino yonisahuaton, quënanconin.

—Nani iyasha Cristo quënanai, Yosë quiricanën quëran ninopiso'. Moisësë, pënëntona'piro'sa', inapita ninotona', inaquë ninshitopi. Inaso' Quisoso, Cosi hui'nin. Nasaritoquë ya'huërinso', itërin.

<sup>46</sup> —Nasaritoro'saso', pa'pi co noya piyapi'sahuë'. ¿A'na tëranta' ta'ma' inaquë ya'huërinso' noya nihuan nica? tënin Natanino.

—Huëquë' pa'a nohuitonquë', itërin Pinipiri.

<sup>47</sup> Natanino ya'carirahuaso', Quisosori quënanin.

—Paso' quëmapi ni'co'. Israiromia chachin inaso'. Co pi'pisha tëranta' nonpininhuë', itërin Quisosori.

<sup>48</sup> —¿Onporahuatonta' nohuitërancoso'? itërin.

—Co'huara Pinipi nonchatërasënquënhuë', ninoto quënananquën. Iquira naraanaquë huënsëasënquën, quënananquën, itërin. Aquë ni'ton, co ya'pirin quëran chachin quënanaponahuë', napotërin ni'ton, Natanino pa'yanin.

<sup>49</sup> —Quëmaso' Maestro, Yosë hui'ninquën. Israiro'sa' copirnonquën, tënhuë, itërin.

<sup>50</sup> —¿Ninoto quënananquënso marëáchin natëranco ti? saca sacai nininsopita ni'saran, itërin.

<sup>51</sup> Ina quëran itaantarin:

—No'tëquën itëranquëma'. Iráca Cacopo nanpiso', pi'iro'të' ni'soarin. Ni'soatohuachina, anquëniro'sari huëcapaimapi. Huëcapaimarahuatona', panantarapi. Inapochachin iporaso' Yosë quëran quëmapico ni'to, o'marahuë Yosë anohuita'huanquëmaso marë'. Ya'ipi ninahuëso' ni'sarama', itërin Quisosori.

## 2

### *Canaquë Yosë pochin nininso'*

<sup>1</sup> Cara tahuëri quëran a'na quëmapi pita nisarin sa'acaso marë'. Canaquë naporin, Cariria parti ya'huërinso'. Inatohua' Quisoso a'shin ni'tapon pa'nin. <sup>2</sup> Quisosonta' amatopi. Pa'nin inanta' ni'tapon. Ca'tano'sanënpitacointa' amatërinacoi. <sup>3</sup> Huino ta'quihuachinara, a'shini Quisoso itapon:

—Capa huino ta'quipi huachi, itërin.

<sup>4</sup> —¿Ma'marëta' mama napotëranco? Co tahuëri naniyatërarinhuë' nohuitiinacoso', itërin Quisosori.

<sup>5</sup> Napotopirinhuë', inpriatoro'sa' quënanconahuaton, a'shini itapon:

—Ma'sona Quisoso sha'huitohuachinquëma', natëco', itërin.

<sup>6</sup> Inaquë saota panca orinan ya'huërin, na'pi quëran nipiso'. A'na orinanquëáchin catapini rata pochin ya'conin. Moisësë pënëntërinso' natëtona' oshanëna inquicaiso marë' acopiso'. <sup>7</sup> Ina quëran inpriatoro'sa' sha'huitërin:

—I'sha amëntaitoco', itërin Quisosori. Natëtona', huirotënuë huarë' i'sha amëntaitopi.

<sup>8</sup> —Pi'pian macatoma', pita hua'an api'nitonco', itaantarin Quisosori.

Napotohuachina, masahuatona api'nitooonpi. <sup>9</sup> Orinan quëran mapirinahuë', pita hua'anso' co nitotërinhuë'. Inpriatoro'saráchin nitotopi. I'sharáchin ta'panpirinahuë', nani huino taranin. Napoaton pi'nirahuaton, sa'ana'pi amatërin. <sup>10</sup> Huë'pachina, itërin:

—¡Ma'pitacha ninan paya! Iso huinoso' noya noya, yashin yashin o'ocaso'. Ya'ipi piyapi'sa' noya noya huino nininso'ton o'shipi. Ina quëran nani natëhuachinara, co onpopinchin noyahuë' nininso' o'shiantarapi. Quëmaso nipirinhue' ipora huarë' noya noya huino o'shitërancoi, itërin. Quisoso naporinso' co nitotatonhuë', naporin.

<sup>11</sup> Naporos' Quisoso caniaritërin Yosë pochin nicacaso'. Piyapi'sari nicatona': "Tëhuënchachin Yosëri catahuarin ni'ton, nanitaparín," topi. Ca'tano'sanënpitacointa ni'sahuatoí: "Quisosos', Yosëri a'paimarinso'," tënai. Canaquë naporin. Inaso ninano', Cariria parti ya'huërin

<sup>12</sup> Ina quëran Capinaomoquë pa'marin. A'shin, iinpita inapitarë chachin pa'marin. Ca'tano'sanënpitacointa' imarai. A'na simana pochin inaquë ya'huërai.

*Nipa'antopisopita Yosë chinotopiso pëi quëran a'parinso'*  
(Mateo 21.12-13; Marcos 11.15-18; Lucas 19.45-46)

<sup>13</sup> Pascoa tahuëri cotioro'sa' niyontopí Yosëri Iquipito quëran nicha'ërinso' yonquiantacaiso marë'. Ina naniriahuachina, Quirosarinquë paantarai. <sup>14</sup> Yosë chinotopiso pëiquë pa'sahuatoí, i'iratëquë nipa'antopisopita quënanconai. Ohuaca', ohuica, nëpë', inapita nipa'antapi. Yosë chinotatona' tëpacaiso marë' pa'anapi. A'naquëonta' misanënpitaquë huënsëatona', coriqui nicanpiarapi. <sup>15</sup> Inapita quënanconahuaton, Quisosori co noyahuë' ni'nin. Nonin masahuaton, sihuirintahuaton, ohuica, ohuaca', inapita huënitaton, a'parin huachi. Pa'anpisopitanta' Yosë pëinën quëran a'parin. Coriqui nicanpiapisonta' misanënapita quëran ta'sarin. Coriqui ta'sarahuatón, misanënapitanta' të'yatërin. <sup>16</sup> Nëpë' pa'anpisopita itapon:

—Isopitanta' quëpaco'. ¡Ama Tatahuë pëinën mircato pochin nitocosohuë'! itërin Quisosori.

<sup>17</sup> Yosë quiricanënuë ninshitopiso' yonquirai. "Ya'ipi piyapi'sa' Tata, chinochinënuë, tënahuë. Ina na'con yonquiato, quëma pëinën a'pitërahuë. Ina marë' no'huarinaco," tënin quiricaquë.

<sup>18</sup> Ina quëran cotioro'sari huëcapaipi.

—¿Onpoaponta' hua'an pochin nisanan? Chiníquën nanantohuatan, Yosë pochin niquë' quiyanta' nicatoí natëiniquën, itopi.

<sup>19</sup> —Iso pëi' ata'huantohuatama', cara tahuëri quëran anoyataantarahuë, itërin Quisosori.

<sup>20</sup> —Yosë chinotopiso pëi' catapini shonca saota pi'ipi quëran tinipi. Cara tahuëri quëran naquëranchin ¿anoyataantaran ti? itopi cotioro'sari.

<sup>21</sup> Quisososo nipirinhue' co ina pëi chachin yonquirinhue'. Inaora nonën pëi pochin tapon naporin. <sup>22</sup> Quisoso nanopiantahuachina, naporinso' yonquirai. Cara tahuëriya quëran nanopiantarin ni'ton, "Yosë quiricanën quëran no'tëquën ninorin," tënai. Quisoso noninsonta' natërai.

*Yonquipisonta' nitotërinso'*

<sup>23</sup> Pascoa tahuëri inaquë ya'huasocoi, Quisoso Yosë pochachin ninin. Piyapi'sa' a'naroáchin anoyatërin. "Yosëri catahuarin," ta'tona', a'naquën natëpi. <sup>24-25</sup> Quisososo nipirinhue' ya'ipiya noyá nohuitërin. Co piyapiri sha'huitopirinhue', yonquipiso chachin nitotërin. Napoaton "Co natëmiatërinacohuë'," ta'ton, co inapita natërinhuë'.

### 3

*Nicotimo a'chintërinso'*

<sup>1-2</sup> Tashi' nisahuaso', a'na quëmapí huë'nin Quisoso nontacaso marë', Nicotimo itopiso'. Cotio hua'an inaso'. Parisio nipoñahuë', Quisoso nontiirin.

—Maistro, Yosë a'pairinquën a'chintancoiso marë'. Sacai' nininsopita nicaton, Yosë pochin ninan. Napoaton ina a'pairinquën, tënai. Co Yosë catahuarinquënhuë' naporini, co quëma nanitapaitonhuë', itiirin.

<sup>3</sup>—No'tëquën iyasha sha'huitaranquën. Co nasitaantahuatanhuë', co onporonta' Yosë hua'anëntërinquë ya'conaranhuë', itërin Quisosori.

<sup>4</sup>—Nani mashotohuatëra, co huachi mamampo yo'namënquë ya'conëhuë'. ¿Onporahuatëta' nasitaantarë'? itantarin Nicotimorinta'.

<sup>5</sup>Napotohuachina, Quisosori itaantapon:

—No'tëquën sha'huitaranquën. I'quë amarëso pochin cancanëma' anoyatacaso' ya'huërin. Ya'ipi co noyahuë' yonquiramasopita naniantoco'. Ina naniantohuatama', Ispirito Santo anoyacancantohuachinquëma', nasitaantarëso pochin nisarama'. Naporo huarë' Yosë hua'anëntërinquë ya'conarama'. <sup>6</sup>Piyapi quëran nasitohuatamara, piyapi pochin cancantërama'. Ispirito Santo quëranso' nasitaantahuatama', Yosë pochin cancantarama'. <sup>7</sup>Napoaton nasitantacaso' ya'huërin. Ama ina natanaton, pa'yanquësohuë'. <sup>8</sup>Ni'quë'. Ihuan inaora nohuanton, pa'nin. Natanarihuarahuë', intohua quëranso' huëcaton intohuasona pa'ninso', co nitotërëhuahuë'. Co quënanpirëhuahuë', natanëhua'. Inapochachin Ispirito Santo ya'coancantohuachinquëma', nasitaantarëso pochin nasha cancan quëtarinquëma', itërin.

<sup>9</sup>—¿Onporahuatëta' nasitaantarë'? itantarin.

<sup>10</sup>—Quëmaso' Israiro maistranquën niponahuë', ¿co nitotëranhuë' ti? <sup>11</sup>No'tëquën itaranquën. Nitotatoi, a'chintarainquëma'. Ni'naiso' sha'huitarainquëma'. Canpitaso nipirinhüë' co natëramacoihuë'. <sup>12</sup>Isoro'paquë ya'huërinso' quëran a'chintopiranquëmahüë', co natëramacohüë'. Inápaquë ya'huërinso' quëran a'chintohuatëinquëma', aquëtë huarë' co natëramamahüë'.

<sup>13</sup>Co inso piyapi tëranta' inápaquë pantarinhuë'. Casáchin ina quëran o'marahuë. Yosë quëran quëmapico ni'to, inápa quëran o'marahuë. Napoaton casáchin inápaquë ya'huërinso' a'chintaranquëma'. <sup>14</sup>Iráca shimashonëmapita inotëro parti paaso', na'a piyapi'sa' ya'huanapi. Co noyahuë' cancantopi ni'ton, Yosëri ana'intërin. Na'a ya'huano'sa' huëcatona', quëtëra'piapi. Ina quëran Moisésë ya'huan nonanpiso' ninin. Hua'na quëran nisahuaton, naraquë achinpirin. Achinpirahuaton, inápaquë ahuanirin. Inapochachin Yosë quëran quëmapico niporahuë', a'na tahuëri inápaquë achinpiarinaco. <sup>15</sup>Natëhuatamaco, Yosë nohuitatoma', nanpimiatarama'. Ina marë' achinpiarinaco, itërin Quisosori.

### *Yosë nosororinpoaso'*

<sup>16</sup>Yosëso' ya'ipi piyapi'sa' pa'pi nosoromiatërin. Napoaton a'naíchin hui'nin nipirinhüë', isoro'paquë a'paimarin chiminacaso marë'. Ina natëtëhua': "Ca marë' chiminin," topatëhua', co parisitopiquë pa'sarëhuahuë'. Yosë nohuitatëhua', nanpimiatarëhua'. <sup>17</sup>Co ana'intinpoaso marë' hui'nin a'paimarinhuë'. Nicha'ëinpoaso marë' a'paimarin. Hui'nin quëran cha'ërihua'.

<sup>18</sup>Hui'nin natëhuatëhua', co Yosë ana'intarinpoahuë'. Co natëpisopitahuë' nani Yosëri yonquirin ana'intacaso'. Inaíchin hui'nin nipirinhüë', co natëpihuë'. Napoaton ana'intarin. <sup>19</sup>Quisoso isoro'paquë o'maton, a'pintërinpoaso pochin oshanënpoa' anitotërinpoa'. A'naquëniso nipirinhüë', co nohuantopihuë' Quisoso nohuitacaiso'. Co noyahuë' nicacaisoáchin pa'yatatona', tashi pochin cancantopi. Co yanatëpihuë' ni'ton, Yosëri ana'intarin. <sup>20</sup>Co noyahuë' nipisopita co tahuëri pochin nininso' nohuantopihuë'. A'piniquë a'ningüëchin huanicaiso' co nohuantopihuë'. Tahuëri nipachina, ma'sha co noya nipisohüë' quënanë'. <sup>21</sup>Nipirinhüë', no'tëquën yonquihuachina', noya nisapi. Ina quëran a'napitanta' nicatona': "Ma noya Yosëri catahuarin ni'ton, noya natëpi," tosapi.

### *Naquëranchin Coansha sha'huirinsó'*

<sup>22</sup>Ina quëran Quisoso Cotia parti pa'nin. Ca'tano'sanënpitacoi imarai. Inaquë hua'quimiáchin ya'huëconahuato, piyapi'sa' aporintërai. <sup>23</sup>Coanshanta' Inoiiquë aporintarin. Sarimo ya'cariya inaso'. Inaquë na'a ii' ya'huërin ni'ton, inaquë aporintarin. Na'a



piyapi'sa' huë'pachinara, aporintarin. <sup>24</sup> Naporó' Coanshaso' noya pa'sarin. Co tashinan pëiquë po'moyätërapihuë'.

<sup>25</sup> Quiyarinta' aporintërai. Coanshanta' aporintarin. Napoaton a'na cotio quëmapi huëcaton, Coansha ca'taninsopita itërin:

—¿Insota' noya noya aporintërinso'? itërin. Nisha nisha ninontopi. <sup>26</sup> Ina quëran Coansha sha'huitonpi.

—Ni'quë' Maistro. Cortanii' aquëtëran nicasëhua', inaquë Quisosonta' nisarin ni'ton, anohuitërancoi. Iporaso' inanta' aporintarin. Na'a piyapi'sari imasapi. Co ina nápo quëmaso' imasarinënuquënhuë', itopi.

<sup>27</sup> —Co Yosë nohuantërinhuë' naporini, co napo'itonahuë'. Ya'ipinpoa' Yosë acorinpoa' ma'sona nicacaso'. <sup>28</sup> Nani sha'huitëranquëma'. “Co caso' Cristocohuë',” itëranquëma'. Co'huara ina huë'shatërasohuë', Yosë a'parinco piyapi'sa' pënëna'huaso marë'. Ina imacaiso marë' pënënarahuë'. <sup>29</sup> Ni'co'. Quëmapi sa'apachina, amiconëonta' noya cancantërin. Noya nipayapi ni'ton, naporinso' natantaton, nóya cancantërin. Inapochachin canta' ninahuë. Na'con piyapi'sa' Quisoso imasapi ni'ton, nóya cancantërahuë'. <sup>30</sup> Co caso' nohuantërahuë' piyapi'sa' yonquiinacoso'. Quisoso na'con na'con yonquinaso', tënin.

### *Inápa quëran o'marinso'*

<sup>31</sup> Cristo inápa quëran o'maton, chini chiniquën nanantërin. Noya noya ninin. Piyapinpoaso nipirinhüë' isoro'paráchin nohuitërehua'. Inasáchin nohuitatëhua', nisha'huitërehua'. Cristoso nipirinhüë' inápa quëran o'maton, chini chiniquën nanantërin. <sup>32</sup> Yosë'pa' ya'huërinso' nohuitërin. Nani ni'nin. Yosëri nontërinso' natanin. Ina nohuitaton, sha'huitarinpoa'. Sha'huitopirinpoahuë', na'con na'con piyapi'saso', co yanatëtopihuë'. <sup>33</sup> A'naquënpaso nipirinhüë' natëtërehua'. “Yosë no'tëquën nonin. Inari a'paimarin,” ta'tëhua', natëtërehua'. <sup>34</sup> Quisososo' Yosë nanamën chachin nonin. Ispirito Santori noyá ya'coancantërin ni'ton, no'tëquënáchin nonin. <sup>35</sup> Tata Yosëri hui'nin pa'pi nosororin. Chini chiniquën nanan quëtërin ya'ipiya hua'anëntacaso marë'. <sup>36</sup> Hui'nin natëpisopitaso', Yosë nohuitatona' nanpimiatapi. Co natëpisopitasohuë', co ina pochin nanpimiatapihuë'. Nani Yosëri yonquirin ana'intacaso marë'. A'na tahuëri ana'intomiatarin, parisitopiquë a'pararin huachí.

## 4

### *Samaria sanapi sha'huitërinso'*

<sup>1-2</sup> I'huaso' na'a piyapi'sa' Coansha imapi. Na'a aporintërin. Iporaso' na'con na'con Quisoso imasapi. Co Quisoso chachin aporintërinhuë'. Ina sha'huitohuachincoi, ca'tano'sanënpitaco'i aporintërai. Na'con na'con aporintërai. Parisioro'sarinta' nantopi. <sup>3</sup> Ina nitotaton, Quisoso pa'nin. Cotia parti quëran pipirahuaton, Cariria parti paantarin.

<sup>4</sup> Inatohua pa'pachina, Samaria parti na'huëcaso' ya'huërin. <sup>5</sup> Inatohua' a'na ninano' ya'huërin, Sicarë itopiso'. Ina ya'cariya Cosi no'panën ya'huërin. Iráca pa'pin Cacopo itopisori quëtërinso'. <sup>6</sup> Inaquë a'na poso ya'huërin. Cacopo posonën itopi. Camotëchin inaquë canconai. Quisoso canotaton, posoquë huënsëconin.

<sup>7-8</sup> Ca'tano'sanënpitacoiso', ninanoquë pa'nai cosharo' pa'ana'huaiso marë'. Pa'naiso', Samaria sanapi i'sha macapon huë'nin. Nani mapachina, Quisosori itapon:

—Imoya, i'sha mananso canta' o'oi topirahuë, itërin.

<sup>9</sup> —Caso' Samaria sanapico nipirahuë': “I'sha mananso canta' o'oi,” ¿itëranco ti? itërin inarinta'. Cotioro'saso' Samariaro'sarë' co noya ninontopi huë' ni'ton, napotërin.

<sup>10</sup> —Yosë yanicanapirinquënhuë', co quëmaso' nitotëranhuë'. “I'sha mananso canta' o'oi,” itëranquën nipirinhüë', co nohuitërancohuë'. Nohuitëranco naporini, quëma nataintoncohuë'. Carinquën nanpirin i'sha quëchitënuquënhuë', itërin Quisosori.

11 —Quëmaso' co manta' ya'huëtërinquënhuë' i'sha macamaso'. I'shaso' acopo' ya'huërin. ¿Onporahuatoncha nanpirin i'sha manë'ponquënya? 12 Iráca Tata Cacopo iso poso ninin. Isëquëran i'sha macaton, o'orin. Hui'ninpita, pë'tahuanënpita inapitanta' isëquë o'opi. Inaso' chiniquënanantërin, topi. ¿Ina quëran na'con na'con quëmaso' nanitaparan ti? itërin sanapiri.

13 —I'shamia imoya o'opatëra, naquëranchin yamoroantarë'. 14 Nisha i'sha carinquë quëtaranquë. Ina ya'huëtöhuachinquë, co huachi yamororëso pochin cancantaranhuë'. Ni'quë'. Pancai' no'pa quëran pipihuachina, noyápiachin pipirárin. Co onporonta' yanimarinhue'. Inapochachin nanpirin i'sha quëtöhuatëinquë, cancanënuquë chachin ya'huëtërinquë. Inaquë ya'huápon huachi. Yosë nohuitaton, nanpimiataran, itërin.

15 —Ina i'sha siniro quëtoco ama yamoroto, i'sha masa'isohuë', itërin.

16 —Paaton imoya so'yan maconquë' huë'in, itërin.

17 —Co caso' so'yahuancohuë', itërin.

—No'tëquënaporan. Co so'yahuanquënhuë'. 18 Nani a'natërápo quëmapi so'yataponahuë', iporaso' quëmapi yacaparanso' co so'yanhuë'. No'tëquënonan, itërin.

19 —Quëmaso' siniro ninotona'pinquë, tënahuë. 20 Shimashonëhuëipita paso motopiquë Yosë chinotopi. Ya'huërë cotioro'sanquëmaso': “Quirosarinquëráchin Yosë chinotacaso' ya'huërin,” tënama', itërin.

21 —Natanco imoya. Nani tahuëri naniarin. Yosë yachinotöhuatama', co paso motopiquë pa'saramahuë'. Co Quirosarinquë tëranta' pacacaso ya'huërinhuë'. 22 Canpitaso' Yosë chinotopiramahuë', co nohuitëramahuë'. Cotioro'sacoiso', Yosë nohuitërai. Cotio quëmapi nicha'ësarinquëma' canpitanta'. 23 Ipora quëran huarë' Yosë yachinotöhuatama', ya'ipi cancanëma quëran huarë' chinotoco'. Ispirito Santo catahuarinquëma' ni'ton, no'tëquënyonquiatoma', Yosë chinotoco'. Ina pochin nohuantërin chinotacaso'. 24 Yosë co nonën ya'huëtërinhuë'. Co quënanarihuarahuë', ya'huërárin. Ispirito Santo chachin catahuarinquëma' no'tëquënyonquiatoma', ina chinotacaso', itërin Quisosori.

25 —A'na tahuëri Cristo huë'sarin, Yosëri a'paimarinso'. Ina huë'pachin, ya'ipiya a'chintarinpoa', tënin Samaria sanapi.

26 —Ca mini inaco, nontaranquënsó', itërin.

27 Naporo chachin ca'tano'sanënpitacoi o'mantarai. Sanapi nontarin, quënanquimarai. “¿Ma'marëta' iso sanapi nontarin? ¿Ma'ta' nohuantërin?” ta'toi, yonquinëhuëi quëran pa'yanpiraihuë', co natanaihuë'. 28 Sanapiso nipirinhue' yonshanën patahuaton, nianoquë pantarahuaton, piyapi'sa' sha'huëtërin.

29 —Huëco' pa'ahua'. Pasëquë quëmapi nohuitoco'. Co nohuitaponcorahuë', “Nani a'natërápo so'yahuanquë,” itërinco. Ya'ipiya ninorin. ¿Inaso' Cristo nimara ti? itërin.

30 Natanahuatona', na'a ya'huëhuano'sa' o'mapi Quisoso nicapona'. 31 Co'huara canquiyatërasoihuë', Quisoso yaa'capiraihuë'.

—Ca'quë' Maistro, itopiraihuë', co nohuantërinhuë'.

32 —Cosharo pochin nininso' ya'huëtërinco, co nohuitëramasohuë', itërincoi.

33 —¿A'napitari coshoro' quëtiimara? nitopiraihuë', co coshachatërarinhue'.

34 —Yosë a'paimarinco nohuantërinso' nica'huaso'. Ya'ipiya yanatërahuë. Ina yonquiato, co huachi coshoro' yonquirahuë'. Cosharo pochin achinirincó. 35 “Catapini yoqui pahuanarin cayarinso' macacaso',” topiramahuë'. Ipora chachin cayarinso pochin nininso' macacaso' ya'huërin, tënahuë caso'. ¡Ni'cochi! Isoro'pa' panca imin pochin ninin. Cayarinso' manëso pochachin piyapi'sa' manë Yosë imacaiso marë'. Ipora tahuëri'sa chachin na'a piyapi'sa' ya'huërarin Yosë imacaiso marë'. Inapita a'chintacaso' ya'huërin. 36-37 Piyapi'sa' a'chintöhuatama', Yosë'pa' canaarama'. Noya noya nanpimiatarama'. Cato' piyapi sacatërinso pochin nisarama'. “A'naso' ya'pirin sha'nin. Cayahuachina, a'narinta' manin,” topi. Napöhuachina, cato'

a'china'piro'sa chachin nóya cancantapi. <sup>38</sup> Na'a piyapi'sa' ya'huërin, co Yosë nohuitopisohuë'. A'naquëni nani a'chintopirinahuë', co yanatëpihuë'. Iporaso nipirinhüë' a'paranquëma' a'chintantacamaso marë'. Yosë huëntonënquë ya'conacaiso marë' a'chintoco'. A'chintohuatama', imasapi huachi, itërincoi.

<sup>39</sup> Na'a ya'huëhuano'sa' Quisoso natëpi. Sanapiri: “Ya'ipi ninorinco,” itërinso marë' natëpi. <sup>40</sup> Quisoso ni'quihuachinara, “Huëquë' isëquë yacapatoncoi, a'chintocoi,” itopi. Itohuachinara, cato' tahuëri a'chintacaso marë' inaquë i'huatërai. <sup>41</sup> A'chintohuachina, na'con na'con piyapi'sa' natëpi. <sup>42</sup> Sanapi itapona':

—Quëma sha'huitërancoi ni'toi, pi'pian Quisoso natërai. Iporaso nipirinhüë' quiyaora chachin natanai. Nani nohuitatoi, cancanëhuëi quëran huarë' natërai huachi: “Tëhuëenchachin isoso' nicha'ërinpoa'. Insosona imapachina', oshanën inquitaton, anoyacancantarín, tënai,” itopi.

### *Capitan hui'nin anoyatërinso'*

<sup>43</sup> Cato' tahuëri quëran paantarahuatoi, Cariria parti canconai. <sup>44-45</sup> Caririario'sari nohuitatona', noya natanpi. I'hua chachin Pascoa tahuëri na'huëhuachina, inahuanta' Quirosarínquë pa'pi. Naporo' Quisoso nohuitopi. Nani ma'sha Yosë pochín nininso' ni'pi ni'ton, iporaso' a'chintohuachina, noya natanpi. Ninanonënquë chachinso nipirinhüë' co a'chininhüë'. “Ya'huërinquëso' pënëntona'pi co yanatëpihuë',” ta'ton, co inaquë a'chininhüë'.

<sup>46</sup> Ina quëran Canaquë cancoantarai. Inaquë i'hua i'sha huino atarantërin. Inaquë canconpatoira, a'na capitan copirno piyapínën nininsoari huëcapairín. Hui'nin quëmapia'hua nininso', Capinaomoquë chiníquën caniorín. <sup>47</sup> “Quisoso Cotia parti quëran pipirahuaton, Cariria parti canquirín,” topi, natantërin. Natantahuaton, paahuarín:

—Huëquë' Maistro hui'nahuë anoyatiimaco. Nani yachimín, itërin.

<sup>48</sup> —Canpitaso' co a'naroáchin natëramacohüë'. Co'so' Yosë pochín nipatohüë', co natëaramacohüë', itërin inarinta'.

<sup>49</sup> —Manóton Sinioro huëquë'. Hui'nahuë chimínpachín, itaantarín.

<sup>50</sup> Napotaantahuachina:

—Ya'huëran'pa' pa'mantaquë'. Hui'nan co chimínaponhuë'. Noyatarín, itërin. Napotohuachina: “No'tëquën nontërinco,” ta'ton, ya'huërin'pa' pa'mantarín.

<sup>51</sup> Yacanconahuaso', inpriatonënpitari nacapiatona':

—Hui'nan nani noyatërin, itiipi.

<sup>52</sup> —¿Insëchinta' pi'i nisahuaso' noyatërin? itërin.

—I'huara pi'i yatëhuërenahuaso' sapo otanotërin, itopi.

<sup>53</sup> “Naporo chachín Quisoso nontërinco. ‘Hui'nan noyatarín,’ itërinco,” ta'ton, Quisoso natërin. Ya'ipi pëinënquë ya'huëpisopitanta' natëpi.

<sup>54</sup> I'hua chachín i'sha huino atarantërin. Iporaso' Cotia parti quëran huëntarahuaton, capitan hui'nin ya'huëre' a'naroáchin anoyatërin. Inapoaton catoro' huachi Caririaquë Yosë pochín nisarín piyapi'sari nohuitacaiso marë'.

## 5

### *Apia anoyatërinso'*

<sup>1</sup> Ina quëran cotio niyontonpiso tahuëri naniriarín. Naporo' Quisoso Quirosarínquë paantarín. <sup>2</sup> Inaquë i'sha ya'huërin, anpomiachín. Cotio nananquë Pitista itopi. Ninano ya'coana pirayan ya'huërin, ohuicaros'a' ya'coananën itopiquë. I'sha pirayan a'natërápo imënamë pochín nininso' ya'huërin. <sup>3-4</sup> Inaquë na'a cania'piro'sa' quëhuënapí. A'naquën somaraya. A'naquën sonpacha. A'naquën nantën tachitërin ni'ton, co nanitërinhuë' huanicaso'. Inaquë ninarapi. [“Hua'qui quëran hua'qui quëran Sinioro anquëninën o'maton, i'sha aco'sacaitërin,” topi. “Napohuachina, inso'ton i'quë ya'conpachina, a'naroáchin noyatërin,” ta'tona', ninarapi.] <sup>5</sup> Inaquë a'na quëmapí ya'huërin. Nani cara

shonca posa pi'ipi caniorin. Co nanitërinhuë' huanicaso'. <sup>6</sup> Inaquë quëhuënápirinhuë', Quisosori quënanquirin. “Nani hua'qui' caniorin,” itohuachina, apia itapon:

—¿Nohuantëran noyatamaso ti? itërin.

<sup>7</sup> —Nohuantopirahuë' Sinioro. Sa'ahuaco. Co insonta' ya'huërinhuë' i'quë po'moincoso'. I'sha co'sacaitohuachina, yaya'conpirahuë'. A'na'ton ya'conin, itërin.

<sup>8</sup> —Huaniquë' iyasha. Pë'sara'huaya masahuaton, iratëquë', itërin.

<sup>9</sup> Napotohuachina, a'naroáchin apia noyatërin. Pë'sara'huaya masahuaton, iratërin. Chinoto tahuëri chachin naporin. <sup>10</sup> Cotio hua'ano'sari quënanahuatona', apia huëcapaipi. —Ipora tahuëriso', chinoto tahuëri ni'ton, co ma'sha quëpacaso' ya'huërinhuë', itopi.

<sup>11</sup> —Quëmapi anoyatërinco' nani sha'huitërinco. “Pë'sara'huaya masahuaton, iratëquë',” itërinco, tënin.

<sup>12</sup> —¿Ma quëmapita' napotërinquën? itopi. <sup>13</sup> “Ahuën. Co nohuitërahuë',” tënin. Hua'huayatërahuë' piyapi inaquë ya'huërin ni'ton, nani Quisoso pa'nin. <sup>14</sup> Ina quëran chinotopiso pëiquë pa'sahuaton, apia anoyatërinso' quënancoantarín.

—Ni'quë' iyasha. Nani quëmaso' noyatëran. Ama huachi oshahuaantaquësohuë', na'con na'con ma'sha onpotan, itërin.

<sup>15</sup> Ina natanahuaton, Yosë chinotopiso pëi quëran pipirahuaton, cotioro'sa' sha'huitonin. “Quisoso anoyatërinco,” itoonin. <sup>16</sup> Napoaton Quisoso no'huipi. Chinoto tahuëri anoyatërinso marë' co quë'yapihuë'. <sup>17</sup> Quisosorisso nipirinhue' itërin:

—Tatahuëso' co ipora huanta' chinotërinhuë'. Sacatárin piyapi'sa' catahuacaso marë'. Canta' co chinotërahuë'. Nani tahuëri piyapi'sa' catahuarahue', tënin.

<sup>18</sup> Chinoto tahuëri piyapi anoyatërin ni'ton, cotioro'sari yatëpapi. “Yosëso' tatahuë chachin, topachina, Yosë pochachin niconin,” ta'tona', aquë aquëtë' yatëpapi.

### *Yosë hui'nin ni'ton chiníquën nanantërinso'*

<sup>19</sup> Ina quëran Quisosori itantarín: “No'tëquën itaranquëma'. Caora yonquinëhuë quëran co manta' ninahuë'. Tatahuëráchin nonanahuë. Hui'ninco ni'to, inapochachin canta' ninahuë. <sup>20</sup> Tatahuë na'con nosororinco. Nosoroatonco, yonquirinso chachin anitotërinco. A'na tahuëri catahuaarinco saca sacai' nininso' nica'huaso'. Canpitaso' ni'patama', pa'yanarama'. <sup>21</sup> Tatahuë chimipi ananpitaantarín. Inapochachin canta' insosona nohuantërahuëso' ananpitaantarahuë. <sup>22</sup> A'na tahuëri coisë pochín nicato, ya'ipi piyapi'sa' no'tëquën sha'huitarahue. Noya nipisopita noya acoarahue. Oshahuano'saso nipirinhue' no'tëquën ana'intarahue. Co tatahuëri ana'intarinhuë'. Nani nanan quëtërinco ana'inta'huaso marë'. <sup>23</sup> Ina quëran ya'ipi piyapi'sa' noya ni'sarinaco. Tatahuë noya ni'piso pochachin ni'sarinaco. Ina marë' nanan quëtërinco. Co noya ni'patamacohue', Tatahuënta' co noya ni'namahuë'. Ina a'paimarinco.

<sup>24</sup> No'tëquën itaranquëma'. Yosë chachin a'paimarinco. Noya natanpatamaco, cancanëma quëran huarë' ina imapatama', nanpimiatarama'. Co onporonta' ana'intaranquëmahuë'. Chiminpatama', co parisitomiataramahue'. Nani Yosë nohuitarama' ni'ton, nanpimiatarama'. <sup>25</sup> Caso' Yosë hui'ninco. Iporaso huachi a'naquën chimipi pochín nipisopita natanarinaco. Inapita noya natanpachinaco, Yosë anohuitarahue. Ina nohuitoahuachina', nanpimiatapi. <sup>26</sup> Tata Yosë inaora nohuanton, nanpirin. Inari piyapi'sa' nanpicaso' quëtërin. Inapochachin canta' ina nohuanton, nanpirahuë. Naporahuaton, a'napitanta' ananpita'huaso' nanitaparahuë. <sup>27</sup> Yosë quëran quëmapiico ni'to, nanan quëtërinco piyapi'sa' ana'inta'huaso marë'. <sup>28</sup> Ama ina yonquiatoma', pa'yancosohue'. A'na tahuëri ya'ipi chiminpisopita natanarinaco. <sup>29</sup> Natanpachinaco, po'oro quëran pipiapi. Noya nipisopita noya noya nanpiantarapi. Co noyahuë' nipisopitaso nipirinhue', ana'intarahue,” tënin Quisoso.

### *Yosëri a'paimarinso'*



<sup>30</sup> Ina quëran Quisosori itantarin: “Co caora nohuanto manta' ninahuë'. Tata Yosë sha'huitohuachincora, inachachin sha'huirahuë. Co caso' nisha yonquirahuë'. Tata yonquirinsoráchin nohuantërahuë. Napoaton no'tëquën ana'antarahuë. <sup>31</sup> Caso' Cristoco. Yosë quëran o'marahuë, ténahuë. Casáchin naporahuë naporini, co natëinacoso' ya'huëitonhuë'. <sup>32</sup> Nipirinhüë', Tata Yosënta' inachachin sha'huitarinquëma'. No'tëquën nonin, ténahuë. <sup>33</sup> I'hua piyapi'sa' a'parama' Coansha natanacaiso marë'. ‘Co caso' Cristocohüë'. Inaso' Cristo, Yosëri a'paimarinso', itërin. No'tëquën naporin. <sup>34</sup> Caso' co piyapi noninsoachin yonquirahuë'. Nipirinhüë', iso' sha'huitarinquëma' canpita natëtoma' cha'ëcamaso marë'. <sup>35</sup> Coanshaso' noya quëmapi. Huaroro noya orotërinso pochin ni'ton, noya anitotërinquëma'. Ya'nan natanpatamara, hua'quimiachin pa'yatërama'. <sup>36</sup> Inaso' no'tëquën sha'huitërinquëma'. ‘Yosëri chachin Quisoso a'paimarin,' itërinquëma'. Nipirinhüë', co inasáchin anitotërinquëmahüë'. Yosëso' chini chiniquën nanantaton, catahuarinco ni'ton, sacai' nininso' ninahuë. Cania'piro'sa' a'naroáchin anoyatërahuë. Yosë nohuanton, ina pochin ninahuë. Ina marë' na'con na'con natëamacoso' ya'huërin. <sup>37</sup> Tatahuë a'paimarincosonta' nani sha'huitërinquëma'. Co onporonta' noninso' natanchinamahuë'. Co ni'chinamahuë'. <sup>38</sup> Nanamënta' co natëramahuë'. A'paimapirincohüë' co natëramacohüë' ni'ton, naporama'. <sup>39</sup> Yosë quiricanën na'con nontërama'. ‘Ina nontohuatëhua', nanpimiatacaiso marë' anitotarinpoa', tënama'. Napopiramahuë', co tëhuënchachin natëramahuë'. Ina quiricaquë chachin ninorinaco. <sup>40</sup> No'tëquën ninopirincohüë', co yaimaramacohüë'. Ananpimiata'huanquëmaso' ya'huëpirinhüë', co nohuantëramacohüë'.

<sup>41</sup> Co canpita noya nicamacoso marë' napotëranquëmahüë'. <sup>42</sup> Nani nohuitëranquëma'. Co cancanëma quëran Yosë nosororamahuë', ténahuë. <sup>43</sup> Yosë chachin a'paimarinco ni'ton, o'mapirahuë', co nohuantëramacohüë'. A'naquënso nipirinhüë' inaora yonquinën quëran a'chintohuachinquëma', nohuantarama'. <sup>44</sup> Canpita capini nipa'yatacasoráchin yonquiatoma', co Yosë noya nicainquëmaso' yonquiramahuë'. Napoaton co natëramacohüë'. <sup>45</sup> Co carinquëma' Yosëquë sha'huirapiaranquëmahüë'. Moisésë tëhuënchinso' sha'huirapiarinquëma'. ‘Ina catahuarinpoa', ta'toma', imapiramahuë', co natëramahuë' ni'ton, sha'huirapiarinquëma'. <sup>46</sup> Inaso', iráca ninotonco ninshitërin. Ina natërama' naporini, canta' natëitomacohüë'. <sup>47</sup> Ninshitopirinhüë', co natëramahuë' ni'ton, carinquëmanta' a'chintopirancohüë', ‘Co no'tëquën nonanhuë', itëramaco,' itërin Quisosori, cotio hua'ano'sa' nontaton.

## 6

### *Cosharo' ana'atërinso'*

*(Mateo 14.13-21; Marcos 6.30-44; Lucas 9.10-17)*

<sup>1</sup> Ina quëran Cariria sono' aquëtëran pëntonai. Ina sonoso', Tipiriasë itopi anta'. <sup>2</sup> Notohuaro' piyapi'sa' imasarinacoi. Na'a cania'piro'sa' Quisosori a'naroáchin anoyatërin. Ina nicatona', imasapi. <sup>3</sup> Nonshirahuatoi, a'na motopia'huaquë pomosocontarai. Inaquë huënsëconai. <sup>4</sup> Pascoa tahuëri naniriarin. Naporo' cotioro'sa' niyontonpi Yosë yonquicaiso marë'. <sup>5</sup> Quisoso natanacaiso marë' notohuaro' piyapi'sa' canquirapi. Inapita quënanahuaton, Quisosori Pinipi itapon:

—¿Intohuacha cosharo' pa'anë isopita capacaiso marë' nicaya? itërin.

<sup>6</sup> Nani yonquirin cosharo' ana'atacaso' niponahuë', Pinipi natanin tënicaso marë'.

<sup>7</sup> —Cato pasa tahuëri sacatatë' canarësoquë pa'anpirëhuahuë', co iso nápo piyapi'sa' naniitonahuë', itërin Pinipiri.

<sup>8</sup> Antërisënta' ya'huarin. Simon Pitro iin inaso'. Natanahuaton, itapon:

<sup>9</sup> —Isëquë a'na quëmapia'hua ya'huërin. A'natërapoíchin pan nisahuaton, catoyachin sami ya'huëtërin. Inaíchin nipirinhüë', ¿iso nápo' piyapi ta'ma' nanitëre'poya? itërin.

<sup>10</sup> —Piyapi'sa' sha'huitoco' huënsë'ina', itërincoi Quisoso.



Inaquë noya pastoa'huaya ya'huërin. Sha'huitohuatëira, inaquë huënsëpi. A'natërápo huaranca quëmapi'sa pochin ya'huëpi. <sup>11</sup> Quisosori a'natërapoya pan masahuaton, Yosë nontërin. “Yosparinquën, Tata,” itahuaton, piyapi'sa' quëtërin capacaiso marë'. Samirë chachin quëtëra'piarai. Ya'ipi piyapi'sa' natëaquë huarë' coshatopi. <sup>12</sup> Nani natëhuachinara, ca'tano'sanënpitacoi itaponcoi:

—Pan, sami, inapita pë'sotopiso' maconco', chiniahuachina', itërincoi.

<sup>13</sup> Napoaton pë'sotopiso' masahuatoi, shonca cato' i'më' mëntatërai. <sup>14</sup> Ina nápo piyapi'sa' capacaiso marë' cosharo' ana'atërinso' ni'sahuatona', piyapi'sa' ninontopi:

—Tëhuëenchachin iso quëmapi Yosëri a'paimarin. Pënëinpoaso marë' a'paimacaso sha'huirinso chachin, nani o'marin, nitopi.

<sup>15</sup> “Huëco' maahua', copirno acoa'ahua',” topi a'naquën. Co Quisosori natanaponahuë', inaora yonquinën quëran nitotërin. Nitotaton, inaora panënuë' pantarin.

### *Ii' aipi iratërinso'*

*(Mateo 14.22-27; Marcos 6.45-52)*

<sup>16</sup> I'huanahuanquë ca'tano'sanënpitacoiso', sono' yonsanquë pa'mantarai. <sup>17-18</sup> Potiquë ya'conahuatoi, Capinaomoquë paca'huaiso marë' pëntonapiraihuë', huancoana' tashitërai. Co Quisoso huë'shatërasohuë', panca ihuan manincoi ni'ton, panca co'sacaitërin. <sup>19</sup> Saota quiromitro pochin nani maitopiraihuë', Quisoso huë'sarin nicaporaihuë', co a'naroáchin nohuitëraihuë'. Ii' aipi i'narahuaton, no'pa pochin huë'shiarin. Poti ya'caririarinso' ni'sahuatoi, pa'yanai.

<sup>20</sup> Napopiraihuë':

—¡Co'ta ca huë'sarahuë! ¡Ama pa'yancosohuë! itërincoi. <sup>21</sup> Ina quëran noya cancantatoi: “Ya'conquiquë',” itohuatoira, ya'conin. Ya'conpachina, a'naroáchin Capinaomo yonsanquë canconai.

### *Quisoso yonípi'so'*

<sup>22</sup> Piyapi'saso nipirinhüë' ina quëranchin quëparitopi. Tahuëririnquë Quisoso yonísapirinhüë'. Co quënanatonahuë', ninontopi. “¿Intohuaso' pa'mara? I'huara a'naíchin poti ya'huëpirinhüë'. Inaquë ca'tano'sanënpita ya'conahuatona', pa'pi. Quisososo nipirinhüë' co pa'ninhüë',” nitopi. <sup>23</sup> Napoasoi, potiro'santa Tipiriasë quëran huë'piso' canquirapi quënanpi. Quisoso cosharo' ana'ataton piyapi'sa' a'carinso' ya'cari nonshiipi. <sup>24</sup> Co ca'tano'sanënpitacoi tëranta' ya'huëraihuë' ni'ton, “Huëco' pa'ahua', Quisoso yoníahua',” nitatona', potiro'saquë ya'conpi. Ya'conahuatona', Capinaomoquë pa'pi Quisoso yonípona'.

### *Cosharo pochin nininso'*

<sup>25</sup> Inaquë nonshirahuatona', Quisoso quënanconpi huachi.

—¿Onporota' Maistro isëquë huënan? itopirinhüë'.

<sup>26</sup> —No'tëquën sha'huitaranquëma'. I'huara cosharo' ana'atërahuë nohuitamacoso marë' nipirinhüë', co yanohuitëramacohüë'. Natëaquë huarë' coshatërama' ni'ton, yoniramaco. <sup>27</sup> Cosharomia a'naroáchin chanatërin. Ama inasáchin nohuantocosohüë'. Cosharo pochin nininso' ya'huërin. Cancanëma marë' quëtaranquëma'. Ina co onporonta' chanatarinhüë'. Ya'huëtohuachinquëma', Yosë nohuitatoma' nanpimiatarama. Ina na'con na'con yonquico'. Yosë quëran quëmapico ni'to, quëtaranquëma'. Ina marë' Tata Yosë acorinco. Ina nohuanton, nani ma'sha nanitaparahuë nohuitamacoso marë', itërin.

<sup>28</sup> —¿Ma'ta' Yosë nohuantërin nica'huaiso'? itopi.

<sup>29</sup> —Tëhuëenchachin Yosë yanatëhuatama', ca imaco. Ina a'paimarinco ni'ton, cancanëma quëran huarë' imaco. Ina Yosë nohuantërin, itërin Quisosori.

<sup>30</sup> —Inta nipachin, Yosë pochin niquë'. Ina nicatoi, natë'inquën. Co topinan natëa'huainquënso' ya'huërinhuë'. <sup>31</sup> Iráca shimashonënpopita Moisésëri Iquipito quëran

quēcapon, noya cosharo' mana itopiso' quëtërin. “Cosharo' inápa quëran o'marinso' quëtërin capacaiso marë',” ténin Yosë quiricanênquë. Inotëro parti napopi, itopi.

<sup>32</sup> —No'tëquën itëranquëma'. Cosharo' inápa quëran o'marinso' co Moisésëri quëtërinhuë'. Tata Yosëri quëtërinso'. Iporaso' noya noya nininso' quëtarinquëma'.

<sup>33</sup> Inápa quëran a'patimarinquëma' piyapi'sa' ina pochin nanpicaíso marë', itërin.

<sup>34</sup> —Inanpi cosharo', Sinioro, quëtocoi nani tahuëri capatoi, noya nanpii, itopi.

<sup>35</sup> —Ca inaco. Caso' cosharo pochinco ni'to, piyapi'sa' ananpitiatarahuë. Imapatamaco, co huachi tanarëso pochin cancantaramahuë'. Natëhuatamaco, co huachi yamororëso pochin cancantaramahuë'. Yosë nohuitohuatama', sano cancantarama'.

<sup>36</sup> Nipirinhüë', nani sha'huitëranquëma'. Ninahuëso' nicapomarahüë', co natëramacohüë'.

<sup>37</sup> A'naquën Tata Yosë nohuanton, imasarinaco. Insosona imapachinaco, co onporonta' a'pararahüë'. <sup>38</sup> Co caora nohuanto, ma'sha ninahuë'. Inápa quëran o'marahüë Tata Yosë natëca'huaso marë'. Ina a'paimarinco. <sup>39</sup> A'naquën Yosë nohuanton, imasarinaco. Inapitaso' noya a'pairahuë, co a'poarinacohüë'. Ayaro' tahuëri ananpitaantararahüë. Ina Yosë nohuantërin. <sup>40</sup> “Quëmaso' tēhuēnchachin Yosë hui'ninquën,” itatomaco imapatamaco, Yosë nohuitatoma' nanpimiatarama huachi. Ayaro' tahuëri ananpitaantaranguëma'. Ina Yosë nohuantërin, itërin Quisosori.

<sup>41</sup> Ina natanahuatona', cotioro'sari no'huipi. “Caso' cosharo pochin ninahuë. Inápa quëran o'marahüë,” téninso marë' no'huipi. No'huitona', ninontapi.

<sup>42</sup> —Co'ta inaso' Quisoso. Cosi hui'nin. A'shionta' nohuitërehua'. ¿Onpoatonta' “Inápa quëran o'marahüë,” toconin? nitopi.

<sup>43</sup> —Ama huachi no'huitomaco, sacaro quëran ninontocosohüë'. <sup>44</sup> Co insonta' nanitërinhuë' inaora nohuanton imaincoso'. Tata Yosëri huayoninsopitaráchin imasarinaco. Ayaro' tahuëri inapitaso' ananpitaantararahüë. <sup>45</sup> Pënëntona' piro'sa' iráca ninshitopi. “Ya'ipi piyapi'sa' Yosëri a'chintarin,” topi, ninshitatona'. Tatahuë natanatoma' natëhuatama', imasaramaco.

<sup>46</sup> Co insonta' Tata Yosë quënaninhuë'. Casáchin quënanahuë. Ina ya'huërin quëran o'marahüë. <sup>47</sup> No'tëquën sha'huitëranquëma'. Imapatamaco, Yosë nohuitatoma' nanpimiatarama'. <sup>48</sup> Ca cosharo pochinco ni'to piyapi'sa' ananpimiatarahuë. <sup>49</sup> Shimashonëmapita inotëro parti ya'huaso', cosharo' Yosëri quëtërinso' ca'pi. Mana itopiso' ca'pirinahüë', nani iráca chiminpi. <sup>50</sup> Insosona natëhuachinco inápa quëran cosharo' o'marinso capatë pochin nizarin. Napohuachin, Yosëre' ya'huëmiatapon. <sup>51</sup> Ca nanpirin cosharo pochinco. Inápa quëran o'mato, noya noya ananpiaranquëma'. Ca nonëhuë chachin quëtarahuë ya'ipi piyapi'sa marë'. Coshatëramaso pochin nitohuatamaco, ya'coancantaranquëma', nanpimiatarama huachi, itërin.

<sup>52</sup> Ina natanahuatona', cotioro'sa' nisha nisha ninontopi.

—¿Onporahuatonta' nonën chachin ca'nëso pochin quëtëre'ponpoa nicaya? nitopi.

<sup>53</sup> —No'tëquën itëranquëma'. Caso' Yosë quëran quëmapico ni'to, ya'ipi cancanëma quëran yonquico. Co'so' nonëhuë ca'nëso pochin nitohuatamahuë', huënainëhuënta' co o'orëso pochin nitohuatamahuë', co onporonta' nanpimiataramahuë'. <sup>54</sup> Insosona nonëhuë ca'nëso pochin nipachina', huënainëhuënta' o'orëso pochin nipachina', nanpimiatarin. Ayaro' tahuëri ananpitaantarahuë. <sup>55</sup> Nonëhuë cosharo pochin ni'ton, achinicananaranquëma'. Huënainëhuë pa'sarin ni'ton, imapatamaco, anoyacancantaranquëma'.

<sup>56</sup> Tëhuēnchachin nonëhuë ca'nëso pochin nipatama', huënainëhuënta' o'orëso pochin nipatama', ya'coancantaranquëma' ni'ton, imamiataramaco. <sup>57</sup> Tatahuëso' nanpimiatarin. Ina a'paimarinco. Catahuarinco noya nanpica'huaso marë'. Inapochachin imamiatohuatamaco, cosharo pochin achinicananaranquëma' ni'ton, catahuaranguëma' Yosë nohuitatoma' nanpimiatacaso marë'. <sup>58</sup> Ca cosharo pochinco. Inápa quëran o'marahüë. Shimashonëmapita cosharo' Yosëri a'patimarinso' ca'pirinahüë', iráca chiminpi. Nipirinhüë', imamiatohuatamaco, nanpimiatarama', itërin.

<sup>59</sup> Capinaomo niyontonpiso pëiquë a'chintaton naporin.

*Quisoso natëhuatëhua', nanpimiatacaso ya'huërinso'*

<sup>60</sup> Na'a piyapi'sa' Quisoso imasapirinahuë', ina nanan natanahuatona' a'naquën nisha yonquipi.

—A'chininso' sacai' imacaso'. ¿Incaricha nitotaton, natërë'poya? nitopi.

<sup>61</sup> Napohuachinara, Quisoso inaora nitotaton, itërin:

—A'chintopiranquëmahuë', ¿yaa'poramaco ti? <sup>62</sup> Yosë quëran quëmapico ni'to, a'na tahuëri Yosë ya'huërin'pa' panantararahuë. Ina ni'patama' ¿ma'ta' yonquiarama'?

<sup>63</sup> Ispirito Santoráchin ananpimiatarinquëma'. Piyapi'sa' inahuara co nanitapihuë'. Yosë yonquirinso chachin sha'huitëranquëma'. Ina natëhuatama', Yosë nohuitatoma' nanpimiatarama'. <sup>64</sup> Nipirinhüë', a'naquëma' co natëramacohüë', itërin. Iráca quëran huarë' ya'ipi piyapi'sa' yonquirinsopita nitotërin. A'naquën co yanatëtopihuë'. A'nanta' yasha'huirapirin. Inapita nitotaton, napotërin. <sup>65</sup> Ina quëran itantarin:

—Napoaton itaranquëma'. Co Yosëri anitotohuachinhüë', co insonta' nanitarinhüë' imaincoso', itërin.

<sup>66</sup> Naporo quëran huarë' na'amiáchin co huachi imapihuë'. A'popi huachi.

<sup>67</sup> Napohuachinara, ca'tano'sanënpitacoi itaponcoi:

—¿Co canpitaso' a'poapomacohüë' to? itërincoi.

<sup>68</sup> —Co Sinioro a'poarainquënhüë'. Co a'na ya'huërinhuë' imaca'huaiso'. Quëma nóya a'chintarancoi Yosë nohuitatoi nanpimiata'huaiso marë'. <sup>69</sup> Nani natërainquën. Quëmaso' noyasáchin ninan. Yosë a'paimarinquën, tënai, itërin Simon Pitrori.

<sup>70</sup> —Shonca catonquëma' acoranquëma' imacamacoso marë'. A'naëmaso nipirinhüë', sopai pochin cancantërin, itërincoi. <sup>71</sup> Simon hui'nin Cotasë Iscarioti itopiso yonquiaton, naporin. Inarinta' ca'tanpirinhüë', yasha'huirapirin.

## 7

*Quisoso iinpita napopiso'*

<sup>1</sup> Ina quëran hua'quimiáchin Quisoso Cariria parti ya'huërarin. Cotioro'sari yatëpapi ni'ton, co Cotia parti yapa'ninhüë'. <sup>2</sup> Ina quëran a'na cotio niyontonpiso tahuëri naniriarin, imënamëro'sa' pita itopiso'. <sup>3</sup> Napoaton iinpitari itapona':

—Quëmanta' Cotia parti paaton, Yosë pochin niquë' imarinëinquënsopita ni'ina'.

<sup>4</sup> Po'oana quëran ma'sha nipatan, piyapi'sa' co nohuitarinëinquënhüë'. Yosë pochin yanipatan, a'ninquëchin niquë' ya'ipi piyapi ni'inëinquën, itopi.

<sup>5</sup> Co iinpitari tëranta' natëyátërapihuë' ni'ton, napotopi. Inapita nontaton, itapon:

<sup>6</sup> —Pahuanarin caso' paca'huaso'. Canpitaso nipirinhüë' onporosona yapa'patama', noya paco'. <sup>7</sup> Canpitaso' piyapi'sa' co no'huirinhëinquëmahuë'. Caso nipirinhüë' no'huirinaco. “Co noyahuë' ninama',” itërahuëso marë' no'huirinaco. <sup>8</sup> Napoaton paatoma', niyontonpiso tahuëri na'huëco'. Co ipora pa'sarahuë'. Pahuanarin paca'huaso', itërin.

<sup>9</sup> Ina tosahuaton, ina quëranchin ya'huërarin.

*Quisosonta' Cotia parti pa'ninso'*

<sup>10</sup> Iinpita nani pa'pachinara, Quisosonta' pa'nin niyontonpiso tahuëri na'huëcaso marë'. Pa'pirinhüë', co piyapi'sa' ni'tërantapaquë pa'ninhüë'. Po'oana quëran pochin pa'nin. <sup>11</sup> Inaquë cotioro'sari yonisápirinhüë'.

—¿Intohuata' Quisoso ipora? tosapi.

<sup>12</sup> Nisha nisha yonquiatona', ninontopi. “Inaso' noya quëmapi,” topi a'naquën. A'napitaso nipirinhüë' taponas': “Co noyahuë'. Yanonpintërinpoa',” topi.

<sup>13</sup> Napopirinhüë', hua'ano'sa' të'huatatona', po'oana quëran ninontopi.

<sup>14</sup> Simana huancana Quisoso Yosë chinotopiso pëiquë pa'nin. Inaquë a'chinarin.  
<sup>15</sup> Cotioro'sa' natanahuatona', pa'yanpi.

—¿Onporahuatonta' iso quëmapi co na'con quirica nitotaponahuë', noyá nitotërin? topi.

<sup>16</sup> Napohuachinara, Quisosori itapon:

—Co caora yonquinëhuë quëran a'chinhahuë'. Tata Yosë a'paimarincoso' sha'huitohuachincora, canta' a'chinarahuë. <sup>17</sup> Cancanëma quëran huarë' Yosë yanatëhuatama', no'tëquën anitotaringuëma': "Co inaora yonquinën quëran a'chininhue'. Yosë nanamën chachin a'chinarin," tosarama'. <sup>18</sup> A'naquënso' inahuara yonquinëna quëran a'chinpi. Piyapi'sari pa'yatacaiso marë' napopi. Caso' nipirinhue' Yosëichin yonquiato, no'tëquën a'chinhahuë. Inaichin pa'yatacaiso' ya'huërin, ténahuë. Co nonpintëranquëmahuë'. <sup>19</sup> Moisësë iráca pënëntopirinhue', co a'nayanquëma tëranta' natëramahuë'. ¿Onpoatonta' yatëparamaco? itërin.

<sup>20</sup> —¡Quëmaso' sopai ya'coancantërinquën ni'ton, hua'yantëran! ¿Inta' yatëparinquën? itopi.

<sup>21</sup> —Chinoto tahuëri a'na quëmapi anoyatërahuë. "Chinoto tahuëri nipirinhue', co chinotërinhuë'," ta'toma', canpitaso' pa'yanama'. <sup>22</sup> Ni'cochi. Co canpita tëranta' ya'ipi chinoto tahuëri chinotëramahuë'. Iráca shimashonëma' sha'huitërinënguëma' marca acocaso'. "Hui'nanpita posa tahuëritohuachina', marca acotoco'," itërinpoa' Moisësënta'. Posa tahuëri nanihuachina, marca acotërama'. Chinoto tahuëri nisapirinhue', acotërama'. <sup>23</sup> Chinoto tahuëri niponahuë', marca niacotërama'. Moisësë pënëntërinso' natëcaso marë' naporama'. Inapoapomarahue', ¿onpoatomata' nipachin chinoto tahuëri piyapi anoyatërahuëso marë' no'huiramaco? <sup>24</sup> Ama quënanamasoráchin yonquiato, sha'huirapicosohue'. Yonquinënpoa quëran huarë' Yosë ni'sarinpoa'. Ina nitotatoma', no'tëquën yonquico', itërin Quisosori.

### *Cristo inápa quëran o'marinso'*

<sup>25</sup> Ina quëran ya'huëhuano'sari Quisoso quënanahuatona', ninontopi.

—¿Isona quëmapi yatëpapiso' ti? <sup>26</sup> Ni'cochi. A'ninquëchin a'chinapirinhue', co incari tëranta' no'huirinhue'. Hua'ano'sarinta' natëtona': "Inaso' Cristo, Yosëri a'paimarinso'," ¿tomarai huachi ti? nitopi.

<sup>27</sup> —Nepochináchin, nipirinhue' Quisoso intohua quëransona huë'ninso' nitotërehua'. Cristoso huë'pachin intohua quëransona huë'ninso', co insonta nitotarinhuë', nitopi.

<sup>28</sup> Quisososo nipirinhue', Yosë chinotopiso pëiquë chiníquën itaantarín:

—¿Nohuitëramaco ti? Intohua quëranso' huë'nahuëso' nitotapomarahue', co tëhuënhachin nohuitëramacohue'. Co caora nohuanto, o'marahue'. Yosë nohuanton, o'marahue'. Inaso' no'tëquën nonin. Nipirinhue', inanta' co nohuitëramahuë'. <sup>29</sup> Caso nipirinhue' ina nohuitërahuë. Inatohua' ya'huëpirahuë', isoro'paquë a'paimarincó, itërin.

<sup>30</sup> Ina topachina, hua'ano'sari tashinan pëiquë po'mocaiso marë' yamápirinhue', Yosë nohuanton, co chiminacaso' naniyatërarinhue' ni'ton, co mápihuë'. <sup>31</sup> Hua'ano'sariso' no'huipirinhue', na'a piyapi'sari Quisoso yanatëpi.

—Cristo o'mahuachin, iso quëmapi quëran na'con na'con ta'ma' ¿Yosë pochin niquimarë'po ti? topi.

### *Tashinan pëiquë yapo'mopiso'*

<sup>32</sup> Ina pochin ninontopiso', parisioro'sa' natantopi. Natantahuatona', corto hua'ano'sarë chachin ponisario'sa' a'papi Quisoso macacaiso marë'. <sup>33</sup> Huë'pirinhue', Quisosori itërin:

—Co hua'qui' canpitaro'co ya'huapohue'. Pa'miatarahuë. Yosë nohuanton, o'marahue'. Inaquë chachin panantarahuë. <sup>34</sup> Naporo' yonípiramacohuënta', co quënanaramacohue'. Insëquësona pa'pato canpitaso' co nanitaramahuë' pacacamaso', itërin.

<sup>35</sup> Hua'ano'sa capini ninontopi.

—¿Intohuata' yapaaton naporinso? “Co quënanaramacohuë’,” tënin. Nisha piyapi'sa' ya'huëpi parti a'naquën cotioro'sa' yacapatonpi. Inaquë paaton, nisha piyapi'sa' a'chintapon nimara. <sup>36</sup> ¿Ma'ta' tapon naporin? “Yonípiramacohuënta', co quënanaramacohuë'. Insëquësona pa'nahuëquë co canpitaso' nanitaramahuë' pacacamaso',” toconin, nitopi.

### *Nanpirin i'sha*

<sup>37</sup> Pita ta'huantërinso' tahuëri na'con na'con yonquipiso' ni'ton, notohuaro' piyapi'sa' niyontonpi. Naporo' Quisosori huanirahuaton, chiniquën itapon:

—Yamororëso pochin cancantohuatama', huëco' imaco sano cancantamaso marë'.

<sup>38</sup> Natëhuatamaco, cancanëmaquë nanpirin ii' ya'huëtarinquëma'. Pancai' no'pa quëran pipirinso pochin cancanëmaquë ya'huërápon. Yosë quiricanënuquë naporin, itërin.

<sup>39</sup> Quisoso imapatëhua', Ispirito Santo ya'coancantarinpoa'. Ina yonquiaton, napotërin. Naporo' Quisoso co inápaquë pantayátërarinhuë'. Napoaton co Ispirito Santori piyapi'sa' noyá ya'coancanchátërarinhuë'. (Ina ya'coancantohuachinpoa', na'con catahuarinpoa' noya cancantacaso marë'. Ina quëran a'napitanta' Yosë anohuitarihua', tapon naporin.)

### *Nisha nisha yonquipiso'*

<sup>40</sup> Quisoso naporinso' natanahuatona', nisha nisha yonquiipi.

—Tëhuëchachin isoso' pënëntona'pi ninarëhuaso', topi.

<sup>41</sup> —Cristo mini ténahuë, tënin a'naquën.

—Co inahuë' nimara. Cristo naporini co Cariria parti quëran huë'itonhuë'. <sup>42</sup> ¿Co'ta “Tapico' shiin ni'ton, ina ninanonënuquë chachin nasitapon? Pirinquë nasitapon,” tënin Yosë quiricanënuquë, topi a'naquëonta'.

<sup>43</sup> Ina pochin ninontatona', nisha nisha yonquiipi. <sup>44</sup> A'naquëninta' tashinan pëiquë po'mocaiso marë' yamápirinahuë', co mápihuë'.

### *Hua'ano'sa' co natëpisohuë'*

<sup>45</sup> Ina marë' ponisiaro'sa' nani a'papi. Hua'ano'sari chachin a'pápirinahuë', topinan huënantapi.

—¿Onpoatomata' co manamahuë'? itopi.

<sup>46</sup> —¿Co insonta' ina pochin a'chinchininhüë'! itopi.

<sup>47</sup> Ina quëran parisioro'sari itapona':

—Nani nonpintërinquëma' ni'ton, ¿canpitanta' natërama' pa'? <sup>48</sup> Ni'cochi. Co inso hua'ano'sari tëranta' ina natërinhuë'. Parisioro'sacointa' co natërainhuë'. <sup>49</sup> Topinan piyapi'sariachin natëpirinahuë', inapitaso' co Moisésë pënëntërinso' nitotopihuë' ni'ton, Yosëri ana'intarin, tënai, itopi.

<sup>50</sup> Nicotimonta' inaquë ya'huërin, i'huapo' tashi' Quisoso nicapon pa'ninso'. Inanta' cotio hua'an ni'ton, itapon:

<sup>51</sup> —Moisésë pënëntërinso' natërehua'. Nani pënëninpoa'. “Ama topinan quëran ana'intocohuë'. No'tëquën nitotaquë huarë' ana'intacaso' ya'huërin,” tënin. Napoaton canpoanta' Quisoso a'chininso' natahuan'. Naporinsonta' nitotahua'. Co topinan quëran ana'intacaso' ya'huërinhuë', ténahuë, itërin.

<sup>52</sup> —¿Quëmanta' Cariria parti quëran huë'nan? Yosë quiricanën nontëquë'. Pënëntona'pi co onporonta' Cariria quëran huëcaponhuë', itopi.

### *Oshahuana'pi sha'huirapipiso'*

[ <sup>53</sup> Ina quëran piyapi'sa' yanquëërahuatona', ya'huëpi'pa' paantapi.



## 8

<sup>1</sup> Quisososo nipirinhüë' Oriposë panënquë pa'nin. <sup>2</sup> Tahuëririnquë tashiramiachin Yosë chinotopiso pëiquë paantarín. Na'a piyapi'sa' huë'pi ina natanacaiso marë'. Inaquë huënsërahuaton, a'chinapirinhüë', <sup>3</sup> Cotio maistro'sa', parisioro'sa', inapita huëcatona', a'na sanapi quëpi. So'yahuan nipirinhüë', nisha quëmapiri ichihüë'ërin. Nani quënanpi ni'ton, masahuatona', Quisosoquë quëpi. Sanapi huancánachin ahuanirahuatona', Quisososo itapona':

<sup>4</sup> —Maistro, iso sanapi so'yahuan nipirinhüë', nisha quëmapiri ichihüë'ërin, quënanai. <sup>5</sup> Iráca Moisësë pënëninpoa'. “Monshihuanpisopita na'piquë të'yaratoma', tëpaco',” tënin. ¿Ma'ta' tënan quëma ipora? ¿Tëpa'ii ti? itopi.

<sup>6</sup> Quisososo atëhuërahuatona' sha'huirapicaiso marë' natanapi. Quisososo nipirinhüë' i'chorahuaton, imirin quëran no'paquë ninshitarín.

<sup>7</sup> —¿Ma'ta' onpochii? Sha'huitocoi, itantahuachinara, huaniantarín.

—Noyahua'. Insonquëma tëranta' co pi'pian tëranta' oshahuanpatamahuë', inari'ton na'piquë të'yarain, itërin.

<sup>8</sup> Ina quëran i'choantarahuaton, no'paquë ninshitaantarín. <sup>9</sup> Ina natanahuatona', a'naya a'naya pa'pi. Mashoro'sa'ton pa'pi. Ina quëran a'naya a'naya pa'pi. Ya'ipiya pa'pachinara, sanapiichin huaniárin. <sup>10</sup> Quisososo huaniantarahuaton, itapon:

—¿Inso huachi, imoya, quëmapi'sa' yaana'intërinëinquënso'? ¿Co huachi yaana'intërinëinquënhüë'? itërin.

<sup>11</sup> —Nani pa'pi Sinioro, itërin.

—Co carinquëonta' yaana'intëranquënhüë'. Paaton, ama huachi aquëtë' oshahuaan-taquësohüë'. Noya niquë huachi, itërin. Napotohuachina, pa'nin.]

*Quisososo a'pintërinpoaso'*

<sup>12</sup> Ina quëran piyapi'sa' a'chintantarín.

—Caso' a'pintatë pochín nicato, ya'ipi piyapi'sa' no'tëquën anitotarahüë. Imapata-maco, co huachi tashinan pochín cancantaramahuë'. Tahuëri pochín cancantarama'. Ina pochín cancantohuatama', Yosë nohuitatoma' nanpimiatarama'. <sup>13</sup> Parisioro'sari natanahuatona', itapona':

—Quëmaora yonquinën quëran naporan. Co natëca'huainquënso' ya'huërinhuë', itopi.

<sup>14</sup> —Caora yonquinëhuë quëran napopirahuë', tëhuëchachín no'tëquën nonahuë. In-tohua quëransona o'marahüëso' nitotërahuë. A'na tahuëri inatohua chachín panan-tarahüë. Casáchin ina nitotërahuë. Canpitaso nipirinhüë' co nitotëramahuë'. Napoa-ton natëcamacoso' ya'huërin. <sup>15</sup> Canpitaso' piyapi'sa' inahua yonquipiso pochín napoonin yonquirapitomaco sha'huirama'. Caso nipirinhüë', co insonta ina pochín yon-quirapito sha'huirahuë'. <sup>16</sup> Sha'huihuatëraso napoaponahuë', no'tëquën sha'huirahuë. Co casáchin sha'huirahuë'. Tatahuënta' ina pocháchín yonquiaton sha'huitarinquëma'. Ina a'paimarinco. <sup>17</sup> Moisësë pënëntërinso' ya'huëtërinquëma'. Inaquë iráca ninshitërin. “A'na piyapiáchin sha'huihuachina, nonpiámara. Nipirinhüë', cato' piyapi inachachín sha'huihuachina', naporu huarë' natëtacaso' ya'huërin,” tënin. <sup>18</sup> Carinquëma' nani sha'huitaranquëma'. Tatahuënta' inachachín anitotarinquëma'. Ina a'paimarinco, itërin Quisosori.

<sup>19</sup> —¿Insëquëta' tataparín? itopi.

—Canpitaso' co ina nohuitëramahuë'. Canta' co tëhuëchachín nohuitëramacohüë'. No-huitëramaco naporini, tatahuënta' nohuichitomahuë', itërin.

<sup>20</sup> Yosë chinotopiso pëiquë a'chintaton, napotërin. Coriqui cacon notënanquë a'chintarin. Yosë nohuanton, co chiminacaso' naniyatërarinhüë'. Napoaton co insoari tëranta' maninhüë'.

*Quisososo pa'miatarinso'*

<sup>21</sup> Ina quëran itantarin:

—A'na tahuëri pa'miatarahuë. Naporo' yonípiramacohuënta', co quënanaramacohuë'. Oshanëmarë'quëma chachin chiminarama'. Insëquësona pa'pato, co canpitaso' nani-taramahuë' pacacamaso', itërin. <sup>22</sup> Ina natanahuatona', cotioro'sa' ninontopi.

—¿Ma'ta' tapon naporin? “Insëquësona pa'pato, co nanitaramahuë' pacacamaso',” itërinpoa'. ¿Yanitëpamara ti? nitopi.

<sup>23</sup> —Canpitaso' isoro'paquë ya'huatoma', a'napita piyapi'sa pochin yonquirama'. Caso nipirinhüë' inápa quëran o'marahuë ni'to, Yosë pochin yonquirahuë. <sup>24</sup> Napoaton napotëranquëma'. Caso iráca quëran huarë' ya'huato, ya'huëmiatarahuë. Co natëhuatamacohuë', oshanëmarë'quëma chachin chiminarama', itërin.

<sup>25</sup> Napohuachina:

—¿Inquënta' quëmaso'? itopi.

—Nani iráca quëran huarë' sha'huitëranquëma'. Ca inaco tënhuë. <sup>26</sup> Canpitaso co noyahuë' ninama ni'ton, na'con sha'huita'huanquëmaso ya'huërin. A'paimarinco'so' no'tëquënáchin nonin. Ina sha'huitohuachincora natanato, ina chachin sha'huitaranquëma', tënin.

<sup>27</sup> Tata Yosë tapon naporinso' co nitotopihuë'.

<sup>28</sup> —Yosë quëran quëmapico niporahuë', corosëquë achinpiarinaco. Naporo huarë' ca ya'huëmiatarahuë'so' nohuitaramaco. Naporahuaton: “Tëhuëenchachin co inaora yonquinën quëran a'chininhüë'. Pa'pini a'chintërinso chachin a'chinin,” tosarama'.

<sup>29</sup> Tatahuë a'paimarinco ni'ton, ca'taninco. Ina nohuantërinso'ráchin no'tëquën natërahüë ni'ton, co patarincohuë', itërin.

<sup>30</sup> Itohuachina, na'a piyapi'sari “No'tëquën nontërinpoa',” ta'tona', natëpi.

### *Sopairi camairinso'*

<sup>31</sup> Ina quëran nasha imarinsopita itantarin:

—Carinquëma' a'chintëranquëmaso' noya natëhuatama', noya imasaramaco.

<sup>32</sup> Imamiatohuatamaco, no'tëquën yonquiarama'. Co insonta' camaiarinquëmahüë', itërin.

<sup>33</sup> —Quiyaso' Apraan shinpitacoi. Co onporonta' a'napita camairinacoihuë'. ¿Onpoa-tonta': “Co insonta' camaiarinquëmahüë',” itërancoi? itopi.

<sup>34</sup> —No'tëquën itëranquëma'. Co noyahuë' nipatama', sopai hua'an camaiarinquëma'. Piyapinënpita pochin nisarama'. Co canpitaora nanitaramahuë' oshanëma' nani-antamaso'. Sopai camaihuachinquëma', co noyahuë' nisarama'. <sup>35</sup> Ni'co'. Patron ya'huërinquë piyapinën co ya'huëmiatërinhuë'. Patronëni nohuantohuachina, ocoiantarin. Hui'ninso nipirinhüë' ya'huëmiatarin. <sup>36</sup> Yosë hui'ninco ni'to, catahuahuatënuëma', cha'ësarama'. Co huachi insonta' camaiantarinquëmahüë'. <sup>37</sup> Canpitaso' Apraan shinpitanquëma' nipomarahüë', yatëparamaco. A'chintopiranquëmahüë', non-ahuë'so' co yanatëramahuë'. <sup>38</sup> Tatahuë anitotërinco'so' natëto sha'huitaranquëma'. Canpitaso nipirinhüë', ma'sona tatanëma pochin nininso' camaihuachinquëmara, natërama', itërin Quisosori.

<sup>39</sup> —Apraan mini quiyaso tatanëhuëi, itopi.

—Apraan pochin cancantërama' naporini, ina pochin noya niitomahuë'. <sup>40</sup> Yosë anitotërinco'so chachin no'tëquën sha'huitopiranquëmahüë', yatëparamaco. Apraanso' co ina pochin yonquirinhüë'. Yosë nanamën noya natërin. <sup>41</sup> Canpitaso nipirinhüë' tatanëma pochin nininso' nonanama', itërin.

—Co quiyaso' ma'papia'huaro'sacoihuë'. Yosë chachin tatanëhuëi. Inasáchin natërai, itaantapi.

<sup>42</sup> Napotohuachinara:

—Yosë'so' tatanëma' naporini, nosoro'itomacohuë'. Yosë quëran o'marahuë. Co caora nohuanto, o'marahuë'. Yosë a'paimarinco. <sup>43</sup> A'chintopiranquëmahüë', ¿onpoatomata'

co natanamacohuë'? Co natëtochináchinhuë' cancantërama' ni'ton, co nanitëramahuë' natanamacoso' ténahuë. <sup>44</sup> Sopai hua'an mini tataparinquëmaso'. Ina pochin cancantatoma', inasáchin natëarama'. Iráca quëran huarë' piyapi'sa' tëpana'pi inaso'. Co no'tëquën nitononinhuë' ni'ton, co pi'pisha tëranta' natëcaso' ya'huërinhuë'. Pa'pi nonpintë' inaso'. Inachin, nonpinacasaráchin cancantërin. Ina nohuanton, nonpinë'. <sup>45</sup> No'tëquën pënënanquëma' ni'ton, co yanatëramacohuë'. <sup>46</sup> ¿Inquëmata' nanitërama' no'tëquën sha'huirapiamacoso'? “Co noyahuë' nicon, oshahuanan,” itohuata-maco, nonpinarama'. Caso' no'tëquën nontaranquëma', nipirinhuë', ¿onpoatomata' co natëramacohuë'? ténahuë. <sup>47</sup> Yosë piyapinënpita ina nanamën noya natanpi. Canpitaso nipirinhuë' co Yosë piyapinënuquëmahuë' ni'ton, co yanatanamahuë', itaantarín Quisosori.

*Co'huara Apraan nasichatërasohuë', Quisoso ya'huërinso'*

<sup>48</sup> Ina natanahuatona' hua'ano'sari itantapi:

—¿Co'ta quëmaso' Samaria piyapinquën? ténai. “Sopai ya'coancantërinquën ni'ton, hua'yantëran,” topatëira, no'tëquën napotërainquën, itopi.

<sup>49</sup> —Co sopai ya'coancantërincohuë'. Tatahuë noya nicato natërahuë. Canpitaso nipirinhuë' nocanatomaco, pinoramaco. <sup>50</sup> Co noya ni'piramacohuë', co ina yonquirahuë'. Yosëso' noya ni'ninco. Inaso' coisë pochin nicon, no'tëquënáchin yonquirin.

<sup>51</sup> No'tëquën itaranquëma'. Natëhuatamaco, co chiminaramahuë', itërin Quisosori.

<sup>52</sup> —Sopai mini nani ya'coancantërinquën. Co huachi yonquiranhuë'. Apraan nani chiminín. Pënëntona'piro'santa' chiminpi anta'. Quëmaso nipirinhuë': “Natëhuatamaco, co chiminaramahuë',” itërancoi. <sup>53</sup> Tata Apraan, pënëntona'piro'sa', inapita chiminpi. ¿Inapita quëran quëmaso' chini chiníquën nanantëran ti? ¿In pochinta' cancantaton, naporan? itaantapi cotioro'sari.

<sup>54</sup> —Casáchin “Noyaco,” ténahuë naporini, topinan quëran napo'itohuë'. Nipirinhuë', Tata Yosë noya ni'ninco. Canpitanta': “Ina chinotërai,” ténamaso'. <sup>55</sup> Co inaso' nohuitopiramahuë', caso' nohuitërahuë. Ya'ipi noninso' natërahuë. “Co nohuitërahuë',” ténahuë naporini, canpita pochachin canta' nonpiintohuë'. <sup>56</sup> Tata Apraan yonquirinco. “A'na tahuëri Yosëri a'paimarinso' o'mararin,” ta'ton, noya cancantërin. Nani ni'ninco ni'ton, noya cancantërin, itërin Quisosori.

<sup>57</sup> —Co quëmaso' a'natërápo shonca pi'ipichátëraponahuë', ¿Apraan ni'nan ti? itopi.

<sup>58</sup> —No'tëquën sha'huitëranquëma'. Co'huara Apraan nasichatërasohuë', caso' ya'huárahue, itërin.

<sup>59</sup> Ina quëran na'piro'sa' masahuatona', yatë'yarapi. Quisososo nipirinhuë' na'pirahuaton, Yosë chinotopiso pëi quëran pipirin.

## 9

*Somaraya anoyatërinso'*

<sup>1</sup> Quisoso pa'sahuaton, a'na quëmapi quënanconin, somaraya nininso'. Hua'huatërin quëran huarë' co manta' ni'tërinhuë'. <sup>2</sup> Ca'tano'sanënpitacoi imarai ni'ton, quiyanta' ni'nai.

—¿Onpoatonta' Maistro iso quëmapi somaraya nasitërin? ¿Inaora oshanën marë' nica? ¿A'shin, pa'pin, inapita oshanëna marë' nica? Sha'huitocoi nitochii, itërai.

<sup>3</sup> —Co inso oshanën marë' ina pochin nasitërinhuë'. Yosë nohuanton, ina pochin hua'huatërin. Anoyatacaso marë' naporin. Piyapi'sa' ni'pachina', na'con na'con Yosë yonquiapi. “Ma noyacha Yosëso' nanitaparin paya,” tosapi. <sup>4</sup> Ipora chachin catahuarahuë. Yosë natëto, ina marë' sacatarahuë. Co hua'qui' isoro'paquë ya'huarëhuahuë'. A'na tahuëriáchin pochin ya'huërëhua'. Shiarahuaton tashihuachin, co huachi nanitarihuahuë' ma'sha nicacaso'. <sup>5</sup> Isoro'paquë ya'huasoco, a'pintërinso pochin ya'ipi piyapi'sa' no'tëquën anitotërahuë, itërincoi.

<sup>6</sup> Ina quëran no'paquë ipirahuaton, ashipiroterin. Ina quëran ina masahuaton, somaraya pashirayatërin.

<sup>7</sup> —Paaton Siroiquë nipa'morayaquë', itërin. Siroiso': "A'parinso'," tapon naporin.

Itohuachina, pa'nin. Inaquë nipa'morayahuachina, noya ni'tërin. Noya ni'tahuaton, ya'huërin'pa' pa'nin huachi. <sup>8</sup> Ya'cariya ya'huëpisopitari quënanahuatona', pa'yanpi. Nani hua'qui' huënsëaton, coriqui ma'patërin. Somaraya ni'ton, topinan quëtopi. Napoaton na'a piyapi'sari nohuitopi. Inapitari quënanahuatona', ninontopi.

—¿Isona quëmapi i'hua coriqui ma'patërinso' ti? nitopi.

<sup>9</sup> —Ina mini, tënin a'naquën.

—Ina pochin ya'nopirinhue' co inahuë' topiraihue', topi a'naquëonta'.

—Ca mini, co nishacohue', tënin quëmapi'so'.

<sup>10</sup> —¿Onporahuatonta' iporaso' noya ni'tëran? itopi.

<sup>11</sup> —A'na quëmapi Quisoso itopiso' no'pa ipitahuaton, shipiro' ninin quëran, pashirayatërinco. Ina quëran sha'huitërinco: "Paaton Siroiquë nipa'morayaquë'," itërinco. Inaquë pa'sahuato, nipa'morayahuatëra, ni'tërahuë, itërin.

<sup>12</sup> —¿Intohuata' ipora inaso'? itopi.

—Ahuën. Co caso' nitotërahuë', tënin.

### *Hua'ano'sari natanpiso'*

<sup>13</sup> Napohuachina, Parisioro'sataquë quëpapi. <sup>14</sup> Chinoto tahuëri nipirinhue' Quisosori no'pa ipitahuaton, shipiro nininquë pashirayatahuaton, anoyarayatërin ni'ton, inaquë quëpapi. <sup>15</sup> Parisioro'sari quënanahuatona', itopi:

—¿Onpotahuatënquënta' anoyarayatërinquën? itopi.

—Shipiroquë pashirayatërinco. Nipa'morayarahuatëra, noya ni'tërahuë, itërin.

<sup>16</sup> —Ni'quëchi. Chinoto tahuëri nipirinhue', co Quisoso chinotërinhuë'. Napoaton co Yosë quëran o'marinhue', topi a'naquën.

—¿Onporahuatonta' nipachin nanitërin somaraya a'naroáchin anoyatacaso'? Oshahuan naporini, co nanitapaitonhuë', topi a'naquëonta'. Nisha nisha yonquipi. <sup>17</sup> Napoaton quëmapi itantapona':

—Nani anoyarayatërinquën ni'quëhuarë', ¿ma'ta' quëma yonquiran? itopi.

—Yosëri acorin pënëntacaso marë' tënahue', itërin.

<sup>18</sup> Hua'ano'saso nipirinhue' co natëpihuë'. "Iso quëmapi co somaraya hua'huataponahuë', nonpiámara," topi. Napoaton a'shin, pa'pin, inapita amatopi natanacaiso marë'. <sup>19-20</sup> Huë'pachinara, natanpi:

—¿Iso' hui'nán, somaraya hua'huatërinso'? itopi. Itohuachinara:

—Ina mini hui'nahuë. Somaraya hua'huatërin, itërin.

—¿Onporahuatonta' iporaso' noya ni'tërin? itopi.

<sup>21</sup> —Co quiyaso' nitotëraihuë'. ¿Incariso' anoyarayatomara? Nani mashotërin. Ina natanco' sha'huichinquëma', tënin pa'pin.

<sup>22</sup> Cotio hua'ano'sa' të'huataton, napotërin. I'hua chachin hua'ano'sa capini ninontopi Quisoso imarinsopita ana'intacaiso marë'. "Quisososo' Cristo chachin," topachina', ocoia'ahua'. Ocoihuatëhua', co huachi nanitapihuë' niyontonpiso pëiquë huëcacaiso', nitopi. <sup>23</sup> Napoaton: "Nani mashotërin. Ina natanco'," itërin pa'pini.

<sup>24</sup> Ina quëran hui'nin amatantapi.

—Yosë ni'sarinquën ni'quëhuarë', no'tëquën sha'huitocoi. Quisososo' co noyahuë' ni'ton, oshahuanin, tënai, itopi.

<sup>25</sup> —Ahuën. Oshahuamara. Co ina nitotërahuë'. Nipirinhue', anoyarayatërinco. I'hua co manta' quënantopirahuë', nani noya ni'tërahuë. Inaichin nitotërahuë, itërin.

<sup>26</sup> —¿Ma'ta' onpotahuatënquën, anoyarayatërinquën? itaantapi.

<sup>27</sup> —Nani sha'huitopiranquëmahuë', co yanatëramacohue'. ¿Onpoatomata' naquëranchin yanatantaramaco? ¿Canpitanta' Quisoso yaimarama' ti? itërin.

<sup>28</sup> Napohuachina, chiníquën no'huipi.

—Quëmari imasaran. Co quiyaso' nohuantëraihuë'. Moisësë imarai. <sup>29</sup> Yosëri iráca Moisësë nontërin. Quisososo nipirinhüë' intohua quëranso' huë'mara. Co nitotëraihuë', itopi.

<sup>30</sup> —¡Ma'pitacha tënama paya! Intohuaransona huë'ninso canpitaso co nitotopiramahuë', caso' anoyarayatërinco. <sup>31</sup> Oshahuano'sari Yosë nontohuachina, co natantonhuë', co catahuarinhüë'. Nipirinhüë', Yosë chinotohuatëhua', noya natëhuatëhua', natanarinpoa'. Ina nitotërehüa'. <sup>32</sup> Somaraya hua'huatohuachina, co onporonta' anoyarayatochinpihuë'. <sup>33</sup> Co Yosë quëran o'marinhuë' naporini, co anoyarayachitoncohuë', tënahüë, itërin.

<sup>34</sup> —Quëmaso' hua'huatapon quëran huarë' oshahuanaponahuë', ¿yaa'chintërancoi ti? itopi. Ina quëran ocoirahuatona', a'papi huachi.

### *Somaraya pochin nipiso'*

<sup>35</sup> Hua'ano'sari ocoirinso' natantahuaton, Quisososo pa'nin yonípon. Quënanconahuaton, itërin:

—Quëmapi Yosë quëran o'marinso' ¿natëran ti? itërin.

<sup>36</sup> —¿Inta' Siniro inaso'? Yanatëpirahuë', itërin.

<sup>37</sup> —Nani ni'nanco. Ca mini, nontaranquënso', itërin.

<sup>38</sup> —Natëranquën Siniro, itahuaton, isonin quëran Quisososo chinotërin.

<sup>39</sup> Napotohuachina, Quisosori itërin:

—Isoro'paquë o'marahüë piyapi'sa' no'tëquën sha'huita'huaso marë'. Somarayaro'sa nipsisopita anoyarayatarahuë. Napoaponahuë': "Quiyaso noya ni'tërai topisopitaso', asomarayatë pochin nitarahuë," itërin.

<sup>40</sup> A'naquën parisioro'sa' inaquë huanirahuatona', Quisososo natanapi.

—¿Napoahuarë quiyanta somarayacoí? itopi.

<sup>41</sup> —Somarayanquëma naporini, co oshahuaintomahuë'. Nipirinhüë', "co quiyaso somarayacoihuë'," tënamaso marë' oshahuanama'. Ina marë' Yosë ana'intarinquëma', itërin.

## 10

### *Ohuicaros'a pochin nininso'*

<sup>1</sup> Ina quëran Quisosori a'chintaantarín.

—Ohuicaros'a naporin quëran a'chinchinquëma' natanco'. Ohuicaros'a' a'paicaiso marë' pairapipi. A'naíchin ya'coana ya'huërin. A'naquën huëcaton, co ya'coana quëran ya'coninhüë'. Nanpërahuaton, ya'conin. Inaso' co hua'anënhüë'. Ihuatë', matararo, inapita ina pochin ya'conpi ohuica ihuatacaiso marë'. <sup>2</sup> Hua'anënso nipirinhüë' ya'coana quëran ya'conahuaton, ohuicanënpita a'pairin. <sup>3</sup> Ina huë'pachina, ya'coana a'paina'piri nohuitaton, i'soatërin. Ohuicanënpitarinta' natanahuatona', nohuianantopi. A'naya a'naya nininën përapachina, co të'huatatonahuë', a'naroáchin huë'pi. Huë'pachinara, quëparin panpatëro' capacaiso marë'. <sup>4</sup> Ohuicanënpita quëpahuachina, quëchitërarin. Noninso' nohuianantatona', imapi huachi. <sup>5</sup> Nisha piyapiri yaquëpahuachina, co yaimapihuë'. Co noninso' nohuianantatonahuë', ta'ananpipi, itërin Quisosori.

<sup>6</sup> Iso pënënto nanan sha'huitopirinhüë', co nitotopihuë'.

—¿Ma'ta' tapon naporin? itopi.

### *Quisososo' ohuica hua'anën pochin ninin*

<sup>7</sup> Napoaton itaantarín:

—Tëhuëchachin caso' ya'coana pochin ninahuë. Ohuica pairapipiquë yaya'conpatëra, ya'coana quëran ya'conë'. <sup>8</sup> Co'huara huë'shatërasocohüë', na'a piyapi'sa' a'chinpirinhüë', inapitaso' ihuatëro'sa pochin nipi. Anishacancantacaiso marë'



a'chinpi. Imarinacosopitaso nipirinhüé', co inapita natëpihué'. <sup>9</sup> Casáchin ya'coana pochin ninahué. Ca quëran ya'conpatama', cha'ësarama'. Ohuicaro'sa' pipirahuatona', noya coshatopi. Ina quëran ya'coantapi. Inapochachin imarinacosopita noya pa'sapi.

<sup>10</sup> Ihuatëro'sa' co noyahué' yonquipi. Ihuatacaiso', tëpatacaiso', ata'huantacaiso inapita nicacaisoráchin yonquipi. Caso nipirinhüé' o'marahué imarinacosopita Yosë nohuitacaiso maré'. Noya noya nanpicaico maré' o'marahué. <sup>11</sup> Caso' ohuica hua'anën pochin ninahué. Imarinacosopita noya a'pairahué. Hua'anën noya nipachina, ohuicanënpita a'paiton, co chiminacaso' të'huatërinhué'. Inapochachin canta' imarinacosopita maré' chiminarahué. <sup>12</sup> Inpriatoso nipirinhüé', pa'pini' hué'pachina, ohuicaro'sa' ta'ananpirin. Pa'piniri a'nara' macaso', ya'ipi ohuicaro'sa' yanquëpi. Inpriatoso' co hua'anënhüé' ni'ton, co ohuicaro'sa' pa'poyatërinhué'. <sup>13</sup> Canacaso maréáchin sacatërin ni'ton, co inapita yonquiatonhué', ta'ananpirin.

<sup>14</sup> Caso nipirinhüé' noya hua'anën pochin ninahué. Imarinacosopita nohuitërahué. Canta' nohuitërinaco. <sup>15</sup> Tatahuëré'co ninohuitëraiso pochin nohuitërahué. Nosoroato, inapita maré' chiminarahué. <sup>16</sup> A'napita piyapi'santa' oshaquëran imasarinaco. Nisha piyapiro'sa' niponaraihué', yaimarinaco. Inapitanta' nohuantërahué imainacoso maré'. A'chintacaso' ya'huërin. Nanamëhué natanpachina', natëarinaco. Ya'ipi imarinacosopita a'na huëntoínchin nisapi. Carisachin hua'anëntarahué.

<sup>17</sup> Imarinacosopita yonquiato, caso' chiminarahué noya noya nanopianta'huaso maré'. Napoaton Tatahué nosororinco. <sup>18</sup> Caora nohuanto, imarinacosopita maré' chiminarahué. Co nohuantërahué' naporini, co tëpainacoso' nanichitonahué'. Tatahué sha'huitërinco ni'ton, chimina'huaso' nohuantërahué. Ina nohuanton, nanopiantararahué huachi, itërin.

<sup>19</sup> Ina natanahuatona', cotioro'sa' nisha nisha yonquipi.

<sup>20</sup> —Sopairi nani ya'coancantërin ni'ton, hua'yantërin. ¿Ma'marëta natanama'? topi a'naquën.

<sup>21</sup> A'naquëniso nipirinhüé' noya natanpi.

—Co sopairi ya'coancantërinhué'. Noya a'chintërinpoa'. Hua'yantona'piso' co ina pochin noninhüé'. ¿Sopainta' ta'ma' somaraya anoyarayatacaso' nanichitonhué' ti? topi.

### *Cotioro'sa' co Quisoso nohuantopisohüé'*

<sup>22</sup> Ina quëran a'na cotio niyontonpiso tahuëri naniantarín. Naporo' Yosë chinotopiso' pëi' iráca anoyataantapiso' yonquiataona', “Yosparinquën Sinioro,” itopi. Ina maré' na'a piyapi'sa' Quirosarinquë pa'sapi. Quisosonta' Yosë chinotopiso' pëiquë pa'nin. O'napi tahuëri ni'ton, <sup>23</sup> ishpanamën pochin ninquë pa'sarin, inaso “ishpana, Saromon ishpananën,” itopi nohuitatona'. <sup>24</sup> Na'a cotioro'sa' canquirahuatona', Quisoso ahuan-canapipi.

—Na'aro' natanpirainquënhüé', ¿onporo huarëta' sha'huitaponcoi? Quëmaso' Cristonquën nipatan, no'tëquën sha'huitocoi nitochii, itopi.

<sup>25</sup> —Nani sha'huitopiranquëmahué', co yanatëramacohüé'. “Tata Yosë chachin catahuarinco,” ta'to, sacai' nininso' ninahué canpita nohuitamacoso maré'.

<sup>26</sup> Nipirinhüé', canpitaso' co ohuicanëhué pochin ninamahué' ni'ton, co natëramacohüé'.

<sup>27</sup> Caso' ohuica pë'tahuana'pi pochin ninahué. Imarinacosopita ohuicanëhuëpita pochin ni'nahué. Nohuitërahué. Noya nataninaco. Nontohuatëra, natëtonaco, imarinaco. <sup>28</sup> Ca nohuanto, nanopimiatapi. Co parisitopiquë pa'sapihué'. Noya a'pairahué. Co insonta' osëretarinacohüé'. <sup>29</sup> Tata Yosë nohuanton, imarinaco. Inaso' chini chiniquën nanantërin. Co insonta' nanitërinhué' Yosë quëran osërecaiso'. <sup>30</sup> Caso Tatahuëro'co napopináchin cancantërahué, itërin Quisosori.

<sup>31</sup> Ina natanahuatona', naquëranchin na'piro'sa' maantapi. Tëpacaiso maré' maantapirinhüé', <sup>32</sup> Quisosori itaantarín:

—Tata Yosë sha'huitërinco ni'ton, na'a piyapi'sa' anoyatërahuë: ¿Insota anoyatërahuëso marë' na'pique yatëparamaco? itërin.

<sup>33</sup> —Co ina marë' na'pique yatëparainquënhuë'. Yosë pinoranso marë' napotarainquën. Quëmaso' piyapinquën nïponahuë', “Caso' Yosëco,” toconan. Ina pochin nonan ni'ton, Yosë yaya'huërëtëran, itopi.

<sup>34</sup> Napotihuachinara, itantarin:

—Yosë pënëntërinso' quiricaquë nani ninshitopi: “Canpitaso' a'naya a'nayanquëma' Yosë pochin ninama,” tëninsó' nontërama'. <sup>35</sup> Yosëri chachin hua'ano'sa' acorinsó' yonquiato, napotërin. Ya'ipi Yosë quiricanënso' no'tëquën. Co pi'pisha tëranta' nonpininhuë'. <sup>36</sup> Tata Yosë chachin acorinco nanamën a'china'huaso marë'. Ina marë' isoro'paquë a'paimarinco. “Caso' Yosë hui'ninco,” topatëra, ¿onpoatonta' ina marë' pinoramaco? tënhuë. <sup>37</sup> Co tatahuë pochin nipatohuë', ama natëcosohuë' <sup>38</sup> Co yanatëpiramacohuë', nani ma'sha Yosë pochin ninahuë ni'ton, natëco. Ina quëran nito-tarama Tata Yosë pochachin ninahuëso'. Tata Yosënta' ca pochachin ninin, itërin.

<sup>39</sup> Ina natanahuatona', naquëranchin tashinan pëiquë po'mocaiso marë' yamaantapirinahuë', cha'ërin.

<sup>40</sup> Ina quëran Cortanii' aquëtëran paantarin. I'hua Coansha piyapi'sa' aporintërinquë ya'huërarin. <sup>41</sup> Na'a piyapi'sa' ina nicapona' pa'pi. Ina ni'sahuatona', ninontopi.

—Coanshaso' co piyapi'sa' a'naroáchin anoyatopirinhuë', no'tëquën sha'huitërinpoa'. “Quisososo' Yosëri a'paimarinso',” itohuachinpoara, no'tëquën nonin, nitopi. <sup>42</sup> Na'a piyapi'sa' inaquë paatona', Quisososo natërapí.

## 11

### *Nasaro chimininsó'*

<sup>1-2</sup> Pitaniaquë a'na cania'pi ya'huërin, Nasaro itopiso'. Cato' oshinpita ya'huëtërin, Maria, Marta inapita itopiso'. Ina Maria a'na tahuëri Quisososo pa'morantëarin. Hua'sai' pa'ton nininsoquë pa'morantërahuaton, ainën quëran amirantërarin. Co'huara inapoyatërasohuë', yo'in chiniquën caniorin. <sup>3</sup> Caniohuachina, oshinpitari piyapi a'papi Quisososo sha'huitacaso marë':

—Nosororanso' Siniro, chiniquën caniorin. Huëcaton ni'quiquë', itërin.

<sup>4</sup> Ina natanahuaton, ca'tano'sanënpita itapon:

—Tëhuëchachin yo'in chiniquën canioponahuë', co chiminacaso marë' caniorinhuë'. Noyatohuachin, na'a piyapi'sari nicatona', na'con na'con Yosë yonquiapi. “Ma noyacha Yosëso' ni'ton, anoyatërin paya,” tosapi. Canta' ina hui'ninco ni'ton, noya ni'sarinaco. Ina marë' caniorin, itërin.

<sup>5</sup> Nasaro, Marta, Maria, inapita pa'pi nosororin. <sup>6</sup> Napoaponahuë', Nasaro caniorinso' natantaponahuë', cato' tahuëri inaquë chachin i'huataantarin. <sup>7</sup> Ina quëran ca'tano'sanënpitacoí itaponcoí:

—Huëco' iyaro'sa' Cotia parti paanta'ahua', itërincoí.

<sup>8</sup> —I'huamiáchin Maistro, inaquë ya'huëpisopita tëpainënuënsó marë' na'pique yatë'yarapirinënuënhuë', ¿inatohua chachin yapaantaran ti? itërai.

<sup>9</sup> Napotihuatoira, Quisososo itaponcoí:

—Shonca cato' ora quëran i'huarin. Tahuëri iratohuatëra, co i'parëhuë'. Noya quënantatë', noya pa'në'. <sup>10</sup> Tashiso nipirinhuë' iratohuatëra, i'parë'. Capa a'pininsó' ni'ton, i'parë', itërincoí.

<sup>11</sup> Ina quëran itaantarincoí:

—Iya Nasaro huë'ërin. Nipirinhuë', paato ochinanconapo, itërincoí.

<sup>12</sup> —Huë'ërin ni'quëhuarë' Siniro, noyatapon, itërai.

<sup>13</sup> Topinan huë'ërin, topiraihuë'. Nani chimininsó' nitotaton, naporin. <sup>14</sup> Napoaton no'tëquën sha'huitërincoí:

—Nasaro nani chiminin. <sup>15</sup> I'huara aquëtëran co paatorahuë', co anoyatërahuë'. Canpita na'con na'con natëamacoso marë' isëquë ninarahuë. Inaso' noya ténahuë. Iporaso nipirinhüë', huëco' inatohua' pa'ahua', itërincoi.

<sup>16</sup> —Huëco' iyaro'sa' pa'ahua' canpoanta' inarë'quënpoa' chiminacaso marë', itërincoi Tomasë, catopia'hua nininso'.

### *Quisosori ananpitaantacaso'yonquirinso'*

<sup>17</sup> Napotohuachincoira, Pitaniaquë pa'nai. Inaquë canconpiraihuë', nani Nasaro chiminin quënanconai. Nani catapini tahuëri na'pi naninquë ya'huërin. <sup>18</sup> Pitanaso' Quirosarin ya'cariya ya'huërin. Cara quiromitro pochin aquërin. <sup>19</sup> Na'a cotioro'sa' nani huë'pi Marta, Maria, inapita achinicananapona'. Yo'ina' chimininso marë' nontapi ama aquëtë' sëtacaiso marëhuë'. <sup>20</sup> “Quisoso nani huë'sarin,” topachinara, Marta pa'nin nacapiapon. Mariaso nipirinhüë' pëinënquë ya'huarin. <sup>21</sup> Quisoso nacapirahuaton, Martari itapon:

—I'hua Siniro isëquë ya'huëran naporini, co yo'yohuë chimiintonhuë'. <sup>22</sup> Chiminpirinhüë', natëranquën Siniro. Ma'sona Yosë nipatan, acotarinquën, ténahuë, itërin.

<sup>23</sup> —Yo'yoparin nanopiantararin, itërin Quisosori.

<sup>24</sup> —Nanpiantacaso tahuëri nanihuachin, nanopiantararin, nitotërahuë, tënin Marta.

<sup>25</sup> —Cari ananpitaantarahuë. Casáchin nanopicaso' quëtërahuë. Insopitasona natëhuachinaco, chiminaponaraihuë', nanopiantarapi. <sup>26</sup> Natërinacosopita chiminpachina', co parisitomiatapihuë'. Co onporonta' ta'huantapihuë'. No'tëquën nontaranquën. ¿Natëranco ti? itërin Quisosori.

<sup>27</sup> —Natëranquën mini Siniro. Tëhuënhachin quëmaso' Cristo. Yosë hui'ninquën. Isoro'paquë a'paimarinquënso', itërin.

### *Quisoso na'nërinso'*

<sup>28</sup> Ina tosahuaton, Marta pa'nin cain sha'huitapon. Canconahuaton, sacaro quëran sha'huitërin.

—Nani Maistro huë'nin. Yanontërinquën, itërin.

<sup>29</sup> Ina natanahuaton, Maria a'naroáchin huanirahuaton, nontapon pa'nin. <sup>30</sup> Quisososo' co ninanoquë canshatërarinhüë'. Martari nacapirinquë quëparitërin.

<sup>31</sup> Maria manorahuachina, cotioro'sa' huë'pisopitari ni'sapi. “Na'pi naninquë na'nëapon pa'samara,” ta'tona' imapi.

<sup>32</sup> Mariaso' Quisosoquë canconahuaton, nantën pirayan isonconin.

—I'hua Siniro isëquë ya'huëran naporini, yo'yohuë co chimiintonhuë', itërin.

<sup>33</sup> Ina tosahuaton, na'nërárin. Cotioro'santa' na'nërápi. Ina ni'sahuaton, Quisoso chiníquën sëtaton, co napion cancantërin. <sup>34</sup> —¿Insëquëta' po'mopi? itërin.

—Huëquë' Siniro ni'quiquë', itopi.

<sup>35</sup> Quisosonta' na'nërin. <sup>36</sup> Ina ni'sahuatona', cotioro'sa' nitapona':

—Ni'co'. Na'nërin anta'. Pa'pi nosororin inarinta', itopi.

<sup>37</sup> —Somaraya a'naroáchin anoyarayatërin ni'quëhuarë', ¿ina nohuanton Nasaronta co chimiintonhuë' nimara ti? topi a'naquën.

### *Nasaro ananpitaantarinso'*

<sup>38</sup> Quisoso sëtaton, na'pi naninquë Nasaro po'mopiquë pa'nin. Pancara'piquë nani pa'copitopi.

<sup>39</sup> —Na'pi chi'huincaco', itërin Quisosori.

—Co', Siniro. Nani anarotarin. Nani catapini tahuëritërin, itërin oshini, Marta itopiso'.

<sup>40</sup>—Ama imoya ina pochin yonquiquësohuë'. Yosë ya'ipiya nanitaparín. Natëhuatanco, Yosë nóya nininso' ni'saran, itërin. <sup>41</sup> Ina quëran na'pi chi'huincatopi. Quisoso inápaquë në'pëtahuaton, Yosë nontërin:

—Nani Tata nontëranquën catahuancoso marë'. Natanatonco, catahuaranco mini. Ina marë' "Yosparinquën," itëranquën. <sup>42</sup> Nani tahuëri natanatonco, catahuaranco noya nica'huaso marë'. Quëma chachin isoro'paquë a'paimaranco. Caso' nitotopirahuë', isopitaso' co nitotopihuë'. Inapita natëinacoso marë' a'ninquëchin nontaranquën, tënin.

<sup>43</sup> Ina tosahuaton, chimipi chiníquën itapon:

—¡Iya Nasaro, pipirahuaton huëquë'! itërin.

<sup>44</sup> Napotohuachina, chimipi nãpïantarahuatón, pipirin. Pa'on, imirin, inapita në'mëtërinquë ya'ipi so'pinpinan pipirin. Ya'pirionta' panioquë tonporayatopinã. Cotioro'sa' inachintopiso' ni'ton, ina pochin po'mopi.

—I'quiritoco' pa'in, itërin Quisosori. Napotohuachina, i'quiritopi.

*Quisoso macacaiso marë' chinotopiso'*

*(Mateo 26.1-5; Marcos 14.1-2; Lucas 22.1-2)*

<sup>45</sup> Cotioro'sa' huë'pisopitanta' ni'pi. Anãpitaãntarinso' ni'sahuatona', na'a natëpi. "Tëhuëenchachin Yosëri catahuarin ni'ton, nãporin," topi. <sup>46</sup> A'naquënso nipirinhue' paa-tona', parisioro'sa' sha'huitonpi. <sup>47</sup> Ina natanahuatona', parisioro'sa', corto hua'ano'sa', inapita napopianáchin yonquiatona', ya'ipi cotio hua'ano'sa' ayontonpi ninontacaiso marë'.

—¿Ma'ta' onpotahua'? Ina quëmapi na'a piyapi'sa' a'naroáchin anoyatarin. Iporanta' a'na piyapi chiminpirinhue', anãpitaãntarin. "Yosëri chachin catahuarin," topi. <sup>48</sup> Tanãpïtohuatëhua', ya'ipi piyapi'sari natërapï. Napohuachina', Noma copirno no'huitaton, sontaro'sa' a'paiarin. Huë'pachina', Yosë chinotërehuaso pëi' ohuatahuatona', ya'ipi cotioro'sanpoa' ata'huantarinënpoa' nimara, nitopi.

<sup>49</sup> Ina quëran a'na corto hua'an Caihuasë itopisoari nontërin. Naporo pi'iquë inaso', chini chiníquën nanantërin. Inaso huanirahuaton, tapon:

—Canpitaso' co manta' nitotëramahuë'. <sup>50</sup> Chiminacaso' ya'huërin, tënhuë. Ama ya'ipinpoa' chiminacaso marëhuë' ina chimi'in. Ina noya noya canpoa marë', itërin.

<sup>51</sup> Napoaponahuë', co inaora yonquinën quëran nãporinhue'. Corto hua'an ni'ton, Yosë nohuanton, ninorin. Tëhuëenchachin Quisoso cotioro'sa marë' chiminarin.

<sup>52</sup> Nipirinhue', co cotioro'sa marëáchin chiminarinhue'. Ya'ipi piyapi'sa' ya'huërenamën chiminarin. Natëhuachina', Yosëri hui'ninpita pochin ni'sarin. A'naquën aquë ya'huëpirinhue', imãpachina', a'na huëntoíchin pochin nisapi. <sup>53</sup> Naporo tahuëri quëran huarë' cotio hua'ano'sa' yonquipi Quisoso tãpacaiso marë'.

<sup>54</sup> Napoaton Quisoso co huachi nohuantërinhuë' a'ninquëchin cotio ninãnorosaque paacaso'. Inotëro parti pirayan paaton, Iprãinquë yacapatarin. Inaquë ca'tano'sanënpitacointa' yacapatonã.

<sup>55</sup> Pascoa tahuëri naniriahuachina, na'a piyapi'sa' Quirosarinquë pa'pi. Co'huara Pascoa naniyátërasohuë', Yosë chinotopiso pëiquë pa'pi. "Moisësë camaitërinso' nipatëhua', Yosë noya ni'sarinpoa'," ta'tona', pa'pi. <sup>56</sup> Inatohua' pa'sahuatona', Quisoso yonisápi. Chinotopiso pëiquë ya'conahuatona', ninontápi.

—Pascoa na'huëcaso marë' ¿Quisoso huëcapon to? topi a'naquën.

<sup>57</sup> Corto hua'ano'sa', parisioro'sa', inapitaso' nani piyapi'sa' sha'huitopi: "Quisoso quënanpatama', sha'huitocoi maii," itopi. Tashinan pëiquë po'mocaiso marë' napotopi.

## 12

*Hua'saiquë oporantëtërinso'*

*(Mateo 26.6-13; Marcos 14.3-9)*

<sup>1</sup> Saota tahuëri pahuanarin Pascoa nanicaso'. Naporo' Quisoso Pitaniaquë paantarin. Inaquë Nasaro ya'huërin, ananpitaantarinso'. <sup>2</sup> Inaquë canconpatëira, ya'huëhuano'sa' amatërinacoi ca'pata'huaiso marë'. Quisoso nosoroatona', napopi. Martaso' cosharo' o'huinarin. Nasaronta' inaquë coshatarin. <sup>3</sup> Naporo' Mariaso' a'na potiria pa'ton hua'sai' ya'huërinquë manin. Inaquë Quisoso nantëquën pashirantëtërin. Ina quëran ainën quëran amirantërin. Ya'ipi pëi' pimoanahuanin. <sup>4</sup> Cotasë Iscariotiso nipirinhüë', co noyahuë' ni'nin. Inaso' Quisoso ca'tanaponahuë', yasha'huirapirin.

<sup>5</sup> —¿Onpoatonta' iso hua'sai' chiniarin? Pa'anin naporini, cara pasa tahuëri sacatërešo marë' canarëšo pochin coriqui canaitonhuë'. Sa'ahuario'santa' quëchitonhuë', tënin Cotasë.

<sup>6</sup> Nipirinhüë', co sa'ahuario'sa' yonquiaton naporinhüë'. Yaihuatatón, naporin. Inari chachin coriqui tanpanantë' a'pairin ni'ton, pi'pian pi'pian ihuatarin. <sup>7</sup> Napopirinhüë', Quisosori itërin:

—Iso sanapi tananpitëquë'. Noya napotarincó. Chimina'huaso' yonquiatón, pashirantëtërinco pa'pitinacoso marë'. <sup>8</sup> Nani tahuëri sa'ahuario'saso' ya'huërarin. Caso nipirinhüë', co isëquë ya'huëmiatarahuë', itërin.

### *Nasaronta' yatëpapiso'*

<sup>9</sup> Quisoso Pitaniaquë ya'huëaso', na'a cotioro'sa' natantopi. Ina natantahuatona', huë'pi Quisoso nicapona'. Nasaronta' yani'pi. Quisosori ananpitaantarin ni'ton, yani'pi. <sup>10-11</sup> Ananpitaantarinso marë' na'aya'pi co huachi cotio hua'ano'sa' yanatëpihuë'. Inapita a'porahuatona', Quisoso imasapi. Napoaton hua'ano'sari yonquipi Nasaronta' tëpacaiso marë'.

### *Quirosarinquë canconinso'*

*(Mateo 21.1-11; Marcos 11.1-11; Lucas 19.28-40)*

<sup>12</sup> Hua'huayátërahuë piyapi'sa' Quirosarinquë pa'sapi. Pascoa na'huëcaiso marë' inatohua' pa'sapi. Tahuëririnquë Quisosonta' inatohua chachin pa'sarin. Ina natantahuatona', <sup>13</sup> mërëmë pochin nininso' mapi. Ina quëran nacapiapona' pa'sapi. Pa'yatatona', chiníquën itapona':

—¡Nicha'ëcoi Tata Yosë! ¡Ma noyacha Quisososo paya! ¡Quëmari chachin chiníquën nanan quëtëran! ¡Quëma nohuantón, israiro'sacoi hua'anëntarincói! tosapi.

<sup>14</sup> Mora quënanconahuatón, ina aipi Quisoso huënsërin. Iráca Yosë quiricanëinquë, pënëntona'pi ninshitërin Quirosarinquë ya'huëpisopita nitotacaiso marë'.

<sup>15</sup> “Quirosarinquë ya'huëramasopita, ama pa'yancosohüë'.

Ni'co'. Hua'anëma' huë'sarin. Mora hui'napishin aipi huënsëriarin.

Inaquë ya'mitahuatón huë'sarin,” tënin ninshitatón.

<sup>16</sup> Yosë quiricanën quëran ninorin. Ca'tano'sanënpitacoiso nipirinhüë', co ina yonquiraihuë'. Quisoso nanopiantahuachina, naporo huarë' yonquirai. “Mora aipi chachin huënsërahuatón, Quirosarinquë huë'nin,” tënai.

<sup>17</sup> Nasaro ananpitaantarinso' ni'pisopita sha'huirápi. “Tëhuënhachin chiminpirinhüë', catapini tahuëri quëran Quisosori ananpitaantarin. Po'mopi quëran përarin quiyari ni'nai,” tosapi. <sup>18</sup> Ina marë' notohuaro' piyapi'sa' Quisoso nacapiapona' pa'pi.

<sup>19</sup> Natanahuatona', parisioro'sa' ninontopi.

—Topinan quëran pënënpirëhuahuë', co piyapi'sa' pi'pisha tëranta' natërinënpohuë'. ¡Ni'cochi! ¡Na'con na'con piyapi'sa' Quisoso imasapi! nitopi ninontatona'.

### *Cricoro'sari Quisoso yanontopiso'*

<sup>20</sup> A'naquën Crico piyapi'santa' Quirosarinquë huë'pi. Nisha piyapi niponahuë', Yosë yonquiapi anta'. Niyontonpiso tahuëri ni'ton, Yosë chinotacaiso marë' huë'pi.

<sup>21</sup> Quisoso yanohuitatona', Pinipi nontipi. Pinipiso' Pitsaitaquë ya'huërin, Cariria parti ya'huërinso'.



—Quiyanta' iyasha Quisoso yanohuitopiraihuë', itopi.

<sup>22</sup> Ina natanahuaton, Antërisë sha'huitonin. Naporahuaton, cato chachin paatona', Quisoso sha'huitonpi. <sup>23</sup> Natanahuaton, itërin:

—Noya iyaro'sapa'. Nani tahuëri nanirin huachi. Yosë quëran quëmapico ni'to, chiminapo. Ina quëran na'a piyapi'sa' noya ni'sarinaco. <sup>24</sup> No'tëquën sha'huitëranquëma'. Tricoraya pochin ninin. Co sha'patërahuë', co na'arinhuë'. A'naíchin nisárin. Napoaponahuë', sha'patëra, chiminin pochin niponahuë', papotohuachina, na'a nitërin. <sup>25</sup> Canpitanta' isoro'paquë ya'huërin sopitaráchin yonquihuatama', topinan quëran nanpiarama'. Nipirinhüë', Yosë na'con na'con yonquihuatama', ina nohuitatoma' noya nisarama'. Canpitaora nohuantëramasoáchin naniantohuatama', a'na tahuëri inápaquë nanpimiatontarama'. <sup>26</sup> Nohuantërahuëso' yanipatama', ca pochin cancantatoma' imaco. Insëquësona pa'pato, piyapinhüëpita imasarinaco. Inquëma tëranta' ca marë' sacatohuatama', Yosë noya ni'sarinquëma', itërin Quisosori.

### *Chiminacaso' ninorinso'*

<sup>27</sup> Ina quëran itaantarin: “Iporaso' sëtchinachin cancantërahuë. ¿Ma'ta' Yosë ichi? tënahüë, yonquiato. Co parisita'huaso' nohuantopirahuë', ‘Catahuaco Tata ama parisichisohüë’, co itarahüë'. Chimina'huaso marë' o'marahüë,” itahuaton, Yosë itapon: <sup>28</sup> “Catahuaco Tata nohuantëranso nii. Ina quëran piyapi'sa' nóya ni'sarinënuën,” itërin, Yosë nontaton. Itohuachina, inápa quëran Yosëri itërin: “Nani catahuanquën. Nohuantërahuëso ninan ni'ton, piyapi'sa' nóya ni'ninaco. Iporaso' catahuaantaranguën nohuantërahuëso nicacaso marë'. Napoaton noya noya ni'sarinaco,” itërin Yosëri.

<sup>29</sup> Piyapi'sa' natanahuatona', ninontopi. “Huirátarin,” topi a'naquën.

—Co huirahuë'. Anquëniri nontërin nimara, topi a'naquëonta'.

<sup>30</sup> Napohuachinara, Quisosori itërin:

—Co ca marë' inápa quëran nontërincohuë'. Canpita natëamacoso marë' nontërinco, natanama'. <sup>31</sup> Iporaso' co natëpisopitahuë' no'huiarinaco ni'ton, ana'intacaso' ya'huërin huachi. Hua'qui' sopairi piyapi'sa' camaipirinhüë', cari minsërahuato, ocoiarahuë'. <sup>32</sup> Co hua'quiya quëranhuë' inápaquë achinpiarinaco. Ina quëran nisha nisha piyapi'sa' imasarinaco, itërin.

<sup>33</sup> “Corosëquë chachin chiminapo,” tapon naporin. <sup>34</sup> Ina quëran nataninsopitari itapona':

—Cristo nanpimiatarin. Co onporonta' chimianinhüë', tënai. Yosë quiricanënuë naporin, nontërai. Quëmaso nipirinhüë' nisha nonan. “Yosë quëran quëmapico niporahuë', inápaquë achinpiarinaco,” tënan. ¿Onpoatonta' naporan? ¿Ma quëmapinquënta' quëmaso' itopi.

<sup>35</sup> —Iporáchin tahuëri pochin a'pintaranquëma'. Co huachi hua'qui' ya'huapohüë'. A'pininso pochin no'tëquën anitotëranquëma'. Anitotohuatënuëma', noya nico'. Ni'cona tashinan pochin cancantotama'. Tashinanquë iratohuatëra, chihuëre'. <sup>36</sup> Carinquëma' a'pintaranquëma'. Co'huara pa'shantatërasocohüë', natëco. Natëhuatamaco, canpitanta' tahuëri pochin cancantarama', itërin.

Ina tosahuaton, pa'nin. Co huachi a'ninquëchin iratërinhuë'.

### *Tanshirëso pochin cancantopisopita*

<sup>37</sup> Nani na'a piyapi'sa' a'naroáchin anoyatërin. Cosharo' ana'atërin. Yosë pochin nininso' nicaponaraihuë', co yanatëpihuë'. <sup>38</sup> Iráca Isaiasë pënëntaton, tapon: “Nani a'chintopiraihuë', Siniro. Quëma nohuanton, sacai' nininso' nani a'notopiraihuë'.

Na'con na'con piyapi'sa' co natërapihuë',” tënin.

<sup>39</sup> No'tëquën ninorin. Napoaton co nanitopihuë' natëtacaiso'. Isaiasë chachin itantarin: <sup>40</sup> “Yosëri tananpitërin ni'ton, tanshirëso pochin cancantatona',

co natëtochináchinhuë' cancantopi.  
 Hua'qui' co yanatëpihuë' ni'ton, napotërin.  
 Noya ni'pi naporini, quënanchitonahuë'.  
 Noya natanpi naporini, natëchitonahuë'.

Imarinaco naporini, anoyacancanchitohuë', tënin.

<sup>41</sup> Iráca co'huara Quisoso isoro'paquë huë'shamátërasohuë', Isaiasëri hua'narëso pochin quënanin. Quisososo' Yosë pochachin nóya ni'ton, ina yonquiaton, naporin.

<sup>42</sup> Napoaponahuë', na'amiachin cotioro'sa' hua'ano'sanënpitarë chachin natëpi. Napopirinahuë', parisioro'sa' të'huatatona', co a'ninquëchin sha'huipihuë'. “Niyonton-piso pëiro'sa quëran ocoihuachinënpoa',” ta'tona', ta'tápi. <sup>43</sup> Yosëáchin pa'yatacaiso nipir-inhuë', piyapi'sari pa'yatacaiso' na'con na'con nohuantatona napopi.

*Co Quisoso a'chininso' natëhuachinahuë', ana'intacaso' ya'huërinso'*

<sup>44</sup> Ina quëran Quisosori chiníquën nonaton, a'chintantarin ya'ipiya natanacaiso marë'. “No'tëquën a'chintëranquëma'. Natëhuatamaco, co casáchin natëaramacohuë'. Tata Yosënta' natëarama anta'. Ina a'paimarinco. <sup>45</sup> Ca nohuitohuatamaco, Yosënta' nohuitarama'. <sup>46</sup> Carinquëma' a'pintëranquëma'. Imapatamaco, co tashinan pochin cancantaramahuë'. Tahuëri pochin cancantarama'. Ina marë' isoro'paquë o'marahuë'. <sup>47</sup> A'naquëma' natanpiramacohuë', co natëramacohuë'. Co natëhuatamacohuë', co carima' ana'intaranquëmahuë'. Co ina marë' o'marahuë'. Piyapi'sa' nicha'ëca'huaso marë' o'marahuë'. <sup>48</sup> Co nohuantohuatamacohuë', a'chintëranquëmasonta' co natëhuatamacohuë', canpitaora tëhuënëmaquë nina'intarama'. Nonahuëso chachin co natëramahuë' ni'ton, ayaro' tahuëri na'intarinquëma'. <sup>49</sup> Co caora yonquinëhuë quëran a'chinahuë'. Tata Yosë sha'huitërinco nani ma'sha a'china'huaso'. <sup>50</sup> Yosë a'chininso' imapatama', ina nohuitatoma' nanpimiatarama huachi, ténahuë. Sha'huitohuachincora, inachachin carinquëmanta' sha'huitaranquëma',” itërin.

## 13

*Quisosori ca'tano'sanënpita pa'morantërinso'*

<sup>1</sup> A'na tahuëríchin pahuanarin Pascoa nanicaso'. Naporo' naniarin Quisoso chiminatón, Tata Yosë'pa' panantacaso'. Ina nitotërin. Ca'tano'sanënpitacoí na'con nosororincoí. Chiminaquë huarë' nosoromiatërincoí.

<sup>2</sup> Inaro'coi coshatarai. Sopai hua'ani nani Cotasë ayonquirin Quisoso sha'huirapicaso marë'. Simon Iscarioti hui'nin inaso'. <sup>3</sup> Quisososo nipirinhue' ya'ipi nitotërin. Yosë ya'huërin quëran nani o'marin. Co hua'quiya quëranhuë' naquëranchin inatohua' panantarin. Tata Yosëri chini chiníquën nanan quëtërin ya'ipiya hua'anëntacaso marë'. Inanta' nitotaton, coshatasocoi, <sup>4</sup> Quisoso misa quëran huanirin. Aipi a'morinso' ocoirahuaton, paniocara masahuaton, niso'nantërin. <sup>5</sup> Ina quëran i'sha panticaquë oporahuaton, nantëhuëi pa'morantëra'piarincoi. A'naya a'naya pa'morantëatoncoi, paniocaraquë amirantërincoi.

<sup>6</sup> Simon Pitronta' yapa'morantëpirinhue', co nohuantërinhuë'.

—Quëma Siniro, ¿yapa'morantëranco ti? itërin.

<sup>7</sup> —Ma'marësona napotaranquënso', co ipora nitochátëranhuë'. Oshaquëran nitotaran, itërin.

<sup>8</sup> —Co onporonta' caso' pa'morantëarancohuë', itërin Pitrori.

—Co napotohuatënquënhuë', co ca pochin cancantaton imamiatarancohuë', itërin Quisosori.

<sup>9</sup> —Napoahuarë', ama Siniro nantëhuërachin pa'motocosohuë'. Imirahuë, motohuë, inapitanta' ya'ipi pa'motoco, itërin.

<sup>10</sup> —Co ina nohuantërehuë'. Nani amahuatëra, co huachi në'huëtërehuë'. Nantëichin pa'morë'. Inapochachin nani anoyacancantëranquëma'. Ina piquëran co noyahuë'

nipatama', inanta' inquitaantaranquëma'. Ina quëran noya cancantaantarama'. Canpitaso' noyápiachin cancantërama'. A'naichinquëma' co noyápiachin cancantërinhuë', itërin.

<sup>11</sup> Cotasëri yasha'huirapirinso' ninoton, naporin. Napoaton "A'naichinquëma' co noyápiachin cancantërinhuë'," tënin.

<sup>12</sup> Nani ya'ipicoi pa'morantëra'piatoncoi, a'moantarahuaton, huënsëantararin. Huënsëantarahuaton, a'chintërincoi.

—Ma'ta' tapo napotëranquëmaso' iyaro'sa', ¿nitotërama' to? Ina a'chinchinquëma'.

<sup>13</sup> Canpitaso' nontohuatamacora, "Maistro" itëramaco. "Sinioro" itëramaco anta'. No'tëquën yonquiatoama', napotëramaco. Canpita maistrone'maco mini. Sinioroco ni'to, natëramaco. <sup>14</sup> Canpita maistrone'maco niporahuë', pa'morantëranquëma'.

Napoaton canpita capininta' ina pochachin cancantoco'. <sup>15</sup> Nani pa'morantëranquëma' nonanamacoso marë'. Canpitanta' ca pochin cancantatoma', ninosoroatoma' nicatahuaco'.

<sup>16</sup> Tëhuënhachin iyaro'sa' patronso' chiniquën nanantërin. Piyapinënpitaso nipirinhuë' co ina pochin chiniquën nanantopihuë'. Comisionëonta' co hua'anën pochin chiniquën nanantërinhuë'. <sup>17</sup> Nani nitotërama' ipora. Ca pochin nipatama', nóya cancantarama'.

<sup>18</sup> "Co ya'ipinquëma' noya cancantëramahuë'. Shonca catoya'pinquëma' huayonanquëma' ca'tanamacoso marë'. Ya'ipinquëma' noyá nohuitëranquëma'. Yosë quiri-canënuë iráca naporin: 'A'nara' carë' coshataponahuë', inimicotarinco,' tënin. Ipóra huarë' ina pochin nizarin. <sup>19</sup> Apira nitotato, sha'huitëranquëma'.

Ma'sha onpotohuachinaco, yonquiarama'. 'Inaso' tëhuënhachin Cristo ni'ton, ninorin,' tosarama'.

<sup>20</sup> No'tëquën sha'huitëranquëma'. Carinquëma' a'paranquëma' piyapi'sa' a'chintacamaso marë'. Natëhuachinënuëma', natëarinaco canta'. A'paranquëma' ni'ton, natëinënuëma'. Insosona natëhuachinco, Yosënta' natëarin. Ina a'paimarinco," itërincoi.

*Cotasëri sha'huirapicaso' ninorinso'*

*(Mateo 26.20-25; Marcos 14.17-21; Lucas 22.21-23)*

<sup>21</sup> Naporo' Quisoso sëtërin. Chiniquën sëtatón, co napion cancantërin.

—No'tëquën sha'huitëranquëma'. Shonca catonquëma' ca'tanpiramacohuë', a'nayanquëma' sha'huirapiarinco, itërincoi.

<sup>22</sup> Ina natanahuato, a'naya a'nayaco, nini'nai. "¿Inquënpocha yasha'huirapirëhua' nicaya?" tënai, yonquiato. <sup>23</sup> Caso' Quisoso inchinanën quëran coshatërahuë'. Na'con nosororinco ni'ton, inaporahuë. <sup>24</sup> Simon Pitro imirin quëran tasatahuatonco, "nataniquë': ¿Incarita' sha'huirapiarin?" itërinco. <sup>25</sup> Napotohuachinco, amasha ya'carirahuato, natanahuë.

—¿Inta' Sinioro yasha'huirapirinquën? itërahuë.

<sup>26</sup> —Iso pan, nocaroquë i'shirahuato quëtarahuë. Insosona quëtohuato, ina sha'huirapiarinco, itërinco. Ina quëran i'shirahuaton, Cotasë quëtërin. Simon Iscarioti hui'nin inaso'. <sup>27</sup> Ina ma'pahuachina, sopairi ya'coancantërin huachi. Naporo' Quisosori itapon:

—Ma'sona yaninanso' manóton niquë', itërin.

<sup>28</sup> Napotërinso' natanpiraihuë', ma'marësona napotërinso' co nitotëraihuë'. <sup>29</sup> Cotasëri coriqui tanpanantë' a'pairin ni'ton, ma'sha pita tahuëri marë' pa'anapon a'pamara, topirinahuë' a'naquën. Sa'ahuaros'a' coriqui quëtacaso marë' a'pamara, topirinahuë' a'naquëonta'. <sup>30</sup> Cotasëso nipirinhuë', cosharo' quëtërinso' ma'parahuaton, pipirin. Naporo' nani tashirin.

*Nasha pochin ninosorocaso' pënëinso'*

<sup>31</sup> Cotasë nani pipihuachina, Quisoso itantarincoi:

—Yosë quëran quëmapico ni'to, apira no'tëquën Yosë natërahuë. Napoaton nóya ni'sarinco. Piyapi'sa' ni'pachinaco: "Ma noyacha Yosëso' ni'ton, na'con catahuarin

paya,” tosapi. <sup>32</sup> Ina hui'ninco chachin ni'ton, piyapi'sa' nitotatona', na'con na'con Yosë yonquiapi. Ina quëran Yosë noya noya acoantarinco. Co hua'quiya quëranhuë' inapotar-inco. <sup>33</sup> Hui'nahuëpita pochin ni'piranquëmahuë', co huachi hua'qui' ya'huapohuë'. Yonípiramacohuë', intohuaso' pa'nahuëquë, co nanitaramahuë' pacacamaso'. I'hua in-achachin cotioro'santa' sha'huitërahuë. <sup>34</sup> Iporaso' nasha pochin pënënaranguëma' noya ninosorocamaso marë'. Carinquëma nosororanguëmaso pochachin, imaramacosopita capininta' ninosoroco'. <sup>35</sup> Ninosorohuatama', tëhuëenchachin imaramacoso' nitotapi. “Quisoso imatona', noya noya ninosoroapi,” tosapi, itërin.

*Pitrori nonpinapicaso' ninorinso'*

*(Mateo 26.31-35; Marcos 14.27-31; Lucas 22.31-34)*

<sup>36</sup> Ina quëran Simon Pitrori itapon:

—¿Intohuata' Siniro pa'saran? itërin.

—Intohuaso' pa'pato, co ipora nanitëranhuë' imaancoso'. A'na tahuëri imasaranco, itërin. <sup>37</sup> —¿Onpoatonta' Siniro co apira nanitërahuë' ima'huanquënso'? ¡Imaranquën ni'ton, yatëpapirinacohuënta', imamiataranquën! itërin.

<sup>38</sup> —Yatëpapirinënhuënta', ¿imamiataranco ti? No'tëquën sha'huitaranquën. Ipora tashi chachin co'huara atari përasatërasohuë', cararo' nonpinapiaranco. “Co Quisoso nohuitërahuë',” tosan, itërin Quisosori.

## 14

*Quisoso ira pochin nininso'*

<sup>1</sup> Ina quëran a'chintaantarin: “Ama pa'yancosohuë'. Ama sëtocosohuë'. Yosë natëco'. Canta' natëco. ‘Co naniantarincoihuë’; ta'toma', nani tahuëri natëco. <sup>2</sup> Tatahuë ya'huërinquë na'a pëi' ya'huërin. Co ya'huërinhuë' naporini, nani sha'huichitënhuëmahuë'. Inatohua' panantarahuë canpita ya'huëcamaso marë' tapachinquëma'. <sup>3</sup> Inatohua' pa'pato, tapatontahuatënhuëma', o'mantararahuë. O'mantahuato, maquimaranquëma'. Carë'quëma' ya'huapoma'. Ina marë' o'mantararahuë. <sup>4</sup> Intohuasona pa'sarahuëso' nitotërama'. Iranta' nani nohuitërama',” itërin.

<sup>5</sup> —¿Intohuata' Siniro pa'saranso'? Co nitotëraihuë'. ¿Onporahuatoita' ira nohuichii? itërin Tomasëri.

<sup>6</sup> —Ca ira pochinco. Ya'ipiya no'tëquën a'chintëranquëma'. Casáchin nanpicaso' quëtëranquëma'. Imaramacosopitarachin Yosë'pa' cancontarama'. <sup>7</sup> Nohuitohuatamaco, Tatahuënta' nohuitarama'. Ipora quëran huarë' ina nohuitarama'. Nani ni'nama', itërincoi.

<sup>8</sup> —Tata a'notocoi ni'ii. Ina ni'patoi, nóya cancantara huachi, itopirinhue' Pinipiri.

<sup>9</sup> —Isonápo' pi'ipi iyasha, canpitaro'co ya'huëpirahuë', ¿co nohuichatërancohuë' ti? Ni'patamaco, tatahuënta' ni'nama'. ¿Onpoatonta' nipachin, “Tata a'notocoi ni'ii,” itëranco?

<sup>10</sup> Caso Tata Yosë pochachin ninahuë. Tata Yosënta' ca pochachin ninin. ¿Co ina iyasha, natëyatëranhuë' ti? A'chintohuatënhuëmara, co caora yonquinëhuë quëran a'chinahuë'. Yosë yonquirinso chachin yonquiato, a'chintëranquëma'. Ina nohuanton, nani ma'sha nanitaparahuë. <sup>11</sup> Caso Tatahuë pochinco. Inanta' ca pochachin ninin. Napoaton ya'ipinquëma' natëco. Naporahuaton, nani ma'sha nanitaparahuëso' yonquiato, natëco, itërincoi.

<sup>12</sup> —Natanco' iyaro'sa' no'tëquën sha'huitaranquëma'. Tëhuëenchachin imapatamaco, ca pochin nisarama'. Tata Yosë ya'huërin'pa' panantarahuë ni'ton, saca saca' nininsonta' nanitapaarama'. <sup>13</sup> Ca pochin yonquihuatama', nanan quëchinquëma' Tatahuë nontacamaso marë'. “Hui'nán chachin nanan quëtërinco,” ta'toma', ina nontoco'. Ca pochin cancantatoma', ma'sona nipatamaco acotaranquëma'. A'napitanta' Tata Yosë noya noya

nicacaiso marë' inapoarahuë. Ina na'con nohuantërahuë. <sup>14</sup> Ca pochin yonquiatoma', ma'sona nipatamaco acotaranquëma'.

*Ispirito Santo a'patimarinpoaso'*

<sup>15</sup> Ina quëran taantarín: “Nani pënënanquëma'. Nosorohuatamaco, natëaramaco. <sup>16</sup> Inápaquë panantahuato, Tata nontarahuë Ispirito Santo a'patimarinquëma'. Inaso ca pochachín catahuarinquëma', achinicancanarinquëma'. Co onporonta' patarínquëmahuë'. <sup>17</sup> Ispirito Santoso' no'tëquënáchin nonín ni'ton, Yosë nanamën no'tëquënanitotarinquëma'. Co imarinacosopitasohuë' nipirínhuë' co ina natëpihuë'. Napoaton co nohuitapihuë'. Canpitaso nipirínhuë' nohuitarama'. Nani tahuëri catahuarinquëma'. Ya'coancantarinquëma'.

<sup>18</sup> Co sa'ahuario'sa' pochin nitaranquëmahuë'. Co patomiataranquëmahuë'. Ca nohuanto, Ispirito Santo ya'coancantarinquëma'. Ca pochachín catahuarinquëma'. <sup>19</sup> Co hua'qui' isëquë ya'huapohuë'. Pa'pato, co imarinacosopitahuë' co huachiquënanarinacohuë'. Canpitaso nipirínhuë' quënaantaramaco. Nanpíantarahuë ni'ton, Yosë nohuitatoma' nanpímiatarama'. <sup>20</sup> Nani nanpíantahuato, noya noya nohuitaramaco. Tëhuënychachín Tata Yosë pochín ninahuëso' nitotarama'. Imamiataramaco ni'ton, canpitarë'co a'naíchin pochín nisarahuë. Ya'coancantaranquëma' ni'ton, nóya ninohuitaríhua'. <sup>21</sup> Nani pënënanquëmaso' nitotatoma' natëhuatamaco, tëhuënychachín nosoroaramaco, tënahuë. Nosorohuatamaco, Tata Yosënta' nosoroarinquëma'. Carínquëmanta' nosoroaranquëma'. Inápaquë panantaporahuë', cancanëma quëran nontaranquëma'. Noya noya nohuitaramaco,” itërin Quisosori.

<sup>22</sup> —¿Onpoatonta' Sinioro, quiyariachín noyá nohuitarainquë? ¿Co ya'ipi piyapi'sa' nohuitarínënquënhuë' ti? itërin Cotasëri. A'na Cotasë inaso'. Co Cotasë Iscariotihuë'.

<sup>23</sup> Napotohuachina, Quisosori itërin:

—Co ya'ipi piyapi'sa' nanitopihuë' nohuitinacoso'. Insosona nosorohuachinaco, natëarinaco. Natëhuachinaco, Tata Yosëri nosoroarin. Inaro'co ya'coancantatoi, inaquë ya'huëarai. <sup>24</sup> Co'so' nosorohuachinacohuë', co natëarinacohuë'. Co caora yonquinëhuë quëran sha'huitëranquëmahuë'. Tata Yosë sha'huitohuachincora, inachachín sha'huitëranquëma'. Ina a'paimarinco.

<sup>25</sup> Co'huara pantayatërasocohuë', sha'huitëranquëma'. <sup>26</sup> Inápaquë pantahuato, tatahuë nontarahuë, Ispirito Santo a'patimarinquëma'. Ca ya'huërenamëhuë o'mararin. Inaso' achinicancanarinquëma'. Ya'ipi Yosë nanamën a'chintarinquëma'. Catahuaarinquëma' a'chintëranquëmaso' ama naniantacamaso marëhuë'. Catahuahuachínquëma', nóya yonquiantarama'.

<sup>27</sup> Pantaporahuë', asanocancanaranquëma'. Tata Yosë natëto, co manta' të'huatërahuë'. Catahuaaranquëma' ca pochachín cancantacamaso marë'. Piyapi'sa' inahuara co sano cancantopihuë'. A'naroáchin pa'yanpi. Carínquëmaso nipirínhuë' catahuaaranquëma' sano cancantacamaso marë'. Ama pa'yancosohuë'. Ama të'huacosohuë'. <sup>28</sup> Nani sha'huitëranquëma'. Inápaquë pantaporahuë', ya'coancantimaranquëma'. Tëhuënychachín nosororamaco naporíni, Tatahuëtaquë panantarahuëso marë' noya canchitomahuë'. Inaso' chini chiníquënanantërin. <sup>29</sup> Co'huara pantayatërapohuë', sha'huitëranquëma'. Inápaquë pantahuato, yonquiarama'. “Tëhuënychachín ninoton, sha'huitërinpoa',” ta'toma', noya noya natëaramaco. Ina marë' sha'huitëranquëma'.

<sup>30</sup> Co huachi hua'qui' nontaranquëmahuë'. Sopai hua'an nohuanton, masarinaco. Inari camairín ni'ton, nani huë'sapi macainacoso marë'. Co caso' pi'pian tëranta' ina camaincosohuë' nipirínhuë', <sup>31</sup> co ta'arahuë'. Tata Yosë nosoroato, ina no'tëquënanatërahuë. Ina nohuanton, ma'sha onpoarahuë. Piyapi'sa' niconaco, “Tëhuënychachín Yosë nosoroaton, natërin,” tosapi.

“Huëco' pa'ahua huachi,” itërincoi Quisoso.



## 15

### *Opa nara'huaya nitërinso pochin nininso'*

<sup>1</sup> Ina quëran itantarincoi: "Casáchin no'tëquën a'chintatëinquëma', opa nara'huaya pochin ninahuë. Tata Yosëso' hua'anën pochin ninin. <sup>2</sup> A'na së'paquën co nitohuachinahuë', nishitëtërin. A'naquënso nipirinhüë' pi'pian nitërin. Ina së'para'huainpita pi'pian ni'quitërin na'con na'con nitacaso marë'. Co ni'quitohuatërahuë', co noya nitërinhuë'. <sup>3</sup> Carinquëma' nani anoyacancantëranquëma'. A'chintëranquëmaso' natërama' ni'ton, anoyacancantëranquëma'. <sup>4</sup> Imamiatatomaco, nani tahuëri yonquiráco catahuainquëma'. Noya nichinpitërinso pochin nico'. Nara së'pa' nohuishatohuachina, co nitërinhuë'. Inapochachin co imamiatohuatamacohüë', co nanitaparamahuë' noya nicacamaso'.

<sup>5</sup> Ca opa ya'huë pochinco. Canpitaso' së'paquën pochinquëma'. Ya'coancantaranguëma'. Nani tahuëri yonquihuatamaco, catahuaaranquëma'. Opa noya nitërinso pochin noya nisarama'. Canpitaora co nanitaramahuë' Yosë pochin cancantacamaso'. <sup>6</sup> Nara së'pa' nohuishatohuachina, ahuirin. Masahuatona', pënuë të'yatopi ahuiquitacaiso marë'. Inapochachin co imamiatohuatamacohüë', Yosë ana'intarinquëma'.

<sup>7</sup> Casáchin yonquihuatamaco, na'con catahuaaranquëma'. A'chintëranquëmasonta' ama naniantocosohüë'. Ina yonquiatoma', Yosë nontoco'. Tëhuëinchachin imamiatohuatamaco, ma'sona nohuantohuatama', sha'huitoco acochinquëma'. <sup>8</sup> Opa na'con nitërinso pochin canpitanta' noya noya nico'. Ina quëran a'napitanta' nicatënenquëma', Yosë yonquiapona'. Naporahuatoma', noya noya imasaramaco. <sup>9</sup> Tata Yosë nosororincoso pochachin nosororanguëma'. Casáchin yonquico na'con nosoro'inquëma'. <sup>10</sup> Tata Yosë no'tëquën natërahuë ni'ton, pa'pi nosororinco. Inapochachin natëhuatamaco, carinquëmanta' pa'pi nosoroaranquëma'.

<sup>11</sup> Ya'ipi cancanëhuë quëran Tatahuë natërahuë ni'ton, nóya cancantërahuë. Natëhuatamaco, ca pochachin noya cancantarama'. Co sëtaramahuë'. Ina marë' a'chintëranquëma'. <sup>12</sup> Nani pënënanquëma' noya ninosorocamaso marë'. Carinquëma' nosororanguëmaso pochachin canpitanta' ninosoroco'. Ina pa'pi nohuantërahuë nicacamaso'. <sup>13</sup> Ni'co' iyaro'sa'. Nipayarëso' na'con nosorohuatëra, ina nicha'ëcaso marë' chiminë'. Inapochachin canta' na'con nosoroatëinquëma', canpita nicha'ëca'huanquëmaso marë' chiminarahuë. Co insonta' ina pochin nosororinquëmahuë'. <sup>14</sup> Natëhuatamaco, tëhuëinchachin nipayarahuëso pochin ni'saranquëma'. <sup>15</sup> Co caso' patron pochin cancantërahuë'. Patronso' piyapinëpita camairin. Camaipirinhüë', yonquirinso chachin co sha'huitërinhuë'. Nipayarinso nipirinhüë' ya'ipiya sha'huitërin. Inapochachin carinquëmanta' ya'ipiya sha'huitëranquëma'. Co piyapinëhuë pochin ni'nanquëmahuë'. Nipayarahuëso pochachin ni'nanquëma'. Ya'ipi Tatahuë sha'huitërincosopita anitotëranquëma'. <sup>16</sup> Co canpitaora nohuanton imaramacohüë'. Ca nohuanto, imaramaco. Carinquëma' huayonanquëma'. Nani acoranquëma opa së'paquën na'con nitërinso pochin nisápamaso marë'. Inapohuatama': 'Quisoso nanan quëtërinco,' ta'toma', Yosë nontoco' catahuainquëma'. Ca pochin yonquiatoma', ma'sona nipatama', acochinquëma'. <sup>17</sup> Nani pënënanquëma'. 'Imaramacosopita capini ninosoroco', itëranquëma'," tënin.

### *Piyapi'sa' no'huirinënpoaso'*

<sup>18</sup> Ina quëran itantarincoi: "Co imarinacosohüë' no'huihuachinëinquëma', ama pa'yancosohüë'. Ca'ton no'huirinacoso, nitotërama'. <sup>19</sup> Inapita pochin cancantërama' naporini, noya ni'itënenquëmahuë'. Inahua capiniráchin nipa'yatopi. Nipirinhüë', nani huayonanquëma'. Ca nohuanto, co inapita pochin cancantëramahuë'. Imaramaco ni'ton, no'huirinëinquëma'. <sup>20</sup> No'huirinaco ni'ton, canpitanta' no'huirinëinquëma'. Nani

sha'huitëranquëma': 'Hua'anëmaco ni'ton, co canpitaso' noya noya ni'sarinënuquëmahuë'; itëranquëma'. Aparisitërinaco ni'ton, canpitanta' aparisitarinënuquëma'. A'chinahuëso' natëhuachina', canpitanta' natëarinënuquëma'. <sup>21</sup> Napoaponahuë', imaramaco ni'ton, na'con na'con piyapi'sa' aparisitarinënuquëma'. Tata Yosë a'paimarincoso' co nohuitopi-huë' ni'ton, no'huiarinënuquëma'.

<sup>22</sup> Co o'mato, a'chintërahuë' naporini, co a'porinacoso marë' oshahuaintonahuë'. Nani a'chintopirahuë'. Co natëtonacohuë', oshahuanpi ni'ton, Yosëri ana'intarin. <sup>23</sup> Insopitaso' no'huihuachinaco, Tata Yosënta' no'huiapi. <sup>24</sup> Na'a piyapi'sa' a'naroáchin anoyatërahuë. Nani ma'sha Yosë pochin ninahuë. A'napita piyapi'saso' co nanitapapihuë'. Yosë anohuita'huaso marë' sacai' nininso' a'notërahuë. Co a'notërahuë' naporini, co ina marë' oshahuaintonahuë'. Nani nicaponaracohuë', no'huirinaco. Tata Yosënta' no'huiapi. <sup>25</sup> Iráca Yosë quiricanënuquë ninshitopi. 'Topinan quëran no'huirinaco,' ténin ninshitaton. Iporaso' naporinso chachin topinan quëran no'huiarinaco.

<sup>26</sup> Yosë'pa' pantahuato, Ispirito Santo a'patimaranquëma'. Inaso' achinicancanarin-quëma'. No'tëquënáchin nonin. Yosë quëran o'marahuatón, piyapi'sa' ayonquiarin. Non-ahuëso chachin no'tëquënu ayonquiarinquëma'. <sup>27</sup> Canpitanta' a'chinarama' a'napitanta' nohuitinacoso marë'. Ya'nan a'chinahuë quëran huarë' nohuitëramaco ni'ton, napo-rahue'so' sha'huitarama'.

## 16

<sup>1</sup> Co'huara ma'sha onpochátërasënuquëmahuë', sha'huitëranquëma' ama pa'yanatoma' a'poamacoso marëhuë'. <sup>2</sup> Niyontonpiso pëiro'sa quëran ocoiarinënuquëma'. A'na tahuëri yatëparinënuquëma'. 'Co noyahuë' nipi ni'ton, tëpahuatoi, Yosë noya ni'sarincoi,' ta'tona', a'naquëma' tëpaarinënuquëma'. <sup>3</sup> Co Tata Yosë nohuitopihuë'. Canta' hui'ninco nipi-rahue', co nohuitërinacohuë' ni'tona', aparisitarinënuquëma'. <sup>4</sup> Napoaton iyaro'sa', ama pa'yancosohuë'. Nani sha'huitëranquëma'. A'na tahuëri aparisitohuachinënuquëma', ina yonquiarama'. 'Tëhuënu chachin no'tëquënu ninoton, sha'huitërinpoa', tosarama'.

### *Ispirito Santo catahuarinpoaso'*

Ya'nan imapoma', co ina pochin sha'huitëranquëmahuë'. Canpitaro'co ya'huato, catahuaranquëma'. <sup>5</sup> Iporaso' 'Yosë'pa' paantarahuë', itopiranquëmahuë': '¿Intohu-ata' pa'saran?' co itëramacohuë'. <sup>6</sup> Napotëranquëmaso marë' chiniquënu sëtapiaramahuë'. <sup>7</sup> No'tëquënu itëranquëma'. Canpita marë' paanta'huaso' noya, tënahuë. Co paantahuato-huë', Ispirito Santo co o'marinhuë' catahuainquëmaso marë'. Nipirinhuë', paantahuato, ina a'patimaranquëma'. <sup>8-11</sup> Ispirito Santo isoro'paquë o'mahuachin, oshahuano'sa' pa'pi co noyahuë nipiso', Yosë noya coisë pochin nininso', no'tëquënu ana'intacaso ya'huërinso', inapita ayonquiarin: 'Co Quisoso natëramahuë' ni'ton, pa'pi oshahuanama'. Inaso' no'tëquënu chachin Yosë natëton co tëhuërinhuë ni'ton, chiminpachina Tata Yosë ya'huërinquë pantarin. Napoaton co huachi quënanaramahuë'. Sopai hua'ani hua'qui' piyapi'sa' hua'anëntopirinhuë', Yosëri minsërahuaton, ana'intarin,' itarin piyapi'sa', ayon-quiaton.

<sup>12</sup> Na'con yaa'chintopiranquëmahuë', co ipora nanitaramahuë' ya'ipiya yonquica-maso'. <sup>13</sup> Nipirinhuë', Ispirito Santo o'mahuachin, ya'ipi nanamëhuë' a'chintarinquëma'. No'tëquënu anitotarinquëma'. Co inaora yonquirinso' a'chintarinquëmahuë'. Yosë yon-quirinso chachin a'chintarinquëma'. A'na tahuëri ma'sha onpocaisonta' anitotarin-quëma'. <sup>14</sup> Ca nonahuëso chachin a'chintarinquëma' ni'ton, noya noya ni'saramaco. <sup>15</sup> Ya'ipi tatahuë yonquirinso' nitotërahuë. Ina pochin yonquirahuë canta'. Napoaton Ispirito Santo o'mahuachin, ca nonahuëso chachin a'chintarinquëma'.

<sup>16</sup> Pi'pian pahuanarin paca'huaso'. Pa'pato, co quënanaramacohuë'. Ina quëran co hua'quiya quëranhuë' quënantaramaco," itërincoi.

### *Sëto inquitarinso'*

<sup>17</sup> Ca'tano'sanënpitacoi ninontërai.

—¿Ma'ta' tapon naporin? “Pi'pian pahuanarin paca'huaso'. Pa'pato, co quënanaramacohuë'. Ina quëran quënantaramaco,” tënin. “Tatahuë ya'huërin'pa' paantarahuë,” tënin anta'. <sup>18</sup> “Co hua'quiya quëranhuë' quënantaramaco,” topachina, co nitotërehuahuë'. ¿Ma'ta' tapon naporin? tënai ninontatoi.

<sup>19</sup> Yanatanpiraihuë', co natanaihuë'. Quisososo nipirinhüë' nitotërin. Napoaton itërincoi:

“¿Ma'ta' tapon naporin?” ta'toma', yanatanpiramacohuë', co natanamacohuë'. Tëhuëenchachin pi'pian pahuanarin paca'huaso'. Pa'pato co quënanaramacohuë'. Ina quëran co hua'quiya quëranhuë' quënantaramaco. <sup>20</sup> No'tëquën itëranquëma'. Sëtatoma', na'nëarama'. Co natërinacosopitasohuë' nipirinhüë': “Nani chiminin huachi,” ta'tona', capa cancantapi. Canpitaso nipirinhüë' sëtapiramahuë', co hua'qui' sëtararamahuë'. A'naroáchin noya cancantantarama'. <sup>21</sup> Ni'co iyaro'sa'. Sanapi yahuaihuachina, iquiaton co noyahuë' cancantërin. Nani huaihuachina, a'naroáchin nóya cancantërin. Co huachi iquitërinso' yonquirinhüë'. “Hua'huahuë nani hua'huacharin,” ta'ton nóya cancantërin. <sup>22</sup> Inapochachin canpitanta' ipora sëtapiramahuë', naquëranchin quënantaranquëma'. Naporo' nóya cancantarama'. Co huachi insonta' nanitarinhüë' asëtainëmaso'. Nóya cancantomiatarama'.

<sup>23</sup> “Naporo' co huachi natanaramacohuë'. No'tëquën sha'huitëranquëma'. Ca pochin yonquiatoma', Tata Yosë nontoco'. ‘Quisoso nanan quëtërincoi,’ ta'toma', ma'sona nipatama', acotarinquëma'. <sup>24</sup> Ipora huanta' co ina pochin Yosë nonchátëramahuë'. Iporaso nipirinhüë' ca pochin yonquiatoma', ma'sha nico quëchinquëma'. ‘Quisoso nanan quëtërincoi,’ ta'toma', nani tahuëri nontáco' nóya cancantacamaso marë',” itërincoi.

### *Co noyahuë' nipisopita Quisosori minsërinso'*

<sup>25</sup> “Ma pochinsona nininso' nani a'chintëranquëma'. A'na tahuëriso nipirinhüë' co huachi ina pochin a'chintaranquëmahuë'. A'ninquëchin tatahuë naporinso' sha'huitaranquëma'. <sup>26</sup> Naporo' ca pochin yonquiatoma', tatahuë nontarama'. Ca pochin nontarama' ni'ton, noya natanarinquëma'. Co huachi canpita marë' nonta'huaso' ya'huërinhuë'. <sup>27</sup> Tatahuë chachin nosororinquëma'. Nosororamaco ni'ton, nosororinquëma'. Ina a'paimarincoso' natërama' ni'ton, nosororinquëma' canpitanta'. <sup>28</sup> Tatahuë quëran o'mato, isoro'paquë ya'huëpirahuë'. Co hua'qui quëranhuë' tatahuë ya'huërin'pa' panantarahuë,” itërincoi.

<sup>29</sup> —Iporaso' co huachi ma pochinsona nininso' sha'huitarancoihuë'. A'ninquëchin nontarancoi ni'ton, a'naroáchin natanai. <sup>30</sup> Quëmaso' ya'ipi nitotëran. Yosë quëran o'maran, tënai. Co huachi natana'huainquënso tëranta' ya'huërinhuë', itërai.

<sup>31</sup> —¿Nani natëramaco ti? Napoaponahuë', carinquëma' itaranquëma'. <sup>32</sup> Ipora tashi chachin ya'ipinquëma' ta'ananpiaramaco. Yanquëërahuatoma', pëinëmaquë pa'sarama'. Patopiramacohuë', co caora ya'huapohuë'. Tatahuë ca'tanarincó. <sup>33</sup> Nani na'con sha'huitëranquëma' sano cancantacamaso marë'. Casáchin yonquihuatomaco, sano cancantarama'. Co pa'yanaramahuë'. Piyapi'sa' aparisitopirinëinquëmahuë', catahuaranquëma' ni'ton, chiniquën cancantoco'. Ya'ipi isoro'paquë co noyahuë' nipisopita nani minsëarahuë, itërincoi Quisososo.

## 17

### *Quisososo, imarinsopita marë' Yosë nontërinso'*

<sup>1</sup> Ina tosahuaton, inápaquë në'pëtërin Yosë nontacaso marë': “Nani Tata ora naniarin chimina'huaso'. Aparisitohuachinaco, catahuaco quëma pochachin cancantato, noya natëinquën. Ina quëran a'napita nicatonaco, noya noya yonquiarinëinquën. Quëma hui'nanco ni'to, napotaranquën. <sup>2</sup> Nani chiniquën nanan quëtëranco ya'ipi piyapi'sa'

hua'anënta'huaso marë'. Quëma nohuanton, a'naquën imasarinaco. Inapitaso' anoyacancantërahuë quëma nohuitatënën nanpimiatacaiso marë'. <sup>3</sup> Quëmasáchin Yosënquën. Isoro'paquë a'paimaranco. Piyapi'sa' nohuitahuatënënquën, canta' nohuitoahuachinaco, nanpimiatapi.

<sup>4</sup> Piyapi'sa' nicha'ëca'huaso marë' a'paimaranco. Ya'ipi sha'huitërancoso' natëarahuë. Ya'ipi tiquirahuë. Quëmasáchin natëranquën ni'ton, piyapi'sa' noya ni'sarinënquën. <sup>5</sup> Iráca co'huara isoro'pa' ya'huëyátërasohuë', quëmaro'co noya noya ya'huëpirahuë', a'paimaranco. Iporaso', Tata, quëmataquë naquëranchin acoantaco quëmaro'co chachin ya'huanta'i.

<sup>6</sup> Quëma nohuanton, a'naya a'naya imasarinaco. Isoro'paquë ya'huëpirinahuë', huayonan imainacoso marë'. Napoaton, imasarinaco. Nani a'chintërahuë. Onpopinsona quëma cancantëranso' nani anitotërahuë ni'ton, nohuitërinënquën. Inapitaso' quëma piyapinënpita. Iráca quëran huarë' yonquiran imainacoso'. Quëma nanamën natëpi. <sup>7</sup> Caora yonquinëhuë quëran co manta' ninahuë'. Quëma sha'huitoahuatancora, natëranquën. Ina nitotopi. <sup>8</sup> Sha'huitoahuatancora, inachachin a'chintërahuë, natëtopi. Quëmá quëran o'marahuë. Quëma chachin a'paimarancosonta' natëpi.

<sup>9</sup> Imarinacosopita marë' chiníquën nontaranquën. Hui'nanpita pochin ni'nan. Iráca quëran huarë' yonquiran imainacoso'. A'napitaso' co imarinacohuë'. Co inapita marë' nontaranquënhuë'. <sup>10</sup> Ya'ipi imarinacosopita imarinënquën quëmanta'. Quëmari hui'nanpita pochin cancantëran. Napopianachin imarinënpo'. Noya natërinaco ni'ton, piyapi'sa' noya ni'sarinaco.

<sup>11</sup> Co hua'quiya quëranhuë' quëmataquë paantarahuë. Isoro'paso' patarahuë. Imarinacosopitaso nipirinhuë', isëquë ya'huapona'. Quëma nohuanton, imasarinaco. Quëmaso' Tata nóyanquën ni'ton, noya a'paiquë' imamiachinaco. Ya'ipiya nanitaparan ni'ton, catahuaquë' napopianachin yonqui'ina'. Campo' ninosororëso pochin ninosoro'ina'. <sup>12</sup> Inapitaro'co ya'huasoco, quëma nanamën a'chintërahuë, pënënahuë, na'con catahuarahuë imamiatinacoso marë'. Noya a'pairahuë. Co a'naya tëranta' a'poarinacohuë'. A'naíchin pipirin, parisitopiquë pacacaso' ya'huërinso'. Quëma quiri-canënuë ninoranso chachin nanirin.

<sup>13</sup> Iporaso nipirinhuë' ya'huëranquë paantarahuë. Co'huara pantayatërapohuë', isoro'pa quëran chachin, nontaranquën imarinacosopita noya cancantacaiso marë'. Ya'ipi cancanëhuë quëran natëranquën ni'ton, noya cancantërahuë. Catahuaquë inapitanta' ca pochachin noya cancanchina'. <sup>14</sup> Quëma nanamën chachin nani a'chintërahuë. Co imarinacosopitarihuë' no'huipi. Co inapita pochin cancantopihuë' ni'ton, no'huipi. Canta' co inapita pochin cancantërahuë'. <sup>15</sup> Co nohuantërahuë' isoro'pa quëran ocoicamaso'. Isëquë ya'huëpirinahuë', catahuaquë' ama sopairi minsëinsohuë'. <sup>16</sup> Na'a piyapi'sa' co noyahuë' nipirinahuë', co caso' inapita pochin cancantërahuë'. Imarinacosopitanta' co inapita pochin cancantopihuë'. <sup>17</sup> Catahuaquë' quëmasáchin cancanchinën. No'tëquën ayonquiquë' noya nicacaiso marë'. Quëma nanamën quëran no'tëquën anitotëran. <sup>18</sup> Isoro'paquë a'paimaranco. Inapochachin inapitanta' a'parahuë piyapi'sa' a'chintacaiso marë'. <sup>19</sup> Imarinacosopita nosoroato, ya'ipi cancanëhuë quëran quëmasáchin natëranquën. Inapitanta' no'tëquën yonquiatona', noya natëinënquën.

<sup>20</sup> Co isopita marëáchin nontaranquënhuë'. A'na tahuëri inapitanta a'napita a'chintohuachina', imasarinaco. <sup>21</sup> Inapitanta' catahuaquë' napopianachin yonqui'ina'. Campo' ninosororëso pochin ninosoro'ina'. Quëma hui'nanco ni'to, yonquiranso chachin yonquirahuë. Inapitanta' catahuaquë' campo pochachin yonqui'ina'. Ina quëran a'napitanta' natëarinaco. 'Yosëri chachin a'paimarin,' tosapi. <sup>22</sup> Quëma nohuanton, noyápiachin cancantërahuë. Imarinacosopitanta' catahuarahuë noyápiachin cancantacaiso marë'. Ina quëran a'na huënton pochin napopianachin yonquiapi. Campo pochachin cancantapi. <sup>23</sup> Quëma pochachin yonquiato, inapita ya'coancantërahuë

canpo pochachin yonquicaiso marë'. Ina quëran co imapisopitahuënta' nicatora': 'Tëhuëncachin Yosëri hui'nin a'paimarin. Hui'nin nosororinso pochin imarinsopitanta' nosororin,' tosapi.

<sup>24</sup> Quëma nohuanton Tata, isopitaso' imasarinaco. Inapita nohuantërahuë carë' ya'huëcaiso'. Iráca quëran huarë' quëma nosororanco. Co'huara isoro'pa' ya'huëyátërasohuë', nosoroatonco, nóya acoranco. Inatohua' inapitanta' pantahuachina', noya noya ni'sarinaco. Ina na'con nohuantërahuë. <sup>25</sup> Quëmaso' Tata no'tëquënáchin yonquiaton, noyasáchin ninan. Co imarinosopitahuë' co nohuitërinënguënhuë'. Caso nipirinhüë' nohuitëranquën. Quëma isoro'paquë a'paimaranco. Imarinosopita nitotopi. <sup>26</sup> Quëma nanamën nani a'chintërahuë nohuitinënguënso marë'. Ipora huanta' a'chintërahuë ni'ton, noya noya nohuitarinënguën. Quëma nosororanco so pochachin ninosorocaiso marë'. Inapohuachina', inapita ya'coancantato, ya'huëmiatarahuë," itërin.

## 18

### *Quisoso mapiso'*

*(Mateo 26.47-56; Marcos 14.43-50; Lucas 22.47-53)*

<sup>1</sup> Nani Yosë nontohuachina, Sitron itopiso' i'shanantë' aquëtëran pa'nai. Inaquë nararoa'hua ya'huërin. <sup>2</sup> Inatohua' na'aro' niyontonai ni'ton, Cotasërinta' nohuitërin. Inaso' yasha'huirapirinso'. <sup>3</sup> Corto hua'ano'sa', parisioro'sa', inapita nani sha'huitonin. Natanahuatona', sontaro'sa', ponisiaro'sa', inapita a'papi Quisoso macacaiso marë'. Nansa, sahuëni, inapita quëpapi. Tashi' ni'ton, nanparin, yonarin, inapitanta' quëpapi. Cotasëri quëchitërahuaton, a'notërin. <sup>4</sup> Quisososo' ya'ipiya ninoponahuë', co ta'arinhuë'. Nacapiapon pa'nin.

—¿Inta' yonisarama'? itërin.

<sup>5</sup>—Quisoso Nasaritoquë ya'huërinso', itopi.

—Ca mini inaco, itërin. Cotasënta' inaquë huaniarin anta'.

<sup>6</sup>—Ca mini inaco, itohuachina, pa'yanpi. A'na achira' pinën parti pa'sahuatona', pinëna quëran anotopi.

<sup>7</sup> Ina quëran naquëranchin itantarin:

—¿Inta' yonisarama'? itantarin.

—Quisoso Nasaritoquë ya'huërinso', itantapi.

<sup>8</sup>—Nani sha'huitëranquëma'. Ca mini. Ca nohuantohuatamaco, isopitaso' tananpitoco' pa'ina', itërin. <sup>9</sup> Achin Yosë nontaton, itërin: “Quëma nohuanton, isopita imasarinaco. Noya a'paiarahuë. Co a'naya tëranta' a'poarinacohüë,” itërin. Ina nanicaso marë': “Tananpitoco' pa'ina',” itërin. <sup>10</sup> Napopirinhüë', Simon Pitroso' sahuëninën ocoirahuaton, corto hua'an inpriatonën Marco itopiso' ahuërin. Inapotaton, inchinan huëratën nishitëhuëratëtërin. <sup>11</sup> Quisososo nipirinhüë' co nohuantërinhuë'.

—Sahuëni iyasha po'moantaquë'. Tananpitëquë' mainaco. Tatahuë nohuanton, masarinaco. Main o'orëso pochin chiniquën parisitarahuë. ¿Co ina nitotëranhuë' ti? itërin.

### *Corto hua'an pëinënguë quëpapiso'*

*(Mateo 26.57-58; Marcos 14.53-54; Lucas 22.54)*

<sup>12</sup> Ina quëran sontaro'sa', capitan, cotio ponisiaro'sa', inapita huë'sahuatona', Quisoso mapi. Masahuatona', tanpaquën noyá tonporahuatona', <sup>13</sup> Anasëtaquë quëpapi. Inaso' Caihuasë mi'sën. Naporo' pi'ipi Caihuasë corto hua'an chini chiniquën nanantërinso' ya'conin. <sup>14</sup> I'hua inaso' cotioro'sa' sha'huitërin: “Ama ya'ipinpoa' chiminacaso marëhuë' ina chimi'in, tënahüë,” itërin. Inaquë quëpapi natanacaiso marë'.



*Pitrori nonpinapirinso'**(Mateo 26.69-70; Marcos 14.66-68; Lucas 22.55-57)*

<sup>15</sup> Ca'tano'sanënpitaso' pa'pi. Simon Pitroso nipirihuë', Quisoso imaquirin. Canta' imaquirahuë. Caso' corto hua'an nohuitërinco ni'ton, Quisoso acoana quëpahuachinara, pairanaquë chachin ya'conahuë. <sup>16</sup> Pitroso' ya'coana aipiran huaniárin. Napohuachina, ya'coana a'pairinso' sanapi nontërahuë Pitronta' ya'conacaso marë'. Nontohuatëra, ya'conin anta'. <sup>17</sup> Pitro ya'compachina, sanapiri itërin:

—Quëmanta' mini Quisoso imaran, itërin.

—Co'chi caso' imarahuë paya, itërin Pitrori.

<sup>18</sup> Naporo' tashi' sëhuën ni'ton, ponisiaro'sa', inpriatoro'sa', inapita pëyara quëran nani a'pëtopi. Inaquë huanirahuatona', napëntapi. Pitronta' inaquë napëntapatarin.

*Corto hua'ani nataninso'**(Mateo 26.59-66; Marcos 14.55-64; Lucas 22.66-71)*

<sup>19</sup> Ina quëran Quisososo' natanapi:

—¿Ma'ta' a'chinan? ¿Inpitata' imarinënuquën? itërin corto hua'ani.

<sup>20</sup> —Caso' a'ninquëchin piyapi'sa' a'chintërahuë. Niyontonpiso pëiquë, Yosë chinotopiso pëiquë, inaquëpita cotioro'sa' niyontonpachinara, a'chintërahuë. Co po'oana quëran a'chinahuë'. <sup>21</sup> ¿Onpoatonta' natananco? Na'a piyapi'sa' nataninaco, nani nitopi. Inapita natanquë' sha'huichinën, itërin.

<sup>22</sup> Itohuachina, ponisiari panpirayarin.

—Corto hua'an chini chiniquën nanantërinso nipirihuë', ¿ina pochin a'paniran ti? itërin ponisiari.

<sup>23</sup> —Co noyahuë' nonahuë nipachin, sha'huitoco maquëta tëhuërahuë. Nipirihuë', no'tëquën nonahuë nipachinso', ¿onpoatonta' ahuëranco? itërin.

<sup>24</sup> Ina natanahuaton, hua'ani a'parin Caihuasë nontacaso marë'. Tonpopinan quëpapi.

*Naquëranchin Pitrori nonpinapiantarinso'**(Mateo 26.71-75; Marcos 14.69-72; Lucas 22.58-62)*

<sup>25</sup> Simon Pitroso nipirihuë' huaniton, napëntarin.

—¿Quëmarinta' iso quëmapi imamaranquën ti? itërin ponisiari.

—Co'chi imarahuë paya, itantarin.

<sup>26</sup> Ina quëran cotio hua'an piyapinëni quënanin. Ina quëmopinën chachin Pitrori nishitëhuëratëtërinso' ni'ton, pi'pian nohuitërin. Pitro quënanahuaton, itërin:

—¿Co'ta Quisoso mapiquë quënananquën pora? itërin.

<sup>27</sup> —Co'chi cahüë paya, itaantarin Pitrori. Naporo' atari përarin, natanin.

*Pirato quëtonpiso'**(Mateo 27.1-2, 11-14; Marcos 15.1-5; Lucas 23.1-5)*

<sup>28</sup> Tashíramiachin nisahuaso', Caihuasë pëinën quëran quëparahuatona', Noma hua'an pëinënquë quëpapi. Cotioro'saso nipirihuë' co inaquë ya'conpihuë'. “Nisha piyapi'sa' pëinënquë ya'conpatëhua', oshahuanarigua'. Ina quëran co nanitarihuahuë' Pascoa cosharo' capacaso',” topi. <sup>29</sup> Napoaton Pirato pipirahuaton, inapita nontërin.

—¿Ma'ta' onporin iso quëmapi? itërin.

<sup>30</sup> —Pa'pi co noyahuë'. Noya ninin naporini, co quëshiitënuquëhuë', itopi.

<sup>31</sup> —Canpitari quëpaco'. Iráca quëran huarë' nipënenamaso' co natëhuachinhuë', ana'intoco', itërin.

—Co quiyaso' nanitëraihuë'. Co nanan ya'huëtërincoihuë' piyapi'sa' tēpaca'huaiso', itopi.

<sup>32</sup> I'hua Quisoso ninoton nani sha'huirin: “A'na tahuëri inápaquë achinpiarinaco,” tēnin. Yosë nohuanton, onpotatonasona tēpacaiso' naniarin. <sup>33</sup> Ina quëran Piratori pëiquë ya'coantarahuaton, Quisoso itapon:

—¿Quëmaso' cotio copirnonquën ti? itërin.

<sup>34</sup>—¿Quëmaora yonquinën quëran napoaran? ¿A'napita sha'huitërinquën nica? itërin.

<sup>35</sup>—“Cotio piyapi inanta,” ¿topiranhüë' ti? Caso' nishaco. Cotioro'sa' sha'huirapirinënguën. Corto hua'ano'sa chachin yo'quirinën ana'inta'huanquënso marë'. ¿Ma'ta' onporan ni'ton, yatëparinënguën? itërin.

<sup>36</sup>—Co caso' isoro'paquë hua'anëntarahuë'. Ina nohuantërahuë naporini, imarinacoso-pita sontaro'sa pochin niitonahuë'. Ama cotioro'sa' macainacoso marëhuë' chiniquën ahuëchitonahuë'. Caso nipirinhüë' nisha pochin hua'anëntarahuë, itërin.

<sup>37</sup>—Napoahuarë' ¿quëmaso' copirnonquën? itërin Piratori.

—Inaco mini. Ina marë' nasitimarahüë. O'marahüë no'tën nanan pënënta'huaso marë'. No'tëquën yonquipisopita natëarinaco, itërin.

<sup>38</sup>—¿Ma no'tën nanancha napotëran nicaya? itërin Piratori.

### *Quisoso tëpacaso' sha'huirinso'*

*(Mateo 27.15-31; Marcos 15.6-20; Lucas 23.13-25)*

Ina tosahuaton, pipiantarahuatón, cotioro'sa' itantarin:

—Iso quëmapi noya, tënahüë. Co manta' onporinhüë'. Co ana'intacaso' ya'huërinhuë'.

<sup>39</sup> Napoaton sha'huichinquëma'. Nani Pascoa tahuëri a'nara' apina'pi tashinan pëi quëran ocoirahuë pipicaso marë'. ¿Nohuantërama' cotio copirno ocoica'huaso'? itërin.

<sup>40</sup> Natanahuatona', chiniquën a'panitopi:

—¡Ama ina ocoiquësohüë'! ¡Parapasë ocoiquë'! itopi. Inaso' matararo nipirinhüë' napotopi.

## 19

<sup>1</sup> Ina natanahuaton, sontaro'sa' camairin Quisoso huihuicaiso marë'. Napohuachina, chiniquën huihuitona' pë'sha pë'shatopi. <sup>2</sup> Nahuan quëran yancotë' nicatona', ayancotopi. Nahuan ni'ton, ohuanin. Naporahuaton, quëhuanën miáchin hua'an a'morinso pochin a'motopi tëhuacaiso marë'.

<sup>3</sup> —¡Nanpimiataton israiro'sa hua'anëntëquë'! itopi. Napotahuatona', panpirayarápi.

<sup>4</sup> Ina quëran Pirato pipiantarahuatón, piyapi'sa' nontantarin.

—Iso quëmapi a'notantaranquëma', ni'co'. Co manta' onporinhüë', tënahüë, itërin.

<sup>5</sup> Naporo' Quisosonta' pëi quëran pipirin. Yancotë' nahuan quëran nipiso ayancotopi, quëhuanën miáchin a'motopiso'. Inapitarë chachin pipirin.

—Ni'co' iso quëmapi, sa'ahua, itërin piyapi'sa'.

<sup>6</sup> Corto hua'ano'sa', ponisiaro'sa', inapitari quënanahuatona', chiniquën noncarotopi.

—¡Corosëquë patanantëquë' chimin! itopi. Inachin inachin itápi.

—Canpitari corosëquë patanantatoma', tëpaco'. Co caso' nohuantërahuë' tëpa'huaso'. Co manta' onporinhüë', tënahüë caso', itërin Piratori.

<sup>7</sup>—Íraca pënëntërinso' co natërinhuë' ni'ton, chimi'in. Topinan piyapi niponahuë', “Yosë hui'ninco,” toconin, itopi.

<sup>8</sup> Ina natanahuaton, Pirato chiniquën pa'yanin. <sup>9</sup> Ya'coantarahuaton, Quisoso itapon:

—¿Intohua quërantá huë'nan? No'tëquën sha'huitoco, itërin. Inariso nipirinhüë', co manta' itërinhuë'.

<sup>10</sup> —¿Onpoatonta' co yanontërancohuë'? Ca nohuantohuato, ocoiaranguën. Nohuantohuato, atëpataranguën. ¿Co ina nitotëranhuë' ti? itërin.

<sup>11</sup> —Co Yosë nanan quëtërinquënhüë' naporini, co manta' quëma nanitapaitoncohuë'. Tëpahuatanco, ina marë' oshahuanaran. Nipirinhüë', yo'coninacosopita na'con na'con oshahuanapi, itërin. <sup>12</sup> Naporo' quëran huarë' Piratori yaocoipirinhüë', cotioro'sari itaantapi:

—Iso quëmapi ocoihuatan, Noma copirno no'huiarinquën. “Caso' copirnoco,” tëninso marë' copirnorin inimicotarin, itopi.

<sup>13</sup> Ina natanahuaton, “Co'chi nanitërahuë' Quisoso ocoica'huaso paya,” ta'ton, aipiran quëpantarin. Quëpantarahuatón, ana'intacaso' shiranënguë huënsërin. “Shancori i'iratë'” itopiquë ya'huërin. Cotio nananguëso', Capata, itopi. <sup>14</sup> A'na tahuërichin pahuanarin Pascoa nanicaso'. Yacamotahuaso', cotioro'sa' itërin:

—Copirnonëma' ni'co', itërin.

<sup>15</sup> —Co quiyariso' nohuantërahuë'. ¡A'naroáchin atëpatëquë! ¡Corosëquë apatanantëquë' chimiin! itaantapi hua'ano'sari.

—Copirnonëma' nipirihuë', ¿atëpachi ti? itërin.

—¡Noma copirnoíchin natërai quiyanta! Co a'na copirno ya'huëtërincoihuë', itopi.

<sup>16</sup> Napotohuachinara, Piratori itërin: “Inta nipachin, Quisoso quëparahuatoma', corosëquë patanantoco',” itërin sontaro'sa'. Napotohuachina, masahuatona' quëpapi.

### *Corosëquë patanantopiso'*

*(Mateo 27.32-44; Marcos 15.21-32; Lucas 23.26-43)*

<sup>17</sup> Corosë apitëntohuachinara, inaora quëparin. Pa'sahuatona', “Nansë Moto',” panën itopiquë canconpi. Cotio nananguëso', Corocota itopi. <sup>18</sup> Inaquë corosëquë patanantopi. Cato' apiro'santa' tëparapi anta' ni'ton, nisha patanantopi. A'na' ahuënan quëran, a'nanta' inchinan quëran patanantopi. Quisoso ahuanapanipi. <sup>19</sup> Ina quëran Pirato ninshitërin onporinso marësona tëparapiso nitotacaiso marë'. Nani ninshitoahuachina, corosëquë chachin motën pëtëcha achinpitopi.

ISOSO' QUISOSO NASARITOQUë YA'HUërinso'. COTIORO'SA' COPIRNO tënin, ninshitaton. <sup>20</sup> Ninano ya'cariya ni'ton, na'a cotioro'sa' ina nontopi. Cotio nananguë, Noma nananguë, Crico nananguë, cara nananguë chachin aninshitërin.

<sup>21</sup> Corto hua'ano'saso nipirihuë', co noyahuë' ni'pi.

—“Cotioro'sa' copirno,” ta'ton ninshitëranso', co noyahuë'. “Cotioro'sa' copirnoco toconinso',” ta'caso' ninshitaantaquë', itoonpi Pirato.

<sup>22</sup> —Inca, co nohuantërahuë'. Nani ninshitërahuë huachi. Co huachi a'na ninshita'huaso' ya'huërinhuë', itërin Piratori.

<sup>23</sup> Ina quëran sontaro'saso', nani Quisoso patanantahuatona', aipi a'morinso' nipatomatopi. Catapinitë yasëratona', a'naya a'naya mapi. Acopotërinso' nipirihuë', co pipinamën ya'huëtërinhuë'. Ya'ipitë' a'nanpiso'.

<sup>24</sup> —Ama oshahuasohuë'. Huëco' ya'nipitëhua' nicanahua', ta'tona' ya'nipirapi. Inapora'huatona', a'nari manin.

Íraca Yosë quiricanënguë ninoton, tapon: “A'morahuëso' nipatomatapi. Acopotërahuëso macacaiso marënta' nicanarapi,” tënin ninshitaton. Naporinso chachin mapi.

<sup>25</sup> Corosë ya'cari catapini sanapi'sa' huaniapi. A'naso' Quisoso a'shin. A'nanta' a'shatën. Criopasë sa'in Maria itopisonta' inaquë huaniarin. A'nanta' Maria Mactarina. Inapitari ni'sapi. <sup>26</sup> Canta' inaquë huaniarahuë. Quënanahuatonco, a'shin itapon:

—Iso quëmapi mama, hua'huan pochin ni'quë'. Ina ni'sarinquën huachi, itërin. Na'con nosoroatonco napotërin. <sup>27</sup> Ina quëran nontërinco.

—Quëmanta' iyasha, mamahuë mamaparinquën pochin ni'quë', itërinco.

Napotohuachincora, naporo chachin pëinëhuëquë quëparahuë yacapaincoso marë'.

### *Quisoso chimininso'*

*(Mateo 27.45-56; Marcos 15.33-41; Lucas 23.44-49)*

<sup>28</sup> Quisoso nontahuatoncoi: “Nani ya'ipi Yosë sha'huitërinco' natërahuë,” tënin yon-quinënguë. Ina quëran, Yosë quiricanënguë ninorinso nanicaso marë':

—Yamororahuë, tënin.

<sup>29</sup> Huino áin nininso' tasonquë ya'huërin. Napoaton pi'shiro pochin nininquë asë'cotërahuatona', nara'huayaquë achinpipi. Ihuëtahuaton, Quisoso nanamënguë paquënantërin. <sup>30</sup> Pi'pian o'sahuaton: —Nani ya'ipi nanirin, tënin.

Ina toshuaton, monshorahuaton, chiminin.

### *Sontarori ohuaninso'*

<sup>31</sup> Ina tashiraya chinoto tahuëri ni'ton, cotioro'sa' co nohuantopihuë' inaquëranchin patanantopisopita patacaiso'. Pascoa tahuëri chachin inaso' ni'ton, noya noya ni'pi. Napoaton Pirato paahuantapi. "Sontaro'sa' sha'huitëquë' tonaina' nipanchina' a'naroáchin chiminacaiso marë'. Chiminpachina', quëparahuatona', pa'pichina'," itopi hua'ano'sari. <sup>32</sup> Napotohuachinara: "Noyahua'," itahuaton, sontaro'sa' a'parin tonaina' nipantacaiso marë'. Pa'sahuatona', cato' apiro'sa chachin nipantononpi. <sup>33</sup> Ina quëran Quisoso huëcapaipirinahuë', nani chiminin quënanquipi. Napoaton co nipantonatopihuë'.

<sup>34</sup> A'na sontaroso nipirinhue', nansaquë nininpitën ohuantërin. Huënai' i'shapitarë chachin pipirin. <sup>35</sup> Cari chachin ni'nahuë. No'tëquën sha'huitaranquëma' canpitanta' nitotoma' natëcamaso marë'. <sup>36</sup> Iráca Yosë quiricanënuquë ninshitërin: "Co a'na nansëquën tëranta' nipantapihuë'," tënin. Naporinso chachin co inaso' nipantopihuë'. <sup>37</sup> A'nanta' ninshitërin: "A'na tahuëri ohuanpiso' ni'sapi," tënin Yosë quiricanënuquë.

### *Quisoso na'pi naninquë po'mopiso'*

*(Mateo 27.57-61; Marcos 15.42-47; Lucas 23.50-56)*

<sup>38</sup> Ina quëran Cosi Arimatiaquë ya'huërinso' pa'nin Pirato nontapon. Inanta' Quisoso imaponahuë', cotioro'sa' tē'huataton, co a'ninquëchin sha'huirinhue'. Inaso nipirinhue', chiniquën cancantaton, pa'nin Pirato nontapon.

—Quisoso nonën nohuantërahuë. Quëtoco cari quëpa'i, itërin. Itohuachina, "Noyahua'. Quëpaquë'," itërin. Napotohuachina, pa'nin nonën corosë quëran anohuaracaso marë'. Anohuararahuatona', quëpapi. <sup>39</sup> Nicotimonta' huë'nin. Inaso' iráca Quisosoquë paaton, tashi' nontërin. Inanta huëcaton, pimo yaqui' shinpanantë ayontopinan, quënin nonën pashitacaso marë'. Cara shonca quiro pochin quë'ninso' quënin. <sup>40</sup> Quisoso nonën masahuatona', pimóchin nininsoquë morin asë'cotëtopi. Inapotatona, noyá so'pinpi. Ina pochin cotioro'sa' nipa'pitohuachinara, chimipi tapapi na'pi naninquë po'mocaiso marë'. <sup>41</sup> Ina ya'cariya imia'huaya ya'huërin. Inaquë nasha na'pi nanin ya'huërin chimipi po'mocaiso marë'. Inaquëso', co chimipi po'moyátërapihuë'. <sup>42</sup> Nani i'huararin. Tahuëririnquë Pascoa tahuëri chachin ni'ton, manorapi. Tëpapiso' ya'cariya ni'ton, inaquë po'mopi. Pancara'pi pitarahuatona', nanin pa'copitopi.

## 20

### *Quisoso nanpiantarinso'*

*(Mateo 28.1-10; Marcos 16.1-8; Lucas 24.1-12)*

<sup>1</sup> Tomio tahuëri nipachina, tashiyachin Maria Mactarina pa'nin Quisoso po'mopiquë nicapon. Co noya tahuëriyátërasohuë', canconin. Canconahuaton ni'pirinhue', na'pi pa'copitopiso' chi'huincapinan quënanconin. <sup>2</sup> "Quisoso nonën nani quëpapi," ta'ton, ta'aquirin. Canquirahuaton, Simon Pitro'coi sha'huitiirincoi.

—¡Sinioro nonën po'mopi quëran, nani quëpapi! Intohuaso' quëpapiso' co nitotërahuë', itiirincoi.

<sup>3</sup> Napotohuachincoira, na'pi nanin'pa' pa'nai. <sup>4</sup> Napopianachin ta'apiraihuë', Pitro na'huëtërarahuato, ca'ton canconahuë. <sup>5</sup> Monshorahuato, nëhuëconahuë. Morinquë so'pinpisoachin quënanconahuë. Nipirinhue', co ya'conahuë'. <sup>6</sup> Ca piquëran Simon Pitro canconahuaton, ya'conin. Morin Quisoso so'pinpiso' ni'conin anta'. <sup>7</sup> Në'mëtë' so'pinayapisonta' quënanin. Inaso' nisha quëhuëánin. Inanta' so'pinpinan. <sup>8</sup> Ina quëran canta' ya'conahuë. Në'mëtë' so'pinpiso' ni'sahuato, natërahuë. "Tëhuëchachin Quisoso nanpiantarin," tënahue. <sup>9</sup> Yosë quiricanënuquë iráca ninshitatona': "Nanpiantararin," topirinhue', co yonquiyátëraraihuë'. <sup>10</sup> Nani ni'patëira, ya'huërai'pa' paantarai.

*Maria Mactarina ya'notërinso'*  
(*Marcos 16.9-11*)

<sup>11</sup> Mariaso nipirinhüë' huëantarahuaton, Quisoso po'mopiso' aipiran huaniquiantarin. Chiniquën na'nëárin. Na'nëárin quëran monshorin na'pi naninquë nëhuécaso marë'.

<sup>12</sup> Nëhuëpirinhüë', cato' anquëniro'sa' quënanin, huiríchin a'mopiso'. Quisoso nonën acopiquë huënsëapi. A'na' motën quëran huënsëarin. A'nanta' nantën parti quëran huënsëarin.

<sup>13</sup> —¿Onpoatonta' na'nëaran? itërin anquëniri.

—Sinioronëhuë nonën nani quëpapi. Intohuaso' quëpapiso' co nitotërahuë', itërin.

<sup>14</sup> Tahuërëtahuaton, Quisoso chachin quënanaponahuë', co nohuitërinhuë'.

<sup>15</sup> —¿Onpoatonta' imoya na'nëaran? ¿Inta' yonisanan? itërin Quisosori. Mariaso napoaponahuë': "Sacatona'pi ta'ma'," tëcaton:

—Quëmari imoya Quisoso nonën quëpahuatan, sha'huitoco maconta'i, itërin.

<sup>16</sup> —¡Maria! itërin Quisosori. Tahuërëtahuaton, nohuitërin huachi. Inaora nananquë nontaton;

—¡Raponi! itërin. Maistro tapon naporin.

<sup>17</sup> —A'poco imoya. Co tatahuë ya'huërin'pa' pantayátërarahuë'. Apira paaton, iyahuëpita pochin ni'nahuësopita sha'huitonquë': "Yosë ya'huërin'pa' panantarahuë'. Inaso': 'Tata,' itato chinotërahuë. Canpitanta' imaramaco ni'ton, 'Tata,' itatoma' chinotërama', ténin Quisoso, itonquë'," itërin.

<sup>18</sup> Ina natanahuaton, Maria paaton, itaponcoi: "¡Sinioro chachin nani ni'nahuë!" itüirincöi. Ya'ipi sha'huitërinso chachin sha'huitërincoi.

*Ca'tano'sanënpitacoi ya'notaantarincöiso'*  
(*Mateo 28.16-20; Marcos 16.14-18; Lucas 24.36-39*)

<sup>19</sup> Naporo' tahuëri Tomio tahuëri. Tashihuachina, pëiquë ya'huarai. Cotioro'sa' të'huatatoi, ya'coana noyá oncotopiraihuë', Quisoso a'nanaya huancánachin ya'notatoncoi:

—Tashita iyaro'sa'. Sano cancantoco', itërincoi.

<sup>20</sup> Itahuatoncoi, imirin a'notërincoi. Nininpitëonta' a'notërincoi. Ohuanpiso' ni'nai. Sinioro chachin ni'sahuatoi, "Ina mini," ta'toi, nóya cancantërai.

<sup>21</sup> —Sano cancantoco' iyaro'sa'. Tatahuë a'parincoso pochachin canpitanta' a'paaranquëma' piyapi'sa' a'chintacamaso marë', itërincoi.

<sup>22</sup> Ina quëran pihuirahuaton,

—Ispirito Santo ya'coancanchinquëma huachi. Ina catahuarinquëma' no'tëquën pënëntacamaso'. <sup>23</sup> Insosona natëhuachinquëma', "Oshanën iyasha Yosë inquitaringuën," itoco'. Inquitarin mini. Nipirinhüë', co yanatëhuachinquëmahuë', "Co oshanën iyasha inquitaringuënhüë'," itoco'. Tëhuënhachin co inquitaringuë', itërincoi. Itahuatoncoi, pa'nin.

*Tomasëri quënanaton, natërinso'*

<sup>24</sup> Naporo' shoncayáchincoi ya'huërai. Tomasëso' co ya'huërinhuë'. Inaso': "Catopia'hua," itopi. <sup>25</sup> Quisoso quënanahuatoi, Tomasë sha'huitonai:

—Sinioro ni'nai, itopiraihuë', co yanatërincoihuë'.

—Imirin ohuantopiso' nicato së'huata huarë', nininpitëonta' ohuantopiso' së'huata huarë', natërahuë', itërincoi Tomasë.

<sup>26</sup> Posa tahuëri quëran niyontoantahuatoira, Tomasënta' inaquë nisarin. Naquëranchin ya'coana noya oncotaantapiraihuë'. Quisoso a'naroáchin huancánachin ya'noantarahuaton:

—Tashita iyaro'sa'. Sano cancantoco', itërincoi.

<sup>27</sup> Ina quëran anquirahuaton, Tomasë itërin:



—Imirahuë iyasha nicaton, sè'huaquë'. Nininpitèhuënta' sè'huatoco. Ama huachi nisha nisha yonquiquësokuë'. Natëco huachi, itërin.

<sup>28</sup>—¿Quëma mini Sinioronèhuënquën! Natëranquën. Yosënèhuënquën ni'ton, chinotaranquën, itërin Tomasëri.

<sup>29</sup>—Ni'nanco ni'ton iyasha, natëranco. A'napitaso' co nicaponaracohuë', natëarinaco. Inapitaso' noya noya cancantapi, itërin Quisosori.

### *Ma'marësona iso quirica ninshitërahuëso'*

<sup>30</sup> Quisoso nani ma'sha Yosë pochin ninin piyapi'sari natëcaiso marë'. Ca'tano'sanënpitacoi ni'piraihuë', co ya'ipiya isëquë ninshitëranquëmahuë'. <sup>31</sup> Iso quiricaquë ninshitërahuësopitaso', Quisoso natëcamaso marë' ninshitërahuë: “Inaso' tèhuënchachin Cristo, Yosë hui'nin. Inari a'paimarinso',” ta'toma', ina imaco huachi. Imapatama', Yosë nohuitatoma' nanpimiatarama'.

## 21

### *Yonsanquë ya'notantarincoiso'*

<sup>1</sup> Ina quëran Tipiriasë sono' yonsanquë Quisoso ya'notantarincoi. Ni'naiso' sha'huichinquëma'. <sup>2</sup> Inaquë canchisë ya'picoi nisarai. A'naso' Simon Pitro. A'nanta' Tomasë, catopia'hua itopiso'. A'nanta' Natanino, Canaquë ya'huërinso'. Sipitio hui'ninpitacointa' ya'huërai. A'napitanta' Quisoso ca'tanpisopita, catoya'pi, inapitaro'coi canchisëcoi ya'huërai.

<sup>3</sup>—Riti tē'yatapo pa'sarahuë, itërincoi Simon Pitro.

—Pa'sarai quiyanta', itërai. Potiquë ya'conconahuato, pa'nai. Pa'piraihuë', ya'ipi tashi' riti tē'yatopiraihuë', co manta' manaihuë'. <sup>4</sup> Pi'i yapipirirahuaso', Quisoso yonsanquë huaniarin, ni'piraihuë', co nohuitëraihuë'.

<sup>5</sup>—¿Co iyaro'sa', manta' manamahuë' ti? itërincoi.

—Co'chi manta' manaihuë' paya, itërai.

<sup>6</sup>—Inchinkan quëran tē'yatoco'. Inaquë tēhuënchinsos' masarama', itërincoi. Ina quëran inchinkan quëran tē'yatohuatëira, notohuaro' sami manai. Na'a ni'ton, co nanitaparaihuë' oshica'huaiso'. <sup>7</sup> Naporo' Sinioro nohuitërahuë huachi.

—Pasoso' Sinioro chachin, itërahuë Pitro.

Itohuatëra, i'nanpirapi sacatarin ni'ton, aipi a'morinso' a'naroáchin masahuaton, a'morin. Manorahuaton, i'quë niitërin. <sup>8</sup> Quiyaso' potiquë pa'nai. Riti ohuararahuato, yonsai'pa' quëparai. Co aquëyahuë'. Pasa mitro pochin aquërinso'. <sup>9</sup> Nonshiconahuato, pën quënanconai. Inaquë sami chinsarin, ni'conai. Paonta' ya'huërin.

<sup>10</sup>—Sami manamaso' caraya mamaco', itërincoi Quisoso.

<sup>11</sup> Simon Pitro potiquë ya'conahuaton, riti yonsanquë oshirin. Pasa a'natërápo shonca cara sami ya'huërin, panca samisachin. Ina nápo' niponahuë', co riti oquirinhuë'.

<sup>12</sup>—Huëco' iyaro'sa' coshatahua', itërincoi Quisoso. “¿Inquënta' quëmaso'?” co itapoirahuë', Sinioro nohuitërai. <sup>13</sup> Pan masahuaton, quëtërincoi. Saminta' quëtërincoi ca'nai.

<sup>14</sup> Nanpiantarin piquëran nani cararo' ca'tano'sanënpitacoi quënanai.

### *Simon Pitro nontërinso'*

<sup>15</sup> Nani coshatohuatoira, Quisosori itërin:

—Iya Simon, ¿isopita quëran na'con na'con nosoromiatëranco ti? itërin.

—Nosororanquën Sinioro ina nitotëran, itërin.

—Imarinacosopita carniroa'huaro'sa pochin ni'nahuë. Patontahuato, co incariso' a'pairarinhuë'. Quëmari noya a'paiton, a'chintëquë', itërin. <sup>16</sup> Ina quëran itaantarin:

—¿Nosoromiatëranco ti? itërin.

—Nosororanquën mini, Sinioro, ina nitotëran, itantarin.

—Imarinacosopitaso', ohuicaro'sa pochin nipi ni'ton, a'paiquë' noya imamiachinaco, itërin. <sup>17</sup> Ina quëran naquëranchin itantarín:

—Iya Simon, ¿tëhuë'nchachin nosororanco ti? itantarín. Cararo' natanin ni'ton, Pitro sëtërin.

—Ya'ipi Siniro nitotëran. Nosororanquën mini, ina nitotëran, itërin.

—Imarinacosopitaso', ohuicaro'sa pochin nipi ni'ton, noya a'paiquë'. <sup>18</sup> No'tëquën, iyasha, itaranquën. Quëmaso' hui'napitapon, quëmaora nohuanton, ma'sha ninan. Intohuaso' yapa'patana, nitaparahuaton, pa'nan. Nipirinhüë', a'na tahuëri mashotohuatan, ma'sha onpotarinë'nquën. Cato quëran chachin anquiran'so' tonpoarinë'nquën. Co nohuantopiranhüë', quëpararinë'nquën, itërin Pitro.

<sup>19</sup> A'na tahuëri Yosë imarin ni'ton, inapotatona', tëparapi. Ina ni'pachina', na'a piyapi'sari Yosë nóya ni'sapi huachi. Ina ninoton, Quisoso naporin. Ina quëran:

—Imamiatoco iyasha, itërin.

*Tiquinamë'nquë ninshitërahuëso'*

<sup>20</sup> I'hua coshatapoi, Quisoso pirayan coshatërahuë. Naporo' “¿Inta' Siniro sha'huirapiarinquënso'?” itërahuë Pitro nitotacaso marë'. Iporaso' sono' yonsanquë Pitro tahuë'rërahuaton, quënaninco. <sup>21</sup> Quënanahuatonco, Quisoso itapon:

—Iso quëmapiso' Siniro, ¿ma'ta' onpoapon? itërin Pitrori.

<sup>22</sup> —¿Onpoatonta' iyasha, ina yonquiran? Nohuantohuato, o'maca'huaso tahuëri huarë' nanpihuachin, co ina quëmaso' yonquicamaso' ya'huërinhuë'. Quëma imaco, itërin.

<sup>23</sup> Naporo quëran huarë' imapisopita ninontopi. “Inaso' co onporonta' chiminarinhüë',” nitopi. Quisoso nipirinhüë' co naporinhüë'. “Nohuantohuato, o'maca'huaso tahuëri huarë' nanpihuachin,” topachina, “co chiminaponhuë',” co tapon naporinhüë'.

<sup>24</sup> Nani carinquëmaso' sha'huitëranquëma'. No'tëquën ninshitëranquëma'. Ya'ipiya nicatoi, nitotërai.

<sup>25</sup> Na'con Quisoso a'chinin. Nani ma'sha ninin. Co insonta' nanitaparinhüë' ya'ipiya ninshitacaso'. Ina nápo' quirica ninshitërai naporini, co isoro'paquë tëranta' naniitonhuë', topirahuë'. Nani huachi.

## Quisoso ca'tano'sanënpita napopiso'

### *Quisoso nanpiantarahuatón, imapisopita ya'notërinso'*

<sup>1</sup> Iya Tiohuero. Ca Nocasëco ninshitaantaranquën. ¿Noya quëmanta' ya'huaran? Noya canta' ya'huarahuë. A'na quiricaquë nani ninshitëranquën. Ya'ipi Quisoso naporinso' sha'huitëranquën. A'chininsonta' anitotëranquën. <sup>2</sup> Ya'ipi inápaquë panantaquë huarë' naporinso' ninshitëranquën no'tëquën nitotamaso marë'. Iporaso' naquëranchin ninshitantaranquën. Co'huara Quisoso inápaquë pantayátëraponhuë', ca'tano'sanënpita huayoninso' sha'huitërin paatona' a'chinacaiso marë'. Ispirito Santo nohuanton, sha'huitërin. Inapita napopisonta' nitochin, ta'to, ninshitantaranquën. <sup>3</sup> Quisososo' tēhuëenchachin chiminpirinhuë', nanpiantarin. Ina piquëran catapini shonca tahuëri isoro'paquë ya'huëantarin. Ca'tano'sanënpita ya'notëra'piarin nanpiantarinso' natëcaiso marë'. Yosë hua'anëntërinso' a'chintaantarin.

<sup>4</sup> A'na tahuëri inapitarë' ni'so', sha'huitërin:

—Ama a'naroáchin Quirosarin quëran pipicosohuë'. Isëquë ninaco' Ispirito Santo o'main. “Ispirito Santo a'patimaranquëma',” tēnin Tata Yosë. I'hua chachin sha'huitëranquëmaso'. <sup>5</sup> Coanshaso' i'quë aporintërinquëma'. Iporaso nipirinhuë' Ispirito Santo aya'coancantaranquëma' catahuainquëmaso marë'. Co hua'qui quëranhuë' ya'coancantaranquëma', itërin ca'tano'sanënpita.

### *Quisoso inápaquë pantarinso'*

<sup>6</sup> Ina quëran niyontoantarahuatona', Quisoso natanpi:

—Íraca Sinioro israiro'sa' pancana hua'anëntopirinahuë'. ¿Ipora chachin chiníquën nanantaton, ina pochin acoantaran ti? itopi.

<sup>7</sup> —Tata Yosëichin chini chiníquën nanantërin. Inaora nohuanton, ma'sha acorin. Ma tahuëriso' acoamara. Onporosona napoarinsó', co Yosë nohuantërinhuë' canpita nitotacamaso'. <sup>8</sup> Iporaso nipirinhuë' Ispirito Santo na'con catahuarinquëma'. Ya'coancantohuachinquëma', nóya pēnētarama'. Ina nohuanton, nani ma'sha nanitaparama'. Ya'ipi naporahuëso' ni'nama', nani nitotërama'. A'napitanta' sha'huitoco'. Quirosarinquë chachin sha'huitoco'. Ina quëran ya'ipi Cotia parti paatoma', sha'huitonco'. Samaria partinta' sha'huitonco'. Ya'ipi parti paatoma', sha'huitëra'piaco', itërin Quisosori.

<sup>9</sup> Ina topachina, Yosëri inápaquë quëpantarin. Ca'tano'sanënpitari nicasoi', inápaquë pantarin. Nē'pērāpirinahuë', chitorori imotërin. Co huachi quënanpihuë'. <sup>10</sup> Inápaquë pantaquëya', nē'pērāpirinahuë', a'nanaya catoya'piri ya'notiimarin, huiríton a'mopiso'.

<sup>11</sup> —¿Ma'marëta' caririario'sanquëma' inápaquë nē'pētërama'? Quisoso nani pantarin. Yosëri inápaquë quëpantapirinhuë', ina chachin o'mantamarin. Inápaquë pa'ninso pochachin a'na tahuëri o'mantamarin, itërin.

### *Cotasë ya'huërenamën Matiasë acopiso'*

<sup>12</sup> Ina natanahuatona', Oriposë panën quëran nohuaramarahuatona', Quirosarinquë paantapi. Co aquëyahuë'. A'na quiromitro pochin aquërinso'. <sup>13</sup> Canconahuatona', a'na pëiquë pa'pi. Inapa pē'satë' pëi' ni'ton, nanpëpi. Inaquë naporó' yacapatapi. Pitro, Coansha, Santiaco, Antërisë, Pinipi, Tomasë, Partoromi, Matio, inapita ya'huërapí. A'nanta' Santiaco. Arpio hui'nin inaso'. A'na Simonta' ya'huërin. Inaso' copirno no'huina'piro'sa' imapirinhuë', inanta' Quisoso imarin. A'na Cotasënta' ya'huërin. Santiaco hui'nin inaso'. <sup>14</sup> Inapitaso' nani tahuëri niyontonatona', Yosë nontápi. Quisoso iinpitanta' huë'pi Yosë nontacaiso marë'. Sanapi'santa' inaquë huë'pi. A'naso' Maria. Quisoso a'shin inaso'. Napopianachin yonquiatona', inaquë na'con Yosë nontápi.

<sup>15</sup> Ina quëran na'a Quisoso imapisopita niyontonpi. Pasa cato shonca piyapi'sa pochin ya'huëpi. Pitrori huancánachin huanirahuaton, itërin:

<sup>16-17</sup> “Shonca catoya'picoi iyaro'sa' Quisoso nani acorincoi a'napita a'chinta'huaiso marë'. Cotasënta' acorin ni'ton, quiyapitarë' Quisoso ca'tanpirinhuë', inimiconënpitari yamapachina, sha'huirapirin. A'notonpachina, mapi. Iráca Ispirito Santo nohuanton, Cotasë napocaso' ninorin. Tapiri ninoton, Yosë quiricanënquë ninshitërin. Iráca ninorinso chachin naporin. <sup>18</sup> Sha'huirapirinso marë' coriqui quëtopi. Ina coriquinënquë no'pa' pa'anpi. Cotasëso' nitëparahuaton, no'paquë anotaton, ya'poirin. Chi'chirinamën pipirin. <sup>19</sup> Ya'ipi Quirosarinquë ya'huëpisopita natantopi. Natantahuatona', ina no'pa' apoyatopi. Inahuara nananquë *Aquirama* itopi. Aquiramaso', 'Huënai' No'pa', tapon naporin. <sup>20</sup> Yosë quiricanënquë ninoton, ninshitërin:

'Ama insonta' pëinënquë ya'huë'insohuë'.

No'panëonta', tanahuantërarin quëran pantachin,' tënin.

Ina quëran tantarin:

'Ina ya'huërënamën a'na acoantaquë', tënin anta' Sarmo quiricaquë.

<sup>21-22</sup> Napoaton iyaro'sa' a'na quëmapi acoanta'ahua' Cotasë ya'huërëtacaso marë'. Iráca Coansha aporintaso', Sinioro Quisoso caniaririn a'chinacaso'. Naporo' na'a miachincoi Quisoso imarai. Nani tahuëri ca'tanai. Inápaquë panantaquë huarë' ca'tanai. A'nara' Quisoso ca'taninso chachin acoanta'ahua'. 'Quisoso nanpíantarín. Canta' ni'nahuë', ta'caso marë' acoa'ahua',” tënin.

<sup>23</sup> Ina marë' catoya'pi huayonpi. A'naso' Matiasë. A'nanta' Cosi Parsapa. Costo itopi anta'. <sup>24</sup> Ina quëran Yosë nontopi. “Quëmasáchin Sinioro, ya'ipi cancanëhuëi quëran yonquiraiso' nitotëran. ¿Insota' nohuantëran acoa'huaiso', <sup>25</sup> inanta' paaton, a'napita a'chintacaso marë'? Cotasë co huachi nanitërinhuë'. Nani a'porinquën ni'ton, parisitopiquë pa'nin,” itopi.

<sup>26</sup> Ina quëran cato' ya'pi nininënpita cato' na'pitëa'huayaquë ninshitopi. Yontëra'huayaquë po'morahuatona', pa'tan pa'tantohuachinara, Matiasë nininën pipirin. Shonca a'nara' ca'tano'sanënpita ya'huëpirinahuë', iporaso huachi shonca cato' ca'tano'sanënpita ya'huantapi.

## 2

### *Ispirito Santo o'marinso'*

<sup>1</sup> Ina quëran Pinticosti tahuëri nanihuachina, Quisoso imapisopita inaquërächin niyontonpi. <sup>2</sup> A'nanaya chiniquën irininso' natanpi. Panca ihuan pochin tënëntërimarin. Inápa quëran o'marin. Ya'ipi pëianaquë tënëanahuanin. <sup>3</sup> Ina quëran pën nënërinso pochin nininsopita ya'noimarin. Ya'ipiya a'naya a'naya motoanshirainënaquë chiniimarin. <sup>4</sup> Napohuachina, Ispirito Santori ya'ipiya ya'coancantërin. Ina quëran inari catahuarin nisha nisha nananquë nonacaiso marë'. Co nitotaponaraihuë', a'naroáchin nonpi huachi.

<sup>5</sup> Ina ninanoquë chachin na'a cotioro'sa' ya'huëapi. Nisha nisha parti quëran huë'pi Yosë chinotacaiso marë'. Napoaton nisha nisha nananquë nonpi. <sup>6</sup> Quisoso imapisopita nisha nisha nananquë nonsapiso' natanpi. Natanahuatona', notohuaro' piyapi niyontonpi. A'naya a'naya inahuara nananquë nonpiso' natanahuatona', pa'yanpi. <sup>7</sup> Chiniquën pa'yanatona', ninontopi.

—Ma'pitata' natanëhuaso'. Isopitaso Cariria parti ya'huëpisopitaráchin niponaraihuë', <sup>8</sup> ¿onporahuatonata' canpoa' nisha nisha nananquë nonëhuaso pochachin inahuanta' a'naroáchin nonpi? topi. <sup>9</sup> Nisha nisha parti ya'huëpisopita nani huë'pi. Partiaro'sa', miriaro'sa', irano'sa', Misapotamiaquë ya'huëpisopita, Cotia parti ya'huëpisopita, capatosiaro'sa', pontoro'sa', asiario'sa', inapita natanapi. <sup>10</sup> Piriquiaro'sa', panpiriaro'sa', iquipitoro'sa', nipiario'sa', Sirini pirayan ya'huëpisopita, inapitanta' nani huë'pi.

Ni'toro'sa' Noma quëran huë'pisopitanta' natanapi. <sup>11</sup> A'naquën cotioro'sa', a'naquën nisha piyapi'sa' nïponaraihuë', Yosë chinotopi. Critaro'sa', arapiaro'sa', inapitanta' huëcatona', natanapi. “Nisha nishanpoa' nicarihuarahuë', canpoa' nanamënpoaquë chachin nontarinënpoa'. Yosë pa'yápiro nininso' sha'huitarinënpoa', natanëhua'. <sup>12</sup> Ma'pitata' napopi,” ta'tona', pa'yanpi.

—¿Onporahuatonata' naponontërinënpoa'? <sup>13</sup> A'naquënso nipirinhüë' tëhuarahuatona':

—No'pitona', napoapi, toconpi.

*Pitro pënëntërinso'*

<sup>14</sup> Shonca cato' ca'tano'saso nipirinhüë', co të'huatonaraihuë' huanipi. Pitroso' a'ninquëchin huanirahuaton, chiniquën nontërin ya'ipi piyapi'sa' natanacaiso marë'. “Noya natanco iyaro'sa'. Ya'ipima Quirosarinquë ya'huëramasopitanta' natanco onporaisona no'tëquën sha'huichinquëma'. <sup>15</sup> ‘Isopita no'pipi,’ topiramahuë', co no'piraihuë'. Co yono pi'iyätërarinhüë'. Co tashiramiachin no'pirëhuë'. Ispirito Santo ya'coancantërincoi ni'ton, naporai. <sup>16</sup> Iráca pënëntona'pi Coiro itopiso', ninoton ninshitërin ipora ni'saramaso'. Yosë noninso chachin ninshitaton, tapon:

<sup>17</sup> ‘A'na tahuëri ispiritonëhuë' a'pamarahuë nisha nisha piyapi'sa' ya'coancantacaso marë'.

Ya'coancantohuachin, hui'namapita nanamëhuë sha'huirapi.

Hui'napi'santa' co huë'ëponaraihuë', hua'narëso pochin quënanapi.

Mashoro'santa' hua'narapi.

<sup>18</sup> Naporro' ya'ipi natërinacosopita ispiritonëhuëri ya'coancantarin.

Ina nohuanton, nanamëhuë sha'huirapi.

<sup>19</sup> Inápaquë nani ma'sha acoarahuë. Piyapi'sa' quënanpachina', pa'yanapi.

Isoro'paquënta', ma'sha acoarahuë piyapi'sa' yonquicaiso marë'. Huënai', pën, conai' tomontarinso', inapita ni'sapi, tënin Yosë.

<sup>20</sup> Siniro o'macaso' tahuëri na'con yonquicaso' ya'huërin.

Co'huara naniyatërasohüë', nani ma'sha onporapi. Pi'i tashiarin.

Yoqui quëhuashin huënai pochin nisarin. Yosë yonquicaiso marë' inapoarin.

<sup>21</sup> “Nicha'ëco Siniro,” topachina', nicha'ësarín.

Anoyacancantahuaton, nicha'ësarín huachi,' tënin Coiro iráca ninshitaton.

<sup>22</sup> Natanco iyaro'sa'. Canpitanta' israiro'sanquëma' ni'ton, Yosë nanamën anitotarinquëma'. Quisoso naporinso' sha'huichinquëma', nitotoco'. Inaso' Nasaritoquë ya'huërin. Nani ma'sha nanitaparin. Piyapi a'naroáchin anoyatërin. Co ina pochin ni'chinëhuahuë'. Yosëri catahuarin ni'ton, naporin. Napoaton: ‘Tëhuëchachin Yosë quëran o'marin,’ topi. Canpitanta' nicatora', nitotërama'. <sup>23</sup> Napoaponahuë', canpitari atëpatërama'. Masahuatoma', nisha piyapi'sa' quëtonama' corosëquë tëpacaiso marë'. Co Yosë natëpihuë' ni'ton, tëpapi. Iráca chachin Yosëri yonquirin hui'nin chiminacaso'. Ina nohuanton, oshanënpoa marë' chiminin. Co nohuantërinhuë' naporini, co macacamaso' nanichitomahuë'. Canpitari atëpatopiramahuë', <sup>24</sup> Yosëri ananpitaantarin. Chimirin quëran nicha'ërin. Co chimirini minsërinhuë'. <sup>25</sup> Ina yonquiaton, Tapi iráca tapon:

‘Nani tahuëri Siniro ca'tanarinco. Inchinanëhuë quëran ya'huërarín achinicancaincoso marë'. Catahuarinco ni'ton, co pa'yanahuë'.

<sup>26</sup> Napoaton noya cancantërahuë. Ma noyacha Tata Yosëso paya, tënahüë.

Co naniantarincohuë', ta'to, co chimina'huaso' të'huatërahuë'.

<sup>27</sup> Yosë yonquiato, nontarahuë. Hua'yanëhuë, Siniro, co chimipiro'sa ya'huërinquë të'yataranhuë'.

Quëmasáchin natëranquën ni'ton, co nohuantaranhuë' nonëhuë chanatacaso'.



<sup>28</sup> Quëma iranën a'notëranco. A'chintëranco quëma nohuitatënquën nóya nanpica'huaso'. Nani tahuëri ca'tananco ni'ton, nóya cancantarahuë', ténin Tapi, iráca ninshitaton.

<sup>29</sup> Ni'cochi iyaro'sa'. Tata masho Tapi nani chiminin. Iráca nani pa'pitopi. Pa'pitopiso' ipora huanta' ya'huërarin. <sup>30</sup> Co'huara chimiyantërasohuë', Yosëri itërin: 'A'na tahuëri quëma shiparinguën acoarahuë hua'anëntacaso marë'. Quëma ya'huërenamën hua'anëntarin. Caso' Yosëco ni'to, co nonpintaranquënhuë', itërin. Napoaton shia'huain ninoton, ninshitërin. <sup>31</sup> Cristo nanpiantacaso' ninorin. 'Co chimipiro'sa ya'huërinquë patarancohuë'. Co nonëhuë chanatarinhuë', ténin iráca ninoton. <sup>32</sup> Iporaso' Quisoso chachin Yosëri ananpitaantaran. Quiyari ni'nai. <sup>33</sup> Ina quëran Yosëri inápaquë quëpantarin. Chiníquën nanantërin ni'ton, inchinanën quëran ahuënsërin. Inapotahuaton, sha'huitërin: 'Ispirito Santo a'pamaquë' piyapi'sa' ya'coancanchin. I'hua sha'huitëranquënso', itërin. Ina quëran Quisosori Ispirito Santo a'paimarin, ya'coancantërincoi, ni'nama'. Napoaton nisha nisha nananquë nonai, natanama'. <sup>34</sup> Tapi co nanpiantaton, inápaquë pantarinhuë', nitotërëhua'. Napoaponahuë', ninshitaton, tapon:

'Yosëri Sinioronëhuë sha'huitërin:  
"Inchinanëhuë quëran huënsëquë'

<sup>35</sup> inimiconënpita cari minsëchinquën," itërin Yosëri, ténin.

<sup>36</sup> Yosë hui'nin chachin iyaro'sa', corosëquë apatanantërama'. Inapotopiramahuë', Yosëri noya noya ni'nin. 'Inaso' Cristo, a'paimarahuëso'. Sinioro ni'ton, natëcaso' ya'huërin, ténin. No'tëquën iyaro'sa' nani sha'huitëranquëma'," itërin.

<sup>37</sup> Piyapi'sa' natanahuatona', na'con sëtopi.

—Co noyahuë' ninai. ¿Ma'ta' iyaro'sa', onpo'iiso'? itopi ca'tano'sa'.

<sup>38</sup> Napotohuachinara, Pitrori itaantaran:

—Ya'ipi co noyahuë' yonquiramasopita naniantatoma', Yosë chachin tahuërëtantaco'. "Quisocristo imarahuë," ta'toma', aporihuanco'. Ina imapatama', Yosë oshanëma' inquitaringuëma'. Ina quëran Ispirito Santo aya'coancantaringuëma' canpitanta'.

<sup>39</sup> Yosë nohuanton, Ispirito Santo a'patimarinpoa'. Canpitanta' ya'coancantaringuëma'. Hui'namapitanta' ya'coancantarin. A'naquëonta' aquë ya'huëpirinahuë', Yosë nohuanton, imasapi. Imapachina', Ispirito Santori ya'coancantarin inahuanta', itërin.

<sup>40</sup> Itahuaton, na'con pënënin.

—Ipora ya'huëpisopita co manta' Yosë yanatëpihuë'. Ina marë no'tëquën ana'intarin. Canpitaso nipirinhüë' ama inapita pochin cancantocosohuë'. Yosë nontoco' anoyacancanchinquëma'. Ina quëran cha'ësarama', itërin.

<sup>41</sup> Napotohuachina, na'a natëtopi. Naporahuatona', i'quë aporihuanpi. Naporo' tahuëri cara huaranca pochin piyapi'sa' ya'conpi. Quisoso imasapi. <sup>42</sup> Ca'tano'sa a'chinpachinara, pa'yatopi natanacaiso'. Noya natanatona', natëpi. Noya nini'tona', ya'huërapí. Quisoso chimininso' yonquiatona', coshatapatapi. Naporahuatona', apira apira Yosë nontapi.

### *Quisoso imatona', noya ya'huëpiso'*

<sup>43</sup> Siniorori catahuahuachina, ca'tano'sa' nani ma'sha nanitapapi. Na'a piyapi'sa' a'naroáchin anoyatopi. Ya'ipi piyapi'sari nicatona', pa'yanpi. "Tëhuëenchachin Yosëri catahuarin," topi. <sup>44</sup> Ya'ipi Quisoso imapisopita noya nini'tona' ya'huërapí. A'na huëntoíchin pochin nipi. A'naya a'naya ma'sha pahuantohuachinara, nicatahuapi. Co niapiratopihuë'. <sup>45</sup> A'naquënso' ma'shanënapita pa'anahuatona', coriqui ma'patopi. Ina quëran a'napita pahuantohuachinara, quëtopi. <sup>46</sup> Nani tahuëri Yosë chinotopiso pëiquë niyontopi. Quisoso chimininso' yonquiatona', a'na pëiquë a'na pëiquë coshatapatapi. Co apiratonaraihuë', noya cancantapi. Nóya cancantatona', coshatapatapi. <sup>47</sup> "Ma noyacha Yosëso paya," tosapi. Ya'ipi piyapi'sari noya ni'pi. Nani tahuëriya a'napitanta' imasapi ni'ton, Yosëri anoyacancantërin. Ina nohuanton, inapitanta' ya'conpi.

## 3

*Apia anoyatërinso'*

<sup>1</sup> A'na tahuëri pi'i tëhuërënahuasos', Pitro pa'sarin Yosë chinotopiso pëiquë. Naporos' ora niyontonatona', Yosë nontopi. Coansharë' pa'sapirinhüë'. <sup>2</sup> Inaquë a'na quëmapi quënanconpi. Nasitërin quëran huarë' co nanitërinhuë' iratacaso'. Nani tahuëri Yosë chinotopiso pëiquë quëpapi. A'na ya'coanaquë acopi, "Noyápiachin," itopiquë. Inaquë acopi coriqui ma'patacaso marë'. Piyapi'sa' Yosë chinotopiso pëiquë ya'compachinara, coriqui ma'patërin. <sup>3</sup> Pitro, Coansha, inapita ya'conasoi', apiari quënanin. Quënanahuaton, coriqui quëtacaiso' nohuantopirinhüë'. <sup>4</sup> Pitro, Coansha inapitari ni'sahuatona':

—Ni'coi iyasha, itërin Pitrori.

<sup>5</sup> "Coriqui quëtarinco," ta'ton, në'pëtarin. <sup>6</sup> Pitroriso nipirinhüë':

—Co coriqui ya'huëtopirincohüë', nanitato, anoyataranquën. Quisocriso Nasaritoquë ya'huërinso' nanan quëtërinco ni'ton, anoyataranquën. Ina nohuanton, noyataran. Huanirahuaton, noya iratëquë', itërin.

<sup>7</sup> Inchinan imira quëran masahuaton, ahuanirin. A'naroáchin ca'yopirain nantëre chachin chinirin. <sup>8</sup> Ina quëran pashitiquintarahuatón, huanirin. Iratarin. Pitro, Coansha, inapita Yosë chinotopiso pëiquë ya'compachinara, inapitarë chachin apianta' ya'conin. Noya irataton, niirárin. "Ma noyacha Yosëso paya," tosárin. <sup>9</sup> Inapohuachina, ya'ipi piyapi'sari ni'pi. "Ma noyacha Tata Yosë catahuarinco paya," ta'ton, iratárin. <sup>10</sup> Ni'sahuatona', piyapi'sari nohuitopi ni'ton, pa'yanpi. "Isoso' quëmapi, Yosë chinotopiso pëi' ya'coananëquë huënsërahuatón, coriqui ma'pachantërinso'. ¿Onporahuatoncha noya iratërin nicaya?" nitopi.

*Yosë chinotopiso pëiquë Pitro pënëntërinso'*

<sup>11</sup> Apia anoyatërinso': "Ama patocosohüë'," ta'ton, Pitro, Coansha inapita co a'porinhüë'. Cara chachin "Saromon ishpananën," itopiquë pa'pachinara, notohuaro' piyapi'sa' manorahuatona', inaquë niyontonpi. "Ma noyacha ni'ton, apia a'naroáchin anoyatërin paya," ta'tona', pa'yanpi. <sup>12</sup> Inapita ni'sahuaton, Pitrori itapon: "¿Onpoatonta' iyaro'sa' iso quëmapi nicatoma', pa'yanama'? ¿Onpoatonta' quiyanta' ni'saramacoi? Co quiyaora nanitaparaihuë' anoyata'huaiso'. Co quiyaso' noya noyacoihuë'. Yosë nohuanton noyataton, iratarin. <sup>13</sup> Iráca shimashonënpoapita Apraan, Isaco, Cacopo, inapita Yosë chinotopi. Ina Yosëri chachin Quisoso noya noya acorin. Nicha'ëinpoaso marë' a'paimapirinhüë', canpitari masahuatoma', hua'ano'saquë yo'conama'. Piratori yaocoipirinhüë', co canpita nohuantëramahuë'. <sup>14</sup> Quisososo' noyasáchin ninin. Co pi'pisha tëranta' oshahuanpirinhüë', co nohuantëramahuë'. '¿Inta' ocoichinquëma'?' itohuachinquëmara, tëpatona'pi huayonama'. <sup>15</sup> Quisoso mini ananpirinpoaso nipirinhüë', atëpatërama'. Tëpapurinahuë', Yosëri ananpitaantarín. Quiyaso' ni'nai. <sup>16</sup> 'Quisoso catahuarincoi,' ta'toi, iso apia nohuitëramaso' anoyatërai. Inanta': 'Inaso', catahuarinco mini,' ta'ton, noya pa'sarin ni'nama' canpitanta'.

<sup>17</sup> Quisoso Yosë quëran o'mapirinhüë', co nitotëramahuë'. Napoaton, iyaro'sa', atëpatërama'. Hua'ano'sanëmanta' co nitotopihuë'. <sup>18</sup> Iráca pënëntona'piro'sa' ninotona', ninshitopi. 'A'na tahuëri Cristo parisitapon,' topi. Yosë nohuanton, ninopi. Ninopiso pochachin parisitërin. <sup>19</sup> Napoaton iyaro'sa' ya'ipi co noyahuë' yonquiramasopita naniantatoma', Yosë chachin tahuërëtantaco' oshanëma' inquichinquëma'. <sup>20</sup> Quisocriso imapatama', anoyacancantarinquëma' ni'ton, sano cancantarama'. A'na tahuërinta' ina chachin a'patimantarinquëma'. Canpita marë' nani Yosëri acorin. <sup>21</sup> Iráca quëran huarë' Yosë nohuanton, noya pënëntona'piro'sa' ninopi. 'A'na tahuëri Yosëri ya'ipiya anoyatarin,' topi. Anoyataquë huarë' inápaquë Quisoso ya'huantarín. <sup>22</sup> Iráca Moisésëri ninoton, shimashonënpoapita sha'huitërin: 'A'na tahuëri Yosë nohuanton, a'na pënëntona'pi

ya'huapon, ca pochin nininso'. Inaso' Israiro quëmapi. Pënënpachinquëma', ya'ipi natëco'.<sup>23</sup> Insosona co natëhuachinhuë', ya'huërama quëran ocoimiatamaso ya'huërin,' tënin.

<sup>24</sup> Ya'ipi pënëntona'piro'sa' iso tahuëri'sa' ninopi. Samoiro quëran huarë' napopi. <sup>25</sup> Yosë nohuanton, ninshitërinënuëma', nitotërama'. Yosë chachin naporinso' natanama'. Shimashonënpita nontohuachina, yonquirinquëma' canpitanta'. Iráca Apraan itërin: 'Caora nohuanto, catahuanquën. Quëma shiparinpita quëran ya'ipi piyapi'sa' noya cancantapi,' itërin Yosëri. <sup>26</sup> Canpita'ton yonquiatënuëma', hui'nin ananpitaantarahuatón, a'parin catahuainquëmaso marë'. Ina catahuahuachinquëma', co noyahuë' ninamasopita naniantarama'. Ina quëran nóya cancantarama'. Ina marë' Quisoso a'paimarin," itërin.

## 4

### *Pitro, Coansha, inapita mapiso'*

<sup>1</sup> Pitrori a'chintohuachina, na'a piyapi'sa' natanapi. Coansharinta' pënënin. Pënëntasoi', corto hua'ano'sa' canquipi. Ponisiaro'sa' hua'anën, satororo'sa', inapitanta' canquipi. <sup>2</sup> Piyapi'sa' a'chintopiso marë' no'huipi. "Quisoso nanopiantarin ni'ton, nanopiantacaso' ya'huërin," topiso marë' no'huipi. <sup>3</sup> Napoaton cato chachin mapi. I'huaraya ni'ton, tashinan pëiquë po'mopi. "Tashiraya natahuan'," ta'tona', napotopi. Naporo' tashi' inaquë tahuërianpitopi. <sup>4</sup> Na'a piyapi'saso nipirinhuë' nanamën natanahuatona', natëpi. Nani a'natërápo huaranca pochin quëmapi'sa' Quisoso imasapi.

<sup>5</sup> Tahuëririnquë ya'ipi cotio hua'ano'sa' niyontonpi. Corto hua'ano'sa', ansiano'sa', maestro'sa', inapita huë'pi. Quirosarinquë chachin niyontonpi. <sup>6</sup> Nisha nisha corto hua'ano'sa' huë'pi. Anasë chini chiníquën nanantërinso', Caihuasë, Coansha, Aricantro, inapita huë'pi. Corto hua'ano'sa' quëmopinënpitarë chachin niyontonpi. <sup>7</sup> Pitro, Coansha, inapita maconahuatona', ahuanacanapipi natanacaiso marë'.

—¿Onporahuatomata' chiníquën nanantatoma', apia anoyatërama'? ¿Inta' nanan quëtërinquëma' anoyatacamaso'? itopi.

<sup>8</sup> Ispirito Santori noyá ya'coancantërin ni'ton, Pitrori itapon:

—Natanco hua'ano'sanquëma' ninamaso'. <sup>9</sup> Tëhuëchachin co quiyaora nanitërai huë' apia anoyata'huaiso'. "¿Onporahuatomata' anoyatërama'?" itëramacoi ni'ton, <sup>10</sup> no'tëquën sha'huitaranquëma', nitotoco'. Ya'ipi israiro'sa' nitochina'. Quisocriso Nasaritoquë ya'huërinso' nanan quëtërincoi anoyata'huaiso'. Ina catahuanincoi ni'ton, anoyatërai. Yosëri a'paimapirinhuë', canpitariso' corosëquë apatanantërama'. Tëpapiramahuë', Yosëri ananpitaantarin. Ina nohuanton iso quëmapi nani noyataton, isëquë huanirarin. <sup>11</sup> Ni'cochi. Yosë quiricanënuë naporin: "Pëi' nina'piro'sa' pëihuachina', a'na na'pira' quënanpirinahuë', co nohuantopihuë'. 'Nagoonin,' ta'tona', të'yatopirinahuë'. Hua'anëni maantarahuaton, 'Iso na'pi na'con na'con nohuantërahuë pëica'huaso marë', ta'ton, noya acoantarin," tënin. Quisocrisoso' ina na'pi pochin. Canpita co nohuantopiramahuë', Yosëri noya noya ni'nin. <sup>12</sup> Quisocrisoíchin anoyacancantërinpoa'. Co a'na nanitërinhuë' nicha'ëinpoaso'. Inaíchín nanitërin nicha'ëinpoaso', itërin Pitrori.

<sup>13</sup> Ina natanahuatona', cotio hua'ano'sa' ninontopi. "Isopitaso' topinan piyapi'sa'. Co maestro'sahuë'. Co na'con quirica nitotaponaraihuë', co të'huatërinënpohuë'. Ma'pitacha nitotopi paya. Quisoso ca'tanpi ni'ton, ina pochin cancantopi," nitopi. <sup>14</sup> Quëmapi nani noyatërinso' inaquë huanirarin ni'ton, co nanitopihuë' "Nonpinápi," ta'caiso'. <sup>15</sup> Pitro, Coansha, inapita aipiran a'parahuatona', inahua capini ninontapi.

<sup>16</sup> —¿Ma'ta' isopita onpotahua'? Apia nani anoyatopi. Ya'ipi Quirosarinquë ya'huëpisopita nitotopi. Nani ni'pi. Co nanitërehuahuë' "Nonpinápi," ta'caso'. <sup>17</sup> Nipirinhuë', ama aquëtë' piyapi'sari natëcaiso marëhuë' pënëanhuán'. "Ama huachi Quisoso nanamën sha'huicosohuë'," itahua', nitopi.

<sup>18</sup> Ina quëran amatantarahuatona', pënëmpi. “Ama aquëtë' a'chintantacosohuë'. Ama Quisoso nanamën sha'huitantacosohuë',” itopi. <sup>19-20</sup> Napotopirinahuë', Pitro Coansharë chachin co yanatëtopihuë'.

—Yosë natëtoi, co nanitëraihuë' canpita natëca'huainquëmaso'. Co quiyaso' nanitëraihuë' ta'tahuaiso'. Ni'naiso' sha'huirápoi. Natanaisonta' sha'huirápoi. “Co Yosë natëcaso' ya'huërinhuë',” ¿tënema' ti? itopi.

<sup>21-22</sup> “Co natëhuatamacoihuë', ana'intarainquëma',” itahuatona', a'papi. Apia anoyatërinso' nani catapini shonca na'con pi'ipitërin ni'ton, ya'ipi piyapi'sari pa'yatopi. “Yosëichin nanitërin anoyatacaso'. Ma noyacha Yosëso paya,” topi ya'ipi piyapi'sa'. Napoaton hua'ano'sari co nanitopihuë' ana'intacaiso'.

### *Yosë nontopiso'*

<sup>23</sup> Nani Pitro, Coansha, inapita a'pahuachinara, imapisopitataquë paantarahuatona', sha'huiconpi. “Corto hua'ano'sa', ansiano'sa', inapita chiniquën pënëninacoi ama a'china'huaiso marëhuë',” itopi. <sup>24</sup> Napotihuachinara, napopianachin yonquiatona', Yosë nontopi: “Quëmasáchin Siniro chini chiniquën nanantëran. Isoro'pa', inápaquë ya'huërinso'pita, iiro'sa', ya'ipi ma'sharo'sa', inapita acoran. <sup>25</sup> Quëma nohuanton, iráca Tata masho Tapi ninshitërin. Inaso' noya natërinquënso'. Ispirito Santori ayonquirin ni'ton, no'tëquën ninshitaton, itapon:

‘Inpio naciono'saquë ya'huëpisopita, co no'tëquën yonquipihuë'.

Siniro co quë'yatonaraihuë' pinosapi:

“Huëco canpoari minsëahua',”

ta'tona', ma'sha onpotacaiso' yonquirapi.

<sup>26</sup> Copirno' sa', hua'ano'sa', inapita niyontonpi.

Siniro ahuëcaiso marë' nisha'huitapi.

Copirno huayoninso chachin Cristoso nipirinhüë', co nohuantopihuë', tënin Tapi iráca ninshitaton.

<sup>27</sup> Iso ninanoquë chachin Siniro, piyapi'sa' yonquipi hui'nán tēpacaiso marë'. Inaso' nóya nipirinhüë', tēpapi. Quëmari acoranso nipirinhüë', co quë'yapihuë'. Irotisë, Ponsio Pirato, nisha piyapiro'sa', isairio'sa', inapitari Quisoso no'huipi. <sup>28</sup> Quëmaso nipirinhüë' chini chiniquën nanantëran. Co nohuantëranhuë' naporini, co nanitapaitonahuë'. Iráca quëran huarë' yonquiran ina chiminacaso' ni'ton, aparisitopi. <sup>29</sup> Iporaso' Siniro, quiyanta' no'huirinacoiso', nitotëran. Quëmasáchin yanatërainquën ni'ton, catahuacoi chiniquën cancantatoi, quëma nanamën sha'huüi. <sup>30</sup> Cania'piro'santa' quëmari anoyatëquë'. ‘Yosë hui'nin chachin nanan quëtërincoi,’ topatoi, catahuacoi piyapi'sa' noyachina'. Ina ni'pachina', yonquiapi huachi,” itopi Yosë nontatona'.

<sup>31</sup> Nani Yosë nontohuachinara, ina nohuanton, pëi' nacon nacontarin. Ispirito Santori ya'ipiya noyá ya'coancantërin. Chiniquën cancantatona', Yosë nanamën sha'huirapi.

### *Imapisopita capini ninosoropiso'*

<sup>32</sup> Ya'ipi Quisoso natëpisopita noya nini'tona', ya'huëpi. Napopianachin yonquipi. A'naya a'naya pahuantohuachinara, niquëtopi. Co manta' niapiratopihuë'. <sup>33</sup> Ca'tano'sa' na'con sha'huirapi. “Siniro Quisoso nantantarin. Nani ni'nai,” topachinara, na'a piyapi'sa' noya natanpi. Yosëri ya'ipiya catahuarin. <sup>34</sup> Napohuachina, co a'naya tēranta' ma'sha pahuantërinhuë'. A'naya a'naya no'panën, pëinën, ma'shanën, inapita ya'huëtōhuachinara, pa'anpi. <sup>35</sup> Pa'anahuatona', coriqui canapiso' ca'tano'sa' quëtōpi piyapi'sa' quëtacaiso marë'. A'naya a'naya pahuantohuachinara, quëtōpi. <sup>36</sup> Naporo' a'na quëmapi ya'huërin. Cosi itopiso'. Ca'tano'sari nisha nininën acotopi. Pirnapi itopi. Pirnapiso': “Achincancantona'pi,” tapon naporin. Inaso' Nihui huënton quëmapi, Chipriquë hua'huatërinso'. <sup>37</sup> Inanta' no'panën pa'anin. Pa'anahuaton, ya'ipi coriqui canarinso' ca'tano'sa' quëtërin pahuantërinso'pita quëtacaiso marë'.

## 5

*Ananiasë sa'inë chachin nonpininso'*

<sup>1</sup> A'na quëmapi Ananiasë itopisoso' nipirinhuë' yanonpinin. Sa'inso' Sahuira itopi. Inahuaso' no'panëna pa'anpirinahuë', co nohuantopihuë' ya'ipi canapiso' yocacaiso'. <sup>2</sup> Napoaton ninontopi. "Coriqui yo'conpatë', onposona canarëso' ama sha'huitasohuë'. Ya'ipimiáchin quëtërëso pochin quëta noya ni'inënpo'," itërin sa'in. "Inta nipachin inapota," topachina, patoma coriqui canarinso' po'orahuaton, taparin. Napopinchin ca'tano'sa' quëtontarin. <sup>3</sup> Co Pitroso' sha'huitopirinhuë', Yosë nohuanton, nitotërin. Nitotaton, Ananiasë itërin:

—¿Onpoatonta iyasha Sopai natëran? Ispirito Santo yanonpintaton patoma coriqui canaranso' quëmaora marë' taparan. <sup>4</sup> Co'huara pa'ayantëraponhuë', no'paso' quëmaquën. Quëmaora nohuanton pa'anan. Ina quëran nani pa'anpatana coriqui canaransonta', quëmaquën. Co nohuantohuatanhuë', co ya'ipi quëtacaso' ya'huë'itonhuë'. "Ya'ipimiáchin coriqui Yosë quëtarahuë'," tëcaton nonpinan. Co iyasha, napo'itonhuë'. Co piyapiáchin nonpintëranhuë'. Yosënta' yanonpintopiranhuë', co inaso' nanitëranhuë' nonpintamaso', itërin.

<sup>5</sup> Ananiasë natanahuaton, a'naroáchin no'paquë anotaton, chiminin. Piyapi'sari ni'pachinara, pa'yanpi. A'napitanta' natantahuatona', pa'pi të'huatopi. <sup>6</sup> Ina quëran hui'napi'sari nonënso' so'pinahuatona', quëpapi pa'pitacaiso marë'.

<sup>7</sup> Cara ora quëran pochin, sa'ionta' huë'nin. So'in chimininso' co nitochátërarinhuë'. <sup>8</sup> Huë'pachina, Pitrori itapon:

—Pi'pian imoya yanatananquën. Achin so'yan isonapo' coriqui quëtërincoi. ¿Isonápo marë' no'panëma' pa'anama' ti? itërin.

—Inanapo marë' mini pa'anai, tënin sanapi.

<sup>9</sup> —¿Onpoatonta' imoya canpita capini ninontatoma', Ispirito Santo yanonpintopiramahuë'? "Co ina ana'intarinpohuë'," ta'toma', napopiramahuë'. Ni'quë'. Quëmapi'sa' so'yan pa'pitopisopita nani huënantarapi. Quëma' ya'huë'rë quëpantarinënquën pa'pitiñenquënso marë', itërin Pitrori.

<sup>10</sup> Itohuachina, a'naroáchin chiminaton, inaquë chachin anotërin anta'. Hui'napi'sa' huëantarahuatona', chimipi quënanquinantapi. Inanta' quëpantarahuatona', so'in pirayan pa'pitopi. <sup>11</sup> Ya'ipi Quisoso huëntonënquë ya'conpisopita të'huatopi. A'napitanta' natanahuatona', "Ana'intoahuachinpoa' canpoanta'," ta'tona' pa'pi të'huatopi.

*Cania'piro'sa' a'naroáchin anoyatopiso'*

<sup>12</sup> Naporo' tahuëri'sa' Yosë nohuanton, ca'tano'sa' nani ma'sha nanitapapi. Na'a cania'piro'sa' së'huarahuatona', a'naroáchin anoyatopi. Piyapi'sari ni'pachinara, "Tëhuëenchachin Yosëri catahuarin," topi. Ya'ipi imapisopita "Saromon ishpananën," itopiquë niyontonapi. <sup>13</sup> Imapisopitaráchin inaquë niyontonpi. A'napitaso': "Ana'intoahuachinpoa'," ta'tona', co inaquë niyontonpihuë'. Napoaponahuë', "Inapitaso' nóya piyapi'sa'," topi ya'ipiya. <sup>14</sup> Naporahuaton, na'con na'con piyapi'sari Quisoso natëtona', imasapi anta'. Na'a quëmapi'sa' sanapi'sarë chachin ya'conachinpi. <sup>15</sup> "Quisosori catahuarin ni'ton, ca'tano'sa' nani ma'sha nanitapapi," ta'tona', na'a cania'piro'sa' quëntarahuatona', cachiquë acoonpi anoyatacaiso marë'. A'naquën nantëtë'rë chachin acoonpi. A'naquëonta' sahuanasaquë tëranta' aquëhuënpi. "Pitro pa'pachin, hua'yanën tëranta' tashinantohuachin, noyatapon nimara," ta'tona', quëntapi. <sup>16</sup> Ya'cariya ninanoro'sa' quëraonta' huë'pi. Quirosarinquë huë'sahuatona', cania'piro'sa' quëpi. Sopairi ahua'yantërinso'pitanta' quësapi. Yosë nohuanton, ya'ipiya anoyatopi.

*Cotio hua'ano'sari aparisitopiso'*



<sup>17</sup> Napohuachina, corto hua'an chini chiníquën nanantërinso' no'huitërin huachi. "Na'con na'con piyapi'sa' Quisoso imasapi," ta'ton, apiratërin. Satosioro'santa' no'huitopi. <sup>18</sup> Napoaton ca'tano'sa' masahuatona', tashinan pëiquë po'mopirinahuë'. <sup>19</sup> Yono tashi' Sinioro anquëninën huë'sahuaton, ya'coana i'soatiirin. Ca'tano'sa' aipiran quëparahuaton, sha'huitërin: <sup>20</sup> "Yosë chinotopiso peiquë paco'. Inaquë pa'sahuatoma', piyapi'sa' a'chintoco' nasha pochin nanpicaíso marë'," itërin anquëniri. <sup>21</sup> Ina natanahuatona', tashiramiachin Yosë chinotopiso pëiquë pa'pi. Piyapi'sa' huë'pachinara, a'chintapi.

Corto hua'an chini chiníquën nanantërinso', satosioro'sa', inapitaso' co nitotatonahuë', niyontonahuatona', ya'ipi hua'ano'sa', Israiro ansiano'sa', inapita amatopi. Huë'pachinara, ponisia a'papi inapita maconacaiso marë'. <sup>22</sup> Ponisiaro'saso' tashinan pëiquë pa'pirinahuë', co insonta' quënanpihuë'. Huë'antarahuatona', sha'huitiipi.

<sup>23</sup> —Tashinan pëi' noya niahuitopinan quënanconai. Ya'coanaquë ponisiaro'sa' a'pairápirinahuë'. I'soapiraihuë', capa piyapi huachi, itiipi.

<sup>24</sup> Natanahuatona', ponisiaro'sa' hua'anën, corto hua'ano'sa' chini chiníquën nanantopisopita, inapita pa'yanpi. Pa'yanahuatona', ninontopi. "¿Intoacha pacaiya? ¿Ma'ta' onpoapona napoapi?" nitopi. <sup>25</sup> Naporo' a'na quëmapiri huë'sahuaton, sha'huitiirin.

—Quëmapi'sa' tashinan pëiquë po'moramaso', Yosë chinotopiso pëiquë piyapi'sa' a'chintapi, itërin.

<sup>26</sup> Ina quëran ponisiaro'saso' hua'anënarë chachin pa'sahuatona', macoantapi. Piyapi'sa' të'huatona', co ahuëpihuë'. "Na'piquë të'yarahuachinënpoa'," ta'tona', oshaquëran mapi. <sup>27</sup> Hua'ano'sa' niyontopiquë quëpapi. Inaquë quëpahuachinara, hua'an chini chiníquën nanantërinso' itapon:

<sup>28</sup> —Nani pënënatënuëma': "Ama huachi Quisoso nanamën a'chincosohuë'," itopiranquëmahuë', aquë aquëtë' a'chinarama'. Ya'ipi Quirosarinquë ya'huëpisopita natanapi. Inapoatoma', Quisoso chiminso marë' na'intaramacoi, itërin.

<sup>29</sup> —Pënëpiramacoihuë', Yosë na'con na'con natëcaso' ya'huërin. Napoaton co nanitëraihuë' natëca'huainquëmaso'. <sup>30</sup> Tëhuëchachin corosëquë patanantatoma', Quisoso tëpapirama'huë', shimashonënpoapita chinotërinso Yosëri chachin ananpitaantarin. <sup>31</sup> Inapotahuaton, inchinanën quëran acorin. Inaso' hua'anënpoa' ni'ton, natëcaso ya'huërin. Nóya nicon ya'ipi israiro'sanpoa' nicha'ëinpoaso marë' acorin. Co noyahuë' yonquirëhuasopita naniantohuatëhua', oshanënpoa' inquitarinpoa'. <sup>32</sup> Ina nitotatoi sha'huirárai. Ispirito Santorinta' inachachin anitotarin. Yosë natëhuatëhua', Ispirito Santo aya'coancantarinpoa', itërin Pitrori.

<sup>33</sup> Cotio hua'ano'sari natanahuatona', chiníquën no'huiantarahuatona', yatëpapirinahuë'. <sup>34</sup> A'na hua'an ya'huërin. Inaso' cotio maistro. Camariro itopi. Parisio quëmapi niponahuë': "Noya quëmapi inaso'," topi ya'ipi piyapi'sa'. Inaso' huanirahuaton, itërin:

—Isopita aipiran ocoico' pi'pian nonchinquëma'. Apira huënanta'ina', itërin. <sup>35</sup> Nani ocoihuachinara, pënënin.

—Ni'cona iyaro'sa' tëhuëtama'. Co isopita tëpacaso' ya'huërinhuë', ténahuë. <sup>36</sup> Ni'cochi. Iráca Tiotasë ya'huërin. "Ca hua'an ya'coanahuë," topachina, catapini pasa pochin quëmapi'sari imapi. Imasapirinahuë', tëpahuachinara, ya'ipi imapisopita yanquëëpi huachi. <sup>37</sup> Ina piquëran copirno sha'huitërinpoa' nininënpoa' niacotacaso'. Naporo' a'nanta' ya'huërin, Cotasë Caririaquë ya'huërinso'. Na'con miáchin piyapi'sari imasapirinahuë', inanta' tëpahuachinara, imapisopita yanquëëpi. <sup>38</sup> Napoaton ama isopita tëpacosohuë'. Tananpitoco', ténahuë. Inahuara yonquinëna quëran a'chinahuachinaso', oshaquëran imapisopita pipimiatapi. <sup>39</sup> Nipirinhuë', Yosëri catahuahuachin, co canpitari acopitaramahuë'. Ni'cona Yosë chachin inimicototama', itërin.

Itohuachina, hua'ano'sari natëtona', co tëpapihuë'. <sup>40</sup> Ca'tano'sa' naquëranchin amantarahuatona', chiniquën huihuipi. “Ama huachi insonta' Quisoso nanamën sha'huitocosohuë',” itahuatona', a'papi huachi. <sup>41</sup> A'pahuachinara, pipipi. “Yosë noya ni'nincoi ni'toi, Quisoso marë' parisitërai,” ta'tona', capa cancantopi. Co manta' sëttopihuë'. <sup>42</sup> Nani tahuëriya Yosë chinotopiso pëiquë a'chinapi. Co ta'topihuë'. Pëiro'saquënta' Quisoso nanamën sha'huirapiapi. “Inaso' Cristo, Yosëri a'paimarinso',” tosápi.

## 6

### *Canchisë quëmapi'sa' catahuacaiso marë' acopiso'*

<sup>1</sup> Naporo' tahuëri'sa' Quisoso imapisopita na'asapi. Notohuaro' ya'huëpi huachi. A'naquën cotio nananquë nonpi. A'naquënso nipirinhüë' cotioro'sa' niponaraihuë', Crico nananquë nonpi. Inapitaso' co noyahuë' cancantatona', taponá: “Nani tahuëriya quëyoro'no'sa' huë'pachinara, a'naya a'naya cosharo' ma'patopirinahuë', co napopi-anachin quëttopihuë', apiratërinacoi. Crico quëyoro'no'sa' pahuantopi,” topi. <sup>2</sup> Ina natanahuatona', ca'tano'sari ya'ipi Quisoso imapisopita ayontonpi. Niyontonpachinara, itopi:

—Natancoi iyaro'sa' pi'pian sha'huichinquëma'. Yosë nanamën a'china'huaiso marë' Quisocristo acorincoi. Inaso nipirinhüë', nani tahuëri cosharo' yo'sápatoi, co nanitëraihuë' Yosë nanamën a'china'huaiso'. Co a'chinpatoihuë', co noyahuë' nisarai, tënai. <sup>3</sup> Napoaton iyaro'sa', canchisë ya'pi huayonco' catahua'inacoiso marë'. Ispirito Santori noyá ya'coancantërinso' huayonco', noya yonquipiso'. Noya quëmapisáchin acoa'ahua' cosharo' yocacaiso marë'. <sup>4</sup> Quiyaso nipirinhüë' Yosë nonta'huaiso', nanamën a'china'huaiso', inasáchin yonquiarai, itopi ca'tano'sari.

<sup>5</sup> Natanahuatona':

—Noyapa'. Pa'ahua acoa'ahua', topi ya'ipiya. Ina quëran Istipan huayonpi. Inaso' Yosë nóya natërin. Ispirito Santori noyá ya'coancantërin. Pinipi, Porocoro, Nicanoro, Timon, Parminasë, Niconasë, inapitanta' huayonpi. Niconasëso' Antioquiaquë hua'huatërin. Co cotio quëmapihuë' niponahuë', cotioro'sa' pochin Yosë chinotërin. Iporaso' Quisoso imasarin anta'. Inanapo huayonpi. <sup>6</sup> Inapita huayonahuatona', ca'tano'saquë quëpi. Yosë nontahuatona', së'huamotopi acocaiso marë'. Inapotatona', acopi huachi.

<sup>7</sup> Ina quëran ca'tano'sa' nani tahuëri pënëntapi. Yosë nanamën a'chinapi. Aquë aquëtë' nahuinin. Quirosarinquë na'con na'con piyapi'sa' imasapi. Na'a corto hua'ano'santa' Quisoso nanamën natëpi.

### *Istipan mapiso'*

<sup>8</sup> “Istipanso' nóya pënëntërin,” topi ya'ipiya. Ispirito Santori catahuarin ni'ton, sacai' nininso' nanitaparín. Cania'pi marë' Yosë nontohuachina, a'naroáchin noy-atopi. Napoaton: “Tëhuëchachin Yosëri catahuarin,” topi. <sup>9</sup> A'naquën cotioro'saso nipirinhüë', nisha niyontonpiso pëi quëran huëcatona', Istipan no'huipi. “Patron quëran pipipisopita,” itopiso quëran huë'pi. Inapitaso' Sirini quëran, Aricantëria quëran, Sirisia parti quëran, Asia parti, inaquëranpita huëcatona', Quirosarinquë ya'huëpi. Inapitaso' Istipan no'huipi. Hua'qui' chiniquën ninontopi. <sup>10</sup> Istipanso nipirinhüë', Ispirito Santori catahuarin ni'ton, no'të no'tëquën nonin. Co nanitopihuë' a'panicaiso'. <sup>11</sup> Napoaton po'oana quëran quëmapi'sa' pahuërëpi sha'huirapicaiso marë'. Inapotohuachinara, sha'huirapipi:

—Iso quëmapiso', co noyahuë'. Moisésë pinorin. Yosënta' pinorin natanai, tosápi. <sup>12</sup> Ina pochin nonatona', na'a piyapi'sa' ano'huítopi. Cotio ansiano'sa', cotio maistro'sa', inapitanta' ano'huítopi. Co huachi Istipan noya ni'pihuë'. Napoaton maconpi. Maconahuatona', quëpapi cotio hua'ano'sari natanacaiso marë'. <sup>13</sup> Nani niyontonpachinara, naquëranchin sha'huirapiantapi. Nonpinatona', co no'tëquën sha'huirapihuë'.

—Yosë chinotopiso pëi' noya nipirinhüë', nonapirarin. “Moisësë iráca pënëntërinsona' co natëcaso' ya'huërinhuë',” toconin. <sup>14</sup> Quisoso Nasaritoquë ya'huërinso' imaton, naporinso' a'chinarin. “A'na tahuëri Quisosori Yosë chinotopiso pëi' ata'huantarin. Moisësë pënëninpoasonta' ananiantatonpoa', nisha a'chintarinpoa',” toconin Istipan natanai, topi sha'huirapitona'.

<sup>15</sup> Ina quëran hua'ano'sari Istipan ni'sapi. Ni'sapirinhüë', ya'pirin anquëni pochin huënaráchin ni'tërin.

## 7

### *Istipan sha'huirinsó'*

<sup>1</sup> Ina quëran Corto hua'an chini chiníquën nanantërinsoari natanin.

—¿Tëhuëchachin naporan nonapon? itërin.

<sup>2</sup> —Co onporonta' api Yosë pinorahuë'. Natanco, apiro'sa'. Iyaro'sa' canpitanta' natanco no'tëquën sha'huichinquëma'. Iráca quëran huarë' shimashonënpoapita Yosë imapi. Canta' ina imarahuë. Tata Yosëso' noya noya. Iráca Tata Apraan nisha no'paquë ya'huaso', ya'notimarin. Co Aranquë pa'shátëraponhuë', nontërin. Misopotamia parti ya'huëpirinhüë', inaquë Yosëri itapon: <sup>3</sup> “Ya'huëran quëran pipimiatëquë'. Quëmopinënpitanta' patomiatëquë'. A'na parti paaton, inaquë ya'huëquë'. Carinquën a'notaranquën, inaquë ya'huëmiatëquë',” itërin Yosëri. <sup>4</sup> Natanahuaton, Apraan pipirin. Cartia parti quëran pipirahuaton, Aranquë pa'nin. Inaquë ya'huëantapirinhüë'. Ina quëran pa'pin chiminpachina, Yosë nohuanton, Canaan parti huë'nin. Ya'huërëhuaquë chachin huë'nin. <sup>5</sup> Huë'pirinhüë', Yosë nohuanton, co no'pa' ya'huëtërinhuë'. Co pi'pisha tëranta' hua'anëntërinhuë'. “A'na tahuëri Canaan parti ya'huëmiatarama'. Quëma shiparinpita na'asahuatona', ina no'pa' hua'anëntapi,” itërin Yosëri. Co hui'nahuayantërasohüë', napotërin. <sup>6</sup> Ina quëran Yosëri itantarin: “A'na tahuëri quëma shiparinpita nisha parti yacapatapona'. Inaquë nisha piyapi'sari chiníquën asacatapi. Co pahuërëaponaraihuë', asacatapi. Catapini pasa pi'ipi aparisitapi. <sup>7</sup> Nipirinhüë', nisha piyapi'sa' shiparinpita aparisitopiso' ana'intarahüë. Ina quëran shiparinpita pipirapi. Isëquë chachin huënantahuachina', chinotarinaco,” itërin Yosëri. <sup>8</sup> Ina quëran itantapon: “Caora nohuanto, catahuanquën. Hui'nanpita, ya'ipi shiparinpita, inapitanta' catahuanahuë. Napoaton marca niacotoco' imaramacoso' anitotacamaso marë',” itërin. Ina quëran Apraan hui'nin ya'huëtërin. Isaco itërin. Posa tahuëritohuachina, marca acotërin. Isaco mashotohuachina, hui'nin ya'huëtërin. Cacopo itopi. Ina quëran inanta' hui'ninpita ya'huëtantarin. Shonca cato' ya'huëtërin. Ya'ipiya marca niacotëra'piapi. Inapita quëran shonca cato' huënton cotioro'sa' ya'huërëhua'. Inapitaso' shimashonënpoa', tënëhua'.

<sup>9</sup> A'nara' Cosi itopi. Iinpitari apiratatona', no'huipi. Iina chachin nipirinhüë', co quë'yapihuë'. Napoaton nisharo'sa' ya'nohuachinara, pa'anpi asacatacaiso marë'. Nisha piyapi'sari Iquipito'pa' quëpapi. Yosëriso nipirinhüë' catahuanin. <sup>10</sup> Parisitopirinhüë', nicha'ërin. Ina nohuanton, Iquipito copirnorino noya ni'nin. “Cosi noya quëmapi. Noya yonquirin,” ta'ton, chiníquën nanan quëtërin. Ya'ipi copirno ma'shanënpita a'pairin. Ya'ipi Iquipito piyapi'sa' camairin.

<sup>11</sup> Naporo' Iquipito parti cosharo' co noya papotërinhuë'. Hua'qui' co manta' papotërinhuë' ni'ton, tanarotopi. Canaan partinta' capa cosharo'. Shimashonënpoa' co manta' ya'huëtopihuë' capacaiso'. Parisitápi. <sup>12</sup> “Iquipito parti trico ya'huërin,” topiso marë' Cacoposo' hui'ninpita a'parin cosharo' pa'anacaiso marë'. Iina chachin ma'paponaraihuë', nani mashotërin ni'ton, co nohuitopihuë'. Ina pa'anatona', ya'huëpi'pa' cosharo' quëpaantapi capacaiso marë'. Ina capatona', nanpipi. <sup>13</sup> Ina quëran pë'yahuachinara, pa'pini a'paantarin. Naporo' Cosiri sha'huitërin. “Caso' co nishacohüë'. Cosico. Iyaya, itoco,” itërin. Copirnonta' iinpita anohuitërin. <sup>14</sup> Ina

quëran Cosiri pa'pin amatërin. Ya'ipi quëmopinënpitanta' amatërin. Ya'ipi quëran canchisë shonca a'natërâpo piyapi ya'huërin. <sup>15</sup> “Huëquë', tata, isëquë ya'huëa'ahua',” itohuachina, Cacoponta' Iquipito'pa' pa'marin. Ya'ipiya pa'mapi. Inatohua' Cacopo chiminin. Ya'ipi shimashonënponta' inaquë ya'huërapi quëran chiminpi. <sup>16</sup> Cacopo chiminpachina, nonën isëquë chachin quënantapi pa'pitacaiso marë'. Siquimoquë pa'pitopi. Ina no'pa chachin iráca Apraani, amororo'sa' pa'antërin.

<sup>17</sup> Yosëri chachin nani iráca Apraan sha'huitërin Canaan parti hua'anëntacaso'. Nipirinhuë', shinpita co a'naroáchin panantapihuë'. Hua'qui' Iquipitoquë ya'huëpi. Inaquë na'api. Panantacaiso' tahuëri ya'caritohuachina, notohuaro' israro'sa' ya'huëpi. <sup>18</sup> Napoin quëran Iquipito parti nisha copirno ya'conin. Cosiso' iráca chiminin ni'ton, co nohuitërinhuë'. <sup>19</sup> Cosi naporinso' co nitotërinhuë' ni'ton, nonpintaton, israiro'sa' aparisitërin. Ahuihuitahuatón, chiníquën asacatërin. Naporahuatón: “Quëmapi'a'hua nasitohuachin, aipiran tē'yatoco' chimiin,” itërin. <sup>20</sup> Naporo', iyaro'sa', Moisésë nasitërin. Yosëri noya ni'nin. Pa'pin a'shinë chachin nosoropi ni'ton, cara yoqui po'orahuatona', pëinënquë acanopitopi. <sup>21</sup> Ina quëran aipiran acohuachina', Yosë nohuantón copirno hui'nini chachin manin aso'socaso marë'. Hua'huin pochin ni'nin. <sup>22</sup> Iquipito maistro'sari noya a'chintopi. Ya'ipi nitotopiso' a'chintopi. Napoaton noya noya nonin. Nani ma'sha nicacaso' nitotërin.

<sup>23</sup> Catapini shonca pi'ipitohuachina, a'napita israiro'sa' yonquiatón, pa'nin ni'tapon. <sup>24</sup> Inaquë a'na Israiro quëmapi quënanconin. Co manta' onpopirinhüë', Iquipito quëmapi ahuëaton, yatëpararin quënanconin. Quëmopinën nosoroaton, “cari i'huërëchi,” tënin. Ina quëran Iquipito quëmapi ahuëaton, tëparin. <sup>25</sup> “Israiro'saso' iyahuëpita. Yosë catahuarincó inapita nicha'ëca'huaso',” tënin Moisésë yonquinënquë. Inapitaso nipirinhüë' inari nicha'ëcaso' co yonquipihuë'. <sup>26</sup> Tahuërinquë cato' israiro'sa' capini niahuërapi, Moisésëri quënanconin. “¿Onpoatomata' canpita capini niahuëarama'? Nanan anoyatoco',” itërin. <sup>27</sup> Ahuëtona'piso nipirinhüë' co nohuantërinhuë' natëcaso'. “¿Inta' hua'an acorinquën? Co coisë pochin sha'huitancoiso' ya'huërinhuë'. <sup>28</sup> I'huara Iquipito quëmapi tëparan. ¿Inapochachin canta' yatëparanco ti?” itërin. <sup>29</sup> Ina natanahuaton, tē'huatërin. “Copirno natantohuachin, no'huiarincó,” ta'ton, pipimiatërin huachi. Matian parti yacapatërin. Inaquë sa'aton, cato' hui'nin ya'huëtërin.

<sup>30</sup> Catapini shonca pi'ipi Moisésë inaquë ya'huërin. Ina quëran a'na tahuëri inotëro' parti pa'nin. Sinai motopi ya'cariya ni'so', sarsa nara orotarincó quënanin. Inaquë chachin anquëniri ya'notimarin. <sup>31</sup> Ina ni'sahuaton, pa'yanin. “¿Ma'ta' inaso' nimara?” ta'ton, ya'cariconin. Naporo' Yosëri itapon: <sup>32</sup> “Caso' Yosëco. Quëma shimashonënpita chinotërinaco. Apraan, Isaco, Cacopo, inapita chinotërinaco,” itërin. Moisésë tē'huataton, ropa ropátarin. Monshorahuaton, co yani'ninhüë'. <sup>33</sup> Ina quëran Yosëri itantarín: “Sapatën ocoiquë'. Isëquë nontaranquën ni'ton, isëquë chachin chinotancoso' ya'huërin, tēnahuë. <sup>34</sup> Piyapinëhuëpita Iquipitoquë ya'huëpirinahuë', parisitápi ni'nahuë. Chiníquën aparisitopi ni'ton, tarëtápi, natanahuë. Napoaton nicha'ësarahuë huachi. Huëquë' inatohua' a'pa'inquën nicha'ëcamaso marë',” itantarín.

<sup>35</sup> Napoaton Moisésë inatohua chachin paantarín. Iráca israiro'sa' yacatahuapirinhüë', co yanatëpihuë'. “¿Inta' hua'an acorinquën? Co coisë pochin sha'huitancoiso' ya'huërinhuë',” itopi. Yosëso nipirinhüë' Moisésë chachin hua'an acorin. Nara'huaya quëran anquëniri ya'notaso', Yosëri sha'huitërin inapita nicha'ëcaso marë'. <sup>36</sup> Ina quëran Iquipitoquë paantarahuaton, nani ma'sha Yosë pochin ninin, sacai' nininsopita. Inapoaton, Iquipito quëran ocoirahuaton, nicha'ërin. Inapochachin Quëhuai marëquë, inotëro parti inaquëpita Yosë pochin ninin. Catapini shonca pi'ipi inaporin. <sup>37</sup> Moisésëri chachin inapita itërin: “A'na tahuëri Yosë nohuantón, a'na pëntona'pi ya'huapon, ca pochin nininso'. Inanta' Israiro quëmapi nisarín,” tënin. <sup>38</sup> Iráca inotëro parti shimashonënpoa' niyontónpachinara, Moisésëri Yosë nanamën anitotërin. Sinai motopiquë



pa'pachina, anquëniri nontërin. Yosë nanamën sha'huitërin noya nanpicaíso marë'. Canpoa marënta' sha'huitërin.

<sup>39</sup> Shimashonënpoaso nipirinhüë' co nohuantopihüë' Moisësë natëcaíso'. Yaa'popi. Iquipito parti na'huanatona', inatohua' yapa'mantapi. <sup>40</sup> Napoaton Moisësë motopiquë ya'huaso', iin, Aaron itopiso', nontopi. “Mamanshiro'sa' nitocoi, ina imahua'. Moisësë Iquipito quëran ocoipirinpoahuë', ¿intohuaso' pa'mara?” ta'tona', mamanshi nipi. <sup>41</sup> Ohuaca'huaya pochin nininso nipi. Ma'sha teparahuatona', mamanshi moshapi. Inahuara nipiso' niponahuë', pa'yatatona' pita nipi. <sup>42</sup> Napoaton Yosëri tananpitërin. Tananpituachina, ma'sha inápaquë ya'huërinso pita moshapi. Pi'i, yoqui, tayora, inapita moshapi. Pënëntona'pi iráca Yosë quiricanënuë ninshitaton, tapon:

“Israiro'sa' nontaton, Yosëri itërin:

‘Catapini shonca pi'ipi inotëro parti paasëma' ma'sha tēpahuatamara, co chinotatomaco naporamahuë'.

<sup>43</sup> Nisha piyapiro'sa' moshapiso' yonquirama'.

Moroco artaronën quēparahuatoma', ina chinotërama'.

A'na tayloranta' mosharama', Nipan itopiso'.

Napoaton ana'intaranquëma'.

Ca nohuanton, inimicoro'sa' huë'sahuatona', minsëarinënuëma'.

Papironia aquëtë' quēpararinënuëma', itërin Yosëri,” tēnin.

<sup>44</sup> Shimashonënpoapita iráca inotëro parti pacapona', Yosë chinotacaso në'mëtë' pëi quēparápi. Yosëri chachin Moisësë sha'huitërin ina pochin nicatona', chinotacaiso marë'. A'notërinso pochachin nipi. Inaquë Yosë pënëntërinso nanan ninshitërinso' ya'huërin. <sup>45</sup> Ina quëran hui'ninpitanta' inachachin pëi' ya'huëtopi. Nisha piyapi'sa' isëquë ya'huëpirinahuë', Yosë nohuanton, a'papi. Cosoiri minsëhuachina, a'papi isëquë ya'huëcaíso marë'. Ina pëi chachin isëquë quëpi Yosë chinotacaiso marë'. Tapi hua'an ya'conaquë huarë' ina pëiquë Yosë chinotopi. <sup>46</sup> Yosëri noya catahuarin ni'ton, Tapi noya hua'anëntërin. Inari pancana yapëitopirinhüë', co Yosë nohuantërinhuë'. <sup>47</sup> Ina quëran hui'nin Saromon itopiso', panca pëi' na'pi quëran ninin inaquë chinotacaiso marë'. <sup>48</sup> Nipirinhüë', Yosëso' chini chiníquën nanantërin. Co nipiso' pëiquëráchin ya'huërinhuë'. Pënëntona'pi inachachin sha'huitërinpoa':

<sup>49</sup> “Yosëri itapon: Inápaquë huënsërahuë hua'anënta'huaso marë'.

Isoro'panta' nantëhuë aya'nanahuëquë pochin nitërahuë.

¿Onpopinta' yapëirapipiramacohüë'?

¿Insëquë chachinta' acotapomaco ya'huëca'huaso marë'? Co pëiquëráchin ya'huarahuë'.

<sup>50</sup> Cari ya'ipi ma'sha ninahuë, itërin Yosëri,” tēnin.

<sup>51</sup> Canpitaso nipirinhüë' co pi'pisha tēranta' yanatëtëramahuë'. Co natan-tochináchinhüë' cancantërama'. Co onporonta' Ispirito Santo yanatëramahuë'. Iráca shimashonëmapita co noyahuë' cancantopi. Inapita quēpatoma', inapochachin cancantërama'. <sup>52</sup> Iráca quëran huarë' na'a pënëntona'piro'sa' pënëntopirinhüë', ¿insota' shimashonëmapitari noya ni'pi? Ya'ipiya aparisitopi. “A'na tahuëri noya noya nininso' o'mararin,” topachinara, no'tëquën ninopirinhüë', tēpapi. Ina quëran Cristo chachin o'mahuachina, sha'huirapitoma', atēpatërama'. <sup>53</sup> Yosë iráca pënëntërinso' anquëniri chachin sha'huitopirinhüëmahuë', canpitaso' co natëramahuë', itërin Istipani.

### *Istipan tēpapiso'*

<sup>54</sup> Natanahuatona', chiníquën no'huitona', yatēpapi. <sup>55</sup> Istipanso nipirinhüë' Ispirito Santori noyá ya'coancantërin ni'ton, inápaquë në'pëtërin. Yosë ya'huërinso chachin ni'nin. Huënaráchin huënaráchin ya'norin. Quisoso Yosë inchinanën quëran huaniárin, ni'nin.

<sup>56</sup> —Ni'cochi iyaro'sa'. Pi'iro'të nii'soatërin ni'nahuë. Quisoso chachin Yosë inchinanën quëran huaniarin, quënanahuë, itërin Istipani.



<sup>57</sup> Ina natantahuatona', nicipihuëratëtopi. Chiníquën no'huitona', a'naroáchin maconpi. <sup>58</sup> Ninano quëran quëparahuatona', na'piquë tè'yararapi. Sha'huirapisopitaso', aipi a'mopiso' ocoirahuatona', a'na hui'napi Saono itopiso' quëtopi a'paicaso marë'. <sup>59</sup> Të'yaraso', Istipanso' chiníquën parisitaponahuë', Quisoso nontërin: "Hua'yanëhuë' Sinioro matahuatonco, quëpaquë'," itërin. <sup>60</sup> Ina quëran isonahuaton, chiníquën itantarin: "Tëparinacoso marë', ama Sinioro isopita ana'intëquësohuë'," itërin. Ina tosahuaton, chiminin.

## 8

<sup>1</sup> Istipan tëpasoi', Saononta': "Tëpaco'," tënin.

### *Saonori aparisitërinso'*

Naporo quëran huarë' cotio hua'ano'sa' no'huitatona', Quisoso imapisopita chiníquën aparisitopi. Quirosarinquë napopi. Aparisitatona', ayanquëëpi. Ya'ipi Cotia parti, Samaria parti, inaquëpita yanquëëpi. Ca'tano'saráchin co pa'pihuë'. <sup>2</sup> Nani Istipan tëpahuachinara, Yosë chinotopisopitari pa'pitopi. Sëtatona', na'nërápi. <sup>3</sup> Saonoso nipirinhue' Quisoso imapisopita aparisitatón, pëinënaquë huarë' ya'cona'piarin. Quëmapi'sa' masahuaton, ohuararahuaton, tashinan pëiquë po'morin. Sanapi'santa' inaquë po'morin.

### *Samaria parti noya nanan sha'huirinso'*

<sup>4</sup> A'naquënso nipirinhue' yanquëërahuatona', pa'sapi. Yosë nanamën sha'huirapiapi. <sup>5</sup> Pinipiso' Samariaquë pa'nin. Inaquë Quisocriso naporinso' sha'huirarin: "Yosëri a'paimarinso' imaco' canpitanta'," itarin. <sup>6</sup> Na'a piyapi'sa' niyontonahuatona', natanapi. Noya natanpi. A'chintohuachina, cania'piro'santa' quëpi. Yosë nohuanton, Pinipiri anoyatërin. Ni'sahuatona', aquë aquëtë' yaimapi. "Yosëri catahuarin ni'ton, a'naroáchin anoyatërin," topi. <sup>7</sup> A'naquënso' sopairi ya'coancantërin ni'ton hua'yantopirinhue', Pinipiri sha'huitohuachina, sopairo'sa' chiníquën nonsahuatona', pipira'piapi. A'naquëonta' caniopi quëran co huachi nanitopihuë' iratacaiso', quëhuënápi. A'napitaso' apia ni'tona', sonpapi. Inapitanta' huë'pachinara, anoyatërin. <sup>8</sup> Napoaton inaquë ya'huëpisopitaso', capa cancantopi.

<sup>9</sup> Inaquë a'na quëmapi Simon itopiso' ya'huërin. Co'huara Pinipi huë'shatërasohuë', na'con pënotërin. Nani hua'qui' piyapi'sa' nonpintërin. "Caso' chiníquën nanantërahuë'," tëninso marë' pa'yatopi. <sup>10</sup> Ya'ipi Samariaquë ya'huëpisopitari natëpi. Ya'ipi piyapi'sa', hua'ano'sa quëran huarë' natëpi. "Iso quëmapi Yosë pochín ninin. Nani ma'sha nanitaparin," topi.

<sup>11</sup> Hua'qui' pënotaton, piyapi'sa' nonpintërin. Napoaton natëpi. <sup>12</sup> Nipirinhue', Pinipiri noya nanan sha'huitohuachina, noya natanpi. "Yosë yahua'anëntërinpoa'. Quisocriso inápa quëran a'paimarin nicha'ëinpoaso marë'. Ina imaco' canpitanta'," itohuachina, natëpi. Ina quëran quëmapi'sa' sanapi'sarë chachin aporihuanpi. <sup>13</sup> Simonta' natëpirinhue'. Aporihuanahuaton, Pinipi ca'tanin. Pinipiri cania'piro'sa' a'naroáchin anoyatërin. Nani ma'sha nanitaparin. "Tëhuëchachin Yosëri catahuarin," topi. Ina ni'sahuaton, Simon pa'yanin. "Ma'pitacha nanitaparin paya," tënin, yonquiaton.

<sup>14</sup> Naporo' ca'tano'sa' Quirosarinquë ya'huëpi. "Samariaquë ya'huëpisopitanta' Yosë nanamën natëpi huachi," topi. Natantahuatona', Pitro, Coansha cato chachin a'papi nicapona'. <sup>15-16</sup> Na'a ya'huëhuano'sa' nani aporihuanpi. "Sinioro Quisoso imarai," ta'tona', aporihuanaponaraihuë', Ispirito Santori co ya'coancanchátërarinhue'. Napoaton Pitro, Coansha inapita o'marahuatona', Yosë nontopi Ispirito Santori ya'coancantacaso marë'. <sup>17</sup> Ina quëran së'huamotohuachinara, Ispirito Santori ya'coancantërin. <sup>18-19</sup> Simonta' nicanon: "Ca'tano'sari së'huamotorahuatona', Ispirito Santo aya'coancantopi," ta'ton: —A'chintoco canta' canpita pochín nii. Ina marë'

pahuërë'inquëma'. Ispirito Santo aya'coancanchi canta', topirahuë', itërin. <sup>20</sup> Pitroriso' itapon:

—Ma'pitacha yonquiran paya. Coriqui marë' Ispirito Santo ¿yama'paranco ti? Co ina marë' Yosë quëtërinpoahuë'. Co inaso' pa'anëhuë'. Ina pochin yonquihuatan, parisitopiquë pa'saran. ¡Coriquirë'quën chachin inaquë pa'saran! <sup>21</sup> Co ya'ipi cancanën quëran imaranhuë' ni'ton, co Yosë noya ni'ninquënhuë'. <sup>22-23</sup> Pa'pi co noyahuë' yonquiran. Catinaquë tonporëso pochin ninan ni'ton, co pi'pian tëranta' Yosë yanatëranhuë'. Napoaton co noyahuë' yonquiransopita naniantaton, Yosë nontëquë' tapon a oshanën yainquitápirinquënhuë', itërin.

<sup>24</sup> —Canpitari Yosë nontoco' ama ina pochin ana'inchincosohuë', itërin. Chiníquën pa'yanaton, naporin.

<sup>25</sup> Ina quëran Pitro Coansharë chachin piyapi'sa' a'chintantapi. Quisocriso naporinso' anitotapi. Ya'ipi Yosë nanamën sha'huitantapi. Nani sha'huitohuachinara, ya'huëpi'pa' yapaantapi. Samaria parti paatona', a'naya a'naya ninanoro'saquë noya nanan sha'huitëra'piapi. Inaporatona', Quirosarinquë cancoantapi.

### *Itiopia quëmapi natërinso'*

<sup>26</sup> Ina quëran Siniro anquëninëni ya'notimarahuaton, Pinipi sha'huitërin: “Huani-rahuaton, Quirosarin quëran Casa'pa' ira pa'ninso pa'tëquë',” itërin. Inatohua' inotërachin ya'huërin. <sup>27</sup> Sha'huitohuachina, pa'nin. Pa'sapirinhüë', a'na quëmapi quënanconin, Itiopiaquë ya'huërinso'. Inaso' hua'an. Itiopia copirno paya Cantasi itopisoari nani acorin ya'ipi coriquinën a'paicaso marë'. Hua'anso' i'hua Quirosarinquë pantarin Yosë chinotacaso marë'. <sup>28</sup> Nani o'mantaton, ya'huërin'pa' paantararin. Torona'hua cahuariori quëparinquë huënsëaton, pa'sarin. Papon pochin, Yosë quiricanën iráca Isaiasë ninshitërinso' nontërarin.

<sup>29</sup> Naporo' Ispirito Santori Pinipi sha'huitërin: “Manóton ya'yoranconahuaton, imaraaquë',” itërin.

<sup>30</sup> Pinipiso' ta'arahuaton, ya'yoranconin. Isaiasë ninshitërinso' nontaquëya', natanin:

—Nontëranso' iyasha, ¿nitotëran ti? itërin.

<sup>31</sup> —¡Co'chi iyasha, nitotërahuë' paya! Co insonta' a'chintërincohuë' ni'ton, co nanitërahuë'. Huëquë' huënsëiquë'. Sha'huitoco nitochi, itërin. Napotohuachina, inaquë huënsërin. Papon pochin ninontërapí.

<sup>32</sup> —Iso' iyasha nontápirahuë', ma'ta' tápon naporinso' co nitotërahuë', itahuaton, Yosë quiricanënquë nontërinso' a'notërin nontacaso marë'.

“Tëhuëchachin ohuica tëpacaiso marë' quëpahuachinara, co manta' téninhuë'.

Carniroa'huanta ya'ihuachinara, co na'nërinhuë'.

Inapochachin ina quëmapi yatëpahuachina', co manta' taponhuë'.

<sup>33</sup> Nonpinapipi ni'ton, coisë co no'tëquën sha'huirinhüë'.

Tëpapi ni'ton, co a'na hui'nin tëranta' ya'huërinhuë',” ténin quiricanënquë.

<sup>34</sup> —¿Ma quëmapi' yatëpapiso'? Isaiasë nica. A'na quëmapi nica. Co caso' nitotërahuë'. Sha'huitoco canta' nitochi, itërin hua'ani.

<sup>35</sup> “Quisoso ninoton, Isaiasë ninshitërin,” itahuaton, ina quirica chachin nontaton, ya'ipi Quisoso nanamën a'chintërin. <sup>36</sup> Nani a'chintohuachina, ira pa'tapona pochin ii' quënanconpi.

—Ni'quë' iyasha. Ii' ya'huërin. Canta' aporintoco, topirahuë', itërin hua'ani.

[ <sup>37</sup> —Ya'ipi cancanën quëran huarë' natëhuatan, aporintaranquën, itërin.

—Quisocrisoso' Yosë hui'nin chachin, ténahuë', ténin hua'an.]

<sup>38</sup> “Noyahua',” itohuachina, torona'hua asanorin. Nohuararahuatona', cato chachin i'quë pa'mapi. Inaquë aporintërin. <sup>39</sup> Nonshipirinhüë', a'nanaya Pinipi ayarin. Ispirito Santori quëparin ni'ton, hua'ani co huachi quënaninhüë'. Co quënanaponahuë', noya cancantaton, pa'nin. <sup>40</sup> Pinipiso nipirinhüë', Asotoquë'pa ya'nochanin. Ina

quëran pa'sahuaton, ninanoro'saquë noya nanan sha'huitëra'piarin. Sisariaquë huarë' sha'huirapiarin.

## 9

### *Saono imarinso'*

<sup>1</sup> Saonoso nipirinhüë' no'huitárin. Quisoso imapisopita no'huiton, yatëparin. Napoa-ton corto hua'an chini chiníquën nanantërinso' nontonin. <sup>2</sup> “Quirica ninshitoco piyapi maca'huaso marë'. Tamascoquë quëparahuato, niyontonpiso pëi' hua'ano'sa' quëtarahuë. Inaquë nasha nanan imapisopita quënanpato, masarahuë. Quëmapi'sa' tonporahuato, isëquë chachin quësarahuë. Sanapi'saquë huarë' masarahuë,” tënin Saono. Napohuachina, quirica ninshitahuaton, quëtërin. <sup>3</sup> Ina quëran Tamascoquë pa'nin. Ya'caritërahuaso', a'naroáchin inápa quëran huënaráchin huënaráchin a'pintërin. <sup>4</sup> No'paquë anotahuaton, inápa quëran nontërinso' natanin.

“Saono, Saono, ¿onpoatonta' aparisitaranco?” itërin.

<sup>5</sup> “¿Inquënta' quëmaso', Sinioro?” itërin Saonori. “Ca Quisosoco, aparisitarancoso'. <sup>6</sup> Iporaso' huanirahuaton, ninanoquë paquë'. Inaquë sha'huitarinënguën ma'sona nicamaso',” itërin.

<sup>7</sup> Ca'taninsopitaso' pa'yanatona', co manta' topihuë'. Nontërinso' natanaponarai-huë', co insonta' quënanpihuë'. <sup>8</sup> Saono huaniintarahuaton, ni'topirinhüë', co huachi quënantërinhuë'. Napoaton a'napitari së'quërahuatona', Tamascoquë quëpapi. <sup>9</sup> Cara tahuëri co quënantërinhuë'. Co manta' ca'ninhüë'. Co manta' o'orinhüë'.

<sup>10</sup> Ina ninanoquë chachin a'na quëmapi ya'huërin, Quisoso imarinso'. Ananiasë itopi. Yosë nohuanton, co huë'ëponahuë', hua'narëso pochin ni'nin. Nontërinsona' natanin. “Ananiasë, ¿ya'huaran?” itërin Quisosori. “Ya'huarahuë Sinioro,” itërin inarinta'.

<sup>11</sup> “Huanirahuaton, no'tëquën cachi itopiquë paquë'. Inatohua' Cotasë pëinën ya'huërin. Inaquë a'na quëmapi Tarsoquë ya'huërinso' yacapatarin. Inaso' Saono itopi. Apira inaso' nontarinco. <sup>12</sup> Inanta' hua'narëso pochin nani quënaninquën. Quëmari së'huarayaconpatan, quënantantapon,” itërin Quisosori.

<sup>13</sup> Ananiasëso nipirinhüë' co yapa'ninhüë'. “Ina quëmapiso' Sinioro, pa'pi co noyahuë', topi natantërahuë. Quirosarinquë quëma imarinënguënsopita chiníquën aparisitërin. <sup>14</sup> Corto hua'ano'sa' chiníquën nanantopisopitari nanan quëtërin isëquënta' piyapi'sa' macacaso marë'. Nontërinquënsopita tonporahuaton, tashinan pëiquë yapo'morin,” itërin Ananiasëri.

<sup>15</sup> “Thua mini co noyahuë' yonquipirinhüë', nani huayonahuë ca nanamëhuë a'chinacaso marë'. Nisha nisha piyapi'sa' a'chintarin imainacoso marë'. Hua'ano'sanënpitanta' sha'huitarin. Israiro'santa' a'chintarin imainacoso marë'. <sup>16</sup> Nanamëhuë a'chininso marë' na'con parisitapon. Inanta' cari anitotarahuë,” itërin Quisosori.

<sup>17</sup> Ina natanahuaton, Ananiasë pa'nin. Cotasë pëinënguë ya'conconahuaton, Saono së'huaconin:

—Iya Saono. Sinioro Quisoso iraquë ya'notërinquënso sha'huitërinco ni'ton, huë'nahuë. Ina nohuanton, apira noya ni'taantaran. Naporahuaton, Ispirito Santo noyá ya'coancantarinquën, itërin.

<sup>18</sup> Naporo chachin sami sha'huëtë pochin nininso', ya'pirin quëran anotërin. A'naroáchin noya ni'taantaran. Ina quëran huaniintarahuaton, aporihuanin. <sup>19</sup> Nani coshatahuaton, chiníquën cancantaantaran. Hua'quimiachin inaquë Quisoso imapisopitatuquë yacapatërin.

### *Saono ya'nan pëntërinso'*

<sup>20</sup> Shiarahuaton, cotio niyontonpiso pëiquë pa'sahuaton, pënëntarin. “Quisososo' Yosë hui'nin,” itahuaton, na'con a'chinarin. <sup>21</sup> Ya'ipi piyapi'sa' natanahuatona', ina nohuitatona', pa'yanpi.

—¿Co'na isohuë' Quirosarinquë ya'huapon Quisoso imapisopita chiniquën aparisitërin? Isëquënta' huë'nin imapisopita macacaso marë'. Tonporahuaton, corto hua'ano'saquë quëpararin, topiraihuë'. Ni'quëchi. Nani a'chinarin inanta', topi.

<sup>22</sup> Saonoso' chiniquën cancantaton, nóya a'chinarin. “Tëhuëenchachin Yosëri Cristo a'paimarin. Inaso' Quisoso chachin. Yosë quiricanën quëran no'tëquën anitotërinpoa'” ta'ton, na'con a'chintërin. Cotioro'sa' inaquë ya'huëpisopita nisha nisha yonquiatona', co nanitopihuë' a'panitacaiso'.

#### *Saono cha'ërinso'*

<sup>23</sup> Napoaton hua'qui quëran cotioro'sari tëpacaiso' yonquipi. <sup>24</sup> Yatëpapiso' natana-ton, Saono co huachi a'ninquëchin paacaso' nohuantërinhuë'. Nani tahuëri ninano' ya'coanaquë cotioro'sari ninarapi tëpacaiso marë'. Tashirë chachin ninarápi. <sup>25</sup> A'na tashiso nipirihuë', imapisopitari huëcatona' Saono quëpapi. Ninano pairapipi quëran anohuaramapi. Nantipi pochin ninquë anohuaramahuachinara, pa'nin huachi.

#### *Saono Quirosarinquë paantarinsó'*

<sup>26</sup> Quirosarinquë canconahuaton, Quisoso imapisopita ya'huëpiquë pa'pirinhuë'. “Co tëhuëenchachin Quisoso imamarahuë', sha'huirapihuachinpoa',” ta'tona', t'ë'huatopi.

<sup>27</sup> Pirnapiso nipirinhuë' natërin. Natëton, Saono quëparin ca'tano'sa' nontacaso marë'. “Saono ira pa'taso', Quisoso quënanin. Nontërinsona' natanin. Tamascoquë chiniquën cancantaton, Quisoso nanamën sha'huirin,” itërin. <sup>28</sup> Ina quëran ca'tano'sataquë Saono yacapatarin. Imapisopitarë' nipayatona', pa'sapi. Inaquë co t'ë'huatonhuë', Siniro nanamën sha'huirárin. <sup>29</sup> A'naquën cotioro'saso' Crico nananquë nonpi. Saonori chiniquën pënënpachina, no'huitona', yatëpapi. <sup>30</sup> Yatëpapurinahuë', imapisopita natanahuatona', Sisariaquë quëpapi. Inaquë quëparahuatona', Tarsoquë a'papi.

<sup>31</sup> Ina quëran Quisoso imapisopita noya ya'huapi. Co huachi insoari tëranta' aparisitërinhuë'. Cotia parti, Cariria parti, Samaria parti, inaquëpita sano ya'huatona', noya noya imasapi. “Siniro chiniquën nanantërin,” ta'tona', nóya natëpi. Ispirito Santori catahuarin ni'ton, a'napitanta imasapi.

#### *Yosë nohuanton Pitrori Iniasë anoyatërinso'*

<sup>32</sup> Pitroso nipirinhuë' nisha nisha parti pa'sarin imapisopita nicacaso marë'. Nitaquë canconpachina, imapisopita ni'conin. <sup>33</sup> Inaquë a'na quëmapi quënanconin, Iniasë itopiso'. Posa pi'ipi canioton, quëhuénárin. Apia ni'ton, co nanitërinhuë' huanicaso'.

<sup>34</sup> —Iya Iniasë, Quisocristo anoyatarinquën. Huanirahuaton, pë'sara'huaya tapaquë huachi, itërin Pitrori.

Napotohuachina, a'naroáchin huanirin. <sup>35</sup> Inaquë ya'huëpisopitari ni'pi. Saronaquë ya'huëpisopitarinta' ni'pi. Napoaton na'a piyapi'sa' iráca yonquipisopita naniantatona', Quisocristo imapi.

#### *Yosë nohuanton Tapita ananpitaantarinsó'*

<sup>36</sup> Copëquë a'na sanapi Tapita itopiso' ya'huërin. Crico nananquë Torëcasa itopi. Inanta' Quisoso imarin. Noya sanapi ni'ton, sa'ahuaros'a' nosoroaton, nani tahuëri catahuarin. Pahuantohuachinara, ma'sha topinan nicanarin. <sup>37</sup> Naporo' ina sanapi caniorahuaton, chiminin. Nonën pa'morahuatona', inapa pa'cotë' ninquë acopi. <sup>38</sup> Pitroso' Nitaquë ya'huarin, natantopi. Co aquëyahuë' ni'ton, cato' quëmapi a'papi. Canconahuatona', “Manóton huëquë',” itopi.

<sup>39</sup> Napoaton Pitro inapitarë' pa'nin. Canconpachinara, inapa pa'cotëquë quëpantapi. Inaquë na'a quëyorono'sari tahuirapitahuatona', na'nëtopi. A'mopisopita Tapitaco' i'hua pipitërinso' sa'ahuaros'a' quëtacaso marë' a'notopi. <sup>40</sup> “Ya'ipinquëma' pipico' Yosë

nontëri'i," itohuachina, pa'pi. Nani pa'pachinara, isonahuaton, Yosë nontërin. Ina quëran nonën tahuërëtahuaton, itapon:

—Imoya Tapita, huënsëquë', itërin.

A'naroáchin ni'tiintarin. Pitro quënanahuaton, huënsërin. <sup>41</sup> Pitrori maimirarahuatón, ahuanirin. Ina quëran imapisopita, quëyorono'sa' inapita përarin. Huë'sahuatona', nanpirin quënanquipi. <sup>42</sup> Ya'ipi ninanoquë nahuinin. Na'a piyapi'sa' Quisoso natëpi. <sup>43</sup> Inaquë hua'qui' Pitro yacapatërin. Simon itopiso' pëinënquë yacapatërin. Simonso', sha'huëtë' tapana'pi.

## 10

### *Cornirio nicacaso marë' Pitro pa'ninso'*

<sup>1</sup> Sisariaquë a'na quëmapi ya'huërin. Cornirio itopiso'. Inaso' capitan. "Itariaro'sa'" itopiso sontaro huënton camairin. <sup>2</sup> Inaso nisha piyapi niponahuë', Yosë chinotërin. Ya'ipi pëinënquë ya'huëpisopitanta' Yosë chinotopi. Cotioro'sa' ma'sha pahuantohuachinara, nosoroaton, topinan quëtërin. Nani tahuëri Yosë nontërin. <sup>3</sup> Pi'i tëhuërënahuasó', co huë'ëponahuë', hua'narëso pochin a'ninquëchin quënanin. Yosë anquëninëni huëcapaimarahuatón: "¡Cornirio!" itërin.

<sup>4</sup> Anquëni ni'sahuaton, pa'pi të'huatërin.

—¿Ma'ta' sinioro nohuantëran? itërin.

—Quëmaso' na'con Yosë nontëran, nataninquën. Sa'ahuario'sa' nosoroaton, ma'sha topinan quëtëran. Ina marë' noya yonquirinquën. <sup>5</sup> Napoaton Copëquë piyapi'sa' a'paquë' Simon Pitro maconta'ina'. <sup>6</sup> Inaso', sha'huëtë' tapana'pi Simon itopiso' pëinënquë yacapatarin. Marë yonsanquë ya'huërin, itërin.

<sup>7</sup> Anquëni pa'pachina, cato' piyapinën amatërin. A'na sontaronta' amatërin, nani tahuëri camairinso'. Inanta' Yosë chinotërin. <sup>8</sup> Anquëniri nontërinso' sha'huitahuaton, Copëquë a'parin.

<sup>9</sup> Tahuëririnquë yacamotëriahuaso', ninanoquë ya'caritopi huachi. Naporo' Pitro inapa pa'cotëquë pa'nin Yosë nontacaso marë'. <sup>10</sup> Tanaton, yacoshatopirinhüë'. A'na piyapiri cosharo' nitaso', Pitro hua'narëso pochin quënanin. <sup>11</sup> Pi'iro'të' ni'soatarin, ni'nin. Panca ta'na pochin nininso' o'marin. Catapini cachinën quëran huëntënimararin. <sup>12</sup> Inaquë nani ma'sha ya'huërin. Tananquë ya'huërsopita, pëhuara pochin nininsopita, anpantëhuano'sa', inapita ya'huërin ni'nin. <sup>13</sup> Ina quëran noninso' natanin. "Huanirahuaton Pitro, tëpaton ca'quë'," itërin.

<sup>14</sup> —Inca Sinioro. Sopai inapitaso'. Co onporonta' ina pochin ca'chinahuë'. Iráca Moisësë pënënincoi ama ina pochin capaca'huaiso marëhuë', itërin Pitrori.

<sup>15</sup> —Noya capacaso', itëranquën ni'ton, ama quëmari "sopai" itëquësöhuë'. Co huachi tananpitacaso' ya'huërinhuë', itërin.

<sup>16</sup> Cararo' inachachin sha'huitantarin. Ina quëran ta'na pochin nininso' inápaquë quëpantarin. <sup>17</sup> Pitroso' yonquirárin. "Yosë nohuanton hua'narëso pochin quënanahuë. ¿Ma'ta' tapon ina pochin a'notërinco nica?" tënin yonquiaton. Naporo' Corniriori a'parinsopita canquirapi. Natantiirahuatona', Simon pëinën ya'coananënquë canquipi. <sup>18</sup> Canquirahuatona', natanpi: "¿Simon Pitro isëquë ya'huarin ti?" topi.

<sup>19</sup> Pitroso nipirinhüë' co nataninhüë'. Hua'narëso pochin ni'ninso' yonquirárin. Yonquiaso', Ispirito Santori itërin: "Apira cara quëmapi yonisarinquën.

<sup>20</sup> Nohuaramarahuatón, paquë'. Ama nisha nisha yonquiatonhuë', imaquë'. Ca nohuanton, huë'pi ni'ton, noya imaquë'," itërin.

<sup>21</sup> Pitro nohuaramarahuatón, comisiono'sa' nontërin.

—Ca Simon Pitroco. ¿Onpoapomata' huë'namaso'? itërin.

<sup>22</sup> —Capitan Cornirio a'parincoi. Inaso' noya quëmapi. Nisha piyapi niponahuë', Yosë chinotërin. Ya'ipi cotioro'sari noya ni'pi. I'huara ya'huaso', a'nanaya anquëniri



ya'notimarahuatón, sha'huitimarin. “Piyapi'sa' a'paquë' Pitro maconta'ina'. Ina a'chintarinquën, noya natanquë',” itërin ni'ton, a'parincoi huë'nai, itërin. <sup>23</sup> Napotohuachina, “Ya'cointaco' iyaro'sa',” itërin Pitrori. Napotohuachina, ya'coontapi. A'cahuachinara, huë'ëpatopi. Tahuëririnquë paantahuachinara, Pitronta' pa'nin. A'napitanta' Quisoso imapisopita Pitro imapi.

<sup>24</sup> Ina tashiraya Sisariaquë canconpi. Inaquë Corniriori ninararin quënanconpi. Quëmopinënpita, nipayarinsopita, inapita amatohuachina, nani niyontonpi natanacaiso marë'. <sup>25</sup> Pitro canconpachina, Corniriori isonapairahuaton, moshapirinhüë'.

<sup>26</sup> A'naroáchin Pitrori ahuaniantarin.

—Huaniquë' iyasha. Co caso' moshancoso ya'huërinhuë'. Piyapico canta', itërin.

<sup>27</sup> Ninontahuatona', pëiquë ya'conpi. Inaquë na'a piyapi'sa' niyontonpi quënanconpi.

<sup>28</sup> Nani ninontohuachinara, Pitrori itërin:

—Cotioro'sacoi inachintëraiso', nani iyaro'sa' nitotërama'. Co onporonta' nisha piyapiro'sataquë ni'tapoi pa'naihuë'. Co inapitaro'coi niyontónaihuë'. “Co Yosë no-huantërinhuë',” topiraihuë'. Iporaso nipirinhüë' Yosë nani anitotërinco. Insosona Yosëri noya ni'pachina, canta' noya ni'i. Ya'ipi piyapi napopianachin noya nica'huaso' ya'huërin, ténahuë. <sup>29</sup> Napoaton amatohuatancora, noya huë'nahuë. ¿Ma'marëta' amatëranco? itërin.

<sup>30</sup> Napotohuachina, Corniriori itërin:

—Nani catapini tahuëritarin, ipora pochin Yosë nontasoco, a'nanaya a'na quëmapi ya'notërinco. A'morinsó' huënaráchin huënaráchin ni'nahuë. <sup>31</sup> Ya'notirahuatonco, itërinco: “Cornirio, quëmaso' na'con Yosë nontëran, nataninquën. Sa'ahuaró'sa' nosoroaton, ma'sha quëtëran. Ina marë' Yosë noya yonquirinquën. <sup>32</sup> Napoaton Copëquë piyapi'sa' a'paquë' Simon Pitro maconta'ina'. Inaso', Simon itopiso' sha'huëtë' tapanapi pëinënuquë yacapatarin. Marë yonsanquë ya'huërin,” itërinco. <sup>33</sup> Ina natanahuato, a'naroáchin amatëranquën. Ma noyanquën ni'ton, huë'nan. Iporaso' ya'ipicoi niyontónai. Yosënta' ni'sarincoi. ¿Ma'ta' ina sha'huitërinquën natëca'huaiso marë'? Yanatanai, itërin.

### *Cornirio a'chintërinso'*

<sup>34</sup> Itohuachina, Pitrori itërin:

—Tëhuëenchachin Yosëri ya'ipi piyapi'sa' nosororin. Co quiyasáchin nosororincoihuë'. Cancanënpoaquë yonquirëhuasopita nitotaton, no'tëquën yonquirinpoa', ténahuë. <sup>35</sup> Nisha piyapi'sanquëma' nipomarahüë', cancanëma quëran huarë' ina chinotohuatama', no-huantarinquëma'. Noya cancantohuatama', noya ni'sarinquëma'. <sup>36</sup> Iráca israiro'sacoi noya nanan sha'huitërincoi. Piyapinënpita pochin nicatoncoi, Yosë anitotërincoi. Os-hahuanëhua' ni'ton, Yosë inimicotopirëhuahuë', Quisocriso a'paimarin nanan anoyatinpoaso marë'. Inaso' ya'ipi piyapinpoa' yahua'anëntërinpoa'. <sup>37</sup> Caririquë nanan nahuinin. Ina quëran ya'ipi Cotia parti nahuinin ni'ton, canpitanta' natantërama'. Yosë nohuanton, Coansha pënëntërin co noyahuë' yonquipisopita naniantacaiso marë'. Piyapi'sari natëhuachinara, aporintërin. <sup>38</sup> Ina piquëran Yosëri chachin Quisocriso acorin, Nasaritoquë ya'huërinso'. Yosë nohuanton, Ispirito Santori noyá ya'coancantërin. Napoaton nani ma'sha nanitaparín nicacaso'. Nisha nisha parti paaton, nóya ninin. Na'a cania'piro'sa' a'naroáchin anoyatërin. A'naquën sopairi ya'coancantërin ni'ton, chiníquën parisitopirinhüë', inari anoyatërin. Yosëri catahuarin ni'ton, a'naroáchin anoyatërin. <sup>39</sup> Quirosarinquë naporin. Ya'ipi cotioro'sa' ya'huëpikuënta' inaporin. Ina quëran corosëquë patanantahuatona', tëpapi. Ya'ipiya quiyari ni'nai. <sup>40</sup> Chiminpirinhüë', cara tahuëri quëran Yosëri ananpitaantarín. Nanpiantahuachina, Yosë nohuanton, ya'notërincoi. <sup>41</sup> Co ya'ipi piyapi'sari ni'pihuë'. Yosë nohuanton, quiyariso' ni'nai a'napita sha'huita'huaiso marë'. Nani nanpiantahuachina, quiyarë' coshatërin, o'orin. Quisocriso tëhuëenchachin nanpiantarín, ténai. <sup>42</sup> Naporo' sha'huitërincoi paatoi pënënta'huaiso marë'. “Paatoma', ca nanamëhuë sha'huico'

imatonaco noya cancanchina'. Yosë chachin acorinco ni'ton, a'na tahuëri coisë pochin nisarahuë. Nanpipisopita, chiminpisopitanta', ya'ipiya co noyahuë' nipachina', ana'antarahuë. Inanta' sha'huitoco' nitochina', itërincoi ni'ton, sha'huirárai. <sup>43</sup> Iráca quëran huarë' pënëntona'piro'sa' Quisoso ninotona', sha'huitërinënpoa' ina natëcaso marë'. Cancanënpoa quëran huarë' ina natëcaso' ya'huërin. Oshanënpoa marë' chiminin ni'ton, imapatëhua', ya'ipi oshanënpoa' inquitarinpoa'. "Ca oshanëhuë marë' mini Quisocristo chiminin," topatëhua', inquitarinpoa', itërin Pitrori.

### *Ispirito Santori ya'coancantërinso'*

<sup>44</sup> Noninso' natanahuatona', ya'ipiya natëpi. Nontaso chachin, Ispirito Santori ya'coancantërin. <sup>45-46</sup> Ina nohuanton, nisha nisha nananquë nonsapi. Co nitotaponaraihuë', Ispirito Santo nohuanton, napoapi. "Ma noyacha Yosëso paya," tosapi. Natanahuatona', cotioro'sa' Pitro ca'tanpisopita pa'yanpi: "Nisha piyapi'sa' niponaraihuë', Yosë nohuanton, Ispirito Santori ya'coancantërin," topi.

<sup>47</sup> —Isopitanta' canpoa pochin Ispirito Santori ya'coancantërin ni'quëhuarë' apori-huaina', tënahüë. <sup>48</sup> "Quisocristo imarai huachi," topachinara, aporintëquë', itërin Pitrori. Napotohuachina, aporintopi.

—Isëquë iyaya yacapatoncoi, hua'quimiáchin a'chintocoi, itopi. Napotohuachinara, inaquë hua'quimiáchin yacapatërin.

## 11

### *Pitro Quirosarinquë natanpiso'*

<sup>1</sup> Nisha piyapi'santa' Yosë nanamën natëpi ni'ton, Cotia parti a'naroáchin nahuinin. Ca'tano'santa' natantopi. Ya'ipi imapisopita inaquë ya'huëpiso' nitotopi. <sup>2</sup> Napoaton Pitro Quirosarinquë huënantahuachina, a'naquën cotioro'sa' iráca nanan natëpisoari no'huipi. Quisoso imaponaraihuë', iráca nanaonta' nohuantopi.

<sup>3</sup> —Nisha piyapi'sa' pëinënquë yacapataton, inapitarë'quën coshatëran. Co inapitaso' marca niacotopihuë'. ¿Onpoatonta' naporan? itërin.

<sup>4</sup> Pitroso nipirinhüë' ya'ipiya sha'huitërin.

<sup>5</sup> —Natanco iyaro'sa', no'tëquën sha'huichinquëma'. Copëquë ya'huëasoco, a'na tahuëri Yosë nontárahüë. Naporo' co huë'ëporahuë', hua'narëso pochin quënanahuë. Panca ta'na pochin nininso' inápa quëran o'mararin. Catapini cachinën quëran huëntënimararin. Ca ya'cariya o'marin. <sup>6</sup> Inaanaquë ni'pirahuë', nani ma'sha quënanahuë. Tananquë ya'huërinso'pita, tanan ni'ni pochin nininso', pëhuara pochin nininso', nisha nisha anpiantëhuano'sa', inapita quënanahuë. <sup>7</sup> Nontërinco'sonta' natanahuë. "Huanirahuaton isopita tëpaton ca'quë'," itërinco. <sup>8</sup> "Inca Sinioro. Sopai inapitaso'. Co onporonta' ina pochin ca'chinahuë'. Iráca Moisésë pënënincoi ama ina pochin capa'huaiso marëhuë'," itohuatëra, <sup>9</sup> inápa quëran itantarinco: "Noya capacaso', itëranquën ni'ton, ama quëmari 'sopai' itëquësohüë'. Co huachi tananpitacaso ya'huërinhuë'," itërinco. <sup>10</sup> Cararo' inachachin sha'huitantarinco. Ina quëran inápaquë quëpanantarin. <sup>11</sup> Naporo' cara quëmapi'sa' Simon pëinënquë canquipi. Sisaria quëran huë'pi. Capitan Corniriori a'parinso'. <sup>12</sup> Ispirito Santo sha'huitërinco: "Inapita imaquë'. Ama nisha nisha yonquiatonhuë', noya paquë'," itërinco. Napoaton pa'nahuë. Isopita iyaro'sa' ca'taninaco, saotaya'pi chachin ca'taninaco. Pëinënquë canconahuatoi, ya'conai. <sup>13</sup> Ya'conpatoira, Cornirio itërincoi: "Pëinëhuëquë Yosë nontasoco, anquëni ya'notirincó, ni'nahuë. 'Copëquë piyapi'sa' a'paquë' Simon Pitro maconta'ina'. <sup>14</sup> Inaso' nanan sha'huitarinquë cha'ëcamaso marë'. Ina natëhuatan, Yosë anoyacancantarinquë. Quëmopinënpitanta' anoyacancantarin, tënin anquëni," itërinco. <sup>15</sup> Quisoso nanamën sha'huitasoco chachin, inapitanta' Ispirito Santori ya'coancantërin. Ya'nan canpoa' ya'coancantërinpoaso pochachin inapitanta' ya'coancantërin. <sup>16</sup> Naporo' Sinioro sha'huitërincoiso' yonquirahuë. "Coanshaso'

i'quë aporintërinquëma'. Yosëso nipirinhüë' Ispirito Santo aya'coancantarinquëma' catahuainquëmaso marë'," itërincoi Quisoso. <sup>17</sup> Sinioro Quisocristo imapatëhua', Yosë nohuanton, Ispirito Santo ya'coancantërinpoa'. Inapitaso' nisha piyapi'sa' niponaraihuë', imapachinara, inapochachin Ispirito Santori ya'coancantërin. Yosëri noya ni'pachina, inapochachin canta' noya ni'i, tënahüë. ¡Co caso' nanitërahuë' nisha yonquia'huaso'! itërin Pitrori.

<sup>18</sup> Natanahuatona', co huachi no'huipihuë'.

—Tëhuëenchachin Yosë nohuanton, nisha piyapi'santa' co noyahuë' yonquipisopita naniantatona', imasapi. Inari catahuarin ni'ton, nanpimiatapi. Ma noyacha Yosëso paya, itopi.

### *Antioquiaquë imapiso'*

<sup>19</sup> I'hua chachin Istipan tëpahuachinara, Quisoso imapisopita aparisitopi ni'ton, aquë yanquëpi. A'naquën Pinisia parti pa'pi. A'naquëonta' Chipriquë pa'pi. A'napitanta' Antioquiaquë'pa' pa'pi. Nisha nisha parti paatona', Quisoso nanamën sha'huipi. Sha'huiponaraihuë', cotioro'saráchin sha'huitopi. <sup>20</sup> A'naquënso nipirinhüë' Antioquiaquë canconahuatona', nisha piyapi'santa' sha'huitopi. Sinioro Quisoso naporinso' a'chintopi. "Oshanëma' inquitatëinquëma', anoyacancantarinquëma'," itopi. Chipri quëran huë'pisopita, Sirini quëran huë'pisopita, inapita napopi. <sup>21</sup> Yosëri catahuarin ni'ton, na'a piyapi'sa' natëtona', imapi. Iráca yonquipiso' naniantatona', Quisoso imasapi.

<sup>22</sup> Quirosarinquë nahuinin. Quisoso imapisopita natantahuatona', Pirnapi a'papi Antioquiaquë ya'huëpisopita nicacaso marë'. <sup>23-24</sup> Inaquë canconahuaton, "Tëhuëenchachin nisha piyapi'santa' imasapi. Yosëri na'con catahuarin," ta'ton, noya cancantërin. Pirnapiso' noya quëmapi. Yosë noya natërin. Ispirito Santori noyá ya'coancantërin ni'ton, piyapi'sa' pënënin: "Ama Sinioro a'pocosohüë'. Ya'ipi cancanëma quëran huarë' imamiatoco'," itërin. Pënënpachina, a'napitanta' Quisoso imapi.

<sup>25</sup> Ina quëran Pirnapi Tarsoquë pa'nin Saono yonípon. Inaquë yoniton, quënanin. <sup>26</sup> "Huëquë' pa'a Antioquiaquë ya'huëpisopita a'chinta," itohuachina, "Inta nipachin pa'a," ta'ton, imarin. A'na pi'isa' inaquë ya'huëpi. Imapisopita catahuacaiso marë' yacapatopi. Na'a piyapi'sa' a'chintopi. Inaquë chachin Quisoso imapisopita nisha nininën acoantapi. "Cristo imaro'sa'," itopi.

<sup>27</sup> Naporo' tahuëri'sa' pënëntona'piro'sa' Quirosarin quëran Antioquiaquë huë'pi. <sup>28</sup> A'naso' Acapo itopi. Inaso' Ispirito Santo nohuanton, ninorin. "Co hua'qui quëranhuë' ya'ipi parti tanarotapi," itërin ninoton. Ina quëran Craotio itopiso' Noma copirno ya'conaso', tëhuëenchachin tanarotopi. <sup>29</sup> Napohuachina, imapisopita yonquipi Cotia parti ya'huëpisopita catahuacaiso marë'. Imapisopita parisitapi ni'ton, coriqui yaa'papi. Coriquihuano'saso' na'con quëtopi. Co coriquihuano'sahuë' nipsisopitaso', pi'pian quëtopi. <sup>30</sup> Nani coriqui yontonpachinara, Pirnapi, Saono, inapita quëtopi quëpacaiso marë'. Quirosarinquë quëparahuatona', ansiano'sa' quëtonpi pahuantërinso' quëtacaiso marë'.

## 12

### *Irotisëri aparisitërinso'*

<sup>1</sup> Naporo' tahuëri'sa' a'na hua'an ya'huërin, Irotisë itopiso'. Quisoso imapisopita no'huiton, sontaro'sa' a'parin aparisitacaiso marë'. <sup>2</sup> Santiago maconpi. Inaso' Coansha iin. Mapachinara, sahuëniquë atëpatërin. <sup>3</sup> Tëpapi ni'ton, cotio hua'ano'sari pa'yatopi. Ina natantahuaton, Pitronta' macacaiso marë' camaitërin. Naporo' cotioro'sa' niyontonapi pan co ahuëpocatopisohüë' capacaiso marë'. <sup>4</sup> Mapachinara, tashinan pëiquë apo'motërin. Shonca saota sontaro'sa' acorin a'paicaiso marë'. Catapini, catapini ya'piri ni'sapi. Niya'huërëtatona', tashirë chachin a'pairapi. "Pascoa na'huëhuachin, piyapi'sa'

ni'tërantapaiquë Pitro ana'intarahuë," ténin hua'an yonquiaton. <sup>5</sup> Pitro tashinan pëiquë ya'huapirinhüë', Quisoso imapisopita Yosë nontapi. Pitro marë' chiníquën Yosë nontapi.

*Pitro tashinan pëi quëran cha'ërinso'*

<sup>6</sup> Tashiraya pochin hua'ani ana'intacaso' nisahuaso', Pitro huë'ësárin. Cato' sontaro'sari ahuancoanapipi. Cato' catinaquë tonpopi. Ahuënan quëran a'na sontarori nitonpotanpatërin. Inchinan quëran a'narinta' nitonpotanpatërin. Inapotahuatona', ya'ipi huë'ësapi. Ya'coanaquë cato' sontaro'sa chachin tashinan pëi' a'pairápirinahuë'.

<sup>7</sup> A'nanaya Siniro anquëninën inaquë ya'notimarin. Huënaráchin a'pinin. Pitro pichianahuaton, ochinanin. "Manóton huënsëquë' pa'a," itërin. Napotohuachina, tanpain quëran catina inaora ni'quiritërin. Cato quëran chachin nii'quiritërin.

<sup>8</sup> "A'moanahuaton, sapatë' po'moquë'," itërin. Itohuachina, inaporin. "Aipi a'moransonta' a'mosahuaton, imaquico," itantarín.

<sup>9</sup> Ina quëran pipihuachina, Pitrori imarin. "Co'ta'ma' anquëni ocoiarincohuë'. Topinan hua'narëso pochin ni'samarahuë'," topirinhüë'. <sup>10</sup> Sontaro ya'natontarinso' na'huëtirin. Ina quëran a'nanta' na'cotiantarin. Pëianshinanquë huarë' canquirin. Inaquë panca ya'coana hua'na quëran nininso' ya'huëpirinhüë', inaora ni'soatërin. Pipirahuaton, a'na cachiquë pa'nin. Inaquë a'naroáchin anquëniri patërin.

<sup>11</sup> Naporo' Pitro no'tëquën yonquirin: "Co hua'narëso pochin ni'nahuë'. Siniro chachin anquëninën a'patimarinco nicha'ëincoso marë'. Irotisë, cotio hua'ano'sa', inapita yatëpapirinaohüë', nicha'ërinco," ténin.

<sup>12</sup> Ina yonquiaton, Maria pëinënquë pa'nin. Coansha Marco a'shin inaso'. Inaquë na'a imapisopita niyontonahuatona', Yosë nontapi. <sup>13</sup> Paira tahuirinquë canconahuaton, ya'coananënquë pi'nitonin. Pi'nitohuachina, a'na nanon huë'nin, Rota itopiso'. <sup>14</sup> Pitro noninso' nohuanantahuaton, pa'yanin. Pa'yanaton, co ya'coana i'soataponahuë', ta'acotarahuaton, pëiquë ya'coantarin. Pitro aipiran huaniarinso' sha'huiconin.

<sup>15</sup> —Quëmaso' hua'yantëran, itopirinhüë'.

—Co hua'yantërahuë'. Tëhuëchachin Pitro inaquë huaniarin, itohuachina:

—Co inahuë'. Anquëninën nimara, itopi.

<sup>16</sup> Napoaso', Pitroso' ya'coana pi'niantarin. Naporo huarë' i'soatopi. Pitro quënanahuatona', pa'yanpi. <sup>17</sup> Inaso nipirinhüë' imirin quëran anquitërin ama noncaroaiso marëhuë'.

—Siniro chachin anquëninën a'patimarinco. Tashinan pëi quëran ocoirincó. Iya Santiago sha'huitonco' nitochin. Ya'ipi imapisopitanta' sha'huitoco', itërin.

Ina quëran a'na parti pa'nin.

<sup>18</sup> Tahuërihuachina, sontaro'sa' pa'pi pa'yanpi. "¿Intocha Pitro pacaya?" nitopi.

<sup>19</sup> Irotisëso nipirinhüë': "Pitro maconquë'," itopirinhüë'.

"Capa huachi," itohuachina, a'na a'na sontaro natanin. Co nitotohuachinarahuë', tēpacaiso marë' camaitërin. Napoaton sontaro'sa' Pitro a'paipisopita tēpapi. Ina quëran Irotisë Cotia quëran pipirahuaton, Sisariaquë pa'nin ya'huapon.

*Irotisë chiminiso'*

<sup>20</sup> Irotisi hua'an ya'huërinquë nisha nisha piyapi'sa' huëcatona', cosharo' pa'anquipi. A'naquënsó' cosharo' yapa'anpirinahuë', chiníquën no'huiton, co nohuantërinhuë' quëtacaso'. Tiroquë ya'huëpisopita, Sitonquë ya'huëpisopita, inapita no'huirárin. Napoaton niyontonahuatona', inaquë huë'pi. Po'oana quëran inpriatonën Pirasito itopiso' nontiipi.

—Quëmari hua'an nontëquë' ama huachi no'huincoisohüë'. Ina marë' coriqui quëchinquën, itopi.

—Noyahua', tosahuaton, pa'nin hua'anën nontacaso marë'.

<sup>21</sup> —Sha'huitëquë' huënta'ina' nonchi, itërin. Niyontonpachinara, noyápiachin nitaparin. Hua'anëntacaso' shiranënquë huënsërahuaton, piyapi'sa' nontarin.

<sup>22</sup> Natanahuatona', pa'yatapi: “Ma noyanquëncha quëmaso paya. Co piyapi pochin nontërancoihuë'. Yosë chachin pochin nontarancoi,” itopi chiníquën nontatona'.  
<sup>23</sup> Topinan piyapi niponahuë' natanahuaton hua'an nipa'yatërin. Yosëichin chinotacaso nipirinhüë' naporinso marë', a'naroáchin Sinioro anquëninëni acaniorin. Chiníquën canioton, shonari pë'yarin. Parisitërarin quëran chiminin.

<sup>24</sup> Yosë nanamënso nipirinhüë' nahuinarin. Nisha nisha parti sha'huirápi ni'ton, na'a piyapi'sa' natëtona' imasapi.

<sup>25</sup> Pirnapi, Saono, inapitaso' nani yonquipi Antioquiaquë paantacaiso'. Imapisopita coriqui a'papiso' nani quëtonpi ni'ton, Quirosarin quëran pipirahuatona', paantapi. Coansha Marconta' quëpapi.

## 13

### *Pirnapi, Saono inapita a'chinacaso marë' a'papiso'*

<sup>1</sup> Antioquiaquë na'a Quisoso imapisopita ya'huëpi. Na'a niyontonahuatona', Yosë chinotopi. A'natërápo quëmapi'sa' ansiano ya'conpi. A'naquënso' Quisoso nanamën sha'huitona', pënëntopi. A'naquëonta' imapisopita a'chintopi noya imacaiso marë'. Inapitaso': Pirnapi, Simon, Nosio, Manain, Saono, inanapo ya'huëpi. Simonso' yara piyapi. Nosioso' Sirini quëran huë'nin. Manainso', Cariria hua'an Irotisë pëinënquë so'sorinso'.  
<sup>2</sup> A'na tahuëri co coshatatonaraihuë', Sinioro chinotopi. Napohuachinara, Ispirito Santori sha'huitërin: “Pirnapi, Saono inapita nohuantërahuë paatona', piyapi'sa' a'chintacaiso marë'. Ina marë' inapita acorahuatoma', a'paco' pa'ina',” itërin.

<sup>3</sup> Napoaton co coshatatonaraihuë', inapita marë' chiníquën Yosë nontopi. Nani Yosë nontohuachinara, së'huamotorahuatona', acopi paatona' a'chinacaiso marë'. Ina quëran a'papi.

### *Chipri parti a'chinpiso'*

<sup>4</sup> Ispirito Santo nohuanton, Siriosiaquë pa'pi marë pa'tacaiso marë'. Ina quëran panca nanchaquë pa'sahuatona', Chipri parti canconpi. Panca so'ton inaso'. Inaquë na'a ninano' ya'huërin.  
<sup>5</sup> Saraminaquë nonshirahuatona', cotio niyontonpiso pëiquë pantarahuatona', Yosë nanamën sha'huitopi. Nisha nisha niyontonpiso pëiquë sha'huitëra'piapi. Coansha Marconta' pa'nin catahuacaso marë'.

<sup>6</sup> Inaquë sha'huirahuatona', ya'ipi Chipri parti pa'topi. A'chintëra'piapi. Inapoa-tona', Paposëquë huarë' canconpi. Inaquë a'na pënoton quënanconpi. Inaso' cotio quëmapi, Pariquisoso itopiso'. Inaso', nonpin nanan pënëntona'pi ni'ton, piyapi'sa' nonpintarin.  
<sup>7</sup> Inaso' hua'an amiconën. Hua'anso' Siriquio Paono itopi. Inaso' noya yonquirin. “Canta' Yosë nanamën nata'in,” ta'ton, Pirnapi, Saono, inapita amatërin.  
<sup>8</sup> Pënotonso nipirinhüë' co nohuantërinhuë'. Inaso' Crico nananquë Irimasë itopi. “Ama natëquësohüë',” toconin.  
<sup>9</sup> Saonoso' Noma nananquë Paono itopi. Ispirito Santori noyá ya'coancantërin ni'ton, pënoton ni'sárin quëran itapon:

<sup>10</sup> —Quëmaso' sopai pochin cancantëran. Yosëso' noya noya nipirinhüë', yain-amicotëran. Tëhuëchachin nonpintënquën, pa'pi co noya quëmapiinquënhüë'. Sinioro no'tëquën sha'huitopirinpohuë', ¿onpoatonta' quëmari nonpintaton, a'napita anishacancantaran?  
<sup>11</sup> Apiramiachin Yosë nohuanton, co manta' quënantaranhuë'. Hua'quimiachin co pi'i quënanaranhuë', itërin.

Napotohuachina, a'naroáchin chitoro pochin ni'tërin. Somaraya pochin nica-ton, co manta' quënantërinhuë'. Si'pinantápirinhüë', a'na piyapi nohuantërin matanparahuaton, quëpacaso marë'.  
<sup>12</sup> Hua'ani ni'sahuaton, “Yosëri mini napotërin,” ta'ton, natërin. Sinioro nanamën natanahuaton, pa'yanin. “Inaso' chiníquën nanan,” tënin.

### *Pisitia parti pënëntërinso'*



<sup>13</sup> Ina quëran Paonoso', ca'taninsopitarë chachin a'na parti pa'nin. Nanchaquë ya'conahuatona', marë pa'tantapi. Panpiria parti nonshirahuatona', a'na ninano Piriqui itopiquë pa'pi. Coansha Marcosa nipirinhüë', co huachi imätërinhuë'. Quirosarinquë ayamantarin. <sup>14</sup> Paonoso' Pirnapirë chachin paantapi. Piriqui na'huëtahuatona', aquë iratopi. Pa'sápatona', a'na Antioquiaquë canconpi, Pisitia parti ya'huërinso'. Chinoto tahuëri nipachina, cotio niyontonpiso pëiquë pa'pi. Inaquë ya'conahuatona', huënsëpi. <sup>15</sup> Cotio ansiano'sa' quirica nontapi. Moisësë iráca pënëntërinso', pënëntona'piro'sa' ninshitopiso', inapita nani nontohuachinara, itapona':

—Achinicanamacoiso marë' yapënënpatamacoï iyaro'sa', sha'huitocoi nata'in, itërin.

<sup>16</sup> Napotohuachina:

—Noyapa', carinquëmanta' pënëinquëma', ta'ton Paono huanirin. Huanirahuaton, imirin quëran tasatërin piyapi'sari ta'tatona' natanacaiso marë'.

—Natanco iyaro'sa'. A'naquëmanta' nisha piyapinquëma' nipomarahuë', Yosë chinotërama'. Canpitanta' natanco. <sup>17</sup> Iráca quëran huarë' israiro'sanpoa' Yosë chinotërhua'. Iráca chachin shimashonënpoapita acorin piyapinënpita nicacaiso marë'. Iquipitoquë ya'huëapona', Yosë nohuanton, na'api. Ina quëran Yosëri chachin chiniquën nanantaton, catahuarin inatohua quëran cha'ëcaiso marë'. <sup>18</sup> Catapini shonca pi'ipi inotëro parti pa'pachinara, Yosëri nosoroaton, co ata'huantërinhuë'. Co yanatëpirinahuë', na'con catahuarin. <sup>19</sup> Ina nohuanton, Canaan parti pa'pi. Inatohua' nisha nisha piyapiro'sa' ya'huëpi, nisha nisha nananquë nonpisopita. Canchisë huënton ya'huëpirinahuë', co Yosë natëpihuë' ni'ton, ina nohuanton minsëpi. Inaquë chachin shimashonënpoapita ya'huëpi. Yosëri catahuarin ni'ton, ina no'pa' hua'anëntopi. <sup>20</sup> Ya'ipi quëran catapini pasa a'natërápo shonca pi'ipi ninin.

Ina piquëran Yosë nohuanton, hua'ano'sa' ya'cona'piapi catahuacaiso marë'. Samoiro ya'conaquë huarë' inapopi. <sup>21</sup> Inaso' noya pënëntopirinhüë': "Copirno nohuantërai huachi," topachinara, Yosëri Saono acorin. Inaso' Mincamin huënton quëmapi, Quisi hui'nin. Catapini shonca pi'ipi Saono hua'anëntopirinhüë', <sup>22</sup> Yosëri ocoirahuaton, Tapi acorin. Quisi hui'nin inaso'. Nóya quëmapi ni'ton, Yosëri noya ni'nin. "Tapiso' ca pochin cancantërin. Noya ni'nahuë. No'tëquën natëarinco," tënin Yosë. <sup>23</sup> Iráca chachin Yosëri sha'huitërin: "A'na tahuëri Tapi shiin nicha'ësarinquëma'," itërin shimashonëmapita. Iporaso' iyaro'sa', nani Quisoso a'paimarin nicha'ëinpoaso marë'. Sha'huitërinso chachin a'paimarin. <sup>24</sup> Co'huara Quisoso huë'shatërasohuë', Coansha pënëntarin. Na'a israiro'sa' pënënarin. "Co noyahuë' yonquiramasopita naniantatoma', Yosë chachin tahuërëtantaco'. Ina quëran i'quë aporintaranquëma'," itërin. <sup>25</sup> Coansha pënëntërinso' yatiquihuachina, no'tëquën sha'huirin. "Quëmaso' Cristonquën, itopiramacohuë', co caso' inacohuë'. Nipirinhüë', ca piquëran huë'sarin. Inaso' noya noya. Co caso' maquëyancohuë' ni'to, co sapatën i'quirita'huaso tëranta' nanitarahuë'," itërin.

<sup>26</sup> "Canpoaso' iyaro'sa', Apraan shinpitanpoa' ni'tëhua', Yosë nanan a'patirinpoo' nicha'ëinpoaso marë'. Nisha piyapinquëmanta' Yosë chinotohuatama', nicha'ësarinquëma' canpitanta'. Napoaton ya'ipinquëma' sha'huitaranquëma'. <sup>27</sup> Quirosarinquë ya'huëpisopitaso', co Quisoso nohuitopihuë': 'Yosëri a'paimarin,' co topihuë'. Co hua'ano'sa' tëranta' napopihuë'. Pënëntona'piro'sa' ninshitopiso' nani chinoto tahuëri natanpirinahuë', co yonquipihuë'. 'Quisoso tëpaquë', itopi. Iráca ninorinso chachin yatëpapi. <sup>28</sup> Co ma'marë tëranta' tëpacasohuë' nipirinhüë', Pirato sha'huitopi: 'Tëpaquë', itopi. <sup>29</sup> Ina quëran ya'ipi Yosë quiricanënquë ninorinso' nanihuachina, corosë quëran anohuararahuatona', na'pi naninquë po'mopi. <sup>30</sup> Inaquë po'mopirinhüë', Yosëri ananpitaantarin. <sup>31</sup> Nanpiantarahuatón, a'na yoqui miria pochin ya'huantarahuaton, ca'tano'sanënpita ya'notëra'piarin. Co'huara chimiyantërasohuë', na'a Caririaquë ya'huëpisopitari ca'tanpi. Quirosarinquë huarë' imapi. Quisoso nanpiantahuachina,

inapitarinta' quënanpi. Quënanahuatona', ya'ipi piyapi sha'huitapi: 'Nanpiantarin mini. Quiyari ni'nai,' tosapi.

<sup>32</sup> Quiyanta', iyaro'sa', noya nanan sha'huitarainquëma'. Iráca Yosëri shimashonënpoapita nontaton, sha'huitërin. <sup>33</sup> Iporaso' nani Quisoso a'patimarinpoa'. Shinpitanpoa' ni'tëhua', yonquirinpoa'. Quisoso ananpitaantarahuaton, catahuarinpoa' canpoanta'. Yosë quiricanënguë iráca ninshitërin. 'Quëmaso' hui'nahuënguën. Ipora chachin acoaranquën hua'anëntamaso marë', tënin Tapi. Sarmo catoquë naporin. <sup>34</sup> Yosëri ananpitaantacaso' ninorin. Co nonën chanatarinhuë'. Iráca quiricanën quëran itërin: 'Tapi no'tëquën nontërahuë. Nosoroato, na'con catahuarahuë. Canpítanta' inapochachin catahuaranquëma', tënin Yosë. <sup>35</sup> Napoaton Tapiri ninshitantarín. 'Quëmasáchin natëranquën ni'ton, co nohuantaranhuë' nonëhuë chanatacaso', itërin, Yosë nontaton. Sarmo quiricaquë chachin naporin. <sup>36</sup> Napoaponahuë', Tapiso' Yosë natëton, piyapi'sa' catahuarin. Ina quëran chiminin. Shimashonënpita pirayan pa'pitopi. Nonën chanatërin. <sup>37</sup> Quisosososonipirinhuë' Yosëri ananpitaantarín. Co nonën chanatërinhuë'. Quisoso nonën chachin ninoton, Tapi iráca ninshitërin. <sup>38-39</sup> Napoaton iyaro'sa' sha'huichinquëma'. Quisosoíchin nanitaparín oshanëma' inquitiiinquëmaso'. Iráca pënëntërinso' Moisésëri ninshitopirinhuë'. Ina imapatama', co oshanëma' inquitariinquëmahuë'. Nipirinhuë', Quisoso natëhuatëhua', oshanënpoa' inquitariinpoa'. Oshanënpoa marë' chiminin ni'ton, inquitariinpoa'. Ina quëran Yosë noya ni'sarinpoa'. <sup>40</sup> Nani natanamacó ni'ton, a'naróáchin, iyaro'sa', natëco'. Ni'cona ana'intochinquëma'. Iráca Yosë quiricanën quëran pënëntona'piro'sa' itapona':

<sup>41</sup> 'Yosëri itërin: "Canpítaso' na'con tēhuaconama'.

Iso tahuëri'sa' ca nohuanto, na'con ma'sha onpoarama'. Yonquirahuëso' sha'huitarinënguëma'.

Natanapomarahué', co natëtaramahuë'. Napoaton pa'yanatoma', yonquico'.

Chiníquën ana'intaranquëma' ni'ton, ta'huantarama', tënin Yosë,' itopi.

Canpítanta' ni'cona inapochachin ana'intochinquëma', tënin Paono, pënëntaton.

<sup>42</sup> Ina quëran niyontonpiso pëi quëran pipihuachinara, 'a'na chinoto tahuërinta' inapochachin a'chintaantacoi,' itopi. <sup>43</sup> Piyapi'sa' noquitopirinahuë', na'a cotioro'sari Paono imasapi. Nisha piyapi'santa' cotioro'sa pochín Yosë chinotopisopita imasapi. Imapachinara, Paono, Pirnapi catoari chachin a'chintantapi.

'Yosë inaora nohuanton, nosororinpoa', ta'toma', imamiatoco', itopi.

<sup>44</sup> A'na chinoto tahuëri nanihuachina, ya'ipi ninanoquë ya'huëpisopita niyontonpi Yosë nanamën natanacaiso marë'. Caraíchin piyapi co pa'pihuë'. <sup>45</sup> Cotioro'saso nipirinhuë' notohuaro' piyapi ni'sahuatona', no'huitona', apiratopi. "Isopítaso' nisha piyapi'sa' ni'ton, co canpoa pochín iráca pënëntërinso' natëpihuë'," ta'tona', no'huitopi.

"Paono co no'tëquën a'chininhuë'. Inaso' nonpintë'," itopi. <sup>46</sup> Paonosonipirinhuë' chiníquën cancantaton, co tē'huarinhuë'. Pirnapinta' chiníquën cancantërin.

—Canpítaton Yosë nanamën sha'huita'huanquëmaso' ya'huëpirinhuë', a'porama' ni'ton, canpítatona' tēhuënëma quëran co nanpimiatarahué'. Napoaton nisha piyapi'sa' a'chintaraí. <sup>47</sup> Siniro sha'huitërincoi:

"Quëmaso' acoranquën nisha piyapi'sa' a'chintaton anohuitancoso marë'.

A'pintëréso pochín nanamëhuë anitotaran.

Ya'ipi parti paaton, piyapi'sa' a'chintëra'piapon cha'ëcaiso marë'," itërincoi, tënin Paono.

<sup>48</sup> Nisha piyapi'sa' natanahuatona', pa'yatopi. "Ma noyacha Yosë sha'huitërinpoa paya," topi. A'naquën Yosëri huayonin ni'ton, natëtona', Quisoso imasapi ina nohuitatona', nanpimiatacaiso marë'. <sup>49</sup> Ya'ipi ina parti Siniro nanamën nahuinin.

<sup>50</sup> Cotioro'saso nipirinhuë' ninano' hua'ano'sa' nontopi. Sanapi'santa' chiníquën nanan-topisopita nontopi, Yosë chinotopisopita nininso'. "Paono co noya quëmapihuë'. Pirnapinta' co noyahuë'. Co isëquë nohuantëraihuë'," toconpi. Napotatona', aparisitahuatona',

a'papi. <sup>51</sup> “Nani sha'huitopiranquëmahüè', co nohuantaramahuè' ni'ton, canpitaora tëhuënëmaquë nina'intarama',” itahuatona', Iconioquë pa'pi. <sup>52</sup> Patopirinahuè', nani a'chintopi ni'ton, Quisoso imapisopitaso' noya cancantopi. Ispirito Santori noyá ya'coancantërin.

## 14

### *Iconioquë a'chinpiso'*

<sup>1</sup> Paono, Pirnapi, inapita Iconioquë canconpachinara, inachachin niantapi. Inaquënta' chinoto tahuëri nanihuachina, cotio niyontonpiso pëiquë ya'conpi. Nóya a'chinpi ni'ton, na'a cotioro'sari natëpi. Na'a nisha piyapi'santa' Quisoso imápi. <sup>2</sup> A'naquën cotioro'saso nipirinhüè', co yanatëpihuè'. Napoaton, nisha piyapi'sa' nonatona', anishacancantopi. “Quisoso imapisopita co noya piyapisahuè',” itopi. Napoaton a'naquën co yaimatonahuè', imapisopita no'huipi. <sup>3</sup> Hua'qui' inaquë Paono yacapatërin. Pirnapirë chachin inaquë ya'huëpi. Chiníquën cancantatona', Siniorori nosororinso' sha'huirápi. No'tëquën sha'huipi ni'ton, Siniorori catahuarin cania'piro'sa' a'naroáchin anoyatacaiso'. Ina ni'sahuatona', “Tëhuënchachin Yosë catahuarinquëma',” itopi. <sup>4</sup> Ya'huëhuano'saso' nisha nisha yonquipi. A'naquën cotioro'sa pochin cancantopi. A'naquënso nipirinhüè' Paono, Pirnapi, inapita natëpi. <sup>5</sup> Cato chachin noya nipirinahuè', cotioro'saso' nisha piyapi'sarë' napopianachin yonquiatona', chinotopi ahuëcaiso'. Hua'ano'sarinta' no'huipi. Na'piquë yatëpapirinahuè', <sup>6</sup> natantahuatona', ta'api. Niconia parti pa'pi. Inaquë cato' panca ninanoro'sa ya'huërin. A'naso Nistra, a'nanta' Tirpi itopi. <sup>7</sup> Inatohua' paatona', noya nanan sha'huiantarapi. Ya'cariyanta' a'chinapi.

### *Paono na'piquë të'yarapiso'*

<sup>8</sup> Nistraquë apia ya'huërin. Co nanitërinhuè' iratacaso'. Nasitërin quëran huarë' co onporonta' huanirinhüè'. <sup>9</sup> Paonori a'chintohuachina, nóya natanarin. Napohuachina, Paonori notëërin. “Iso quëmapi noya natëtërin. ‘Quisocriso nanitërin anoyatiincoso’, téninso marë' anoyatarahuë,” ténin yonquinëinquë. <sup>10</sup> Napoaton chiníquën itapon:

—No'tëquën huaniquë' iyasha, itërin.

A'naroáchin huanirahuaton, noya pa'sarin. <sup>11</sup> Piyapi'sari ni'sahuatona', Niconia nananquë ninontopi:

—Yosëro'sa' isëquë o'matona', piyapi taraimapi, topi.

<sup>12</sup> “Pirnapiso' Sioso chinotërëhuaso',” nitopi. Paono na'con na'con a'chinin ni'ton, “Inaso' Irimisë chinotërëhuaso',” nitopi. (Inahuara nananquë ninontopi ni'ton, Paono, Pirnapi inapitaso' co natanpihuè'.) <sup>13</sup> Ninano intonquë Sioso moshapiso pëi' ya'huërin. Ina hua'anënso', ohuaca' masahuaton, yancoro'sa' sihuirin, apë'pëconotacaso marë'. Notohuaro' piyapi'sari imasapi. Ninano ya'coanaquë quëparahuaton, inaquë yatëparin moshacaiso marë'. <sup>14</sup> Naporo huarë' Pirnapi, Paono, inapita nitotopi. Natanahuatona': “Tata Yosëichin chinotacaso' ya'huërin,” ta'tona', a'mopiso oshapi. Huancanachin ta'arahuatona', chiníquën nontopi.

<sup>15</sup> —¿Onpoaramata' iyaro'sa'? Ama moshacoisohüè'. Tëhuënchachin co quiyaso' moshamacoiso ya'huërinhuè'. Quiyanta' piyapicoi, canpita pochachin ninai. Noya nanan sha'huita'huanquëmaso marë' huë'nai. Quisoso nanamën, iyaro'sa', a'chinchinquëma', natanco. Mamanshi topinan quëran mosharama'. Yosëso nipirinhüè' nanpirárin. Ama huachi mamanshi moshacosohüè'. Inapita nianiantatoma', Yosë imaco huachi. Isoro'pa', inápaquë ya'huërinso'pita, marëro'sa', ya'ipi ma'sharo'sa', inapita inari ninin. <sup>16</sup> Iráca piyapi'sa' co Yosë nohuitopihuè' ni'ton, Yosëri tananpitërin inahuara yonquipiso' imacaiso marë'. <sup>17</sup> Nipirinhüè', nosoroatonpoa', nani ma'sha acotërinpoa' ina nohuitacaso marë'. Ina nohuanton, o'nanin. Ina nohuanton, ma'sha papotërin. Ina

nohuanton, cosharo' ya'huëtërinpoa' ca'patëhua' noya cancantacaso marë'. Inapoaton, noya yonquirinpoaso' anitotërinpoa', itopi.

<sup>18</sup> Napotopirinahuë', co a'naroáchin natëtopihuë'. Parisi quëran pochin natëtona', co huachi ohuaca' tëpatona inapita moshapihuë'.

<sup>19</sup> Napoaponahuë', cotioro'sari huëcapairahuatona', anishacancantopi. A'naquën Antioquia quëran huë'pi. A'napitanta' Iconio quëran huë'pi. Huë'sahuatona', Paono, Pirnapi, inapita sha'huirapipi ni'ton, no'huipi.

No'huirahuatona', Paono mapi. Masahuatona', na'piquë të'yarahuachinara, chiminpirinhuë'. Ohuararahuatona', ninano intonquë të'yatonpi. “Nani chiminin,” ta'tona' inaquë patopi. <sup>20</sup> Quisoso imapisopitari tancapitahuatona', nocoaso', a'nanaya ni'tiintarahuatón, huaniantarin. Ninanoquë paantarin. Tahuëririnquë Tirpiquë pa'nin. Pirnapinta' pa'nin.

<sup>21</sup> Inaquë noya nanan sha'huitohuachina', na'a piyapi'sa' Quisoso imasapi. Nani a'chintohuachinara, Nistraquë ayamantapi. Ina quëran Iconioquënta' paantarahuatona', Antioquiaquë cancoantapi. <sup>22</sup> Cara ninanoquë chachin Quisoso imapisopita pënëna'piapi. “Ama iyaro'sa' Quisoso a'pocosohuë'. Imamiatoco'. A'napita aparisitarinënpoa'. Parisitacaso' ya'huërin. Parisitatëhua', Yosë hua'anëntërinquë ya'conarëhua'. Napoaton noya ahuantoco',” itopi. Pënënpachinara, achinicancanpi. <sup>23</sup> Yapa'pachinara, a'naya a'naya Quisoso imapisopitaquë ansiano'sa' acora'piapi. Noya nipisopitaráchin acora'piapi. Co coshatatonaraihuë', inapita marë' Yosë nontopi: “Ya'ipi isopita, Sinioro, noya natërinënuë. Noya a'paiquë',” itopi. Cara ninanoquë chachin napopi.

### *Hua'qui quëran ya'huëpiquë paantapiso'*

<sup>24</sup> Ina quëran paantapi. Pisitia parti na'huëtaantarahuatona', Panpiria parti cancoantapi. <sup>25</sup> Piriquiquë Yosë nanamën sha'huiantarahuatona', Atariaquë pa'pi huachi. <sup>26-27</sup> Ina quëran nanchaquë huë'sahuatona', Antioquiaquë canquiipi. A'papi quëran chachin canquiantapi. Canquirahuatona', Quisoso imapisopita ayontonahuatona', ya'ipi sha'huitopi. “T'hua chachin a'paramacoi. ‘A'na parti ya'huëpisopita noya nanan sha'huitonco'. Insëquësona pa'patama', Yosë noya catahuainquëma'’ itohuatamacoira, pa'nai. Nani sha'huirai. Yosë nóya catahuarincoi. Ina nohuanton, nisha piyapi'santa' Quisoso natëtona', Yosë huëntonënuë ya'conpi,” itopi. <sup>28</sup> Inaquë hua'qui' ya'huëantapi. Imapisopitarë' ninontatona', noya ya'huëpi.

## 15

### *Quirosarinquë anoyatopiso'*

<sup>1</sup> Ina quëran a'naquën quëmapi'sa' Cotia parti quëran canquiipi. Quisoso imaponaraihuë', Moisésë pënëntërinsona' imasapi. Napoaton Antioquiaquë canquihuachinara, imapisopita nisha a'chintopi. “Íráca Moisésë pënëninpoa' marca niacotacaso'. Co ina natëhuatamahüë', co Yosë anoyacancantarinquëmahüë',” itopi. <sup>2</sup> Paonoso', co ina pochin yonquirinhuë'. “Co niacotacaso' ya'huërinhuë',” tënin. Pirnapinta' inachachin yonquirin. Napoaton canquipisopitarë' ninontopi. “Co no'tëquën a'chinamahuë',” nitatona', chiniquën ninontopi. Napoaton imapisopitari itapona': “Quirosarinquë paco'. Ca'tano'sa', ansiano'sa', inapita natanco'. ¿Ma'tama' sha'huichinënuëmapa'?” ta'tona', Paono, Pirnapi, inapita a'papi. A'napitanta' inapitarë' a'papi.

<sup>3</sup> A'pahuachinara, pa'pi. Pinisia parti, Samaria parti, inaquëpita pa'sahuatona', sha'huirapiapi. “Nisha piyapi'santa' íráca yonquipiso' naniantatona', Quisoso imasapi huachi,” itëra'piapi. Quisoso imapisopita natanahuatona', nóya cancantopi.

<sup>4</sup> Quirosarinquë canconpachinara, ya'ipi Quisoso huëntonënuë ya'conpisopita noya nontopi. Ca'tano'sa', ansiano'sa', inapitanta' noya nontopi. Ina quëran Paonori ya'ipi sha'huitërin: “Aquë iyaro'sa' pa'nai Quisoso nanamën sha'huita'huaiso marë'. Yosë noya



catahuarincoi. Nisha piyapi'santa' Quisoso imasapi. Nisha nisha ninanoquë niyontonapi," itërin. <sup>5</sup> Ina natanahuatona', a'naquën parisioro'sa' Quisoso imaponarahüë', co noyahuë' natanpi. Napoaton huanirahuatona', taponá':

—Nisha piyapi'sa' yaimapachina', marca acotacaso' ya'huërin. Ya'ipi Moisésë iráca pënëntërinso' imacaiso' ya'huërin. Inapita a'chintoco' imaina', itopi.

<sup>6</sup> Napoaton ca'tano'sa', ansiano'sa', inapita niyontonpi nisha nisha yonquipiso' natanacaiso marë'. <sup>7</sup> Hua'qui' ninontohuachinara, Pitro huanirahuaton, itërin:

—Canta' iyaro'sa' pi'pian sha'huichinquëma'. Nani iráca Yosë acorinco nisha piyapi'sa' sha'huita'huaso marë'. Ina nohuanton, Quisoso nanamën sha'huitërahuë. Inapitanta' natanahuatona', natëpi. Natëtona', imasapi. Ina nitotërama' canpitanta'. <sup>8</sup> Ya'ipi yonquirëhuasopita Yosë nitotërin. "Inapitanta' cancanëna quëran noya natërinaco," ta'ton, Ispirito Santo aya'coancantërin. Canpoa' ya'coancantërinpoaso pochachin inapitanta' ya'coancantërin. <sup>9</sup> Ya'ipinpoa' napopianachin ni'ninpoa'. Nisha piyapi'santa' nosororin. "Quisocristoíchin imasarahüë," topachinara, cancanëna' anoyatërin. <sup>10</sup> Iráca Moisésë nisha nisha pënëntopirinhüë', shimashonënpoa' co nanitopihuë' ya'ipiya no'tëquën natëcaiso'. Canpoanta' co nanitaparëhuahuë'. ¿Ma'marëta' nipachin nisha piyapi'sa' imapachina', iráca pënëntopiso' a'chinacaso' nohuantërama'? ténahuë. Yosëri noya ni'pachina, co canpoari nisha sha'huicaso' ya'huërinhuë'. Quisoso imapisopita tananpítahua', Yosë ana'intoahuachinpoa'. <sup>11</sup> Siniro Quisoso natëhuatëhua', inaora nohuanton, nicha'ësarinpoa'. Nosoroatonpoa', oshanënpoa marë' chiminin ni'ton, anoyacancantërinpoa'. Inapochachin nisha piyapi'santa' anoyacancantërin, ténin Pitro.

<sup>12</sup> Ina natanahuatona', "No'tëquën nonin," ta'tona', ta'tápi. Ina quëran Pirnapi, Paono, inapitanta' sha'huitantapi: "Thua pa'patoira, Yosë na'con catahuarincoi. Quisoso nanamën sha'huitohuatoira, na'a nisha piyapi'sari natëpi. Inapitanta' caniohuachinara, Yosë nohuanton, anoyatëra'piarai. Ni'sahuatona', 'Tëhuënhachin Yosëri catahuarin,' topi," ténin Paono.

<sup>13</sup> Nani nontohuachina, Santiaconta' tapon:

—Natanco iyaro'sa'. <sup>14</sup> Iya Simon nani sha'huitërinpoa'. Yosë nohuanton, ina'ton nisha piyapi'sa' a'chintërin. A'chintohuachina, a'naquën imasapi, Yosëri huëntonënuë aya'conin. Inapitanta' piyapinënpita pochachin ni'sarin. <sup>15</sup> Inachachin pënëntona'piro'sa' ninshitërin. Iráca Yosë quiricanënuë ninshitaton, tapon:

<sup>16</sup> "Yosë chachin naporin:

'A'na tahuëri huëantarahuë.

Tapi shinpita catahuaantarahuë. Inapitaso' naniantërinaco ni'tona', pëi' mocarinsó pochin nisapi.

Co noya cancantopirinhüë', cari anoyacancantaantarahuato, noya acoantarahuë.

<sup>17</sup> A'napita piyapi'santa' nohuitiinacoso marë' napoarahüë.

Nisha piyapi'santa' nohuitohuachinaco, chinotarinaco.

Ca nohuanto, a'naquën imasarinaco,'

<sup>18</sup> ténin Yosë. Iráca quëran huarë' yonquirin nisha nisha piyapi'sa' nicha'ëcaso'.

Ina yonquiaton, anitotërinpoa'," ténin pënëntona'pi.

<sup>19</sup> "Napoaton nisha piyapi'sa' Yosë imapachina', noya nia'ahua', ténahuë. Co ya'ipi Moisésë pënëntërinso' a'chintacaso ya'huërinhuë'. <sup>20</sup> Nipirinhüë', pi'pian pënënacaso marë' ninshitahua'. Nisha piyapi'sa' ma'sha tëpapi mamanshi moshacaiso marë'. Ina nosha Quisoso imapisopita tananpichina'. Naporahuatona', a'naquën maconorahuatona', ma'sha tëpapi. Co huënnainën noya inquitopihuë'. Ina noshanta' ama ca'inasohüë'. Naporahuatona', ama monshihuainasohüë', Inaíchin pënëanhuan'. <sup>21</sup> Iráca quëran huarë' Moisésë pënëntërinso' ya'huërin. Na'a ninanoquë a'chintapi. Nani chinoto tahuëri niyontonpiso pëiquë nontopi. Napoaton ama inapita pinoinënpoaso marëhuë' ina pochin quirica a'patahua' Quisoso imapisopita pënënacaso marë'," itërin.



*Pënënacaiso marë' ninshitopiso'*

<sup>22</sup> “Noyahua'. Ina pochin ninshitahua',” topi ya'ipiya. Ina quëran ca'tano'sa', ansiano'sa', inapita yonquipi catoya'pi a'patacaiso marë'. “Paono, Pirnapi, inapita panantahuachina', inahuanta' ca'taina',” topachinara, “Inanta' noya,” topi ya'ipi imapisopita. Napoaton cato' quëmapi'sa' nóya nipisopita huayonpi paatona' sha'huitacaiso marë'. A'naso' Sirasë. A'nanta' Cotasë. Parsapasë itopi anta'. <sup>23</sup> Ina quëran quirica ninshitopi Antioquiaquë ya'huëpisopita quëtontacaiso marë'.

“Iyaro'sa'. ¿Noya canpitanta' ya'huarama'? Noya quiyanta' ya'huarai. Quiyaso' ca'tano'sanënpitacoi ninshitarainquëma'. Ansiano'saro'coi chachin quirica a'patarainquëma', ni'co'. Co cotioro'sanquëmahuë' nipomarahuë', canpitanta' Quisoso imarama' ni'ton, iyahuëipita pochin ni'nainquëma'. Ya'ipi imaramasopita Antioquiaquë, Siria parti, Sirisia parti, inatohua' ya'huëramasopita iso nanan chachin a'patarainquëma' nitotacamaso marë'. <sup>24</sup> I'hua a'naquën isëquëran pa'pachinara, nisha a'chintërinëinquëma'. ‘Co Moisésë pënëntërinso' natëhuatamahuë', co Yosë huëntonëinquë ya'conaramahuë', itërinëinquëma'. Co quiyari a'papiraihuë', pa'pi. Natanahuatoma', nisha nisha yonquirama'. Pirnapi Paonorë chachin huëcaton, nani sha'huitirincoi. Ipora huarë' nitotatoi, ninshitarainquëma'. <sup>25</sup> Napoaton niyontonpatëira, catoya'pi sha'huitatoi, a'patarainquëma'. Pirnapi, Paonorë chachin ya'huëramaquë pa'pachina', inapitanta' pa'sapi. Pirnapi, Paono cato chachin nóya quëmapi'sa', tënai, noya nosororai. <sup>26</sup> Sinioro Quisocristo nanamën sha'huipiso marë' na'con aparisitopi. A'naquëni no'huitona', pi'pishachin shitëpapi. <sup>27</sup> Napoaton Cotasë, Sirasë inapita a'patarainquëma' yonquiraiso' sha'huitinquëmaso marë'. <sup>28</sup> Nani iyaro'sa' ninontërai. Ispirito Santonta' no'tëquën anitotërincoi. Napopianachin yonquiatoi, ninshitarainquëma'. Co ya'ipi Moisésë pënëntërinso' natëcaso' ya'huërinhuë', tënai. Pi'pisha sha'huichinquëma' natëcamaso marë'. <sup>29</sup> A'naquën ma'sha tëpapi mamanshi moshacaiso marë'. Ina nosha tananpitoco', tënai. Naporahuaton, a'naquën maconorahuatona', ma'sha tëpapi. Co huënainën noya inquipirinhüë', ca'pi. Ina noshanta' ama ca'cosohuë'. Naporahuaton, ama monshihuancosohuë'. Moisésë na'con pënëntopirinhüë', inaíchin natëcaso' ya'huërin, tënai. Cotasë, Sirasë, inapitanta' inachachin pënënarinhüëma'. Natëhuatama' iyaro'sa', noya nisarama'. Nani huachi,” topi quiricatatona'.

<sup>30</sup> Nani a'pahuachinara, pa'sahuatona', Antioquiaquë canconpi. Imapisopita niyontonpachinara, quirica quëtopi. <sup>31</sup> Nani nontohuachinara: “Ma noyacha pënëninpoa paya,” ta'tona', nóya cancantopi. <sup>32</sup> Cotasë, Sirasë, inapitaso' pënëntona'piro'sa' ni'ton, hua'qui' Quisoso imapisopita pënënpi. Noya pënënpi ni'ton, noya noya imasapi. <sup>33</sup> Hua'quimiáchin inaquë yacapatopi. Ina quëran ya'huëpi'pa' yapanantahuachinara: “Osharan paco'. Yosë noya catahuainquëma',” itopi. [ <sup>34</sup> Sirasëso nikipirinhüë': “Co caso' pa'shatërapohuë',” ta'ton, co pa'ninhüë'.]

*Naquërachin a'chinacaso marë' paantapiso'*

<sup>35</sup> Paonoso' Pirnapirë chachin hua'qui' Antioquiaquë ya'huëpi. Sinioro nanamën sha'huirápi. A'napitarë chachin a'chinápi.

<sup>36</sup> Nani hua'quimiachin ya'huëhuachinara, Paonori itërin:

—Huëquë' pa'a iyasha. I'hua na'a ninanoquë Sinioro nanamën sha'huirë'. Paatë' Quisoso imapisopita nianta'a. ¿Onpoapita'mapa'? itërin.

<sup>37</sup> “Noyapa'. Pa'a nipachin. Coansha Marconta' quëpanta'a,” itërin Pirnapiri.

<sup>38</sup> “Ama iya quëpa'asohuë'. I'hua pi'iquë Panpiriaquë canconpatëhuara, ya'huërin'pa' pa'mantarín. Co yacatahuarinpohuë'. Napoaton co nohuantërahuë',” itërin Paonori. <sup>39</sup> Hua'qui' ninontopirinhüë', co napopianachin yonquiatonahuë', nisha nisha pa'pi. Pirnapiso' Coansharë chachin nanchaquë pa'sahuaton, Chipriquë canconpi. <sup>40</sup> Paonoso

nipirinhuë' Sirasë nontërin ca'tanacaso marë'. Yapa'pachinara, Quisoso imapisopitari Yosë nontopi: "Isopita pa'pachina' Siniro, a'paiquë' noya pa'ina'. Nosoroaton, catahuaquë' noya a'chiina'," itahuatona', a'papi. <sup>41</sup> Ya'ipi Siria parti pa'tatona', nisha nisha ninanoquë pa'pi. Quisoso imapisopita pënëna'piapi chiniquën cancanta-caiso marë'. Sirisia partinta' paantatona', inachachin pënëantapi. Quisoso nanamën sha'huitatona', imapisopita achinicananpi.

## 16

### *Timotionta' imatërinso'*

<sup>1</sup> Ina quëran Tirpiquë pa'pi. Inaquë a'chinahuatona', paantapi. Paantarahuatona', Nistraquë canconpi. Inaquë a'na hui'napi quënanconpi, Timotio itopiso'. Inanta' Quisoso imarin. A'shinso' cotio sanapi. Quisoso imarin anta'. Pa'pinso nipirinhuë' Crico piyapi.

<sup>2</sup> "Timotio nóya quëmapi," topi ya'ipi Quisoso imapisopita. Nistraquë ya'huëpisopita, Iconioquë ya'huëpisopitanta' napopi. <sup>3</sup> "Huëquë' api imaquico," itërin Paonori.

"Noyahua', pa'i canta'," tënin anta'. Inaquë na'a cotioro'sa' ya'huëpi ni'ton, Paonori sha'huitohuachina, marca acotopi. Pa'pinso' Crico quëmapi ni'ton, napopi.

<sup>4</sup> A'na ninanoquë, a'na ninanoquë pa'sahuatona', pënëna'piapi. Ca'tano'sa', ansiano'sa', inapita Quirosarinquë ya'huëpisopita ninshitopiso' sha'huirapi imacaiso marë'. <sup>5</sup> Napohuachina, Quisoso huëntonënuquë ya'conpisopita natëtona', noya noya imasapi. Naporahuaton aquë aquëtë na'asapi.

### *Ispirito Santo nohuanton, hua'narinso'*

<sup>6</sup> Asia parti Yosë nanamën yasha'huipirinahuë', Ispirito Santo co nohuantërinhuë' inaquë a'chinacaiso'. Napoaton Piriquia parti, Carasia parti inapita na'huëtopi. <sup>7</sup> Misia parti ya'caritonahuatona', Pitinia parti yapa'sapirinahuë'. Naquëranchin Ispirito Santori ya'copirin. "Co Quisoso nohuantërinhuë' inaquë a'china'huaiso'," ta'tona', co inatohua' pa'pihuë'. <sup>8</sup> Napoaton Misia parti na'huërahuatona', Toroasëquë canconpi. <sup>9</sup> Inaquë Yosë nohuanton, tashi' Paono hua'narëso pochin quënanin. Masitonia piyapi huaniarin, quënanin. "Huëquë' isëquë. Nosoroatoncoi, catahuaco," itërin. <sup>10</sup> Ina natanahuaton, "Yosë nohuantërincoi inatohua' noya nanan sha'huica'huaiso'," ta'toi, manorai inatohua' paca'huaiso'.

### *Piriposëquë a'chinpiso'*

<sup>11</sup> Marë yonsanquë ya'huërai ni'ton, nanchaquë ya'conai paca'huaiso marë'. Ya'conahuatoi, pipirai. Panca so'ton huancoanai' ninquë canconai, Samotrasia itopiso'. Inaquë huë'ëpatërai. Tahuëririnquë pantarahuatoi, Niaporisëquë canconai. Inaquë nonshirai. <sup>12</sup> Nani Masitonia parti canconpatoira, ira pa'tatoi, Piriposëquë canconai. Inaso' panca ninano'. Copirnorri acorinso' ni'ton, inaquë na'a Nomaro'sa' ya'huëpi. Hua'quimiáchin inaquë ya'huërai. <sup>13</sup> Chinoto tahuëri nanihuachina, ninano quëran pipirahuatoi, ii' yonsanquë pa'nai. "Inaquë Yosë chinotapi," ta'toi, inaquë pa'nai. Sanapi'sa' nani niyontonpi, quënanconai. Inaquë huësërahuatoi, a'chintërai. <sup>14</sup> A'na sanapi inaquë Yosë chinotërin, Niria itopiso'. Tiatira quëran huë'nin. Inaso' tintahuan. Ma'maro' në'mëtë' pa'ton nininso' pa'anin. Inaso' nisha piyapi niponahuë', Yosë chinotërin ni'ton, Paonori a'chintohuachina, nóya natanin. Yosë nohuanton, a'naroáchin cancanën quëran huarë' yaimarin. <sup>15</sup> Quisocristo imarin ni'ton, aporintërin. Pëinënuquë ya'huëpisopitarë chachin aporihuanpi.

—Canta' Siniro imarahuë ni'ton, huëco' pëinënuquë yacapacoi, itërincoi. Na'con sha'huitohuachincoira, inaquë huachi yacaparai.

<sup>16</sup> A'na tahuëri yonsanquë paantarai Yosë chinota'huaiso marë'. Paasocoi, a'na nanon quënanconai. Sopairi ya'coancantërin ni'ton, ninotërin. Ina sanapiso' a'napitari pa'anpi asacatacaiso marë'. Ninorinso marë' hua'anënpitaso', na'con canapi. <sup>17</sup> Nanonso'

quënanahuatoncoi, imaquiarincoi. Imaritoncoi, chiníquën nonsarin ya'ipi piyapi'sa' natanacaiso marë'.

—Isopita quëmapi'saso' Yosë piyapinënpita. Yosë chini chiníquën nanantërinso' no-huitatona', natëpi. A'chintarinëinquëma' canpitanta' nitotatoma' cha'ëcamaso marë', itëriarin.

<sup>18</sup> Na'a tahuëri imatoncoi, naporárin. Pinatanaton, Paonoso' no'huitëriporin. Tahuërëtahuaton, sopai itapon:

—Quisocristo nanan quëtërinco ni'ton, a'paaranquën. ¡Iso sanapi quëran pipimiatëquë'! itërin. Naporo chachin pipimiatërin.

<sup>19</sup> Hua'anënpitaso nipirinhüë' no'huitopi. “Co huachi ninorinhüë' ni'ton, co huachi canarëhuahuë',” ta'tona', Paono, Sirasëre chachin masahuatona', cachiquë quëpapi ninano hua'ano'sa' nontacaiso marë'. <sup>20</sup> Inaquë quëparahuatona', coisëro'sa' itapona':

—Isopita quëmapi'saso' cotioro'sa' ni'ton, a'chinatona', ninano tapiapi. Nisha a'chintohuachinara, ya'ipi piyapi'sa' nisha nisha yonquipi. <sup>21</sup> Canpoaso nipirinhüë' Noma piyapinpoa' ni'ton, co inachintopiso' natëcaso' ya'huërinhuë', itopi.

<sup>22</sup> Huanipapisopitanta' no'huitatona', Paono, Sirasë inapita ahuëpi. Coisëro'sarinta' camaipi. “Ai'nanpiratahuatoma', naraquë ahuëpico',” itopi. Napohuachina inapopiti. <sup>23</sup> Chiníquën ahuëpitona', tashinan pëiquë po'mopi. Po'mohuachinara, tashinan pëi' hua'an itapona': “Noya a'paiquë', ta'ahuachina',” itopi. <sup>24</sup> Ina natanahuaton, huancánachin po'morin. Nantëna' nontëquë acatëntahuaton, catinaquë niahuitërin.

<sup>25</sup> Yono tashi' nisahuaso', parisitaponaraihuë', co sëtöpihuë'. Cato chachin Yosë nontápi. Yosë chinotatona', cantarapi. Apiro'sa' natantapi. <sup>26</sup> A'nanaya panca ocohua pa'nin. Tashinan pëi' achinicaso marë acotopiquë huarë', nacon nacontarin. Naporo' Yosë nohuanton, ya'coanaro'sa' nii'soatëra'piapi. Ya'ipi apiro'sa' catinanëna' nii'quiritopi. <sup>27</sup> Tashinan pëi' hua'an capayatohuachina. Ya'coanaro'sa' nii'soatöpinan ni'nin. “Ya'ipi apiro'sa' capa, nani ta'api,” ta'ton, sahuëninën ocoirahuaton, yanitëparin.

<sup>28</sup> Paonoriso nipirinhüë' a'naroáchin nontërin:

—¡Ama iyasha nitëpaquësohuë'! ¡Co ta'araihuë'! itërin chiníquën nontaton.

<sup>29</sup> Ina natanahuaton: “¿Naporin ti?” tosahuaton, pa'yanin. “Nanparin quëshico ni'i,” itohuachina, piyapinënpitari quëpatopi. Manorahuaton, ya'conin. Pa'yanaton, ropa ropátarin. Paono pirayan isonahuaton, mosharin. <sup>30</sup> Ina quëran cato chachin ocoirahuaton:

—¿Ma'ta' iyaro'sa' onpo'i cha'ëca'huaso marë'? itërin.

<sup>31</sup> —Quisocristoíchin nicha'ërinpoa'. Ina natëhuatan, cha'ësan. Sa'an, hui'nanpita inapitarë'quën chachin cha'ësan. <sup>32</sup> Ina tosahuaton, Quisocristo nanamën a'chintërin. Ya'ipi pëinëinquë ya'huëpisopita natanpi. <sup>33</sup> Tashinan pëi' hua'anso' noya natanahuaton, natërin. Tashi' nipirinhüë', quëparahuaton, nicarotopiso' pa'mopirin. Napohuachina, Quisoso imapi huachi ni'ton, ya'ipiya aporintërin. <sup>34</sup> Nani aporihuanpachinara, pëinëinquë quëparin. Inaquë a'carin. Yosë natëtona', ya'ipiya noya cancantopi.

<sup>35</sup> Coisëro'saso' nipirinhüë' co nitotöpihuë'. Tahuërihuachina, sontaro'sa' amatahuatona', itopi: “Tashinan pëi' hua'an sha'huitonco' catoya'pi i'huara po'moraiso' ocoi'in pa'ina',” itohuachinara, pa'pi sha'huitapona'. <sup>36</sup> Ina natanahuaton, Paono itapon:

—Coisëro'sa' nanan a'patërinaco ocoia'huainquëmaso marë'. Napoaton noya pipico', itërin hua'ani.

<sup>37</sup> Paonoso nipirinhüë' sontaro'sa' itërin:

—Co po'oana quëran pa'saraihuë'. Quiyaso' Noma piyapicoi nipiraihuë', naraquë hui'tonpirinacoi. Co coisëquë sha'huirapiponaracoihuë', cachiquë chachin napotërinacoi. Ina quëran tashinan pëiquë po'morinacoi. Noma piyapicoi ni'toi, co topinan ana'intinacoisohüë' nipirinhüë'. ¿Iporaso' po'oana quëran yaocoiantarinaracoi ti? ¡Co'chi nohuantëraihuë' paya! Sha'huitëquë' inahuara chachin huë'ina'. A'ninquëchin ocoi'inacoi, itërin.

<sup>38</sup> Sontaro'sa' paantarahuatona', coisëro'sa' sha'huitonpi: “Inapitaso' Noma piyapi'sa',” topachinara, pa'yanpi. Co topinan quëran Noma piyapi' ahuëcasohuë' nipirinhuë', ahuëpi. <sup>39</sup> Napoaton tashinan pëiquë pa'sahuatona', noya nontopi. “¿Canpitanta' Noma piyapinquëma' ti?” itohuachina, “Inacoi mini,” tënin Paono. “Co'chi nitotëraihuë' paya. Co nitotatoihuë' ahuërainquëma', co ahuëca'huainquëmasohuë' nipirinhuë',” itërin. Ina quëran noya ocoirahuatona', “A'na parti paco',” itopi. <sup>40</sup> Napotohuachinara, tashinan pëi quëran pipipi. Pipirahuatona', Niria pëinënquë paantapi. Quisoso imapisopita niyontonpachinara, pi'pian pënëantapi: “Chiniquën cancantatoma', imamiatoco',” itopi. Ina quëran pa'pi huachi.

## 17

### *Tisaronicaquë a'chininso marë' no'huipiso'*

<sup>1</sup> Ina quëran Anpiporisë na'huëtahuatona', Aporonianta' na'huëtaantapi. Ina quëran Tisaronicaquë canconpi. Inaquë cotioro'sa' niyontonpiso pëi' ya'huërin. <sup>2</sup> Inachintërin nichinapon chachin cara chinoto tahuëri inaquë Paono Yosë quiricanën a'chinin.

<sup>3</sup> —Quisocriso imaco' canpitanta'. Inaso' inápa quëran o'marin, Yosëri a'paimarinso'. Ina nohuanton, oshanënpoa marë' chiminin. Chiminpirinhuë', Yosë nohuanton, nantiantarin. Iráca quiricanën quëran ninorinso chachin naporin. Inaso' Cristo, Yosëri acorinso', tënin.

<sup>4</sup> A'naquën natanahuatona', natëpi. Natëtona', imasapi. Na'a Crico piyapi'santa' imasapi. Nisha piyapi'sa' niponaraihuë', Yosë chinotopi. Paono a'chininso' natanahuatona', Quisoso imasapi. Na'amiachin sanapi'santa' chiniquën nanantopisopita imasapi. <sup>5</sup> A'naquën cotioro'saso nipirinahuë', co yanatëpihuë'. “Na'a piyapi'sa' Quisoso imasapi,” ta'tona', apiratopi. Apiratatona', no'huipi. Cachiquë pa'sahuatona', no'huitërayaro'sa', chirotëro'sa', inapita itapona': “Huëco' Paono, Sirasërë chachin macatëhua' ana'intahua',” ta'tona', piyapi'sa' ayontonpi. No'huitëratona', Casono pëinënquë pa'pi. Inaquë Paono yacapatërin ni'ton, macacaiso marë' pa'pi. Ya'coana papaatahuatona', ya'conpirinahuë', <sup>6</sup> co Paono ya'huërinhuë'. Co ina quënanatonahuë', Casono mapi. A'napita Quisoso imapisopitanta' masahuatona', ninano hua'ano'saquë quëpapi.

—Paono ya'ipi parti pa'sárin. A'chintaton, notohuaro' piyapi'sa' anishacancantarin. Sirasënta' inachachin nisarin. Isëquënta' huë'pachinara, <sup>7</sup> Casonori pëinënquë aya'conin ni'ton, inaquë yacapapi. Isopitanta' imatona', co huachi Noma copirno natëtonahuë', nisha imasapi. “A'na copirno ya'huarin. Inaso' Quisoso,” toconpi, itopi.

<sup>8</sup> Piyapi'sa' natanahuatona', aquë aquëtë' no'huitopi. Hua'ano'santa' no'huitatona', Casono, a'napita imapisopita inapita chiniquën pënënpi. <sup>9</sup> Ina quëran coriqui ma'papi ama tashinan pëiquë po'mocaiso marëhuë'. Nani pahuërëtohuachinara, a'papi.

### *Piriquë Yosë quiricanën na'con nontopiso'*

<sup>10</sup> Quisoso imapisopita pipirahuatona', ya'huëpi'pa' paantapi. Naporo' tashi' Paono, Sirasë, inapita Piriquë a'papi. Inaquë canconahuatona', cotioro'sa' niyontonpiso pëiquë pa'pi a'chinacaiso marë'. <sup>11</sup> Inaquë ya'huëpisopitaso nipirinhuë' nóya yonquipi. Co Tisaronicaquë ya'huëpisopita pochinhuë'. Paonori a'chintohuachina, nóya natanpi. “Paonosó' no'tëquën a'chinamara,” ta'tona', nani tahuëri Yosë quiricanën noyásha nontapi no'tëquën nitotacaiso marë'. <sup>12</sup> Naporahuatona', na'a cotioro'sa' natëpi. Na'amiachin Crico sanapi'santa' chiniquën nanantopisopita natëpi. A'naquën Crico quëmapi'santa' imasapi. <sup>13</sup> Napopiso', Tisaronicaquë nahuinin. Cotioro'saso' natanahuatona', “Piriquënta' Paono Yosë nanamën a'chinarin,” ta'tona', inatohua' pa'pi. Canconahuatona', Paono sha'huirapitona', piyapi'sa' ano'huitopi. <sup>14</sup> Napohuachinara, Quisoso imapisopitari a'naroáchin Paono a'papi. A'naquëni ca'tanatona', marë yonsanquë'pa' quëpapi. Sirasë, Timotio, inapitaso nipirinhuë' co pa'pihuë'. <sup>15</sup> Atinasë'pa' Paono



ca'tanpi. Yapanantahuachinara, —Sirasë, Timotio, cato chachin sha'huitonco' manóton huë'ina', itërin Paonori. Napotohuachina, ya'huëpi'pa' panantapi.

*Atinasëquë nisha nisha moshapiso'*

<sup>16</sup> Paonoso nipirinhüë' Atinasëquë Sirasë, Timotio, inapita ninararin. Ninano' conitaton, notohuaro' mamanshi quënanin. Inapita quënanahuaton, sëtërin. Inapoaton, napion cancantërin. <sup>17</sup> Napoaton na'con pënëntërin. Niyontonpiso pëiquë pa'sahuaton, cotioro'sa' a'chintërin. Cotioro'sa' pochin chinotopisopitanta' natanapi. Quisoso nanamën a'chintohuachina, ninontápi. Naporahuaton, nani tahuëriya cachiquë pa'nin. Inaquë a'naya a'naya huë'pachinara, nontarin. Nisha piyapi'santa' natanapi. <sup>18</sup> Inaquë nisha nisha yonquipiso' a'china'piro'santa' huë'pi. A'naquën ipicorioro'sa' itopi. A'naquëonta' istoicoro'sa' itopi. Paono quënanahuatona', ninontopi.

—Iso quëmapi pa'pi nona'pi. ¿Ma'ta' tēcapon naporin? itopi a'naquën.

—Ahuën. Nisha yosëro'sa' imacaiso marë' a'chinamara, topi a'naquën. “Quisoso chiminin. Ina quëran nanopiantarin,” tëninsö marë' napotopi. <sup>19</sup> A'naquënso natanahuatona', Ariopaco itopiquë quëpapi. Inaso' hua'ano'sa' niyontoyantopiquë. Paono inaquë quëparahuatona', itopi:

—¿Ma nisha nanan chachinta' a'chinan? Yanitotërai quiyanta'. <sup>20</sup> Co onporonta' natanchinaihuë'. A'chintocoi quiyanta' nitochii, itopi.

<sup>21</sup> Inaquë ya'huëpisopita nasha nanano'sa' pa'yatopi. Nisha nisha a'chinpiso' yanatanpi. Nisha piyapi'sa' huë'pisopitanta' yanatanpi.

<sup>22</sup> Paono inaquë huanirahuaton, Atinasëquë ya'huëpisopita itërin:

“Natanco iyaro'sa' pi'pian sha'huichinquëma'. Canpitaso' ya'ipinquëma' na'con moshatërama', ténahuë. <sup>23</sup> Cachiquë pa'patora, ya'ipi moshatëramaso' ni'nahuë. A'na artaro quënanahuë. Inaquë ninshitërama'. 'ISOSO YOSË CO NOHUITOPIRËhuahuë', MOSHAHUA', tënama' ninshitatoma'. Co nohuitapomarahuë', mosharama'. Apira carinquëma' a'chinchinquëma', nohuitoco'.

<sup>24</sup> Ina Yosëso' chini chiniquën nanantërin. Iráca isoro'pa', ya'ipi ma'sha isëquë ya'huërinsona' acorin. Inaso' hua'anënpoa'. Isoro'paquë ya'huërinso'pita, inápaquë ya'huërinso'pita, ya'ipimiáchin hua'anëntarin. Moshatopiso pëi' piyapi'sari nipiquë co Yosë ya'huërinhuë'. <sup>25</sup> Co piyapi ma'shanënpita nohuantërinhuë'. Co manta' pahuantërinhuë'. Inariáchin ya'ipi ma'shanënpoa' quëtërinpoa'. Ina nohuanton, nanopirëhua'. Ina nohuanton, cosharo', ma'sha, inapita ya'huëtërinpoa'.

<sup>26</sup> Iráca a'na quëmapi'ra' ninin. Inaya quëranchin ya'ipi piyapi'sa' na'api. Nisha nisha nipisopita na'api ya'ipiro'paquë ya'huëcaiso marë'. Co'huara ya'huëyatërasëhuahuë', yonquirinpoa'. Nisha nisha parti ya'huëcaso marë' acorinpoa'. Onporosona nanopicahuasonta' yonquirin. Ina nohuanton, nanopirëhua'. <sup>27</sup> Ya'ipinpoa' acorinpoa' ina nohuitacaso marë'. Co quënanarihuarahuë', ina na'con yonquicaso' ya'huërin. Co inaso' aquë patërinpoahuë'. Co naniantërinpoahuë'. <sup>28</sup> Ina nohuanton nanopiarëhua', pa'nëhua', ya'huërhua'. A'nara' cancan yonquina'pi ninshitaton, no'tëquën naporin: 'Canpoaso' Yosë hui'nin'pita pochin ninëhua', tënin.

<sup>29</sup> Napoaton Yosënta' canpoa pochin nanopirárin anta'. Co inaso' mamanshi pochinhüë'. Mamanshisö nipirinhüë' piyapi'sari inahuara yonquinëna quëran nipi. Oro quëran, prata quëran, na'pi quëran, ina quëranpita nipi. Ama Yosëso' mamanshi pochin cancantocohüë'. <sup>30</sup> Iráca co Yosë nohuitopihüë' ni'ton, co ana'intërinhuë'. Iporaso nipirinhüë', ya'ipi piyapinpoa' pënëninpoa': 'Co noyahuë' yonquiramaso' naniantatoma', casáchin chinotoco,' itërinpoa' Yosë. <sup>31</sup> A'na tahuëri co noyahuë' nipisopita no'tëquën ana'ntarin. Nani Quisoso acorin coisë pochin nicon, ya'ipi piyapi'sa' no'tëquën sha'huitacaso marë'. Inaso' piyapi chachin ni'ton, chiminpirinhüë', Yosëri ananpitaantarin. Napoaton inaso', Yosëri acorinso', tënëhua', tënin Paono.



<sup>32</sup> “Ananpitaantarin,” tēninsō marē', “Tēhuēnchachin ta'ma' ananpitēca,” ta'tona', tēhuapi a'naquēn. A'naquēnsō nipirinhüē' co tēhuapihuē'.

—A'na tahuēri a'chintaantacoī, itopi.

<sup>33</sup> Ina quēran Paono pa'nin. <sup>34</sup> A'naquēnsō nipirinhüē' natētona', imapi. Quisoso natēpi. A'naso' Tionisio, Ariopaco hua'an nininsō'. A'nanta' sanapi, Tamarisa itopiso'. A'napitanta' imasapi.

## 18

### *Corintoquē Paono a'chininsō'*

<sup>1</sup> Ina quēran Paono pipirahuaton, Corintoquē pa'nin. <sup>2</sup> Inaquē a'na cotio quēmapi Aquiro itopiso' quēnanconin. Inaso' Pontoquē nasitērin. Sa'inso' Pisisira itopi. I'huamiáchin Itaria parti ya'huēpi. Nomaquē chachin ya'huēpirinahuē', copirno Craotiori camaitohuachina, ya'ipi cotioro'sa' pipipi. Aquirosō' ina quēran pipirahuaton, Corintoquē huē'nin. Ina pēinēnquē Paono pa'nin ni'tapon. <sup>3</sup> Paonosō' nē'mētē' pēiro'sa' nina'pi. Aquirona' inaquē chachin sacatērin ni'ton, inaquē yacapatērin nicatahuacaiso marē'. <sup>4</sup> Nani chinoto tahuēri cotioro'sa' niyontonpiso pēiquē pa'sahuaton, cotioro'sa' a'chintērin. Cricoro'santa' a'chintaton: “Quisoso natēco' canpitanta',” itērin.

<sup>5</sup> Ina quēran Sirasē Timotiorē chachin Masitonia parti quēran canquipi. Canquihuachinara, Paono na'con na'con a'chinarin quēnaimapi. Nani tahuēri cotioro'sa' Quisoso nanamēn a'chintárin. “Inaso Cristo, Yosēri a'paimarinso',” itaton na'con pēnēnin. <sup>6</sup> Inapitaso nipirinhüē' no'huitona', Paono pinopi. Napoaton tananpitērin.

—Tēhuēnchachin Yosē ana'intarinquēma'. Nani ya'ipi a'chintopiranquēmahuē', co yanatēramahuē' ni'ton, canpitaora tēhuēnēmaquē nina'intarama'. Iporaso nisha piyapi'sa' a'chintarahüē huachi, tēnin Paono.

<sup>7</sup> Ina quēran co huachi cotioro'sa' niyontonpiso pēiquē a'chintērinhuē'. Pipirahuaton, Tisio Costo pēinēnquē pa'nin. Inaso' nisha piyapi niponahuē', Yosē chinotērin. Niyontonpiso pēi' pirayan ya'huērin. Ina pēinēnquē pa'nin a'chinacaso marē'. <sup>8</sup> Cotio niyontonpiso pēi' hua'aonta' natanahuaton, natērin, Crispo itopiso'. Ina pēinēnquē ya'huēpisopitanta' Quisoso imasapi. Na'a ya'huēhuano'sa' Quisoso nanamēn natanahuatona', natēpi. Natēhuachinara, aporihuanpi. <sup>9</sup> A'na tashi' Yosē nohuanon, Paono hua'narēso pochin niantarin. Siniorori chachin itapon: “Ama tē'huaton, copitēquēsohuē'. A'chináquē'. <sup>10</sup> Carinquēn catahuaranquēn. A'naquēn no'huipirinēnquēonta', noya a'paiaranquēn. Co insonta' nanitapaponhuē' ma'sha onpotinquēnsō'. Na'a piyapi'sa' isēquē yaimarinaco. Napoaton a'chintáquē',” itērin. <sup>11</sup> Napotohuachina, inaquē a'na pi'ipi miria ya'huaton, Yosē nanamēn a'chinárin.

<sup>12</sup> Ina quēran Cariono Acaya parti hua'anēntohuachina, cotioro'sari Paono no'huitona', niyontonpi. Ina masahuatona', hua'ano'sataquē quēpapi ana'intacaiso marē'.

<sup>13</sup> —Moisēsē iráca pēnēncoiso pochin Yosē chinotērai. Iso quēmapišo nipirinhüē' nisha a'chinarin. Piyapi'sa' anishacancantarin, itopi.

<sup>14</sup> Paonori yanontapirinhüē', hua'ani itapon:

—Canpita cotioro'sanquēma' co yanatananquēmahuē'. Paso' quēmapi co noyahuē' ninin naporini, nata'intonhuē'. Ihuatērin, ahuētērin, inaporin naporini tēhuēnchinso', natanacaso' ya'huē'itonhuē'. <sup>15</sup> Nipirinhüē', nisha nisha nanan cotioro'sanquēma' ya'huētērinquēma'. Nipēnēnamaso' quiricanta' ya'huētērinquēma'. Co caso' nohuanterahuē' ina yonquica'huaso'. Canpita capini anoyatoco', itērin.

<sup>16</sup> Itahuaton, a'parin. <sup>17</sup> Na'a piyapi'sari ni'sapi. Ni'sahuatona', cotio niyontonpiso pēi' hua'an mapi, Sostinisē itopiso'. Masahuatona', inaquē chachin ahuēpi. Carionori nicaponahuē', co manta' tēninhüē'. Co ina yonquirinhüē'.

### *Antioquiaquē paantapiso'*

<sup>18</sup> Hua'qui' Paono inaquë ya'huantarin. Ina quëran Quisoso imapisopita nontahuaton, pa'nin huachi. Aquiro sa'inë chachin pa'pi anta'. Nanchaquë Siria parti yapantapirinahuë'. Sincriaquë canconahuaton, Paono noyá niya'itërin. Yosë sha'huitërinso' nanirin ni'ton, naporin. Ina quëran nanchaquë ya'conpi. <sup>19</sup> Ipiquë canconpachinara, nonshipi. Aquiroso' sa'inë chachin inaquë quëparitërin. Paonos' yapaantahuachina, cotio niyontonpiso pëiquë ya'conahuaton, a'chintërin. Cotioro'sarë' ninontopi. <sup>20</sup> "Hua'qui' ya'huaton, a'chintaantacoi," itopirinahuë', co nanitërinhuë'. <sup>21</sup> "A'na tahuëri Yosë nohuantohuachin, huëantarahuë," tënin.

Ina quëran nanchaquë ya'coantarahuaton, paantarin. <sup>22</sup> Sisariaquë nonshiconahuaton, Quirosaringuë pa'nin. Ya'ipi Quisoso imapisopita inaquë ya'huëpiso' nontërin. Ina quëran Antioquiaquë paantarin. <sup>23</sup> Hua'quimiáchin inaquë ya'huërin. Ina quëran naquëranchin yonquirin paaton nasha imapisopita nicacaso marë'. Carasia parti pa'sahuaton, pënëna'piarin. Naporahuaton, Piriquia partinta' pa'sahuaton, pënëna'piarin. A'naya a'naya ninanoro'saquë Quisoso imapisopita achinicancana'piarin. Achinicancanpachina, noya noya imasapi.

### *Aporosë Ipiquë pënëntërinso'*

<sup>24</sup> Napor' tahuëri'sa' a'na cotio quëmapi Ipiquë pa'nin, Aporosë itopiso'. Aricantriaquë nasitërin. Noyá nitotërin a'chinacaso'. Yosë quiricanën iráca ninshitopisonta' noya nitotërin. <sup>25</sup> Siniro iranën anitotopi ni'ton, a'ninquëchin nanamën a'chintarin. Ya'ipi cancanën quëran a'chinin. Quisoso naporinso' no'tëquën a'chinaponahuë', Coansha aporintërinso'áchin nitotërin. <sup>26</sup> Cotioro'sa' niyontonpiso pëiquë ya'conahuaton, chiniquën cancantaton, a'chinpirinhuë'. Pirisira, Aquiro, inapitari natanahuatona': "Co ya'ipi Quisoso nanamën nitochátërarinhuë'," ta'tona', pëinënuquë quëpapi. Inaquë ya'ipi Quisoso nanamën a'chintopi no'tëquën nitotaton, Yosë iranën pa'tacaso marë'. Ina natanahuaton, natërin. <sup>27</sup> Ina quëran Acaya parti yapa'sarin a'chinacaso marë'. "Acaya parti a'chinchí, topirahuë'," topachina: "Noya iyasha. Noya paquë'," itopi Quisoso imapisopitari. Naporahuatona', quirica ninshitopi quëtontacaiso marë'. "I'huata, iyaro'sa'. Aporosë huë'pachin, noya nontoco'. Inanta' Quisoso imarin ni'ton, noya natanco'," itopi ninshitatona'. Quirica ma'patahuaton, Acaya parti pa'nin. Inaquë Quisoso imapisopita quënanconin. Yosëri catahuarin ni'ton, Quisoso imapi. Inapita quënanconahuaton, noya a'chintaton, achinicancanarin. <sup>28</sup> Piyapi'sa' niyontonpachinara, Yosë quiricanën a'chinárin. "Iráca quëran huarë' Cristo o'macaso' ninopi. Iporaso' nani o'marin. Inaso' Quisoso," tënin. Quiricanën quëran anitotërin. Noya noya a'chinin ni'ton, cotioro'sa' co nanitopihuë': "Nonpiánin" ta'caiso'.

## 19

### *Ipiquë Paono a'chininso'*

<sup>1</sup> Aporosë Corintoquë ya'huaso', Paono huancoro ira pa'tahuaton, Ipiquë canconin. Inaquë na'amiáchin imapisopita quënanconin.

<sup>2</sup>—Quisoso natëhuatamara, ¿Ispirito Santo ya'coancantërinquëma' ti? itërin.

—Co Ispirito Santo nohuitëraihuë'. Co ina a'chintërinacoihuë', itopi.

<sup>3</sup>—¿Ma'ta' natëhuatamara aporihuanama'? itërin.

—Coansha pënëntërinso' natëtoi, aporihuanai, itopi.

<sup>4</sup>—Coanshaso pënëntërin co noyahuë' yonquisopita naniantacaiso marë'. Ina quëran aporintërin. Nipirinhuë', co inasáchin sha'huirinhue'. "Ca piquëran a'na quëmapi huë'sarin, Yosëri a'paimarinso'. Ina imaco'," itërin anta'. Napoaton Quisoso imaco', itërin Paonori.

<sup>5</sup> Ina natanahuatona': "Siniro Quisoso imasarai. Ina natëarai huachi," ta'tona', aporihuanpi. <sup>6</sup> Ina quëran Paonori së'huamotohuachina, Ispirito Santori ya'coancantimarin. Ina nohuanton, nisha nisha nananquë nonpi. Co nitotopirinahuë', a'naroáchin nonpi

anta'. Naporahuaton, Ispirito Santori catahuarin Yosëri anitotërinso sha'huicaiso marë'.  
<sup>7</sup> Shonca catoya'pi pochin napopi.

<sup>8</sup> Hua'qui' inaquë Paono ya'huërin. Cara yoqui pochin cotioro'sa' a'chintárin. Nani simana niyontonpiso pëiquë pa'nin. Co tē'huatonhuë', a'chintárin. “Yosë yahua'anëntërinquëma'. Ina marë' Quisoso a'paimarin. Ina imaco',” itarin. <sup>9</sup> A'naquënso nipirinhuë' co natantochináchinhuë' cancantatona', co yanatëpihuë'. Piyapi'sa' niyontonpachinara, no'huitopi. No'huitatona', —Co Quisoso nanamën imacaso' ya'huërinhuë', toconpi. Napoaton Paonori patërin. Quisoso imapisopita quëparahuaton, iscoira pëiquë pa'nin. Tirano a'chinquë paaton, nani tahuëri a'chintárin. <sup>10</sup> Cato' pi'ipi inaquë ya'huaton, a'chinin. Siniro nanamën ya'ipi Asia parti nahuinin. Cotioro'sa' natantopi. Na'a nisha piyapi'santa' natantopi. <sup>11</sup> Yosë nohuanton, Paono nani ma'sha nanitaparin. Cania'piro'sa' sē'huahuachina, a'naroáchin noyatopi. <sup>12</sup> Panionën, a'morinso', inapita tēranta' quëparahuatona', cania'piro'sa' quëtonpachinara, a'naroáchin noyatopi. Sopairo'santa' pipipi.

<sup>13-14</sup> A'naquën cotioro'santa', sopairo'sa' yaa'papi. Paono nicatona', yanonanpi. A'naquënso' Isipo corto hua'an hui'ninpita napopi. Canchisë hui'ninpita chachin napopi. Co Quisoso imaponaraihuë', sopairi ya'coancantërinso' itapona': “Quisoso nanan quëtërincoi ni'ton, a'paarainquën. Ina nanamën Paononta' a'chinarin. Napoaton pipiquë huachi,” itopirinahuë', <sup>15</sup> sopairi a'panirin: “Quisoso nohuitërahuë. Paononta' nohuitërahuë'. Canpitaso napoaponahuë', co nohuitëranquëmahuë',” itërin.

<sup>16</sup> Ina toshuaton, quëmapi hua'yantërinsoari pashita'parin Inapotaton, canchisëya'pi chachin manin. Chiniquën ahuëaton, pē'shara'piarin. A'naya'piáchin niponahuë', canchisëya'pi minsërin. A'mopisonta' oshato oshatotërin. I'nanpirapi ta'api. <sup>17</sup> Ya'ipi ninanoquë nahuinin. Cotioro'sa', nisha piyapi'sa', inapita natanahuatona', pa'yanpi. “Siniro Quisoso chini chiniquën nanantërin,” topi.

<sup>18</sup> Ina quëran na'amiáchin Quisoso imapisopita huë'pi. “Quiyanta' pënotopiraihuë'. Co noyahuë' ninaiso' a'poarai,” itopi. <sup>19</sup> A'naquënso' pënoton quirica ya'huëtopi. Inapita a'porahuatona', quëntapi ahuiquitacaiso marë'. Na'a piyapi'sa' nicasoi', ahuiquitopi. Pa'tërinso pichihuachinara: “A'natërápo shonca huaranca coriqui prata quëran nininso pa'tërin,” topi. <sup>20</sup> Pënotono'santa' pënotopiso' a'porahuatona', cancanëna quëran huarë' imasapi ni'ton, Siniro nanamën ya'ipi parti nahuinin. Na'con na'con imasapi.

<sup>21</sup> Ina quëran Paono yonquirin a'napita imapisopita ni'coantacaso marë': “Masitonia parti ni'coantarahuë. Acaya partinta' nisha nisha ninanoquë imapisopita niantarahuë. Nani pënëantahuato, Quirosarinquë paantarahuë. Ina quëran Nomaquë'pa' paca'huaso' ya'huërin,” tënin. <sup>22</sup> Timotio, Irasito, inapitari inaquë catahuapirinahuë', Paonori a'parin Masitonia parti imapisopita a'chintacaiso marë'. Inaso nipirinhuë', hua'quimiachin Asia parti quëparitantarin.

### *Artimisa moshapiso'*

<sup>23</sup> Naporo' na'a piyapi'sa' Siniro imasapi ni'ton, mamanshi moshana'piro'sa' no'huitopi. <sup>24</sup> Inaquë moshapiso' Artimisa itopi. Na'a mamanshi nina'piro'sa' ya'huëpi. Mamanshi pëia'huaro'sa' prata quëran nonanpi. Ina pa'anatona', na'con canapi. A'nara' Timitirio itopi. <sup>25</sup> Inari ya'ipi piyapinënpita ayontonin. A'napita ma'sha nina'piro'santa' amatërin. Ya'ipi niyontonpachinara, itapon: “Ni'co', iyaro'sa'. Mamanshi ninëhua quëran na'con canarëhua'. <sup>26</sup> Paonosonipirinhuë' isëquë huëcaton, pënëntarin. ‘A'naíchin Yosë ya'huërin. Piyapi'sari nipiso' co inaso' Yosëhuë', tosarín, natanama' canpitanta'. Ya'ipi Asia partinta' nahuinin. Na'a piyapi'sa' natanahuatona', natëpi. Natëtona', mamanshi a'popi. <sup>27</sup> Napohuachina', co huachi noya ni'sarinënpohuë'. Co onpopinchin canarihuahuë'. Artimisaonta' naniantapi. Inaso' chini chiniquën nanantërin. Ya'ipi asiaro'sa' moshapiso'. Ya'ipi parti quëran nohuitopi. Aquëtë chachin Paono

natëhuachina', co huachi moshato pëiquë huë'sapihuë'. Artimisa nóya nipirinhüë', co huachi moshaapihuë', itërin.

<sup>28</sup> Natanahuatona', Paono chiníquën no'huipi. "¡Ma noyacha Artimisasiyo paya! Ina chinotërehuaso'," tosapi chiníquën nonatona'.

<sup>29</sup> Ina quëran ya'ipi piyapi'sa' noncaropi. No'huitatona', Paono ca'taninsopita mapi, Acayo, Aristarico inapita itopiso'. Inapitaso' masitoniaro'sa'. Chiníquën masahuatona', huëntëntërahuatona', niyontopiso i'iratëquë quëpapi. <sup>30</sup> Paononta' piyapi'sa' nontapon yapa'pirinhüë', Quisoso imapisopitari to'shitëatona', ya'copipi. "Ama paquësohuë'," itopi. <sup>31</sup> A'naquën Asia parti hua'ano'santa' Paono amiconënpita ni'ton, nanan a'patopi. "Ama niyontopiso i'iratëquë pa'insohuë'," itopi. <sup>32</sup> Piyapi'saso' noncaroápi. Nisha nisha nonsápi. Na'con na'con piyapi'sa' co nitotatonaraihuë', "¿ma'marëcha niyontonëhua' nicaya?" topi. <sup>33</sup> Ina quëran cotio hua'ano'saso', Aricantro itopiso ca'maipi piyapi'sa' nontacaso marë'. Napoaton huancánachin huanirahuaton, anquirarin piyapi'sa' ta'tacaiso marë': "Co quiya tëhuëraihuë'," ta'caso' yonquipirinhüë', <sup>34</sup> "inaso' cotio quëmapi," ta'tona', co yanatanpihuë'.

"¡Ma noyacha Artimisasiyo paya! Ina chinotërehuaso'," tosapi chiníquën nonatona'. Cato' ora pochin naporápi.

<sup>35</sup> Parisi quëran ninshitona'pi hua'ani atonirin. Atonirahuaton, itapon: "Tëhuënhachin iyaro'sa', Artimisasiyo chini chiníquën nanantërin. Inaso ya'ipiyo quëran nitotopi. Iráca inápa quëran anotimarin. Iso ninanonënpoaquë chachin anotimarin ni'ton, canpoari a'pairëhua'. <sup>36</sup> Ya'ipiyo nitotopi ni'ton, ama huachi no'huitocoso huë'. Ama topinan quëran ahuëtocoso huë'. <sup>37</sup> Isopita quëmapi'sa' quëpiramahüë'. Co Artimisa sha'huirapipihuë'. Co moshato pëiquë ihuatopihuë'. <sup>38</sup> Timitirio, mamanshi nina'piro'sa', inapitari yasha'huirapihuachina', coisëquë pa'ina'. Hua'ano'santa' ya'huërapí. Inaquë quëparahuatona', sha'huirapiina'. <sup>39</sup> Aquëtë huarë' nanan ya'huëhuachin, hua'ano'sa' niyontopiquë natanco'. <sup>40</sup> Ipora tahuëri topinan quëran noncaroarama'. Co manta' onpocasohuë' nipirinhüë', naporama'. Ni'cona, copirno no'huihuachinpoa'. <sup>41</sup> Ya'huëramaquë paco'," topachina, yanquëëpi.

## 20

### *Masitonia parti, Crisia parti, inaquëpita a'chiantarinso'*

<sup>1</sup> Piyapi'sa' nani yanquëëhuachinara, co huachi no'huitantapihuë'. Ina quëran Paono yapaantarín. Ya'ipi imapisopita amatahuaton, achinicananin. Ina quëran "Pa'sarahüë huachi," topachina, "Osharan paquë'," itohuachinara, Masitoniaquë pa'nin. <sup>2</sup> Masitonia parti pa'taton, pënëna'piarín achinicananacaso marë'. Inapotaton, Crisia parti canconin. <sup>3</sup> Inaquë cara yoqui yacapatërin. Ina quëran Siria parti yapa'pirinhüë'. Nanchaquë yaya'conaso', cotioro'sari yatëpapiso' natantërin. Napoaton co inaquë pa'ninhüë'. "Masitonia parti paantarahuë'," ta'ton, ira pa'tërin. <sup>4</sup> Na'a piyapi'sari ca'tanpi. Sopatiro (Pirro hui'nin, Piriyaquë ya'huërinso'), Aristarco, Sicono, (Tisaronicaquë ya'huëpiso'), Acayo (Tirpiquë ya'huërinso'), Timotio, Tiquico, Tropimo (Asia parti ya'huëpiso') inapita Paono ca'tanpi. <sup>5</sup> Inapitaso' quëchitërahuatona', Troasëquë ninarinacoi. <sup>6</sup> Pita tahuëri nanihuachina, Piriposë quëran pipirai. Naporo' nisha pan ca'sapi, co ahuëpocatopisohuë'. Nanchaquë ya'conahuatoí, marë pa'tërai. A'natërápo tahuëri quëran Troasëquë canconahuatoí, inapita quënanconai. Inaquë a'na simana ya'huërai.

### *Hui'napi inapa quëran anotërinso'*

<sup>7</sup> Tomio tahuëri nanihuachina, niyontonai Quisoso chimininsó' yonquiatoí coshata'huaiso marë'. Naporo' Paonori a'chintarin: "Tashiraya pa'sarai," ta'ton, yono tashiquë huarë' a'chinin. <sup>8</sup> Inapa pë'satë' pëiquë niyontonai. Inaquë na'a nanparin



orotarin. <sup>9</sup> A'na hui'napi Iotico itopiso', huintanaquë huënsëápirinhuë', Paono hua'qui' a'chinpachina, inaso huë'ëi' iquitaton, iquëtërarin quëran anotërin. Cara pa'cotë quëran anotohuachina nohuararahuatona' nimapirinuë', chiminin quënamapi. <sup>10</sup> Paononta nohuararahuaton, ipomarin.

—Ama pa'yancosohuë', nanpiarin, itërin piyapi'sa'.

<sup>11</sup> Ina quëran pëiquë nanpëonantarin. Quisoso chiminso' yonquiatona', coshatopi. Nani coshatohuachinara, ninontatona', tahuërianpitopi. Ina quëran pa'nin. <sup>12</sup> Hui'napi nanpiantarinsó' ya'huërinquë quëpantapi. Napoaton có sëtópihuë'. Noya cancantopi.

### *Miritoquë pa'naiso'*

<sup>13</sup> Nani Paono sha'huitërincoi: “Canpita'ton potiquë paco'. Asoquë ninataco,” ito-huachincoira, pa'nai. Inaso nipirinuë' ira pa'tërin. <sup>14</sup> Asoquë canconahuatoí, ninarai. Paononta' canconpachina, nanchaquë ya'conahuarincoi. Ina quëran Mitirinquë canconai. <sup>15</sup> Tahuëririnquë Quio notënanquë na'huërai. Ina tashiraya Samosëquë canconai. Ina huënihuaninquë Miritoquë nonshirai. <sup>16</sup> “Nanitohuato, Quirosarinquë Pinti-costisë tahuëri yana'huërahuë,” ta'ton, có Paono nohuantërinhuë' Asia parti hua'quicaso'. Napoaton manorahuatoí, có Ipiquoquë nonshiraihuë'.

### *Ansiano'sa' Ipiquoquë ya'huëpisopita pënënahuatón, patërinso'*

<sup>17</sup> Miritoquë nonshirahuaton, Ipiquoquë nanan a'parin. “Ya'ipi ansiano'sa' sha'huitëquë' huë'ina',” itërin. Sha'huitonpachinara, a'naroáchin huë'pi Paono nicacaiso marë'. <sup>18</sup> Huë'pachinara, Paonori itapon: “Iporaso' iyaro'sa' pi'pian nonchinquëma', noya natanco. Ya'nán Asia parti canquirahuë quëran huarë' nohuitëramaco. Ya'ipi ninahuëso' ni'nama'. Ya'ipiya nitotërama'. Co caso' chirorahuë'. Nani tahuëri pënënanquëma'. <sup>19</sup> Quisocristoíchin natëto, Yosë marë' sacatërahuë. Co a'napita nocanahuë'. ‘Caso' noya noyaco,’ có tënahuë'. A'na tahuëri sëtato, na'nërahuë. Cotioro'sa' na'con chinotërinaco tëpainacoso marë'. Chiníquën aparisitërinaco. <sup>20</sup> Napotopirinacohuë', ahuantato pënënanquëma'. Co të'huato, ta'tërahuë'. Quisoso nanamën no'tëquën sha'huitëranquëma' noya imacamaso marë'. Niyontonpatamara, a'chintëranquëma'. Naporahuaton, a'naya a'naya pëinëmaquënta' paato, a'chintantaranquëma'. <sup>21</sup> Co cotioro'saráchin pënënahuë'. Cricoro'santa' pënënahuë. ‘Co noyahuë' yonquiramasopita naniantatoma', Yosë chachin tahuëretantaco'. Siniro Quisoso natëco huachi. Inasáchin anoyacancantërinpoaso', itëranquëma'. Ya'ipinquëma' a'chintëranquëma'. <sup>22</sup> Iporaso nipirinuë' Ispirito Santo natëto, Quirosarinquë pa'sarahuë. Ma'sona onpotaponaco nimara, có caso' nitotërahuë'. <sup>23</sup> Nisha nisha ninanoro'saquë pa'patora, Ispirito Santo nohuanton, sha'huitëra'piarinaco: ‘Quirosarinquë pa'patan, tashinan pëiquë po'moarinënuquën, chiníquën aparitarinënuquën,’ itërinaco. <sup>24</sup> Yatëpapirinacohuënta', có caso' të'huatërahuë'. Co ina yonquirahuë'. Siniro Quisoso natëa'huasoáchin cancantërahuë. Iráca ina sha'huitërinco a'china'huaso marë'. ‘Yosëri ya'ipi piyapi nosoroaton, anoyacancantacaso' nohuantërin. Ina noya nanan chachin a'chintonquë', itërinco. Napoaton paato, a'chintárahue. Co chimina'huaso' të'huatërahuë'.

<sup>25</sup> Hua'qui' ya'huëramaquë pa'sápato, Yosë hua'anëntërinpoaso' a'chintopiranquëmahuë', apira pa'sarahuë huachi. Co huachi quënanaramacohuë'. <sup>26-27</sup> Ya'ipi Yosë yonquirinpoaso' nani sha'huitëranquëma'. Napoaton no'tëquën itëranquëma'. Insosona có natëhuachinahuë', ina marë' có Yosë ana'ntarincohuë'. Inahuara tëhuënënaquë nina'ntapi. <sup>28</sup> Canpitanta' ni'cona pi'pian tëranta' Yosë naniantotama'. Quisoso imapisopitanta' noya ni'co'. Ispirito Santo nani acorinquëma' hua'anën pochin nicacamaso marë'. Inapitanta' Yosë huëntonënuquë ya'conpi. Quisoso chiminaton, aya'coninpoa'. <sup>29</sup> Nani pa'pato, có noyahuë' quëmapi'sa' huë'sapi. Canoniri ma'sha maninso pochachin yaocoiarinënuquëma'. Pa'sápato'na', anishacancantapi. Co nosoroarinënuquëmahuë'. Ina nani nitotërahuë. <sup>30</sup> A'naquëonta' Quisoso imaponaraihuë',



a'porahuatona', nisha a'chinapona'. Yanonpintarinēnquēma'. Inahua' imacamaso marē' napotarinēnquēma'. <sup>31</sup> Napoaton iyaro'sa', ni'cona nonpintochinēnquēma'. Cara pi'ipi catahuanquēma'. Tahuērirē chachin, tashirē chachin pēnēnanquēma'. Na'con nosororanquēma' ni'ton, na'nēto, a'naya a'nayanquēma' pēnēnanquēma'. Ina yonquiatoma', nipēnēncō', nicatahuaco'.

<sup>32</sup> Pa'pato, Yosē noya a'painquēma'. Quiricanēn quēran nontarinquēma'. Ina quēran nosororinpoaso' anitotaripoa'. Ina natēhuatama', achinicananarinquēma'. Oshaquēran noya noya cancantarama'. Quisocristo imarēhua' ni'ton, anoyacancantērinpoa'. Ina nohuanton, a'na tahuēri ya'ipi sha'huitērinpoaso' noya acotaripoa'.

<sup>33</sup> A'chintohuatēnquēmara, co aquētē' coriqui yonquirahuē'. A'na piyapi coriquinēn co nohuantaparahuē'. Co a'mopiso tēranta' noyapatērahuē'. <sup>34</sup> Caora sacatonēhuē quēran coshatērahuē, ma'sha pahuantērincoso' pa'anahuē. Ca'tanincosopitanta' quētērahuē. Ina nitotērama'. <sup>35</sup> Canpitanta' nonanco. Sacatatoma', pahuantērinsopita ma'sha quētoco'. Siniro Quisoso noninso' yonquico'. 'A'napita ma'sha topinan quētohuachinquēma', noya cancantērama'. Nipirihuē', canpitarinta' nosoroatoma', topinan quētohuatama', noya noya cancantarama', 'tēnin Quisoso,' itērin Paonori.

<sup>36</sup> Ina tosahuaton, inapitarē chachin isonin. Napohuachinara, Yosē nontērin inapita catahuacaso marē'. <sup>37</sup> Naporo' ya'ipiya sētatona', na'nēpi. Paono iporahuatona', apinopi. <sup>38</sup> "Co huachi quēnanaramacohuē'," tēninso marē' na'con sētopi. Ina quēran nanchaquē huarē' imapi.

## 21

### *Co tē'huatonahuē', Quirosarinquē paantarinsō'*

<sup>1</sup> Imapisopita nani nontahuatoī, panca nanchaquē pipirai. Cosēquē no'tēērai. Tahuērinqüē Notasēquē canconai. Ina quēran Pataraqüē canconahuatoī, nonshirai.

<sup>2</sup> Inaquē a'na nancha quēnancoantarai, Pinisia parti yapa'sarinso'. Inaquē ya'conahuatoī, paantarai. <sup>3</sup> Chipri so'ton notērahuatoī, ahuēnan quēran na'huētērai. Pa'sahuatoī, Siria parti canconai. Tiroquē ma'sha oshicaso' ni'ton, inaquē nonshirai. <sup>4</sup> Quisoso imapisopita quēnanconahuatoī, inaquē a'na simana pochin yacapatonai. Ispirito Santo nohuanton, Paono pēnēnpi: "Ama Quirosarinquē paquēsohuē', aparisitochinēn," itopirihuē'. <sup>5</sup> Simana nanihuachina, paantarai. Yapa'patēira, ninano yonsanquē huarē' imarinacoī. Sa'inarē chachin, hui'ninpitare chachin ca'taninacoī. Nonshinanquē isonconahuatoī, Yosē nontērai. <sup>6</sup> Ina quēran imapisopita nontahuatoī, nanchaquē ya'coantarai. Ya'huēhuano'saso nipirihuē' ya'huēpi'pa' paantapi.

<sup>7</sup> Tiro quēran pipirahuatoī, Torimaitaquē canconai. Imapisopita nontahuatoī, a'na tahuērira' i'huatonai. <sup>8</sup> Tahuērinqüē pipiantarahuatoī, Sisariaquē canconai. Inaquē nonshirahuatoī, Pinipi pēinēnquē yacapatonai. Inaso' iráca Quirosarinquē acopi ca'tano'sa' catahuacaso marē'. Canchisēya'pi acohuachinara, inanta' acopi. Iporaso huachi noya nanan sha'huirárin. <sup>9</sup> Catapini hui'ninpita ya'huētērin. Nano'sa' niponaraihuē', co so'yapihuē'. Ispirito Santori catahuanin Yosēri anitotērinso sha'huicaíso'. <sup>10</sup> Inaquē hua'quimiáchin ya'huasocoi, a'na pēnēntona'pi Cotia parti quēran o'marin, Acapo itopiso'. <sup>11</sup> Huē'sahuaton, Paono sintoronēn ocoirahuaton, inaora tanpaquēn nantēnē chachin nitonporin.

—Ispirito Santo nohuanton iyasha, ninorahuē. Quirosarinquē pa'patan, sintoronēnquē nitonporahuēso pochachin cotioro'sa' tonpoarinēnquēn. Nisha piyapi'saquē yo'coaninēnquēn ana'intinēnquēnso marē', itērin. <sup>12</sup> Natanahuatoī: "Ama Quirosarinquē paquēsohuē'," itopiraihuē'. Inaquē ya'huēpisopitarinta' inachachin napotopirihuē', co yanatērincoihuē'.

<sup>13</sup> —¿Onpoatonta' na'nētoma' asētaramaco? Ama huachi na'nēcosohuē'. Inatohua' pa'pato, yatonpoarinaco. Nipirihuē', yapa'sarahuē. Siniro Quisoso imarahuēso

marë' yatëpapirinacohuënta', pa'sarahuë, itërincoi. <sup>14</sup>Hua'qui' nontopiraihuë', inachachin yonquirin ni'ton:

—Noyahua'. Sinioro nohuantohuachin, paquë nipachin, itërai.

<sup>15</sup>Ina quëran ma'shanëhuëipita taparahuatoi, Quirosarinquë paantarai. <sup>16</sup>Pa'patoira, a'naquën imapisopita ca'taninacoi. Mason pëinënquë quëparinacoi yacapata'huaiso marë'. Inaso' Chipri quëran huë'nin, iráca imarinsó'.

### *Santiago nontërinso'*

<sup>17</sup>Quirosarinquë canconpatoira, imapisopita nóya nontërinacoi. Huë'naiso marë' noya cancantopi. <sup>18</sup>Tahuëririnquë Paono pa'nin Santiago nicapon. Quiyanta' pa'nai. Ya'ipi ansiano'sa' inaquë nani niyontonpi. <sup>19</sup>“Huë'cama, iyaro'sa',” itahuaton, Paonori itantapon: “Nani hua'qui' Quisocriso nanamën a'chinahuë. Nisha piyapi'sa' a'chintëra'piarahuë. Yosë catahuarincoi ni'ton, noya natanatona', na'a imasapi huachi,” itërin. Ya'ipi a'chininsó' sha'huitërin.

<sup>20</sup>Natanahuatona', “Ma noyacha Yosëso' ni'ton, nisha piyapi'santa' imasapi paya,” topi a'naya a'naya. Ina quëran itantapi:

—Noya iyasha nipirinhüë', isëquë na'a huaranca cotioro'sa' Quisoso imaponaraihuë', Moisésë iráca pënëntërinso' yanatëpi anta'. “Inanta' natëcaso' ya'huërin,” topi.

<sup>21</sup>Inapitaso' nonpin nanan natantopi. “Paono nisha piyapi'sa' ya'huërinquë paaton, cotioro'sa' inaquë ya'huëpisopita nisha a'chintërin. ‘Moisésë pënëntërinso' a'poco'. Ama huachi hui'namapita marca acotocosohüë', tënin Paono pënëntaton. Co nohuantërinhuë' iráca napopiso' natëcaiso',” topi, natantopi. <sup>22</sup>¿Ma'ta' iporasó' onpoa'ahua' nonpin-topiso' ama natëcaiso marëhuë'? Huë'nansó' onpopionta' piyapi'sa' nitotapona'. <sup>23</sup>Nani yonquirai ni'ton, natancoi sha'huichinquën ma'sona nicamasó'. Catapini quëmapi'sa' isëquë ya'huëpi. Nani Yosë nontopi ma'sha nicacaisó'. <sup>24</sup>Inapita quëparahuaton, catahuaquë' iráca pënëntërinso' natëcaiso marë'. Yosë chinotopiso pëiquë quëparahuaton, pahuërapitëquë' ma'sha Yosë marë' tëpacaisó'. Ina quëran niya'irapi. Inapotohuatan, ya'ipi piyapi'sa' ni'sarinëinquën. “Paononta' Moisésë pënëntërinso' natërin. Nonpin nanan natantërehua',” tosapi. <sup>25</sup>Nisha piyapi'saso nipirinhüë' nani ninshitërai. “Quisocriso imapatama', co ya'ipi iráca pënëntërinso' natëcamasó' ya'huërinhuë'. Isoíchin sha'huichinquëma' ama nicacamaso marëhuë'. A'naquën ma'sha tëpapi mamanshi moshacaiso marë'. Ina nosha tananpitoco'. Naporahuaton, a'naquën maconorahuatona', ma'sha tëpapi. Co huënainën noya inquipirinhüë', ca'pi. Ina noshanta' ama ca'cosohüë'. Naporahuaton, ama monshihuanacosohüë'. Cotioro'sacoi pënëntëraisó' na'con ya'huëpirinhüë', inaíchin natëcamasó' ya'huërin,” tënai, nisha piyapi'sa' ninshitatoí, itërin Santiacori.

### *Paono mapiso'*

<sup>26</sup>Itohuachina, “Noyahua'. Napo'i nipachin,” itërin Paonori. Tahuëririnquë catapiniya'pi quëparin. Iráca pënëntërinso' natërahuatona', Yosë chinotopiso pëiquë ya'conpi. Ya'conahuatona', corto hua'an sha'huitopi: “Canchisë tahuëri huë'sápoi Yosë camaitërinso' natëtoi oshanëhuëi inquica'huaiso marë'. Tahuëri nanihuachin, ma'sha quësarai canpitari tëpatoma' ahuiquitamaso marë',” itopi.

<sup>27</sup>Canchisë tahuëri nanirihuachina, Yosë chinotopiso pëiquë paantapi. Inaquë a'naquën cotioro'sa Asia parti quëran huë'pisopitari quënanpi. Paono quënanahuatona', mapi. Ya'ipi piyapi'sa' ano'huitopi. <sup>28</sup>“¡Huëco' iyaro'sa' catahuacoi! Iso quëmapi ya'ipi parti paaton, nisha a'chinarin. ‘Cotioro'saso' co no'tëquën a'chinpihuë'. Moisésë pënëntërinso' a'poco',’ tënin. Naporahuaton, Yosë chinotopiso pëi' co huachi noya ni'ninhüë'. Ni'cochi. Crico piyapi'sa' isëquë chachin ichiya'conin ni'ton, Yosë pëinën tapiarin. Co inapitasó' ya'conacasohüë' nipirinhüë',” toconpi.

<sup>29</sup> I'hua Paonori Toropimo quëparahuaton, ninano' pa'tërin, cotioro'sari quënanpi. Ipi-isoquë ya'huërin ni'ton, Crico piyapi inaso'. "Nisha piyapi nipirinhüë', Yosë chinotopiso pëiquë ichiya'conin," tëcatona napopi.

<sup>30</sup> Natanahuatona', notohuaro' piyapi'sa' no'huitopi. Yosë chinotopiso pëiquë ta'arahuatona', Paono mapi. Masahuatona', ocoicaiso marë' ohuararachinpi. Nani ocoihuachinara, ya'coana oncotopi. <sup>31</sup> Paono yatëparapiso', capitan hua'anso' natantërin. Ya'ipi Quirosarinquë ya'huëpisopita yaniahuërapì, natantërin. <sup>32</sup> Natantahuaton, sontaro'sa', capitano'sa', inapita amatahuaton, quëparin. Ta'arahuatona', piyapi'sa' niyontonpiquë pa'sapi. Sontaro'sa' ya'caritërahuachinara, cotioro'sari quënanahuatona', co huachi Paono ahüëpihuë'. <sup>33</sup> Capitan hua'ani canconahuaton, Paono maconin. "Cato' catinaquë tonpotanpatëquë'," itohuachina, a'na sontarori nitonpotanpatërin. A'na tanpain quëraonta' a'na sontarori inapotërin. Inapotohuachinara, capitanso' piyapi'sa' natanin: "¿Ma'ninta' iso quëmapi? ¿Ma'ta' onporinso'?" tënin. <sup>34</sup> Napoaponahuë', chiniquën nonatona', nisha nisha sha'huitopi. Noncaroapi ni'ton, co nanitërinhuë' no'tëquën natanacaso'. Napoaton: "Sontaro'sa' ya'huëpiquë quëpaco'," itërin. <sup>35-36</sup> Quëpahuachinara, ya'ipi piyapi'sari imasapi. "Tëpachinaco'," itërapì. Pëi' nanpënanquë canconahuatona', na'con na'con no'huitona', yaahuëpi. Napoaton sontaro'sari Paono inápaquë pitëtërahuatona', quëpapi.

### *No'huitona'piro'sa' nontërinso'*

<sup>37</sup> Pëiquë yaya'compachinara, Paonori capitan itapon:

—Sinioro capitan, pi'pian nonchinquën topirahuë', itërin.

—¿Crico nananquë nonan ti? itërin.

—Ina nananquë mini nonahuë', itërin.

<sup>38</sup> —Iquipito piyapinquën ta'ma topirahuë'. Inaso' i'huamiáchin copirno no'huiton, catapini huaranca tirocoro'sa', inotëro parti quëparin, itërin.

<sup>39</sup> —Co inacohüë'. Caso' cotio quëmapico. Tarsoquë nasitërahuë. Inaso' panca ninano', Sirisia parti ya'huërinso'. Ya'ipi piyapi'sa' nohuitopi. Isopita piyapi'sa' nonchi, topirahuë', itërin.

<sup>40</sup> "Inta nipachin, nontëquë'," itërin. Paono nanpënanquë huanirahuaton, anqui anquita'parin. Piyapi'sari ni'sahuatona', copica topi huachi. Napohuachinara, Paonori cotio nananquë itapon:

## 22

<sup>1</sup> "Natanco iyaro'sa', apiro'sa', pi'pian yanontëranquëma'. Caso co manta' onporahuë'," tënin. <sup>2</sup> Cotio nananquë nonsarinso natanahuatona', aquë aquëtë ta'topi. Napohuachinara, itaantarin:

<sup>3</sup> "Canta' iyaro'sa' cotio piyapico. Tarsoquë nasitërahuë. Sirisia parti nasitopirahuë', isëquë huëcato, hui'napitërahuë. Maestro Camariro a'chintërinco. Shimashonënpoa' pënëntërinso chachin ya'ipi a'chintërinco. Hua'huatapo quëran huarë' chiniquën Yosë yonquirahuë. A'naya tëranta' nisha yonquihuachinara, canpita pochachin no'huirahuë. <sup>4</sup> Iráca na'a Quisoso imapisopita aparisitërahuë. Yatëparahuë. Quëmapi'sa' tonporahuato, tashinan pëiquë po'morahuë. Sanapi'sa' quëran huarë' inaquë po'morahuë. <sup>5</sup> Yanitotohuatama', corto hua'an chini chiniquën nanantërinsona' inachachin sha'huitarinquëma'. Cotio ansiano'santa' nitotopi. Inapitaso' quirica ninshitërinaco iyaro'sa' Tamascoquë ya'huëpisopita quëtona'huaso marë'. Inatohua' pa'nahuë Quisoso imapisopita maca'huaso marë'. 'Tonporahuato, Quirosarinquë quëmaarahüë ana'intacaiso marë', ta'to,' pa'nahuë.

### *Quisosori ya'notërinso' sha'huiantarinso'* (Hechos 9.1-19; 26.12-18)

<sup>6</sup> Pa'sápatoi Tamascoquë ya'caritërarai. Camotëchin nisahuaso', a'naroáchin inápa quëran huënaráchin huënaráchin a'pintërinco. <sup>7</sup> No'paquë anotahuato, inápa quëran nontërinco' natanahuë. 'Saono, Saono, ¿onpoatonta' aparisitaranco?' itërinco. <sup>8</sup> '¿Inquënta' quëmaso' Siniro?' itërahuë. 'Ca Quisosoco, Nasaritoquë ya'huërahuëso'. Aparisitaranco,' itërinco. <sup>9</sup> Ca'taninacosopitanta' a'pininso' ni'pi. Nipirinhüë', nontërinco' co natanpihuë'. <sup>10</sup> '¿Ma'ta' Siniro onpo'iso?' itërahuë. 'Huanirahuaton, ninanoquë paquë'. Inaquë a'na quëmapi sha'huitarinquën ma'sona nicamaso', itërinco. <sup>11</sup> Huënaráchin huënaráchin a'pintërinco ni'ton, co manta' quënantërahuë'. Napoaton ca'tanincosopita matanparahuatonaco, Tamascoquë quëparinaco.

<sup>12</sup> Ina ninanoquë chachin a'na quëmapi ya'huërin, Yosë noya chinotërinso'. Anani-asë itopi. Moisësë iráca pënëntërinso' no'tëquën natërin. 'Inaso' noya quëmapi,' topi ya'ipi cotioro'sa'. <sup>13</sup> Huëcapairahuatonco, nontiiirincó. 'Iya Saono. ¿Siniro nohuanton, noya ni'tantaquë!' itërinco. Naporo chachin noya ni'taantarahuato, ina quënanahuë. <sup>14</sup> Ina quëran itaantarincó: 'Yosë chinotërehuaso' nani huayoninquën nohuantërinso chachin nitotamaso marë'. Ina nohuanton, Quisoso ya'notërinquën. Noya noya inaso'. Nontërinquënso' natanan. <sup>15</sup> Yosë acorinquën ya'ipi piyapi'sa' sha'huitamaso marë'. Ni'nanso', natananso', inapita sha'huiaran. Ina marë' ya'notërinquën. <sup>16</sup> Napoaton ama hua'quiquësóhuë'. Apiramiáchin huaniquë'. "Quisoso imasarahüë huachi," ta'ton, aporihuanquë'. Ina nontohuaton, oshanën inquitarinquën,' itërinco.

#### *Nisha piyapi'sa' a'chintacaso marë' a'parinso'*

<sup>17</sup> Ina quëran Quirosarinquë paantahuatëra, Yosë chinotopiso pëiquë pa'nahuë. Inaquë Yosë nontasoco, hua'narëso pochin ni'nahuë. <sup>18</sup> Quisoso nontaantarincó. 'Manorahuaton, Quirosarin quëran pipiquë'. Ca nanamëhuë sha'huihuatan, co natëarinëinquënhüë', itërinco. <sup>19</sup> 'Inapita Siniro nohuitërinaco. A'na parti a'na parti paato, ya'ipi niyontonpiso pëiro'saquë ya'conahuë. Inaquë imarinëinquënsopita ahuërahuë. Tashinan pëiquë po'morahuë. <sup>20</sup> Istipan quëma nanamën a'chininso marë' tëpahuachinara, canta' ni'nahuë. "Tëpaco'," itërahuë carinta'. Tëpatona'piro'sa' a'mopiso' ocoirahuatona', quëtërinaco, a'pairahuë. Ya'ipiya nohuitërinaco,' itërahuë. <sup>21</sup> 'Ina nipirinhüë', paquë'. Aquë yaa'paranquën nisha piyapi'sa' a'chintamaso marë', itërinco. Napoaton nisha piyapi'sa' a'chintarahüë," ténin Paono.

#### *Capitan hua'ani maninso'*

<sup>22</sup> Piyapi'sa' noya natanapirinhüë'. "Nisha piyapi'sa' a'chintarahüë," topachina, no'huitaantapi.

"Tëpachinaco'. ¿Pa'pi co noya quëmapihuë! ¿Chiminchina'in!" itopi. <sup>23</sup> Chiníquën nonsapi. No'huitatona', a'mopiso' pa'tan pa'tantahuatona', inápaquë mo'shiquëpita pa'satapi. Chiníquën no'huitoahuachinara, cotioro'sa' inachintopiso'. <sup>24</sup> Capitan hua'ani ni'sahuaton, sontaro'sa itapon: "Sontaro'sanpoa ya'huërehuaquë quëparahuatoma', huihuico'. Ma'marësona no'huipiso', sha'huichinpoa'," itërin. <sup>25</sup> Inaquë quëparahuatona', tonpopi huihuicaíso marë'. Tonpopirinhüë', capitan inaquë huaniarin ni'ton, Paonori itapon:

—Caso' Noma piyapico nipirahuë', yahuihuiramaco. Co napotamacoso ya'huërinhuë'. Co coisë nitotopirinhüë', ¿yahuihuiramaco ti? itërin Paonori.

<sup>26</sup> Ina natanahuaton, capitan hua'an sha'huitapon pa'nin.

—¿Ma'ta' ipora onpoapon? Paso' quëmapi Noma piyapi nipirinhüë', yahuihuitëran. Ni'quëna copirno no'huihuachinquën, itërin.

<sup>27</sup> Napotóhuachina, capitan hua'ani huëcapairahuaton:

—¿Quëmaso' Noma piyapinquën ti? itiirin.

—Inaco mini, itërin Paonori.

<sup>28</sup> —Na'con pahuëretato, Noma piyapi ya'conahuë, itërin capitan hua'ani.

—Caso nipirinhüë' nasitërahuë quëran huarë' Noma piyapico. Tatahuë Noma piyapi ni'ton, canta' inapochachin ninahuë, tënin Paono.

<sup>29</sup> Ina natanahuatona', co huachi huihuipihüë'. Capitan hua'aonta' pa'yanaton, të'huarin. Noma piyapi nipirinhüë', catinaquë tonporinso marë' copirno të'huatërin.

*Cotio hua'ano'sa' Paonori sha'huitërinso'*

<sup>30</sup> Tahuëririnquë capitan hua'ani yanatantërin. “¿Ma'marëta' cotioro'sari sha'huirapipi?” ta'ton, sontaro'sa' sha'huitërin Paono ocoicaiso marë'. Naporahuaton, ya'ipi cotio hua'ano'sa' amatërin. Corto hua'ano'sa' chini chiniquën nanantopisonta' amatërin. Nani niyontonpachinara, inaquë Paono quëparin natanacaiso marë'.

## 23

<sup>1</sup> Paono ya'conahuaton, hua'ano'sa' notëërahuaton, itapon:

—Ipora iyaro'sa' pi'pian nonchinquëma' natanco. Hua'huatapo quëran huarë' noya ninahuë. Yosë ni'sárinco, co manta' onporahuë', itërin.

<sup>2</sup> Naporo tahuëri'sa' Ananiasë itopiso', corto hua'an chini chiniquën nanantërinso' nisarin. Inari huanipapisopita itapon:

—Ahuëananco', itërin. Napohuachina, huaniparinsoari ahuëananin. Napotihuachina, Paonori itapon:

<sup>3</sup> —Quëmaso' nonpintënuën. ¡Yosë ahuëarinquën quëmanta! “Moisësë pënëntërinso' natëto, ana'intarahüë,” taponahuë', ¿onpoatonta' sha'huitëran ahuëincoso'? Moisësë chachin pënëninpoa' ama topinan quëran piyapi ahuëcaso marëhuë', itërin.

<sup>4</sup> —Corto hua'an chini chiniquën nanantërinso' nipirinhüë', ¿no'huiton, nonapiran ti? itopi.

<sup>5</sup> —Co'chi iyaro'sa' nohuitatorahuë', naporahuë' paya. Tëhuëchachin Yosë quiricanën quëran pënëninpoa'. “Co hua'anënpoa' nonapicaso' ya'huërinhuë',” tënin, itërin Paonori.

<sup>6</sup> Cotio hua'ano'sa' huë'pisopita co napopianachin yonquipihüë'. Patoma satorio'sa', patomaso', parisio'sa'. Ina yonquiaton, Paonori itantarin:

—Caso' iyaro'sa', Parisioco. Shimashonëhuëpitanta' parisio'sa' chachin. “Yosë ananpitaantarinpaa',” ténahuëso marë' isopita sha'huirapirinaco, itërin.

<sup>7</sup> Ina natanahuatona', parisio'sa', satorio'sa', inahua capini nino'huipi. Nisha nisha yonquipi. <sup>8</sup> Satorio'saso' co natëtona'piro'sahuë'. “Co Yosë ananpitaantarinpaa'huë'. Co hua'yanënpoa' ya'huëtërinpoahuë'. Co anquëniro'sa' tëranta' ya'huëpihuë',” toconpi. Parisio'saso' nipirinhüë' natëpi. “Hua'yanënpoa' ya'huëtërinpoa' ni'ton, Yosë ananpitaantarinpaa'. Anquëniro'santa' ya'huërin,” topi. <sup>9</sup> Napoaton ninontatona', noncaroapi. Parisio maistro'sa' huanirahuatona', chiniquën nonpi.

—Iso quëmapiso' noya, tënai. Co manta' onporinhüë'. Anquëni noninso' natamara. Hua'yaní a'na nontomara, tënin a'naquën. Napohuachinara, satorio'sa' no'huitopi.

<sup>10</sup> Chiniquën nino'huitona', niahuë'rapi. Napoaton capitan hua'ani sontaro'sa' camairin.

—Maconco' tēpahuachina', itërin. Napotihuachina, sontaro'sa' pa'pi. Paono osërëconahuatona', sontaro'sa' ya'huëpiquë quëpaantapi.

<sup>11</sup> Naporo' tashi' Siniorori ya'notimarahuaton, Paono itapon: “¡Ama të'huatonhuë', chiniquën cancantëquë! Quirosarinquë nanamëhuë nani sha'huiran. Inapochachin Nomaquënta' paaton, sha'huiantamaso' ya'huërin,” itërin.

*Paono yatëpapiso'*

<sup>12</sup> Tahuëririnquë a'naquën cotioro'sa' chinotopi Paono tēpacaiso'. “Ama huachi ca'ahuasohüë'. Ama o'ahuasohüë'. Paono tēpaquë huarë' ca'ahua'. Co tēparihuarahuë' ca'patëhua', Yosë ana'inchinpoa',” nitopi. <sup>13</sup> Catapini shoncaya'pi pochin napopi.

<sup>14</sup> Naporahuatona', paatona', cotio hua'ano'sa', ansiano'sa', inapita nontopi.



—Nani huachi anoyatërai. Co huachi coshataraihuë'. Paono tēpaquë huarë' coshataantari. Yoscoarë' tēpaarai, tēnai. <sup>15</sup> Napoaton capitán hua'an sha'huitoco' Paono quënta'in. “Tashiraya yanontantari no'tēquën nitota'huaiso marë',” itoco'. Quiyaso nipirihuë' na'pitatoí, ninaarai. Ya'caritohuachin, a'naroáchin masahuatoí, tēpaarai, itopi.

<sup>16</sup> Paono apia'huainso nipirihuë', yatēpapiso' natantërin. Inaso', oshin hua'huin. Natantahuaton, sontaro'sa' ya'huëpiquë paaton, Paono sha'huitërin. <sup>17</sup> Sha'huitohuachina, a'na capitán amatërin.

—Iso hui'napi hua'anënguë quëpaquë' nanan sha'huichin, itërin.

<sup>18</sup> Napohuachina, hua'anënguë quëparahuaton, itonin:

—Sontaro'sa' ya'huëpiquë Paono amatërinco. “Iso hui'napi hua'anënguë quëpaquë' nanan sha'huichin,” itërinco ni'ton, quënahüë, itërin.

<sup>19</sup> Capitán hua'ani matanparahuaton, amashamiachin quëparin ama piyapi'sari natanacaiso marëhuë'.

—¿Ma'ta' yasha'huitërancoso'? itërin.

<sup>20</sup> —Cotio hua'ano'sa' nani chinotopi Paono amatacaiso marë'. “Tashiraya Paono quënantaquë' nontanta'ii. Naporinso', aquëtë huarë' yanitotërai,” itarinënguën. <sup>21</sup> Nipirihuë', ama natëquësohüë'. Catapini shonca na'con piyapi'sari chinotopi tēpacaiso marë'. Po'oana quëran ninarapi tēpacaiso marë'. Co huachi coshatapihuë'. Co o'osapihuë'. Paono tēpai huarë' coshatacaiso' yonquipi. Iporaso' quëma ninarinën nohuantopiso chachin nitamaso', itërin.

<sup>22</sup> —Sha'huitërancoso' api, ama insonta' sha'huitëquësohüë', itahuaton hui'napi a'parin.

### *Paono a'na parti quëpapiso'*

<sup>23</sup> Ina quëran cato' capitano'sa' amatërin.

—Apira ma'sha tapaco' Sisariaquë pacacamaso marë'. Cato pasa sontaro'sa' sha'huitonquë' pa'ina'. Cahuarioquë pa'na'piro'santa' canchisë shonca quëpaquë'. Nansahuano'sa' cato pasa quëpaquë'. Ya'ipi tapatëquë' yayonotashirahuaso' pacacamaquëma'. <sup>24</sup> Cato' cahuario quëpaco' Paono paacaso marë'. Noya a'pairahuatoma', hua'an Huirisë quëtonco', itërin. <sup>25</sup> Ina quëran quirica ninshitërin hua'an quëtacaiso marë'.

<sup>26</sup> “Sinioro hua'an Huirisë. ¿Noyanquën quëmanta'? Ca Craotio Nisiasëco ninshitaranquën, ni'quë'. Quëmaso' chiniquën nanantëran ni'ton, pi'pian sha'huichinquën.

<sup>27</sup> Iso quëmapi a'pataranquën, cotioro'sari mapiso'. Yatëpapurinahuë', quënanahuato, sontaro'sa' a'parahuë osërëtacaiso marë'. Inaso' Noma piyapi ni'ton, osërëterahuë.

<sup>28</sup> ¿Ma'marëta' sha'huirapipiso'? ta'to, cotio hua'ano'saquë quëparahuë nitota'huaso marë'. <sup>29</sup> ‘Cotio pënëntërinso' co natërinhuë', toconpi. Inaíchin sha'huirapipi. Co manta' onporinhuë'. Co chiminacaso' ya'huërinhuë'. Coni tashinan pëiquë tëranta' po'mocaso' ya'huërinhuë'. <sup>30</sup> Ina quëran cotioro'sa' chinotopi tēpacaiso', natantërahuë. Napoaton a'naroáchin a'patëranquën. Cotioro'santa' nani sha'huitërahuë ya'huëranquë paatona' sha'huirapicaiso marë'. Nani huachi,” itërin, ninshitaton.

<sup>31</sup> Ina quëran sontaro'saso' natërahuatona', Paono quëpapi. Tashi' nipirihuë', Antipatërisë'pa' quëpapi. <sup>32</sup> Tahuërininquë sontaro'saso' ya'huëpiquë panantapi. Cahuarioquë pa'na'piro'saichin Paono quëpapi. <sup>33</sup> Sisariaquë canconahuatona', quirica hua'an quëtonpi. Paononta' yo'conpi. <sup>34</sup> Hua'anso' quirica nontahuaton, itapon: “¿Inso partita' hua'huatëranso'?” itërin. “Sirisia parti hua'huatërahuë,” itërin Paonori.

<sup>35</sup> —Sha'huirapirinënsopita canquihuachina', ya'ipiya natanarahuë, itërin. Ina toshuaton, sontaro'sa' camairin Paono quëpacaiso marë'.

—Hua'an Irotisë pëinënguë quëparahuatoma', a'paico' ta'ahuachin, itërin.

## 24

### *Hua'an Huirisëquë sha'huirapipiso'*

<sup>1</sup> A'natërápo tahuëri nanihuachina, corto hua'an chini chiníquën nanantërinso' canquirin, Ananiasë itopiso'. A'naquën cotio ansiano'sari ca'tanpi. Nonapina'pi hua'aonta' huë'nin, Tirotoro itopiso'. Huirisë ya'huërinquë huë'sahuatona', Paono sha'huirapi. <sup>2</sup> Paono quëntahuachinara, Tirotorori itërin:

—Ipora siniro hua'an, pi'pian nonchinquën natanco. Ma noya quëmaso' hua'anëntërancoi. Noya yonquiaton, na'con catahuanancoi ni'ton, sano ya'huërai. <sup>3</sup> Ina marë' ya'ipicoi noya ni'nainquën. “Yosparinquën,” itërainquën. Quëmaso' tēhuëinchachin chiníquën nanantëran. <sup>4</sup> Apira pi'pisha yanontaranquën, noya natanco. Co hua'qui' nontaranquënhuë'. <sup>5</sup> Iso quëmapi Paono itopiso' pa'pi co noyahuë', tēnai. Ya'ipi parti paaton, piyapi'sa' nisha nisha ayonquirin. A'chinpachina, cotioro'sa' nino'huipi. Ya'ipi parti naporin. Nisha imarin. Nasarinoro'sa' itopiso' imaton, na'a piyapi'sa' a'chintarin imacaiso marë'. <sup>6</sup> Yosë chinotopiso pëinta' yatapirin. Nisha piyapi'sa' inaquë ichiya'conin, co inapitaso' ya'conacasohuë' nipirinhüë'. Naporo' quiyari manai. [Quiya coisëquë yaquëpapiraihuë' ana'intacaso marë'. <sup>7</sup> Capitan hua'an Nisiasëso nipirinhüë', notohuaro' sontaro'sa' quësahuaton manin. Osërëtërincoi. <sup>8</sup> “Noma hua'an ya'huërin'pa' paatoma', sha'huirapico',” itërincoi. Napoaton isëquë huë'nai.] No'tëquën sha'huirapiarai. Quëmari Paono natanquë' inachachin sha'huichinquën, itërin Tirotorori.

<sup>9</sup> Cotioro'sa' huë'pisopitanta' inachachin napotopi. “No'tëquën sha'huitërinquën,” itopi. <sup>10</sup> Ina quëran hua'ani imirin quëran tasatërin Paono nontacaso marë'. Napotihuachina, Paonori itërin:

—Na'a pi'ipi siniro hua'an quëma hua'anëntërancoi. Napoaton noya cancantato, nontaranquën. <sup>11</sup> I'huamiáchin Quirosarinquë paantarahuë Yosë chinota'huaso marë'. Shonca cato' tahuërichin nisarin pa'nahuëso'. A'napita natanpatan, inachachin sha'huitarinëinquën. Co hua'quiyatërarahuë'. <sup>12</sup> Yosë chinotopiso pëiquë pa'patora, co insonta' no'huirahuë'. Niyontonpiso pëiquënta' noya pa'nahuë. Co cachiquë tēranta' chiníquën a'chinahuë'. Piyapi'sa' niyontonpachinara, co sha'huitërahuë' nino'huicaiso'. <sup>13</sup> Topinan quëran nonpinapirinaco. Na'con sha'huirapipirinacohuë', ni'nincoso chachinso co ya'huërinhuë'. <sup>14</sup> “Nisha imarin,” topi. Inaíchin no'tëquën nonpi. Tēhuëinchachin Quisoso nanamën imarahuë. Nipirinhüë', Yosë no'tëquën chinotërahuë. Shimashonëhuëpita chinotopiso chachin chinotërahuë canta'. Ya'ipi Yosë quiricanën natërahuë. Iráca pënëntërinso', pënëntona'piro'sa' ninshitopiso', inapita yonquirahuë. <sup>15</sup> “Yosë no'tëquën nontërinpoa',” ta'to natërahuë. “A'na tahuëri ya'ipi piyapi'sa' ananpitaantarahuë. Noya piyapi'sa', co noya piyapi'sahuë', ya'ipi ananpitaantarahuë,” tēnin Yosë. Ina tahuëri caso' ninarahuë. Isopitanta' ina ninarapi. <sup>16</sup> Napoaton nani tahuëriya Yosë no'tëquën yanatërahuë. Piyapi'santa' co yanonpintërahuë'.

<sup>17</sup> Iráca Quirosarinquë ya'huëpirahuë'. Na'a pi'ipi a'na parti pa'nahuë quëran i'huamiáchin inaquë paantarahuë. Sa'ahuaro'sa' nosoroato, coriqui quëta'huaso marë' pa'nahuë. Ma'sha Yosë quëta'huaso marënta' pa'nahuë. <sup>18</sup> Iráca pënëntërinso' natëto, Yosë chinotopiso pëiquë ya'conpirahuë', co manta' onporahuë'. Co piyapi'sa' ayontonahuë'. Co ca nohuanto nino'huipihuë'. Inaquë cotioro'sa' Asia parti ya'huëpisopita quënaninaco. <sup>19</sup> Inapita mini isëquë huë'sahuatona', sha'huirapiitonacohuë', co huë'pihuë'. <sup>20</sup> I'hua cotio hua'ano'sa' niyontonpachinara, amatërinaco. Isopita nataninaco. Ma'sona onporahuëso' sha'huichinën. <sup>21</sup> Naporo' isoíchin napotërahuë. “Yosë ananpitaantarainpoa' tēnahuëso marë' ipora sha'huirapirinaco,” itërahuë, tēnin Paono.

<sup>22</sup> Ina natanahuaton:

—Noyahua'. Nani natananquën. Capitan hua'an Nisiasë o'mahuachin, iso nanan yonquiantarahuato, sha'huichinquëma', tēnin hua'an. Quisoso nanamën a'chinpiso' noya nitotaton, co aquëtë' yanataninhüë'.

<sup>23</sup> Ina quëran capitan sha'huitërin: “Paono noya a'paiquë' ama ta'ainsohuë'. Nipirinhuë', ama tonpoquësuhuë'. Nipayarinsopita huë'pachina', noya ya'coina'. Ma'sha pahuantohuachin, quëchina'” itërin.

<sup>24</sup> Hua'quimiáchin quëran Huirisë sa'inë chachin huëantarahuaton, Paono amataantarin. Sa'inso' cotio sanapi, Torosira itopi. Paono huë'pachina, itapon:

“Quisocriso imaranso' sha'huitocoi noya nitochii,” itohuachina, “Tëhuëenchachin Quisocriso imarahuë. <sup>25</sup> Yosë sha'huitërinpoa' noya cancantacaso marë'. Ina catahuar-inpoa' co noyahuë' yonquirëhuasopita naniantacaso'. A'na tahuëri coisë pochin nicaton, ya'ipi piyapi'sa' natanarin. Co noyahuë' nipisopita ana'intarin,” tënin Paono. Napotohuachina, hua'an pa'pi pa'yanin.

—Nani huachi. Iporaso' paquë'. A'na tahuëri yanontaantahuatënquën, amataantaranquën, itërin.

<sup>26</sup> “Paono pahuërëaponco pipicaso marë' nimara,” ta'ton, hua'qui quëran hua'qui quëran amataantarin nontacaso marë'. Na'aro' Paono nontopirinhuë'. <sup>27</sup> Cato' pi'ipi nanihuachina, nisha hua'an ya'coantarin, Porsio Pisto itopiso'. Huirisëso' pipirin huachi. Pipiponahuë', co Paono ocoirinhuë'. “Cotioro'sa' no'huihuachinaco,” ta'ton, co ocoirinhuë'.

## 25

### *Hua'an Pistoquë sha'huirapiantapiso'*

<sup>1</sup> Nasha hua'an canquirin huachi, Pisto itopiso'. Sisariaquë huëcaton, cara tahuëri i'huatërin. Ina quëran Quirosarinquë pa'nin. <sup>2</sup> Inaquë pa'pachina, cotio hua'ano'sa', corto hua'ano'sa', inapitari Paono sha'huirapipi.

<sup>3</sup> “Quirosarinquë quënantaquë', natanta'ii, topiraihuë',” itopi. Nani chinotopi na'pirahuatona', iraquë tēpacaiso marë'. <sup>4</sup> Napotopirinahuë', co hua'an nohuantërinhuë'.

“Inca. Co yaquëntarahuë'. Sisariaquë a'pairapi. Co hua'qui quëranhuë' inaquë canta' paantarahuë,” tënin. <sup>5</sup> —Napoaton pa'pato, caraíchin hua'anquëma' huëco' pa'ahua', tēnahuë. Paono co noyahuë' nipachin, inaquë sha'huirapico', itërin.

<sup>6</sup> Inaquë shonca tahuëri pochin i'huatantarahuaton, Sisariaquë paantarin. Tahuëririnquë coisë shiranēnquë huënsërahuaaton, Paono amatërin. <sup>7</sup> Cotioro'sa' Quirosarin quëran nani o'mapi ni'ton, Paono huë'pachina, ahuanapanirahuatona', na'con sha'huirapipi. Nisha nisha sha'huirapipirinahuë', co ni'ninso chachin ya'huërinhuë'. <sup>8</sup> Ina quëran Paonori itërin:

—Íraca quëran huarë', siniro hua'an, noya ninahuë. Co manta' onporahuë'. Moisésë pēnētërinso' cotioro'sari natëhuachinara, co ina marë' no'huirahuë'. Yosë chinotopiso pēinta' co tapirahuë'. Co nisha piyapi ichiya'conahuë'. Noma copirnonta' natërahüë. Co onporonta' piyapi'sa' sha'huitërahüë' ina no'huicaiso'. Topinan quëran sha'huirapirinaco, itërin.

<sup>9</sup> Noya natanpirinhuë', hua'an co nohuantërinhuë' cotioro'sari no'huicaiso' ni'ton, Paono itërin:

—¿Nohuantëran Quirosarinquë paacaso'? Inaquë sha'huirapihuachinën, cari natanpato, sha'huitaranquën, itërin.

<sup>10</sup> —Co nohuantërahüë'. Quëmaso' Noma copirno acorinquën ni'ton, nontaranquën. Sha'huirapirinacoso' isëquë anoyatacaso' ya'huërin. Co manta' cotioro'sa' onpotërahüësuhuë', nitotëran. <sup>11</sup> Tēpatona'pi, copirno no'huina'pi, inapita tēpacaso' ya'huërin. Ina pochinco canta' naporini, tēpainacoso' nohuanchitohüë'. Nipirinhuë', nonpinapihuachinaco, co cotioro'saquë yocancoso' ya'huërinhuë', tēnahuë. Noma copirno chachin yanontarahüë. Ina nataincoso' ya'huërin, itërin Paonori.

<sup>12</sup> “Noma copirnososo' chini chiniquën nanantërin ni'ton, co topinan a'parëhuë',” ta'ton, coisēnēnpita nontërin. Nani nontohuachina, Paono itantarin:

—Noma copirno chachin yanontëran ni'quëhuarë', ina ya'huërin'pa' a'paaranquën, nontonquë', itërin.

*Acripa hua'an canquirinso'*

<sup>13</sup> Hua'quimiáchin quëran a'na hua'an chiníquën nanantërinso' canquirin, Acripa itopiso'. Sisariaquë huë'nin Pisto nicapon. A'na sanapinta' huë'nin, Pirinisa itopiso'.

<sup>14</sup> Hua'qui' inaquë yacapatarin ni'ton, Pistori itërin:

—Tashinan pëiquë a'na quëmapi ya'huëarin, Paono itopiso'. Iráca Huirisëri po'morinso'.

<sup>15</sup> I'hua Quirosarinquë ya'huasoco, cotio hua'ano'sa', ansiano'sa', inapitari na'con sha'huirapipi. “Chiníquën ana'intëquë',” itërinaco. <sup>16</sup> Ina itohuachinacora, cari itapo: “Noma piyapicoi co topinan quëran ana'intëraihuë'. Cato ya'pi ma'sha nionpoto-huachinara, cato chachin coisëquë pa'sapi. Sha'huirapihuachina, a'nanta' a'panitacaso' ya'huërin. Ina quëran coisëri noya nitotaton, tëhuëna'pi no'tëquën ana'intarin. Ina pochin Noma piyapicoiso' ninai,” itërahuë. <sup>17</sup> Napoaton isëquë huë'pachinara, co hua'quirahuë'. Tahuëririnquë coisë shiranëinquë huënsërahuato, Paono amatërahuë. <sup>18</sup> Ina quëran cotioro'sari sha'huirapipi. Panca tëhuëmara ni'ton, sha'huirapiapi, topirahuë', co ina pochin sha'huirapipihuë'. <sup>19</sup> “Paono co quiya pochin Yosë chinotërinhuë'. Nisha imarin. A'na quëmapi Quisoso itopiso' chiminaponahuë', nani nanopiantarin,” toconin, topi. Inaíchin sha'huirapipi. <sup>20</sup> Cotioro'sa' moshapiso' co pi'pisha tëranta' nitotërahuë'. Napoaton Quirosarinquë yaquëpapirahuë' aquëtë' natanta'huaso marë'. “Inaquë sha'huirapiinën,” itopirahuë', co nohuantërinhuë' <sup>21</sup> “Noma copirno chachin yanontarahuë. Ina nataincoso' ya'huërin,” tënin. Napoaton tashinan pëiquë po'moantarahuë. Nanitohuato, Noma copirno nontacaso marë' a'paarahuë, tënin Pisto.

<sup>22</sup> —Carinta' nata'in, tënin Acripa.

—Noyahua'. Tashiraya chachin natanaran, itërin Pistori.

<sup>23</sup> Tahuëririnquë Acripaso' Pirinisarë chachin huë'pi. Noyasha nitaparahuatona', natanacaiso pëiquë ya'conpi. Capitano'sa', ninano' hua'ano'sa', inapitanta' ya'conpi. Naporahuatona', Paononta' amatopi. <sup>24</sup> Huë'pachina, Pistori itapon:

—Noya siniro hua'an huë'nan. Canpitanta' iyaro'sa', noya huë'nama'. Ya'ipinquëma' yanontaranquëma', natanco. Iso quëmapi ni'co'. Ma'sona onpomara. Ya'ipi cotioro'sari no'huipi. Quirosarinquë sha'huirapipi, isëquënta huëcatona', sha'huirapipi, chiníquën nonapitona'. “Co noya quëmapihuë'. Atëpatëquë',” itërinaco. <sup>25</sup> Natanpirahuë', co manta' onporinhuë'. Co tëpacaso' ya'huërinhuë', tënahüë. “Noma copirno chachin yanontarahuë,” itërinco marë' inaquë yaa'papirahuë', co nanitërahuë' topinan a'paca'huaso'. <sup>26</sup> Quiricanta' yaa'papirahuë'. Co nitotërahuë' ma'sona onporinso' ninshita'huaso'. “¿Ma'ta' Noma copirno ichi?” ta'to, Paono amatërahuë natanamaso marë'. Quëmarinta', siniro hua'an, noya natantariquë'. Nani natanpatan, catahuaco ninshichi, topirahuë'. <sup>27</sup> Co topinan a'pacaso' ya'huërinhuë'. Ma'sona onporinso' ninshitahuato sha'huirapicaso' ya'huërin, tënahüë, itërin.

## 26

*Hua'an Acriparinta' Paono nataninso'*

<sup>1</sup> Ina quëran hua'an Acripari Paono itapon:

—Inta noniquë nipachin. Ma'sona onporanso' sha'huitocoi pa'poyainquën, itërin.

Itohuachina, Paonori anquitahuaton, itapon: <sup>2</sup> “Noya siniro hua'anpa', noya cancantato, nonchinquën natanco. Cotioro'sa' nani na'con sha'huirapirinaco ni'ton, cari no'tëquën sha'huitaranquën. <sup>3</sup> Quëmaso' cotioro'sa' a'chininso' noyá nitotëran. Nisha nisha inachintopiso' ya'ipiya nitotëran. Ama no'huitatonhuë', noya natanco.

*Co'huara imashatëraponhuë', Paono naporinso'*



<sup>4</sup> Hua'huatapo quëran huarë' ya'huërahuëso', Quirosarinquënta' ya'huërahuëso', inapita ya'ipi cotioro'sa' nitotopi. <sup>5</sup> Caso' Parisioco. Quiyaso' cotioro'sa' imapiso', no'të no'tëquën natërai. Ya'ipi cotioro'sa' nitotopi. Nohuantopi naporini, inachachin sha'huichitënënguënhuë'. <sup>6-7</sup> Iráca shimashonënpoopita nontaton, Yosëri itërin: 'A'na tahuëri nicha'ësaranguëma', nanpimiatarama', itërin. Ya'ipi cotioro'sa' ina ninapi, shonca cato' huënton chachin ninarapi. Nani tahuëri tashirë chachin ina chinotatona', naporapi. Canta' ina ninarahuë. Ina marë' sinioro hua'an, cotio hua'ano'sa' sha'huirapirinaco. <sup>8</sup> A'na tahuëri Yosë ananpitaantaripoa', tënai. ¿Onpoatomata' canpitaso' co ina yanatëramahuë? tënahüë.

*Paonori Quisoso imapisopita aparisitërinso'*

<sup>9</sup> Canta' iráca co Quisoso Nasaritoquë ya'huërinso' imarahüë'. Ina imapisopitanta' no'huirahuë. Aparisita'huaso' ya'huërin, topirahuë'. <sup>10</sup> Quirosarinquë ya'huasoco, Quisoso imapisopita tashinan pëiquë po'morahuë. Cotio hua'ano'sa' nanan quëtërinaco po'moa'huaso marë'. Yatëpahuachinara, carinta': 'Tëpaco', itërahuë. <sup>11</sup> Niyontonpiso pëiro'saquë ya'conahuato, na'aro' aparisitërahuë. Quisoso a'pocaiso marë' naporahuë. Chiníquën no'huito, nisha piyapi'sa' ya'huëpíquë huarë' paato, aparisitërahuë.

*Paono ya'nan imarinso'*  
(Hechos 9.1-19; 22.6-16)

<sup>12</sup> A'na tahuëri cotio hua'ano'sa' nanan quëtërinaco Tamascoquë paca'huaso marë'. Quisoso imapisopita maca'huaso marë' pa'sapirahuë', <sup>13</sup> camotëchin iratërasoco, inápa quëran chiníquën a'pintimarincoi. Pi'i quëran chini chiníquën a'pintërincoi. Huënaráchin huënaráchin ni'nahuë. Ca'tanincosopitanta' ni'pi. <sup>14</sup> Ya'ipicoi no'paquë anotasocoi, Quisoso nontërinco. Cotio nananquë nontërinco, natanahuë. 'Saono, Saono, ¿onpoatonta' aparisitaranco? Ni'quë'. Cahuario yaa'pahuatëra, nara'huaya inëshin nininquë ohuanë'. Cahuariori no'huitaton to'tahuachina, aquë aquëtë' iquitërin. Inapochachin quëmanta' no'huiranco ni'ton, aquë aquëtë' co noyahuë' cancantaran', itërinco. <sup>15</sup> '¿Inquënta' quëmaso' Sinioro?' itërahuë. 'Ca Quisosoco, aparisitarancoso'. <sup>16</sup> Iporaso nipirinhüë' huaniquë'. Nani acoranquën piyapi'sa' sha'huitamaso marë'. Nani ni'nanco. A'na tahuëri nohuantërahuëso' a'notaranquën. Ya'ipi sha'huiráquë'. <sup>17</sup> Cotioro'sa' yatëpahuachinënguën, nicha'ësaranguën. Nisha piyapi'sa' ya'huëpíquë a'paaranquën. Inapitanta' yatëpahuachinënguën, nicha'ësaranguën. <sup>18</sup> Nisha piyapi'santa' a'chintëquë' nanamëhuë nitochina'. Somaraya pochin cancantatona', co nohuitërinacohüë'. Nanamëhuë a'chintohuatan, nohuitarinaco. Iporaso' tashi pochin cancantopi. Nohuitohuachinaco, tahuëri pochin cancantapi. Iporaso' sopai hua'ani camaihuachina, natëpi. A'na tahuëriso' Yosë natërapí. Natëtonaco, imapachinaco, oshanëna' Yosëri inquitarin. Ya'ipi natërinacosopita nasha cancan quëtarahuë. Yosë piyapínënpita chachin nisapi,' itërinco.

*Paonori natërinso'*

<sup>19</sup> Napoaton, sinioro hua'an, Quisoso inápa quëran ya'notimarinco ni'ton, a'naroáchin imarahüë. Ya'ipi sha'huitohuachincora, no'tëquën natërahuë. <sup>20</sup> Tamascoquë ya'huëpiso'ton sha'huitërahuë. Ina quëran Quirosarinquënta' sha'huiantarahuë. Ya'ipi Cotia partinta' inachachin sha'huiantarahuë. Nisha piyapi'santa' a'chintërahuë. 'Co noyahuë' yonquiramasopita naniantatoma', Yosë chachin tahuëretäantaco'. Tëhuëchachin imapatama', noya nisarama', itërahuë. <sup>21</sup> Ina marë' cotioro'sa' no'huirinaco. Yosë chinotopiso pëiquë masahuatonaco, yatëpapirinacohüë', <sup>22</sup> Yosëso' catahuarinco, cha'ërahuë. Napoaton ipora huanta' natërahuë. Ya'ipi piyapi'sa' hua'ano'sa' quëran huarë' sha'huitarahuë. Moisësë, pënëntona'piro'sa', inapita ninopiso chachin a'chinarahuë: <sup>23</sup> Yosë nohuanton, Cristo chiminapon. Chiminaponahuë', Yosëri ananpitaantarin. Ina'ton nanpiantarin. Ina quëran a'chintapon tahuëri



pochin cancantacaiso marë'. Co cotioro'saráchin nicha'ësarinhüë'. Nisha piyapi'santa' nicha'ësarín, topi ninshitatona',” ténin.

*Hua'aonta' imacaso' Paono nohuantërinso'*

<sup>24</sup> Ina pochin nontahuachina, Pistori chiníquën itërin:

—¡Paono, quëmaso' hua'yantëran! Na'con quirica nontaton hua'yantëran, itërin.

<sup>25</sup> —Co'chi siniro hua'an hua'yantërahuë' paya. No'tëquën nonahuë. Sano yonquiato, nontaranquëma'. <sup>26</sup> Ya'ipi sha'huitëranquëmaso' hua'an Acripa nani nitotërin. Co po'oana quëran napopihüë'. Ya'ipi piyapi nitotopi. Inanta' nani natantërin. Napoaton co t'ëhuatohüë', ina nontarahüë'. <sup>27</sup> ¿Quëmanta' siniro hua'an, pënëntona'piro'sa' ninshitopiso' natëran pa'? Natëran ténahuë caso', itërin Paonori.

<sup>28</sup> —Pi'pian nontopirancohüë' a'naromarëáchin quëma pochin canta' Cristo ima'i, ¿topiranhüë' ti? itërin Acripari.

<sup>29</sup> —Pa'pi nohuantërahuë ca pochachin nicamaso'. Ya'ipinquëma' natanamacosopita ca pochachin nicacamaso' nohuantopirahuë'. Catinaquëachin tonpoinëmaso' co nohuantërahuë'. A'naroáchin imarama naporini, noya niitonhuë'. Hua'qui quëran imapatamanta', noya chachin niitonhuë', itërin Paonori.

<sup>30</sup> Ina natanahuaton, hua'an huanirin. Pisto, Pirinisa, ya'ipi inaquë huënsëpisopitarë chachin huanipi. <sup>31</sup> Pipirahuatona', inahuara capini ninontopi.

—Iso quëmapi co manta' onporinhüë'. Co tëpacaso' ya'huërinhuë'. Co tashinan pëiquë tëranta' po'mocaso' ya'huërinhuë', nitopi.

<sup>32</sup> Ina quëran Acripari Pisto nontaton itapon:

Co Noma copirno chachin nontapon yapa'ninhüë' naporini, ocoicaso' ya'huë'itonhuë', itërin.

## 27

*Nomaquë Paono a'papiso'*

<sup>1</sup> Ina quëran Pisto yaa'parincoi. A'napita apiro'santa' yaa'parin. Noma copirno Itaria parti ya'huërin ni'ton, Noma sontaro'sa' capitan Orio itopiso' nontërin inatohua' quëpacaiso marë'. “Paono, apiro'sa', inapita quëpaco',” itohuachina, “Noyahua'. Quëpa'i nipachin,” ténin. <sup>2</sup> Inaquë panca nancha ya'huërin, Atramitio quëran huë'ninso'. Asia parti yapa'sarin. A'naya a'naya ninanoquë yachinpirinso'. Inaquë ya'conahuato, pipirai. Aristarconta' ca'tanincoi. Inaso' Tisaronicaquë ya'huërin, Masitonia parti nininso'. <sup>3</sup> Tahuëririnquë Sitonquë nonshirai. Inaquë Paono nosoroaton, capitani itërin: “Nipayaransopita ya'huërinquë yapa'patan, noya paquë',” itërin. Pa'patoira, pahuantërincoisopita quëtërinacoi. <sup>4</sup> Ina quëran pipirahuato, Chipriqué canconai. Ihuan niquëran pitarincoi ni'ton, coninan pa'tërai. <sup>5</sup> Ina quëran Sirisia parti, Panpiria parti, inapita pirayan na'huërai. Inapoato, Nisia parti canconai. Miraquë nonshiconai.

<sup>6</sup> Inaquë capitan a'na nancha quënanin, Aricantria quëran huë'ninso'. Itaria parti yapa'sarin ni'ton, inaquë ichiya'conincoi. Panca nancha inaso'. <sup>7</sup> Pipirahuato, sacai' pa'nai. Oshaquëran paato, na'a tahuëri quëran Quintoquë canconai. Ihuan nacapiato, panca so'ton Crita itopiso' tahuitonai. Sarmona ya'cariya pa'nai. <sup>8</sup> Inaquë yonsai' pa'tërai. Sacai' pa'sahuato, Noya Nonshinano'sa' itopiquë canconai. Ya'cariya a'na ninano' ya'huërin. Nasia itopiso'.

<sup>9</sup> Hua'quirai ni'toi, o'napi tahuëri'sa' naniriarin. Naporo quëran huarë' huëhuëpiro' marë pa'tacaso'. Napoaton Paonori itapon:

<sup>10</sup> —Ama siniro'ro'sa' pa'ahuasohüë', ma'sha onpohuatëhua', ténahuë. Pa'patëhua', nancha tapiarëhua'. Ma'sharo'santa' a'paitarihua'. Piyapinponta' chimiitochináchin, itërin.

<sup>11</sup> Capitanso nipirinhüë' co natëtërinhuë'. Nancha hua'anën, nancha quëpana'pi, inapita manorapi: “Pa'ahua',” itohuachinara, “Noyahua', pa'ahua' nipachin,” ténin

capitan. <sup>12</sup> “Iso nonshinanquë co noyahuë' o'napi na'huëanatacaso'. Pinisiquë tëranta' canconamarëhua'. Inaquë o'napi na'huëanatahua',” topi. Napoaton manorapi. Pinisiso' Crita parti ya'huërin. Nonshinanën quëran pi'i pipirinso parti notëërin.

### *Panca ihuani maninso'*

<sup>13</sup> Ihuan ahuënan quëran huisohuantahuachina, “Iporaso' noya pacacaso',” topachinara, pipirai. Crita yonsai' pa'tërai. Noya pa'sapiraihuë', <sup>14</sup> shiarahuaton, panca ihuan manincoi. Pi'i pipirinso parti quëran huëcaponahuë', norti parti amasha yonsanin. <sup>15</sup> Chiniquën mapachincoira, co nanitëraihuë' no'tëca'huaiso'. Ihuansa' topin an quëpaconincoi. <sup>16</sup> Marë huancoanai' so'ton ya'huërin, Caota itopiso'. Co pan-canayahuë'. Inataquëchin co ihuan chiniquën pa'ninhuë' ni'ton, ina yonsan yoranai. Ina pa'tasocoi, sacai' niponahuë', poti quëparaiso' a'sonai ama ihuani oshitëcaso marëhuë'. <sup>17</sup> Ohuararahuatona', nanchaquë po'mopi. Ina quëran caporinquë nancha so'quëtopi ama ya'quirapicaso marëhuë'. Ina ya'cariya panca sa'mairo' ya'huërin. Inotërachin ninin, Sirti itopiso'. Nohuitatona', ama inaquë pacacaso marëhuë' panca në'mëtë' ótënpiso', a'pamapi. Inapotohuachinara, ihuansa' topinan quëpaconincoi. <sup>18</sup> Tahuëririnquë co'sacairi chiniquën ayanpon yanpontárin. Chiniquën ihuai' ni'ton, pë'pëtoro'sa' quëpapiso' inquiitopi. <sup>19</sup> Ina tashiraya nancha ma'shanënpitanta' inquiitopi. <sup>20</sup> Ina quëran na'a tahuëri co pi'i quënanaihuë'. Tayoranta' co ya'norinhuë'. Intohuasos quëparincoi nimara. Co nitotëraihuë'. Chiniquën ihuantarin ni'ton: “Tëhuëenchachin chimiitarihua'; co cha'ësarihuahuë',” topiraihuë'.

<sup>21</sup> Nani hua'qui' co coshatëraihuë'. Chiniquën ihuan manincoi ni'ton, co nanitëraihuë'. Co huachi chiniraihuë'. Paonosos huancánachin huanirahuaton, itapon:

—Natanco iyaro'sa' no'tëquën sha'huichinquëma'. Ni'co'. Critaquë quëparitacaso marë' sha'huitopiranquëmahuë', co natëramacohuë' ni'ton, huë'nëhua'. Co huë'nëhuahuë' naporini, co ma'sha onpo'itërihuahuë'. Co ma'sha aya'itonhuë'. <sup>22</sup> Iporaso nipirinhüë' chiniquën cancantoco'. Co inquënpoa tëranta' chimiitarihua'huë'. Nanchasáchin ayatarihua'. <sup>23</sup> Caso' Yosë natërahuë. Inasáchin imarahüë. Ina nohuanton, achin tashi' anquëninën ya'notimarinco. <sup>24</sup> Ya'notimarahuatonco, itërinco: “Ama Paono të'huaquësohuë'. Co chimiitaranhuë'. Yosë nohuanton, a'na tahuëri Noma copirno ya'huërin'pa' cansaran copirno chachin nontamaso marë'. Yosë nontëran ni'ton, ya'ipi nanchaquë nisaramasopita nanpiarama'. Co a'nayanquëma tëranta' chiminapomahuë',” itërinco anquëni. <sup>25</sup> Napoaton iyaro'sa' chiniquën cancantoco'. Tëhuëenchachin Yosë natërahuë. Co inaso' nonpintërinpoahuë'. Sha'huitërinco chachin co a'nayanpoa tëranta' chimiitarihua'huë'. <sup>26</sup> Nipirinhüë', a'na so'tonquë ihuai' të'yatarinpoa', itërincoi Paono.

<sup>27</sup> Nani cato' simana nanirihuaso', Atriatico marëquë yanponarai. Ipora huanta' ihuai' quëparárincoi. Yono tashi pochin nisahuaso': “No'pa' ya'cariarëhua',” topi nancha quëpana'piro'sa'. <sup>28</sup> Napoaton caporin quëran tantiarin. “Cara shonca saota mitro anpotërinso',” tënin. Amashamiachin pa'sahuato, inapochachin tantiantarin. “Cato shonca canchisë mitroíchin anpotërinso',” tënin. <sup>29</sup> “Na'pique ya'parapihuatëhua',” ta'tona', huanconën quëran catapini hua'na moto' të'yaitopi ama pacacaso marëhuë'. “¿Onporohuarëcha tahuërirë'poya?” ta'tona', moshatopi. <sup>30</sup> Nancha quëpana'piro'saso nipirinhüë' yata'anapitonaco: “Hui'nimotën quëran a'na hua'na moto' të'yaitahua',” niitatona', ta'acaiso marë' poti i'quë yatë'yatantapi. <sup>31</sup> Napohuachinara, Paonori nicaton, capitan, sontaro'sa', inapita itapon:

—Isopita ta'ahuachina', co canpitanta' cha'ëpomahuë', itërin.

<sup>32</sup> Napotohuachina, sontaro'saso' manorahuatona', caporin nishitëtopi. Inapotohuachinara, poti i'quë anotërin huachi.

<sup>33</sup> Tahuëri ya'caritohuachina, Paono itantarincoi:

—Iporaso', iyaro'sa', nani cato' simana pa'yanatoma', co coshatëramahuë'. <sup>34</sup> Napoaton coshatoco huachi chiniamaquëma'. Co chimiitarihuahuë'. Co manta' onpoarihuahuë', itërincoi.

<sup>35</sup> Itahuatoncoi, pan manin. Ya'ipiya ni'tërantapaiquë, Yosë nontërin. “Yosparinquën Tata Yosë,” itahuaton, së'panin. Ina quëran coshatarin. <sup>36</sup> Napohuachina, ya'ipicoi chiniquën cancantatoi, coshatërai. <sup>37</sup> Cato pasa canchisë shonca saotaya'picoi nanchaquë ya'huërai. <sup>38</sup> Nani ya'ipiya natëhuachinara, trico quëparaiso' inquitopi. Inapotohuachinara, nancha niotëintarin.

### *Nancha quëran cha'ëpiso'*

<sup>39</sup> Tahuërihuachina, no'pa' quënanpirinahuë', co nohuitopihuë'. Coninanquë inotë' quënanpi. “Nanitohuatëhua', paso' inotëquë chinpia'ahua',” nitopi. <sup>40</sup> Napoaton hua'na moto' nishitëtatona', i'quë a'paitopi huachi. Naporo chachin no'soratën i'shiritopi. Ina quëran hui'nin quëran panca në'mëtë' inapaquë pë'tënpi. Ihan quëpahuachincoira, inotëquë pa'sarai. <sup>41</sup> Pa'sapiraihuë', sa'mairo' ni'ton, hui'nin quëran ya'tararin. Co huachi yapa'ninhuë'. Huanconën quëran co'sacairi chiniquën opotaton, nipaatërin huachi.

<sup>42</sup> “Huëco' apiro'sa' tëpa'ahua', yonatona' ta'ahuachina',” topi sontaro'sa'. <sup>43</sup> Capitanso nipirinhue' nohuantërin Paono cha'ëcaso'. Napoaton “Amä tëpacosohue'. Ya'ipinpoa' pa'ahua'. Nitoyonpatama', canpita'ton niitatoma', yonsaiquë paco'. <sup>44</sup> Ina quëran a'naquëmanta' nontë' së'quërahuatoma', yonsaiquë paco'. Capa nontë' nipachin, nancha ma'shanënpitaquë tëranta' së'quërahuatoma', paco huachi,” itërin capitani. Naporahuatoi, cha'ërai. Ya'ipicoi yonsaiquë canconai.

## 28

### *Paono Martaquë naporinso'*

<sup>1</sup> Ya'ipicoi cha'ërahuatoi, no'paquë nonshiconai. Ya'huëhuano'sa natanatoi: “¿Ma'ninta' iso parti?” itohuatëira, “Marta,” itopi, itërinacoi. <sup>2</sup> Ya'huëhuano'sa' noya nosororinacoi. O'natatoi, sëhuënai ni'ton, a'pëtopi. “Huëco' napëntiico',” itërinacoi. <sup>3</sup> Paono ihuë masahuaton pënuë acoapirinhue', ya'huan pipirahuaton quëtëimirarin. <sup>4</sup> Naquëimirarinso', ya'huëhuano'sari ni'pi. “Iso quëmapi tëpatona'pi ipora. Napoaton yosëro'sa' nohuanton, ma'sha onpoarin i'huëretacaso marë'. Marë quëran cha'ëponahuë', chimianin,” nitopi.

<sup>5</sup> Paonosonipirinhue' imirin pa'tanahuaton, ya'huan pënuë të'yatërin. Co manta' onporinhue'.

<sup>6</sup> “Apira pomatarin. A'naroáchin anotahuaton, chiminapon,” tëcatona' hua'qui' ni'sapirinhue', co manta' onporinhue'. Napoaton “Co ipora tëpatona'pihuë'. Yosë pochin niponahuë', piyapi taramara,” nitopi.

<sup>7</sup> Ina ya'cariya a'na hua'an ya'huërin, Popirio itopiso'. Noya quëmapi ni'ton, pëinënuë ahuë'ëtërincoi. Noya nontërincoi. Cara tahuëri cosharo' quëtërincoi. <sup>8</sup> Pa'pinso nipirinhue' chiniquën caniorin. Apira apira saporin. Nani hua'qui' chi'chirárin. Paonori nicapon pa'nin. Së'huamotorahuaton Yosë nontohuachina, a'naroáchin noyatërin. <sup>9</sup> Napohuachina, na'a cania'piro'sa' huë'pi. Inapitanta' anoyatërin. <sup>10</sup> Ina marë' nóya ni'ninacoi. Naporahuaton, ma'sha nicanarinacoi. Hua'qui' inaquë ya'huërai. Yapa'patëira, pahuantërincoiso' quëtërinacoi.

### *Nomaquë canconinso'*

<sup>11</sup> Nani cara yoqui nisahuaso', yapa'nai huachi. Inaquë nisha nancha ya'huërin. Aricantria quëran huë'pirinhue', inatohua' o'napi na'huëanatërin. Ina hui'nin motënuë catopia'hua mamanshiro'sa' ya'huërin. Castoro, Porosi inapita itopiso'. <sup>12</sup> Inaquë ya'conahuatoi, paantarai. Siracosaquë nonshirahuatoi, cara tahuëri inaquë i'huatërai.

<sup>13</sup> Ina quëran yonsai' pa'tahuatoi, Niquioquë canconai. Tahuërinquë pinëhuëi parti

quëran ihuan huë'sahuaton, quëparincoi. Cato' tahuëri quëran Potioriquë canconpatëira, nonshirai. <sup>14</sup> Inaquë imapisopita quënanconai. “Huëco' ni'quicoi,” itohuachina-coira, inaquë a'na simana yacaparai. Naporahuatoi, Nomaquë ya'caritërai huachi. <sup>15</sup> Ya'caritohuatëira, Quisoso imapisopita inaquë ya'huëpiso' natantahuatona', huë'pi. “Apio niyontonpiso,” itopiquë a'naquën nacapirai. Naporahuaton, Tres Tapinasëquë canconpatëira, a'napitanta' quënancoantarai. Imasapi anta' ni'ton, nacapiaponaco huë'pi. Inapita Paono quënanahuaton, Yosë nontërin: “Yosparinquën,” itërin. Naporahuaton, chiniquën cancantërin. <sup>16</sup> Ina quëran Nomaquë chachin canconai. Capitanso' pa'sahuaton, prisoro'sa' quëparin tashinan pëiquë po'mocaiso marë'. Paonoso nipirinhüë' co inaquë po'mopihuë'. “Nohuantohuatan, quëmaora ya'huëquë’,” itopi. Napoaton a'na pëiquë ya'huërin. Nipirinhüë', a'na sontarori a'pairarin ama ta'acaso marëhuë'.

### *Nomaquë Paono pënëntërinso'*

<sup>17</sup> Cara tahuëri quëran cotio hua'ano'sa' amatërin. Inaquë huë'pachinara, Paonori itërin: —Nani iyaro'sa' isëquë huë'nahuë. Pi'pian nonchinquëma', ta'to, amatëranquëma' huë'nama'. Topinan quëran iyaro'sa' sha'huirapirinaco. Canta' cotio quëmapico ni'to, co a'napita cotioro'sa' no'huirahuë'. Shimashonënpoapita napopiso' yonquiato, co pinorahuë'. Nipirinhüë', Quirosarinquë pa'patora, maninaco. Masahuatonaco, Noma hua'ano'saquë yo'coninaco ana'intinacoso marë'. <sup>18</sup> Hua'ano'sa' natanahuatonaco, “Co manta' onporinhüë' ni'ton, co tëpacaso' ya'huërinhuë'. Ocoi'i,” topi. <sup>19</sup> Cotioro'saso nipirinhüë' co nohuantopihuë'. Napoaton “Noma copirno chachin yanontërahuë,” itërahuë. Co yaocoirinacohüë' ni'ton, isëquë huarë' huëca'huaso' ya'huërin. Co cotioro'sa' sha'huirapica'huaso marë' huë'nahuë. Co no'huirahuë'. <sup>20</sup> Napoaton amatëranquëma'. Yanohuitëranquëma'. Huëco' ninontahua'. Ya'ipi israiro'sanpoa' ninarëhuaso marë' catinaquë tonpoimiratërinaco, itërin.

<sup>21</sup> —Co'chi iyasha manta' nitotëraihuë' quiyaso paya. Cotia parti ya'huëpisopita co quirica a'patiirinacoihuë'. Huë'pachinaranta', co a'naya tëranta' nonapirinënquënhüë'. <sup>22</sup> Nipirinhüë', yanatanainquën. “Quisoso imapisopita co noyahuë’,” topi natantërai. Ya'ipi parti napopi. Napoaton sha'huitocoi. ¿Ma'ta' quëma a'chinan? <sup>23</sup> A'na tahuëri huënantahuatoi, sha'huitocoi nitochii, itopi.

—Noya iyaro'sapa'. Naporo' tahuëri huënantaco' ya'ipinquëma' sha'huichinquëma', itohuachina, pa'pi. Ina quëran tahuëri nanihuachina, na'aya'pi huë'pi. Paono ya'huërinquë niyontonpi natanacaiso marë'. Tashiramiachin huë'pi. Huë'pachinara, Paonori a'chintárin.

—Yosë yahua'anëntërinpoa'. Na'con nohuantërin huëntonënuquë chachin aya'coinpoaso'. Ina marë' hui'nin a'paimarin. Inaso' Quisoso itopi. Quiricanën quëran ina na'con ninopi. Moisésë pënëntërinso' ninshitaton, ninorin. Pënëntona'piro'santa' ninopi, itërin. Quiricanën quëran na'con a'chintërin. A'chintaton, chiniquën pënënin Quisoso natëcaiso marë'. A'chintochináchin i'huatërin. <sup>24</sup> Natanahuatona', a'naquën natëpi. A'naquënso nipirinhüë' co natëpihuë'. <sup>25</sup> Nisha nisha yonquiato, yapipipi. Yapipihuachinara, Paonori itaantarín:

—Ma no'tëquën iyaro'sa' Ispirito Santori nontërin shimashonënpoa' pënënacaso marë'. Ina nohuanton, Isaiasë ninshitaton, naporin:

<sup>26</sup> “Paaton, piyapi'sa' sha'huitonquë':

‘Natanapomarahüë', co natëtaramahuë'.

Nicapomarahüënta', co tëhuëchachin quënanaramahuë', itëquë'.

<sup>27</sup> Isopita piyapi'sa' co natantochináchinhuë' cancantopi.

Në'huëya pochin cancantatona', co yanatantopihuë'.

Tanshirinso pochin cancantatona', co yaquënanpihuë'.

Noya ni'pi naporini, quënantonahuë'.

Noya natanpi naporini, cancanëna quëran natëchitonahuë'.

Co noyahuë' yonquipisopita naniantatona' imarinaco naporini,  
anoyacancanchitohuë', itërin Yosëri," tënin.

<sup>28</sup> Napoaton sha'huichinquëma' nitotoco'. Yosëri nisha piyapi'sa' nani sha'huitërin  
cancanëna' anoyatacaso marë'. Inapitaso' natërapì, tënin Paono. [ <sup>29</sup> Ina itohuachina,  
nisha nisha ninontahuatona', pipipi.]

<sup>30</sup> Ina quëran cato' pi'ipi Paono inaquë ya'huërin. A'nantërinso' pëiquë ya'huëhuachina,  
na'a piyapi'sari nicapona' huë'pi. Huë'pachinara, noya nontërin.

<sup>31</sup> "Yosë hua'anëntërinquë ya'conco' canpitanta'," itërin. Sinioro Quisocriso naporinso'  
a'chintárin. Co të'huatonhuë', na'con a'chinin. A'chinpirinhuë', co insoari tëranta'  
atonirinhüë' ni'ton, Quisoso nanamën nahuinin. Nani ninshitëranquën huachi.



## Paonori Nomaquë ya'huëpisopita ninshitërinso'

### *Paonori imapisopita yonquiaton, ninshitërinso'*

<sup>1</sup> Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahüë. Quisocristoíchin natërahuë. Ina acorinco paato nanamën a'china'huaso marë'. Yosë nohuanton, noya nanan a'chináruhuë.

<sup>2</sup> Co'huara Quisocristo o'mayatërasohüë', ina nanan chachin Yosë sha'huitërinpoa'. Quiricanën quëran anitotërinpoa', iráca ninshitopiso'. Ina nohuanton, na'a pënëntona'piro'sa' ninopi. <sup>3</sup> “Hui'nahuë a'paimarahüë,” ténin Yosë. Napoaton Quisocristo isoro'paquë o'marahuatón, piyapi chachin nasitimarin. Tapi shiin inaso'. <sup>4</sup> Yosë pochachin ni'ton, noyasáchin ninin. Chiminpirinhuë', Yosëri ananpitaantarín. “Inaso' tēhuēnchachin Yosë hui'nin. Chini chiníquēn nanantarín,” tēnhua'. Ananpitaantarín ni'ton, nitotërehua'. Quisocristo chachin hua'anëntërinpoa' ni'ton, “Sinioro” itërehua'.

<sup>5</sup> Ina nosoroatonco, acorinco nisha nisha piyapi'sa' a'chinta'huaso marë'. Inapitanta' nanamën natëcaiso marë' pënënarahuë. Natëhuachina', “Quisocristoso' noya noya,” tosapi. <sup>6</sup> Canpitanta' nisha piyapinquëma' nipomarahüë', Quisocristo imarama'. Yosë nohuanton, imarama'. <sup>7</sup> Napoaton Nomaquë ya'huëramasopita ninshitaranquëma'. Yosë pa'pi nosororinquëma'. Nani acorinquëma' piyapinēnpita nicacamaso'. Ni'ton, inasáchin yonquicaso' ya'huërin. Tata Yosë inaora nohuanton, catahuainquëma'. Asanocancainquëma'. Quisocristonta' inapochachin catahuainquëma'. Inaso' hua'anëntërinpoa'.

### *Inapita marë' Yosë nontërinso'*

<sup>8</sup> Canpitaso' noya Yosë natërama', natantërahuë. Ya'ipi piyapi napopi. Ina natantato, “Yosparinquēn Sinioro,” itërahuë Yosë. Ina'ton napotërahuë. Quisocristo catahuarinco ina pochin Yosë nonta'huaso marë'. <sup>9</sup> Yosë ni'sárinco, no'tëquēn nontaranquëma'. Ya'ipi cancanëhuë quëran huarë' Yosë imarahüë. Hui'nin nanamën a'chináruhuë. Nani tahuëriya canpita yonquiatēnquëma', <sup>10</sup> Yosë nontarahüë. “Noya catahuaquë',” itërahuë. Iráca quëran huarë' nicapēnquëma' yapa'pirahuë', co nanitërahuë'. Ipora huanta' paca'huaso' yonquiarahuë. “Quëma nohuantohuatan, Sinioro, catahuaco onpopionta' pa'i,” tēnahuë, Yosë nontato. <sup>11</sup> Yani'nanquëma'. Yacatahuanquëma' chiníquēn cancantamaso marë'. Ina quëran noya noya imasarama'. <sup>12</sup> Canpitanta' noya imapatama', achinicancanaramaco canta'. Noya ninontatëhua', noya noya cancantarihua'.

<sup>13</sup> Tēhuēnchachin iyaro'sa', iráca quëran huarë' nicapēnquëma' yapa'pirahuë'. Ipora huanta' co nanitërahuë' paca'huaso'. Nisha nisha parti a'chinpatëra, piyapi'sa' natëtona', Quisocristo imasapi. Canpitanta' yaa'chintëranquëma' noya noya imacamaso marë'. <sup>14</sup> Ya'ipi piyapi'sa' pënëna'huaso' ya'huërin. Quisocristo sha'huitërinco. “Hua'ano'sa', topinan piyapi'sa', ya'ipi nananquë nonpisopita a'chintëquë'. Quirica nitotoro'sa', co nitotoro'sahuë', ya'ipiya pënēnquë',” itërinco. <sup>15</sup> Napoaton canpitanta' yaa'chintëranquëma'. Nomaquë ya'huëramasopitanta' Quisocristo nanamën a'chinchinquëma' tēnahuë.

### *Quisocristo nanamën*

<sup>16</sup> Co caso' tapanahuë' Quisocristo nanamën a'china'huaso marë'. Piyapi'sa' natëhuachina', Yosëri anoyacancantarín. Inaíchin nanitaparín nicha'ëinpoaso'. Cotioro'sari'ton natëhuachina', anoyacancantarín. Iporaso' nisha nisha piyapi'santa' anoyacancantarín. Napoaton pa'yatërahuë nanamën sha'huica'huaso'. <sup>17</sup> “Yoséíchin anoyacancantërinpoa',” topatëhua', Yosë noya ni'sarinpoa'. Oshanēnpoa' inquitatonpoa', co huachi inapita yonquiarinhuë'. Quiricanën quëran ina anitotërinpoa'. “Cancanēnpoa quëran huarë' Yosë natëhuatëhua', noya ni'sarinpoa' ni'ton, noya nanpimiatarihua',” ténin Yosë quiricanēnquë. Co canpoara nanitërehuahuë' noya cancantacaso'.

*Iraca quëran huarë' oshahuanpiso'*

<sup>18</sup> Yosë inápaquë ya'huaponahuë', cancanënpoa quëran anitotërinpoa'. “Piyapi'sa' co noyahuë' nipi. Co ca pochin cancantopihuë'. Ina marë' no'huito, ana'intarahuë huachi,” ténin Yosë. No'tën nanan nitotaponaraihuë', co nohuantopihuë' natëcaiso'. <sup>19</sup> Cancanëna quëran Yosë nohuitochinachin acopirinhüë', co yanohuitopihuë'. <sup>20</sup> Isoro'pa' ninin quëran huarë' piyapi'sa' nitotopi. Yosëso' co quënanpirëhuahuë', nani ma'sha ninin. Ina nicatona', “Tëhuëncachin Yosë ya'huërin. Ya'ipiya nanitaparín ni'ton, ina chinotahua,” ta'caso nipirinhüë', co nohuantopihuë'. Napoaton na'inpi. <sup>21</sup> Yosë ya'huërinso' nitotaponaraihuë', co ina chinotopihuë'. Ina nohuanton, nani ma'sha ya'huëtopirinhüë', co ina marë' “Yosparinquën Siniro,” co itopihuë'. Nisha nisha yonquiatona', chihuërinso pochin nipi. Tashi pochin cancantopi. <sup>22</sup> “Ya'ipiya nitotërai,” topirinhüë', co noya yonquipihuë'. <sup>23</sup> Yosëso' noyasáchin ninin. Co onporonta' chiminaponhuë'. Inaso nipirinhüë', co ina yonquipihuë'. Ina naniantatona', mamanshi nipi moshacaiso marë'. Mamanshi piyapi nonanpiso' moshapi. Co piyapi ya'huëmiatopirinhüë', ina yamoshapi. Nisha nisha ma'sharo'santa' moshapi. A'naquën anpiantëhuano'sa', a'naquën no'paquë niohuaratërinso'pita, inapita moshapi.

<sup>24</sup> Napoaton Yosëri tananpitërin co noyahuë' yonquipisopita nicacaiso marë'. A'porin. A'pohuachina, pa'pi co noyahuë' nipi. Taparosáchin yonquiatona', nisë'huapi. Co ina pochin nisë'huacasohüë' nipirinhüë'. <sup>25</sup> Yosëri no'tëquën anitotopirinhüë', ina a'porahuatona', nonpin nanan natëpi. Ma'sha isoro'paquë ya'huërinso'pita moshatona', chinotopi. Yosëriáchin ya'ipiya ninin nipirinhüë', co inaso' chinotopihuë'. Tëhuëncachin inasáchin chinotacaso' ya'huërin, tënahüë. Amen.

<sup>26</sup> Napoaton Yosëri tananpitërin pa'pi co noyahuë' cancantacaiso marë'. Sanapi'sa' co huachi so'ina' nohuantopihuë'. Sanapi capini nisë'huacaiso' nohuantopi. Co ina pochin nicacasohüë' nipirinhüë'. <sup>27</sup> Quëmapi'santa' co huachi sa'ina' nohuantopihuë'. Quëmapi capini nisë'huapi. Ina marë' na'inpi ni'ton, Yosëri ana'intarin. Co no'tëquën yonquiatonaraihuë', nitapicancanpi. Nonënanta' tapiipi.

<sup>28</sup> Co Yosë yanatëpihuë' ni'ton, inari a'porin co noyahuë' nicacaiso marë'. Nitapicancamiatopi. <sup>29</sup> Pa'pi co noyahuë' nipi. Nimonshitacaisoráchin yonquipi. Na'con oshahuanpi. A'na piyapi ma'shanënpita nohuantapapi. Piyapi chinotopi. Niapiratopi. A'naquën tëpatopi. Nino'huipi. Nonpinápi. No'huitápi. A'napita nonpinapipi. <sup>30</sup> Nipinopi. Yosë inimicotopi. Ma'tona ma'tona nonpi. “Caso' noya noyaco,” ta'tona', a'napita nocanpi. Yonquirápi co noyahuë' nicacaiso marë'. Pa'pina', a'shina', co inapita tëranta' natëpihuë'. <sup>31</sup> Co huachi noya yonquipihuë'. Nonpinápi. Co quëmopinënpita tëranta' nosoropihuë'. No'huitochinachin cancantopi. <sup>32</sup> “Co noyahuë' nipsisopita chiminpachinara, ana'intacaso' ya'huërin,” ténin Yosë. Ina nitotaponaraihuë', inachachin niantapi. Naporahuatona', a'napitanta' co noyahuë' nipachinara, pa'yatopi.

**2***Yosëri no'tëquën ana'intërinso'*

<sup>1</sup> A'naquëma' iyaro'sa' piyapi'sa' yonquirapiratoma': “Paso' quëmapi co noyahuë' ninin,” tënama'. Napoapomarahüë', ina pochachin canpitanta' co noyahuë' ninama'. Napoatoma', nina'intarama'. <sup>2</sup> “Co noyahuë' nipatama', ana'intaranquëma',” ténin Yosë. No'tëquën inaso' ana'intarin, nitotërehua'. <sup>3</sup> “Pasopita oshahuanpi,” tënama'. Nipirinhüë', canpitanta' co noyahuë' nipatama', Yosë ana'intarinquëma co cha'ësaramahuë'. <sup>4</sup> Yosë nosororinpoaso' co no'tëquën yonquiramahuë'. “Co a'naroáchin no'huirinoahuë',” ta'toma', co noyahuë' ninama'. Tëhuëncachin co a'naroáchin ana'intërinquëmahuë'. “Oshaquëran co noyahuë' yonquipisopita naniantapona' nima'ra,” ta'ton, ninarárin. <sup>5</sup> Canpitaso nipirinhüë', co natantochináchinhuë' cancantërama'. Co oshanëma' yaa'poramahuë'. Napoaton ayaro' tahuëri chini chiníquën

ana'intarinquëma'. Naporo' ya'ipi piyapi'sa' no'tëquën ana'intarin. <sup>6</sup> Ya'ipi ninëhuasopita Yosë nitotërin. Ayaro' tahuëri ina yonquiaton, no'tëquën sha'huitarinpoa'. Noya nipatëhua', noya acoarinpoa'. Co'so' noya nipatëhuahuë', ana'intarinpoa'. <sup>7</sup> Noyasáchin nipatëhua', noya ni'sarinpoa'. Yosë yonquiatëhua', noya acoinpoaso marë' na'con nohuantohuatëhua', ananpitaantaripoa'. Inarë'quënpoa' ya'huëmiatarihua'. <sup>8</sup> Nipirinhüë', canpoara nohuantërehuasoráchin nipatëhua', no'huiarinpoa'. No'tëquën anitotopiripoahuë' co natëhuatëhuahuë', ana'intarinpoa'. Co noyahuë' nipatëhua', chiníquën ana'intarinpoa'. <sup>9</sup> Ya'ipi co noyahuë' nipisopita no'tëquën ana'intarin. Naporo' chiníquën parisitapi. Cotioro'sa' no'tëquën chachin ana'intarin. Nisha piyapi'santa' co noyahuë' nipachina, inapochachin ana'intarin. <sup>10</sup> Noya nipisopitaso nipirinhüë', noya ni'sarin. Noya noya acorarin. Asanocancanarin. Cotioro'sa' no'tëquën chachin napotarin. Nisha piyapi'santa' inapochachin nitarin. Ya'ipinpoa' noya nipatëhua', nicha'ësaripoa'.

<sup>11</sup> Yosëso' ya'ipinpoa' napopianachin ni'ninpoa'. <sup>12</sup> Iráca Moisësëri cotioro'sa' pënënin nani ma'sha natëcaiso'. Cotioro'saráchin pënënin. Co ina natëhuachinahuë', oshahuanpi. Ina marë' Yosëri ana'intarin. A'napitaso nipirinhüë' co pënëntërinso' nitotopihuë'. Co nitotatonahuë', co ina natëcaiso' ya'huëpirinhüë'. Co noyahuë' nipachina', ana'intarin chachin inahuanta'. <sup>13</sup> Cotioro'saso' Moisësë pënëntërinso' natanaponaraihuë', co natëtopihuë'. Napoaton co Yosëri noya ni'ninhüë'. No'tëquën natëpi naporini, Yosëri noya ni'itonhuë'. <sup>14</sup> Nisha piyapi'saso' co Moisësë pënëntërinso' nitotopihuë'. Co nitotaponaraihuë', a'naquën noya nipi. Inahuara cancanëna quëran nitotopi ni'ton, napopi. <sup>15</sup> Cancanëna quëran Yosëri anitotërin noya nicacaiso'. Co noyahuë' nipachinara, inahuara nitotopi. "Co inapocaso nipirinhüë', inaporëhua'," topi yonquiatona'. Inapochachin noya nipachinara, inanta' cancanëna quëran nitotopi. <sup>16</sup> Ayaro' tahuëri ya'ipi co noyahuë' yonquirëhuasopita aipitarinpoa'. Po'oana quëran ma'sona tëranta' onporëhuasopita a'ninquëchin anitotarinpoa'. Naporo' tahuëri Tata Yosë nohuanton, Quisocristo no'tëquën sha'huitarinpoa'. Co noyahuë' nipatëhua', ana'intarinpoa'. Ina nanan ya'ipi parti sha'huirarahüë'.

*Co cotioro'sa' tëranta Yosë pënëntërinso' natëpisohüë'*

<sup>17</sup> A'naquëma' cotioro'sanquëma' ni'ton, a'napita nocanama': "Moisësë pënëntërinso' natëhuatoi, cha'ësarai," tënama'. "Yosë na'con na'con nosororincoi," tomantatoma', a'napita nocanama'. <sup>18</sup> Yosë nohuantërinso' nani nitotërama'. Yosë quiricanën a'chintërinënuëma' ni'ton, nitotërama' noya nicacamaso'. <sup>19</sup> Nisha piyapi'santa' yaa'chintërama'. Inapitaso' co Yosë nohuatatonaraihuë', somaraya pochin niconpi. Tashi pochin cancantopi. <sup>20</sup> Co Yosë nanamën nitotopihuë' ni'ton, yaa'chintërama'. "Yosë no'tëquën pënënincoi ni'ton, noya noya nitotërai. A'napitaso' co quiya pochin nitochátërapihuë'," tënama'. <sup>21</sup> A'napita a'chintopiramahuë', ¿onpoatomata' canpita chachinso' co yonquiramahuë'? "Ama ihuatocosohüë'," tapomarahuë', ¿onpoatomata' ihuatërama'? <sup>22</sup> "Ama a'na quëmapi sa'in monshitocosohüë'," tapomarahuë', ¿onpoatomata' canpitanta' monshihuanama'? Piyapi'sa' mamanshi moshahuachinara, no'huirama'. "Yosëichin chinotacaso nipirinhüë'," tënama'. Napoapomarahuë', ¿onpoatomata' co cancanëma quëran huarë' chinotëramahuë'? Co mamanshi moshapiramahuë', moshatopiso pëiquë ihuatërama'. <sup>23</sup> "Quiyasáchin Moisësë pënëntërinso' nitotërai," tënama'. Napoapomarahuë', co natëramahuë'. Ina marë' a'napitari Yosë pinopi. <sup>24</sup> Co noyahuë' cancantërama' ni'ton, nisha piyapi'santa' co Yosë noya ni'sapihuë'. Quiricanënuë' chachin naporin:

<sup>25</sup> "Quiyaso' Yosë piyapinënpitacoi," ta'toma', marca niacotërama'. Moisësë pënëntërinso' noya natëhuatama', no'tëquën niacotërama'. Nipirinhüë', co natëhuatamahuë', topinan quëran marca niacotërama'. <sup>26</sup> Nisha piyapi'santa' niponaraihuë', Yosë natëhuachina', piyapinënpita pochin ni'sarin. <sup>27</sup> Co marca niacotaponaraihuë', Yosë natëhuachina', sha'huirapiaponënuëma'. Canpitaso'

pënëntërinso' nitotapomarahuë', co natëhuatamahuë', Yosë ana'intarinquëma'.  
 28 Cotioro'sanquëma' nipiramahuë', co ina marë' piyapinënpita pochin ni'ninquëmahuë'.  
 Inapochachin Yosë marcanënta' co topinan nonënpoaquë niacotacaso' ya'huërinhuë'.  
 29 Ya'ipi cancanënpoa quëran Yosë imapatëhua', tēhuëchachin piyapinënpita pochin  
 ni'sarinpoa'. Marcanën cancanënpoaquë acotërinpoa'. Co nonënpoaquë acotërinpoahuë'.  
 Ispirito Santo anoyacancantërinpoa'. Ina quëran noya ni'ninpoa'. Co piyapi'sa'  
 pa'yatopirinënpoahuë', Yosëso' noya ni'sarinpoa'.

### 3

1 Cotioro'sa' ni'tona', marca niacotopi. ¿Ma'ta' ina marë' canapi? 2 Na'con canapi  
 tēnahuë. Yosëri na'con catahuarin. Inahua'ton iráca nontërin. Nanamën chachin  
 aninshitërin ya'huëmiatacaso marë'. 3 A'naquënsó' co huachi ina natëpihuë'. Ina nipon-  
 ahuë', co nanitërehuë': "Yosëso' co no'tëquën sha'huitërinhuë'," ta'caso'. 4 Yosëriso' co  
 onporonta nonpintarinhuë'. Ya'ipi piyapi'sa' nonpinpirinahuë', Yosëso' no'tëquënáchin  
 nonin. Quiricanën quëran naporin:

"No'tëquënáchin nontërancoi ni'ton, a'naquën nonpinapipirinënquënhuë',  
 co onporonta' minsëarinënquënhuë'," tēnin.

5 A'naquën po'pin yonquipi: "Canpoa co noyahuë ninëhua ni'ton, Yosë noyasáchin  
 nininso' a'ninquëchin anitotërinpoa'. Napoaton ana'intoahuachinpoa', co no'tëquën  
 ana'intërinpoahuë'," toconpi. 6 ¿Co ina pochin yonquicaso ya'huërinhuë'? Yosëso' noya  
 ni'ton, no'tëquën ana'intiinpoaso' ya'huërin. Co ana'intiinpoaso' ya'huërinhuë' naporini,  
 co ayaro' tahuëri no'tëquën sha'huichitonpoahuë'.

7 A'naquëonta' taponá: "Caso' nonpinpirahuë', Yosëso' no'tëquënáchin nonin. Non-  
 pinahuë ni'ton, Yosë no'tëquënáchin noninso' a'ninquëchin anitotërinpoa'. Napoaton  
 co oshahuan pochin Yosë ana'intincoso' ya'huërinhuë'," toconpi. Co no'tëquën yon-  
 quipihuë'. 8 A'naquënta' napopi: "Huëco' manta tēranta' niahua' Yosë na'con na'con  
 catahuainpoaso marë'. Paono chachionta' ina pochin a'chintërinpoa'," topi pinotonaco.  
 Co no'tëquën yonquipihuë' ni'ton, napopisopita no'tëquën ana'intacaso' ya'huërin.

#### *Ya'ipinpoa' oshahuanëhuaso'*

9 ¿Onpopinta' iporaso' yonquiarihua'? Cotioro'sanpoa noya noya ninëhua', ¿tëcarihua ti?  
 ¿Co naporinhuë'? Nani sha'huitëranquëma'. Cotioro'sanpoa', nisha piyapi'sa', ya'ipinpoa'  
 oshahuanëhua'. 10 Yosë quiricanënquë tapon:

"Ya'ipi piyapi'sa' co noyahuë' nipi.

Co a'naya tēranta' noya nininhuë'.

11 Co no'tëquën yonquipihuë'.

Co inahuara nohuantopihuë Yosë chinotacaiso'.

12 Co Yosë iranën pa'topihuë', pëshonpi.

Co a'naya tēranta' noya nininhuë'.

13 Chimipi pa'pitopiso' i'soatopinan pochin

napoonin nonpi.

Nonpintatona', ya'huan tomain yanquëëtërinso pochin na'a piyapi'sa' aparisitopi.

14 No'huitatona', piyapi'sa' pinosápi.

15 A'naroáchin yaahuëtopi, yatëpatopi.

16 Insëquësona pa'pachinara, piyapi'sa' aparisitopi, asëtopi.

17 Piyapi'sa' ano'huitopi ni'ton, co noya nini'tona' ya'huëpihuë'. Co sano cancantopihuë'.

18 Yosë tē'huatacaso' ya'huëpirinhuë', co ina yonquipihuë'," tēnin iráca Yosë quiricanënquë  
 ninshitatona'.

19 Tēhuëchachin co noyahuë' nicatëhua', ya'ipinpoa' oshahuanëhua'. Yosë pënëntërinso'  
 nitotopirëhuahuë', co natërehuahuë' ni'ton, ana'intinpoaso' ya'huërin. 20 "Pënëntërinso'  
 natëhuatëhua', Yosë noya ni'sarinpoa'," topirinahuë' a'naquën. Co ina marë' noya



ni'ninpoahuë'. Pënëntërin quëran oshahuanëhuaso' anitotërinpoa'. Ina natanpatëhuara, "Tëhuënchachin oshahuanëhua'. Co noyahuë' ninëhua'," tënëhua'.

*Quisocriso imapatëhua', anoyacancantërinpoaso'*

<sup>21</sup> Iporaso nipirinhüë' Yosë anitotërinpoa' onporahuatësona cha'ëcaso'. Co iráca pënëntërinso' natërëhua quëran noya cancantarihuahuë'. Moisésë, pënëntona'piro'sa', inapita inachachin sha'huitërinënpoa'. <sup>22</sup> Quisocriso imapatëhua', Yosë noya ni'sarinpoa'. Insosona natëhuachin, anoyacancantarín. Co nisha nisha nontërinpoahuë'. <sup>23</sup> Ya'ipinpoa' oshahuanëhua'. Co a'nayanpoa tëranta' Yosë pochin cancantërëhuahuë'. <sup>24</sup> Nipirinhüë', inaora nohuanton, Yosë nosororinpoa'. Nosoroatonpoa', Quisocriso a'paimarin nicha'ëinpoaso marë'. Ina imapatëhua', Yosë noya ni'sarinpoa'. <sup>25</sup> Yosë nohuanton, Quisocriso chiminin. Oshanënpoa' inquitinpoaso marë' chiminin. "Ca marë' chiminin," topatëhua', oshanënpoa' inquitarinpoa'. Huënainën quëran anoyacancantarínpoa'. Iráca piyapi'sa' oshahuanpirinahuë', Yosëri co a'naroáchin ana'intërinhuë'. "A'na tahuëri Quisocriso chiminpachin, oshanëna' inquitarahüë," ta'ton, co ana'intërinhuë'. <sup>26</sup> Iporaso huachi Quisocriso chachin a'paimarin ya'huërenamënpoa' chiminacaso marë'. "Quisocriso oshanënpoa marë' chiminin," topatëhua', oshanënpoa' inquitarinpoa'. Noyápiachin cancan quëtarinpoa'. Ina imapatëhua', Yosë noya ni'sarinpoa'. Co canpoanta' ana'intarinpoahuë'.

<sup>27</sup> Napoaton co inso tëranta nocanacaso' ya'huërinhuë', ténahuë. Co pënëntërinso' natërëhuaso marë' Yosë noya ni'ninpoahuë'. Quisocriso naporinso' natërëhuaso marë' nicha'ërinpoa' ni'ton, co a'napita nocanacaso' ya'huërinhuë'. <sup>28</sup> Nani sha'huitëranquëma'. Quisocriso imarëhuaso marë' anoyacancantërinpoa'. Co ya'ipi pënëntërinso' natëpirëhuahuë', noya ni'ninpoa'.

<sup>29</sup> Yosë ya'ipi piyapínpoa' nohuantërinpoa'. Co cotioro'saráchin nosororinhüë'. Nisha piyapi'santa' nosororín. Ya'ipinpoa' nosororínpoa'. <sup>30</sup> A'naíchín Yosë ya'huërin. Ya'ipinpoa' napopianachin nosororínpoa'. Cotioro'santa', nisha piyapi'santa', Quisocriso imapachina', anoyacancantarín. <sup>31</sup> Quisocrisoíchín anoyacantërinpoa' ni'ton, iráca pënëntërinso' ¿co huachi pa'tërinhuë pochín nitërëhua tí? ¿Co naporinhüë! Ina quëran oshahuanëhuaso' nitotarihua'. Quisocriso imapatëhua', catahuarínpoa' noya natëcaso'.

## 4

*Apraan natëtërinso'*

<sup>1</sup> Apraan naporinso' sha'huichinquëma'. Inaso' shimashonënpoa'. ¿Onporahuatonta' Yosëri noya ni'nin? <sup>2</sup> Apraan inaora co nanitërinhuë' no'tëquën Yosë natëcaso'. Inaora nanitërin naporini, "Caso' noyaco. No'tëquën natërahuë," chitonhuë'. Napoaponahuë', co ina pochín Yosëri ni'ninhüë'. <sup>3</sup> Yosë quiricanënquë naporin: "Yosë no'tëquën nontërinco. Inasáchin catahuarinco,' topachina, Yosëri noya ni'nin. Oshanën inquitaton, noya ni'nin," ténin quiricanënquë. <sup>4</sup> Ni'co'. Piyapi'sa' sacatohuachinara, pahuërecaso' ya'huërin. Inapochachín no'tëquën natërëhua' naporini, Yosë noya nicainpoaso' ya'huë'itonhuë'. <sup>5</sup> Yosëso nipirinhüë', inaora nohuanton nosororínpoa'. "Co caora noya nipirahuë', Yosë chachín anoyacancantarínco," topatëhua', oshanënpoa' inquitatonpoa' noya ni'ninpoa'. <sup>6</sup> Co noyahuë' nipirëhuahuë', inaora nohuanton, Yosë anoyacancantërinpoa' ni'ton, noya ni'ninpoa'. Ina marë' nóya cancantërëhua'. Iráca Tapi inachachín naporin. <sup>7</sup> Quiricanënquë ninshitërin: "Oshanënpoa' Yosë inquitohuachínpoa', noya cancantarihua'. Ya'ipi oshanënpoa' ayatarínpoa'.

<sup>8</sup> ¿Co huachi oshanënpoa marë' ana'intarinpoahuë! Napoaton noya cancantarihua'," ténin.



<sup>9</sup> ¿Inpitata' ina pochin noya cancantapi? Co cotioro'saráchin ina pochin noya cancantacaso' ya'huëtopihuë'. Co marca niacotopirinahuënta' noya cancantapi. Apraan yonquico'. “Yosë no'tëquën nontërinco. Inasáchin catahuarinco,” topachina, Yosëri noya ni'nin. Nani sha'huitëranquëma'. <sup>10</sup> ¿Onporota' noya ni'nin? ¿Marca niacotërin piquëran noya ni'nin? Co naporota' naporinhuë'. Co'huara marca niacochatërasohuë', noya ni'nin. <sup>11</sup> Yosë natërin ni'ton, inari noya ni'nin. Co'huara marca niacochatërasohuë', piyapinën pochachin ni'nin. Ina piquëran marca niacotërin imarinso' anitotacaso marë'. “No'tëquën nontërinco,” topachina, noya ni'nin. Nisha piyapi'santa' ina pochachin natëtohuachinara, Apraan pochin cancantopi. Co marca niacotopirinahuë', Apraan hui'ninpita pochin nipi. <sup>12</sup> Cotioro'santa' Apraan pochin natëtohuachinara, hui'ninpita pochin nipi anta'. Co marca niacotopiso marë' noya cancantopihuë'. Co'huara marca niacochatërasohuë', Apraanso' natëtërin. A'napitanta' ina pochin cancantohuachinara, Yosëri noya ni'sarin.

### *Yosëri Apraan sha'huitërinso'*

<sup>13</sup> Iráca Yosëri Apraan itapon: “Nosoroatënquën, páncaro'pa' quëchinquën. Piyapinëhuë pochin ni'saranquën. Quëma shinparinpitanta' noya catahuaarahüë. A'na tahuëri ya'ipiro'pa' hua'anëntapona',” itërin. “Yosë co onporonta' nonpintarincohuë’,” téninso marë' Yosëri noya ni'nin. Co naporota' Moisësë pënëchátërarinhuë'. Napoaton co ina natërinso marë' Apraan noya ni'ninhuë'. <sup>14</sup> Pënëntërinso' natëpisopitaráchin noya ni'nin naporini, topinan cancanënpoa quëran natërehuasopitaso' co noya nicainpoaso' ya'huë'itonhuë'. Topinan quëran Yosëri Apraan sha'huichitonhuë'. <sup>15</sup> Moisësë pënëntërinso' co natëhuachinarahüë', ana'intacaso' ya'huërin. Co pënëntërinso' ya'huërinhuë' naporini, co natëcaso' ya'huë'itonhuë'. Co ina marë' oshahuaintërihuahuë'.

<sup>16</sup> Napoaton Apraaniso natëton: “Yosë no'tëquën nontërinco,” topachina, Yosëri itërin: “Oshahuanpiranhuë', caora nohuanto, nosoroatënquën catahuaranquën. Hui'nanpitanta' catahuaarahüë’,” itërin Yosëri. Co cotioro'saráchin nosororinhuë'. Ya'ipi Apraan pochin cancantopisopitanta' nosororin. Ina hui'ninpita pochin ninëhua'. <sup>17</sup> Iráca Yosëri Apraan itërin: “Ca nohuanto, notohuaro' shiparinpita ya'huëtarinquën. Na'a nisha nisha piyapi'santa' quëma pochachin cancantapi,” ténin Yosë. Quiricanënuë naporin. “Yosë no'tëquën nontërinco. Ya'ipiya nanitaparin. Chiminpisopitanta' nanitërin ananpitacaso'. Co ma'sha ya'huëpirinhuë', nani ya'huërinso pochin sha'huichanin,” ta'ton, Apraan natëtërin.

<sup>18</sup> “Quëma shiparinpita notohuaro' na'asapi,” itërin Yosëri. Hua'qui' co a'na hui'nin tëranta' ya'huëtërinhuë'. Sacai' natëtacaso nipirinhuë', Apraan natëtërin. “Yosë nohuanton, oshaquëran hui'nahuë ya'huëtarinco. Shihuëpitanta' na'asapi,” ténin Apraan. <sup>19</sup> Pasa pi'ipitaponahuë', co hui'nin ya'huëchatërarinhuë'. Co huachi chinirinhuë'. Sa'ionta' co hua'huana'pihuë'. Nani paiya. Napoaponahuë', Yosë natërin. <sup>20</sup> “Yosë nonpintërinco,” co téninhuë'. Co nisha nisha yonquirinhuë'. “No'tëquën nontërinco,” ta'ton, chiniquën cancantërin. “Ma noyacha Yosëso' ni'ton, co naniantarincohuë'. <sup>21</sup> Yosë ya'ipiya nanitaparin. Sacai' niponahuë', nani sha'huitërinco ni'ton, catahuarinco. Sha'huitërinco chachin ya'huapon,” ténin. <sup>22</sup> Ina pochin yonquirinso marë' Yosëri nóya ni'nin.

<sup>23</sup> Apraan naporinsopita Yosë quiricanënuë ninshitopi. Canpoanta' nitotacaso marë' ninshitopi. <sup>24</sup> Ina pochin cancantohuatëhua', Yosë noya ni'sarinpoa'. Quisocriso chiminpirinhuë', Yosëri ananpitaantarin. Ina hua'anëntërinpoa', ténëhua'. Ina marë' Yosë noya ni'sarinpoa' canpoanta'. <sup>25</sup> Yosë nohuanton, oshanënpoa marë' chiminin. Inari chachin ananpitaantarin oshanënpoa' inquitatonpoa', noya nicainpoaso marë'.

## 5

### *Yosë anoyacancantërinpoaso'*

<sup>1</sup> “Sinioro Quisocristoíchin nicha'ësarínpoa',” ta'tèhua', imarèhua'. Oshanènpoa' inquitèrinpoa' ni'ton, Yosè noya ni'ninpoa'. Co inimiconènpita pochin ni'ninpoahuè'. <sup>2</sup> Quisocristo cancanènpoa quèran natèhuatèhua', nicha'ësarínpoa'. Nosoroatonpoa', ipora huanta' catahuarínpoa' noya imacaso marè'. A'na tahuèri Yosè'pa' pa'patèhua', Yosè pochin nisarèhua'. Ina yonquiatèhua', nóya cancantarihua'. <sup>3</sup> Iporaso' parisitarihuahuè', noya cancantarihua'. “Parisitohuatèhua', Yosè catahuarínpoa' imamiat-acaso marè',” ta'tèhua', co sètarihuahuè'. Chiníquèn cancantatèhua', noya ahuantarihua'. <sup>4</sup> Noya ahuantohuatèhua', chini chiníquèn cancantarihua' ni'ton, Yosè noya ni'ninpoa'. “Co naniantarinpoahuè',” ta'tèhua', inasáchin ninarihua'. <sup>5</sup> Inasáchin ninahuatèhua', tèhuèenchachin co naniantarinpoahuè' ni'ton, co tapanarihuahuè'. Ispirito Santo a'patimarinpoa'. Ya'coancantohuachinpoa': “Ma noyacha Yosè nosororínpoa paya,” tarihua'. Ispirito Santo chachin Yosè nosororínpoaso' anitotèrinpoa'.

<sup>6</sup> Canpoara co nanitèrèhuahuè' cha'ècaso'. Nipirínhuè', iráca o'macaso' nanihuachina, Quisocristo isoro'paquè o'marin. O'marahuatón, oshahuano'sa marè' chiminin. <sup>7</sup> Ni'co'. Piyapi noya niponahuè', co insonta' ya'huèrenamèn chiminacaso' nohuantèrinhuè'. Noya noya nipachin, nicha'ècaso marè' a'nara' ya'huèretapon nimara. <sup>8</sup> Quisocristoso nipirínhuè' oshahuano'sa marè' chiminin. Oshahuanpirèhuahuè', ya'huèretèrinpoa'. Yosè nohuanton, canpoa marè' chiminin. Napoaton: “Ma noyacha Yosè nosororínpoa paya,” tènèhua'. <sup>9</sup> “Corosèquè huènnainèn pa'nin. Oshanènpoa marè' chiminin,” topatèhua', Yosè noya ni'sarínpoa'. Napoaton ayaro' tahuèrinta' catahuarínpoa'. Naporo' tahuèri co noyahuè' nipsisopita chiníquèn ana'intarin. Imarèhuasopitaso nipirínhuè', co ana'intarinpoahuè'. Quisocristo chachin nicha'ësarínpoa'. <sup>10</sup> Iráca oshahuanatèhua', Yosè inimicotopirèhuahuè', hui'nin chiminin ni'ton, nanan anoyatèrinpoa'. Iporaso' noya nipayarèhuaso pochin ninèhua' ni'ton, noya noya catahuarínpoa'. Nanpiantarin ni'ton, catahuarínpoa' noya cha'ècahuaso marè'. <sup>11</sup> Naporahuaton, “Yosè nosororínpoa',” ta'tèhua', ina pa'yatèrèhua'. Hui'nin chachin nanan anoyatèrinpoa' ni'ton, noya cancantèrèhua'.

### *Atan, Cristo inapita napopiso'*

<sup>12</sup> Atan'ton co noyahuè' nicaton, oshahuanin. Ina marè' chiminacaso' ya'huèrin. Ina quèran ya'ipinpoa' co noyahuè' nicatèhua', chiminèhua'. <sup>13</sup> Co'huara Moisésè pènèchatèrasohuè', piyapi'sa' oshahuanpi. Oshahuanpirinahuè', co pènèntèrinso' ya'huèyátèrarínhuè' ni'ton, co ina marè' ana'intacaso' ya'huè'itonhuè'. <sup>14</sup> Nipirínhuè', Atan quèran huarè' ya'ipi piyapi'sa' chiminpi. Moisésè ya'huèaquè huarènta' chimina'piapi. Ya'nan isoro'pa' nipon, Yosèri pènènpirínhuè', Atan co natètonhuè', oshahuanin. Ina quèran ya'ipi piyapi'santa' co noyahuè' nicatona', oshahuanpi. Co Yosèri chachin pènènpirínhuè', inahuanta' oshahuanpi. Atan pochin cancantatona' ya'ipi piyapi'sa' oshahuanpi. Quisocristoso nipirínhuè' nanan anoyatinpoaso marè' o'marin.

<sup>15</sup> Inaso' ya'ipinpoa' nosororínpoa'. Atanso nipirínhuè' co ina pochin nininhuè'. Co natèrinso marèhuè' oshanèn ya'huètèrin. Inapochachin ya'ipi piyapi'sa' oshahuanatona', chiminpi. Ina quèran ana'intacaso' ya'huèrin. Yosèso nipirínhuè' inaora nohuanton, na'con nosororínpoa'. Nosoroatonpoa', hui'nin a'paimarin na'aquènpoa' anoyacancantínpoaso marè'. <sup>16</sup> Atan co natèrinhuè' ni'ton, osha ya'huèrin. A'naíchin pènèninso' co natèrinhuè' ni'ton, ana'intacaso' ya'huèrin. Nipirínhuè', Yosè nosororínpoaso' co ina pochin nininhuè'. Na'con oshahuanpirèhuahuè', Quisocristo chiminin ni'ton, oshanènpoa' inquitatonpoa', noya ni'ninpoa'. <sup>17</sup> A'na ya'piíchin tèhuèrin ni'ton, ya'ipi piyapínpoa' chiminacaso' ya'huèrin. Aquètè huarè' Yosèso', inaora nohuanton nosoroatonpoa' Quisocristo quèran nicha'èrinpoa' ni'ton, inarè'quènpoa' nanpimi-atatèhua' hua'anèntarihua'.

<sup>18</sup> Atan co noyahuè' ninin ni'ton, ya'ipinpoa' ana'intínpoaso' ya'huèpirínhuè'. Quisocristo chiminin ni'ton, ya'ipinpoa' nanitèrèhua' nanpimiatacaso'. Imapatèhua',

co ana'intarinpoahuë'. <sup>19</sup> A'naíchin co Yosë natërinhuë' ni'ton, ya'ipinpoa' oshahuanëhua'. A'naso nipirinhuë' Yosë natëton, chiminin. Ina marë' na'aquënpoa' anoyacancantërinpoa'.

<sup>20</sup> Iráca Moisésë pënëntërin oshahuanëhuaso' anitotinpoaso marë'. Ina quëran na'con oshahuanëhuaso' nitotërehua'. Na'con oshahuanpirëhuahuë', inaora nohuanton, Yosë na'con na'con nosororinpoa'. <sup>21</sup> Oshahuanëhua' ni'ton, chiminpatëhua', parisitomi-atacaso' ya'huëpirinhuë'. Yosëso' inaora nohuanton, nosoroatonpoa', catahuarinpoa'. Siniro Quisocristo anoyacancantohuachinpoa', nanpimiatarihua'.

## 6

### *Quisocristo imapatëhua', co huachi oshahuanacaso' pa'yatarihuahuë'*

<sup>1</sup> Yosë inaora nohuanton nosororinpoa ni'ton, manta tëranta' niahua' inaora nohuanton, oshanënpoa' inquitinpoaso marë' ¿tëcarihua ti? <sup>2</sup> ¡Co naporinhuë'! Quisocristo imapatëhua', chiminëhuaso pochin cancantatëhua', co huachi oshahuanacaso' pa'yatarihuahuë'. <sup>3</sup> “Quisocristo imarahuë huachi,” ta'tëhua', aporihuanëhua'. Ina noya chinpitacaso marë' aporihuanëhua'. Aporihuanpatëhua', Quisocristorë'quënpoa' chiminëhuaso pochin ninëhua'. Ina chimininso pochachin co noyahuë' yonquirëhuasopita a'porëhua'. Nani ina nitotërama'. <sup>4</sup> Quisocristo chiminpachina, pa'pitopi. Aporintohuachinënpoara, canpoanta' pa'pitërinënpoaso pochin co noyahuë' yonquirëhuasopita naniantërehua'. Tata Yosë chiníquën nanantaton, Quisocristo ananpitaantarín. Canpoanta' nasha cancan quëtërinpoa' nasha pochin nanpicaso marë'. Ina yonquiatëhua', aporihuanëhua'.

<sup>5</sup> Quisocristo chiminaponahuë', nanpiantarin. Inapochachin canpoanta' co noyahuë' yonquirëhuasopita naniantohuatëhua', nanpiantarëso pochin noya noya cancantarihua'. <sup>6</sup> Cato' cancan pochin ya'huëtërinpoa'. A'na cancanso' sopai yanatërin. Quisocristo imarëhua' ni'ton, co noyahuë' cancantërehuaso' corosëquë patanantërešo pochin nitërehua'. Ama huachi sopai natëcaso marëhuë' napotërehua'. Co noyahuë' cancantërehuaso' chimininso pochin nitahua'. <sup>7</sup> Chimipiso' co huachi yonquirinhuë' oshahuanacaso'. Inapochachin canpoanta' Quisocristo imapatëhua', co huachi oshanënpoa hua'anëntërinpoahuë'. <sup>8</sup> Co noyahuë' cancanso' naniantohuatëhua', Quisocristo pochachin noyápiachin cancantarihua'. Ina nohuitatëhua', noya noya nanpiarëhua'. <sup>9</sup> Inaso' nanpiantahuachina, co huachi chimianinhuë'. Chimirin nani minsëaton, nanpimiataantarín. <sup>10</sup> Chiminpachina, oshanënpoa marë' chiminin. Naporo' oshanënpoa' minsërin. Iporaso' Yosëíchin natëcaso marë' nanpimiataantarín. <sup>11</sup> Inapochachin canpitanta' ama huachi oshahuanacamaso' yonquicosohuë'. Quisocristo imarama' ni'ton, Yosëíchin natëco'.

<sup>12</sup> Ama oshanëma hua'anëntatë pochin nitatënguëma' camayápainquëmaso nohuantocosoahuë'. Ya'ipi co noyahuë' yonquiramasopita naniantatoma', noyasáchin yonquico'. <sup>13</sup> Ni'co'. Imirama', nantëma', ya'pirama', huëratëma', nanamëma', inapita ya'huëtërinquëma'. Inapita quëran co noyahuë' nicacaso ya'huëpirinhuë'. Ama nohuantocosoahuë'. Yosë natëcamasoáchin yonquico'. Chiminama quëran nanpiantëramaso pochin cancantatoma', ya'ipi nonëma quëran huarë' noyasáchin nico'. <sup>14</sup> Inapohuatama', co huachi oshanëma hua'anëntatë pochin nitaringuëmahuë'. Co ya'ipi pënëntërinso' natëpiramahuë', inaora nohuanton, Yosë anoyacancantërinquëma'. Nosoroatënguëma', catahuarinquëma' noya nicacamaso marë'.

### *Hua'anënpoa pochin nininso'*

<sup>15</sup> Tëhuënhachin co huachi iráca pënëntërinso' natëcaso' ya'huërinhuë'. Yosë nosoroatonpoa', nicha'ërinpoa'. A'naquënso nipirinhuë' ina natanatona', co manta' yanatëpihuë'. “Noya oshahuanacaso',” toconpi. ¡Co ina pochin yonquicaso

ya'huërinhuë! <sup>16</sup> Insosona natëhuatëhua', inaso' hua'anëntarinpoa'. ¡Nani nitotërama' ipora! Oshanënpoa natëhuatëhua', ina hua'anëntarinpoa'. Camaihuachinpoara, co noyahuë' ninëhua'. Oshanënpoa' co a'poasëhuahuë' chiminpatëhua', parisitopiquë pa'sarëhua'. Nipirinhüë', Yosë natëhuatëhua', noya nicarihua'. <sup>17</sup> Iráca oshanëma natëtoma', co noyahuë' nipiramahuë'. Quisocriso nanamën a'chintohuachinënquëmara, noya natanama'. Ya'ipi cancanëma quëran noya natërama'. Ina yonquiatëhua', "Yosparinquën" itërehua' Yosë. <sup>18</sup> Iporaso', co huachi oshanëma camaiarinquëmahuë'. Nasha hua'anëma' ya'huëtërinquëma'. Quisocriso natëtoma', noya nisarama'. <sup>19</sup> Iso pochin a'chintaranquëma' noya noya nitotacamaso marë'. Canpitaora co nitotëramahuë'. Iracaso' ya'ipi nonëma quëran huarë' oshahuanacasoáchin pa'yatërama'. Inapohuatamara, pa'pi nishinahuën' cancantërama'. Iporaso' noyasáchin nico'. Inapohuatama', noyápiachin cancantarama'.

<sup>20</sup> Iráca oshanëma natëhuatamara, co noyahuë' ninama'. Co yonquiramahuë' noya nicacamaso'. <sup>21</sup> Inapohuatamara, ¿ma'ta' ina marë' canarama'? Co ina marë' canamiataramahuë'. Topinan quëran ya'huërama'. Ina pochin cancantohuatama', chiminpatama', parisitopiquë pa'sarama'. Iráca ina pochin nipiramahuë', iporaso ina marë' tapanama'. <sup>22</sup> Iporaso nipirinhüë' co huachi oshanëma hua'anëntërinquëmahuë'. Yosë nicha'ërinquëma' ama huachi oshahuanacamaso marëhuë'. Ina chachin hua'anëntërinquëma'. Napoaton noyápiachin cancantarama'. A'na tahuëri Yosë'pa' nanpimiatarama'. <sup>23</sup> Piyapi asacatohuatëra, pahuërëre'. Inapochachin co noyahuë' nipatëhua', chiminpatëhua' parisitomiatarihua'. Yosëso nipirinhüë', inaora nohuanton nosororinpoa'. Quisocriso imapatëhua', ina nohuitatëhua', nanpimiatarihua. Inaso' hua'anënpoa'. Inasáchin natërehua'.

## 7

### *Sa'arinso pochin nininso'*

<sup>1</sup> Canpitaso' iyaro'sa', pënëntopiso' nitotërama'. Nanpipisopitaráchin camaitërinso' natërapí. <sup>2-3</sup> Ni'co'. Sanapi so'yahuachina, so'in chinpitacaso' ya'huërin. So'in ya'huëtöpirinhüë', a'na quëmapiri së'huahuachin, monshihuanin. Ina marë' oshahuanarin. Nipirinhüë', so'in chiminpachin, so'yaantahuachin, co ina marë' oshahuaninhüë'.

<sup>4</sup> Inapochachin iyaro'sa', canpoanta' Quisocristorë'quënpoa' chiminëhuaso pochin ninëhua' ni'ton, co huachi iráca pënëntërinso' hua'anëntiinpoaso' ya'huërinhuë'. Quisocriso chinpitacaso' ya'huërin. Inaso chiminaponahuë', nani nanopiantarin. Ina imamiatohuatëhua', noya nicarihua' a'napitanta' Yosë noya yonquicaíso marë'. <sup>5</sup> Iráca, canpoara nipa'yatacasoáchin yonquirëhua'. Co noyahuë' cancantërehua'. Pënënpachinënpoara, aquë aquëtë' co noyahuë' yonquiatëhua', co noyahuë' ninëhua'. Ina marë' chiminpatëhua', parisitomiatacaso' ya'huërin. <sup>6</sup> Iráca nisha nisha pënëntërinso' ya'huërin natëcaso', Moisésëri ninshitërinso'. "Co ya'ipiya natëhuatëhuahuë', co onporonta' cha'ësarëhuahuë'," topi. Apina'pi tashinan pëiquë ya'huërinso pochin nipirëhuahuë'. Iporaso' co huachi Moisésë pënëntërinso' yonquiarëhuahuë'. Quisocristorë'quënpoa' chiminëhuaso pochin ninëhua' ni'ton, co huachi hua'anëntiinpoaso' ya'huërinhuë'. Ispirito Santo catahuarinpoa' cancanënpoa quëran huarë' Yosë natëcaso'. Nasha cancan quëtërinpoa'. Napoaton noya nisarëhua'.

### *Co noyahuë' yonquirëhuasopita yaminsërinpoaso'*

<sup>7</sup> Napoahuarë', "Moisésë pënëntërinso' aoshahuaninpoa' ni'ton, co noyahuë'," ¿tëcarihua' ti? ¡Co naporinhüë'! Napoaponahuë', pënëntërin quëran oshahuanëhuaso' nitotërehua'. Iso pochin yonquia'ahua'. "Ama a'na piyapi ma'shanëna' noyapatocosohuë'," tënin iráca pënëntaton. Caso' ina natanato, "Tëhuëchachin a'napita ma'shanën noyapatato, co noyahuë' yonquirahuë. Ina marë' oshahuanahuë,"



tēnahuē. <sup>8</sup> “Ama ma'sha noyapatocosohuē,” itērinco. Ina natanato, aquē aquëtē' a'napita ma'shanēna' noyapatērahuē. Co noyahuē' cancantērahuēso' canarinco. Iráca oshahuanpirahuē'. Co'huara pēnētērinso' nitochatērasocohuē', oshahuanahuēso' co nitotērahuē'. <sup>9</sup> Co'huara pēnētērinso' natayantērasocohuē', “Caso' noya piyapico,” topirahuē'. Pēnētērinso' natanpatēra, “Tēhuēnchachin oshahuanco. Chiminpatō, Yosē ana'intarinco,” tēnahuē. <sup>10</sup> Noya ya'huēca'huaso marē' pēnēnpirincohuē'. Co ina natētorahuē', oshahuanahuē. Oshahuanato, parisitopiquē paca'huaso' ya'huērin. <sup>11</sup> Pēnētērinso' natēhuato, noya cancantarahuē, topirahuē'. Co ina natērahuē' ni'ton, oshahuanahuē. Chiminpatō, ana'intincoso' ya'huērin.

<sup>12</sup> Yosē chachin pēnēninpoa'. Sha'huitērinpoaso' nōya. No'tēquēn nonin. <sup>13</sup> Napoahuarē' pēnētērinso' noya nipirinhūē', ina marē' ana'intarinco, ¿topiramahuē' ti? ¿Co pēnētērinso' marē' ana'intincoso' ya'huērinhuē'? Oshahuanahuē' ni'ton, ana'intincoso' ya'huērin. Pēnētērinso' noya nipirinhūē' natanahuē' quēran aquē aquëtē' co noyahuē' yonquiato, co noyahuē' ninahuē. Pēnēninpoa' quēran oshahuanahuēso' nitotērahuē. Pa'pi co noyahuē' ninahuē, tēnahuē.

<sup>14</sup> Noya yonquicaso marē' pēnēnpirinpoahuē'. Caso' co noya yonquiatohuē', oshahuanahuē. Oshahuanahuēso' hua'anēntatē pochin nitērinco. Co nanitērahuē' noya nica'huaso'. <sup>15</sup> Noya nisarahuē, topirahuē', a'naroáchin co noyahuē' yaninahuē. Co yaoshahuanpirahuē', oshahuanahuē. Onpoatoso' napomaraco, co nitotērahuē'. <sup>16</sup> Co nohuantopirahuē', co noyahuē' ninahuē. Ina marē' co noya cancantērahuē'. Yonquinēhuē' quēran nitotērahuē. Tēhuēnchachin pēnētērinso' noya, tēnahuē. <sup>17</sup> Co nohuantopirahuē', caora co noyahuē' cancantato, co noyahuē' ninahuē. Co noyahuē' cancantērahuēso' canarinco. <sup>18</sup> Caora co noyahuē' cancantērahuē. Co nanitērahuē' noya nica'huaso'. Inachinco. Yosē yanatēpirahuē', caora co nanitērahuē' natēca'huaso'. <sup>19</sup> Noya nica'huaso' nohuantopirahuē', co noyahuē' ninahuē. Co yaoshahuanpirahuē', oshahuanahuē. <sup>20</sup> Co nohuantopirahuē', co noyahuē' ninahuē. Co noyahuē' cancantērahuēso' canarinco.

<sup>21</sup> Noya nica'huaso' nohuantopirahuē', co noyahuē' cancantato, co noyahuē' nica'huasoráchin yonquiconahuē. <sup>22</sup> Cancanēhuē' quēran Yosē pēnēninpoaso' pa'yatato, yanatēpirahuē'. <sup>23</sup> A'na' cancan nohuantērin. A'na' cancanso' nipirinhūē', co nohuantērinhuē'. Co noyahuē' nicacasoáchin yonquirin. Ina canarinco' ni'ton, co noyahuē' ninahuē.

<sup>24</sup> ¿Ma'huantacha caso' ninahuē' paya! ¿Incha ipora nicha'ēinco co noyahuē' yonquirahuēso' nanianta'huaso marē'? tēnahuē. <sup>25</sup> ¿Yosēíchin nanitaparín! Sinioro Quisocriso imarahuē' ni'ton, ina catahuarinco. Ina marē': “Yosparinquēn Tata Yosē,” itērahuē. Tēhuēnchachin cancanēhuē' quēran Yosē yanatēpirahuē', co noyahuē' cancantato, co noyahuē' ninahuē.

## 8

### *Ispirito Santo catahuarinpoaso'*

<sup>1</sup> Napoaton iporasō' Quisocriso imapatēhua', co huachi ana'intinpoaso' ya'huērinhuē'. <sup>2</sup> Oshanēnpoa' natēhuatēhua', co noyahuē' ninēhua'. Inapohuatēhua', chiminpatēhua', ana'intarinpoa'. Nipirinhūē', Quisocriso imapatēhua', Ispirito Santo catahuarinpoa' nanpimiatacaso marē'. Naporahuaton, co huachi oshanēnpoa' natēcaso' ya'huērinhuē'. <sup>3</sup> Iráca Yosē pēnēnpirinpoahuē'. Co noyahuē' cancantatēhua', co nanitērēhuahuē' no'tēquēn natēcaso'. Ina quēran hui'nin chachin isoro'paquē' a'paimarin. Piyapi chachin nasitimarin. Co oshahuanaponahuē', oshanēnpoa' inquitinpoaso' marē' chiminin. Inapoaton, nicha'ērinpoa' ama huachi ana'intinpoaso' marēhuē'. <sup>4</sup> Co noyahuē' yonquirēhuasopita naniantatēhua', Ispirito Santo natēhuatēhua', catahuarinpoa' noya nicacaso'. Ina pochin cancantohuatēhua', Yosē noya ni'sarinpoa'. Ina marē' hui'nin a'paimarin.



<sup>5</sup> Co noyahuë' yonquihuatèhuara, co noyahuë' nicacasoáchin pa'yatèrèhua'. Nipir-inhuë', Ispirito Santo natèhuatèhua', Yosë nohuantèrinsoáchin pa'yatarèhua'. <sup>6</sup> Co noyahuë' nicacasaráchin pa'yatohuatèhuara, chimipi pochin niconèhua'. Co Yosë nohuitèrèhuahuë'. Nipirinhue', Ispirito Santo pa'yatatèhua' natèhuatèhua', Yosë nohuitatèhua', nanpimiatarihua'. Noya yonquiatèhua', sano cancantarihua'. <sup>7</sup> Co noyahuë' nicacasaráchin pa'yatohuatèhua', Yosë inimicotarèhua'. Co Yosë pènèntèrinso' natècaso' nohuantarèhuahuë'. Co nanitarèhuahuë' ina natècaso'. <sup>8</sup> Ina pochin cancantohuatèhua', co Yosë noya ni'sarinpoahuë'.

<sup>9</sup> Canpitaso nipirinhue' co noyahuë' yonquiramasopita naniantèrama'. Ispirito Santo ya'coancantohuachinquëma', ina nohuantèrinso' nisarama'. Co Ispirito Santo ya'coancantohuachinquëmahuë', co tèhuënchachin Quisocriso imaramahuë'. <sup>10</sup> Oshahuanama' ni'ton, nonèmaso chiminacaso' ya'huërin. Napoaponahuë Quisocriso ya'coancantatènquëma', anoyacancantèrinquëma'. Napoaton Yosë noya nicatènquëma ispiritonëma ananpitarin ni'ton, nanpimiatarama'. <sup>11</sup> Ispirito Santo ya'coancantèrinpoa'. Yosë hua'yanën chachin ni'ton, achinicancaninpoa' Yosë pochin cancantacaso marë'. A'na tahuërinta' Yosë ananpitaantarinpoa'. Quisocriso ananpitaantarinso' pochachin ananpitaantarinpoa' canpoanta'. Nonënpoa' chiminacaso ya'huëpirinhue', Ispirito Santo ya'coancantèrinpoa' ni'ton, nanopiantarihua'.

<sup>12</sup> Napoaton iyaro'sa', Ispirito Santo natècaso' ya'huërin. Co noyahuë' yonquirèhuasopitaso' naniantahua'. <sup>13</sup> Co noyahuë' ninèhuasopita co a'poasèhuahuë', chiminpatèhua' parisitomiatacaso' ya'huërin. Nipirinhue', co noyahuë' ninèhuasopita tēpatē pochin nitohuatèhua', nanpimiatarihua'. Ispirito Santo catahuarinpoa' co noyahuë' ninèhuasopita tēpatē pochin nitacaso marë'.

<sup>14</sup> Ispirito Santo nohuantèrinso' natèhuatèhua', Yosë hui'ninpoa chachin nisarèhua'. <sup>15</sup> Iráca Yosë tē'huatèrama'. Iporaso nipirinhue' Ispirito Santo ya'coancantèrinpoa' ni'ton, co huachi manta' tē'huatacaso' ya'huërinhuë'. Hui'ninpita pochachin Yosë ni'ninpoa'. Ina nontohuatèhuara, "Tata," itèrèhua'. <sup>16</sup> Ispirito Santo chachin cancanënpoa quëran anitotèrinpoa'. "Hui'ninpita pochachin Yosë ni'ninquëma'," itèrinpoa'. <sup>17</sup> Hui'ninpoa' ni'ton, na'con na'con catahuarinpoa'. A'na tahuëri ya'huërin'pa' noya acoarinpoa'. Quisocriso noya acorinso pochin acoarinpoa' canpoanta'. Ina imarèhuaso marë' aparisitopirinënpoahuë', inapochachin inarë'quënpoa' noya noya ya'huëcontarihua'.

### *A'na tahuëri ya'ipiya anoyatarinso'*

<sup>18</sup> Isoro'paquë pi'pian parisitarihuarahue', ama ina yonquia'ahuasohue'. Ama ina marë' sètahuasohue'. A'na tahuëri Yosë'pa' noya noya ya'huëcontarihua'. Ina yonquiatèhua', noya cancantahua' tēnahuë. <sup>19</sup> Naporo' Quisocriso imarèhuasopita noya noya ya'noarihua'. Ya'ipi ma'sha isoro'paquë ya'huërinso'pitanpa' ina tahuëri ninarapi. <sup>20</sup> Iporaso nipirinhue' sharo'sa' co noyatopihue'. Ma'sharo'santa' chiminpi. Nipirinhue', co inahuara nohuanton, napopihue'. Yosë nohuanton, napopi. A'na tahuëri ya'ipiya anoyatarin. <sup>21</sup> Naporo' co huachi ma'sha chanatarinhue'. Yosë hui'ninpitanoa ninèhuasopita noya noya acohuachinpoa', ma'sharo'santa' noya noya niantapi. Co huachi chiminaponahuë'. <sup>22</sup> Iráca quëran huarë' ma'sharo'sa' parisitopi. Sharo'santa' papotopirinhue', co noyatèrinhuë', chiminin. Ipora huanta' sanapi hua'hua iquito-huachina, iquitèrinso pochin chiniquën parisitapi. <sup>23</sup> Canpoanta' Ispirito Santo nani ya'coancantopirinpoahuë', parisitèrèhua'. Parisitatèhua', manorèhua' nasha nonënpoa' ya'huëtinoaso marë'. Ina ninarèhua'. Nasha nonënpoa' quëtohuachinpoa', co huachi caniorihuahuë'. Co huachi chiminarihuahuë'. Naporo' Yosë hui'ninpita chachin nisarèhua'. <sup>24</sup> Tata Yosë noya nicha'èrinpoa'. Napoaponahuë', co ya'ipi naniyatèrarinhue': "A'na tahuëri noya noya acoarinpoa'," ta'tèhua', ina ninarèhua'. Pahuanarin ya'ipi nanicaso'. Napoaton ninarèhua'. Nani nanirin naporini, co ninacaso' ya'huë'itonhuë'.

25 “Tëhuënchachin noyá nicha'ësarínpoa',” ta'tëhua', co sëtërëhuahuë'. Noya cancantatëhua', ninarihua'.

26 Iporaso' co chiníquën cancantopirëhuahuë', Ispirito Santo catahuarínpoa'. Yosë nontohuatëhuara, co nitotërëhuahuë' ma'sona itacaso nipirínhuë', catahuarínpoa'. Cancanënpoa quëran inari Yosë nontërin. Tarëtarínso pochín ninín. Canpoaso' co natanpirëhuahuë', Yosëriso' natanín. 27 Ya'ipi yonquirëhuasopita Yosë nitotërin. Ispirito Santori nontohuachina, natanín. Yosë nohuantërinso chachín nitotaton, canpoa marë' noya nontërin.

### *Yosë nosororínpoaso'*

28 Yosë nosorohuatëhua', noyasáchin yonquirínpoa'. Ma'sha onpohuatëhuara, na'con catahuarínpoa'. Pi'pian parisitapirëhuahuë', ina nohuanton, parisitërhua quëran noya noya pipiarëhua'. Achinicananínpoa' ni'ton, noya noya imarihua'. Nani huayonínpoa' ina nohuantërinso' nicacaso marë'. 29 Iráca quëran huarë' Yosë nohuitërinpoa'. Nohuitatónpoa', huayonínpoa' Quisocriso pochachín cancantacaso marë'. Quisocrisoso' noya noya ninín. Ina quëran na'aquënpoa' imapatëhua', ina pochín cancantarihua'. Yosë hui'ninpita pochín ni'sarínpoa' canpoanta'. 30 Nohuantërinpoa' ni'ton, huëntonënuquë chachín aya'conínpoa'. Oshanënpoa' inquitatónpoa', noya ni'nínpoa'. Ina nohuanton, a'na tahuëri inápaquë noya noya acoarínpoa'.

31 Ina pochín Yosë yonquirínpoa' ni'quëhuarë', co insonta nanitërinhuë minsëinpoaso'.

32 Yosë chachín nosoroatónpoa' co hui'nín tëranta' apiratërinpoahuë'. Isoro'paquë a'paimarin chiminacaso marë'. Canpoa marë' chimín. Ipora chachinta' nosoroatónpoa', catahuarínpoa'. ¡Quisocriso imarëhua' ni'ton, co manta' pahuantarinpoahuë' Yosë pochín cancantacaso marë'! Nóya nicha'ësarínpoa'. 33 Yosë huayonínpoa' ni'quëhuarë', co insonta nanitërinhuë sha'huirapínpoaso'. Yosë chachín noya ni'nínpoa'. 34 Yosë noya ni'nínpoa' ni'ton, co insonta nanitërinhuë ana'intínpoaso'. Quisocriso oshanënpoa' inquitínpoaso marë' chimín. Ina quëran nanpíantarín. Yosë inchinanën quëran ya'huaton, canpoa marë' Yosë nontárin. 35 Tëhuënchachín Quisocriso nosororínpoa'. Co insonta' nanitërinhuë ina quëran osëreínpoaso'. A'na tahuëri parisitërhua'. Parisitatëhua', co napion cancantërhua'. Piyapi'sa' aparisitërinënpoa'. Cosharo', ma'sha inapita pahuantërinpoa'. Ma'sha onpochináchin nisarëhua'. Yatëparínënpoa'. Inapopirëhuahuë', ¡co inapita nanitapihuë' Quisocriso quëran osëreínpoaso'! 36 Yosë quiricanënuquë naporín:

“Imarainquënso marë' Siniro, ya'ipi tahuëri yatëparínacoi.

Co manta' onpopiraihuë', ohuicaro'sa' yatëpapiso pochín yatëparínacoi,” ténin.

37 Ina nipirínhuë', Quisocriso nosororínpoa'. Parisitapirëhuahuë', nani tahuëri catahuarínpoa' sopai minsëcaso marë'. Nóya cancantarëhua'. 38 Yosë nosoromiatërinpoa'. Nanpihuatëhuara, nosororínpoa'. Chiminpatëhuanta', co patarínpoahuë'. Anquëniro'sa', sopairo'sa', tanan hua'yano'sa', inapita co nanitopihuë' Yosë quëran osëreínpoaso'. Ipora tahuëri'sa' ma'sha onpotopirínënpoa'huë', co patarínpoahuë'. A'na tahuërinta' ma'sha onpotohuachínënpoa', co Yosë naniantarínpoahuë'. 39 Ma'sha inápaquë ya'huërinso'pita, aco'poroquë ya'huërinso'pita inapita co nanitopihuë' Yosë quëran osëreínpoaso'. ¡Co insonta' nanitërinhuë' Yosë ananiantínpoaso'! Quisocriso hua'anëntërinpoa'. Ina imarëhua' ni'ton, Yosë nosoromiatërinpoa'.

## 9

### *Yosëri israiro'sa' huayonínso'*

1 Quisocriso imato, no'tëquën nonahuë. Co nonpinahuë'. Ispirito Santo ya'coancantërinco ni'ton, no'tëquën nontaranquëma', ténahuë. 2 Tëhuënchachín israiro'sa' yonquiato, sëtërahuë. Cancanëhuë quëran huarë' sëtárahuë. 3 Inapitaso' quëmopinëhuëpita. Co Quisocriso imapihuë' ni'ton, ana'intacaso' ya'huërin. Nanitërahuë

naporini, inapita ya'huërënamën parisitopiquë pa'itohuë'. Cha'ëcaiso marë' inaquë parisichitohuë'. <sup>4</sup> Piyapinënpita nicacaiso marë' Yosëri acorin. Israiro shinpita nipi. Iráca quëran huarë' Yosëri nohuantërin ni'ton, hui'ninpita pochin nicacaiso marë' acorin. Huënaráchin huënaráchin a'pintohuachina, shimashonënpitari quënanpi. Iráca chachin piyapinënpita nicacaiso marë' inapitarë' anoyatërin. Naporahuaton, pënëntërinso nanan sha'huitërin. Noya chinotacaiso marënta' a'chintërin. Na'con sha'huitërin nicha'ëcaso marë'. <sup>5</sup> Shimashonënpitaso' Yosëri chachin huayonin. Ina quëran Cristo isoro'paquë o'mahuachina, Israiro sanapi quëran nasitërin. Inaso' Yosë chachin. Ya'ipiya hua'anëntërinpoa'. ¡Ma noyacha inaso paya! tënëhua'. Amen.

<sup>6</sup> Na'con nitotaponaraihuë', notohuaro' israiro'sa' co Yosë natëpihuë'. Napoaponahuë', Yosëri co topinan quëran sha'huitërinhuë' nicha'ëcaso marë'. Co ya'ipi israiro'sa' piyapinënpita pochin ni'ninhuë'. <sup>7</sup> Apraan cato' hui'ninpita ya'huëtopirinhüë', a'naíchin Yosëri acorin Apraan ya'huërëtacaso marë'. “Isaco huayonahuë. Shinpitanta' piyapinënpita pochin ni'sarahuë,” ténin Yosë. <sup>8</sup> Napoaton co ya'ipi Apraan hui'ninpita Yosë piyapinënpita nipihuë'. Yosëri sha'huitërinso chachin nasitohuachina, piyapinënpita pochin ni'nin. <sup>9</sup> Iráca Yosëri Apraan itapon: “A'na pi'ipi quëran nicaponquën huëantarahuë. Naporo' ca nohuanto, sa'an hua'huanarin,” itërin. Naporinso chachin tahuëri nanihuachina, Isaco nasitërin, Yosëri acorinso'.

<sup>10</sup> Naporahuaton, Tata Isaconta' cato' hui'nahuanin. Sa'in Nipica itopiso' yahuaihuachina, Yosëri itapon: <sup>11-13</sup> “Hua'hua nininso' chini chiniquën nanantarin. Paninanso' co onpopinchin chiniquën nanantaponhuë',” itërin. Ina quëran itantarin: “Cacopo nosoroato, huayonahuë. Isaoso nipirinhüë' co onpopinchin nohuantërahuë',” ténin Yosë quiricanënguë. Co'huara nasichátërasoihuë', naporin. Co ya'huëyátërasoihuë', yonquiato, huayonin. “Noya nininso marë' Yosëri huayonin,” topiramahuë', co ina marë' huayoninhüë'. Inaora nohuanton, huayonin.

<sup>14</sup> Naporin ni'quëhuarë' ¿ma'ta' tēcarihua'? “Yosëso' co napopináchin ni'ninpoahuë',” ¿tēcarihua ti? ¡Co naporinhüë'! <sup>15</sup> Iráca Yosëri Moisésë itërin: “Caora nohuanto, nosororahuë. Insosona nohuantohuato, huayonahuë,” itërin. <sup>16</sup> Napoaton co canpoara nohuanton, Yosë huëntonënguë ya'conëhuahuë'. Noya nipirëhuahuënta', co canpoara nanitërehuahuë' ya'conacaso'. Inaora nohuanton, Yosë aya'coninpoa'. Nosoroatonpoa', aya'coninpoa'. <sup>17</sup> Iráca Iquipito copirnosos' co noyahuë' cancantopirinhüë', Yosëri huayonin hua'anëntacaso marë'. “Piyapinënpita hua'anëntopiranhüë', nicha'ësarahuë noya pipicaiso marë'. Ina quëran na'a piyapi'sa' nicatora', ‘Ma noyacha Yosëso' nanitaparín paya. Copirno co nohuantopirinhüë', piyapinënpita nicha'ërin, tosapi,” ténin. Quiricanën quëran sha'huitërinpoa'. <sup>18</sup> Inaora nohuanton, a'naquën nosororin. A'naquënso nipirinhüë' tananpitërin. Tananpitohuachina, co natantochináchinhüë' cancantopi.

<sup>19</sup> Ina natanatoma', a'naquëma' co noyahuë' yonquirama': “Yosë nohuanton, a'naquën natëpi. Co ya'ipiya natëpihuë'. Ma'sona Yosë nohuantërinsoichin nipirëhuahuë'. ¿Onpoatonta' nipachin ana'intarinpoa'? ¡Co insonta' nanitërinhuë' Yosë nohuantërinso' canpiacaso'!” toconama'. <sup>20</sup> ¿Maquëma cháchinta' ni'toma', nanitërama' Yosë chachin pinocamaso'? Ni'co'. Piyapi tëshitohuachina, minë', huë'ëta, inapita ninin. Nipachina, co tëshiri hua'anën no'huirinhüë'. “¿Onpoatonta' naponin ninanco?” co itërinhuë'. <sup>21</sup> ¡Co'ta tëshitona'pi no'pa' mapachina, ma'sona nohuantohuachina, ninin! Nohuantohuachina, a'naquën ninshirayarin. A'naquënso' topinanaya. Inapochachin Yosëso' yonquirinpoa'.

<sup>22</sup> A'naquën co natëpihuë' ni'ton, Yosëri no'huirin. No'huipiro' nipirinhüë', co a'naroáchin ana'intërinhuë', ninararin. Co a'naroáchin ana'intoahuachinahuë', co ina marë' Yosë no'huicaso' ya'huërinhuë'. Oshaquëran ana'intarin. Ina ni'pachina', “Tëhuëenchachin Yosë no'tëquën yonquirin. Hua'qui' tananpitopirinhüë', iporasos' no'tëquën ana'intërin. Chini chiniquën nanantërin inaso',” tosapi. <sup>23</sup> A'naquënpoaso nipirinhüë', nosoroatonpoa' nicha'ësarínpoa'. Inaora nohuanton, nosororinpoa'. Iráca

chachin yonquirinpoa' nicha'ëinpoaso marè'. Anoyacancantohuachinpoa', piyapi'sa' na'con Yosè yonquiapi. “Ma noyacha catahuarin paya,” tosapi. <sup>24</sup> A'naquën cotio piyapi'sacoi huayonincoi. A'naquëma' nisha piyapi'sanguëmanta' Yosè nohuanton, imarama' canpitanta'. <sup>25</sup> Inapochachin iráca Osiasè ninshitërin.

“A'naquën iráca co piyapinëhuëpitahuë' nipirinahuë', iporaso' piyapinëhuëpita pochin ni'nahuë.

Iráca co nosoropirahuë', iporaso' nosororahuë huachi,” ténin Yosè, itërin.

<sup>26</sup> Ina quëran itantarin: “Canpitaso' co piyapinëhuëpitanquëmahuë',” itopirinhuë', iporaso' inaquë itapona': “Inapitaso' Yosè hui'ninpita chachin nisapi. Inaso' nanpimiatarin,” tosapi.

<sup>27</sup> Isaiasënta' ninoton, ninshitërin. “Hua'huayatërahuë' israiro'sa' ya'huëpirinahuë', co ya'ipiya cha'ësapihuë'. Marè yonsanquë inotëra'huaya ya'huërinso nápo' ya'huëpirinahuë', caraíchin Yosëri nicha'ësarín. <sup>28</sup> Co hua'quiya quëranhuë' na'a piyapi'sa' no'tëquën ana'intarin,” ténin. <sup>29</sup> Co'huara ina ninshichatërasohuë', Isaiasë ninoton, tapon:

“Sinioro ya'ipinpoa' hua'anëntërinpoa'. Iráca ina nohuanton, ya'ipi Sotomaquë ya'huëpisopita ta'huantopi huachi. Comoraquë ya'huëpisopitanta' ta'huantopi.

Canpoanta' caraíchin nipirëhuahuë' nosoroatonpoa', nicha'ërinpoa'. Co nosororinpoahuë' naporini, canpoanta' ya'ipinpoa' ta'huanchitërihuahuë',” ténin.

### *Israiro'santa' noya nanan natëcaso' ya'huërinso'*

<sup>30</sup> Napoahuarë' ¿ma'ta' tëcarihua'? ténahuë yonquiato. Nisha piyapi'sa' hua'qui' co Yosè yonquipirinahuë', inari anoyacancantërin. “Yosè no'tëquën nonin,” ta'tona' natëpi. Napoaton noya ni'nin. <sup>31</sup> Israiro'saso nipirinhuë' tapon: “Moisësë pënëntërinso' natëhuatëhua', Yosè noya ni'sarinpoa',” topirinahuë'. Co nanitopihuë' no'tëquën natëcaiso' ni'ton, co Yosëri noya ni'ninhuë'. <sup>32</sup> ¿Onpoatonta' co noya ni'ninhuë'? “Pënëntërinso' nanan no'tëquën natëhuatëhua', nóya cancantarëhua',” topirinahuë', co nanitopihuë'. “Yosëíchin nanitërin anoyacancantínpoaso',” ta'caiso nipirinhuë', co Quisocriso nohuantopihuë'. Inapoatona', pancara'pi i'patërëso pochin ni'pi. Ina marè' Yosëri co noyahuë' ni'nin. <sup>33</sup> Yosë quiricanën quëran naporin:

“Sionquë Cristo a'pahirahuë', co nohuantopihuë'.

Inapoatona' pancara'piquë i'parëso pochin ni'pi. Co nohuantopihuë' ni'ton, anotërëso pochin nipi.

Nipirinhuë', insosona Cristo nohuantohuachin, co onporonta' atapanarahuë'. Noya ni'sarahuë huachi,” ténin Yosè.

## 10

<sup>1</sup> Pa'pi nohuantërahuë israiro'sa' cha'ëcaiso'. Ina marè' iyaro'sa', chiníquën Yosè nontárahue. <sup>2</sup> Tëhuënhachin Yosè yachinotopirinahuë', co nanamën no'tëquën yonquipihuë'. <sup>3</sup> Yosëíchin anoyacancantërinpoa'. Nipirinhuë', co nohuantopihuë' ina nanan imacaiso'. “Pënëntërinso' natëhuatëhua', Yosè noya ni'sarinpoa',” toconpi. “Quëma Sinioro anoyacancantocoi,” co itopihuë'. <sup>4</sup> Iráca Moisësë pënëntërin. Iporaso nipirinhuë' co ina natërhüaso marè' Yosè noya ni'ninpoahuë'. Quisocriso nani o'marin oshanënpoa' inquitinpoaso marè'. “Quisocrisoíchin anoyacancantarinpoa',” topatëhua', Yosè noya ni'sarinpoa'.

<sup>5</sup> Moisësëri ninshitërin pënëntërinso nanan imacaiso marè'. “No'tëquën natëhuatama', Yosè noya ni'sarínquëma'. Ya'ipiya natëcaso' ya'huërin,” ténin ninshitaton. <sup>6</sup> Canpoaso nipirinhuë' Quisocriso imapatëhua', Yosè noya ni'sarinpoa'. Quisocriso nanamënso' co sacaiyahuë' nitotacaso'. “¿Inta inápaquë pantapon Quisocriso quëmacaso marè'?” co ta'caso' ya'huërinhuë'. Nani o'marin. <sup>7</sup> “¿Inta' chimipiro'sa' ya'huëpiquë papon ina quëran Cristo quënantacaso marè'?” co ta'caso' ya'huërinhuë'. Nani nanpiantarin.



<sup>8</sup> ¿Ma'ta' quiricanën quëran anitotërinpoa'? "Ina nananso', co sacaihuë' nitotacaso'. Nanamënpoa quëran sha'huicaso ya'huërin. Cancanënpoa quëranta', natëcaso ya'huërin," itërinpoa'. Inasáchin natëco', itëranquëma' canta'. <sup>9</sup> Tata Yosë nohuanton, Quisocriso tēhuēnchachin nānpiantarin. Ina cancanënpoa quëran natēhuatēhua', "Quisocrisoíchin imarahuë," topatēhua', Yosë anoyacancantarinpoa'. <sup>10</sup> "Yosë co onporonta' nonpintarinpoahuë'," ta'tēhua', cancanënpoa quëran natēhuatēhua', noya ni'sarinpoa'. "Caso' Quisocriso imarahuë," topatēhua', naporochachin anoyacancantarinpoa'.

<sup>11</sup> "Insosona Quisocriso natēhuachin, co sëtarinhuë'. Co a'poarahuë'," tēnin Yosë quiricanēnquë. <sup>12</sup> A'naíchin Yosë ya'huërin. Ya'ipinpoa' hua'anëntërinpoa'. Co co-tioro'saráchin na'con nosororinhuë'. Nisha piyapi'santa' nosororin. Ina nontohuatēhua', nóya catahuarinpoa'. <sup>13</sup> "Oshanēhuë Siniro inquitoco," topatēhua', anoyacancantatōnpoa' nicha'ësarínpoa'. <sup>14</sup> Napoaponahuë', co a'chintohuatēhuahuë', co nitotapihuë'. Co nitotohuachinahuë', co nanitapihuë' natëtacaiso'. Co natëtohuachinahuë', co nanitapihuë' Yosë nontacaiso'. Napoaton a'chintacaso' ya'huërin. <sup>15</sup> Co Yosëri a'china'piro'sa' a'pahuachinhuë', ¿onpo nitotaponata'? Yosë quiricanën quëran naporin: "Ma noyacha ni'ton, noya nanan sha'huitaonpoa' huë'sarin paya," tēnin.

<sup>16</sup> A'naquënso nipirinhuë', noya nanan natanpirinahuë', co nanitopihuë' natëcaiso'. "Nanamën Siniro, sha'huitopirahuë' co insonta natëtërinhuë'," tēnin Isaiasë iráca. <sup>17</sup> Quisocriso nanamën natanacaso' ya'huërin. Natanpatēhua': "No'tëquën nonin," topatēhua', natëtarihua'.

<sup>18</sup> ¿Co natanpihuë' ti? ¿Nani mini natanpi! tēnahuë. Yosë quiricanēnquë naporin: "Nisha nisha parti nanamën sha'huitopi.

Ya'ipi parti nahuinin," tēnin Yosë quiricanēnquë.

<sup>19</sup> Naquëranchin natainquëma'. Israiro'saso' natanaponaraihuë', ma'sona tapon naporinso' ¿co nitotopihuë' ti? Nitotaponaraihuë', co natëpihuë'. Moisésë ninshitaton, naporin:

"Nisha piyapi'sa' co yonquipirinacohuë' catahuararahuë' ni'ton, canpitariso' a'pitarama'.

Ina marë' no'huitarama', tēnin Yosë," itërin.

<sup>20</sup> Isaiasënta' co tē'huatonhuë', Yosë noninso' sha'huirín.

"Nisha piyapi'sa' co yanohuitopirinacohuë', iporaso' imasarinaco.

Co iráca nohuantopirinacohuë', iporaso' nohuitarinaco, tēnin Yosë," itërin.

<sup>21</sup> Israiro'saso nipirinhuë' co yanatëpihuë'. Inapita yonquiaton, Isaiasë quëran taantarin: "Íraca quëran huarë' yacatahuarahuë. Imirahuë ihuëtatë pochin nitato: 'Huëco' catahuainquëma', itopirahuë', co yanatërinacohuë'. Co natantochináchinhuë' cancantopi, tēnin Yosë," itërin.

## 11

### *Israiro'sa' huayoninso'*

<sup>1</sup> Napoaton natananquëma': ¿Israiro'sa' co natëtopiso marëhuë' Yosëri a'pomiatërin ti? Co a'porinhuë'. Ipora huanta' piyapinēnpita ni'ton, nosororin. Canta' Israiro piyapico. Tata Apraanso' shimashonëhuë. Mincamin huëntonquë nasitërahuë.

<sup>2</sup> Inapitaso', iráca Yosëri huayonahuaton acorin piyapinēnpita nicacaiso marë'. Co a'porinhuë'. Íraca Iniasë naporinso' Yosë quiricanēnquë ninshitopiso' nitotërama'. Inariso pēnēnpirinhuë', israiro'sari no'huipi. Napoaton Yosë nontohuachina, inapita sha'huirapirin. <sup>3</sup> "Na'amiachincoi Siniro pēnēntopiraihuë'. Co nohuantatonaraihuë', a'naquēncōi tēparinacōi. Artaroro'sa' chinota'huainquënso marë' a'mitëraisonta' tē'yatopi.

Casáchin pēnēntapirahuë', yatëparinaco canta'," itërin. <sup>4</sup> Napotopirinhuë', ¿ma'ta' Yosëri itantarin? "A'naquën mini mamanshi moshapi, Paaro itopiso'. Nipirinhuë', ca nohuanto, canchisë huaranca quëmapi'sa' chinotarínaco. Co mamanshi moshapihuë',"



itërin. Nani ina nitotërama'. <sup>5</sup> Inapochachin iporanta' caraya pochin Yosë huëntonënquë ya'conpi. Inaora nohuanton, nosoroaton, Yosëri aya'conin. <sup>6</sup> Inaora nohuanton, catahuarin. Co noya nipiso marë' catahuarinhuë'. Noya nipiso marë' huayonin naporini, co huachi inaora nohuanton, catahuacaso' ya'huë'itonhuë'.

<sup>7</sup> Napoahuarë', ¿ma'ta' nipachin tēcarihua'? Na'a israiro'sa' Yosë huëntonënquë yaya'conpirinahuë', co inahuara nanitopihuë' noya cancantacaiso'. A'naquën huayoninsopitaso' Yosë nohuanton, ya'conpi. A'napitaso nipirinhuë' co natan-tochináchinhuë' cancantopi. <sup>8</sup> “Yosëri tananpitërin ni'ton, huë'ërëso pochin cancantopi. Ya'pirahuanaponaraihuë', co quënantërëso pochin nipihuë'. Huëratëhuanaponaraihuë', co natantërëso pochin nipihuë'. Ipora huanta' ina pochin nisapi,” tēnin Yosë quiricanënquë. <sup>9</sup> Iráca Tapinta' tapon:

“Yosë no'huipi ni'quëhuarë', ana'inchin. Nani ma'sha ya'huëtopirinahuë', co Yosë yon-quipihuë'.

Coshatatona', capa cancantapirinahuë', ina quëran chachin nitapicancaina'. Yosëri ana'inchin.

<sup>10</sup> Somaraya pochin cancantopi ni'quëhuarë', ama quënantërëso pochin cancanchinaso-huë'.

Yosë nohuanton, chiníquën parisitomiachina',” tēnin iráca. Inapochachin ipora huanta' nisapi.

### *Nisha piyapi'sa'ya'conpiso'*

<sup>11</sup> Napoaton natanaranquëma'. ¿Israiro'sa' co yanatëpihuë' ni'quëhuarë' Yosëri a'pomiatërin ti? Co Yosëri a'pomiatërinhuë'. Nipirinhuë', co imapihuë' ni'ton, nisha piyapi'santa' Yosëri anoyacancantarin. Ina quëran israiro'saso', apiratona' yon-quíapi: “Canpoanta' inapita pochin cancantohuatëhua', Yosë noya ni'sarinpoa',” tosapi.

<sup>12</sup> Inapita co imatonahuë' tēhuëpiso marë', iporaso' ya'ipi piyapi'sa' nanitopi Yosë huëntonënquë ya'conacaiso'. Nisha nisha piyapi'sa' niponaraihuë', Yosëri noya ni'sarin. A'na tahuëri na'a cotioro'sa' imaantahuachina', noya noya nizarin.

<sup>13</sup> A'naquëmaso' nisha piyapi'sanquëma'. Yosë a'parinco a'chinta'huanquëmaso marë'. Ina marë' noya cancantërahuë. Pa'sápato, a'chintaranquëma'. <sup>14</sup> Na'acquëma' imapatama', a'naquën israiro'santa' nohuantapi imacaiso' nimara. Inapitanta' Yosëri anoyacancantarin. <sup>15</sup> Iporaso Yosëri tananpitërin ni'ton, nisha nisha piyapi'sa' ina nohuitapi. A'na tahuëriso nipirinhuë' israiro'santa' imaantahuachina', noya noya nisapi. ¿Ma pochinta' nisapi? Chimipi nanopiantarinso pochin nisapi, tēnahuë. <sup>16</sup> Ni'co'. Pan nipachinara, ya'nan nipiso' Yosë marë' acohuachina, ya'ipi chachin noya ninin. Nara itënta' noya nipachina, sē'paquëonta' noya nizarin.

<sup>17</sup> Nara quëran a'chinchinquëma'. Oripo nara sē'pa' co noya nitohuachinahuë', nishitëtahuatë', tē'yatërë'. Ina quëran apinapinso' oripo sē'paquën tēranta' achinpitërë' papotacaso marë'. A'naquën israiro'saso' oripo nara sē'pa pochin nipi. Co natëpihuë' ni'ton, Yosëri tananpitërin. Canpitaso' nisha piyapinquëma' nipiramahuë', huëntonënquë aya'coninquëma'. Piyapinēnpita pochachin ni'ninquëma'. <sup>18</sup> Nipirinhuë', ama israiro'sa' nocancosohuë'. Ama: “Quiyaso' noya noyacoí,” tocosohuë'. Sē'paquëni co nara achinir-inhuë'. Itēni achinirinsó'.

<sup>19</sup> “Quiyanta' imaca'huaiso marë' israiro'sa' tananpitërin,” tēnama' nimara. <sup>20</sup> Yosëri tananpitërin mini. Nipirinhuë', co ina marë' tananpitërinhuë'. Co Quisocriso nohuantopihuë' ni'ton, tananpitërin. Canpitanta' imarama' ni'ton, noya ni'ninquëma'. Napoaton ama inapita nocancosohuë'. Ni'cona canpitanta' Quisocriso naniantotama'.

<sup>21</sup> Israiro'sa'ton piyapinēnpita pochin ni'pirinhuë', ana'intërin. Quisocriso naniantohu-atama', ana'intarinquëma' canpitanta'.

<sup>22</sup> Ma noyacha Yosëso' nosororinpoa paya. Co natëpisopitasohuë' nipirinhue', chiniquën ana'intarin. Inasáchin imapatama', nosoromiatarinquëma'. Nipirinhue' naniantohuatama', ana'intarinquëma' canpitanta'. <sup>23</sup> Naporahuaton israiro'santa' imantahuachina', Yosëri piyapinënpita pochin niantarin. Nara së'para'huain achinpitantarëso pochin acoantarin. Yosë ni'ton, nanitaparin. <sup>24</sup> Nani a'chintëranquëma'. Canpitaso' apinapin nara pochin ninama'. Apinapinso' nara së'para'huain nishitëtahuatë', oripo nara së'para'huain achinpihuatëra, papotërin. Aquëtë huarë' së'para'huain chachinso' achinpitaantahuatëra, a'naróachin papotaantarin. Inapochachin israiro'sa' noya imapachina', Yosëri noya niantarin.

### *Na'a israiro'sa' imaantapiso'*

<sup>25</sup> Yosë yonquirinso' iyaro'sa' sha'huichinquëma', no'tëquën nitotacamaso marë'. A'napita co nitotopirinhue', ama nocantamaso marëhuë' sha'huitaranquëma'. “Quiyasáchin no'tëquën yonquirai,” ama tocosohuë'. Iporaso' na'a nisha piyapinquëma' Yosë huëntonënuquë ya'conarama'. Ya'ipi Yosë nohuantërinquëmasopita ya'conamaquë huarë' na'a israiro'sa' co natantochináchinhue' cancantapi. <sup>26</sup> A'na tahuëriso nipirinhue' ya'ipi israiro'santa' cha'ësapi huachi. Yosë quiricanënuquë ninorinso pochachin imaantapi. Iráca ninshitaton, naporin:

“A'na tahuëri a'nara' Israiro quëmapi Quirosarin quëran o'mararin piyapi nicha'ëcaso marë'.

Cacopo shinpita co noyahuë' yonquipiso' ananiantarin.

<sup>27</sup> Oshanëna' inquitahuato, piyapinëhuëpita pochin ni'sarahue'.

Apraan sha'huitërahuëso chachin napotarahue',” ténin Yosë.

<sup>28</sup> Iporaso' israiro'sa' co Quisocriso nanamën natëpihuë'. Yosë inimicotopirinhue', canpitaso' imarama'. Napoaponahuë', israiro'sa'ton acorin piyapinënpita nicacaiso marë'. Iráca Apraan, Isaco, Cacopo, inapita sha'huitërin ni'ton, ipora huanta' shinpita nosoroarin. <sup>29</sup> Nani Yosëri sha'huitoahuachin, inachachin nisarin. Co onporonta' nisha nontarinhuë'. Huëntonënuquë aya'conpachin, co onporonta' naniantarinhuë'. <sup>30</sup> Iráca co canpitaso' natëpiramahuë', co israiro'sa' nohuantopihuë' ni'ton, Yosë nosoroatënuquëma', catahuarinquëma'. <sup>31</sup> Iporaso' israiro'sa' co natëpihuë'. Co natëhuachinarahuë', Yosë catahuarinquëma'. Ina ni'pachina', yonquiantapona' ni'ton, a'na tahuëri inahuanta' nosoroaton, catahuaantarin. <sup>32</sup> Yosëri ya'ipi piyapi'sa' tananpitërin ni'ton, co natëtochináchinhue' cancantopi. Ya'ipinpoa' nosoroinpoaso marë' naporin.

<sup>33</sup> ¡Ma noyacha Yosëso' catahuarinpooa paya! ¡Ma noyacha yonquirin paya! Ya'ipiya nitotërin. Yonquirinsopita co nitotochináchinhue' ninin. Naporahuaton, ina pochin cancantacaso' co onporonta' nanitarihuahuë'. <sup>34</sup> “Co insonta inaora Yosë yonquirinso' nitotërinhuë'. ¡Co incari tëranta' nanitërinhuë' noya noya ayonquicaso'! <sup>35</sup> ¿Incarita' ma'sha Yosë quëtërin ni'ton, i'huërëtacaso' ya'huërin? Co incari tëranta',” ténin quiri-canënuquë. <sup>36</sup> Ya'ipi ma'sha Yosëri ninin. Ina nohuanton, co ta'huantarëhuahuë'. Yosëichin pa'yatacaso marë' ya'huërëhua'. Inaora nohuanton, anoyacancantërinpoa'. Ma noyacha Yosëso paya, itahua'. ¡Inasáchin chinotahua'! Amen.

## 12

### *Yosë marë' sacatërehuaso'*

<sup>1</sup> Yosë na'con nosororinpoa' ni'ton, ya'ipi cancanëma quëran, iyaro'sa', ina imaco'. Iráca Yosë chinotohuachinara, ma'sha tëpapi. Canpitaso nipirinhue' Yosë marë' naniantohuatama', nohuantërinso'ráchin nico'. Ina yonquiatoma', nani tahuëri noyasáchin nico'. Ina Yosë nohuantërin. Inapohuatama', Yosë noya chinotarama'. <sup>2</sup> Iporaso' notohuaro' piyapi'sa' co Yosë natëpihuë'. Ma'sharáchin yonquiatona', co Yosë yonquipihuë'. Ama inapita nonancosohuë'. Nani tahuëri Yosë nontoco' yonquirinso chachin quëchinquëma'.

Ina yonquihuatama', nohuantërinso chachin anitotarinquëma'. Ina quëran noya noya cancantohuatama', noya ni'sarinquëma'.

<sup>3</sup> Yosë nosoroatonco, acorinco piyapi'sa' a'chinta'huaso'. Nani tahuëri catahuar-inco. Napoaton pënënananquëma'. Ya'ipinquëma' sano yonquico'. Ama a'napita nocancosohuë'. Yosë nisha nisha acorinpoa'. Nisha nisha catahuarinpoo' ma'sona nohuantërinso' nicacaso'. Napoaton, co a'napita nocanacaso' ya'huërinhuë'. No'tëquën yonquiatoma', ma'marësona acorinquëmaso' nitotoco'. A'naya a'nayanquëma' anitotarinquëma'. <sup>4</sup> Ni'co'. Imira, nantë', ya'pira, inapita ya'huëtërinpoa'. Imira ya'huëtërinpoa' së'quëtacaso marë'. Nantë' ya'huëtërinpoa' iratacaso marë'. Nisha nisha ya'huëtërinpoa' nisha nisha nicacaso marë'. Co ya'ipiya inachachin nipihuë'. <sup>5</sup> Inapochachin ya'ipi Quisocristo imarëhuasopita a'naíchin nonënpoo pochin ninëhua'. Ya'ipinpoa' ina imarëhua' ni'ton, ina pochin ninëhua'. Nisha nisha nitotërëhuaso' niriuhuarahuë', nicatahuarëhua'. A'na huëntonaca ninëhua'.

<sup>6</sup> Yosë nosoroatonpoa', acorinpoa' nisha nisha nicacaso'. Ma'marësona acohuachinpoo', noya niahua'. A'naquën, yonquirinso chachin anitotërin sha'huicaiso marë'. Anitotohuachinquëma', ya'ipiya no'tëquën sha'huico'. <sup>7</sup> Ina nohuanton, a'naquën nitotërin catahuatacaso'. Nitocatahuatohuatama', noya catahuatoco'. A'naquën nitotërin a'chinacaso'. Nitoa'chinpatama', noya a'chinco'. <sup>8</sup> A'naquëonta' nitotopi achinicancanacaso'. Nitotohuatama', noya cancantatoma' achinicancanco' imamiachina'. A'naquëonta' ina nohuanton, coriqui, ma'sha, inapita ya'huëtopi. A'napita quëtohuatama', ama piyapi'sa' noya nicainënnquëmaso marë' quëtocosohuë'. Yosë yonquiatoma', quëtoco'. "Ina nosororinco ni'ton, carinta' nosoro'i," ta'toma', quëtoco'. A'naquëonta' ina nohuanton chachin, chiníquën nanan ya'huëtopi. Ansianohuë nipon, hua'anhuë nipon ya'conpatama', ama chirotomarahuë', noya pënëntoco'. Noya nonco'. A'naquëonta' ina nohuanton, cania'piro'sa', sa'ahuaros'a', inapita catahuapi. Inapita nicapoma' pa'patama', noya cancantatoma', catahuaco'.

### *Ma'pitasona nicacaso' ya'huërinso'*

<sup>9</sup> Ya'ipi piyapi'sa' nosoroco'. Cancanëma quëran huarë' nosoroco'. Co noyahuë' ninamasopita a'poco'. Noyasáchin nico'. <sup>10</sup> Imaramasopita capini noya ninosoroco'. Iyaparima pochin nini'co'. Ama "Caso' noya noyaco," tocosohuë'. A'napita noya noya ni'co'. <sup>11</sup> Ama chirotomarahuë', noya sacatoco'. Ya'ipi cancanëma quëran noya yonquiatoma', Yosë marë' sacatoco'. <sup>12</sup> "Yosë ananpitaantarinpoo'," ta'toma', noya cancantoco'. Ma'sha onpohuatama', ama no'huitocosohuë'. Chiníquën cancantatoma', ahuantoco'. Apira apira Yosë nontoco'. <sup>13</sup> Imapisopita pahuantohuachina', ma'sha quëtoco'. Ni'toro'sa' ya'notohuachinënnquëma', noya nontatoma', a'caco'.

<sup>14</sup> Piyapi aparisitohuachinënnquëma', ama no'huitomarahuë', noya nontoco'. Yosë nontoco' inahuanta' catahuacaso marë'. Ama Yosëri ana'intacaso' yonquirapicosohuë'. <sup>15</sup> A'napita na'con yonquico'. Canpitaora ninatanamaso pochin cancantoco'. Noya cancantohuachina', ina marë' canpitanta' noya cancantoco'. Sëtohuachina', sëtoco'. <sup>16</sup> Noya ninicatoma' ya'huëco'. Ama a'na piyapi tëranta' nocancosohuë'. Topinan piyapi pochin cancantatoma', ya'ipiya catahuaco'. Ama: "Caso' na'con na'con nitotërahuë'," tocosohuë'. Ama ina pochin yonquicosohuë'.

<sup>17</sup> A'na piyapi ma'sha onpotohuachinquëma', ama i'huërëtosohuë'. Noya nico' a'napitanta' catahuacaso marë'. <sup>18</sup> Ama piyapi'sa' no'huicosohuë'. No'huihuachinënnquëma', ama canpitariso' no'huicosohuë'. Onpopionta' nanan anoyatoco'. <sup>19</sup> Nosoroatënnquëma' iyaro'sa', oshaquëran pënënanquëma'. Ama i'huërëtosohuë'. Tananpitoco' Yosëri ana'inchin. Quiricanën quëran naporin: "Co noyahuë' nipisopita cari ana'intarahuë. No'tëquën ana'intarahuë," tënin Yosë. <sup>20</sup> Napoaton "Inimiconëma' tanahuachin, a'caco'. Yamorohuachin, o'shitoco'. Inapotohuatama', inimiconëma' atapanarama'," tënin anta'. <sup>21</sup> Ama sopai natëcosohuë'.

Nani ma'sha ayonquirinquëmaso' a'pomiatoco'. Yosë yonquiatoma', noyasáchin nico'. Inapohuatama', sopai minsëarama'.

## 13

<sup>1</sup> Copirno acorinsopita natëco'. Yosë nohuanton, copirno, chirinchi, coisë, hua'an, inapita ya'huërin. Co Yosë nohuantërinhuë' naporini, co inapita ya'cointonahuë'. Napoaton natëco'. <sup>2</sup> Co copirno acorinsopita natëhuatamahüë', Yosënta' co natëaramahuë'. Ina marë' ana'intarinquëma'. <sup>3</sup> Noya nipatama', co hua'ano'sa' no'huiarinëinquëmahüë'. Co natëhuatamahüë', no'huiarinëinquëma' ni'ton, t'huatacaso' ya'huërin. ¿Nohuantërama' hua'ano'sa' noya nicainëinquëmaso'? Noya nico' nipachin noya ni'inëinquëma'. <sup>4</sup> Yosëri acorin a'painënpaso marë'. Nipirinhuë', co noyahuë' nipatama', t'huatoco'. Co topinan quëran chiníquën nanan quëtërinhuë'. Yosëri acorin co noyahuë' nipsisopita ana'intacaso marë'. <sup>5</sup> Napoaton hua'ano'sa' natëco' ana'intochinëinquëma'. Isonta' yonquicaso' ya'huërin: "Yosëri acorin natëcaso marë'," ta'toma', natëco'. <sup>6</sup> Ina nohuanton, hua'ano'sa' ya'huërin noya nicacaiso marë'. Ina marë' nani tahuëri sacatapi. Napoaton pahuërëtacaso' camaitërinso' pahuërëtarama'.

<sup>7</sup> Ya'ipiya no'tëquën pahuërëtoco'. Hua'ano'sa' catahuacaso marë' pahuërëtacaso' ya'huëhuachina', quëtoco'. Chiníquën nanantopi ni'ton, noya nicatoma', natëco'.

<sup>8</sup> Nihuitohuatama', a'naroáchin pahuërëtoco'. Ya'ipi piyapi nosoroco'. Inaso' na'con na'con Yosë nohuantërin. Nosorohuatama', iráca pënëntërinso' noya natëarama'. <sup>9</sup> Iráca pënëntohuachina, itërin: "Sa'ahuanpatama', ama a'na sanapi së'huacosohüë'. Ama tëpatocosohüë'. Ama manta' ihuatocosohüë'. Ama nonpinapicosohüë'. Ama a'na piyapi ma'shanënpita nohuantapatocosohüë'," tënin. Ninosorohuatëhua', ya'ipi Yosë pënëninpoaso' natëarëhua'. "Quëmaora ninosororanso pochachin a'napitanta' nosoroquë'," tënin Yosë. <sup>10</sup> A'napita nosorohuatama', co no'huiaramahuë'. Co pinosaramahuë'. Nóya catahuarama'. Napoaton nosorohuatama', Yosë nóya natëarama huachi.

<sup>11</sup> Ya'nan imarigua': "Pahuanarin Quisocriso o'mantacaso'," tënëhua'. Iporaso nipirinhuë' nani o'mantacaso' tahuëri ya'caritëriarin. Naporo' nicha'ësaripoa'. Napoaton ama huë'ërëso pochin yonquicosohüë'. Yosë no'tëquën natëco'. <sup>12</sup> Hua'qui' piyapi'sa' co noyahuë' nicatona', tashi pochin cancantopirinahuë'. Iporaso' Sinioro tahuërinën ya'caritëriarin. Napoaton ama tashi pochin cancantahuasohüë'. Sontaro'sa' hua'na quëran a'mopiso pochin tahuëri pochin cancantatëhua', noyasáchin niahua'. <sup>13</sup> Tahuëri nipachina, a'ninquëchin ni'ton, noyasáchin ninë'. A'naquënso nipirinhuë' pitasachin pa'yatopi. Na'a tahuëri nansarápi, o'osápi, coshatápi, no'piápi. Ama pitaso' pa'yatocosohüë'. Ama no'picosohüë'. Ama pi'pisha tëranta' nimonshitacamaso' yonquicosohüë'. Ama nino'huicosohüë'. Ama a'na piyapi noyapatoma', no'huicosohüë'. <sup>14</sup> Sontaro'sa' hua'na a'mopiso pochin Quisocriso ya'copiripoa' ama sopai minsëinpoaso marëhuë'. Napoaton Quisocriso na'con yonquiatoma', ina pochachin cancantoco'. Ina natëtoma', ama pi'pian tëranta' yonquicosohüë' co noyahuë' nicacamaso marë'.

## 14

### *Co ninocanacaso' ya'huërinsohuë'*

<sup>1</sup> A'naquënso' Quisocriso imasapirinahuë', co ya'ipi cancanëna quëran natëyátërapihuë'. "Pënëntërinsona' natëcaso' ya'huërin," topi. Inapitanta' huë'pachina', noya nontoco'. "Huëco' iyaro'sa' Yosë chinotahua'," itatoma', cortoque ichiya'conco'. Ama ninocanacamaso marë' ninontocosohüë'. <sup>2</sup> A'naquënso' "Quisocrisoíchin nicha'ërinpoa' ni'ton, ya'ipi cosharo' noya capacaso'," ta'tona' ya'ipi ca'pi. A'napitaso nipirinhuë', "Nosha ca'patëhua', oshahuanëhua'," ta'tona' ya'ipi nosha a'popi. <sup>3</sup> Nosha ca'patama', ama nosha a'poro'sa' nocancosohüë'. Nosha a'pohuatamanta' "Nosha



ca'nama' ni'ton, co noyahuë' ninama'," ama itocosohuë'. Cato chachinquëma' Yosë noya ni'ninquëma' ni'ton, ama ninapotocosohuë'. <sup>4</sup> Co a'napita piyapinën nocanacaso ya'huërinhuë'. Piyapinën noya nipachina, co noyahuë' nipachinanta' hua'anëni nitotarínso'. Yosëichin ya'ipinpoa' hua'anëntërinpoa' ni'ton, no'tëquën sha'huitarinpoa'. Inasáchin nanitërin achinicancaínpoaso'. Co canpoa capíniso' ninocanacaso' ya'huërinhuë'.

<sup>5</sup> Inapochachin a'naquën: "Cotio chinoto tahuëri noya noya," topi. Naporo' tahuëri chinotatona', Yosë chinotopi. A'napitaso nipirinhuë' "Nani tahuëri noya Yosë chinotacaso'," topi. Co tahuëri imarëhuahuë'. Quisocriso imarëhuaso'. Napoaton ama nisha nisha yonquicosohuë'. A'naya a'nayanquëma' cancanëma quëran na'con yonquico' noya nicacamaso marë'. <sup>6</sup> Ma tahuërisona chinotohuatama', Yosë yonquiatoma', ina chinotarama'. Inapochachin nosha ca'patama', Yosë yonquiatoma', coshatërama'. "Yosparinquën, Siniro," itërama'. Co nosha ca'na'pinquëmahuënta' Yosë yonquiatoma', coshatërama'. "Yosparinquën, Siniro," itërama' canpitanta'. <sup>7</sup> Co canpoara nipa'yatacaso marë' ya'huërehuahuë'. Chiminpatëhuanta' co canpoara marë' chiminarihuahuë'. <sup>8</sup> Siniro piyapinënpoa' ninëhua'. Ina natëcaso marë' nanpitëhua', ya'huërehua'. Ina yonquiinpita chiminarihua'. Nanpihuatëhuanta', inasáchin hua'anëntarinpoa'. Ina quëran chiminacaso' nipachin, ina yonquiatëhua', chiminarihua'. Inasáchin imarëhua'. <sup>9</sup> Ya'ipinpoa' hua'anëntinpoaso marë' Quisocriso chimin. Nani chimirin minsërahuaton, chini chiniquën nanantaton, nanopiantarin. Napoaton nanopirëhuasopita, chiminpisopitanta', ya'ipinpoa' hua'anëntarinpoa'.

<sup>10</sup> Ayaro' tahuëri ya'ipinpoa' natanarinpoa' co noyahuë' nipisopita ana'intacaso marë'. ¿Onpoatonta' nipachin iyaparin nocanan? Co ina pochin nicacaso' ya'huërinhuë'. Yosëichin no'tëquën anitotarínpoa'. <sup>11</sup> Iráca quiricanënquë naporin: "Caso' Yosëco ni'to, co nonpinahuë'.

A'na tahuëri ya'ipi piyapi'sa' isonahuatona', chinotarinaco.  
'Quëmasáchin Yosënuën, itarinaco," tënin Yosë.

<sup>12</sup> Ayaro' tahuëri nanihuachin, ya'ipinpoa' Yosë natanarinpoa'. Ma'marësona ma'sha ninëhuaso' natanarinpoa'. A'naya a'nayanpoa' no'tëquën sha'huitacaso' ya'huapon.

### *Noya noya imacaso marë' nicatahuahua'*

<sup>13</sup> Napoaton ama huachi ninocancosohuë'. A'napita imapisopita catahuaco' noya cancanchina'. Ni'cona anishacancantotama'. <sup>14</sup> Ya'ipi cosharo' noya capacaso'. Co manta' a'pocaso' ya'huërinhuë'. Siniro Quisoso imato, naporahuë. Napoaton nitotërahuë. A'naquënso nipirinhuë': "Co Yosë nohuanterinhuë' nosha capacaso'," taponaraihuë', ca'pachina', tëhuëenchachin oshahuanpi. <sup>15</sup> Isonta' yonquico'. A'naquëma' ya'ipi cosharo' noya ca'nama'. A'naquënso nipirinhuë' co nosha ca'pihuë'. "Huëco' ina ca'ahua'," itohuatama', co noyahuë' cancantapona' nimara. "Co noyahuë' capacaso'," taponaraihuë', ca'pachina', co huachi noyahuë' cancantapi. Napoaton inapita nosoroatoma', ama napotocosohuë'. Ama cosharoachin yonquiatoma', a'napita anishacancantocosohuë'. Inapita marënta' Quisocriso chimin. <sup>16</sup> Ma'sona tëranta' noya nicacaso' ya'huëpirinhuë', a'napita co noyahuë' ni'pachinënquëma', ama napocosohuë'. Ni'cona co noyahuë' nicatënënquëma' nonapichinënquëma'. <sup>17</sup> Yosë noya hua'anëntërinpoa'. Ina imapatëhua', noya nisarëhua'. Asanocancanarinpoa' ni'ton, co nino'huicaso' ya'huërinhuë'. Yosëso', ca'nëhuaso', o'orëhuaso', inapita co onpopinchin yonquirinhuë'. Ispirito Santo catahuarinpoa' noya cancantahuaso'. Catahuahuachinpoa', capa cancantarihua'. <sup>18</sup> Ina pochin Quisocriso imapatëhua', Yosë noya ni'sarinpoa'. Piyapi'santa' noya ni'sarinpoa'.

<sup>19</sup> Napoaton noya ninicatëhua', ya'hua'ahua'. Nicatahuahua' noya noya imacaso marë'. <sup>20</sup> Ama ca'namaso marë' a'napita anishacancantocosohuë'. Ya'ipi cosharo' noya capacaso'. Co manta' a'pocaso' ya'huërinhuë'. Nipirinhuë', a'naquën co ina



natëtonahuë', ca'pachina', co noyahuë' cancantapi. Napoaton co yaca'pachinahuë', naporo' canpitanta' tananpitoco' nisha cancantohuachina'. <sup>21</sup> Ama manta' a'napita anishacancantacamaso' yonquicosohuë'. Ca'namaso marë', o'oramaso marë', ama inapita marë' a'napita anishacancantocosohuë'. Iyaparin pochin nosoroatoma', catahuaco' noya noya imacaiso marë'. <sup>22</sup> Ma'sona tëranta' nipatama', "Yosë nohuantërinso' nisarahuë," ta'toma', noya nico'. Cancanënpoa quëran huarë': "Noya nisarahuë," topatëhua', noya cancantarihua'. <sup>23</sup> Napoaponahuë': "Co Yosë nohuantërinhuë' iso cosharo capacahuaso'," tarihuarahuë', ca'patëhua', oshahuanarihua'. Ina pochin yonquiarihuarahuë' ma'sona tëranta nipatëhua', oshahuanarihua'. Nipirinhue', "iso cosharo noya capacaso'," tēcaton ca'patan, co oshahuanaranhuë'.

## 15

### *Nicatahuacaso' ya'huërinso'*

<sup>1</sup> Canpoaso' ya'ipi cancanënpoa quëran imarëhua'. "Quisocristoíchin nicha'ërinpoa'," ta'tëhua', co nisha nisha yonquirëhuahuë'. A'naquënso nipirinhue' co ya'ipi cancanëna quëran natëyätërapihuë'. Inapitanta' oshaquëran pënënatëhua', catahuahua' noya imaina'. Ama canpoara nohuantërehuasoráchin yonquia'huasohuë'. <sup>2</sup> A'napita yonquiatëhua', catahuahua' noya cananchina'. Catahuahuatëhua', noya noya imasapi. <sup>3</sup> Quisocristoso' co inaora nohuantërinso' yonquirinhue'. Yosëíchin natërin. Ina nontaton, itërin: "Quëma inimiconënpita Tata, no'huirinënquën. Natëranquën ni'ton, no'huirinaco canta'," itërin. Quiricanënquë naporinso chachin ninin. <sup>4</sup> Iráca Yosë quiricanënquë na'con ninshitopi. Canpoanta' yonquicaso marë' napopi. "Iráca imapisopitanta' ma'sha onpoaponaraihuë', Yosë yonquiatona', ahuantopi. Yosëri noya catahuahuachina, imamiatopi. Inapochachin Yosë noya catahuarinpoa' canpoanta'," ta'caso marë' ninshitopi. <sup>5</sup> Yosëso' catahuarinpoa' ya'ipiya ahuantacaso'. Ina achinicancaninpoa', ina pochin cancantacaso marë'. Ina catahuainquëma' noya ninitatoma' ya'huëcamaso marë'. Quisocristo naporinso pochachin nico'. <sup>6</sup> Ina quëran co nisha nisha yonquiamahuë'. Napopináchin cancantatoma', nóya Yosë chinotarama'. Hui'nin chachin hua'anëntërinpoa', Quisocristo imarëhuaso'. "Ma noyacha Yosëso' catahuarinpoa' paya," tosarama'.

### *Nisha piyapi'santa' Yosë imacaiso ya'huërinso'*

<sup>7</sup> Quisocristo co nocaninpoahuë'. Ina pochin canpitanta' ninosoroatoma', ama ninocancosohuë'. Nisha nisha piyapinpoa' ni'tëhua', pi'pisha nisha inachintërehua'. Nisha nisha nirihuarahuë', noya ninontahua'. Ina quëran "Ma noyacha Yosëri catahuarin ni'ton, ninosoropi paya," tosapi. <sup>8</sup> Iráca cotioro'sa' shimashonëna' nontaton, Yosëri itërin: "A'na tahuëri Cristo a'paimarahuë," itërin. Napoaton Quisocristo a'paimarin cotioro'sa' catahuacaso marë'. Sha'huitërin ni'ton, a'paimarin. Co onporonta' nonpininhue'. <sup>9</sup> Nisha piyapi'sarinta' imacaiso marë' o'marin. A'chintohuachinara, inahuanta' Yosë chinotapi. "Ma noyacha nosororinpoa' paya," tosapi. Quiricanënquë ninshitopi.

"Nisha nisha piyapi'sa' ya'huërinquë, Sinioro, chinotaranquën.

Yonquiatënquën, cantararahuë," tēnin.

<sup>10</sup> Ina quëran taantarín:

"Cotioro'sa' Yosë chinotatona', noya cancantopi. Canpitanta' nisha piyapi'sanquëma' nipomarahuë', jina chinotatoma', noya cancantoco'!" tēnin.

<sup>11</sup> Naquëranchin taantarín:

"Tata Yosë chinotatoma': 'Ma noyanquëncha quëmaso paya,' itoco'.

Nisha nisha piyapi'saquëmanta' ina chinotoco'," tēnin.

<sup>12</sup> Isaiasënta' Quisocristo ninoton, ninshitërin.

"A'na tahuëri Quisi shiin nasitimapon.

Cotio piyapi niponahuë', mashotohuachin, ya'ipi piyapi'sa' hua'anëntarin.  
Nisha nisha piyapi'sarinta' ina natëtona', ninarapi," ténin.

<sup>13</sup> Yosëichin tëhuënchachin catahuarinpoa' chiníquën cancantacaso'. Canpitanta' catahuainquëma' nóya cancantacamaso marë'. Asanocancainquëma'. Inasáchin yonquihuatama', catahuarinquëma'. Ispirito Santo ya'ipi nanitaparin. Catahuahuachinquëma', chini chiníquën cancantatoma', noya ninarama'.

<sup>14</sup> Canpitaso' iyaro'sa', nóya piyapinquëma'. Yosë nanamën noya nitotërama'. Napoaton nipënënamaso' nanitarama', ténahuë. <sup>15</sup> Napoaponahuë', chiníquën miachin pënënatënuëma', ninshitaranquëma' na'con na'con ayonquica'huanquëmaso marë'. Yosë nosoroatonco, acorinco nanamën a'china'huaso marë'. <sup>16</sup> Quisocriso chachin a'parinco nisha nisha piyapi'sa' a'chinta'huaso marë'. Nanamën a'chintarahuë inapitanta' imacaiso marë'. A'chinato, Yosë marë' sacatarahuë. Nisha piyapi'santa' imapachina', Ispirito Santori ya'coancantarin. Noyápiachin cancan quëtarin. Ina marë' Yosëri noya ni'sarin.

<sup>17</sup> Quisocriso catahuarinco ni'ton, nóya a'chinahuë. Napoaton noya cancantërahuë.

<sup>18</sup> Quisocriso noya catahuahuachincora, nisha nisha piyapi'sa' a'chintërahuë. Ina nohuanton, noya ninahuë ni'ton, natëpi. Co catahuarincohuë' naporini, co imaitonahuë'. Napoaton inasáchin sha'huitaranquëma'. <sup>19</sup> Tëhuënchachin Ispirito Santo ananitërinco ni'ton, na'a cania'piro'sa' a'naróachin anoyatërahuë Yosë natëcaiso marë'. Ina ni'sahuatona', natëpi. Ispirito Santori ya'coancantërin ni'ton, imapi. Quirosarinquë a'chintërahuë. Ina quëran pa'sápato, Iriricoquë huarë' Quisocriso nanamën a'chintëra'piarahuë. Ya'ipi parti pënëntërahuë. <sup>20</sup> Insëquësona a'na piyapiri a'chintohuachina, co inaquëso' a'chinahuë'. Co Quisocriso nohuitopiquëhuë' pa'nahuë. Ina marë' acorinco ni'ton, inaporinqueráchin a'china'huaso' nohuantërahuë. <sup>21</sup> Yosë quiricanënuë ninorin:

“Nisha nisha parti co Yosë nanamën natanaponaraihuë', natanapi.

Co nitotopirinahuë', a'na tahuëri nitotapi,” ténin.

Ipora huarë' nisha nisha parti a'chintërahuë.

### *Nomaquë yapa'ninso'*

<sup>22</sup> Napoaton hua'qui' nicapënuëma' yapa'pirahuë', pa'sápato, co nanitërahuë'. <sup>23</sup> Isëquë nani ya'ipi a'chintërahuë. Naporahuaton, ya'nipishahuë' yani'nanquëma ni'ton, iporaso' nicapënuëma' pa'sarahuë. <sup>24</sup> Nani yonquirahuë Ispania'pa' a'china'huaso marë'. Inatohua' pa'pato, nirapënuëma'. Naporo huarë' ninohuitarihua'. Hua'quimiáchin yacapatënuëma', pi'pian tëranta' a'chintaranquëma'. Ina quëran yapa'pato, catahuaco noya pa'i, topirahuë'. <sup>25-26</sup> Iporaso nipirinhue' Quirosarinquë'ton pa'sarahuë. Inatohua' na'a imapisopita ya'huëpirinahuë'. Ma'sha pahuantopi ni'ton, parisitapi. Ina natanahuatona', Masitoniaquë imapisopitari inahuara nohuanton yacatahuapi. Acayaquë imapisopitarinta' yacatahuapi. Pahuantërinso'pita nosoroatona', coriqui yontonpiso' quëtërinaco. Ina quëtonta'huaso marë' pa'sarahuë. <sup>27</sup> Inahuanta' Quisocriso imapi ni'ton, catahuatacaiso' pa'yatopi. “Cotioro'sa' imapisopita Yosë nanamën nitotatona', a'chintërinënpoa' ni'quëhuarë', canpoarinta' ma'sha quëtacaso' ya'huërin. Nisha piyapinpoa' nipirëhuahuë', Yosë nohuitacaso marë' catahuarinënpoa' ni'ton, canpoarinta' catahuahua' ama ma'sha pahuanchinasohuë',” nitopi. <sup>28</sup> Napoaton cari coriqui quëtapo pa'sarahuë. Huënantahuato, nicapënuëma' pa'sarahuë. Ina quëran Ispaniaquë pa'sarahuë. <sup>29</sup> Canpitataquë pa'pato, Quisocriso noya catahuarinco nanamën a'chinta'huanquëmaso marë', ténahuë.

<sup>30</sup> Canpitanta' iyaro'sa' Quisocriso imarama'. Ispirito Santo catahuarinpoa' ni'ton, ninosoroarëhua'. Napoaton chiníquën Yosë nontoco' catahuainco. <sup>31</sup> Cotia parti na'a piyapi'sa' co Yosë natëpihuë'. Inatohua' pa'pato, Yosë nontoco' ama macainacoso marëhuë'. Naporahuaton, coriqui quëtontahuato, Yosë nontoco' cotioro'sa' imapisopita

Quirosarinquë ya'huëpiso' noya nicainacoiso marë'. <sup>32</sup> Ina quëran Yosë nohuanton, canpitataquë pa'sarahüë. Noya cancantato, nontaranquëma'. Noya ninontohuatëhua', chiniquën cancantarahuë. <sup>33</sup> Yosëichin asanocancaninpoa'. Canpitanta' noya catahuainquëma', tënahuë. Amen.

## 16

### *Nipayarinsopita yonquirinso'*

<sup>1</sup> Imoya Huipi noya sanapi, tënahuë. Inanta' noya imarin. Sincriaquë ya'huaton, tiacona ya'conin. Inaquë imapisopita na'con catahuarin ni'ton, noya ni'co'. <sup>2</sup> Canpitataquë canconpachin, Quisocristo imarama' ni'ton, noya nontoco'. Ma'sha pahuantohuachin, quëtoco'. Ina sanapi na'a piyapi'sa' catahuarin. Canta' catahuarinco.

<sup>3</sup> Pirisira, Aquiro, inapita yonquiato, saludos a'patarahuë. Na'con catahuarinaco Quisocristo nanamën a'chinaca'huaso marë'. <sup>4</sup> Iráca a'napita yatëpapirinacohüë', inapita co chimirin të'huatatonaraihuë', catahuarinaco. Ina marë' pi'píshachin shichiminaponaraihuë', catahuarinaco ni'ton, cha'ërahuë. Ina marë' "Yosparinquën," itërahuë. Nisha piyapi'sa' imapisopitarinta' "Yosparinquën," itopi inahuarinta'. <sup>5</sup> Aquiro pëinënquë chachin a'naquën niyontonpi Yosë chinotacaiso marë'. Inapitanta' yonquiato, saludos a'patarahuë. Ipinitonta' saludos a'patarahuë. Asia parti pa'patëra, ina'ton Quisocristo imarin. Inaro'co noya nipayarai. <sup>6</sup> Marianta' saludos a'patarahuë. Na'con catahuarinquëma'. <sup>7</sup> Antronico, Coniasë inapitanta' saludos a'patarahuë. Inapitasto' ca pochin cotio piyapi nipi. Quisocristo imapi anta'. Imaraiso marë' napopináchin tashinan pëiquë po'morinacoi. Yosë nohuanton, iráca inahuanta' acopi a'chinacaiso marë'. Noya a'chinpi. Co'huara ca imayatërasocohüë', imapi.

<sup>8</sup> Anpriasënta' saludos a'patarahuë. Inanta' Quisocristo imarin. Inaro'co noya nipayarai. <sup>9</sup> Orpanonta' saludos a'patarahuë. Inanta' noya catahuarincoi Quisocristo nanamën a'china'huaiso marë'. Istaquisënta' noya nipayarai ni'ton, saludos a'patarahuë. <sup>10</sup> Apirisënta' saludos a'patarahuë. Ya'ipi cancanën quëran Quisocristo natërin. A'napitari aparisitopirinahuë', co a'porinhuë'. Aristoporo pëinënquë ya'huëpisopitanta' saludos a'patarahuë. <sup>11</sup> Irotiononta' saludos a'patarahuë. Inanta' cotio piyapi. Narsiso pëinënquë ya'huëpisopitanta' Quisocristo imapisopita saludos a'patarahuë. <sup>12</sup> Imoya Tripina, Imoya Triposa, inapitanta' saludos a'patarahuë. Nani tahuëri piyapi'sa' catahuapi Yosë imacaiso marë'. Imoya Pirisitanta' noya ni'nahuë. Inanta' na'con piyapi'sa' catahuarin ni'ton, saludos a'patarahuë. <sup>13</sup> Noponta' saludos a'patarahuë. Nóya Quisocristo marë' sacatërin. A'shionta' yonquirahuë. Mamahuë pochin ni'nahuë carinta'. <sup>14</sup> Asincrito, Priconti, Irimasë, Patropasë, Irimisë, ya'ipi imapisopita inaquë ya'huëpiso', inapitanta' saludos a'patarahuë. <sup>15</sup> Piroroconta' Coniarë chachin saludos a'patarahuë. Nirionta' oshinë chachin yonquiato, saludos a'patarahuë. Orinpasënta' yonquiarahuë. Ya'ipi imapisopita inapitarë' niyontonpiso' saludos a'patarahuë.

<sup>16</sup> Imaramasopita capini noya ninosoroatoma', nisë'quëco'. A'napita Quisocristo imarinsopitanta' nisha nisha parti ya'huëpisopita saludos a'patarinënuëma'.

<sup>17</sup> Quisocristo nanamën nóya a'chintërinënuëma'. A'naquënso nipirinhüë' co no'tëquën a'chinpihuë'. Yaanishacancantopi. Ni'cona, iyaro'sa', nonpintochinënuëma'. Insëquësona a'chintohuachinara, nisha nisha yonquiapi. Ama inapita natancosohüë'. Tananpitoco' pa'ina'. <sup>18</sup> Quisocristos' hua'anënpoa' nipirinhüë', co inapitariso' natëpihuë'. Inahuara nohuantopisoráchin yonquiapi. Noyasha nonaponaraihuë', co no'tëquën nonpihuë'. Co noya nitotopiquëhuë' a'chintohuachinara, a'naroáchin nonpintopi. <sup>19</sup> Canpitaso nipirinhüë' noya natërama' ni'ton, ya'ipi piyapi'sa' natantopi. Ina marë' noya cancantërahuë. Na'con yonquico' noya nicacamaso marë'. Ama

oshahuanamaso marë' yonquicosohuë'. <sup>20</sup> Yosëichin catahuarinpoa' sano cancantacaso'. Sopai yanonpintopirinquëmahuë', Yosë catahuarinquëma' ni'ton, a'naroáchin sopai minsëarama'. Canpita marë' Yosë nontarahuë. Inaora nohuanton, Siniro Quisocriso noya catahuainquëma', tënahuë. <sup>21</sup> Timotionta' saludos a'patarinquëma'. Inaso' catahuarinco a'china'huaso'. Nosio, Cason, Sosipatro, inapitanta' saludos a'patarinënguëma'. Inapitasto' cotio piyapi'sa'. <sup>22</sup> Ca Tirsioco iso quirica ninshitaranquëma'. Paono sha'huitërinco' ninshitaranquëma'. Canpitanta' Yosë imarama' ni'ton, saludos a'pataranquëma'. <sup>23</sup> Acayonta' yonquiatënguëma', saludos a'patarinquëma'. Ina pëinënguë yacapatërahuë. Inaquë chachin imaraisopita niyontonai Yosë chinota'huaiso marë'. Irasitonta' saludos a'patarinquëma'. Iso ninanoquë coriqui tapana'pi inaso'. Iya Coartonta' saludos a'patarinquëma'. [ <sup>24</sup> Inaora nohuanton, Siniro Quisocriso na'con catahuainquëma'. Amen, tënahuë.]

*Ma noyacha Yosëso paya, itahua'*

<sup>25</sup> Nani tahuëriya Yosë chinotahua'. Ya'ipi nanitaparin. Ina achinicancaninquëma' imamiatacamaso marë'. Nanamën tëninso pochachin catahuarinquëma'. Ina nanan chachin a'chintëranquëma'. Quisocriso nanamën inaso'. Iráca quëran huarë' co nanamën nitotopirinahuë', iporaso' Yosë anitotërinpoa'. <sup>26</sup> Quiricanën quëran anitotërinpoa'. Iráca a'naya a'naya ninotona', Yosë nohuanton, ninshitopi. Iráca quëran huarë' Yosë ya'huërin. Co onporonta' chiminaponhuë'. Nanpimiatarin. Ina nohuanton, nanamën ya'ipi parti sha'huiarëhua'. Nisha nisha piyapi'sa' anitotarëhua' natëcaiso marë'. <sup>27</sup> Yosëichin chinotacaso' ya'huërin. Inaíchin ya'ipi nitotërin. Quisocriso catahuarinpoa' noya noya ina chinotacaso marë'. Ipora quëran huarë' inasáchin chinotahua'. Ama onporonta' naniantahuasohuë'. Amen. Nani ninshitëranquëma huachi.

*Paono*

## Paonori Corintoquë ya'huëpisopita ninshitërinso'

### *Imapisopita yonquiaton, quirica a'patërinso'*

<sup>1</sup> Ca Paonoco ninshitaranquëma'. ¿Noya canpitanta' ya'huarama'? Canta' isëquë noya ya'huarahüë. Yosë nohuanton, Quisocristo acorinco nanamën a'china'huaso marë'. Iya Sostinisëro'co nanan a'patarainquëma'. <sup>2</sup> Corintoquë ya'huëramasopita ninshitaranquëma'. Canpitanta' Yosë huëntonënquë ya'conama'. Quisocristo imapatama', anoyacancantërinquëma' ni'ton, noyápiachin cancantërama'. Yosë acorinquëma' piyapinënpita nicacamaso marë'. Nisha nisha parti a'napitanta' Quisocristo imapi. Ya'ipinpoa' ina hua'anëntërinpoa'. A'na huënton pochin ninëhua'. <sup>3</sup> Inaora nohuanton, Tata Yosë catahuainquëma'. Asanocancainquëma'. Siniro Quisocristonta' inachachin catahuainquëma'.

### *Yosë catahuarinpoaso'*

<sup>4</sup> Quisocristo imapatama', Yosë nosoroatënuëma', catahuarinquëma'. Ina marë', "Yosparinquën," itërahuë Yosë. <sup>5</sup> Quisocristo imarama' ni'ton, na'con catahuamiatërinquëma'. Ina catahuahuachinquëma', noya yonquiatoma' noya nia'chintarama'. Yonquirinso chachin anitotërinquëma'. <sup>6</sup> Quisocristo nanamën a'chintohuatënuëma', Yosë catahuarinquëma' natëcamaso marë'. "No'tëquën sha'huitërinpoa'," ta'toma', natërama'. <sup>7</sup> Canpitaora co nanitëramahuë' Yosë pochin cancantacamaso'. Nipirinhüë', Yosë ananitarinquëma'. Co manta' pahuantarinquëmahuë' noya nicacamaso marë'. Catahuarinquëma' ni'ton, noya cancantatoma', Siniro Quisocristo o'mantacaso' tahuëri ninarama'. <sup>8</sup> O'mantaquë huarë' inaso' achinicancanarinquëma'. Oshänëma' inquitatënuëma', noyápiachin cancan quëtërinquëma'. Imamiatarama' ni'ton, o'mantahuachin, co insonta' ana'intarinquëmahuë'. <sup>9</sup> Yosë co naniantarinquëmahuë'. Sha'huitërinquëmaso chachin catahuarinquëma'. Nani acorinquëma' hui'nin nohuitacamaso marë'. Quisocristo chachin hua'anëntërinpoa huachi.

### *Nisha nisha imapiso'*

<sup>10</sup> Apira iyaro'sa' Siniro Quisocristo nanan quëtërinco ni'ton, pënënananquëma'. Ina imarama' ni'quëhuarë', noya ninontoco'. Ama nisha nisha yonquiatoma', a'na' a'na' imacosohüë'. Napopináchin yonquiatoma', noya nini'toma' ya'huëco'. <sup>11</sup> A'naquëma', iyaro'sa', canpita capini nino'huirama', natantërahuë. Croi quëmopinënpita sha'huitiirinco. <sup>12</sup> Nisha nisha nonama': "Paono imarai," tënama' a'naquëma'. "Quiyaso' Aporosë imarai," tënama' a'naquëma'. A'naquëmanta': "Pitro imarai," tënama'. A'naquëmaso nipirinhüë': "Cristo imarai quiyaso'," tënama'. <sup>13</sup> A'naíchin Cristo ya'huërin imacaso'. ¿Onpoatomata' nipachin nisha nisha imarama'? ¿Caso' co canpita oshanëma marë' corosëquë patanantërinacohüë! Aporintohuachinënuëmara, ¿ma'ta' tënama'? "Paono imarahüë," co tënamahuë pora. <sup>14</sup> Co na'aquëma' aporintëranquëmahuë'. Crispo, Acayo, inaíchinquëma' aporintëranquëma'. Ina marë' noya cancantërahuë. <sup>15</sup> Na'aquëma' aporintëranquëma' naporini, "Paono aporintërincoi ina imaca'huaiso marë'," ichitomacohüë'. Co napotamacoso' nohuantërahuë'. <sup>16</sup> I'yan, Istipanasënta', sa'in, hui'ninpita, inapitarë chachin aporintërahuë. Inaíchin aporintërahuëso', topirahuë'. Co huachi a'na yonquirahuë'. <sup>17</sup> Nanamën a'china'huaso marë' Quisocristo acorinco. Co aporinta'huaso marë' acorincohuë'. A'chintohuatënuëmara, co na'con nitotoro'sa pochin nontëranquëmahuë'. Quisocristo corosëquë chiminin oshanënpoa' inquitinpoaso marë', tënahüë. Inaíchin nanitaparín nicha'ëinpoaso'. Napoaton inasáchin a'chinahuë. Nisha nisha a'chinahuë naporini, Quisocristo nianchitomahuë'. Inaíchin yonquihuatëhua', tëhuëchachin anoyacancantërinpoa'.



*Quisocristo chiníquën nanantaton, nicha'ërinpoaso'*

<sup>18</sup> A'chinpatëra, "Quisocristo corosëquë chiminin nicha'ëinpoaso marë'," itërahuë. A'naquën natanpachinara, tëhuapi. Naporinsopita chiminpachina', parisitomiatapi. Canpoaso nipirinhüë' noya natanëhua'. Nani Yosë anoyacancantërinpoa'. Yosëichin nanitaparín nicha'ëinpoaso'. <sup>19</sup> Quiricanën quëran itapon:

"A'naquënso' nani ma'sha nitotaponaraihuë', co noya yonquipihuë'. Inahuara cha'ëcaiso' yonquipirinhüë', co nanitapihuë'.

Nani ma'sha yonquiaponaraihuë', napoonin yonquiipi," tënín Yosë.

<sup>20</sup> A'naquën inahuara yonquinëna quëran nani ma'sha nitotopi. A'naquënta' ni-toa'chinapi. A'naquëonta' míso nonpi. Inapopirinhüë', ¿ma'ta' ina marë' canapi? Co manta' canapihuë'. "Co nanamëhuë' imatomahuë', napoonin yonquirama'," itërin Yosëri. <sup>21</sup> Ina nohuanton, piyapi inahuara yonquinëna quëran co nanitopihuë' Yosë nohuitacaiso'. Quisocristo chiminínso' a'chinárai. A'naquënso' ina natanpachinara, tëhuapi. Canpoaso nipirinhüë' natëhuatëhua', anoyacancantërinpoa'. Ina Yosë nohuantërin.

<sup>22</sup> Cotioro'saso' co yanatëtopihuë'. "Yosë pochín niquë'. Ina ni'patoí, natëarainquën," toconpi. Nisha piyapi'santa' co yanatëtopihuë'. Na'con na'con nitotacasaráchin yonquiipi. "Quiyaora yonquinëhuëi quëran nitotarai," topi. <sup>23</sup> Quiyaso nipirinhüë' Quisocristo nanamënáchin a'chinai: "Corosëquë canpoa marë' chiminin," tënai. Cotioro'saso' co natëtopihuë': "Inaso' Yosë hui'nin naporini, co chimiintonhuë'," toconpi. Nisha piyapiro'sarinta' co nohuantatonaraihuë', tëhuapi. <sup>24</sup> Canpoaso nipirinhüë' Yosë huayoninpoa' ni'ton, Quisocristo imarëhua'. Inaso' no'tëquën yonquirin. Ya'ipiya nitotaton, no'tëquën anitotërinpoa'. Inasáchin nanitaparín anoyacancantinpooaso', tënëhua'. Quiyanta' cotio piyapicoi nipiraihuë', canpitanta' nisha piyapinquëma' nipomarahuë', Yosë nohuanton, imarëhua'. <sup>25</sup> A'naquën Quisocristo nanamën tëhuapi. "Quiyaso' na'con na'con nitotërai," topirinhüë', Yosëso' noya noya yonquiaton, no'tëquën anitotërinpoa'. A'naquëonta' "Co inaso' chiníquën nanantërinhuë'," ta'tona', co natëtopirinhüë'. Yosëso' ya'ipi nanitapaton, anoyacancantërinpoa'. <sup>26</sup> Ni'co iyaro'sa'. Na'aquëma' co na'con nitotopiramahuë', Yosë huayoninquëma'. Co chiníquën nanantona'piro'sa pochín nipiramahuë', nohuantërinquëma'. Caraíchín ma'huanosaso' imasapi. <sup>27</sup> Yosë nohuanton, na'a topinan piyapi'sa' imasapi. A'naquënso' nipirinhüë' na'con nitotaponaraihuë' co imapihuë'. Chiníquën nanantopirinhüë', co Yosëri nicha'ërinhuë'. Inapita atapanacaso marë' Yosë nohuanton, na'a topinan piyapi'sa' imasapi. <sup>28</sup> Iporaso' a'naquën nocaninënpoa'. "Canpitaso' topinan piyapi'sanquëma'. Co manta' nitotëramahuë'. Napoonama'," itopirinhüë', Yosëso' nohuantërinpoa'. Inapitaso' chiníquën nanantaponaraihuë', co imapihuë' ni'ton, ya'ipi Yosëri ayatarin. <sup>29</sup> Co insonta' inaora cha'ëponhuë'. Yosë'pa' huanihuatëhua', co inquënpoa tëranta' nanitarihuahuë': "Caso' noyaco," ta'caso'. <sup>30</sup> Yosë nohuanton, Quisocristo imarëhua'. Imapatëhua', ya'coancantërinpoa' ni'ton, yonquínahuan pochín Yosë ni'ninpoa'. Naporahuaton, catahuarinpoa' no'tëquën yonquicaso'. Oshanënpoa' inquitohuachinpoa', noya huachi ni'ninpoa'. Nasha cancan quëtërinpoa' noya nicacaso marë'. Quisocristo chachín nicha'ërinpoa'. <sup>31</sup> " 'Ma noyacha Yosëso' ni'ton, anoyacancantërinpoa' paya,' nitahua'. 'Quiyaso' noya noyacoí, 'ama tocosohüë'," tënín Yosë quiricanënuë.

## 2

*Quisocristo nanamën sha'huirinso'*

<sup>1</sup> Canpitataquë pa'patëra, Yosë nanamën a'chintëranquëma'. Co iyaro'sa' míso nona'pi pochín nontëranquëmahuë'. Co na'con na'con nitotërinso pochín a'chintëranquëmahuë'.

<sup>2</sup> Co'huara pa'shatërapohüë', yonquirahuë. "Quisocristo naporinsoáchin a'chinarahuë. Corosëquë oshanënpoa marë' chiminínso' a'chínchi," ta'to, inaíchín sha'huitëranquëma'.

Inasáchin imacamaso marë'. <sup>3</sup> Canpitataquë ya'huasoco, co chiníquën cancantërahuë'. “Co caora nanitërahuë' noya a'china'huaso',” ta'to, naporahuë'. <sup>4</sup> Co na'con nito-tona'pi pochin nontëranquëmahuë'. Ispirito Santo chachin catahuarinco nanamën nóya a'china'huaso marë'. Inaso' ya'ipi nanitaparín. Natanpatama', “Yosë nanamën chachin a'chintërinpoa',” ta'toma', natërama'. <sup>5</sup> Napoaton co piyapi yonquirinso' imaramahuë'. “Yosëichin ya'ipi nanitaparín,” ta'toma', natërama'.

#### *Yosë anitotërinpoaso'*

<sup>6</sup> Napoaponahuë', chinoton pochin cancantopisopita a'chintohuatoí, ya'ipi Yosë yonquirinpoaso' a'chintërai. Co piyapi'sa' yonquipiso' a'chinaihuë'. Co hua'ano'sa' yonquipiso tëranta a'chinaihuë'. Inapitaso' inahuaara yonquipisoáchin yonquiatona', co Yosë pochin yonquipihuë' ni'ton, ta'huantapi. <sup>7</sup> Co inapita pochin a'chinaihuë'. Yosë yonquirinso chachin a'chinai. Iráca co'huara isoro'pa' ya'huëyátërasohuë', Yosë ninotonpoa', yonquirinpoa' anoyacancantínpoaso marë'. Anoyacancantohuachinpoa', inarë'quënpoa' ya'huëmiataríhua'. Iráca co insonta' nitotopirínahuë', iporaso huachi Yosë anitotërinpoa' ni'ton, a'chintërainquëma'. <sup>8</sup> Hua'ano'saso' co nitotopihuë'. Nitotopi naporini, co Quisocristo tëpa'ítonahuë'. Inaso' Yosë chachin. Noya noya nipirínhuë', tëpapi. <sup>9</sup> Napoaponahuë', Yosë quiricanënguë naporin: “Yosë nosorohuatëhua', noya noya catahuarinpoa'. Noya nininsopita nani tapatërinpoa'. Co inso tëranta' ina pochin ni'chinínhuë'. Co incari tëranta' natanínhuë'.

Yosë noya yonquirinpoaso', co insonta' inaora nitotërinhuë',” tënin quiricanënguë.

<sup>10</sup> Imarëhuasopitaso nipirínhuë', nitotërehua'. Yosë nohuanton, Ispirito Santo anitotërinpoa'. Ya'ipi Yosë yonquirinsopita Ispirito Santo nitotërin.

<sup>11</sup> Co insonta' piyapi yonquirinso' nitotërinhuë'. Ispiritonën tëhuëncinso nitotërin. Inapochachin Ispirito Santonta', Yosë ispiritonën ni'ton, yonquirinso chachin nitotërin. <sup>12</sup> Imarëhuasopitaso' co piyapi yonquipiso' imarëhuahuë'. Yosë nohuanton, Ispirito Santo ya'coancantërinpoa'. A'chintínpoaso marë' a'patimarinpoa'. Ya'coancantohuachinpoara, Yosë yonquirinpoaso' anitotërinpoa'. <sup>13</sup> Quiyanta' ina nitotatoí, a'napita a'chintarai. Co quiyaora yonquinëhuëi quëran a'chinaihuë'. Ispirito Santo ayonquirincoí noya a'china'huaiso marë'. Chinoton pochin cancantopisopita a'chintohuatoira, ma'sona tapon naporinsopita a'chintarai.

<sup>14</sup> A'naquënso nipirínhuë' piyapi yonquirinsoráchin nitotatona', co nohuantopihuë' Yosë nanamën natanacaiso' ni'ton, tëhuaconpi. Ispirito Santoráchin catahuarinpoa' natëtacaso'. Napoaton co imarinsopitasohuë' natanaponaraihuë', co nanitopihuë' no'tëquën yonquicaiso'. <sup>15</sup> Ispirito Santo catahuahuachinpoa', no'tëquën yonquiaríhua'. A'napitaso' co canpoa pochin yonquipihuë'. Co nitotatonaraihuë': “¿Onpoatomata' ina pochin yonquirama'?” itërinënpoa'. <sup>16</sup> Quiricanënguë naporin: “¡Co insonta' Yosë yonquirinso' nitotërinhuë'! ¡Co incari tëranta' nanitërinhuë' ina a'chintacaso'!” tënin. Canpoaso nipirínhuë' Quisocristo imapatëhua', yonquirinso chachin ayonquiarinpoa huachi.

## 3

#### *Inpriatoro'sa pochin nipiso'*

<sup>1</sup> Ya'ipi Yosë nanamën iyaro'sa' yaa'chintopiranquëmahuë', co ipora nanitërahuë'. Ispirito Santo cancanëma quëran huarë' natërama' naporini, na'con a'chinchitënguëmahuë'. Co noyahuë' yonquiramasopita co nanianchátëramahuë'. Quisocristo imapiramahuë', hua'huishin pochin cancantërama'. <sup>2</sup> Ni'co'. Hua'huishin sho'shoíchin nanpitërin. Co coshachatërarínhuë'. Inapochachin canpitato' ninama'. Ya'nan a'chintaponquëma', pi'pian a'chintëranquëma'. Aquëtë' yaa'chintopiranquëmahuë', co nanichátëramahuë' no'tëquën yonquicamaso'.

Iporahuanta' co nanitëramahuë'. <sup>3</sup> Co noyahuë' yonquiramasopita co nani-anchátëramahuë'. Canpita capini ninoyapatoma', nino'huirama'. ¿Onpoatonta' canpitaora nohuantëramasoachin yonquiconama'? Nisha nisha yonquiatoma', co imapisopitahuë pochin cancantërama'. <sup>4</sup> “Paono imarai quiyaso',” tënama' a'naquëma'. “Quiyaso' Aporosë imarai,” tënama' a'naquëmanta'. Ina pochin nonatoma', co imapisopitahuë pochin yonquirama'.

<sup>5</sup> Co ca imamacoso' ya'huërinhuë'. Aporosënta' co imacaiso' ya'huërinhuë'. Quiyanta' topinan piyapicoi nipiraihuë', Yosë sha'huitërincoi ni'ton, a'chintërainquëma'. Natanpatama', Yosë imasarama'. <sup>6</sup> Ni'co'. Iminpatëra, a'naso' sha'tërin. Ina quëran a'nanta' pacarapiton, i'shaquë oporapitërin noya papotacaso marë'. Nipirinhüë', Yosëriíchin apapotërin. Inapochachin carinquëma'ton a'chintëranquëma'. Ina quëran Aporosënta' a'chintantarinquëma'. A'chintopirainquëmahuë', Yosëso' anoyacancantërinquëma'. <sup>7</sup> Napoaton co ca imamacoso' ya'huërinhuë'. Aporosënta' co imacaiso' ya'huërinhuë'. Yosë anoyacancantërinquëma' ni'ton, inasáchin yonquicamaso' ya'huërin. <sup>8</sup> Sha'tërëso pochin carinquëma'ton a'chintëranquëma'. A'nari i'shaquë oporapitërinso pochin Aporosënta' a'chintantarinquëma'. Catocoi chachin Yosë inpriatonën pochin ninai. Inpriatoro'sa' sacatohuachinara, hua'anëni pahuërin. Onpopinsona sacatohuachinara, no'tëquën pahuërin. Inapochachin quiyaso' Yosë marë' sacatarai ni'ton, ina acanarincioi. <sup>9</sup> Quiyaso' Yosë a'parincioi ina marë' sacata'huaiso'. Canpitaso' nipirinhüë' Yosë sha'tërinso pochin ninama'. Naporahuaton, Quisocriso imarama' ni'ton, Yosë pëinën pochin ninama'.

<sup>10</sup> Natëricho quëran yapëihuatëra, acopo' ihuatahuatë', siminto acorë'. Ina'ton acorëso pochin carinquëma'ton a'chintëranquëma'. Yosë catahuarinco no'tëquën a'china'huaso'. Ina quëran a'napitanta' a'chintantarinënuquëma'. Napoaponahuë', a'naya a'naya noya yonquiaton pëirinso pochin a'napita noya a'chintacaso' ya'huërin. <sup>11</sup> Quisocrisoso' ina siminto pochin ninin. Yosë nohuanton, ya'huërin. Co a'na ya'huërinhuë'. Co ina imapatëhuahuë', co onporonta' Yosë nohuitarihuahuë'. <sup>12</sup> Siminto nani acohuachina, nisha nisha quëran pëipi. A'naquën oro, prata, inapita quëran pëipi. Nisha nisha na'piro'sa' pa'ton nininsopita quëran pëipi. A'naquënso nipirinhüë' nara, panpë, piquira, inapita quëran pëipi. <sup>13</sup> Tachiton nininso quëran pëipatëra, noya ninin, co huiquitërinhuë'. Nipirinhüë', nara, panpë, piquira inapita quëran pëipatëra, a'naroáchin huiquitërin. Inapochachin ayaro' tahuëri Yosë ya'ipinpoa' ninëhuasopita pën quëran tëniarin. Naporo' ya'ipi piyapi'sa' nitotapi. <sup>14</sup> Noya nipatëhua', tachiton quëran pëirinso pochin nisarëhua'. Inaso' co huiquitërinhuë' ni'ton, Yosë noya ni'sarinpoa'. A'napita catahuarëhua' noya imacaiso marë'. Napoaton inápaquë acanaarinpoa'. <sup>15</sup> A'naquënso nipirinhüë' Yosë imaponaraihuë', co ya'ipi cancanëna quëran imapihuë'. Co a'napita catahuapihuë' noya imacaiso marë'. Napoaton pëi' huiquitërinso pochin nisapi. Yosë'pa' paponaraihuë', co ina marë' sacatopihuë' ni'ton, inápaquë co manta' canaapihuë'.

<sup>16</sup> Yosë imapatëhua', ina pëinën pochin ninëhua'. Ispirito Santo ya'coancantohuachinpoa', cancanënpaquaë ya'huërarin. ¿Co ina nitotëramahuë' ti? <sup>17</sup> Canpitaso' Yosë pëinën pochin ninama' ni'ton, a'na piyapi atapicancanpachinquëma', Yosëri chiníquën ana'intarin. Yosë pëinënuquëso' noyasáchin nicacaso' ya'huërin.

<sup>18</sup> Ama inquëma tëranta' isoro'paráchin yonquiatoma', ninonpintocoso'huë'. “Caora noya noya nitotërahuë,” co ta'caso' ya'huërinhuë'. Ama ina pochin yonquicoso'huë'. “Caora co no'tëquën yonquirahuë'. Catahuaco Siniro noya yonqui'i,” topatama', Yosë catahuarinquëma' noya noya yonquicaso'. <sup>19</sup> Co imapisopitaso'huë' nani ma'sha nitotaponaraihuë': “Co no'tëquën yonquipihuë’,” tënin Yosë. Quiricanën quëran anitotërinpoa'. “Na'con nitotatona', piyapi'sa' nonpintopirinhüë', co nanitopihuë' Yosëso' nonpintacaiso'. Inari na'con na'con nitotaton, minsëarin,” tënin. <sup>20</sup> Yosëso' ya'ipi

nitotërin. “Piyapi'sa' na'con yonquipirinahuë', napoonin yonquipi,” ténin anta'. Quiricanën quëran naporin. <sup>21</sup> Napoaton ama piyapi'sa' pa'yatocosohuë'. “Paso' quëmapi noya noya a'chintërincoi,” ama tocosohuë'. Yosëichin pa'yatacaso' ya'huërin. Inari ya'ipi acorin canpita marë'. <sup>22</sup> Ina nohuanton, carinquëma' a'chintëranquëma'. Aporosë, Pitro, inapitanta' Yosëri a'parin a'chintinquëmaso marë'. Nani ma'sha isoro'paquë quëtërinpoa' noya ya'huëcaso marë'. Anoyacancantërinpoa' Yosë nohuitatëhua' noya noya nanpicaso marë'. Chiminpatëhua', ya'huërin'pa' noya noya ya'huëcontarihua'. Ipora tahuëri'sa' noya catahuarinpoa'. O'mantacaso' tahuërinta' co naniantarinpoahuë'. Noyasáchin yonquirinpoa'. <sup>23</sup> Quisocriso anoyacancantërinpoa' ni'ton, inasáchin imacaso' ya'huërin. Inaso' hua'anëntërinpoa'. Tata Yosëri chachin a'paimarin.

## 4

### *Yosë marë' sacatëraiso'*

<sup>1</sup> Hua'qui' piyapi'sa' co Yosë nanamën nitotopihuë' ni'ton, Yosë a'parincoi nanamën a'china'huaiso marë'. Quisocriso inpriatonën pochin ninai. Ina yonquico'. <sup>2</sup> Inpriatonpo' nipatëra, hua'anënpa' no'tëquën natëcaso' ya'huërin. Inapochachin Yosë hua'anëntërincoi ni'ton, inasáchin natëcaso' ya'huërin. <sup>3</sup> Napoaton sha'huirapihuatamaco, co ina yonquirahuë'. Piyapi yonquirincoso' co yonquirahuë'. Co caora tëranta' nisha'huirapica'huaso' yonquirahuë'. <sup>4</sup> Noya mini natërahuë', topirahuë', co caso' Yosë pochin nitotërahuë'. “Noyaco,” ténahuëso marë' co Yosë noya ni'sarincohuë'. Inaichin ya'ipi nitotaton, no'tëquën sha'huitarinpoa'. <sup>5</sup> Napoaton iporaso' ama nisha'huirapiahuasohuë'. A'na tahuëri Siniro o'mantahuachin, ya'ipi piyapinpoa' tënariinpoa'. Ya'ipi ninëhuasopita anitotarínpoa'. Po'oana quëran ninëhuasopitanta' a'ninquëchin sha'huitarinpoa'. Yonquirëhuasopitanta' nitotërin. Ma'marësona tëranta' naporëhuaso' anitotarínpoa'. Naporo' ya'ipinpoa' no'tëquën nontarinpoa'. Noya nipatëhua', noya ni'sarinpoa'.

<sup>6</sup> A'chintohuatëinquëmara iyaro'sa', Yosëichin yonquirai. Aporosëre'coi a'chintërainquëmaso' ninshitëranquëma' canpitanta' quiya pochin yonquicamaso marë'. Yosë quiricanënachin natëcaso' ya'huërin. A'na quëmapi noya noya a'chintohuachinquëma', ama inasáchin pa'yatocosohuë'. <sup>7</sup> Yosë nohuanton, nisha nisha nitotërehua'. Co canpoara nohuanton, nitotërehuahuë'. Yosëichin catahuarinpoa' noya noya nicacaso'. Co catahuarinpoahuë' naporini, co manta' nitochitërihuahuë'. Napoaton co nocantacaso' ya'huërinhuë'.

<sup>8</sup> Canpitaso' naporama': “Nani ya'ipi nitotërai. Co manta' pahuantërincoihuë' noya cancanta'huaiso marë'. Quiyaora noya nitotatoi, hua'an pochin chiniquën nanantërai,” topiramahuë'. ¡Tëhuëinchachin chiniquën nanantërama' naporini, quiyanta' isoro'paquë chachin chiniquën nananchitoihuë'! <sup>9</sup> Co ina tahuëri naniyatërarinhuë'. Yosë nohuanton, co piyapi'sa' noya ni'ninacoihuë'. Nanamën a'china'huaiso marë' a'papurincoihuë', na' piyapi'sa' co nohuantopihuë'. Apiro'sa pochin ni'ninacoi. Chimirin quihuitërinacoi. A'ninquëchin aparisitërinacoi ni'ton, anquëniro'santa' nicataona', pa'yanpi. <sup>10</sup> Quisocriso natëtoi, nanamën a'chinarai. Ina marë' quiyaso' tëhuarinacoi. Canpitaso nipirinhuë' noya nitotona'piro'sa pochin nicatënenquëma', co tëhuarinënuquëmahuë'. Quiyaso' co chiniquën nanantëraihuë'. Canpitaso nipirinhuë' chiniquën nanantërama'. Piyapi'sa' noya ni'pirinënuquëmahuë', quiyaso' co noyahuë' ni'ninacoi. <sup>11</sup> Iporahuanta' parisi-tarai. A'na tahuëri tana natanai. Yamororai. A'moca'huaisonta' pahuantërincoi. Ahuërinacoi. Pa'sápatoi, co huachi ya'huëmiatëraihuë'. <sup>12</sup> Chiniquën sacatatoi, canotërai. No'huipirinacoihuënta', noya nontërai. Aparisitohuachinacoiranta', co no'huiraihuë'. Ahuantërai. <sup>13</sup> Pinopachinacoiranta', sanoanan quëran nontërai. “Nanan anoyachi,” ta'toi, noya nontërai. No'huitonacoi, iporahuanta' co quë'yarinacoihuë'. Amoro pochin ni'ninacoi.



14 Co no'huiranquëmahuë'. Nosororanquëma'. Co nohuantërahuë' atapanahuanquëmaso'. Pënëna'huanquëmaso marë' ninshitaranquëma'. Hui'nahuëpita pochin nicatënquëma', napotaranquëma' noya yonquicamaso marë'. 15 Notohuaro' piyapi'sa' Quisocristo nanamën a'chintopirinënquëmahuë', carima'ton pënënanquëma' ni'ton, imarama'. Quisocristo nanamën sha'huitohuatënquëmara, natërama'. Napoaton tataparima pochin ni'co. 16 Ina pochin cancantatomaco, nonanco, tënahuë.

17 Ina marë' Timotio a'patëranquëma'. Inaso' noya ni'nahuë. A'chintohuatëra, Quisocristo imarin ni'ton, hui'nahuë pochin ni'nahuë. Nóya Sinioro imarin. Ya'ipi naporahuëso' ayonquiarinquëma' noya noya imacamaso marë'. Insëquësona pa'patëra, Quisocristo nanamënsáchin a'chinahuë. Imapisopita niyontonpachinara, a'chintërahuë. 18 A'naquëmaso nipirinhüë' nocanatomaco, "Quiyaso' Paono quëran na'con na'con nitotërai. Napoaton co huachi yahuë'ninhüë'," topiramahuë'. 19 Tëhuënchachin nicaponquëma' yapa'sarahuë. Yosë nohuanton, co hua'quiya quëranhuë' pa'sarahuë. Naporo' nocaninacosopita ni'sarahuë. Na'con nonpirinahuë', co nimara nanitapapihuë' Yosë marë' noya sacatacaiso'. 20 Co topinan quëran nonacaso' ya'huërinhuë'. Yosë hua'anëntohuachinpoa', piyapi'sa' catahuarëhua' noya noya imacaiso'. 21 Nosororanquëma' ni'ton, sanoanan quëran yapënënpiranquëmahuë'. Co Yosë natëhuatamahuë', pa'pato ana'inta'huanquëmaso' ya'huërin. Canconpato, ¿ma'cha onpochinquëma nicaya? tënahuë.

## 5

### *Quisocristo imaponahuë', oshahuaninso'*

1 A'naquënso' co noyahuë' nicaton, monshihuanin, topi natantërahuë. Inaso' pa'pin sa'in monshitërin. Inapoaton, pa'pi co noyahuë' ninin. Co imapisopitahuë' tëranta' co onporonta' ina pochin nipi huë'. 2 Canpitanta' nitotapomarahuë', co ina marë' tapanamahuë'. Ina oshanën yonquiatoma' sëtacamaso nipirinhüë', iporahuanta' "Quiyaso' nóya imarai," toconama'. Nani ocoicaso nipirinhüë', co ocoiramahuë'. 3 Co canpitataquë ya'huaporahuë', canpitataquë ya'huëarahuëso pochin cancantato, yonquiranquëma'. Ina quëmapi no'tëquën ana'intacaso' ya'huërin, tënahuë. 4-5 Quisocristo imarama' ni'ton, niyontonco'. Niyontonpatama', ca pochin cancantatoma', ina quëmapi chiniquën pënëncó'. "Sinioro Quisoso nanan quëtërincoi ni'ton, ama huachi Tata Yosë a'painquënsohuë', tënai. Sopai natëran ni'ton, parisitamaso' ya'huërin," itoco'. Inapotohuatama', a'na tahuëri yonquiapon nimara. "Co noyahuë' yonquirahuëso' nani-antato, Yosë imanta'i," tapon nimara. Napohuachin, Sinioro Quisoso o'mantahuachin, nicha'ësarín huachi.

6 Iporaso nipirinhüë' "Nóya imarai," topiramahuë', co ya'ipinquëma' noya nianamahuë'. Co no'tëquën yonquiramahuë'. Ni'co'. "Pan nipatëra, pi'pian ahuëpocatërinso' acohuachina, ya'ipi së'cotërin," topi. Nani ina nitotërama'. Inapochachin a'nayanquëma tëranta' co noyahuë' yonquihuatama', ya'ipinquëma' nitapicancanarama'. 7 Iráca Pascoa cosharo' ca'pachinara, co pi'pian tëranta' ahuëpocatërinso' nohuantopihuë'. Ya'ipiya të'yatopi. Pascoaquë carniroa'hua tëpapiso pochin Quisocristo nani chiminin canpoa marë'. Ina imarama' ni'ton, nasha cancan quëtërinquëma'. 8 Pascoa pita na'huasoí', ya'ipi ahuëpocatërinso' të'yatopi. Inapochachin canpoanta' ya'ipi co noyahuë' yonquirëhuasopita a'poatëhua', noyasáchin niahua'. Ama huachi co noyahuë' niahuasohüë'. Noyápiachin cancantatëhua', no'tëquënáchin yonquia'ahua'.

9 I'huanta' nani ninshitëranquëma'. "Ama monshihuaninsopitarë'quëma' nipayacoso-hüë'. Ama inapita noya ni'cosohüë'," itëranquëma'. 10 Na'a piyapi'sa' co Yosë imatonahuë', monshihuanpi, apirapi, ihuatopi, mamanshi moshapi, inapopi. Hua'huayatërahuë' piyapi ina pochin nipi ni'ton, inapitaso' nontacaso' ya'huërin. Co nontërehuahuë' naporini, co nanichitërihuahuë' isoro'paquë ya'huëcaso'. 11 A'naquënso nipirinhüë'.



“Canta' imarahuë,” taponahuë', monshihuanárin. A'nanta' apirarin. A'naquëonta' ipora huanta' mamanshi moshararin. A'napitanta' pinotapi, no'pirapi, ihuatapi, naporapi. Napoaponaraihuë': “Quiyanta' imarai,” topi. Ama inapitarë'quëma' nipayacosohuë'. Yosë nonpintapi ni'ton, ama inapitarë'quëma' coshatocosohuë'. <sup>12-13</sup> Co Yosë imapiso-pitasohuë' co canpoari ana'intacaso' ya'huërinhuë'. Tananpita'hua' Yosëri ana'inchin. Imarëhua capinisö nipirinhüë' nipënëahuan' noya yonquicaso marë'. Co noyahuë' nina'pi, niyontonama quëran ocoico', ténahuë'.

## 6

### *Imarëhuasopita capini nanan anoyatacaso' ya'huërinso'*

<sup>1</sup> Canpita capini nanan ya'huëhuachin, ama nino'huicosohuë'. Ma'sha nionpotohuata-mara, ¿onpoatomata' coisëquë niquëparama'? Co inaso' imarinhuë'. Quisocriso imarama' ni'ton, niyontonpatama', no'tëquën pënëncö' nanan anoyachina'. <sup>2</sup> A'na tahuëri Quisocriso o'mahuachin, imarëhuasopita acoarinpoa' inarë'quënpoa' hua'anëntacaso marë'. Coisë pochin nicatëhua', ya'ipi piyapi'sa' no'tëquën sha'huitarihua'. Nani ina nitotërama'. Ina nitotatoma', ipora nanan ya'huëhuachin, anoyatacaso ya'huërin. <sup>3</sup> Ayaro' tahuëri anquëniro'santa' hua'anëntatëhua', coisë pochin no'tëquën sha'huitarihua'. Nani inanta' nitotërama'. ¡Nanan isëquë co onpopinchin sacaihuë' anoyatacaso'! <sup>4</sup> Napoaton nanan ya'huëhuachina, co coisëquë nisha'huirapicamaso ya'huërinhuë'. Co inaso' Yosë imana'pihuë' ni'ton, co canpoa pochin no'tëquën yonquirinhüë'. <sup>5</sup> Tapanacamaso marë' pënënaranguëma'. ¿Co a'naya tëranta' niyontonamaquë noya yonquina'pi ya'huërinhuë' ti? ¡Ya'huërin mini, ténahuë! Nanan ya'huëhuachin, inari anoyachin. <sup>6</sup> Canpitaso nipirinhüë' imaramaso capini nipinotoma', nisha'huirapirama'. Naporahuaton, coisëso' co Yosë natëpirinhüë', inaquë niquëpahuatamara, co noyahuë' ninama'.

<sup>7</sup> Nisha'huirapihuatamara, co imapisopitahuë pochin niconama'. Ma'sha onpotohuachinënquëma', ¿onpoatonta' co ahuantëramahuë'? Ma'shanëma' matohuachinënquëma', tananpitërama' naporini, noya noya niitomahuë'. <sup>8</sup> Canpitaso nipirinhüë' co noyahuë' cancantatoma', imaramasopita capini niihuarama'. Naporahuaton, ninonpinapitoma', nii'huëretërama'.

<sup>9</sup> Co noyahuë' nipisopita co Yosë hua'anëntërinquë ya'coanpihuë'. ¡Nani ina nitotërama' ipora! Ama ninonpintocosohuë'. A'naquën co Yosë natëtonahuë', monshihuanapi. Mamanshi moshapi. Sa'ina' ya'huëtopirinhüë', a'na sanapi së'huapi. Quëmapi capini nisë'huapi. Taparosachin yonquipi. Inapita pochin nipisopitaso', co Yosë'pa' pa'sapihuë'. <sup>10</sup> A'naquëonta' ma'sha ihuatopi, apirapi, no'pipi, pinotopi. A'naquën a'napita ahueatona', ma'shanëna' matopi. Ya'ipi co noyahuë' nipisopita co Yosë hua'anëntërinquë ya'coanpihuë'. <sup>11</sup> Iráca a'naquëma' ina pochin nipiramahuë'. Siniro Quisocriso imapatamara, oshanëma' inquitërinquëma'. Nani anoyacancantërinquëma' ni'ton, Yosë noya ni'ninquëma'. Ispirito Santo chachin catahuarinquëma' noya cancantacaso'.

### *Ma'marësona nonënpoa' Yosë acotërinpoaso'*

<sup>12</sup> “Ma'sona tëranta' yanipatëhua', noya nicacaso',” topi a'naquën. Napoaponahuë', co ya'ipi ninëhuasopita catahuarinhüë' noya cancantacaso marë'. Napoaton ma'sona tëranta' anishacancantohuachinco, co nisarahuë'. Ano'quihuachinco. <sup>13</sup> A'naquën napopi: “Cosharo' ya'huërin anpopitë marë'. Anpopitënta' ya'huërin coshoro marë',” topi. Inaso nipirinhüë', a'na tahuëri Yosë nohuanton, coshoro', anpopitë', inapita ta'huantarín. Ni'ton, co coshatërehuaso marë' oshahuanëhuahuë'. Napoaponahuë', monshihuanacaso' pa'pi co noyahuë'. Co Yosë nohuantërinhuë' monshihuanacaso'. Co ina marë' nonënpoa' acotërinpoahuë'. Siniro natëcaso marë' acotërinpoa'. Nonënponta' nicha'ërin. <sup>14</sup> Yosë nohuanton, Siniro Quisoso nanpiantarin. Inari chachin chiniquën nanantaton, nonënpoa' ananpitaantarinhüë'.

<sup>15</sup> Quisocristo imapatèhua', ina nonèn pochin ninèhua'. Nani ina nitotèrama'. Ina nitotapomarahuè', ¿noya ipora monshihuana'pi monshitacaso' to? ¡Co onporonta'!

<sup>16</sup> Yosè quiricanènquè naporin: “Quèmapiri sanapi mapachina, cato' piyapi niponahuè', a'naíchin pochin Yosèri ni'nin,” ténin. Canpitaso' monshihuana'pi ichihuè'èpatama', ina pochin cancantarama'. Inapohuatama', co Quisocristo imamiataramahuè'.

<sup>17</sup> Quisocristoíchin imapatèhua', ina pochin cancantarèhua'.

<sup>18</sup> Napoaton ama pi'pisha tèranta' monshihuancosohuè'. Ihuatacaso', no'picaso', inapita nicacaso' co noyahuè', nipirinhue', co atapicancaninpoahuè'. Monshihuanpatama', nitapicancanarama'. Nonèmanta' tapiarama'. <sup>19</sup> Quisocristo imapatèhua', Ispirito Santo ya'coancantèrinpoa'. Nani ina nitotèrama'. Yosè a'patimarinpoa' ni'ton, cancanènpoaquè chachin ya'huèrarin. Napoaton co huachi canpoara nohuantèrèhuasopita nicacaso' ya'huèrinhuè'. Yosè chachin hua'anèntèrinpoa'. <sup>20</sup> Quisocristo chiníquèn parisitaton, chiminin nicha'èinpoaso marè'. Nicha'èrinpoa' ni'ton, ya'ipi nonènpoa quèran huarè' hua'anèntinpoaso' ya'huèrin. Napoaton noyasáchin nico' a'napitanta' nicatènènquèma' Yosè chinochina'.

## 7

### *Yasa'arinsopita pènèinso'*

<sup>1</sup> I'hua chachin ninshitatomaco, nisha nisha natanamaco ni'ton, sha'huichinquèma'. Quèmapi co yasa'apachinhue', noya inaora ya'huècaso', ténahuè. <sup>2</sup> Napoaponahuè', na'a piyapi'sa' monshihuanapi ni'ton, na'con na'con quèmapi'sa' sa'aina'. Ama monshihuanacaiso marèhuè' sa'aina'. Quèmapi'sa' sa'inaráchin yonqui'ina'. Inapochachin sanapi'santa' so'ináchin yonqui'ina'. <sup>3</sup> Quèmapi'sa' sa'ina' noya nosoroatona', ichihuè'èina'. Inapochachin sanapi'santa' so'ina' nosoroatona', huè'èpaina'. <sup>4</sup> Sanapi nani so'yahuachina, co inaora nohuantèrinso' yonquicaso' ya'huèrinhuè'. So'in nohuantèrinsonta' yonquicaso' ya'huèrin. Quèmapinta' co inaora nohuantèrinso' yonquicaso' ya'huèrinhuè'. Sa'in nohuantèrinsonta' yonquicaso' ya'huèrin. <sup>5</sup> Ama nia'po'inasohuè', niichihuè'èina'. A'na tahuèriso nipirinhue' quèmapi sa'inè chachin inahuara yonquinèna quèran nohuantohuachina', na'con na'con Yosè nontacaiso marè' nisha huè'èina'. Ina quèran naquèranchin nihuè'èpanta'ina' ama nisha yonquicaiso marèhuè'. Ama hua'qui' nisha huè'ècosohuè', Satanase minsèchinquèma'.

<sup>6</sup> Napoaton yasa'apatama', sa'aco', ténahuè. Co yasa'apatamahuè', noyatapon. Co Yosè ina pochin camaipirinpoahuè', ayonquirinco ni'ton, sha'huitaranquèma'. <sup>7</sup> Caso nipirinhue' co sa'ahuancohuè'. Co manta' sanapi sè'huarahue'. Yosè catahuarinco ahuanta'huaso'. Pa'sápato, a'chinárahue. Na'a quèmapi'sa' ca pochin nipi naporini, noya niitonahuè', topirahuè'. Co ya'ipi nanitopihuè' ca pochin nicacaiso'. Yosè catahuarinpoa' nisha nisha nicacaso'. A'naquèn ina nohuanton, sa'arin. A'naquènso nipirinhue' ina nohuanton, noya inaora ya'huèrin.

<sup>8</sup> Co yasa'apatamahuè', noya nisarama'. Inapochachin quèyorono'sa' co yaso'yantahuachinahuè', noya nisapi. Canta' caora ya'huarahue. <sup>9</sup> Napoaponahuè', sanapi nohuantohuatama', maco'. Noya sa'acaso'. A'naquèn co sa'apachinahuè', nisha nisha yonquipi. Sanapi sè'huacaisoachin nohuantopi. Ina pochin cancantohuachina', sa'aina'. Ina noya, ténahuè.

<sup>10</sup> Nani sanapi mapatama', inarè'quémáchin ya'huèco', ténahuè. Co casáchin naporahuè'. Quisocristo sha'huitèrinpoa' ni'ton, natècaso' ya'huèrin. Sanapi'santa' so'yahuachina', so'ina' chinpitomiatacaso' ya'huèrin. <sup>11</sup> Nipirinhue', co chinpitoahuachinhue', ama huachi a'na quèmapi so'yachinsohue'. So'in chachin chinpitantahuachin, noya nisarin. Quèmapi'santa' sa'apachina', ama sa'ina' tè'yachinasohue'.

<sup>12</sup> Isonta' pènèntaranquèma'. Quisocristo isoro'paquè nipon, co napopirinhue', noya pènèntaranquèma', ténahuè. A'naquèma' co'huara Quisocristo imashatèrapomahuè',

sa'arama'. Iporaso' imapiramahuë', sa'amaso' co yaimarinhuë'. Noya yacapahuachinquëma', ama të'yatocosohuë'. <sup>13</sup> Canpitanta', imoyaro'sa', a'naquëma' imapomarahuë', co so'yamaso' yaimarinhuë'. Co yatë'yatohuachinquëmahuë', ama ta'anapicosohuë'. Noya yacahuatoma', chinpitoco'. <sup>14</sup> A'naíchin imaponahuë', noya ichiya'huë'in. Sa'in imapachina, so'ionta' Yosëri noya yonquiarin. Oshaquëran imapon nimara. Inapochachin quëmapi imana'pi nipachina, sa'ionta' Yosëri noya yonquiarin. Hui'ninpitanta' noya yonquiarin. Co ichiya'huëhuachinhuë', hui'ninpita co onporonta' Yosë imaponahuë' nimara. <sup>15</sup> Nichinpitacaso' noya noya nipirinhüë', quëmapihuë' nipon, co imatonhuë' yapa'pachin, noya pa'in. Sanapinta' co imatonhuë' yapa'pachin, noya inanta' pa'in. "Noya nini'toma', ya'huëco'," itërinpoa' Yosë. <sup>16</sup> Sanapi noya imaponahuë', so'inso' co onporonta' imaponhuë' nimara. Quëmapi' noya imaponahuë', sa'inso' co imaponhuë' nimara. Co nitotërhuaahuë'.

<sup>17</sup> Yosë nohuanton, nisha nisha ninëhua'. Co napopináchin ninëhuaahuë'. Onpopinsona nicasëhua' Yosë imapatëhua', inachachin niahua'. Ya'huërhëhuaquë chachin sano yonquiatëhua', imahua'. Paato, ya'ipi imapisopita inachachin pënënarahuë. <sup>18</sup> A'naquëma' co'huara imashatërapomahuë', marca acotërinënuquëma'. Quisocriso imapatama', ama ina marë' tapancosohuë'. Naporahuaton, co marca ya'huëtohuachinquëmahuë', ama niacotocosohuë'. <sup>19</sup> Co marca yonquicaso' ya'huërinhuë'. Yosë natëcasorachin yonquico'. <sup>20</sup> Ya'nan Quisoso imapatama', onpopinsona nicasëma' imapatama', inachachin nisáco'. Ama a'na' a'na' pochin yonquicosohuë'. <sup>21</sup> A'naquëma' patron marërachin sacatohuatama', ama ina marë' sëtocosohuë'. Nipirinhüë' nanitohuatama', pipimiatatoma', canpitaora marë' sacatoco'. <sup>22</sup> Patron marë' sacatapomarahuë', Yosë huayonpachinquëma', oshanëma' inquitatënuquëma', nicha'ërinquëma'. Ina yonquiatoma', co huachi sëtacaso' ya'huërinhuë'. Inapochachin a'naquëma' co patron asacatopirinquëmahuë'. Yosë nicha'ërinquëma' ni'ton, ina na'con na'con natëcamaso' ya'huërin. Yosë piyapinënpita ninama'. <sup>23</sup> Quisocriso chiminatón, nicha'ërinquëma'. Inasáchin natëtoma', yonquico'. Ama piyapi'sa marëáchin sacatatoma', Yosë naniantocosohuë'. <sup>24</sup> Napoaton iyaro'sa' ya'nan imapatama', onpopinsona nicasëma' imaramaso chachin nisáco'. Yosë ni'sarinquëma'.

<sup>25</sup> Iporaso' co sa'arinsopitahuë', co so'yarinsopitahuë', inapita ma'sona onpocaso' sha'huichinquëma'. Quisocriso isoro'paquë nipon, co ina a'chinpirinhüë', catahuarincó no'tëquën pënëna'huaso'. Nosoroatonco, acorincó nanamën a'china'huaso marë'. Napoaton nanitërama' natëamacoso', tënahüë. <sup>26</sup> Ipora tahuëri'sa' sacai' imacaso', na'con aparisitarinënpoa'. Napoaton onporamasona ya'huapoma', inachachin ya'huëco'. <sup>27</sup> Sa'ahuanpatama', ama të'yatocosohuë'. Co sa'ahuanpatamahuë', noya canpitaora ya'huëco'. <sup>28</sup> Napoaponahuë', sanapi nohuantohuatama', maco'. Noya sa'acaso'. Inapochachin nano'santa' yaso'yahuachina', noya nisapi. Co ina marë' oshahuanapihuë'. Nipirinhüë', sa'ahuano'sa', so'yahuano'sa' inapitaso' saca sacai' ya'huapona'. Co nohuantërahuë' canpitaso' ina pochin nicacamaso'.

<sup>29</sup> Ni'co', iyaro'sa'. Yosë nohuanton, co hua'qui' isoro'paquë ya'huarihuahuë'. Napoaton sa'ahuanpatama', ama sa'amachin yonquicosohuë'. Yosë na'con na'con yonquico'. <sup>30</sup> A'na tahuëri sëtapomarahuë', ama sëtacamasorachin yonquicosohuë'. Yosë yonquiatoma', noya cancantoco'. A'na tahuërinta' capa cancantapomarahuë', ama inasáchin yonquicosohuë'. Ma'sha pa'anacasonta' ya'huëtopirinquëmahuë', ama inasáchin yonquicosohuë'. <sup>31</sup> Ya'ipi ma'sha isoro'paquë ya'huërinso'pita a'na tahuëri ta'huantarín. Napoaton ma'sha ya'huëtopirinquëmahuë', ama inapita na'con na'con yonquicosohuë'.

<sup>32</sup> Nani ma'sha yonquihuatëra, sacai' Yosë marë' sacatacaso'. Co nohuantërahuë' canpitaso' nisha nisha yonquiatoma', napion cancantamaso'. Quëmapi co sa'in ya'huëtohuachinhuë', co nani ma'sha yonquicaso' ya'huërinhuë'. Nanitërin Sinioroáchin yonquicaso'. <sup>33</sup> Sa'ahuano'saso nipirinhüë' nani ma'sha yonquicaiso' ya'huërin.

Sa'ina' noya ya'huëcaiso marë' na'con yonquiapi. <sup>34</sup> Co nanitopihuë' Yosëáchin yonquicaiso'. Inapochachin sanapi'santa' co so'yahuachinahuë', nanitopi ya'ipi cancanëna quëran Yosëíchin yonquicaiso'. Inasáchin yonquihuachina', na'con Yosë marë' sacatapi. So'yahuano'saso nipirinhüë', na'con ma'sha yonquicaiso' ya'huërin. So'ina', hua'huinpita, inapita noya nocomacaiso' ya'huërin.

<sup>35</sup> Ina pochin a'chintëranquëma' yonquicamaso marë'. Co caso' camairanquëmahüë'. Noya yonquico' Yosë nohuantërinso' ayonqui'inquëma'. Noyasáchin nicacaso' ya'huërin. Yosë na'con na'con yonquiatoma', ina marë' sacatoco'.

<sup>36</sup> Hui'nama' nani nanontohuachin, quëmapiri nohuantohuachin, ama apiratosohüë'. Noya macacaso' nipachina', "Maquë'," itoco'. Noya so'yain. Co ina marë' oshahuaninhuë'. <sup>37</sup> Nipirinhüë', co quëtacaso' nohuantohuatamahüë', noya inanta'. Hui'naonta' co yaso'yahuachinhuë', quëma pëinënuë chachin ya'huë'in. Yaso'yahuachin, acoantoco'. <sup>38</sup> Nanon aso'yacaso' noya. Co'so' nohuantohuachinahuë', inanta' noya. Co so'yahuachinhuë', noya noya, topirahuë'.

<sup>39</sup> Sanapi so'yahuachin, so'in chinpitacaso' ya'huërin. Napoaponahuë', so'ini ayananpihuachin, yaso'yantahuachin, noya so'yanta'in. Yosë imana'pi so'yachin. <sup>40</sup> Co huachi so'yantahuachinhuë', noya inanta'. Noya noya cancantarin, topirahuë'. Ispirito Santo catahuarinco no'tëquën pënënta'huaso' ténahuë'.

## 8

### *Cosharo' mamanshi marë' acopiso'*

<sup>1</sup> A'naquën ma'sha tëparahuatona', nosha acopi mamanshi chinotacaiso marë'. "¿Noya ipora ina nosha pa'anatë' capacaso' ti?" itëramaco ni'ton, sha'huichinquëma'. Tëhuëenchachin iyaro'sa' co mamanshisó' nanpirinhüë', nitotërëhua'. Nani na'con nitotarihuarahüë', co a'napita nosorohuatëhuahuë', topinan quëran nitotatëhua', ninocanarihua'. Nipirinhüë', piyapi nosorohuatëhua', catahuarëhua' noya noya Yosë imacaiso marë'. <sup>2</sup> A'naquënso': "Ya'ipi nitotërai" topirinahuë', na'con pahuantarin no'tëquën yonquicaiso'. <sup>3</sup> Napoaponahuë', Yosë nosorohuatëhua', ina pochin cancantarihua'. Ina quëran Yosë nohuitatonpoa', noya ni'sarinpoa'.

<sup>4</sup> Nosha mamanshi chinotacaiso marë' acopiso' a'chinchinquëma' nitotoco'. Co mamanshi nanpirinhüë'. Co ina chinotacaso' ya'huërinhuë'. Tata Yosëíchin chinotacaso' ya'huërin, tënëhua'. <sup>5</sup> A'naquënso' nipirinhüë' nisha nisha ma'sha isoro'paquë ya'huërinso'pita moshapi. Inápaquë ya'huërinso'pita moshapi. Nisha nisha ya'huërin, "yosë" ta'tona', moshapi. "Inapita natëcaso' ya'huërin," topi. <sup>6</sup> Canpoaso' nipirinhüë' Tata Yosëíchin chinotërëhua'. Ya'ipi ma'sha ninin. Ina marë' acorinpoa'. Quisocristoíchin hua'anëntërinpoa'. Ina nininpoa'. Nani nicha'ërinpoa' ina nohuitatëhua' nancapicaso marë'.

<sup>7</sup> Napoaponahuë', a'naquënso' co ina nitochátërapihuë'. Iráca mamanshi chinotopirinahuë', Quisocristo imapachinara, mamanshi a'popi. A'popirinahuë', ipora huanta' co cancanëna quëran natëyátërapihuë'. "Nosha mamanshi marë' tëpapiso' ca'patëhua', mamanshi chachin chinotarëhua'," taponaraihuë' ca'pachina': "Oshahuanëhua'," ta'tona', co huachi noyápiachin cancantopihuë'. <sup>8</sup> Tëhuëenchachin ca'patëhua', co ina marë' oshahuanëhuahuë'. A'pohuatëhua', co ina marë' Yosë noya noya ni'ninpoahuë'. Co inaso' coshoro' yonquirinhüë'. Cancanënpoa quëran noya yonquicaso' na'con na'con nohuantërin. <sup>9</sup> Nipirinhüë', ya'ipi nosha ca'patama', ni'cona a'napita anishacancantotama'. A'naquën imasapirinahuë', co Quisocristoíchin natëyátërapihuë'. Nisha nisha tē'huatapi. <sup>10</sup> "Ya'ipi nosha noya capacaso'," ta'toma', noya ca'nama'. A'na tahuëriso' nipirinhüë' mamanshi moshapiso' pëiquë pa'patama', inaquë coshatarama'. Inaquë coshatasëma', tē'huatona'pi nicatënuëma': "Mamanshi marë' acopiso' noya capacaso'," tapon nimara. Ina quëran: "Canta' nipachin ca'i," ta'ton, ina nosha capon. Ina ca'pachin,



“Oshahuanahuë caso huachi,” ta'ton, co noyahuë' cancantarin. <sup>11</sup> Canpitaso' nitotatoma', noya capomarahuë', të'huatona'pi atapicancanarama'. Ina marënta' Quisocristo chiminin. <sup>12</sup> Të'huatona'pinta' imaponahuë', co ya'ipi cancanën quëran imarinhuë' ni'ton, nisha nisha të'huatarin. Nonanatënguëma', ca'pachin, co noyahuë' cancantapon. “Ma'cha onpo'iya. Co noyahuë' ninahuë,” tapon. Ina aoshahuanpatama', Quisocristonta' co noyahuë' ni'saringuëma'. Ina marë' canpitanta' oshahuanarama'. <sup>13</sup> Ya'ipi cosharo' noya capacaso nipirinhüë', a'na tahuëri nosha capasoco iyahuë niconco nishacancantohuachin, co huachi ina nosha ca'sarahüë'. Iyahuë nosoroato, co pi'pian tëranta' nohuantërahuë' anishacancanta'huaso'.

## 9

### *Quisocristori acorinsopita*

<sup>1</sup> Co inso piyapi tëranta' camairincohuë'. Quisocristo chachin acorinco nanamën a'china'huaso marë'. Inápaquë panantarinso' piquëran cari ni'nahuë. Ina catahuarincó a'china'huaso'. A'chintohuatënguëmara, canpitanta' imarama'. <sup>2</sup> “Co Quisocristo chachin acorinquënhüë’,” itërinaco a'naquën. Canpitaso nipirinhüë' co napotaramacohüë'. A'chintohuatënguëmara, Quisocristo imarama' ni'ton, acorincoso' nitotërama'.

<sup>3</sup> Nocanpachinacora, no'tëquën iso pochin sha'huitërahuë: <sup>4</sup> A'chintohuatënguëmara, a'camacoiso' ya'huërin. Yamorohuatoi, o'shitamacoisonta' ya'huërin. Nohuantërai naporini, noya ma'paitënguëmahuë'. <sup>5</sup> A'napita Quisocristori acorinsopitaso', sa'atona' sa'inarë' iratopi. Nanamën a'chinacaiso marë' pa'pachinara, sa'inë chachin pa'pi. Quisocristo iinpita, Pitro, inapitanta' inapopi. Nohuantërai naporini, quiyanta' Quisocristo imarinso' macatoi, inaro'coi chachin irachitohüë'. <sup>6</sup> Pirnapirë'co a'chintarainquëma' ni'ton, a'camacoiso' ya'huëpirinhüë'. Quiyaora sacatatoi, coshatërai. Ma'shanta' pahuantohuachincoira, quiyaoira pa'anai. A'napitaso' topinan ma'parinënguëma'. <sup>7</sup> Ni'co', iyaro'sa'. Sontaro ya'conpachinara, co cosharonën pa'anacaso' ya'huërinhuë'. Capacaso', a'mocaso', inapita topinan quëtopi. Inapochachin opa sha'pachina, hua'anëni inaora macaton, irorin. Co ina marë' pahuëretacaso' ya'huërinhuë'. Ohuica pë'tahuana'pinta' nohuantohuachina, ohuica sho'shoi' shi'shiaton, o'orin. <sup>8</sup> Co piyapi'saráchin ina pochin yonquipihüë'. Yosë quiricanënguënta' Moisésë naporin: <sup>9</sup> “Toro asacatohuatama', a'caco'. I'nataton to'norayahuachin, ama tonpoanantocohüë'. Tananpitoco' pi'pian pi'pian coshachin,” tënin iráca ninshitaton. Co toroáchin yonquiaton, Yosë naporinhüë'. <sup>10</sup> Canpoanta' yonquiatonpoa', quiricanënguë aninshitërin. Quëmapi iminpachina, co topinan sha'ninhüë'. “Nitohuachin, masarahüë,” ta'ton, sha'nin. Ina quëran sha'ninso' cayahuachina, manin. <sup>11</sup> Inapochachin quiyanta' Yosë nanamën a'chintërainquëma' noya noya cancantacamaso marë'. Ina marë' ma'sha pahuantohuachincoi, topinan quëtëramacoi naporini, noya niitonhuë'. <sup>12</sup> A'napitaso' a'chintohuachinquëmara, ma'sha topinan quëtërama'. Quiyaso' na'con na'con a'chintërainquëma' ni'ton, na'con na'con quëtamacoisó' ya'huëpirinhüë'.

Napoaponahuë', co manta' topinan ma'parainquëmahuë'. Ma'sha pahuantopirincóihuënta', ahuantërai. Piyapi'sa' noya noya Quisocristo nanamën natanacaiso marë' co manta' ma'patëraihuë'. A'chinahuë quëran canarahüë naporini, co onpopinchin noya ni'itonacoihuë' nimara, tënhüë. <sup>13</sup> Iráca a'naquën Yosë chinotopiso pëiquë sacatohuachinara, inaquë chachin coshatopi. Ma'sha Yosë chinotacaiso marë' tēpahuachinara, patoma ca'pi. Topinan quëtohuachinara, noya ca'pi. Nani ina nitotërama'. <sup>14</sup> Inapochachin Quisocristonta' sha'huitërinpoa'. “Nani tahuëri nani tahuëri Yosë nanamën a'chinpachina', natanpisopitari ma'sha quëchina' nanpicaíso marë’,” tënin. <sup>15</sup> Ina nipirinhüë', co manta' ma'paranquëmahuë'. Co ina marë' ninshitëranquëmahuë'. Co manta' nohuantërahuë'. Caora sacatato, a'chinarahuë. Ina marë' noya cancantërahuë.



A'chintëranquëmaso marë' pahuërëamacoso' ya'huërin naporini, chimina'huaso' noya noya niitonhuë'. Topinan nohuantato, a'chintaranquëma', ténahuë.

<sup>16</sup> A'naquën: “Yosë nanamën a'chinahuëso marë' caso' noya noyaco,” topi. Caso nipirinhüë' co caora nohuanto a'chinahuë'. Co ina marë' noya noyacoahuë'. Quisocriso acorinco nanamën a'china'huaso marë'. Co'so' a'chinpatohüë', jma'huantacha nisarahuë paya! <sup>17</sup> Caora nohuanto, a'chinahuë naporini, ina marë' canaitohüë'. Nipirinhüë', ina sha'huitërinco ni'ton, a'china'huaso' ya'huërin. <sup>18</sup> Napoaton nanamën a'chinpatëra, co manta' ina marë' ma'patërahuë'. Cosharo', ma'sha, inapita quëtinacoso' ya'huëpirinhüë', co manta' ma'patërahuë'. Topinan a'chinahuë. Ina marë' nóya cancantërahuë.

<sup>19</sup> Co insonta' pahuërërincohuë' ni'ton, co insonta' camaincoso' ya'huërinhuë'. Nipirinhüë', caora nohuanto, ya'ipi piyapi'sa' catahuarahuë. Na'con na'con piyapi'sari Quisocriso imacaiso marë' a'chinarahuë. <sup>20</sup> Cotioro'sa' a'chintohuatëra, inapita pochin ninahuë inapitanta' imacaiso marë'. Co Moisésë pënëntërinso' natëca'huaso' ya'huëtopirincóhuë', cotioro'sa pochin ninahuë natainacoso marë'. Inapitanta' Quisocriso natëcaiso' nohuantërahuë. <sup>21</sup> Nisha piyapi'saso' co Moisésë pënëntërinso' natëpihuë'. Napoaton inapita a'chintohuatëra, co ya'ipi Moisésë pënëntërinso' natërahuë'. Co ina natëpirahuë', Quisocriso natëto, noya ninahuë. Nisha piyapi'sarinta' imacaiso marë' Quisocriso nanamënáchin a'chintërahuë. <sup>22</sup> A'naquëonta' imaponahuë', co ya'ipi cancanëna quëran natëyátërapihuë'. Inapitanta' co nocanahuë'. “Caso' noya noya imarahuë,” co itërahuë'. Inapita pochin ninahuë natanatonaco, noya noya Quisocriso imacaiso marë'. Ya'ipi piyapi'sa' nosoroato, sanoanan quëran a'chintarahuë caraya tëranta' cha'ëcaiso marë'. <sup>23</sup> Ina pochin Yosë nanamën a'chinpató, na'con na'con piyapi'sari ina nohuitapi anta'. Ina marë' canta' noya cancantërahuë.

<sup>24</sup> Quëmapi'sa' nicanacaiso marë' ta'ahuachinara, a'naíchin canatërin. Nani ina nitotërama'. A'napitaso' co chiníquën ta'atonahuë', co canatopihuë'. Canpitanta' chiníquën ta'apiso pochin cancantatoma', na'con yonquico' noya noya cancantamaso marë'. <sup>25</sup> Quëmapi'sa' yanicanahuachinara, nani tahuëri ta'arápi noya noya no'quicaiso marë'. Ta'acaisoráchin yonquipi. Canatohuachinara, yancotë' huëron quëran nipiso' quëtopirinhüë', inaso' a'naroáchin ahuirin. Canpoaso nipirinhüë' noya nipatëhua', Yosë'pa' acanarinpoa'. Inatohua' co manta' mocsarinhuë'. <sup>26</sup> Caso' co nisha nisha yonquirahuë'. Noya ni'tatë' ta'arëso pochin Yosë natëca'huasoráchin yonquirahuë. Co topinan ya'huërahuë'. Co papinanquë ahuetëresó pochin ninahuë'. Yosë nohuantërinso'ráchin ninahuë. <sup>27</sup> Co noyahuë' yonquihuatëra, a'naroáchin naniantërahuë. Co nohuantërahuë' pi'pian tëranta' oshahuanaca'huaso'. Nohuantaso' Yosë marë' sacatarahuë. A'napita na'con pënënpirahuë', co caso' noya nipatohüë', co Yosë noya ni'sarincohuë', co acanaarincohuë', ténahuë.

## 10

### *Ama mamanshi moshacaiso marëhuë' pënëninso'*

<sup>1</sup> Iráca napopisopita iyaro'sa', yonquico'. Iráca cotio mashocoro'sa' Iquipito quëran pipirahuatona', Moisésë imapi. Yosë nohuanton, chitoro' ya'norin imacaiso marë'. Naporahuatona', Quëhuai' marë pëntonahuatona', ya'ipiya cha'ëpi. <sup>2</sup> Marë quëran cha'ërahuatona', Moisésë imapi. Chitoronta' quëchitërarin. (Inapochachin iporaso' Quisocriso natërehua' ni'ton, aporihuanatëhua', imarëhua'.) <sup>3</sup> Iráca inotëro parti pa'pachinara, Yosë nohuanton, nani tahuëri no'paquë cosharo' ya'nohuachina, ya'ipiya coshatopi. <sup>4</sup> Inaquëso' co i'sha ya'huëpirinhüë', Yosë nohuanton, na'pi quëran pipirin, ya'ipiya o'opi. Quisocrisoso' ina na'pi pochin ninin. Pa'pachinara, co quënanpirinhüë', inari na'con catahuarin cha'ëcaiso marë'. <sup>5</sup> Inapotopirinhüë', cotioro'saso' co noyahuë' cancantopi. Na'con na'con co natëpihuë' ni'ton, Yosëri co noyahuë' nicaton, ana'intërin. Ina nohuanton, inaquë chachin chiminpi.

<sup>6</sup> Pënëinpoaso marë' iráca ina ninshitërin. Inapitaso' co noyahuë' yonquipi. Nani ma'sha noyapatopi. Ama inapita nonahuansohuë'. <sup>7</sup> Inapitaso' mamanshi moshapi. “Moshatacaiso marë' pita nipi. Huënsërahuatona', coshatopi, o'opi. Ina quëran nansarahuatona', capa cancantopi,” tënin Yosë quiricanënguë. Canpitaso nipirinhüë' ama inapita pochin nicosohuë'. <sup>8</sup> Ina quëran a'napita monshihuanpi. Ina marë' Yosëri ana'intërin. Ina nohuanton, cato shonca cara huaranca piyapi'sa' chiminpi. A'na tahuëriíchin nipirinhüë', inanapo chiminpi. Ina yonquiatoma', ama manta' monshihuanacamaso' yonquicosohuë'. <sup>9</sup> Naporahuatona' Sinioronta tënipi: “Co nimara ana'intarinpoahuë',” ta'tona', co noyahuë' nipi. Ina marë' ya'huanatona', na'a chiminpi. <sup>10</sup> Ama Yosë no'huitëhua' tarëtahuasohuë'. “Co Yosë noya catahuarinpoahuë',” topi a'naquën. Napoaton Yosëri anquëni a'paimarin inapita tēpacaso marë'.

<sup>11</sup> Yosë nohuanton, iráca napopisopita quiricanënguë ninshitopi pënëinpoaso marë'. Inapita pochin nipatëhua', ana'intarinpoa' canpoanta'. Nani ana'intacaso' tahuëri naniriarin. <sup>12</sup> A'naya a'nayanquëma' ni'cona oshahuantama'. “Caso' noya piyapico. Co onporonta' Yosë a'poarahüë',” ama tocosohuë'. <sup>13</sup> Sopai ya'ipi piyapinpoa' sha'huitërinpoa' co noyahuë' nicacaso marë'. Yosëso nipirinhüë' catahuarinpoa'. A'naya a'nayanpoa' co nanitërehuasohuë' nitotaton, ni'sarinpoa'. “Tananpitëquë',” itohuachina, co sopai nanitërinhuë' aquëtë' tēniinpoaso'. Cancanënpoa quëran huarë' Yosë natëhuatëhua', co sopai minsëarinpoahuë'. Ma'sha onpopirëhuahuënta', Yosë ananitarinpoa' ahuantacaso'. Yosë chachin catahuarinpoa' sopai minsëcaso marë'.

<sup>14</sup> Napoaton iyaro'sa' ama pi'pisha tēranta' mamanshi moshacosohuë'. Nosororanquëma' ni'ton, pënënanranquëma'. <sup>15</sup> Canpitaso' nitoyonquirama'. Sha'huitëranquëmaso' yonquico' no'tëquën nitotacamaso marë'. <sup>16</sup> Niyontonpatëhuara, Quisocriso chiminso' yonquirëhua'. “Quiya marë' Sinioro huënainën pa'nin ni'ton, ‘Yosparinquën’ tēnai,” itatëhua', huënainën pochin nininso' o'orëhua'. Cancanënpoa quëran huarë' yonquiatëhua', o'opatëhua', huënainën napopináchin yonquirëhua'. Ina quëran cosharo' ina nonën pochin nininso' sē'panahuatëhua', ca'nëhua'. “Tëhuëchachin canpoa marë' Quisocriso nonën ohuanpi,” ta'tëhua', napopináchin yonquirëhua'. <sup>17</sup> Quisocriso yonquiatëhua', ina cosharo' ca'nëhua'. Na'aquënpoa' niriuhuarahuë', Quisocriso imarëhua' ni'ton, a'na huëntona pochin ninëhua'. Napopináchin yonquirëhua'.

<sup>18</sup> Israiro'sa' napopisonta' yonquico'. Ma'sha Yosë chinotacaso marë' tēparahuatona', ahuiquitopi. Pi'pian nosha acopiso' ca'pi. Yosë yonquiatona', coshatopi. Inapoatona', Yosë chinotopi. <sup>19</sup> Mamanshisó' co nanpirinhüë'. Co chinotacasohuë' nipirinhüë', a'naquëni moshapi. Ma'sha inapita chinotacaso marë' tēpahuachinara, topinan quëran napopirinahuë', co mamanshiri ni'ninhüë', co nataninhüë'. <sup>20</sup> Nisha piyapi'saso nipirinhüë' mamanshi moshacaiso marë' ma'sha tēpahuachinara, co Yosë yonquipi-hüë'. Sopairo'sa' yonquipi. Co caso' nohuantërahuë' canpitanta' sopairo'sa' yonquicamaso'. <sup>21</sup> A'naquën mamanshi moshacaiso marë' pita nipi. Sopairo'sa' yonquiatona', napopi. Sinioro yonquihuatama', co sopairo'sa' yonquicamaso' ya'huërinhuë'. Napoaton amatohuachinënguëma', ama pacosohuë'. Quisocriso chiminso' yonquiatoma', coshatërama', o'orama'. Napoaton ama sopairo'sa' yonquiatoma', coshatocosohuë', o'ocosohuë'.

<sup>22</sup> Sopairo'sa' yonquihuatama', Yosë a'pitatënguëma', no'huiaringuëma'. ¿Ina nohuantërama' ti? ¡Inaso' chini chiniquën nanantërin! Canpoaso' co ina pochin chiniquën nanantërehuahuë'.

### *A'napita nosorocaso' ya'huërinso'*

<sup>23</sup> “Ma'sona tēranta' yanipatëhua', noya nicacaso',” topi. Napoaponahuë', co ya'ipi ninëhuasopita catahuarinpoahuë' noya cancantacaso'. Tëhuëchachin ya'ipi noya nicacaso nipirinhüë', co ya'ipi catahuarinpoahuë' a'napita achinicanacaso'. <sup>24</sup> Napoaton

a'napitanta' noya noya imacaiso marë' catahuaco'. Canpitaora costaramaso' ama aquëtë' yonquicosohuë'. A'napita na'con na'con yonquico'.

<sup>25</sup> Nosha mircatoquë ya'huëhuachin, pa'anatoma', ca'co'. Ama manta' natantapomarahuë', ca'co'. “¿Mamanshi chinotopiso pëiquë ma'patëran?” ama itocosohuë'. Ama nisha nisha yonquiapomarahuë', ca'co'. <sup>26</sup> Tata Yosëri ya'ipiro'pa' ninin. Ya'ipi ma'sharo'santa' noya ninin.

<sup>27</sup> A'na tahuëri coshatapatarama'. Co imarinsohuë' amatohuachinquëma', nohuan-tohuatama' paco'. Nosha acotohuachinënuëma', “Mamanshi marë' acopiso' nimara,” ama tapomarahuë', ca'co'. <sup>28</sup> Nipirinhüë', a'na piyapi sha'huitohuachinquëma', “Iso nosha mamanshi chinotacaso marë' acopiso,” itohuachinquëma', ama ca'cosohuë'. Sha'huitërinquëmaso' nosoroatoma', ama ca'cosohuë'. <sup>29</sup> Ca'patama', co ina marë' os-hahuanaramahuë'. A'naquënso nipirinhüë' ni'pachinënuëma', nisha nisha yonquiamara. Ina nosoroatoma', ama ca'cosohuë'.

A'naquëmaso nipirinhüë', itaramaco: “¿Ma'marëta' a'napita yonquiato cosharo' a'poca'huaso' ya'huërin? <sup>30</sup> ‘Yosparinquën Sinioro,’ itahuato, noya caso' ca'nahuë. ¿On-poaonta' ina marë' co noyahuë' ni'ninaco?” topiramahuë'. <sup>31</sup> Ma'sona tëranta' nipatama', Yosë yonquiatoma', noya nico' a'napitanta' Yosë noya yonquicaiso marë'. Napoaton coshatohuatama', o'opatama', ma'sona tëranta' nipatama', ina yonquico'. <sup>32</sup> Ama insonta' anishacancantocosohuë'. Cotioro'sa', nisha piyapi'sa', Quisocriso imapisopita, ya'ipiya nosorocaso' ya'huërin. <sup>33</sup> Caso' ya'ipi piyapi'sa' yonquirahuë. Catahuarahuë noya Yosë imacaiso marë'. Co caora costarahuëso' yonquirahuë'. A'napitanta' ya-catahuarahuë inahuanta' Quisocristori anoyacancantacaso marë'.

## 11

<sup>1</sup> Caso' Quisocriso noya nonanahuë. Canpitanta' nonanatomaco, noya nico'.

### *Sanapi'sa' Yosë imapisopita*

<sup>2</sup> Ma noyanquëma' iyaro'sa' ni'ton, na'con yonquiramaco. Yosë nanamën a'chintohuatënuëmara, noya natëramaco. <sup>3</sup> Isonta' iyaro'sa' a'chinchinquëma' nitotoco'. Co insonta' inaora nohuanon ya'huërinhuë'. Tëhuënhachin natëcaso' ya'huërin, tënhuë. Sanapi'saso' so'ina' natëina'. Quëmapi'santa' Quisocriso natëina'. Quisocrisoso' Tata Yosë natërin. <sup>4</sup> Quëmapinpoa' niyontonëhuaquë Yosë nontohuatëhua', ama motënpoa' niimomototahuasohuë'. Niimomotohuatëhua', co Quisocriso natërehuahuë'. Inapochachin pënëntohuatëhua', ama niimomototahuasohuë'. <sup>5</sup> Canpitanta', imoyaro'sa', niyontonëhuaquë Yosë nontohuatama', so'yama' natëtoma', niimomototoco'. Yosë anitotërinquëmaso' sha'huihuatamanta', niimomototoco'. Co niimomototohuatamahuë', noyá niya'itopiso pochin ya'noarama'. Ina pochin nipatama', so'yama' atapanarama'. <sup>6</sup> Ni'co'. Sanapi'sa' co quëmapi'sa' pochin niya'itopihuë'. Ya'ipi noyá niya'itopi naporini, tapaintonahuë'. Napoaton imoyaro'sa' niimomototoco'. <sup>7</sup> Quëmapinpoaso' nipirinhüë' Yosë nontohuatëhua', ama motënpoa' niimomototahuasohuë'. Yosë nininpoa' ina pochin hua'anëntacaso marë'. Inasáchin, iyaro'sa', natëhuatëhua', nóya cancantarihua'. Ina marë' acorinpoa'. Inapochachin sanapi'santa' so'ina' noya natëhuachina', nóya cancantapi. <sup>8</sup> Quëmapi'ton Yosëri ninin. Ina quëran ahuë'ëtahuaton, a'na nininpitëraca' ocoitërin. Ina ocoitahuaton, ina quëran chachin sanapi ninin. <sup>9</sup> Quëmapi'ton ninin. Ina piquëran sanapi ninin so'in catahuacaso marë'. <sup>10</sup> Napoaton quëmapi'sa' chini chiniquën nanantopi. Sanapi'saso' so'ina' natëina'. Natëtona', motëna' niimomotochina'. Napohuachina', so'ina' natëpi ni'ton, anquëniro'sarinta' noya ni'sapi. <sup>11</sup> Napoaponahuë', Yosë napopináchin nosororinpoa'. Co quëmapi'saráchin nohuantërinhuë'. Sanapi'santa' nohuantërin. Quisocriso imapatëhua', napopináchin ni'ninpoa'. <sup>12</sup> Ya'ipinpoa' Yosë nininpoa'. Quëmapi'ton nisahuaton,

quëmapi nininpitën quëran sanapi ninin. Naporo quëran huarë' quëmapi poanta' sanapi'sa quëran nasitërehua'. Yosë nohuanton naporin.

<sup>13</sup> Iporaso' iyaro'sa', imoyaro'sa', cancanëma quëran yonquico' noya nicacamaso marë'. Niyontonpatama', ¿noya ipora sanapi'sa' co niimomototaponaraihuë' Yosë nontacaiso' to? <sup>14</sup> Ni'co'. Quëmapi poa' niya'itërehua'. Co ain a'pamacaso' nohuantërehuahuë'. <sup>15</sup> Sanapi'saso nipirihuë' ainën a'pamapi. A'pamahuachinara, noya ya'nopi. Yosëri naporopi ain quëtërin noyá niimomototacaiso marë'. <sup>16</sup> A'naquëma' nisha yonquihuatama', isoíchin sha'huitaranquëma': Quiyaso' co nisha nisha a'chinaihuë'. Ya'ipi parti imapisopitanta' inachintopi.

*Niyontonpachinara, a'naquën co noyahuë' nipiso'*

<sup>17</sup> Niyontonpatama' iyaro'sa', noya nicacaso' ya'huëpirinhuë', a'naquëma' co noyahuë' ninama'. Co ina marë' noya ni'nanquëmahuë'. Napoaton pënënanranquëma'. <sup>18</sup> Yosë chinotacaso marë' niyontonpatamara, a'na huënton a'na huënton nicatoma', nino'huirama', natantërahuë. No'tëquën sha'huitërinaco, topirahuë'. <sup>19</sup> Co ya'ipi cancanëma quëran imapatamahuë', nisha nisha yonquiamama'. Co napopináchin yonquiamamahuë'. Ina quëran Yosë cancanën manëhuasopita nohuitërinënpoa'. Co ya'ipinpoa' nisha nisha yonquirëhuahuë'. A'napitaso nipirihuë' co noya yonquiatonahuë', co no'tëquën imapihuë'. <sup>20</sup> Quisocriso yonquicaso marë' niyontonatoma', coshatapomarahuë', co tēhuënchachin chimininsó' yonquiamamahuë'. <sup>21</sup> A'naquëma' co ninosoroatomahuë', niapiratërama'. A'naroáchin canpitaora cosharonëma' ca'nama'. Co nipatomatëramahuë'. Inapotohuatamara, a'naquën tanapi. A'naquënso nipirihuë' na'con o'otona', no'pipi. Napoatoma', co nanitëramahuë' Quisocriso chimininsó' yonquiatoma' coshatacamaso'. <sup>22</sup> ¿Co'na pëinëma' ya'huëtërinquëmahuë' inaquë coshatamaso', o'ocamaso'? ¿Onpoatonta' corto pëiquë chachin pahuantërinso'pita atapanarama'? ¿Ma'ta' ina marë' ichinquëma'? Co ina marë' noya ni'nanquëmahuë'.

*Quisocriso chimininsó' yonquiatëhua', ca'nëhuaso'*  
(Mateo 26.26-29; Marcos 14.22-25; Lucas 22.14-20)

<sup>23</sup> Siniro sha'huitërinco chachin nani sha'huitëranquëma'. Iráca Cotasëri Quisocriso sha'huirapirin. Sontaro'sari yamapachinara, naporo' tashi' ca'tano'sanënpitarë' coshatopi. Cosharo' masahuaton, <sup>24</sup> “Yosparinquën Tata Yosë,” itahuaton, së'panin. Së'panahuaton, a'naya a'naya quëtërin. “Ca nonëhuë pochin iso'. Ca'co'. Canpita marë' chiminarahuë. Niyontonpatama', chiminahuëso' yonquiatomaco, pi'pian cosharo' ca'co',” itërin. <sup>25</sup> Nani coshatohuachinara, minëa'hua manin. “Huënainëhuë pochin iso'. Huënainëhuë pa'sarin ni'ton, nasha quëran canpitarë' Yosë anoyatërinso' sha'huichinquëma' imacamaso marë'. Chiminarahuë ni'ton, anoyacancantaranquëma'. Ca yonquiatomaco, o'oco'. Ipora quëran huarë' inapoatoma', yonquico,” itërin Quisosori. <sup>26</sup> Onporosona cosharo' ina nonën pochin nininsó' ca'patama', huënainën pochin nininsonta' o'opatama', Quisoso chimininsó' a'napita anitotarama'. Siniro o'mantaquë huarë' inapoarama'.

*Onpopinso Quisoso chimininsó' yonquicaso' ya'huërin*

<sup>27</sup> Ina marë' niyontonpatama', ama topinan quëran ca'cosohuë'. Ama nisha nisha yonquiatoma', o'ocosohuë'. Co Siniro nonën, huënainën inapita noya yonquihuatamahuë', oshahuanarama'. <sup>28</sup> Napoaton canpitaora yonquinëma quëran no'tëquën yonquico'. Pi'pisha tëranta' co noyahuë' yonquihuatama', naniantoco'. Noyapiachinsáchin cantatoma', ca'co', o'oco'. <sup>29</sup> Quisoso chimininsó' no'tëquën yonquicaso' ya'huërin. Topinan quëran ca'patama', topinan quëran o'opatama', na'con oshahuanarama'. Ina marë' Yosë ana'intarinquëma'. <sup>30</sup> Napoaton na'anquëma' caniorama'. A'naquëmanta' co chiniramahuë'. A'naquënso' ina marë' chiminin. <sup>31</sup> Ya'ipi cancanënpoa quëran huarë'



nitantiacaso' ya'huërin ni'ton, yonquia'ahua'. Co noyahuë' yonquirëhuasopita nanianto-huatëhua', co Yosë ana'intarinpoahuë'. <sup>32</sup> A'na tahuëri oshahuano'sa' ana'intomiatarin. Imarëhuasopitaso nipirinhüë', ipora chachin pi'pian ana'intarinpoa' noya noya yon-quicaso marë'. Ina quëran ayaro' tahuëri co ana'intomiatarinpoahuë'.

<sup>33</sup> Napoaton iyaro'sa' noyápiachin cancantatoma', Quisocristo chiminso' yon-quicaso marë' niyontonco'. Ina marë' niyontonpatama', ama a'naroáchin ca'cosohüë'. Nininaco'. Ya'ipi nanihatama', napopináchin ca'co'. <sup>34</sup> A'naquën tanahuachina', inahuara pëinënaquë coshachina'. Ina quëran noya niyontonpatama', co Yosë ana'intarinquëmahuë'. A'na tahuëri pa'sarahuë nicaponquëma'. Naporo' na'con na'con a'chinchinquëma'.

## 12

### *Ispirito Santo nisha nisha catahuarinpoaso'*

<sup>1</sup> Apira Ispirito Santo naporinso' iyaro'sa', a'chinchinquëma' no'tëquën nitotacamaso marë'. Ina tëhuënhachin catahuarinpoa' nohuantërinso' nicacaso'. A'naya a'nayanpoa' catahuarinpoa'.

<sup>2</sup> Iráca co Yosë natëyatërapomahuë', nisha nisha yonquiatoma', mamanshi mosharama'. Co nanpiton natanpirinquëmahuë', sopai nohuanton, inapita chinotërama'. <sup>3</sup> Iporahuanta' a'naquëni co noyahuë' yonquirapitona' Quisocristo no'huiipi. Inapitaso' co Ispirito Santo natëpihuë'. Ispirito Santo ya'coancantohuachinpoa', catahuarinpoa' Quisocristo natëcaso'. "Quisocristoíchin natërahuë. Inaso' hua'anëntërinco," tënëhua'. Ispirito Santo nohuanton, naporëhua'.

<sup>4</sup> Yosë acorinpoa' nisha nisha nitotacaso marë'. Ispirito Santo chachin catahuarinpoa' noya nicacaso'. <sup>5</sup> Siniro nohuanton, nisha nisha ninëhua' a'napita catahuacaso marë'. Nisha nisha nirihuarahuë', ya'ipinpoa' Siniro natërehua'. <sup>6</sup> A'naya a'nayanpoa' ananitërinpoa' nisha nisha nicacaso marë'. Ya'ipinpoa' Yosë chachin catahuarinpoa'. <sup>7</sup> Co canpoara nanitopirëhuahuë', Ispirito Santo ananitërinpoa' ma'sona ina nohuantërinso' nicacaso'. Catahuarinpoa' ni'ton, a'napitanta' catahuarigua' noya noya imacaiso marë'. <sup>8</sup> Ispirito Santo nohuanton, a'naquën noyá nitotërin pënëntacaso'. No'tëquën yonquiaton, pënëntarin. A'naquëonta' noya noya nitotaton, a'chinarin. <sup>9</sup> A'naquëonta' catahuarin chiníquën Yosë natëcaso marë'. "Yosë ya'ipiya nanitaparín," ta'ton ina nontërin. Nontohuachina, Yosëri na'con catahuarin. A'nanta' Ispirito Santori catahuarin cania'piro'sa' anoyatacaso marë'. <sup>10</sup> Ispirito Santo nohuanton, a'naquëonta' nanitërin sacai nininso' nicacaso'. A'naquën Yosë yonquirinso chachin cancanën quëran anitotërin a'napita sha'huitacaso marë'. A'naquëonta' Ispirito Santo nohuanton, macarisona catahuarinso' nitoninorin. Co Ispirito Santoachin yacatahuarinpoahuë'. Sopairinta' piyapi'sa' catahuarin nonpintinpoaso marë'. Napoaton a'napita pënënpachinpoa', ninocaso' ya'huërin. Nonpin nanan nipachina, sha'huitërinpoa' ama natëcaso marëhuë'. A'naquëonta' Ispirito Santo nohuanton, nisha nananquë nonpiso pochin nonpi. A'napitanta' catahuarin ma'sona nisha nananquë topiso' sha'huicaiso'. <sup>11</sup> Ya'ipi imarëhuasopita catahuarinpoa'. A'naíchin Ispirito Santo niponahuë', catahuarinpoa' nisha nisha nitotacaso'. Inaora nohuantërinso' ananitërinpoa'.

### *A'na huëntona pochin ninëhuaso'*

<sup>12</sup> Nonënpoa' a'naíchin nipirinhüë', nisha nisha ya'huëtërin. Ya'piranpoa', nantënpoa', imiranpoa', inapita ya'huëtërinpoa'. Inapochachin Quisocristo imarëhuasopita nisha nisha nirihuarahuë', a'na huëntoínchin ninëhua'. Nonën pochin Quisocristo ni'ninpoa'. <sup>13</sup> Ispirito Santo chachin Quisocristo huëntonënuquë aya'coninpoa'. Cotioro'sahuë nipon, nisha piyapi'sahuë nipon, napopináchin Yosë ni'ninpoa'. A'naquëma' canpitaora marë'



sacatërama'. A'naquëma' nani tahuëri patronëma' asacatërinënguëma'. Nisha nishanpoa' nipirihuahuë', Ispirito Santo catahuarinpoa'. Quisocriso imarëhua' ni'ton, huëntonënguë aya'coninpoa'. Aporintohuachinënpoara, a'na huëntoínchin ninëhua'. Ya'ipi imarëhuasopita Ispirito Santo ya'coancantërinpoa'.

<sup>14</sup> Nonënpoa' a'naíchin nipirihuë', nisha nisha ya'huëtërin. Nantënpoa', imiranpoa', ya'piranpoa', inapita pochin nininsopita ya'huëtërinpoa'. <sup>15</sup> Nantëhuë nontërinco naporini, "Caso' co imirancohuë'. Napoaton co nohuantancoso' ya'huërinhuë'," itërinco naporini, co no'tëquën nonchitoncohuë'. Nantëhuënta' nohuantërahuë'. <sup>16</sup> Huëratëhuënta' nontërinco naporini, "Caso' quëma huëratëncó. Co ya'pirancohuë'. Napoaton co nohuantancoso' ya'huërinhuë'," itërinco naporini, co no'tëquën nonchitoncohuë'. Huëratëhuënta' nohuantërahuë'. <sup>17</sup> Ya'piranpoáchin ya'huërin naporini, ¿ma quërantá' natanchitërihuahuë'? Huëratënpoáchin ya'huërin naporini, ¿ma quërantá' imëchitërihuahuë'? ténahuë. <sup>18</sup> Yosëso nipirihuë' nisha nisha acotërinpoa'. Ina nohuanton, imiranpoa', nantënpoa', ya'piranpoa', inapita ya'huëtërinpoa'. A'naya a'naya nohuantërinquë chachin acotërinpoa'. <sup>19</sup> A'naíchin ya'huëtërinpoa' naporini, co nonënpoa' inaichitonhuë'. Napoaton nisha nisha acotërinpoa'. <sup>20</sup> Nisha nisha ya'huëtopirinpoahuë', a'naíchin nonënpoa' ya'huërin.

<sup>21</sup> Isonta' yonquico'. Ya'pirari imira nocanin naporini, "Quëmaso' napoonan. Co nohuantëranquënhuë'," itërin naporini, co no'tëquën nonchitonhuë'. Motënpoanta' co nantënpoa' nocanacaso' ya'huërinhuë'. Ya'piranpoa', imiranpoa', motënpoa', nantënpoa', ya'ipi nohuantëréhua'. <sup>22</sup> Ni'co'. Ninopinënpoa', sa'poronënpoa', inapita pochin nininsopita co a'ninquëchin ya'noponahuë', na'con na'con nohuantëréhua' nanpicaso marë'. Inapitaso' noya noya ananpirinpoa'. Co inapita ya'huëtërinpoahuë' naporini, chimi-intërihuahuë'. <sup>23</sup> A'naquën nonënpoaquë ya'huërinso' co onpopinchin pa'yatëréhuahuë'. Nipirihuë', inaso' noya noya a'motëréhua'. Taparonënpoapitanta' noya imotëréhua'. <sup>24</sup> Imiranpoa', ya'piranpoa', inapita co imotëréhuahuë'. Nisha nisha ya'huëtopirinpoahuë', ya'ipi nohuantëréhua'. Yosë nohuanton, co a'ninquëchin nininsopitahuë' na'con na'con yonquirëhua'. <sup>25</sup> Nonënpoa' a'naíchin nipirihuë', nisha nisha ya'huëtërin. Co nino'huitonahuë', nicatahuapi. <sup>26</sup> Maquënpoa tëranta' iquin nipachina, ya'ipi ninatanë'. Inapochachin maquënpoa tëranta' pa'yatohuachinënpoa', ya'ipi nonënpoa' capa cantërin.

<sup>27</sup> Canpoanta' imarëhua' ni'ton, a'na huëntoínchin ninëhua'. Nonën pochin Quisocriso ni'ninpoa'. A'naya a'nayanpoa' nohuantërinpoa'. <sup>28</sup> Yosë nisha nisha acorinpoa' imarëhuasopita capini nicatahuacaso marë'. Quisocriso isoro'paquë nipon, a'naquën acorin paatona' nanamën a'chinacaiso marë'. Inapita'ton Yosëri acorin. Ina quëran a'napitanta' acorin pënëntacaiso marë'. Naporahuaton, a'naquëonta' acorin Quisocriso nanamën a'chinacaiso marë'. Yosë nohuanton, a'naquën sacai' nininso' nanitaparin. A'naquën acorin cania'piro'sa' anoyatacaso marë'. A'naquën acorin a'napita catahuacaso marë'. A'naquën acorin hua'an pochin nicacaso marë'. A'naquën Yosë nohuanton, nisha nananquë nonpiso pochin nonin. <sup>29</sup> Co ya'ipinpoa' acorinpoahuë' paatëhua' a'chinacaso marë'. Co ya'ipinpoa' nitopënëntëréhuahuë'. Co ya'ipinpoa' Quisocriso nanamën a'chinacaso' ananitërinpoahuë'. Co ya'ipinpoa' sacai' nininsopita nanitaparëhuahuë'. <sup>30</sup> Co ya'ipinpoa' ananitërinpoahuë' cania'piro'sa' anoyatacaso'. Co ya'ipinpoa' nisha nananquë nonëhuahuë'. Nisha nanan natanpatëhuara, co ya'ipinpoa' nanitëréhuahuë' ma'sona téninso' sha'huicaso'. Co ya'ipinpoa' inachachin nicacaso' acorinpoahuë'. Ispirito Santo nohuanton, nisha nisha ninëhua'. <sup>31</sup> Yosë nontoco' Ispirito Santo catahuainquëma' noya noya nininsopita nitotatoma' a'napita catahuacaso marë'.

### *Ninosorocaso' ya'huërinso'*

Napoaponahuë', piyapi nosorocaso' noya nóya ténahuë. Ina a'chinchinquëma'.

## 13

<sup>1</sup> Nisha nananquë nonpiso pochin nitononarihuarahüë', co piyapi'sa' nosorohuatëhuahuë', topinan quëran nonarihua'. Anquëni pochachin nonarihuarahüënta', co nosorohuatëhuahuë', hua'na, canpana inapita irininso pochin Yosë nataninpoa'. <sup>2</sup> A'naquënpoa' Yosë yonquirinso chachin nitotatëhua', sha'huitarëhua'. Ya'ipi nitotarihuarahüë', co piyapi'sa' nosorohuatëhuahuë', topinan quëran nitotarihua', co Yosë noya ni'sarinpoahuë'. Yosë chiniquën natëtëhua', nontohuatëhua', motopi chi'huincacaso pochin nanitapapirëhuahuë', co piyapi'sa' nosorohuatëhuahuë', topinan quëran natërëhua', co Yosë noya ni'sarinpoahuë'. <sup>3</sup> Ya'ipi ma'shanënpoa' sa'ahuario'sa' quëtopirëhuahuë', co tëhuëchachin nosorohuatëhuahuë', topinan quëran quëtarihua'. "Pën quëran yatëpapirinacohüënta', imamiatarahuë," tarihuarahüë', co piyapi'sa' nosorohuatëhuahuë', co manta' Yosë'pa' canarihuahuë'.

<sup>4</sup> Piyapi'sa' nosorohuatëhua', co yano'huirihuahuë'. Noya nontatëhua', catahuarihua'. Piyapi'sa' nosorohuatëhua', co noyapatëhua', no'huiarihuahuë'. Co nocantarihuahuë'. "Caso' noya noyaco," co tarihuahuë'. <sup>5</sup> Piyapi'sa' nosorohuatëhua', co pi'pisha tëranta' atapanarihuahuë'. Co canpoara nohuantërëhuasoachin yonquiarihuahuë'. Tëhuëchachin nosorohuatëhua', no'huipirinënpoahuënta' co no'huirihuahuë'. Pinopirinënpoahuënta', co ina yonquiarihuahuë', naniantarihua'. <sup>6</sup> Piyapi'sa' co noyahuë' nipachina', tëhuëchachin sëtarihua'. No'tëquën yonquiuhachina', canpoanta' noya cancantarihua'. <sup>7</sup> Co noyahuë' nanan natantohuatëhua', co a'naroáchin natëtarihuahuë'. Noya yonquiätëhua', natëarihua'. "Yosë nohuanton, oshaquëran noya cancantapon," ta'tëhua', ninarëhua'. Ma'sha onpotopirinënpoahuënta', ya'ipi ahuantarihua'.

<sup>8</sup> Ipora quëran huarë' ninosoromiatacaso' ya'huërin. A'naquën ipora Yosë yonquirinso chachin piyapi'sa' sha'huitapirinahuë', a'na tahuëriso' co huachi ina sha'huitacaso' ya'huaponhuë'. A'naquëonta' nisha nananquë nonpiso pochin nonpi. A'na tahuëriso nipirinhüë' co huachi ina pochin nonacaso' ya'huaponhuë'. Iporaso' a'naquën nitotërin a'chinacaso'. A'na tahuëri co huachi ma'sha anitotacaso' ya'huaponhuë'. Inapitaso' co ya'huëmiatarinhüë'. Nipirinhüë', ninosorocasoso' ya'huëmiatarin. <sup>9</sup> Iporaso' co ya'ipi nitotërëhuahuë'. Co inquënpoa tëranta' no'tëquënáchin nitopënëntërëhuahuë'. <sup>10</sup> A'na tahuëriso nipirinhüë' Yosë'pa' ya'ipi nitotarihua'. Naporo' co a'chinacaso' ya'huaponhuë'. Co huachi nipënëncasoso' ya'huaponhuë'. Ya'ipi noya nisapi.

<sup>11</sup> Iráca hua'huatarihua', hua'huasha pochin nonëhua', hua'huasha pochin yonquirëhua'. Iporaso nipirinhüë' nani mashotërëhua'. Co huachi hua'huasha pochin nonëhuahuë'. Co huachi hua'huasha pochin ninëhuahuë'. <sup>12</sup> Hua'na huënaratërinquë sacóshin hua'yanënpo' quënanë'. Inapochachin iporaso' pi'pisha Yosë nohuitërëhua'. Yosë'paso nipirinhüë' a'ninquëchin Yosë nohuitarihua'. Iporaso' co Yosë pochin ya'ipi nitotarihuahuë'. Inatohuaso nipirinhüë' ya'ipiya nitotarihua'. Yosë noyá nohuitërinpoa'. A'na tahuëri canpoanta' inapochachin ina noya nohuitontarihua'. <sup>13</sup> Cancanënpoa quëran huarë' Yosë natëcaso' ya'huërin. "Co onporonta' nonpintarinpoahuë'," ta'tëhua', inasáchin ninacaso' ya'huërin. Ninosorocasonta' ya'huërin. Yosëso' na'con na'con nohuantërin ninosorocasoso'.

## 14

### *Nisha nisha nananquë nonpiso'*

<sup>1</sup> Napoaton iyaro'sa', noya ninosoroco'. Ina quëran Yosë nontoco' Ispirito Santo catahuainquëma' ma'sona nohuantërinso' nicacamaso'. Yosë nanamën sha'huicaso' na'con na'con nohuantoco'. <sup>2</sup> A'naquën Ispirito Santo nohuanton, nisha nananquë nonpiso pochin nonpi. Co natanchináchinhüë' nonpi ni'ton, co piyapi'sa' natanpihuë'. Yosëichin natanin. Yosëri ayonquirinso' nonsapirinahuë', co a'napitari natanpihuë'.

<sup>3</sup> Napoaponahuë', Yosë nanamën sha'huitohuatëhuaso', noya nataninënpoa'. Ina yonquihuachina', noya noya imasapi. Sha'huitohuatëhua', achinicananarihua'. Sëtopirinahuë', natanatënënpoa', chiníquën cancantapi. <sup>4</sup> Nisha nananquë nonpiso pochin nonpachina', inahuara Yosë yonquiatona', chiníquën cancantapi. Nipirinhüë', Yosë nanamën sha'huitohuachinënpoa', ya'ipi imarëhuasopita natanpatëhua', chini chiníquën cancantarihua'.

<sup>5</sup> Nisha nananquë pochin nonacaso' noya nipirinhüë', Yosë nanamën sha'huicaso' noya noya, ténahuë. Ina na'con na'con Yosë nohuantërin. Nisha nananquë nonpachina, ina piquëran ma'sona tapon naporinso' sha'huichinënquëma'. Imaramasopita natanatoma', noya yonquicamaso marë' sha'huichinënquëma'. <sup>6</sup> Yosë a'chintohuachincora, inachachin iyaro'sa' sha'huitëranquëma'. Ina anitotohuachincora, nanamën chachin a'chintëranquëma'. Inapotato, catahuanquëma' noya noya imacamaso marë'. Nisha nananquë nonpiso pochin nontëranquëma' naporini, co nataintomacohüë'. Co ina quëran noya noya imaitomahuë'. Canpita nananquë chachin no'tën nanan pënënpatënquëma', tëhuëchachin catahuanquëma'.

<sup>7</sup> Ni'co'. Quina co noya pihuihuachinahuë', napoonin natanpi. Quitaranta' co noya pi'nihuachinahuë', napoonin natanpi. <sup>8</sup> Tronpitanta' nisha nisha pihuiipi sontaro'sa' nitotacaiso marë'. A'na tahuëri inimicoro'sa' huë'pachinara, tronpita pihuiipi sontaro'sa' përacaiso marë'. Co no'tëquën pihuihuachinahuë', co sontaro'sa' niyontoanpihuë' inimicoro'sa' ahuëcaiso marë'. <sup>9</sup> Inapochachin canpitanta' nisha nananquë nonpiso pochin nonpatama', co natanarinënquëmahuë'. Topinan quëran nonsarama'. <sup>10</sup> Tëhuëchachin iyaro'sa' nisha nisha nanan ya'huërin. Nisha nisha piyapi'sa' ninontacaiso marë' ya'huëpirinhüë', <sup>11</sup> co nitotohuatëhuahuë', co natanarihuahuë'. “Nisha piyapi ni'ton, nisha nananquë nonin,” tënëhua'. Co ninontacaso' nanitarihuahuë'. <sup>12</sup> Na'con nohuantërama' Ispirito Santo catahuainquëmaso'. Nisha nisha nicacamaso' nohuantërama' ni'quëhuarë' ma'sona tëranta' nipatama', a'napita imapisopita catahuaco' noya noya cancantacaiso marë'.

<sup>13</sup> Napoaton nisha nananquë nonpiso pochin yanonpatama', Yosë nontoco' ma'sona tapon nonamaso' nitotamaquë. Ina quëran nitotatoma', canpita nananquë chachin piyapi'sa' sha'huitoco'. <sup>14</sup> Nisha nananquë Yosë nontohuato, ispiritonëhuë quëran nontopirahuë', ma'sona tapo naporahuëso' co nitotërahuë'. <sup>15</sup> Napoahuarë', ¿onpocasota ya'huërin? Ispiritonëhuë quëran Yosë nontarahüë', cantarahuë, napoarahüë. Napoaparahüë', ma'sona tapo naporahuësonta' yonquiato, Yosë nontarahüë, cantarahuë napoarahüë, ténahuë. <sup>16</sup> Niyontonpatama', a'naquëma' Yosë chinotatoma', “Yosparinquën,” itohuachina, napopináchin yonquiatoma', “Amen,” tënama'. Napoaponahuë', nisha nananquë nonpiso pochin nontërama' naporini, a'napitaso' co nitotatonahuë', co “Amen” ta'caiso' nanichitonahuë'. <sup>17</sup> Noya Yosë nontopiramahuë', a'napitaso' topinan quëran natanpi ni'ton, co catahuaramahuë'. <sup>18</sup> Canta' nisha nananquë nonpiso pochin nitononahuë. Canpita quëran na'con na'con nitotërahuë. Ina marë' “Yosparinquën” itërahuë Yosë. <sup>19</sup> Napoaponahuë', Yosë chinotacaso marë' niyontonpatëhua', a'chinacaso' noya noya ténahuë. Nisha nananquë pochin nonato, shonca huaranca nanan nonahuë naporini, topinan quëran nointohüë'. Canpoa' nananquë cara nanaínchin tëranta' nonpato, natanama' ni'ton, noya noya ninin, ténahuë.

<sup>20</sup> Canpitaso' iyaro'sa' chinotono'sa pochin yonquico'. Ama hua'huaro'sa pochin yonquicosohüë'. Napoaponahuë', hua'huaro'sa pochin noyápiachin cancantatoma', noyasáchin nico'. Inapitaso' co yonquiyatërapihuë' oshahuanacaiso'. <sup>21</sup> Yosë quiricanënquë iráca ninshitërin: “Cotioro'sa' hua'qui' pënënpirahuë', co yanatërinacohüë'. Napoaton nisha piyapi'sa' inaquë a'parahuë. Nisha nananquë nontapirinahuënta', co natëarinacohüë',” tënin Yosë. <sup>22</sup> A'naquën nisha nananquë nonpiso pochin nonpi. Co imapisopitasohüë' ayonquicaiso marë' napopi. “Yosë nohuanton, naporin,” ta'tona',

yonquiapona' nimara. Imarëhuasopitaso nipirinhüé', canpoara nanamënpoaquë chachin Yosë nanamën sha'huitohuachinënpoa', noya cancantarihua: "Ma noyacha catahuar-inpoa paya," tarihua'. <sup>23</sup> Yosë chinotacaso marë' niyontonëhuaquë, a'naquën co Yosë imana'piro'sahuënta' ya'conpi. Nisha nananquërachin nonpatama', co natanatonarai-hüé': "Hua'yantomarai'," tapona'. <sup>24</sup> Nipirinhüé', Yosë nanamën a'chintohuatama', co imarinsopitahuënta' noya natanapi. Pënëntërinso' natanahuatona', yonquiapi: "Tëhuënchachin canta' co noyahuë' nicato, oshahuanahuë," tosapi. <sup>25</sup> Cancanëna quëran yonquipisopita a'ninquëchin sha'huitapi ni'ton, ina yonquiatona', oshanëna marë' sëtapi. Isonahuatona', Yosë chinotapi: "Tëhuënchachin Yosë catahuarinquëma'," itar-inënuquëma'.

### *Niyontompachinara Yosë chinotopiso'*

<sup>26</sup> Napoaton iyaro'sa' niyontompatama', noyasáchin yonquico'. A'naquëma' cantarama'. A'naquëma' Yosë nanamën a'chinararama'. A'naquëma' Yosë anitotërinquëmaso' sha'huitarama'. A'naquëmantata' nisha nananquë nonpiso pochin nonsarama'. Ina piquëran a'naquëmaso' ma'sona tapon nonamaso' canpita nananquë sha'huitarama'. Ma'sona tëranta' nipatama', nicatahuaco' ya'ipinquëma' noya noya imacamaso marë'. <sup>27</sup> Nisha nananquë pochin yanonpachina', a'naya a'naya noina'. Catoya'pihuë nipon, caraya'pihuë nipon, inaíchin noina'. Naporahuaton, a'nanta' ma'sona tapon noninso' sha'huiin. <sup>28</sup> Co insoari tëranta' sha'huitacaso' nanitohuachinhüé', niyontompiguë ama ina pochin noinasohuë'. Ina pochin yanonpachin, inaora paaton, noin Yosëíchin natanacaso marë'. <sup>29</sup> Niyontompatama', catoya, caraya nimara Yosëri anitotërinso' sha'huiina'. A'napitaso' nataina'. No'tën nanan nipachin, noya natanatoma' yonquico' no'tëquën natëcamaso marë'. Yosë nanamënáchin imacaso' ya'huërin. <sup>30</sup> A'nanta' inaquë huënsërinso' Yosëri nanan anitotohuachin, inanta' sha'huiin. Yasha'huihuachin, ya'nan nona'pi ta'taton, nata'in. <sup>31</sup> Inapoatoma', a'naya a'nayanquëma' pënëntoco'. Ya'ipinquëma' noya noya yonquicamaso marë' nipënëncó'. Napohuatama', canpita capini niachinicanararama'. <sup>32</sup> Nipënënpatëhua', a'naya a'nayanpoa' pënëntacaso' ya'huërin. A'na'ton tonihuachin, a'nanta' pënëntanta'in. Ina toniantahuachin, a'nanta' pënëntanta'in. <sup>33</sup> Yosëso' co nisha nisha ayonquirinpoahuë'. Catahuarinpoa' sano cancantacaso'. Niyontonëhuaquënta' catahuarinpoa' a'naya a'nayanpoa' pënëntatëhua' noya Yosë chinotacaso marë'.

Ya'ipi Yosë imarëhuasopita nisha nisha niyontonëhuaquë, <sup>34</sup> sanapi'saso' ta'tatona', nataina'. Ama pënëncinasohuë'. "Quëmapi'sa' natëina'," tënin Yosë pënëntërinquë. <sup>35</sup> Ma'sona yanitotohuachina', pëinënaquë so'ina' nataina'. Yosë chinotacaso marë' niyontompatama', sanapi'saso' co nonacaiso' ya'huërinhuë'.

<sup>36</sup> Isonta' yonquico'. Co canpita'ton Yosë nanamën nitotëramahuë'. Naporahuaton, co canpitaráchin a'chintërainquëmahüé'. <sup>37</sup> Yosë nanamën chachin no'tëquën a'chintëranquëma'. No'tëquën ninshitëranquëma'. Insosona yapënëntohuachin, natëinco. Ispirito Santo tëhuënchachin catahuahuachinquëma', ina nanan chachin natëarama'. <sup>38</sup> Nisha a'chintohuachinënuquëma', ama natëtocosohuë', tënahuë'.

<sup>39</sup> Napoaton iyaro'sa', Yosë anitotërinquëmaso' sha'huicamaso' na'con na'con nohuantoco'. A'naquën nisha nananquë nonpiso pochin yanonpachina, tananpitoco' noin. <sup>40</sup> Nipirinhüé', ama noncarocosohuë'. A'naya a'nayanquëma' nonco'. Noyápiachin cancantatoma', Yosë yonquico'.

## 15

### *Quisocristo nanpiantarinso'*

<sup>1</sup> Yosë nanamën iyaro'sa', nani a'chintëranquëma'. "No'tëquën nontërincoi," ta'toma' natërama'. Natëtoma', imamiatarama'. Ina nanan chachin sha'huitaantarinquëma'



yonquicamaso marë'. <sup>2</sup> Ina natëmiatohuatama', Yosë nicha'ësarinquëma'. A'naquënso nipirinhüë': "Imarahüë," taponarahüë', topinan quëran napopi. Co cancanëna quëran natëpihuë'. Inapitaso' co nicha'ësarinhuë'.

<sup>3</sup> Ya'nan a'chintaponquëma', Yosë anitotërinco chachin sha'huitëranquëma': "Oshanënpoa' inquitinpoaso marë' Quisocristo chiminin," itëranquëma'. Iráca Yosë quiricanën quëran ninorinso chachin chiminin. <sup>4</sup> "Chiminpachina, pa'pitopi huachi. Pa'pitopirinhüë', cara tahuëri quëran nanopiantarin," itëranquëma'. Quiricanënuë ninorinso chachin nanopiantarin: <sup>5</sup> Nanpiantarahuatón, Pitro ya'notërin. Ca'tano'sanënpitanta' ya'notërin. <sup>6</sup> Ina quëran na'a imapisopita niyontonasoi', ya'notaantarin. A'natërápo pasa na'con ni'pi. Ipora huanta' nanopirapi. Caraíchín nani chiminpi. <sup>7</sup> Santiaconta' ya'notërin. Naporahuaton, ya'ipi a'chinacaso marë' acorinsopita ya'notaantarin. Ina quëran inápaquë panantarin.

<sup>8</sup> Piquëran huarë' canta' ni'nahuë. Ana'huaya pochín nipirahuë', inápa quëran ya'notimarínco. Naporó huarë' imarahüë. <sup>9</sup> Imapisopita aparisitërahüë ni'ton, co acóincoso' ya'huërinhuë', topirahuë'. Pa'pi co noyahuë' cancantopirahuë', anoyacancantatonco, acorínco paato a'china'huaso marë'. <sup>10</sup> Inaora nohuantón, Yosë catahuarínco. Co catahuaríncohuë' naporíní, co manta' nanichitohüë'. Catahuahuachínco, pa'nahuë nanamën a'chinapo. Co topinan quëran catahuaríncohuë'. Caso' na'con na'con Yosë marë' sacatërahüë. Co cariso' piyapi'sa' anoyacancantërahüë'. Yosë achinicancanínco a'china'huaso marë'. Ina catahuarínco ni'ton, a'chinpatëra na'a piyapi'sa' imasapi. <sup>11</sup> Yosë nanamën a'chintëranquëma'. Quisocristo ca'tano'sanënpitanta' a'chinpi. Ina nanansáchin a'chintërainquëma', natërama'.

### *Quisocristo imarëhuasopita nanopiantacaso' ya'huërinso'*

<sup>12</sup> "Quisocristo nanopiantarin huachi," itërainquëma' ni'ton, ¿onpoatomata' a'naquëmaso' co no'tëquën yonquiramahuë'? "Co Yosë ananpitaantarinpoahuë'," toconama'. <sup>13</sup> Co nanopiantacaso' ya'huërinhuë' naporíní, co Quisocristo tëranta' nanopiantaitonhuë'. <sup>14</sup> Co nanopiantarinhuë' naporíní, topinan quëran a'chinchitënuëmahüë'. Canpitanta' topinan quëran natëitomahuë'. <sup>15</sup> Co nanopiantarinhuë' naporíní, nani nonpinchitënuëmahüë'. Nipirinhüë', co iyaro'sa' nonpin nanan a'chintërainquëmahüë'. "Yosëri chachin ananpitaantarin," itohuatëinque'mara, no'tëquën nontërainquëma'. <sup>16</sup> Co ananpitaantainpoaso' ya'huërinhuë' naporíní, co Quisocristo tëranta' nanopiantaitonhuë'. <sup>17</sup> Co nanopiantarinhuë' naporíní, topinan quëran imaitërihuahuë', co oshanënpoa' inquichitonpoahuë'. <sup>18</sup> Co nanopiantarinhuë' naporíní, a'naquën imapisopita nani chiminpi ni'ton, parisitopiqué pa'itonahuë'. <sup>19</sup> Isoro'pa marëáchin Quisocristo imarëhua' naporíní, pa'pi nosoro-chitërihuahuë'.

<sup>20</sup> Nipirinhüë', Quisocristo tëhuë'nchachin nani nanopiantarin. Ya'nan cayarínso' sënarëso pochín ina'ton nanopiantatón, nanopimiatarin. Ina quëran canpoanta' chiminarihuarahüë', nanopiantarihua'. <sup>21</sup> Atan'tón co Yosë natëtonhuë', chiminin ni'tón, canpoanta' chiminëhua'. Inapochachin Quisocrístoso' chiminaponahuë', nanopiantarin ni'tón, canpoanta' nanopiantarihua'. <sup>22</sup> Atan pochín cancantatëhua', ya'ipinpoa' chiminëhua'. Napoaponahuë', Quisocristo imapatëhua', ya'ipinpoa' ananpitaantarinpoa'. <sup>23</sup> Co napopináchin nanopiantarihuahuë'. Quisocristo'tón nanopiantarin. A'na tahuëri o'mantahuachin, imarëhuasopitanta' ananpitaantarinpoa'. <sup>24</sup> Ina quëran ya'ipiya naniarin. Iporaso' nisha nisha hua'ano'sa', copirnoros'a', inapita chiníquën nanantatona', camairínënpoa'. Sopairo'santa' yacamairínënpoa'. Quisocristo o'mantahuachin, ya'ipiya minsëarin. Nani minsëhuachin, Tata Yosëíchin ya'ipiya hua'anëntarinpoa'. <sup>25</sup> Ina nohuantón, Quisocristo chiníquën nanantarin. Ya'ipi hua'anëntarin. A'na tahuëri ya'ipi inimicoro'sa' minsëarin. <sup>26</sup> Ina quëran huachi chimirionta' ayatarin. Ananpitaantahuachinpoa', chimirin minsëarin huachi. Co huachi chiminacaso' ya'huaponhuë'.



27 “Yosë nohuanton, ya'ipiya minsëarin huachi,” tēnin Yosë quiricanēnquē. Napoaton Quisocriso ya'ipiya hua'anēntarin. Tata Yosëichin co hua'anēntarinhuē'. Inari Quisocriso chiniquēn nanan quētērin. 28 Ina nohuanton, Quisocriso ya'ipiya minsëarin. Nani minsëhuachina, inanta' Yosë hui'nin ni'ton, pa'pin natēmiatarin. Naporo quēran huarē' Yosëáchin ya'ipiya hua'anēntomiatarin.

29 ¿Onpoatomata' ipora huanta' a'naquēma' co natēyátēraramahuē'? “Co Yosë ananpitaantarinpoahuē’,” toconama'. Co no'tēquēn yonquiramahuē'. A'naquēn chiminipisopita yonquiatona', inapita ya'huērēnamēn aporihuanpi. Co nanpiantacaso' ya'huērinhue' naporini, ¿ma'marēta' inapitanta' napo'itonahuē'? 30 ¿Ma'marēta' quiyanta' parisitaporaihuē', a'chinárai? Nani tahuēri yaahuērinacoi. Co nanpiantahuatēhuahuē', topinan quēran parisitērai. 31 A'naquēn yatēparinaco. Nani tahuēri “Chiminapo nimara,” tēnahuē. Tēhuēnchachin no'tēquēn nontēranquēma'. Quisocriso catahuarinco ni'ton, a'chintohuatēnquēmara, noya imarama'. Ina marē' nōya cancantērahuē. 32 Ipositoquē a'chinahuēso marē' chiniquēn no'huirinaco. Ni'ni pochin cancantatona', yatēparinaco. Ahuantaporahuē', ¿ma'ta' ina marē' canarahuē? Isoro'paquērāchin ya'huērēhua' naporini, co manta' canaitērihuahuē'. Co nanpiantacaso' ya'huērinhue' naporini, co Yosë yonquicaso' ya'huē'itonahuē'. “¡Huēco' coshatahua'. Huēco' o'oahua'. Co hua'quiya quēranhuē' chiminarihua' ni'ton, capa cancantahua'!” topiso pochin nichitērihuahuē'.

33 Ama ina pochin yonquicosohuē'. Ni'cona a'napita anishacancantochinēnquēma'. “Co noyahuē' nipisopitarē'quēma' nipayahuatama', canpitanta' nitapicananarama'. Inapita nonanpatama', co huachi noyápiachin cancantaramahuē’,” topi iráca. No'tēquēn napopi. 34 No'tēquēn yonquiatoma', noyasáchin nico'. Ama huachi tēhuēcosohuē'. A'naquēma' co Yosë nohuichátēraramahuē'. Ina yonquiatoma', tapanacamaso' ya'huērin, tēnahuē.

### *Nasha nonēnpoa' quētarinpoaso'*

35 A'naquēma' yanitotērama'. “Chiminpatēhua', ¿onporahuatēhuata' nanpiantarihua'? ¿Onpopinta' nonēnpoa' ya'huētaponpoaso'?” tēnama'. 36 ¡Co canpitaso' nitoyonquiramahuē'! Ni'cochi. Ya'pirin sha'patēra, ya'pirin chachinso' chimininso pochin ninin. Acopo' ya'pira'huainso nipirinhue', noya papotērin. 37 Tricoraya yonquia'ahua'. Ina sha'patamara, aipi noshinēnso' co papotērinhuē'. Ya'pira'huain papotohuachina, nisha ya'norin huachi. 38 Yosë nohuanton, ma'sha papotērin. Nisha nisha ya'pirin sha'patēra, nisha nisha papotērin. Co napopináchin papotērinhuē'. Yosë nohuanton, naporin. 39 Ma'sharo'santa' nisha nisha noshatopi. Piyapinpoanta' nonēnpoa' nisha. Ohuacaro'sa', inairaro'sa', samiro'sa', inapitanta' nisha nisha noshatopi. Co napopináchin noshatērehuahuē'. Nisha nisha acorinpoa'. 40 Nisha nisha ma'sha isoro'paquē ya'huērin. Inápaquē ya'huēpisopitanta' nisha nisha ya'nopi. Co napopináchin noyápiachin ya'nopihuē'. 41 Pi'iso' huēnaráchin huēnaráchin a'pinin. Yoquinta' nisha a'pinin. Tayoraro'santa' nisha nisha a'pinpi. Co napopináchin a'pinpihuē'.

42 Inapochachin canpoanta' nanpiantahuatēhua', nisha ya'noarihua'. Chiminpatēhuara, nonēnpoa' chanatopirinhue', nanpiantahuatēhua', nasha nonēnpoa' ya'huētarinpoa'. Co onporonta' chanatarinhue'. 43 Iporaso' nonēnpoa' co onpopinchin noyahuē'. Chiminpatēhua', pa'pitarinēnpoa'. A'na tahuēriso' nipirinhue', noyápiachin nonēnpoa' ya'huētarinpoa'. Iporaso' co chinipirēhuahuē'. Nanpiantahuatēhua', chiniarihua'. 44 Isoro'pa maréáchin nonēnpoa' ya'huētērinpoa' ni'ton, chiminēhua'. Pa'pitopirinēnpoahuē', ananpitaantahuachinpoa', nisha nonēnpoa' quētarinpoa' Yosē'pa' ya'huēcaso marē'. Iporaso' nonēnpoa' Yosē acotērinpoa' isoro'paquē ya'huēcaso marē'. A'na tahuēriso nipirinhue' noya noya nonēnpoa' quētarinpoa' inápaquē ya'huēcontacaso marē'.

45 Yosë quiricanēnquē tapon: “Íraca Yosēri ya'nán quēmapi nininso' Atan itērin. Inaso' nonēn quētērin isoro'paquē nanpicaso marē’,” tēnin. Iporaso' Quisocrisonta' Atan

pochin nicaponahuë', Yosë chachin ni'ton, catahuarinpoa' canpoanta' Yosë pochin nanpicaso marë'. <sup>46</sup> Napoaponahuë', ya'nan nipon, nonënpoa' quëtërinpoa' isoro'paquë nanpicaso marë'. Ina piquëran nasha nonënpoanta' quëtarinpoa' inápaquë nanpimiatacaso marë'. <sup>47</sup> Atanso' no'pa quëran ninin isoro'paquë nanpicaso marë'. Quisocristoso nipirinhüë' Yosë ya'huërin quëran o'marin ni'ton, noya noya ninin. <sup>48</sup> Ya'ipi piyapinpoo' Atan pochin nicatëhua', ina nonën pochin ya'huëtërinpoa'. Napoaponahuë', Quisocristo imapatëhua', a'na tahuëri ina nonën pochachin ya'huëtërinpoa'. <sup>49</sup> Iporaso' Atan pochin ya'norëhua'. A'na tahuëriso nipirinhüë' Quisocristo pochin ya'noarihua'.

<sup>50</sup> Nonënpoa' ipora ya'huëtërinpoaso' co nanitërinhuë' Yosë hua'anëntërinquë paacaso'. Chiminpatëhua', nonënpoa' chanatarin, co ya'huëmiatarinhüë'. <sup>51</sup> Noya natanco iyaro'sa'. Na'a piyapi'sa' co nitotopirinhüë', sha'huitaranquëma'. Co ya'ipi imarëhuasopita chiminarihuahuë'. Napoaponahuë', Yosë nohuanton, ya'ipi imarëhuasopita nisha ya'noarihua'. <sup>52</sup> A'nanaya nisha nonënpoa' ya'huëtërinpoa'. O'mantacaso' tahuëri nanihuachin, tronpita pihuirarin. Pihuihuachin, chiminpisopita nanopiantarapi. Quisocristo imapi ni'ton, ananpitaantarin huachi. Naporo' ya'ipi imarëhuasopita nisha nonënpoa' ya'huëtërinpoa'. Co huachi chiminarihuahuë'. <sup>53</sup> Nonënpoa' ipora ya'huëtërinpoaso' chanatarin. A'na tahuëriso nipirinhüë' nisha nonënpoa' ya'huëtöhuachinpoa', co chanatarinhüë'. Nasha a'morëso pochin nisarihua'. Co huachi chiminarihuahuë'. <sup>54</sup> Nisha nonënpoa' quëtöhuachinpoa', nanopiantarihua'. Yosë quiricanën quëran ninoton, naporin: "A'na tahuëri Yosëri chimirin minsëarin. Co huachi chiminacaso' ya'huaponhuë'. <sup>55</sup> ¿Onporahuatonta' chimirin minsëarinpoa'? Co huachi nanitarinhüë'. Ya'huan quëtëhuachinpoa' chiminëso pochin chiminacaso' ya'huëpirinhüë', co huachi chiminacaso' të'huatarihuahuë'," tënin. <sup>56</sup> Yosë iráca pënëntërinso' co natëtatëhuahuë', oshahuanëhua'. Oshahuanëhua' ni'ton, chiminacaso' ya'huërin. <sup>57</sup> Ya'huëpirinhüë', jma noyacha Tata Yosëso' ni'ton, nicha'ërinpoa' paya! Ina nohuanton, Quisocristo ya'huëretërinpoa'. Corosëquë chiminatón, sopai minsërin. Nanpiantarahuatón, chimirionta' minsërin. Ina marë': "Yosparinquën," itahua'.

<sup>58</sup> Napoaton iyaro'sa' chiníquën cancantoco'. Nosororranquëma' ni'ton, pënënararanquëma': Ama nisha nisha yonquicosohüë'. Naporahuatón, paatoma' a'napita a'chintëra'piaco'. Sinioro catahuahuachinquëma', co onporonta' topinan quëran a'chinaramahuë'. A'chinpatama', Yosëri nohuantërinso'pita imasapi huachi.

## 16

### *Pahuantërinso'pita catahuacaso' ya'huërinso'*

<sup>1</sup> A'nanta' sha'huichinquëma', yonquico'. A'naquën imapisopita ma'sha pahuantarin ni'ton, parisitapi. Inapita catahuacaso marë' coriqui yaa'parama'. Carasiaquë imapisopitanta' coriqui a'parapi. Inapita nani sha'huitërahuë coriqui yontonacaiso marë'. Inapochachin canpitanta' sha'huitaranquëma'. <sup>2</sup> Nani Tomio tahuëri niyontónpatama', coriqui acoco'. Nanitëramaso' acoco'. Na'con canahuatama', na'con quëtoco'. Pi'pian canahuatama', pi'pian quëtoco'. Nani simana inapohuatama', nicaponquëma' pa'pato, coriqui yontónmaso' quënanconarahüë. <sup>3</sup> A'naquëma' noya ni'namasopita huayonco' coriqui quëpacaiso marë'. Canconpato, quiricatarahuë huayonamasopita nohuitacaiso marë'. Nani quiricatahuato, inarë chachin huayonamasopita a'paarahüë. Quirosarinquë quëparapi pahuantërinso'pita quëtacaiso marë'. <sup>4</sup> Nanitöhuato, canta' pa'samaraco. Pa'patoso', napopináchin pa'sarai.

### *Nicapon yapa'ninso'*

<sup>5</sup> Nicaponquëma' yapa'pirahuë', iporaso' co nanitërahuë'. Masitonia parti paca'huaso' ya'huërin. Nani ni'tontahuato, ya'huëramaquë pa'sarahüë. <sup>6</sup> Canpitataquë hua'quimiáchin yacapanranquëma'. O'napi tahuëri inaquë na'huëanatapo nimara.

Ina quëran catahuaramaco a'na parti paca'huaso', topirahuë'. <sup>7</sup> Co topinan niraponquëmahuë'. A'na tahuëri Yosë nohuantohuachin, hua'qui' yacapanquëma'. <sup>8</sup> Iporaso nipirihuë' Ipiquoë ya'huato, a'chinárahüë. Pinticostisë tahuëri huarë' isëquë ya'huapo. <sup>9</sup> Yosë nohuanton, na'a piyapi'sa' isëquë yaimapi ni'ton, a'chintárahüë. A'naquënso' no'huipirinacohüë', pënëntárahüë. Na'amiachin imasapi.

<sup>10</sup> Iya Timotio cantonpachinquëma', noya nontoco' noya cancanchin. Ca pochachin inanta' Yosë nanamën a'chinarin. <sup>11</sup> Hui'napi nipirihuë', ama nocancosohüë', noya natanco'. Noya nontatoma', catahuaco' isëquë huënanta'in. Ina ninarahuë. A'napita iyaro'sarë' canquimapon, ténahuë.

<sup>12</sup> Iya Aporosënta' sha'huitopirahuë'. "Iyaro'sa' pa'pachina', quëmanta' paquë'," itopirahuë', co ipora nohuantërinhuë'. Nanitohuachin, nicaponquëma' pa'sarin.

*Tiquiapon pochin pënëninso'*

<sup>13</sup> Ama huë'erëso pochin cancantatomarahuë', noya yonquico'. Ya'ipi cancanëma quëran natëmiatoco'. Ma'sha onpoapomarahüënta', chiníquën cancantoco'. Niachinican-canço'. <sup>14</sup> Ma'sona tëranta' nipatama', noya ninosoroatoma', nico'.

<sup>15</sup> Istipano sa'inë chachin nohuitërama'. Iráca Acaya parti a'chinpatëra, inapita'ton Quisocriso imapi. Pëinënquë ya'huëpisopitanta' imasapi. Imatona', na'con catahuarinënquëma'. Ya'ipi imapisopita catahuapi. <sup>16</sup> Inapitaso' noya natëco', ténahuë. A'napitanta' chiníquën catahuarinquëma' noya imacamaso marë'. Insosona ina pochin a'chintohuachinquëma', noya ni'co'.

<sup>17</sup> Istipanasë, Portonato, Acaico, inapita isëquë cantihuachinacora, nóya cancantërahüë. Canpitaso' aquë ya'huatoma', co ni'namacohüë'. Inapitaso' ya'huërama quëran huëcatona', catahuarinaco. <sup>18</sup> Noya nontatonaco, achinicancaninaco. Canpitanta' achinicancaninënquëma', ténahuë. Cancoantahuachina', noya nicatoma', natanco'.

<sup>19</sup> Ya'ipi imapisopita Asia parti ya'huëpiso' yonquiatënquëma', saludos a'patarinënquëma'. Aquira sa'inë chachin na'con yonquiatënquëma', saludos a'patarinquëma'. Pëinënquë niyontonpisopitanta' yonquirinënquëma'. Canpitanta' Siniro imarama' ni'ton, na'con yonquirinënquëma'. <sup>20</sup> Ya'ipicoi saludos a'patarainquëma'. Noya iyaro'sa' ya'huëco', ténai. Noya ninosoroatoma', nisë'quëco'.

<sup>21</sup> Ca Paonoco na'con yonquiranquëma'. Caora imirahuë quëran isoíchin ninshitaranquëma'.

<sup>22</sup> Insosona co Siniro Quisocriso nosorohuachinhuë', Yosëri ana'inchin. ¡A'naroáchin Siniro o'mantaquë'! ténahuë.

<sup>23</sup> Inaora nohuanton, Siniro Quisoso catahuainquëma'. <sup>24</sup> Ya'ipinquëma' Quisocriso imarama' ni'ton, nosororanquëma'. Nani ninshitëranquëma huachi.

*Paono*

## Paonori Corintoquë ya'huëpisopita ninshitaantarinsó'

### *Imapisopita yonquiaton, nanan a'patërinso'*

<sup>1</sup> Ca Paonoco ninshitantaranquëma'. ¿Noya canpitanta' ya'huarama'? Noya canta' ya'huarahüë. Yosë nohuanton, Quisocriso acorinco nanamën a'china'huaso marë'. Iya Timotioro'co nanan a'pataranquëma'. Corintoquë ya'huëramasopita ninshitaranquëma'. Yosë nohuanton, canpitanta' huëntonënquë ya'conama'. Acaya parti nisha nisha ninanoro'saquë imaramasopita yonquiatënquëma', ninshitaranquëma'. <sup>2</sup> Inaora nohuanton, Tata Yosë catahuainquëma'. Asanocancainquëma'. Sinioro Quisocrisonta' inachachin catahuainquëma'.

### *Paono parisitaponahuë', Yosëri achinicananinsó'*

<sup>3</sup> —Ma noyacha Tata Yosëso paya. Sinioro Quisocriso pa'pin inaso'. Na'con nosororinpoa' ni'ton, catahuarinpoa' chiníquën cancantahuaso'. Nani tahuëri inasáchin achinicananinpoa'. <sup>4</sup> Ma'sona tëranta' onpohuatëhua', ina catahuarinpoa' noya cancantacaso marë'. Achinicananinpoa' ni'ton, canpoanta' nanitarihua' a'napita catahuacaso'. Inapitanta' ma'sha onpohuachina', achinicananarihua'. Yosë catahuarinpoaso pochachin inapitanta' catahuarihua'. <sup>5</sup> Quisocriso imarëhuaso marë' a'napita aparisitërinënpoa'. Aparisitochuachinënpoara, Quisocriso chachin achinicananinpoa'. Na'con na'con aparisitochuachinënpoa', na'con na'con catahuarinpoa' noya cancantacaso marë'. <sup>6</sup> Canpitanta' Yosë nohuitacamaso marë' a'chintërainquëma'. Ina marë' aparisitërinacoi. Parisitapiraihuë', Yosë achinicananincoi ahuenta'huaiso marë'. Yosë catahuarinquëma' canpitanta', tënai. Parisitopiramahuë' achinicananarinquëma' quiya pochachin ahuantamaso marë'. <sup>7</sup> Canpitanta' aparisitochuachinënquëma', Yosë catahuarinquëma' chiníquën cancantacamaso marë'. Napoaton co Yosë a'poaramahuë'. Chiníquën cancantatoma', imamiatarama', tënai. Ina marë' noya cancantërai.

<sup>8</sup> Parisitëraisó' sha'huichinquëma', canpitanta' nitotoco'. Asiaquë ya'huasocoi, na'con ma'sha onpotërinacoi. Co ahuantochináchinhuë' cancantërai: <sup>9</sup> “Chiminapoi nimara,” topiraihuë', co chiminaihuë'. Yosë nohuanton, ma'sha onporai ina na'con na'con yonquica'huaiso marë'. Napoaton “Quiyaora nanitërai,” co tënaihuë'. “Catahuacoi Sinioro, co quiyaso' nanitëraihuë',” itërai. Yosëíchin ya'ipi nanitaparín. Chiminpisopitanta' ananpitaantarín, tënai. <sup>10</sup> Pi'pishachin shichiminpiraihuë', Yosë na'con catahuarincoi ni'ton, cha'ërai. Nani tahuëri ni'sárincoi. “Co onporonta' naniantarincoihuë'. A'na tahuëri parisitaantapiraihuë', nicha'ësaríncoi,” ta'toi noya cancantërai. <sup>11</sup> Canpitanta' quiya marë' chiníquën Yosë nontoco' catahuarincoi. Na'anquëma' quiya marë' Yosë nontohuatama', Yosë catahuarincoi. Ina quëran canpitanta' noya cancantarama'. “Ma noyacha Yosëri catahuarin paya,” ta'toma', “Yosparinquën Sinioro,” tosarama'.

### *Paono Corintoquë yapa'ninsó'*

<sup>12</sup> Yosë ni'sárincoi ni'ton, no'tëquën sha'huitarainquëma'. Co pi'pian tëranta' nonpintërainquëmahuë'. Noyápiachin cancantatoi, ya'ipi parti a'chinai. Co quiyaora yonquinhüëi quëran a'chintërainquëmahuë'. Yosë inaora nohuanton, catahuarincoi ni'ton, noya ninai. Ina marë' noya cancantërai. <sup>13</sup> No'tëquënáchin ninshitërainquëma'. Co nisha nisha yonquiraihuë'. Co yanonpintërainquëmahuë'. Iso quirica nontohuatama', yonquiraiso chachin nitotarama'. Oshaquëran ya'ipi nitotarama huachi, tënahuë. <sup>14</sup> Ipora noyamiachin nitotërama'. Sinioro Quisoso o'mantacaso' tahuëri nanihuachin, noya cancantatoi, noya ni'sarainquëma'. Naporo tahuëri canpitanta' noya ni'saramacoi, tënai. “Paono noya a'chintërincoi ni'ton, imarai,” tosarama'. Ina yonquicamaso' nohuantërai.

15-16 “Noya ni'sarinaco,” ta'to, i'hua nicaponquëma' yapa'pirahuë'. Masitonia parti pa'pato, nira'inquëma'. Ina quëran o'mantahuato, nirimanta'inquëma', topirahuë'. Inaporahuë naporini, canpita catahuaitomacohuë' Cotia parti paca'huaso'. Catoro' ni'nanquëma' naporini, noya noya cancanchitomahuë', tënahuë yonquiato. Napopirahuë', co pa'nahuë'. 17 Napoaton: “Paono nisha nisha yonquirin,” ¿topiramahuë' ti? Co nisha nisha yonquirahuë'. A'naquënso' ma'sona tëranta' sha'huipirinhüë', co tëhuënchachin naporinhüë'. Co caso' ina pochin cancantërahuë'. 18 Yosë ni'sárinco no'tëquën nontëranquëma'. Yosë no'tëquënáchin nonin ni'ton, canta' co nonpintëranquëmahuë'. Co nisha nisha nonahuë'. 19 Iráca Siripano, Timotio, ca, caracoi a'chintërainquëma'. Quisocristo nanamën a'chintërainquëma'. Inaso' Yosë hui'nin chachin. Co onporonta' nonpintërinpoahuë'. No'tëquën nontërinpoa'. 20 Ya'ipi Yosë sha'huitërinpoaso' Quisocristo acotarinpoo'. Napoaton “Quisocristoso' no'tëquën nonaton, catahuarinpoa'. Ma noyacha Yosëso paya,” tënëhua'. 21 Yosë chachin huëntonënuquë aya'coninpoo' Quisocristo imacaso marë'. Huayonatonpoa', acorinpoo' piyapinënpita nicacaso marë'. 22 Hui'nin pochin nicatonpoa', sichoquë marca acorëso pochin Ispirito Santo aya'coancantërinpoa'. Hua'yanën chachin aya'coancantërinpoa' ni'ton, anitotërinpoa'. “Ya'ipi sha'huitërinpoaso' chachin quëtarinpoo',” tënëhua'.

23 Ya'ipi yonquirahuëso' Yosë nitotërin. Ina ni'sárinco ni'ton, no'tëquën nontaranquëma'. Co nohuantërahuë' canpitataquë chiníquën pënëna'huanquëmaso'. Napoaton co i'hua ni'conanquëmahuë'. Naporo' pa'nahuë naporini, co noyahuë' ninamaso marë' chiníquën pënëna'huanquëmaso' ya'huë'itonhuë'. 24 Co quiyaso' hua'an pochin chiníquën pënëntëraihuë'. Sanoanan quëran pënënaninquëma'. Yosë nanamën noya natërama'. Yacatahuarainquëma' noya cancantacamaso marë'.

## 2

1 I'hua nicaponquëma' yapantapirahuë', co pa'nahuë'. Pa'nahuë naporini, asëchitënuquëmahuë'. 2 Chiníquën pënënpatënuquëma', sëtarama'. Co nohuantërahuë' asëta'huanquëmaso'. Canpita sëtohuatama', co huachi nanitaramahuë' acapacancanamacoso', tënahuë yonquiato. 3 Napoaton i'hua ninshitëranquëma' pënëna'huanquëmaso marë'. Ina quëran canpitataquë pa'pato, co sëtarahuë'. Noya imaantahuatama', noya cancantarahuë. Noya cancantohuato, canpitanta' noya cancantarama', tënahuë. 4 Chiníquën sëtato, i'hua ninshitëranquëma'. “Co yanatërinacohuë’,” ta'to, sëtërahuë. Na'nëchináchin cancantërahuë. Co nohuantërahuë' chiníquën asëta'huanquëmaso'. Co no'huiranquëmahuë'. Na'con nosororanquëma'. Ina nitotacamaso marë' ninshitëranquëma'.

### *Nanan anoyatacaso' ya'huërinso'*

5 I'hua a'nara' co noyahuë' nininso marë' sëtërahuë. Co casáchin sëtërahuë'. Canpitanta' pancamiachin sëtërama'. Nipirinhüë', co nohuantërahuë' nanan apancatacaso' ni'ton, napotëranquëma'. 6 Tëhuëna'pi nani ana'intërama'. Na'anquëma' ana'intërama' ni'ton, co noyahuë' nininso marë' inanta' sëtárin. Co huachi aquëtë' ana'intacaso' ya'huërinhuë'. 7 Iporaso' nanan anoyatoco'. Noya nontaantaco' chiníquën cancanchin. Iporahuanta' sëtárin. Napoaton catahuaco' ama aquëtë' sëchinsohuë', sëtori ya'coancantohuachin. 8 Niyontonahuatoma', noya nontoco'. “Nosoroatënuquën iyasha nanan anoyatarainquën,” itoco'. Ina quëran tëhuënchachin nosoroatoma', noya nontaantaco'. 9 Napoaton i'hua ninshitëranquëma'. “Ya'ipi natëarinaco,” ta'to, pënënanquëma'. Tënia'huanquëmaso marë' ninshitëranquëma'. 10 Nanan anoyatohuatama', canta' nanan anoyatërahuë pochin cancantarahuë. Canpita yonquiatënuquëma', nanan anoyatërahuë. “Quisocristo nani tahuëri ni'sarinpoa',” ta'to, cancanëhuë quëran huarë' nanan anoyatërahuë. 11 Co nanan anoyatohuatëhuahuë', Satanase minsëarinpoa'. Inaso' nisha nisha yanonpintërinpoaso' nitotërehua'.



*Troasëquë Paono na'con yonquirinso'*

<sup>12</sup> I'hua Troasëquë pa'nahuë Quisocristo nanamën a'china'huaso marë'. Yosë nohuan-ton, na'a piyapi'sa' nohuantopi ni'ton, a'chintërahuë. <sup>13</sup> Napoaponahuë', i'hua chachin iya Tito canpitataquë a'pahirahuë'. Co huënantarinhuë ni'ton, co sano cancantërahuë'. “¿Onpoatoncha co iyasha huëntarinhuë nicaya?” ta'to, piyapi'sa' noyasha nontahuato, Masitoniaquë pa'nahuë.

*Quisocristo catahuarinpoa' minsëtacaso'*

<sup>14</sup> Ma noyacha Tata Yosëso paya, tënëhua'. Quisocristo imarëhua' ni'ton, nani tahuëri ina catahuarinpoa' inimiconënpoapita minsëcaso'. Inapitaso' co nohuantopihuë' Quisocristo nanamën a'china'huaiso'. Co nohuantopirinahuë', nisha nisha parti paatoi, nanamën a'chinárai. Pimóton hua'sai' pimoanahuaninso pochin Quisocristo nanamën nahuinarin. A'chintatoi, na'a piyapi'sa' anitotërai. <sup>15</sup> Quisocristoso' pimóchin nininso' a'përahuaton, Yosë chinotërin. Ina pimoanahuaninso pochin ya'ipi parti nanamën a'chinai. A'chinpatëira, Yosëri nohuantërinso' noya natanpi ni'ton, nicha'ësarín. Co nohuantërinso'pituahuënta' natanpirinahuë', topinan quëran natanpi ni'ton, parisitopiquë pa'sapi. <sup>16</sup> Inapitaso' chimipi anarinso pochin nica-tonacoí, co natëtopihuë' ni'ton, chim-inpachina', parisitomiatapi. Natëpisopitaso nipirinahuë' pimóchin imërëso pochin nica-tonacoí, cha'ëshuatona', nanpimiatapi. ¿Incarita' nanitërin ina pochin noya a'chinacaso'? Co insonta' nanitërinhuë' inaora a'chinacaso', tënahué. <sup>17</sup> A'naquën nonpinatona', in-ahuara canacaiso marë' a'chinapi. “Yosë nanamën a'chintërainquëma',” topirinahuë', co no'tëquën a'chinpihuë'. Quiyaso nipirinahuë' no'tëquën sha'huitërainquëma'. Yosë a'parincoi ni'ton, ina nanansáchin a'chinarai. Yosë ni'sárincoi ni'ton, Quisocristoíchin natëarai.

### 3

*Nasha quëran anoyatërinso'*

<sup>1</sup> “Ina pochin nonpatama', naquëranchin a'napita nocanarama',” ¿itëramacoí ti? Co insonta' nocanaihuë'. A'naquënso' carta a'napitari ninshitërinso' a'notërainquëma' no-huitacaso marë'. “Iso quëmapiso' noya. A'chintohuachinquëma', noya natanco',” tënin quiricaquë. Inanpi quirica co ma'parainquëmahuë'. Co ina pochin no-huantëraihuë'. Nani noyá nohuitëramacoí. <sup>2</sup> Canpitaso' cartanëhuëi pochin ninama', cancanëhuëiquë Quisocristori ninshitërinso'. Nanamën chachin a'chintohuatëinquëmara, noya imarama'. Ya'ipi piyapi'sa' ni'ninëinquëma'. “Paono ca'taninsopitarë chachin a'chintërin ni'ton, noya cancantopi,” ta'tona', noya ni'ninacoí. <sup>3</sup> A'chintohuatëinquëmara, noya natanatoma' Quisocristo imarama' ni'ton, noya carta pochin ninama'. Quisocristo chachin ninshitërinso'. Ina cartaso' co napisëquë ninshitërinhuë'. Co na'piquë tëranta' ninshitërinhuë'. Yosëso' nanpimiatarin ni'ton, Ispirito Santo anoyacancantërainquëma' nóya nicacamaso marë'.

<sup>4</sup> Quisocristo catahuarincoi ni'ton, noya a'chintërainquëma'. Ina marë' Yosë noya ni'sarincoi, tënai. <sup>5</sup> Quiyaora co pi'pisha tëranta' nanitëraihuë' noya a'chinta'huainquëmaso'. Yosëíchin ananitërincoí. Co catahuarincoihuë' naporini, co canpitanta' cancanëma quëran imaitomahuë'. <sup>6</sup> Ina nani acorincoi a'china'huaiso marë'. Acohuachincoira, catahuarincoi nasha quëran anoyatërinso a'chinta'huainquëmaso marë'. Ina imapatëhua', Ispirito Santo catahuarinpoa' Yosë nohuitatëhua' nanpimiatacaso marë'. Iráca anoyatërinso Moisésëri ninshitopirinahuë'. Ina imapatëhua, co onporonta' noya cancantërehuahuë'. “Co natëhuatamahuë', chiminpatama', ana'intacaso' ya'huërin,” tënin. Co ina a'chintërainquëmahuë'.

<sup>7</sup> Iráca Yosë pënëntërinso' sha'huihuachina, na'piquë ninshitërin. Yosëso' noya noya ni'ton, huënaráchin ya'norin. Moisésë ya'pirionta' huënaratarin ni'ton, co israiro'sa' nanitopihuë' hua'qui' nirayacaiso'. Huënarataponahuë', oshaquëran sacorayarín.

Pënëntërinsona' noya niponahuë', co ya'huëmiatërinhuë'. Co ya'ipi natëhuachinahuë', chiminpachina', ana'intacaso' ya'huërin. <sup>8</sup> Iporaso nipirinhüë', nasha quëran anoyatërinso a'chinarai. ¡Ispirito Santo chachin catahuarinpoa' ni'ton, inaso' noya noya! <sup>9</sup> Iráca pënëntërinso' nanan noya nipirinhüë', co natëhuachinahuë', ana'intacaso' ya'huërin. Quisocriso nanamënso nipirinhüë', noya noya. Ina imapatëhua', oshanënpoa' inquitatonpoa', Yosë noya ni'sarinpoa'. Napoaton noya noya, ténahuë. <sup>10</sup> Iráca Moisésë noya pënëntopirinhüë', iporaso' noya noya ya'huëtërinpoa'. <sup>11</sup> Iráca pënëntërinso sha'huitohuachina, huënaráchin pochin ya'nopirinhüë', sacorin huachi, co ya'huëmiatarinhüë'. Iporaso' nasha quëran anoyatërinso', ya'huëmiatarin. Co onporonta' nishatarinhüë' ni'ton, noya noya, tënëhua'.

<sup>12</sup> “Inaso co ta'huantarinhüë',” ta'toi, inasáchin a'chinarai. Co tē'huatoihuë', ya'ipi parti a'chinarai. <sup>13</sup> Iráca Moisésë pënëntohuachina, ya'pirin huënaratopirinhüë', oshaquëran sacorayarin. Napoaton nipa'copirayatërin ama sacorayarinso' quënanacaiso marëhuë'. Quiyaso' co ina pochin a'chintërainquëmahuë'. <sup>14</sup> Israiro'saso nipirinhüë' co natan-tochináchinhuë' cancantopi. Ipora huanta' Yosë quiricanën iráca ninshitopiso' nontopirinhüë', co no'tëquën yonquipihuë'. Nipa'copirayatërinso pochin cancantatona', co nanitopihuë' Yosë quiricanën no'tëquën nitotacaiso'. Quisocrisoíchin catahuarinpoa' no'tëquën nitotacaso'. <sup>15</sup> Ipora huanta' Moisésë ninshitërinso' nontopirinhüë', co no'tëquën yonquipihuë'. <sup>16</sup> Quisocriso imapatëhua', co huachi nipa'copirayatëreso pochin cancantarihuahuë'. Siniro noya nohuitarihua'. <sup>17</sup> “Siniro” topatëhua', Ispirito Santo tapon naporëhua'. Ina catahuahuachinpoa', co huachi iráca pënëntërinso' imacaso' ya'huërinhuë'. Ispirito Santo nicha'ërinpoa' no'tëquën yonquicaso marë'. <sup>18</sup> Siniro imapatëhua', co huachi nipa'copirayatëreso pochin cancantarihuahuë'. Isihuicoquë ma'sha a'notëreso pochin ninëhua'. Yosë nóya nininso' piyapi'sa' anitotërehua'. Apira apira ina yonquihuatëhua', oshaquëran Yosë pochachin cancantarihua'. Ina nohuanton, Ispirito Santo catahuarinpoa' noya noya cancantacaso marë'.

## 4

<sup>1</sup> Yosë nosoroatoncoi, acorincoi ina nanamën a'china'huaiso marë'. Ina yonquiato, co yaa'poraihuë'. <sup>2</sup> A'naquënso' co noyahuë' yonquiatona', a'chinapi. Noyasha nonpirinhüë', nonpinacaiso marë' napopi. Quiyaso nipirinhüë' co manta' po'oana quëran ninaihuë' ni'ton, co tapana'huaiso' ya'huërinhuë'. Co nisha nisha a'chinaihuë'. Ya'ipi Yosë nanamën no'tëquën a'chintarainquëma'. Yosë ni'sárincoi ni'ton, inasáchin a'chinarai. A'ninquëchin a'chinai ya'ipi piyapi'sa' yonquicaiso marë'. <sup>3</sup> Quisocriso nanamën noya a'chintopiraihuë', a'naquën co yanatëtopihuë'. Parisitopiquë pacacaiso nipsisopita co nohuantopihuë' natëtacaiso'. <sup>4</sup> Sopai nohuanton, co nanitopihuë' no'tëquën yonquicaiso'. Ma'sha a'pintëreso pochin nanamën quëran Yosë anitotërinpoa' Quisocriso nohuitacaso marë'. Inaso' Yosë chachin ninin. Inapitaso nipirinhüë' somaraya pochin cancantatona', co nanitopihuë' natëtacaiso'. <sup>5</sup> Co quiya imancoiso marë' a'chintërainquëmahuë'. Quisocriso nanamënáchin sha'huitërainquëma'. “Siniro ni'ton, inasáchin yonquicaso' ya'huërin,” tēnai. Quiyanta' ina natëtoi, nani tahuëri yacatahuarainquëma'. <sup>6</sup> Ya'nan isoro'pa' acoapon ya'ipi parti tashipirinhüë': “Nii'sohuanchin huachi,” tēnin Yosë. Napohuachina, tahuëri ya'huërin. Inapochachin iporaso' cancanënpoaquë a'pintërinpoa' ina nohuitacaso marë'. Inaso' noya noya. Quisocriso ya'pirin quëran a'pintërinpoaso pochin ninin. Ina yonquihuatëhua', Yosë chachin anohuitarinpoa huachi.

### *Yosë natëtona', chiniquën cancantopiso'*

<sup>7</sup> Co quiyaso' chiniquën nanantopiraihuë', Yosë nohuitatoi, a'napitanta' catahuarai ina nohuitacaiso marë'. Ni'co'. Yonsha, huë'ëta, inapita no'pa quëran nipi ni'ton, co ya'huëmiatërinhuë'. A'naroáchin ya'quihuachina, co noyatërinhuë'. Napoonin. Inapochachin quiyanta' co chiniquën cancantopiraihuë', Yosë catahuarincoi nanamën

a'china'huaiso'. A'napitanta' natanatonacoi, yonquiapi. “Ma noyacha Yosëri catahuarin paya. Co catahuarinhuë' naporini, co ina pochin nanichitonahuë'” tosapi. <sup>8</sup> Nani ma'sha onpopiraihuë', Yosë catahuarincoi ahuanta'huaiso marë'. “Oshaquëran nicha'ësarincoi,” ta'toi, imarai. “¿Onpoatoicha ma'sha onporai paya?” tapoiraihuë', co pa'yanaihuë'. <sup>9</sup> A'chinoiso marë' chiniquën no'huipirinacoihuë', co Yosë nani-antërincoihuë'. Aparisitopirinacoihuë', co ata'huantërinacoihuë'. <sup>10</sup> Iráca Quisocristo chiniquën aparisitahuatona', tēpapi. Quiyanta' Quisocristo marë' parisitarai. A'naquën yatēparinacoi. Napoaponahuë' Quisocristo nanpianntarin ni'ton, catahuarincoi ina pochin nica'huaiso marë'. <sup>11</sup> Quisocristo nanamën a'chinoiso marë' yatēparinacoi. Quiyaora co nanitopiraihuë', nani tahuëri ina achinicananincoi ina pochachin yonquica'huaiso marë'. Ipora huanta' nanpitoi, Quisocristo pochin cancantarai. <sup>12</sup> A'chintërainquëmaso marë' aparisitattonacoi, yatēpapurinacoihuë', canpitaso' imarama'. Quisocristo anoyacancantërinquëma' ni'ton, nanpimiatarama', tēnahuë'.

<sup>13</sup> Yosë quiricanēnquë ninshitopi. “Yosë natërahuë ni'ton, sha'huirahuë,” tēnin. Quiyanta' inapochachin cancantërai. “Yosë catahuarincoi,” ta'toi, nanamën a'chinarai. <sup>14</sup> Tēpapurinacoihuënta', Quisocristo imarai ni'toi, Yosë ananpitaantarincoi, tēnai. Iráca Quisocristo ananpitaantarinsó' pochin quiyanta' ananpitaantarincoi. Yosë'pa' quēpantarincoi. Canpitaro'coi chachin ya'huëcontarihua huachi. <sup>15</sup> Canpitanta' imacamaso marë' parisitërai. Inaora nohuanton, Yosë na'con nosororincoi. Na'con na'con piyapi'sa' ina nohuitohuachina', noya cancantatona', Yosë nontapi. “Ma noyanquëncha, Sinioro, paya. Nosoroatoncoi, nicha'ësarancoi ni'ton, ‘Yosparinquën,’ Sinioro,” itapi.

<sup>16</sup> Napoaton co a'pochináchinhuë' cancantërai. Parisitatoi, co huachi chinipiraihuë', nani tahuëri achinicananincoi noya noya cancanta'huaiso marë'. <sup>17</sup> Tēhuēnchachin iporaso' pi'pian parisitapirëhuahuë', co hua'qui' isoro'paquë ya'huarihuahuë'. Yosë'pa' pa'patëhua', co onporonta' pipiarëhuahuë'. Imarëhuaso marë' parisitapirëhuahuë', inapaguëso' noya noya cancantarihua'. Yosë pochachin cancantarihua'. <sup>18</sup> Isoro'paquë ya'huërinso' co na'con na'con yonquirëhuahuë'. Iporaso' parisitarihuahuë', co ina marë' sëtarihua'. Yosë na'con na'con yonquiarëhua'. Ina nohuitacasoáchin cancantarihua'. Isoro'paquë ya'huërinso' co quēnanpirëhuahuë', co ya'huëmiatarinhuë'. Ta'huantarin. Yosë noya yonquirinpoasoso' co quēnanpirëhuahuë', ya'huëmiatarin.

## 5

<sup>1</sup> Ni'co'. Pëi' nē'mëtë quëran nipachinara, co hua'quirinhuë'. Inapochachin nonēnpoanta' co ya'huëmiatarinhuë'. Chiminpatëhua', Yosë'pa' pa'patëhua', nasha nonēnpoa' Yosë quëtarinpoa'. Noya noya nininsó' quëtarinpoa'. Inaso' co onporonta' chanatarinhuë'. <sup>2</sup> Iporaso' parisitapirëhuahuë', a'na tahuëri nasha a'morëhuaso pochin nasha nonēnpoa' ya'huëtarinpoa'. Ina na'con nohuantërehua'. <sup>3</sup> Chiminpatëhua', co hua'yanēnpoarachin inápaquë ya'huëmiatarinhuë'. Nasha nonēnpoa' quëtarinpoa'. <sup>4</sup> Iporaso' isoro'paquë ya'huatëhua', co chinirëhuahuë', sëtërehua', naporëhua'. Napopirëhuahuë', co chiminacaso' nohuantërehua'. Nasha nonēnpoa' tēhuēnchinsó' na'con nohuantërehua'. Isoro'paquë ta'huantopirëhuahuë', Yosë'pa' noya noya nanpimiatarihua'. <sup>5</sup> Yosë acorinpoa' nasha nonēnpoa' ya'huëtinpoaso marë'. Tēhuēnchachin inápaquë noya ananpitaantarinpoa', tēnhua'. Sichoquë marca acorëso pochin nani Ispirito Santo aya'coancantërinpoa' ni'ton, nitotërehua'.

<sup>6</sup> Napoaton chiniquën cancantërehua'. “A'na tahuëri Yosë'pa' pa'sarëhua',” ta'tëhua', noya cancantarëhua'. Tēhuēnchachin isoro'paquë nanpihuatëhua', co Quisocristo ni-rayarihua'. <sup>7</sup> Co ipora quēnanpirëhuahuë', “Yosë no'tëquën nontërinpoa',” ta'tëhua', natërehua'. “Co onporonta' nonpintarinpoahuë’,” tēnhua'. <sup>8</sup> Napoaton chiniquën cancantërehua'. “Chiminpatëhua', Quisocristorë'quënpoa' ya'huëcontarihua'. Inaso' noya

noya,” tēnhua'. <sup>9</sup> Ma'sona tēranta' nipatēhua', Yosēichin natērēhua' noya nicainpoaso marē'. Nanpihuatēhua', chiminpatēhuanta', Siniro nohuantērīnsoáchin nohuantērēhua'. <sup>10</sup> A'na tahuēri Quisocrīsto o'mantahuachin, ya'ipinpoa' coisē pochin sha'huitarinpoa'. Ya'ipi ninēhuasopita yonquiaton, a'naya a'nayanpoa' no'tēquēn nontarinpoa'. Co noya nipatēhuahuē', co Yosē'pa' acanaarinpoahuē'. Noya nipatēhua', acanaarinpoa huachi.

### *Nanan anoyatērinpoaso'*

<sup>11</sup> Napoaton Yosē tē'huatacaso' ya'huērin. Ina yonquiatoi, ya'ipi piyapi'sa' pēnēnārai. Co pi'pian tēranta' nonpintērainquēmahuē'. Yosē ni'sárincoi ni'toi, no'tēquēn nontērainquēma'. Noya ninaiso' canpitanta' nitotērama', topiraihuē'. <sup>12</sup> “Quiyaso' noya noyacoī,” co tēnaihuē'. Co a'napita nocanaihuē'. Nisha nanan a'china'piro'sa' noya pochin ya'noponaraihuē', co cancanēna quēran huarē' imapihuē'. Pinopachincoi, sha'huitoco': “Paono tēhuēnchachin no'tēquēn nontērincoi. Ya'ipi cancanēn quēran huarē' Quisocrīsto imarin,” itoco'. Ina pochin a'panicamaso marē' sha'huitaranquēma'. <sup>13</sup> A'naquēn na'con pēnēnpatēira, “Hua'yantopi,” itērinacoī. Napopirinahuē', Yosē yonquiatoi, naporai. A'na tahuērīnta' sanoanan quēran pēnēnainquēma'. Yosē yonquicamaso marē' ina pochin nontērainquēma'. <sup>14</sup> “Quisocrīsto na'con nosororinpoa',” ta'toi, nanamēn a'chinārai. Canpoa marē' inaso' chiminin. Ina imapatēhua', canpoanta' chiminēhuaso pochin ni'ninpoa'. <sup>15</sup> Tēhuēnchachin canpoa marē' chiminin noya noya cancantacaso marē'. Co huachi canpoara costarēhuaso' pa'yatacaso' ya'huērinhuē'. Inasáchin yonquicaso marē' chiminin. Chiminaponahuē', nanopiantarin ni'ton, inasáchin yonquirēhua'. <sup>16</sup> Iráca quiyaora yonquinhuei quēran yonquiatoi, aipi ya'norinsoráchin yonquirai. Quisocrīstonta' iráca co no'tēquēn yonquirapiraihuē'. “Co inaso' Yosē hui'ninhuē',” topiraihuē', iporaso' no'tēquēn yonquirai. <sup>17</sup> Quisocrīsto imapatēhua', Yosē anoyacancantarinpoa'. Nasha cancan ya'huētarinpoa huachi. Iráca yonquirēhuasopita naniantērēhua'. Nashamiachin pochin cancantatēhua', noya noya yonquiarīhua huachi.

<sup>18</sup> Co canpoara noya cancantērēhuahuē'. Yosēichin anoyacancantērinpoa'. Iráca oshahuanatēhua', Yosē inimicotopirēhuahuē', inaora nohuanton, hui'nin isoro'paquē a'paimarin chiminatōn nanan anoyatinpoaso marē'. Ina quēran quiyanta' acorincoi nanamēn a'china'huaiso marē'. Insosona natēhuachin, nanan anoyatarin. <sup>19</sup> Yosē nohuanton, hui'nin chiminin anoyacancantīnpoaso marē'. Anoyacancantohuachinpoa', co huachi oshanēnpoa' yonquirinhuē', inquitērinpoa huachi. Nani nanan anoyatohuachinpoara, quiyanta' acorincoi paatoī a'napita sha'huita'huaiso marē'. <sup>20</sup> Quisocrīsto chachin acorincoi a'napita anitota'huaiso marē'. Ina ya'huērēnamēn pochin sha'huitarainquēma'. “Yosē nontoco' nanan anoyachinquēma',” itárainquēma'. <sup>21</sup> Iráca Quisocrīsto co manta' oshahuanaponahuē', Yosē nohuanton, ya'huērētērinpoa'. Oshahuan pochin nicaton, Yosēri chiniquēn ana'intērin. Canpoa marē' chiminin ni'ton, co huachi oshahuan pochin ni'ninpoahuē'. Quisocrīsto imapatēhua', Yosē nóya ni'sarinpoa'.

## 6

<sup>1</sup> Yosē acorincoi nanamēn a'china'huaiso marē'. Acoatoncoi, catahuarincoi a'chinta'huainquēmaso marē'. “Yosē nosoroatonpoa', yanicha'ērinpoa',” itērainquēma'. Ama topinan quēran natancosohuē'. Imaco huachi. <sup>2</sup> Iráca quiricanēn quēran Yosē naporin:

“Ipora chachin yacatahuaranquēma'. Nontohuatamaco, natanaranquēma'.

Yanicha'ēranquēma' ni'ton, catahuaranquēma' cha'ēcamaso marē',” tēnin.

Ipora tahuēri chachin yacatahuarinpoa'. Nontohuatēhua', anoyacancantarinpoa', tēnahuē'.

<sup>3</sup> Napoaton noyasáchin ninai ama a'na piyapi tēranta' nisha cancantacaso marēhuē'. Co noyahué' ninai naporini, a'napitanta' nicatonacoī, co Yosē imaitonahuē'.



<sup>4</sup> Ma'sona tēranta' nipatoira, Yosēichin natērai piyapi'sa' niconaco'i ina yonquicaiso marē'. Aparisitopirinacoihuē', co i'huērētērai'huē'. Ma'sha, cosharo', inapita pahuantopirinacoihuē', ahuantatoi, chiniquēn cancantērai. Ma'sha onpoapoiraihuē', co pa'yanaihuē'. <sup>5</sup> A'chinoiso marē' tēhuēnchachin huihuirinacoi, tashinan pēiquē po'morinacoi. Chiniquēn no'huitatona', ahuerinacoi. A'chinapoi pa'sápatoi, co huachi chiniraihuē'. Na'a tashi' Yosē marē' sacatápatoi, huē'ēi' natanai. A'na tahuērinta' co coshatatoihuē', tana natanai. <sup>6</sup> “Quisocristo imarai,” ta'toi, noyasáchin ninai. Yosē nanamēn noya nitotērai. Ma'sha onpotopirinacoihuē', co no'huiraihuē', ahuantērai. Ya'ipi piyapi'sa' nōya nontatoi, catahuarai. Ispirito Santo ya'coancantērincoi ni'ton, catahuarincoi noya nica'huaiso'. Tēhuēnchachin cancanēhuēi quēran huarē' piyapi'sa' nosororai. <sup>7</sup> No'tēquēn a'chinai. Yosē na'con catahuarincoi ni'ton, a'chinpatoira, na'a piyapi'sa' natanatona', imasapi. Ni'co'. Inimicoro'sa' huē'pachinara, sontaro'sa' hua'na quēran a'morin ama inimicori paquitacaso marēhuē'. Inapochachin Yosē achinirincoi ama sopai minsēincoiso marēhuē'. Yosē nohuanton, noyasáchin ninai. Noya catahuarincoi ni'ton, sopai minsēarai. <sup>8</sup> A'naquēn noya ni'ninacoi. A'naquēnso nipirinhue' no'huirinacoi. A'na tahuēri: “Paono nōya a'chinin,” topi. A'na tahuēriso nipirinhue' pinorinacoi. No'tēquēn a'chintopiraihuē': “Nonpiánpi,” topi a'naquēnta'. <sup>9</sup> Na'a piyapi'sa' nohuitopirinacoihuē', a'naquēnso' nisha pochin niconaco'i, co yanataninacoihuē'. Pi'pianchin shichiminpiraihuē', nanpiárai. Chiniquēn aparisitopirinacoihuē', co tēparinacoihuē'. <sup>10</sup> Sētopiraihuē', Yosē yonquiatoi, noya cancantērai. Co na'con ma'sha ya'huētopirinacoihuē', Yosē nanamēn a'chintērai ni'ton, na'a piyapi'sa' natētonaco'i, noya noya cancantapi. Co manta' ya'huētopirinacoihuē', Yosē nohuitatoi, sano cancantērai. Co manta' noya nininso' pahuantērincoihuē'.

<sup>11</sup> Corintoquē ya'huēramasopita, na'con ninshitarainquēma'. Nani ya'ipi yonquiraiso', iyaro'sa', sha'huitērainquēma'. Na'con nosororainquēma'. <sup>12</sup> Quiyaso' ya'ipi cancanēhuēi quēran nosoromiatērainquēma'. Noyasáchin yonquipirainquēmahuē', canpitaso' co a'na nosororamacoihuē' nimara, tēnai. <sup>13</sup> Hui'nahuēpita pochin ni'nanquēma' ni'ton, inapochachin nosorocoi quiyanta', topiraihuē'. Ina na'con nohuantērai.

### *Nipayarēhuasopita*

<sup>14</sup> Co Yosē imapisopitasohuē' nipirinhue', ama inapitarē'quēma' na'con na'con nipayacosohuē'. Co canpita pochin cancantopihuē'. Noya cancantohuatama', co nohuan-taramahuē' oshahuanacamaso'. Ni'co'. Tahuēri, tashi' co inachachinhue'. Nisha nisha ya'nopi. <sup>15</sup> Quisocristo sopairē' co napopináchin yonquipihuē'. Naporahuaton, canpoaso' Quisocristo imarēhua' ni'ton, co oshahuano'sa pochin cancantērehuahuē'. <sup>16</sup> Yosē chinotērehuahuē' noyasáchin nicacaso' ya'huērin. Co inaquēso' mamanshi moshacaso' ya'huērinhuē'. Inapochachin canpoanta' Yosē imapatēhua', ya'coancantarinpōa' ni'ton, ina pēinēn pochin ninēhua'. Yosēso' nanpiárin. Quiricanēn quēran naporin:

“Imapatamaco, ya'coancantaranquēma'. Canpitáro'co ya'huarahuē.

Chinotohuatamaco, noya a'paiaranquēma'.

Piyapinēhuēpita pochin ni'saranquēma',” tēnin.

<sup>17</sup> Ina quēran Siniorori itantarin:

“A'naquēn co noyahuē' cancantohuachina', ama inapitarē'quēma' nipayacosohuē'.

Co noyahuē' yonquipiso' tananpitoco'.

Inapotohuatama', noya ni'saranquēma'.

<sup>18</sup> Tataparinquēma pochachin noya nosoroaranquēma'.

Hui'nahuēpita pochin cancantēranquēma',

itērinpōa' Tata Yosē. Chini chiniquēn nanantaton, ya'ipiya hua'anēntērin,” tēnin quiri-canēnquē.



## 7

<sup>1</sup> Iyaro'sa na'con nosororanguëma'. Ina pochin Yosë yonquirinpoa ni'ton, ya'ipi co noyahuë' yonquirëhuasopita naniantahua'. Ya'ipi co noyahuë' ninëhuasopitanta' a'poa'ahua'. Yosë të'huatatëhua', noyasáchin niahua'.

*Noya cancantantapiso'*

<sup>2</sup> Cancanëma quëran huarë' nosorocoi. Co a'nayanquëma tëranta' ma'sha onpotërainquëmahuë'. Co anishacancantërainquëmahuë'. Co nonpintërainquëmahuë'. <sup>3</sup> Co nocanatënguëma' pënënanquëmahuë'. Na'con nosororainquëmaso' nani sha'huitërainquëma'. Chimina'huaiquë huarë' nosoromiatarainquëma'. <sup>4</sup> Tëhuëenchachin nóya ni'nanquëma'. “Corintoquë ya'huëpisopita noya imapi,” itërahuë ya'ipi piyapi'sa'. Parisitaporahuë', canpita yonquiatënguëma', nóya cancantërahuë'.

<sup>5</sup> Masitoniaquë canconpatoira, na'con ma'sha onpoatoi napion cancantërai. Na'a piyapi'sa' no'huirinaicoi ni'ton, parisitërai. Naporahuaton, cancanehuëi quëran na'con yonquirápatëinguëma', sëtërai. <sup>6</sup> Sëtohuatëhua', Yosë achinicancaninpoa' ni'ton, quiyanta' achinicancanincoi. Ina nohuanton, Tito huë'nin. <sup>7</sup> Napoaton noya cancantërai. Noya nanan sha'huitiirincioi. Noya yonquiantarama' ni'ton, inanta' noya cancantërin. I'hua ni'conpachinguëmara, napotërama': “Hua'qui' co Paono ni'nincoihuë'. Sha'huitëquë' manóton huë'in. Co noyahuë' ninaiso marë' sëtërai. Paono pënënpachincoi, noya natanai,” tënama', itërincoi. Ina natanato, nóya cancantërahuë'.

<sup>8-9</sup> I'hua quirica ninshitatënguëma', chiníquën pënënanquëma'. Ina quirica nontohuata-mara, pa'pi sëtërama'. Ina natanato, canta' sëtopirahuë'. Co nohuantërahuë' chiníquën asëta'huanquëmaso'. Iporaso nipirinhue' noya cancantërahuë. Co hua'qui' sëtëramahuë'. Oshanëma marë' sëtatoma', na'con na'con Yosë yonquirama'. Co noyahuë' ninamasopita a'porama'. Pënënanquëma' ni'ton, co ana'intinguëmaso' ya'huërinhuë'. <sup>10</sup> Oshanënpoa marë' sëtatëhua', Yosë nontohuatëhua', catahuarinpoa' co noyahuë' yonquirëhuasopita naniantacaso marë'. Ina pochin sëtacaso' noya, tënahue. Ina quëran anoyacancan-tarinpoa'. Co imapisopitasohue' nipirinhue' topinan quëran sëtopi. Co oshanëna' naniantohuachinahuë', chiminpachina', Yosëri ana'intarin. <sup>11</sup> Canpitaso' sëtatoma', na'con na'con Yosë yonquirama'. Ina quëran “Tëhuëenchachin co noyahuë' nicatehua', oshahuanëhua'. Co noyahuë' ninëhuasopita naniantahua', Yosë ana'into huachinpoa',” tënama'. Canta' noya yonquiramaco. “Manóton Paono huë'in catahuainpoaso marë'. Chiníquën cancantatëhua', no'tëquën natëahua',” tënama'. Oshahuana'pi co noyahuë' nininso marë' ana'intërama' noya nicacaso marë'. Ya'ipi co noyahuë' yonquiramasopita naniantatoma', noya cancantaantarama'. <sup>12</sup> I'hua ninshitapon-quëma', co tëhuëna'pi yonquiato, ninshitëranquëmahuë'. Co inari aparisitërinso tëranta' yonquirahuë'. Ya'ipinguëma' noya yonquiantamacoiso' nohuantërahuë. “Paonoso catahuarinsopitarë chachin, no'tëquën pënëninpoa'. Yosë ni'sarinpoa' ni'quëhuarë', natëahua',” ta'camaso marë' ninshitëranquëma'. <sup>13</sup> Naporama' ni'ton, co huachi sëtëraihuë'.

Tito cantonpachinguëmara, co pi'pian tëranta' no'huiramahuë'. Noya nontërama' ni'ton, noya cancantërin. Quiyanta' ina natanato, nóya cancantërai. <sup>14</sup> Co'huara Tito pa'shátërasohue', sha'huitërahuë: “Corintoquë ya'huëpisopita noya imatona', natëarinënguën,” itërahuë. Canpita no'tëquën nontërainquëmaso pochachin Titonta' no'tëquën nontërahuë. Pa'pachina, tëhuëenchachin noya natërama' ni'ton, co tapanahuë'. <sup>15</sup> Pënënpachinguëmara, itërama': “No'tëquën pënënancoi. Tëhuëenchachin co noyahuë' ninai. Yosë të'huata'huaiso' ya'huërin,” ta'toma', natërama'. Ina natanahuaton, Titonta' na'con nosororinguëma'. <sup>16</sup> Caringuëmanta' yonquiatënguëma', nóya cancantërahuë. Noya noya imasarama huachi, tënahue.

## 8

*Pahuantërsopita catahuacaso' ya'huërinso'*

<sup>1</sup> Isonta' iyaro'sa' yasha'huitëranquëma'. Masitonia parti na'a piyapi'sa' Quisocristo imasapi. Nisha nisha ninanoquë niyontonatona', Yosë chinotapi. “Yosë na'con nosororinpoa',” ta'tona', a'napita noya nosoroapi. Yosëri chachin catahuarin ina pochin cancantacaiso marë'. <sup>2</sup> Ma'sha onpotohuachinara, chiniquën parisitaponaraihuë', noya cancantopi. Naporahuaton, pi'pisha ya'huëtopirinhue', a'napita imapisopita pahuantohuachinara, na'con coriqui quëtopi. <sup>3</sup> Co apiratonahuë', na'con quëtopi. Pahuantaiquëhuarë' quëtopi, cari ni'nahuë. Co sha'huitopiraihuë', inahuara nohuantatona', quëtërinacoi pahuantërsopita quëtaca'huaiso marë'. <sup>4</sup> “Quiyarinta' a'napita imapisopita catahua'ii, topiraihuë'. Cotia parti na'con pahuantopi ni'ton, iso coriqui quëtonquë',” itërinacoi. Na'con ina pochin nontërinacoi. <sup>5</sup> Co coriqui quëtacasoachin yonquipihuë'. Ya'ipi cancanëna quëran Yosë imapi. Ina'ton yonquipi. Ina pochin cancantacaso' noya noya, ténahuë. Ina quëran coriqui, ma'sha, inapita quëtopi. Quiyanta' yanatërinacoi. “Ma'sona Yosë nohuantohuachin, sha'huitocoi natë'i,” itërinacoi. <sup>6</sup> I'hua chachin Tito sha'huitërinquëma' ni'ton, canpitanta' yonquirama' coriqui yontonacamaso'. “Imapisopita pahuantopi ni'ton, a'patahua',” ténama'. Napoaton i'huamiachin Tito itërai: “Naquëranchin paantaton, pënëantaquë' ya'ipi coriqui yaa'papiso' ananina',” itërai. <sup>7</sup> Canpitaso' nóya imarama' ni'ton, Quisocristo natërama'. Na'con nitotatoma', a'chinama'. A'napita yacatahuarama'. A'chintëranquëmaso pochachin a'napita nosoroarama'. Napoaton iporaso' pahuantopisopita nosoroatoma', catahuaco', ténahuë.

<sup>8</sup> Co camairanquëmahuë'. A'napita na'con Yosë marë' acopiso' sha'huitëranquëma' yonquicamaso marë'. Tëhuënhachin a'napita nosorohuatama', ama topinan quëran nontocosoahuë'. Catahuaco' ama pahuanchinasohuë'. <sup>9</sup> Siniro Quisocristo nosoroatonpoa', catahuarinpoaso' nani nitotërama'. Iráca noya noya inápaquë ya'huëpirinhue', isoro'paquë o'marin nicha'ëinquëmaso marë'. Co manta' isëquë ya'huëtërinhuë'. Parisitërin quëran nicha'ërinquëma' noya noya cancantacaso marë'. Parisitaton, na'con catahuarinquëma'.

<sup>10</sup> I'hua pi'iquë yonquirama' a'napita catahuacamaso'. Naporo' caniaritërama' coriqui yontonacaso'. Iporaso' naquëranchin yontoantaco', ténahuë. Inapohuatama', noya nisarama'. <sup>11</sup> Naporo' pa'pi nohuantopiramahuë', iporaso' coriqui ya'huëtohuachinquëma', noya cancantatoma', yontonco' ananicaso marë'. <sup>12</sup> Ya'ipi cancanëma quëran quëtohuatama', Yosë noya ni'sarinquëma'. Co na'a coriquihuanpatamahuë', Yosë nitotërin. Co nanitëramahuë' na'a quëtacaso'. Co apiratomahuë', pi'pian tëranta' quëtohuatama', noya ni'sarinquëma'.

<sup>13</sup> Nanitinpichin acocaso' ya'huërin. Co nohuantërahuë' pahuantinquëmaso'. <sup>14</sup> Noya nicatahuacaso' nohuantahua'. Iporaso' ya'huëtarinquëma' ni'ton, pahuantërsopita quëtoco'. A'na tahuëriso' canpita ya'huëre' ma'sha pahuantohuachinquëma', inahuanta' i'huëretarinëinquëma'. Ninapotohuatëhua', ya'ipi imarëhuasopita noya ya'huarigua'. Co pahuantaripoahuë'. <sup>15</sup> Iráca Yosë quiricanënuë naporin: “Mana mapachinara, a'naquënso' na'a maponaraihuë', co ya'sotopihuë'. A'naquënso nipirinhue' pi'pian maponaraihuë', co pahuantopihuë',” ténin.

*Tito Corintoquë a'parinso'*

<sup>16</sup> Titonta' na'con yonquirinquëma'. Ina marë' noya cancantato, “Yosparinquën, Siniro,” itërahuë. <sup>17</sup> “Naquëranchin paantaquë',” itohuatëra, “Noyahua'. Nani canta' yonquirahuë paanta'huaso'. Na'con nohuantërahuë',” itërinco.

<sup>18</sup> A'na iyayanta' a'paarai. Titorë' pa'sarin. “Inanta' nóya imaton, Quisocristo nanamën noya a'chinin,” topi ya'ipi imapisopita. <sup>19</sup> Nisha nisha ninano quëran imapisopita niyontonahuatona', ina quëmapa chachin huayonahuatona', acopi ca'tanaincoiso

marë'. Coriqui yoca'huaiso marë' pa'patoi, inanta' pa'sarin. Coriqui quëtonpatoi, noya cancantapona huachi. "Ma noyacha Tata Yosë nosororinpoa paya. Ina nohuanton, iyaro'sa' noya cancantatona', catahuarinënpoa'," taponá'. <sup>20</sup> Na'a coriqui quëparai ni'ton, co nohuantëraihuë' a'napita pinoinacoiso'. Napoaton ina napocoi pa'sarai. <sup>21</sup> Noyasáchin nisarai Yosë noya nicainacoiso marë'. Piyapi'santa' noya nicainacoiso' nohuantërai.

<sup>22</sup> A'na iyayanta' a'parai nicainquëmaso marë'. Inanta' na'con catahuarincoi a'china'huaiso marë'. Piyapi'sa' nosoroaton, catahuarin, a'chintërin, naporin. Noya quëmapi, tënai. Ipora canpitataquë pa'sarin. "Corintoquë imapisopita na'con nohuantopi pahuantërinso'catahuacaiso'," ta'ton, pa'sarin catahuainquëmaso marë'.

<sup>23</sup> "¿Inta' Titoso'?" itohuachinënquëma', sha'huitoco'. "Co'ta Paonorë' a'chininso'. Inanta' piyapi'sa' catahuarin noya imacaiso marë'," itoco'. "¿Ma'marëta' a'napitanta' huë'pi?" itohuachinënquëma', "Nisha nisha ninano quëran a'paipiso'. Quisocriso noya imapi inapitanta'," itoco'. <sup>24</sup> Inapita cantonpachinquëma', noya nontoco'. Ina quëran coriqui pahuantërinso'catahuacaiso marë' yontonamaso' quëtohuatama', noya ni'sarinënquëma'. "Paono no'tëquën nontërinpoa'. Corintoquë imapisopitaso' pahuantopisopita nosoropi mini," tosapi. Ina quëran ya'huëpiquë chachin paantahuachina', sha'huirapi anta'. Ya'ipi imapisopita nitotapi huachi.

## 9

### *Imapisopita catahuacaso marë' coriqui yontonpiso'*

<sup>1</sup> Tëhuënchachin a'napita imapisopita pahuantohuachina', ma'sha quëtacaso' ya'huërin. Nani nitotërama' ni'ton, co na'con ninshitaranquëmahuë'. <sup>2</sup> Piyapi'sa' yacatahuaramaso' nitotërahuë. Ya'ipi Masitonia parti pa'pato, sha'huitëra'piarahuë. "I'hua pi'iquë chachin Acaya parti imapisopita na'con yonquipi pahuantërinso'catahuacaiso'," itërahuë. Masitoniaro'sa' natantahuatona', inahuanta' nohuantopi. "Inapita pochin quiyanta' catahuachi, topiraihuë'," itërinaco na'aya'pi. <sup>3</sup> Nipirihuë', "Co ya'ipi coriqui yontonchätërapihuë'," ta'to, isopita iyaro'sa' a'pataranquëma' nontinquëmaso marë'. "Nani yontonapi huëshirahuë," itopirahuë', ipora huanta' pahuanamara. Co topinan quëran napota'huaso' ya'huërinhuë', tënahüë. <sup>4</sup> Co hua'quiya quëranhuë' canpitataquë pa'sarahüë. A'naquën Masitoniaquë ya'huëpisopita imasarinaco nimara. Canpitataquë canconpatoi, nani coriqui yontontopinan quënanconarai, topirahuë'. Co ya'huëhuachinhuë', tapanarahüë. "Corintoquë imapisopitaso' noyaro'sa'," itërahuëso marë', co coriqui ya'huëhuachinhuë', tapanarama' canpitanta'. <sup>5</sup> Napoaton iyaro'sa' aquëchitërahuë. I'hua yonquirama' a'napita catahuacaso'. Inapitaso' catahuarinënquëma' coriqui yontonacamaso marë'. Nani yontonpatama', noya quënanconarai. Canpitaora nohuanton, quëtoco'. Co quiyaora nohuanton, yama'parainquëmahuë'.

<sup>6</sup> Isonta' yonquico': "Pi'pian sha'tohuatëra, pi'pian manë'. Pancana sha'tohuatëra, na'con manë'," topi. <sup>7</sup> Ya'ipinpoa' canpoara nohuanton, quëtahua'. Onposona yaquëtohuachin, quëchin. Ama nisha nisha yonquia'huasohüë'. Co apiquëran quëtacaso' ya'huërinhuë'. Noya cancantatëhua', quëtahua'. Ina pochin quëtohuatëhua', Yosë noya ni'sarinpoa'. <sup>8</sup> Yosë ya'ipi nanitaparín. Nosoroatënquëma', na'con catahuarinquëma' noya nicacamaso'. Nani tahuëri catahuarinquëma'. Ina catahuahuachinquëma', noya cancantarama'. Ina nohuanton, ya'huëtarinquëma' a'napitanta' quëtacaso marë'. <sup>9</sup> Iráca Yosë quiricanënquë naporin:

"Noya cancantopisopita co apirapihuë'. Sa'ahuaros' pahuantohuachina', quëtapi. Noya nipiso', ya'huëmiatarin," tënin.

<sup>10</sup> Ni'co'. Yosë nohuanton, ya'pirin ya'huërin shacacaso marë'. Sha'patëra, ina nohuanton, na'a papotërin capacaso marë'. Inapochachin ina nohuanton, ma'sha ya'huëtarinquëma'. A'napita topinan quëtohuatama', Yosë catahuarinquëma' noya noya cancantacamaso marë'. <sup>11</sup> Noya catahuahuachinquëma', a'napitanta' catahuarama'. Co

apiratomahuë', quëtarama'. Pahuantërsopita quëtonpatoi, “Yosparinquën, Siniro,” tosapi. <sup>12</sup> Imapisopita catahuahuatama', co huachi pahuantapihuë'. Naporahuaton, na'con na'con Yosë yonquiapi. “Yosparinquën, Siniro,” itapi. <sup>13</sup> Catahuarama' ni'ton, noya cancantapi. “Ma noya Quisocristo nanamën natëtona', catahuarinënpoa'. Ma noyacha Yosëso' ni'ton, ina nohuanton, na'a piyapi'sa' catahuapi paya,” tosapi. <sup>14</sup> Yosë nohuanton, na'con nosororama' ni'ton, inapitanta' nosoroatënquëma', canpita marë' Yosë nontapi huachi. <sup>15</sup> Yosëso nipirinhüë' na'con na'con quëtërinpoa'. Hui'nin chachin a'paimarin nicha'ëinpoaso marë'. Inaso' noya nóya ni'ton, “Yosparinquën, Siniro,” itahua'.

## 10

### *Yosëri nanan quëtërinso'*

<sup>1</sup> Ca Paonoco sanoanan quëran pënënanquëma'. A'naquën napopi: “Paono aquë quëran ninshitohuachinpoara, chiníquën nanan a'patirinpoa'. Isëquë chachin ya'huapon, tē'huatatonpoa', co chiníquën pënëninpoahuë',” topi natantërahuë. Quisocristoso' chiníquën nanantaponahuë', co no'huirinpohuë'. Sanoanan quëran pënëninpoa'. Ina pochin cancantato, canta' sanoanan quëran pënënanquëma'. <sup>2</sup> A'naquënso' pinorinaco. “Paonosoco Yosë pochin yonquirinhüë'. Inaora nohuantërsinsoáchin yonquirin,” topirinahuë'. Pa'pato, inapita chiníquën pënënarahuë. Canpitaso nipirinhüë', noya yonquihuatama', co chiníquën pënëna'huanquëmaso' ya'huaponhuë', tēnahuë. <sup>3</sup> Piyapicoi quiyanta' nipirinhüë', co a'napita pochin yonquirinhüë'. Co natëpisopitahuëso' inimicotopirina-coihuë', co quiyaora yonquinëhuëi quëran yaminsëraihuë'. <sup>4</sup> A'naquënso' inimiconënpita minsëcaiso marë' nisha nisha quihuípi. Quiyaso nipirinhüë' co quiyaora yonquinëhuëi quëran minsëtaraihuë'. Sacai' nipirinhüë', Yosë ananitërsincoi nonpin nanano'sa' minsëca'huaiso'. <sup>5</sup> A'naquën nisha nanan imasapi. “Quiyaora noya nitotërai,” toconpi ni'ton, co nanitopihuë' Yosë nohuitacaiso'. Nipirinhüë', Yosë catahuarincoi inapitanta' minsëca'huaiso'. No'huipirinacoihuë', no'tën nanan a'chintarai Quisocristoíchin natëcaiso marë'. Ya'ipinpoa' co noyahuë' yonquipirëhuahuë', Yosë nanitërsin ananiantinpoaso' Quisocristoíchin natëcaso marë'. <sup>6</sup> Canpita noya natëhuatama', noya cancantarai. Ina quëran canconpatoi, co natëpisopitahuë' no'tëquën ana'ntarai.

<sup>7</sup> Canpitaso' ya'pirama quëran quënanamasoráchin yonquirama'. Co cancanëma quëran huarë' yonquiramahuë'. A'naquën “Quisocristo chachin imarai,” topachinara, isonta' yonqui'ina'. Quiyanta' Quisocristo imarai mini. <sup>8</sup> Yosë chachin chiníquën nanan quëtërsincoi nanamën a'chinta'huainquëmaso marë', itohuatënquëmara, co ina marë' tapanahuë'. Noya noya imacamaso marë' a'chintërsinquëma'. Co nisha cancantamaso marë' a'chintërsinquëmahuë'. <sup>9</sup> Chiníquën nanantopirahuë', co apa'yanahuanquëmaso marë' ninshitaranquëmahuë'. <sup>10</sup> A'naquën itërsinquëma': “Paono na'con ninshitatonpoa', chiníquën pënënpirinpoahuë'. Huë'pachinaso', co chiníquën nanantona'pi pochin nontërsinpoahuë'. Sanoanayan quëran a'chintërsinpoa' ni'ton, co chiníquën nanantërsinhüë',” toconpi. <sup>11</sup> Napopirinhüë', co nisha nisha nontaraihuë'. Inapitanta' sha'huitoco' nitochina'. Ninshitohuatënquëmara, chiníquën pënënanquëma mini. Canpitaquë canconpatoi, inachachin nontarainquëma'. Insosona co yanatëhuachinhüë', chiníquën pënënato, ana'ntarai huachi.

<sup>12</sup> Inapitaso' co no'tëquën yonquipihuë'. “Quiyaso' noya noyaco. A'napita quëran noya noya nitotërai,” toconpi. Co ina pochin nonacasohüë' nipirinhüë', napopi. Inahua capini ninocanatoná', ninapotopi. Co quiyaso' inapita pochin cancantërsinhüë'. <sup>13</sup> Co quiyaora nohuanton, chiníquën nanantërsinhüë'. Yosë chachin acorincoi na'a piyapi'sa' a'chinta'huaiso marë'. Insëquësona a'china'huaisonta' sha'huitërsincoi. Ina nohuanton, Corintoquë ya'huëramasopitanta' a'chintërsinquëma'. <sup>14</sup> Yosë sha'huitërsincoisoráchin natërai. Ina nohuanton, canpitaquë pa'nai. Quiyarima'ton Quisocristo nanamën



a'chintërainquëma'. <sup>15</sup> Co a'na piyapi a'chinquë paatoi, a'chinaihuë'. Yosë a'parincoi noya a'chinta'huainquëmaso marë'. Na'con nohuantërai noya noya imacamaso'. Noya noya natëhuatama', aquëtë huarë' a'chintarainquëma'. <sup>16</sup> Ina quëran a'napita ya'huërinquënta' yaa'chinai. Inapitanta' Yosë imacaiso marë' a'chintarai. A'na piyapi a'chinquë co nohuantëraihuë' a'china'huaiso'.

<sup>17</sup> Yosë quiricanënguë naporin: “ ‘Noya noya ninahuë,’ co ta'caso' ya'huërinhuë'. ‘Ma noyacha Yosë catahuarinco paya,’ ta'caso' ya'huërin,” tënin. <sup>18</sup> “Caso' noyaco,” topatëhua', co ina marë' Yosë noya ni'sarinpoahuë'. Noya cancantohuatëhua', Yosë noya ni'sarinpoa'. Ina na'con na'con yonquia'ahua'.

## 11

### *Nisha a'china'piro'sa'yanonpinpiso'*

<sup>1</sup> Noya nipatëhua', co ina marë' a'napita nocanacaso' ya'huërinhuë'. Nipirinhuë', pi'pian hua'yantërinso pochin nonchinquëma' natanco. No'tëquën yonquicamaso marë' sha'huitaranquëma'. <sup>2</sup> Yosë nohuanton, na'con nosororanquëma'. Nosoroatënguëma', a'pitëranquëma'. Co nohuantërahuë' nisha cancantacamaso'. Nanon so'yarinso pochin ninin. Ni'co'. Quëmapiri mapachina, so'ináchin yonquicaso' ya'huërin. Inapochachin carinquëmanta' a'chintëranquëma' Quisocristoíchin yonquicamaso marë'. <sup>3</sup> A'naquënso nipirinhuë' yaanishacancantërinënguëma'. Iráca ya'huani Ipa nonpintërinso pochin yanonpintërinënguëma' ama Quisocristoíchin yonquicamaso marëhuë'. <sup>4</sup> Quisocristo imacaso' a'chintëranquëma'. Natëhuatama', Ispirito Santo ya'coancantërinquëma'. Inapitaso nipirinhuë' nisha a'chintërinënguëma'. “Quisocristo nanamën chachin a'chintarainquëma'” itopirinënguëmahuë', nisha nanan a'chintërinënguëma'. Nisha ispiritonta' ya'huërin, itërinënguëma'. Nisha nisha natëcaso' a'chintohuachinquëmara, a'naroáchin yaimarama'. <sup>5</sup> “Quiyaso' noya noyaco,” itopirinënguëmahuë', inapitaso' co ca quëran noya noyahuë', tënhuë. <sup>6</sup> Co míso nona'picohuë' niporahuë', noya noya nitotërahuë. Ya'ipi no'tëquën a'chintëranquëmaso' nani nitotërama'. Nani ma'sha ninahuësonta' nani ni'nama'.

<sup>7</sup> Yosë nanamën a'chintohuatënguëmara, co pi'pisha tëranta' coriqui ma'paranquëmahuë'. Sacatato, ma'sha pahuantërinco' pa'anahuë. Topinan a'chintëranquëma' canpita noya noya imacamaso marë'. ¿Ina marë' co noyahuë' ni'namaco ti? <sup>8</sup> A'chintëranquëmaso marë' co manta' ma'paranquëmahuë'. A'napita imapisopita coriqui a'patërinaco catahua'huanquëmaso marë'. Naporo' co inapita a'chintopirahuë', a'patërinaco. <sup>9</sup> Canpitataquë ya'huasoco, ma'sha pahuantopirincohuë', co pi'pisha tëranta' ma'paranquëmahuë'. Masitonia parti quëran huëcatona', quëtirinaco. Quisocristo imapi ni'ton, topinan ma'sha quëtirinaco nanpica'huaso marë'. Canpita ma'shanëma' co ma'paranquëmahuë'. Co onporonta' nohuantaparanquëmahuë'. <sup>10</sup> Quisocristo catahuarinco ni'ton, no'tëquën nontaranquëma'. Co a'chinato canarahuë'. Ya'ipi Acaya parti topinan a'chinarahuë. Napoaton noya cancantërahuë. Co insonta' nanitarinhuë' nisha ayonquincoso'. <sup>11</sup> “Co nosororinquëmahuë' ni'ton, ma'shanëma' co ma'parinquëmahuë'” itopirinënguëmahuë', co no'tëquën nonpihuë'. Yosë ni'sárinco, na'con nosororanquëma', tënhuë.

<sup>12</sup> Nisha a'china'piro'sa' a'chintohuachinënguëmara, coriqui ma'parinënguëma'. Caso nipirinhuë' a'chinahuëso marë' co coriqui ma'patërahuë'. Ipora huanta' topinan a'chinárahue' ama pinoinacoso marëhuë'. Inapita pochin canta' ma'paranquëma' naporini, “Paono pochachin a'chintërainquëma'. Yosë a'parincoi quiyanta'” ichitënenquëmahuë'. <sup>13</sup> Inapitaso nipirinhuë' na'con nonpintërinënguëma'. “Quisocristo a'parincoi,” itopirinënguëmahuë', co tëhuënchachin a'parinhuë'. Nonpintatënenquëma', a'chintarinënguëma'. <sup>14</sup> Co ina marë' pa'yanacaso' ya'huërinhuë'. Ni'co'. Satanasënta' nohuantohuachin, Yosë anquëninën pochin ya'norarin piyapi'sa' nonpintacaso marë'.



<sup>15</sup> Napoaton Satanase natëpisopitanta' ina pochachin nisapi. “Yosë a'parincoi. No'tëquën natëcamaso marë' a'chintarainquëma',” topirinahuë'. Nonpinapi ni'ton, a'na tahuëri Yosëri no'tëquën ana'intarin.

### *Paono parisitërinso'*

<sup>16</sup> Naquëranchin sha'huitanta'inquëma'. “Paonoso' hua'yantërin,” toconpi a'naquën. Ama inapita natëcosohuë'. Nipirinhaüë', pi'pian ina pochin nontohuatëinquëma', ahuanatoma', natanco, topirahuë'. Caso' noya noya ninahuëso' sha'huitaranquëma' yonquicamaso marë'. <sup>17</sup> Co Siniro nohuantërinhuë' a'napita nocanacaso'. Nocantohuatëra, hua'yantërinso pochin nonëhua'. <sup>18</sup> Nipirinhaüë', nisha a'china'piro'sa' ina pochin nonpi ni'ton, canta' pi'pian ina pochin sha'huichinquëma'. <sup>19</sup> Inapitaso' nocanpirinëinquëmahuë', noya natanama' ni'quëhuarë', canta' pi'pian tëranta' natanco, topirahuë'. <sup>20</sup> Inapitaso' chiniquën camairinëinquëma'. Ma'shanëma' topinan mapi. Nocaninëinquëma', yaahuërinëinquëma'. Inapotopirinëinquëmahuë', ¿ma'marëcha noya natanama nicaya? tënahuë, yonquiato. <sup>21</sup> Quiyaso nipirinhaüë' co ina pochin ninaihuë'. Co chiniquën nontërainquëmahuë'. Ina marë' tapanai.

Nipirinhaüë', inapitaso' nocaninacoi ni'quëhuarë', canta' hua'yantërinso pochin nonato, pi'pian nonantapatarahuë. <sup>22</sup> “Quiyaso' Iprio piyapicoi,” topachinara, canta' mini Iprioco. “Israiro piyapicoi,” topachinara, canta' inachachin ninahuë. “Apraanso' shimashonëhuëi chachin,” topachinara, inaso' shimashonëhuë canta'. <sup>23</sup> “Quisocristo sha'huitërincoi ni'toi, natërai,” itopirinëinquëmahuë'. ¡Caso' na'con na'con natërahuë! Inapitaso' nocaninaco ni'ton, hua'yantërinso pochin nonato, pi'pian inapita pochin nonchinquëma' no'tëquën yonquicamaso marë'. Yosë marë' caso' chini chiniquën sacatërahuë. Pa'sápato, Yosë nanamën a'chinahuë. Ina marë' na'con na'con parisitaporahuë', ahuantërahuë. Inanta' sha'huichinquëma'. A'chinahuëso marë' na'aro' tashinan pëiquë po'morinaco. Na'aro' ahuerinaco. Shitëparinaco. <sup>24</sup> Cotio hua'ano'sa' ana'intatonaco, chiniquën huihuirinaco. Cara shonca iscono' huihuirinaco. Nisha nisha ninanoquë a'natëraporo' inapotëra'piarinaco. <sup>25</sup> Copirno sontaro'sanënpita naraquë chiniquën ahuerinaco. Cararo' inapotatonaco, ana'intërinaco. A'na tahuëri na'piquë të'yararinaco tëpainacoso marë'. Naporahuaton, cararo' pi'pishachin shichimiitërahuë. Nanchaquë marë pa'taporahuë', nancha yancominahuaton, acopoi' pa'nin. Cararo' inaporahuë. A'na tashi' nara yanponinquë matato, marëquë chachin tahuërianpitërahuë. I'huaraya huarë' cha'ërahuë. <sup>26</sup> A'chinaca'huaso marë' pa'sárahüë. Iiro'sa' panca pamatohuachina, shichimiitërahuë. Ihuatëro'santa' yatëparinaco. Canta' cotio piyapico nipirahuë', cotioro'sa' no'huitonaco, yaahuërinaco. Nisharo'santa' no'huirinaco. Panca ninanoro'saquë a'naquën yaahuërinaco. Co piyapi ya'huërinquëonta' ma'sha onporahuë. Marë pa'tohuatëra, parisitërahuë. A'naquën: “Quiyanta' imarai,” taponaraihuë', chiniquën no'huirinaco. <sup>27</sup> Chiniquën sacatápato, parisitërahuë. Tashinta' co huë'ëtorahuë', ni'tárahüë. Na'a tahuëri capa cosharo' ni'ton, tanarahuë, yamororahuë. Co coshataporahuë', a'chinárahüë. A'moca'huaso' pahuantërinco ni'ton, sëhuën natanahuë.

<sup>28</sup> Yosë nohuanton, ina pochin parisitárahüë. Naporahuaton, ya'ipi imaramasopita nosoroatëinquëma', yonquiáranquëma'. Noya noya imacamaso' na'con nohuantërahuë. Nani tahuëri yonquiátëinquëma' napion cancantërahuë. <sup>29</sup> A'naquën co chiniquën cancantohuachinahuë', canta' ina pochin ninatanahuë. A'na piyapi anishacancantohuachinquëmara, nosororanquëma' ni'ton, ina no'huirë pochin cancantërahuë. <sup>30</sup> A'naquënso' na'con nonsapi. “Quiyaso' noya noyaco,” topi. Caso nipirinhaüë' co ina pochin nonahuë'. Co caora nanitërahuëso' sha'huichinquëma'. Na'con ma'sha onpotopirinacohuë', Yosëichin achinicananinco ahuanta'huaso marë'. <sup>31</sup> Yosë ni'sárinco, co nonpintaranquëmahuë'. Inaso' Quisocristo pa'pin chachin, ya'ipiyari chinochina'. Ina ni'sárinco

ni'ton, no'tëquën nontaranquëma'. <sup>32</sup> Iráca Tamascoquë ya'huasoco, ninano hua'an ya-maninco, copirno Aritasëri acorinso'. Tashinan pëiquë yapo'morinco ni'ton, sontaro'sa' a'parin. Nani tahuëri ninano ya'coana ni'sapi macainacoso marë'. <sup>33</sup> Yamapirinacohuë', imapisopita catahuarinaco cha'ëca'huaso marë'. Inapa pairatopiquë huintana ya'huërin. Ina quëran nantipiquë anohuaraimarinaco. Napotohuachinacora, cha'ërahuë. Co caora nanitopirahuë', Yosë catahuarinco, cha'ërahuë.

## 12

### *Paono inápaquë quënaninso'*

<sup>1</sup> Co nohuantërahuë' a'napita nocana'huaso'. "Caso' noya noya piyapico," co taporahuë', pi'pian ina pochin sha'huichinquëma'. Iráca Yosë nohuanton, hua'narëso pochin ma'sha ni'nahuë. Quisocriso chachin anitotërinco'. <sup>2</sup> Naporó' inápaquë Yosë ya'huërinquë chachin quëparinco. Nani shonca catapini pi'ipitarin quëparinco'. Hua'yanëhuëichin a'na' pa'mara. Nonëhuëro'co chachin a'na' pa'maraco. Co caso' nitotërahuë'. Yosëichin nitotërin. <sup>3</sup> Tëhuëenchachin pantarahuë. Hua'yanëhuëichin a'na' pa'mara. Nonëhuëro'co chachin a'na' pa'maraco. Co caso' nitotërahuë'. Yosëichin nitotërin. <sup>4</sup> Yosë'pa' ya'huasoco, na'con natanpirahuë', co nanitërahuë' sha'huica'huaso'. Co Yosë nohuantërinhuë'. <sup>5</sup> Noya noya nininso' anitotërinco ni'ton, nocantochináchin cancantopirahuë', tananpitërahuë. Co caora nohuanto, chiníquën nanantërahuë'. Co caora nanitërahuë' noya nica'huaso', ténahuë. <sup>6</sup> "Na'con na'con nitotërahuë," itëranquëma' naporini, no'tëquën nonchitëinquëmahuë', co nonpinchitëinquëmahuë'. Nipirinhüë', co ina pochin nontëranquëmahuë'. Nani nohuitëramaco. A'chintohuatëinquëmara, natanamaco. Naporahuësopita ni'nama'. Ináchin yonquiatoma', noya ni'co topirahuë'. Napoaton co aquëtë' sha'huitaranquëmahuë'.

<sup>7</sup> Yosë na'con na'con anitotërinco. Ina quëran ama a'napita nocana'huaso marëhuë' ina nohuanton, ma'sha onporahuë. Nahuan acoposha ohuanincoso pochin natanahuë. Co oshahuanaporahuë', Satanasë na'con aparisitërinco. <sup>8</sup> Ina marë' chiníquën Siniro nontërahuë. "Catahuaco ama parisichisohuë'," itërahuë. Cararo' ina pochin nontopirahuë'. <sup>9</sup> Siniro sha'huitërinco: "Ca nohuanto, ipora huanta' parisitapiranhüë', nosoroatëinquën, na'con catahuaranquën. Carinquën achinicananaranquën noya ahuantamaso marë'. Co quëmaora nanitohuatanhüë', na'con na'con catahuaranquën. Ma'sona tëranta' onpohuatan, co onporonta' pataranquënhüë'," itërinco. Napoaton co huachi sëtërahuë'. "Co caora nanitohuatërahuë', Quisocriso na'con na'con catahuarinco," ta'to, noya cancantërahuë. <sup>10</sup> Napoaton co chiníquën cancantopirahuë', co pa'yanahuë'. Pinopachinacora, co no'huitërahuë'. Ma'sha pahuantopirinhüë', co ina yonquirahuë'. Quisocriso imarahuëso marë' aparisitohuachinacora, ahuantërahuë. Sacai' nipirinhüë', nóya cancantërahuë. "Co caora nanitohuatërahuë', na'con na'con catahuarinco," ta'to, chini chiníquën cancantërahuë.

### *Imapisopita yonquirinso'*

<sup>11</sup> Nisha a'china'piro'sa' pa'yatërama' ni'ton, hua'yantërinso pochin nontëranquëma'. "Paono nóya a'chintërincoi," itërama' naporini, co ina pochin canta' nonaca'huaso' ya'huë'itonhuë'. "Quiyaso' noya noyacoi," itopirinhëinquëmahuë', co ca quëran noya noyahuë' inahuaso'. Co caora nanitaporahuë', Quisocriso catahuarinco ni'ton, noya ninahuë. <sup>12</sup> Iráca isoro'paquë nipon, a'naya a'naya huayonaton, acorin nanamën a'chinacaiso marë'. Inapitaso' na'con catahuarin. Ina nohuanton, cania'piro'sa' a'naroáchin anoyatopi. Nani ma'sha nanitapapi. Inapopi quëran acorinsopita nohuitërehua'. Canta' acorinco ni'ton, inapochachin catahuarinco. Canpitataquë ya'huapo, cania'piro'sa' a'naroáchin anoyatërahuë. Aparisitopirinacohüë', ahuantato, a'chintëranquëma'. "Ma noyacha Yosëri catahuarin paya," ta'toma', imarama'.

<sup>13</sup> A'naquënso nipirinhüè' sha'huitërinënguëma'. “A'napita imapisopita noya noya ni'nin,” itopirinënguëmahüè', ya'ipinguëma' napopináchin ni'nanquëma'. A'na parti a'chinpato, cosharo', coriqui, inapita ma'patërahuë capato, nanpica'huaso marë'. Canpitaíchin co ma'pachinanguëmahüè'. ¿Ina marë' no'huiramaco ti? No'huivatamaco, jnaniantoco'!

<sup>14</sup> Nani catoro' ni'conanquëma'. Iporaso' naquëranchin nicaponquëma' yapa'sarahuë. Cantonpatënguëma', co manta' ma'paaranquëmahüè'. Co ma'shanëma' nohuantërahuë'. Canpita noya noya imacamaso' nohuantërahuë. Hui'nahuëpita pochin ni'nanquëma'. Hui'nanpoa' co nocomarinpoahuë'. Canpoari catahuacaso' ya'huërin. <sup>15</sup> Napoaton co manta' ma'paranquëmahüè'. Noya cancantato, sacatarahuë cosharo' pa'ana'huaso marë'. Ina quëran parisitaporahuë', a'chintaranquëma' noya imacamaso marë'. Carimaso' na'con na'con nosoropiranquëmahüè', canpitaso' co onpopinchin nosororamaco-hüè' topirahuë'.

<sup>16</sup> A'naquëonta' nonpinapirinaco. “Paono co ma'sha ma'papiinguëmahüè', nonpin-tatënguëma', canarin,” itërinënguëma'. Co napopirahuë', napotërinënguëma'. <sup>17</sup> I'hua mini a'naquën a'papiirahuë', co manta' ina quëran canarahuë'. <sup>18</sup> “Inta, quëmari ni'coniquë' iyaro'sa,” itahuato, Tito a'parahuë. Inarë' a'na iyayanta' a'parahuë. Cantonpachin-quëma', co Tito nonpintërinquëmahüè'. Canta' ina pochachin cancantërahuë. Co pi'pisha tëranta' canaraihuë'.

<sup>19</sup> Co noya nicamacoiso marë' ninshitarainquëmahüè'. A'naquëma' nimara ina pochin yonquipiramahuë', co quiyaso naporaihuë'. Nosororainquëma' iyaro'sa'. Noya noya imacamaso marë' ninshitarainquëma'. Quisocristo imarai ni'ton, Yosëíchin yonquirai. Ina ni'sárincoi ni'ton, no'tëquën ninshitarainquëma'. <sup>20</sup> Canconpato, co noya ni'saranquëmahüè' nimara. Canpitanta' co noya ni'saramacohüè' nimara. Napoaton sëtato, yonquiáranquëma'. Ipora huanta' a'naquëma' nimara nino'huarama', nia'pitarama', iquianan quëran ninontarama', nipinosarama', ninocanarama', nisha nisha yonquiarama' nimara, ténahuë yonquiato. <sup>21</sup> Iráca a'naquëma' co noyahuë' yonquirama'. Monshihuanama', sanapirachin yonquirama'. Ipora huanta' a'naquëma' inapoarama' nimara. Co ina naniantohuatamahüè', canconpato, pa'pi sëtarahuë. Carinquëma' a'chintëranquëmaso' ni'ton, Yosë atapanarinco. Co oshanëma' a'pohuatamahüè', chiníquën asëtaramaco.

## 13

### *Piquëran pënëntërinso'*

<sup>1</sup> Nani catoro' ni'conanquëma'. Iporaso' naquëranchin nicaponquëma' pa'sarahuë. Yosë quiricanën quëran sha'huitërinpoa'. “Ama topinan quëran ana'intocosohüè'. Natantacaso' ya'huërin. Cato' piyapihuë nipon, cara piyapihuë nipon, inachachin sha'huitohuachinpoa', naporu huarë' ana'intacaso' ya'huërin,” topi. Napoaton pa'pato, ina pochin natantarahuë no'tëquën nitota'huaso marë'. <sup>2</sup> I'hua ni'conpatënguëmara, pënënanquëma'. “Co oshanëma' naniantohuatamahüè', a'na huë'pato, no'tëquën ana'intaranquëma huachi,” itëranquëma'. Iporaso' co inatohua' ya'huëpirahuë', inachachin pënëntaranquëma'. Co i'hua oshahuaninsoachin yonquirahuë'. Ya'ipinguëma' pënëntaranquëma'. <sup>3</sup> “Chiníquën nanantëranso' a'notocoi nitochii,” itopiramacohüè'. Pa'pato, no'tëquën ana'intohuatënguëma', nitotarama'. “Quisocristori a'parin ni'ton, chiníquën nanantërin,” tosarama'. Quisocristo co topinan quëran nontërinpoahuë'. Chiníquën nanantaton, ya'ipi nanitaparin. <sup>4</sup> Isoro'paquë nipon, co aquëtë' chinirinhüè'. Corosëquë patanantopi. Chiminaponahuë', Tata Yosëri chiníquën nanantaton, ananpitaantarín. Quiyanta' Quisocristo pochin cancantatoi, co quiyaora chiniraihuë'. Ina acorincoi ni'ton, Yosë achinicananincoi no'tëquën pënëna'huainquëmaso marë'.

<sup>5</sup> Canpitaso nipirinhüë' nitantiaco'. Canpitaora yonquinëma quëran yonquico'. A'naquëma' co cancanëma quëran huarë' imashatëramahuë' nimara. Ya'ipi cancanëma quëran imapatama', Quisocristo ya'coancantërinquëma'. ¿Co ina nitotëramahuë' ti? A'naquëmaso nipirinhüë' co tëhuëenchachin imamaranquëmahuë'. <sup>6</sup> Tëhuëenchachin imapatama', co topinan quëran a'chintërainquëmahuë', tënahuë. Ina quëran canpitanta' inachachin yonquiarama'. “Tëhuëenchachin Quisocristori acorin pënënaipoaso marë'” tosarama'. <sup>7</sup> Canpita marë' Yosë nontarai. “Catahuaquë' noyasáchin niina',” itërai. Co a'napita noya nicainacoiso marë naporaihuë'. Canpita noya noya imacamaso marë' naporai. A'napita co noyahuë' yonquiarapipirinacoihuë', co ina yonquiraihuë'. <sup>8</sup> No'tën nanan natëcamaso marë' catahuarainquëma'. Co nohuantërai huë' nisha a'chinta'huainquëmaso'. <sup>9</sup> Co chiníquën nanantona'pi pochin nipiraihuë', co ina marë' sëtërai huë'. Noya imapatama', nóya cancantarai. Ipora huanta' Yosë nontarai. “Catahuaquë', Siniro, noya noya cancanchina',” itërai. <sup>10</sup> Napoaton co inaquë ya'huaporahuë', ninshitaranquëma' pënëna'huanquëmaso marë'. Ya'ipi co noyahuë' yonquiramasopita naniantohuatama', canconpato, co ana'inta'huanquëmaso' ya'huaponhuë'. Siniro chachin chiníquën nanan quëtërinco catahua'huanquëmaso marë'. Co anishacancanta'huanquëmaso marë' napotaranquëmahuë'. Noya noya imacamaso marë' napotaranquëma'.

<sup>11</sup> Nani iyaro'sa' ninshitëranquëma'. Noya cancantoco', tënahuë. Ya'ipi cancanëma quëran Yosë imaco'. Pënënanquëmaso' noya natëtoma', niachinicancanco'. Napopináchin yonquico'. Noya nini'toma', ya'huëco'. Inapohuatama', Yosë catahuarainquëma'. Inasáchin nosoroatonpoa', catahuarainpoa' sano cancantacaso marë'. <sup>12</sup> Noya ninosoroatoma', imaramasopita capini nisë'quëco'. <sup>13</sup> Ya'ipi imapisopita isëquë ya'huëpiso', saludos a'patarinënuquëma'.

<sup>14</sup> Inaora nohuanton, Siniro Quisocristo catahuainquëma'. Tata Yosë nosoro'inquëma'. Ispirito Santo chachin nani tahuëri noya ayonquiinquëma'. Nani huachi.

*Paono*

## Paonori Carasiaquë ya'huëpisopita ninshitérinso'

### *Carasiaquë imapisopita quirica a'patërinso'*

<sup>1</sup> Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahüë. Quisocristo acorinco nanamën a'china'huaso marë'. Co piyapi'sa' inahuaara nohuanton a'parinacohüë' a'china'huaso marë'. Co inapita acorinacohüë'. Tata Yosë chachin acorinco. Ina nohuanton, Quisocristo nanopiantarin huachi. Nani nanopiantohuachina, ina chachin nanan quëtërinco a'china'huaso marë'. <sup>2</sup> Ya'ipicoi isëquë imaraisopitaro'coi chachin nanan a'patarainquëma'. Canpitanta' Carasia parti ya'huëramasopita imarama' ni'ton, ninshitaranquëma'. <sup>3</sup> Inaora nohuanton, Tata Yosë catahuainquëma'. Asanocancainquëma'. Siniro Quisocristonta' inachachin catahuainquëma'. <sup>4</sup> Oshanënpoa' inquitinpoaso marë' Quisocristo chiminin. Inaora nohuanton, ya'huërëtërinpoa'. Notohuaro' piyapi'sa' co noyahuë' yonquipi. Ama inapita pochin cancantacaso marëhuë' chiminaton, anoyacancantërinpoa'. Tata Yosë nohuanton, nicha'ërinpoa'. <sup>5</sup> “¡Ma noyacha Tata Yosëso paya!” itahua'. Ama onporonta' ina naniantahuasohüë'. Amen.

### *Quisocristoíchin imacaso' ya'huërinso'*

<sup>6</sup> Yosë ayonquirinquëma' imacamaso marë'. Quisocristo inaora nohuanton nosoroatënnquëma', catahuarinquëma' ni'ton, imarama'. Imapiramahuë', a'naroáchin ina naniantatoma', nisha nanan yaimarama'. Ina yonquiato, pa'yanahuë'. <sup>7</sup> Co a'na nanan, iyaro'sa', ya'huërinhuë' cha'ëcaso marë'. Quisocristoíchin anoyacancantërinpoa'. Ina imapatëhua', oshanënpoa' inquitarinpoa'. Inasáchin yonquipiramahuë', a'napita huëcatona', nisha nanan a'chintarinënnquëma'. Napoaton nisha nisha yonquiarama'. Yanonpintërinënnquëma'. “Co Quisocristoráchin yonquicaso' ya'huërinhuë',” itërinënnquëma'. <sup>8</sup> Quiyanta' nisha nanan a'chinai naporini, Yosë ana'inchitoncoihuë'. Anquëni tëranta' nisha nanan a'chinin naporini, Yosëri ana'inchitonhuë'. “Quisocristoíchin nicha'ërinpoa',” itëranquëma'. <sup>9</sup> Iráca inachachin sha'huitërainquëma'. Iporaso' naquëranchin sha'huitantaranquëma'. “Quisocristoíchin anoyacancantërinpoa',” ta'toma', imarama'. Inso tëranta' nisha nanan a'chintohuachinquëma', Yosëri chiniquën ana'inchin, tënhuë.

<sup>10</sup> Co piyapi'sa' noya nicainacoso marë' a'chinahuë'. Yosë noya nicaincoso marë' a'chinahuë. Piyapi'sa' pa'yatinacoso marë' na'con na'con yonquirahuë naporini, co Quisocristo natëitohüë'.

### *Paono ya'nan imarinso'*

<sup>11</sup> No'tëquën iyaro'sa' sha'huitaranquëma'. Iráca quëran huarë' co piyapi yonquirinso' a'chintëranquëmahuë'. <sup>12</sup> Quisocristo chachin nanamën anitotërinco. Co a'na piyapi sha'huitërincohuë'. Co insonta' ina nanamën a'chintërincohuë'. Inaora chachin anitotërinco.

<sup>13</sup> Iráca naporahuëso' nani natantërama'. Co'huara Quisocristo imashatërapohüë', cotio nanan imarahüë. Ina imato, Quisocristo imapisopita no'huirahuë. Chiniquën aparisitërahüë. Ata'huanta'huaso' yonquipirahuë'. <sup>14</sup> Cotioro'sa' napopiso' chiniquën imato, inasáchin yonquirahuë. Carë' napopináchin pi'ipitopiso' noya natëpirinahuë', caso' na'con na'con natërahüë. Nani ma'sha shimashonëhuëpita a'chinpiso' yanatëpirahuë'. <sup>15-16</sup> Yosë nosoroatonco, nohuantërinco hui'nin imaca'huaso marë'. Co'huara nasichátërapohüë', yonquirinco nanamën a'china'huaso marë'. Inaora nohuanton, nosororinco ni'ton, hui'nin anohuitërinco nisha piyapi'sa' pënëna'huaso marë'. Ina marë' acohuachincora, co piyapi'sa' paaparahuë' a'chintinacoso marë'.



17 Ca'tano'sa' Quirosarinquë ya'huëpirinahuë', co inatohua' pa'nahuë' nonta'huaso marë'. Inapita'ton acopirinhüë', Yosë nani sha'huitërinco ni'ton, co inapita tëranta' natanconahuë'. Co hua'qui quëranhuë' Arapia parti paato, Quisocristo nanamën yonquiarahuë. Ina quëran Tamascoquë paantarahuë.

18 Cara pi'ipi quëran Quirosarinquë pa'nahuë Pitro nohuita'huaso marë'. Cato simana pochin pëinënquë yacaparahuë. 19 Naporo' Santiaconta' nohuitërahüë. Quisocristo iin inaso'. Inapitasáchin nontërahüë. A'napita ca'tano'saso' co ni'nahuë'. 20 Yosë ni'sárinco, no'tëquën ninshitaranquëma'. Co nonpintaranquëmahuë'.

21 Ina quëran Siria parti pa'nahuë a'chinapo. Sirisia partinta' pa'nahuë. 22 Cotia parti ya'huëpisopitaso nipirinhüë' co nohuichatërarinacohüë'. Inatohua' na'a Quisocristo imapisopita ya'huëpirinahuë', co nohuitërinacohüë'. 23 Topinan natantërinaco. "Íráca Paono aparisitërinpoa'. Yatëpapirinpoahuë', iporaso' inanta' imarin. Quisocristo nanamën a'chinarin huachi," topi, natantopi. 24 Ina natantahuatona', "¡Ma noyacha Tata Yosëso' ni'ton, Paononta' imarin paya!" topi.

## 2

### *Quisoso ca'tano'sanënpitarë' ninontopiso'*

1 Shonca catapini pi'ipi quëran naquëranchin Quirosarinquë paantarahuë. Pirnapi ca'taninco. Titonta' quëparai. 2 Yosë ayonquirinco paca'huaso' ni'ton, pa'nahuë imapisopita nonta'huaso marë'. Ansiano'sarachin niyontonpachinara, sha'huitërahüë. "Caso' nisha piyapi'sa' a'chintohuato, Quisocristoíchin imacaiso' ya'huërin, tënahüë. Íráca pënëntërinso' imacaiso' co a'chintërahüë'," itërahüë. "Co no'tëquën a'chinanhuë'," itërinaco naporini, topinan quëran a'chinchitënquëmahuë', tënahüë yonquiato. Ansiano'saso' nipirinhüë' "Noya a'chinan," itërinaco. 3 Titonta' nisha piyapi nipirinhüë', inatohua' quëparahuë. Co marca ya'huëtopirinhüë', ansiano'sari noya ni'pi. "Marca niacotëquë'," co itopihuë'. 4 A'naquën cotioro'saso' nipirinhüë', "Quiyanta' imarai," taponaraihuë', co Quisocristoráchin imapihuë'. Íráca pënëntërinsonota' imapi. Yasha'huirapitonacoi, niyontonpiso pëiquë ya'conpi Quisocristo imatoi naporaisopita nicacaiso marë'. "Íráca pënëntërinsonota' natëcaso' ya'huërin," ta'tona', yaanishacancantërinacoi nisha nisha natëca'huaiso marë'. 5 Napotopirinacoihuë', co pi'pian tëranta' nohuantërahüë'. "Quisocristoíchin anoyacancantërinpoa'," itërai. Canpitanta' no'tëquën yonquicamaso' nohuantërai. Napoaton nisha a'chintohuachinacoira, co manta' natërahüë'.

6 Ansiano hua'ano'saso' nipirinhüë', co nisha sha'huitërinacohüë'. Chiníquën nanantopirinhüë', co tē'huatërahüë'. Napopináchin Yosë ni'ninpoa'. 7-8 "No'tëquën a'chinan," itërinaco. Pitrori a'chintohuachina, Yosë nohuanton, na'a cotioro'sa' Quisocristo imasapi. Carinta' a'chintohuato, Yosë nohuanton, na'a piyapi'sa', nisha nisha niponaraihuë', imasapi inahuenta'. Napoaton ansiano'santa' noya nontërinaco. "Yosëri Pitro acorin cotioro'sa' a'chintacaso marë'. Quëmaso' nipirinhüë' acorinquën nisha piyapi'sa' a'chintacaso marë'," itërinaco.

9 Santiaco, Pitro, Coansha, inapitaso' chini chiníquën nanantopi ni'ton, sha'huitërinacoi. "Yosë na'con catahuarinquën. Ina acorinquën nisha piyapi'sa' a'chintacaso marë'," ta'tona', sē'quërinaco. Pirnapinta' sē'quëpi. "Canpitaso' nisha piyapi'sa' a'chintoco'. Quiyaso' nipirinhüë' cotioro'sa' a'chintarai," itohuachinacoira, "Noyahua'," itërai. 10 "Ama sa'ahuario'sa' naniantocosohüë'. Imapisopita a'chintoco' ma'sha quëtacaso'," itërinacoi. "Co'chi naniantaraihuë' paya. Nosororai quiyarinta'," itërahüë.

### *Paonori Pitro pënëninso'*

11 Ina quëran Pitro Antioquiaquë pa'pachina, Quisocristoíchin anoyacancantërinpoaso' nitotaponahuë', tēhuërin. Napoaton niyontonpiquë chachin pënënahüë. Ina

sha'huichinquëma' nitotoco'. <sup>12</sup> Inaquë nisha piyapi'sa' ya'huëpi. A'naquën Quisocristo imapi. Inapitaso' co cotio piyapihuë' ni'ton, ya'ipi cosharo' ca'pi. Cotioro'santa' inaquë ya'huëpisopita Quisoso imapachinara, co huachi cosharo' a'popihuë'. Napopináchin coshatopi. Pitronta' inapitarë' coshataton, co ma'sha a'porinhuë'. Ina quëran a'napita cotioro'sa' Quirosarin quëran canquiipi. Santiago imarinsopita inahuaso'. "Quiyanta' Quisocristo imarai," taponaraihuë', iráca pënëntopiso' yonquiatona', ma'sha a'popi. Inapita huë'pachinara, Pitro co huachi nisha piyapi'sarë' coshatërinhuë'. Marca pa'yatopisopita tē'huataton, nisha coshatërin. <sup>13</sup> Ya'huëhuano'santa' cotioro'sa' nipisopita Pitro nica'ona', nisha coshatopi. Pirnapinta' Pitrorë chachin nisha coshatërin. Quisocristo nanamën nitotaponaraihuë', co no'tëquën imapihuë'. <sup>14</sup> Ina ni'sahuato, ya'ipi piyapi ni'tërantapaiquë Pitro chiníquën pënënahuë. "Cotio piyapinquën niponahuë', Quisocristo imaton, iráca pënëntërinso' naniantëran. Nisha piyapi'sarë'quën coshataponahuë', iporaso' naquëranchin ma'sha a'poantaran. Ina pochin nica'aton, piyapi'sa' anishayonquiaran. 'Co Quisocristoíchin nicha'ërinpoahuë' nimara. Iráca pënëntërinso' natëcaso' ya'huërin, ta'tona', nonanarinëquën. ¿Nisha piyapi'santa' cotioro'sa' pochin yaatarantëran ti?

*Quisocristo natëhuatëhua', Yosë nicha'ërinpoaso'*

<sup>15</sup> Canpoaso' hua'huatërhua quëran huarë' cotioro'sanpoa' ninëhua'. Co nisha piyapinpoahuë'. 'Co oshahuano'sanpoahuë', nitërhua'. <sup>16</sup> Napopirëhuahuë', Moisésë pënëntërinso' natëhuatëhua', co ina marë' Yosë noya ni'sarinpoahuë'. Quisocristoíchin imapatëhua', noya ni'sarinpoa'. Napoaton canpoanta' Quisocristo natërhua' oshahänpoa' inquitinpoaso marë'. Co inso tëranta' pënëntërinso' natërinso marë' Yosë'pa' pa'sarinhuë'. Quisocristoráchin nicha'ërinpoa'.

<sup>17</sup> 'Quisocristo nicha'ësarinpoo', ta'tëhua', imarihuarahuë', iráca pënëntërinso' imaan-tahuatëhua', ¿Quisocristo napoahuarë' aoshahuaninpoa' ti? Co onporonta' ina pochin yonquicaso' ya'huërinhuë'. <sup>18</sup> Iráca pënëntërinso' nani naniantërhua'. Naquëranchin ina yonquiantahuatëhua', co Yosë natëarihuahuë'. Quisocristoíchin yonquicaso' ya'huërin. <sup>19</sup> Iráca canta' pënëntërinso' imapirahuë', co nanitërahue' no'tëquën natëca'huaso'. Co ina imato noya cancantërahue'. Oshahuanato, chimipi pochin cancantërahue'. Napoaton iráca pënëntërinso' naniantërahue' Yosëíchin yonquica'huaso marë'. <sup>20</sup> Quisocristo corosëquë chiminin. Ina imato, canta' corosëquë chiminahuëso pochin ninahuë. Iráca yonquirahuëso' naniantërahue'. Napoaton co huachi oshahuanaca'huaso' ya'huërinhuë'. Iporaso' Quisocristoíchin yonquirahuë. Co huachi caora nohuanto ma'sha ninahuë'. Quisocristo ya'coancantërinco ni'ton, catahuarinco noya nica'huaso'. 'Nani tahuëri Yosë hui'nin chachin catahuarinco,' ta'to, noya cancantërahue'. Inaso' pa'pi nosoror-inco. Nosoroatonco, ya'huërenamëhuë chiminin. <sup>21</sup> Inaora nohuanton, Yosë nosoroatonpoa', hui'nin a'paimarin chiminacaso marë'. Co ina naniantërahue'. Inasáchin imarahuë ni'ton, Yosë noya ni'sarinco huachi. Iráca pënëntërinso' natërhue'huaso marë' noya ni'ninpoa' naporini, topinan quëran Quisocristo chimiintonhuë', itërahue'.

### 3

*Iráca nanan naniantatëhua', nasha nananáchin imahua'*

<sup>1</sup> Co no'tëquën iyaro'sa' yonquiramahuë'. ¿Inta' ahua'yantatëinquëma', anishacancantërinquëma'? ténahuë yonquiato. "Quisocristo corosëquë patanantopi. Canpoa marë' chiminin," itërainquëma'. Aninquëchin quënanëso pochachin sha'huitohuatëinquëmara, natanama'. "Ina pochin chiminatón, oshanënpoo' inquitërinpoa'," ta'toma', Quisocristo imarama'. <sup>2</sup> Isoíchin yanitotërahue'. ¿Ma'ta' imarama' ni'ton Ispirito Santo ya'coancantërinquëma'? Iráca pënëntërinso' natëhuatama', ¿Ispirito Santo ya'coancantërinquëma' ti? ¿Co'ta, Quisocristo nanamën natanatoma' natëhuatama', ya'coancantërinquëma'? "No'tëquën nontërinpoa'," ta'toma', natërama'. Ina imapatama',

Ispirito Santo ya'coancantatēnquēma', na'con catahuarinquēma'. <sup>3</sup> ¿Onpoatomata' iporaso' co huachi no'tēquēn yonquiramahuē'? Naquēranchin iráca pēnēntopiso' yanatēantarama'. Ya'nan imapoma', co canpitaora nanitēramahuē' Yosē huēntonēnquē ya'conacamaso'. Ispirito Santo aya'coninquēma'. Ipora huanta' co canpitaora nanitaramahuē' noya noya imacamaso'. <sup>4</sup> Imaramaso marē' Ispirito Santo na'con catahuapirinquēmahuē'. Quisocriso naniantohuatama', topinan quēran catahuarinquēma'. Napoaponahuē', co Quisocriso naniantaramahuē', topirahuē'. <sup>5</sup> “Quisocrisoíchin anoyacancantērinco,” topatama', Ispirito Santo ya'coancantērinquēma'. Inapotohuachinquēma', achinicananinquēma'. Catahuarinquēma' ni'ton, nani ma'sha nanitaparama'. Co iráca pēnētērinso' natēramaso marē' catahuarinquēmahuē'.

<sup>6</sup> Isonta' yonquico': iráca Apraan Yosē natērin. “No'tēquēn nontērinco. Sacai' nininsonta' nanitaparín,” topachina, Yosēri noya ni'nin. <sup>7</sup> Iporaso' canpoanta': “Yosē no'tēquēn nontērinpoa' ni'ton, imasarahué,” topatēhua', Apraan pochin cancantarihua'. Ina pochin cancantohuatēhua', Yosē noya ni'sarinpoa'. Inanta' iyaro'sa' nitotoco'. <sup>8</sup> Co cotioro'saráchin Yosēri nohuantērinhuē'. Nisha piyapi'santa' imapachina', noya ni'sarin. Noya nicaton, co oshanēna marē' ana'intarinhuē'. Iráca iso noya nanan ninoton, Apraan itapon: “Nisha nisha piyapi'santa' quēma pochin cancantohuachina', na'con catahuarahué,” itērin Yosēri. Quiricanēn quēran naporin. <sup>9</sup> Apraan Yosēri sha'huitērinso' topinan natēcharinso marē' Yosēri na'con catahuarin. Inapochachin canpoanta' Quisocriso nanamēn topinan natēcharēhuaso marē' catahuarinpoa'.

<sup>10</sup> Moisēsē iráca pēnētērinso' yaimapatama', ana'intinquēmaso' ya'huērin. Co ya'ipi natēramahuē' ni'ton, Yosē ana'intarinquēma'. Iráca quiricanēn quēran naporin: “Co ya'ipimiáchin natēhuatamacohué', chiníquēn ana'intaranquēma'. Parisitopiquē a'paranquēma',” tēnin. <sup>11</sup> “Pēnētērinso' natēto cha'ēsarahué,” co ta'caso' ya'huērinhuē'. Ina pochin cancantohuatēhua', co Yosē noya ni'sarinpoahuē'. Quiricanēn quēran no'tēquēn sha'huitērinpoa': “Cancanēnpoa quēran huarē' natētohuatēhua', Yosē noya ni'sarinpoa ni'ton, noya nanpimiatarihua’,” tēnin quiricanēnquē. <sup>12</sup> Cato' nanan ya'huērin. Co cato chachin imacaso' ya'huērinhuē'. Iráca pēnētērinso' natēhuachina', inasáchin natēcaso' ya'huērin. Moisēsē sha'huitērinpoa': “No'tēquēn natēcaso' ya'huērin. No'tēquēn natēhuatēhua', noya nanpimiatarihua’,” tēnin. Ina nanan imapatama', co Quisocriso nanamēn imaramahuē'.

<sup>13</sup> Co nanitērehuahuē' no'tēquēn natēcaso' ni'ton, ana'intinpoaso' ya'huērin. Quisocrisoso nipirinhue' nicha'ērinpoa'. Canpoa' ya'huērēnamēnpoa' chiminin. Ina, Yosēri ana'intērin. Quiricanēn quēran naporin: “Piyapi pa'pi co noyahuē' nipachina, naraquē achinpirahuatē', chiníquēn ana'intērē'. Nani Yosēri a'porin,” tēnin quiricanēnquē. Canpoaso' ana'intinpoaso' ya'huēpirinhue', naraquē chachin Quisocriso apatanantohuachinara, oshanēnpoa marē' parisitērin. Inaquē parisitaton, nicha'ērinpoa'. <sup>14</sup> “Yosē no'tēquēn nontērinco,” tēnin Apraan. Ina tēninso marē' Yosēri noya ni'nin. Nisha piyapiro'sarinta' imacaiso marē' Quisocriso chiminin. Ina natēhuachinara, Yosēri noya ni'nin. Ya'ipinpoa' Quisocriso imapatēhua', Ispirito Santo ya'coancantarinpoa'. Iráca Yosē sha'huirinsos pochachin ya'coancantarinpoa'.

### *Yosē sha'huirinsos'*

<sup>15</sup> Ni'cochi iyaro'sa'. Iso pochin sha'huichinquēma' yonquicamaso marē'. Ma'sha mapatēra, quirica quētērinēnpo'. Quētohuachinēnpora, hua'ani nininēn acorahuaton, hui'sharin. Ina quēran co insonta' nanitērinhuē' canpiacaso'. Co aquētē' ninshitacaso' ya'huērinhuē'. Naporahuaton, co tapicaso' ya'huērinhuē'. Ya'nan ninshitērinso'ráchin ya'huēmiatarin. <sup>16</sup> Inapochachin iráca Yosēri nontaton, Apraan sha'huitērin: “Caora nohuanto, nóya catahuananquēn. Quēma shiparionta' catahuarahué ya'ipi piyapi'sa' anoyacancantacaso marē’,” itērin. A'naíchin shiin yonquiaton, naporin. Quisocriso ninoton, napotērin. <sup>17</sup> Iráca Apraanē' anoyataton, itapon: “A'na tahuēri quēma shiparin

ya'huëhuachin, ya'ipi piyapi'sa' anoyacancantarín. Caora nohuanto, nicha'ësarahuë. No'tëquën nontaranquën. Co onporonta' naniantarahuë," itërin Yosëri. Ina quëran catapini pasa cara shonca pi'ipi na'huëhuachina, cotioro'sa' pënënin nani ma'sha natëcaiso marë'. Pënënpirínhuë', Apraanë' iráca anoyatërinso' co naniantërinhuë'. Yosëri nani sha'huitohuachina, co onporonta' nonpinínhuë'. <sup>18</sup> Iráca Yosëri sha'huitërin. "Caora nohuanto, piyapi'sa' nicha'ësarahuë," itërin. Iráca pënëntërinso' natëtë' cha'ëcaso' ya'huërin naporini, co inaora nohuanton Yosë nicha'ëitonpoahuë'.

<sup>19</sup> ¿Ma'marëta' nipachin pënëntërinso' nanan ya'huërin? Co topinan quëran cotioro'sa' pënëninhuë'. Oshahuanëhuaso' anitotínpoaso marë' pënënin. Quisocristo nasitaquë huarë' pënëntërinsoachin ya'huërin imacaiso'. Quisocristo nasitohuachina, iráca Apraan sha'huitërinso' chachin o'marin. Yosë pënëntohuachina, anquëniro'sa' a'paimarin Moisësë sha'huitacaso marë'. Ina quëran Moisësëri piyapi'sa' sha'huitërin. <sup>20</sup> Nipirínhuë', Apraan nontohuachina, co anquëni a'paimarínhuë'. Co piyapi tëranta' a'parínhuë' sha'huitacaso marë'. Inaora chachin no'tëquën sha'huitërin.

### *Maistro pochin nininso'*

<sup>21</sup> Ina pochin ni'quëhuarë' Moisësë pënëntërin ni'ton, ¿Yosëri Apraan sha'huitërinso' tapirin ti? Co naporínhuë'. Pënëntërinso' noya noya nicon, anoyacancantërinpoa' naporini, ina natërehuaso marë' Yosë noya ni'itonpoahuë'. <sup>22</sup> Nipirínhuë', co insonta' nanitërinhuë' no'tëquën natëcaso'. Ya'ipínpoa' oshahuanëhua'. Ina marë' ana'intínpoaso' ya'huërin, ténin Yosë quiricanën quëran. Napoaton Quisocristoráchin nanitaparín anoyacancantínpoaso'. Inasáchin imapatëhua', Yosë noya ni'sarínpoa'.

<sup>23</sup> Co'huara Quisocristo imacaso' tahuëri naniyatërasohuë' Moisësë pënëntërinso' hua'anëntatë pochin nitërinpoa' ama aquëtë' oshahuanacaso marëhuë'. Oncorapirínpoaso pochin nitërinpoa'. Quisocristo nasitaquë huarë' pënëntërinsoachin ya'huërin ama Yosë naniantacaso marëhuë'. <sup>24</sup> Ni'cochi. Hua'huaro'sa' co yonquipihuë' ni'ton, na'con pënënacaso' ya'huërin. Inapochachin iráca Moisësë na'con pënëninpoa'. Maistro pochin pënëninpoa' oshahuanëhuaso' ayonquiínpoaso marë'. Co pënëntërinso' natëcaso' nanitërehuahuë' ni'ton, Quisocristo huachi yonquiarëhua'. Ina imapatëhua', anoyacancantarinpoa'. <sup>25</sup> Iporaso' nani Quisocristo o'marin ni'ton, co huachi maistro pochin nininso' nohuantarihuahuë'.

<sup>26</sup> Iporaso' Quisocristo imapatëhua', hui'ninpita pochin Yosë ni'ninpoa'. <sup>27</sup> Ya'ipínpoa' Quisocristo natëhuatëhua', huëntonënguë chachin aya'conínpoa'. Ya'conpatëhuara, "Quisocristoíchin imasarahuë huachi," ta'tëhua', aporihuanëhua'. Nasha a'morëso pochin ninëhua' ni'ton, Quisocristo pochin yonquiaríhua'. <sup>28</sup> Yosëso' co nisha nisha yonquirínpoahuë'. A'naquënpoa' cotio piyapínpoa', a'naquëonta' nisha piyapi'sa'. A'naquëonta' patrono'sa', a'naquënso' piyapínënpita. A'naquën sanapi'sa', a'naquënpoa' quëmapínpoa' nipirëhuahuë', ya'ipínpoa' Quisocristo imapatëhua', a'na huëntoínchin pochin ninëhua'. <sup>29</sup> Quisocristo imapatëhua', Apraan shinpítanpoa' ninëhua' canpoanta'. Apraan sha'huitërinso' pochachin na'con catahuarínpoa'.

## 4

<sup>1</sup> Ni'cochi. Ma'huan chiminpachina, ya'ipi ma'shanënpita, coriqui, inapita ayananpirin. Hui'nin mashotohuachina, inari ya'huërëterin. Hua'huataponso nipirínhuë', co a'naroáchin manínhuë'. Inaora ma'shanënpita nipirínhuë', piyapínënpochin nicon, co a'naroáchin hua'anëntërinhuë'. <sup>2</sup> Hui'napitaquë huarë' a'napitari a'pairin. Hua'huasha ni'ton, natëcaso' ya'huërin. Ina quëran hui'napitohuachina, ya'ipi hua'anëntarin. Pa'pin sha'huirínso' tahuëri chachin nanihuachin, hua'anëntarin. <sup>3</sup> Inapochachin canpoanta' co'huara Quisocristo nanamën nitochatëraríhuahuë', hua'huaro'sa' pochin yonquirëhua'. Nani ma'sha natëtacaso' yonquiconëhua'. Ma'sha a'pocaso', ma'sha nicacaso', inapita sha'huitërinënpoa'. Inasáchin yonquipirëhuahuë'. <sup>4</sup> Ina quëran tahuërinën nanihuachina,



Yosëri hui'nin a'paimarin. Sanapi quëran nasitaton, piyapi chachin ninin. Cotio quëmapi ni'ton, iráca pënëntërinso' natëcaso' ya'huërin. <sup>5</sup> Iráca pënëntërinso' natëtoi, piyapinën pochin nipirahuë', Quisocristo nicha'ëinpoaso marë' o'marin. Ina imarëhua' ni'ton, iporaso' hui'ninpita pochin Yosë ni'ninpoa'. <sup>6</sup> Hui'nin pochachin nicatonpoa', Ispirito Santo aya'coancantërinpoa'. Ina quëran Yosë nontohuatëhua', Ispirito Santo nohuanton, "Tata" itërëhua'. <sup>7</sup> Napoaton co huachi pënëntërinso' hua'anëntërinpoahuë'. Hui'ninpita pochin Yosë ni'ninpoa' ni'ton, na'con catahuarinpoa'. Inaora nohuanton, ya'ipi sha'huitërinpoaso' acotarinpooa'.

*Iráca pënëntopiso' co natëcaso' ya'huërinhuë'*

<sup>8</sup> Iráca co Yosë nohuitëramahuë'. Nisha nisha ma'sha, mamanshi, inapita tē'huatatoma', mosharama', co inapita yonquicasohuë' nipirinhue'. <sup>9</sup> Iporaso' Yosë nohuitërama'. Inanta' hui'ninpita pochin nicatēnquëma', noya nohuitërinquëma'. Nani nicha'ëpirinquëmahuë', ¿ma'marëcha naquëranchin iráca pënëntërinso', a'napita piyapi'sa' natëtopiso', inapita natëtoma', tē'huachinachin cancantantarama'? tēnahuë. Inapita natëapomarahuë', co ina marë' noyápiachin cancantëramahuë'. <sup>10</sup> Cotioro'sa pochin sahuato tahuëri chinotërama', yoquia'huarai tahuëri'santa', chinotantarama'. Nani pi'ipi nisha nisha niyontopiso tahuëri'sa' na'huërama'. "Ina marë' Yosë noya ni'ninpoa'," topiramahuë', co ina marë' noya ni'ninquëmahuë'. <sup>11</sup> No'tëquën iyaro'sa' a'chintopiranquëmahuë', naniantërama' nimara, tēnahuë. "Topinan quëran a'chintërahuë nimara," ta'to sëtërahuë.

<sup>12</sup> Canta' iráca ya'ipi pënëntërinso' natëpirahuë', Quisocristo imaca'huaso marë' co huachi ina yonquirahuë'. Ca pochin cancantatoma', canpitanta', iyaro'sa', "Co iráca pënëntërinso' nicha'ësarinpooahuë'," ta'toma', Quisocristoíchin imaco huachi. Iráca nicapēnquëma' pa'patëra, co no'huiramacohuë', noya nontëramaco. <sup>13</sup> Ya'nan a'chintapēnquëma', caniorahuë. Canioto, hua'qui' yacapatēnquëma', a'chintëranquëma'. Ina nitotërama'. <sup>14</sup> Chiníquën caniopirahuë', co nocanamacohuë'. Noya natanamaco. "Anquëni pochin Yosë nanamën a'chintërancoi," itëramaco. Quisocristo noninso pochachin natanamaco. <sup>15</sup> A'chintohuatēnquëmara, pa'yatërama'. Na'con nosororamaco. Nanitërama' naporini, ya'pirama chachin quëchitomacohuë'. ¿Onpoatomata' iporaso nisha yonquirama'? <sup>16</sup> No'tëquën pënēnanquëma' ni'ton, ¿no'huiramaco ti?

<sup>17</sup> Nisha a'china'piro'saso canpitataquë paatona' noyásha nontopirinēnquëmahuë', co tēhuēnchachin yacatahuarinēnquëmahuë'. Yaocoiarinēnquëma' inapita pa'yatamaso marë'. "Ama Paono natëcosohuë'," itërinēnquëma'. <sup>18</sup> Noyasha yonquiatona', a'chinpachina', a'china'pi pa'yatacaso' ya'huërin. Nipirinhue', co noyahuë' yonquiatona', a'chinpachina', co pa'yatacaso' ya'huërinhuë'. Canpitataquë ya'huasoco, nóya nontëramaco. Iporanta' co ya'huëpirahuë', noya yonquirapico, topirahuë'. <sup>19</sup> Na'con iyaro'sa' nosororanquëma'. Hui'nahuëpita pochachin ni'nanquëma'. Ni'co'. Sanapi yahuaihuachina, chiníquën parisitërin. Inapochachin canta' na'con yonquiatēnquëma', chiníquën parisitarëso pochin cancantërahuë. Canpitanta' Quisocristo pochachin cancantacamaso' na'con nohuantërahuë. Quisocristoráchin imapatama', oshaquëran ina pochachin cancantarama'. Ina marë' na'con yonquiáranquëma'. <sup>20</sup> Ma'cha inatohua' aco'incoya, topitërarahuë. ¡Inaquë ya'huërahuë naporini, ninontërehua' noya noya niitonhuë! Aquë ya'huërama' ni'ton, "¿Ma'ta' onpochi anoyata'huaso' marë' nicaya?" tēnahuë yonquiató.

*Acara, Sara inapita pochin nipiso'*

<sup>21</sup> Natanco iyaro'sa' Moisésë pënëntërinso' yanatëramasopita. ¿Co ya'ipi Moisésë ninshitërinso' natanamahuë' ti? <sup>22</sup> Apraan cato' hui'nin ya'huëtërin. A'naso' cosonänën hua'huin. A'naso' nipirinhue' sa'in chachin hua'huin, tēnin. <sup>23</sup> Cosonanēnso' a'napita sanapi'sa' pochin hua'huanin. Sa'in chachinso' nipirinhue' Yosë nohuanton,



hua'huanin. Co'huara hua'huayantëraponhuë', Yosëri itërin: “Ca nohuantonëhuëquë hua'huanaran,” itërin. Yosëri catahuarin ni'ton, hua'huanin. <sup>24-25</sup> Iso cato' sanapi'sa' yonquiatoma', nitotoco'. Cato' sanapi'sa' ya'huërin. Inapochachin cato' anoyatërinso ya'huërin. A'naso' iráca pënëntërinso', itopi. A'naso' nipirinhüë', Quisocristo quëran anoyatërinpoaso'. Iráca pënëntërinso' cosona pochin ninin, Acara itopiso'. Iráca cotioro'sa' Arapia parti pa'topi. Ina parti pa'taso', Moisésë pënëntërin. Sinai motopiquë canconpachinara, pënëntërin nani ma'sha natëcaiso'. “Co no'tëquën natëhuatëhuahuë', Yosë ana'intarinpoa',” ta'tona', të'huatopi. Ipora huanta' cotioro'saso' Quirosarinquë ya'huatona', pënëntërinso' nanan imasapi. “Ana'intohuachinpoa',” ta'tona', të'huarë'na' ya'huapi. <sup>26</sup> Apraan sa'inso nipirinhüë' co ina pochinhüë'. So'ini noya noya ni'nin. Co hua'anën pochin camairinhüë'. Inapochachin inápaquë nasha Quirosarin ya'huërin. Inatohua' co nisha nisha natëcaso' ya'huërinhuë'. Quisocristo imapatëhua', Sara hua'huin pochin ninëhua'. <sup>27</sup> Iráca Yosë quiricanënguë ninshitaton, naporin:

“Co hua'huana'pinqüënhüë' niponahuë', nóya cancantëquë'.

Co hua'huanaton iquitaponahuë', capa cancantëquë'.

A'na'ton so'yaton, hua'huanin.

Quëmaso nipirinhüë', na'con na'con amiparinpita ya'huëtarinquën. Ina marë' capa cancantëquë', itërin.

<sup>28</sup> Apraan hui'nin chachin Isaco itopiso'. Yosë nohuanton, ya'huëtërin. “No'tëquën Yosë nontërinco,” topachina, ina nohuanton, Isaco nasitërin. Canpoanta' Quisocristo imapatëhua', Yosë nohuanton, huëntonënguë ya'conarigua'. Hui'ninpita pochin ni'ninpoa'. <sup>29</sup> Apraan hui'ninpitaso' co noyahuë' nini'tona', ya'huëpi. Ispirito Santo nohuanton, Isaco nasitërin. Cosona' hua'huinso nipirinhüë', apiraton Isaco aparisitërin. Inapochachin ipora huanta' iráca pënëntërinso' nanan imapisopita aparisitërinënpoa'. <sup>30</sup> Cosona' hua'huinso nipirinhüë', co ya'huëmiatërinhuë'. Ina'ton nasitaponahuë', Yosë co nohuantërinhuë' pa'pín ma'shanënpita hua'anëntacaso'. Apraan nontaton, itapon: “Isaco ya'ipi hua'anëntapon. Napoaton cosonaso', hua'huinë chachin a'paquë' pa'ina',” tënin. <sup>31</sup> Napoaton iyaro'sa' Quisocristo nanamën imapatëhua', co pënëntërinso' nanan imacaso' ya'huërinhuë'. Yosëso' co patron pochin piyapitërinpoahuë'. Huëntonënguë chachin aya'coninpoa' ni'ton, hui'nin pochachin ni'ninpoa'.

## 5

### *Quisocristo ocoirinpoaso'*

<sup>1</sup> Quisocristo nicha'ërinpoa' inasáchin yonquiatëhua' noya cancantacaso marë'. Ina imapatëhua', catahuarinpoa' noya nicacaso'. Napoaton ama naquëranchin iráca pënëntërinso' imahuasohüë'. Quisocristoráchin yonquia'ahua'.

<sup>2</sup> Ca Paonoco no'tëquën sha'huitëranquëma'. Marca niacotohuatama', co Quisocristoíchin yonquiaramahuë'. Ina quëran co anoyacancantarinquëmahüë'.

<sup>3</sup> Naquëranchin sha'huitantëranquëma'. Marca niacotohuatama', ya'ipi cotio pënëntërinso' natëcaso' ya'huërin. <sup>4</sup> “No'tëquën natëhuatëhua', Yosë noya ni'sarinpoa',” topatama', co Quisocristo imaramahuë'. Yosë inaora nohuanton, nosoropirinquëmahüë', Quisocristo naniantohuatama', co huachi catahuarinquëmahüë'.

<sup>5</sup> Nipirinhüë', ina imapatëhua', Ispirito Santo catahuarinpoa'. “Quisocristoíchin anoyacancantërinpoa',” topatëhua', Yosë noya ni'sarinpoa', tënëhua'. Oshanënpoa' inquitatonpoa', tëhuënhachin noyápiachin cancan quëtarinpoa'. Ina ninarëhua'.

<sup>6</sup> Quisocristo imapatëhua', co marca yonquiarihuahuë'. A'naquënsó' nani niacotopi. A'naquënsó' nipirinhüë' co niacotopihüë'. Co ina yonquicaso' ya'huërinhuë'. Cancanënpoa' quëran huarë' imacaso' ya'huërin. “Quisocristo catahuarinpoa'. Co nonpintarinpoahuë',” ta'tëhua', ya'ipi cancanënpoa' quëran natëahua'. Ina natëhuatëhua',

catahuarinpoa' nóya ninosorocaso'. Ina pochin cancantohuatēhua', Yosē noya ni'sarinpoa'.

<sup>7</sup> Canpitaso noya imasapiramahuē', ¿inta nonpintatēnquēma', nisha ayonquirinquēma'? tēnahuē. <sup>8</sup> Co ina pochin Yosē a'chintērinpoahuē'. Huēntonēnquē aya'coninpoa' ni'ton, cancanēnpoaquē nontarinpoa'. No'tēquēn yonquicaso' nohuantērin. <sup>9</sup> Ni'co' iyaro'sa'. Pan nipatēra, pi'pian ahuēpocatērinso' acotohuachinara, ya'ipi sē'cotērin. Inapochachin pi'pian tēranta' nonpin nanan yonquihuata'ama', co hua'quiya quēranhuē' ya'ipinquēma' nitapicancanarama'. <sup>10</sup> Caso nipirinhue' natēranquēma'. No'tēquēn yonquiarama', tēnahuē. Siniro catahuarinquēma' ama nisha nisha yonquicamaso marēhuē'. Nipirinhue', inso tēranta' nisha a'chintohuachinquēma', Yosēri ana'intarin. Chiníquēn nanantopirionta', nonpintohuachinquēma', Yosēri ana'intarin.

<sup>11</sup> A'naquēn nonpinapirinaco. —Paononta' quiya pochin a'chinin. “Marca niacotoco'. Co iráca pēnētērinso' natēhuatamahuē', co Yosē noya ni'sarinquēmahuē',” tēnin Paononta', toconpi. Co napopirahuē', nonpinapirinaco. Ina pochin a'chinahuē naporini, co cotioro'sa' no'huiitonacohuē'. “Quisocriso corosēquē chiminin. Inasáchin imapatēhua', anoyacancantarinpoa',” itērahuēso marē' ipora huanta' aparisitarinaco. <sup>12</sup> Marca nia-cotacaiso' na'con na'con yonquipi ni'quēhuarē', ya'ipi niyashitētochinapi naporini, noya noya niitonahuē'.

<sup>13</sup> Ina pochin, iyaro'sa', nontaranquēma'. Canpitaso' Quisocriso nohuantērinquēma'. Nicha'ērinquēma' ama huachi tē'huarē'quēma' ya'huēcamaso marēhuē'. Co huachi ya'ipi iráca pēnētērinso' imacaso' ya'huēpirinhue', co Yosē nohuantērinhuē' oshahuacamaso'. Quisocriso imapatama', co noyahuē' yonquiramaso' naniantacaso' ya'huērin. Ninosoroatoma', nicatahuaco' noya cancantacamaso marē'. A'napita na'con na'con yonquico'. <sup>14</sup> Iráca Yosē pēnētōhuachina, ninosorocaso' na'con na'con nohuantērin. “Quēmaora ninosororanso pochachin a'napitanta' nosoroco',” tēnin. <sup>15</sup> Nino'huihuatama', pa'pi co noyahuē' nisarama'. Tanan ni'niro'sa' niquētēpiso pochin cancantarama'. Nipinocasonta' co noyahuē'. Ina pochin nipatama', ni'cona ya'ipinquēma' nitapicancantama'.

### *Ispirito Santo catahuarinpoaso'*

<sup>16</sup> Ispirito Santo natēco' catahuainquēma', tēnahuē. Ina catahuahuachinquēma', co noyahuē' yonquiramaso' naniantarama'. Inapita naniantatoma', nóya nisarama'. <sup>17</sup> Ispirito Santo noyasáchin ayonquiinpoaso' nohuantopirinhue', ipora huanta' co noyahuē' yonquirēhua'. Ispirito Santoso nipirinhue' pēnēninpoa' ama ina pochin cancantacaso marēhuē'. Co noyahuē' yonquihuatēhua', co nanitērehuahuē' Ispirito Santo natēcaso'. Cato' cancan pochin ya'huētērinpoa'. Itohuara capini nipatētātē pochin nipi. Noya cancantacaso' nohuantopirēhuahuē', canpoara co nanitērehuahuē' noya nicacaso'. <sup>18</sup> Cancanēnpoaquē Ispirito Santo nontērinpoa' ma'sona noya nicacaso'. Ina natēhuatēhua', co huachi iráca pēnētērinso' camairinpoahuē'. Ispirito Santo nohuantērinso chachin yonquiarihua'.

<sup>19</sup> Piyapi'sa' inahuara co nanitopihuē' Yosēichin yonquicaiso'. Co noyahuē' yonquipsopita nitotērehua'. Co noyahuē' yonquihuachinara, co noyahuē' nipi. Yamonshihuanpi, taparo' nonpi, sanapi sē'huachinachin cancantopi. <sup>20</sup> Co noyahuē' yonquihuachinara, mamanshi moshapi, pēnotopi, co nanan anoyatopihuē', co napopi-anachin yonquipihuē'. A'pitatona', a'naroáchin no'huitopi, nipinopi. A'na huēnton a'na huēnton co noyahuē' ninicatona' ya'huēpi. Nisha nisha yonquiatona', ya'huēpi. <sup>21</sup> Co noyahuē' yonquihuachinara, a'napita ma'shanēnpita noyapatona', no'huipi. No'pipi, pitaro'saquē ca'miatopi, o'omiatopi, a'naratipita nipi. Iráca pēnēnanquēma'. Iporanta' pēnēntaranquēma'. Inapohuatama', co Yosē hua'anētērinquē ya'conaramahuē'. Ina pochin nipisopita co Yosē'pa' pantarapihuē'.

<sup>22</sup> Nipirinhüë', Ispirito Santo natëhuatëhua', catahuarinpoa' ninosorocaso'. Catahuahuachinpoa', Yosë nohuitatëhua', capa cancantarihua'. “Yosë noya ni'sarinco,” ta'tëhua', sano cancantarihua' ni'ton, noya ninicatëhua' ya'huarihua'. Piyapi'sa' no'huipirinpoahuënta', co yano'huirihuahuë'. Ma'sha onpohuatëhuanta', ahuantarihua'. Nosoroatëhua', nóya nontarihua'. Ispirito Santo catahuahuachinpoa', noya nicarihua'. No'tëquën nontarihua'; co pi'pisha tēranta' nonpintarihua'huë'.  
<sup>23</sup> Ispirito Santo natëhuatëhua': “Caso' noya noyaco,” co tēcarihua'huë'. Sano piyapi nicarihua'. Co noyahuë' nicacaso' yonquipirëhuahuë', ina catahuarinpoa' naniantacaso'. Inapohuatëhua', Yosë noya ni'sarinpoa'. Co pënëinënpoaso' ya'huaponhuë'.  
<sup>24</sup> Quisocriso corosëquë chiminaton, oshanënpoa' inquitërinpoa'. Napoaton canpoanta' ina imapatëhua', co noyahuë' yonquirëhuasopita corosëquë patanantatë pochin nitatëhua', naniantacaso' ya'huërin. Co huachi nohuantarihua'huë' sopai pochin cancantacaso'.  
<sup>25</sup> Ispirito Santo ya'coancantatonpoa', catahuarinpoa' noya nicacaso' ni'quëhuarë', ma'sona tēranta' sha'huithuachinpoa', noya natëahua'.

<sup>26</sup> Ama noya ninëhuaso marë' a'napita nocahuansohuë'. Ninocanpatëhua', a'naroáchin nino'huarihua'. Itohuara capini ninoyapatëhua', nino'huarihua'. Ama ina pochin cancantahuasohuë'.

## 6

### *Nicatahuacaso' ya'huërinso'*

<sup>1</sup> Ispirito Santo natëtoma' noya cancantohuatama', a'napitanta' catahuaco' ina pochin cancanchina'. A'naso' co noyahuë' nipachin, ama no'huicosohuë'. Sanoanan quëran pënënatoma', catahuaco' co noyahuë' yonquirinsopita nanianchin. Ni'cona canpítanta' sopai minsëchinquëma'.  
<sup>2</sup> Ya'ipinpoa' a'na tahuëri ma'sha onporëhua'. A'na tahuërinta' sopai yanonpintërinpoa' co noyahuë' nicacaso marë'. Napoaton nicatahuahua' noya yonquicaso marë'. Panca pë'pëto nicatahuarëso pochin catahuahua'. Inapohuatëhua', Quisocriso natëarihua'. “Ninosoroco,” itërinpoa'.

<sup>3</sup> “Caso' noya piyapico,” topatan, quëmaora ninonpintaran, co no'tëquën yonquiranhuë'. Co insonta' Yosë pochachin cancantërinhuë'. Co Yosë catahuarinpoahuë' naporini, co manta' noya niitërihuahuë'.  
<sup>4</sup> Ama a'napita napopiso' nicatora', nitantiacosohuë'. Quëmaora naporanso yonquiaton, nitantiaquë'. Noya cancantohuatan, Yosë noya ni'sarinquën. Ina quëran “Yosë noya ni'sarinco,” ta'ton, capa cancantaran.  
<sup>5</sup> A'naya a'nayanpoa' Yosë acorinpoa' ma'sona nicacaso'. Canpoara pë'pëtonënpoa' quëparëso pochin niahua'. A'na tahuëri sacai' nipirinhüë' ahuantatëhua', imamiatahua'.

<sup>6</sup> A'naquën paatona', nani tahuëri Yosë nanamën a'chinápi. A'chintohuachinquëma', ma'sha quëtoco' ama pahuanchinasohuë'.

<sup>7</sup> Ni'cona sopai nonpintochinquëma'. Co Yosë tēhuacaso' ya'huërinhuë'. Co insoari tēranta' nanitërinhuë' Yosë nonpintacaso'. No'tëquën yonquico'. Ma'sha sha'patëra, inachachin nitërin. Co nisha nitërinhuë'.  
<sup>8</sup> Inapochachin co noyahuë' yonquirápatëhua', co noyahuë' nisarëhua'. Ina marë' ana'intinpoaso' ya'huërin. Nipirinhüë', Ispirito Santo natëhuatëhua', nani tahuëri catahuarinpoa' noya cancantacaso marë'. Ina quëran Yosë'pa' noya nanpicontarihua'.  
<sup>9</sup> Ama Yosë naniantatëhuahuë', noya niahua'. Noya nicacaso' ama amiahuasohuë'. Chiníquën cancantohuatëhua', Yosë noya ni'sarinpoa'. Ina marë' tahuëri nanihuachin, acanaarinpoa'.  
<sup>10</sup> Napoaton ya'ipi piyapi'sa' nosoroa'hua'. Nanitohuatëhua', catahuahua'. Quisocriso imarëhuasopita capini na'con na'con nicatahuahua'.

### *Piquëran huarë' pënëntërinso'*

<sup>11</sup> Ca Paonoco apira pi'pian tēranta' caora imirahuë quëran ninshitaranquëma'. Panca ninshiquë ninshitaranquëma'.  
<sup>12</sup> A'naquën ipora huanta' marca yaacotarinenquëma'.

A'napita cotioro'sari noya nicacaiso marë' inapopi. “Quisocristo corosëquë chiminaton, anoyacancantërinpoa'. Inasáchin nicha'ërinpoa', topatëhua', cotio hua'ano'sa' aparisitarinënpoa',” topi. Ama inapitari no'huicaiso marëhuë' napopi. <sup>13</sup> Co inapita tëranta' ya'ipi pënëntërinso' natëpirinahuë', marca yaacotarinënquëma'. Niacotohuatama', pa'yatapi. “Ni'co'. Nisha piyapi'santa' natëtënënpoa', marca niacotopi,” tosapi. <sup>14</sup> Caso nipirinhüë' piyapi'sa' pa'yata'huaso' co yonquirahuë'. Quisocristo chimininsoáchin yonquirahuë. Corosëquë chiminaton, anoyacancantërinpoa'. Ni'ton, inaro'co chiminahuëso pochin co ma'sha isoro'paquë ya'huërinso' yonquirahuë'. Naporahuaton, isoro'paráchin pa'yatopisopita co huachi noya ni'ninacohuë'. <sup>15</sup> Marcaso' co onpopinchin yonquicaso' ya'huërinhuë'. Co ina marë' Yosë noya ni'ninpoahuë'. Quisocristo imapatëhua', nasha cancan quëtërinpoa'. Ina marë' tēhuënchinso' noya ni'ninpoa'. <sup>16</sup> Nani no'tëquën a'chintëranquëma'. Ina imapatama', Yosë piyapinën chachin nisarama'. Yosë nosoroatënquëma', noya catahuainquëma'. Asanocancainquëma', tēnahuë.

<sup>17</sup> Quisocristo no'tëquën natërahuë ni'ton, ahuërinaco. Ipora huanta pë'sharinaco ni'ton, cariro'sa' ya'huëarin. Napoaton ama insonta' aquëtë huarë' asëchincosohuë' tēnahuë.

<sup>18</sup> Ya'ipinquëma', iyaro'sa', yonquiáranquëma'. Inaora nohuanton, Siniro Quisocristo catahuainquëma'. Amen. Nani huachi.

*Paono*

## Paonori Ipiשוֹקֵּ ya'huëpisopita ninshitérinso'

### *Imapisopita yonquiaton, ninshitérinso'*

<sup>1</sup> Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahue. Yosë nohuanton, Quisocristo acorinco nanamën a'china'huaso marë'. Canpitanta' Quisocristo noya imarama' ni'ton, Yosë noya ni'ninquëma'. Ipiשוֹקֵּ ya'huëramasopita ninshitaranquëma'. <sup>2</sup> Inaora nohuanton, Tata Yosë catahuainquëma'. Asanocancainquëma'. Siniro Quisocristonta' inapochachin catahuainquëma'.

### *Iráca quëran huarë' Tata Yosë yonquirinpoaso'*

<sup>3</sup> Ma noyacha Tata Yosëso paya. Siniro Quisocristo pa'pin inaso'. Inápa quëran noya noya yonquirinpoa'. Quisocristo imarëhua' ni'ton, na'con catahuar-inpoa' noya noya cancantacaso marë'. Oshanënpoa' inquitatonpoa', anoyacancantërinpoa'. Ina quëran nani tahuëri catahuar-inpoa' nohuantërinso chachin nicacaso'. Co inápaquë ya'huëyatërihuarahue', inatohua' ya'huëarëhuaso pochin Yosë nohuitërehua'. Ina yonquiatëhua', "Yosparinquën Siniro," itahua'. <sup>4</sup> Co'huara isoro'pa' ya'huëyatërasohue', yonquiatonpoa', huayoninpoa' nóya cancantacaso marë'. Quisocristo imapatëhua', oshanënpoa' inquitatonpoa', Yosë nóya ni'ninpoa'. <sup>5</sup> Iráca quëran huarë' nosoroatonpoa', acorinpoa' huëntonënuquë ya'conacaso'. Quisocristo anoyacancantërinpoa' ni'ton, hui'nin pochachin ni'ninpoa'. Inaora nohuanton, noya yonquirinpoa'. <sup>6</sup> Hui'nin na'con nosororin. Ina imapatëhua', canpoanta' na'con nosoroarinpoa'. Ina yonquiatëhua', "Ma noyacha Tata Yosëso' ni'ton, inaora nohuanton, nosororinpoa' paya," tosarëhua'. <sup>7</sup> Quisocristo corosëquë chiminaton, nicha'ërinpoa'. Huënainën pa'nin ni'ton, oshanënpoa' inquitërinpoa'. Inaora nohuanton, Yosë na'con nosororinpoa'. <sup>8</sup> Nosoroatonpoa', na'con catahuar-inpoa' no'tëquën yonquicaso marë'. Yonquinën chachin anitotërinpoa'. <sup>9</sup> Inaora nohuanton, nóya yonquirinpoa'. Co canpoara nitotopirëhuahue', yonquirinpoaso' anitotërinpoa'. Iráca quëran huarë' yonquirin Quisocristo a'paimacaso'. <sup>10</sup> Ina tahuërinën nanihuachin, Quisocristo ya'ipiya hua'anëntarin. Isoro'paquë ya'huërinso'pita, inápaquë ya'huërinso'pita inapita hua'anëntarin. A'na huëntoínchin pochin acoarin. Ina Yosë na'con nohuantërin.

<sup>11</sup> Inaora nohuanton, acorinpoa' piyapinënpita nicacaso marë'. Quisocristo imapatëhua', hui'nin pochin ni'sarinpoa'. Napoaton a'na tahuëri Yosë'pa' noya noya acoar-inpoa'. Iráca chachin yonquirinpoa' ni'ton, huëntonënuquë aya'coninpoa'. <sup>12</sup> Quiya'ton imarai. "Quisocristo nicha'ësarínpoa'," ta'toi imarai. Noya imapatoi, a'napitanta' nicatonacoi, Yosë yonquiapi inahuanta': "Ma noyacha Tata Yosëso paya," tosapi. Ina ta'caiso marë' acorincoi. <sup>13</sup> Canpitanta' Yosë nanamën natanama'. "Quisocristo anoyacancantohuachinquëma', nicha'ësarínquëma'," itërainquëma'. Natanpatamara: "No'tën nanan inaso'," ta'toma', natërama'. Quisocristo imapatama', hui'nin pochin Yosë ni'ninquëma'. Napoaton Ispirito Santo aya'coancantërinquëma'. Sichoquë marca acopiso pochin aya'coancantërinquëma' huëntonënuquë aya'coninquëmaso' nitotacaso marë'. Iráca sha'huirínso chachin napotërinquëma'. <sup>14</sup> Quisocristo imapatëhua', Ispirito Santo ya'coancantomiatërinpoa'. Ina'ton quëtërinpoa' ni'ton: "Tëhuëinchachin a'na tahuëri Yosë'pa' quëpantarinpoa'," tënëhua'. Nani Yosë nicha'ërinpoa' ni'ton, o'mantacaso' tahuëri nanihuachin, ya'huërin'pa' quëpantarinpoa'. Inaquë noya noya ya'huëcontarihua'. Ina yonquiatëhua': "Ma noyacha Tata Yosëso yonquirinpoa' paya," tënëhua'.

### *Inapita marë' Paonori Yosë nontërinso'*

<sup>15</sup> "Quisocristo anoyacancantërinpoa'," ta'toma', inasáchin imarama'. Ina imatoma', ya'ipi imaramasopita capini noya ninosoroarama', natantërahuë. Ina natantato,



nóya cancantërahuë. <sup>16</sup> Na'con canpita marë' Yosë nontërahuë. “Noya imarinënquën ni'ton, ‘Yosparinquën, Siniro,’ ” itërahuë, Yosë nontato. <sup>17</sup> Tata Yosëso' noya noya ninin. Inasáchin chinotacaso' ya'huërin. Quisocristo isoro'paquë o'maton, Yosë anohuitërinpoa'. Ina yonquiato, canpita marë' Yosë nontërahuë: “Catahuaquë' Siniro no'tëquën yonqui'ina'. Noya noya nohuichinënquën. Noya nohuitohuachinënquën, quëma yonquiranso chachin nitotapi. <sup>18</sup> Ya'ipi nanamën Siniro noyá anitotëquë'. Quëma huëntonënquë chachin aya'conancoi noya cancanta'huaiso marë'. Catahuaquë' ina yonquiato'na', noya cancanchina'. A'na tahuëri ya'huëranquë chachin noya noya ya'huëcontarai. Ina na'con yonqui'ina'. <sup>19</sup> Quëmaso' ya'ipi nanitaparan. Natërainquën ni'ton, nani tahuëri catahuanancoi. Chini chiníquën nanantaton, nicha'ërancoi. Catahua-coi ina yonquiato', chiníquën cancanchii. <sup>20</sup> Iráca chiníquën nanantaton, Quisocristo ananpitaantaran. Inápaquë quëpantarahuaton, inchinan quëran ahuënsëran ni'ton, chini chiníquën nanantarin,” itërahuë, Yosë nontato. <sup>21</sup> Isoro'paquë nisha nisha hua'ano'sa', chirinchiro'sa', copirnoros'sa', inapita chiníquën nanantopi. Inapaquënta' chiníquën nanantopisopita ya'huëpi. Quisocristoso nipirinhüë', inapita quëran chini chiníquën nanantërin. Co incari tëranta' nanitërinhuë' ina minsëcaso'. Co onporonta' a'napitari ina minsëapihuë'. <sup>22</sup> Yosëri chachin Quisocristo nanan quëtërin ya'ipi ya'huërinso'pita hua'anëntacaso marë'. Naporahuaton, ya'ipi imarëhuasopita catahuainpoaso marë' acorin. Na'aquënpoa' nipirëhuahuë', a'na huëntoínchin pochin ninëhua'. Inaso' motënpoa pochin nicon, ya'ipiya hua'anëntarinpoa'. <sup>23</sup> Inaora nonën pochin ni'ninpoa'. Napoaton na'con yonquirinpoa'. Nani ya'coancantërinpoa' noya noya imacaso marë'. Noyá ya'coancantohuachinpoa', ya'ipi cancanënpoa quëran ina yonquiarihua'. Ina marë' nininpoa'. Inaso' ya'ipiya hua'anëntarin.

## 2

### *Inaora nohuanton nicha'ërinpoaso'*

<sup>1</sup> Iráca canpitaso' co noyahuë' nicatora', oshahuanama'. Co Yosë nohuitatomahuë', chimipi pochin cancantërama'. <sup>2</sup> Co'huara Quisocristo imashatërapomahuë', sopai hua'an natëtoma', co noyahuë' ninama'. Inaso' ihuan ya'huërinquë ya'huaton, ya'ipi sopairo'sa' hua'anëntarin. Co quënanpirëhuahuë', isoro'paquë sacatárin minsëinpoaso marë'. Yonquinëmaquë camairinquëma' ni'ton, co Yosë natëramahuë'. <sup>3</sup> Iráca ya'ipinpoa' co Yosë natërehuahuë'. Co noyahuë' yonquiatëhua', co noyahuë' ninëhua'. Canpoara nohuantërehuasoráchin ninëhua'. Yano'huitohuatëhuara, no'huitërehua'. Yano'pihuatëhuara, no'pirëhua'. Yaahuëtohuatëhuara, ahuëtërehua'. Ina marë' ya'ipinpoa' ana'intinpoaso' ya'huërin. <sup>4</sup> Yosëso nipirinhüë' na'con nosororinpoa'. Nosoroatonpoa', yanicha'ërinpoa'. <sup>5</sup> Oshahuanëhua' ni'ton, chimipi pochin ni'pirinpoahuë', oshanënpoa' inquitërinpoa'. Iporaso huachi Quisocristo imarëhua' ni'ton, nantiantarinso pochin Yosë ni'ninpoa'. Anoyacancantërinpoa' noya noya cancantacaso marë'. Nosoroatonpoa', inaora nohuanton, nicha'ërinpoa'. <sup>6</sup> Iráca Quisocristo pa'pitopirinhüë', Yosëri ananpitaantaranahuaton, inápaquë quëpantarin. Canpoanta' imarëhua' ni'ton, inarë'quënpoa' nantiantarëhuaso pochin anoyacancantërinpoa'. Quisocristo ya'coancantërinpoa' ni'ton, ipora chachin inápaquë ya'huarëhuaso pochin Yosë ni'ninpoa'. <sup>7</sup> Yosë inaora nohuanton, na'con nosororinpoa'. Quisocristo imapatëhua', noya catahuarinpoa'. A'na tahuëri a'napitanta' nicatora'ntënpoa', Yosë chinotapi: “Ma noyacha Yosëri nosororin paya,” tosapi. <sup>8</sup> Nosoroatonpoa', inaora nohuanton nicha'ërinpoa'. “Quisocristoíchin anoyacancantërinpoa',” topatëhua', oshanënpoa' inquitatonpoa', nicha'ërinpoa'. Co canpoara nanitërehuahuë' Yosë imacaso'. Ina catahuarinpoa' cancanënpoa quëran natëcaso'. <sup>9</sup> Co canpoara nanitërehuahuë' cha'ëcaso'. Napoaton co nocantacaso' ya'huërinhuë'. “Caso' noyaco ni'to, Yosë'pa' pa'sarahuë,” co ta'caso' ya'huërinhuë'. <sup>10</sup> Yosë anoyacancantërinpoa'. Anoyacancantahuatonpoa', acorinpoa' nóya nicacaso marë'. Quisocristo

catahuahuachinpoa', noya nisarëhua'. Iráca quëran huarë' yonquirinpoa' ina pochin nicacaso'. Ina marë' nicha'ërinpoa'.

*Quisocristo nanan anoyatërinpoaso'*

<sup>11</sup> Isonta' iyaro'sa' yonquico'. Iráca co pi'pian tëranta' Yosë nohuitëramahuë'. Canpitaso' nisha piyapi'sanquëma' ni'ton, cotioro'sa' nocaninënquëma'. “Quiyaso' Yosë piyapinënpitacoi. Canpitaso' co marca tëranta' nonëmaquë niacotëramahuë',” itërinënquëma'.

<sup>12</sup> Tëhuënchachin co'huara imashatërapomahuë', co Quisocristo nohuitëramahuë'. Iráca Yosëri israiro'sa' huayonin piyapinënpita nicacaso' ni'ton, “Nicha'ësanquëma',” itërin. Co inapita pochin ni'ninquëmahuë'. Shimashonënapitarë' anoyatërinso' sha'huitopirinhuë', co nitotëramahuë'. Topinan quëran ya'huërama'. Co Yosë'pa' pacamaso' ninaramahuë'. Co pi'pian tëranta' Yosë nohuitëramahuë'. <sup>13</sup> Co Yosë nohuitatomarahuë', áquë pochin nisapiramahuë'. Iporaso' Quisocristo imatoma', nohuitërama huachi. Oshanëma marë' huënainën pa'nin ni'ton, Yosë anohuitërinquëma'. Ya'caritëramaso pochin ninama'.

<sup>14</sup> Quisocristo chiminin ni'ton, nanan anoyatërinpoa'. Iráca cotioro'sacoi co noyahuë' ni'nainquëma'. Nisha piyapinquëma' ni'ton, inimicoro'sa pochin ni'pirainquëmahuë'. Inaso' chiminaton, paira pochin ya'copirinpoaso' nani chi'huincarín. Iporaso' ya'ipinpoa' Quisocristo imarëhuasopita a'na huëntoínchin ninëhua'. <sup>15</sup> Quisocristo nasha nanan quëtërinpoa'. Co huachi iráca pënëntërinso' yonquicaso' ya'huërinhuë'. Ya'ipinpoa' Quisocristo imapatëhua', nasha huëntonquë aya'coninpoa'. Quisocristo huëntonënquë ya'conatëhua', co huachi nisha chinotërehuahuë'. Nisha nisha piyapinpoa' nirihuarahuë', noya nini'tëhua' ya'huërëhua'. <sup>16</sup> Naporahuaton, co huachi Yosë inimicotërehuahuë'. Quisocristo corosëquë chiminaton, nanan anoyatërinpoa'. Cato' huënton pochin nipirëhuahuë', Quisocristo imapatëhua', noya ninicatëhua' ya'huërëhua'. A'na huëntoíchin ninëhua'.

<sup>17</sup> Quisocristo isoro'paquë o'maton, noya nanan sha'huitërinpoa'. “Ya'ipinquëma' nicha'ësanquëma',” itërinpoa'. Canpitaso' co pi'pisha tëranta' Yosë nohuitatomarahuë', áquë pochin nipiramahuë', nanan anoyatërinquëma'. Cotioro'sacointa' ya'carisha pochin ninaiso' nanan anoyatërincoi. <sup>18</sup> Quisocristo chiminin ni'ton, ya'ipinpoa' nanitërehua' Tata Yosë nontacaso'. Ispirito Santo catahuarinpoa' ni'ton, ina nontohuatëhuara, noya nataninpoa'. <sup>19</sup> Napoaton iporaso' iyaro'sa', Yosë nohuitërama'. Co Yosë'pa' pa'shatërapomarahuë', nani huëntonënquë aya'coninquëma'. Ya'huëhuano'sa pochin nisarama'. Co huachi nisharo'sa pochin ni'ninquëmahuë'. Ya'ipinpoa' Quisocristo imarëhuasopita hui'ninpita pochachin nóya ni'ninpoa'. <sup>20</sup> Ya'ipi imarëhuasopita ina naponpoa chachin a'na pëi pochin ninëhua', na'pi quëran nipiso'. Na'pi quëran yapëihuatëra, acopo' ihuatahuatë', siminto'ton acorë'. Inapochachin canpoanta' Yosë pëinën pochin ninëhua'. Siminto acopiso pochin, ca'tano'sa'ton nanamën a'chintërinënpoa'. Ina quëran pënëntona'piro'santa' no'tëquën a'china'piapi. Na'pi quëran yapëihuatëra, pëi' taconorinquë na'pi noya noya nininso' acorë' tantiacaso marë'. Ina acohuatëra, a'napita na'piro'sa' no'tëquën apanshinë'. Na'pi noya noya nininso pochachin Quisocristoso' achinirinpoa'. <sup>21</sup> Quisocristo imapatëhua', Yosë acoarinpoa' ina pëinën pochin nicacaso marë'. Catahuahuachinpoa', noya nini'tëhua' ya'huërëhua'. A'napitanta' a'naya a'naya Quisocristo imapachina', ya'conapi anta'. Nóya pëi' Yosë chinotacaso marë' acorëso pochin nisarëhua'. <sup>22</sup> Canpitanta' Quisocristo imatoma', ya'conama'. A'naya a'nayanpoa' na'pi pochin ninëhua' pëi' nanicaso marë'. Ya'ipi imarëhuasopita Yosë pëinën pochin ninëhua'. Ispirito Santo ya'coancantohuachinpoa', Yosë chachin canpoarë' ya'huërarín huachi.

### 3

*Nanamën a'chinacaso marë' acorinso'*

<sup>1</sup> Napoaton isonahuato, canpita marë' Yosë nontarahuë. Nisha piyapi'sanquëma' nipomarahuë', Quisocristo nanamën a'chintëranquëma' ni'ton, tashinan pëiquë po'morinaco. <sup>2</sup> Inaora nohuanton, Yosë chachin acorinco a'chinta'huanquëmaso marë'. Na'con catahuarinco ni'ton, nanamën sha'huiárahue, natantërama'. <sup>3</sup> Iráca quëran huarë' Yosë yonquirin nicha'ëinquëmaso'. Napoaponahuë', co piyapi'sa' anitotërinhuë'. Iporaso nipirinhue' inaora nohuanton, anitotërinco ni'ton, nani pi'pian ninshitëranquëma'. <sup>4</sup> Ina nontohuatama', Quisocristo nanamën anitotërinco' canpitanta' nitotarama'. <sup>5</sup> Iráca co iso nanan nitotopihuë'. Iporaso' Quisocristo acorincoisopita nitotërai. Pënëntona'piro'santa' nitotopi. Ispirito Santo anitotërincoi a'china'huaiso marë'. <sup>6</sup> Na'a pi'ipi cotiöro'saráchin Yosë chinotopi. "Nicha'ësaranguëma'," itaton, Yosëri na'con catahuarin. Iporaso nipirinhue' nisha piyapi'sanquëmanta' catahuarinquëma'. Noya nanan natanatoma', Quisocristo imarama' ni'ton, canpitanta' nicha'ësarinquëma'. Napoaton a'na huëntoínchin pochin ninëhua'.

<sup>7</sup> Yosë nosoroatonco, acorinco ina nanan a'china'huaso marë'. Co acoincosohuë' nipirinhue', acorinco. Na'con catahuarinco ni'ton, noya a'chinárahue. <sup>8</sup> Caso' a'napita imapisopita quëran na'con na'con co noyahuë' nipirahuë', anoyacancantërinco. Ina quëran nosoroatonco, acorinco nisha piyapi'sa' sha'huita'huaso marë'. Quisocristo nanamënso' noyápiachin. Ma inacha ni'ton, nosoromiatërinpoa paya, ténahuë yonquiato. <sup>9</sup> Iráca Yosëri ya'ipi ma'sha ninin. Naporo chachin yonquirinpoa' anoyacancantinpaso marë'. Napoaponahuë', co ya'ipi piyapi'sa' sha'huitërinhuë'. Ipora huarë' anitotërinco ni'ton, sha'huitëranquëma'. <sup>10</sup> Na'con Yosë yonquirinpoa'. Ina nohuanton, oshaquëran a'naya a'nayanpoa' imarëhua'. Iporaso' na'aquënpoa' imapatëhua', Quisocristo huëntonënguë ya'conëhua'. Inápaquë chiníquën nanantopisopitanta' nicatënpoa': "Ma noya Yosë yonquirin ni'ton, anoyacancantaton, huëntonënguë chachin aya'conin paya," tosapi. <sup>11</sup> Iráca quëran huarë' Yosë yonquirinpoa' imacaso marë'. Quisocristo o'maton, huëntonënguë aya'coninpoa'. Inasáchin hua'anëntërinpoa'. <sup>12</sup> Ina imarëhua ni'ton, natëtëhua', Yosë nontarihua'. "Anoyacancantërinpoa' ni'ton, noya natanarinpoa'," ta'tëhua', co tē'huatarihuahuë'. Noya cancantatëhua', ina nontarëhua'. <sup>13</sup> A'chintëranquëma' ni'ton, tashinan pëiquë po'morinaco. Parisitapirahuë', chiníquën cancantoco'. Canpitanta' Quisocristo imacamaso marë' parisitërahue. Ina marë' noya cancantacaso' ya'huërin.

### *Quisocristo nosororinpaso'*

<sup>14</sup> "Ma noyacha Yosë yonquirinpoa paya," ta'to, isonahuato, Tata Yosë nontërahue. <sup>15</sup> Inaso' ya'ipinpoa' hua'anëntërinpoa'. A'naquën inápaquë ya'huërapa. A'naquënpoa' isoro'paquë chachin ya'huëarëhua'. <sup>16</sup> Napoaton canpita yonquiatënguëma', Yosë nontërahue. "Quëmaso' Siniro chini chiníquën nanantëran. Noya noyanquën ni'ton, imarinënsopita nosoroaton, catahuaquë' chiníquën cancanchina'. Ispirito Santori achinicancaín noya noya imainënguën. <sup>17</sup> Ya'ipi cancanëna quëran natëtatona', Quisocristoíchin yonqui'ina'. 'Cancanëhuëquë ya'huërarin,' ta'tona', noya noya nohuichinën. Catahuaquë' noya nosoro'inën. Ya'ipi piyapi'santa' nosoro'ina', Nara itëquën acopo' pa'pachina, co inpaninhue'. Inapochachin inapitanta' 'Quisocristo na'con nosororincoi', ta'tona', a'napitanta' nosoro'ina'. Noya ninosorohuachina', Ispirito Santori catahuararin chiníquën cancantacaiso'. <sup>18-19</sup> Inapohuachina', Quisocristo nosoromiatërincoiso' nitotapi. Pi'iro'të' pancantërinso', naporopitërinso', inaparinso', acoporinso' inapita co naninahuanhuë' yonquirai. Inapochachin Quisocristo nosoromiatërincoisonta' co nitotochináchinhuë nipirinhue', nitotapi. Ina nitotohuachina', ya'ipi quihuitërancoisopita ya'huëtapi. Ya'ipi imapisopita ina yonqui'ina'," itërahue.

<sup>20</sup> Tata Yosëso' chini chiníquën nanantaton, ya'ipi nanitaparin. Hua'yanën chachin nani ya'coancantërinpoa' ni'ton, noya catahuarinpoa'. Nani tahuëri achinicancaínpoa' ni'ton, cancanënpoa quëran huarë' Yosë yonquia'ahua'. Ina nontohuatëhua',

“Catahuaco,” itohuatèhua', na'con catahuarinpoa'. Na'con nohuantopirèhuahuè', na'con na'con inaso' nanitaparín nicacaso'. Co nitotèrèhuasohuènta' nanitaparín. <sup>21</sup> “Ma noyacha Tata Yosèso paya,” itahua'. Quisocriso noya imapatèhua', a'napitanta' nicatènènpoa', Yosè yonquiapi. Ya'ipi piyapi'sari ina chinochina'. Ama onporonta' ina naniantahuasohuè'. Ipora quèran huarè' inasáchin yonquia'ahua'. Amen.

## 4

### *A'na huènton pochín ninèhuaso'*

<sup>1</sup> Quisocriso nanamèn a'chinahuèso marè' tashinan pèiquè po'mopirinacohuè', iporahua'nta' pènénáranquèma'. Yosè nicha'ètènquèma', huèntonènquè aya'coninquèma'. Napoaton noyasáchin nico'. <sup>2</sup> “Yosèíchin catahuarinpoa' noya nicacaso',” ta'toma', ama a'napita nocancosohuè'. Sanoanan quèran nontatoma', ama no'huicosohuè'. A'napita ma'sha onpotohuachinènquèma', ama yai'huèrètocosohuè'. Co noyahuè' nipirinahuè', nosoroatoma' noya nontoco'. <sup>3</sup> Na'con yonquico' iyaparima pochachín ninosorocamaso'. Ispirito Santo catahuarinquèma' napopináchin yonquicamaso marè'. Ina catahuahuachinquèma', co pi'pian tèranta' nino'huíaramahuè'. Noya nini'toma', ya'huarama'. <sup>4</sup> Quisocriso imapatèhua', ya'ipinpoa' a'na huèntoínchin pochín ninèhua'. A'naíchin Ispirito Santo ya'huèrinso' ya'coancantèrinpoa'. Imarèhuasopita nicha'èsarinpoa' ya'huèrinquè chachín quèpanta'inpoaso marè'. Inasáchin ninarèhua'. <sup>5</sup> Quisocrisoíchin hua'anèntèrinpoa'. Ina nanamènáchin natèrèhua'. “Quisocriso imarahuè,” ta'tèhua', aporihuanèhua'. Co nisha nisha imacaso marè' aporintèrinènpohuè'. <sup>6</sup> Tata Yosèíchin chinotèrèhua'. Ya'ipi imarèhuasopita hui'ninpita pochín ni'ninpoa'. Inaso' chini chiníquèn nanantaton, hua'anèntèrinpoa'. Ya'ipinpoa' catahuarinpoa' ina marè' sacat-acaso'. Imapatèhua', ya'coancantomiatèrinpoa'.

<sup>7</sup> Quisocriso catahuarinpoa' ma'sona tèranta' noya nicacaso marè'. Ya'ipinpoa' a'naya a'nayanpoa' catahuarinpoa' nisha nisha nicacaso'. Inaora nohuanton, catahuarinpoa' ma'sona nohuantèrinso' noya nitotacaso marè'. <sup>8-9</sup> Iráca inápaquè nóya ya'huèpirinhuè', isoro'paquè chachín o'marin. Na'con parisitaton, chiminín. Pa'pitopirinahuè', naniantaton, inápaquè panantarin. Iráca quiricanènquè naporin:

“Ya'ipi minsèrahuaton, inápaquè panantarin huachi.

Naporahuaton, ma'sha topinan nicanarèso pochín piyapinènpita catahuarin nóya nicacaso'.

Nisha nisha nicacaso' catahuarin,” ténin.

<sup>10</sup> Quisocriso chachín isoro'paquè o'marahuatón, inápaquè panantarin. Yosè ya'huèrinquè chachín panantarahuaton, hua'yanèn chachín a'patimarinpoa' ya'coancantínpoaso marè'. Ya'ipi parti ya'huaton, ya'ipi hua'anèntarin.

<sup>11</sup> Naporahuaton, nisha nisha acorinpoa' nicatahuacaso marè'. A'naquènta' Ispirito Santo nohuanton, Yosè yonquirinso chachín sha'huirin. A'naquènta' nisha nisha parti paaton, Yosè nanamèn a'china'piarin. A'naquènta' ina nohuanton, ya'huèpique ya'huèhuano'sa' nani tahuèri catahuapi noya imacaiso marè'. A'naquènta' ya'ipi Yosè nanamèn a'chintapi. <sup>12</sup> Nisha nisha acorinpoa' noya nicatahuacaso marè'. Inaora nonèn pochín ni'ninpoa' ni'ton, ya'ipi imarèhuasopita catahuarinpoa' noya ina marè' sacatacaso'.

<sup>13</sup> Inapohuatèhua', ya'ipinpoa' imarèhuasopita napopináchin yonquiarihua'. Yosè hui'nin chachín nóya nohuitarihua'. Ina quèran noya noya cancantarihua'. So'sorèso pochín oshaquèran Quisocriso pochachín cancantacaso' ya'huèrin. <sup>14</sup> Ina quèran no'tèquèn yonquiarihua'. Co huachi hua'huaro'sa pochín cancantarihuahuè'. Hua'huaro'saso' co yonquiyatèrapihuè' ni'ton, nisha nisha natètopi. Canpoaso nipirinhuè' chinotènpoa pochín no'tèquèn yonquia'ahua'. Ni'co'. Panca ihuan huè'pachina, poti niquèran niquèran ohuèrèrin. Co no'tèquèn yanponinhuè'. Inapochachín a'naquèn nisha



nisha nanan natanpachinara, nisha nisha yonquipi. Co Quisocristo nanaménáchin yonquipihué'. A'naquén nisha nisha a'chinapi. Noyá nitotopi nonpinacaiso'. Nonpin nanan imatona', yanonpintopirinénquémahué', ama pi'pian tēranta' natēcosohué'.  
 15 Quisocristo nanaménso nipirihué' no'tén nanan. Noya ninosoroatēhua', inasáchin nia'chintahua'. Inapohuatēhua', oshaquēran Quisocristo pochin cancantarihua'. Inaso' na'con nosoroatonpoa', hua'anéntarinpoa'. Inaora nonén pochachin ni'ninpoa'. Inaso' motēnpoa pochin ni'ton, natēcaso' ya'huērin. 16 Ina natēhuatēhua', noya nini'tēhua', ya'huarigua'. Ya'ipinpoa' nicatahuacaso' ya'huērin. Nisha nisha nicatahuarigua' noya noya imacaso maré'. Quisocristo chachin catahuahuachinpoa', noya nicatahuarigua'. Ina quēran ninosoroatēhua', ya'ipinpoa' noya noya cancantarihua'.

### *Nasha cancan quētērinpoaso'*

17-18 Quisocristo nanan quētērinco ni'ton, pēnēnaranquēma'. Na'a piyapi'sa' co imatonaraihué', topinan quēran ya'huērapi. Somaraya pochin cancantatona', nisha nisha yonquipi. Co natantochináchinhué' cancantopi ni'ton, co Yosé nanamén nitotopihué'. Co Yosé yonquiatonaraihué', co manta' Yosé nohuitopihué'. Ama inapita pochin nicosohué'. 19 Inapitaso' nitotaponaraihué', co nohuantopihué' noya nicacaiso'. Co noyahué' nisáponaraihué', co nitotapanpihué'. Monshihuanacaisoáchin yonquipi. Co noyahué' yonquiatona', a'naratipita nipi. 20 Co ina pochin Quisocristo a'chintērinpoahué'. 21 Inaso' no'téquén anitotērinpoa'. Nanamén nani natanama'. 22 Iráca pa'pi co noyahué' ninama'. No'pirama', monshihuanama', nisha nisha yonquirama'. Inapohuatamara, “noya cancantarēhua',” topiramahué', ninonpintērama'. Co tēhuēnchachin noya cancantēramahué'. Iráca naporamaso' chandatērinso pochin Yosé ni'ninquēma'. Iporaso' ya'ipi co noyahué' yonquiramasopita naniantoco huachi. 23 Ina naniantatoma', nóya cancantoco' noya noya yonquiamaso maré'. 24 Nasha cancan Yosé quētērinpoa' ina pochin cancantacaso maré'. Napoaton nasha a'morēso pochin nasha cancantoco'. No'téquén yonquiatoma', noyasáchin nico'.

25 Ya'ipi imarēhuasopita Yosé huēntonēnquē chachin ya'conēhua'. Iyanpoa pochin ninēhua'. Napoaton ama ninonpintahuasohué'. No'téquénáchin ninontahua'.

26 A'na piyapi no'huihuatama', ni'cona oshahuantama'. Co'huara pi'i ya'coyantērasohué', nanan anoyatoco'. 27 Hua'qui' no'huihuatama', a'naroáchin sopai minsēarinquēma'.

28 A'naquēma' iráca ihuatērama'. Ama huachi ihuatocosohué'. Ama chirotomarahué', noya sacatoco'. Ina quēran nanitērama' pahuantērinso'pita quētacamaso'.

29 Ama taparo' noncosohué'. Ama ma'toma ma'toma noncosohué'. Sano yonquiatoma', noya nonco' a'napita natanatēnquēma', Yosé yonqui'ina'. Noya noya imacaso maré' catahuaco'. 30 Co noyahué' nipatama', Ispirito Santo sētarin. Quisocristo imapata-mara, sichoquē marca acotēreso pochin Ispirito Santo aya'coancantērinquēma'. Ayaro' tahuēriquē huaré' a'paiarinquēma'. Naporo' noyá nicha'ēsarinquēma'. Napoaton ama Ispirito Santo asētocosohué'.

31 Ama a'napita no'huitoma', yonquirácosohué'. A'naroáchin nanan anoyatoco'. Ama no'huitacamaso' nohuantocosohué'. Ama no'huito canainquēmasohué'. Ama iquianan quēran ninontocosohué'. Nipinocasonta' co noyahué'. Ama pi'pian tēranta' co noyahué' nicosohué'. 32 Ya'ipi piyapi noya nontoco'. Nosoroatoma', catahuaco'. Ma'sha onpotohuachinēnquēma', ama ina yonquicosohué'. Quisocristo imarama' ni'ton, Yosé oshanēma' inquitērinquēma'. Canpita maré' chiminin ni'ton, nanan anoyatērinquēma'. Inapochachin canpitanta' a'napita ma'sha onpotohuachinēnquēma', nanan anoyatatoma', noya nontoco'.



## 5

*Yosë imatëhua', noyasáchin niahua'*

<sup>1</sup> Yosë nosoroatonpoa', hui'ninpita pochin ni'ninpoa'. Tatanpoa' ni'ton, ina non-ahuan'. <sup>2</sup> Quisocristo nosoroatonpoa', canpoa marë' chiminin. Oshanënpoa marë' chiminpachina, Yosëri noya ni'nin. Napoaton canpoanta' nani tahuëriya inapochachin ninosoroa'ahua' Yosë noya ni'ninpoa'.

<sup>3</sup> Yosë anoyacancantërinquëma' ni'ton, ama iyaro'sa' monshihuancosohuë'. Ama a'na quëmapi sa'in noyapacosohuë'. Ama ma'sharáchin cancantatoma', apiracosohuë'. Ama a'napita tëranta ina pochin nipiso sha'huitocosohuë'. <sup>4</sup> Ama taparo' ninontocosohuë'. Ama narinacasoachin yonquicosohuë'. Co topinan quëran ninontacaso' ya'huërinhuë'. Yosë catahuarinpoaso' na'con na'con nisha'huitatëhua': "Yosparinquën Siniro," itahua'. <sup>5</sup> Monshihuanpatama', co Quisocristo huëntonënguë ya'conamahuë'. Taparo' nininso' nipatama', co imaramahuë'. Ma'sharáchin yonquihuatama', co tēhuēnchachin Yosë yonquiamahuë'. Nani ma'sha nohuantohuatama', mamanshi moshapiso pochin niconama'. Ina nitotatoma' iyaro'sa' yonquico'. <sup>6</sup> A'naquën yanon-pintatēnquëma', napopi: "Quisocristo imapomarahuë', ma'sona nohuantēramaso' nico', co ana'intarinquëmahuë'," itopirinēnquëmahuë', ama pi'pian tēranta' natēcosohuë'. Co Yosë natēpisopitahuë' chiniquën ana'intarin. <sup>7</sup> Napoaton ama inapitarë'quëma' nipay-acosohuë'.

<sup>8</sup> Iráca tashi pochin cancantopiramahuë', iporaso' Yosë imarama' ni'ton, anoyacantërinquëma' tahuëri pochin nicacamaso marë'. Napoaton tahuëri pochin nico'. <sup>9</sup> Tahuëri pochin cancantohuatama', nóya nisarama'. No'tëquénáchin yonquiatoma', noyápiachin cancantarama'. <sup>10</sup> Noya yonquiatoma', Yosë nohuantërinso' nitotoco'. Ina nitotohuatama', ya'ipiya natëco'. <sup>11</sup> A'naquën tashi pochin cancantatona', co noyahuë' nipi. Topinan quëran ya'huërapí ni'ton, ama inapita pochin cancantocosohuë'. No'tëquën sha'huitoco' co noyahuë' nipisopita naniantacaiso marë'. <sup>12</sup> Pa'pi co noyahuë' nipi. Po'oana quëran a'naratipita nipi. Napopiso a'ninquëchin sha'huirahuë' naporini, pa'pi tapaintërihuahuë'. <sup>13</sup> Noyasáchin nipatëhua', oshahuano'sa' oshaquëran yonquiapi. "Tēhuēnchachin co noyahuë' ninëhua'," tosapi. <sup>14</sup> Tahuëri nipachina, ya'ipi quënanë'. Ninshitatona napopiso chachin ninin.

"Co noyahuë' nipatama', huë'ërëso pochin cancantarama'.

Ama ina pochin cancantatomarahuë', Yosë yonquico'.

Chimipi pochin cancantohuatama', Yosë nontoco' nasha cancan quëchinquëma'. Ina quëran nanpiantarëso pochin cancantarama'.

Quisocristo chachin a'pintarinquëma' noya nicacamaso marë'," topi.

<sup>15</sup> Napoaton iyaro'sa' noya yonquiatoma' ya'huëco'. A'naquën co manta' yonquip-ihuë'. Ama inapita pochin cancantocosohuë'. No'tëquën yonquico'. <sup>16</sup> Ama tahuëri chiniacosohuë'. Iporaso' na'a piyapi'sa' co noyahuë' cancantopi. Napoaton apira apira a'napita catahuaco' Yosë yonquicaíso marë'. Onpopionta' nanamën anitotoco'. <sup>17</sup> Ama topinan quëran ya'huëcosohuë'. Yosë nohuantërinso' nitotatoma', natëco'. <sup>18</sup> A'naquën no'picasoáchin cancantopi. "Huëco' no'piahua'. Capa cancantahua'," nitopirinahuë'. Ama canpitaso' no'picosohuë', nishacancantotama'. Yosë nontoco' Ispirito Santo noyá ya'coancanchinquëma'. Nani tahuëri ya'coancantomiachinquëma'. Ina quëran co no'pipomarahuë', tēhuēnchachin capa cancantomiatarama'. <sup>19</sup> Yosë quiricanënguë cantapiso' yonquiatoma', nisha'huitoco'. Yosë cantanën cantaco'. Nisha nisha cantanën cantatoma', ya'ipi cancanëma quëran Yosë chinotoco'. <sup>20</sup> Nani tahuëri Tata Yosë nontatoma': "Yosparinquën," itoco'. Ma'sha onpoapomarahuënta', noya cancantoco'. "Siniro Quisocristo nanan quëtërinco ni'ton, nontaranquën," ta'toma' Yosë nontoco'.

*Quëmapi'sa' sa'inarë chachin pënëinso'*

<sup>21</sup> Quisocristoso' hua'anëma' ni'ton, ina yonquiatoma', imaramasopita capini nicatahuaco'. Ya'ipinquëma' nipënënatoma', ninatanco'. <sup>22</sup> Sanapi'sa' Siniro natëtona', so'inanta' natëina'. <sup>23</sup> Imarëhuasopitaso' Quisocristo nonën pochin ninëhua'. Inaso' hua'anënpoa' ni'ton, camairinpoa'. Ya'ipi imarëhuasopita nicha'ësaripoa'. Napoaton inasáchin natëcaso' ya'huërin. Inapochachin quëmapi'sa' sa'ina quëran chini chiniquën nanantërin. Napoaton sanapi'sa' so'ina' natëina'. <sup>24</sup> Imarëhuasopita Quisocristo natërëhuaso pochachin sanapi'santa' so'ina' natëina'.

<sup>25</sup> Quëmapi'santa' sa'ina' nosoro'ina'. Quisocristoso' imarëhuasopita na'con nosororinpoa'. Nosoroatonpoa', ya'huërënamënpoa' chiminin. Ina nosororinpoaso pochachin quëmapi'sa' sa'ina' nosoro'ina'. <sup>26</sup> Quisocristo chiminin anoyacancantinpoaso marë'. Nanamën natëhuatëhuara, noyápiachin cancan quëtërinpoa'. I'quë amarëso pochin oshanënpoa' inquitërinpoa'. <sup>27</sup> Ya'ipi imarëhuasopita noya noya acoinpoaso marë' naporin. Co pi'pian tëranta' në'huëtërinso pochin cancantacaso' nohuantërinhuë'. Napoaton ya'ipi co noyahuë' yonquirëhuasopita inquitërinpoa'. Noyápiachin cancan quëtërinpoa' ni'ton, noya ni'sarinpoa'. <sup>28</sup> Inapochachin quëmapi'sa' sa'ina' nosoro'ina'. Inahuara nonëna pochin nicatona', nosoro'ina'. Insosona sa'in nosorohuachin, inaora ninosoroarin. <sup>29</sup> Co insonta' inaora nino'huirinhüë'. Tanahuachina, coshatërin. Canotohuachina, chinotërin. Noya ina pochin ninosororin. Quisocristo imarëhuasopita nosororinpoaso pochin ninin. <sup>30</sup> Imarëhuasopitaso' inaora nonën pochin ni'ninpoa' ni'ton, a'naya a'nayanpoa' nosororinpoa'. <sup>31</sup> "Napoaton quëmapi sa'apachina, co huachi pa'pin, a'shin, inapita na'con na'con yonquicaso' ya'huërinhuë'. Sa'in na'con na'con yonquiaton, chinpitacaso' ya'huërin. Cato' piyapi nipirinhüë', a'naíchin pochin Yosëri ni'nin," ténin quiricanënquë. <sup>32</sup> Inaso' sacai' nitotacaso'. Caso nipirinhüë' Quisocristo noya yonquirinpoaso' sha'huitaranquëma'. Ya'ipi imarëhuasopita inarë'quënpoa' nichinpitërehua' ni'ton, a'naíchin pochin Yosë ni'ninpoa'. <sup>33</sup> Canpitanta' iyaro'sa', sa'ama' na'con nosoroco'. Canpitaora ninosororamaso pochachin sa'ama' nosoroco'. Sanapi'sanquëmanta' so'yama' noya ni'co'. Noya nicatoma', natëco'.

## 6

### *Hua'huaro'santa' pënëninso'*

<sup>1</sup> Canpitanta' apia'huaro'sa', pënënanquëma'. Tatama' natëco'. Mamamanta' natëco'. Quisocristo imarama' ni'ton, inapita natëcamaso' ya'huërin. <sup>2-3</sup> Yosë quiricanën quëran pënëninpoa'. "Tatama' noya nicatoma', natëco'. Mamamanta' natëco'. Natëhuatama', Yosë na'con catahuarinquëma'. Hua'qui' noya ya'huarama'," ténin quiricanënquë. Ina pochin nicacaso' Yosë na'con na'con nohuantërin.

<sup>4</sup> Canpitanta' iyaro'sa', hui'nama' noya pënëncó'. Ama apira apira no'huicosohüë'. Apira apira no'huihuata' co natantochináchinhuë' cancantapona'. Co noyahuë' nipachina', sanoanan quëran pënëncó' noya nicacaiso marë'. Yosë nanamën noya a'chintoco' Quisocristo imaina'.

### *Sacatoro'sa' pënëninso'*

<sup>5</sup> Patron marë' sacatohuatama', noya nicatoma', natëco'. Ama nonpintocosohüë'. Quisocristo marë' sacatarëso pochin cancantatoma', noya sacatoco'.

<sup>6</sup> A'naquënso' patroni ni'pachina', chiniquën sacatërin. Co ni'pachinahuë', chiroton co sacatërinhuë'. Canpitaso nipirinhüë' patron co ni'pirlinquëmaonta', noya sacatoco' Quisocristo noya ni'inquëma'. Yosë natëtoma', ya'ipi cancanëma quëran noya nico'. <sup>7</sup> Co piyapi maréáchin sacataramahuë'. Siniro imarama' ni'ton, ina marë' sacatarama'. Napoaton ya'ipi cancanëma quëran sacatoco'. <sup>8</sup> Noya nipatëhua', Yosë'pa' acanaarinpoa'. Ma'huano'sahuë nipon, piyapinënpitahuë nipon, ya'ipinpoa' no'tëquën sha'huitarinpoa'. Insosona noya nipachin, acanararin. Ina yonquiatoma', noya nico'.

<sup>9</sup> Patrono'saquëmantá', piyapinëmapita noya nontoco'. Ama no'huiana quëran camaito-cosohuë'. Yosë ni'sarínquëma' canpitanta'. Inaso' inápaquë ya'huaton, hua'anëntërinpoa'. Napopianáchin ni'ninpoa'. Co ma'huano'sa' noya noya ni'ninhuë'.

*Yosë catahuarinpoa' sopai minsëcaso marë'*

<sup>10</sup> Nani iyaro'sa' pënënanquëma'. Yosë imatoma', nani tahuëri ina nontoco' achinican-cainquëma'. Inaso' chini chiníquën nanantaton, ya'ipi nanitaparin ni'ton, catahuarinquëma'. <sup>11</sup> Sopai hua'an noyá nitotërin nonpinacaso'. Nani tahuëri yanonpintërinpoa'. Yosëso nipirínhuë' chini chiníquën nanantaton, yacatahuarinpoa'. Ina nontohuatëhua', catahuarinpoa' sopai minsëcaso'. Sontaro'sa' a'mopiso pochin nininso' Yosë quëtërinpoa' ama sopai minsëinpoaso marëhuë'. <sup>12</sup> Inimiconënpoa' co piyapi pochin quënanëhuahuë'. Sopai hua'anso' yaminsërinpoa'. Na'a sopairo'santa' inápaquë ya'huatona', yacamairinënpoa'. Co quënanpirëhuahuë', yonquinënpoa quëran yacamairinënpoa' co noyahuë' nicacaso marë'. Iporaso' notohuaro' piyapi'sa' tashi pochin cancantatona', sopai natëpi. Inari camairin ni'ton, pa'pi co noyahuë' yonquipi. <sup>13</sup> Sopai chiníquën sacatarin minsëinpoaso marë'. Napoaton Yosë nontoco' catahuainquëma'. Sontaro'sa' a'mopiso pochin nininso' Yosë quëtërinquëma'. Ina masahuatoma', a'moco' sopai minsëcaso marë'. Noya nitaparëso pochin nico'. Inapoatoma', chinitoco'.

<sup>14</sup> Napoaton chiníquën cancantatoma', panca sintoronquë nitonpotopiso pochin no'tën nanan na'con nohuantoco'. Ina imatoma', no'tëquën nonco'. Co pi'pisha tëranta' nonpinacaso' ya'huërinhuë'. Hua'na coton a'mopiso pochin noyasáchin nico' Yosë catahuainquëmaso marë'. <sup>15</sup> Sho'shorahuan sapatë' pochin nininso' po'mohuachinara, co to'coitopihuë', noya noya iratopi. Inapochachin canpitanta' Yosë nanamën sha'huitoco' a'napitanta' nitochina'. Noya nanan yonquihuatëhua', sano cancantarihua'. <sup>16</sup> Sontaro'sa' iscoto quëpapi nipa'shintacaiso marë'. Inimicoro'sa' panca shinërë masahuatona', yaqui' noya orotërinso' nininquë pashitahuatona', i'chinpitopi. I'chinpitahuatona', pë'chinanquë aguë të'yatopi. Napoaton sontaro'sa' iscoto quëpapi nipa'shintacaiso marë'. Ina quëran inimicori të'yanantohuachina, shinërë inaquë tacopiquirin. Panca shinërë orotërarinso pochachin sopai apira apira yanonpintërinpoa' Yosë naniantacaso marë'. Napoaton na'con Yosë yonquico'. “Yosë ni'sárinco. Co onporonta' naniantaríncohuë'” topatama', achinicananarínquëma'. Co pi'pian tëranta' sopai natëaramahuë'. Iscoto quëpapiso pochin Yosëso' noya ya'copiarinpoa'. <sup>17</sup> Sontaro'sa' co casco hua'na quëran nininso' yancopihuë' naporini, a'naroáchin inimiconënpitari motën acochitonahuë'. Inapochachin canpoanta' co Yosë anoyacancantërinpoahuë' naporini, co cha'ëtërihuahuë'. Yosë quiricanënta' ya'huëtërinpoa'. Ispirito Santo nohuanton, ninshitërinënpoa' sopai minsëcaso marë'. Napoaton nani tahuëri ina nontatoma', yonquico'. Sontaro'sari sahuëninëna quëran inimico minsëpi. Inapochachin canpoanta' Yosë quiricanën quëran sopai minsëarihua'.

<sup>18</sup> Apira apira Yosë nontoco'. Ma'sha onpohuatamanta', ina nontoco' catahuainquëma'. Noya yonquiatoma', chiníquën nontoco'. Ispirito Santo catahuarinpoa' cancanënpoa quëran huarë' noya nontacaso'. Ama amiatomahuë', ni'sáco' ama a'nanaya sopai minsëinquëmaso marëhuë'. Ya'ipi imarëhuasopita marë' Yosë nontoco'. <sup>19</sup> Ca marënta' Yosë nontoco' catahuainco nanamën noya a'chínchi. Chiníquën cancantato, a'chínchi. Yosëso' yanicha'ëpirinpoahuë', na'a piyapi'saso' co nitochátërapihuë'. <sup>20</sup> Quisocriso chachin a'parinco a'chinta'huaso marë'. Ina marë' tashinan pëiquë po'morinaco. Po'mopirinacohuë', Yosë nontoco' ama të'huaisohuë'. Chiníquën cancantato, a'nínquëchin a'chinta'huaso' ya'huërin.

*Piquëran huarë' sha'huirínso'*

<sup>21</sup> Iya Tiquico ya'ipi naporahuëso' sha'huitarínquëma' nitotamaso marë'. Inaso' na'con nosoroato, iyahuë pochin ni'nahuë. Sinioro nanamën noya a'chinarin.

<sup>22</sup> Canpitataquë a'paarahüë onpohuinsona ya'huëraiso' sha'huitinquëmaso marë'. Ina natanpatama', chiniquën cancantarama'.

<sup>23</sup> Quisocristo imarama' ni'ton, iyaro'sa', Tata Yosë asanocancainquëma'. Nosoro'inquëma'. Catahuainquëma' sha'huitërinpoaso' noya natëcamaso marë'. Siniro Quisocristonta' inapochachin catahuainquëma'. <sup>24</sup> Quisocristo hua'anëntarinpoa'. Ina nosoromiatohuatama', inaora nohuanton, Yosë noya catahuainquëma', tënahuë. Amen. Nani ninshitëranquëma huachi.

*Paono*

## Paonori Piriposëquë ya'huëpisopita ninshitërinso'

### *Imapisopita yonquiaton, ninshitërinso'*

<sup>1</sup> Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahüë. Iya Timotioro'co nanan a'patarainquëma'. Quisocristo hua'anëntërincoi. Inasáchin natërai. Ya'ipi Quisocristo imaramasopita Piriposëquë ya'huëramaso', ninshitaranquëma'. Ansiano'sanquëma' na'con yonquiranquëma'. Tiacono'sanquëmanta' yonquiranquëma'. <sup>2</sup> Tata Yosë inaora nohuanton, catahuainquëma'. Asanocancainquëma'. Siniro Quisocristonta' inapochachin catahuainquëma'.

### *Inapita marë' Yosë nontërinso'*

<sup>3</sup> Co naniantëranquëmahuë'. Canpita yonquiatënuëma', Yosë nontárahüë. “Piriposëquë ya'huëpisopita noya imarinënuëni' ton, ‘Yosparinquëni, Siniro,’ ” itërahüë, Yosë nontato. <sup>4</sup> Noya cancantato, canpita marë' Yosë nontërahüë. <sup>5</sup> Iráca Yosë nanamën a'chintohuatënuëmara, a'naroáchin imarama'. Naporo quëran huarë' catahuaramaco a'napitanta' a'chinta'huaso marë'. Iporahuanta' a'napita a'chintarama' Yosë imacaiso marë'. Ina yonquiato, noya cancantërahüë. <sup>6</sup> “Quisocristo imasarahüë huachi,” topatama', naporo tahuëri chachin Yosë anoyacancantërinquëma'. Co naniantëranquëmahuë', tënahüë. Ipora huanta' catahuarinquëma' noya noya nicacamaso marë'. Quisocristo o'mantaquë huarë' catahuarinquëma'. Naporo' Quisocristo pochachin cancantarama'. <sup>7</sup> Na'con nosororanquëma' ni' ton, ina pochin noya yonquiranquëma'. Iráca Quisocristo nanamën a'chinpatëra, catahuaramaco. Tashinan pëiquë po'mohuachinacoranta', co naniantëramacohüë'. Inaquënta' catahuaramaco. Imarahüëso marë' sha'huirapirinaco. Coisëquë quëpapirinacohüë', co tapanatohüë', Yosë nanamën no'tëquëni sha'huitërahüë. Canpitanta' “Yosë catahuarinpoa',” ta'toma', co tapanaramahuë'. Napoaton canpita yonquiatënuëma', noya cancantërahüë. Iyahuëpita pochachin ni'nanquëma'. <sup>8</sup> Quisocristo nosororinpoaso pochachin carinquëmanta' nosororanquëma'. Pa'pi yani'nanquëma'. Yosë ni'sárinco no'tëquëni nontaranquëma'. <sup>9</sup> Canpita marë' ina nontërahüë. “Catahuaquë', Siniro, noya noya ninosoro'ina'. Quëma nohuanton, nanamën nóya nitochina'. Catahuaquë', Siniro, no'tëquëni yonqui'ina',” itërahüë Yosë nontato. <sup>10</sup> Yosë nanamën na'con yonquihuatama', noya noya nitotatoma', noya nisarama'. No'tëquëni yonquihuatama', noyápiachin cancantarama'. Noyasáchin nipatama', Quisocristo o'mantahuachina, nóya ni'sarinquëma'. Co ana'intëranquëmahuë'. <sup>11</sup> Quisocristo catahuahuachinquëma', noyasáchin nisarama'. Ina quëran a'napitanta' nicatënuëma', Yosë yonquiapi. “Ma noya Yosëri catahuarin ni' ton, noya nipi. Ma noyacha Yosëso paya,” tosapi.

### *Parisitërin quëran Yosë nanamën nahuininso'*

<sup>12</sup> Ma'sha onpotopirinacohüë', inanta' noya, tënahüë. Ina sha'huichinquëma'. Tashinan pëiquë po'mopirinacohüë', ina marë' na'con na'con piyapi'sa' Yosë nanamën natanapi. <sup>13</sup> Ya'ipi sontaro'sa' isëquë ya'huëpisopita natanapi. “Paono co manta' onpopirinhüë', Quisocristo imarin ni' ton, tashinan pëiquë po'mopi,” topi. Ya'ipi piyapi'sa' ina nitotopi. <sup>14</sup> Tashinan pëiquë po'mopirinacohüë', chiníquëni cancantërahüë. Ina natanatona', na'a imapisopita co huachi aquëtë' të'huapihüë'. “Quisocristo catahuarincoi quiyanta',” ta'tona', chiníquëni cancantapi. Chiníquëni cancantatona', Yosë nanamën na'con na'con a'chinapi.

<sup>15-17</sup> A'naquëni noya nosororinaco ni' ton, noya cancantatona', a'chinapi. “Paono tashinan pëiquë ya'huëpirinhüë', Yosë nohuanton, inaquë po'mopi Quisocristo nanamën no'tëquëni sha'huicaso marë',” ta'tona', noya a'chinapi. A'naquënso nipirinhüë', co



nosororinacohuë'. Apiratatë pochin nitërinaco. "Quiyaso' noya noya a'chinarai," toconatona', co noyahuë' ni'ninaco. "Paono tashinan pëiquë ya'huaso', quiyaso' a'chinpatëira, na'con na'con piyapi'sa' pa'yatatona', nataninacoi. Ina quëran Paonori apiratë pochin nicaton, aquë aquëtë' sëtarin," topi natantërahuë. <sup>18</sup> Ina niponahuë', co no'huirahuë'. Co apiratatë pochin ninahuë'. A'naquën noya cancantatona', Quisocristo nanamën a'chinapi. A'naquënso' co noya cancantaponaraihuë', a'chinapi anta'. Na'con na'con piyapi'sari natanapi ni'ton, noya cancantërahuë'.

<sup>19</sup> Nani tahuëri ca marë' Yosë nontërama'. Naporahuaton, Ispirito Santo nani tahuëri catahuarinco. Napoaton co pa'yanahuë'. Ocoiarinaco nimara. Co caso' nitotërahuë'. Yosëichin nitotërinso'. Ma'sona tëranta' onpotohuachinaco, inanta' noya, tënahüë. Noyasáchin Yosë yonquirinpoa'. Ina marë' noya cancantarahuë. <sup>20</sup> Co nohuantërahuë' pi'pian tëranta' Yosë nanianta'huaso'. Inaso' noyasáchin yonquirinpoa' ni'ton, co atapanarincohuë', tënahüë. Coisë ocoiaponco nimara. Tëpaponco nimara. Co ina nitotërahuë'. Co ina yonquirahuë'. Ocoihuachinco, chiniquën cancantato, a'chiantarahuë a'napitanta' imacaiso marë'. Tëpahuachinaco, piyapi'sa' nicatonaco, na'con na'con Quisocristo yonquiapona', tënahüë. Quisocristo natëca'huasoráchin yonquirahuë. <sup>21</sup> Co tëpahuachinacohuë', Quisocristo natëto noya cancantarahuë. Tëpahuachinacos' nipirinhüë', canamiatarahuë. <sup>22</sup> Co chiminpatohüë', Yosë nanamën a'chiantarahuë. Ina quëran na'con na'con piyapi'sa' Quisoso imasapi. Napoaton co nitotërahuë'. <sup>23</sup> ¿Ma'cha noya noya nicaya? tënahüë yonquiato. Co caso' nitotërahuë'. A'na cancan nohuantërin chimina'huaso'. Chiminpató, Quisocristoro'co ya'huëcontarahuë. Inaso' noya noya. <sup>24</sup> Nipirinhüë', chiminpató, ¿incha a'chintërë'ponquëmaya? tënahüë yonquiato. Canpita a'chinta'huanquëmaso' nohuantërahuë. <sup>25</sup> Napoaton co tëparinacohüë', tënahüë. Yosë nohuanton nanpihuatoso', a'chiantarahuë. Noya noya Quisocristo imacaso marë' a'chinchinquëma'. Nóya natëtohuatama', noya noya cancantarama'. <sup>26</sup> Ocoihuachinaco, nicaponquëma' pa'sarahuë. Pa'pató, capa cancantarama huachi. "Ma noyacha Quisocristosó' ni'ton, Paono a'pairin paya," tosarama'.

<sup>27</sup> Iporaso' iyaro'sa' nóya nico'. Quisocristo nanamën yonquiatoma', ina pochachin cancantoco'. Yosë huëntonënuquë ya'conama' ni'ton, ina pochin cancantacaso' ya'huërin. Nicaponquëma' pa'samarahuë. Co a'na' nanitapohüë' nimara. Ina niponahuë', nani tahuëri noya nico' noya nanan natanchi. Ya'ipinquëma', iyaro'sa', imamiatoco'. Ama a'nayanquëma' tëranta' nisha yonquicosohüë'. Napopináchin yonquiatoma', Quisocristo nanamën a'chináco'. Inapohuatama', natantohuato, nóya cancantarahuë huachi. <sup>28</sup> A'naquën co Quisocristo imatonahuë', no'huiarinënquëma', aparisitarinënquëma'. No'huipirinënquëmaonta', ama të'huatocosohüë'. Chiniquën cancantohuatama', yonquiapi. "Ma inacha Yosë imapisopitaso paya. Yosëri catahuarin ni'ton, cha'ësapi. Co imarëhuasopitasohüë' nipirinhüë', co nicha'ësarinpohüë'," tosapi. Yosëichin catahuarinpoa' chiniquën cancantacaso'. <sup>29</sup> Yosë nosoroatonpoa', noyasáchin yonquirinpoa'. Ina nohuanton, Quisocristo imarëhua'. Ina quëran imarëhuaso marë' parisitarëhua'. "Ca marë' chiniquën parisitërin ni'ton, canta' imarahuëso marë' parisichi," ta'tëhua', noya cancantahua'. Inanta' Yosë nohuantërin. <sup>30</sup> Iráca canpitataquë ya'huapo, imarahuëso marë' aparisitërinaco, ni'nama'. Ipora huanta' ina marë' parisitarahuë. Canpitanta' imaramaso marë' aparisitarinënquëma'. Niponahuë', chiniquën cancantatoma', imamiatoco'.

## 2

### *Quisocristo nonanacaso' ya'huërinso'*

<sup>1</sup> Quisocristo achinicananinquëma'. Na'con nosororinquëma' ni'ton, noya cancantarama'. Ispirito Santo ya'coancantohuachinquëma', catahuarinquëma'. Catahuahuachinquëma', noya ninosoroarama'. <sup>2</sup> Napoaton ya'ipinquëma' nóya

nini'toma', ya'huëco'. Noya noya ninosoroco'. Ama, iyaro'sa', nisha nisha yonquicosohuë'. Napopináchin cancantoco'. Ina pochin cancantohuatama', noya noya cancantarahuë. <sup>3</sup> A'naquën chiníquën nanan nohuantopi. Inasáchin yonquiatona', a'napita nocanpi. "Caso' noya noyaco," topi yonquinëna quëran. Canpitaso nipirihuë' ama ina pochin cancantocosohuë'. A'napita noya noya ni'co'. <sup>4</sup> Ama canpitaora nohuantëramasoráchin yonquicosohuë'. A'napita nohuantërinsona' yonquiatoma', catahuaco'.

<sup>5</sup> Noya ninicatoma', Quisocristo pochachin cancantoco'.

<sup>6</sup> Inaso', iráca quëran huarë' Yosë'pa' ya'huërin. Yosë chachin niponahuë', co inaora nipa'yatacaso' yonquirinhuë'. Nosoroatonpoa', yonquirinpoa'. Inápaquë chini chiníquën nanantaponahuë', co ina na'con na'con nohuantërinhuë'.

<sup>7</sup> Noya noya ya'huërinso' huëshimarahuaton, isoro'paquë o'marin. Piyapi chachin nasitimarin. Nani mashotohuachina, co hua'an pochin chiníquën nanantacaso' nohuantërinhuë'.

Topinan piyapi pochin cancantaton, a'napita catahuacasoráchin yonquirin. Canpoa pochachin ninin.

<sup>8</sup> Isoro'paquë ya'huëhuachina, Yosëíchín natërin.

Ina nohuanton, canpoa marë' chiminin.

Yosë hui'nin niponahuë', corosëquë patanantohuachinara, chiminin.

<sup>9</sup> Yosëíchín natërin ni'ton, inari ananpitaantarahuaton, inápaquë quëpantarin.

Inaquë chini chiníquën nanan quëtërin. Yosë nohuanton, ya'ipiya hua'anëntarin. "Sinioro" itarëhua'.

<sup>10</sup> Napoaton Quisocristo yonquiatona', ya'ipi piyapi'sari isonahuatona' chinochina'.

Inápaquë ya'huërinso'pita, isoro'paquë ya'huërinso'pita, no'paanaquë ya'huëpisopita, inapitarinta' chinochina'.

<sup>11</sup> "Quisocristoso' Yosë hui'nin ni'ton, ya'ipiya hua'anëntarin," tēcaponá'.

Ina quëran Tata Yosë na'con na'con yonquiarëhua huachi.

### *Tashi' a'pininso pochin ninëhuaso'*

<sup>12</sup> Iráca canpitaquë ya'huapo, noya natanamaco. Noya natanatomaco, Yosë natërama'. Iporanta' iyaro'sa' nosororanguëma' ni'ton, co inatohua' ya'huaporahuë', noya noya natëco'. Ya'nan imapoma', Yosë anoyacancantërinquëma'. Napoaton noya cancantatoma', imamiatoco'. "Catahuaco Sinioro noya imainquën. Co caora nanitërahuë'," ta'toma' imamiatoco'. Ni'cona Yosë naniantotama'. <sup>13</sup> Co noyahuë' cancantatoma', co canpitaora nanitëramahuë' Yosë natëcamaso'. Nipirihuë', Yosë non-tohuatama', catahuarinquëma' nohuantacaso'. Ina quëran Yosë yanatëhuatama', inari chachin catahuarinquëma' no'tëquën natëcamaso'. Inaso' noya noya ayonquiarinquëma'.

<sup>14</sup> Noya ninicatoma' iyaro'sa' ya'huëco'. Ama nino'huicosohuë'. Ma'sona tëranta' nipatama', noya cancantatoma', nico'. <sup>15</sup> Noyasáchin nico' a'napita nicatëinquëma', Yosë yonqui'ina'. Ina hui'ninpita pochin nicatoma', noyápiachin cancantoco'. Co imapisopitasohuë' nipirihuë' co Yosë nohuitatonahuë', co noyahuë' cancantopi. Nino'huipi, monshihuanacaisoráchin yonquipi, nonpinápi. Co noyahuë' yonquiatona', tashi pochin cancantopi. Canpitaso nipirihuë', tayoraro'sa' tashi' a'pintërinso pochin piyapi'sa' catahuaco' no'tëquën yonquicaiso marë'. <sup>16</sup> Quisocristo nanamën chachin a'chintoco'. Ina imapatëhua', Yosë nohuitatëhua', nanpimiatarihua'. Ina quëran Quisocristo o'mantahuachin, co atapanaramacohuë'. "Parisitaporahuë', co topinan quëran Yosë nanamën a'chintërahuë', noya imamiatopi," ta'to, nóya cancantarahuë huachi. <sup>17</sup> Iráca ma'sha Yosë marë' tēpahuachina', huinonta' opotopi. Inapochachin canta' canpita noya noya imacamaso marë' tēpahuachinaconta', noya nisarin, co

sëtarahuë'. A'chintëranquëma' ni'ton, noya imarama'. Napoaton noya cancantërahuë.  
 18 Tëpahuachinaco, ama sëtocosohuë'. Ca pochachin noya cancantoco'.

### *Timotio, Ipapiroto inapita yaa'parinso'*

19 Hua'qui' iyaro'sa' canpitata quëran co nanan natantërahuë' ni'ton, yon-  
 quiáranquëma'. Napoaton Timotio yaa'parahuë' natantacaso marë'. Quisocriso no-  
 huantohuachin, co hua'qui quëranhuë' a'paarahuë. Ina quëran sha'huitintahuachinco,  
 noya cancantarahuë. 20 Inaso' na'con nosororinquëma'. Cancanën quëran huarë'  
 yacatahuarinquëma'. Ca pochachin nosororinquëma'. Inasáchin ina pochin cancantërin.  
 21 A'napitaso' inahuara nohuantopisoráchin yonquipi. Co Quisocriso na'con  
 yonquipihuë'. 22 Timotioso nipirinhüë' nohuitërama'. “Inaso' noya quëmapi,” topi  
 ya'ipi piyapi'sa'. Hui'nahuë pochin ni'ton, catahuarincó Yosë nanamën a'china'huaso  
 marë'. Inanta' nitotërama'. 23 Ma'sona coisë onpotaponco nimara, co caso' nitotërahuë'.  
 Nitotohuato, Timotio a'parahuë sha'huitinquëmaso marë'. 24 Yosë nohuanton, tashinan  
 pëi quëran ocoiarinaco, topirahuë'. Ocoihuachinco, canta' nicaponquëma' pa'sarahuë.  
 Co hua'qui quëranhuë' pa'sarahuë, ténahuë.

25 Iporaso nipirinhüë' Iya Ipapiroto a'patantaranguëma'. I'hua chachin  
 a'patiramaco catahuaincoso marë'. Canquihuachina, nóya catahuarincó.  
 Achinicananincó. Naporahuaton, inanta' Quisocriso nanamën a'chinin. Ina marë'  
 parisitaponahuë', noya ahuantërin. Iporaso nipirinhüë' canpitataquë pananta'in,  
 ténahuë. 26 I'huamiáchin chiníquën caniorin, natantërama'. Nani noyatahuaton,  
 ya'huërin'pa' yapanantarín. Yani'ninquëma'. “Caniorahuëso' natantatona',  
 pa'yamarai,” ta'ton, manorarin. Napoaton “Noyahua'. Panantaquë' nipachin,”  
 itërahuë. 27 Tëhuënhachin chiníquën caniorin. Pi'pishachin shichiminin. Nipirinhüë',  
 Yosëri nosoroaton, anoyatërin. Canta' nosoroatonco, iyahuë anoyatërinco. Ama  
 aquëtë' sëtaca'huaso marëhuë' Yosë nohuanton, co chimininhüë'. 28 Napoaton manoton  
 a'parahuë. Ina quënanpatama', nóya cancantarama huachi. Noya cancantohuatama',  
 canta' noya cancantarahuë. Co huachi aquëtë' sëtarahuë'. 29-30 Canconpachin,  
 noya cancantatoma', nontoco'. “Ma noyacha Siniro catahuarinquën ni'ton, noya  
 huënantaran paya,” itatoma', noya nontoco'. Co canpitato' nanitëramahuë' isëquë  
 huëcacamaso'. Napoaton ina a'patiramaco. Isëquë huëcaton, shichiminin. Chiníquën  
 parisitërin catahuaincoso marë'. Ina pochin cancantopisopita nóya ni'co'.

## 3

### *Yosëri noya ni'ninsopita*

1 Iporaso' iyaro'sa' Quisocriso yonquiatoma', nóya cancantoco'. Iráca quëran huarë'  
 inachachin inachachin pënënapiranquëmahuë', co amirahuë'. Naquëranhachin natanta-  
 huatama', yonquiantarama'. Ina quëran noya noya imasarama', ténahuë. 2 A'naquënso'  
 nonpin nanan a'chinapi. “Co marca niacotohuatamahuë', co Yosë piyapinënuëma'  
 nisaramahuë',” topi nonpinatona'. Ni'nira pochin pa'pi co noyahuë' cancantatona',  
 napopi. Ni'cona, nonpintochinënuëma'. Inapitaso' co noyahuë' nisapi. 3 Yosë  
 marcanën co nonënpoaquë niacotërehuahuë'. Cancanënpoa' Yosë anoyacancantërinpoa'.  
 Cancanënpoa quëran ina chinotarëhua'. Ispirito Santo chachin catahuarinpóa' noya  
 chinotacaso marë'. Co canpoara nanitërehuahuë' noya cancantacaso'. Quisocrisoíchin  
 anoyacancantohuachinpóa', nicha'ësarinpóa', tënëhua'. Napoaton canpoaso' Yosë piyap-  
 inënpita ninëhua'. 4 “Moisësë pënëntërinso' no'tëquën natërahuë ni'ton, Yosë noya  
 ni'sarinco,” topi a'naquën. Caso nipirinhüë' na'con na'con natërahuë. Ina marë' Yosë  
 nicha'ërinpoa' naporini, ca noya noya cha'ëitohuë'. 5 Caso' Israiro piyapico. Mincamin  
 huënton quëmapiço. Posa tahuëritahuaso', marca acotërinaco. Tatahuë, mamahuë Israiro  
 piyapiráchin. Co nishahuë'. Israiro hua'an ya'conahuë, parisioro'sa' itopiso'. Ya'conato,

ya'ipi Moisësë pënëntërinso' imarahuë. <sup>6</sup> Inasáchin imato, Quisocristo imapisopita chiníquën aparisitërahuë. “Iráca pënëntërinso' no'tëquën natërahuë,” ta'to, noya piyapico, topirahuë'. <sup>7</sup> Ina marë' Yosë noya ni'sarinco, ténahuë iráca. Iporaso nipirinhüë' iráca yonquirahuëso' a'porahuë Quisocristo imaca'huaso marë'. <sup>8</sup> Ina na'con na'con nohuantato, inasáchin yonquirahuë. Iráca cotioro'sa' noya ni'ninaco. Hua'ano'saquë huarë' noya ni'pirinacohüë', Quisocristo imapatëra, a'porinaco. No'huipirinacohüë', co ina yonquirahuë'. Iráca yonquirahuëso' amoru pochin nicato, co pi'pisha tëranta' nohuantërahuë'. Quisocristo nohuita'huasoráchin nohuantërahuë. Ina nohuitacaso' noya noya, ténahuë. Inasáchin hua'anëntërinco. <sup>9</sup> Quisocristoíchin imasarahüë huachi. Co caora noya nicato cha'ërahuë'. Co pënëntërinso' natëto, cha'ërahuë'. Quisocristoíchin anoyacancantërinco, ta'to, ina imarahuë. Imapatora, oshanëhuë inquitatonco, anoyacancantërinco. Ina quëran Yosë catahuarinco noya nica'huaso'. Ina marë' noya ni'ninco. <sup>10</sup> Aquë aquëtë' Quisocristo yanohuitërahuë. Iráca nanpiantarahuaton, chini chiníquën nanantërin. Ya'ipi nanitaparín ni'ton, catahuaincoso' nohuantërahuë. Noya noya nica'huaso marë' catahuainco, ténahuë. Iráca Yosë natëton, parisitërin. Canpoa marë' chiminin. Iporaso' canta' aparisitopirinacohüë', Quisocristo pochin Yosë natëi. Chimininso pochin ya'ipi co noyahuë' yonquirahuëso' naniantato, noyápiachin cancanchi, ténahuë. <sup>11</sup> Ina pochin cancantato, imamiachi a'na tahuërinta' ananpitaantaincoso marë'.

*Chini chiníquën imacaiso' ya'huërinso'*

<sup>12</sup> Co ya'ipi cancanëhuë quëran noya noya cancanchatërarahuë'. Ipora huanta' pi'pian pi'pian co noyahuë' yonquirahuë. Co Yosë pochachin cancantopirahuë', Quisocristo nani acorinco ina pochin cancanta'huaso marë'. Napoaton nani tahuëri yonquiárahüë' noya noya nica'huaso marë'. <sup>13</sup> Co iyaro'sa' Yosë pochachin cancanchatërarahuë'. Nipirinhüë', inasáchin nohuantërahuë. I'hua naporahuësopita naniantërahuë. Iporaso' chiníquën Yosë imasarahüë noya noya cancanta'huaso marë'. <sup>14</sup> Co nisha nisha yonquirahuë'. Quëmapi'sa' nicanatona' ta'apiso pochin cancantato, Quisocristoíchin yonquiárahüë ina pochin cancanta'huaso marë'. Nani tahuëri nani tahuëri napoarahüë. Ina quëran a'na tahuëri Yosë'pa' cancontahuato, noya ni'sarinco. Quisocristo anoyacancantërinco ni'ton, inápaquë quëpantarinco.

<sup>15</sup> Ya'ipi Yosë imarëhuasopita chinoton pochin cancantohuatëhua', ina pochin yonquiarëhua'. Nisha yonquihuatëhua', Yosë anitotarínpoa'. “Catahuaco no'tëquën yonqui'i,” itohuatëhua', anitotarínpoa'. <sup>16</sup> Anitotohuachinpoa', ama topinan quëran natahuansohüë'. Na'con yonquia'ahua' natëcaso marë'. Ya'ipi cancanënpoa quëran huarë' imahua'.

<sup>17</sup> Ya'ipinquëma' iyaro'sa' nonanco. Nicatahuaco' ca pochachin imacamaso marë'. A'naquën nani quiya pochin cancantapi. Inapitanta' nicatoma', nonanco'. <sup>18</sup> A'naquënso nipirinhüë' “Yosë imarahüë,” taponaraihuë', co noyahuë' cancantopi. Quisocristo oshanënpoa' inquitinpoaso marë' corosëquë chiminin. Nipirinhüë', co inapitasa' ina yonquipihüë'. Ina nanan a'chinpatora, no'huitopi. Iporanta' inapita yonquiato, chiníquën sëtato, na'nërahuë. Co inapita nonanacaso' ya'huërinhuë'. <sup>19</sup> Inapitasa' co Quisocristo nanamën imapihuë'. Ma'sona tëranta' yanipachinara, nipi. Ina marë' tapanacaso' ya'huëpirinhüë', co tapanpihuë'. “Nohuantato, napoarahüë,” toconpi. Isoro'paquë ya'huërinso'pitaráchin yonquipi. A'na tahuëri pënquë parisitomiatapi. <sup>20</sup> Canpoaso nipirinhüë', inápaquë ya'huërinso' na'con na'con yonquia'ahua'. Inatohua' ya'huëmiatarihuaso'. Siniro Quisocristo nicha'ërinpoa' ni'ton, ina ninarëhua'. A'na tahuëri inápa quëran o'mantarin. <sup>21</sup> Iporaso' nonënpoa' co chinirinhüë'. Yacaniorëhua'. Chiminacaso' ya'huërin. Nipirinhüë', Quisocristo o'mantahuachin, nonënpoa' anishatarin. Ina pochachin ya'noaríhua'. Nanitaparín ni'ton, ya'ipi minsërahuaton, ananpitomiatarínpoa', noya noya acoarinpoa'.



## 4

*Quisocristo yonquiatëhua', noya cancantërehuaso'*

<sup>1</sup> Napoaton iyaro'sa' Quisocristo imamiatoco'. Na'con nosororanquëma'. Ya'nipishahuë' yani'nanquëma'. Canpita yonquiatënquëma', nóya cancantërahuë. Noya imarama' ni'ton, co topinan quëran a'chintëranquëmahuë', tënahüë.

<sup>2</sup> Imo Ipotia, imo Sintiquia, inapitaso' co noya ninontopihuë', natantërahuë. Ama huachi imoyaro'sa' nino'huicosohuë'. Catoquëma chachin Quisocristo imarama' ni'ton, noya nini'toma', ya'huëco'. <sup>3</sup> Quëmanta' iyasha na'con catahuaranco ni'ton, inapita catahuaquë' noya ninonchina'. Cato chachin nóya sanapi'sa'. Na'con catahuarinaco Quisoso nanamën a'china'huaso marë'. Iya Crimintinta' noya catahuarinco. A'napitanta' catahuarinaco a'china'huaso marë'. Co nininënpita isëquë ninshitopirahuë', Yosëri nohuitërin. Nanpirin quiricaquë nininënpita nani ninshitërin. Inaquë ninshitohuachinpoa', nanpimiatarihua'.

<sup>4</sup> Nani tahuëri Quisocristo yonquiatoma', noya cancantoco'. Naquëranchin inachachin sha'huichinquëma'. Ma'sha onpoapomarahüë', noya cancantoco', tënahüë. <sup>5</sup> Ya'ipi piyapi'sa' nosoroatoma', noyasha nontoco'. Quisocristo ni'sárinpoa'. Co hua'quiya quëranhuë' o'mantararin. Ina yonquiatoma', ya'ipi piyapi'sa' noya nontoco'.

<sup>6</sup> Ma'sha onpohuatama', ama pa'yancosohuë'. Ama nisha nisha yonquicosohuë'. Yosë nontoco' catahuainquëma'. Ma'sha pahuantohuachinquëma', nitoco'. "Ma noya catahuarancoi ni'ton, 'Yosparinquën, Siniro,' " itoco'. <sup>7</sup> Apira apira Yosë nontohuatama', asanocancanarinquëma'. Co imapisopitasohuë' nipirinhüë' co sano cancantopihuë'. Ma'sha onpohuachinara, a'naroáchin pa'yanpi. Canpoaso nipirinhüë' Quisocristo imarëhua' ni'ton, ina yonquiatëhua', sano cancantarihua'.

*Yonquirëhuasopita*

<sup>8</sup> Isoíchin iyaro'sa' pënënanranquëma'. No'tën nanansáchin yonquico'. Noya imatona', noya nipisopita yonquico'. Ama nonpin nanano'sa' natëtocosohuë'. Noyápiachin cancantoco'. A'napita noyasáchin yonquirapico'. Noya nahuininsoráchin yonquico'. A'napita noya nipiso' yonquiatoma': "Ma noyacha Yosëri catahuarin paya," itoco'. Ina pochin yonquihuatama', Yosë noya ni'sarinquëma'.

<sup>9</sup> Na'con Yosë nanamën sha'huitëranquëma', natanama'. Ya'ipi a'chintëranquëmaso' noya natëco'. Canpitataquë ya'huapo, noya ninahuë, ni'namaco. Ca pochachin noya nico'. Noya nipatama', Yosë noya catahuarinquëma'. Ina nohuanton, noya nini'toma', ya'huarama'. Inasáchin asanocancaninpoa'.

*Paono catahuapiso'*

<sup>10</sup> Canpitaso' yonquiramaco ni'ton, noya cancantërahuë. I'huamiáchin ma'sha a'patiramaco ama pahuantincoso marëhuë'. Ina marë' "Yosparinquën," itërahuë Yosë. Iráca ma'sha a'patëramaco. Ina quëran yacatahuantapiramacohüë', co insonta' huë'ninhuë' ni'ton, co nanitëramahuë'. Iporaso nipirinhüë' catahuantaramaco. <sup>11</sup> Co ma'sha pahuantërinco marë' napotëranquëmahuë'. Yosë nohuanton, nani nitotërahuë ya'ipi ahua'nta'huaso'. Ma'sha pahuantopirincosohuënta', noya cancantërahuë. <sup>12</sup> Ma'sha ya'huëtohuachinco, noya ya'huërahuë. Capanta' nipachina, co ina marë' sëtërahuë'. Sacai' ahuantacaso nipirinhüë', Quisocristo catahuarinco ni'ton, noya ahuantërahuë. A'na tahuëri cosharo' ya'huërin, noya ca'nahuë. A'na tahuëriso nipirinhüë' capa ni'ton, tana natanahuë. Ma'sha ya'huëhuachina, noya cancantërahuë. Capanta' nipachina, ahuantato, noya cancantërahuë. <sup>13</sup> Co caora nanitapapirahuë', Quisocristo achinicancaninco ni'ton, ya'ipiya nanitaparahuë. Ma'sha onpoaporahuënta', noya ahuantërahuë. <sup>14</sup> Inaso nipirinhüë', ma noyanquëma' canpitaso' ni'ton, catahuaramaco. Isëquë ya'huato parisitopirahuë', noya catahuaramaco.



<sup>15</sup> Iráca Masitonia parti pacapo, Yosë nanamën a'chintëranquëma'. Ina marë' a'na parti yapa'patëra, canpita catahuaramaco. "Ma noya quëmaso' catahuancoi Quisocristo ima'huaiso'," itatomaco, coriqui a'patëramaco. Canpitasáchin inapotëramaco. <sup>16</sup> Ina quëran Tisaronicaquë ya'huasoco, ma'sha pahuantohuachincora, naquëranchin coriqui a'patantaramaco. Catoro' a'patëramaco. <sup>17</sup> Ina marë' noya cancantërahuë. Co coriqui quëtëramacoso marëáchin noya cancantërahuë'. Catahuaramacoso marë' Yosë'pa' canaarama' ni'ton, noya noya cancantërahuë. <sup>18</sup> Iporaso' nóya i'huërëtëramaco huachi. Napoaton noya ya'huarahuë. Co manta' pahuantërincohuë'. I'hua Ipapërotito huë'pachina, coriqui a'patëramaco ni'ton, ma'sha ya'huëtërinco. Ina marë' "Yosparinquëma'," itëranquëma'. Yosë nosoroatoma', a'patiramaco. Yosë chinotacaiso marë' pimóchin nininso' a'pëhuachinara, Yosëri noya ni'nin. Inapochachin canpitanta' coriqui a'patëramaco ni'ton, Yosë noya ni'ninquëma'. <sup>19</sup> Canpitanta' ma'sona pahuantohuachinquëma', Yosë chachin quëtarinquëma'. Ya'ipi hua'anëntaton, nanitaparin. Quisocristo imarama' ni'ton, catahuarinquëma'. Co huachi pahuantarinquëmahuë'. <sup>20</sup> Ma noyacha Tata Yosë chinotërehuasoso paya. Ipora quëran huarë' ya'ipi piyapi'sari chinochina'. Amen.

*Amiconënpita yonquirinso'*

<sup>21</sup> Ya'ipi Quisocristo imaramasopita noya yonquiatënuquëma', saludos a'pataranquëma'. Ca'taninacosopitanta' yonquiatënënuquëma', saludos a'patarinënuquëma'. <sup>22</sup> Ya'ipi Yosë imapisopita isëquë ya'huëpiso' saludos a'patarinënuquëma'. Copirno inpriatonënpitanta' na'con yonquiatënënuquëma', saludos a'patarinënuquëma'.

<sup>23</sup> Inaora nohuanton, Siniro Quisocristo noya catahuainquëma'. Nani ninshitëranquëma huachi.

*Paono*

## Paonori Corosasëquë ya'huëpisopita ninshitërinso'

### *Imapisopita yonquiaton, nanan a'patërinso'*

<sup>1</sup> Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahüë. Yosë nohuanton, Quisocristo acorinco nanamën a'china'huaso marë'. Iya Timotioro'co nanan a'patarainquëma'. <sup>2</sup> Ya'ipi imaramasopita Corosasëquë ya'huaramaso', ninshitaranquëma'. Canpitanta' Quisocristo imamiatarama' ni'ton, Yosë noya ni'ninquëma'. Ina imarama' ni'ton, iyahuëi pochin ni'nainquëma'. Inaora nohuanton, Tata Yosë na'con catahuainquëma'. Asanocancainquëma'.

### *Imapisopita marë' Yosë nontërinso'*

<sup>3-4</sup> Canpita yonquihuatëinquëmara, na'con Yosë nontarai. Inaso' Siniro Quisocristo pa'pin. Cancanëma quëran huarë' ina natërama'. Ya'ipi Yosë piyapinënpitanta' nosororama', natantërai. Ina natantatoi, noya cancantërai. “Noya imarinëinquën ni'ton, ‘Yosparinquën Siniro,’ ” itërai. <sup>5</sup> Iráca noya nanan natanama'. “Oshanënpoa' inquitatonpoa', Quisocristo anoyacancantërinpoa',” itohuachinëinquëma', no'tëquën a'chintërinëinquëma'. A'chintohuachinëinquëma', natërama'. “A'na tahuëri Yosë'pa' noya ananpitaantaripoa',” ta'toma', Quisocristo imarama'. Ina imatoma', ina tahuëri ninarama'. <sup>6</sup> Noya nanan chachin ya'ipi parti a'chinapi. A'na parti a'na parti piyapi'sa' natëtatona', noya imasapi. Canpitanta' noya imasarama'. Ya'nan natantapoma', natërama'. “Yosë nosoroatonpoa', inaora nohuanton, nicha'ësaripoa',” itërinëinquëma'. Napotohuachinëinquëmara, “No'tëquën sha'huitërinpoa',” ta'toma', natërama'. <sup>7</sup> Ipapërasë a'chintërinquëma', inaro'coi nóya ninosororaiso'. Quiya pochachin natëton, Quisocristo nanamën a'chinarin. Co quiyaso' nanitëraihuë' canpitataquë paca'huaiso' ni'ton, ina a'parahuë a'chintinquëmaso marë'. Co chirorinhuë' a'chinacaso'. <sup>8</sup> Ina sha'huitiirincoi. “Ispirito Santori catahuarin ni'ton, noya ninosoroapi,” itiirincoi.

<sup>9</sup> Naporo quëran huarë' canpita yonquiatëinquëma', Yosë nontërai. Nani tahuëriya nontatoi, itërai: “Quëmaso' Siniro tēhuëchachin anitotërancoi no'tëquën natëca'huainquënso marë'. Corosasëquë imarinënsopita na'con catahuaquë'. Ya'ipi nohuantëranso' anitotëquë'. Ispirito Santori catahuain no'tëquën yonqui'ina'. <sup>10</sup> Catahuaquë' Siniro quëma nohuantëranso chachin niina'. Inapohuachina', noya noya ni'saran. Catahuaquë' noyasáchin niina'. Na'con na'con nohuichinëinquën. <sup>11</sup> Quëmaso', Siniro, chini chiníquën nanantëran ni'ton, catahuaquë' chiníquën canchchina'. Ma'sha onpohuachina', catahuaquë' noya cancantatona', ahuanchina'. A'napitari aparisito-huachina', catahuaquë' ama no'huinasohuë',” itërai, Yosë nontatoi. <sup>12</sup> Nani anoyacancantohuachinpoara, huëntonëinquë chachin aya'coninpoa'. Hui'ninpita pochin ni'sarinpoa'. Iporaso' ina catahuahuachinpoa', tahuëri pochin cancantarihua'. Naporahuatëhua', ya'huërinquë chachin ya'huëcontarihua'. Ina marë' noya cancantatëhua' “Yosparinquën Siniro,” itarihua'. <sup>13</sup> Iráca sopai camairinpoa'. Ina natëtëhua', tashi pochin cancantopirëhuahuë', nani Yosë nicha'ërinpoa'. Co huachi sopai natëcaso' ya'huërinhuë'. Yosë nohuanton, hui'nin hua'anëntërinpoa'. Hui'nin na'con nosoropirinhuë', isoro'paquë a'paimarin. <sup>14</sup> Ina chiminin ni'ton, nicha'ërinpoa'. Oshanënpoa' inquitërinpoa huachi.

### *Quisocristo chiminaton, nanan anoyatërinpoaso'*

<sup>15</sup> Tata Yosëso' co quënanëhuë'. Nipirinhuë', hui'nin isoro'paquë o'maton, pa'pin anohuitërinpoa'. Inanta' Yosë chachin ni'ton, nóya anohuitërinpoa'. Co'huara isoro'pa' ya'huëyátërasohuë', hui'nionta' inápaquë ya'huërin. <sup>16</sup> Yosë nohuanton, inarë chachin ya'ipi ma'sha ninin. Inápaquë ya'huërinso'pita, isoro'paquë ya'huërinso'pita, inapita

acorin. A'naquën quënanë'. A'naquënso co quënanëhuë'. Anquëniro'sa', inápaquë chiníquën nanantërinso, nisha nisha nininsopita, inapitanta' ninin. Quisocristoíchin chinotacaiso marë' ya'ipiya ya'huërin. Ina marë' acorin. <sup>17</sup> Co'huara ma'sha ya'huëyátërasohuë', Quisocristo ya'huërin. Ina nohuanton, piyapi'sa', ma'sharo'sa', ya'ipiya ya'huërapí. Ipora huanta' co yonquirinpoahuë' naporini, ya'ipinpoa' ta'huanchitërihuahuë'. Ya'ipi ma'sharë'quënpoa chachin ta'huanchitërihuahuë'. <sup>18</sup> Ya'ipi imarëhuasopita a'na huënton pochin ninëhua'. Inaora nonën pochachin Quisocristo ni'ninpoa'. Inaso' motënpoa pochin nicaton, hua'anëntërinpoa'. Ina'ton chiminaponahuë', nãpiantarin. Napoaton ya'ipinpoa' inasáchin natëcaso' ya'huërin huachi. <sup>19</sup> Quisocristoso' Yosë hui'nin ni'ton, Yosë chachin anta'. Co pi'pisha tëranta' pahuantërinhuë' pa'pin pochin nicacaso'. Tata Yosë nohuanton, naporin. <sup>20</sup> Iráca oshahuanëhua' ni'ton, ya'ipinpoa' Yosë inimicotopirëhuahuë'. Yosë nohuanton, Quisocristo chiminin nanan anoyatinpoaso marë'. Isoro'paquë ya'huërinso, inápaquë ya'huërinso, ya'ipiya nohuantërin anoyatacaso'. Canpoa marë' huënainën pa'nin. Corosëquë chiminin ni'ton, co huachi Yosë inimicotacaso' ya'huërinhuë'.

<sup>21</sup> Iráca canpitaso' co Yosë yonquiramahuë'. Co noyahuë' cancantatoma', Yosë inimicotërama'. Co noyahuë' ninama'. <sup>22</sup> Iporaso nipirinhue' nanan anoyatërinquëma'. Quisocristo isoro'paquë o'maton, piyapi chachin nasitimarín. Corosëquë chiminin nanan anoyatinpoaso marë'. Nanan anoyatatonpoa', anoyacancantërinpoa'. Noyápiachin cancan quëtërinpoa'. O'mantahuachin, co ana'intarinpoahuë'. Noya cancantacaso marë' nanan anoyatërinpoa'. <sup>23</sup> Imamiatohuatama', Yosë noya ni'sarínquëma huachi. Noya nanan natanama'. "Nicha'ësarínpoa'," ta'toma', natërama huachi. Natëmiatoco'. Ama, iyaro'sa', nisha nisha yonquicosohuë'. Ama pi'pian tëranta' a'pocosohuë'. Ya'ipi parti noya nanan chachin a'chinapi. Inachachin canta' a'chinarahuë'.

### *Imapisopita catahuacaso marë' Yosëri acorinso'*

<sup>24</sup> Imarëhuasopita marë' Quisocristo chiníquën parisitërin. Parisitaton, huëntonëncuë aya'coninpoa'. Ina quëran imarëhuasopitanta' parisitacaso' ya'huërin a'napitanta' imacaiso marë'. Napoaton ipora canta' parisitarahuë canpitanta' imacamaso marë'. Parisitaporahuë', noya cancantërahuë. <sup>25</sup> Yosë acorinco imapisopita catahua'huaso marë'. Canpitanta' a'chintaranquëma'. Ya'ipi nanamën a'china'huaso marë' acorinco. <sup>26</sup> Iráca iso nanan co nitotopihuë'. Iporaso nipirinhue' imarëhuasopita anitotërinpoa'. Yonquirinso chachin anitotërinpoa'. <sup>27</sup> "Quisocristo chachin aya'coancantaranquëma'," itërinpoa'. Canpitanta' nisha piyapínquëma' nipiramahuë', ya'coancantërinquëma'. Ya'ipinpoa' ya'coancantërinpoa' ni'ton, a'na tahuëri Yosë'pa' noya noya ya'huëcontarihua'. Iráca co manta' ina nitotopirinhue', nani anitotërinpoa huachi. Quisocristo nohuitatëhua', ina ninarëhua'. Ma noyacha Tata Yosëso' yonquirinpoa paya, tënëhua'.

<sup>28</sup> Napoaton Quisocristo nanamën a'chinárai. Ya'ipi piyapi pënënárai. Noya yonquiatoi, a'chintarai Quisocristo imacaiso marë'. Ina imapatama', noya noya cancantarama'. <sup>29</sup> Ina marë' pa'sápato, a'chinárahuë. Quisocristo chachin catahuarinco. Achinicancaninco ni'ton, chiníquën cancantato a'chinárahuë.

## 2

<sup>1</sup> Na'con iyaro'sa' yonquiranquëma'. Naotisiaquë ya'huëpisopitanta' yonquirahuë. Na'aquëma' inatohua' ya'huëramasopita co nohuitaponquëmarahuë', na'con yonquiranquëma'. Co pi'pisha tëranta' nohuantërahuë' nisha cancantacamaso'. Napoaton ninshitaranquëma'. <sup>2</sup> Ya'ipínquëma' yonquiatëncuëma', Yosë nontárahuë. "Catahuaquë' Siniro chiníquën canchina'. Noya ninosoro'ina'. Ina quëran a'na huëntoínchin pochin nisapi. Ma noyacha quëmaso' yonquirancoi paya. Catahuaquë' quëma nanamën noya yonqui'ina'. Quisocristo chachin nohuichina'. Iracaso' co piyapi'sari nohuitopirinhue'.

Iporaso nipirinhüë' anohuitërancoi. Ina nohuitatoi, tëhuënchachin noya cancantarai," itërahuë, Yosë nontato. <sup>3</sup> Quisocristo ya'ipi nitotërin. No'tëquën yonquirin. Inasáchin catahuarinpoa' no'tëquën yonquicaso'. Ina na'con yonquihuatëhua', noya noya nitotarihua'. Na'a piyapi'sa' co nitotopirinhüë', Yosë anitotërinpoa' Quisocristo pochin yonquicaso marë'. <sup>4</sup> A'naquënso nipirinhüë' nisha a'chinpi. Ama Quisocristoíchin yonquicamaso marëhuë' noyásha nontarinëinquëma'. Ni'cona nonpintochinëinquëma'. <sup>5</sup> Co canpitataquë ya'huaporahuë', nosoroatëinquëma', nani tahuëri yonquiranquëma'. Noya nini'toma', ya'huarama'. Co nisha nisha yonquiramahuë'. Ya'ipi cancanëma quëran Quisocristo natërama'. Ina marë' nóya cancantërahuë.

### *Quisocristo nicha'ërinpoaso'*

<sup>6</sup> Ya'nan imapoma', Quisocristo anoyacancantërinquëma'. Inasáchin hua'anëntërinquëma'. Iporahuanta' inasáchin natëtoma', imamiatoco'. <sup>7</sup> Ni'co'. Ma'sha sha'patëra, itën acopo' no'paquë pa'pachina, noya huanirin. Inapochachin canpitanta' Quisocristo noya chinpitoco'. Inasáchin yonquico' achinicancainquëma'. Nani iyasha no'tëquën a'chintërinquëma' ni'ton, ya'ipi cancanëma quëran Quisocristo natëco'. "Yosë na'con nosororinpoa'," ta'toma', nani tahuëri "Yosparinquën Siniro," itoco'.

<sup>8</sup> A'naquënso nipirinhüë' nisha a'chinpi. Ni'cona oshaquëran anishacancantochinquëma'. Nonpin nanan inahuara yonquipiso' a'chinapi. Piyapi'sa' yonquipisoráchin imasapi. Quisocristo a'chininso' co imapihuë'. Nisha nisha isoro'paquë chiníquën nanantopisopita yonquiatona', nisha pënëntapi. Yaocoirinëinquëma'. Canpitaso nipirinhüë' ama inapita natëcosohuë'.

<sup>9</sup> Quisocristoíchin natëcaso' ya'huërin. Piyapi chachin niponahuë', Yosë chachin ninin anta'. Co manta' pahuantërinhuë' Yosë pochin nicacaso'. <sup>10</sup> Canpoanta' ina imapatëhua', co manta' pahuantarinpoahuë' noya noya cancantacaso marë'. Yosë chachin nohuitarëhua'. Hua'ano'sa', anquëniro'sa', sopairo'sa', inapita chiníquën nanantopirinhüë', Quisocristoso' chini chiníquën nanantërin. Co ina nohuantohuachinhüë', co manta' nanitapihuë' nicacaiso'. <sup>11</sup> Iráca Yosë chinotopisopita marca niacotopi. Iporaso nipirinhüë' Quisocristo imapatëhua', nisha acotërinpoa'. Co nonënpoaquë acotërinpoahuë'. Cancanënpoa' anoyatërinpoa'. Co noyahuë' yonquirëhuasopita inquitatonpoa', anoyacancantërinpoa' ni'ton, nóya cancantarihua'. <sup>12</sup> Aporihuanpatëhua', Quisocristo pochin ninëhua'. Chimpinpachina, pa'pitopirinhüë'. Yosë nohuanton, nanpiantarin. Inapochachin canpoanta' co noyahuë' yonquirëhuasopita naniantarihua'. Ina quëran Quisocristo nanpiantarinso pochin ninëhua'. "Yosë ya'ipiya nanitaparín," topatëhua', catahuarinpoa' ina pochin nicacaso'. <sup>13</sup> Iráca canpitaso' oshahuanatoma', chimipi pochin ninama'. Co noyahuë' nicacasaráchin yonquirama'. Co Yosë piyapinënpita ninamahuë'. Iporaso nipirinhüë' Quisocristo imarama' ni'ton, anoyacancantërinquëma'. Oshanëma' inquitatëinquëma', nanpiantarinso pochin ni'ninquëma'. <sup>14</sup> Iráca Moisésë pënëntërin nani ma'sha natëcaso marë'. Co inquënpoa tëranta' nanitaparëhuahuë' ya'ipi natëcaso' ni'ton, oshahuanëhua'. Ina marë' ana'intinpoaso nipirinhüë', Quisocristo corosëquë chiminaton, nicha'ërinpoa' ni'ton, Yosë noya ni'ninpoa'. <sup>15</sup> Quisocristoso' chini chiníquën nanantërin. Corosëquë chiminaton, ya'ipi sopaihua'ano'sa', sopairo'sa', inapita a'ninquëchin minsërahuaton, atapanin. Co huachi inapita nanitapihuë' sha'huirapiinpoaso'.

### *Inápaquë ya'huërinso'pita yonquicaso' ya'huërin*

<sup>16</sup> Napoaton nisha pënënpachinëinquëma', ama natëcosohuë'. "Nani ma'sha ca'patëhua', o'opatëhua', oshahuanarëhua'," topi a'naquën. Nani sahuato tahuëri chinotopi. Nani yoquia'huaraiquë chinotopi. Nisha nisha niyontopiso tahuëri'sa' na'huëpi. "Co quiya pochin nipatamahuë', co no'tëquën imaramahuë'," itarinëinquëma'. Nipirinhüë', ama inapitaso' natëcosohuë'. <sup>17</sup> Iráca Yosë ina pochin pënënin. Quisocristo

o'maquë huarë' napopirinhüë'. Iporaso' nani o'marin ni'ton, co huachi inapita no-huantërhüahuë'. Quisocristoíchin natëcaso' ya'huërin. <sup>18</sup> Nisha a'china'piro'saso nipirinhüë' taponá': "Quiyaso' anquëniro'sa' chinotërai. Hua'narëso pochin quënanai. Co canpitaso' quiya pochin nipatamahuë', co noya cancantaramahuë'," itohuachinëinquëma', ama pi'pisha tëranta' natëtocosohüë'. Inapitaso' nonpinatona', "Nani ma'sha Yosë anitotërincoi ni'ton, noya noyacoí," topirinhüë', inahuara yonquinëna quëran napopi. <sup>19</sup> Inapitaso' co tëhuëenchachin Quisocristo imapihuë'. Inasáchin motënpoa' pochin nicaton, hua'anëntarinpoa'. Ni'co'. Nonënpoa' nisha nisha ya'huëtërin. Motënpoa' ya'ipi camairin noya sacatacaiso marë'. Inapochachin imarëhuasopitanta' Quisocristoíchin noya camairinpoa'. Achinirinpoa' so'sorëso pochin nicacaso marë'. Ina pochin nicacaso' Yosë nohuantërin.

<sup>20-21</sup> Iráca Quisocristo chiminin. Canpitanta' ina imapatama', inarë'quëma' chiminamaso pochin ninama' ni'ton, co huachi a'napita pochin nisha nisha chiníquën nanantopisopita imaramahuë'. Inapitaso' inahuara yonquinëna quëran nisha a'chinpi. "Nani ma'sha natëhuatoí, cha'ësarai," ta'tona', "Ama ina ca'cosohüë. Ama pi'nicosohüë'. Ama së'huayátëracosohüë'," itarinëinquëma'. ¿Ma'marëta' ipora huanta' ina natëcamaso' yonquirama'? tënahüë yonquiato. <sup>22</sup> Co ina pochin Yosë pënëninpoahuë'. Cosharo', ma'sha, inapitaso' co ya'huëmiatërinhuë'. A'na tahuëri ta'huantarin ni'ton, co inapitaso' aquëtë' Yosë yonquirinhüë'. Piyapi'sa' inahuara yonquinëna quëran ina pochin nipënënpí. <sup>23</sup> Ina pochin nipënënpachina', yonquínahuan pochin ya'nopirinhüë'. "Ma'sha a'porahuatoí, parisitërai. Parisitopiraihuë', ahuantërai. Ina marë' Yosë noya noya ni'nincoí," topirinhüë', co no'tëquën yonquipihuë'. Ina pochin nipirinhüënta', co pi'pian tëranta' nanitopihuë' co noyahuë' yonquipisopita naniantacaiso'.

### 3

<sup>1</sup> Quisocristo chiminpachina, Yosëri ananpitaantarín. Canpitanta' imarama' ni'ton, anoyacancantërinquëma' noya noya yonquicamaso marë'. Napoaton Quisocristo yonquirinso chachin nohuantoco'. Nani tahuëri yonquiráco' ina pochin cancantacamaso marë'. Inaso' inápaquë ya'huërarín. Yosë inchinan quëran huënsëaton, ina pochachin chini chiníquën nanantarín. <sup>2</sup> Ama ma'sharáchin yonquicosohüë'. Yosë'pa' ya'huërinsoyapa yonquiráco'. <sup>3</sup> Ni'co'. Chimipiso' co huachi isoro'pa' yonquirinhüë'. Inapochachin canpitanta' Quisocristorë'quëma' chiminamaso pochin cancantatoma', co ma'sharáchin yonquiaramahuë'. A'na tahuëri huachi Quisocristorë'quënpoa' Yosë'pa' noya noya ya'huëcontarihua'. <sup>4</sup> Quisocristo chachin ya'coancantërinpoa' Yosë yonquicaso marë'. A'na tahuëri o'mantahuachin, noya noya ya'noarin. Naporo' inarë'quënpoa' ya'huërarinhua' ni'ton, canpoanta' noya noya acoarinpoa'.

*Co noyahuë' yonquirëhuasopita naniantatëhua', noyápiachin cancantahua'*

<sup>5</sup> Napoaton pi'pian tëranta' co noyahuë' yonquihuatama', a'naroáchin naniantoco'. Ama monshihuancosohüë'. Ama taparo' yonquicosohüë'. Ama a'na sanapi së'huacamaso' yonquicosohüë'. Ama a'na quëmapi sa'in noyapacosohüë'. Ama nani ma'sha nohuantapatocosohüë'. A'naquënsó' ma'sha na'con nohuantatona', mamanshi moshapiso pochin niconpi. <sup>6</sup> Ina pochin nipisopita co natëpíhuë'. Ina marë' Yosëri chiníquën ana'intarin. <sup>7</sup> Iráca canpitanta' co noyahuë' cancantatoma', co noyahuë' ninama'. <sup>8</sup> Iporaso nipirinhüë' isopitanta' co noyahuë' cancantatoma' naporamasopita a'poco'. Ama no'huitocosohüë'. Ama no'huito canainquëmasohüë'. Ama piyapi naponin yonquirapicosohüë'. Ama yanpitocosohüë'. Ama taparo' noncosohüë'. <sup>9</sup> Ama ninonpintocosohüë'. Co noyahuë' yonquiramasopita nani a'porama' ni'ton, co ina yonquicaso' ya'huërinhuë'. Mocarínso' të'yatëreso pochin iráca naporamasopita a'poatoma', naniantomatoco'. <sup>10</sup> Nasha a'morëso pochin nasha cancan manama'. Yosë nininpoa' ni'ton, nani tahuëriya catahuarínquëma' ina pochin



cancantacamaso marë'. Ina quëran noya noya ina nohuitarama'. Ina marë' nasha cancan quëtërinquëma'. <sup>11</sup> Quisocristo imapatëhua', napopináchin Yosë ni'ninpoa'. A'naquën cotioro'sa', a'naquënso nipirinhüë' cricoro'sa'. A'naquën marca niacotopiso', a'naquënso nipirinhüë' co niacotopihüë'. A'naquën nisha piyapi'sa', a'naquënta' quëmaro'sa'. A'naquën patron piyapinëpita, a'naquënso nipirinhüë' inahuara marë' sacatopi. Nisha nisha nicarihuarahüë', napopináchin Yosë ni'ninpoa'. Quisocristoíchin yonquicaso' ya'huërin. Ina imapatëhua', ya'ipinpoa' ya'coancantërinpoa'. Co manta' pahuantarinpoahuë' noya cancantacaso marë'.

<sup>12</sup> Yosë nosoroatonpoa', huayoninpoa' noya nicacaso marë'. Napoaton ya'ipi piyapi'sa' nosoroatoma', noya nontoco'. Nasha a'morëso pochin noyápiachin cancantoco'. Ama nocantocosohüë'. Nani tahuëriya yonquico' a'napita catahuacaso marë'. Sano nicatoma', noya nontoco'. Ma'sha onpoapomarahüë', ahuantoco'. <sup>13</sup> Ama yai'huërëtosohüë'. A'napita no'huihuachinquëma', nanan anoyatoco'. Ma'sha onpotopirinquëmaonta', naniantoco'. Siniro oshanëma' nani inquitërinquëma'. Ina nonanatoma', canpitanta' nanan anoyatoco'. <sup>14</sup> Nóya ninosoroco'. Ina na'con na'con Yosë nohuantërin. Noya ninosorohuatëhua', noya noya nisarëhua'. Inapohuatëhua', tëhuënychachin nóya cancantarihua'. <sup>15</sup> Quisocristoíchin asanocancaninpoa'. Ina yonquihuatëhua', noya ninicatëhua', ya'huarëhua'. Ina marë' a'na huënton pochin Yosë acorinpoa'. Ina catahuahuachinpoa', co huachi pa'yanarihuahuë'. Napoaton inasáchin yonquico' asanocancainquëma'. Nani tahuëri: "Yosparinquën Siniro," itoco'.

<sup>16</sup> Ya'ipi Quisocristo nanamën yonquiráco'. Na'con ina yonquico'. Noya nitotatoma', nia'chintoco', nipënëncoco'. Yosë cantanën nisha nisha nininsopita cantaco'. Sarmo quirica nontatoma', inanta' cantaco'. Canpitaora yonquinëma quëraonta' ocoirahuatoma', cantaco': "Ma noyanquëncha Tata ni'ton, catahuancoi paya," itatoma', cancanëma quëran huarë' cantaco'. <sup>17</sup> Ma'sona tëranta' yanipatama', Siniro Quisoso yonquiatoma', nico'. Ina yonquiatoma', noya nonco'. Quisoso catahuaninquëma' ni'ton, "Yosparinquën," Tata Yosë itoco'.

### *Sa'ahuano'sa', so'yahuano'sa', inapita pënëninso'*

<sup>18</sup> Canpitaso' imoyaro'sa', so'yama' natëco'. Siniro Quisocristo imarama' ni'ton, natëcaso' ya'huërin. <sup>19</sup> Canpitanta' iyaro'sa', sa'ama' nosoroco'. Ama no'huicosohüë'. Sanoanan quëran nontoco'. <sup>20</sup> Hua'huaro'santa' pa'pina' natëina'. A'shinanta' natëina'. Ya'ipi pënënpiso' natëina'. Inapohuachina, Siniro noya ni'sarin. <sup>21</sup> Canpitanta' iyaro'sa', hui'nama' sanoanan quëran pënëncoco'. Apira apira no'huihuatama', co huachi nohuantapihuë' natëcaiso'. "Natëpirahuë', no'huiárinco," ta'tona', co huachi natërapihuë'.

<sup>22</sup> Patron marë' sacatohuatama', noya natëco'. Ama nonpintocosohüë'. Co ni'pirinquëmaonta', noya sacatoco'. Co patronachin yonquicaso' ya'huërinhuë'. Sinioronta' ni'sarinquëma'. Ina yonquiatoma', ya'ipi cancanëma quëran natëco'. <sup>23</sup> Ma'sona tëranta' nipatama', noya nico'. Co piyapi marëáchin sacatëramahuë'. Yosë imarama' ni'ton, ina marë' sacataramaso pochin cancantatoma', nóya sacatoco'. <sup>24</sup> Inaso' no'tëquën acanaarinpoa'. Inápaquë noya noya acoarinpoa'. Quisocristo tëhuënychinso' hua'anëntërinpoa'. Napoaton noya natëco'. <sup>25</sup> Yosëso' ya'ipinpoa' napopináchin ni'ninpoa'. Noya nipatëhua', acanaarinpoa'. Co'so' noya nipatëhuahuë', ana'intarinpoa'.

## 4

<sup>1</sup> A'naquëma' patronquëma' ninamaso'. Piyapinëmapita nosoroatoma', no'tëquën pahuëreco'. Ama topinan quëran ana'intocosohüë'. Canpitanta' hua'anëma' ya'huëtërinquëma'. Yosë inápaquë ya'huaponahuë', ya'ipinpoa' hua'anëntërinpoa'.

### *Piquëran huarë' pënëntërinso'*

<sup>2</sup> Nani tahuëri Yosë nontoco'. Ama amiatomahuë', nontáco'. Ama topinan nontocoso-huë'. Ya'ipi cancanëma quëran huarë' noya yonquiatoma', nontoco'. “Yosparinquën Sinioro,” itoco'. <sup>3</sup> Quiya marënta' Yosë nontoco'. Pa'sápato, Quisocristo nanamën a'chinpirahuë'. Ina marë' tashinan pëiquë po'morinaco. Na'a piyapi'sa' co nanamën nitochátërapihuë'. Inahuanta' nitochina'. Napoaton Yosë nontohuatama', quiya marënta' nontoco' catahuaincoi a'chintohuatoira, Yosë nanamën nohuanchina'. <sup>4</sup> Yosë nontoco' noya a'chinci no'tëquën nitotacaiso marë'. Ina pochin a'china'huaso' ya'huërin.

<sup>5</sup> Co imarinsopitasohuë' huë'pachina', noya nontoco'. Ama tapanatomahuë', noya a'chintoco'. Onpopionta' noya nanan sha'huitoco'. <sup>6</sup> Noya yonquiatoma', sanoanan quëran pënëntoco' noya natinënguëma'. Yashin yashin nontoco'. A'naya a'naya natanpachinguëma', noyasha a'panico'. Ina pochin nontacaso marë' na'con yonquico'.

### *Nipayarinsopita napopiso'*

<sup>7</sup> Iya Tiquico a'pataranquëma'. Inaso' nóya ni'nahuë. Iyahuë pochachin nosororahuë. Noya catahuarinco. Inanta' Sinioro natëton, noya nanan a'chinarin. Onpopinsona ya'huërahuëso' sha'huitarinquëma'. <sup>8</sup> Canpitanta' onporaisona nitotacamaso marë' a'pataranquëma'. Achinicancainquëmaso marënta' a'pataranquëma'. <sup>9</sup> Iya Onisimonta' pa'sarin, canpitataquë ya'huërinso'. Inanta' iyahuë pochin nosororahuë. Yosë natëton, noya imarin. Inapita canconpachina', ya'ipi isëquë ya'huëraisopita ma'sona onporaiso' sha'huitarinënguëma'.

<sup>10</sup> Aristarconta' isëquë ya'huërarin. Quisocristo imarinso marë' tashinan pëiquë po'mopi anta'. Inanta' yonquiarinquëma', saludos a'patarinquëma'. Marconta' saludos a'patarinquëma'. Inaso' Pirnapi quëmopinën. Canpitataquë pa'pachin, noya nontatoma', catahuaco' ténahuë. Nani ina sha'huitëranquëma'. <sup>11</sup> Quisoso Costo itopisonta' yonquiatënguëma', saludos a'patarinquëma'. Inapitaso' cotio piyapi'sa' niponaraihuë', Quisocristo imasapi. Ca pochin a'chinapi a'napitanta' Yosë hua'anëntërinquë ya'conacaiso marë'. Ina marë' nóya cancantërahuë. Inapitaso' achinicancaninaco. A'napita cotioro'saso nipirinhüë' co catahuarinacohüë'. <sup>12</sup> Ipapërasënta' canpitataquë ya'huërinso' saludos a'patarinquëma'. Inanta' Quisocristo natëton, noya nanan a'chinarin. Nani tahuëri canpita marë' Yosë nontárin. “Catahuaquë' Sinioro ya'ipi nohuantëranso' nitochina'. Noya nitotatona' imamiachinën,” itárin. <sup>13</sup> Na'con yonquirinquëma'. Co chirorinhüë' Yosë nontacaso'. Naotisiaquë, Iraporisëquë inaquëpita ya'huëpisopitanta' yonquiaton, Yosë nontárin. Noya Yosë marë' sacatarin. Cari ni'nahuë. <sup>14</sup> Nocasënta' saludos a'patarinquëma'. Inaso' notoro. Inanta' iyahuë pochin nosororahuë. Timasënta' inapochachin yonquirinquëma'.

<sup>15</sup> Imapisopita Naotisiaquë ya'huëpisopitanta' saludos a'patarahuë. Ninpanta' yonquirahuë. Ina pëinënguë Quisocristo imapisopita niyontonpi. Inapitanta' saludos a'patarahuë. <sup>16</sup> Iso quirica nontoco' ya'ipi imapisopita nataina'. Nani nontohuatama', Naotisiaquë a'patoco' imapisopita nonchina'. Inapitanta' nisha ninshitato, a'patërahuë. Ina quiricanta' canpitari nontoco'. <sup>17</sup> Arquipo sha'huitoco': “Ama chirotonhuë', ya'ipi Sinioro camairinquënso' natëquë',” itoco'.

<sup>18</sup> Ca Paonoco na'con yonquiatënguëma', saludos a'pataranquëma'. Caora imirahuë quëran isoíchin ninshitaranquëma'. Tashinan pëiquë ya'huërahuë. Ama naniantocoso-huë'. Yosë inaora nohuanton, noya catahuainquëma'. Nani ninshitëranquëma huachi.

*Paono*

## Paonori Tisaronicaquë ya'huëpisopita ninshitérinso'

### *Imapisopita yonquiaton, nanan a'patërinso'*

<sup>1</sup> Ca Paonoco ninshitaranquëma', ni'co'. Noyanquëma' canpitanta'. Noya quiyanta' ya'huarai. Ya'ipi Yosë imaramasopita Tisaronicaquë ya'huëramaso' ninshitaranquëma'. Siripano, Timotio, inapitanta' isëquë ya'huapi. Inapitaro'coi nanan a'patarainquëma'. Canpitanta' Tata Yosë chinotatoma', Siniro Quisocriso imarama'. Inaora nohuan-ton, Yosë noya catahuainquëma'. Asanocancainquëma'. Quisocrisonta' inapochachin catahuainquëma', tēnahuë.

### *Cancanëna quëran huarë' imapiso'*

<sup>2-3</sup> Nani tahuëri canpita marë' Yosë nontërai. Tata Yosë natëtoma', noya ninama'. Ninosoroatoma', na'con nicatahuarama'. “Siniro Quisocriso co onporonta' nani-antarinpoahuë'. Inasáchin ninarëhua',” ta'toma', chiniquën cancantërama'. Napoaton yonquiatëinquëma', Tata Yosë nontërai: “Ma noya Tata catahuanan ni'ton, cancanëna quëran huarë' imasarinëinquën. Ina marë' ‘Yosparinquën, itërainquën,” itërai Yosë nonta-toi. <sup>4</sup> Tata Yosë na'con nosororinquëma', iyaro'sa'. Nani huayoninquëma' huëntonëinquë ya'conacaso marë'. Nani ina nitotërai. <sup>5</sup> Quisocriso nanamën a'chintohuatëinquëmara, co topinan quëran a'chintërainquëmahuë'. Ispirito Santo chachin catahuarincoi a'china'huaiso'. Canpitanta' catahuarinquëma' noya natanacamaso marë'. “No'tëquën nontërinpoa',” ta'toma', ya'ipi cancanëna quëran natërama'. Ina nicatoi: “Tëhuëenchachin Yosëri huëntonëinquë aya'conin,” tēnai. Canpitataquë ya'huapoi, noya imarai canpitanta' noya imacamaso marë'.

<sup>6</sup> Ina marë' aparisitopirinacoihuë', noya cancantërai. Canpitanta' Yosë nanamën noya natanama'. Imaramaso marë' aparisitopirinëinquëmahuë', Ispirito Santo catahuarinquëma' ni'ton, nóya cancantërama'. Quiya pochin cancantatoma', chiniquën cancantërama'. Nonanpatamacoi, Quisocriso chachin nonanarama'. <sup>7</sup> Parisitapomarahué', co a'poramahuë'. Nóya imarama' ni'ton, a'napita imapisopitanta' natantopi. “¡Ma noyacha inapitaso' imapi paya! Ina pochin Quisocriso imacaso' ya'huërin,” topi. Ya'ipi Masitonia parti, Acaya parti, inaquëpita napopi. <sup>8</sup> Noya imarama' ni'ton, ya'ipi inaquë ya'huëpisopita nicatënëinquëma', yonquipi. Naporahuaton, ya'ipi ina parti nahuinin. Co quiyari sha'huitopiraihuë', ya'ipiya nitotopi. <sup>9</sup> Inapita chachin canpita napora-maso' sha'huiantapi: “Paono ni'quihuachincoira, noya a'chintërincoi. Noya natanatoi, a'naroáchin natërai. Mamanshi a'porahuatoi, Tata Yosëichin chinotërai. Ina imarai huachi. Yosëso' nanpirárin. Inasáchin chinotacaso' ya'huërin. <sup>10</sup> Ina chinotatoi, hui'nin chachin ninarai. Canpoa marë' Quisocriso chiminin. Ina quëran Yosëri ananpitaan-tarin. A'na tahuëri inápa quëran o'mantahuachin, nicha'ësaripoa'. Co imapisopitasohué' nipirinhuë', Tata Yosëri no'huiton ana'intarin huachi, tēnama',” topi, natantërai.

## 2

### *Paonori noya a'chintërinso'*

<sup>1</sup> Canpitataquë ya'huapoi iyaro'sa', co topinan quëran a'chintërainquëmahuë', nitotërama'. <sup>2</sup> Piriposëquë a'chinapiraihuë', no'huitonacoi, chiniquën aparisitërinacoi. Inapopotopirinacoihuë', canpitataquë canconpatëira, co tē'huaraihuë'. “Yosë catahuarincoi,” ta'toi, Quisocriso nanamën a'chintërainquëma'. A'napita no'huipirinacoihuë', chiniquën cancantatoi, pënërainquëma'. <sup>3</sup> Co nonpin nanan a'chintërainquëmahuë'. Co nisha nisha nicacaso marë' a'chintërainquëmahuë'. Co pi'pian tēranta' nonpintërainquëmahuë'. <sup>4</sup> Yosë chachin acorincoi nanamën a'china'huaiso marë'. “No'tëquën a'chinapona',”

ta'ton, a'parincoi. Napoaton co piyapi'sa' noya nicainacoiso marè' a'chinaihuè'. Yosè noya nicainacoiso marè' a'chinárai. Ya'ipi yonquirèhuasopita nitotèrin. Ma'marèsona sacatèrèhuasonta' nitotèrin. <sup>5</sup> Co noyasha nonatoi, yanonpintèrainquémahuè'. Co canaca'huaiso marè' napotèrainquémahuè'. Yosè ni'sárincoi, no'tèquèn nontèrainquéma'. <sup>6</sup> Co piyapi'sa' noya nicainacoiso' yonquiatoi a'chinaihuè'. <sup>7</sup> Quisocristo a'parincoi ni'ton, chiníquèn nanan quètèrincoi. Napoaponahuè', co chiníquèn nontèrainquémahuè'. Co inso tēranta' hua'an pochin camairaihuè' natèinacoiso marè'. Sanoanan quèran nontèrainquéma'. Sanapi hua'huinpita nosoroaton, noya nocomarinso pochin quiyari-manta' ni'nainquéma'. <sup>8</sup> Na'con nosoroatèinquéma', Yosè nanamèn a'chintèrainquéma'. Ina marè' parisitopiraihuè', co ina yonquiraihuè'. Ya'ipi cancanèhuèi quèran nosororainquéma' ni'ton, na'con catahuarainquéma'. <sup>9</sup> Canpitataquè ya'huasocoi, chiníquèn sacatatoi, a'chintèrainquéma'. Tahuèrirè chachin tashirè chachin sacatèrai ama topinan ma'sha ma'paca'huainquémaso marèhuè'. Quiyaora sacatonèhuèi quèran coshatèrai. Naporahuatoi, Yosè nanamèn a'chintèrainquéma'. Co ina naniantèramahuè', ténahuè'.

<sup>10</sup> No'tèquèn Yosè natètoi, noyasáchin ninai. Co manta' onpotèrainquémahuè'. Ya'ipi imaramasopita ni'namacoi. Yosènta' ni'nincoi. <sup>11</sup> Ya'ipinquéma' pènènainquéma', nitotèrama'. A'naya a'nayanquéma' nontèrainquéma' noya imacamaso marè'. Quèmapi hui'ninpita a'chintèrinso pochin a'chintèrainquéma'. <sup>12</sup> Achinicancanainquéma'. “Yosè imarama' ni'ton, noyasáchin nico' Yosè noya ni'inquéma',” itèrainquéma'. Ina acorinquéma' hua'anèntèrinquè ya'conacamaso'. A'na tahuèri ya'huèrin'pa' quèpantahuachinquéma', noya noya ya'huècontarama'.

<sup>13</sup> Yosè nanamèn a'chintohuatèinquémara, noya natanama'. “Co piyapi yonquirinso' a'chintèrinpoahuè'. Yosè nanamèn chachin a'chintèrinpoa',” ténama'. Tèhuèenchachin Yosè nanamèn ni'ton, ina natèhuatama', nanamèn quèran anoyacancantèrainquéma'. Ina marè' nani tahuèri “Yosparinquèn,” itèrai Yosè. <sup>14</sup> Iráca Cotia parti na'a piyapi'sa' Quisocristo imatona', natèpi. A'napita cotioro'sariso nipirinhue', no'huitona' chiníquèn aparisitopi. Iporaso' iyaro'sa' canpitanta' parisitèrama'. Ya'huèhuano'sa' inapochachin aparisitarinèinquéma'. <sup>15</sup> Iráca cotioro'sari pènèntona'piro'sa' no'huitona', tèpapi. Ina quèran Siniro Quisocristo chachin o'mahuachina, inanta' tēpaantapi. Quiyanta' aparisitatonacoi, a'parinacoi. Napopiso marè' Yosèri co noyahuè' ni'nin. Tèhuèenchachin co ya'ipi piyapi'sa' nosoropihuè'. <sup>16</sup> Nisha piyapi'sa' cha'ècaiso marè' yaa'chintopiraihuè', cotioro'saso' co nohuantopihuè'. “Ama a'chintocosohe',” ta'tona', no'huirinacoi. Ina marè' aquè aquètè' oshahuanpi. Napoaton Yosèri chiníquèn no'huirin. No'tèquèn ana'intarin huachi.

### *Paonori nicapon yapaantarinso'*

<sup>17</sup> Hua'quimiáchin iyaro'sa' co ni'pirainquémahuè', co naniantèrainquémahuè'. Yonquiatèinquéma', na'con nohuantèrai nica'huainquémaso'. <sup>18</sup> Canpitataquè yapa'piraihuè', ipora huanta' co nanitèraihuè'. Ca Paonoco cararo' yapa'pirahuè', Satanase ya'copirinco ni'ton, co nanitèrahuè' paca'huaso'. <sup>19</sup> Na'con yonquiatèinquéma', nóya cancantèrai. ¿Ma'marè chachinta' ina pochin cancantèrai? Imarama' ni'ton, Yosè ya'huèrin'pa' canpitanta' pa'sarama', ténai. A'na tahuèri Siniro Quisocristo o'mantararin. Naporo': “Quiyari a'chintèrai ni'ton, imapi,” ta'toi, noya cancantèrai. <sup>20</sup> Tèhuèenchachin noya imarama': “¿Ma noyacha Yosè catahuarinquéma paya!” ta'toi, capa cancantèrai.

## 3

<sup>1</sup> Hua'qui' co ni'nainquémahuè'. Co nanan tēranta' natantèraihuè'. Napoaton co huachi ahuantatoihuè', “Quiyaora Atinasèquè quèparichii,” ta'toi, <sup>2</sup> Timotio a'patèrainquéma' nitotacaso marè'. Inanta' noya imarin. Yosèri acorin Quisocristo nanamèn a'chinacaso

marë'. Achinicancainquëmaso marë' a'patërainquëma'. <sup>3</sup> Canpitanta' parisitapi-ramahuë', co nohuantërainhuë' nisha nisha yonquicamaso'. Co ina marë' a'pocaso' ya'huërinhuë'. Quisocriso imapatëhuara, aparisitërinënpoa'. Yosë nohuanton, ina marë' parisitarëhua', nani nitotërama'. <sup>4</sup> Canpitataquë ya'huasocoi, sha'huitërainquëma'. "Imarëhuaso marë' aparisitarinënpoa'," itërainquëma'. Napotërainquëmaso pochachin iporaso' aparisitarinënquëma'. <sup>5</sup> Napoaton caso' co huachi ahuantatohuë', Timotio a'patëranquëma' onpopinsona imaramaso' nitota'huaso marë'. Sopai yanonpintërinpoa' Yosë a'pocaso marë'. Minsërinquëma' naporini, topinan quëran a'chinchitënnquëmahuë'. "Co huachi noya imamaraihuë'," ta'toi, Timotio a'patërainquëma'.

<sup>6</sup> Iporaso' nani huënantaton, nanan sha'huitiirincoi. "Ipora huanta' noya imasapi. Inahua capini noya ninosoroapi," itiirincoi. Na'con yonquiramacoi. Quiya pochin cancantatoma', canpitanta' yani'namacoi. <sup>7</sup> Inanta' sha'huitiirincoi. Ina natantatoi, nóya cancantërai. Ipora huanta' ma'sha onpotërinacoi. Parisitapiraihuë', noya imarama' ni'ton, noya cancantarai. <sup>8</sup> Quisocriso imamiatarama' ni'ton, co huachi sëtërainhuë'. Chiniquën cancantarai. <sup>9</sup> Capa cancantërai ni'ton, ¿onporahuatëicha noya noya: "Yosparinquën Tata Yosë," ichii? ¡Co'chi nanitërainhuë' paya! <sup>10</sup> Nani tahuëri tashirë chachin Yosë nontarai canpitataquë paca'huaiso marë'. Co ya'ipi Yosë nanamën nitochatëramahuë'. Pahuantarinquëma' ni'ton, ina a'chinchinquëma' noya noya imacamaso marë', tënhuë.

<sup>11</sup> Tata Yosë chachin catahuaincoi onpopionta' pa'ii. Siniro Quisosonta' catahuahuachincoi, pa'sarai nicapoinquëma'. <sup>12</sup> Na'con nosororainquëma'. Inapochachin canpita capininta' ninosorocamaso' ya'huërin. "Catahuaquë' Siniro noya noya ninosoro'ina'. Ya'ipi piyapi'sa' nosoro'ina'," itërahuë, Yosë nontato. <sup>13</sup> Noya ninosorohuatama', Quisocriso achinicancanarinquëma' noyasáchin nicacamaso marë'. Catahuahuachinquëma', noyápiachin cancantarama'. Ina quëran Quisocriso o'mantahuachin, Yosë noya ni'sarinquëma'. A'na tahuëri ya'ipi piyapinënpitarë chachin o'mantararin.

## 4

### *Yosëri noya ni'ninsopita*

<sup>1</sup> Iporaso' iyaro'sa' Siniro Quisoso nanan quëtërincoi ni'ton, pënëantarainquëma'. Iráca pënënainquëma' noya nicacamaso marë'. "Noya nipatama', Yosë noya ni'sarinquëma'," itërainquëma', natëramacoi. Iporaso' aquë aquëtë' natëtatoma', noyasáchin nico', tënhuë.

<sup>2</sup> Siniro Quisoso a'chintërincoiso chachin sha'huitërainquëma', natanama'. <sup>3</sup> Yosë nohuantërin noyasáchin nicacaso'. Ama pi'pian tëranta' monshihuancohuë'. <sup>4</sup> Sanapi nohuantohuatama', ama monshitocosoahuë'. Nitatoma', noya sa'aco'. Yosë yonquiatoma', noya ichiya'huëco'. Nani sa'apatama', inasáchin yonquicaso' ya'huërin. <sup>5</sup> A'naquën co Yosë nohuitatonahuë', ichihuë'ëcaisoachin yonquiatona', a'naroáchin mapi. Ama inapita pochin cancantocosoahuë'. Tëhuënhachin nosoroatoma', maco'. <sup>6</sup> A'na quëmapi sa'in ama së'huacosohuë'. Ama ina pochin ni'toma', so'in nonpintocosoahuë'. Së'huahuatama', Yosë no'tëquën ana'intarinquëma'. Iráca inachachin chiniquën pënënainquëma'. <sup>7</sup> Co Yosë nohuantërinhuë' oshahuanacaso'. Acorinpoa' noyasáchin nicacaso marë'. <sup>8</sup> Co quiyaora yonquinëhuëi quëran pënënainquëmahuë'. Co natëhuatamahuë', Yosë chachin co natëaramahuë'. Ina nohuanton, Ispirito Santo ya'coancantërinpoa' noya nicacaso marë'. Inaso' noyasáchin ninin.

<sup>9</sup> Imaramasopita capini noya ninosoroco'. Nani nitotërama' ni'ton, co aquëtë' sha'huita'huancuëmaso' ya'huërinhuë'. Yosë chachin cancanëmaquë anitotërinquëma' ninosorocamaso'. <sup>10</sup> Nani huachi imapisopita nosoroarama'. Ya'ipi Masitonia parti ya'huëpisopita aquë ya'huëpirinahuë', Quisocriso imapachinara, nosororama'. Iporaso', iyaro'sa', na'con na'con ninosoroco', tënai. <sup>11</sup> Nani tahuëri yonquico' sano piyapi nicacamaso marë'. Ama topinan ya'huëcosohuë'. Ya'ipinquëma' noya sacatoco' ama



pahuanchinquëmasohuë'. Iráca inachachin pënëinquinquëma'. <sup>12</sup> Inapohuatama', noya ya'huarama'. Co imapisopitahuënta' noya ni'sarinëinquëma'. Napohuatama', co manta' pahuantarinquëmahuë'. Co topinan ma'patacaso' ya'huëaponhuë'.

### *Chimnispisopita nanpiantarinso'*

<sup>13</sup> Chimnispisopita ma'sona onpocaiso' a'chinchinquëma', nitotoco'. Quisoso imarëhuasopita chimnpatëhua', nanpiantarihua'. Co imapisopitasohuë' nipirinhuë', quëmopinënpita chimnpachinara, sëtopi. "Co onporonta' quënantarihua'huë'," ta'tona' sëtápi. Ama inapita pochin sëtacaso marëhuë' canpitaso' a'chinchinquëma'. <sup>14</sup> Quisoso chimnaponahuë', nanpiantarinso' nitotërëhua'. Inapochachin imapisopita chimnpachina', Yosëri ananpitaantarín. Quisoso isoro'paquë o'mantahuachin, ananpitaantarín.

<sup>15</sup> O'mantahuachin, co nanpirëhuasopitaráchin pantarihua'huë'. Chimnispisopita'ton nanpiantarapi. Siniro Quisoso sha'huitërinpoaso chachin sha'huichinquëma'. <sup>16</sup> Chiníquën nanantaton, o'mantararin. Anquëni hua'aonta' chiníquën sha'huirarin. Yosë nohuanton, tronpita pihuirarin. Naporo' Quisocristo imatona' chimnispisopita'ton nanpiantarapi. <sup>17</sup> Ina quëran a'naróchin nanpirëhuasopitarë'quënpoa' chitoro' ya'huërinquë quëpantarínpoa'. Inaquë Siniro nacapiarihua'. Inarë'quënpoa' ya'huëmiatarihua'. <sup>18</sup> Inapita yonquiatoma', nisha'huitoco' noya cancantacaso marë'. Ama sëtacaso marëhuë' ina pochin niachinicancanco'.

## 5

<sup>1</sup> Onporosona o'mantacaso' tahuëri nanicaso', co ina iyaro'sa' a'chintaranquëmahuë'. <sup>2</sup> Iráca sha'huitërinpoaso' nani nitotërama'. Co nitotasoihuë', o'mantararin. Ni'co' iyaro'sa'. Yono tashi' co nitotasëhuahuë', ihuatona'pi pëinënpoaquë ya'conin. Inapochachin a'nanaya Quisocristo o'mantararin. <sup>3</sup> Co imapisopitasohuë' o'mantacaso' tahuëri co yonquipihuë'. "Noya ya'huarëhua', co manta' onpoarihua'huë'," topirinahuë'. A'nanaya chiníquën ana'intacaso' naniarin, co cha'ësapihuë'. Sanapi yahuaihuachina, onporosona iquitacaso' co nitotërinhuë'. A'nanaya iquitërin. Inapochachin a'nanaya Yosëri ana'intarin. <sup>4</sup> Canpitaso nipirinhuë', co tashi pochin cancantëramahuë'. O'mantacaso' tahuëri nanihuachin, co pa'yanaramahuë'. Ihuatona'pi a'nanaya huë'pachina, apa'yaninpo'. Inapochachin Quisocristoso' a'nanaya o'mahuachin, na'a piyapi'sa' pa'yanapona'. Canpitaso nipirinhuë' ina tahuëri ninaarama'. Nanihuachin, co pa'yanaramahuë'. <sup>5</sup> Quisocristo imarama' ni'ton, tahuëri pochin cancantatoma', nitotarama'. Ya'ipinpoa' imarëhuasopita co tashi pochin cancantërëhuahuë'. <sup>6</sup> Napoaton o'mantacaso' tahuëri yonquiatëhua', noya ninahua'. A'naquënsó huë'ërëso pochin cancantatona', co ina tahuëri yonquipihuë'. Canpoaso nipirinhuë' no'tëquën yonquiatëhua', sano cancantahua'. <sup>7</sup> Yahuë'ëpachinara, tashi' huë'ëpi. Yano'pihuachinaranta', tashi' no'pipi. <sup>8</sup> Canpoaso nipirinhuë' tahuëri pochin cancantacaso' ya'huërin. Napoaton noya yonquiatëhua', Yosë imamiatahua'. Ni'co' iyaro'sa'. Inimicoro'sa' huë'pachinara, sontaro'sa' co topinan pa'pihuë'. Coton hua'na quëran nininso' a'mopi. Casconta' hua'na quëran nininso' yancopi ama inimicori ohuanacaso marëhuë'. Noya nita-pahuachinara, co inimicori minsërinhuë'. Hua'na a'mopiso pochin canpoanta' Yosë natëahua' catahuainpoa'. Ina natëtëhua', noya ninosoroa'ahua'. "Yosë a'paiarinpoa'. O'mahuachin, noyá nicha'ësarínpoa'," ta'tëhua' noya ninahua'. <sup>9</sup> Co ana'intinpoaso marë' Yosë acorínpoahuë'. Siniro Quisocristo imarëhua' ni'ton, nicha'ësarínpoa'. Ina nohuanton cha'ësarëhua'. <sup>10</sup> Canpoa marë' inaso' chiminin. A'naquënpoa' nanpiarëhua', a'naquënpoa' chiminarihuarahuë', o'mantahuachin, ya'ipi imarëhuasopita quëpantarínpoa'. Inarë'quënpoa' ya'huëmiatarihua'. <sup>11</sup> Napoaton nani tahuëri nicatahuaco'

chiníquën cancantacamaso marë'. O'mantacaso' tahuëri yonquiatoma', na'con ninontoco' noya noya imacamaso marë'. Nani noya nicatahuarama'. Aquëtë chachin niachinicancanco'.

*Piquëran huarë' pënëninso'*

<sup>12</sup> Ansiano'sa' iyaro'sa' noya ni'co', ténahuë. Siniro nohuanton, ansiano ya'conpi pënëninquëmaso marë'. Co chirotonahuë', a'chintarinëinquëma'. Pëshonpatama', otërarinëinquëma' ni'ton, noya ni'co'. <sup>13</sup> Na'con catahuarinëinquëma' noya noya Yosë imacamaso marë'. Napoaton nosoroatoma', noya yonquirapico'. Ya'ipiniquëma' noya nini'toma', ya'huëco'.

<sup>14</sup> Canpita capini iyaro'sa' nipënëncó'. A'naquën co yasacatopihuë'. Inapita pënëncó' ama chiroinasohuë'. A'naquën ma'sha onpohuachinara, Yosë yananiantopí. Inapitanta' noya nontoco' chiníquën cancanchina'. A'naquëonta' cancanëna quëran co chinipihuë'. Catahuaco' ama Yosë nanianchinasohuë'. Inapohuatama', ama insonta' no'huicosohuë'. Sanoanan quëran pënëncó'.

<sup>15</sup> A'napita ma'sha onpotohuachinëinquëma', ama yai'huërëtosohuë'. Nani tahuëri noya nontoco'. No'huipirinëinquëmaonta', nosoroatoma', catahuaco'. Canpita capini ninosoroatoma', a'napita piyapi'santa' catahuaco'.

<sup>16</sup> Ama sëtocosohuë'. Yosë yonquiatoma', nani tahuëri noya cancantoco'. <sup>17</sup> Apira apira Yosë nontoco'. Ama a'na tahuëri tëranta' pahuancosohuë'. <sup>18</sup> Ma'sha onpotopirinëinquëmahuë', ama sëtocosohuë'. Nani tahuëri "Yosparinquën Siniro," itoco'. Ma'sha onpoapomarahuënta', noya cancantoco'. "Inanta' Siniro noya," itoco'. Quisocristo imarëhua' ni'ton, ina pochin cancantacaso' Yosë nohuantërin.

<sup>19</sup> Ispirito Santo ya'coancantërinquëma'. Cancanëmaquë nontohuachiniquëma', a'naroáchin natëco'. Ni'co'. Pën noya orotohuachina, noya napëntërë'. Inapochachin Ispirito Santo yacatahuarinpoa' noya cancantacaso marë'. Ama pën atacopitërëso pochin nitocosohuë'. <sup>20</sup> "Yosë anitotërinco sha'huichinquëma," itohuachinëinquëma', noya natanco'. <sup>21</sup> Napoaponahuë', ni'cona nonpintochinëinquëma'. A'naquën "No'tëquën a'chintaranquëma'," itohuachinëinquëma', ama a'naroáchin natëtocosohuë'. Ya'ipi napopiso' Yosë quiricanën quëran tantiaco'. "Inaora yonquinën quëran a'chinamara," ta'toma', tantiaco'. Yosë nanamënsáchin natëcaso' ya'huërin. <sup>22</sup> Ya'ipi aoshahuaninquëmasopita a'poco'.

<sup>23</sup> Yosëíchin asanocancaninpoa'. Canpita marë' ina nontarahuë noyásha anoyacancanichinquëma'. "Catahuaquë' Siniro, ya'ipi cancanëna quëran noyápiachin yonqui'ina'. Naporahuaton, ya'ipi yonquinëna quëran noya nininsopitaráchin nohuanchina'. Quëma nohuanton, ya'ipi nonëna quëran huarë noyasáchin niina'," itërahuë. Ina quëran Siniro Quisocristo o'mantahuachin, nóya ni'sarinquëma'. <sup>24</sup> Yosë nani nontërinpoa' imacaso marë'. Huëntonëinquë chachin aya'coninpoa'. No'tëquën sha'huitërinpoa'. Co onporonta' nonpintarinpoahuë' ni'ton, noya catahuarinpoa'.

<sup>25</sup> Quiya marënta' iyaro'sa' Yosë nontoco'.

<sup>26</sup> Imaramasopita capini noya ninosoroatoma', nisë'quëco'.

<sup>27</sup> Niyontonpatama', iso quirica nontoco' imapisopita nataina'. Siniro nanan quëtërinco ni'ton, nontoco' ya'ipiya nataina', ténahuë.

<sup>28</sup> Inaora nohuanton, Siniro Quisocristo nosoroatëinquëma', catahuainquëma'. Nani ninshitëranquëma huachi.

*Paono*

## Paonori Tisaronicaquë ya'huëpisopita ninshitaantarinsó'

### *Imapisopita yonquiaton, nanan a'pataantarinsó'*

<sup>1</sup> Ca Paonoco ninshitaranquëma', ni'co'. Noyanquëma' canpitanta'. Noya quiyanta' ya'huarai. Ya'ipi Yosë imaramasopita Tisaronicaquë ya'huëramaso' ninshitaantarinquëma'. Siripano, Timotio, inapitanta' isëquë ya'huapi. Inapitaro'coi nanan a'patarainquëma'. Tata Yosë natëtoma', Siniro Quisocristo imarama'. Huëntonënuquë chachin aya'coninpoa' ni'ton, "Tata" itërëhua'. <sup>2</sup> Inaora nohuanton, catahuainquëma'. Asanocancainquëma'. Siniro Quisocristonta' inapochachin catahuainquëma', tēnahuë.

### *Oshahuano'sa' ana'intarinsó'*

<sup>3</sup> Iporaso' iyaro'sa' noya noya imasarama'. Cancanëma quëran huarë' ina natërama'. Na'con na'con ninosororama' ni'ton, nani tahuëri "Yosparinquën," itërai Yosë. Ina na'con catahuarinquëma' ni'ton, ina pochin nontacaso' ya'huërin. Ina Yosë nohuantërin. <sup>4</sup> Ya'ipi parti Yosë imapisopita sha'huitërai. "Tisaronicaquë ya'huëpisopita noya imasapi. Imapiso marë' na'con aparisitopirinahuë': 'Yosë co naniantarinsopahuë', ta'tona', ahuantapi. Co yaa'popihuë'. Ma'sha onpoaponaraihuënta', chiniquën cancantapi," itërai. Noya natërama' ni'ton, noya cancantërai. <sup>5</sup> Imaramaso marë' parisitapomarahuë', noya ahuantërama' ni'ton: "Tëhuëchachin Yosë catahuarinquëma'," tēnai. Inaso' no'tëquën yonquirin. Yosë nohuanton, ipora parisitarama' noya noya cancantacaso marë'. Ina quëran noya ni'sarinquëma'. A'na tahuëri hua'anëntërinquë quëpantarinquëma'.

<sup>6</sup> Iporaso' a'napita no'huirinënuquëma'. Aparisitapirinënuquëmahuë', a'na tahuëri Yosëri no'tëquën ana'intarin. Co naniantarinhüë'. "Oshahuano'sa' ana'intacaso' ya'huërin," tēnin. <sup>7</sup> Quisocristo o'mantahuachin, co huachi parisitaramahuë'. Noya ya'huarama'. Quiyanta' ipora aparisitapirinacoihuë', naporó' ya'ipi imarëhuasopita nóya cancantarihua'. Siniro Quisocristo chachin inápa quëran o'mantararin. Pën huënaratërinso huáncana ya'noarin. Anquëniro'santa' chiniquën nanantatona', o'mantararin. Inapitarë chachin o'mantararin. <sup>8</sup> O'mantarahuatón, co Yosë nohuitopisopitahuë' ana'intarin. Co Siniro Quisoso nanamën natëpihuë' ni'ton, chiniquën ana'intarin. <sup>9</sup> No'tëquën ana'intaton, parisitopiquë a'pararin. Aquë a'pahuachin, chiniquën parisitomiatapi, co cha'ësapihuë'. Inatohua' paatona', co onporonta' Quisocristo nohuitapihuë'. Inaso' chini chiniquën nanantaton, noyasáchin niponahuë', inapitaso' co onporonta' nirayarapihuë'. <sup>10</sup> O'mantahuachin, imarëhuasopitaso' quënanarihua'. "Ma noyacha Quisocristoso paya. Anoyacancantërinpoa'. Inasáchin ya'ipiya chinochina'," tosarëhua'. Ya'ipi imarëhuasopita napoarëhua'. A'chintohuatëinque'mara, canpitanta' natërama' ni'ton, noya ni'sarama'.

<sup>11</sup> Napoaton nani tahuëri canpita marë' Yosë nontërai: "Quëma nohuanton Siniro imarinënuquën. Napoaton, catahuaquë' noyasáchin niina'. Noya noya yaimarinënuquën ni'ton, catahuaquë' noyápiachin cancanchina'. Quiyaora co nanitëraihuë'. Quëmasáchin Siniro ananitaparancoi. Catahuaquë' ya'ipi cancana quëran natëinënuquën," itërahuë, Yosë nontato. Noya nipatama', Yosë noya ni'sarinquëma'. <sup>12</sup> Ina quëran a'napitanta' nicatëinënuquëma': "Ma noyacha Siniro Quisoso ni'ton, ina imatona', noya nisapi paya," tosapi. Canpitanta' ina nohuitërama' ni'ton, noya noya cancantarama'. Inaora nohuanton, Yosë nosoroatënuquëma', catahuarinquëma' ina pochin cancantacamaso marë'. Siniro Quisocristonta' catahuarinquëma'.

## 2

*Yosë inimiconën ya'nocaso' ya'huërinso'*

<sup>1</sup> Apira iyaro'sa' o'mantacaso' tahuëri pi'pian a'chinchinquëma'. Siniro Quisocriso o'mantahuachin, nacapirahuatëhua', pantarihua'. <sup>2</sup> A'naquënso nipirinhüë' co no'tëquën nitotopihuë'. "O'mantacaso' tahuëri nani nanirin," itohuachinquëma', ama pa'yancosohüë'. Ama nisha nisha yonquicosohüë'. A'naquën tapon: "Carí ninorahuë. O'mantacaso' tahuëri nani nanirin," itohuachinquëma', ama natëcosohüë'. A'nanta' tapon: "Nanirin mini. Paono chachin naponinshitërincoi," itopirinëinquëmahuë', ama ina natëcosohüë'. <sup>3</sup> Ni'cona nonpintochinëinquëma'. Co'huara Quisocriso o'mayatërasohüë', notohuaro' piyapi'sa' Yosë a'poapi. Co pi'pian tëranta' yanatërapihuë'. Naporo' a'na quëmapi ya'huapon. Ya'ipi piyapi'sa' nonpintarin ama Yosë imacaiso marëhuë'. Pa'pi co noyahuë' nisarin. Sopairi noyá ya'coancantërin ni'ton, chiníquën ana'intacaso' ya'huërin. Ayaro' tahuëri Yosëri ana'intaton, parisitopiquë a'pararin. <sup>4</sup> Inaso' Yosë inimicotërin. "Ama Yosë chinotocosohüë'. Ama manta' moshacosohüë'. Casáchin natëco. Yosë ya'huëretarahüë," tosarín. Yosë chinotopiso pëiquë chachin huënsëapon piyapi'sari chinotacaiso marë'. Pa'pi co noyahuë' nisarin. Chiníquën nanantaton, ya'ipi piyapi'sa' yacamaiapon.

<sup>5</sup> Canpitataquë ya'huapo, nani sha'huitëranquëma'. ¿Ina naniantarama' ti? <sup>6</sup> Tahuëri nanihuachin, ina quëmapi huë'sarin. Yosë inimiconën inaso'. Yosë nohuanton, macarisona ya'copiarin ni'ton, co iporaso' huë'shatërarinhüë'. Ina nitotërama'. <sup>7</sup> Co Yosë inimiconën ya'noyatëraponahuë', ipora chachin co incari tëranta' nitotopirinhüë', nani sacatapi Yosë inimiconën hua'anëntacaso marë'. A'na tahuëriso nipirinhüë', Yosë nohuanton, ya'copirinsó' capa nipachin, Yosë inimiconën ya'norarin. <sup>8</sup> Ya'nohuachin, piyapi'sa' aquë aquëtë' co noyahuë' cancantapi. Inari camaihuachin, notohuaro' piyapi'sari natëapi. Ayaro' tahuëriso nipirinhüë', Siniro Quisosori ana'intarin. Huënaráchin huënaráchin o'mantahuachin, minsëarin. Topinan noncharapirinhüë', ata'huantarin. Co huachi nanitarinhüë' piyapi'sa' nonpintacaso'. <sup>9</sup> Nipirinhüë', co'huara ina o'mayatërasohüë', notohuaro' piyapi'sa' nonpintarin. Satanásëri catahuarin ni'ton, nani ma'sha nanitapaarin nicacaso'. Piyapi inaora co nanitërinhuë' ina pochin nicacaso'. Nonpintaton, nani ma'sha sacai' nininsó' a'notohuachina, natërapí. Ni'pachina', pa'yanapi. <sup>10</sup> Co noyahuë' nicaton, na'a piyapi'sa' nonpintarin. Co no'tën nanan nohuantopihuë' ni'ton, Yosë inimiconën natëapi, parisitopiquë pa'sapi huachi. Yosë nanamën nohuantopi naporini, cha'ëitonahuë'. <sup>11</sup> Napoaton, Yosëri tananpitarin nonpin nanan natëcaiso marë'. Sopai nohuanton, natëapi. <sup>12</sup> Co no'tëquën yonquiatonahuë', co noyahuë' nicacaiso' pa'yatapi. Ina pochin cancantopi ni'ton, Yosëri ana'intarin.

*Yosëri huayonin nicha'ëcaso marë'*

<sup>13</sup> Canpitaso nipirinhüë' iyaro'sa', imarama'. Siniro nosororinquëma'. Iráca quëran huarë' Yosë huayoninquëma' huëntonëinquë ya'conacamaso marë'. No'tën nanan natëhuatama', Ispirito Santo anoyacancantërinquëma' Yosë nohuantërinso chachin nicacamaso marë'. Ina yonquiató, Yosë nontërai: "Ma noya Siniro inapitaso' nicha'ëran ni'ton, 'Yosparinquën,' " itërai, Yosë nontatói. <sup>14</sup> Yosë nanamën a'chintohuatëinquëmara, canpitanta' imarama'. Yosë acorinquëma' Siniro Quisocriso pochin nicacamaso'. A'na tahuëri o'mantahuachin, ina pochin ya'noarama'.

<sup>15</sup> Napoaton iyaro'sa', chiníquën cancantatoma', ya'ipi cancanëma quëran imaco'. Canpitataquë ya'huasocoi, no'tëquën a'chintërainquëma'. Ina quëran quirica a'patëranquëma' na'con na'con nitotacamasso marë'. No'tën nanansáchin imamiatoco'. <sup>16</sup> Siniro Quisocriso catahuainquëma' chiníquën cancantacamasso marë'. Inaora nohuanton, Tata Yosënta' nosoroatonpoa', achinicancamiatërinpoa'. A'na tahuëri ya'huërinquë

chachin quëpantarinpoa'. Sha'huitërinpoa' ni'ton, ina ninarëhua'. <sup>17</sup> Ina yonquiatoi, canpita marë' Yosë nontarai. "Nani tahuëriya Siniro catahuaquë', chiniquën cancanchina'. Achinicancanquë' noyasáchin niina'. Catahuaquë' noyásha noina'," itërai.

### 3

#### *Yosë nontacaso' ya'huërinso'*

<sup>1</sup> Iporaso' iyaro'sa', quiya marënta' Yosë nontoco' nanamën noya a'china'huaiso marë'. Ya'ipi parti nahuinacaso ya'huërin. Canpitaso' natanatomaco'i, noya imarama'. A'napitanta' a'chintohuatoi, noya nohuanchina'. Canpita pochachin noya imaina'. Ina marë' Yosë nontoco'. <sup>2</sup> A'naquënso nipirinhüë' co yaimapihuë'. Pa'pi co noyahuë' cancantopi. No'huitonaco'i, yaahuërinaco'i ama a'china'huaiso marëhuë'. Yosë nontoco' inapita quëran nicha'ëinco'i. <sup>3</sup> Tata Yosëso nipirinhüë' co onporonta' naniantërinpoahuë'. Achinicancaninpoa'. Sopai yaminsëpirinpoahuë', ina ni'sarinpoa'. Catahuarinpoa' sopai minsëcaso'. <sup>4</sup> Pënënpatëinquëmara, noya natëramaco'i. Co a'poatomahuë', imamiatarama'. Yosë catahuarinquëma' ni'ton, noya imasarama', ténahuë. <sup>5</sup> Yosë catahuainquëma' ina nosororinpoaso' na'con yonquicamaso marë'. Parisitopiramahuë', achinicancainquëma' Quisocristo pochin ahuantacamaso marë'.

#### *Sacatacasonta' ya'huërinso'*

<sup>6</sup> Siniro Quisocristo nanan quëtërinco'i ni'ton, no'tëquën iyaro'sa' pënëninquëma'. A'naquëmaso' imapomarahüë', co sacatatomahuë', nisha nisha yonquirama'. Yosë nanamën no'tëquën a'chintopirainquëmahuë', co natëramacoihuë'. Insosona inapohuachin, ama inapitarë'quëma' nipayacosohüë'. <sup>7</sup> Nani nitotërama' noya nicacamaso'. "Nonancoi," itërainquëma'. Canpitataquë ya'huasocoi, co quiyaso' topinan ya'huëraihuë'. Co chiroraihuë'. <sup>8</sup> Co a'na piyapi cosharonën topinan ma'paraihuë'. Nani tahuëri chiniquën sacatërai. Tashirë chachin sacatërai ama topinan ma'pata'huaiso marëhuë'. <sup>9</sup> Hua'qui' a'chintërainquëma' ni'ton, noya topinan ma'patacaso nipirinhüë', co topinan ma'parainquëmahuë'. Sacatatoi, ma'sha pa'anai. Noya sacatërai nonanamacoiso marë'. <sup>10</sup> Canpitataquë ya'huasocoi, pënëninquëma'. "Insosona co yasacatohuachinhuë', ama coshachinsohüë'," itërainquëma'. <sup>11</sup> Nanan nani natantërahuë. A'naquëma' co yasacatatomahuë', topinan pa'sárama'. Naporahuaton, ma'toma ma'toma nonatoma', piyapi'sa' chinotërama', natantërahuë. <sup>12</sup> Siniro Quisocristo nanan quëtërinco'i ni'ton, pënënanranquëma': Ama huachi iyaro'sa' ina pochin cancantocosohüë', ténahuë. Sano yonquiatoma', noya sacatoco' pahuantërinquëmaso' pa'anacaso marë'.

<sup>13</sup> Na'aquëma' iyaro'sa' noya nisarama'. Ama amiatoma', nisha cancantocosohüë'. Nani tahuëri noya nico'. <sup>14</sup> Nani ninshitatoi, pënëninquëma'. Inso tëranta' co yanatëhuachincoihuë', pënëncó'. Co natëtohuachinahuë', ama inapitarë'quëma' nipayacosohüë' oshanëna marë' tapaina'. <sup>15</sup> Napoaponahuë', ama inimico pochin nicatoma', no'huicosohüë'. Iyaparima pochin nicatoma', sanoanan quëran pënëncó'.

#### *Asanocancaninpoaso'*

<sup>16</sup> Siniroíchin asanocancaninpoa'. Ina catahuainquëma' sano cancantacamaso marë'. Ma'sona onpopiramahuënta', nani tahuëri catahuainquëma' ama pa'yanacamaso marëhuë'. Nani tahuëri noya a'painquëma'.

<sup>17</sup> Ca Paonoco caora imirahuë quëran pi'pian ninshitaranquëma' saludos a'pata'hanquëmaso marë'. Nani quirica ninshitërahuëquë iso pochin ninshitërahuë. Ina nicatoma', nitotarama': "Paono mini ninshitërinpoa'," tosarama'. <sup>18</sup> Siniro Quisocristo inaora nohanton, nosoroatëinquëma', ya'ipinquëma' catahuainquëma'. Nani ninshitëranquëma huachi.

*Paono*



## Paonori Timotio ninshitérinso'

### *Timotio yonquiaton, nanan a'patërinso'*

<sup>1</sup> Ca Paonoco ninshitaranquën, ni'quë'. ¿Noya, ya'huaran? Noya canta' ya'huarahuë. Yosë nohuanton, Quisocristo acorinco nanamën a'china'huaso marë'. Yosë chachin anoyacancantërinpoa'. Oshanënpoa' inquitatonpoa', nicha'ërinpoa'. Quisocristo imatëhua', ina ninarëhua'. A'na tahuëri inápaquë quëpantarinpoa'. <sup>2</sup> Timotionquën ninshitaranquën. A'chintëranquën ni'ton, Quisocristo natëton, ina imaran. Napoaton hui'nahuë pochachin ni'nanguën. Na'con nosororanquën. Tata Yosë inaora nohuanton, catahuainquën. Noya nosoroinguën. Nani tahuëri asanocancainquën. Quisocristonta' inapochachin catahuainquën. Inasáchin natërehua'.

### *Nonpin nanan a'china'piro'sa'*

<sup>3</sup> I'hua Masitoniaquë yapa'patëra, sha'huitëranquën. “Ipiquoë ya'huëtaquë' pënëntamaso marë'” itëranquën. Iporanta' inachachin sha'huitëranquën. Inaquëranchin ya'huaton, pënëntáquë'. A'naquën nisha nisha nanan a'chinapi. Inapita sha'huitëquë' ama ina pochin a'chi'inasohuë'. <sup>4</sup> Shimashonënpita iráca napopiso' yonquiápi. Inahuara yonquinëna quëraonta' nisha'huitopiso' yonquirápi. Ama huachi inapita yonquicaiso marëhuë' sha'huitëquë'. Ina pochin a'chinpachina', topinan quëran a'chinapi. Piyapi'sa' nisha nisha nonsapi. Co catahuapihuë' Yosë nohuitacaiso'. Yosëichin natëhuatëhua', catahuarinpoa' noya noya imacaso marë'.

<sup>5</sup> No'tën nanansáchin imapatëhua', catahuarinpoa' noya ninosorocaso'. Noyápiachin cancantohuatëhua', co nisha nisha yonquiarihuahuë'. Ina quëran cancanënpoa quëran huarë' natëarihua'. Ina pochin cancantohuatëhua', noya nosoroarihua'. Ina Yosëso' nohuantërin. <sup>6</sup> Nisha a'china'piro'saso nipirinhüë', co ina pochin yonquipihuë'. Yosë nohuantërinso' naniantatona', topinan quëran nonsapi. <sup>7</sup> “Quiyaso' maistrocoi. Ya'ipi pënëntërinso' nitotërai,” topirinhüë', co no'tëquën nitotopihuë'. Chiníquën nonpirinhüë', co nitotopihuë'.

<sup>8</sup> Moisësë pënëntërinso' noya niponahuë', ma'marë chachinsona pënëntërinso' nitotatëhua', no'tëquën sha'huitacaso' ya'huërin. <sup>9</sup> Noya nipisopita co pënënacaso' ya'huërinhuë'. A'napitaso nipirinhüë' pënënacaso' ya'huërin. Co Yosë natëtonahuë', co insonta' yanatëpihuë'. Co natantonhuë' niconpi. Pa'pi co noyahuë' nipi, os-hahuanpi. Yosënta' tēhuapi. Co ina chinotopihuë'. A'naquënso' pa'pina', a'shina' inapita co quë'yatonahuë', yatëpapi. A'naquëonta' tēpatopi. <sup>10</sup> Nisha nisha nicacaiso' yonquipi. Sa'ina', so'ina' inapita ya'huëtaponaraihuë', monshihuanpi. Quëmapi capini, sanapi capini nisë'huapi. Piyapi'sa chachin ihuatopi pa'anacaiso marë'. Nonpintopi. “Tëhuëinchachin no'tëquën nonahuë,” taponaraihuë', nonpinpi. Yosëso' noya nicacaso' a'chintopirinpoahuë', co nohuantopihuë' natëcaiso'. Ina pochin nipisopita tēhuëinchinso' pënënacaso' ya'huërin. <sup>11</sup> Yosë nanamënso' noya nóya. Ina quëran nicha'ërinpoa'. “Ma noyacha Yosëso paya,” itërehua'. Ina chachin acorinco nanamën sha'huica'huaso marë'.

### *Quisocristori catahuarinso'*

<sup>12</sup> Ina marë' Sinioro Quisocristo achinicananinco. “No'tëquën natëarinco,” ta'ton, acorinco a'china'huaso marë'. Napoaton: “Yosparinquën Sinioro,” itërahuë. <sup>13</sup> Iráca caso' nisha cancantërahuë. Quisocristo pinorahuë. Imarinsopita no'huito, aparisitërahuë. Quisocristoso nipirinhüë' nosororinco. Co nohuitatohuë', co natëyatërarahuë' ni'ton, nosororinco. <sup>14</sup> Sinioro chachin inaora nohuanton, nosoroatonco, na'con catahuarinco. Catahuahuachincora, “Quisocristoíchin anoyacancantarinco,” ta'to, ina natërahuë. Ina imato, nosororahuë canta'. <sup>15</sup> No'tëquën sha'huitëranquëma'. Ya'ipi piyapi'sa' natëina'.

Quisocristo isoro'paquë o'marin oshahuano'sa' anoyacancantacaso marë'. Caso' na'con na'con oshahuanpirahuë', anoyacancantërinco. <sup>16</sup> Yosë nosororinco. Hua'qui co noyahuë' nimirahuë', nosororinco. A'napitanta' natëcaiso marë' napotërinco. "Paono pa'pi co noyahuë' nimirahuë', hua'qui ahuantaton, Quisocristori nosororin. Nosoroarinco canta'," ta'tona', natëtapi. Natëtohuachina', Yosë nohuitatona', noya nanpiapi. A'na tahuërinta' inápaquë nanpimiatapi. <sup>17</sup> Napoaton Yosëichin natëahua'. Nani tahuëriya: "¡Ma noyacha Yosëso paya!" itahua'. Inaso' co onporonta' ta'huantaponhuë'. Co quënanpirëhuahuë', hua'anëntomiatërinpoa'. Inaíchin chinotacaso' ya'huërin. Ama onporonta' ina naniantahuasohuë'. Amen.

<sup>18</sup> Hui'nahuë pochin api, ni'nanquën. I'hua chachin ansiano'sa' Yosë nontatona', acorinënquën Yosë nanamën a'chinamaso marë'. Naporo' Yosëri anitotërinso' sha'huitatënën, pënëninënquën. "Yosë nohuanton, api, nanamën noya a'chinaran. Ina marë' acorinquën. Parisitaponahuë', catahuarinquën. Napoaton Quisoso a'chininso chachin a'chinquë'," itërinënquën. Iporanta' inachachin pënënanarquën. Quisoso nanamën chachin a'chinquë' sopai minsëcaso marë'. Tëhuëenchachin sopai yacanapirinpoahuë', Quisocristo catahuarinpoa' minsëcaso marë'. <sup>19</sup> Inasáchin natëton, pënëntëquë'. Quisocristo nohuantërinso'ráchin yonquiaton, noya niquë'. Noyápiachin cancantaton, piyapi'sa' a'chintëquë'. A'naquënso nimirahuë' cancanëna quëran noya nicacaiso' nitotopirinahuë', co yanatëpihuë'. Nani Yosë naniantatona', co huachi yonquipihuë'. Quisocristo a'poatona', co huachi imapihuë'. <sup>20</sup> A'naso' Iminio itopi. A'nanta' Aricantëro itopi. I'hua niyontonpatëira, inapita chiníquën pënënahuë. "Quisocristo nanan quëtërinco ni'ton, ama huachi Tata Yosë a'paiinquëmasohuë'. Satanase natërama' ni'ton, parisitamaso' ya'huërin," itërahuë. Ama huachi Yosë pinocaiso' marëhuë' chiníquën pënënahuë. "Oshaquëran co noyahuë' yonquipisopita naniantatona', Yosë pochin cantantapona' nimara," ta'to napotërahuë.

## 2

### *Yosë nontacaso' ya'huërinso'*

<sup>1</sup> Ya'ipi piyapi marë' Yosë nontacaso' ya'huërin. Niyontonpatama', na'con nontoco' Yosëri catahuain. "A'paniarinpoa' mini," ta'toma': "Yosparinquën Sinioro," itoco'. Ina'ton pënënanarquëma'. <sup>2</sup> Copirnoros'a marë' Yosë nontoco' noya hua'anëntacaiso marë'. Ya'ipi hua'ano'sa marë' Yosë nontoco' noya nicacaiso marë'. Noya hua'an nipachin, co aquëtë' piyapi'sa' nino'huipihuë'. Sano yonquiatëhua', noya ya'huarigua'. Ina quëran Yosë yonquiatëhua', noya nisarihua'. <sup>3</sup> Ina pochin Yosë nontacaso' nóya. Inaso' nicha'ërinpoa'. Nontohuatëhua', noya nataninpoa'. <sup>4</sup> Ya'ipi piyapi'sa' nicha'ëcaso' nohuantërin. Nanamën no'tëquën nitochina'. <sup>5</sup> Yosëichin chinotacaso' ya'huërin. Oshahuanëhua' ni'ton, inimicotopirëhuahuë', Quisocristo nanan anoyatërinpoa'. Inasáchin Yosë anohuitërinpoa'. Inaso' Yosë niponahuë', piyapi chachin nasitimarín. <sup>6</sup> Quisocristo inaora nohuanton, nicha'ëinpoaso marë' chiminín. Chiminaton, oshanënpoa' inquitërinpoa'. Tahuëri nanihuachina', Yosë yanicha'ërinpoaso' anitotërinpoa'. <sup>7</sup> Ina nanan sha'huica'huaso marë' Yosë acorinco. A'parinco nisha piyapi'sa' a'chinta'huaso marë'. "Yosë no'tëquën nontërinpoa'. Ina natëco'," itërahuë. Tëhuëenchachin no'tëquën nonahuë, co nonpinahuë'.

<sup>8</sup> Napoaton nani parti niyontonpachina', quëmapi'sa' Yosë nonchina', tënahuë. Ama no'huichinasohuë'. Ama nisha nisha ninonchinasohuë'. Noyápiachin cancantatona', Yosë nonchina'. <sup>9</sup> Sanapi'santa' noya niina'. A'naquën sanapi'sa' nitapacaisoráchin yonquipi. Na'con na'con yanco nitonpomototopi, notohuaro' miyo pë'pëpi, nisha nisha a'sontanpapi. Pa'ton nininsopita a'mocaiso' pa'yatopi. Ainën tapacaisoráchin yonquipi. Yosë imarinsopitaso nimirahuë', ama inasáchin yonquiatonahuë', sano yonqui'ina'. Ama piyapi'sari pa'yatacaiso marëáchin nitapainasohuë'. <sup>10</sup> A'mopiso' ama na'con

na'con yonqui'inasohuë'. Noya nicacaiso' na'con na'con yonqui'ina'. Yosë imapi ni'ton, inaíchín chinochina'. <sup>11</sup> Yosë nanamën a'chinpachina', sanapi'sa' ta'tatona', noya nataina'. Natanahuatona', noya natëina'. <sup>12</sup> Niyontonpatama', quëmapi'sa' pënëchina'. Sanapi'saso nipirihuë', co pënëntacaso' ya'huërinhuë'. Ama quëmapi'sa' camaiinasohuë', ténahuë caso'. Ta'tatona' nataina'. <sup>13</sup> Atan'ton Yosëri ninin. Ina quëran Ipa ninin Atan catahuacaso marë'. <sup>14</sup> Naporahuaton, sanapi'ton co noyahuë' ninin. Sopairi nonpintohuachina, ina natëton oshahuanin. Co Atan nonpintërinhuë'. <sup>15</sup> Sanapi'saso nipirihuë' hua'huinpita noya aso'sohuachina', Yosëri noya ni'sarin. "Yosë catahuar-inco," ta'tona', imamiachina'. Piyapi'sa' noya nosoro'ina'. Noyasáchin ni'ina'. Sano yonqui'ina'. Inapohuachina', nicha'ësarín.

### 3

#### *Ansiano'sa' acocaso' ya'huërinso'*

<sup>1</sup> No'tëquën sha'huitaranquën. Ansiano yaya'conpachina', noya yonquiapi. Ansiano'sa' tēhuëinchachin catahuarinënpoa'. <sup>2</sup> Napoaton yaya'conpachina', nōya nipisopitaráchin ya'coina'. Ama piyapi'sari pinocaiso marëhuë' noyasáchin niina'. A'na sa'ináchin ya'huëchina'. Co monshihuanacaiso' ya'huërinhuë'. Sano yonqui'ina'. Ama nisha nisha yonqui'inasohuë'. Ya'ipi cancanëna quëran imaina'. Ni'toro'sa' huë'pachina', noya nonchina', o'shichina'. A'chinacaiso' noya nitochina'. <sup>3</sup> Ama no'piinasohuë'. Ama yaahuëchinasohuë'. Sano yonqui'ina'. Ama yano'huichinasohuë'. Ama coriquiráchin cancanchinasohuë'. <sup>4</sup> Ya'ipi pëinënquë ya'huëpisopita noya a'paiatona', a'chinchina'. Hui'ninpita noya pënëina' no'tëquën natëcaiso marë'. Sanoanan quëran pënënpachina', noya natërapí. Pa'pina' noya ni'sapi. <sup>5</sup> Co hui'ninpita tëranta' pënënpachinhuë', a'napitarinta co yanatëponhuë'. Napoaton co nanitërinhuë Yosë imapisopita noya catahuacaso'. <sup>6</sup> Hua'qui imapisopitaráchin ansiano ya'coina'. Nasha imarinsos' ya'conpachin, co noyahuë' yonquiámara: "Caso' ansianoco ni'ton, noya noyaco," tapon nimara yonquinënquë. Iráca sopai hua'an ina pochin yonquihuachina, Yosëri ana'intërin. Ni'cona inapochachin ana'intochinquëma'. <sup>7</sup> Noya nininsoráchin ya'coina'. Noya nipachina', co imapisopitarihuënta' noya ni'sapi: "Inaso' noya quëmapí," tosapi. Co noyahuë' nicaponahuë', ya'conpachin, sopai hua'ani nonpintaton, minsëarin. Piyapi'sarinta' tēhuapi.

#### *Tiacono'sa' acocaso' ya'huërinso'*

<sup>8</sup> Ansiano'sa' catahuarinsopitaso' tiacono'sa' topi. Inapitanta' natëtono'sa' niina'. No'tëquënáchin noina'. Ama nisha nisha noinasohuë'. Ama no'piinasohuë'. Ama nonpinatona', coriqui canainasohuë'. <sup>9</sup> Yosë anitotërinpoaso' nōya nitochina'. Nitotatona', cancanëna quëran huarë' natëina'. Inapohuachina', noyápiachin cancantapi. <sup>10</sup> Ama a'naroáchin aya'concosohuë'. Pi'pian tēnitoma', ni'co'. Noya nipachina', ya'coina'. <sup>11</sup> Tiaconaro'santa' natëtono'sa' niina'. Ama ma'tona ma'tona noinasohuë'. Ama pinochinasohuë'. Ama no'piinasohuë'. Noyasáchin niina'. <sup>12</sup> Tiacono'saso', a'naíchín sa'ina' ya'huëchina'. Hui'ninpita noya pënëina' no'tëquën natëcaiso marë'. Ya'ipi pëinënquë ya'huëpisopita noya a'paitona', a'chinchina'. Ina pochin cancantërinso'pitarachin ya'coina'. <sup>13</sup> Tiacono'sa' noya nipachina', imapisopitari noya ni'sapi. Noya Yosë marë' sacatohuachina', chini chiniquën cancantapi. Quisocristo noya natëtona', nanamën a'chinapi.

#### *Yosë huëntonënquë ya'conpisopita*

<sup>14-15</sup> Na'con yonquiatënquën api, nicaponquën yapa'sarahuë. "Co hua'quiya quëranhuë' pa'sarahuë topirahuë'. Hua'qui quëran a'na' pa'samarahuë," ta'to, iso quirica ninshitaranquën pënëna'huanquënso marë'. Yosë huëntonënquë ya'conpatëhua', onpopinsona nicacaso' sha'huitaranquën. Yosëso' nanpiárin. Canpoarë chachin ya'huërarín. Nanamën no'tëquën anitotërinpoa'. Imarëhuasopita niyontonpatëhua',

no'tëquën a'chinarihua'. <sup>16</sup> Iráca co Yosë nohuitopirëhuahuë', iporaso' Quisocristo anohuitërinpoa': "Ma noyacha inaso paya," tënëhua'.  
 Yosë hui'nin isoro'paquë o'maton, piyapi chachin nasitimarin.  
 Ispirito Santo chachin anitotërinpoa' Yosë hui'nin nininso'.  
 Nanpiantahuachina, anquëniro'sarinta' quënanpi.  
 Imapisopitari ya'ipi parti paatona', nanamën sha'hui'ra'piapi.  
 Na'a piyapi'sa' natëpi.  
 Iporaso' Yosë'pa' noya ya'huërin. Inatohua' Yosëri quëpantarin.

## 4

### *Yosë nanamën a'porapiso'*

<sup>1</sup> Tëhuëenchachin Ispirito Santo ninoton, a'ninquëchin sha'huitërinpoa': "A'na tahuëri a'naquën piyapi'sa' Yosë nanamën a'porapi. Sopai natëtona', nonpin nanan a'chinpachina', imasapi. Ayaro' tahuëri ya'caritohuachin, naporapi," tënin. <sup>2</sup> Naporo' nonpina'piro'sa' ya'huapona' piyapi'sa' nonpintacaiso marë'. "Quiyanta' Yosë imarai," topirinahuë', co no'tëquën nonsapihuë'. Nitotaponaraihuë', co cancanhuanhuë' pochin nicatona', co natëtochináchinhuë' cancantapi. Hua'qui' sopai natëtona', co huachi nanitapihuë' Yosë natëcaiso'. Inapitaso' nisha a'chinapi. <sup>3</sup> "Ama sanapi macosohuë'. Nisha nisha cosharo' a'poco huachi," tosapi. Napopirinahuë', Yosë ya'ipi cosharo' ninin capacaso marë'. Nanamën nitotatëhua', Yosë natëhuatëhua', co a'poarihuahuë'. "Yosparinquën, Sinioro," itatëhua', caparihua'. <sup>4</sup> Ya'ipi ma'sha Yosëri ninin. Napoaton nóya. Co manta' a'pocaso' ya'huërinhuë'. "Yosparinquën, Sinioro," itatëhua', ya'ipiya noya caparihua'. <sup>5</sup> Yosë quiricanën yonquiatëhua', Yosë nontohuatëhua', noya capacaso', tënin Yosë.

### *Quisocristo marë' noya sacatacaso' ya'huërin*

<sup>6</sup> Nani pënënanquën. Ina nanan a'chinpatan, noya nisaran. Quisocristo noya ni'sarinquën. Cosharo' achinirirposo pochin Yosë nanamën natëhuatan, achinicananarinquën. No'tëquën a'chintërainquën ni'ton, noya imasaran.

<sup>7</sup> Nonpin nanano'saso nipirinhuë' tananpitëquë'. Inahuara yonquinëna quëran naporapi ni'ton, tananpitëquë'. Inapitaso' topinan quëran a'chinapi. Quëmaso nipirinhuë' nani tahuëri yonquiquë' Yosë noya imacaso marë'. <sup>8</sup> Nani tahuëriya sacatohuatëhuara, chinipirëhuahuë', noya noya Yosë imacaso' yonquihuatëhua', achinicananinpoa'. Achinicananpachinpoa', noya noya nisarëhua', tënëhua'. Noya noya imapatëhua', isoro'paquë noya nanpiarëhua'. A'na tahuërinta' Yosë'pa' nanpimiatarihua'. <sup>9</sup> Caso' no'tëquën pënëntërahuë, ya'ipi piyapi'sa' natëina'. <sup>10</sup> Ina marë' paatëhua', Yosë nanamën sha'huirarëhua'. Parisitarihuarahuë', a'chinarëhua'. Yosëíchin ninarëhua'. Inaso' nanpiarin ni'ton, ya'ipi piyapi nicha'ëcaso' nohuantërin. Natëhuatëhua', anoyacancantatonpoa', nicha'ësarinpaoa'.

<sup>11</sup> Nani a'chintëranquën ni'ton, inachachin api a'chinquë'. A'chinton, pënëntëquë' natëina'. <sup>12</sup> Co mashonquënhuë' niponahuë', noya pënëntëquë' mashoro'santa' natëinënquën. Ya'ipi piyapi'sa' noya nontëquë'. Nosoroaton, catahuaguë'. Cancanën quëran huarë' Yosë natëquë'. Sano yonquiaton, noyápiachin cancantëquë'. Noyasáchin niquë' imapisopita nonainënquënso marë'. <sup>13</sup> Niyontonpachina', Yosë quiricanën nontëquë'. Ina nontaton, pënëntëquë'. Quisocristo nanamën a'chintëquë'. Ca cancona'huarë' inapoquë'. <sup>14</sup> Iráca ansiano'sa' niyontonahuatona', acorinënquën Yosë nanamën a'chinamaso marë'. Së'huamotorahuatënenquën, nanan quëtërinënquën a'chinamaso marë'. Ina quëran Yosë catahuarinquën nóya a'chinamaso'. Ama ina naniantaton, topinan ya'huëquësohuë'.

<sup>15</sup> Yosë nanamën na'con yonquiaton, a'chináquë'. Ya'ipi cancanën quëran huarë' imaquë'. Ina quëran pënënpatan, a'napita noya ni'sarinënquën. "Ma noya Yosëri

catahuarin ni'ton, noya noya pënëntërin,” tosapi. <sup>16</sup> Nani tahuëri yonquiquë' nóya imacamaso marë'. Naporahuaton, no'tëquën a'chinquë'. Inapohuatan, Yosë catahuarinquën imamiataton cha'ëcaso marë'. A'napitanta' natanpachinquën, cha'ësapi.

## 5

### *A'naya a'naya pënënacaso ya'huërinso'*

<sup>1</sup> Mashoro'sa' co noyahuë' nipachina', ama no'huiquësohuë'. Tata pochin nicaton, sanoanan quëran pënënuquë'. Napopináchin pi'ipitëramaso', iyaparin pochin ni'quë'. Inapitanta' nosoroaton, sanoanan quëran pënënuquë'. <sup>2</sup> Sanapi'santa' pënënacaso' ya'huërin. Payaro'sa' nipachin, mama pochin nicaton, sanoanan quëran pënënuquë' noya cancanchina'. Imoyaro'santa' napopináchin pi'ipitëramaso' oshiparin miáchin pochin ni'quë'. Ama inapita pi'pian tëranta' narintëquësohuë'. Noyasáchin yonquiaton, nontëquë'.

### *Quëyoro'na' napopiso'*

<sup>3</sup> Isonta' api, imapisopita sha'huitëquë' nitochina'. “Quëyoro'na' noyá sa'ahuamia nipachina', nosoroatoma' catahuaco,” itëquë'. <sup>4</sup> Nipirinhuë', hua'huinpita ya'huëttohuachin, inapita pënënuquë' a'shina catahuaina'. Aminpitarinta' catahuaina'. Aso'sorin ni'ton, inahuarinta' i'huërëntanta'ina'. Nosoroatona', nocomanta'ina'. Ina Yosë na'con nohuantërin. <sup>5</sup> A'naquën quëyoro'na'saso nipirinhuë', co hua'huinpita ya'huëtërinhuë'. Yosëichin yonquiarin. “Ina catahuarinco,” ta'ton, nani tahuëri Yosë nontarin. Tashirë chachin nontarin. Inapitaso' catahuahua'. <sup>6</sup> A'naquën quëyoro'na'saso nipirinhuë', nipa'yatacasoáchin yonquipi. Nanpiaponahuë', chimipi pochin cancantopi. Co huachi Yosë yonquipihuë' ni'ton, co inapita catahuacaso' ya'huërinhuë'. <sup>7</sup> Nani api sha'huitëranquën. Ya'ipi imapisopita pënënuquë' natëina'. Ama a'napitari pinocaiso marëhuë' noya niina'. <sup>8</sup> Quëmopinëna' tēhuënchachin nosorocaso' ya'huërin. Pahuantohuachina', catahuaina'. A'shina', pa'pina', hui'ninpita, inapita na'con na'con nosorocaso' ya'huërin. Catahuaina', nocomanta'ina'. Insoarisona co nocomahuachinahuë', co huachi Yosë natëapihuë'. Co quëmopinëna' nosorohuachinarahuë', na'con na'con oshahuanapi.

<sup>9</sup> A'naya a'naya niyontonpiquë quëyoro'na'sa' nininënpita ninshichina' catahuacaiso marë'. Payaro'saráchin acoina', saota shonca pi'ipitërinso'. A'naíchin so'yatërinso'. <sup>10</sup> Noya nininsoráchin aco'ina'. Iso pochin nipisopita: Hua'huinpita noya aso'sorinso'. Ni'toro'sa' huë'pachinara, o'shitërinso'. Co manta' apirarinsohuë'. Piyapinën pochin cancantaton, imapisopita catahuarinso'. Parisitopisopita nosororinso'. Noyasáchin nininso'. Ina pochin nipisopita aco'ina'.

<sup>11-12</sup> Nanon quëyoro'na'saso nipirinhuë', ama acoinasohuë'. “Quisocriso marëáchin sacatarahuë, co so'yantapohuë,” taponahuë', oshaquëran ina naniantaton, naquëranchin so'yaantacaso' yonquiantapon nimara. So'yaantacaso' noya nipirinhuë', ma'sona Quisocriso sha'huitërinso' co naniantacaso' ya'huërinhuë'. Naniantohuachin, ina marë' oshahuanarin ni'ton, ama inapitaso' acoinasohuë'. <sup>13</sup> A'naquëonta' topinan ni'tapona' pa'sápatona', chiropi. Naporahuaton, ma'tona ma'tona nonsapi, pinotapi, co napocasohuë' nipirinhuë'. <sup>14</sup> Napoaton nano'sa' so'inari ayananpihuachina', so'yanta'ina', tēnahuë. So'yantatona', hua'huaanta'ina'. So'ina', hua'huinpita, inapita nocomahuachina', noya nisapi. Napohuachina', co a'napitari pinosapihuë'. <sup>15</sup> Ni'quë' api. A'naquën quëyoro'na'sa' nani nisha cancantopi. Quisocriso a'porahuatona', sopai natëpi.

<sup>16</sup> Quisocriso imapatëhua', noya niahua'. Quëyoron quëmopinënpoa' ya'huëhuachin, canpoari chachin catahuahua' noya nanpicaso marë'. Ina quëran a'napita imapisopitarinta' sa'ahuamiaro'sarachin catahuaina'.



*Ansiano'sa' nininso'*

<sup>17</sup> A'naquën ansiano'sa' noya noya Yosë marë' sacatopi. Paatona', nani tahuëri a'chinápi, pënëntápi. Inapita noya noya ni'co'. <sup>18</sup> Yosë quiricanën quëran sha'huitërinpoa'. “Toro asacatohuatama', a'caco'. Trico i'nataton to'norayahuachin, ama tonpoanantocohuë'. Tananpitoco' pi'pian pi'pian coshachin,” ténin. “Piyapi asacatohuatama', pahuërëco',” ténin anta'. Napoaton ansiano'sa' Yosë marë' sacatopi ni'ton, catahuaco'. Ma'sha quëtoco' ama pahuanchinasohuë'.

<sup>19</sup> Nanan natantohuatan, ama a'naroáchin natëquësohuë'. A'na piyapiriachin ansiano sha'huirapihuachin, co natëcaso' ya'huërinhuë'. Catoya'pihuë nipon, caraya'pihuë nipon, inachachin sha'huirapihuachina', naporo huarë' natëtëquë'.

*Nisha nisha pënëntërinso'*

<sup>20</sup> Ansiano tëhuënhachin co noyahuë' nipachina, pënëncaso' ya'huërin. Ya'ipi imapiso-pita ayontonahuaton, chiníquën pënëncuë'. A'napitanta' të'huatatona', noya nicacaiso marë' pënëncuë'.

<sup>21</sup> Tata Yosë Quisocristorë chachin ni'sarinpoa'. Anquëniro'sa' acorinsopitanta' ni'sarinënpoa'. Napoaton api, ya'ipiya no'tëquën pënëncuë'. Ama a'naroáchin ana'intëquësohuë'. Noya natantëquë' no'tëquën nitotacaso marë'. Ina quëran no'tëquën yonquiaton, pënëncuë'. Inso tëranta' co noyahuë' nipachina, pënëncaso' ya'huërin.

<sup>22</sup> Ansiano yaacohuatan, noya yonquiaton, oshaquëran acoquë'. A'naroáchin acohuatan, co noyahuë' nipachina, quëmanta' na'ianan. Noyasáchin niquë'.

<sup>23</sup> Apira apira yacanioran ni'ton, ama api i'sharáchin o'oquësohuë'. Pi'pian huinonta' o'oquë', aquëtë' caniotan.

<sup>24</sup> A'naquën co noyahuë' nipachina, ya'ipi piyapi'sari nitotopi. “Inaso' oshahuanin. Ina marë' Yosëri ana'intarin,” topi. A'naquënso nipirinhue' oshahuanaponahuë', co a'naroáchin nitotërëhuahuë'. Nipirinhue', co cancanën quëran imarinhue' ni'ton, oshaquëran nitotarihua'. <sup>25</sup> Inapochachin a'naquën noya nipachina, ya'ipi piyap'sa' nitotopi. A'naquënso' nóya niponahuë', co a'naroáchin nitotërëhuahuë'. Oshaquëranchi inanta' nitotarihua'.

**6**

<sup>1</sup> Patron marë' sacatopisopita, pënëncuë' patronëna' noya nicatona' natëina'. Co natëhuachinahuë', no'huitatona', Yosë pinopona' nimara. “Yosë nanamënso' napoonin ni'ton, ina imatona' co yanatërinacohuë',” tapona' nimara. Co ina Yosë nohuantërinhuë'. <sup>2</sup> “Patronënantá' Quisocriso imapachin, ama ina marë' chiroidasohuë'. Iyaparin pochin nicatona', noya noya sacachina'. Imarinso' catahuarapi ni'ton, nóya sacachina'. Inanta' Yosëri nosororin ni'ton, noya catahuaina',” itëquë'. Ya'ipi carinquën pënëncuë'no', a'chinquë'. Onpopionta' pënëncuë' natëina'.

*Nonpin nanan a'china'piro'sa'*

<sup>3</sup> Quisocriso no'tëquën a'chintërinpoa'. Natëhuatëhua', noya noya cancantarihua'. A'naquënso nipirinhue' Siniro nanamën co natëtonahuë', nisha a'chinpi. Nonpin nanano'sa' a'chinapi. <sup>4</sup> “Ya'ipiya nitotërai,” topirinhue', co yonquipihuë'. Topinan quëran nonsápi. Nisha nisha nanano'sa' yonquiatona', nonconpi. Pa'yatopi piyapi'sa' ano'huitacaiso'. Inapita natanpachinara, niapiratopi, nino'huipi, nipinopi. “Nonpintërinco nimara,” ta'tona', co huachi natërapihuë'. <sup>5</sup> Nitapicancantatona', co niquë'yapihuë'. Iráca Yosë nanamën nitotopirinhue', ina naniantatona', co huachi no'tëquën yonquipihuë'. Ma'sha canacaiso marë' Yosë yaimaconpi. Co ina marë' imacasohuë' nipirinhue', napopi. Ama inapitaso' natanquësohuë'.

*Canamiatërëhuaso'*

<sup>6</sup> No'tëquën Yosë imapatëhua', tëhuënhachin canamiatarihua'. Co na'a ma'sha ya'huëtopirinpoahuë', sano cancantohtatëhua', nóya ya'huarigua huachi.

<sup>7</sup> Nasitohuatēhua', co manta' ya'huētērinpoahuē'. Naporahuaton, chiminpatēhuanta', ya'ipi ma'shanēnpoa' patarihua'. <sup>8</sup> Napoaton capacaso', a'mocaso' inapita ya'huētohuachinpoa', sano cancantahua'. <sup>9</sup> A'naquēnso nipirihuē' coriqui canacasoáchin yonquipi. Inasáchin cancantatona', sopai natēpi. Nani ma'sha nohuantatona' huēnsonquē ma'sha manēso pochin nisapi. Inasáchin yonquiatona', aquē aquētē' nohuantapona'. Ina marē' Yosēri chiníquēn ana'intarin. <sup>10</sup> Coriquiráchin pa'yatohuatēra, nisha nisha yonquirē'. Co noyahuē' ninē'. Nonpinē', ihuatērē', no'huitērē', ina pochin yonquirē'. A'naquēn coriquiráchin yonquiatona', Yosē a'popi. Ina quēran cancanēna quēran co huachi noya cancantopihuē'. Sētatona', chiníquēn parisitapi.

### *Imamiatacaso' ya'huērin*

<sup>11</sup> Quēmaso nipirihuē' api Yosē imaran ni'ton, ama coriquiráchin yonquiquēsohuē'. Noya nicacasoáchin yonquiquē'. Cancanēn quēran huarē' Yosē chinotēquē'. “Inaso' nosoroatonco, catahuarinco,” ta'ton, noya natēquē'. Naporahuaton, ya'ipi piyapi nosoroquē'. Ma'sha onpoaponahuē', chiníquēn cancantēquē'. Sano piyapi niquē'. <sup>12</sup> Iráca imapisopita niyontonpachinara, chiníquēn cancantaton, “Caso' Quisocriso imarahuē,” itēran. Napoaton “Yosē catahuarinco,” ta'ton, sopai minsēquē'. Yosē nani huēntonēnquē aya'coninquēn ni'ton, imamiatēquē'. Ina quēran a'na tahuēri inápaquē nanpimiataran. <sup>13</sup> Yosē chachin ananpirinpoa'. Inaso' ni'sarinpoa'. Quisocrisonta' ni'sarinpoa'. Iráca inanta' chiníquēn cancantaton, Ponsio Pirato no'tēn nanan sha'huitērin. <sup>14</sup> Ina yonquiaton, Quisocriso noninso chachin natēquē'. Ama a'napita pinocaiso marēhuē' no'tēquēn a'chinquē'. Sinioro Quisocriso o'mantaquē huarē' noya natēquē'. <sup>15</sup> Tahuēri nanihuachin, Yosē nohuanton, o'mantararin. Yosēichin hua'anētērinpoa'. Ya'ipi hua'ano'sa' ina natēina'. Copirnorosarinta' natēina'. “Ma noyacha Yosēso paya,” ichina'. <sup>16</sup> Inasáchin co ta'huantarinhue'. Nanpirápon inaso'. Noya noya ni'ton, huēnaráchin pochin ya'norin. Co ya'carichinachinhue'. Iráca quēran huarē' co insonta' Yosē quēnaninhue'. Ipora huanta' co quēnanarihuarahuē', ya'ipi piyapi'sari chinochina'. Ya'ipiya nanitapararin. Amen.

<sup>17</sup> A'naquēn na'con coriqui ya'huētērin. Inapitanta' api pēnēnquē': “Ama a'napita nocancosohuē'. Ama coriquinēmáchin pa'yatocosohuē'. Inaso' co ya'huēmiataponhuē'. Yosē na'con na'con pa'yatoco'. Inaso' co apiratērinpoahuē'. Nani ma'sha quētērinpoa' nóya cancantatēhua, ya'huēcaso marē'. <sup>18</sup> Na'a coriqui ya'huētohuachinquēma', a'napita nosoroatoma', catahuaco'. Ma'sha pahuantohuachina, quētoco'. Ama manta' apira-cosohuē'. Noya nico'. <sup>19</sup> Inapohuatama', Yosē'pa' canamiatarama'. Inaquē noya noya nanpimiatarama,” itēquē'.

### *Tiquinamēn pochin pēnēninso'*

<sup>20</sup> No'tēquēn api Quisocriso nanamēn a'chintēranquēn. Ama naniantatonhuē', noya imaquē'. Nonpin nanano'saso nipirihuē' ama natanquēsohuē'. Nisha nisha nonpi. “Ya'ipiya no'tēquēn nitotērai,” topirinhue', co no'tēquēn nitotopihuē'. <sup>21</sup> A'naquēn nisha nanan imatona', Yosē a'popi. Ama inapita natēquēsohuē'.

Inaora nohuanton, Yosē noya catahuainquēn. Nani ninshitēranquēn huachi.

*Paono*

## Paonori Timotio ninshitaantarinsó'

### *Timotio yonquiaton, nanan a'patërinso'*

<sup>1</sup> Ca Paonoco ninshitaranquën. ¿Noya quëmanta' ya'huaran? Noya canta' isëquë ya'huarahüë. Yosë nohuanton, Quisocriso acorinco nanamën a'china'huaso marë'. Quisocriso imapatëhua', Yosë nohuitatëhua', nanpimiatarihua'. <sup>2</sup> Timotionquën ninshitaranquën. Nosoroatënquën, hui'nahuë pochin ni'nanquën. Tata Yosë inaora nohuanton, catahuainquën. Noya nosoro'inquën. Nani tahuëri asanocancainquën. Quisocrisonta' inachachin catahuainquën. Inaso' hua'anënpoa' ni'ton, inasáchin natërëhua'.

### *Timotio noya imarinsó'*

<sup>3</sup> Iráca shimashonëhuëpita Yosë chinotopi. Inapochachin canta' chinotërahuë. Yosë nanamën no'tëquën natëto, chinotërahuë. Ina marë' noyápiachin cancantërahuë. Nani tahuëri tashirë chachin Yosë nontato, quëma yonquiranquën. Noya imaranso marë': "Yosparinquën Sinioro," itërahuë. <sup>4</sup> Iráca yapatohuatënquëna, sëtatón na'nëran. Ina yonquiato, na'con yani'nanquën. Onpopionta' nicato noya cancanchi, tënahüë. <sup>5</sup> Cancanën quëran huarë' Quisocriso natëran. Mamapaya'ton natërin. Noita inaso'. Ina quëran mama Ionisanta' natëton, a'chintërinquën. Ipora quëmanta' imaran, tënahüë. Ina yonquiarahuë.

<sup>6</sup> Iráca së'huamotorahuatënquën, acoranquën pënëntamaso marë'. Naporo' Yosë chachin ananitërinquën ni'ton, nóya pënëntëran. Imapisopita noya a'chintëran. Iporanta' api, ina yonquiaton chiníquën cancantëquë'. Ni'quë'. Pënsha yatacopihuachina, pishitohuatëra noya orotaantarín. Inapochachin chiníquën cancantaton, pënëntaantaquë', tënahüë. Napoaton ninshitaranquën achinicancana'huanquënso marë'. <sup>7</sup> Yosë co nohuantërinhuë' të'huacaso'. Ispirito Santo chachin achinicancaninpoa' sopai minsëcaso marë'. Inasáchin ananitërinpoa' piyapi'sa' nosorocaso'. Catahuarinpoa' cancänënpoa quëran no'tëquën yonquicaso'. <sup>8</sup> Ama tapanatonhuë', Sinioro nanamën a'chináquë'. Ina a'chinahuëso marë' tashinan pëiquë po'morinaco. Ama ina marënta' tapanquësöhuë'. Quëmanta' a'chinanso marë' aparisitohuachinënquën, chiníquën cancantëquë'. Napohuatan, Yosë catahuarinquën noya ahuantamaso'. <sup>9</sup> Yosë chachin anoyacancantërinpoa'. Oshanënpoa' inquitatonpoa', acorinpoa' nóya nicacaso marë'. Inaora nohuanton, nosororinpoa'. Co noyahuë' nipurëhuahuë', nosoroatonpoa', catahuarinpoa'. Co'huara isoro'pa' acoyátërasöhuë', ninotonpoa', nosororinpoa'. Naporo' chinotërin Quisocriso a'paimacaso'. Ina imapatëhua', anoyacancantërinpoa'. <sup>10</sup> Nosororinpoaso' nani anitotërinpoa'. Quisocriso o'marin ni'ton, nitotërehua'. Quisocriso chachin nicha'ërinpoa'. Nanpiantarahuatón, chimirin minsërin. Nanamën natëhuatëhua', Yosë nohuitatëhua', nanpimiatarëhua'. Chiminarihuarahüë', nanpiantarihua'. Nanamën quëran anitotërinpoa'.

<sup>11</sup> Yosë acorinco nanamën sha'huica'huaso marë'. Pënënta'huaso marë' a'parinco. Ina nohuanton, nisha piyapi'sa' a'chintarahüë. <sup>12</sup> Ina marë' aparisitopirinacöhuë', co tapanato yaa'porahuë'. Quisocriso imamiatarahuë. Ina nohuitato, inasáchin natërahuë. Ya'ipi nanitaparín. Nani sha'huitërinco nanamën a'china'huaso' ni'ton, noya a'paiarinco. O'mantaquë huarë' nanamën ya'huëmiatarín, tënahüë.

<sup>13</sup> No'tëquën api a'chintëranquën. Inachachin quëmanta' a'chinquë'. "Quisocrisoíchin anoyacancantërinpoa'," ta'ton inasáchin natëquë'. Ina nosoroaton, a'napitanta' nosoroquë'. <sup>14</sup> Yosë nohuanton, nanamën no'tëquën nitotëran. Ama manta' nisha a'chinquësöhuë'. Ispirito Santo catahuarinquën no'tëquën yonquicamaso'. Nani ya'coancantërinpoa' catahuainpoaso marë'.

<sup>15</sup> Tashinan pëiquë po'mohuachinaco, ya'ipi Asiaquë imapisopita patërinaco. Huiquiro, Imoquinisi, inapita quëran huarë' napotërinaco. Nani nitotëran, tënahuë. <sup>16-17</sup> Onisiporoso nipirihuë', co naniantërincohuë'. Nomaquë huë'sahuaton, yonisápatonco, quënaninco. Co tapanatonhuë', tashinan pëiquë ni'quirinco. Na'aro' achinicancaninco. Ina marë' ya'ipi pëinënquë ya'huërsopita Siniorori na'con catahuain, tënahuë. <sup>18</sup> Ipiquoënta' na'con catahuarincoso' nani nitotëran. Ina marë' Yosë nontërahuë. "Na'con nosororinco ni'ton, Sinioro o'mantahuachin, inanta' nosoroquë'," itërahuë, Yosë nontato.

## 2

### *Sontaro pochin nininso'*

<sup>1</sup> Quëmanta' api: "Quisocristo catahuarincó," ta'ton chiníquën cancantëquë'. Ina imapatëhua', inaora nohuanton catahuarinpó' chiníquën cancantacaso'. Hui'nahuë pochin nicatënquën, pënënarinquën. <sup>2</sup> Piyapi'sa' niyontonpachinara, Yosë nanamën a'chintërahuë. Quëmanta' natanan. Inapochachin quëmanta' caraíchín quëmapi'sa' huayonahuaton, ina nanan chachin a'chintantaquë'. Noya natërsopita a'chintëquë'. Inahuanta a'napita a'chintacaiso marë' inapotëquë'.

<sup>3</sup> Noya sontaro pochin niquë'. Inaso' parisitohuachina, ahuantërin. Inapochachin quëmanta' Quisocristo marë' parisitohuatan, ahuantëquë'. <sup>4</sup> Sontaro ya'conpatëra, co huachi a'na sacato yonquirëhuë'. Capitanáchin natërë'. Ina nohuantërinsoáchin ninë'. Inapochachin canpoanta' Quisocristoachin natëcaso' ya'huërin. <sup>5</sup> Isonta' yonquiquë'. Canatacaso marë' ya'nipihuatëra, ya'nipi hua'an sha'huitërinpo' ma'sona noya nicacaso'. Co natëhuatërahuë', co canatërëhuë'. Inapochachin canpoanta' Quisocristo noninso' natëahua'. <sup>6</sup> Iminquë chiníquën sacatërinso pochin Yosë marë' chiníquën sacatacaso' ya'huërin. Sha'tona'pi noya sacatohuachina, cosharo' ya'huëtërin. Cayahuachina, inari'ton manin. <sup>7</sup> A'chintaranquënso' api yonquiráquë'. Quisocristo catahuarinquën noya noya yonquicamaso marë'.

<sup>8</sup> Quisocristo na'con yonquiquë'. Isoro'paquë o'maton, piyapi chachin nasitimarin. Tapi shiin inaso'. Chiminaponahuë', nanpiantarin. Ina nanan chachin a'chinárahue'. Ina imapatëhua', nicha'ësarinpó'. <sup>9</sup> Ina a'chinahuëso marë' parisitërahuë. No'huitonaco, tashinan pëiquë po'morinaco. Apina'pi pochin nicatonaco, catinatërinaco. Inapotopirinacohuë', Yosë nanamënso' co nanitopihuë' inapotacaiso'. Nisha nisha parti a'chinapi ni'ton, nahuinin. <sup>10</sup> "Yosë nohuanton, huayoninsopita oshaquëran imasapi," ta'to, ya'ipiya ahuantërahuë. Quisocristo imapachina', nicha'ësarín. Oshanëna' inquitahuaton, anoyacancantarín ni'ton, a'na tahuëri Yosë'pa' nanpiantarapi. Inatohua' noya noya ya'huëcontapi. Co onporonta' pipiapihuë'.

<sup>11</sup> No'tëquën itëranquën.

Yatëpapirinënpoahuënta', imamiatohuatëhua', inarë'quënpoa' nanpimiatarihua'.

<sup>12</sup> Parisitapirëhuahuë', noya ahuantohuatëhua', a'na tahuëri inarë'quënpoa' hua'anëntarihua'

Nipirihuë', ina a'pohuatëhua', inanta' a'poarinpoa'.

<sup>13</sup> Co no'tëquënáchin imapirëhuahuë', inaso' no'tëquën nontërinpoa' ni'ton, noya a'pairinpoa'.

Nani sha'huitërinpoa' ni'ton, co nanitërinhuë' nonpintinpoaso'. Co onporonta' nisha cancantarínhuë'.

### *Yosë marë' sacatërëhuaso'*

<sup>14</sup> Ina nanan chachin api ya'ipi piyapi'sa' sha'huitaantaquë' yonqui'ina': "Yosë ni'sarinpoa' ni'ton, ama nisha nisha ninontocoso'huë'," itëquë'. Inahuara yonquinëna quëran nisha nisha ninontohuachinara, topinan quëran nonsapi. Insosona inapita natanpachina', co huachi noya Yosë imasapihuë'. Nisha cancantatona', yaa'poapi.

15 Noyasáchin niquë' Yosë noya ni'inquën. Yosë nanamën ma'sona tapon napor-insopita noya nitotaton, no'tëquën a'chinquë'. Ina marë' noya sacatohuatan, co Yosë'pa' tapanaranhuë'. 16 Nonpin nanano'saso nipirihuë' tananpitëquë'. Ama natanquësohuë'. Topinan quëran ninontapi. Inapita imapatëhua', co huachi Yosë pochin yonquiarëhuahuë'. 17 Ni'quë'. Panca yonitohuatëra, nohuarotërë'. Inapochachin nonpin nanano'saso', yatapicancaninpoa'. Iminio, Huirito inapitaso', nonpin nanan a'chinapi. 18 Yosë no'tëquën a'chintopirinpoahuë', co huachi natëpihuë'. "Yosë nani piyapi'sa' ananpitatë pochin nitërin. Co huachi a'na tahuëri ananpitaantaripoahuë'," toconpi. Napopi ni'ton, co huachi a'naquën imapihuë'. 19 Yosë nanamënso nipirihuë' ya'huárin, Yosë chachin acorinso'. Natëricho pëi' achinirinsó' pochin ni'ton, ya'huëmiatarin. Cato quëran chachin ninshitopi. "Ya'ipi imapisopita Yosëri nohuitërin," ténin. "Quisocristo imapisopita nóya cancanchina'. Ya'ipi co noyahuë' yonquipisopita nanianchina'," ténin anta'.

20 Panca pëiquë nisha nisha ma'sha ya'huërin inaquë o'shitacaso marë'. Ni'toro'sa' huë'pachinara, nasha minë' ninshirayáchin masahuatë', o'shitërë'. Minëtë', pa'chitë', inapitaso nipirihuë' co ina marë' ya'huërinhuë'. Në'huëi' acocaso marë', hui'sécaso marë', inapita marë' ya'huërin. 21 Inapochachin co noyahuë' yonquiramaso' naniantohuatama', ninshiraya minë' pochin nisarama'. Noyasáchin cancantohuatama', Yosë nohuantarinquëma'. Acoarinquëma' noya nicacaso marë'.

22 A'naquën hui'napi'saso' nisha nisha yonquiatona', pa'sápi. Ama ina pochin yonquiquësohuë'. Noyasáchin nicacaso' yonquiquë'. Ya'ipi cancanën quëran Quisocristo natëquë'. Ya'ipi piyapi nosoroquë'. Ya'ipi imarëhuaso capininpoa' noya nini'tëhua', ya'hua'ahua'. Noyápiachin cancantatëhua', Sinioro nontërëhua' catahuainpoaso marë'. 23 A'naquën co Yosë yonquiatonahuë', nisha nisha ninontapi. Topinan quëran ninontatona', nino'huiapi. Quëmaso nipirihuë' ama inapitarë'quën chiníquën ninontocoso'huë'. 24 Sinioro piyapinënpoa' nipatëhua', co piyapi'sa' no'huicaso' ya'huërinhuë'. Noya nontacaso' ya'huërin. Noya nitotatëhua', a'chintahua'. No'huipirinpoahuë', ama no'huiahuasohuë', ahuantahua'. Sanoanan quëran nontahua'. 25 Nisha nanan imapachina, oshaquëran pënëanhuan'. Ama no'huitatëhuahuë', a'chintahua'. Yosëri catahuahuachin, oshaquëran co noyahuë' yonquipisopita naniantatona', no'tëquën yonquiapona' nimara. 26 Yonquicaiso marë' sanoanan quëran pënëanhuan'. Huënsonquë ma'sha manëso pochachin sopairi nani manin. Camaihuachina, natëpi. Nipirihuë' pënënpatëhua', sopai quëran cha'ëpona' nimara.

### 3

#### *Aquë aquëtë' co noyahuë' cancantapisopita*

1 Isonta' api pënëanta'inquën. Ayaro' tahuëri ya'caritohuachin, co huachi noya ya'huapihuë'. 2 Piyapi'sa' niapiratatona', co huachi a'napita yonquiapihuë'. Coriquiráchin cancantapi. A'napita nocanapi. "Caso' noya noyaco," ta'tona', a'napita co noyahuë' ni'sapi. Nipinosapi; Yosënta' pinosapi. A'shina', pa'pina', inapita co natërapihuë'. Nani ma'sha quëtöpirinahuë', ina marë' "Yosparinquën," co itopihuë'. Co Yosë chinotapihuë'. 3 Co pi'pisha tëranta' ninosoroapihuë'. Co niquë'yaapihuë'. Ninonpinapitona' nisha'huirapiapi. Nimonshitapi. Ni'ni pochin cancantatona' niahuëapi. Noya nininsopita co pi'pisha tëranta' nohuantapihuë'. 4 Iina niponaraihuë', nonpinapitona' sha'huirapiapi. Co huachi yonquiapihuë': "Quiyasáchin nitotërai," tosapi. Nipa'yatacasoáchin yonquiatona', co huachi Yosë nohuantapihuë'. 5 "Quiyanta' Yosë imarai," topirinahuë', co tēhuēnchachin imapihuë'. Chinotopirinahuë', co cancanëna quëran huarë' natëpihuë' ni'ton, co Yosëri catahuarinhuë' ina pochin cancantacaiso'.



Ama inapita natanquësohuë'. Tananpitëquë' pa'ina'. <sup>6</sup> Na'a piyapi'sa' anishacancantapi. A'naya a'naya pëiquë paatona', sanapi'sa' nonpintopi. Nonpintatona', a'chintapirinahuë', a'naquënso' noya natanpi. "Oshahuanco ni'ton, ana'intincoso' ya'huërin," ta'tona', co chiniquën cancantopihuë'. Nani ma'sha nohuantatona', co sano yonquipihuë' ni'ton, a'naroáchin natëtopi. <sup>7</sup> Nisha nisha nanan yanatanapona'. Yosë no'tëquën noninsoso nipirinhüë', co yanatëpihuë'. Napoaton co Yosë nohuitopihuë'. <sup>8</sup> Iráca cato' pënotono'sari Moisésë chinitopi. Canisë, Canprisë inapita itopiso'. Moisésë no'huitona', copirno nonpintopi ama natëcaso marëhuë'. Inapochachin ipora nisha a'china'piro'sa' co noyahuë' yonquiatona', co Yosë nohuantopihuë'. No'tëquën noninso' co yanatanpihuë'. Nisha nanan imatona', co Yosë imasapihuë'. <sup>9</sup> A'chintohuachina, a'naquën natëpirinahuë', oshaquëran co huachi natërapihuë'. "Nonpinápi," ta'tona', co huachi imasapihuë'. Inapochachin iráca ina pënotono'sari nonpintopirinahuë', piyapi'sari oshaquëran no'tëquën nitotahuatona', a'popi huachi.

### *Paonori Timotio pënëninso'*

<sup>10</sup> Quëmaso nipirinhüë' noya cancantaton, hua'qui' ca'tananco. Yosë nanamën a'chinpatëra, noya natanan. Ya'ipi naporahuëso' ni'nán. Yosëichin yonquiato, imamiatarahuë. Cancanëhuë quëran huarë' natërahuë. Co piyapi'sa' no'huirahuë', nosororahuë. Ma'sha onpoaporahuë', chiniquën cancantërahuë. <sup>11</sup> Aparisitopirinacohüë', ahuantërahuë. Ya'ipi ni'nán ni'ton, nitotëran. Antioquiaquë, Iconioquë, Nistraquë, inaquëpita chiniquën parisitaporahuë', Siniro catahuarinco ni'ton, cha'ërahuë. <sup>12</sup> Ya'ipi cancänëpoa quëran Quisocriso imapatëhua', aparisitarinëpoa'. <sup>13</sup> Co noyahuë' nipisopita, nonpintëro'sa', inapitaso' aquë aquëtë' co noyahuë' nisapi. Na'con piyapi'sa nonpintopi quëran, a'napitarinta' nonpintapi.

<sup>14</sup> Quëmaso nipirinhüë', Yosë nanamën imamiatëquë'. Nani iráca mama, mama paya, ca, a'napitanta' a'chintërainquën, cancänë quëran huarë' natëran. Noya nohuitërancoi ni'ton: "No'tëquën a'chintëraincoi," ta'ton, imamiatëquë'. <sup>15</sup> Hua'huatapon quëra huarë' Yosë quiricanën nohuitëran. Ina quëran Yosë nontërinpoa' nicha'ëinpoaso marë'. Ina nitotohuatëhua', Quisocriso natëhuatëhua', cancänëpoa' anoyacancantërinpoa'. <sup>16</sup> Ya'ipi Yosë quiricanënso' nóya. Yonquirinso chachin Yosëri aninshitérin. Quiricanën quëran a'chintërinpoa'. Pënëninpoa' co noyahuë' ninëhuasopita naniantacaso marë', nóya ayonquirinpoa'. Anitotërinpoa' no'tëquën Yosë natëcaso'. <sup>17</sup> Quisocriso imapatëhua', quiricanën quëran catahuarinpoa' noya nicacaso marë'. Nitotatëhua', natëhuatëhua', nóya nisarëhua'. Ina marë' quiricanën quëtërinpoa'.

## 4

<sup>1</sup> Yosë ni'sárinpoa ni'ton, pënënananquën. Quisocrisonta' ni'sárinpoa ni'ton, "nanamën a'chináquë'," ténahuë. A'na tahuëri inaso' o'mantararin isoro'pa' hua'anëntacaso marë'. Naporo' chiminpisopita, nanpirëhuasopita, ya'ipinpoa' coisë pochin no'tëquën sha'huitarinpoa'. Oshahuano'sa' ana'intarin. Natërehuasopitaso' noya acoarinpoa'. Napoaton Yosë marë' noya sacatëquë'. <sup>2</sup> Nanamën a'chináquë'. Piyapi'sa' yanatanpachina', a'chintëquë'. Sacai' a'chinacaso nipirinhüë', onpopionta' a'chináquë'. A'naquënso' co yaimapachinahuë', no'tëquën sha'huitëquë' natëina'. Co noyahuë' nipachina', pënënuquë'. Noya nontëquë' chiniquën cancantatona', imaina'. Ya'ipi piyapi'sa' a'chintëquë' noya nicacaiso marë'. Nipirinhüë', ama no'huiquësohuë'. Sanoanan quëran pënënuquë'. <sup>3</sup> A'na tahuëri piyapi'sa' co nohuantapihuë' Yosë nanamën natanacaiso'. Nonpin nanano'sa' nisha nisha a'chinpachina', pa'yatapi. Inahuara costapisorachin yanatanapi. <sup>4</sup> Yosë no'tëquën noninso' a'porahuatona', piyapi yonquirinso' natëapi. <sup>5</sup> Quëmaso nipirinhüë', yonquínahuan niquë'. Aparisitohuachinënuquën, ama no'huitatonahuë', ahuantëquë'. A'naya a'naya Yosë

nanamën a'chintëra'piaquë'. Co imapisopitahuënta' nitochina'. Ya'ipi imapisopita catahuaquë' noya noya imaina'.

<sup>6</sup> Ma'sha Yosë marë' tēpapiso pochin co hua'quiya quëranhuë' a'chinahuëso marë' tēpaarinaco. Nani tahuëri naniriarin chimina'huaso'. <sup>7</sup> Iráca Yosë sha'huitërinco a'napita a'chinta'huaso'. Nani tiquirahuë. Chiníquën sacatërahuë pochin Quisocristo nóya natërahuë. Co pi'pian tēranta' a'porahuë'. <sup>8</sup> Napoaton Yosë'pa' acanaarinco. Quisocristo o'mantahuachin, coisë pochin nicon, no'tëquën sha'huitarinpoa'. Naporo' noya ninahuëso marë' acanaarinco. Co casáchin acanaarincohuë'. A'napitanta' Quisocristo nosoroatona', "Manóton o'manta'in," topisopitanta' Yosë'pa' canaapi.

*Timotio huëcacasó' nohuantërinso'*

<sup>9</sup> Manóton api huëquë' ni'quico. Ama hua'quiquësóhuë'. <sup>10</sup> Timasëso' isoro'paráchin yonquiaton, patërinco. Tisaronicaquë pa'nin. Crisinti Carasiaquë pa'nin. Titonta' Tarëmasiaquë pa'nin. <sup>11</sup> Nocasëíchin isëquë ya'huërarin. Marconta' macaton, quëquë'. Inaso' noya catahuarinco. <sup>12</sup> Tiquicoso' ya'huëpirinhuë', Ipiquoë a'parahuë. <sup>13</sup> Aipi a'morahuëso tanontën nininso' Troasëquë huëshirahuë. Carpio pëinënquë ya'huëarin. Huë'patan, quëshico. Quiricaro'santa' quëshico. Quiricanëhuë so'nanpinan nininsopita na'con na'con nohuantërahuë.

<sup>14</sup> Aricantëro hua'naquë sacatërinso' chiníquën sha'huirapirinco. Ina marë' Siniorori ana'intarin. <sup>15</sup> Yosë nanamën a'chinahuë ni'ton, chiníquën no'huirinco. "Nonpiánin," tënin. Napoaton ni'quëna quëmanta inapotochinquën.

<sup>16</sup> Ya'nan coisëquë sha'huirapiponaco, co insonta' catahuarincohuë'. Ya'ipiya tē'huatona', ta'ananpirinaco. Nipirinhuë', co no'huirahuë'. "Ama ina marë' Sinioro ana'intëquësóhuë'," itërahuë Yosë nontato. <sup>17</sup> Ta'ananpipirinacóhuë', Quisocristo catahuarinco. Co patërincohuë'. Achinicanainco ni'ton, inaquënta' ya'ipi Yosë nanamën sha'huirahuë. Nisha nisha piyapi'sa' nani natanpi. Pa'pini' yamaninposo pochin yatëpaporinacóhuë', Yosë catahuarinco, cha'ërahuë. <sup>18</sup> Pa'pi co noyahuë' yonquirapihuachinaconta', onpopionta' nicha'ësarinco. Quisocristo anoyacancantërinco ni'ton, a'na tahuëri hua'anëntërinquë quëpantarinco. ¡Ma noyacha Quisocristoso paya! Ipora quëra huarë' inasáchin chinotahua'. Amen.

*Tiquiapon pochin sha'huirinso'*

<sup>19</sup> Pisisica, Aquira, Onisiporo, sa'in, hui'ninpita, inapita saludos a'patërahuë. <sup>20</sup> Irasito Corintoquë quëparitërin. Tropimo caniorin ni'ton, Miritóquë huëshirahuë. <sup>21</sup> Ama api hua'quiquësóhuë'. Co'huara o'napi naniyatërasóhuë', huëquë'. Ioporo, Potinti, Nino, Craotia, ya'ipi imapisopita isëquë ya'huëpiso' yonquiatënëinquën, saludos a'patarinëinquën.

<sup>22</sup> Sinioro Quisocristo achinicanainquën. Ya'ipinquëma' imaramasopita inaora nohuanton, noya catahuainquëma'. Nani huachi.

*Paono*

## Paonori Tito ninshitérinso'

### *Tito yonquiaton, ninshitérinso'*

<sup>1</sup> Ca Paonoco ninshitaranquën, ni'quë'. ¿Noya ya'huaran? Noya canta' ya'huarahüë. Tata Yosë hua'anëntërinco ni'ton, inasáchin natërahuë. Quisocristo acorinco nanamën a'china'huaso marë'. Yosë huayoninpoa' ni'ton, huëntonënuquë ya'conëhua'. Nóya natëcaiso marë' a'chinarahuë. No'tën nanan a'china'huaso marë' acorinco. Ina natëhuatëhua', no'tëquën imasarëhua'. <sup>2</sup> Quisocristo imapatëhua', a'na tahuëri inápaquë quëpantarinpoa'. Ya'huërin'pa' ya'huëmiatarihua'. “Ananpitaantarinpoa',” ta'tëhua', ina ninarëhua'. Yosë iráca co'huara isoro'pa' acoyátërasohüë', ninotonpoa' yonquirinpoa'. Inaso' co onporonta' nonpintërinpoahuë'. <sup>3</sup> Iporaso huachi tahuëri nanihuachina, inaora nohuanton, nanamën anitotërinpoa'. Yosë sha'huitërinco ni'ton, ina nanan chachin pënënanquëma'. Inaso' nicha'ësarínpoa'. <sup>4</sup> Titonquën ninshitaranquën. A'chintohuatënuquëna natëton, imaran ni'ton, tēhuënychachin hui'nahuë pochin ni'nanquën. Tata Yosë inaora nohuanton, catahuainquën. Asanocancainquën. Quisocristonta' inachachin catahuainquën. Inaso' nicha'ësarínpoa'.

### *Ma'sona Tito nicacaso' ya'huërinso'*

<sup>5</sup> Crita parti ya'huarihua', a'naya a'naya ninanoquë a'chintopirëhuahuë', pahuanarin ya'ipi a'chinacaso' ni'ton, inaquë huëshiranquën: “Imapisopita ya'ipi a'chintacaso ya'huërinso a'chintëquë'. Naporahuaton, ya'ipi ninanoro'saquë ansiano'sa' acora'piaquë',” itëranquën. <sup>6</sup> Ansiano'sa' yaacohuatan, noya imapisopitaráchin acoquë'. A'naíchin sa'in ya'huëtërinso'. Hui'ninpitanta' Quisocristo imaina'. A'naquënso' ansiano yaya'conpirinahuë', hui'ninpita co noya cancantopihuë'. Co yonquínahuan nipihuë'. Co pa'pina' yanatëpihuë'. Co hui'ninpita tëranta' pënënpachinahuë', a'napitarinta' co yanatëponahuë'. Napoaton co inapita acocaso' ya'huërinhuë'. <sup>7</sup> Yosë nohuanton, ansiano'sa' ya'huëpi imapisopita catahuacaiso marë'. Yosëri acorin ni'ton, noyasáchin niina'. Ama nocanchinasohüë'. “Casáchin no'tëquën nitotërahuë,” topachina', ama acoquëssohuë'. Ama yano'huichinasohüë'. Ama no'piinasohüë'. Ama yaahuëchinasohüë'. Ama coriquiráchin cancanchinasohüë'. Ama pi'pian tëranta' nonpinatona', canainasohüë'. Insosona ina pochin cancantohuachin, ama ansiano acoquëssohuë'. <sup>8</sup> Ni'toro'sa' huë'pachina', noya nonchina', o'shichina'. Pahuantërinso'pita nosoro'ina'. Noyasáchin ni'tona', a'napita catahuaina'. Sano yonqui'ina'. Yosë natëtona', ina pochin cancanchina'. Pi'pisha tëranta' co noyahuë' yonquihuachina', a'naroáchin nanianchina'. Ina pochin cancantohuachina', noya ansiano ya'conacaso', tēnahuë. <sup>9</sup> Yosë nanamën no'tëquën a'chintërainquëma'. Ina nanansáchin ansiano'sa' imaina'. Ina na'con yonquihuachina', noya pënëntapona', no'tëquën a'chinapona'. A'napitaso nisha nanan a'chinpirinahuë', ansiano'sariso' Yosë nanamënáchin a'chinchina'. Ama imapisopita nonpin nanan natëtaçaiso marëhuë' inapochina'.

<sup>10</sup> Na'a quëmapi'sa' co natëtochináchinhuë' cancantopi. Inahuara yonquinëna quëran a'chinapi ni'ton, topinan quëran nonsápi. Cotioro'sa' pënëntërinso' imatona', napopi. Nisha nisha nonatona', yanonpinapi. <sup>11</sup> Yapënëntohuachina', sha'huitëquë' ama pënënychinasohüë'. Ma'sha canacaisoáchin yonquiatona', a'chinapi. Nisha a'chintohuachinara, a'naquën Yosë nanamën yaa'popi. Quëmopinënpitarë chachin nisha imasapi.

<sup>12</sup> Tēhuënychachin Crita parti na'a nonpina'piro'sa' ya'huëpi. A'na Crita quëmapi chachin iráca tapon: “Citaro'sa' yanonpinpi. Ni'ni pochin cancantopi. Chiro'tëro'sa' nicatona', cosharoachin cancantopi,” tēnin pënëntona'pi. <sup>13</sup> No'tëquën nonin. Na'a piyapi'sa' inatohua' ina pochin cancantopi. Napoaton chiníquën pënënuquë' ama nonpin nanan

a'chinacaiso marëhuë'. No'tëquën natëhuachina', noya cancantapi. <sup>14</sup> Ama cotioro'sa' iráca napopiso' natëinasohuë'. A'naquën no'tën nanan a'porahuatona', inahuara yonquinëna quëran a'chinapi. Ama inapita natëinasohuë'.

<sup>15</sup> Noyápiachin cancantohuatëhua', ya'ipiya noya yonquiarëhua'. A'naquënso nipirinhuë' co yaimapihuë'. Taparosáchin yonquipi. Co noyahuë' cancantohuachinara, nisha nisha yonquipi. No'tën nanan nitotaponaraihuë', co yanatëpihuë'. Napoaton co huachi no'tëquën yonquipihuë'. Nitapicancanaton', co huachi nanitopihuë' noya yonquicaiso'. <sup>16</sup> “Yosë nohuitërahuë,” topirinahuë', co noyahuë' nipi. Ina marë' co tēhuëncachin imapihuë', tēnahuë. Co Yosëri noya ni'ninhuë'. “Napoonpi,” tēnin. Co manta' yanatëpihuë'. Yosë a'poatona', co pi'pisha tēranta' nanitopihuë' noya nicacaiso'.

## 2

### *Quëmapi'sa', sanapi'sa' inapita pënëninso'*

<sup>1</sup> Quëmaso nipirinhuë' Yosë nanamën no'tëquën a'chinquë'. Ina a'chinaton, pënënuquë' noya nicacaiso marë'. <sup>2</sup> Quëmapi'sa' quëmá quëran mashomiachin nipisopita pënënuquë' natëtono'sa' niina'. Ama nisha nisha yonqui'inasohuë'. Noya yonquiatona ya'huë'ina'. Yosë nanamën no'tëquën imaina'. Ya'ipi piyapi nosoro'ina'. Aparisitopirinahuënta', ama yai'huërëchinasohuë', ahuanchina'. <sup>3</sup> Sanapi'sa' payamiachin nipisopitanta' a'chintëquë' sano yonquiatona' ya'huë'ina'. Ama ma'tona ma'tona noinasohuë'. Ama no'picaiso' pa'yachinasohuë'. Noya niina' a'napita sanapi'sarinta' nicatona' nonanacaiso marë'. Naporahuatona', noya nicacaiso' a'chiina'. <sup>4</sup> Ina quëran sanapi'saso' nanitopi nasha so'yahuano'sa' a'chintacaiso'. So'ina', hua'huinpita inapita nosorocaiso marë' pënëina'. <sup>5</sup> Noya yonquicaiso marë' pënëina'. Ama manta' so'ina' tēhuananpitacaiso' yonqui'inasohuë'. So'ina' noya nocoma'ina'. Ya'ipi piyapi noya nonchina'. So'ina' noya natëina' ama a'napitari Yosë nanamën nonapicaiso marëhuë'.

<sup>6</sup> Hui'napi'santa' pënënuquë' sano yonqui'ina'. <sup>7</sup> Quëmanta' api, noyasáchin niquë' a'napita nonainquënso marë'. Noya cancantaton, Yosë nanamën no'tëquën a'chinquë'. Ya'ipi yonquinën quëran huarë' a'chinquë'. <sup>8</sup> Noyasáchin nonquë' ama a'napita nonapiinquënso marëhuë'. Ina quëran no'huipirinënquënhuënta', tapanapi. Co manta' pinoinpoaso' ya'huaponhuë'.

<sup>9</sup> Patron marë' sacatopisopitanta' pënënuquë' patronëna' noya nicatona', natëina'. Natëtona', noya sacachina'. Camaihuachina', natëina'. Co a'panicaso' ya'huërinhuë'. <sup>10</sup> Ama ihuachinasohuë'. No'tëquën natëtona', ama pi'pian tēranta' nonpiinasohuë'. Noya nipachina', a'napitarinta' noya ni'sapi. “Tata Yosë imatona', noya nipi. Ma noyacha Yosë nanamënso paya,” tapon'. Inaso' tēhuëncachin nicha'ësarinpoo'.

<sup>11</sup> Inaora nohuanton, Yosë nosororinpoo'. Ni'ton, hui'nin chachin a'paimarin nanamën anitotinpoo' marë'. Inaso' ya'ipi piyapinpoo' nicha'ëinpoo' nohuantërin. <sup>12</sup> Nosoroatonpoo', pënëninpoo' ya'ipi co noyahuë' yonquirëhuasopita naniantacaso marë'. Ama ma'sharáchin nohuantahuasohuë'. Co monshihuanacaso' ya'huërinhuë'. Sano ya'huatëhua', nóya yonquia'ahua'. Yosë yonquirinsoráchin imahua'. Nani tahuëri Yosë chinotatëhua', noyasáchin niahua'. Ina marë' pënëninpoo'. <sup>13</sup> Noya cancantatëhua', Quisocristo ninarëhua'. A'na tahuëri chiníquën nanantaton, o'mantararin. Inaso' Yosë chachin ni'ton, huënaráchin huënaráchin ya'noarin. Ina quënanpatëhua', nóya cancantarihua'. Chiníquën nanantaton, noyá nicha'ësarinpoo'. <sup>14</sup> Iráca canpoo' marë' chiminin oshanënpoo' inquitinpoo' marë'. Anoyacancantërinpoo' piyapinënpita nicacaso marë'. Huëntonënuquë chachin ya'conpatëhua', noya nicacasaráchin nohuantarihua'.

<sup>15</sup> Ina nanan a'chintáquë'. Noya nontaton, achinicancanquë'. Co noyahuë' nipachina', chiníquën nanantaton, pënënuquë'. Co mashonquënhuë' niponahuë', Quisocristo nanamën a'chintëran ni'ton, natëinënuquënso' ya'huërin.

### 3

#### *Imapisopita noya niina'*

<sup>1</sup> Imapisopita nani nitotopirinahuë', inachachin quëmarinta' pënëantaquë'. "Copirno natëco'," itëquë'. Ya'ipi copirno acorinsopitanta' natëcaso' ya'huërin. Noya nicacaiso' yonqui'ina'. <sup>2</sup> Ama pinochinasohuë'. Ama nino'huiinasohuë'. Noya ninicatona' ya'huë'ina'. Ya'ipi piyapi'sa' noya nicatona', sanoanan quëran nonchina'.

<sup>3</sup> Iráca canpoanta' co noyahuë' cancantërehua'. Co'huara Yosë nanamën nitochatërarihuahuë', co yonquirëhuahuë'. Co yanatërehuahuë'. Sopai nonpintërinpoa' ni'ton, nisha nisha nicacaso' nohuantërehua'. Ma'pitasona pa'yatacasoáchin yonquirëhua'. A'na piyapi ma'shanënpita noyapatërehua'. Nino'huitëhua', co niquë'yarëhuahuë'. No'huípiro' ninëhua'. Inapoatëhua', topinan quëran ya'huërehua'.

<sup>4</sup> Yosëso nipirinhuë' nosoroatonpoa', catahuarinpoa'. Inaso' noya ni'ton, hui'nin a'paimarin nicha'ëinpoaso marë'. <sup>5</sup> Co canpoara noya ninëhuaso marë' nicha'ërinpoahuë'. Inaora nohuanton, Yosë nosoroatonpoa', nicha'ërinpoa'. Amatëreso pochin ya'ipi oshanënpoa' inquitërinpoa'. Oshanënpoa' inquitatonpoa', anasitaantarëso pochin nasha cancan quëtërinpoa'. Ispirito Santo nohuanton, ina pochin cancantërehua'. <sup>6</sup> Quisocriso anoyacancantërinpoa' ni'ton, Ispirito Santo a'patimarinpoa' ya'coancantinpaso marë'. Noyá ya'coancantohuachinpoa', na'con catahuarinpoa'. <sup>7</sup> Napoaton iporasó Yosë noya ni'ninpoa'. Iráca oshahuanpirëhuahuë', inaora nohuanton, nosoroatonpoa', nanan anoyatërinpoa'. "Huëntonënuquë aya'coninpoa' ni'ton, a'na tahuëri ya'huërin'pa' ya'huëcontarihua'," ta'tëhua', ninarëhua'. Inatohua' nanpimiatarihua'.

<sup>8</sup> No'tëquën sha'huitëranquën. Quëmanta' inachachin a'chintëquë', ténahuë. Pënënáquë' ya'ipi imapisopita noya nicacaiso marë'. A'chintëranquënsoso' nóya imacaso'. Natëhuatëhua', noya noya ya'huarihua'. <sup>9</sup> A'naquën co noyahuë' yonquiatona', nisha nisha nonpi. Cotio mashocoro'sa' yonquiatona', inahuara yonquinëna quëran nisha nisha a'chinpi. Cotioro'sa' iráca pënëntopiso' nisha nisha a'chinatona', nino'huipi. Ama inapita natancosohuë'. Ina pochin ninontohuachinara, topinan quëran ninontopi. Co manta' catahuarinpoahuë'. Yosë nanamënáchin imacaso' ya'huërin.

<sup>10</sup> A'na piyapi nisha nanan a'chinpachin, imapisopita nisha nisha ayonquirin. Inaso' pënënuquë' no'tëquën a'chinchin. Co yanatëhuachinquënhuë', naquëranchin pënëantaquë'. Ina quëran co yanatëantahuachinquënhuë', sha'huitëquë' ta'chin. Ama insoari tëranta' ina natëinasohuë'. Ama huachi imarinso pochin ni'cosohuë'. <sup>11</sup> Nisha nisha yonquiaton, nitapicancanarin. Co noyahuë' cancantaton, inaora nina'intarin.

#### *Nisha nisha pa'pisopita*

<sup>12</sup> Artimasë a'pataranquën. Co ina nanitohuachinhuë', Tiquico pa'sarin. Cantonpachinquën, manoton Nicoporisëquë huëcaton, ni'quico. Inaquë o'napi na'huëanatarahuë'.

<sup>13</sup> Sinasë, Aporosë, inapita cantonpachinquën, noya nontëquë'. Sinasëso' coisë catahuana'pi. Yapa'pachina', catahuaquë' noya pa'ina'. Ma'sha pahuantohuachina', quëtëquë' ama pahuanchinasohuë'. <sup>14</sup> Ya'ipi imapisopitanta' sha'huitëquë' noya niina'. Pahuantërinso'pita catahuaina'. Inapotohuachina', co topinan ya'huapihuë'.

#### *Tiquiapon pochin sha'huirinsó'*

<sup>15</sup> Ca'taninacosopita yonquiatënënuquën, saludos a'patarinënuquën. Ya'ipi imaramasopita yonquiarainquëma'. Noya ya'huëco' canpitanta', ténai. Quisocriso imarama' ni'ton, nosororamacoí. Yosë inaora nohuanton, noya catahuainquëma'. Nani ninshitëranquëma huachi.

*Paono*



## Paonori Pirimon ninshitérinso'

### *Tashinan pëi quëran ninshitaton a'patërinso'*

<sup>1</sup> Iya Pirimon, ca Paonoco ninshitaranquën, ni'quë'. ¿Noya quëmanta' ya'huaran? Noya canta' ya'huarahüë. Quisocristo nanamën a'chinahuëso marë' tashinan pëiquë po'morinaco. Iya Timotioro'co nanan a'pataranquën. Nosororainquën iyasha. Quëmanta' catahuancoi a'china'huaiso marë'. <sup>2</sup> Imoya Apianta' yonquiato, ninshitaranquëma'. Arquiponta' yonquirai. Yosë nanamën a'chinpatora, inanta' na'con catahuancoi. Parisitaponahuë', noya ahuantërin. Ya'ipi imapisopita quëma pëinënuë niyontopiso' na'con yonquirai. Iso quirica nontëquë' inapitanta' nataina'. <sup>3</sup> Tata Yosë inaora nohanton, na'con catahuainquëma'. Asanocancainquëma'. Siniro Quisocristonta' inachachin catahuainquëma'.

### *Imarinso marë' noya cancantërinso'*

<sup>4-5</sup> Nani tahuëri iyasha quëma marë': Yosë nontërahuë. Quisocristo noya natëran. Naporahuaton, ya'ipi imapisopita nosororan, natantërahuë. Ina marë' "Yosparinquën Siniro," itërahuë. <sup>6</sup> Quisocristo imaton, a'napitanta' catahuan imacaiso marë'. Napoaton ina yonquiato, Yosë nontërahuë: "Catahuaquë' Siniro Quisocristo imaton, noya noya yonqui'in. Ya'ipi ina yonquirincoiso' nitochin," itërahuë. <sup>7</sup> Ya'ipi imapisopita nosoroaton, quëmari achinicananan. Noya noya cancantapi. Ina natantahuato iyasha, canta' nóa cancantërahuë. Achinicanananco canta'.

### *Onisimo marë' nontërinso'*

<sup>8</sup> Iporaso' pi'pian sha'huichinquën ma'sona noya nicamaso'. Quisocristo acorinco nanamën a'china'huaso marë'. Chiniquën nanan quëtërinco ni'ton, nohantërahuë naporini, camai'tënuënhuë'. Nipirinhüë' co nohantërahuë'. <sup>9-10</sup> Nani caso' mashotërahuë. Quisocristo imarahüëso marë' tashinan pëiquë po'morinaco. Napoaton iyasha nosoroatanco, Onisimonta' nosoroquë', tënahüë. Tashinan pëiquë ya'huasoco, inaso' ni'quirinco. Co hui'nahuë chachinhüë' nipirinhüë', pënënpatëra, inanta' Quisocristo imarin ni'ton, hui'nahuë pochin ni'nahuë.

<sup>11</sup> Iráca Onisimo pa'anan asacatacaso marë'. Hua'anëntopiranhuë', co noya catahuarinquënhuë'. Ta'ananpirinquën. Iporaso nipirinhüë' Quisocristo imaton, noya catahuarincó. Quëmanta' noya catahuaarinquën huachi, tënahüë. <sup>12</sup> Noya catahuapirinhüë', apira a'pataranquën. Na'con nosoropirahuë', quëma piyapinën ni'ton, nani sha'huitërahuë ya'huëranquë panantacaso marë'. Ca pochachin cancantaton, noya ni'quë'. <sup>13</sup> Isëquë quëparitacaso' nohantopirahuë', a'pataranquën. Quisocristo nanamën a'chinahuëso marë' tashinan pëiquë ya'huarahüë. Quëmanta' isëquë ya'huaran naporini, catahuaitoncohuë', tënahüë. Onisimo quëma ya'huërenamën pochin catahuarincó ni'ton, co yaa'paporahuë', a'pataranquën. <sup>14</sup> Isëquë quëparitacaso' nohantopirahuë', co quëma nohantomaranhuë' ta'to, a'pataranquën. <sup>15</sup> Yosë nohanton, ta'ananpirinquën nimara Quisocristo nohuitacaso marë', tënahüë. Co hua'qui' patërinquënhüë'. Iporaso' paahuamantarinquën inaquë ya'huëmiatacaso marë'. <sup>16</sup> Quëma marë' sacatopirinhüë', ama huachi piyapinën pochin ni'quësohüë'. Piyapinën niponahuë', iporaso' noya noya ni'quë'. Quisocristo imarin ni'ton, iyanpo pochachin nosoroquë'. Cariso' na'con nosororahuë. Quëmaso' aquëtë huarë' na'con na'con nosoroquë', tënahüë.

<sup>17</sup> Canposo' Quisocristo imatë', noya nipayarë'. Napoaton Onisimo cantonpachinquën, noya nontëquë'. Ca nosororancoso pochin inanta' nosoroquë'. <sup>18</sup> Tëhuëhuachinhüë nipon, nihuihuachinquënhüë nipon, sha'huitoco carinquën pahuëre'inquën. <sup>19</sup> Caora imirahuë quëran no'tëquën ninshitaranquën. Tëhuëchachin

pahuëëaranquën. Isonta' iyasha yonquiquë'. Co a'chintëranquënhuë' naporini, co Yosë anoyacancanchitënhuë'. Napoaton quëmanta' nihuirancoso pochin nipiranhüë', co manta' ma'paranquënhuë', tënahuë. <sup>20</sup> Napoaton iyasha ninshitaranquën. Quisocristo imaran ni'ton, Onisimo nosoroquë'. Noya nontohuatan, canta' nóya cantarahuë. Inapoaton, achinicancanco topirahuë'.

<sup>21</sup> “Yosë natëton, Onisimo noya nontarin,” ta'to, ninshitaranquën. Pi'pian sha'huitopiranquënhuë', quëmariso' na'con na'con catahuaaran, tënahuë. <sup>22</sup> Naporahuaton, quëma pëinënhuë a'na patoana tapatoco. Ca marë' Yosë nontërama' ni'ton, ocoiarinaco nimara, tënahuë. Tashinan pëi quëran pipihuato, nicaponquën pa'sarahuë.

*Tiquiapon pochin sha'huirinso'*

<sup>23</sup> Iya Ipapërasë saludos a'patarinquën. Inanta' Quisocristo imarin ni'ton, tashinan pëiquë ya'huarin. <sup>24</sup> Marco, Aristarco, Timasë, Nocasë, inapitanta' yonquiatënhuë, saludos a'patarinënhuë. Inapitaso' catahuarinaco Yosë nanamën a'chinacaso'. <sup>25</sup> Inaora nohuanton, Siniro Quisocristo noya catahuainquëma'. Nani huachi.

*Paono*

## Cotioro'sa' Quisocristo imapisopita a'na piyapiri ninshitérinso'

### *Yosë nanamën anitotërinpoaso'*

<sup>1</sup> Iráca quëran huarë' Yosëso' nanamën anitotërinpoa'. Shimashonënpoapita, pënëntona'piro'sa quëran na'aro anitotërin. Naporahuaton nisha nisha quëran anitotërin. Co a'naromaráchin ya'ipi anitotërinhuë'. <sup>2</sup> Iporaso nipirinhüë', hui'nin quëran nontërinpoa'. Iráca Yosëri sha'huitohuachina, Quisocristori isoro'pa', inápaquë ya'huërinso'pita, ya'ipi ninin. A'na tahuëri Yosë nohuanton, ya'ipi hua'anëntarin. <sup>3</sup> Inaso' pa'pin pochachin noya nóya ninin. Ina pochachin ni'ton, inasáchin Yosë no'tëquën anohuitërinpoa'. Chiníquën nanantërin ni'ton, ipora huanta' ina nohuanton, ma'sha ya'huërarin. Co yonquirinpoahuë' naporini, ya'ipiya ta'huanchitërihuahuë'. Iráca oshanënpoa' inquitinpoaso marë' chiminin. Chiminpirinhüë', nanopiantarahuatón, inápaquë panantarin. Inaquë panantarahuatón, Yosë inchinanën quëran huënsërin. Chiníquën nanantaton, hua'anëntarin.

### *Quisocristoso' noya noya ninin*

<sup>4</sup> Yosë hui'nin ni'ton, anquëniro'sa quëran chini chiníquën nanantërin inaso'. Yosëri acorin ni'ton, inaso' noya noya. <sup>5</sup> Iráca Yosëri sha'huitërin. Quiricanënquë naporin:

“Quëmaso' hui'nahuënquën. Ipora chachin noya nicasatënquën, acoaranquën piyapi'sa' hua'anëntamaso marë'” itërin. Ina quëran taantarin:

“Ca hui'nahuë inaso'. Caso' ina pa'pinco,” tënin. Co inso anquëni tëranta' ina pochin nontërinhuë'.

<sup>6</sup> Hui'nin chachin nipirinhüë' isoro'paquë a'paimahuachina, chini chiníquën nanan quëtaton, tapon:

“Ya'ipi anquëniro'sarinta' ina chinochina',” tënin.

<sup>7</sup> Anquëniro'sa' yonquiatón, quiricanën quëran Yosë tapon:

“Anquëniro'saso' comisionëhuëpita. Cari camairahuë. Camaihuatëra, ihuan pochin a'naroáchin pa'pi.

A'naquën ca nohuanto, pën pochin nipi,” tënin.

<sup>8</sup> Hui'ninso nipirinhüë', noya noya acorin. Ina nontaton, itapon:

“Quëmanta' Yosënquën ni'quëhuarë', ya'ipi hua'anëntaran. Co onporonta' pipiaranhüë'. Piyapiro'sa' no'tëquënáchin pënënarán ni'ton, noya nicaponën.

<sup>9</sup> Noyasáchin yonquiarán. Co pi'pisha tëranta' oshahuanamaso' yonquiaranhüë'.

Napoaton noya ni'nanquën. Noya noya acoranquën ni'ton, ya'ipi nipayaransopita quëran noya noya cancantaran,” itërin Yosëri. Quiricanënquë ninshitopi.

<sup>10</sup> Ina quëran itantarin:

“Quëma Siniro iráca isoro'pa' acoran. Pi'iro'të', tayora, yoqui, inapitanta' acoran.

<sup>11</sup> A'na tahuëri ya'ipi inapitaso' ta'huantarin.

A'morëso mocarinso pochin nisapi.

Quëmaso nipirinhüë' ya'huëmiataran.

<sup>12</sup> A'morëso si'pirahuatë', të'yatërëso pochin ya'ipi ata'huantaran.

Nasha a'morëso pochin, ya'ipi nasha acoantaran.

Quëmaso nipirinhüë' co onporonta' ta'huantaranhuë'.

Co nishataranhüë'. Inachachin ya'huërápon,” itërin.

<sup>13</sup> Ina quëran hui'nin itantarin:

“Chiníquën nanantaton, inchinanëhuë quëran huënsëquë'

ya'ipi inimiconēnpita carinquēn minsēchinquēn,” itērin Yosēri.  
Co inso anquēni tēranta' ina pochin nontērinhuē'. <sup>14</sup> Inapitaso' inpriatonēnpita pochin ni'ton, Yosēri camairin. A'paimarin imarēhuasopita catahuainpoaso marē'. Yosē chachin nicha'ēsarinpoa'. Nani ina nitotērama'.

## 2

### *Ama Quisocriso nanamēn a'poahuasohuē'*

<sup>1</sup> Nani no'tēn nanan natanēhua' ni'ton, nanamēn na'con na'con yonquia'ahua', ama pēshonacaso marēhuē'. Ni'cona canpitanta' ina naniantotama'. <sup>2</sup> Irāca Yosēri anquēniro'sa' a'paimarin nanan sha'huitacaiso marē'. Natēcaso' ya'huērin ni'ton, co piyapi'sari natēhuachinahuē', Yosēri no'tēquēn ana'intērin. <sup>3</sup> Iporaso nipirinhue', Quisocriso a'paimarin noya nanan sha'huitiinpoaso marē'. Na'con nosoroatonpoa', yanicha'ērinpoa'. Hui'nin chachin ni'ton, co ina natēhuatēhuahuē', na'con na'con ana'intinpoaso' ya'huērin. Quisocriso chachin noya nanan sha'huirin. Ina quēran ca'tano'sanēnpitari natanahuatona', inachachin sha'huitaantarinhue'poa'. <sup>4</sup> Yosēri catahuarin ni'ton, ca'tano'sanēnpita nani ma'sha nanitapapi. Ina nohuanton, Ispirito Santori catahuarin nisha nisha nitotacaiso marē'. A'naya a'naya catahuarin Yosē nohuantērinso' nicacaiso'. A'naquēn catahuarin cania'piro'sa' a'naroáchin anoyatacaiso'. A'naquēonta' catahuarin Yosē yonquirinso chachin nitotacaiso marē'. Ina nicatēhua': “¡Ma noyacha Yosēri catahuarin paya! Ina nohuanton, no'tēquēn Yosē nanamēn sha'huitērinēnpoa',” tēnhua'.

### *Quisocriso isoro'paquē o'marinso'*

<sup>5</sup> Irāca quēran huarē' Yosē yonquihuachinpoara, co nohuantērinhuē' anquēniro'sa' hua'anēntinpoaso'. A'na tahuēri nasharo'pa' nipachin, co inapita hua'anēntarinēnpohuē'. Ina sha'huitaranquēma'. <sup>6</sup> Irāca a'na piyapi naporinso' Yosē quiricanēnquē ninshitopi:

“Topinan piyapicoi Siniro nipiraihuē', na'con yonquirancoi. ¿Onpoatonso' nimara na'con nosororancoi? tēnai yonquiatoi.

<sup>7</sup> Quēma nohuanton, co anquēniro'sa pochin chiníquēn nanantopiraihuē', co hua'quiya quēranhuē' chiníquēn nanan quētarancoi.  
Noya noya acoarancoi.

<sup>8</sup> Ya'ipi ma'sha hua'anēntarai,” itērin. “Ya'ipimiáchin hua'anēntarai,” topirinhue', iporaso' co piyapinpoa' ya'ipi ma'sha hua'anēnchátērarēhuahuē'. <sup>9</sup> Quisososo nipirinhue' yonquia'ahua'. Inaso' isoro'paquē o'maton, piyapi chachin nasitimarín. Parisitaton, canpoa marē' chiminin. Napoaton Yosēri chiníquēn nanan quētērin ya'ipi hua'anēntacaso marē'. Inaora nohuanton, Yosē nosoroatonpoa', hui'nin a'patimarinpoa' ya'huērētinpoaso marē'. Ya'ipi piyapinpoa marē' chiminin.

### *Quisocriso parisitērinso'*

<sup>10</sup> Yosēri ya'ipiya ninin. Inasáchin yonquicaso marē' nininpoa'. Ina nohuanton, hui'nin parisitērin huēntonēnquē aya'coinoaso marē'. Na'aquēnpoa' imarēhua'. Imapatēhua', anoyacancantērinpoa'. Hui'ninpoa' pochin Yosē ni'ninpoa'. Quisocriso parisitērin ni'ton nanitērin nicha'ēinpoaso'. Napoaton, “noya parisichin,” tēnin Yosē. Nosoroatonpoa', naporin. <sup>11</sup> Anoyacancantohuachinpoara, hui'ninpoa' pochin ni'ninpoa'. Canpoarinta' “Tata” itērēhua'. Napoaton Quisocriso co tapanatonhuē', iinpoa' pochin ni'ninpoa'. <sup>12</sup> Quiricanēnquē naporin:

“Piyapi'sa' iyahuēpita pochin ni'nahuē. Quēma nanamēn, Siniro, a'chintarahuē. Niyontonpatēira, yonquiatēinquēn, cantarai,” tēnin.

<sup>13</sup> Inanta' piyapi ni'ton, itaantarín:

“Canta' Tata Yosē natērahuē. Co naniantarincohuē', tēnhuē,” tēnin.

Ina quëran itaantaran:

“Yosë nohuanton, a'naquën piyapi'sa' imasarinaco. Inapitanta' Yosë hui'ninpita pochin ni'nahuë,” tënin.

<sup>14</sup> Piyapinpoa' ni'ton, nonënpoa' ya'huëtërinpoa'. Napoaton Quisocristonta' o'mahuachina, piyapi chachin nasitimarín. Inanta' nonën ya'huëtërin. Piyapi chachin niquimatón, chiminín. Canpoaso' sopai natëtëhua', oshahuanëhua' ni'ton, chiminarëhua'. Quisocristoso nipirínhuë' oshanënpoa marë' chiminín. Canpoa marë' chiminatón, sopai minsërin. <sup>15</sup> Iráca quëran huarë' chimirin të'huatërehua'. “Chiminaríhua' nimara,” ta'tëhua', të'huarë'quënpoa chachin ya'huápirëhuahuë', Quisocristoso' nicha'ërinpoa'. Ina imapatëhua', co huachi të'huatacaso' ya'huërinhuë'. <sup>16</sup> Co anquëniro'sa' catahuacaso marë' o'marinhuë'. Piyapinpoa' catahuarinpoa' cha'ëcaso marë'. Apraan pochin noya cancantohuatëhua', catahuarinpoa'. <sup>17</sup> Napoaton isoro'paquë o'maton, piyapi chachin nasitimarín. Co piyapi pochin nasitërinhuë' naporiní, co catahuainpoaso' nanichitonhuë'. Piyapi pochachin inanta' ni'ton, noyá nohuitërinpoa'. Corto hua'an chini chiníquën nanantërinso pochin nicatón, canpoa marë' Yosë nontarin nanan anoyatinpoaso marë'. Nosoroatonpoa', chiminín oshanënpoa' inquitinpoaso marë'. Inaso' co nonpintërinpoahuë'. <sup>18</sup> Inanta' sopairi tënihuachina, parisitërin ni'ton, yanonpintërinso' ninatanin anta'. Napoaton sopai yaminsëhuachinpoa', ina nanitërin catahuainpoaso'. Catahuarinpoa' ama sopai natëcaso marëhuë'.

### 3

#### *Moisësë quëran noya noya nininso'*

<sup>1</sup> Imarama' ni'ton, Yosë anoyacancantërinquëma'. Huëntonënuquë aya'coninquëma'. Napoaton iyaro'sa' Quisocristo na'con yonquico'. Yosëri a'paimarin nanamën a'chintinpoaso marë'. Corto hua'an chini chiníquën nanantërinso pochin acorin. Ina nohuanton, imarëhua'. <sup>2</sup> Yosëri acohuachina, no'tëquën natërin. Iráca Moisësënta' Yosë natëton, ya'ipi piyapinënpita catahuarin. <sup>3-4</sup> Quisososo nipirínhuë', Moisësë quëran chini chiníquën nanantërin. Ni'co'. Yapëihuachinara, co pëi' inaora ya'huërinhuë'. Piyapiri nipachina, inari hua'anëntërin. Inapochachin Yosëri ya'ipiya ninin ni'ton, ya'ipi hua'anëntërin. Quisocristonta' Yosë hui'nin ni'ton, chiníquën nanantatón, ya'ipi hua'anëntërinpoa'. <sup>5</sup> Moisësëso' inpriatonën pochin ninin. Yosëri acorin coti'oro'sa' pënënacaso marë'. Ma'sona tëranta' sha'huitohuachina, inachachin piyapi'sa' sha'huitantarín. <sup>6</sup> Quisocristoso nipirínhuë' co inpriatohuë'. Yosë hui'nin chachin ni'ton, chini chiníquën nanantërin. Pa'pin natëton, nóya hua'anëntarinpoa huachi. Napoaton chiníquën cancantatëhua', chiminaquë huarë' Quisocristo natëahua'. “Co naniantarínpoahuë',” ta'tëhua', noya cancantahua'. Imamiatohuatëhua', piyapinënpita chachin nisarihua'.

#### *Asanocancaninpoaso'*

<sup>7</sup> Napoaton iyaro'sa' yonquico'. Iráca Ispirito Santo nohuanton, Yosë noninso' quiri-canënuquë ninshitopi:

“Ipora tahuëri Yosë nontarinquëma'. Natanpatama', noya natëtoco'.

<sup>8</sup> Ama naniantocosohuë'. Iráca Moisësëri israiro'sa' quëpahuachina, shimashonënpoa' co natëtóchináchinhuë' cancantopi.

Inotëro parti ya'huasoí, na'con catahuapirahuë', co natërinacohuë'.

<sup>9</sup> Tënihuachinaconta', ahuantërahuë'.

Catapini shonca pi'ipi nani ma'sha sacai' nininso nipirahuë', co yanatërinacohuë'. ‘Co Yosë catahuarinpoahuë', ta'tona', a'naquën a'porinaco.

<sup>10</sup> Napoaton inapita no'huito, napotërahuë':

Isopita co onporonta' natërinacohuë'.

Co yanohuitërinacohuë'. Co iranëhuë pa'topihuë' ni'ton,



11 no'tèquèn sha'huitèrahuë. Noyaro'paquë ya'huëcaiso marë' yaquëtopirahuë', co imarinacohuë' ni'ton, co huachi nohuantèrahuë'.

Co onporonta' inaquë ya'huëcontapihuë'. Co inaquë sano cancantapihuë', ténin Yosë.

12 Canpitanta' iyaro'sa' a'nayanquëma tëranta' co cancanëma quëran huarë' natèhuatamahuë', co noya cancantaramahuë'. Ni'cona Yosë chachin a'potama'. Inaso', iporahuanta' nanpitan ni'sárinpoa'. 13 Napoaton nani tahuëri nipënenco'. Ipora chachin co'huara ayaro' tahuëri naniyatërasohuë', nicatahuaco' ama oshahuanacaso marëhuë'. Ni'cona oshanëma' ano'quihuachinquëma'. Inapotohuachinquëma', oshaquëran Yosë naniantarama' ni'ton, co natëtochináchinhuë' cancantarama'. 14 Iráca Quisocriso natërëhua'. Chiminaquë huarë' noya imahua'. Co a'pohuatëhuahuë', Quisocrisorë'quënpoa' ya'huëcontarihua'.

15 Quiricanënuë naporin:

“Ipora tahuëri Yosë nontarinquëma'. Natanpatama', noya natëtoco'.

Iráca shimashonëmapita co natëtochináchinhuë' cancantopi. Ama inapita pochin cancantocohuë', ténin.

16 ¿Inpitata' natanaponaraihuë', co yanatëpihuë'? Co'ta cotioro'sa chachin napopi. Moisésëri Iquipito quëran ocoirahuaton, quëpapurinhuë', co yanatëpihuë'. 17 ¿Insopitata' catapini shonca pi'ipi Yosëri co noyahuë' ni'nin? Co'tana inapita chachin oshahuanpi ni'ton, no'huiton, ana'intërin. Inotëro parti chachin ya'ipiya chiminpi.

18 Co'huara chimiyantërasoihuë', Yosëri sha'huitërin: “Noyaro'pa' yaquëtopiranquëmahuë', co natëramacohuë' ni'quëhuarë', co onporonta' inaquë ya'huëcontaramahuë', Co inaquë sano cancantaramahuë'. Ca Yosëco ni'to, no'tèquèn sha'huitaranquëma',” ténin.

19 “Co Yosë nanitërinhuë' nicha'ëinpoaso',” topiso marë' co Yosëri catahuarinhuë'. Co ya'conpihuë' ni'ton, co sano cancantopihuë'.

## 4

1-2 Yosë nani sha'huitërinpoa'. “Ipora huanta' yacatahuaranquëma' sano cancantacamaso marë',” itërinpoa'. Noya nanan nani natanëhua'. Iráca natanpirinahuë', co natëpihuë'. “Yosë no'tèquèn nontërinpoa',” co topihuë'. Topinan quëran natanpi ni'ton, co Yosëri anoyacancantërinhuë'. Ni'cona canpitanta' topinan quëran natantama'. Co natèhuatamahuë', co sano cancantaramahuë'. 3-4 Iráca Yosëri itërin:

“Co cancanëma quëran huarë' yaimaramacohuë' ni'ton, no'huiranquëma'. Co onporonta' sano cancantaramahuë', ténahuë. Ca Yosëco ni'to, no'tèquèn sha'huitaranquëma',” itërin.

Canpoaso nipirinhuë' cancanënpoa quëran huarë' imapatëhua', huëntonënuë chachin aya'coninpoa'. Ina quëran sano cancantarihua'. Sano cancantohuatëhua', co huachi nisha nisha yonquiarihuahuë'. Yosëso' isoro'pa' ténirahuaton, chinotërin. Quiricanënuë sha'huitërinpoa':

“Iráca Yosëri isoro'pa' ninin. Saota tahuëri quëran nani ya'ipi tiquihuachina, tahuëririnque sano cancantaton, chinotërin,” ténin.

5 Naquëranchin quiricanën quëran tantarin:

“Co onporonta' ya'conatona', ca pochin sano cancantapihuë',” ténin.

6 Cotioro'sa'ton noya nanan natanaponaraihuë', co natëpihuë' ni'ton, co ya'conpihuë'. Napoaton ipora huanta' Yosë yonquiarin piyapi'sa' asanocancantacaso'. Iráca quëran huarë' yonquirinpoa' asanocancainpoaso'. 7-8 Moisésë chiminpachina, Cosoiri is-rairo'sa' hua'anëntantarin. Noyaro'paquë quëpapurinhuë'. “Ya'conpatoí, sano cancantarai huachi,” topirinahuë', co sano cancantopihuë'. Iráca Yosëri sha'huitërin. “Piyapi'sa' asanocancantarahuë',” itopirinhuë', co cotioro'sa' ina pochin cancantopihuë'. Ina quëran na'a pi'ipi na'huërin piquëran Tapi tapon:

“Ipora tahuëri Yosë nontarinquëma'. Natanpatama', noya natëtoco'. A'naquë co natëtochináchinhuë' cancantopi. Ama inapita pochin cancantocohuë',” ténin.

Cosoiri asanocancantërin naporini, co ina pochin Yosëri pënëintonhuë'. <sup>9</sup> Napoaton ipora huanta' Yosë nohuantërin asanocancainpoaso'. Yosë anoyacancantohuachinpoa', sano cancantarihua'. <sup>10</sup> Iráca isoro'pa' tiquihuachina, Yosë chinotaton, sano cancantërin. Canpoanta' cancanënpoa quëran imapatëhua', inapochachin sano cancantarihua'. Yosë noya nohuitarihua'. <sup>11</sup> Napoaton na'con yonquia'ahua' Yosë huëntonënquë ya'conacaso marë'. Iráca co natëtonahuë', co imamiatopihuë'. Ama inapita pochin cancantahuaso-huë'.

<sup>12</sup> Yosë nanamën chiníquën nanantërin. Yosë nanpiárin ni'ton, ipora huanta' quiri-canën quëran nontarinpoa'. Noya natëhuatëhua', nanamën quëran chachin catahuar-inpoa' noya noya imacaso marë'. Co'so' natëhuatëhuahuë', aquë aquëtë' co noy-ahuë' cancantarihua'. Sahuëni cato quëran chachin to'nahuatëra, inëshin ni'ton, niahuëpatëra, a'naroáchin nansë acopoquë huarë' nipë'sharë'. Inapochachin Yosë nanamënso' chini chiníquën ya'coancantërinpoa'. Ina yonquihuatëhua', no'tëquën nitotarihua'. Ya'ipi yonquirëhuaso chachin anitotërinpoa'. Yonquinënpoaquë ma'marësona naporëhuasopitanta' anitotaripoa'. <sup>13</sup> Ya'ipi ninëhuasopita Yosëso' nitotërin. Po'oana quëran nipirëhuahuë', ya'ipi ni'ninpoa'. Co pi'pisha tëranta' inaso' nonpintarihuahuë'. Ya'ipi yonquirëhuasopitanta' noyá nitotërin. Ayaro' tahuëri ya'ipinpoa' ninëhuasopita aipitaripoa'. Naporo' coisë pochin nontarinpoa'. Nontohuachinpoa', no'tëquën sha'huitacaso' ya'huapon.

*Corto hua'an chini chiníquën nanantërinso pochin nininso'*

<sup>14</sup> Iporaso' Quisoso imarëhua'. Yosë hui'nin chachin inaso'. Nani inápaquë panantarahuaton, Yosë'pa' ya'huarin. Corto hua'an chini chiníquën nanantërinso pochin Yosëri acorin catahuainpoaso marë'. Napoaton ama ina naniantatëhuahuë', imami-atahua'. <sup>15</sup> Inaso' ya'ipinpoa' noyá nohuitërinpoa'. Sopai yaminsërinpoasonta' nitotërin. Co chiníquën cancantërehuahuë' ni'ton, sopai sha'huitarinpoa' ama Yosë natëcaso marëhuë'. Quisosonta' isoro'paquë nipon, sopairi na'con yanonpintaton, nisha nisha sha'huitopirinhue' minsëcaso marë', co inaso' sopai natërinhuë'. <sup>16</sup> "Tëhuëchachin nosoroatonpoa', catahuarinpoa'," ta'tëhua', apira apira Yosë nontahua'. Nontohuatëhua', oshanënpoa' inquitarinpoa'. Ma'sha onpohuatëhua', ina nontohuatëhua', inaora nohuanton, catahuarinpoa' noya ahuantacaso marë'.

## 5

<sup>1</sup> Iráca Yosëri a'naya a'naya corto hua'an chini chiníquën nanantërinso' acorin ina marë' sacatacaso'. Inanta' piyapi niponahuë', a'napita piyapi'sa marë' Yosë nontërin. Co noyahuë' nipachinara, chinotopiso pëiquë ma'sha quëpapi. Inaquë corto hua'ani tëparin oshanëna marë'. Ama Yosëri ana'intacaso marëhuë' inaporin. <sup>2</sup> A'naquën piyapi'sa' co aquëtë' nitotatonahuë', co noyahuë' nipi. Inapita huë'pachinara, corto hua'ani co chiníquën nontërinhuë'. Inanta' piyapi ni'ton, sopairi yaminsërin. Napoaton sanoanan quëran pënënin. <sup>3</sup> Inanta' oshahuanin ni'ton, inaora oshanën marë'ton ma'sha tëpacaso' ya'huërin. Ina quëran a'napita oshanëna marënta' ma'sha tëpaantarin.

<sup>4</sup> Co inaora nohuanton, corto hua'an ya'coninhuë'. Yosë nohuanton, ya'conin. Iráca Aaron'ton Yosëri acorin. <sup>5</sup> Quisocristonta' co inaora nohuanton, corto hua'an chini chiníquën nanantërinso' ya'coninhuë'. Yosëri noya nicon, itapon:

"Quëmaso' hui'nahuë chachinquën.

Ipora chachin acoaranquën piyapi'sa' anohuitancoso marë'," itërin. Quiricanënquë chachin naporin.

<sup>6</sup> Ina quëran quiricanën quëran itaantarin:

"Na'a corto hua'ano'sa' ya'conpirinhue', quëmaso' noya noya acoaranquën. Ya'ipi piyapi'sa marë' nontaranco.

Miriquiso pochin nisaran. Co onporonta' pipiaranhue'," itërin.

<sup>7</sup> Quisocristo isoro'paquë o'marahuatón, piyapi chachin nasitimarin. Yatëpahuachinara, chiníquën Yosë nontërin. Na'nëton, itapon: “Quëma nohuantohuatan Tata, nicha'ëco, ama tëpa'inacosohuë'. Nipirinhüë', co quëma nohuantohuatanhuë', ma'sona yaonpotohuatanconta' noya,” itërin. No'tëquën yanatërin ni'ton, Yosëri natanaton, catahuarin noya natëcaso'. <sup>8</sup> Yosë hui'nin chachin niponahuë', piyapi pochachin parisitërin. Co oshahuanaponahuë', piyapi ni'ton, parisitërin quëran noyá nitotërin Yosë natëcaso'. <sup>9</sup> No'tëquën natëton, canpoa marë' chiminin. Napoaton nanitërin anoyacancantinpoaso'. Ina natëhuatëhua', noya nicha'ësaripoa' nanpimiatacaso marë'. <sup>10</sup> Yosë nohuanton, Quisocristo corto hua'an chini chiníquën nanantërinso pochin ya'conin. Miriquiso pochin ninin.

*Ama Yosë a'pocaiso marëhuë' pënëninso'*

<sup>11</sup> Iráca ninopiso' na'con yaa'chintopiranquëmahüë'. Co natantochináchinhuë' cancantatoma', co yanatantëramahuë' ni'ton, sacai' a'chinta'huanquëmaso'. <sup>12</sup> Hua'qui Yosë nanamën natanapomarahüë', co nanitëramahuë' Yosë no'tëquën natëcamaso'. Noya yonquiatoma', a'napita a'chintacamaso nipirinhüë', co no'tëquën yonquiyatëramahuë'. Ya'nan a'chintëranquëmaso' naquëranchin a'chintanta'huanquëmaso' ya'huërin. Co inapita tëranta' cancanëma quëran huarë' yanatëramahuë'. Hua'huaro'sa pochin cancantatoma', co nanitëramahuë' ya'ipi Yosë nanamën yonquicamaso'. Ni'co'. Canopia'huaya sho'shoráchin yonquirin. Co nanitërinhuë' coshatacaso'. <sup>13</sup> So'soquë huarë' coshatërin. Canpitaso' co noyahuë' yonquiatoma', canopia'huaya pochin yonquiconama'. Co nanitëramahuë' no'tëquën yonquicamaso'. <sup>14</sup> Chinotono'saso nipirinhüë', cosharomia ca'pi. Inapochachin noya noya imapisopitaso' no'tëquën yonquiapi. Noya nicacasos' no'quitona', co noyahuë' nininso' a'naroáchin a'porapi.

## 6

<sup>1</sup> Napoaton noya so'sorinso pochin noya noya imahua'. Ya'ipi Quisocristo nanamën yonquia'ahua'. Ya'nan a'chintohuatëinquëmara, co sacaihuë' nininsopita'ton a'chintërainquëma'. “Co noyahuë' nipatama', parisitopiquë pacacasos' ya'huërin ni'ton, ya'ipi co noyahuë' yonquiramasopita naniantoco'. Naporahuaton, Yosëichin natëco'” itërainquëma'. <sup>2</sup> Ina quëran aporihuanacasonta' a'chintërainquëma'. Naporahuaton, “Nani imapachina', së'huamotorahuatoma', Yosë nontoco' inari catahuacaso marë'” itërainquëma'. Ina quëran Yosë ananpitaantainpoaso ya'huërinsona' a'chintërainquëma'. “Ayaro' tahuëri ya'ipinpoa' no'tëquën sha'huitarinpoa'. Co noyahuë' nipsisopita ana'intomiatarin,” itërainquëma'. Ya'nan imapoma', inapita'ton anitotërainquëma'. Inaso' noya nipirinhüë', co inaíchin yonquicasos' ya'huërinhuë'. <sup>3</sup> Ya'ipi Quisocristo nanamën yonquia'ahua' noya noya imacaso marë'. Yosë nohuantohuachin, oshaquëran ina a'chintanta'inquëma'.

<sup>4</sup> Ama Quisocristo a'pocosohuë'. Ina a'pohuatama', co nanitërinhuë' anoyacancantinquëmaso'. A'naquën Quisocristo nanamën nani nitotopi. “Quisocristo nicha'ësaripoa'” ta'tona', imapi. Cosharo' pi'nirëso pochin pi'pian nohuitopi. Ispirito Santori chachin catahuarin. <sup>5</sup> Yosë nanamën noya natanpi. Yosë chiníquën nanantaton catahuarinsona' nicaponaraihuë', <sup>6</sup> Quisocristo a'pohuachina', ¿incaricha anoyacancantëre'poiya? Co huachi nanitapihuë' cha'ëcaiso'. Yosë hui'nin chachin canpoa marë' chiminin. Co ina nohuantohuachinahuë', naquëranchin corosëquë patanantopiso pochin cancantapi. Ina a'pohuachina', piyapisari Quisoso tëhuapona'. <sup>7</sup> Ni'co'. Ya'pirin sha'patëra, o'nan ya'huëhuachina, papotërin. Hua'anënso' inaquë sacatarin. Noya nitohuachina, noya cancantërin. “Yosë nohuanton, noya papotërin,” tënin. <sup>8</sup> Nipirinhüë', nahuan, shihuarin, inapitasáchin papotohuachina, co manta' nitërinhuë'. “No'pa' napoonin,” topatëra, tananpitëre huachi. Inapochachin Yosë na'con catahuarinpoa'. Noya imapatëhua', Yosë noya ni'sarinpoa'. A'naquënso nipirinhüë' nahuan, shihuarin, inapita papotërinso

pochin nicatona', topinan quëran ya'huëpi. Co Yosë yonquipihuë'. Inapitaso' Yosëri tananpitërin. A'na tahuëri parisitopiquë a'parahuaton, pën quëran ana'intarin.

### *Co Yosë naniantërinpoasohuë'*

<sup>9</sup> Chiníquën iyaro'sa' pënënpiranquëmahuë', nosororanquëma'. Co Yosë a'poaramahuë'. Noya imatoma', cha'ësarama' ténahuë. <sup>10</sup> Yosë co topinan ana'intarinquëmahuë'. Iráca noya ninama'. Imapisopita nosoroatoma', catahuarama' noya imacaso marë'. Ipora huanta' noya ninosoroarama' ni'ton, co Yosë naniantarinquëmahuë'. <sup>11</sup> Chiníquën cancantatoma', ya'ipinquëma' imamiatoco'. “Yosë co naniantaripoahuë'. A'na tahuëri ya'huërin'pa' quëpantarinpoa',” ta'toma', chiminaquë huarë' nóya imaco'. <sup>12</sup> Ama amito-marahuë', na'con Yosë yonquico'. Noya natëpisopita nonanco'. Inapitaso' imamiatapi. “Yosë no'tëquën nontërinpoa',” ta'tona', noya natëapi. Ma'sha onpoaponaraihuë', noya ahuantapi. Iráca Yosëri sha'huitërinso chachin ninapi.

<sup>13-14</sup> Apraan yonquico'. Iráca Yosëri itërin: “Caso' Yosëco ni'to, no'tëquën nontëranquën. Quëma na'con catahuaaranquën. Ca nohuanto, a'na tahuëri hui'nán ya'huëtarinquën. Naporahuaton, oshaquëran notohuaro' shiparinpitanta' ya'huëtarinquën,” itërin. Yosëso' chini chiníquën nanantërin. Co a'na' ya'huërinhuë' ina quëran chini chiníquën nanantërinso'. Napoaton: “Caso' Yosëco ni'to, no'tëquën nontëranquën,” itërin. <sup>15</sup> Itohuachina, Apraani Yosë natërin. Hua'qui' co hui'nin ya'huëtopirinhue', noya cancantaton, ninarárin. “Co Yosë nonpintërincohuë’,” ta'ton, natërin. Napoaton napoin quëran hui'nin nasitërin. <sup>16</sup> Co piyapi yanatëhuachinpoarahue', “Yosë ni'sárinco, no'tëquën nontëranquën,” ténëhua'. Ina pochin nontohuatëhua', natërinënpoa'. “No'tëquën nontërinpoa',” topi. <sup>17</sup> Yosë co onporonta' nonpintërinpoahuë'. Sha'huitërinpoaso' co onporonta' nishatërinhuë'. Napoaton noya nanan sha'huitohuachinpoa': “Caso' Yosëco ni'to, no'tëquën nontëranquëma'. Nicha'ësaranquëma',” itërinpoa'. <sup>18</sup> Yosë chachin sha'huitërinpoa'. Naporahuaton “Caso' Yosëco ni'to, no'tëquën nontëranquëma',” itomantaripoa'. Napoaton co onporonta' nonpintaripoahuë'. Co pi'pian tëranta' nishataponhuë', ténëhua'. Ina yonquiatëhua', chiníquën cancantahua'. Iráca Yosëichin imarëhua' catahuainpoaso marë'. “Nicha'ësarinpoa',” ta'tëhua', ya'ipi cancanënpoa quëran imahua'. <sup>19</sup> Ni'co'. Nanchaquë pa'pachinara, a'na tahuëri panca ihuan nacapipi. Chiníquën co'sacaitërin. Naporo' hua'na quëquën nininso' a'sonahuatona', të'yaitopi. Acopoi' no'paquë ni'toromahuachina, sano yanponin. Co co'sacairi tëranta' chi'huincarinhue'. Inapochachin canpoanta' a'na tahuëri ma'sha onporëhua', parisitërehua', sëtërehua', naporëhua'. Inapohuatëhua', Yosë yonquia'ahua'. “Inaso' no'tëquën nontërinpoa'. Nicha'ësarinpoa'. Co onporonta' naniantaripoahuë’,” topatëhua', sano cancantarihua'. Yosëso' co quënanarihuarahue', inápaquë ya'huárin. Ina yonquiatëhua', ninarëhua'. <sup>20</sup> Quisoso'ton nani inápaquë panantarin tapatinpoaso marë'. Inaquë ya'huëmiatarin. Corto hua'an chini chiníquën nanantërinso pochin ni'ton, canpoa marë' Yosë nontarin. Miriquiso pochin ninin. Co onporonta' pipiarinhue'.

## 7

### *Quisocriso Miriquiso pochin nininso'*

<sup>1</sup> Miriquisoso' iráca ya'huërin. Co cotio piyapihuë' niponahuë', noya Yosë imarin. Sarimoquë ya'huëpisopita hua'anëntërin. Naporahuaton, Yosë nohuanton, corto hua'an ya'conin. Piyapi marë' Tata Yosë nontërin. Iráca Apraani nohuitërin. Inimico copirnoros' sa' minsërahuatón, o'mantahuachina, Miriquisori nacapirin. Nacapirahuatón, Apraan noya nontërin. Ina quëran corto hua'an ni'ton, Yosë nontërin Apraan noya noya ya'huëcaso marë'. <sup>2</sup> Nani nontohuachina, Apraani nani ma'sha canarin quëran diesmo Yosë marë' acorinso' quëtërin. Miriquisoso' nóya hua'an. Nininën chachin “hua'an noya nicacaso' yonquirinso'” tapon naporin. Naporahuaton, Sarimo hua'an



ni'ton, "hua'an sano cancantërinso'" tapon naporin. <sup>3</sup> A'shin, pa'pin, shimashonënpita, inapita co nohuitërehuahüë'. Onporosona nasitërinso', onpo pi'ipi quëransona chininso', inapita co nitotërehuahüë'. Co Yosë quiricanën quëran sha'huitërinpoahuë'. Piyapi marë' Yosë nontárin. Co Yosëri ocoirinhüë' ni'ton, pi'pian Yosë hui'nin pochin ni'nin. Nanpiárin pochin cancantërehua'.

<sup>4</sup> Iráca na'a corto hua'ano'sa' ya'huëpirinahuë', cotioro'saráchin ya'conpi. Miriquisoso nipirinhüë' nisha piyapi. Co cotio quëmapihuë' niponahuë', a'napita corto hua'ano'sa quëran chini chiniquën nanantërin. Apraani noya ni'nin. Apraan'ton Yosëri acorin piyapinënpita nicacaso marë'. Inaso' chiniquën nanantërin, tënëhua'. Napoaponahuë', inimiconënpita ma'shanëna' matërin quëran, diesmo ocoirinsó' Miriquiso quëtërin. Inaso' corto hua'an ni'ton, ma'parin. <sup>5</sup> A'na cotio huënton Nihuiro'sa' itopiso'. Iráca Yosë nohuanton, Moisësëri sha'huitërin. "Nihuiro'saráchin corto hua'an ya'coina'. Inapita chinotopiso pëiquë pa'pachina', piyapi marë' Yosë nontapi," itërin. Ina quëran piyapi'sa' itantarin: "Yosë nohuanton, nani ma'sha ya'huëtarinquëma'. Napoaton diesmo quëtoco'. Corto hua'an ma'pahuachinquëma', quëtoco'," itërin Moisësëri. Quëmopinënpita niponahuë', Yosë nohuanton, ma'parin. <sup>6</sup> Miriquisoso' co cotio quëmapihuë' niponahuë', diesmo Apraan ma'parin. Naporahuaton, ina marë' Yosë nontahuaton, "Yosë noya catahuainquën," itërin. Yosëri chachin Apraan nani sha'huitërin noya catahuacaso marë'. <sup>7</sup> "Chini chiniquën nanantohuatëra, a'napita marë' Yosë nontëre', 'Yosë noya catahuainquën,' itëre'," tënëhua'. Napoaton Apraan quëran Miriquisoso' chini chiniquën nanantërin. <sup>8</sup> Isoro'paquë corto hua'ano'sari diesmo ma'patopirinahuë', inapitanta' piyapi'sa' ni'ton, chiminpi anta'. Miriquisoso nipirinhüë' nanpiarin pochin cancantërehua'. Yosë quiricanën nontërehua' quëran, naporëhua'. <sup>9-10</sup> Nihuiro'saso nipirinhüë' Apraan shinpita. Corto hua'an ya'conpi ni'ton, diesmo ma'patopirinahuë', co Miriquiso pochin chiniquën nanantopihuë'. Co'huara Nihui shinpita nasichátëraponahuë', Apraani Miriquiso quënanahuaton, diesmo quëtërin. Nihuiro'sa' ya'huërenamën quëtërin.

<sup>11</sup> Iráca Aaron'ton corto hua'an ya'conin. Ina quëran a'naya a'naya Nihuiro'sa' huënton quëran niya'huëretëra'piapi. Naporó' Yosëri, pënëntërinso' nanan sha'huitërin ya'ipi israiro'sa' imacaiso marë'. Nihui corto hua'ano'sa' nanan anoyatërinënpoa' naporini, ¿ma'marëta' a'na corto hua'an Miriquiso pochin nininso' huëcacasó' ya'huëitonhuë'? <sup>12</sup> Nisha corto hua'an ya'conpachina, nisha nanan pënëninpoa'. <sup>13-14</sup> Quisocristoso' co Nihui huëntonquë nasitërinhuë'. Cota huëntonquë nasitërin. Inapitaso' co onporonta' corto hua'an ya'conpihuë'. Co ina pochin Moisësë pënëntërinhuë'. Napoaton Quisocristo co corto hua'an ya'coninhüë', tënahüë.

<sup>15</sup> Inaso' isoro'paquë o'marin ni'ton, nasha nanan sha'huitërinpoa'. Corto hua'an pochin canpoa marë' Yosë nontárin. Miriquiso pochin co onporonta' pipiarinhüë'. Ina yonquihuatëhua', naporinsó' no'tëquën anitotërinpoa'. <sup>16</sup> Co Nihuiro'sa' huënton quëran ya'conpiso pochin nininhüë'. Inaso' chiminaponahuë', nanpiantarahuaton, ya'huëmiatarin. Napoaton chiniquën nanantaton, noya noya ya'conin. <sup>17</sup> Yosë quiricanën quëran naporin:

"Na'a corto hua'ano'sa' ya'conpirinahuë', quëmaso' noya noya acoaranquën inapita ya'huëretacaso marë'.

Ya'ipi piyapi'sa marë' nontaranco. Miriquiso pochin nisaran. Co onporonta' pipiarinhüë'," itërin Yosëri.

<sup>18</sup> Iráca corto hua'ano'sa' pënëntërinso' nanan imapirinahuë', co oshanëna' inquietërinhuë'. Co tëhuëchachin catahuarinhuë'. Napoaton co imacaso' ya'huërinhuë'.

<sup>19</sup> Moisësë pënëntërinso' nanan co manta' anoyatërinhuë'. Quisocristoso nipirinhüë' anoyacancantërinpoa'. Anoyacancantohuachinpoa', nanitërehua' Yosë nohuitacaso'. Huëntonënuë chachin aya'coninpoa'. Inaso' noya noya, tënëhua'.



<sup>20-21</sup> Iráca na'a cotioro'sa' corto hua'an ya'conpi. Yosëri acopirinhüë', co ya'huëmiatopihuë'. Nipirinhüë', Quisocristo yaa'paimahuachina, itapon:

“Caso' Yosëco ni'to, no'tëquën nontaranquën.

Ipora quëran huarë' corto hua'an chini chiniquën nanantërinso pochin nicon, piyapi marë' nontaranco huachi.

Ya'huëmiataran. Co onporonta' nisha acoaranquënhüë' itërin Yosëri.

<sup>22</sup> Napoaton Quisocristoso', nasha quëran canpoarë' anoyatërin. Co nonpintarinpoahuë'. Co onporonta' nisha sha'huitarinpoahuë'. Ina anoyatërinpoaso' noya noya. Pënëntërinso' nanan iráca imapisoso', co onpopinchin noyahuë'. <sup>23</sup> Iráca na'a corto hua'ano'sa' ya'conpirinahuë', niya'huërëtëra'piapi. A'na chiminpachina, a'na ya'coantarín. Ina chimiantahuachina, a'nanta' ya'coantarín. <sup>24</sup> Quisocristoso nipirinhüë' nanopiantarahuatón, ya'huëmiatërin ni'ton, canpoa marë' Yosë nontárin. Co incari tëranta' ya'huërëtërinhuë'. <sup>25</sup> Napoaton nanitërin noyá nicha'ëinpoaso'. “Quisocristoíchin anoyacancantërinpoa'” ta'tëhua', Yosë imarëhua'. Iporahuanta' Quisocristo nanopiárin catahuainpoaso marë'. Nani tahuëri canpoa marë' Yosë nontárin.

<sup>26</sup> Quisocristoíchin nanan anoyatërinpoa'. Inaso' corto hua'an chini chiniquën nanantërinso pochin nicon, nóya ninin. Co pi'pian tëranta' oshahuaninhüë'. Co në'huëtërinso pochin nininhüë'. Co oshahuano'sa pochin cancantërinhuë'. Inápaquë panantahuachina, Yosëri chini chiniquën nanan quëtërin. <sup>27</sup> Co inaso' a'napita corto hua'ano'sa pochinhüë'. Inapitaso' oshahuanatona', inahuara oshanëna marë'ton ma'sha tëpapi. Ina quëran piyapi'sa' oshanëna marënta' ma'sha tëpaantapi. Nani tahuëri naporápi. Quisocristoso nipirinhüë' co oshahuanatonhuë', co ma'sha tëpacaso' ya'huërinhuë'. Inaora nohuantón, canpoa' ya'huërënamënpoa' chiminin. A'naroíchin chiminatón, nanitërin ya'ipi oshanënpoa' inquitinpoaso'. <sup>28</sup> Iráca Moisésë pënëntërin quëran na'a quëmapi'sa' corto hua'an ya'cona'piapi. Inahuanta' co noyahuë' cancantatona', oshahuanpi. Ina piquëran Yosëso' hui'nin chachin acorin. “Co onporonta' nisha acoaranquënhüë'” itaton, oshanënpoa' inquitinpoaso marë' acorin. Inaso' noyasáchin ninin. Co onporonta' oshahuanaponhuë'. Napoaton nóya catahuarinpoa'.

## 8

### *Quisocristo nasha quëran anoyatërinso'*

<sup>1</sup> No'tëquën sha'huitaranquëma'. Quisocristo inápaquë panantarahuatón, Yosë inchinanën quëran chachin huënsërin. Corto hua'an chini chiniquën nanantërinso pochin ni'ton, nanan anoyatërinpoa'. <sup>2</sup> Iráca cotioro'sa' chinotopiso pëi' nipi Yosë chinotacaiso marë'. Inápaquë ya'huërinso chachin nonanpi. Inaquë corto hua'ano'sari piyapi'sa marë' Yosë nontopi. Quisocristoso nipirinhüë' inápaquë Yosëri acorinquë chachin canpoa marë' ina nontárin. Inaquëso' noya noya catahuarinpoa'.

<sup>3</sup> Iráca corto hua'ano'sa' ma'sha tëpapi piyapi'sa' oshanëna marë'. Quisocristoso nipirinhüë' inaora nohuantón, chiminin oshanënpoa' inquitinpoaso marë'. <sup>4</sup> Ipora huanta' isoro'paquë ya'huërin naporini, co corto hua'an ya'cointonhuë'. Cotioro'sa' iráca nanan imatona', corto hua'ano'sa' ya'huëtapi ma'sha tëpacaiso marë'. <sup>5</sup> Corto hua'ano'saso chinotopiso pëiquë Yosë marë' sacatopi. Inaso', inápaquë ya'huërinso chachin nonanpiso'. Iráca chinotopiso pëi' yanipachinara, Yosëri Moisésë itërin: “Chinotamacoso marë' në'mëtë pëi' nico”. Motopiquë a'notëranquënso chachin niquë’ itërin. <sup>6</sup> Quisocristoso nipirinhüë', Yosë ya'huërinquë chachin panantarahuatón, nanan anoyatërinpoa'. Cotioro'saso' iráca anoyatërinso imapirinhüë', Quisocristoso' nasha quëran anoyatërinso sha'huitërinpoa'. “Oshanëma' inquitatënhüëma', anoyacancantaranquëma'” itërinpoa' ni'ton, inaso noya noya, tënahüë.

<sup>7</sup> Iráca anoyatërinso natërëhua quëran noyápiachin cancantërëhua' naporini, co nasha quëran anoyatacaso ya'huëitonhuë'. <sup>8</sup> Iráca anoyatërinso imaponaraihuë', co noya cancantopihuë' ni'ton, quiricanën quëran Yosëri sha'huitërin:

“A'na tahuëri ca nohuanto,  
ya'ipi piyapinëhuëpitarë'co nasha quëran anoyatarahuë.

<sup>9</sup> Iráca inapitaso' Iquipito parti ya'huëpirinahuë',  
imiranpo quëran së'quërëso pochin nosoroato, nicha'ërahuë.  
Naporo' inapitarë'co anoyatopirahuë',  
co natantochináchinhuë' cancantopi ni'ton,  
tanapitërahuë,” ténin Yosë.

<sup>10</sup> Ina quëran itantarin:

“Tahuëri nanihuachin, nasha quëran anoyataantarahuë.  
Naporo' anoyacancantarahuë noya yonquicaiso marë'.  
Nasha cancan quëtarahuë ca pochin cancantacaiso marë'.  
Casáchin chinotarinaco ni'ton, noya a'paiarahuë.  
Ca pochin cancantatona', piyapinëhuëpita chachin nisapi.

<sup>11</sup> Iráca a'naya a'naya yanohuitohuachinacora, a'napitari a'chintopi.  
'Yosë nohuitoco', itopirinahuë', co ya'ipi nanamëhuë nitochátërapihuë'.

A'na tahuëriso nipirinhue' nitotapi. Nasha cancan ya'huëtohuachina', cancanëna quëran chachin nohuitarinaco.

Insopita tëranta' nasha quëran anoyatërahuëso imapachina', nohuitarinaco.

Hua'ano'sahuë nipon, topinan piyapi'sahuë nipon nohuantohuachina', nohuitarinaco.

<sup>12</sup> Na'con nosoroato, ya'ipi co noyahuë' yonquipisopita inquitarahue.

Co huachi oshanëna' yonquiarahuë,” ténin Yosë.

<sup>13</sup> Nasha quëran anoyatërinso quëtërinpoa. Inaso' iráca ya'huërinso' ya'huëretërin. Napoaton iráca anoyatërinso' naniantacaso' ya'huërin. Co huachi ina imacaso' ya'huërinhuë'.

## 9

### *Iráca chinotopiso pëi' nininso'*

<sup>1</sup> Iráca anoyatërinso sha'huitohuachina, Moisësë nani ma'sha sha'huitërin onporahuatonsona Yosë chinotacaiso marë'. Ina marë' chinotopiso pëi' nipi. <sup>2</sup> Në'mëtë', sha'huëtë', inapita quëran nipi. Cato' patoana ya'huërin. Ya'natimarinsoso', noya patoana itopi. Inaquë panca nanparin pochin nininso' ya'huërin. Misanta' ya'huërin. Inaquë pan acorin, Yosë marë' acopiso'. <sup>3</sup> Nëmëtëquë patonpiso' aquëtë', a'na patoananta' ya'huërin, noya noya patoana itopiso'. <sup>4</sup> Nëmëtë' ya'cariya a'na misa'huaya ya'huërin, oro quëran nipiso'. Inaquë yonarin pochin pimóchin nininso' a'pëpi tomontacaso marë'. Yosë caposonëonta' ya'huërin. Aipiran, acoporan, ya'ipi oro quëran achinpitopi. Caposo acopoana yonsha oro quëran nipiso' ya'huërin. Inaquë pi'pian cosharo' Yosëri inápa quëran a'paimarinso' po'morin, mana itopiso'. Aaron pitananëonta' inaquë po'morin. Inaso' noyá yaniponahuë', Yosë nohuanton, a'naroáchin papotantarin piyapinëpita yonquicaiso marë'. Naporahuaton, cato' na'pitëa'huayanta' inaquë acopi. Inaquë Yosë pënëntërinso' nani ninshitopi. Iráca anoyatërinso' itopiso'. <sup>5</sup> Caposo a'tanamënuquë cato' anquënia'huaya pochin nonanatona', acopi. Yosë huënaráchin nininso' ayonquiinpoaso marë' napopi. A'na inchinan quëran, a'na ahuënan quëran ninotëëpi. Naporahuaton anpianënëna quëran, caposo a'tanamën imotatë pochin nipi. Nisha nisha nininsopita a'chintaca'huanquëmaso' ya'huëpirinhue', co apira aquëtë' sha'huitaranquëmahuë'.

<sup>6</sup> Ina pochin ma'sha chinotopiso pëiquë acohuachinara, noya patoanaquëso' ya'ipi corto hua'ano'sa' ya'conpi. Nani tahuëri ya'conpi Yosë chinotacaiso marë'. <sup>7</sup> Noya noya patoanaquëso nipirinhue', co ya'ipi ya'conpihuë'. A'naíchin chini chiníquën nanantërinsoáchin ya'conin. Co ina tëranta' nani tahuëri ya'coninhue'. Nani pi'ipiquë

a'na tahuëriáchin ya'conahuaton, ma'sha huënainën quëparin. Inaora oshanën marë' quëparin. Naporahuaton, piyapi'sa' co yonquiatonahuë oshahuanpiso marënta' quëparin. <sup>8</sup> A'napita piyapi'saso' co onporonta' inaquë ya'conpihuë'. Ina yonquihu-atëhua', Ispirito Santo anitotërinpoa'. Iráca anoyatërinso' imapachina', piyapi'sa' co nani-topihuë' Yosë nohuitacaiso', tënëhua'. <sup>9</sup> Iporahuanta' ina yonquihuatëhua', nitotarihua'. Iráca pënëntërinso' co natëhuachinahuë', ma'sha tëpapi ama Yosëri ana'intacaso marëhuë'. Nipirinhüë', co ina marë' oshanën inquitërinhuë'. <sup>10</sup> Iráca nisha nisha cosharo' a'popi. Nisha nisha o'ocasonta' a'popi. Co noyahuë' nipachinara, "Oshanëhuë inqui'i," ta'tona', nisha nisha pa'mopi. "Inapotohuatëhua', Yosë noya ni'sarinpoa'," topirinahuë', co ina marë' noya cancantopihuë'. Yosëri nasha nanan sha'huitaton, anoyataquë huarë' inapocaiso' ya'huërin.

<sup>11-12</sup> Iporaso nipirinhüë', Quisocriso nani o'marin. Corto hua'an chini chiniquën nanantërinso pochin nicaton, nóya catahuarinpoa'. Co chinotopiso pëiquë ya'conaton, nanan anoyatërinpoahuë'. Co isoro'paquë nipiso pëiquë ya'coninhüë'. Co chipo, ohuaca'huaya, inapita tëparinhüë' huënainën macacaso marë'. Inaora huënainën chachin a'parin. Chiminaton, oshanënpoa' inquitërinpoa'. Ina quëran Yosë ya'huërinquë chachin panantarin a'naromaráchin nanan anoyatinpoaso marë'. Inaquë noya noya catahuarinpoa'. Canpoa marë' chiminin ni'ton, anoyacancantarinpoa'. Ina imapatëhua', nicha'ësarinhüë'. <sup>13</sup> Cotioro'sa' co ya'ipi Moisësë pënëntërinso' natëhuachinahuë', në'huëtërinso pochin ni'tona', co nanitopihuë' chinotopiso pëiquë ya'conacaiso'. Napohuachinara, ma'sharo'sa', chipo, toroa'huaya, inapita chinotopiso pëiquë quëpapi. Inaquë corto hua'ani tëparahuaton, huënainën manin. Huënainën masahuaton, ohuaca'huaya huiquitërinso' yanonën ayontërin. Ayontahuaton, oshahuana'pi ta'satërin. Inapotohuachina, në'huëtërinso' inquirinso pochin ninin ni'ton, naquëranchin nanitërin chinotopiso pëiquë ya'conacaso'. <sup>14</sup> Quisocriso huënainënso nipirinhüë' noya nóya. Inaso' Yosë hui'nin ni'ton, co pi'pisha tëranta' oshahuaninhüë'. Ispirito Santo ya'huëmiatërinso' catahuarin ni'ton, canpoa marë' chiminaton anoyacancantomiatërinpoa'. Inaso huënainën a'parin oshanënpoa' inquitinpoaso marë'. Inapoaton noyápiachin cancan quëtërinpoa'. Ina quëtöhuachinpoa', Yosë noya chinotarihua'. Inaso' nanpiarin ni'ton, canpoanta' ina marë' noya sacatarihua'.

<sup>15</sup> Napoaton nasha quëran anoyatërinso nani sha'huitërinpoa'. Ya'nan anoyatërinso na'a piyapi'sa' imapirinahuë', co noyahuë' cancantatona', oshahuanpi. Co ma'sharo'sa' huënainën quëran oshanëna' inquitiatopihuë'. Nipirinhüë', Quisocriso chiminin ya'ipi huayoninsopita oshanëna' inquitacaso marë'. Ya'nan anoyatërinso imapisopita oshanënantá' inquitërin. <sup>16-17</sup> Ni'co'. Quëmapi yachiminpachina, quiricatërin ma'shanënpita macacaiso marë'. Co'huara chimiyantërasohüë', co macacaiso' ya'huërinhuë'. Chiminpachina, naporö huarë' mapi. Inapochachin nani Quisocriso chiminin ni'ton, ya'ipi sha'huitërinpoaso' acotërinpoa'. Oshanënpoa' inquitatonpoa', nóya catahuarinpoa'. <sup>18</sup> Napoaton ya'nan anoyatërinso' sha'huitöhuachina, ma'sharo'sa' tëparahuatona', huënainëna' a'patopi. Inapotatona', iráca anoyatërinso' imapi. <sup>19</sup> Ya'ipi piyapi'sa' ayontonahuaton, Moisësëri pënënin. Nani ma'sha sha'huitërin natëcaiso marë'. Nani sha'huitöhuachina, ohuaca'hua, chipo, inapita tëparahuaton, huënainëna manin. Ina quëran narasë'pa' isopo itopiso' masahuaton, quëhuan huaitaquë so'quëtahuaton, i'sharë chachin ta'satërin. Pënëntërinso' quirica, piyapi'sa', inapita ta'satërin. <sup>20</sup> Inapotahuaton: "Nani anoyatërinso Yosë sha'huitërinpoa' natëcaso marë'. Iso huënai' pa'nin ni'ton, Yosë canpoarë anoyatërinso anitotërinpoa'," tënin Moisësë. <sup>21</sup> Ina quëran chinotopiso pëi', ma'sha inaquë ya'huërinso'pita, inapitanta' huënaiquë ta'satërin. <sup>22</sup> Iráca pënëntërinso imapachinara, nani ma'sha huënaiquë ta'satopi anoyatacaiso marë'. "Co huënai' ta'satöhuatëhuahuë', co Yosë noya ni'sarinpoahuë'," topi. Tëhuënhachin co huënai' pa'pachinhüë', Yosë co onporonta' oshanënpoa' inquitërinpoahuë'.

*Quisocristo oshanënpoa' inquitërinpoaso'*

<sup>23</sup> Iráca ma'pitasona inápaquë ya'huërsopita nonanpiso', huënai quëran ta'satopi anoyatacaso marë'. Ma'sha inápaquë ya'huërsopitaso nipirinhüë', noya noya huënai' nohuantërin. <sup>24</sup> Iráca chinotopiso pëi', piyapi'sari ninin. Quisocristoso', co inaquë ya'coninhüë'. Yosë ya'huërinquë chachin pantarahuatón, canpoa marë' Yosë nontárin. "Oshanëna' inquitahuaso marë' nani chiminahuë," ta'ton, nontárin. <sup>25</sup> Iráca corto hua'an ma'sha huënnainën masahuatón, noya noya patoanaquë ya'conin. Nani pi'ipi inaporin. Quisocristoso nipirinhüë' co na'aro' inaporinhüë'. <sup>26</sup> A'naroíchin chiminaponahuë', ya'ipi piyapinpita marë' chiminin. Co a'naromarëáchin nanitërinpoahuë' naporini, iráca quëran huarë' na'aro' chimianta'itonhuë'. Iporaso' nani ayaro tahuëri ya'cariapirinpoahuë', a'naroíchin chiminin oshanënpoa' inquitinpoaso marë'. <sup>27</sup> Yosë nohuanton, ya'ipi piyapinpoa' a'naroíchin chiminëhua'. Ina quëran Yosë chachin coisë pochin nicatón, ma'sona onpotiinpoaso' no'tëquën sha'huipón. <sup>28</sup> Quisocristonta' a'naroíchin chiminin oshanënpoa' inquitinpoaso marë'. Ina quëran inápaquë panantarin. Nani oshanënpoa' inquitohuachinpoa', a'na tahuëri o'mantararin. "¡Ma noyacha Quisocristoso' ni'ton, nicha'ërinpoa' paya!" ta'tëhua', ina ninarëhua'. O'mantahuachin, imarëhuasopita maquimarinpoa' huachi.

**10**

<sup>1</sup> Iráca pënëntërinso' nanan imapachinara, ma'sharo'sa' tēpapi. Oshanëna' yonquiatona', napopi ama Yosëri ana'intacaso marëhuë'. Quisocristo chiminacaso' ninoton, Yosëri sha'huitërin ma'sharo'sa' huënnainëna a'patacaso'. Quisocristoíchin anoyacancantërinpoa'. Ina chiminin ni'ton, oshanënpoa' inquitërinpoa'. Iráca nani pi'iquë ma'sha tēpaporinahuë', co tēhuëncachin piyapinpita oshanëna' inquitërinhuë'. <sup>2</sup> Oshanëna' inquipi naporini, co nani pi'iquë naquëranchin naquëranchin ma'sha tēpa'itonahuë'. Cancanëna' anoyatopi naporini, noyápiachin cancanchitonahuë'. <sup>3</sup> Nani pi'iquë ma'sharo'sa' tēpahuachinara, yonquiantapi. "Tēhuëncachin oshahuanëhua'," topi. <sup>4</sup> Ma'sharo'sa' tēpaporinahuë', ina huënnainën quëran co onporonta' oshanëna' inquitërinhuë'.

<sup>5</sup> Napoaton Quisocristo isoro'paquë yao'mahuachina, pa'pin itapon: "Iporaso huachi ma'sharo'sa' tēpacaiso', ofrenda quēcacaiso', inapita co nohuantëranhuë'. Quëma nohuanton, piyapi chachin nasitomarahuë natëa'huanquënso marë'.

<sup>6</sup> Na'a ma'sharo'sa' ahuiquitopi.

Nisha nisha ma'sha oshanëna marë' tēpaporinahuë', co inapita marë' noya ni'nanhuë'.

<sup>7</sup> Ina quëran itërahuë: 'Napoaton tata, nani o'marahuë nohuantëranso' nica'huaso marë'. Quiricanëncuë ninorancoso chachin nisarahuë', itërahuë," tēnin.

<sup>8</sup> Quisocristo pa'pin nontaton, naporin: "Iporaso huachi ma'sharo'sa' tēpacaiso' co nohuantëranhuë'. Nisha nisha ma'sha oshanëna marë' tēpaporinahuë', co inapita marë' noya ni'nanhuë'," itërin. Iráca pënëntërinso natëtona' inapopirinahuë', naporin. <sup>9</sup> Ina quëran itantarin: "Ma'tana nani o'marahuë quëma nohuantëranso' nicaca'huaso marë'," itërin. Napoaton co huachi iráca Yosë chinotacaiso marë ma'sha tēpapiso pochin nicacaso' ya'huërinhuë'. Quisocristo nasha pochin Yosë chinotacaso anitotërinpoa'.

<sup>10</sup> Quisocristo piyapi chachin nasitimarahuatón, oshanënpoa marë' chiminin. Yosë nohuanton, a'naroíchin chiminin. Canpoanta' ina imapatëhua', oshanënpoa' inquitërinpoa'. Noyápiachin cancan quëtërinpoa' huachi.

<sup>11</sup> Nani tahuëri corto hua'ano'sa' sacatápi. Naquëranchin naquëranchin ma'sharo'sa' tēpaporinahuë', co oshanëna' inquipihuë'. <sup>12</sup> Quisocristoso nipirinhüë' a'naroíchin chiminin oshanënpoa' inquitinpoaso marë'. Ina quëran inápaquë panantarahuatón, Yosë inchinanën quëran huënsëarin. <sup>13</sup> Inimiconënpita minsëaquë huarë' inaquë ninarin. <sup>14</sup> A'naroíchin chiminaponahuë', anoyacancantërinpoa'. Ya'ipi imarëhuasopita



oshanënpoa' inquitatonpoa', noyápiachin cancan quëtërinpoa'. <sup>15</sup> Ispirito Santonta' in-  
achachin anitotërinpoa'. Quiricanën quëran sha'huitërinpoa'.

<sup>16</sup> “A'na tahuëri piyapinëhuëpitarë'co anoyatohuato, iso pochin nisarahuë:  
Nasha cancan quëtarahuë natëtochináchin cancantacaiso marë'.

Anoyacancantarahuë noya yonquicaiso marë'.

<sup>17</sup> Co huachi oshanëna' yonquiarahuë'.

Ya'ipi co noyahuë' nipisopita naniantarahuë,” ténin.

<sup>18</sup> Quisocriso oshanënpoa' nani inquitohuachinpoa', co huachi ma'sha tēpacaso'  
ya'huërinhuë'. Inasáchin anoyacancantërinpoa'.

*Quisocriso imatëhua', Yosë nohuitërehuaso'*

<sup>19</sup> Napoaton iyaro'sa', iporaso' nanitërehua' Yosë chachin nohuitacaso'. Noya noya  
patoanaquë ya'conëso pochin nohuitërehua'. Piyapinpoa' nirihuarahuë', chiníquën  
cancantatëhua', Yosë nontahua'. Quisoso huënainën pa'nin ni'ton, <sup>20</sup> nasha ira pochin  
nininso' acorin Yosë nohuitacaso marë'. Noya noya ananpirinpoa'. Iráca noya  
noya patoanaquë Yosë ya'nopirinhue'. Në'mëtëri ya'copitërin ni'ton, co piyapi'sari  
nohuitopihue'. Iporaso' Quisocriso o'maton, piyapi chachin nasitimarín. Chiminin  
ni'ton, nanitërehua' Yosë nohuitacaso'. <sup>21</sup> Chiníquën nanantaton, noya noya corto  
hua'an pochin canpoa marë' Yosë nontárin. Ya'ipi imarëhuasopita catahuarinpoa'.  
<sup>22</sup> Napoaton Quisocrisoíchin natëtëhua', ya'ipi cancanënpoa quëran Yosë nontahua'.  
Nani oshanënpoa' inquitërinpoa' ni'ton, noya cancantarëhua'. Quisocriso anoyacan-  
cantërinpoa' ni'ton, noya i'quë amarëso pochin noyápiachin cancantarihua'. <sup>23</sup> “Yosë  
no'tëquën sha'huitërinpoa'. Quisocrisoíchin nicha'ësarínpoa',” ta'tëhua', imamiatahua'.  
Ama pi'pian tēranta' nisha yonquia'huasohuë. Nani sha'huitërinpoa' ni'ton, co non-  
pintarinpoahuë'. <sup>24</sup> A'napitanta' yonquia'ahua'. Na'con nosoroatëhua', catahuahua'  
ínahuanta' noya ninosoroacaiso marë'. Nipënëhuan' noya nicacaso marë'. <sup>25</sup> A'naquën  
co huachi niyontonpihuë' Yosë chinotacaiso marë'. Ama inapita pochin cancantahua-  
sohuë'. Sinioro o'macaso' tahuëri naniriarin ni'ton, niyontonatëhua', na'con na'con  
nicatahuahua' chiníquën cancantacaso marë'.

<sup>26</sup> Quisocriso nanamën nani nitotërehua'. Nitotarihuarahuë', naquëranchin  
naquëranchin co noyahuë' nipatëhua', a'popisopita pochin cancantararihua'.  
A'pohuatëhua', co insonta' nanitarinhue' oshanënpoa' inquitinpoaso'. <sup>27</sup> Ina quëran pa'pi  
të'huatacaso' ya'huërin. Yosë chiníquën ana'intarinpoa'. A'na tahuëri inimiconënpita  
pënquë a'pararin. <sup>28</sup> Iráca Moisésë pënëntohuachina, a'naquën co yaimapihuë'.  
A'popi. A'pohuachinara, ana'intopi. Coisëquë quëparahuatona', sha'huirapipi.  
Catoya'pihuë' nipon, caraya'pihuë' nipon inachachin sha'huirapihuachinara, co  
nosoropihuë'. “Tëpaquë',” itopi. <sup>29</sup> Yosë hui'nin chachin a'pohuatama', jaquë aquëtë'  
ana'intinquëmaso' ya'huërin! Quisocriso canpoa marë' chiminin. Huënainën a'parin  
anoyacancantinpoaso marë'. Inapoaton, nasha quëran anoyatërinso sha'huitërinpoa'  
imacaso marë'. A'naquënso nipirinhue' imapirinhue'. Ina quëran Quisocriso a'popi.  
Huënainën quëran anoyacancantopirinhue', nisha cancantatona', ina huënainën chachin  
nocanpi. Ispirito Santori nosoropirinhue', co pi'pian tēranta' yanatëpihuë'. Inapitaso'  
Yosëri chini chiníquën ana'intarin. <sup>30</sup> Yosë nohuitërehua'. Inaso' ya'ipiya nitotërin.  
“Co noyahuë' nipachina', cari ana'intarahuë. No'tëquën ana'intarahuë huachi,” ténin  
Yosë. “Piyapinënpita tēranta' co yanatëhuachinahuë', Siniorori ana'intarin,” ténin anta'.  
Quiricanënuë naporin. <sup>31</sup> Yosëso' nanpiárin. Chiníquën nanantërin. Co noyahuë'  
nipatëhua', pa'pi tē'huatacaso' ya'huërin. Ana'intarinpoa'.

<sup>32</sup> Ya'nan imaramaso' tahuëri'sa' yonquico'. Quisocriso nanamën  
a'chintohuachinënquëmara, noya natanatoma', imarama'. Ina marë' parisitapo-  
marahuë', co yaa'poramahuë'. Noya ahuantërama'. <sup>33</sup> Imaramaso marë' a'ninquëchin  
tëhuarinënquëma', no'huirinënquëma'. A'na tahuëri ahuëpirinënquëmahuënta', noya



cancantërama'. A'napita imapisopitanta' parisitohuachinara, nosoroatoma', catahuarama'. <sup>34</sup> Tashinan pëiquë po'mohuachinara, co të'huatomarahuë', nicapoma' pa'nama'. Paatoma', catahuarama'. Canpitanta' imaramaso marë' ma'shanëma' osërëtopirinënuquëmahuë', co sëtëramahuë'. “Yosë chachin nohuitërëhua'. Nasha cancan quëtërinpoa'. Co insonta' nanitërinhuë' inaso' osërëtinpoaso',” ta'toma', nóya cancantërama'. <sup>35</sup> Ya'nan imapoma', noya imarama'. Ama iporaso' yaa'pocosohuë'. “Yosë naniantërinco,” ama tocosohuë'. Chiníquën cancantoco' Yosë nóya acanainquëma'. <sup>36</sup> Ma'sha onpopiramahuënta', noya ahuantoco'. Noya natëhuatama', na'con catahuarinquëma'. Nani sha'huitërinquëma' ni'ton, co nonpintarinquëmahuë'. Noya nicha'ësarinquëma'.

<sup>37</sup> Quiricanënuquë naporin:

“Tëhuëenchachin o'macaso' nininso' o'mapon.

Co hua'quiarinhuë'.

<sup>38</sup> Cancanëma quëran huarë' natëhuatamaco, noya ni'saranquëma' ni'ton, noya nanpimiatarama'.

Nipirinhuë' a'pohuatamaco,

pa'pi co noyahuë' ni'saranquëma',” ténin.

<sup>39</sup> Insosona a'pohuachina', parisitopiquë pa'sapi. Canpoaso nipirinhuë', co a'poarihuahuë'. Natërëhua' ni'ton, nicha'ësarinpoa huachi.

## 11

*Ya'ipi cancanëna quëran huarë' natëpisopita*

<sup>1</sup> “Co Yosë quënanpirëhuahuë', ya'huárin. Nosoroatonpoa' catahuarinpooa',” topatëhua', tëhuëenchachin ina natërëhua'. Na'con Yosë sha'huitërinpoa'. Co ipora naniyatërarinhuë'. “Oshaquëran naniarin huachi,” ta'tëhua', noya ninarëhua'. <sup>2</sup> Iráca quëran huarë' ina pochin cancantohuachinara, Yosëri noya ni'nin.

<sup>3</sup> “Yosë no'tëquën nontërinpoa',” ta'tëhua', natërëhua'. Inaora yonquinën quëran ya'ipi isoro'pa' acorin. Co manta' ya'huëpirinhuë', “Ya'huë'in,” topachina, ma'sha ya'huërin. Ya'ipi ni'nëhuasopita co inaora ya'huërinhuë'. Yosëri nininso'. Quiricanën quëran anitotërinpoa'.

<sup>4</sup> Iráca Apiri Yosë natërin. “Yosë catahuarincó,” ta'ton, ma'sha tëparahuaton, Yosë chinotërin. Inapotohuachina, noya ni'nin. “Noya natërinco,” ténin. Cainoso nipirinhuë' co ina pochin cancantërinhuë'. Napoaton Apiri nani chiminpirinhuë', ipora huanta' “Ma noya Apiri natëtërin,” tënëhua'.

<sup>5</sup> Iráca Inoco noya natërin ni'ton, Yosëri inápaquë quëpantarin. Napoaton co chimininhue'. Piyapi'sari yonisápirinahuë', co quënanpihuë'. Co'huara inápaquë quëpantayátërasohuë', “Inoco nóya ni'nahuë,” ténin Yosë quiricanënuquë. <sup>6</sup> Yosë yonqui-huatëhua', natëtacaso' ya'huërin. “Yosë ya'huárin. No'tëquën nontërinpoa'. Ina nontohu-atëhua', natanatonpoa' catahuarinpooa',” topatëhua', noya ni'sarinpoa'. Co ina pochin cancantohuatëhuahuë', co onporonta' noya ni'sarinpoahuë'.

<sup>7</sup> Iráca Nointa' ya'huëpirinhuë', a'na tahuëri Yosëri itapon: “Co hua'qui quëranhuë' ma'sha onpoarama'. Co ni'chinamasohuë' ni'sarama'. Naporo' ya'ipi oshahuano'sa' ii' quëran ata'huantarahuë,” itërin. Co'huara o'nayantërasohuë' napotopirinhuë': “Yosë no'tëquën nontërinco,” ta'ton, Noi natëtërin. Sha'huitohuachina, natëton, panca nancha ninin. Ina quëran sa'in, hui'ninpitare chachin cha'ëpi. A'napitaso' natanaponaraihuë', co yanatëpihuë'. Napoaton na'inpi. Noiso nipirinhuë', ya'ipi cancanën quëran natëtërin. “No'tëquën nontërinco,” topachina, Yosëri noya ni'nin.

<sup>8</sup> Apraanta' Yosëri itërin: “Ya'huëran quëran pipimiatëquë'. A'na parti a'nochinquën. Ina no'pa' quëchinquën ya'huëcamaso marë',” itërin. Co no'pa' nohuitaponahuë', Yosë natërin. “Co nonpintarincohuë',” ta'ton, pa'nin. <sup>9</sup> Aquë paaton, Canaan parti

canconin. Inaquë ya'huaponahuë', në'mëtë' pëiquërächin ya'huërin. Pa'sápaton, co ya'huëmiatërinhuë'. Isaco, Cacopo, inapitanta' në'mëtë' pëiro'saquë ya'huëpi. Yosëri nani sha'huitërin. “Iso no'pa chachin quëchinquëma',” itopirinhue', co hua'anëntarihuë'. “Co Yosë nonpintarinpoahuë'. A'na tahuëri ina nohuanton, hua'anëntarihuë',” ta'tona', Yosë natëpi. <sup>10</sup> Apraan yonquiárin. “A'na tahuëri Yosë'pa' noya noya ya'huëcontarihuë'. Inaquë noya ninano' ya'huëmiatarin. Yosëri chachin canpoa marë' acorinso',” ta'ton, ina ninararin.

<sup>11</sup> Inaso', chiniquën Yosë natërin. “Nani máshoco. Saranta' co hua'huana'pihuë' nipirinhue', Yosë sha'huitërinco ni'ton, oshaquëran hui'nahuë ya'huëtarinco,” téninso marë', Yosë nohuanton, hui'nahuanin huachi. <sup>12</sup> Apraan nani másho niponahuë', hui'nahuanin. Ina hui'nin quëran chachin na'api. Oshaquëran hua'huayátërahuë shinpita ya'huëtërin. Tayora nápo' ya'huëpi. Marë yonsanquë notohuaro' inotëra'huaya ya'huërin. Inotëra'huaya nápo' shinpita ya'huëpi. Co pichicasohue'.

<sup>13</sup> Apraan, Isaco, Cacopo, inapita chiminaquë huarë' Yosë natëpi. “Nani Yosë sha'huitërinpoa'. Co nonpintarinpoahuë'. Pahuanarin nipirinhue', a'na tahuëri Yosë nohuanton, ya'huapon,” ta'tona', nóya cancantopi. “Co hua'qui isoro'paquë ya'huarihuahuë'. Isëquëso' topinan yacapatërehuaso pochin ninëhua',” topi. <sup>14</sup> “Co isoro'paquë ya'huëmiatarihuahuë'. Yosë'pa' tēhuëchinso' ya'huëmiatarihuë',” ta'tona', napopi. <sup>15</sup> Ya'huëpi quëran nani pipimiatopi. Ina na'con yonquipi naporini, inaquë ayamanta'itonahuë'. <sup>16</sup> Nipirinhue', co isoro'pa' na'con yonquipihuë'. Yosë na'con na'con nohuantopi. Ina ya'huërinquë chachin ya'huëcaiso' nohuantopi. Napoaton Yosë tapon: “Nóya yonquirinaco ni'ton, hui'nahuëpita pochin ni'sarahue'. A'na tahuëri inápaquë quëpantarahuë. Nani tapatërahuë ya'huëcaiso',” ténin.

<sup>17-18</sup> Apraan tēhuëenchachin Yosë natërin. A'naíchín hui'nin ya'huëtërin. Nasitohuachina, Isaco itërin. Naporó' Yosëri sha'huitërin: “Isaco mashotohuachin, hui'nahuanarin anta'. Naporahuaton, oshaquëran notohuaro' shinpita ya'huëtarin,” itopirinhue'. Hui'nin hui'napitohuachina, Yosëri itantarín: “Hui'nan quëparahuaton, motopi'pa' paquë'. Inaquë hui'nan tēpaquë' chinotancoso marë',” itërin. Tënicaso marë' napotërin. <sup>19</sup> “Yosë co nonpintërincohuë'. Ananpitaantacasonta' nanitërin,” ta'ton, Apraan natëtërin. Paaton, Isaco yatëparahuachina, Yosëri itaantarín: “Tananpitëquë'. Ama tēpaquësohuë',” itërin. Napoaton hui'nin chiminin quëran, nanpintarinso pochin ni'nin.

<sup>20</sup> Ina quëran Isaconta' cato' hui'ninpita ya'huëtërin, Cacopo, Isao inapita itopiso'. Mashotohuachina, Yosë natëton, nontërin hui'ninpita catahuacaso marë'. <sup>21</sup> Cacoponta' mashotahuaton, pitana paquëaponahuë', Yosë chinotarin. Yachiminpachina, ina natëton, Cosi hui'ninpita catahuacaso marë' Yosë nontërin.

<sup>22</sup> Cosinta' chiminaquë huarë' Yosë natërin. Yachiminpachina, quëmopinënpita sha'huitërin: “Iquipito parti ipora ya'huërehua'. A'na tahuëriso nipirinhue' Yosë nohuanton, ya'ipi israiro'sa' isëquëran pipiapi. No'pa' Yosë quëtërinpoaquë chachin quëpantarin ya'huëcaiso marë'. Naporó' nansëhuëpita quëpa'ina' pa'pitinacoso marë',” itërin. “Yosë co nonpintarinpoahuë',” ta'ton, naporin.

<sup>23</sup> Ina quëran Iquipito copirnorí piyapinënpita camairin: “Israiro sanapi'sa' huaihuachina', quëmapia'huaya nipachin, tēpaco',” itërin. Napopirinhue', Moisésëso' nasitohuachina, a'shini co nohuantërinhuë' hua'huin chiminacaso'. Yosë natëton, co copirno tēranta' tēhuatërinhuë'. “Iso hua'huahuëso' noya,” itërin so'in nontaton. Cara yoqui noya po'opi. <sup>24</sup> Ina quëran copirno hui'nini masahuaton, aso'sorin. Napoaponahuë' hui'napitohuachina, Yosë natëton copirno pëinën quëran pipirin. <sup>25</sup> Yosë piyapinënpita catahuacaso marë' pa'nin. Ina marë' parisitopirinhue', co ina yonquirinhue'. Yosë natëcaso' na'con na'con nohuantërin. “Co noyahuë' nicatëhua', capa cancantopirëhuahuë', co hua'quiya quëranhuë' ma'sha ta'huantarin,” ta'ton, co ma'sharáchin

yonquirinhuë'. <sup>26</sup> Copirno hui'nin pochin ni'ton, nohuantërin naporini, Iquipito parti na'con canaitonhuë', co ina nohuantërinhuë'. Yosë na'con na'con yonquirin. "A'na tahuëri Cristo o'maton, nicha'ësaripoa'. Iporaso' ina marë' aparisitopirinacohuë', Yosë'pa' noya noya acanarinco," ta'ton, noya ahuantërin.

<sup>27</sup> Yosë natëton, Moisësë Iquipito quëran pipirin. Copirnorino' no'huipirinhuë', co të'huatërinhuë'. "Yosë co quënanaporahuë', ni'sárinco," ta'ton, chiníquën cancantërin. Chiníquën cancantaton, Yosë piyapinënpita catahuarin. <sup>28</sup> "Yosë nicha'ësaripoa'," ta'ton, natëtërin. Napoaton piyapi'sa' camairin: "Ya'ipinquëma' carniroa'hua tēpaco'. Huënainën ya'coanaquë pashitoco' ama anquëniri paninan nininso' tēpacaso marëhuë'," itërin. Napotohuachina, a'naya a'naya inahuara pëinëna' ya'coanaquë huënaiquë pashitëra'piapi. Napoaton Yosëri catahuarin. Co paninano'sa' chiminpihuë'. Pascoa pitaquë napopi.

<sup>29</sup> Ina quëran ya'ipi israiro'sa' Yosë natëtona', noya pipipi. "Yosë catahuarinpoa'," ta'tona', Quëhuai marë aquëtëran pa'pi. Pancai' niponahuë', Yosë nohuanton, a'naroáchin nipatomairin ni'ton, panca ira pochin yaniro ya'norin. Ina pa'tatona pëntonpi. Iquipito sontaro'saso nipirinhuë' co nanitopihuë' pëntonacaiso'. Imatapirinahuë', iiri imotërin ni'ton, chimitopi.

<sup>30</sup> Ina quëran israiro'sa' Canaan parti canconpi huachi. Yosë natëtona', inimiconënpita minsëpi. Quiricoso' panca ninano'. Natëricho quëran pairatopiso' inápaquë huarë' pantarin. Yosëri sha'huitërin tahuitacaiso'. "Catahuarinpoa mini," ta'tona', natëpi. Canchisë tahuëri tahuitopi. Inapotohuachinara, Yosë nohuanton, paira a'naroáchin nohuaatërin. <sup>31</sup> Ya'ipi ya'huëhuano'sa' co Yosë yanatëpihuë' ni'ton, chiminpi. A'na sanapiáchin natëton, cha'ërin. Oshahuana'pi inaso', Nacapa itopiso'. Inimico niponahuë', Israiro comisionënpita huë'pachinara, inari po'orin ama sontaro'sari tēpacaiso marëhuë'.

<sup>32</sup> Co inapitaráchin Yosë natëpihuë'. Quitono, Paraco, Sanson, Quihuiti, Tapi, Samoiro, pënëntona'piro'sa', inapitanta' nóya natëtöpi. ¡Notohuaro' ya'huëpi ni'ton, co'chi nanitërahuë' ya'ipiya sha'huita'huaso paya! <sup>33</sup> A'naquën Yosë natëtona', nisha nisha piyapiro'sa' minsëpi. A'naquëonta' hua'an ya'conatona', no'tëquën hua'anëntopi. "Yosë sha'huitërinpoa' ni'ton, catahuarinpoa'," ta'tona', a'naquën natëpi. Napoaton Yosëri catahuarin. A'naquënso' Yosë natëtona', pa'pini' quëran cha'ëpi. <sup>34</sup> A'naquën pën chiníquën nënë nënëtaquë tē'yatopirinahuë', co pi'pian tēranta' huëyapihuë'. Noya cha'ëpi. A'naquëonta' Yosë nohuanton, sahuëni quëran cha'ëpi. Yatëpapirinahuë', co chiminpihuë'. A'naquëonta' co chinipirinahuë', Yosëri catahuarin chiníquën cancantacaiso marë'. Na'a inimicoro'sa' minsërahuatona', a'papi. <sup>35</sup> Sanapi'santa' hua'huinpita chiminpachina, Yosë natëpi ni'ton, ina nohuanton nanpiantapi huachi.

A'naquënso' nipirinhuë' Yosë natëtona', chiníquën parisitopi. "Yosë a'poco' tēpachinënquëma'," itopirinahuë', co yaa'popihuë'. "Co onporonta' a'poaraihuë'. Yosë noya noya ananpitaantarincoi," ta'tona', imapiso marë' chiminpi. <sup>36</sup> A'naquëonta' Yosë imapi ni'ton, tēhuapi, huihuipi, catinaquë tonpopi, tashinan pëiquë po'mopi, napotopi. <sup>37</sup> A'naquëonta' na'piquë tē'yaratona', tēpapi. A'naquëonta' sërichoquë yatonatona', tēpapi. "Yosë a'poco', tēpachinënquëma'," itopirinahuë', co yaa'popihuë'. A'naquëonta' sahuëni quëran tēpapi. A'naquën co tēpapirinahuë', imapiso marë' chiníquën aparisitopi. Yatëpahuachinara, ta'api. Co huachi ya'huëmia ya'huëpihuë'. Capa a'mocaiso' ni'ton, ohuica sha'huëtë', chipo sha'huëtë' inapita a'mopi. Co manta' ya'huëtöpihuë'. Chiníquën parisitopi. <sup>38</sup> Motopiro'sa' parti, inotëro partiro'sa', nisha nisha parti iratopi. Na'pi naninquë ya'conahuatona', huë'ëpi. Inpioro'sari nocanpi: "Inapitaso' napoonpi," topirinahuë', Yosëriso' noya noya ni'nin.

<sup>39</sup> Yosëichin yonquiatona', nóya imapi. Napoaponahuë', co ya'ipi Yosëri sha'huitërinso' naniyatërasohuë', chiminpi. <sup>40</sup> Canpoanta' yonquiatonpoa', Yosë ninararinpoa'. Iporaso'

Quisocristo nani chiminin ni'ton, ya'ipinpoa' anoyacancantërinpoa'. Iráca imapiso-pita, ipora canpoanta', ya'ipinpoa' anoyacancantërinpoa'. A'na tahuërinta' inápaquë pa'patëhua', Yosë noyá nohuítarihua'.

## 12

### *Quisocristoíchin yonquia'ahua'*

<sup>1</sup> Iráca quëran huarë' na'a piyapi'sa' parisitaponaraihuë', imamiatopi. “Yosë catahuarinpoa',” ta'tona', natëpi. Napoaton inapita yonquiatëhua', canpoanta' nóya imahua'. Ni'co'. Quëmapi'sa' nicanacaiso marë' ta'ahuachinara, chiníquën ta'api. Co manta' quëpapihuë'. Torosaréachin ta'api. Naporopi a'mopiso' co ocoihuachinahuë', co nani-topihuë' chiníquën ta'acaiso'. Inapochachin canpoanta' naporopi a'mopiso' ocoipiso pochin ya'ipi oshanënpoa' naniantahua'. Co noyahuë' yonquirëhuasopita naniantatëhua', ya'ipi cancanënpoa' quëran Quisocristo imahua'. Sacai' nipirinhüë', ahuantatëhua', noya imahua'. <sup>2</sup> Quisocristo na'con yonquia'ahua'. Inasáchin catahuarinpoa' Yosë natëcaso'. Naporahuaton, inasáchin catahuarinpoa' noya noya natëtacaso'. Isoro'paquë o'mahuachina, chiníquën parisitërin. Corosëquë parisitohuachina, na'con tëhuapirinhüë', co ina yonquirinhüë'. “Chiminpató, piyapi'sa' nicha'ësarahuë,” ta'ton, nóya cancantërin. Ina quëran inápaquë panantarahuaton, Yosë inchinanën quëran chachin huënsëarin.

<sup>3</sup> Isoro'paquë ya'huapon, oshahuano'sari chiníquën no'huipirinhüë', ahuantërin. Ina yonquiatëhua', ama yaa'poa'huasohüë'. Chiníquën cancantoco'. <sup>4</sup> Sopai yaminsërinquëma' Yosë a'pocaso marë'. Sacai' nipirinhüë', Quisocristo imamiatoco'. Imaramaso marë' aparisitopirinënuëmahüë', co tëparinënuëmahüë'. <sup>5</sup> Hui'ninpita pochin niconpoa', Yosë pënëninpoa' chiníquën cancantacaso marë'. Nani nitotopiramahuë', ¿naniantërama' ti? Quiricanën quëran napotërinpoa': “Yonquiquë' conpa. A'na tahuëri Yosë nohuanton, parisitaran noya noya imacamaso marë'.

A'na tahuëri pi'pian ana'intopirinquënhüë', ama sëtëquësohüë'.

Ama yaa'poquësohüë'. Ahuantacaso' ya'huërin.

<sup>6</sup> Nosororinpoa' ni'ton, a'na tahuëri ina nohuanton, ma'sha onporëhua'.

Hui'ninpita pochin niconpoa', ana'intërinpoa' noya noya yonquicaso marë',” tënin.

<sup>7</sup> Hui'ninpita pochin ni'ninpoa' ni'ton, ahuantacaso' ya'huërin. Ni'co'. Hui'nanpo' no'tëquën pënënë' noya noya yonquicaso marë'. <sup>8</sup> Co Yosë pënëninpoahuë' naporini, co tëhuëchachin hui'ninpita pochin ni'itonpoahuë'. Ya'ipi hui'ninpita yonquirin noya noya cancantacaiso marë'. Co pi'pian tëranta' ana'into huachinquëmahüë', co Yosë hui'ninpitinquëmahüë'. <sup>9</sup> Tatanpoa' pënënpachinpoara, natërëhua'. Pi'pian ana'intopirinpoahuë', co no'huirëhuahuë'. Noya niconatëhua', natërëhua'. Tata Yosëso nipirinhüë' na'con na'con natëcaso' ya'huërin. Inaso' nininpoa' ni'ton, natëhuatëhua', noya noya nanpiarihua'. <sup>10</sup> Hua'huatarihua', co hua'qui isoro'paquë ya'huëcasohüë' nipirinhüë', tatanpoa' pënëninpoa'. Inaora yonquiaton, pi'pian ana'intërinpoa' natëcaso marë'. Yosëso nipirinhüë', noya noya yonquiatonpoa', no'tëquën catahuarinpoa'. Na'con nosoropirinpoahuë', a'na tahuëri ina nohuanton parisitërëhua' ina pochin cancantacaso marë'. <sup>11</sup> A'na tahuëri Yosë nohuanton, ma'sha onporëhua'. Naporahuaton, a'napita ma'sha onpotërinënpoa'. Naporo chachinso' sëtërëhua'. Parisitacaso' co nohuantopirëhuahuë', noya ahuantohuatëhua', Yosë na'con catahuarinpoa'. Nirótëatëhua', noya nisarëhua'. Inapostatëhua sano cancantarihua'.

### *Ama Yosë a'poa'huasohüë'*

<sup>12</sup> Napoaton iyaro'sa', chiníquën cancantahua'. Ama amiatëhuarahüë', chiníquën Yosë imahua'. Ni'co'. Aquë pa'patëra, canotërë', sacai' iratërë'. A'naquëma' ina pochin cancantatoma', co huachi ya'ipi cancanëma quëran Yosë imaramahuë'. Ama huachi canotërëso



pochin cancantocosohuë'. <sup>13</sup> Yosë iranën no'tëquën imapatama', co pëshonaramahuë'. Yosë catahuarinquëma' noya noya yonquicamaso marë'. A'napitanta' nicanatëncuëma', chiníquën cancantapi. Co huachi sonpacha pochin cancantapihuë'.

<sup>14</sup> Ama pi'pian tëranta' nino'huicosohuë'. Naporahuaton, noya nico'. Co noya nipatamahuë', co manta' Yosë nohuitaramahuë'. <sup>15</sup> Yosë inaora nohuanton nosoroatonpoa', yacatahuarinpoa'. A'naquënisso nipirinhüë', co yatahuërëtopihuë'. Inahuara yonquipoáchin imatona', co Yosë yonquicaíso' nohuantopihuë'. Ama inapita pochin cancantocosohuë'. Co Yosëichin yonquihuatomahuë', oshaquëran nitapicancanarama'. Inaquëran pënanin a'naroáchin sël'cotëtërinso pochachin a'napitanta' atapicancanarama'. <sup>16</sup> Ni'cona nisha nisha cancantotama'. Ama monshihuanacosohuë'. Noyápiachin cancantoco'. Ama ma'sha yonquiatoma', Yosë naniantocosohuë'. Isao iráca naporinso' yonquico'. Ma'sharáchin yonquiaton, co onpopinchin Yosë yonquirinhüë'. Tanaton, iin nontërin: “¿Yosë na'con catahuainquënsó' nohuantëran tí? Co caso' ina yonquirahuë'. Cosharo' na'con na'con nohuantërahuë,” itërin. <sup>17</sup> Ina piquëran yonquiantapirinhüë'. “Yosë na'con catahuainco,” tantapirinhüë', co huachi Yosëri nohuantërinhuë'. Chiníquën sëtaton na'nëpirinhüë', iráca a'porinso' co huachi nanitërinhuë' anoyatacaso'. Ina yonquiatoma', ni'cona Yosë naniantotama'.

<sup>18</sup> Iráca Sinai motopi nicotoanaquë huë'pachinara, cotioro'sa' pa'pi tē'huatopi. Inaquë panca pën nënërin. Co ya'caritacaso' ya'huërinhuë'. Tahuëri niponahuë', tashi pochin ninin. Yara yaráchin ninin. Panca ihuan pa'nin. <sup>19-20</sup> Tronpita chiníquën pihuirinso' natanpi. Naporo' Yosëri chiníquën itërin: “Iso motopiquë pënënanarquëma' ni'ton, ama ya'caricosohuë'. Ma'sharo'sa tëranta' inaquë pa'pachina', chimiina'. Na'piquë tē'yaratoma', tēpaco,” itërin. Ina natanahuatona': “Sacai' ina nanan natëcaso’,” ta'tona', pa'yanpi. “Ama huachi chiníquën nonchincoisohuë’,” itopi. <sup>21</sup> Ni'sahuaton, Moisésenta' pa'pi tē'huatërin. “Canta' tē'huatato, ropa ropátarahüë,” tēnin.

<sup>22</sup> Canpoaso nipirinhüë', co ina motopi ya'carirëhuahuë'. Quisocristo imapatëhua', nisha motopi ya'carirëhua', Sion itopiso'. Yosë chachin nohuitarihua'. Co ipora quënanpirëhuahuë', nanpiárin. A'na tahuëri ya'huërinquë chachin pantarihua'. Nasha Quirosarinquë ya'huëcontarihua huachi. Notohuaro' anquëniro'sa' inaquë niyontonpi. Noya cancantatona', Yosë chinotapi. <sup>23</sup> Huëntonëncuë chachin Yosë nani aya'coninpoa'. Inápaquë nininënpoa' nani ninshitërinpoa' hui'ninpita pochin nicaninpoaso marë'. Inatohua' niyontonarihua'. Yosë chachin imarëhua'. Inaso' ya'ipiya hua'anëntaton, co imapisopitahuë' no'tëquën ana'intarin. A'naquë imapisopita nani chiminpachinara, hua'yanënaso' Yosë'pa' ya'huapi huachi. Yosë pochachin cancantopi. Inapitarë'quënpoa chachin niyontonarihua' <sup>24</sup> Quisocristo chachin nohuitarihua'. Inaso' nasha quëran anoyatërinso sha'huitërinpoa' imacaso marë'. Huënnainën quëran anoyacancantërinpoa'. Iráca Apiri huënnainën pa'nin. Iini tēpahuachina, huënnainën pa'nin ni'ton, ana'intacaso' ya'huërin. Quisocristo chimininsoso' nipirinhüë', noya noya. Huënnainën pa'nin ni'ton, nanan anoyatërinpoa'.

<sup>25</sup> Napoaton Quisocristo nanamën noya natanco'. Ama pi'pian tëranta' a'pocosohuë'. Pënëntërinso nanan sha'huitohuachinara, a'naquë co yanatëtopihuë' ni'ton, a'naroáchin ana'intërin. Quisocristo nanamënso' noya noya ni'ton, ina naniantohuatëhua', aquë aquëtë' ana'intinpoaso' ya'huërin. Inaso' inápa quëran pënëninpoa'. <sup>26</sup> Yosëri pënëntërinso nanan sha'huitohuachina, ina nohuanton, panca ocohua pa'nin. Ina quëran quiricanën quëran sha'huitërinpoa': “A'na tahuëri naquëranchin nontaantahuato, co isoro'paráchin nacontarinhuë'. Inápaquë ya'huërinso'pitanta' naco nacóntarin,” tēnin. <sup>27</sup> A'na tahuëri mini ya'ipi ma'sha isoro'paquë ya'huërinso'pita ta'huantarin. Ma'sha ya'huëmiatërinso' acohuachinaso', ya'huëmiatarin. <sup>28-29</sup> Hua'anëntërinquë chachin aya'coninpoa'. Inápaquë pa'patëhua', co onporonta' ta'huantarihuahuë'. Napoaton: “Yosparinquë Siniro,” itahua'. Ya'ipi cancanënpoa quëran inasáchin chinotahua'. Noya cancantatëhua',



natëahua' noya nicainpoaso marë'. Ipora huanta' Yosëso' no'tëquën ana'intarin ni'ton, të'huatacaso' ya'huërin. Pënquë ma'sha ahuiquitërëso pochin ya'ipi co noyahuë' nininso-pita ana'intarin.

## 13

### *Onporahuatonsona Yosë noya ni'ninpoaso'*

<sup>1</sup> Ya'ipi imaramasopita capini noya ninosoroco'. Iyaparima pochin ni'co'. <sup>2</sup> Co nohuitapomarahuë', nosoroco'. Huë'pachina, noya nontatoma', o'shitoco', a'caco'. Iráca a'naquën napopiso' yonquico'. Ni'toro'sa' huë'pachinara, "Huëco' ni'quicoi," itërin. Piyapita'ma' topirinhüë', Yosë anquëninën chachin a'carin. Inapochachin canpoanta' ni'toro'sa' noya nontahua'.

<sup>3</sup> Ama tashinan pëiquë po'mopisopita naniantocosohüë'. Catahuaco'. Canpitanta' tashinan pëiquë ya'huëaramaso pochachin yonquico'. A'naquëonta' imapiso marë' chiníquën aparisitohuachina', noya yonquico'. Canpitanta' inapita ninatanpiso pochin cancantatoma', nosoroco'.

<sup>4</sup> Quëmapi'sa' sa'apachina', ama a'na sanapi yonqui'inasohüë'. Sanapi'santa' so'yahuachina', ama so'ina' tëhuananpichinasohüë'. Ama manta' monshihuainasohüë'. Monshihuanpatama', Yosë chiníquën ana'intarinquëma'.

<sup>5</sup> Ama coriquiráchin pa'yatocosohüë'. Co na'con ma'sha ya'huëtopirinquëmahuë', sano cancantoco'. Ama na'con na'con nohuantocosohüë'. Yosë chachin nani sha'huitërinpoa'. "Co onporonta' pataranquëmahuë'. Co naniantaranquëmahuë'," itërinpoa'. <sup>6</sup> Napoaton chiníquën cancantatëhua' naporëhua':

"Yosë catahuarinpoa' ni'ton, co të'huarëhuahuë'.

¡Piyapi'sa' ma'sha onpotopirinpoahuënta', co të'huatarihuahuë'!" tënëhua'.

<sup>7</sup> Ya'nán a'chintërinënuëmasopita yonquico'. Yosë quiricanën noya a'chintërinënuëma'. Chiminaquë huarë' noya nicatona', a'napita catahuapi. Napoaton inapita nonanatoma', noya natëco'.

<sup>8</sup> Quisocristo co onporonta' nishataponhuë'. Iráca nosororinpoa'. Ipora huanta' catahuarinpoa'. Co onporonta' naniantarinpoahuë'. Inasáchin imahua'. <sup>9</sup> A'naquën nisha a'chintohuachinënuëma', ama natancosohüë', nonpintochinënuëma'. No'tëquën yonquico'. Nisha nisha nicacaso' pënënpirinënuëpoahuë', co ina quëran noya cancantërehuahuë'. Na'a piyapi'sa' nisha nisha cosharo' a'poaponaraihuë', co noya cancantopihuë'. Quisocristoíchin nanitërin anoyacancantinpoaso'. Inaora nohuanton, nosoroatonpoa', catahuarinpoa' imamiatacaso'.

<sup>10-11</sup> Quisocristo corosëquë chiminatón, oshanënpoa' inquitërinpoa'. Iráca pënëntërinso imapisopitaso nipirinhüë', co ina natëpihuë' ni'ton, co oshanëna' inquitërinhuë'. Iráca corto hua'ano'sa' piyapi'sa' oshanëna marë' ma'sha tēpapi. Tēpahuachinara, corto hua'an chini chiníquën nanantërinsoari ma'sha tēpapiso' huënainën manin. Masahuatón, Yosë ya'norinso' patoanaquë quëparin oshanëna marë'. Noshinënso nipirinhüë' co ca'pihuë'. Ninano' intonquë quëpapi ahuiquitacaiso marë'. <sup>12</sup> Quisocristonta' ninano' aquëcha quëparahuatona', aparisitopi. Inaquë chiminin oshanënpoa' inquitinpoaso marë'. Inaora huënainën quëran anoyacancantërinpoa'. <sup>13</sup> Napoaton canpoanta' aparisitohuachinënpoa', ahuantahua'. Iráca pënëntërinso nanan naniantatëhua', Quisocristoíchin imahua'. Ina no'huipiso pochin no'huipirinënpoaonta', ahuantahua'. <sup>14</sup> Co isoro'paquë ya'huëmiatarihuahuë'. Yosë ya'huërin'pa' pantacaso' ninarëhua'. Inatohua' ya'huëmiatarihua'. <sup>15</sup> Napoaton iporaso' co huachi ma'sha tēparihuahuë' Yosë chinotacaso marë'. Nani tahuëri ina chinotatëhua', "Ma noyanquëncha Tata Yosë quëmaso paya. Quisocristoíchin anoyacancantërincoi ni'ton, 'Yosparinquën Siniro,' itërainquën," itahua'. <sup>16</sup> Noyasáchin niahua'. Nicatahuacaso' ama naniantahuasohüë'.

A'napita ma'sha pahuantohuachina', ama apiratocosohuë'. Inapohuatëhua', Yosë noya chinotarëhua' ni'ton, noya ni'sarinpoa'.

<sup>17</sup> Ansiano'sa' pënënpachinënquëma', noya natëco'. Noya noya imacamaso marë' Yosëri acorin. A'na tahuëri inapitanta' ya'ipi napopisopita Yosë sha'huitapi. Nani tahuëri pënënarinënquëma'. Noya natëhuatama', noya cancantatona', a'chintarinënquëma'. Co yanatëhuatamahuë', sëtapi. Naporahuaton, canpitanta' co noya noya cancantapomahuë'.

<sup>18</sup> Quiya marë' Yosë nontoco'. Noya nisarai, ta'toi, noyápiachin cancantërai. Ya'ipi cancanëhuëi quëran Yosë yanatërai. <sup>19</sup> Ca marë' chiníquën Yosë nontoco' catahuainco a'naroáchin canpitataquë pa'i.

### *Quisocriso a'pairinpoaso'*

<sup>20</sup> Yosë catahuainquëma' noya ninicatoma' ya'huëcamaso'. Inasáchin asanocancaninpoa'. Inari chachin iráca Quisocriso ananpitaantarín. Iporaso' ohuicanënpita pochin nicatonpoa', Siniro Quisoso a'pairinpoa'. Huënainën pa'nin ni'ton, nasha quëran anoyatërinso sha'huitërinpoa' imacaso marë'. Ina anoyatërinso' ya'huëmiatarin. Co onporonta' nishataponhuë'. <sup>21</sup> Yosë na'con catahuainquëma' ina nohuantërinso' nicacamaso marë'. Pi'pian tëranta' co noyahuë' yonquihuatama', anoyacancanchinquëma'. Quisocriso catahuahuachinpoa', nani tahuëri nóya nisarëhua'. Ina quëran noya ni'sarinpoa huachi. Ya'ipi piyapi'sa' inasáchin chinochina'. Ama onporonta' ina naniantahuasohuë'. Amen.

<sup>22</sup> Nani pi'pian ninshitëranquëma'. Noya cancantatoma' iyaro'sa' natanco', tënahuë. Achinicancainquëma', ta'to ninshitërahuë. <sup>23</sup> Co hua'quiya quëranhuë' nicaponquëma' pa'sarahuë. Iya Timotio nani tashinan pëi quëran ocoipi. Manóton huë'pachin, inaro'co pa'sarai.

<sup>24</sup> Ansiano'sanquëma' saludos a'pataranquëma'. Ya'ipi imaramasopitanta' yonquiatënquëma', saludos a'pataranquëma'. Itariaro'santa' saludos a'patarinënquëma'.

<sup>25</sup> Inaora nohuanton, Yosë nóya catahuainquëma'. Nani ninshitëranquëma huachi.

## Santiago ninshitérinso'

### *Nisha nisha parti ya'huëpisopita ninshitérinso'*

<sup>1</sup> Ca Santiacoco ninshitaranquëma', ni'co'. ¿Noya canpitanta' ya'huarama'? Canta' isëquë noya ya'huarahüë. Tata Yosë hua'anëntërinco ni'ton, Siniro Quisocristoíchin natërahuë. Ya'ipi cotioro'sanquëma' Quisocristo imaramaso' ninshitaranquëma'. Canpitaso' yanquëërahuatoma', nisha nisha parti ya'huarama'. Ya'ipi Yosë piyapinënpitanquëma' ninamaso' ninshitaranquëma'.

### *Ma'sha onporëhuaso'*

<sup>2</sup> Nisha nisha ma'sha onpoapomarahüë' iyaro'sa', ama sëtocosohüë'. Noya cancantoco'. <sup>3</sup> Yosë tënarinpoa' cancanënpoa quëran huarë' natëcaso marë'. A'naquën ma'sha onpo-huachinara, a'naroáchin Yosë yaa'popi. Canpoaso nipirinhüë' parisitohuatëhua', "Yosë co onporonta' naniantaripoahuë'," topatëhua', catahuarinpoa' chini chiniquën cancantacaso marë'. <sup>4</sup> Noya cancantatoma', ya'ipi ahuantoco' noya noya imacamaso marë'. Chiniquën cancantohuatama', nóya nisarama'. Oshaquëran noya noya cancantarama'.

<sup>5</sup> "¿Ma'cha ipora niiya?" topatama', Yosë nontoco' noya anitochinquëma'. Onpopionta' Yosë nontacaso' ya'huërin. Co nosororinpoaso' apiratërinpoahuë'. Inaora nohuanton, catahuarinpoa'. Nontërehuaso marë' co no'huiripoahuë'. Catahuarinpoa' no'tëquën yonquicaso marë'. <sup>6</sup> "Yosë noya catahuarinco. Natëmiatarahuë," ta'tëhua', Yosë nontahua'. Ama nisha nisha yonquia'ahuasohüë'. "Co catahuarincohüë' nimara," ama tahuasohüë'. Ni'co'. Co'sacai' co sanoirinhüë'. Pancaiquë ihuaitohuachina, niquëran niquëran niöhuërin. A'naquën piyapi'sa' ina pochin yonquionpi. Nisha nisha yonquipi. <sup>7</sup> Nisha nisha yonquiatoma', nontohuatama', co Yosë a'paniarinquëmahuë', co catahuarinquëmahuë'. <sup>8</sup> Co ya'ipi cancanëma quëran huarë' imapatamahuë', co no'tëquën yonquiaramahuë'. Cato' cancan pochin ya'huëtohuachinquëma', nisha nisha yonquiarama'.

<sup>9</sup> Co na'con coriqui iyaro'sa' ya'huëtopirinquëmahuë', Yosë nóya ni'ninquëma'. Huëntonënuquë chachin aya'coninquëma'. Ina marë' nóya cancantoco'. <sup>10</sup> A'naquëmaso nipirinhüë' na'a coriqui, ma'sha, inapita ya'huëtërinquëma'. Ina niponahuë' Quisocristo imarama' ni'ton, co ma'sharáchin yonquicamaso' ya'huërinhuë'. A'na tahuëri chiminariahua'. Ya'ipi ma'sha papotërinsona' ta'huantapona'. Quisocristo na'con yonquiatoma', noya cancantoco'. <sup>11</sup> Ni'co'. Pi'i chiniquën picatohuachina, papotërinso' a'naroáchin ahuirin. Yanconëonta' anotohuachina, co huachi noyápiachin nininhüë'. Ahuirin huachi. Inapochachin ma'huano'santa' a'na tahuëri chiminapi anta'. Sacatápirinahuë', chiminapona'. Nani ma'sha ya'huëtopirinahuë', patapi.

### *Anishacancaninpoaso'*

<sup>12</sup> Ya'ipinpoa' ma'sha onporëhua'. Caniorëhua', parisitërehua', naporëhua'. Noya ahuantohuatëhua', nóya cancantarihua'. "Parisitaponaraihuë', nóya imasarinaco," ta'ton, Yosë noya ni'sarinpoa'. Ina marë' inápaquë noya acanararinpoa'. Nanpimiatarihua'. "Tëhuëenchachin nosorohuatamaco, ananpitaantaranquëma'," itërinpoa'. Sha'huitërinpoa' ni'ton, co onporonta' nonpintarinpoahuë'. <sup>13</sup> A'naquënso nipirinhüë' ma'sha onpohuachinara, a'naroáchin co noyahuë' yonquipi. "Yosë nohuanton, co noyahuë' ninahuë. Napoaton co ana'intincoso' ya'huërinhuë'," toconpi. Ama ina pochin yonquicosohüë'. Yosëso' noyasáchin yonquirin. Co pi'pisha tëranta' oshahuaninhüë'. Co onporonta' aoshahuaninpoahuë'. <sup>14</sup> Canpoara nohuanton, co noyahuë' cancantatëhua', co noyahuë' yonquirëhua'. Inachin inachin yonquihuatëhua', chini' quëparinposo pochin co noyahuë' nicacaso' yonquirëhua'. <sup>15</sup> Ipora huanta' pi'pian co noyahuë' yonquirëhua'.

Co a'naroáchin naniantohuatēhuahuē', co noyahuē' nisarēhua'. Naporahuatēhua', oshahuanarēhua'. Oshahuanpatēhua', chiminpatēhua' parisitomiatarēhua'. Ni'co'. Sanapi hua'huanpachina, oshaquēran oshaquēran hua'huin nanihuachina, huairin. Inapochachin co noyahuē' yonquihuatēhua', oshaquēran oshaquēran co noyahuē' nisarēhua'. Ina marē' oshahuanarēhua'.

<sup>16</sup> Nosororanquēma' iyaro'sa'. Ama canpitaora yonquinēma quēran ninonpintocoso-huē'. No'tēquēn yonquico'. <sup>17</sup> Yosēso' noyasáchin yonquirinpoa'. Noya noya cancantacaso marē' catahuarinpoa'. Inasáchin noya a'pintērinpoa' no'tēquēn yonquicaso marē'. Pi'i, yoqui, tayora, inapita inari acopirinhue', co ya'ipi tahuēri noya a'pininhue'. A'na tashinta' co manta' a'pininhue'. Yosēso nipirinhue' co ina pochin nininhue'. Nani tahuēriya nosoroatonpoa', catahuarinpoa'. <sup>18</sup> Inaora nohuanton, anasitaantatonpoa pochin nasha cancan quētērinpoa'. Inaso' no'tēquēn nonin. Nanamēn natēhuatēhua', huēntonēnquē aya'coaninpoa'. Hui'ninpita pochachin ni'ninpoa'. Canpoa'ton anoyacancantērinpoa'. Ina quēran oshaquēran na'aya'pi anoyacancantarin.

### *Cancanēnpoa quēran huarē' natēcaso' ya'huērin*

<sup>19</sup> Napoaton iyaro'sa', ama topinan nonacamasoáchin yonquicosohuē'. Yosē nanamēn na'con na'con natanco'. Naporahuaton, ama yano'huitocoso-huē'. <sup>20</sup> No'huitohuatēhua', co nanitarihuahuē' noya nicacaso'. Ina marē' co Yosē noya ni'sarinpoahuē'. <sup>21</sup> Napoaton ya'ipi co noyahuē' yonquiramasopita naniantoco'. Ama huachi oshahuancoso-huē'. Yosē nanamēn nani a'chintērinēnquēma'. “Caora Siniro co nanitērahuē' noya nica'huaso'. Catahuaco,” ta'toma', nanamēn yonquiráco'. Ina yonquihuatama', nicha'ēsarinquēma'.

<sup>22</sup> No'tēquēn yonquico'. Yosē nanamēn a'chintohuachinēnquēma', ama topinan quēran natancosohuē'. Ya'ipi cancanēma quēran huarē' natēco'. <sup>23-24</sup> Ni'co'. A'na piyapi isihuicoquē ya'pirin ni'pirinhue'. Nē'huērayatērinso' nicaponahuē', a'naroáchin naniantērin. Co niamirayarinhue'. Canpitanta' Yosē nanamēn topinan natanpatama', co natēhuatamahuē', ina piyapi naporinso pochin nicapoma'. <sup>25</sup> Nipirinhue', natēhuatama', noya nisarama'. Nasha nananso' nōya. Canpitaora nohuanton, ina natēhuatama', co sopai camaiarinquēmahue'. Nani tahuēri Yosē nanamēn yonquico'. Natanpatama', ama naniantocoso-huē'. Noya natēhuatama', Yosē catahuarinquēma' noya nicacamaso marē'.

<sup>26</sup> “Canta' noya Yosē imarahuē,” topi a'naquēn. Nipirinhue', nisha nisha nonin. Co noyahuē' nonpachina, topinan quēran nonsarin, inaora ninonpintarin. Co tēhuēnchachin imarinhue'. <sup>27</sup> Tēhuēnchachin Yosē chinotohuatēhua', piyapi'sa' nosoroarēhua'. Sa'ahuaros'a', quēyorono'sa', inapita catahuarēhua'. Ma'sha pahuantohuachina', quētacaso' ya'huērin. A'naquēn piyapi'sa' co noyahuē' cancantatona', co Yosē imapihue'. Ama inapita nonanhuansohue'. Noyápiachin cancantohuatēhua', noya imasarēhua'. Inapohuatēhua', Yosē noya ni'sarinpoa'.

## 2

### *Ya'ipi piyapi'sa' nosoroa'hua'*

<sup>1</sup> Quisocriso hua'anēntērinpoa'. Inasáchin noya noya ninin. Ina imarama' ni'ton, ama iyaro'sa' a'napita nocancosohue'. Ya'ipi piyapi'sa' napopináchin nosoroco'. <sup>2-3</sup> Yosē chinotacaso marē' niyontonpatamara, ma'huanso' huē'pachina, pa'yatērama'. Noyápiachin a'morin. Na'a po'moitēra oro quēran nininso' po'morin. Ina nicatoma': “Huēquē' iyasha,” itatoma', noyaquē chachin ahuēnsērama'. A'naquēnso nipirinhue', co onpopinchin noyahuē' a'mosahuaton huē'pachina, co onpopinchin noya ni'namahuē': “Inaquē huaniquē'. Nohuantohuatan, no'paquē tēranta' huēnsēquē,” itērama'. <sup>4</sup> ¿Co'ta ina pochin nipatama', co napopianachin nosororamahuē'? Cancanēnpoa quēran huarē' Yosē ni'sarinpoa' nipirinhue', co ina pochin yonquiramahuē'. Co noyahuē' yonquirama'.

<sup>5</sup> Ni'co' iyaro'sa'. Na'acquēnpoa' co na'con coriqui ya'huētopirinpoahuē', Yosē huayoninpoa' imacaso marē'. Yosē nohuitohuatēhua', nōya cancantarihua'. Huēntonēnquē chachin aya'coninpoa' ni'ton, Yosē'pa' noya noya ya'huēcontarihua'. Nani sha'huitērinpoa'. “Nosorohuatamaco, inápaquē quēpantaranquēma',” itērinpoa'.  
<sup>6</sup> Canpitaso nipirinhue', sa'ahua nininsopita co onpopinchin nosororamahuē'. Ma'huano'saso' nonpintatēnēnquēma', ihuarinēnquēma'. Aparisitērinēnquēma'. Coisēquē sha'huirapirinēnquēma'. ¿Ina nipirinhue' pa'yatarama' ti? <sup>7</sup> Quisocristoso' nōya niponahuē', tēhuapi: “Co noyahuē' inaso',” toconpi. Imarēhua' ni'ton, Quisocristo piyapinēnpitanpoa' canpoaso'. Napoaton ama ma'huano'sa' na'con na'con pa'yatocosohuē'.

<sup>8</sup> Yosē quiricanēn quēran noya noya pēnēninpoa'. “Quēmaora ninosororanso pochachin a'napitanta' nosoroco',” itērinpoa'. Ya'ipi piyapi'sa' nosorohuatama', noya nisarama'.  
<sup>9</sup> Nipirinhue', a'naso' nocanpatama', co noyahuē' nisarama'. Co Yosē natēramahuē' ni'ton, oshahuanarama'. <sup>10</sup> Yosē chachin pēnēninpoa'. “Noya natērai,” topiramahuē', pi'pian tēranta' co natēhuatamahuē', oshahuanarama'. Ana'intinquēmaso' ya'huērin.  
<sup>11</sup> “Sa'ahuanpatama', ama a'na sanapi monshitocosohuē',” tēnin Yosē. Naporahuaton, “Ama piyapi tēpacosohuē',” tēnin anta'. Co monshihuanaponahuē', piyapi tēpahuatan, oshahuanaran. Co Yosē natēaranhuē'. <sup>12</sup> Quisocristo imapatēhua', nasha nanan sha'huitērinpoa'. Nicha'ērinpoa' ni'ton, nanitērehua' nōya nicacaso'. Ina nanan chachin yonquiaton, a'na tahuēri Yosē coisē pochin nontarinpoa'. Ni'ton, piyapi nosoroatoma', noya nico', noya nontoco'. <sup>13</sup> Co piyapi'sa' nosorohuatamahuē', ayaro' tahuēri Yosēnta' co nosoroarinquēmahue'. Napoaton “Yosē na'con nosororinpoa',” ta'tēhua', a'napita nosoroa'hua'. Ina quēran ayaro' tahuēri co ana'intarinpoahuē'.

### *Noya nicacaso' ya'huērin*

<sup>14</sup> “Canta' Yosē imarahuē’,” tapomarahuē', co noyahuē' nipatama', topinan quēran nonsarama'. Ina pochin cancantohuatama', co cha'ēsaramahuē'. <sup>15</sup> Ni'co'. A'na quēmapihuē' nipon, sanapihuē' nipon Quisocristo imana'pi, capa capacaso', capa a'mocaso' nipachina, catahuacaso' ya'huērin. <sup>16</sup> Co catahuarihuarahuē': “Noya ya'huēquē'. Ama sēhuēnquēsohuē'. Ama tana natanquēsohuē',” itapomarahuē', co a'mocaiso', cosharo', inapita quētohuatēhuahuē', itopinan quēran napotarihua'! <sup>17</sup> Inapochachin “Canta' Yosē natērahue’,” tapomarahuē', co piyapi'sa' catahuahuatamahuē', topinan quēran nonsarama'. Co tēhuēnchachin imaramahuē'.

<sup>18</sup> A'naquēma' tapoma' nimara: “Quēmaso' ‘Yosē imarahuē’ ta'ton, chinotēran. Caso nipirinhue' noya ninahuē. Quēmaso' Yosē chinotaponahuē', co noya nipatanhuē', topinan quēran nonsaran. Caso nipirinhue', noya ninahuēso marē' natērahue'so ya'noarin,” tapoma'. <sup>19</sup> “A'naichin Yosē ya'huērin,” ¿tēnan ti? No'tēquēn nonan. “Yosē ya'huarin mini,” topi sopairo'santa'. Ina nitotopi ni'ton, tē'huatatona', ropa ropatapi. Napoaponarahuē', co Yosē imapihuē'. Co napopiso marē' Yosē'pa' pa'sapihuē'. <sup>20</sup> ¿Co'chi no'tēquēn yonquiranhuē' paya! Co noya nipatanhuē', “Canta' imarahuē’,” topiranhuē', topinan quēran nonsaran. <sup>21</sup> Tata Apraan yonquiquē'. Yosēri nontohuachina, “Ama hui'n'an apiratocosohuē’,” itohuachina, Isaco quēparin. Hui'nin niponahuē', co apiratērinhuē'. Yosē chinotacaso marē' yatēpapirinhue', Yosēriso' nicha'ērin. ¿Natērinso marē' Yosēri noya ni'nin! <sup>22</sup> “Yosē no'tēquēn nontērinco,” ta'ton, Apraani natērin. Natēton, noya noya imarin. Co topinan quēran chinotērinhuē'. Ya'ipi cancanēn quēran huarē' natēton, noya imarin. <sup>23</sup> Yosē quiricanēnquē ninshitērin: “ ‘Yosē no'tēquēn nontērinco,’ tēninso marē' Yosēri noya ni'nin,” tēnin. “Inaso' Yosēre' nipayarin,” tēnin anta'. No'tēquēn naporin.

<sup>24</sup> Co topinan quēran nonacaso' ya'huērinhuē', tēnahuē. Yosē natētēhua', noya nipatēhua', noya imarēhua'. Ina marē' Yosē noya ni'sarinpoa'. <sup>25</sup> Inapochachin Nacapanata' oshahuana'pi niponahuē', Yosē yonquiaton, noya ninin. Cosoi a'parinsopita huē'pachinara, noya a'pairin ama inimicoro'sari tēpacaiso marēhuē'. Ina quēran po'oana



quëran catahuarin cha'ëcaso'. Ina marë' Yosëri noya ni'nin. <sup>26</sup> Hua'yanënpo' capa nipachina, co nanpirëhuë'. Inapochachin topinan quëran nonpatëhua', co noya cancan-tohuatëhuahuë', co Yosë natërëhuahuë'. Chimipi pochin cancantatëhua', co tëhuënchachin imarëhuahuë'.

### 3

#### *Nanamënpoa' nininso'*

<sup>1</sup> Ama iyaro'sa' na'anquëma' cortoque pënëntocosohe'. Piyapi'sa' pënënpirëhuahuë' co canpoa tëranta' noya nipatëhuahuë', aquëtë chachin Yosë ana'intarinpoa'. <sup>2</sup> Ya'ipinpoa' co noyahuë' nicatëhua', oshahuanëhua'. Noyasáchin nonacasoso' saca sacai'. Noyasáchin nonëhua' naporini, Yosë pochachin cancanchitërihuahuë'. Co huachi aquëtë' tëhuë'itërihuahuë'. <sup>3</sup> Cahuario pa'patëra, pi'pian hua'nayon acatëntërë' no'tëquën pacacaso marë'. Ina quëran motën no'tëquën otëërarë'. <sup>4</sup> Nanchanta' panca masho nipirinhue', quëmapiri otëërin. No'soratënën hua'huishin niponahuë', noya otëërarin. Panca ihuani mapirionta', noya otëërarin. Insëquësona yaquëpahuachina, noya quëparin. <sup>5</sup> Inapochachin nanamënpoa' pi'pira'huaya niponahuë', nonpatëhua', na'con nocanëhua'. Noya nonpatëhua', piyapi'sa' achinicananarihua'. Nipirinhue', co noyahuë' nonpatëhuara, anishacancantarihua'. Ni'co'. Pën pi'pira'huaya niponahuë', matohuachina, panca imin a'naroáchin huiquitërin. <sup>6</sup> Nanamënpoaso' pën pochin ninin. Pa'pi co noyahuë' ninin. Ina marë' oshahuanëhua'. Sopai chachin camairinpoa' co noyahuë' noncaso'. Nanamënpoa quëran nipinorëhua', nino'huirëhua'. Ma'tëhua' ma'tëhua' nonëhua'. Co noyahuë' nonpatëhuara, nitapicananarëhua'.

<sup>7</sup> Nisha nisha ma'sharo'sa' tananquë ya'huërinsopita pë'tahuarë'. Pë'tahuahuatëra, co huachi maninpohue'. Anpianthëuano'sa', i'quë ya'huërinsopita, inapita pë'tahuarë'. Pëhuara, mayo, inapita pochin nininsonta' mapatëra, pë'tahuarë'. <sup>8</sup> Nipirinhue', co insonta' inaora nanitërinhuë' noya noncaso'. A'naroáchin co noyahuë' nonëhua'. Co noyahuë' nonpatëhua', ya'huan tomainën pochin nonëhua'. A'naroáchin yanquëëtërinso pochin na'a piyapi'sa' atapicananarihua'. <sup>9</sup> Nanamënpoa quëran Yosë chinotërëhua'. "Tata Yosë hua'anëntërinpoaso' nóya," tënëhua'. Ina nanamënpoa quëran chachin piyapi'sa' pinorëhua'. Ya'ipinpoa' Yosë chachin nininpoa'. Ina pochin cancantacaso marë' acopirinpoahuë', nipinorëhua'. <sup>10</sup> Yosë noya nontapomarahue', piyapi pinopatama', co noyahuë' cancantarama'. Co iyaro'sa' nisha nisha noncaso' ya'huërinhuë'. <sup>11-12</sup> Ni'co'. Quëpa papotohuachina, quëpa nitërin. Co nisha nitërinhuë'. Misëra papotohuachina, misëra nitërin. Co quëpa nitërinhuë'. A'na huinan ya'huëhuachina, noyai', ca'cai', co cato chachin pipirinhue'. Noyápiachin nipachina, co onporonta' ca'caquën pipirinhue'. Inapochachin iyaro'sa', co nisha nisha noncaso' ya'huërinhuë'. Noyasáchin nonco'.

#### *Yosë noya ayonquirinpoaso'*

<sup>13</sup> ¡Tëhuënchachin noya yonquihuatama', noya nisarama! Napoaton noya nico' a'napitanta' noya yonquiramaso' nitochina'. "Co canpoara noya nitotërëhuahuë'. Yosëichin catahuarinpoa' noya yonquicaso'," ta'toma', noya nico'. <sup>14</sup> A'naquënso nipirinhue' a'napita apiratatona', nocanpi. Inahuara nohuantopisoráchin yonquiatona' no'huitápi. Ina pochin cancantohuatama': "Caso' noyaco," ama tocosohue'. Co no'tëquën yonquiramahuë'. Nonpiánama'. <sup>15</sup> Co Yosë nohuanton ina pochin cancantërëhuahuë'. Piyapi'sa' inahuara ina pochin yonquipi. Ninocanatoná, niapiratopi. Inachin yonquipi. Sopai nohuanton, ina pochin yonquipi. <sup>16</sup> Niapiratohuatëhuara, yanino'huirëhua'. Co a'napita nohuantopiso' yonquihuatëhuahuë', nisha nisha cancantarihua'. Inapohuatëhua', pa'pi co noyahuë' nisarëhua'. <sup>17</sup> Yosëso nipirinhue', no'tëquën ayonquirinpoa'. Ina catahuahuachinpoa', noyápiachin cancantarihua'. Co manta' no'huitarihuahuë'. Sanoanan quëran nontarihua'. A'napita pënënpachinpoa', noya natanarihua'. Piyapi'sa'

nosoroarigua'. Naporahuaton noyasáchin nisarëhua'. Co nisha nisha yonquiariguahuë'. Co nonpintariguahuë'. Yosëíchin catahuarinpua' ina pochin cancantacaso'. <sup>18</sup>Yosë yonquihuatëhua', sano cancantatëhua', nanan anoyatarigua'. Napoaton, noya nini'tëhua' ya'huarigua'. Noya nipatëhua', a'napitanta' nicaatonpua', noya nisapi.

## 4

### *Ma'sharáchin yonquipisopita*

<sup>1</sup>¿Onpoatomata' nino'huitoma', yaniahuërama'? ténahuë, yonquiato. Canpitaora cancanëma quëran nisha nisha ma'sha nohuantërama' ni'ton, co noyahuë' cancantërama'. Nipa'yatacasoáchin yonquirama'. Napoaton nino'huirama'. <sup>2</sup>Nani ma'sha nohuantopiramahuë', co ya'huëtërinquëmahuë' ni'ton, yatëpatopiso pochin cancantërama'. A'na piyapi ma'shanënpitanta' nohuantaparama'. Co ya'huëtohuachinquëmarahuë', nino'huirama', yaniahuërama'. Co Yosë nontëramahuë' ni'ton, noya nininsopita co ya'huëtërinquëmahuë'. <sup>3</sup>A'naquëma' Yosë nontohuatamara, ma'sha nipiramahuë', co quëtërinquëmahuë'. Canpitaora nipa'yatacamaso marë' ma'sha nohuantërama' ni'ton, co quëtërinquëmahuë'. <sup>4</sup>Canpitaso' co huachi Yosëíchin yonquiramahuë'. Yosë yonquipiramahuë', nani ma'sha na'con na'con nohuantatoma', yamonshihuaninso pochin cancantërama'. Capa cancantacasoáchin pa'yatërama'. Ma'sharáchin yonquiato, Yosë inimiconën pochin cancantërama'. <sup>5</sup>Yosë quiricanën quëran sha'huitërinpua'. "Ispirito Santo aya'coancantërinpua'. Ya'coancantohuachinpua', apirarinpua' Yosëíchin pa'yatacaso marë'," ténin. Co topinan quëran naporinhuë'. <sup>6</sup>Sacai' Yosëíchin yonquicaso nipirinhuë', inari chachin inaora nohuanton catahuarinpua' ina pochin cancantacaso'. "Caora noya ninahuë," topatëhua', co Yosë noya ni'sarinpua'huë'. Nipirinhuë', "Co caora nanitërahuë' noya nica'huaso'. Catahuaco Siniro," topatëhua', Yosë catahuarinpua'. Nosoroatonpua', catahuarinpua', ténin Yosë quiricanënuë.

<sup>7</sup>Napoaton Yosëíchin natëco'. Ama pi'pian tëranta' sopai nohuantocosohuë'. Chiniquën cancantoco'. Yosë nontatoma', sopai a'paco' pa'in. Co ina natëhuatamahuë', patarinquëma'. <sup>8</sup>Nani tahuëri Yosë yonquihuatama', inanta' yonquiarinquëma', na'con catahuarinquëma'. Ya'ipi co noyahuë' yonquiramasopita naniantatoma', noya nico'. Ama huachi nisha nisha yonquicosohuë'. Noyápiachin cancantoco'. <sup>9</sup>Oshanëma' yonquiato, sëtoco'. Ina yonquiato, ama huachi capa cancantamasoachin yonquicosohuë'. Ama narinamasoachin yonquicosohuë'. Ya'ipi cancanëma quëran oshanëma marë' sëtatoma', na'nëco'. <sup>10</sup>Ya'ipinquëma', a'naya a'nayanquëma', Yosë chachin ni'sarinquëma'. "Caora Siniro co nanitërahuë' noya nica'huaso'. Catahuaco," topatama', anoyacancantarinquëma'. Ina pochin cancantohuatëhua', noya noya acoarinpua'.

### *Pinotona'piro'sa' ana'intacaso' ya'huërinso'*

<sup>11</sup>Ama iyaro'sa' nipinocosohuë'. Ama coisë pochin cancantatoma', a'napita no'huicosohuë'. Pi'pisha tëranta' nanan ya'huëhuachin, ama apancatahuatoma', nisha'huirapicosohuë'. Quisocriso imarama' ni'ton, iyaparin pochachin ninosorocaso' ya'huërin. Pinopatama', co nosoroaramahuë'. Yosë pënënpirinpua'huë'. "Ya'ipi piyapi'sa' nosoroco'," itopirinpua'huë', "Co nosorocaso' ya'huërinhuë'," ta'toma', pinorama'. Canpitaora yonquinëma quëran pinotatoma', co Yosë natëramahuë'. <sup>12</sup>Yosëíchin coisë pochin nicaaton, no'tëquën sha'huitarinpua'. Inasáchin ana'intarinpua'. Noya cancantohuatëhua', nica'ësarinpua'. Co'so' natëhuatëhuahuë', parisitopiquë a'pararinpua'. Canpua capiniso nipirinhuë', co nisha'huirapicaso ya'huërinhuë'.

### *A'nanaya chiminacaso' ya'huërinso'*

<sup>13</sup>Natanco iyaro'sa'. A'naquëma' co Yosë yonquiato, nisha nisha yonquiconama'. "Iporahuë nipon, tashirayahuë nipon, sacatapai a'na ninanoquë pa'sarai. Inaquë a'na pi'ipi pochin sacatohuato, na'con canaarai," topiramahuë'. <sup>14</sup>Co tashiraya

tëranta' nanitaramahuë' ninocamaso'. Ma'sona onpocamaso' co nitotëramahuë'. Co canpitaora nohuanton nanpiramahuë'. Chitoro' a'naroáchin sacorinso pochachin a'nanaya a'naquën chiminin. <sup>15</sup> “Yosë nohuantohuachin nanpihuatoi, ma'sha nisarai,” ta'caso nipirinhüë'. <sup>16</sup> “Quiyaora nohuanton, nani ma'sha nisarai,” toconama'. Co Yosë yonquihuatamahuë', co noyahuë' cancantarama'. <sup>17</sup> Yosë yonquicamaso' nitotapomarahüë', co yonquihuatamahuë', oshahuanarama'. Ma'sona tëranta' noya nicacaso' nitotapomarahüë', co ina nipatamahuë', ina marënta' oshahuanarama'.

## 5

### *Ma'huano'sa' pënëinso'*

<sup>1</sup> Ma'huano'santa' co Yosë natëpisopitahuë' pënëin. A'na tahuëri canpitaso' chiníquën parisitarama'. Ina yonquiatoma', sëtoco', na'nëco'. <sup>2</sup> Ya'ipi ma'sha canaramaso' chanatarin. A'moramasopitanta', no'soni pë'yararin. <sup>3</sup> Coriquinëmanta' topinan quëran canarama'. Hua'na chi'chirotërinso pochin napoonin nisarín. Co canami-ataramahuë'. Canpitaora marëáchin coriqui yontonama' ni'ton, Yosë chiníquën ana'intarínquëma'. Pënquë parisitarama'. Na'a coriqui canapomarahüë', nani ayaro' tahuëri ya'caritëriarin. <sup>4</sup> Piyapínëmapita nonpintërama'. Iminëmaquë asacatopiramahuë', co no'tëquën pahuërëtëramahuë'. Inapitaso' Yosëquë sha'huirapirínëinquëma'. Shanëmapita nitërinso' mapirínahuë', co pahuërëtëramahuë'. Inapohuatama', Yosë nitotarin. Inaso' chini chiníquën nanantërin ni'ton, no'tëquën i'huërëtarínquëma'. <sup>5</sup> Isoro'paquë nóya ya'huërama'. Nani ma'sha ya'huëtërinquëma'. Capa cancantacasoáchin yonquirama'. Nani ma'sha ya'huëtöpirínquëmahüë', Yosë ana'intarínquëma'. Ohuacaro'sa' tëpacaso pochin nipon. Yatëparinso' co nitotatonahuë', coshatápirínahuë', tahuëri nanihuachina, a'nanaya hua'anëni huëcapairahuaton, tëparin. Inapochachin canpitaso' noya ya'huápiramahuë', a'nanaya ayaro' tahuëri naniarin. <sup>6</sup> Pa'pi co noyahuë' cancantatoma', noya piyapi'sa' nonpinapirama'. Chiníquën aparisitopiramahuë', inapitaso' co nanitöpihuë' i'huërëtinëinquëmaso'. Napoaton, Yosë chiníquën ana'intarínquëma'.

### *Quisocristo noya ninacaso' ya'huërinso'*

<sup>7</sup> Napoaton iyaro'sa' aparisitoahuachinëinquëma', noya ahuantoco'. A'na tahuëri Sinioro o'mantararin. Naporo' ya'ipiya no'tëquën ana'intarin. Ni'co'. Sha'tohuatëra, co a'naroáchin manëhuë'. O'nanpachina, oshaquëran papotarin. O'naantahuachina, cayarín. “Oshaquëran cayahuachín, mapatëhua' ca'sarëhua',” ta'ton hua'anëni ninararin. <sup>8</sup> Inapochachin canpitanta' noya cancantatoma', Sinioro o'mantacaso' tahuëri ninaco'. Nani ya'caritëriarin. Napoaton ama sëtocosohüë'. Chiníquën cancantoco'. <sup>9</sup> Ama pi'pian tëranta' iyaro'sa' nino'huicosohüë', Yosë ana'intochinquëma'. Ni'sárinpoa'. Co hua'quiya quëranhuë' o'mararin ana'intinpoaso marë'. <sup>10</sup> Ni'co' iyaro'sa'. Iráca pënëntona'piro'sa' Sinioro nanamën a'chinpirínahuë'. Pënëntohuachinara, a'naquëni no'huitona', aparisitopi. Parisitaponaraihuë', ahuantopi. Co no'huipihüë'. <sup>11</sup> Noya ahuantopi ni'ton, Yosëri nóya ni'nin, tënëhua'. Coponta' pa'pi parisitërin, nitotërama'. Na'con parisitaponahuë', chiníquën cancantaton, ahuantërin. Ma'sha onpoaponahuë', Yosëri catahuarin noya noya pipicaso'. Ina nohuanton, napoin quëran noya noya yonquirin. Yosë nosoroatonpoa' na'con catahuarinpoa', ténahuë. Napoaton chiníquën cancantatoma', ahuantoco'.

<sup>12</sup> Na'con iyaro'sa' yonquico' no'tëquënáchin nonacamaso': “Pa'sarahüë,” topatama', paco'. “Co pa'sarahüë,” topatama', ama pacosohüë'. Nani tahuëri no'tëquënáchin nontohuatama', co “Yoscoarë,” ta'caso' ya'huërinhuë'. Co'ni ma'sha tëranta' isoro'paquë ya'huërinso' a'pitatëhua' nonpinacaso' ya'huërinhuë'. Napoaton nani tahuëri no'tëquën nonco', Yosë ana'intochinquëma'.

<sup>13</sup> A'naquëma' ma'sha onpohuatama', Yosë nontoco' catahuainquëma'. Noya cancantohuatama', Yosë cantanën cantatoma': “Yosparínquën Sinioro,” itoco'. <sup>14</sup> A'naquëma'

caniohuatama', ansiano'sa' amatoco' Yosë nonchina'. "Quisocristo catahuainquën," ta'tona', pi'pian tomaquë pashichinquëma'. Ina quëran Yosë nonchina' anoyatacaso marë'. <sup>15</sup> Ya'ipi cancanëma quëran huarë' natëcaso' ya'huërin. "Ya'ipi Sinioro nanitaparan," topachina', anoyatarin. Oshahuanpachina', inanta' inquitarin. <sup>16</sup> Napoaton ma'sona tëranta' co noyahuë' nipatëhua', imarëhuasopita capini nisha'huítahua'. "Ina marë' caso' oshahuanahuë," nitahua'. Itohuaran capini Yosë nontahua' anoyachinpoa'. Ya'ipi co noyahuë' yonquirëhuasopita naniantohuatëhua', chiníquën ina nontohuatëhua', na'con catahuarinpoa'. <sup>17</sup> Ni'co'. Iniasë canpoa pochachin niponahuë', chiníquën Yosë nontohuachina, natanin. "Na'a piyapi'sa' Sinioro co imarinëinquënhuë'. Quëma nohuan-ton, ama o'nainsohuë'," itohuachina, cara pi'ipi na'con co pi'pisha tëranta' o'naninhuë'. <sup>18</sup> Ina quëran Yosë nontantahuachina: "Quëma nohuan-ton o'naanta'in," itohuachina, o'naantarín. Sharo'sa' papotantarín. Napoaton canpoanta' noyápiachin cancantatëhua', chiníquën Yosë nontahua'.

<sup>19</sup> Noya iyaro'sa' nipënëncó'. A'naso' no'tën nanan nitotaponahuë', nisha cancantohuachina, a'naya a'nayanquëma' pënëncó' no'tëquën yonquianta'in. <sup>20</sup> Natëhuachinquëma', chiminpachina co parisitomiatapihuë'. Ya'ipi oshanëna' Yosëri inquitarin. Pënënama' ni'ton, noyápiachin cancantantapi huachi. Ina yonquiatoma', nipënëncó'. Nani huachi.

*Santiago*

## Pitrori Yosë piyapinēnpita ninshitērinso'

### *Nisha nisha parti ya'huēpisopita ninshitērinso'*

<sup>1</sup> Ca Pitroco ninshitaranquēma', ni'co'. ¿Noya canpitanta' ya'huarama'? Noya canta' isēquē ya'huarahuē. Quisocriso a'parinco nanamēn a'china'huaso marē'. Canpitaso' aparisitatēnēnquēma', ayanquērinēnquēma' ni'ton, nisha nisha parti ya'huērama'. Pontoquē, Carasiaquē, Capatosiaquē, Asiaquē, Pitiniaquē, inaquēpita ya'huēramaso' nanan a'pataranquēma'. Tēhuēnchachin co isoro'paquē ya'huēmiatarihuahuē'. Yosë nohuanton, Quisocriso imarēhua' ni'ton, Yosë'pa' ya'huēmiatarihua'. Isēquēso' topinan yacapatatēhua pochin ninēhua'. <sup>2</sup> Iráca quēra huarē' Tata Yosë nohuitērinquēma'. Nosoroatēnquēma', huayoninquēma' huēntonēnquē ya'conacamaso marē'. Ispirito Santo anoyacancantērinquēma' natēcamaso marē'. Quisocriso corosēquē chiminín oshanēma' inquitinquēmaso marē'. Yosë nontērama' ni'ton, oshanēma' inquitērinquēma'. Yosë inaora nohuanton, noya catahuainquēma'. Asanocancainquēma'.

### *Yosë'pa' ya'huēcaso' ninarēhuaso'*

<sup>3</sup> Ma noyacha Tata Yosëso paya. Quisocriso pa'pin inaso'. Na'con nosoroatonpoa', nasitantarēso pochin nasha cancan quētērinpoa' ina nohuitacaso marē'. Quisocriso hua'anēntērinpoa'. “Chiminaponahuē', nanpiantarin ni'ton, canpoanta' nanpiantarihua',” ta'tēhua', noya ninarēhua'. Natētomiaterēhua'. <sup>4</sup> Yosë'pa' nani tapatērinpoa' noya noya ya'huēcontacaso marē'. Inatohua' co manta' ta'huantarihuahuē'. Co manta' nitapiarinhuē'. Inaquēso' co yanco pochin ahuirinhuē'. Noya noya nisarin. Canpoa marē' Yosēri acorin. Inari chachin ni'sarin. <sup>5</sup> Tata Yosë ya'ipiya nanitaparin. “Yosë co quēnanpirēhuahuē', catahuarinpoa',” topatēhua', noya a'paiarinpoa'. Ma'sha onpohuatēhua', catahuarinpoa' ahuantacaso'. Ayaro' tahuēri nóya nicha'ēsarinpoa'. Nani yonquirin o'mantacaso'. A'na tahuēri ni'sarēhua'. O'mantaquē huarē' a'paiarinpoa'.

<sup>6</sup> Ina yonquiatoma', capa cancantarama'. A'na tahuēri Yosë nohuanton, pi'pian ma'sha onporama'. Ipora chachin ma'sha onpotopirinēnquēmahuē', co hua'qui' parisitaramahuē'. Parisitapomarahué', o'mantacaso' tahuēri yonquiatoma', noya cancantoco'. <sup>7</sup> Ma'sha onpohuatēhua', Yosë catahuararinpoa' ya'ipi cancanēnpoa quēran imacaso marē'. Oro tapacaiso marē' a'irotopiso pochin nitarinpoa'. Oro inapotohuachinara, noyápiachin pipirin. Ya'ipi nē'huē huiquitahuaton, orosachin ninin. Inapochachin iporasos Yosë nohuanton, pēnquē ahuiquitērešo pochin ma'sha onpotērinpoa' noya noya acoinpoaso marē'. Oro pa'ton niponahuē', co ya'huēmiatērinhuē'. Canpoaso nipirinhuē', Yosë natēhuatēhua', nanpimiatarihua'. Napoaton na'con yonquia'ahua' cancanēnpoa quēran huarē' natēcaso'. Ina Yosë nohuantērinso'. Natēmiatohuatēhua', Yosë noya noya ni'sarinpoa'. Quisocriso o'mantahuachin, noya noya acorarinpoa'. Ina pochin ya'noarihua'.

<sup>8</sup> Quisocriso co onporonta' quēnanapomarahué', nosororama'. Ipora huanta' co nicapomarahué', “Co nonpintarincohuē'. Catahuarincó,” ta'toma', ina natērama'. Cancanēma quēran ina nohuitatoma', nóya cancantērama'. Ina yonquiatoma', capa cancantērama'. <sup>9</sup> Imarama' ni'ton, anoyacancantērinquēma'. Nicha'ēsarinquēma' huachi.

<sup>10</sup> Iráca pēnēntona'piro'sa' ninopi. “A'na tahuēri Yosë inaora nohuanton, nosoroatēnquēma', nicha'ēsarinquēma' canpitanta',” topi. Ninotona' ninshitaponarahué', co nitotopihuē' ma'sona tapon napopiso'. Napoaton cancantatona', Yosë quiricanēn nontopi no'tēquēn nitotacaiso marē'. Noya nitotatona no'tēquēn sha'huitērinēnpoa'. <sup>11</sup> Ispirito Santo nohuanton, iráca Cristo ninopi. “Parisitapon. Ina quēran nanpiantarahuatón, noya noya ya'huapon,” topi ninotona'. Napoatona', yonquiapi. “¿Ma quēmapita' o'maton, parisitapon? ¿Onporota' parisitaponso?” topi.



<sup>12</sup> Ina quëran Yosëri anitotërin. “Pahuanarin nanicaso'. A'na tahuëri ya'huëpisopita nitotacaiso marë' ca nohuanton, ninorama',” itërin Yosëri. Canpita iyaro'sa' nitotacamaso marë' ninopi. Iporaso' ina noya nanan chachin a'chintërainquëma'. Inápa quëran o'maton, Ispirito Santo catahuarincoi noya a'china'huaiso marë'. Anquëniro'sa quëran huarë' yanitotopirinahuë', co ya'ipiya nitotopihuë'.

*Noyasáchin nicacaso' ya'huërinso'*

<sup>13</sup> Napoaton chiníquën cancantatoma', yonquico' noya nicacamaso'. Sano yonquico'. Quisocriso o'mantahuachin, inaora nohuanton, nicha'ësarínpoa'. Ina ninatoma', noya cancantoco'. <sup>14</sup> Hua'huaro'sa' noya nipachinara, pa'pina' natëpi. Inapochachin canpitanta' Yosëichin natëco'. Iráca co Yosë nanamën nitotatomarahuë', co yonquiramahuë'. Yano'pihuatomara, no'pirama'. Co noyahuë' yonquihuatomara, co noyahuë' ninama'. Iporaso nipurinhuë' ama inapocosohuë'. <sup>15</sup> Tata Yosë noyasáchin ninin. Huëntonënguë aya'coninquëma' ni'ton, canpitanta' ina pochin cancantoco'. <sup>16</sup> Quiricanën quëran Yosë pënëinpoa'. “Caso' noyasáchin ninahuë. Napoaton canpitanta' noyasáchin nico',” itërinpoa'.

<sup>17</sup> Yosë nontohuatamara, “Tata,” itërama'. A'na tahuëri inaso' coisë pochin ni'ton, ya'ipi piyapi'sa' no'tëquën sha'huitarin. Co noyahuë' nipisopita no'tëquën ana'intarin. Ya'ipi oshahuaninsopita ana'intarin ni'ton, të'huatacaso' ya'huërin. Chiminaquë huarë' ina yonquiatoma', noya nico'. <sup>18</sup> Iráca shimashonënpoapita topinan quëran ya'huëpi. Moshatopirinahuë', co Yosë nohuitopihuë'. Inapita nonanatoma', canpitanta' topinan quëran ya'huëpiramahuë', Yosë ocoirinquëma' ina nohuitacamaso marë'. Ocoirinquëmaso marë' co coriqui pahuërëterinhuë'. Hui'nin chachin a'paimarin. Coriqui, oro, inapita a'na tahuëri ta'huantarin. <sup>19</sup> Hui'ninso nipurinhuë' noya noya. Ina chiminpachina, huënainën pa'nin. Iráca cotioro'sa' co noyahuë' nipachinara, carniroa'hua noyápiachin nininso' masahuatona', tëpapi. Inapochachin Quisocrisoso' nóya. Co manta' oshahuanaponahuë', corosëquë chiminin. Oshanënpoa' inquitatonpoa', ocoirínpoa huachi. <sup>20</sup> Iráca co'huara isoro'pa' ya'huëyátërasohuë', Yosë yonquirin hui'nin a'paimacaso marë'. Ipora huarë' ya'norin canpitanta' nicha'ëinquëmaso marë'. Nani ayaro' tahuëri ya'caritapon chachin ya'norin. <sup>21</sup> Quisocriso anoyacancantërinquëma' ni'ton, Yosë nohuitatoma', natërama': “Tëhuëchachin catahuarinpoa',” tënama'. Quisocriso chiminaponahuë', Yosëri ananpitaantarin. Inápaquë quëpantarahuaton, chiníquën nanan quëtërin. Napoaton Yosëichin imarama'. “Canpoanta' ananpitaantarinpoa',” ta'toma', ninarama'.

<sup>22</sup> Yosë nanamënso' no'tën nanan. Ina natëhuatama', ya'ipi co noyahuë' yonquiramasopita naniantarama'. Noyápiachin cancantarama'. Yosë anoyacancantërinquëma' ninosorocamaso marë'. Napoaton imaramasopita capini noya ninosoroco'. Tëhuëchachin cancanëma quëran huarë' ninosoroco'. <sup>23</sup> Yosëso' co onporonta' chimininhuë'. Nanpimiatarin. Inaso' nasha cancan quëtërinquëma' huëntonënguë ya'conacaso marë'. Nasitantarëso pochin noya cancantërama'. Co piyapi quëran nasitatoma' huëntonënguë ya'conamahuë'. Nanamën quëran anoyacancantërinquëma'. Nanamënso' co onporonta' ta'huantarinhuë'. Ina natëhuatëhua', canpoanta' nanpimiatarihua'.

<sup>24</sup> “Panpatëro' a'naroáchin ahuirin. Inapochachin canpoanta' chiminarihua'. Yancoro'santa' noyápiachin nipirinhuë', a'naroáchin ahuihuachina, nohuatërin. Inapochachin nani ma'sha ni'nëhuasopita ta'huantarin anta'. <sup>25</sup> Siniro nanamënso nipurinhuë', ya'huëmiatarin,” tënin Yosë quiricanënguë.

Ina nanan chachin nani a'chintërainquëma'.

## 2

<sup>1</sup> Ya'ipi co noyahuë' yonquiramasopita naniantoco'. Ama iyaro'sa' ninonpintocoso-huë'. A'naquën noyasha nonaponaraihuë', po'oana quëran co noyahuë' nipi. Ama

ina pochin nicosohuë'. Ya'ipi cancanëma quëran no'tëquën ninontoco'. A'napita noya ya'huëhuachina', ama noyapatocosohuë'. Ama pinotocosohuë'. <sup>2</sup> Yosë huëntonënguë ya'conpatëhua', hua'huasha nasha huaipiso pochin ninëhua'. Ni'co'. Canopia'huaya sho'sho apira apira nayaran. Sho'shotaton, noya chinirarin. Inapochachin canpitanta' Yosë noninso chachin na'con na'con nohuantoco'. Ina yonquihuatama', oshaquëran noya noya nisarama'. Chiníquën cancantatoma', noya cha'ësarama'. Yosë nanamënáchin achinicananinpoa'. <sup>3</sup> “Sinioroso' noya,” ta'toma', nani imarama'. Cosharo' pi'nirëso pochin pi'pian nohuitërama'. Na'con na'con ina nohuitoco'.

### *Quisocristo na'pi pochin nininso'*

<sup>4</sup> Na'pi quëran yapëihuatëra, a'na na'piso' na'con na'con nohuantërë' pëi' achinicaso marë'. Quisocristo ina na'pi pochin ninin. Piyapi'sari co nohuantopirinahuë', Yosëriso' nóya nicator, na'con nohuantërin. Apira apira Quisocristo yonquico'. Inaso' nannimiatarin. <sup>5</sup> Imarama' ni'ton, canpitanta' noya na'piro'sa pochin nisarama'. Nannimiatarama'. Ya'ipi imarëhuasopita Yosë acorinpoa' pëinën pochin nicacaso marë'. Cancanënpoa quëran huarë' ina na'con chinotërëhua' ni'ton, corto hua'ano'sa pochin nisarëhua'. Nani tahuëri ina chinotatëhua', “Yosparinquën Sinioro,” itahua'. Nicatahuacasona' ama naniantahuasohuë'. Quisocristo catahuarinpoa' ina pochin nicacaso'. Ina marë' Yosë noya ni'sarinpoa'. <sup>6</sup> Quiricanën quëran ina ninorin:

“Yapëihuachinara, noya noya na'pi nohuantopi pëi' achinicaso marë'. Cristo ina na'pi pochin nizarin. Sionquë acoarahuë. Ina natëhuatama', ‘Co naniantaripoahuë’; ta'toma', co sëtërëso pochin cancantaramahuë’,” tënin Yosë quiricanënguë.

<sup>7</sup> Quisocristo natëhuatëhua', ina na'con nohuantarihua'. A'naquënso nipirinhue' co natëtonaraihuë', co Quisocristo nohuantopihuë'. Quiricanën quëran naporin:

“Na'pi quënanpachinara, sacatoro'sa' co nohuantopihuë'. Të'yatopi. Ina na'piso nipirinhue' noya noya ninin pëicaso marë’,” tënin.

Inapochachin Quisocristo noya nipirinhue' co nohuantopihuë'. <sup>8</sup> Quiricanën quëran itantarin:

“Iratohuatëra, na'pi i'patahuatë', anotërë’,” tënin. Inapochachin a'naquën co Quisocristo nanamën natëtonaraihuë', nisha cancantopi. Ina marë' Yosë nohuanton, na'inpí huachi.

<sup>9</sup> Imarëhuasopitaso nipirinhue' nohuantërinpoa'. Huayoninpoa' ina nohuitacaso marë'. Inasáchin hua'anëntërinpoa'. Nani acorinpoa' corto hua'ano'sa pochin nicatorëhua', ina marë' sacatacaso'. Noyápiachin cancan quëtërinpoa'. Yosë piyapinënpoa' ninëhua'. Iráca tashi pochin cancantopirëhuahuë', Yosë nicha'ërinpoa' tahuëri pochin cancantacaso marë'. Acorinpoa' Yosë noya nosororinpoaso' sha'huicaso marë'. <sup>10</sup> Iráca co Yosë piyapinënpita nipiramahuë', iporaso' nani huëntonënguë aya'coninquëma'. Iráca co insonta' tēhuëchachin nosororinquëmahuë'. Iporaso' Yosë nosororinquëma'.

### *Yosë noya imahua'*

<sup>11</sup> Nosororanquëma' iyaro'sa' ni'ton, pënënanranquëma'. Quisocristo imatoma', co isoro'paquë ya'huëmiataramahuë'. Yosë'pa' ya'huëmiataramaso'. Napoaton ama ma'sha isoro'paquë ya'huërinso'pitaráchin yonquicosohuë'. Isoro'paquë no'piápi, monshihuanapi, taparósáchin nonatona', capa cancantapi. Ama ina pochin cancantocosohuë'. Ina pochin cancantohuatama', sopai minsëarinquëma', co Yosë pochin cancantaramahuë'.

<sup>12</sup> Co imapisopitahuë' pinorinënguëma'. “Co noyahuë' nipi,” topi. Ina nipirinhue', noyasáchin nico' ni'inënguëma'. Ina quëran a'na tahuëri Yosëri catahuarin ni'ton, no'tëquën yonquihuachina', yonquiarinënguëma'. “Ma noyacha Yosëri catahuarin ni'ton, noya nipi paya,” tosapi.

### *Hua'ano'sa' natëcaso' ya'huërinso'*

<sup>13</sup> Sinioro imarama' ni'ton, hua'ano'sa' natëco'. Ya'ipi acorinsopitanta' natëco'. Copirnosó' chini chiniquën nanantërin ni'ton, natëcaso' ya'huërin. <sup>14</sup> Ninano hua'ano'sa', chirinchirosá', sontarósá', ponisiarósá', inapita acorin piyapi'sa' a'paicaiso marë'. Co noyahuë' nipachina', ana'intapi. Noya nipachina', noya ni'sapi. Inapitanta' natëco'. <sup>15</sup> Ina Yosë nohuantërin. A'naquën co Yosë nanamën nitotatonaraihuë', co yonquipihuë'. Quisocriso imarama' ni'ton, a'naroáchin yapinorinënquëma'. Noyasáchin nico' ama pinoinënquëmaso marëhuë'.

<sup>16</sup> “Yosë nicha'ërinpoa',” ta'toma', noya yonquico'. Iráca nanan co natëcaso' ya'huëpirinhuë', ama ina yonquiatoma' tēhuëcosohuë'. Yosë hua'anëntërinquëma' ni'ton, ina nohuantërinsoáchin natëco'. <sup>17</sup> Ya'ipi piyapi'sa' noya nontoco'. Imaramasopita capini noya ninosoroco'. Yosë tē'huatatoma', no'tëquën natëco'. Copirnonta' noya nicatoma', natëco'.

### *Quisocriso nonanacaso' ya'huërinso'*

<sup>18</sup> A'naquëma' patron marë' sacatërama'. Asacatohuachinquëma', natëco'. Yosë ni'sarinquëma' ni'ton, noya natëco'. A'naquën patron noya. Nosororinquëma'. A'naquënso nipirinhüë' yáno'huitërin. Co noyahuë' nipirinhüë', inapitanta' natëcaso' ya'huërin. <sup>19</sup> Topinan quëran ana'into huachinquëma', ama no'huicosohuë'. Yosë yonquiatoma', ahuantoco'. Ina marë' Yosë noya ni'sarinquëma'. <sup>20</sup> Co noyahuë' nipatama', ana'intarinquëma'. Ahuantohuatama', co ina marë' noya ni'ninquëmahuë': “No'tëquën ana'into huachinquëma', ahuantacaso' ya'huërin,” topi ya'ipiya. A'na tahuëriso nipirinhüë' noya nipiramahuë', aparisitarinënquëma'. Co no'huitatomahuë', ahuantohuatama', Yosë noya ni'sarinquëma'. <sup>21</sup> Ina pochin ahuantacaso' Yosë nohuantërin. Quisocriso canpoa marë' parisitërin. Parisitaton, a'chintërinpoa' canpoanta' ina pochin ahuantacaso'. Ina iyarósá' nonanco'. <sup>22</sup> Inaso' nóya ninin. Co manta' onporinhüë'. Co pi'pian tëranta' nonpininhüë'. <sup>23</sup> Inimiconënpitari pinopachinara, co yai'huëretërinhuë'. Aparisitopirinhüë', co no'huirinhüë'. “A'na tahuëri Yosëri no'tëquën ana'intarin,” ta'ton, Yosëíchin natërin. <sup>24</sup> Quisocriso isoro'paquë o'maton, piyapi chachin nasitimarin. Oshanënpoa marë' corosëquë chiminin. Inaora ya'huëretërinpoa'. Ya'ipi co noyahuë' yonquirëhuasopita naniantatëhua' noya nicacaso marë' chiminin. Corosëquë parisitaton, anoyacancantërinpoa'. <sup>25</sup> Ohuica chihuërinso pochin nicatëhua', co Yosë nohuitopirëhuahuë', iporasó' Quisocriso imarëhua'. Inaso' ohuicarósá' hua'anën pochin ni'ton, noya a'pairinpoa'.

## 3

### *So'yahuano'sa' pënëninso'*

<sup>1-2</sup> Sanapi'santa' so'yahuachina', so'ina' natëina'. A'naquën quëmapi'sa' co Yosë nanamën natëyátërapihuë'. Inahuanta' imacaiso marë' so'ina' noya natëina'. Noya no-coma'ina'. Ama a'na quëmapi tēhuainasohuë'. Yosë yonquiatona', noya niina'. Noyasáchin nipachin, ina nica-ton, so'ionta' oshaquëran imapon nimara. Co sa'ini pënënpirinhüë', noya nininso marë': “Noya nanan imasarin,” tapon inanta'. <sup>3</sup> Ama imoyarósá' nita-pacasaráchin yonquicosohuë'. A'naquën sanapi'sa' ainëna tapacasoachin yonquipi. Oro quëran nipiso' a'sontanpapi. Notohuaro' miyo pë'pëpi. Pa'ton nininsopita a'mocaiso pa'yatopi. Noyápiachin nitapacasaráchin yonquipi. <sup>4</sup> Quisocriso imapatama', ama aipi ya'norinsoráchin yonquicosohuë'. Noyápiachin cancantacamaso' na'con na'con yonquico'. Yosë pochin yonquicaso' ya'huërin. Nitaparamaso' co ya'huëmiatarinhüë'. Cancanënpoa quëran yonquirëhuasopitaso nipirinhüë', ya'huëmiatarin. Napoaton imoyarósá' sano cancantoco'. Ama pi'pian tëranta' no'huitocosohuë'. Nóya cancantohuatama', Yosë noya ni'sarinquëma'. <sup>5</sup> Iráca noya sanapi'sa' Yosë natërinso-pita ina pochin nipi. “Yosë

catahuarinco,” ta'tona', inaíchín yonquipi. So'ina' noya natëtona', noyápiachin cancantopi. <sup>6</sup> Apraan sa'in ina pochín ninín, Sara itopiso'. So'in noya natërin. “Camaihuachincora, natërahuë mini,” tënín. Canpitanta' imoyaro'sa' noya nipatama', ina pochín cancantarama'. Noyápiachin cancantohuatama', co të'huatochinachín cancantaramahuë'.

<sup>7</sup> Canpitanta' iyaro'sa', sa'ama' nosoroatoma' noya ichiya'huëco'. Co canpita pochín chinipihuë' ni'ton, noya nicatora', sanoanan quëran nontoco'. Inapitanta' Quisocristo imapi ni'ton, canpitarë'quëma chachín Yosë huëntonënguë ya'conpi anta'. Inapitanta' nanpimiatapi. Ina yonquiatoma', sa'ama' noya nosoroco'. Inapotohuatama', Yosë nontohuatama', catahuarinquëma'.

### *Aparisitërinënpaso'*

<sup>8</sup> Ya'ipinquëma' noya nini'toma', ya'huëco'. A'naquën sëtouachina', noya nontoco' ama aquëtë' sëchinasohuë'. Noya cancantohuachina', canpitanta' noya cancantoco'. Imaramaso capini ninosoroco'. Ninosoroatoma' iyaro'sa' nicatahuaco'. Ama ninocancosohuë'. Canpitanta' imoyaro'sa', noya ninontoco'. <sup>9</sup> Piyapi'sa' ma'sha onpotohuachinënguëma', ama i'huërëtacamaso' yonquicosohuë'. Pinopachinënguëma', ama canpitariso' pinocosohuë'. Noya nontoco'. Naporahuaton, Yosë nontoco' inapitanta' catahuain. Imapatëhua', ina sha'huitërinpoa' a'napitanta' nosorocaso'. Napohuatëhua', Yosë noya catahuarinpoa'. <sup>10</sup> Iráca quiricanën quëran itërinpoa':

“Noya ya'huëcamaso' nohuantohuatama', noyasáchin nonco'. Ama insonta' nonpintocosohuë'. Inapohuatama', noya cancantatoma', noya ya'huarama'.

<sup>11</sup> Ya'ipi co noyahuë' yonquiramasopita naniantatoma', nóya nico'. Sano piyapi nicatora', ama insonta' no'huicosohuë'. A'napitanta' catahuaco' noya nini'tona' ya'huë'ina'.

<sup>12</sup> Noya nipatama', Siniro a'paiarinquëma'. Ina nontohuatama', natanarinquëma'. Nipirinhüë', co noyahuë' nipatama', co Siniro tahuërëtarinquëmahuë',” tënín.

<sup>13</sup> ¡Noyasáchin nipatama', co a'napita ya'huërëtarinquëmahuë'! <sup>14</sup> A'na tahuëriso nipirinhüë' imaramaso marë' aparisitohuachinënguëma', ama të'huatocosohuë'. “Quisocristo marë' parisitarëhua’,” ta'toma', noya cancantoco'. Yosë noya catahuarinquëma' ni'ton, ama pa'yancosohuë'. <sup>15</sup> Ya'ipi cancanëma quëran Quisocristo yonquico'. Inaso' hua'anëntërinpoa' ni'ton, chinotoco'. Nani tahuëriya chiníquën cancantatoma', yonquico' Quisocristo nanamën sha'huicamaso marë'. Ina quëran “¿Onpoatomata' imarama'?” itohuachinënguëma', a'naroáchin no'tëquën sha'huitarama'. <sup>16</sup> Ama no'huitë pochín chiníquën sha'huatocosohuë'. Sanoanan quëran pënëncó'. Yosë yonquihuatama', noya sha'huitarama'. Quisocristo imarama' ni'ton, noyasáchin nicatora', noyápiachin cancantoco'. Ina quëran pinopirinhüëma', “Co'ta noya nisapi. Quëmariso' nonpinapiran,” itarin a'narinta'. Itohuachina, pinotona'piso' tapanarin.

<sup>17</sup> Co noyahuë' nipatëra, parisitacaso' ya'huërin. A'na tahuëriso nipirinhüë' Yosë nohuanton, imarëhuasopitanta' parisitarëhua'. Noya nipirëhuahuënta', piyapi aparisitarinënpoa'. Ina pochín parisitacaso' Yosë nohuantërin. <sup>18</sup> Quisocristonta' nóya niponahuë', oshahuanëhuaso marë' parisitërin. Oshanënpoa' inquitinpoaso marë' chiminín. A'naromarëáchin chiminín. Noya niponahuë', oshahuano'sa marë' chiminín. Canpoanta' Yosë nohuatacaso marë' chiminín. Piyapi ni'ton tëhuëenchachín tëpapi. Chiminaponahuë', nanpiantarin ni'ton, noya noya ya'huantarin. <sup>19</sup> Ina pochín nanpiantaton, pa'nin chimipiro'sa' ya'huërinquë. Inaquë tashinan pëiquë ya'huapiso pochín nininsopita nanan sha'huitonin. <sup>20</sup> Inapitaso' iráca Noi nanpiso', pa'pi co noyahuë' cancantopi ni'ton, ina nohuanton, Noi pënëntárin. Pënëntopirinhüë', co yanatëpihuë'. Yosëso' co a'naroáchin ana'intërinhuë'. Noi panca nancha nicaso', ninarapirinhüë', co natëpihuë' ni'ton, ana'intërin. Ipora huanta' parisitapi. Noiso' nancha tinirahuaton, ya'conin. Naporo' posaya'píchin ii' quëran cha'ëpi. <sup>21</sup> Inapochachín iporaso'



Yosë nicha'ësarinpoo'. Anoyacancantohuachinpoo', aporintërinënpoo'. Co në'huë inquitinënpooaso marë' aporintërinënpooahuë'. Aporintohuachinënpooara, Yosë nontërehua' catahuainpooaso marë'. “Ya'ipi oshanëhuë inquitoco. Catahuaco noyasáchin nicato, noyápiachin cancanchi,” itërehua'. Ina marë' anoyacancantërinpoo'. Quisocristo nantantarin ni'ton, nicha'ësarinpoo'. <sup>22</sup> Nantantarahuaton, Yosë'pa' pantarin. Yosë inchinan quëran huënsëaton, chini chiniquën nanantarin. Ya'ipi anquëniro'sa', hua'ano'sa', chiniquën nanantërinso pita inapitari natëpi huachi.

## 4

### *Iráca naporëhuaso' naniantahua'*

<sup>1</sup> Quisocristo isoro'paquë o'maton, tëhuënhachin parisitërin. Napoaton canpitanta' parisitohuatama', ahuantoco'. Quisocristo yonquiatëhua', noya ahuantohuatëhua', noya noya cancantarihua'. Co huachi oshahuanacaso' pa'yatarihuahuë'. <sup>2</sup> Napoaton ama iráca naporamaso pochin yonquicosohuë'. Ipora quëra huarë' Yosë nohuantërinsoáchin natëco'. <sup>3</sup> Hua'qui' co noyahuë' ninama'. Monshihuanama', nisha nisha sanapi noyarama', no'pirama'. Pita nicacasoáchin yonquirama'. Mamanshi mosharama', co inapita moshacasohuë' nipirinhue'. Iráca co Yosë imatomahuë', inaporama'. Inapoatoma', tahuëri chinirama'. <sup>4</sup> Iporaso nipirinhue' imarama'. A'napita yano'pihuachinara, amatopirinëinquëmahuë'. Co yano'pihuatamarahuë', no'huirinëinquëma'. “¿Onpoatomata' pita nipatëira, co yani'namacoihuë'?” itatënëinquëma', pinorinëinquëma'. <sup>5</sup> Iporaso' pinopirinëinquëmahuë', ayaro' tahuëri nanihuachin, Yosë sha'huitiinpooaso' ya'huërin. Nanpirëhuasopita, chiminpisopita, ya'ipinpoo' coisë pochin nontarinpoo'. Co noyahuë' nipsisopita no'tëquën ana'ntarin. <sup>6</sup> A'naquën nohuiteramasopita nani chiminpi. Piyapi ni'ton, chiminpi. Chiminaponaraihuë', co'huara chimiyantërasoihuë', Quisocristo nanamën a'chintopi. Natëpi ni'ton, hua'yanëna quëran Yosë pochin nantantatapi.

### *Nisha nisha acorinpooaso'*

<sup>7</sup> Ayaro' tahuëri nani ya'cariarinpoo'. Napoaton ama nisha nisha yonquicosohuë'. Noya yonquiatoma', Yosë nontáco'. <sup>8</sup> Ya'ipi cancanëma quëran noya ninosoroco'. Ina na'con na'con Yosë nohuantërin. Piyapi nosorohuatama', co noyahuë' nipirinhue'nta', a'naroáchin nanan anoyatarama'. Co noyahuë' nipsisopita naniantatoma', co huachi yonquiamahuë'. <sup>9</sup> Ama apiracosohuë'. Ni'toro'sa' huë'pachina', noya nontoco'. Noya cancantatoma', a'caco', ahuë'ëtoco'. <sup>10</sup> Yosë imarëhuasopita acorinpoo' nisha nisha nicacaso'. Inaora nohuanton, a'naya a'nayanpoo' catahuarinpoo' ma'sona nohuantërinso' nitotacaso'. Napoaton ama topinan quëran ya'huëcosohuë'. Ma'sona nitotohuatama', noya nico' a'napita catahuacaso marë'. Noya noya imacamaso marë' nicatahuaco'. <sup>11</sup> A'naquën Yosë nohuanton, nitotopi pënëntacaiso'. Nitotohuatama', Yosë noninso chachin pënëntoco'. A'naquëonta' Yosë nohuanton, cania'piro'sa', sa'ahuaro'sa', inapita catahuapi. Yosë catahuarinquëma' ni'ton, ina yonquiatoma', a'napita noya catahuaco'. Ma'sona tëranta' nipatama', ya'ipi cancanëma quëran nico'. Piyapi'sa' nicatënëinquëma' Yosë noya noya yonquicaiso marë' inapoco'. Yosëso' noya noya ninin. Chini chiniquën nanantërin. Ya'ipi piyapi'sari ina chinochina'. Quisocristo catahuarinpoo' ina pochin cancantacaso'. Amen.

### *Nisha nisha parisitërehuaso'*

<sup>12</sup> Na'con iyaro'sa', imoyaro'sa', nosororanquëma'. Iporaso' chiniquën parisitohuatama', ama pa'yancosohuë'. Co topinan quëran ma'sha onporamahuë'. Imarama' ni'ton, ina pochin parisitacaso' ya'huërin. Yosë nohuanton, napoarama' noya noya imacamaso marë'. <sup>13</sup> Quisocristo parisitërinso pochin parisitohuatama', noya cancantoco'. Ina quëran chiniquën nanantaton o'mantahuachin, noya noya cancantarama'.



<sup>14</sup> Imaramaso marë' pinopachinënquëma', Yosë noya ni'sarinquëma'. Ispirito Santo ya'coancantatënquëma' achinicananarinquëma' ni'ton, noya cancantoco'.

<sup>15</sup> A'naquën piyapi'saso' co noyahuë' cancantopi. Tëpatopi, ihuatopi, nanan pa'yatopi inapitaso' ana'intacaso' ya'huërin. Ama inapita pochin yonquicosohuë'. Ina marë' parisitohuatëhua', tapanacaso' ya'huërin. <sup>16</sup> Nipirinhue', imaramaso marë' aparisito-huachinënquëma', ama tapancosohuë'. "Quisocristo imarai mini. Ma noyacha Tata Yosëso paya," topatama', Yosë noya ni'sarinquëma'.

<sup>17</sup> Nani ana'intinpoaso' naniriarin. Ipora chachin imarëhuasopita pi'pian pi'pian ana'intarinpoa'. Co noyahuë' nipatëhua', tatanpoa pochin pi'pian ana'intarinpoa' noya noya yonquicaso marë'. ¡Ayaro' tahuëriso nipirinhue' co nanamën natëpisopitahuë' chiníquën ana'intarin! Parisitopiquë a'pararin ni'ton, parisitomiatapi. <sup>18</sup> Yosë quiri-canënquë sha'huitërinpoa': "Noya piyapi'santa' parisi quëran cha'ësapi. ¡Oshahuano'saso nipirinhue' co onporonta' cha'ësapihuë'! Ya'ipi co noyahuë' nipsisopita chiníquën parisitomiatapi," ténin. <sup>19</sup> Napoaton Yosë nohuanton parisitohuatama', noya nico'. "Catahuaco Sinioro chiníquën cancanchi," itoco'. Yosë chachin nininpoa'. Inaso' co onporonta' naniantaripoahuë'.

## 5

### *Ansiano'sa' pënëninso'*

<sup>1</sup> Ya'ipi ansiano'sanquëmanta' pënënanquëma'. Canta' ansianoco ni'to, achinican-cainquëma', ténahuë. Quisocristo isoro'paquë nipon, nohuitërahuë. Corosëquë parisitohuachina, cari ni'nahuë ni'ton, sha'huirárahue. O'mantahuachin, canpoanta' inarë'quënpoa' hua'anëntarihua'. Napoaton iporaso' pënënanarinquëma' noya nicacamaso marë'. <sup>2</sup> Quisoso imapisopita iyaro'sa' noya ni'co'. Yosë acorinquëma' ya'huëramaquë a'chinacamaso marë'. Hua'anëni ohuicanënpita noya a'pairinso pochin noya a'paico' imamiachina'. A'naya tëranta' co noyahuë' nipachin, sanoanan quëran pënëncó' noya yonquianta'in. Nani tahuëri catahuaco' noya imaina'. Ama chirotomahuë', a'chincó'. Ina pochin nicacaso' Yosë nohuantërin. Ni'ton, canpitanta' noya nohuantatoma', a'chincó'. Ama canacaso marë' a'chincosohuë'. Nóya cancantatoma', Yosë marë' sacatoco'. <sup>3</sup> Pënëntohuatama', ama chiníquën nontocosohuë'. Ama hua'an pochin cancantatoma', camaitocosohuë'. Yosë acorinquëma' a'chintëramasopita catahuacamaso'. Napoaton noya yonquiatoma', noya nico' inapitanta' inachachin nonainquëmaso marë'. <sup>4</sup> Quisocristo imarëhua' ni'ton, ya'ipinpoa' hua'anëntërinpoa'. A'na tahuëri o'mantararin. Noya ansiano'sa' nipatama', naporó' noya canaarama'. Isoro'paquë canatohuachinara, yancotë' huëron quëran nipiso' quëtopirinhue', inaso' a'naroáchin ahuirin. Inapaquëso nipirinhue' canahuatama', ya'huëtomiatarinquëma'. Noya noya ya'huëcontarama'.

### *Yosë catahuarinpoaso'*

<sup>5</sup> Hui'napi'sanquëmanta' ansiano'sa' natëco'. Ya'ipinquëma' noya yonquiatoma', nicatahuaco'. Quiricanën quëran itërinpoa':

"Caora noya nisarahuë, ta'toma', nocantohuatama', Yosë co noya ni'sarinquëmahuë'.

Nipirinhue', 'Caora co nanitërahuë' noya nica'huaso'. Catahuaco,' topatama', inaora nohuanton, Yosë nóya catahuarinquëma'," ténin.

<sup>6</sup> Parisitapomarahue', ama Yosë no'huicosohuë'. Chiníquën nanantaton, ni'sarinquëma ni'ton, natëco'. Ina noya yonquihuatama', tahuëri nanihuachin, noya noya acoar-inquëma'. <sup>7</sup> Ama ma'sha onpochináchin yonquicosohuë'. Ya'ipiya Yosë sha'huitoco' catahuainquëma'. Ina quëran: "Nosoroatonpoa', co naniantaripoahuë'," ta'toma' sano cancantoco'.

### *Sopai yaminsërinpoaso'*

<sup>8</sup> Sopaiso' inimiconënpoa'. Yacamairinpoa' co noyahuë' nicacaso marë'. Pa'pini' yamaninposo pochachin sopai pa'sarin piyapi'sa' minsëcaso marë'. Napoaton noya yonquiatoma', ni'sáco'. <sup>9</sup> Ama pi'pian tëranta' ina tahuërëtosohuë'. Chiníquën cancantatoma', sha'huitoco' pa'in. Yosëíchin natëco'. Co canpitaíchin parisitaramahuë'. Ya'ipi parti Yosë imarëhuasopita parisitarëhua'. Ina yonquiatoma', chiníquën cancantoco'. <sup>10</sup> Yosë pa'pi nosororinpoa'. Quisocriso imarëhua' ni'ton, a'na tahuëri inápaquë quëpantarinpoa'. Iporaso' ma'sha onpopirëhuahuë', catahuarinpoa'. Co hua'qui' parisitarihuahuë'. Ina quëran nosoroatonpoa', anoyatarinpoa'. Achinicananarinpoa'. Noya noya acoarinpoa'. <sup>11</sup> Yosë chini chiníquën nanantërin. Ya'ipiya hua'anëntarin ni'ton, co onporonta' pipiarinhuë'. Inasáchin chinochina'. Amen.

*Tiquiapon pochin ninshitërinso'*

<sup>12</sup> Iya Siripano catahuarinco ninshita'huanquëmaso'. Inaso' noya ni'nahuë. Noya imarin. Nani pi'pian ninshitëranquëma' pënëna'huanquëmaso marë'. Yosë yonquirinpoaso chachin nani sha'huitëranquëma'. Noya nosororinpoa', ténahuë. Ina yonquiatoma', ama a'pocosohuë'.

<sup>13</sup> Papironiaquënta' Yosëri huayoninsopita ya'huëpi. Inapita saludos a'patarinënuëma'. Marconta' saludos a'patarinquëma'. Inaso' hui'nahuë pochin ni'nahuë. <sup>14</sup> Ya'ipinquëma' noya ninosoroatoma', nisë'quëco'. Quisocriso imarama' ni'ton, Yosë catahuainquëma' sano cancantacamaso marë'. Nani huachi.

*Pitro*

## Pitrori imapisopita ninshitaantarinsó'

### *Imapisopita yonquiaton, nanan a'patërinso'*

<sup>1</sup> Ca Simon Pitroco ninshitaranquëma', ni'co'. ¿Noya ya'huarama'? Noya canta' ya'huarahuë. Quisocristoíchin hua'anëntërinco ni'ton, inasáchin natërahuë. Ina acorinco nanamën a'china'huaso marë'. Yosë nohuanton, canpitanta' Quisocristo natërama'. Quiya pochin imarama' ni'ton, canpitanta' nicha'ësarinquëma'. Ma noyacha Quisocristo anoyacancantërinpoa paya, tënëhua'. Inaso' Yosë ni'ton, chinotërehua'. Oshanënpoa' inquitatonpoa', nóya ni'ninpoa'. Napopianachin nosororinpoa' ni'ton, catahuarinquëma' canpitanta' cancanëma quëran huarë' natëcamaso'. <sup>2</sup> Yosë inaora nohuanton noya catahuainquëma'. Asanocancainquëma'. Noya noya nohuitohuatama', noya noya cancantarama'. Siniro Quisocristo nohuitohuatama', na'con catahuarinquëma' sano cancantacamaso marë'.

### *Noya noya imacaso' ya'huërin*

<sup>3</sup> Quisocristoso' chiníquën nanantaton, ya'ipiya nanitaparin. Ina imapatëhua', catahuarinpoa' Yosë pochin cancantacaso marë'. Ina Yosë anohuitërinpoa'. Huëntonënuquë nani aya'coninpoa'. Inaso' nóya ni'ton, nohuantërin canpoanta' inapochachin cancantacaso'. Ina nohuitohuatëhua', catahuarinpoa' onporahuatësona noya noya chinotacaso'. <sup>4</sup> "Caora nohuanto, catahuaranquëma' noyápiachin cancantacamaso marë'," itatonpoa', na'con catahuarinpoa'. Oshanënpoa' inquitatonpoa', anoyacancantërinpoa'. Sopai yacamairinpoa' co noyahuë' nicacaso marë'. Sopai natëhuatëra, monshihuanë', canacasoáchin yonquirë', co noyahuë' cancantëre'. Inapohuatëra, oshaquëran nitapicancanë'. Quisocristoso nipurinhuë' nicha'ërinpoa'. Apira apira ina yonquihuatëhua', oshaquëran Yosë pochin cancantarihua'. <sup>5</sup> Napoaton Quisocristo imapatama', na'con yonquico' noya nicacamaso marë'. Noya nicatoma', Yosë yonquirinso chachin nitotoco'. <sup>6</sup> Ina nitotatoma', co noyahuë' yonquihuatama', a'naroáchin naniantoco'. Naporahuatoma', ma'sha onpoapomarahué', chiníquën cancantoco'. Chiníquën cancantohuatama', ya'ipi cancanëma quëran ina chinotoco'. <sup>7</sup> Noyasha chinotatoma', imaramasopita capini noya ninosoroco'. Naporahuatoma', ya'ipi piyapi nosoroco'.

<sup>8</sup> Ina pochin Yosë pënëninpoa' noya noya imacaso marë'. Ina pochin cancantohuatama', co topinan quëran imasaramahuë'. Oshaquëran noya noya cancantohuatama', noya noya Quisocristo nohuitarama'. <sup>9</sup> A'naquënso nipurinhuë' co ya'ipi cancanëna quëran Yosë imapihuë'. Co noyahuë' nipi. Co a'napita nosoropihuë'. Ina pochin cancantohuachinara, pëtorayatëre'so pochin cancantopi. Pëtorayatohuatëra, co aquë quënantërehuë'. Inapochachin inapitanta co ya'ipi cancanëna quëran imatonahuë', isoro'paquë ya'huërinso'pitaráchin yonquipi. Nóya cancantacaso marë' oshanënpoa' inquitopirinpoahuë', ina naniantopi. Oshaquëran somaraya pochin cancantatona' co huachi nanitapihuë' Yosë nanamën natanacaiso'. <sup>10</sup> Napoaton iyaro'sa', na'con yonquico' ya'ipi cancanëma quëran huarë' imacamaso marë'. Yosë huayonatënuquëma', nontërinquëma' ni'ton, noyá matëre'so pochin imamiatoco'. Inapohuatama', co nisha cancantatoma', a'poaramahuë'. <sup>11</sup> Cancanëma quëran huarë' imapatama', a'na tahuëri hua'anëntërinquë quëpantarinquëma' noya ya'huëmiatacamaso marë'. Siniro Quisocristo nóya cancantaton, nicha'ësarinpoa'. Inápaquë pa'patëhua', co onporonta' pipiarëhuahuë'.

<sup>12</sup> Ina yonquiato, co amirahuë' pënënta'huaso'. No'tën nanan nani nitotërama'. Noya nitotopiramahuë', naquëranchin sha'huitantarinquëma' noya noya yonquicamaso marë'. <sup>13</sup> Co'huara ca chimiyantërapohuë', ina nanan chachin sha'huichinquëma' ama naniantacamaso marëhuë', tënahué'. <sup>14</sup> Co hua'quiya quëranhuë' chiminarahuë'.

Sinioro Quisocristo nani anitotërinco. <sup>15</sup> Napoaton ninshitaranquëma'. Naquëranchin a'chintantaranquëma'. Ina quëran chiminpirahuënta', iso quirica nontohuatama', yonquiantarama'.

### *Quisocristo ya'norinso'*

<sup>16</sup> “Chiniquën nanantaton, Quisocristo o'mantararin,” itërainquëma'. Sinioro o'mantacaso' tahuëri no'tëquën a'chintërainquëma'. Co quiyaora yonquinëhuëi quëran a'chintërainquëmahuë'. Co pi'pisha tëranta' nonpintërainquëmahuë'. Iráca isoro'paquë nipon, nisha pochin ya'notërincoi. Ya'pirahuëi quëran chachin ni'nai. <sup>17-18</sup> Quisocristoro'coi a'na motopi'pa' pa'nai. Inaquë Yosë nohuanton, huënaráchin huënaráchin ya'norin, ni'nai. Naporo chachin inápa quëran Tata Yosë noninso natanai: “Iso' hui'nahuë, nosororahuëso'. Nóya ni'nahuë,” tënin. Yosë nohuanton, inaquë quënanatoi, natanai. Inapotatoncoi, Quisocristo chiniquën nanantërinso' anitotërincoi.

<sup>19</sup> Ina yonquiatoi: “Ma no'tëquëncha Yosëri ninorin paya,” tënai. Iráca quëra huarë' pënëntona'piro'sa' ninshitërinënpoa'. Yosë nohuanton, co'huara nasichátëraponhuë', Quisocristo napocaso' ninopi. “No'tëquën ninshitopi,” ta'toi, quiricanën na'con natërai. Canpitanta' ina nontatoma', yonquico'. No'tëquën anitotërinpoa'. Tashi' nipachina, nanparin noya a'pintërinpoa'. Inapochachin Yosë quiricanën quëran a'pintërinpoa' no'tëquën yonquicaso marë'. Tahuërianpitaquë huarë' nanparin noya orotërin. Inapochachin ipora Quisocristo o'mantaquë huarë' quiricanën ya'huëtërinpoa' ina nohuitacaso marë'. O'mantahuachin, noyá nohuitarihua'. Huënio tayora huënaráchin a'pininso pochin a'pintarinpoa'. <sup>20</sup> Iporaso' quiricanën quëran nontërinpoa'. Co canpoara yonquinënpoa quëran ma'sona tapon naporinso' nitotërehuahuë'. <sup>21</sup> Iráca co inahuara nohuanton, ninshitopihuë'. Yosëri acorin nanamën anitotinpoaso marë'. Ispirito Santo nohuanton, Yosë yonquirinso chachin ninshitopi.

## 2

### *Nisha a'china'piro'sa'* (Judas 4-13)

<sup>1</sup> Iráca Yosëri acorinsopita no'tëquën pënëntopi. A'naquënso nipirinhüë' nonpin nanan pënëntatona', israiro'sa' nonpintopi. Inapochachin iporanta' a'naquën nonpin nanan yaa'chintarinëinquëma'. Noyasha nontapirinëinquëmahuë', nonpintarinëinquëma'. “Quiyanta' imarai,” taponaraihuë', nonpin nanan a'chinapi anishacancantacaiso marë'. Quisocristo nicha'ëinpoaso marë' chiminin. Inaíchin natëcaso nipirinhüë', nisha a'china'piro'saso' co yanatëpihuë'. Ina marë' a'na tahuëri Yosëri ana'intarin. A'nanaya ana'intarin. <sup>2</sup> Co no'tëquën a'chintatonaraihuë', na'a piyapi'sa' nonpintapi. “Noya no'picaso', noya monshihuanacaso',” ta'tona', co noyahuë' nisapi. Na'a piyapi natanahuatona', inapita pochin cancantapi. “Imarai quiyanta',” taponaraihuë', co noyahuë' nisapi. Ina marë' a'napitari nicatona', Quisocristo pinosapi. “Quisocristo nanamën co imacaso' ya'huërinhuë'. Ina imapisopitaso' co noyahuë' nipi,” ta'tona', co no'tën nanan yaimasapihuë'. <sup>3</sup> Nisha a'china'piro'saso' co nosororinëinquëmahuë'. Canacaiso marë' nonpin nanano'sa' a'chintarinëinquëma'. Inaso nipirinhüë', iráca quëra huarë' Yosëri yonquirin ana'intacaso'. A'na tahuëri no'tëquën ana'intarin. Co naniantarinhüë' ana'intacaso'.

<sup>4</sup> Ni'co'. Iráca a'naquën anquëniro'sa' co Yosë yanatëpihuë'. Co noyahuë' nipi ni'ton, Yosëri ana'intërin. Co inapita tëranta' nicha'ërinhuë'. Parisitacaiso marë' a'parin. Tashinanquë oncorapipinan ya'huërapi. Inaquë ayaro' ninarapi. <sup>5</sup> Iráca ya'huëpisopitanta' co nicha'ërinhuë'. Co noyahuë' nipachinara, Yosë nohuanton, panca pacon pa'nin. Ii' quëran ta'huantopi. Noiso' Yosë imaton, no'tëquën pënëntopirinhüë', co yanatëpihuë' ni'ton, ya'ipiya ta'huantopi. Noisáchin nicha'ërin. Ya'ipi quëran

posaya'píchin cha'ëpi. <sup>6</sup> Ina quëran Sotomaquë ya'huëpisopitanta' ana'intërin. Co noyahuë' cancantohuachinara, Sotoma, Comora, cato' ninano chachin noyá ahuiquitërin. Ya'ipiya chiminpi. Ayonquiinpoaso marë' inapita aninshitërin. “Co noyahuë' nipatëhua', chiníquën ana'intarinpoa',” tënëhua'. <sup>7-8</sup> Sotomaquë ya'huëpisopita pa'pi co noyahuë' cancantopi. Monshihuanacaisoáchin yonquipi. A'naratipita co noyahuë' nipi. Inaquë a'na quëmapíchin noya ninin, Loto itopiso'. Nani tahuëri, nani tahuëri co noyahuë' nipiso nicator, sëtërin. Taparo' nonpachinara, co noya nataninhuë'. Sëtacasoáchin cancantërin. Sacai' niponahuë', inaora Yosë yonquirin. Ina marë' Yosëri nicha'ërin. <sup>9</sup> Inapochachin ipora Quisocriso imapatëhua', Yosë nanitërin catahuainpoaso'. Sopai yaminsëpirinpoahuënta', Yosë catahuarinpoa' cha'ëcaso marë'. Oshahuano'saso nipirinhuë' ana'intarin. Nani yonquirin chiníquën ana'intacaso'. Ayaro' tahuëri nanihuachin, no'tëquën ana'intaton, parisitopiquë a'pararin.

<sup>10</sup> A'naquën co pi'pisha tëranta' Yosë yanatëpihuë'. Inapitaso' chini chiníquën ana'intarin. Co Yosë natëtonahuë', co noyahuë' nicacaisoráchin yonquipi. A'naratipita taparo' nisáponaraihuë', co ina marë' tapanpihuë'. “Caora noya nitotërahuë,” ta'tona', co inso tëranta' yanatëpihuë'. Chiníquën nanantopisopita Yosëri acorinso' co quënanpirinahuë', pinopi. <sup>11</sup> Anquëniro'saso nipirinhuë' inapita quëran chini chiníquën nanantaponaraihuë', co nohuantopihuë' pinotacaiso'. “Yosëri ana'inchin,” ta'tona', tananpitopi.

<sup>12</sup> Nisha a'china'piro'saso' ma'sharo'sa pochin cancantopi. Co manta' yonquipihuë'. Ma'sona tëranta' yanipachinara, nipi. Yosë yonquirinso' co nitotatonaraihuë' pinopi. Ni'co'. Ma'sharo'sa' tananquë quënanpatëra, tëparë', co nosororëhuë'. Ina marë' Yosëri acorin. Inapochachin nisha a'china'piro'saso' ta'huantapi. Oshañëna marë' Yosëri ana'intarin. <sup>13</sup> Piyapi'sa' anishacancantopi ni'ton, a'na tahuëri inahuanta' parisitapi. Isoro'paráchin yonquiatona', capa cancantacaisoáchin yonquipi. A'morëso mancharinso pochin nicatora', nitapicancanpi. Imaramasopita niyontopatamara, “Quiyanta' imarai,” ta'tona', ya'conpi. Nonpintatënënuquëma', ichicoshatapirinënënuquëmahuë', inahuaso' co noyahuë' nicatora' taparo' nipi.

<sup>14</sup> Sanapi quënanpachinara, monshitacaisoráchin yonquipi. Co nanitopihuë' naniantacaiso'. Co chiníquën cancantopisopitahuë' nonpintatona', anishacancantapi. Huënsonquë ma'sha manëso pochin nonpintapi. Ma'sharáchin yonquiatona', noyapatopi. Napoaton Yosëri ana'intarin. <sup>15</sup> No'tën nanan a'porahuatona', Yosë iranën quëran pëshonpi. Paramo pochin cancantopi. Pioro hui'nin inaso'. Iráca pënëntopirinhuë', coriqui na'con na'con nohuantërin. “Nonpinacaso' co noyahuë' nipirinhuë', inapoato, na'con canarahuë,” ta'ton, co noyahuë' ninin. <sup>16</sup> Co yanatërinhuë' ni'ton, Yosëri chiníquën no'huirin. Moranën co nitononaponahuë', Yosë nohuanton, piyapi pochin nonin. Ina nonin quëran Yosëri pënënin co noyahuë' yonquirinsopita naniantacaso marë'.

<sup>17</sup> Nisha a'china'piro'sa' co Quisocriso nanamën a'chinpihuë'. Poso yanirinso pochin nipi. Yanihuachina, co huachi o'caso' ya'huërinhuë'. Inapochachin nisha a'china'piro'sa' nonpintarinënënuquëma'. Isonta' yonquico'. Hua'qui' co o'nanpachinahuë', chitoro' yaráton quënanpatëra, pa'yatopirëhuë'. Panca ihuani quëpahuachina, co huachi o'naninhuë'. Inapochachin nisha a'china'piro'sa' nisapi. “Noya noya a'chintarainquëma',” itopirinënënuquëmahuë', co tëhuënhachin catahuarinënënuquëmahuë'. Nani iráca Yosëri yonquirin ana'intacaso'. Tashinanquë a'pararin. Inaquë parisitápona'. Co onporonta' pipiponahuë'. <sup>18</sup> Inahuara nipa'yatatona', topinan quëran nontarinënënuquëma'. Nisha nisha yonquipi. Nasha ya'conpisopita a'naroáchin nonpintopi. Ipora huarë' co noyahuë' yonquipisopita naniantapirinahuë'. “Huëco' no'pihua'. Noya no'picaso'. Noya monshihuanacaso',” itopi nonpintatona'. <sup>19</sup> “Co insonta' natëcaso' ya'huërinhuë'. Canpitaora nohuanton ya'huëco'. Ma'sona tëranta' yanipatama', nico'. Inapohuatama', capa cancantarama',” itopirinënënuquëmahuë', co inapita tëranta' inahuara



nohuanton ya'huëpihuë'. Sopai nohuanton, no'pipi, monshihuanpi, co noyahuë' nipi. Insosona minsëhuachinpoa', hua'anëntërinpoa'. <sup>20</sup> Quisocriso nanamën natanpachinara, natëpirinahuë'. “Cha'ësarahuë huachi,” ta'tona', co noyahuë' yonquirinsopita pi'pian naniantopi. Ina quëran nisha cancantatona', Yosë a'poantapi. Co noyahuë' niantahuachinara, sopairi minsërin. Ina marë' na'con na'con Yosëri ana'intarin huachi. <sup>21</sup> No'tën nanan nitotaponaraihuë', co imamiatopihuë'. Nóya nicacaso' a'chintopirinahuë', ina naniantopi. Co onporonta' natanpihuë' naporini, noya noya niitonahuë'. Nani Yosë a'popi. <sup>22</sup> Ma'pitacha nipi paya. Imaponaraihuë' a'pohuachinara, iráca ninshitatona napopiso chachin nipi: “Ni'nira imohuachina, co yonquirinhuë'. Imorinso chachin caantarin. Coshinta' i'quë pa'mopirinahuë', naquëranchin shipiroquë quëhuëantaton, në'huëtantarin,” topi. Inapochachin inahuanta niconpi.

### 3

#### *O'mantacaso' tahuëri*

<sup>1</sup> Nosororanquëma' iyaro'sa'. I'hua quirica a'patëranquëma' nontacamaso marë'. Iporaso' naquëranchin ninshitantatëinquëma', pënëantaranquëma' no'tëquën yonquicamaso marë'. <sup>2</sup> Iráca noya pënëntona'piro'sa' ya'huëpi. Ninotona', Yosë quiricanënuë ninshitopi, nani nontërama'. Naporahuaton, quiyanta' Quisocriso pënënincoiso' a'chintërainquëma'. Inaso' nicha'ësaripoa'. Ca'tano'sanënpitaco'i chachin a'parinco'i. Ama naniantacamaso marëhuë' ninshitaranquëma'.

<sup>3</sup> Iso' na'con yonquico'. O'mantacaso' tahuëri ya'caritohuachin, co noyahuë' piyapi'sa' ya'huapona'. Co Yosë natëtonaraihuë', ma'sona yonquipiso' nisapi. Co noyahuë' cancantapi. Quisocriso sha'huitërinpoaso' tēhuaapi. <sup>4</sup> “¡Ma'pítacha nonama paya! ‘O'mantararahuë’, ¿itërinquëma' ti? Intohuasó Quisocrisoso' nimara, capa. Co o'maarinhuë', tēnai. Tatanënpoarinta ninarápirinahuë', nani chiminpi. Isoro'pa' ninin quëra huarë' inachachin inachachin nisárin. Co onporonta' nisha tahuëri nisarinhuë',” tosapi. <sup>5</sup> Co yanatëtonaraihuë', co yonquiapihuë'. Iráca co manta' ya'huëpirinhuë'. Ina quëran Yosë nonaton, isoro'pa' acorin. Inápaquë ya'huërinso'pitanta' acorin. Isoro'paso' iisáchin nipirinhuë', ina nohuanton, yairo' ya'norin. <sup>6</sup> Ina quëran piyapi'sa' co noyahuë' nipachinara, ii' quëran chachin ata'huantërin. <sup>7</sup> Inapochachin ipora isoro'pa', pi'iro'të', inapita ya'huëpirinahuë', nani Yosëri chinotërin ana'intacaso': “A'na tahuëri pën quëran ata'huantarahuë,” tēnin ni'ton, tahuëri nanihuachin, pën quëran chachin ata'huantarin. Naporo' tahuëri ya'ipi oshahuano'sa' chiníquën ana'intarin. Parisitopiquë a'pararin.

<sup>8</sup> Isonta' iyaro'sa' yonquico'. “A'na tahuëriso' a'naroáchin na'huërin. Huaranca pi'ipiso' hua'qui',” tēnhua'. Yosëso nipirinhuë' co canpoa pochin yonquirinhuë'. Huaranca pi'inta' nipirinhuë', Yosëriso' a'na tahuëriáchin pochin ni'nin. Huaranca pi'ipi, a'na tahuërirë' napopianachin pochin ni'nin. <sup>9</sup> A'naquën napopi: “Yosë hua'quiarin. Naniantërinpoa',” topirinahuë', co hua'quirinhuë'. Co topinan quëran sha'huitërinpoahuë'. Nosoroatonpoa', ninarárin. Co nohuantërinhuë' a'na piyapi tēranta' parisitopiquë pacacaso'. Na'con na'con piyapi'sa' co noyahuë' yonquipisopita naniantacaiso marë' ninarárin.

<sup>10</sup> Napoaponahuë', tahuërinën nanihuachin, Siniro o'mantararin. Ni'co'. Tashi' co yonquiasëhuë', ihuatë' huë'nin. Inapochachin a'nanaya ayaro' tahuëri naniarin huachi. Naporo' tahuëri pi'iro'të' huëntoncaarin. Chiníquën huëntoncahuachin, ta'huantarin. Pi'i, tayora, inapita huëya ni'ton, soquiarin huachi. Isoro'pa', ya'ipi ya'huërinso'pitanta, inapita huiquitapi.

#### *Noya yonquicaso' ya'huërinso'*

<sup>11</sup> Co manta' ya'huëmiatarinhuë'. Ya'ipi ta'huantarin ni'ton, ¡Yosë pochin cancantatëhua', noyasáchin niahua'! <sup>12</sup> O'mantacaso' tahuëri noya ninahua'. “Manoton o'manta'in,” ta'tëhua', noyápiachin cancantahua'. Ina tahuëri nanihuachin, ya'ipi

inápaquë ya'huërsopita pën quëran ta'huantarin. Pi'i, yoqui, tayora, inapita soquiarin. <sup>13</sup> Napoaponahuë', nasha ya'huaantapon. Nani Yosë sha'huitërinpoa'. “A'na tahuëri nasharo'pa', nasha pi'iro'të' inapita acoantapo,” itërinpoa'. Ina ninarëhua'. Inaquë noyasáchin nisarëhua'.

<sup>14</sup> Napoaton iyaro'sa', ina ninatoma' na'con yonquico' noyasáchin nicacamaso marë'. “Quisocristo nanan anoyatërinpoa',” ta'toma', noya nini'toma', ya'huëco'. Ya'ipi co noyahuë' yonquiramasopita naniantatoma', noyápiachin cancantoco'. Ina quëran o'mantahuachin, noya ni'sarinquëma'. <sup>15</sup> Nosoroatonpoa', hua'qui' Sinioro ninararin na'con na'con piyapi'sari natëcaiso marë'. Ina quëran inapitanta' nicha'ësarín. Ama ina naniantocosohuë'. Inachachin iya Paononta' ninshitërinquëma'. Inaso' iyanpoa pochín ni'nëhua'. Yosë nohuanton, no'tëquën nitotaton, ninshitërin. <sup>16</sup> Na'a quirica ninshitaton, nisha nisha ninanoquë ya'huëpisopita a'patërin. Noya pënënpirínpoahuë', pi'pian sacai' yonquicaso'. A'naquën piyapi co Yosë nanamën nitotatonahuë', nisha nisha yonquipi. Paono ninshitërinso' nontopirínahuë', co noya yonquiatonaraihuë', ma'sona tapon naporinso' anishatopi. Yosë quiricanën iráca ninshitopisonta' anishatopi. Ina marë' Yosëri chiníquën ana'intarin huachi.

<sup>17</sup> Napoaton iyaro'sa' nani pënënanquëma' ni'ton, ni'cona nonpintochnëinquëma'. Iporaso' noya yonquipiramahuë'. Co noyahuë' nipisopita yanonpintarinëinquëma' inapita pochín nisha nisha cancantacamaso marë'. <sup>18</sup> Canpitaso nipirínhuë', Sinioro Quisocristoíchin yonquico'. Inaora nohuanton, nosororínquëma' ni'ton, nani tahuëri yacatahuarínquëma'. Inasáchin yonquihuatama', oshaquëran noya noya nohuitarama'. Inaso' nicha'ësarínpoa'. Ya'ipi piyapi'sari chinochina'. Ayaro' tahuëriquë huarë' inasáchin yonquia'ahua'. Amen. Nani ninshitëranquëma huachi.

*Pitro*

## Coanshari imapisopita ninshitérinso'

### *Quisocristo no'téquën anitotërinpoaso'*

<sup>1</sup> Iso quirica a'pataranquëma', ni'co'. ¿Noyanquëma' canpitanta'? Quiyanta' isëquë noya ya'huarai. Quisocristo noya noya nohuitacamaso marë' ninshitaranquëma'. Iráca co'huara isoro'pa' ya'huëyátërasohuë', inápaquë ya'huërin. Ina quëran o'marahuatón, a'chintërincoi, natanai. Quiyaso' ni'nai. Nirayarai. Nonën chachin ya'huëtërin, së'huarai. Inasáchin Yosë yonquirinso' anitotërinpoa'. Ina nohuitoquatëhua', nóya nanpimiatarihua'. <sup>2</sup> Isoro'paquë o'mahuachina, quiyariso' ni'nai. Nohuitatoi, sha'huitarainquëma'. Inaso' nanpimiatarin. Iráca inápaquë ya'huërin. Tata Yosëre chachin ya'huërin. Napopináchin yonquipi. <sup>3</sup> Inápaquë ya'huaponahuë', o'mahuachina, piyapicoi ni'nai, a'chininsonta' natanai. Pa'pionta' anohuitërincoi. Hui'nin nohuitatoi, nohuitërai. Nipayarëso pochin ninai. Napoaton ninshitaranquëma' canpitanta' Quisocristo nohuitacamaso marë'. Quiya pochachin Yosë nohuitoco' nipayarëso pochin nicacamaso marë'. <sup>4</sup> Ina pochin cancantohuatama', nóya cancantarihua'. Ina marë' ninshitaranquëma'.

### *Tahuëri pochin nininso'*

<sup>5</sup> Noya nanan Quisocristo anitotërincoi. Ina nanan chachin sha'huitaranquëma'. “Yosëso' noyasáchin ninin. Tahuëri pochin cancantërin. Co pi'pisha tëranta' tashi pochin cancantërinhuë'” itërincoi. <sup>6</sup> Tashi pochin cancantohuatëhua', co Yosë nohuitarihuahuë'. “Yosë nohuitërahuë,” tapomarahuë', co noyahuë' cancantohuatama', nonpinama'. Co no'tën nanan imaramahuë'. <sup>7</sup> Yosëso' noyasáchin ninin. Tahuëri pochin cancantërin. Canpoanta' tahuëri pochin yonquihuatëhua', Yosë nohuitarihua'. Naporahuaton, noya nini'tëhua' ya'huarihua'. Hui'nin chachin chiminin ni'ton, ya'ipi oshanënpoa' inquitaringpoa'. Huënainën quëran anoyacancantarinpoa'.

<sup>8</sup> “Co oshahuancohuë'” topatëhua', canpoara ninonpintërehua'. Co no'téquën yonquirëhuahuë', co tëhuëenchachin imarëhuahuë'. <sup>9</sup> Onporosona co noyahuë' nipatëhua', Yosë nontahua'. “Tëhuëenchachin co noyahuë' nicato, oshahuanco,” topatëhua', Yosë oshanënpoa' inquitaringpoa'. Co nonpintërinpoahuë'. Quisocristo chiminin ni'ton, nanitërin ya'ipi oshanënpoa' inquitinpoaso'. Noyápiachin cancan quëtarinpoa'. <sup>10</sup> “Ya'ipinquëma' co noyahuë' ninama'” itërinpoa' Yosë. Napotopirinpoahuë', “Noya ninahuë. Co caso' oshahuancohuë'” topatëhua', “Yosë nonpintërinpoa'” tënëhuaso pochin cancantërehua'. Nanamën no'téquën sha'huitopirinpoahuë', co tëhuëenchachin natërehuahuë'.

## 2

### *Nanan anoyatërinpoaso'*

<sup>1</sup> Quisocristo imarama' ni'ton, hui'nahuëpita pochin ni'nanquëma'. Ninshitaranquëma' noyasáchin nicacamaso marë'. Nipirinhue', co noyahuë' nipatëhua', Quisocristo catahuarinpooa'. Oshahuanëhua' ni'ton, ana'intinpoaso' ya'huëpirinhue'. Canpoa marë' Yosë nontaton, nanan anoyatarinpoa'. Inaso' no'téquënáchin yonquirin. <sup>2</sup> Ya'huërenamënpoa' chiminin ni'ton, nontohuatëhua', oshanënpoa' inquitaringpoa'. Oshanënpoa' inquitatonpoa', nanan anoyatërinpoa'. Ya'ipi piyapi marë' chiminin. Ya'ipinpoa' oshanënpoa' inquitinpoaso' nohuantopirinhuë'.

<sup>3</sup> Yosë nohuitoquatëhua', pënëninpoaso' natëarëhua'. No'téquën natëcaso' nohuantarihua'. Ina natëhuatëhua', tëhuëenchachin Yosë nohuitërehua'. <sup>4</sup> A'naquëenso nipirinhue' “Nani Yosë nohuitërahuë,” topirinahuë', pënëninpoaso' co natëtonahuë', nonpiánpi. Co no'téquën yonquipihuë'. <sup>5</sup> Yosë nanamën natëhuatëhua', noya noya Yosë nosoroarihua'.

Ina pochin cancantohuatèhua', tèhuënchachin ina nohuitarihua'. <sup>6</sup> “Yosë imarahuë,” topatèhua', Quisocriso pochachin cancantacaso' ya'huërin.

*Nasha pochin pënëninpoaso'*

<sup>7</sup> Co iyaro'sa' nasha camaitërinso' ninshitaranquëmahuë'. Iráca quëran huarë' Yosë nanamën natanama'. “Ya'ipinquëma' noya ninosoroco',” itërinpoa'. Inachachin iporanta' pënënananquëma'. <sup>8</sup> Co nasha camaitërinsohuë' niponahuë', nasha pochin ninshitaranquëma' cancanëma quëran huarë' ninosorocamaso marë'. Quisocriso ya'ipi piyapi nosororin. Nosoroatonquëma', a'pintëreso pochin anoyacancantërinquëma' tahuëri pochin cancantacamaso marë'. Ninosorohuatama', co huachi tashi pochin cancan-taramahuë'.

<sup>9</sup> A'na piyapi no'huihuatama', co Yosë imaramahuë'. “Imarahuë,” tapomarahuë', co tahuëri pochin cancantëramahuë'. Ipora huanta' tashi pochin cancantarama'. <sup>10</sup> Imaramasopita capini ninosorohuatama', tahuëri pochin cancantarama'. Ina pochin nipatama', no'tëquën imarama'. <sup>11</sup> Nipirinhüë' nino'huihuatama', tashi pochin cancan-tarama'. Co noyahuë' cancantatoma', co manta' yonquiaramahuë'. Co nanitaramahuë' no'tëquën yonquicamaso'. Sopai nohuanton, somaraya pochin cancantarama'. Napoaton iyaro'sa', cancanëma quëran huarë' ninosoroco'.

<sup>12</sup> Canpitaso' imarama' ni'ton, ninshitaranquëma'. Hui'nahuëpita pochin nicanatëquëma', ninshitaranquëma'. Quisocriso canpoa marë' chiminin. Imapatama', oshanëma' inquitërinquëma'. <sup>13</sup> A'naquëma' nani hua'qui' imatoma' a'napita catahuarama' ni'ton, Quisocriso noya nohuitërama'. Inaso' iráca quëran huarë' ya'huërin. Noya imarama' ni'ton, ninshitaranquëma'. Canpitanta' hui'napi'sanquëma', nani sopai minsërama'. Napoaton ninshitaranquëma'.

<sup>14</sup> Ya'ipi imaramasopita hui'nahuëpita pochin ni'nanquëma'. Yosë nohuitërama' ni'ton, ninshitaranquëma' noya noya cancantacamaso marë'. Quisocriso noya nohuitërama' ni'ton, iyaro'sa', ninshitaranquëma'. Inaso' iráca quëran huarë' ya'huërin. Nani tahuëri, apia'huaro'sa', Yosë nanamën yonquiarama'. Napoaton chiníquën cancantarama'. Chiníquën cancantatoma', sopai nani minsërama'.

*Isoro'paráchin pa'yatopisopita*

<sup>15</sup> Na'a piyapi'sa' co Yosë natëtonahuë' nisha nisha yonquipi. Isoro'paquë ya'huërinso'pitaráchin yonquipi. Ama inapita pochin cancantocosohuë'. Ama nani ma'sha nohuantapatocosohuë'. Ma'sha na'con yonquihuatama', co tèhuënchachin Tata Yosë nosororamahuë'. <sup>16</sup> Isoro'paquë nisha nisha ya'huërin aoshahuainpoaso marë': Monshihuanacasaráchin cancantëre'. Ma'sha quënanpatëra, nohuantapatëre'. Ma'huanpatëra, yanocantëre', naporë'. Inapitaso' co Tata Yosë nohuanton ya'huërinhuë'. Sopai nohuanton, ya'huërin. <sup>17</sup> Isoro'pa' ta'huantarín. Ya'ipi ma'shanta' ta'huantarín. Inasáchin pa'yatohuatèhua', topinan quëran nanpiarihua'. Nipirinhüë', Yosë noya imapatèhua', co onporonta' ta'huantarihuahuë'. Ya'huëmiatarihua'.

*Quisocriso inimiconën*

<sup>18</sup> Co hua'quiya quëranhuë', apia'huaro'sa', Quisocriso o'mantararin. “Cristo yao'mahuachin, inimiconën huë'sarin,” itërinënpoa'. Nani natantërama' canpitanta'. Iporaso' na'a piyapi'sari Cristo yainimicotopi. Napoaton o'mantacaso' tahuëri naniriarin, tënëhua'. <sup>19</sup> “Quiyanta' imarai,” topirinhüë', nani pipipi. Co tèhuënchachin Yosë huëntonënuë ya'conpihuë'. Ya'conpi naporini, co pipiitonahuë'. Pipipi quëran nitotërehua'. “Co onporonta' cancanëna quëran huarë' imapihuë’,” tënëhua'.

<sup>20</sup> Canpitaso' nipirinhüë' imarama'. Quisocriso nohuanton, Ispirito Santo ya'coancantërinquëma'. Napoaton no'tëquën yonquirama'. <sup>21</sup> Nitotopiramahuë', naquëranchin pënëantaranquëma' yonquicamaso marë'. No'tën nanan imapatèhua', co nonpin nanan natëarihuahuë'. <sup>22</sup> Tèhuënchachin nonpin nanan sha'huitarinënuëma'.

“Quisososo' co Cristohuë'. Co Yosë hui'ninhuë'” ta'tona', yanonpintërinënguëma'. Inapoatona', Quisocristo inimicotapi. Tata Yosënta' a'popi. <sup>23</sup> Yosë hui'nin a'pohuachina', co Tata Yosënta' nohuitapihuë'. “Quisocristoso' Yosë hui'nin chachin,” topachina', Tata Yosënta' imasapi.

<sup>24</sup> Ya'nan imapoma', no'tëquën a'chintërainquëma'. Ina chachin imamiatoco'. Ina imapatama', cancanëma quëran Tata Yosë nohuitarama'. Hui'nionta' noya nohuitarama huachi. <sup>25</sup> Quisocristo chachin sha'huitërinpoa': “Imamiatohuatamaco, Yosë nohuitatoma', nanpimiatarama',” itërinpoa'.

<sup>26</sup> A'naquën yanonpintarinënguëma' ni'ton, ninshitaranquëma'. <sup>27</sup> Canpitaso nipirinuë' Ispirito Santo ya'huëtërinquëma'. Quisocristo imarama' ni'ton, ina nohuanton, ya'coancantërinquëma'. Nani tahuëri a'chintarinquëma'. Cancanëmaquë Yosë nanamën a'chintarinquëma'. Co onporonta' nonpintërinquëmahuë'. No'tëquën a'chintërinquëma' ni'ton, co a'napita a'chintinquëmaso' ya'huërinhuë'. Ina natëhuatama', no'tëquën yonquiarama'. Sha'huitërinquëmaso pochachin Quisocristo imamiatoco'.

<sup>28</sup> Ipora quëran huarë', apia'huaro'sa', Quisocristo imamiatoco'. Inapohuatama', o'mantahuachin, co tapan ya'huëtërinquëmahuë'. Co pa'yanaramahuë'. <sup>29</sup> Quisocristo noyasáchin ninin, nitotërehua'. Napoaton Yosë huëntonënguë ya'conpatëhua', noya nicarigua'. Inpitasona noya nipachina', nani Yosëri anoyacancantërin ni'ton, hui'nin pochin ni'sarin, tënëhua'.

### 3

#### *Yosë hui'ninpita*

<sup>1</sup> Ma noya Tata Yosë nosororinpoa' ni'ton, hui'ninpita pochachin ni'ninpoa'. Huëntonënguë chachin aya'coninpoa'. Co imapisopitasohuë' nipirinuë' co nitotopihuë'. “¿Onpoatonta' Yosë pochin cancantacaso' nohuantopi?” toconpi. Co Yosë nohuitatonahuë', napopi. <sup>2</sup> Na'con, iyaro'sa', nosororanquëma'. Iporaso' Yosë hui'ninpita pochin ni'ninpoa'. A'na tahuëri noya noya acoarinpoa'. Onpopinsona nicarigua' nimara. Co ya'ipi nitochatërarëhuahuë'. Nipirinuë', Quisocristo o'mantahuachin, nirayarihua'. Ina ni'patëhua', ina pochachin nicarigua'. <sup>3</sup> “A'na tahuëri Quisocristo ni'sarëhua',” ta'tëhua', co noyahuë' yonquirëhuasopita naniantarëhua'. Quisocristoso' noyápiachin cancantërin ni'ton, canpoanta' noyápiachin cancantacaso' nohuantarihua'.

<sup>4</sup> Yosë pënëninpoa'. Co ina natëhuatëhuahuë', oshahuanëhua'. Co noyahuë' nipatëhua', co Yosë natërehuahuë'. <sup>5</sup> Noya nanan nani nitotërama'. Quisocristo o'marin oshanënpoa' inquitinpoaso marë'. Inaso' co pi'pisha tëranta' oshahuaninhuë'. <sup>6</sup> Tëhuëinchachin imapatëhua', nóya nisarëhua'. Co pa'yatarihuahuë' oshahuanacaso'. Nani tahuëri co noyahuë' nipatëhua', co Yosë nohuitërehuahuë'. Co ya'coancantërinpoahuë'. <sup>7</sup> Ni'cona, apia'huaro'sa', nisha a'china'piro'sa' nonpintochinënguëma'. Noya nipatëhua', noya cancantarëhua'. Quisocristo noya ni'ton, ina pochin cancantacaso' ya'huërin. <sup>8</sup> Nani tahuëri co noyahuë' nipatama', sopai imarama'. Iráca quëran huarë' sopai co noyahuë' cancantaton, oshahuanin. Inaso' nonpinto huachinpoa', canpoanta' oshahuanarëhua'. Napoaton Yosë hui'nin o'marin sopai minsëaton nicha'ëinpoaso marë'. Ya'ipi oshanënpoa' inquitihuachinpoa', co huachi sopai natëcaso' ya'huërinhuë'.

<sup>9</sup> Huëntonënguë chachin Yosë aya'coninpoa' ni'ton, co iporaso' pa'yatarëhuahuë' oshahuanacaso'. Hui'nin pochachin cancantatonpoa', yonquinën chachin quëtërinpoa'. Nasitantarëhuaso pochin ninëhua'. Napoaton co huachi nohuantarihuahuë' oshahuanacaso'. <sup>10</sup> Co sacaihuë' Yosë hui'ninpita nohuitacaso'. Noyasáchin nipatëhua', Yosë hui'ninpita pochin nisarëhua'. Nipirinuë', co noyahuë' nipachina', co Yosë huëntonënguë ya'conpihuë'. Co imapisopita nosorohuachinahuë', co Yosë hui'ninpita



pochin nisapihuë'. Sopai hui'ninpita pochin nisapi. Co noyahuë' cancantopi quëran sopai hui'ninpita nohuitarëhua'.

### *Ninosorocaso' ya'huërinso'*

<sup>11</sup> Ya'nan imapoma quëran huarë' Yosë nanamën natanama'. “Noya ninosoroco,” itërainquëma'. <sup>12</sup> Iráca Cainoso' sopai natëton, iin tëparin. ¿Ma'marëta' tëparin? Iinso' noya ninin ni'ton, no'huiton, tëparin. Ama ina pochin cancantocosohuë'.

<sup>13</sup> Napoaton iyaro'sa' co natëpisopitahuë' no'huihuachinëinquëma', ama pa'yancosohuë'. <sup>14</sup> Iráca canpoanta' ina pochin co noyahuë' cancantërehua'. Co Yosë nohuitatëhuahuë', chimipi pochin nipirëhuahuë', Yosë anoyacancantërinpoa' ina nohuitatëhua' nanpimiatacaso marë'. Napoaton iporaso' ninosororëhua'. Ina quëran Yosë huëntonëinquë ya'conëhuaso' nitotërehua'. Co ninosorohuatamahue', co Yosë anoyacancantërinquëmahuë'. Chimipi pochin cancantarama'. <sup>15</sup> A'na piyapi no'huihuatama', tëpatona'piro'sa pochin Yosë ni'sarinquëma'. Tëpatonapiro'saso', co Yosë pochin nanpimiatacaiso ya'huërinhuë'. <sup>16</sup> Quisocristoso nipirinhue' na'con nosoroatonpoa', nicha'ëinpoaso marë' chiminin. Chiminaton, nosororinpoaso' anitotërinpoa'. Inapochachin iyaro'sa', ya'ipi Quisocristo imapisopita nosorocaso' ya'huërin. Na'con ninosoroa'ahua'. Quisoso ya'huërenamënpoa' chimininso pochachin nosorocaso' ya'huërin. <sup>17</sup> Quisocristo imarëhuasopita capini noya ninosorocaso' ya'huërin. A'napita ma'sha pahuantohuachina', catahuahua'. Capa capacaiso' nipachin, capa a'mocaiso' nipachin quëtahua'. Co inapita catahuahuatëhuahuë', co tëhuëenchachin nosororëhuahuë'. Co canpoa capini ninosorohuatëhuahuë', co Yosënta' nosororëhuahuë'. <sup>18</sup> “Ya'ipi imapisopita nosororahuë,” topatëhua', ama, apia'huaro'sa', topinan quëran napoa'huasohuë'. Cancanënpoa quëran huarë' nosoroatëhua', catahuahua'.

### *Co të'huatatëhuahuë' Yosë nontërehuaso'*

<sup>19</sup> Tëhuëenchachin a'napita nosorohuatëhua', no'tëquën Yosë nanamën imasarëhua'. Ina quëran co huachi të'huatacaso' ya'huëtarinpoahuë'. “Tatanpoa pochin ni'ton, noya ni'ninpoa,” ta'tëhua', noya cancantarihua'. <sup>20</sup> Co noyahuë' nipatëhua', cancanënpoa quëran nitotatëhua', sëtërehua'. Co noyahuë' ninëhuaso' Yosënta' nitotërin. Napoaponahuë', cancanënpoa quëran huarë' yaimapatëhua', inanta' nitotërin. Ina nitotaton, nosororinpoa'. Ina yonquihuatëhua', noya cancantatëhua', Yosë nontarihua'. <sup>21</sup> Napoaton iyaro'sa', cancanënpoa quëran a'naya a'nayanpoa' yonquia'ahua'. “Yosë noya ni'sarincó,” topatëhua', co Yosë të'huatarihuahuë'. Co të'huatatëhuahuë', nani tahuëri ina nontarihua'. <sup>22</sup> Yosë pënëninpoaso' natëhuatëhua', noya natanarinpoa'. Ina nohuantërinsoáchin yonquihuatëhua', catahuarinpoa'. Ina pochin cancantohuatëhua', ma'pitaso nipatëhua', quëtarinpoa'. <sup>23</sup> Yosë nani pënëninpoa' hui'nin imacaso marë'. Naporahuaton, ninosorocasonta' sha'huitërinpoa'. “Quisocristonta' inachachin sha'huitërinpoa',” ta'tëhua', cancanënpoa quëran natëahua'. <sup>24</sup> Yosë natëhuatëhua', yonquirinsoráchin imasarihua'. Imapatëhua', ya'coancantomiatërinpoa'. Ispirito Santo quëtërinpoa' ya'coancantinpoaso marë'. Ina catahuahuachinpoa', noya nisarëhua'. Ina quëran Yosë nohuitërehuaso' nitotërehua'.

## 4

### *Nonpin nanan a'chinpiso'*

<sup>1</sup> Na'con iyaro'sa' nosororanquëma' ni'ton, pënënanranquëma'. Na'a nonpin nanan pënëntona'piro'sa' nonpin nanan a'chinapi. “Yosë nanamën a'chinahuë,” topirinahuë', co no'tëquën a'chinpihuë'. Napoaton a'chintohuachinëinquëma', ama a'naroáchin natëtocosohuë'. “Nonpin nanan nimara,” ta'toma', yonquico'. Ya'ipi Yosë quiricanën quëran a'chintërinpoaso' yonquiatoma', tantiaco'. Co ina pochin a'chintohuachinëinquëmahuë', ama natëcosohuë'. <sup>2</sup> Ispirito Santo no'tëquën anitotërinpoa'.

“Quisocristo Yosë hui'nin niponahuë', isoro'paquë o'maton, piyapi chachin nasitimarín. Nonën chachin ya'huëtërin,” itërinpoa'. Ina nanan a'chintohuachinënquëma', no'tëquën a'chinapi. Ispirito Santori ayonquirin ni'ton, noya nonsapi. <sup>3</sup> A'naquënso nipirihuë' sopai nohuanton, nonpinapi. Co Quisocristo nanamën no'tëquën a'chinpihuë'. “Yosë hui'ninso' co piyapi chachin nasitimarínhuë',” toconpi. Inapitaso' Quisocristo inimicotopi. Co ina pochin Ispirito Santo anitotërinpoahuë'. Iráca ninorinso chachin nani Cristo inimiconën natantërehua'.

<sup>4</sup> Canpitaso' apia'huaro'sa', Yosë hui'ninpitänquëma' ninama'. No'tëquën yonquiatoma', nisha a'china'piro'sa' minsëarama'. Sopai nohuanton, nonpin nanano'sa' a'chintopirinënquëmahuë', Ispirito Santo nani ya'coancantërinquëma'. Inaso' sopai quëran chini chiniquën nanantarin ni'ton, catahuahuachinpoa', co nonpin nanano'sa' natëtarihuahuë'. <sup>5</sup> Inapitaso nipirihuë', co Yosë nohuitatonahuë', co nanamën chachin a'chinpihuë'. Isoro'paquë ya'huë'insopitaráchin yonquiatona', inahuara yonquinëna quëran a'chinpi. Napoaton co imapisopitasohuë' nonpin nanan natëpi. <sup>6</sup> Quiyaso nipirihuë' Yosë nohuitatoi, no'tëquën a'chinai. Yosë imapisopita noya nataninacoi. Inaso' no'tën nanan, topi. Co imapisopitasohuë' nipirihuë', co yanatërinacoihuë'. Ispirito Santoso' no'tëquënáchin nonin. Napoaton nonpin nanan pa'yatopisopitaso' co Ispirito Santo yanatëpihuë'. Ina quëran nonpin nanano'sa' nohuitërehua'.

*Iráca quëran huarë' Yosë nosororinpoaso'*

<sup>7</sup> Yosë pa'pi nosororinpoa'. Napoaton iyaro'sa', canpoanta' noya ninosoroa'ahua'. Huëntonënuë aya'compachinpoa', catahuarinpoa' a'napita nosorocaso'. Nosorohuatëhua', Yosë nohuitarihua'. Hui'ninpita pochin ni'ninpoa'. <sup>8</sup> Inaso' nosoromiatochinarinpoa'. Napoaton canpoanta' co a'napita nosorohuatëhuahuë', co pi'pisha tëranta' ina nohuitarihuahuë'. <sup>9</sup> Nosoroatonpoa', hui'nin chachin isoro'paquë a'paimarin anoyacancantinpoaso marë'. A'naíchin hui'nin ya'huëtöpirinhuë', a'paimarin. Quisocristo anoyacancantohuachinpoa', Yosë nohuitatëhua', nanpimiatarihua'. <sup>10</sup> Co canpoariso' nosoropirëhuahuë', Yosëso' na'con nosororinpoa'. Ina nohuanton, hui'nin chachin o'marahuatón, chiminin. Ya'huërenamënpoa' chiminin ni'ton, oshanënpoa' inquitatonpoa', nanan anoyatërinpoa'.

<sup>11</sup> Yosë na'con nosororinpoa' ni'ton, canpoanta', iyaro'sa', inapochachin ninosoroa'ahua'. Ina pochin cancantacaso' ya'huërin. <sup>12</sup> Co inquënpoa tëranta' Yosë quënanpirëhuahuë', noya ninosorohuatëhua', Yosë nohuitarihua', ya'coancantomiatërinpoa'. “Yosë na'con nosororinpoa',” ta'tëhua', canpoanta' noya noya ninosoroarihua'. <sup>13</sup> Yosë huëntonënuë ya'conpatëhua', Ispirito Santo a'patimarinpoa' ya'coancantinpoaso marë'. Hua'yanën chachin ni'ton, cancanënpoaquë ayonquirinpoa'. “Tëhuë'nchachin Yosë ya'coancantërinpoa',” tënëhua'. <sup>14</sup> Tata Yosëri hui'nin isoro'paquë a'paimarin nicha'ëinpoaso marë'. Quiyarisó' ni'nai. Nani tahuëri piyapi'sa' sha'huitárai. <sup>15</sup> “Quisocristoso' Yosë hui'nin. Ina natërahuë,” topatëhua', Yosë pochin cancantatëhua', imamiatarihua'. Inanta' ya'coancantërinpoa'.

<sup>16</sup> Yosë nohuitatëhua', natërehua. “Ma noyacha Yosë nosororinpoa paya,” tënëhua'. Inaso' nosoromiatochinarinpoa'. Canpoanta' nosorohuatëhua', Yosë nohuitarihua'. Yonquirinsoráchin imasarëhua'. Imapatëhua', ya'coancantomiatërinpoa'. <sup>17</sup> Yosë noya nohuitohuatëhua', na'con na'con nosoroarihua'. Ina quëran ayaro' tahuëri nanihuachin, co tē'huatarihuahuë'. Quisocristo nosororinpoa' ni'ton, canpoarinta' ina pochachin nosoroarihua'. Napoaton ayaro' tahuëri co pa'yanarihuahuë'. <sup>18</sup> Imarëhuasopita capini noya ninosorohuatëhua', co nisaitarihuahuë'. Inapochachin Yosë'ë'quënpoa' ninosorohuatëhua', co tē'huatarihuahuë'. A'naquën piyapi'saso' na'con tē'huapi. “Yosë ana'intarinco,” ta'tona', tē'huatochinachin cancantopi. Canpoaso nipirihuë' “Yosë na'con nosoroatonpoa', oshanënpoa' inquitërinpoa',” topatëhua', ya'ipi tē'hua inquitarinpoa'.

<sup>19</sup> Yosë'ton na'con nosororinpoa' ni'ton, canpoarinta' Yosë nosoroatëhua', a'napitanta' nosoroarihua'. <sup>20</sup> A'naquënso' "Yosë nosororahuë," taponahuë', iin no'huirín. Co inaso' no'tëquën noninhuë', nonpiánin. Piyapi quënanëhua'. Yosëso nipirinhuë' co quënanëhuahuë'. Piyapi quënanarihuarahuë', co nosorohuatëhuahuë', aquëtë huarë' Yosëso' co nanitarëhuahuë' nosorocaso'. <sup>21</sup> Quisocristo pënëninpoa'. "Nosorohuatamaco, piyapinta' nosoroco'," itërinpoa'.

## 5

### *Onporohuatësona Yosë imamiatacaso'*

<sup>1</sup> Ya'ipi Quisocristo imarëhuasopita a'na huënton pochín ninëhua'. "Quisocristo Yosë hui'nin chachín," tënëhua' ni'ton, huëntonënguë ya'conëhua'. Hui'ninpita pochín ni'ninpoa'. Ni'co'. "Quëmapi tēhuëenchachín nosorohuatëra, hui'ninpitanta' nosororë'," topi. <sup>2</sup> Napoaton Yosë nosorohuatëhua', pënëninpoaso' noya natëhuatëhua', tēhuëenchachín hui'ninpitanta' nosoroarihua', tēnahuë. <sup>3</sup> Yosë nosorohuatëhua', pënëninpoaso' no'tëquën natëarihua'. Catahuahuachínpoa', nanitaparëhua'. <sup>4</sup> Canpoaso' Yosë hui'ninpitánpoa' ni'ton, nanitaparëhua' sopai minsëcaso'. "Quisocristo catahuarínpoa'," topatëhua', co noyahuë' yonquirëhuasopita naniantarihua'. Isoro'paquë na'a ma'sha, piyapi, inapita ya'huërin anishacancantínpoaso marë'. Nipirinhuë', Quisocristo yonquihuatëhua', catahuarínpoa' imamiatacaso'. <sup>5</sup> "Quisocristo Yosë hui'nin chachín," topatëhua', achinicananínpoa' sopai minsëcaso marë'. A'napitariso' co nanitopihuë' sopai minsëcaiso'.

### *Yosë anitotërinpoaso'*

<sup>6</sup> Quisocristo isoro'paquë chachín o'marin. O'mahuachina, Yosë nohuanton, i'quë aporihuanín. Nani ya'ipi sha'huitërinso' tiquiaton, corosëquë chiminpachina, huënnainën pa'nin. Co topinán aporihuanínhuë'. Oshanënpoa' inquitínpoaso marë' chiminín. Naporahuaton, Ispirito Santonta' cancanënpoa quëran anitotërinpoa'. Inaso' no'tëquën sha'huitërinpoa'. "Quisososo' Yosë hui'nin chachín," itërinpoa'. <sup>7-8</sup> Tata Yosë noya anitotërinpoa' hui'nin natëcaso'. Ni'co'. "Caraya'pi inachachín sha'huihuachina, naporo huarë' natëtërë'," topi. Inapochachín cancanënpoaquë Ispirito Santo sha'huitërinpoa'. Quisocristonta' i'quë aporihuanpachina, ya'ipiya Yosë natërin. Naporahuaton, canpoa marë' chiminpachina, huënnainën pa'nin. Cara chachín napopináchín anitotërinpoa'. <sup>9</sup> Piyapi'sa' inachachín sha'huihuachina', natëtërëhua'. Yosëso nipirinhuë' noya noya ni'ton, no'tëquënáchín nontërinpoa'. Napoaton ina sha'huitoahuachínpoa', na'con na'con natëtacaso' ya'huërin. Nani Yosë sha'huitërinpoa' ni'ton, "Quisocristoso' Yosë hui'nin chachín. Ina nicha'ërinpoa'," tënëhua'. <sup>10</sup> Yosë nani sha'huitërinpoa' ni'ton, imarëhuasopita nitotërëhua'. Cancanënpoa quëran anitotërinpoa'. A'napitaso nipirinhuë', co Yosë natëpihuë'. "Quisoso co Yosë hui'ninhuë'. Co nicha'ësarínpoahuë'," ta'tona', Yosëri nonpintërinso pochín cancantopi. No'tëquën sha'huitopirínpoahuë', co natëpihuë'. <sup>11</sup> Yosëso' huëntonënguë aya'conínpoa' ina pochín nanpicaso marë'. Hui'nin chachín anoyacancantërinpoa' nanpimiatacaso marë', tënëhua'. <sup>12</sup> Yosë hui'nin ya'coancantohuachínpoa', nanpimiatarihua'. Co'so' ina imapatëhuahuë', co nanpimiatarihuahuë'.

### *Chiniquën cancantatëhua', imamiatahua'*

<sup>13</sup> Canpitaso' Quisocristo natërama'. "Inaso' Yosë hui'nin ni'ton, imasarahuë," topatama', huëntonënguë nani aya'conínquëma'. Ina nohuitatoma', nanpimiatarama. Ina nitotacamaso marë' ninshitaranquëma'. <sup>14</sup> Yosë nontohuatëhua', natanarínpoa'. Ina nohuantërinso chachín natanpatëhua', noya natanínpoa'. <sup>15</sup> "Noya natanínpoa'," ta'tëhua', ina ninahua' nohuantërinso chachín quëchínpoa'. "Co onporonta' nonpintarínpoahuë', acotarínpoa'," ta'tëhua', noya cancantarihua'.

<sup>16</sup> A'naquën Yosë imamiataponahuë', co noyahuë' ninin. Co Yosë a'poaponahuë', oshahuanin. Inapita marë' Yosë nontahua' anoyacancanchin. A'naquënso nipirinhuë' imapirinhuë', co noyahuë' yonquiaton, Quisocristo chachin a'pomiatërin. A'pomiatohuachina, chiminpi pochin cancantantapi. Co inapita marë' Yosë nontacaso' ya'huërinhuë'. <sup>17</sup> Co noyahuë' nipachina', oshahuanpi. Nipirinhuë', co Yosë a'pomiatohuachinahuë', cha'ësapi.

<sup>18</sup> Yosëri imarinsopita huëntonënuë aya'conin. Noyasáchin nicacaso' ya'huërin. Yosë hui'nini chachin a'paiarin. Sopairi yanonpintopirinhuë', Quisocristori catahuarin ni'ton, co sopairi minsëarinhuë'.

<sup>19</sup> Imarëhuasopitaso' Yosë hui'ninpitanpoa' ninëhua'. A'napitaso nipirinhuë' co imapihuë' ni'ton, sopairi hua'anëntërin. Camaihuachina, ina natëpi. Ina nitotërëhua'.

<sup>20</sup> Yosë hui'nin chachin o'maton, no'tëquën Yosë anohuitërinpoa'. Inasáchin no'tëquën yonquirin. Yosë nohuitatëhua', yonquirinsoráchin imasarëhua'. Quisocristo nohuitërehua' ni'ton, catahuarinpoa' no'tëquën yonquicaso marë'. Inaíchin Yosëso' ni'ton, chinotacaso' ya'huërin. Ina nohuitohuatëhua', nanopimiatarihua'. <sup>21</sup> Apia'huaro'sa'. Mamanshiro'saso', co moshacaso' ya'huërinhuë'. Yosëíchin chinotahua'. Nani huachi.

*Coansha*

## Coanshari ninshitaantarinsó'

### *No'tën nanan imarëhuaso'*

<sup>1</sup> Ca ansianoco iso quirica ninshitaranquëma' ¿Noya canpitanta' ya'huarama'? Canta' noya isëquë ya'huarahuë. Yosë nohuanton, canpitanta' huëntonënguë nani ya'conama'. No'tën nanan imarama' ni'ton, tëhuëchachin nosororanquëma'. Ya'ipi Quisoso imapisopita noya nicatënënguëma', nosororinënguëma'. Ya'ipinque'ma' yonquiatënguëma', ninshitaranquëma'. <sup>2</sup> Quisocriso no'tëquën a'chintërinpoa'. No'tën nanan imamiatatëhua', ninosoroarëhua'. <sup>3</sup> Inaora nohuanton, Tata Yosë na'con catahuainquëma'. Nani tahuëri nosoro'inquëma'. Asanocancainquëma'. Quisocrisonta' inachachin catahuainquëma'. Inaso' Yosë hui'nin chachin. Catahuahuachinpoa', no'tëquën yonquiarihua'. Ina quëran noya ninosoroarihua'.

<sup>4</sup> A'naquën ya'huëramaquë noya imasapi quënanconahuë. Tata Yosë pënëninpoaso' no'tëquën natëapi. Ina marë' nóya cancantërahuë. <sup>5</sup> Iporaso' ya'ipinpoa' noya ninosoroa'ahua', ténahuë. Co nasha nanan ninshitaranquëmahuë'. Iráca quëra huarë' Yosë sha'huitërinpoa' ninosorocaso'. <sup>6</sup> Yosë nosorohuatëhua', natëarihua'. “Ya'ipi piyapi'sa' nosoroco',” itërinpoa'. Ya'nán imarama quëra huarë' ina natanama'.

### *Nonpin nanan a'china'piro'sa'*

<sup>7</sup> A'naquënso nipirinhuë' piyapi'sa' yanonpintatona', nisha a'chinapi. Ya'ipi parti pa'sápi nonpin nanan sha'huicaiso marë'. “Quisocrisoso' Yosë hui'nin niponahuë', co piyapi chachin nininhuë'. Co canpoa pochin nonën ya'huëtërinhuë',” topi. Co no'tëquën a'chinpihuë'. Insosona ina pochin a'chinpachina, nonpinarin. Inaso' Quisocriso inimiconën, ténahuë. <sup>8</sup> Ni'cona nonpintochinënguëma'. Nani hua'qui Yosë imatoma', ina marë' sacatopiramahuë'. Inapita pochin cancantohuatama', topinán quëran imapoma'. Co Yosë'pa' acanaarinquëmahuë'. Nipirinhuë', ya'ipi cancanëma quëran imapatama', inatohua' Yosë noya noya noyá nohuitatoma', ya'huëmiatarama'.

<sup>9</sup> A'naquën co Quisocriso nanamënáchin imapihuë'. “Quiyaso' na'con na'con nitotërai,” toconpi. Inapitaso' co Tata Yosë nohuitapihuë'. Quisocriso nanamën imapatëhua', Tata Yosë nohuitarihua'. Hui'nionta' nohuitarihua'. <sup>10</sup> A'na piyapi huë'pachin: “Carinquëma' a'chinchinquëma',” itohuachinquëma', ama a'naroáchin natëcosohuë'. Co Quisocriso nanamën a'chintohuachinquëmahuë': “Inca. Co yanatanainquënhuë',” itoco'. Ama ya'huëramaquë aya'concosohuë'. “Yosë catahuainquën,” ama itocosohuë'. <sup>11</sup> Co Quisocriso natëtonahuë', co noyahuë' nipi. Ama pi'pian tëranta' natanacamaso' nohuantocosohuë'. Canpitataquë nisha nanan a'chintohuachinquëma', a'naquën nonpin nanan imapona' nimara. Imapachina', ina marë' canpitanta' oshahuanarama'.

### *Nicapon yapa'ninso'*

<sup>12</sup> Na'con na'con yasha'huitopiranquëmahuë', co aquëtë' yaninshitëranquëmahuë'. Co hua'quiya quëranhuë' nicaponquëma' pa'sarahuë topirahuë'. Canconpato, ninontohuatëhua', noya noya cancantarihua'. <sup>13</sup> Isëquë Quisocriso imapisopita yonquiarinënguëma'. Yosë nohuanton, huëntonënguë ya'conpi anta'. Inapitanta' saludos a'patarinënguëma'. Nani huachi.



## Isonta' Coanshari ninshitaantarinso'

### *Imapisopita nosoroaton, catahuarinso'*

<sup>1</sup> Ca ansianoco ninshitaranquën, iya Acayo. ¿Noya quëmanta' ya'huaran? Canta' noya isëquë ya'huarahüë. No'tën nanan imaran ni'ton, tëhuënchachin nosororanquën. <sup>2</sup> Quëma marë' iyasha, Yosë nontërahuë: “Catahuaquë' Sinioro noya ya'huë'in, ama canioinsohuë'. Noya imarinquën ni'ton, catahuaquë' noya ya'huë'in,” itërahuë, Yosë nontato. <sup>3</sup> I'huamiáchin a'napita iyaro'sa' canquirahuatona', sha'huitiirinaco: “Iya Acayo nóya cancantaton, no'tëquën imarin,” itiirinaco. Ina natanato, nóya cancantërahuë. <sup>4</sup> Nani Quisocristo nanamën a'chintëranquëma'. Ina natëtoma', imarama' ni'ton, hui'nahuëpita pochin ni'nanquëma'. Na'con nosororanquëma'. No'tën nanan imapatama', nóya cancantarahuë. Ina na'con na'con nohuantërahuë.

<sup>5</sup> Ma noya iya imapisopita nosororan. Ni'toro'sa' ya'nohuachinara, Quisocristo imapi ni'ton, o'shitation, a'caran. Co nohuitaponahuë', noya nontaton, catahuan, natantërahuë. Yosë natëton iya inaporan. <sup>6</sup> Inapitaso' huënantahuatona', niyontonaquë sha'huitiirinaco: “Iya Acayo noya nosororincoi,” itiirinaco. Naquëranchin quëmataquë cancoantahuachina', catahuantaquë' noya pa'ina', ténahuë. Yosë marë' sacatapi ni'ton, catahuaquë' ama pahuanchinasohuë'. <sup>7</sup> Quisocristo noninso' a'chinápi. Ina marë' pa'sápi. Co Yosë imapisopitahuë' a'chintaponaraihuë', co manta' ina marë' ma'patopihuë'. <sup>8</sup> Napoaton canpoa' inapopisopita catahuahua' ama pahuanchinasohuë'. Inapitaso' no'tën nanan a'chinapi. Cosharo', ma'sha inapita pahuan-topiso' quëtohuatëhua', canpoarinta' a'napita catahuarihua' Yosë nohuitacaiso marë'. Catahuahuatëhua', na'con na'con piyapi'sa' imasapi.

### *Tiotripisë co noyahuë' nininso'*

<sup>9</sup> Ya'ipi ya'huëramaquë imaramasopita quirica nani ninshitëranquëma'. Tiotripisëso nipirinhüë', co yanatërincohuë'. Inaso' hua'an pochin yaninin. <sup>10</sup> Napoaton ya'huëramaquë pa'pato, co noyahuë' nininsopita a'ninquëchin sha'huitarahüë. Inaso' na'con pinorincoi, nonpinapirincoi. Naporahuaton, iyaro'sa' a'chinacaiso marë' canconpachinara, co noya nontërinhuë'. Co pëinënquë aya'coninhüë'. A'napitari a'china'piro'sa' yacatahuapirinhüë', co ina tëranta' nohuantërinhuë'. “Ama pëinëmaquë aya'concosohuë',” itopirinhüë'. Aya'conpachinara, no'huiton, inapitanta' niyontonpi quëran yaocoirin. “Ama huachi canpita tëranta' niyontonpiso pëiquë ya'concosohuë',” toconin. Pa'pi co noyahuë' yonquirin inaso'.

<sup>11</sup> Ama iya co noyahuë' nipsisopita nonanquësohuë'. Noya nipsisopita nonanquë'. Noya nipatëhua', tëhuënchachin Yosë imarihua'. Co noyahuë' nipatëhua', co Yosë nohuitarihuahuë'.

### *Imitirio noya nininso'*

<sup>12</sup> Imitirioso nipirinhüë' noya imarin. Ya'ipiya quëran napotërinco. Ya'ipi cancanën quëran no'tëquën yonquirin. Quiyanta' nohuitërai. “Inaso' noya quëmapi,” tënai. No'tëquën nontërainquën.

<sup>13</sup> Na'con iya yasha'huitopiranquënhüë', co aquëtë' yaninshitëranquënhüë'. <sup>14</sup> Co hua'quiya quëranhuë' nicaponquën pa'sarahüë, topirahuë'. Pa'pato, niquënanpatëhua' noanhua'.

<sup>15</sup> Yosë asanocainquën. Ina quëran noya cancantaton, noya ya'huaran. Ya'ipi imapisopita isëquë ya'huëpiso' yonquiatënënhüë' saludos a'patarinënhüë'. Ya'ipi ni-payaraisopita inatohua' ya'huëpiso' yonquiarahuë. Saludos a'patarahüë sha'huitëquë'. Nani huachi.

## A'na Cotasë ninshitërinso'

### *Imapisopita yonquiaton, nanan a'patërinso'*

<sup>1</sup> Ca Cotasëco ninshitaranquëma'. Santiaco iinco caso'. ¿Noyanquëma' canpitanta'? Canta' noya ya'huarahuë. Quisocristoíchín natërahuë. Ina acorinco pënënta'huaso marë'. Quisocristo imaramasopita ninshitaranquëma'. Tata Yosë nohuanton, imarama'. Inaso' na'con nosororinquëma'. Quisocristo imarama' ni'ton, nóya a'paiarinquëma', nicha'ësarinquëma'. <sup>2</sup> Yosë na'con catahuainquëma'. Nanan anoyatërinpoa' ni'ton, na'con asanocancainquëma'. Nani tahuëriya nosoro'inquëma' canpitarinta' noya noya nosorocamaso marë'.

### *Nonpin nanan a'china'piro'sa'*

*(2 Pedro 2.1-17)*

<sup>3</sup> Carinquëma' iyaro'sa' nosororanquëma'. I'huamiáchin yonquirahuë ninshita'huanquëmaso marë'. Yosë anoyacancantërinpoaso' noya noya yaa'chintopiranquëmahuë', apira nanan natantërahuë. A'naquënso' nonpin nanan a'chintarinëinquëma', natantërahuë. Napoaton pënëna'huanquëmaso' ya'huërin, ténahuë. Quisocristo nanamën no'tëquën a'chintërainquëma'. Yosë nohuanton, no'tëquën ninshitërai ya'ipi imapisopita nitotacaiso marë'. Nani ya'ipiya nanamën anitotërinpoa'. Inasáchin natëtoma', a'napitanta' a'chintoco' no'tëquën yonquicaiso marë anta'. Ama pi'pian tëranta' nisha a'chintocoso'huë', ténahuë. <sup>4</sup> Tëhuënhachin a'naquënso' nonpin nanan a'chintarinëinquëma'. Pa'pi co noyahuë' inapitaso'. “Quiyanta' imarai,” taponaraihuë', co no'tëquën a'chinpihuë'. “Ma'sona nohuantërehuaso niahua'. Yosë nosororinpoa' ni'ton, co ana'intarinpoahuë',” ta'tona', pa'pi co noyahuë' nipi. No'pipi, monshihuanpi, a'naratipita nipi. Naporahuatona', co tēhuënhachin Quisocristo imapihuë', inasáchin natëcaso nipirihuë'. Ina marë' Yosëri chiníquën ana'intarin. Iráca quëra huare' nani yonquirin ana'intacaso'. Napoaton ni'cona canpitanta' nonpintochinëinquëma'. Chiníquën cancantatoma', no'tëquën a'chinco'.

<sup>5</sup> Nani nitotopiramahuë', naquëranchin sha'huitantarinquëma' yonquicamaso marë'. Iráca Yosë piyapinënpita Iquipito parti parisitopirinahuë', Yosëri nicha'ërin. Ya'ipiya noya pipiponaraihuë', ina quëran a'naquën co yanatëhuachinahuë', Yosëri chiníquën ana'intaton, ata'huantërin. Inapochachin iporanta' imaponaraihuë' nisha cancantohuachina', chiníquën ana'intarin. <sup>6</sup> Anquëniro'santa' ya'nan nipon, ya'ipiya noya yonquipirinahuë'. Ina quëran a'naquën nisha cancantatona', co huachi Yosë yanatëpihuë'. “Quiyanta' nóyaco' ni'toi, natëinacoiso' ya'huërin,” topiso marë', co huachi Yosë'pa' ya'huëpihuë'. Nani Yosëri yonquirin chiníquën ana'intacaso'. Tashinanquë tonpopinan ya'huapi. Ayaro' tahuëri parisitopiquë a'pararin. Co onporonta' cha'ësapihuë'. <sup>7</sup> Iráca Sotomaquë ya'huëpisopitanta' pa'pi co noyahuë' yonquipi. Monshihuanacaisoáchin cancantopi. A'naratipita taparo' nipi. Co ina pochín nicacasohuë' nipirihuë', napopi. Ina marë' Yosëri chiníquën ana'intërin. Pën inápa quëran a'paimarin ahuiquitacaso marë'. Sotoma, Comora, inapita huiquitopi. Ya'cariya ninanoro'santa' huiquitopi. Ayonquipoaso marë' ninshitërinpoa'. Inapita yonquiatëhua', “A'na tahuëri oshahuano'sa' pënquë parisitomiatapi huachi,” tēnhua'.

<sup>8</sup> Inapochachin iporanta' nisha a'china'piro'saso', huë'ëiri ahua'yantërinso pochín cancantatona', inahuara yonquinëna quëran nonpin nanan imasapi. Na'con monshihuanatona', nitapicancanapi. Co inso tëranta' yanatëpihuë'. “Co insonta' camaiinpoaso' ya'huërinhuë',” toconpi. Chiníquën nanantopisopita Yosëri acorinso' inapitanta' tēhuapi. <sup>9</sup> Iráca Moisésë chiminpachina, Yosëri anquëni hua'an a'paimarin nonën pa'pitacaso marë'. Miquiri itopiso'. Sopairi yaosërëtohuachina, nino'huipi. Naporo'

anquëni chiníquën nanantaponahuë', co nohuantërinhuë' sopai pinocaso'. Co inaora ana'intacaso' yonquirinhuë'. “Sinioro ana'inchinquën,” itërin. <sup>10</sup> Nisha a'china'piro'saso nipirinhuë' Yosë yonquirinso' co nitotatonaraihuë', tëhuapi. Ma'sharo'sa pochin cancantatona', co yonquipihuë'. Ma'sona tëranta' yanipachinara, nipi. Inapostatona', nitapicancanpi. Ana'intacaso' ya'huërin.

<sup>11</sup> ¡Ma'huantacha nisapi paya! Nonpina'piro'saso', Caino pochin cancantatona' co Yosë natëpihuë'. Paramo pochin cancantopi. Iráca Paramoso' coriquiráchin cancantaton, piyapi'sa' anishacancantërin. Corinta' iráca co noyahuë' ninin. Co hua'ano'sa' yanatërinhuë', no'huirin. Ina marë' Yosë nohuanton, chiminin. Inapita pochin cancantopisopita Yosëri chiníquën ana'intarin. <sup>12</sup> Quisoso imaramasopita coshatacaso marë' niyontopitamara, nisha a'china'piro'santa' huë'pi. Naporo' Yosë yonquicaso nipirinhuë', na'con o'otona', capa cancantopi. Co Yosë të'huatatonaraihuë', napopi. A'napita catahuacaso' ya'huëpirinhuë', co nosoropihuë'. Inahuara noya ya'huëcasoráchin yonquipi. Ni'co iyaro'sa'. Hua'qui' co o'nanpachinahuë', no'pa' yaniromarin. Ina pochin nipachina, yararo'të' quënanpatamara, pa'yatërama'. “O'nan huë'sarin,” topiramahuë', co o'naninhuë'. Ihuana' pa'nin. Inapochachin inapitaso' pënënpirinëinquëmahuë', nonpin nanan a'chintatënëinquëma' co catahuarinëinquëmahuë'. Nara nitërinsona' yonquico'. Pi'ipi tahuëri nanihuachina, nitacaso' ya'huërin. Co nitohuachinahuë', “Nani chiminin huachi,” ta'ton, hua'anëni nishitëtërin. Itënë chachin ocoirin ni'ton, noyá chiminin huachi. Inapochachin nonpin nanan a'china'piro'sa' ina nara pochin niconpi. Quisocriso nanamën nitotaponaraihuë', chimipi pochin nicatona', a'popi. Ina marë' chiníquën ana'intacaso' ya'huërin huachi. <sup>13</sup> Pamanta' yonquico'. Panca pamatohuachina, notohuaro' sa'po', amoró', inapita quënin. Nonpina'piro'saso', ina pochin co sano cancantopihuë'. Co noyahuë' nipi ni'ton tapanacaso nipirinhuë', co nitotapanpihuë'. Ina marë' Yosëri ana'intarin. Tayoranta' yonquico'. Anotohuachina, tacopirin. Co huachi a'pininhuë'. Inapochachin nisha a'china'piro'santa', tashinanquë pa'miatapi. Quisocriso a'pohuachina', parisitopiquë pacacaso' ya'huërin huachi.

<sup>14</sup> Iráca Inocori chachin inapita ninorin. Atan shiin inaso'. Atan quëran saota shinpita ya'huërin piquëran Inoco ya'huërin. Ninoton, naporin: “Sinioro chachin o'mararin huachi. Hua'huayatërahuë' anquëniro'sarë chachin o'mararin. <sup>15</sup> Naporo' ya'ipi oshahuano'sa' ana'intarin huachi. Pa'pi co noyahuë' nipi ni'ton, ana'intacaso' ya'huërin. Yosë no'huipisopita no'tëquën ana'intarin huachi,” tënin iráca. <sup>16</sup> Yosëso' noya nosoropirinpoahuë', inapitaso' ma'sha onpohuachinara, ina no'huipi. Co sano cancantopihuë'. Ma'sona tëranta' yonquihuachinara, nipi. Co noyahuë' cancantatona', napopi. “Quiyaso' noya noya nitotërai,” ta'tona', chiníquën nonconpi. Co piyapi nosoroaponaraihuë', noyasha nontopi. Inahuara canacaiso marë' napotopi.

### *Chiníquën cancantatëhua', Quisocristoíchin imamiatahua'*

<sup>17</sup> Canpitaso nipirinhuë' iyaro'sa', noya yonquico'. Nosororanquëma' ni'ton, pënënanranquëma'. Quisocriso ca'tano'sanënpita sha'huítërinpoaso' ama naniantocosohuë'. <sup>18</sup> “Ayaro' tahuëri naniriahuachin, co noyahuë' quëmapi'sa' ya'huërapí. Yosë nanamën tëhuaapi. Co noyahuë' cancantatona', a'naratipita nisapi,” itërinpoa'. <sup>19</sup> Inahuara nohuantopiso' nisapi. Co Ispirito Santori ya'coancantërinhuë'. Nisha a'chinatona', piyapi'sa' anishacancantopi, a'na huënton a'na huënton co huachi noya nini'tona', ya'huapihuë'.

<sup>20</sup> Canpitaso nipirinhuë' iyaro'sa', Yosë nanamën na'con yonquico' noya noya imacamaso marë'. Inasáchin no'tëquën anitotërinpoa' Yosë pochin cancantacaso'. Naporahuatón, Yosë nontáco'. Ispirito Santo catahuarinquëma' cancanëma quëran huarë' noya nontacaso'. <sup>21</sup> Inapotatoma', nani tahuëri nóya cancantoco' Yosë nosoro'inquëma'. Ina na'con nohuantoco'. Quisocriso yonquiatoma', o'mantacaso' tahuëri ninaco'.

O'mantahuachin, nosoroatonpoa', chimirin quëran nicha'ësarinpaa'. Yosë'pa' nanpimi-atarihua'.

<sup>22</sup> A'naquënso' co noya natëyátërapihuë'. Inapitaso' nosoroatoma', sanoanan quëran pënënco' no'tëquën yonquicaiso marë'. <sup>23</sup> Ni'co' iyaro'sa'. Ma'sha pënquë anoto-huachina, a'naroáchin manë' ama huiquitacaso marëhuë'. Inapochachin piyapi'sa' na'con pënënco' ama parisitopiquë paacaiso marëhuë'. A'naquënso nipirinhüë' nonpin nanan pa'yatatona', co noyahuë' nipi. Inapitanta' nosoroatoma', pënënco'. Nipirinhüë', ama pi'pian tëranta' inapita pochin cancantocosohüë'. Napopiso' ama yonquicosohüë'. Ni'cona sopai minsëchinquëma' canpitanta'.

*Ma noyacha Yosëso paya itahua'*

<sup>24-25</sup> Tata Yosëso' ya'ipi nanitaparín. Noya a'paiarínquëma' ama anotërëso pochín tëhuëcamaso marëhuë'. Catahuahuachinpaa', co sopai minsëarínpoahuë'. Noya noya tapararínpoa' imamiatacaso marë'. A'na tahuëri ya'huërinquë noya ni'sarínpoa'. Inatohuaso' noya noya. Capa cancantarihua'. Tata Yosëíchin hua'anëntërinpoa'. Ina nohuanton, Quisocriso nicha'ësarínpoa'. Inasáchin catahuarínpoa' noya chinotacaso'. Ma noyacha Tata Yosëso paya. Iráca quëra huarë' chini chiníquën nanantërin. Noya noya ni'ton, ya'ipi piyapi'sari chinochina'. Inasáchin natëahua'. Ama onporonta' naniantahuasohüë'. Amen. Nani huachi.

*Cotasë*

## A'na tahuëri ma'sha onpocaso' Coansha ninshitërinso'

### *Quisocristo anitotërinpoaso'*

<sup>1</sup> Tata Yosë nohuantërin ya'ipinpoa' iso nanan nitotacaso'. Napoaton a'na tahuëri ma'sha onpocaso' nininso' Quisocristo sha'huitërin anitotinpoaso marë'. Inaso' anquëni a'paimarin ca Coanshaco sha'huitiincoso marë'. Quisocristoíchin caso' natërahuë. Anquëni o'marahuaton, nani ma'sha a'notërinco. <sup>2</sup> A'notohuachincora, ni'nahuë. Ina nicato, no'tëquën ninshitaranquëma'. Quisocristo chachin Yosë nanamën anitotërinco.

<sup>3</sup> Iso quirica nontohuatama', noya cancantarama'. Ina natanpatamanta', noya cancantarama'. A'na tahuëri ma'sona onpocaso' sha'huitaranquëma'. Natëhuatama', Yosë noya ni'sarinquëma'. Ayaro' tahuëri nani ya'caririarinpoa huachi.

### *Canchisë ninanoro'saquë Yosë imapisopita ninshitërinso'*

<sup>4</sup> Ca Coanshaco quirica a'pataranquëma'. Asia parti ya'huëramasopita ninshitaranquëma'. Imarama' ni'ton, a'naya a'naya ninanoro'saquë niyontonatoma', Yosë chinotërama'. Canchisë ninanoquë niyontonamaso' a'naya a'nayanquëma' yonquiatënguëma', ninshitaranquëma'. Inaora nohuanton, Tata Yosë noya catahuainquëma'. Asanocancainquëma'. Iráca quëran huarë' ya'huërin. Ipora huanta' nanpiarin. Inaso' ya'huërápon. Co onporonta' chimianinhuë'. Hua'anëntacaso' shiranën notënanquë canchisë ispiritoro'sa' ya'huapi catahuainquëmaso marë'. <sup>5</sup> Quisocristonta' inaora nohuanton, catahuainquëma'. Asanocancainquëma'. Iráca isoro'paquë o'marahuaton, no'tëquën a'chintërinpoa'. Ina'ton chiminaponahuë', nanopiantarin. Chimirin minsërahuaton, ya'ipiya hua'anëntarin. Ya'ipi hua'ano'sa quëran chini chiniquën nanantarin. Naporahuaton, na'con nosororinpoa'. Oshanënpoa' inquitinpoaso marë' huënnainën a'parin. Chiminaton, nicha'ërinpoa. <sup>6</sup> Huëntonënguë chachin aya'conatonpoa', hua'anëntërinpoa'. Yosëíchin yonquicaso marë' corto hua'ano'sa' pochin acorinpoa'. ¡Ma noyacha inaso paya! Ya'ipi piyapi'sari chinochina'. Ipora quëran huarë' inasáchin natëina'. Amen.

<sup>7</sup> Ni'cochi. Quisocristo o'mantararin. A'na tahuëri chitororë chachin o'mantararin. Naporo' ya'ipi piyapi'sari ni'sapi. Iráca ohanpisopitarinta' ni'sapi. Nisha nisha piyapi'sa' sëtatona', na'nërapí. “¿Onpoatëhuacha co natërehuahuë paya?” tosapi. Tëhuëenchachin naporapi. Amen.

<sup>8</sup> Yosë chachin sha'huitërinpoa': “Ca'ton ya'huërahuë. Co'huara isoro'pa' ya'huëyátërasohuë', ya'huárahuë. A'na tahuërinta' ya'ipi ma'sharo'sa' ta'huantopirinahuë', caso' ya'huápo. Iráca quëran huarë' ya'huërahuë. Ipora huanta' nanopiárahuë. Co onporonta' ta'huantapohuë', ya'huërápo. Chini chiniquën nanantërahuë,” ténin.

### *Quisocristo ya'norinso'*

<sup>9</sup> Ca Coanshaco ninshitaranquëma'. Canpitaro'co chachin imarahuë. Ina marë' parisitopirëhuahuë', hua'anëntërinquë aya'coninpoa'. Quisocristo chachin catahuahuachinpoa', noya ahuantarëhua'. Yosë nanamën a'chinahuëso marë' aparisitërinaco. Quisocristo imarahuë ni'ton, a'na so'ton'pa' a'parinaco, Patomosë itopiquë. <sup>10</sup> I'hua Tomio tahuëri Yosë chinotasoco, Ispirito Santo nohuanton, hua'narëso pochin quënanahuë. Co huë'ëpirahuë', pinëhuë quëran chiniquën nontërinco, natanahuë. Tronpita pihuirinso pochin natanahuë. <sup>11</sup> Nontatonco, sha'huitërinco:



—Apira nani ma'sha a'notaranquën, quiricaquë ninshitëquë'. Ina quëran canchisë ninanoro'saquë a'patëquë' imarinacosopita nonchina'. Ipiisoquë, Ismirinaquë, Pircamoquë, Tiatiraquë, Sartisiquë, Piratiripiaquë, Naotisiaquë inaquëpita ya'huëpisopita a'patëquë' nitochina', itërinco.

<sup>12</sup> “¿Inta' nontarinco?” ta'to, tahuërëtopirahuë', canchisë së'parahuan nanparino'sa pochin nininsopita quënanahuë, oro quëran nipiso'. Inapamiáchin huanipi. <sup>13</sup> Ina huancánachin quëmapi huaniarin, ni'nahuë. Piyapi pochachin niponahuë', noya noya ya'norin. Naporopi a'mosahuaton, oro pochin nininso quëran tëtëtëntaquëchin nitonporin. <sup>14</sup> Huiríchin aintërin. Huirihuaita pochin huiritërinso'. Naporahuaton, ya'pirin chachin pën nënërinso pochin ya'norin. <sup>15</sup> Nantëonta' sha'pi hua'na pënquë a'përëso pochin huënaráchin ya'norin. Naporahuaton, chiníquën nonin. Panca so'pora tënëntërinso pochin natanahuë. <sup>16</sup> Inchinan imirin quëran canchisë tayora pochin nininso' së'quërin. Naporahuaton, nanamën quëran sahuëni pochin nininso' pipirarin. Cato quëran chachin to'napinan. Ya'ipi ya'pirinso' pi'i pochin a'pinin. Huënaráchin huënaráchin ya'norin.

<sup>17</sup> Ina ni'sahuato, pa'yanahuë. Chimipi pochin anotërahuë. Nantën pirayan anotopirahuë', inchinan quëran së'huarahuatonco, nontërinco.

—Ama të'huatocosohuë'. Caso' iráca quëran huarë' ya'huërahuë. Co onporonta' ta'huantarahuë'. <sup>18</sup> Nanpiárahuë. Chiminaporahuë', nanopiantarahuë. Caso' chini chiníquën nanantërahuë. Onporosona chiminacaiso' cari sha'huitarahuë. Ca nohuantohuato, nanopiapi. Ca nohuantohuato, chiminapona'. Co imarinacosopitahuë' chiminapachina', parisitopiquë a'pararahuë. <sup>19</sup> Ni'nanso' ninshitëquë'. Apira Yosë nohuanton, naquëranchin nani ma'sha niantaran. Ipora naporapiso', a'na tahuëri ma'sha onpocasonta', inapita a'nochinquën ninshitantaquë'. <sup>20</sup> Ni'nanso' co quëmaora nitotopiranhue', a'chinchinquën nitotëquë'. Canchisë së'parahuan nanparino'saso' noya a'pinin. Inapochachin canchisë ninanoro'saquë imarinacosopita ya'huapi. Niyontonatona', chinotarinaco. Canchisë tayoraro'sa' së'quërahuëso pochin ansiano'sa' a'paiarahuë, itërinco.

## 2

### *Ipisoquë ya'huëpisopita ninshitërinso'*

<sup>1</sup> Ina quëran sha'huitërinco:

—A'na quiricaquë ninshitaton, ansiano Ipisoquë ya'huërinso' a'patëquë' nontohuachin imapisopita nataina'.

“Ca Quisosoco quirica a'pataranquëma', ni'co'. Inchinanëhuë quëran canchisë tayoraro'sa' së'quërahuë. Canchisë së'parahuan nanparin pochin nininsopita huancánachin pa'sárahuë. <sup>2</sup> Nani nohuitëranquëma'. Ya'ipi ninamasopita nitotërahuë. Chiníquën ca marë' sacatërama'. Co amiatomacohuë', noya ninama'. A'naquën co noyahuë' nipachinara, co noya ni'namahuë'. Nonpin nanan a'china'piro'santa' co noya ni'namahuë'. ‘Yosë a'parincoi, a'chinarai,’ itopirinëinquëmahuë', nonpinapi. Inapita natanpatama': ‘Co no'tëquën a'chinpihuë', ta'toma', co natëramahuë'. <sup>3</sup> Imaramacoso marë' aparisitopirinëinquëmahuë', ahuantërama'. Co yaa'poramacohuë'. Ina marë' noya ni'nanquëma'. <sup>4</sup> Nipirinhue', co huachi noya nosororamacohuë'. Iráca ya'nan imapomaco, tëhuëenchachin nóya nosororamaco. Canpita capininta' noya ninosororama'. Iporaso nipirinhue' co huachi iráca pochin noya ninosororamahuë'. Co huachi canta' noya nosororamacohuë'. Ina marë' sëtato, co noya ni'nanquëmahuë'. <sup>5</sup> Iráca naporamaso' yonquiantatoma', noya niantaco'. Ya'ipi co noyahuë' yonquiramasopita naniantatoma', ya'ipi cancanëma quëran nosoroantaco. Naporahuaton canpita capininta' noya ninosoroantaco'. Co noya cancantantahuatamahuë', paaparahuatëinquëma',

ana'intaranquëma'. Nanparin tacopirinso pochin nisarama'. A'na tahuëri ya'huëramaquë co insonta' imasarinacohuë'. <sup>6</sup> Napoaponahuë', nisha a'china'piro'sa' co pi'pian tëranta' nohuantëramahuë', Nicoraitaro'sa' itopiso'. Co noyahuë' nicacaso' a'chintopirinënquëmahuë', co nohuantëramahuë' natëcamaso'. Carinta' co costarahuë'. <sup>7</sup> Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Sopai minsëhuatama', Yosë'pa' ya'huëmiatarama'. Inatohua' nanpirin nara nitërinso' ca'patama', noya noya nanpimiatarama'. Nani huachi," itëquë', ninshitohuatan, itërinco Quisoso.

*Ismirinaquë ya'huëpisopita ninshitërinso'*

<sup>8</sup> Ina quëran sha'huitaantarinco:

—Ansiano Ismirinaquë ya'huërinsona' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. Iráca quëran huarë' ya'huërahuë'. Co onporonta' ta'huantarahuë'. Chiminaporahuë', nanopiantarahuë'. <sup>9</sup> Imaramacoso marë' na'con parisitëramaso' nitotërahuë'. Co na'a ma'sha ya'huëtopirinquëmahuë', Yosë nohuitacamasoachin cancantatoma', sano cancantërama'. A'na tahuërinta' Yosë'pa' pa'patama', co manta' pahuantarinquëmahuë'. Iporaso nipirinhüë' a'naquën chiniquën pinorinënquëma'. ‘Yosë piyapinëncoi quiyaso’, topirinhüë', Satanasë huëntonënquë ya'conpi. <sup>10</sup> Ipora tahuëri'sa' na'con parisitapiramahuë', ama të'huacosohuë'. Sopai nohuanton, tashinan pëiquë po'moarinënquëma'. Yosë a'pocamaso marë' napotarinënquëma'. Shonca tahuëri pochin parisitarama'. Tëpaporinënquëmaonta', ama a'pocosohuë'. Imamiatohuatamaco, inápaquë acanaranquëma'. Inatohua' nanpimiatarama'. <sup>11</sup> Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Sopai minsëhuatama', co parisitopiquë paatoma', parisitomiataramahuë'. Nani huachi,” itëquë', ninshitohuatan, itërinco.

*Pircamoquë ya'huëpisopita ninshitërinso'*

<sup>12</sup> Ina quëran sha'huitaantarinco:

—Ansiano Pircamoquë ya'huërinsona' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. Chiniquën nanantato, sahuëni cato quëran chachin to'napinan pochin nininso' ya'huëtërinco ana'inta'huaso marë'. <sup>13</sup> Canpita ya'huëramaquë nohuitërahuë'. Inaquë na'a piyapi'sa' co noyahuë' cancantopi. Satanasëri hua'anëntopirinhüë', canpitaso' noya imaramaco. Antipasë natëtonco, noya pënëntopirinhüë', ina marë' tëpapi, ni'nama'. Satanasë chachin inaquë ya'huërin, tënahüë'. Parisitapomarahüë', co a'poramacohuë'. Ina marë' noya ni'piranquëmahuë', <sup>14</sup> co ya'ipinquëma' no'tëquën imaramacohuë'. A'naquëma' Paramo pochin cancantërama'. Iráca inaso' Yosë nanamën nitotopirinhüë', Yosë piyapinënpita nonpintërin. Inimiconënpita hua'anën sha'huitërin anishacancantacaiso marë', Paraco itopiso'. Inari sha'huitohuachina, anishacancantopi. Nisha cancantatona', mamanshi moshapi. Moshatona', nosha mamanshi marë' acopisona' ca'pi. Naporahuaton, monshihuanapi. <sup>15</sup> Inapochachin a'naquëma' nisha cancantërama'. Nisha a'china'piro'sa' a'chintohuachinënquëmara, a'naquëma' natëtoma', Nicoraitoro'sa' a'chinpiso' imarama'. <sup>16</sup> Napoaton ya'ipi co noyahuë' yonquiramasopita naniantoco'. Insosona co naniantohuachinhüë', chiniquën ana'intarahuë'. Nanamëhuë quëran sahuëni inëshin nininso' ya'huëarin oshahuano'sa' ana'inta'huaso marë'. <sup>17</sup> Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Sopai minsëhuatama', noya cancantarama huachi. Iráca israiro'sa' Yosëri cosharo' a'patimarin, mana itopiso'. Inachachin po'orahuëso' carimanta' quëchinquëma' sano cancantacamaso marë'. Imaramaco ni'ton, nasha nininëma' a'naya a'nayanquëma'

aco'inquëma'. Canpitaora nitotarama'. Huiiri na'piquë ninshitahuato, quëchinquëma'. Cancanëma quëran noya noya nohuitaramaco huachi. Nani huachi," itëquë', ninshitoahatan, itërinco.

*Tiatiraquë ya'huëpisopita ninshitërinso'*

<sup>18</sup> Ina quëran itaantarinco:

—Ansiano Tiatiraquë ya'huërinsonata' ninshitëquë' nonchin imapisopita nataina'.

“Ca Yosë hui'ninco quirica a'pataranquëma'. Ya'pirahuë pën nënërinso pochin ni'ton, ya'ipi yonquiramaso quëran huarë' nitotërahuë. Nantëhuënta' sha'pi hua'na pënquë a'përëso pochin ni'ton, huënaráchin ya'norin. <sup>19</sup> Canpitaso' noya ninama'. Noya natëtomaco, ninosororama'. A'naquëma' pahuantohuachinquëmara, nicatahuarama'. Ma'sha onpoapomarahué', noya ahuantërama'. Ya'nan imapomaco, noya ninama'. Iporaso' na'con na'con nicatahuarama'. Ina marë' noya ni'piranquëmahuë', <sup>20</sup> co ya'ipi cancanëma quëran imaramacohué'. A'na sanapi corto pëiquë chachin nonpin nanan a'chintopirinquëmahuë', co a'paramahuë'. Iráca Quisapira pa'pi co noyahuë' sanapi niponahuë', chiníquën nanantaton, piyapínëhuëpita anishacancantërin. Inapochachin iporaso' ina sanapi pënënarinquëma' co noyahuë' nicacamaso'. ‘Noya monshihuanacaso'. Mamanshi moshacaso marë' nosha acohuachina, noya capacaso'. Ca'co', itohuachinquëmara, a'naquëma' natëtoma', monshihuanama'. Nosha mamanshi marë' acopiso' ca'nama'. Ina pochin ina sanapi nonpintërinquëma'. <sup>21</sup> Co a'naroáchin ana'intërahuë'. Hua'qui' pënënpirahuë', co pi'pisha tëranta' nohuantërinhuë' natëincoso'. Oshahuanacaso' co yaa'porinhuë'. <sup>22</sup> Iporaso nipirinhué' ana'intarahuë huachi. Chiníquën aparisitarahuë. A'napitanta' anishacancantërinso' co oshanëna' a'pohuachinahuë', chiníquën ana'intarahuë. <sup>23</sup> Sanapi imarinsopitaso' co natërinacohué' ni'ton, ata'huantarahuë. Ina nicatona', ya'ipi imarinacosopitanta' yonquiapi. ‘Tëhuëenchachin Siniro nohuitërinpoa'. Yonquirëhuasonta' nitotërin. Co noyahuë' nipatëhua', no'tëquën ana'intarinpoa', tosapi. <sup>24</sup> A'naquëmaso nipirinhué' co nonpin nanan natëramahuë'. ‘Noya noya nitotërai', itopirinëinquëmahuë', ‘Sopai imatona', napopi', ta'toma', co ina natëramahuë'. Iporahuanta' noya imaramaco ni'ton, co aquëtë' pënëna'huanguëmaso' ya'huërinhuë'. <sup>25</sup> Chiníquën cancantatoma', o'manta'huaquë huarë' imamiatoco. <sup>26</sup> Sopai minsëhuatama', a'na tahuëri chiníquën nanan quëtaranquëma'. Ayaro' tahuëriquë huarë' natëhuatamaco, catahuaramaco nisha nisha piyapi'sa' hua'anënta'huaso marë'. <sup>27</sup> Tata Yosë nohuanton, chiníquën nanantërahuë. Canpitanta' catahuaramaco copirnoros'a' co natërinacosopitahuë' ana'inta'huaso'. No'pa huë'ëta hua'naquë pa'quirëso pochin oshahuano'sa' ana'intarihua'. <sup>28</sup> Naporahuaton, huënio tayora huënaráchin a'pininso pochin quëchinquëma'. Noyápiachin a'pintaranquëma'. <sup>29</sup> Imaramaco ni'ton, Ispirito Santo nontarinquëma'. Huëratëhuanpatama', noya natanatoma', yonquico'. Nani huachi," itëquë', ninshitoahatan, itërinco.

### 3

*Sartisiquë ya'huëpisopita ninshitërinso'*

<sup>1</sup> Ina quëran Quisoso sha'huitaantarinco:

—Ansiano Sartisiquë ya'huërinsonata' ninshitëquë' nonchin imapisopita nataina'.

“Ca Quisosoco ninshitaranquëma'. Caso' canchisë ispiritoro'sa' Yosëri camairinso' canta' camairahuë, natërinaco. Naporahuaton, tayoraro'sa' së'quërahuëso pochin, ansianoro'santa' acorahuë a'chinacaiso marë'. Canpitaso' nohuitëranquëma'. Ya'ipi co noyahuë' ninamasopita nitotërahuë. A'napitaso' nicatënëinquëma', ‘noya imapi', topirinhahuë', co tëhuëenchachin imaramacohué'. Chimipi pochin cancantërama'. <sup>2</sup> Ipora huanta' niyontopiramahuë', topinan quëran naporama': ‘Ya'ipi natëtoi, noya ninai', topiramahuë', co huachi Yosë noya ni'ninquëmahuë'. Huë'ërëso

pochin cancantërama' ni'ton, co yonquiramahuë'. Pënsha yatacopirinsó pochin cancantërama'. Pën yatacopihuachina, pishitërë' noya orotacaso marë'. Inapochachin canpitanta' chiniquën Yosë yonquiantaco'. <sup>3</sup> Ya'nan natanapoma', Yosë nanamën no'tëquën a'chintërinënuquëma'. Ina yonquiatoma', ya'ipi co noyahuë' yonquiramasopita naniantoco'. Ya'ipi cancänëma quëran casáchin yonquico. Co noya cancantaantahuatamahuë', a'naroáchin ana'intaranquëma'. Ihuatona'pi huë'ninsó pochachin a'nanaya ana'intaranquëma'. Co nitotasënuquëmahuë', o'mantararahuë'. <sup>4</sup> Napoaponahuë', caraichinquëma' noyápiachin cancantërama'. Canpitaráchin noya nicatoma', co në'huëtërinso pochin cancantaramahuë'. Ina marë' canpitaso' noya ni'saranquëma' ni'ton, Yosë'pa' ichiya'huëcontaranquëma'. Inatohua' nóya cancantarama' ni'ton, huiríchin a'mocontarama'. <sup>5</sup> Inquëmaso' sopai minsëhuatama', Yosë'pa' pa'sarama'. Noyápiachin cancantarama' ni'ton, huiríchin a'mocontarama'. Inatohua' ya'huëmiatarama'. Nanpirin quiricaquë nininëma' nani ninshitëranquëma'. Co onporonta' tapiarahuë'. Tata Yosë sha'huitarahuë: 'Isopita imamiatërinaco,' itarahuë. Anquëniro'santa' natanapi. <sup>6</sup> Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Nani huachi," itëquë', ninshitohuatan, itërinco.

*Piratiripiaquë ya'huëpisopita ninshitërinso'*

<sup>7</sup> Ina quëran itaantarinco:

—Ansiano Piratiripiaquë ya'huërinsona' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. Caso' noya noyaco. Casáchin no'tëquën a'chinahuë. Iráca Yosëri Tapi sha'huitërin. 'A'na tahuëri quëma shiparinquën ya'ipi piyapinëhuëpita hua'anëntarin,' itërin. Iráca ninorincoso chachin nani o'marahuë Yosë huëntonënuquë aya'cona'huanquëmaso marë'. Niahuiquë ya'coana i'soarahuatë', aya'conë'. Inapochachin carinquëma' aya'conpatënuquëma', co insonta' nanitërinhuë' ocoiinquëmaso'. Oncotohuatëra, co a'napita nanitopihuë' ya'conacaiso'. <sup>8</sup> Cari nohuitëranquëma'. Ya'ipi ninamasopitanta' nitotërahuë. Co na'aquëmahuë' nipomarahuë', noya ninama'. Co chiniquën nanantapomarahuë', nanamëhuë noya imarama'. Co tapanatomahuë', 'Quisocristoíchin imarai,' tënama' ni'ton, ya'coana i'soatëresó pochin catahuanquëma' na'a piyapi'sa' a'chintacamaso'. Ca nohuan-ton, pënëntarama'. Co insonta' nanitarinhuë' ata'tëinquëmaso'. <sup>9</sup> A'naquën nonpintatënuquëma', 'Yosë piyapinëpitacoi quiyanta,' itopirinënuquëmahuë', Satanasë huëntonënuquë ya'conpi. A'na tahuëri ca nohuanto, inapitanta' isonahuatona', noya nontarinënuquëma'. 'Tëhuëchachin no'tëquën imarama'. Quisocristo nosororinquëma', itarinënuquëma'. <sup>10</sup> Chiniquën cancantatoma', imamiatoco, itëranquëma'. Natëramaco ni'ton, carinquëmanta' na'con catahuanquëma'. A'na tahuëri ya'ipi isoro'paquë ya'huëpisopita chiniquën aparisitarahuë tënica'huaso marë'. Co naporo' parisitaramahuë'. Nicha'ësaranguëma'. <sup>11</sup> Co hua'quiya quëranhuë' o'mantararahuë. Ama naniantatomacohuë', imamiatoco. Ni'cona sopai minsëchinquëma'. Ina minsëhuachinquëma', co inápaquë canaaramahuë'. <sup>12</sup> Sopai minsëhuatama', Yosë ya'huërinquë chachin pantarama'. Piyon pëi' achinirinsó pochin na'con nohuan-taranquëma'. Napoaton ya'huëmiatontarama'. Co pipiaramahuë'. Yosë co onporonta' a'poarinquëmahuë'. Nininën chachin acotaranquëma'. A'na tahuëri panca ninano' ya'huapon. Inápa quëran o'mararin. Nasha Quirosarin itopiso'. Ina nininëonta' acotaranquëma'. Canta' Quisosoco o'mantahuato, nasha nininëhuë acotaranquëma'. Co onporonta' a'poaranquëmahuë'. <sup>13</sup> Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Nani huachi," itëquë', ninshitohuatan, itërinco.

*Naotisiaquë ya'huëpisopita ninshitërinso'*



14 —Ina quëran ansiano Naotisiaquë ya'huërinso' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. No'tëquën nonato, no'tën nanan a'chintëranquëma'. Co onporonta' nonpintëranquëmahuë'. Yosë nohuanton, ya'ipi ma'sha ninahuë. Napoaton, ya'ipi piyapi'sa' natëinacoso' ya'huërin. 15 Caso' nohuitëranquëma'. Ya'ipi ninamasopitanta' nitotato, co noya ni'nanquëmahuë'. Ni'co'. Të'nai' noyápiachin o'orë'. Ahuaihuatëranta', yashin o'orë'. Co noya huairinsohuë' nipirinhüë' o'opatëra, amirotërë', topi. Inapochachin ni'nanquëma'. A'naquën noya ahuaireso pochin noya imarinaco. Canpitanta' noya imaramaco naporini, noya ni'itëncuëmahuë'. A'naquëonta' të'nai' pochin nipi. Co nitochátërapihuë' ni'ton, nosororahuë. 16 Canpitaso nipirinhüë' co noya ahuaireso pochinhüë' ninama'. ‘Noya imarai,’ topiramahuë', co ya'ipi cancanëma quëran imaramacohüë' ni'ton, yaa'poranquëma'. Ma'sha amirotatë' yaimorëso pochin ni'nanquëma'. 17 Canpitaso' naporama': ‘Na'a ma'sha ya'huëtërincoi ni'ton, noya ya'huarai. Quiyaso' noya piyapicoi. A'napita quëran noya noya nitotërai. Co manta' pahuantërincoihuë', topiramahuë', co no'tëquën yonquiramahuë'. Cancanëma quëran yonquiramasopita nitotërahuë. Sa'ahuaya pochin ni'nanquëma'. Coriqui pahuantërinso pochin canpitaso' na'con pahuantarinquëma' noya cancantacamaso'. Somaraya pochin cancantatoma', co tëhuëncachin nohuitëramacohüë'. Sa'ahua capa a'mocaso' nininso pochin co noyápiachin cancantëramahuë'. Pa'pi nosorotërama'. 18 Napoaton pënënanquëma'. Chiniquën nontoco catahuainquëma'. Ni'co'. Oro a'pëhuatëra, ya'ipi në'huë inquirin. Orosachin quëparitërin, noyasáchin nininso'. Inapochachin canpitanta' nontoco catahuainquëma' noya yonquicamaso marë'. Na'con pahuantarinquëma' Yosë pochin nicacamaso'. Casáchin yonquico Yosë noya ni'inquëma'. Yonquihuatamaco, huiríchin a'morëso pochin noya nisarama'. Somaraya pochin cancantërama' ni'ton, co tëhuëncachin nohuitëramacohüë'. Nimirioquë acorayatërëso pochin anoyacancanchinquëma' cancanëma quëran nohuitamacoso marë'. 19 Nosoroatëncuëma', chiniquën nontëranquëma'. Ana'intaranquëma' noya cancantacamaso marë'. Co noyahuë' yonquiramasopita a'porahuatoma', casáchin tahuërëtantaco huachi. 20 Cancanëmaquë yaya'coancantëranquëma'. Ina marë' nontaranquëma'. Ya'coana pi'nirëso pochin ninaranquëma'. Natanahuatamaco: ‘Ya'coancantoco,’ itohuatamaco, ya'coancantaranquëma'. Niichicoshatërëso pochin nóya ninohuitarihua'. 21 Nani sopai minsërahuato, Tata Yosë'pa' ya'huarahuë. Ya'ipiya hua'anëntarai. Canpitanta' sopai minsëhuatama', Yosë'pa' noya acoaranquëma'. Canpitaro'co hua'anëntarahuë. 22 Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Nani huachi,” itëquë' ninshitohuatan, itërinco Quisoso.

## 4

### *Inápaquë Yosë chinotopiso'*

1 Ina quëran inápaquë në'përahuato, quënanahuë. Yosë ya'huërinquë chachin ya'coana ni'soatërin, ni'nahuë. Naporahuaton, inápa quëran ya'nan nontërinco' nontaantarinco. Tronpita pihuipiso pochin natanahuë.

—Isëquë huëntaquë'. Nani ma'sha a'nochinquën. A'na tahuëri ma'sha onpocaso' ninoto, anitotaranquën, itërinco.

2 A'nanaya Ispirito Santo nohuanton, hua'narëso pochin Yosë ya'huërinso' quënanahuë. Hua'anëntacaso' shiranëncuë a'nara' huënsëárin, ni'nahuë. 3 Inaquë nisha pochin ya'norin. Na'pi noyápiachin nininso pochin huënaratarin. Caspi, cornarina inapita pochin huënaratarin. Noyápiachin ya'norin. Yahua'tani tahuitërin, huënsëárin. Yahua'tan niponahuë', huëron pochin caninchin a'pinin. Ismirarita pochin huënaratarin, ni'nahuë.



<sup>4</sup> Inaquë cato shonca catapini ansiano'sa' hua'anëntacaso' shiraro'saquë tahuishin miáchin huënsëapi. Huirichinachin a'mopi. Yancotë' oro quëran nininso' yancopi. <sup>5</sup> Yosë hua'anëntacaso' shiranën quëran o'cori pochin nininso' pipiarin. Huënsha huënsha'tarin. Huiratacarintërinso pochin nonpiso' natanahuë. Canchisé pën nënërinso' Yosë notënanquë chachin ni'nahuë. Inapitaso' canchisé ispiritoro'sa' Yosëri camairinso', ténahuë. <sup>6</sup> Shira notënanquë panca sono pochin ya'huërin. Co i'sha pochinhuë'. Isihuico pochin niponahuë', acopoquë huarë' quënantërë'.

Yosë shiranën tahuirinquë catapini ma'sharo'sa pochin nininso' ya'huëpi, nanpirihuanpiso'. Na'a ya'pirahuanatona', itoparan itoparan quënantopi. <sup>7</sup> Nisha nisha ni'topi. A'naso' pa'pini pochin ya'norin. A'nanta' toro pochin ya'norin. A'nanta' piyapi pochin ya'piratërin. Ya'natoninsoso', panca onian pochin ya'norin. <sup>8</sup> Nisha nisha niponarahuë', ya'ipiya anpiantëhuanpi. Saota saota ya'huëtapi. Ina aipi, ina acopo', cato quëran chachin ya'pirin ya'huëtapi. Inapitaso' tahuërirë chachin, tashirë chachin Yosë chinotäpi. Co ta'topihuë'. Napopianachin naporapi:

“¡Ma noyacha Tata Yosëso paya! ¡Noyasáchin ninin! Chini chiníquën nanantaton, ya'ipiya hua'anëntarin. Iráca quëra huarë' ya'huërin. Ipora huanta' nanpiárin. Inaso' ya'huërárin. ¡Ma noyacha inaso paya!” tosapi.

<sup>9</sup> Apira apira chinotapi. “¡Ma noyacha Yosëso paya! Ya'ipi piyapi'sari chinochina'. Na'con catahuarinpoa' ni'ton, 'Yosparinquën Sinioro,' itahua'. Inaso' hua'anëntomiatarinpoa'. Co onporonta' ta'huantarinhue',” topachinara, <sup>10</sup> ansiano'santa' Yosë yonquiapi. “Tëhuëenchachin hua'anëntërinpoa'. Co onporonta' chimianinhue',” ta'tona', cato shonca catapini chachin isonahuatona', chinotapi: “Quëmasáchin nóyanquën,” itatona', Yosëri ayancotërinso', shiranën notënanquë acoantapi. Chinotatona', itapona':

<sup>11</sup> “Quëmasáchin Sinioro imarainquën. Noya noyanquën ni'ton, ya'ipi piyapi'sa' chinochinënguën. Nani tahuëri natëinënguën. Ya'ipi nanitaparan. Ya'ipi ma'sha ninan. Quëma nohuanton, ipora huanta' ya'huërin,” itopi.

## 5

### *Carniroa'hua quirica ma'patërinso'*

<sup>1</sup> Yosë nohuanton, hua'narëso pochin niantarahuë. Inápaquë ya'huërinso' quënanato, quirica ni'nahuë, so'nanpinan. Inchinan imirin quëran Yosëri së'quërarin. Cato quëran chachin nani ninshitërin. To'niquë noyá achinpitërin. Canchisëro' achinpitërin. <sup>2</sup> A'na anquëninta' ni'nahuë. Chiníquën nanantaton, chiníquën nonin.

—¿Inta' noya noya ni'ton, nanan ya'huëtërin to'niro'sa' i'shotahuaton iso quirica oporinacaso'? ténin.

<sup>3</sup> Ya'ipiro'paquë yonisápirinahuë', co insonta' nanan ya'huëtërinhuë' oporinacaso'. Inápaquë ya'huëpisopitanta' co nanitopihuë'. Acoporonta' yonípirinahuë', co inso tëranta' nanan ya'huëtërinhuë' oporinatón nicacaso'. <sup>4</sup> Co insonta' nanitohuachinhue', chiníquën sëtato, na'nërahuë. Na'nëapirahuë', <sup>5</sup> a'na ansiano sha'huitërinco.

—Ama na'nëquësohuë'. Ni'quë'. Tapi shiin nani ya'ipi minsërin. Cota huëntonënguë nasitaton, chini chiníquën nanantërin. Inari nanitërin to'ni i'shotahuaton quirica oporinacaso', itërinco.

<sup>6</sup> Itohuachincora, Quisoso quënanahuë. Huancanachin Yosë huënsërinso ya'cariya huaniarin. Ansiano'sa', catapini ma'sharo'sa pochin nininsopita, inapitari tancapitopi. Quisoso chachin niponahuë', carniroa'hua nani tëpapiso pochin ya'norin. Canchisé pomohuan nisahuaton, canchisé ya'pirin ya'huëtërin. Chiníquën nanantaton, canchisé ispiritoro'sa' a'parin ya'ipiro'paquë nicainpoaso marë'. <sup>7</sup> Ina quëran ya'cariconahuaton, Yosë inchinan quëran quirica ma'parin. <sup>8</sup> Nani ma'pahuachina, ma'sharo'sa pochin nininsopita isonahuatona', Carniroa'hua chinotapi. Ansiano'santa' isonahuatona', ina

chinotapi. A'naya a'naya arparo'sa' sè'quëpi pi'niatona' chinotacaiso marè'. Sënaonta' a'naya a'naya quëpapi, oro quëran nininso'. Inaquë yonarin pochin pimóchin nininso' ya'huërin tomontacaso marè'. Tomontërinso pochin imarëhuasopita Yosë nontërehua'. "Nontohuatëhua', noya nataninpoa'," ta'tona', Yosë chinotapi. <sup>9</sup> Chinotatona', inahuara yonquinëna quëran nasha cantanën cantarapi.

"Noya noyanquën, Sinioro, ni'ton, nanan ya'huëtërinquën quirica ni'camaso'. To'ni i'shotohuatan, nani ma'sha anitotarancoi. Iráca tëparinënquën. Chiminaton, piyapi'sa' sopai quëran ocoiran Yosë imacaiso marè'. Napoaton quëmasáchin nanitëran ya'ipiya hua'anëntacaso'. Nisha nisha parti ya'huëpirinahuë', imarinënquën, Sinioro. Nisha nisha nananquë nonpisopita imarinënquën. Nisha nisha copirnoru hua'anëntërinso' naponaraihuë', natërinënquën.

<sup>10</sup> Hua'anëntëranquë aya'conan. Corto hua'ano'sa pochin acoran Yosëichin yonquicaiso marè'. A'na tahuëri no'paquë chachin ichihua'anëntëran huachi. Ma noyanquëncha quëmaso paya," itopi, cantatona'.

<sup>11</sup> Ina quëran hua'huayátërahuë anquëniro'sa' quënanahuë. Yosë shiranën, ma'sharo'sa pochin nininsopita, ansiano'sa' inapita tancapitopi. Hua'huayátërahuë ya'huëpi, co pichinahuanahuë'. Inapitanta' chiniquën naporapi:

<sup>12</sup> "¡Ma noyacha Carniroa'huaso paya! Piyapi'sa' oshanëna' inquitacaso marè' chiminin. Noya noya ni'ton, ya'ipi piyapi'sari chinochina'. Chini chiniquën nanantaton, ya'ipi nanitaparín. Nani ma'sha ya'huëtërin, ya'ipi hua'anëntërin. Ya'ipi nitotërin. Napoaton ya'ipinpoa' natëahua'. 'Yosparinquën, Sinioro,' itahua'," tosapi.

<sup>13</sup> Ina quëran ya'ipi Yosëri nininsopita napopianachin chinotapi, natanahuë. Inápaquë ya'huërinso'pita, isoro'paquë ya'huërinso'pita, chiminso'pita, marëquë ya'huërinso'pita, ya'ipiya Yosë chinotapi.

"Ma noyacha Tata Yosëso paya. Hua'anëntërinpoa' ni'ton, 'Yosparinquën' itahua'. Inasáchin natëahua'. Noya noya ni'ton, chinotahua'. Ya'ipiya nanitaparín. Carniroa'huanta' inapochachin chinotahua'. Ipora quëra huarë' ina natëahua'," tosapi.

<sup>14</sup> —Naporinchi paya. Tëhuëinchachin inasáchin natëahua', topi catapini ma'sharo'sa pochin nininsopitanta'. Ansiano'santa' isonahuatona', chinotapi.

## 6

### *To'ni i'shorinso'*

<sup>1</sup> Yosë nohuanton, hua'narëso pochin niantarahuë. Quirica so'nanpinan nininso' quënantarahuë, canchisë to'niquë achinpitërinso'. Naporo' Carniroa'huari ya'nan achinpitërinso' i'shotërin. I'shotohuachina, a'na ma'sha pochin nininso' chiniquën nonin, huira pochin natanahuë.

—¡Huëquë huachi! itërin.

<sup>2</sup> Itohuachina, cahuario ya'norin, ni'nahuë, huiríchin nininso'. Ina aipi quëmapi huënsëarin. Pë'chinan quëparin. Piyapi'sa' yaminsërin ni'ton, hua'an pochin yancotëtatón, pa'sarin minsëcaso marè'.

<sup>3</sup> Ina quëran a'na to'niquë achinpitërinso' i'shotantërin. I'shotantahuachina, a'na ma'sha pochin nininsoarinta' përantërin.

—¡Huëquë huachi! itërin. <sup>4</sup> Itohuachina, nisha cahuario ya'norin, quëhuashin nininso'. Ina aipi a'na quëmapi huënsëarin. Panca sahuëni sè'quëarin. Chiniquën nanan ya'huëtërin quira nicacaso marè'. Ina nohuanton, isoro'paquë na'a piyapi'sa' ni-ahuëatona', nitëparapi. Nisha nisha parti quira nisapi. Co huachi noya ya'huapihuë'.

<sup>5</sup> Ina quëran a'na to'niquë achinpitërinso' i'shotantërin. I'shotantahuachina, a'na ma'sha pochin nininsoari përantërin.

—¡Huëquë huachi! itohuachina, yara cahuario ya'norin, ni'nahuë. Quëmapi ina aipi huënsërinso' paransa së'quërin cosharo' pë'tënacaso marë'. <sup>6</sup> Naporos' catapini ma'sharo'sa' huancánachin, noninso' natanahuë:

—Ya'ipi cosharo' na'con pa'tarin. A'na tahuërira' i'huaquë huarë' sacatopirinahuë', a'na quiroichin trico pa'anapi. Inapochachin a'na cosharonta' pahuanarin. Sipataso' trico pochin niponahuë', co ina pochin pa'topirinhuë', inanta' pa'tarin. A'na tahuërira' i'huaquë huarë' sacatopirinahuë', cara quiroichin pa'anapi. Toma', huino, inapitanta' pahuanarin. Ni'cona chiniatama', tënin.

<sup>7</sup> Ina quëran a'na to'niquë achinpitërinso' i'shotantarin. Nani catapini i'shotërin. Ina i'shotohuachina, a'na ma'sha pochin nininsoari përantarin, ya'natomarinso'.

<sup>8</sup> —¡Huëquë huachi! itohuachina, a'na cahuarionta' ya'noantarin, sha'píchin nininso'. Quëmapi ina aipi huënsërinso', Chimirin itopi. Ina nohuanton, na'a piyapi'sa' chiminapi. Notohuaro' chiminatona', chimipiro'sa' ya'huëpiquë pa'sapi. A'naquën niahuëatona', nitëparapi. A'naquën tanari tëpaarin. Naporahuaton, chiníquën caniori masarin ni'ton, na'a piyapi'sa' chiminapi. Tanan ni'niró'sarinta' tëparapi. Inapoatona', patoma patoma pochin piyapi'sa' chiminapi. Cacharonquë un cuarto itopi.

<sup>9</sup> Ina quëran a'na to'niquë achinpitërinso' i'shotantarin. I'shotantahuachina, artaro Yosë chinotacaso marë' acorinso' inápaquë ni'nahuë. Inaanaquë na'a imapisopita chiminapisopita quënanahuë. Nanpipona', nóya imapi. Co të'huatonaraihuë', Yosë nanamën a'chinpi. Ina marë' tëpapi. <sup>10</sup> Tëpahuachinara, hua'yanëna' inápaquë ya'huëcontarahuatona', Yosë nontápi.

—Quëma Sinioro chini chiníquën nanantëran. Noyasáchin nicaton, no'tëquën nonan. ¿Onporo huarëta' oshahuano'sa' ana'intaran? Tëparinacoiso marë' no'tëquën ana'intacaso' ya'huërin, tosapí.

<sup>11</sup> Napotohuachinara, Yosëri itërin:

—Ninataco'. Oshaquëran ana'intarahuë. Co tahuëri naniyatërarinhuë'. A'napita imarinacosopita ipora huanta' pënëntapi. A'naquën tëpaantahuachina', isëquë chachin huëantapi anta'. Naporos' huarë' tëparinënuëmasopita no'tëquën ana'intarahuë, itërin. Itahuaton, huiríchin a'mocaiso' quëtërin. Noyápiachin cancantopi ni'ton, huiríchin a'motërin.

<sup>12</sup> Ina quëran a'na to'niquë achinpitërinso' i'shotaantarin. Inarë' nani saotaro' i'shorin. Inapotohuachina, panca ocohua pa'sarin. Pi'i tashiaton yaráchin nisarin. Yoquinta' co huachi a'pianinhuë'. Nincoan huë'saponahuë', quëhuashin huënai pochin nisarin. <sup>13</sup> Naporahuaton, tayloraro'santa' anotapi. Iquira nara nitërinso' canora niponahuë', panca ihuan pa'pachina, notohuaro shitatërinso pochin nisapi. <sup>14</sup> Pi'iro'tënta' capa nisarin. Quirica so'nanëso pochin co huachi ya'noarinhuë'. Naporahuaton, motopiro'sa', so'tono'sa', inapitanta' nacon nacontatona', itopa itopa nichihuincapi. <sup>15</sup> Ya'ipi piyapi'sa' pa'yanahuatona', ta'arapi. Copirnoros'sa', hua'ano'sa', sontaro hua'ano'sa', ma'huano'sa', chiníquëno'sa', inapita Yosë të'huatatona', ta'arapi. Motopi'pa' ta'arahuatona', na'pi naninos'saquë ya'conapi na'picaíso marë'. Patronos'sa' piyapinënpitarë chachin panca na'pianaros'saquë na'pirapi. <sup>16</sup> Ya'ipi piyapi'sa' të'huatatona', motopi nontapirinahuë':

—Panca na'piros'sa' notarintatona', ya'copiinacoi ama Yosë quënanaincoiso marëhuë'. Inápaquë hua'anëntarin. Carniroa'huanta' chiníquën no'huirincoi. <sup>17</sup> Nani ana'intacaso' tahuëri nanirin. Ana'intoahuachincoi, co insonta nanitarinhuë ina chinitacaso', tosapí.

## 7

### *Yosë marcanën acotopiso'*

<sup>1</sup> Ina quëran Yosë nohuanton, hua'narëso pochin niantarahuë. A'na tahuëri ma'sha onpocaso' a'notantarinco. Catapini anquëni ya'nopi, ni'nahuë. A'naso' pi'i pipirinso'

parti huaniarin. Ananta' pi'i ya'coninso' parti huaniarin. Huancanachionta' cato' ninotërapí. Inaquëpita Yosëri acorin isoro'pa' ana'intacaiso marë'. Oshaquëran Yosë nohuanton, ana'intapi. Pi'pisha pahuanarin ni'ton, anquëniro'sari ihuan ya'copirapi ama marëquë, isoro'paquë inaquëpita ma'sha onpocaiso marëhuë'. Ama nararo'sa tëranta' oyanacaiso marëhuë' ya'copirapi. <sup>2</sup> Ina quëran a'nanaya a'na anquëninta' ya'noantarin. Pi'i pipirinso' parti quëran huë'sahuaton, hua'na'huaya quësarin Tata Yosë marcanën acocaso marë'. Inaso' catapini anquëniro'sa' sha'huitërin:

<sup>3</sup> —Ama apiramiáchin ana'intocoso'huë'. Ninataco Yosë piyapinënpita catahuai. Co Yosë marcanën acochátëraraihuë'. Të'yainaquë acotëra'piapoi. Nani acotohuatoí, ya'ipiro'pa', marë, nararo'sa', inapita ana'intoco', itiirin.

<sup>4</sup> Ina quëran të'yainaquë Yosë marcanën acotëra'piapi a'napitari nohuitacaiso marë'. Notohuaro' acotë'yatëra'piapi. Pichirahuaton:

—Pasa catapini shonca catapini huaranca acotërai, tënin, natanahuë. Ya'ipi Israiro huëntono'saquë napotërin. <sup>5-8</sup> Shonca cato' huëntono'sa' ya'huërin, israiro'sa' itopiso'. Nisha nisha nininsopita ya'huëpi: Cota, Nopino, Caro, Asiri, Nipitari, Manasisi, Simion, Nihui, Isacaro, Saporono, Cosi, Mincamin, inanapo huëntono'sa' ya'huërin ni'ton, shonca cato huaranca, shonca cato huaranca acotë'yatëra'piapi.

### *Huiríchin a'mopiso'*

<sup>9</sup> Ina quëran hua'narëso pochin niantarahuë. Hua'huayatërahuë' piyapi'sa' Yosë'pa' quënanahuë. Co pichicasohuë'. Nisha nisha piyapi'sa' Yosë hua'anëntacaso' shiranën notënanquë huaniapi, nisha nisha nananquë nonpisopita. Nisha nisha parti quëran huëcatona', Carniroa'hua yamotatona', notërapí. Inapitaso' huiríchin a'mopi. Mërëmë pochin nininso' së'quërahuatona', Yosë chinotapi.

<sup>10</sup> “Tata Yosëíchin nicha'ërinpoa'. Inasáchin hua'anëntërinpoa'. Carniroa'hua anoyacantërinpoa'. ¡Ma noyacha inaso paya!” tosapi chiníquën nonatona'.

<sup>11</sup> Inaquë Yosë chachin hua'anëntacaso' shiranënuquë huënsëarin. Ansiano'sa', catapini ma'sharo'sa pochin nininsopita, inapitari tancapitopi. Ina tahuirinquë notohuaro' anquëniro'sa' huaniapi. Chinotopiso' natanahuatona', inapitanta' isonahuatona', Yosë chinotapi:

<sup>12</sup> “Tëhuëenchachin Siniro, piyapi'sa' nicha'ëran. ¡Ma noyanquëncha quëmaso paya! Ya'ipiya chinochinënuquën. Ya'ipi nitotëran. Chini chiníquën nanantaton, ya'ipiya nanitaparan ni'ton, ya'ipi natëinënuquën. ‘Yosparinquën,’ ichinënuquën. Na'con natëmiatarainquën. Co onporonta' a'poarainquënhuë'. Amen,” itapi.

<sup>13</sup> Ina quëran a'na ansiano nataninco.

—¿Ma piyapi'sata' isopita, huiríchin a'mopiso'? ¿Intohua quëranta' huëntapi? ¿Nitotëran ti? itërinco.

<sup>14</sup> —Co caso' nitotërahuë'. Quëma nitotëranso'. Sha'huitoco canta' nitochi, itohuatëra, sha'huitërinco:

—Isopitaso' chiníquën parisitaponaraihuë', co Yosë a'popihuë'. Carniroa'huari huëninën quëran anoyacancantërin ni'ton, huiríchin a'mopi.

<sup>15</sup> Napoaton Yosë ya'huërinquë huëntapi. Tahuërirë chachin tashirë chachin ina chinotapi. Yosëri ichiya'huëaton, ni'sarin. <sup>16</sup> Co huachi tanaponahuë', co yamoroponahuë'. Co pi'iri picahuachin, parisitaponahuë'. Noya ya'huëintarapi. <sup>17</sup> Ni'co'. Hua'anëni ohuicanënpita noya a'paiarin. Quëchitërahuaton, noya ii' a'notërin o'ocaiso marë'. Inapochachin Carniroa'huari imapisopita a'paiarin. Yosë'pa' noya noya nanpiapi. Yosëri chachin na'nëi' amitarin ni'ton, co huachi sëtaponahuë', itërinco.

<sup>1</sup> Ina quëran hua'narëso pochin niantarahuë. A'na tahuëri ma'sha onpocaso' a'notantarinco, ni'nahuë. Ipora huanta' Carniroa'hua quirica së'quëarin. Nani saota to'niquë achinpitërinso' i'shotërin. A'naíchin pahuanarin i'shocaso'. Naporo' a'naíchin nininso' i'shotarin. I'shotohuachina, ya'ipiya copica topi. Miria ora pochin co manta' nonpihuë'. <sup>2</sup> Ina quëran canchisë anquëniro'sa' quënanahuë. Yosë notënanquë huanirapi. Inaquë huanihuachinara, a'naya a'naya tronpita quëtopi pihuicaíso marë'. <sup>3-4</sup> Co'huara pihuiyatërasoihuë', a'na anquëninta' huëcaton, Yosë chinotopiquë artaroa'huaya notënanquë huaniconin. A'pëtinan oro quëran nininso' së'quërin. Inaquë na'a yonarin pochin pimóchin nininso' acorin panca tomontacaso marë'. Yosë ya'huërinquë chachin tomontarin. Tomontërinso pochin Yosë imapisopitanta' ina nontápi. “Ma noyanquëncha quëmaso paya. Nani tahuëri catahuacoi, Sinioro,” ito-huachinara, noya natanin. <sup>5</sup> Ina quëran anquëni Yosë artaronënuquë ya'caritahuaton, na'a pënaya' manin. A'pëtinanquë acorahuaton, isoro'paquë tē'yatërin. Tē'yatohuachina, a'naroáchin huira pochin natanahuë. Chiníquën tēnëntërin. O'corinta' huënsha huënsha'tarin. Naporahuaton, panca ocohua pa'nin. (Nani huachi Yosëri ana'intarin, tēnahuë.)

### *Tronpita pihui piso'*

<sup>6</sup> Naporo' canchisë anquëniro'sa' tronpita yapihuirapi. Co napopianachin pihuiapihuë'. A'naya a'naya pihuirapi.

<sup>7</sup> Ya'nan pihuirinso' irinpachina, Yosë nohuanton, ocai', pën, inapita inápa quëran anotarín. Huënairë chachin anotarín. Pancana huiquitarin. Patoma pochin huiquitarin. [Cacharonquë un tercero, topiso'.] Nararo'sa', panpatëro' inapitanta napochachin huiquitarin.

<sup>8</sup> Ina quëran a'na anquëninta' tronpita pihuiantarin. Pihuiantahuachina, panca motopi pochin nininso' ni'nahuë. Pën pochin orotërimarin. Yosë nohuanton, marëquë anoitërin. Inaquë anotohuachina, patoma pochin marë huënai taranin. <sup>9</sup> Patoma pochin ma'sharo'sa' inaquë ya'huërinso' chiminpi huachi. Panca nancharo'santa' patoma pochin ta'huantopi.

<sup>10</sup> Ina quëran a'na anquëninta' pihuiantahuachina, panca tayora anotarín, panca orotërinso'. Anotohuachina, Yosë nohuanton, patoma pochin iiro'sa' tapiarin. <sup>11</sup> Ina tayoraso' Main itopi. Tëquëin, i'shaa'huaro'sa', inapita patoma pochin main nisarín. Máin ni'ton, notohuaro' piyapi'sa' ina o'otona', chiminapi.

<sup>12</sup> Nani cara anquëni pihuirin. A'nanta' pihuiantahuachina, Yosë nohuanton, patoma pochin pi'i tapiarin. Yoqui, tayoraro'sa', inapitanta' patoma pochin tapiapi. Napoaton tahuëri nipachina, co huachi pi'i noya a'pianinhuë'. Tashinta' yoqui, tayoraro'sa', inapita co huachi noya a'pianpihuë'.

<sup>13</sup> Ina quëran panca onian quënanahuë. Inápaquë a'ninquëchin yanponarin. Piyapi pochin noninso' natanahuë.

—¡Ma'huantacha nisapi paya! Yosë a'popi ni'ton, piyapi'sa' chiníquën parisitapona'. A'napita anquëniro'sa' pihuiantahuachina, isoro'paquë ya'huëpisopita aquë aquëtë' parisitapona', tēnin.

## 9

<sup>1</sup> Ina piquëran a'na anquëninta' pihuiantahuachina, tayora anotërinso pochin a'nanta' o'marin. Yosë nohuanton, chiníquën nanan ya'huëtërin sopairo'sa' oncorapirinso' parti i'soatacaso marë'. Nanin acoporo' pa'ninso' i'soatarin. <sup>2</sup> I'soatohuachina, acopo quëran conai' pipiarin. Yaráchin tomontarin. Panca pën quëran tomontërinso pochin pipiton, pi'i ya'copiarin. Ya'ipi parti tashiarin. <sup>3</sup> Naporahuaton, conai quëran notohuaro' sopairo'sa' pipiapi. Panca sëquërë pochin ya'norahuatona', pipiapi. Pa'pi tē'huatoro'. Sëquërë pochin niponaraihuë', yonpinca pochin huitapi. <sup>4</sup> “Ama panpatëro', nara mono', nitërinso'



inapita pë'yacosohuë'. Piyapi'sa' co Yosë marcanën të'yainquë ya'huëtohuachinarahuë', inapita aparisitoco', itërin. <sup>5</sup> Co tëpaponaraihuë', a'natërápo yoqui pochin aparisitapi. Yonpincari huininso pochin niponahuë', co sanoaponahuë'. Pa'pi iquin natanaponaraihuë', co chiminaponahuë'. <sup>6</sup> Na'con parisitatoná: "Chimiin nipachin," tosapirinahuë', co chiminaponahuë'. Chiminacaiso' nohuantopirinahuë', co nanitapihuë'.

<sup>7</sup> Panca sëquërë pochin ya'notona', chiníquën pa'sapi. Cahuarioro'sa' quira nicacaiso marë' tapapiso pochin pa'sapi. Yancotë pochin oro quëran nininso' yancopi. Naporahuaton, piyapi pochin ni'topi. <sup>8</sup> Aihuan ni'ton, sanapi pochin aintapi. Pa'pini' pochin natëtopi. <sup>9</sup> Sha'huëtëonta' tachiton. Hua'na pochin ni'ton, co ohuanchináchinhuë'. Pa'pachinara, anpiantëna quëran chiníquën tënëntërapí. Quira toronano'sa' cahuarioro'sari ohuararinso pochin tënëntapi. <sup>10</sup> Naporahuaton, yonpinca pochin hui'notopi. Iquin huitatona', a'natërápo yoqui pochin aparisitapi. <sup>11</sup> Hua'anën ya'huëtërin anta'. Inari camairinso', sopairo'sa' oncorapirinso' partí quëran huë'nin. Cotio nananquë Apatono itopiso'. Crico nananquë Aporiono itopi. Tiquitona'pi tapon naporin.

<sup>12</sup> Na'con parisitacaiso' ninoton, nani a'notërinco. Ina ni'pirahuë', na'con na'con parisitacaso' ya'huapon. Catoro' aparisitacaso' pahuanarin nica'huaso'.

<sup>13</sup> Yosë nohuanton, nani a'natërápo anquëniro'sa' tronpita pihuipi co noyahuë' nipsisopita ana'intacaiso marë'. Ina quëran a'na anquëninta' pihuiantahuachina, inápaquë nontërinso' natanahuë. Artaroa'huaya pomonënpita huáncana quëran nontaton, pihuitona'pi itapon: <sup>14</sup> "Catapini anquëniro'sa' i'quiritëquë pa'ina' piyapi'sa' aparisitacaiso marë'. Panca i' yonsanquë nani ninarapiso', Iyopiratisii' itopiquë," itërin.

<sup>15</sup> Itohuachina, anquëniro'sa' a'parin piyapi'sa' ana'intacaiso marë'. Iráca inaquë acopirinhue'. Nani ora nanirin ni'ton, a'parin huachi patoma pochin piyapi'sa' tëpacaiso marë'. <sup>16</sup> Ina quëran hua'huayátërahuë sontaro'sa' huë'sapi, ni'nahuë. Cahuarioro'sa aipi huënsëriapi. "Cato pasa michon huë'sapi," ténin, natanahuë.

<sup>17</sup> Hua'narëso pochin a'ninquëchin quënanahuë. A'na tahuëri ma'sha onpocaso' quënantarahuë. Hua'na coton sontaro'sa' a'mopiso pochin a'mopi. Pënsha pochin huënaráchin nipi. A'naquë caninchin. A'nanta' sha'píchin. Cahuarioro'santa' nisha ya'nopi. Pa'pini' pochin mototopi. Nanamën quëran pën, conai', sha'pi mo'shi', inapita pipiapi. <sup>18</sup> Cahuarioro'sa nanamëna quëran inapita pipirahuatona', patoma pochin piyapi'sa' tëparapi. Notohuaro' chiminapi. <sup>19</sup> Nanamëna quëran tëparapi. Huinamëna quëraonta' ya'huan pochin quëtëtatona', tëparapi.

<sup>20</sup> Na'a piyapi'sa' chiminpirinahuë', co naporito tëranta' a'napitaso' yonquiapihuë'. Ni'saponaraihuë', inachachin co noyahuë' cancantapi. Aquëtë chachin sopairo'sa' chinotapi. Nisha nisha mamanshi moshapi. Oro quëran, prata quëran, hua'na quëran, na'pi quëran, nara quëran, ina quëranpita nipiso'. Co inapitaso' quënantopihuë', co natantopihuë', co iratopihuë'. Co nanpipirinahuë', mosharapi. <sup>21</sup> Pa'pi co noyahuë' cancantatona', tëpatapi, pënotapi, monshihuanapi, ma'sha ihuatapi. Yosëri ana'intërinso' ni'sáponaraihuë', co naporito tëranta' nohuantapihuë' oshanëna' a'pocaiso'.

## 10

### *Quirica'huaya oporininsó'*

<sup>1</sup> Ina quëran hua'narëso pochin a'na anquëninta' niantarahuë, chiníquën nanantërinso'. Chitoro' huancana inápa quëran o'mararin. Motën yahua'tani tahuitërin. Ya'pirin pi'i pochin a'pinin. Tonainta' pën pochin ya'noarin. <sup>2</sup> Quirica'huaya së'quërin. So'nanpinan nipirinhue', nani oporininsó' së'quërin. O'marahuatón, inchinan nantën quëran marëquë i'naitarin. Ahuënan nantën quëran isoro'paquë i'narin. Panca masho ni'ton, naporin. <sup>3</sup> Chiníquën nanantaton, chiníquën nonsarin. Pa'pini' përarinso pochin natanahuë. Përapachina, inápa quëran canchisë huira pochin nininsopitari a'panipi. <sup>4</sup> Nonpachinara, natanato quiricaquë yaninshitopirahuë', inápa quëran

a'na sha'huitërinco: “Ama naporinso' ninshitëquësohuë'. Co a'napita sha'huitacaso' ya'huërinhuë',” itërinco.

<sup>5</sup> Naporon' panca anquëni marëquë, no'paquë inaquëpita i'narinso' inchinan tanpaquën anquiontarin. <sup>6</sup> “Yosë ni'sárinco ni'ton, co nonpinahuë'. Inaso' iráca quëran huarë' ya'huaton, co onporonta' ayaponhuë'. Isoro'pa', marë, pi'iro'të', ya'ipi ya'huërinso'pita inari ninin. Tëhuëncachin co huachi hua'qui quëranhuë' ana'intomiatarin. <sup>7</sup> A'naíchin anquëni pahuanarin tronpita pihuicaso'. Ina pihuiantahuachina, oshahuano'sa' ana'intahuaton, ya'ipiya Yosëri hua'anëntarin. Piyapi'sa' inahuara co nitotopihuë'. Iráca quëran huarë' Yosë nohuanton, pënëntona'piro'sa' ninopirinahuë', ipora huarë' nanirin. Inimiconënpita ana'intahuaton, hua'anëntarin,” tënin panca anquëni.

<sup>8</sup> Ipora huanta' a'na nantën quëran marëquë i'naitarin. A'na quëraonta' no'paquë i'narin. Ina quëran inápa quëran nontërinco' itantarinco:

—Paaton, quirica'huaya së'quërinso' ma'paquë', <sup>9</sup> itohuachincora, pa'sahuato,

—Quirica'huaya quëtoco, itërahuë'.

—Noyahua'. Macaton, ca'quë'. Ninoi pochin cashin ca'saran. Napoaponahuë', nani ni'ipatan, main nizarin, itërinco.

<sup>10</sup> Quirica'huaya masahuato, ca'nahuë. Ninoi pochin cashin ca'pirahuë'. Nani ni'ipatëra, main natanahuë. <sup>11</sup> Ina quëran sha'huitërinaco:

—Na'a piyapi'sa' pënëntaquë'. A'na tahuëri ma'sona onpocaiso' Yosë anitotarinquën. Nisha nisha piyapi'sa', nisha nisha nananquë nonpisopita, copirnoros'a', inapita ma'sona onpocaiso' Yosë ninoton, anitotarinquën ninshitamaso marë', itërinaco.

## 11

### *Catoya'pi Yosëri a'parinso'*

<sup>1</sup> Ina quëran mitro pochin nininso' quëtërinaco a'nica'huaso marë'.

—Yosë chinotopiso pëi' a'niconquë'. Artaronta' a'niquë'. Nani a'nihuatan, piyapi'santa' Yosë chinotopisopita onposona ya'huëpiso' nitotacaso marë' pichiquë'.

<sup>2</sup> I'iratëso nipirinhuë', ama a'niquësohuë'. Inaquë nisha piyapi'sa' ya'conapi. Co Yosë imaponaraihuë', inaquë ya'conahuatona', tapirapi. Yosë ninanonëonta' tapirapi. Cara pi'ipi miria pochin napotapi. <sup>3</sup> Naporon' tahuëri'sa' cato' quëmapi a'pararahuë pënëntacaiso marë'. Yaa'pahuato, chiniquën nanan quëtarahuë no'tëquën sha'huicaiso marë'. Piyapi'sa' na'con oshahuanpi ni'ton, cato' quëmapi sëtapi. Sëtatona' sa'catën nininso' a'mosapi piyapi'sa' oshanëna' ayonquicaiso marë'. Cara pi'ipi miria pënëntapi, itërinco Yosë.

<sup>4</sup> Catoya'piso' nóya pënëntapona', Yosëri chachin a'parinso'. Panca nanparino'sa' orotërinso pochin nicatona', Yosë nanamën anitotapona'. Oripo nara pochin nipi anta', Yosë notënanquë ya'huërinso'. <sup>5</sup> Yosë nohuanton, sacai' nininsopita nanitapapi. A'napitari yatëpahuachina', nanamëna quëran pën pipiarin. Pipihuachina, yatëpapisopita huëyarapi. Huëyarahuatona', chiminapi. Ina pochin Yosëri catahuarin ni'ton, minsëapi. <sup>6</sup> Iráca pënëntona'piro'sa' nani ma'sha nipi piyapi'sa' ayonquicaiso marë'. Inapochachin catoya'pi Yosëri a'parinso', nani ma'sha nanitapaapi. Yosë nontahuachina', co o'nanaponhuë'. Inapotatona', pënëntápona'. Tëquëionta' nontahuachina', huënai' taranapon. Ina quëran Yosë nohuanton, nisha nisha canioro'sa' acorapi Yosë yonquicaiso marë'. <sup>7</sup> Nani ya'ipi noyá pënëntohuachina', co huachi aquëtë' pënëntacaso' ya'huaponhuë'. Naporon' ma'sha pa'pi të'huatoro nininso' ya'noarin. Acoporon' quëran huë'sarin. Huë'sahuaton, cato ya'pi ahüëquiarin. Ina quëran minsërahuaton, tëpararin. <sup>8</sup> Quirosarinquë chachin tëpararin. Inaquë iráca Quisosonta' tëpapi. Inaquë ya'huëpisopita pa'pi co noyahuë' cancantopi. Sotomaquë, Iquipitoquë inaquëpita ya'huëpisopita pochin cancantatona', oshahuanacaisoáchin yonquipi. Catoya'pi tëpahuachina', cachiquë të'yatapi. Co pa'pitapihuë'. <sup>9</sup> Cara tahuëri miria pochin nisha

nisha piyapi'sa', nisha nisha nananquë nonpisopita inapitari ni'sapi. Nicaponaraihuë', co nohuantapihuë' pa'pitacaiso'. <sup>10</sup> Tëpapi ni'ton, capa cancantatona', pita nisapi. Ma'shanënanta' topinan a'naya a'naya niquëtapi. "Hua'qui' pënënatonpoa', apininpoa' nipirinhuë', iporaso' nani chiminpi," ta'tona', capa cancantapi. <sup>11</sup> Cara tahuëri miria napoápirinahuë', a'nanaya Yosë nohuanton, nanopiantarahuatona', huanintarapi. Piyapi'sari ni'sahuatona', pa'pi të'huatapi. <sup>12</sup> Naporo' inápa quëran nontërinso' natanapi.

—¡Isëquë huëntaco huachi! itarin. Napotohuachina, inimiconënpitari nicasoi', catoya'piso' inápaquë paantapi. Chitororë chachin paantapi. <sup>13</sup> Naporo chachin panca ocohua pa'sarin. Pa'pachina, notohuaro' pëiro'sa' ohuatarin. Canchisë huaranca piyapi'sa' chiminapi huachi. A'napitaso' pa'pi të'huatapi. "Yosë nohuanton, naporin. ¡Ma'pitacha nanitaparín paya!" tosapi.

<sup>14</sup> Nani catoro' parisitapiso' ni'nahuë. Shiarahuaton, a'nanta' a'notantarínco. Hua'narëso pochín ni'nahuëso' sha'huichinquëma'.

### *Ya'natontarinso' pihuirinso'*

<sup>15</sup> Ina quëran ya'natontarinso' anquëninta', pihuiantarín. Pihuihuachina, inápaquë chiníquën nonsapi, natanahuë.

"Íráca quëra huarë' na'a copirnoros'a' ya'huëpirinahuë', iporaso' Yosëri ya'ipiya hua'anëntarin. Quisocristorë chachin hua'anëntomiatarin. Co onporonta' pipiapihuë'," tosapi.

<sup>16-17</sup> Cato shonca catapini ansiano'santa' Yosë'pa' ya'huëpiso' isonahuatona', Yosë chinotapi:

"Yosparinquën, Siniro. Quëmasáchin ya'ipi nanitaparan. Íráca quëran huarë' ya'huaton, ipora huanta' nanopiaran. Chiní chiníquën nanantaton, ya'ipi hua'anëntaran.

<sup>18</sup> Nisha nisha piyapi'sa' no'huirinënquënsopita ana'intaran. Ya'ipi chiminpisopitanta' no'tëquën ana'intaran. Imarinënquënsopitaso nipirinhuë', acanaaran. Inso tëranta' natëhuachinquën, inápaquë quëpaaran. Hua'ano'sa', topinan piyapi'sa', inapita imapachinënquën, acanaaran. A'napitaso nipirinhuë' piyapi'sa' aparisitatonatëpapi ni'ton, chiníquën ana'intaran," itapi.

<sup>19</sup> Ina quëran hua'narëso pochín nicasoco, Yosë pëinën inápaquë ya'huërinso' ni'soatërin ni'nahuë. Íráca chinotopiso pëi acohuana Yosë caposonën ya'huërin. Ina pochín nininso' inápaquë ni'nahuë. Nicasoco, o'coritërin, tënëntërin, huiratërin, ocohua pa'nin, ocal' anotërin, naporin. Yosë chiníquën nanantërin ni'ton, naporin.

## 12

### *Panca ya'huan pochín ya'norinso'*

<sup>1</sup> Ina quëran Yosë nohuanton, hua'narëso pochín niantarahué ayonquiinpoaso marë'. A'na sanapi inápaquë quënanahuë. A'morinso' huënaráchin huënaráchin. Pi'i pochín a'pinin. Nantëanaquë yoqui ya'huërin. Shonca cato' tayloraro'sari yancotë pochín motën tahuitërin. <sup>2</sup> Inaso' cayoron. Nani yahuaiarin ni'ton, chiníquën iquitaton, parisitárin. <sup>3</sup> Ina quëran a'na ma'sha inápaquë ya'norin, niantarahué. Panca ya'huan pochín niponahuë', ina quëran panca panca ninin. Quëhuashin nisahuaton, canchisë motën ya'huëtërin, shonca pomohuanin. A'naya a'naya motënuquë hua'an pochín yancotë yancorin. <sup>4</sup> Huinamën quëran inápaquë huihuicontahuachina, tayloraro'sa' a'tëntontarahuatón, isoro'paquë të'yatimarin. Patoma pochín të'yatimarin. Ina quëran hua'narëso pochín quënantarahué. Panca ya'huan pochín nininso' pa'nin. Sanapi notënanquë huaniarin. "Huaihuachin, hua'huin matahuato, ca'sarahué," ta'ton, ninararin. <sup>5</sup> Ninaso', huairin. Quëmapia'huaya huairin. Inaso' chini chiníquën nanantaton, a'na tahuëri ya'ipi piyapi'sa' hua'anëntapon. No'tëquën ana'intapon ni'ton, ya'huani yatëparin. Ina marë' ninarápirinhuë'. Nani nasitohuachina, Yosëri nicha'ërin.

Ya'huërinquë chachin quëpantarin ichihua'anëntacaso marë'. <sup>6</sup> A'shinso nipirinhüë', co piyapi ya'huërinquëhuë' ta'arin. Inaquë Yosëri nani tapatërin ya'huëcaso marë'. Cara pi'ipi miria pochin inaquë ya'huarin ni'ton, cosharo' quëtapi.

<sup>7</sup> Ina quëran hua'narëso pochin niantarahuë. Inápaquë quira nisapi. Anquëni hua'an Miquiri itopiso' anquëninënpita camairin panca ya'huan pochin nininso' minsëcaiso marë'. Inanta' anquëniro'sa' camairinsopitarë chachin ahuëtopirinhüë', <sup>8</sup> co nani-topihüë' minsëcaiso'. Miquiri anquëninënpitari minsërahuatona', isoro'paquë a'paimapi. <sup>9</sup> Inapotatona', panca ya'huan pochin nininso' inápa quëran tē'yatopi. Inaso' sopai chachin, Satanasë itopiso'. Ya'ipi piyapi'sa' yanonpintërin. Ina minsërahuatona', anquëninënpitarë chachin isoro'paquë tē'yatopi.

<sup>10</sup> Ina quëran inápaquë chiníquën noninso' natanahuë.

“Tëhuëenchachin sopai yaminsëpirinpoahuë', Yosë nicha'ërinpoa'. Quisocristorë chachin hua'anëntarinpoa'. Sopairi Yosë nontaton, na'con sha'huirapirinpoa'. ‘Oshahuanpi,’ itëra'piarinpoa'. Tahuërirë chachin tashirë chachin sha'huirapiápirinpoahuë', nani Yosëri minsërin.

<sup>11</sup> Carniroa'hua chiminaton, huënainën quëran anoyacancantërinpoa' ni'ton, sopai minsërehua'. Nanamën sha'huitatëhua', minsërehua'. Yatëpapirinënpoahuënta', co a'porëhuahuë', tosapi.

<sup>12</sup> Napoaton inápaquë ya'huëpisopita noya cancanchina'. Ya'ipiro'paquë, marëquë, inaquëpita ya'huëpisopitaso nipirinhüë', parisitapi. ¡Ma'huantacha nisapi paya! Sopai pa'sárin minsëcaso marë'. ‘Co hua'quiya quëranhuë' Yosë ana'intarinco,’ ta'ton, chiníquën no'huitërin. No'huitaton, piyapi'sa' yaminsërin.”

<sup>13</sup> Ina quëran Yosë nohuanton, hua'narëso pochin niantarahuë. Ya'huan pochin nininso' nani isoro'paquë tē'yatopi. Tē'yatohuachina, sanapi huairinso' aparisitapirinhüë', <sup>14</sup> Yosëri catahuarin cha'ëcaso marë'. Panca onian pochin anpiantëhuanaton, ta'arin. Co piyapi ya'huërinquëhuë' pa'sahuaton, cara pi'ipi miria pochin inaquë na'piarin. Yosë nohuanton, ma'sha ya'huërin capacaso'. <sup>15</sup> Chiníquën no'huiton, ya'huani yamapirinhüë'. Nanamën quëran panca ii' pipirin. Tëquëin pochin pipirin sanapi quëpacaso marë'.

<sup>16</sup> Ii' tē'yatopirinhüë', no'pa' huëncharohuachina, ya'ipiya yanquirin. Co chimii'tërinhuë'.

<sup>17</sup> Napoaton sopairi chiníquën no'huirin. No'huiton, pa'nin a'napita hua'huinpita ahuëapon. Yosë natëpisopita tēpacaso marë' pa'nin. Quisoso imasapi ni'ton, aparisitarin.

<sup>18</sup> Ina yonquiaton, marë yonsanquë huaniarin.

## 13

### *Ma'sha marë quëran pipirinso'*

<sup>1</sup> Ina quëran hua'narëso pochin niantarahuë. A'na ma'sha pa'pi tē'huatoro' nininso' marë quëran pipiarin. Canchisë motohuan nisahuaton, shonca pomonën ya'huëtërin. A'naya a'naya pomonënquë yancotë' ya'huëtërin. Hua'an pochin chiníquën nanantërin ni'ton, naporin. Motënaquë nininënpita nani ninshitërin, Yosë pinorinso'. “Yosë quëran chini chiníquën nanantërahuë,” ta'ton, ninshitërin. <sup>2</sup> Yarani pochin niponahuë', tocani pochin nantëtërin. Nanamënso' pa'pini pochin nanantërin. Panca ya'huani chachin chiníquën nanan quëtapon ni'ton, chiníquën nanantaton, copirno ya'conapon. <sup>3</sup> A'na motën ahuëtohuachina', chiminatë pochin niponahuë, noyatantarin. Noyatohuachin, ya'ipi piyapi'sa' pa'yanapi. Pa'yatatona', imasapi. <sup>4</sup> Panca ya'huan chinotatona', acorinsonta' chinotapi. Notohuaro' piyapi'sa' ina yonquiatona', natëapi: “Ma noyacha inaso paya. Chini chiníquën nanantarin. ¿Incarita' nanitërin ina minsëcaso?” tosapi.

<sup>5</sup> Sopai nohuanton, ma'sha marë quëran pipirinso' na'con Yosë pinosarin. “Yosë quëran chini chiníquën nanantërahuë. Co ina chinotacaso' ya'huërinhuë',” tosarín. Sopairi catahuarin ni'ton, copirno ya'conarin. Chini chiníquën nanantarin ni'ton, ya'ipi copirnoros'a' camaiarin. Cara pi'ipi miria ya'ipiya hua'anëntarin. <sup>6</sup> Na'con



Yosë pinosarin. “Caso' Yosëco,” toconapon. Yosë ya'huërinsona' nocanarin. Inaquë ya'huërinsoyapita' pinosarin. <sup>7</sup> Yosë imapisopita co quë'yarinhüë'. Sopai nohuan-ton, aparisitarin. Quira nisahuaton, canatarin. Notohuaro' piyapi'sa' nisha nisha parti ya'huëpisopita hua'anëntarin. Nisha nisha nananquë nonpisopita hua'anëntarin. <sup>8</sup> Hua'huayatërahüë' piyapi'sari natëapi. Carniroa'hua imapisopitaichin co ina chinotapihuë'. Inaso' a'na quirica ya'huëtërin. Nanpirin quirica itopiso'. Inaquë nininënpita nani ninshitërin. Isoro'pa' ninin quëran huarë' imapisopita ninoton, inaquë ninshitërin. “Canpoa marë' Carniroa'hua chiminin,” ta'tona', ina imasapi. A'napitaso nipirinhüë' co nanpirin quiricaquë nininënpita ya'huërinhuë' ni'ton, ma'sha marë quëran pipirinsó' chinotapi.

<sup>9</sup> Huëratëhuanpatama', noya natanatoma', yonquico'.

<sup>10</sup> “Mapachinënuëma', parisitacaso' ya'huërin. Sahuëniquë yatëpahuachinënuëma', ahuantacaso' ya'huërin. Ina yonquiatoma', chiniquën cancantoco'. ‘Yosë catahuarinpoa', ta'toma', imamiatoco'.”

### *Ma'sha no'pa quëran pipirinsó'*

<sup>11</sup> Ina quëran hua'narëso pochin niantarahüë. A'na ma'shanta' no'pa quëran pipiarinsó' ni'nahuë. Carniroa'hua pochin cato' pomona'huaya ya'huëtërin. Noya ya'noaponahuë', panca ya'huan pochin chiniquën nonsarin. <sup>12</sup> Inanta' chiniquën nanantapon. Chiniquën nanantaton, ya'ipi piyapi'sa' camaiarin ma'sha marë quëran pipirinsó' chinotacaiso marë'. Inaso' motën ahuëtohuachinara, chiminatë pochin niponahuë', noyatantarinsó' ni'ton, piyapi'sari chinotapi. <sup>13</sup> Ma'sha no'pa quëran pipirinsonta' nani ma'sha nanitaparín piyapi'sa' nonpintacaso marë'. Ina nohuan-ton, pën inápa quëran anotarín. Piyapi'sa' ni'tërantapaquë napoarin. <sup>14</sup> Nisha nisha acoarin, sacai' nininsó'. Ma'sha pa'pi të'huatoro' nininsó' ni'tonënuë naporin. Piyapi'sari ni'pachina': “Tëhuëchachin inaso' Yosë,” tosapi. Notohuaro' piyapi'sa' nonpintarin. Ina quëran itapon: “Panca mamanshi niahua'. Sahuëniquë ahuëatona' shitëpapirinhüë', noyataantarinsó' nonanatëhua' chinotahua',” itohuachina', nisapi. <sup>15</sup> Ina quëran aquëtë chachin piyapi'sa' nonpintarin. Ina nohuan-ton, mamanshi nanpirinsó' pochin ya'noarin. Noninsó' pochin natanapi. “Insosona co moshahuachincohuë' tēpaco',” tosarín. <sup>16</sup> Ina quëran camaiantarín. “Marca niacotacaso' ya'huërin. Të'yamaquëhuë napon, inchinan imiramaquëhuë napon niacotoco'. Hua'ano'sa', topinan piyapi'sa', ma'huano'sa', sa'ahuaro'sa', patrono'sa' piyapinënpitarë chachin, ya'ipiya niacotacaso' ya'huërin. Co a'naya tēranta' pahuantacaso' ya'huërinhuë',” tosarín. <sup>17</sup> Co marca niacotohuachinhüë', co huachi nanitapihuë' ma'sha pa'anatona' canacaiso'. Co pa'anacaiso tēranta' nanitapihuë'. Ma'sha marë quëran pipirinsó' marcanën niacotëra'piapona'. A'naquën nininën chachin niacotapi. A'naquënso nipirinhüë' nomironën niacotapi. <sup>18</sup> No'tëquën yonquiamaquë huarë' nomironën nitotarama'. “Piyapi niponahuë', inasáchin natërëhua',” ta'tona', saota pasa saota shonca saota niacotapi.

## 14

### *Pasa catapini shonca catapini huaranca cantapiso'*

<sup>1</sup> Ina quëran hua'narëso pochin niantahuato, Carniroa'hua quënantarahüë. Sion motopiquë huaniarin. Inarë' pasa catapini shonca catapini huaranca piyapi'sa' ya'huapi, ni'nahuë. Imapi ni'ton, ina nininën niacotë'yatopi. Tata Yosë nininëonta' niacotopi. <sup>2</sup> Ina quëran inápaquë chiniquën tēnëntërinso' natanahuë. Panca so'pora pochin tēnëntarin. Chiniquën huira pochin natanpirahuë', arparo'sa' pi'niatona', naporapi. <sup>3</sup> Nasha cantanën inápaquë cantarapi. Yosë notēnanquë cantarapi. Ansiano'sa', catapini ma'sharo'sa' pochin nininsopita, inapitanta' natanapi. Pasa catapini shonca catapini huaranca imapisopita cantapiso'. Isoro'paquë ya'huapona', Quisosori nicha'ërin. Oshanëna



marë' chiminaton, anoyacancantërin ni'ton, inapitaráchin nanitopi ina cantacaiso'.  
<sup>4</sup> Noyápiachin cancantapi. Co pi'pisha tëranta' monshihuana'pi pochin cancantopi-huë'. Yosëíchin yonquiapi. Insëquësona Carniroa'hua pa'pachin, imasapi. Isoro'paquë ya'huëpirinahuë', nani Yosëri nicha'ërin. Ya'nan cayarinsó macatë' Yosë quëtërëso pochin nicatona', inasáchin chinotapi. Nani tahuëri Carniroa'huanta' chinotapi. <sup>5</sup> Co pi'pisha tëranta' nonpinpihuë'. Noyápiachin cancantapi.

### *Cara anquëniro'sa' pa'sapiso'*

<sup>6</sup> Ina quëran a'na anquëninta' quënanahuë. Inápaquë yanponarin noya nanan sha'huicaso marë'. Nisha nisha piyapi'sa', nisha nisha nananquë nonpisopita, ya'ipiya sha'huitarin.

<sup>7</sup> —Yosë të'huatatora', natëco'. Ana'intacaso' tahuëri nani naniriarin ni'ton, inasáchin imaco'. Ya'ipi isoro'pa', inápaquë ya'huërinso', marë, iiro'sa', ya'ipiya ninin ni'ton, chinotoco', itarin anquëniro chiníquën nontaton.

<sup>8</sup> Ina quëran a'na anquëninta' paaton, sha'huirarin:

—Íraca na'a oshahuano'sa' Papironiaquë ya'huëpi. Panca ninano' nipirinhüë', Yosë nohuanton, ta'huantopi. Inapita pochin cancantopisopita ya'huantapirinhüë', Yosëri ana'intarin. Pa'pi co noyahuë' yonquiatona', na'a piyapi'sa' anishacancantopi ni'ton, ta'huantapi. Noyá ta'huantapi, tënin.

<sup>9</sup> Ina piquëran a'na anquëninta' paaton, chiníquën nonsarin.

—Ama ma'sha pa'pi të'huatoro' nininso' natëcosohüë'. Ama mamanshinën moshacosohüë'. Të'yamaquë marcanën yaacotarinquëma' hua'anëntinquëmaso marë'. Ama natëcosohüë'. Ina chinotohuatama', Yosë ana'intarinquëma'. <sup>10</sup> Chiníquën no'huitëntinquëma', main huino o'shitërëso pochin ana'intarinquëma'. Parisitopiquë a'pahuachinquëma', pënuquë parisitarama'. Carniroa'hua, anquëniro'sa' inapita ni'tërantapaquë no'tëquën ana'intarinquëma'. <sup>11</sup> Co onporonta' pën tacopiaponhuë'. Inaquë conainta' tomontápon. Parisitápona. Co sanoarinhuë'. Insopitasona ma'sha pa'pi të'huatoro' nininso' natëtona', mamanshinën moshahuachina', tahuërirë chachin, tashirë chachin chiníquën parisitápona'. Co marcanën niacotacaso' ya'huërinhuë', tënin. <sup>12</sup> Ina yonquiatoma', chiníquën cancantoco'. Yosë nanamën natëtoma', Quisocristo imamiatoco'. Aparisitopirinhëntinquëmahuë', ama a'pocosohüë'.

<sup>13</sup> Ina quëran inápa quëran noninso' natanahuë:

—Apira sha'huichinquën ninshitéquë': Insosona Sinioro imarinso marë' chimin-pachina, noya cancanchina', tënin. Ina quëran Ispirito Santo tapon:

—Tëhuëchachin Yosë'pa' pa'pachina', chinotapi. Yosë marë' sacatopi ni'ton, inápaquë canapi huachi, tënin.

### *Piyapi'sa' mapiso'*

<sup>14</sup> Ina quëran hua'narëso pochin niantahuato, chitoro' quënanahuë, huiríchin nininso'. Inaquë a'naso' huënsëarin, piyapi pochin ya'norinso'. Chiníquën nanantaton, oro quëran nininso' yancorin. Imirin quëran nisha sahuëni së'quërin nitërinso' macacaso marë'.

<sup>15</sup> Naporo' anquëni Yosë pëinën quëran huë'nin. Huëcaton, sha'huitiarin:

—Nani ora nanirin, maquë huachi. Trico noya cayahuachina, a'naroáchin sahuëniquë manë'. Inapochachin iporaso' ora nanirin piyapi'sa' macacaso marë', itërin. <sup>16</sup> Itohuachina, manin. Cayarinsó manëso pochachin manin huachi.

<sup>17</sup> Ina quëran a'na anquëni ya'huëre Yosë ya'huërin quëran pipiantarin. Inanta' nisha sahuëni ya'huëtërin, inëshin nininso'. <sup>18</sup> A'na anquëninta' Yosë chinotopi quëran huë'nin. Inari pën ni'sarin ora nanihuachin, ana'intacaso marë'. Huëcaton, sha'huitërin:

—Nani ora nanirin isoro'pa' ana'intacaso marë'. Opa cayahuachina, manëso pochachin a'naroáchin maquë', itërin anquëniro.

<sup>19</sup> Itohuachina, a'naroáchin co imapisopitahuë' manin ana'intacaso marë'. Yosëri chiníquën no'huiton, no'tëquën ana'intarin. <sup>20</sup> Ni'co'. Oparo'sa' mapachinara, ninano aipiran quëparapi. Inaquë panca nanpiquë to'poipi. Opai' pipihuachina, quëhuain ninin. Huënai pochin ya'norin. Inapochachin ana'intohuachina, panca huënai' pa'sarin, ni'nahuë. Cara pasa quiromitro pochin pancaitërinso'. Cahuario motën ya'cari huarë' anpotarin huachi.

## 15

### *Canchisë anquëniro'sa' ana'intacaiso marë' acorinso'*

<sup>1</sup> Ina quëran Yosë nohuanton, hua'narëso pochin niantarahuë. A'na tahuëri oshahuano'sa' chiníquën ana'intarin. Ina anitotincoso marë' nani ma'sha a'notërinco. Pa'pi huëhuëpiro' ni'nahuë. Canchisë anquëni ya'huarin. A'naya a'naya Yosëri yaa'parin piyapi'sa' ana'intacaso marë'. Ina nohuanton, isoro'paquë nani ma'sha onpocaiso' ya'huapon. Inapoaton, ana'intërinso' naniarin.

<sup>2</sup> Co'huara anquëniro'sa' pa'shatërasoihuë', inápaquë panca sono' niantarahuë. Isihuico pochin niponahuë', huënaratarin. Pën pochin ya'norin. Sono yonsanquë na'a piyapi'sa' quënanahuë, ma'sha pa'pi të'huatoro' nininso' minsëpisopita. Isoro'paquë ya'huapona', co mamanshinën moshapihuë'. Co marcanën niacotopihuë'. Parisitaponaraihuë': "Yosëíchin imarai," ta'tona', imamiatopi. Iporaso' Yosë'pa' ya'huatona', noya ya'huërapí. Arparo'sa' Yosëri quëtërin pi'niatona' cantacaiso marë'. <sup>3</sup> Iráca Moisésë Yosëíchin natëton, inimiconënpita minsërahuaton, cantarín. Inapochachin isopitanta' cantarapi. Carniroa'hua cantarinsonta' cantarapi.

"¡Ma noyanquëncha, Siniro, quëmaso paya! Ya'ipi nanitaparan. Ma noyacha catahuanancoi paya. Chiníquën nanantaton, noya ninan. Noya hua'anëntaton, no'tëquën ana'intëran. Co onporonta' nonpinanhuë'. Ya'ipi piyapi'sa' natëinënquën.

<sup>4</sup> Ya'ipiya Siniro të'huachinënquën. Ya'ipiya yonqui'inënquën. Quëmasáchin nóyanquën. A'na tahuëri no'tëquën oshahuano'sa' ana'intaran ni'ton, nisha nisha piyapi'sa' huëcatona', chinotarinënquën," topi cantatona'.

<sup>5</sup> Ina quëran Yosë chinotopiso pëi' inápaquë ya'huërinso' ni'soatërin, ni'nahuë. Acoana Yosë caposonën ya'huërinquë chachin quënanahuë. <sup>6</sup> Canchisë anquëniro'sa' ina quëran pipiapi. Huiríchin huiríchin a'mopi. Të'tëtënquë oro pochin ninqüë nitonpopi. Piyapi'sa' oshahuanpi ni'ton, Yosëri a'paarin nisha nisha aparisitacaiso marë'. <sup>7</sup> Ina marë' canchisë minëro'sa' pochin nininso' ya'huërin, oro quëran nipiso'. A'nara' ma'sha pochin nininso' minëro'sa' masahuaton, anquëniro'sa' quëtërin. "Paatoma', minëro'saquë ya'huërinso' të'yanantoco'. A'naya a'naya të'yanantohuatama', Yosëri chiníquën ana'intarin huachi," ta'ton, a'naya a'naya quëtërin. Yosëso' co onporonta' chimianinhuë', ni'sárinpoa'. <sup>8</sup> Noya noya ni'ton, ya'ipi nanitaparin. Ina të'huatacaiso marë' conai pochin nininso' tomontarin. Ya'ipi Yosë chinotopiso pëi' inápaquë ya'huërinso' yanquëëtërin. Co insonta' nanitërinhuë' inaquë ya'conacaso'. Nani piyapi'sa' ana'intohuachina, naporo huarë' noya ya'coantapi.

## 16

### *Minëro'saquë ya'huërinso' të'yanantopiso'*

<sup>1</sup> Naporo' chinotopiso pëi' inápaquë ya'huërinso' quëran chiníquën noninso' natanahuë. —Piyapi'sa' ya'huërinquë paatoma', minëro'saquë ya'huërinso' të'yanantoco'. Të'yanantohuatama', parisitapi. Pa'pi co noyahuë' cancantopi ni'ton, Yosëri chiníquën no'huiton, ana'intarin, itërin anquëniro'sa'.

<sup>2</sup> Ina natanahuaton, a'nara' pa'nin. Isoro'pa' nocorahuaton, minëquë ya'huërinso' të'yanantërin. Të'yanantohuachina, na'a piyapi'sa' panca ta'tarapi. Sëncopi pochin pip-itëra'pia'pona'. Co noyatochináchinhuë' nisapi. Ma'sha pa'pi të'huatoro' nininso' imapiso-pita parisitapi. Marcanën niacotopi ni'ton, Yosë nohuanton, ta'taráchin nisapi. Mamanshinënta' moshapi ni'ton, parisitá'pona'. A'na tahuëri ma'sha onpocaso' ninoton, a'notërinco, ni'nahuë.

<sup>3</sup> Ina quëran a'na anquëninta' paaton, minëquë ya'huërinso' marëquë të'yaitarin. Inaquë të'yaitohuachina, huënai' taranarin. Chimipi huënainën pochin anën nisarin. Napoaton ya'ipi marëquë ya'huërinso'pita taquiapi.

<sup>4</sup> Ina piquëran a'na anquëninta' pa'nin. Minëquë ya'huërinso' iro'saquë të'yaitohuachina, inapitanta' huënai' taranarin. Tëquëin, i'sharo'sa', inapita napoapi.

<sup>5</sup> Napohuachina, anquëni ii' a'pairinsoari Yosë nontaton tapon:

“No'tëquën Sinioro ana'intaran. Iráca quëra huarë' ya'huaton, ipora huanta' nanpiaran. Noyasáchin ninan.

<sup>6</sup> Na'a imarinënsopita tëpapi. Noya pënëntopirinahuë', tëpapi ni'ton, i'huërëtatón, ana'intaran. Iiro'sa' huënai' atarantëran ni'ton, ina tëranta' o'ocaiso' ya'huërin. No'tëquën ana'intaran,” itërin.

<sup>7</sup> Artaro quëraonta' noninso' natanahuë: “Tëhuëenchachin Sinioro quëmasáchin ya'ipi hua'anëntëran. Chini chiníquën nanantaton, no'tëquën nonan. No'tëquën ana'intaran,” ténin.

<sup>8</sup> Ina quëran a'na anquëninta' pa'nin ana'intacaso marë'. Minëquë ya'huërinso' pi'iquë të'yanantohuachina, pi'i chini chiníquën pi'catarin. Pën pochin pi'cataton, piyapi'sa' chiníquën aparisitarin. <sup>9</sup> Panca huëyaponaraihuë', co nirotapihuë'. Yosë no'huitona', pinosapi: “Sopai pochin cancantaton, aparisitarinpoa' ni'sora,” tosapi. Parisitaponaraihuë', co nohuantapihuë' oshanëna' a'pocaiso'. Co Yosë yayonquiapihuë'.

<sup>10</sup> Nani catapini anquëniro'sari ana'intapona' pa'pi. Ina quëran a'nanta' ma'sha marë pipirinso' ya'huërinquë pa'nin. Hua'anëntacaso' shiranëinquë chachin paaton, minëquë ya'huërinso' të'yanantarin. Të'yanantohuachina, ya'ipiya tashiarin. Piyapi'sa' chiníquën parisitona', tarëtapí. <sup>11</sup> Yosëso' chini chiníquën nanantopirinhuë', piyapi'sari ta'taráchin nicatona', no'huipi. “Pa'pi co noyahuë' ni'ton, aparisitarinpoa',” topi pino-tona'. Co naporo tëranta' oshanëna' yaa'poapihuë'.

<sup>12</sup> Ina quëran a'na anquëninta' pa'sahuaton, minëquë ya'huërinso' panca i'quë të'yaitërin, Iyopiratisii' itopiquë. Inaquë të'yaitohuachina, pancai' niponahuë', huinquintomatón, yaniromarin. Copirnoros'a' noya pëntonacaiso marë' yaniromarin. Pi'i pipirin parti quëran huë'sapi quira nicacaiso marë'.

<sup>13</sup> Ina quëran panca ya'huan pochin nininso' niantarahuë. Ma'sha marë quëran pipirinso', nonpin nanan pënëntona'pi, inapitanta' niantarahuë. Cara chachin nanamëna quëran cara sopairo'sa' pipipi, inpo pochin ya'nopiso'. <sup>14</sup> Sopairo'sa' ni'ton, nani ma'sha nanitapapi. Sacai' nininsopita nisapi piyapi'sari natëcaiso marë'. Non-pintatona', napoapi. Nisha nisha copirnoros'a' camaira'pia'pona' quira nicacaiso marë'. Ana'intacaso' tahuëri nani ya'caritëriarin ni'ton, niyontona'pona'. “Canpoari Yosë minsëahua',” ta'tona', napoapona'. <sup>15</sup> Nani Quisoso sha'huitërinpoa': “Ni'co', iyaro'sa'. A'nanaya o'mantararahuë. Ihuatë pochin nicato, co nitotasëinquëmahuë', o'mantararahuë ni'ton, nani tahuëri ninaco. Noya ninahuatamaco, noya cancantarama'. Yosë noya ni'sarinquëma'. Noyápiachin a'morëso pochin noyasáchin nico'. Ina quëran o'mantahuato, co tapanapomahuë'. Noya cancantarama',” itërinpoa'. <sup>16</sup> Ana'intacaso' tahuëri ya'caritohuachin, na'a copirnoros'a' ayontónapi quira nicacaiso marë'. Armaquitono itopiquë niyontónapi. Cotio nananquë napopiso'.

<sup>17</sup> A'naíchin anquëni pahuanarin pacacaso'. Ina pa'sahuaton, minëquë ya'huërinso' tē'yanantarin. Ihuanquë tē'yanantohuachina, inápaquë Yosë chinotopiso pëi quëran chiníquën nonin. Hua'anëntërinso shiranën quëran “jnani huachi!” tosarín.

<sup>18</sup> Napohuachina, o'coritarín. Huirá pochin chiníquën tēnëntarin. Naporo' panca ocohua pa'sarin. Iráca quëran huarë' co onporonta' ina pochin pa'chininhuë' niponahuë', napoarín. <sup>19</sup> Co Yosë natëpisopitahuë' ya'huëpíquë nocharotarin. Panca ninano' niponahuë', huëncharoaton, cararo'të huarë' niacoarin. Nisha nisha ninanoro'saquë ta'huantapi. Co Yosëri naniantërinhuë' ana'intacaso'. Papironiaquë na'a piyapi'sa' ya'huëpirinahuë', co noyahuë' nicacaisoráchin yonquipi ni'ton, ana'intërin. Inapochachín a'na tahuëri chiníquën no'huiton, ata'huantarin. <sup>20</sup> Naporo' motopiro'sa', so'tono'sa', inapita co huachi ya'huaponahuë'. <sup>21</sup> Inápa quëran ocai' anotapon. Panca masho ni'ton, quëquën. Catapini shonca quiro pochin quë'ninso'. Na'a anotohuachín, piyapi'sa' chiníquën parisitapi. Napoaton Yosë chiníquën no'huitona', pinosapi huachi.

## 17

### *Monshihuana'pi pochin nininso'*

<sup>1</sup> Ina quëran a'na anquëni minë' sē'quëna'pi nininso' huëcapairahuatonco, itërinco: “Huëquë' pa'a piyapi'sa' ana'intacaso' ya'huërinso' a'nochinquën. Pasëquë a'na sanapi panca iiro'sa' aipi huënsëárin. Inaso' pa'pi co noyahuë'. Monshihuana'pi pochin piyapi'sa' anishacancantërin. <sup>2</sup> Ya'ipi copirnoros'a' ina natëtona', co noyahuë' nisapi. Monshihuaninso pochin cancantatona', Yosë naniantapi. Piyapinënpitanta' ina imatona', co noyahuë' nicacaisoáchin yonquiapi,” itërinco.

<sup>3</sup> Itohuachincora, hua'narëso pochin niantarahuë. Ispirito Santo nohuanton, co piyapi ya'huërinquëhuë' quëparinco. Inaquë co noyahuë' sanapi ni'nahuë. Ma'sha pa'pi tē'huatoro' nininsonta' quënanahuë. Iporaso' quëhuanën ya'norin. Canchisë mototahuaton, shonca pomon ya'huëtërin. Nisha nisha nininën ya'huëtërin, Yosë pinorinso'. Ya'ipi nonënuquë ninshitëra'piarín. Ina aipi sanapi huënsëárin. <sup>4</sup> Inaso' noyápiachín a'moponahuë', co noyahuë' cancantërin. A'morinso' pa'ton ninin. Quëhuashín, quëhuanën, inapita a'morin. Naporahuaton, oro, na'pia'huaya pa'ton nininsopita, inapita pē'tënin. Monshihuana'pi pochin nitaparín. Minë oro quëran nininso' sē'quërin. Inaquë taparo' nininsoráchin ya'huërin. O'shitërinso pochin na'a piyapi'sa' anishacancantërin. Ano'pirin, amonshihuanin, naporin <sup>5</sup> Nininën pochin nininso' tē'inquë ninshitopi. Ninshitopirinahuë', ma'ta' tapon naporinso' co piyapi'sa' nitotopihuë'.

ISO SANAPISO' PAPIRONIAQUË YA'HUËpisopita POCHIN CANCANTËrin. PA'PI MONSHIHUANTË' NI'TON, INA A'CHININ QUËran MONSHIHUANPI. NISHA NISHA CO NOYAHUË' YONQUIPI topi, ninshitatona'. <sup>6</sup> Tëhuëenchachín ina sanapi pa'pi co noyahuë' cancantërin. Quisoso imapisopita co quë'yarínhuë'. “Quisoso imarai,” topachinara, atëpatërin. Notohuaro' atëpatahuaton, no'pirinso pochin pa'yatërin. Ina nicato, panca pa'yanahuë.

Ina quëran anquëni itërinco: <sup>7</sup> “¿Onpoatonta' pa'yananso'? Carinquën anitochinquën. Sanapi, ma'sha ina aipi huënsërinso' inapita ma'sona tapon naporinso' a'chinchinquën nitotëquë'. Ina ma'shaso' canchisë mototahuaton, shonca pomonën ya'huëtërin.

<sup>8</sup> Iráca isoro'paquë ya'huërin. Iporaso' co ya'huërinhuë'. A'na tahuëriso nipirinhuë' ya'noantarin. Acoporo' quëran huëantarin. Ayaro' tahuëri nanihuachín, parisitopiquë pa'sarin. Nipirinhuë', co'huara pa'shátërasohuë', a'nanaya ya'noantahuaton, piyapi'sa' a'payanarin. Co Quisoso imapihuë' ni'ton, pa'yanapi. Quisoso imapi naporini, iráca quëran huarë' nininënpita nanpirin quiricaquë ninshichitonhuë'.

<sup>9</sup> No'tëquën yonquiamaquë huarë' ma'sona tapon naporinso' nitotarama'. Ma'sha canchisë motohuaninso', canchisë motopi tapon naporin. Ina aipi sanapi huënsërinso'. Naporahuaton, canchisë copirnoros'a' ayonquirinpoa'. <sup>10</sup> A'natërápo nani iráca hua'anëntëra'piapirinahuë', chimina'piapi. Iporaso' a'nari hua'anëntantarin. A'naíchin

pahuanarin ya'ipiro'pa' hua'anëntacaso'. A'na tahuëri ya'noarin. Nipirinhue', co hua'qui' hua'anëntaponhue'. <sup>11</sup> Ina piquëran ma'sha pa'pi të'huatoro' nininsoari hua'anëntapon. Nani canchisë copirnoros'a' ayaponahuë', inapita pochin nica-ton, hua'anëntapirinhue', a'na tahuëri Yosëri ocoiarin. Ocoirahuaton, parisitopiquë a'pararin.

<sup>12</sup> Shonca pomontërinso pochin shonca copirnoros'a' ya'huapona'. Inapitaso' co hua'anënchatërapihue'. Tahuëri nanihuachin, nisha nisha piyapi'sa' hua'anëntapona'. Naporo chachin ma'sha pa'pi të'huatoro' nininsonta' hua'anëntapon. Napoaponahuë', co hua'qui' hua'anëntapihue'. <sup>13</sup> Shonca copirnoros'aso' napopianachin yonquiatona', ma'sha pa'pi të'huatoro' nininso' natëpona'. Piyapinënpitanta' camaiapona' ina natëcaiso marë'. <sup>14</sup> Inapitaso' Carniroa'hua yaminsëatona', quira nisapirinhue', co nanitapihue' minsëcaiso'. Inari minsëapon. Inaso' Quisocristo chachin. Chini chiniquën nanantarin ni'ton, ya'ipiya hua'anëntarin. Inasáchin natëcaso' ya'huërin. Piyapinënpitari imasapi. Yosëri huayonin ni'ton, natëmiatapi," itërinco anquëni.

<sup>15</sup> Ina quëran a'chintaantarinco.

—Panca iro'santa' ni'nán, ina aipi sanapi huënsërinso'. Inanta' a'chinchinquën nitotëquë'. Inapochachin a'na tahuëri nisha nisha piyapi'sa' ya'huapona', nisha nisha nananquë nonpisopita. Hua'huayatërahuë' ya'huapona'. Nisha nisha copirnoros'a' hua'anëntërinso' pita. <sup>16</sup> Oshaquëran shonca copirnoros'a', ma'sha pa'pi të'huatoro' nininso', inapita co huachi sanapi nohuantapihue'. No'huirahuatona', masapi. Masahuatona', ai'nanpiratapi. Chiniquën aparisitatona', tëparapi. Ina quëran ahuiquitapi. <sup>17</sup> Yosë nohuanton, copirnoros'a' yonquiapi ma'sha të'huatoro' nininso' natëcaiso marë'. Napopianachin yonquiatona', co noya sanapihue' nininso' ata'huantapi. Yosë nohuantërinso' chachin nisapi. <sup>18</sup> Sanapi panca iiro'sa' aipi huënsërinso' pochin panca ninano' ya'huapon. Ya'huëhuano'sa' pa'pi co noyahuë' cancantapi. Na'a piyapi'sa', copirnoros'a', inapita anishacancantapona' ma'sharáchin yonquicaiso marë'. Yosë a'pocaiso marë' yanonpintapi. Nonpintápirinhue', Yosë nohuanton, ata'huantapi anta'.

## 18

### *Papironia ta'huantërinso'*

<sup>1</sup> Ina quëran a'na anquëninata' inápa quëran o'mararin, ni'nahuë, chiniquën nanantërinso'. Huënaráchin ni'ton, isoro'pa' a'pintërin. <sup>2</sup> O'marahuatón, chiniquën nonin.

“Nani huachi Papironia ta'huantarín. Panca ninano' niponahuë', ta'huantarín. Inaquë nisha nisha sopairo'sa' ya'huapona'. Nisha nisha chanaro' ca'tërosanta' inaquë pa'sapi.

<sup>3</sup> Papironiaro'sari notohuaro' piyapi'sa' anishacancantopi. Ina pochin cancantatona', copirnoros'a', piyapinënpita, inapita co noyahuë' nisapi. Monshihuaninso' pochin nicatona', Yosë naniantopi. Ma'huano'santa' inaquë pa'anatona', nani ma'sha canapirinhue'," tënin anquëni.

<sup>4</sup> Ina topachina, inápa quëran a'nari itërin:

—Ya'ipi imaramasopita pënënananquëma', natanco. Ni'cona papironiaro'sa' anishacancantochinënuquëma'. Ina quëran pipiramaso pochin nicatoma', ama inapita pochin cancantocosohue'. Co noyahuë' nipatama', Yosë ana'intarínquëma' canpitanta'. <sup>5</sup> Na'con oshahuanpi ni'ton, co Yosëri naniantarínhue' ana'intacaso'. <sup>6</sup> A'napita aparisitopi ni'ton, no'tëquën ana'intacaso' ya'huërin. Na'con na'con i'huërëtacaso' ya'huërin. Pa'pi co noyahuë' nipi. <sup>7</sup> Pita nicacaisoáchin cancantopi. Ma'sharáchin yonquiatona', a'napita nocanpi ni'ton, Yosëri aparisichin. Iporaso' cancanëna quëran yonquirapi. “Quiyaso' nóya ya'huërai. Hua'an pochin nicatoi, co manta' pahuantërincoihue'. Co quëyoron pochincoihue'. Co onporonta' sëtaraihue'," topirinhue'. <sup>8</sup> A'nanaya Yosëri ana'intarin



huachi. Na'a piyapi'sa' caniozona', sêtapona', tanarotapona', napoapona'. Yosëri chini chiniquën nanantaton, ana'intarin. Ahuïquitarin.

<sup>9</sup> Nisha nisha copirnorosanta' anishacancantërsopita sêtapona'. Huiquitërinso' nica-tona', na'nëpona'. Yosëri ana'intoahuachin, na'nëpona'. <sup>10</sup> Aquë quëran quënanpachina', pa'pi tē'huatapi.

“¡Ma'huantacha ninin paya! Papironia panca ninano' niponahuë', a'naroáchin ata'huantopi. Yosëri ana'intërin,” tosapi.

<sup>11</sup> Ma'sha pa'ana'pirosanta' sêtatona', na'nëpona'. Nani ma'sha pa'anacaso marë' ya'huëtopirinahuë', co huachi insoari tëranta' pa'antaponhuë'. <sup>12</sup> Notohuaro' oro, prata, na'pira'huaya pa'ton nininsopita, morin, sita, caninë'mëtë', quëhuanë'mëtë', inapita ya'huëtopirinahuë', co incari tëranta' pa'antarinhuë huachi. Nisha nisha pimonontëro'sa', huiripomon quëran ma'sha nipisopita, nontëro'sa' pa'ton nininsopita quëran ma'sha nipiso', sha'píhua'na, hua'namia, huirina'pi, ina quëranpita ma'sha nipiso ya'huërin.

<sup>13</sup> Nisha nisha pimoanacaso marënta' ya'huërin. Canina, nisha nisha cosharo' apimotacaso' nininsopita, yonarin pochin pimóchin nininso', pimo yaqui', pimo hua'sai', huino, toma', arina, trico, inapita ya'huërin. Ohuacaro'sa', ohuicaro'sa', cahuarioro'sa', toronano'sa', inapitanta' ya'huërin. Piyapiro'santa' pa'anapi asacatacaiso marë'. Piyapi chachin nipirinhuë', ma'sharo'sa' pochin yapa'anpi. Notohuaro' ma'sha ya'huëpirinhuë', co huachi pa'anapihuë'. <sup>14</sup> Ya'huëhuano'sa' itapona':

“Huayoro'sa' nayaramaso' capa ninin. Na'a ma'sha ya'huëtopirinënuquëmahuë', capa nizarin. Co huachi noya ya'huapomahuë',” tosapi.

<sup>15</sup> Ma'sha pa'ana'pirosanta' na'con canapirinahuë', sêtapi huachi. Tē'huatatona', aquë quëran notërapí. Na'nëpona pochin <sup>16</sup> itapona':

“¡Ma'huantacha ninin paya! Panca ninano' niponahuë', ta'huantërin. Sanapi noyápiachin a'morinso pochin nipirinhuë', co huachi ya'huërinhuë'. Morin, caninë'mëtë', quëhuanë'mëtë', inapita a'mosahuaton, oro, na'pira'huaya pa'ton nininso', inapita pë'pëpirinhuë',

<sup>17</sup> a'naroáchin ma'shanënpitarë chachin ta'huantërin huachi,” tosapi.

Nanchahuano'santa' marë pa'tatona', na'a ma'sha aquë quëran quëpirinahuë'. Inapoa-tona', na'con canapirinahuë', co huachi pa'sapihuë'. Piyapinënpitanta' inaquë sacatona', canapirinahuë', co huachi canapihuë'. Inapitanta' aquë quëran ni'sapi. <sup>18</sup> Pëiro'sa' huiquitohuachina', panca conaitarinso' quënanapi. Quënanpachina', pa'yanapi. “Co onporonta' a'na ninano' iso pochin ni'chinëhuahuë'. Ma notohuaro' ma'shanënpita ya'huëtopirinahuë', ta'huantopi,” tosapi.

<sup>19</sup> Chiniquën sêtatona', mo'shiquë nipashimototapi. Iráca sëtohuachinara, inachin-topiso'. Na'nëpona pochin itapona':

“¡Ma'huantacha ninin paya! Panca ninano' nipirinhuë', ayarin. Marë nanchaquë pa'tohuatëira, na'a ma'sha pa'anatoi, quënai. Pa'anpatëira, na'con canapiraihuë', a'naromaráchin ma'shanënpitarë chachin ta'huantërin huachi,” tosapi.

<sup>20</sup> Ya'ipi inápaquë ya'huëramasopitaso nipirinhuë', ama ina marë' sëtocosohuë'. Imarama' ni'ton, noya cancantoco'. Aparisitopirinënuquëmahuë', nani Yosëri ana'intërin huachi. Ina marë' Quisoso ca'taninsopita, pënëntona'pirosanta', inapitanta' noya cananchina'.

<sup>21</sup> Ina quëran hua'narëso pochin niantarahuë'. A'na anquëninta' ya'noantarin, chiniquën nanantërinso'. Pancara'pi masahuaton, marëquë tē'yaitërin.

“Pancara'pi tē'yaitërahuëso pochachin Papironia ta'huantarin. Panca ninano' niponahuë', ta'huantarin. Yosëri chiniquën ana'intarin. Co huachi ya'huaponhuë'.

<sup>22</sup> Iráca na'a arparo'sa' pi'nipi. Pirinano'sa', tronpitaro'sa', inapitanta' pihupirinahuë', iporaso' co huachi mosica natanapihuë'. Co huachi sacatoro'sa' inaquë sacatapihuë'. Co huachi cosharo' nipiso' natanapihuë'.

23 Co huachi nanpara i'chinpiapihuë'. Co huachi inaquë sa'asapihuë'. Iráca notohuaro' ma'sha pa'ana'piro'sa' inaquë ya'huatona', na'con canapirinahuë', noyá ta'huantapi. Na'con pënotatona', nisha nisha piyapi'sa' isoro'paquë anishacancan-topirinahuë', Yosëri ana'intarin huachi," ténin.

24 Iráca quëran huarë' inaquë Yosë imapisopita, pënëntona'piro'sa', inapita tēpapi. Ina marë anta' chiníquën ana'intarin huachi.

## 19

1 Ina quëran notohuaro' inápaquë ya'huëpisopita nonsapi natanahuë. Capa cancanta-tona', chiníquën nonsapi:

“¡Ma noyacha Tata Yosëso piyapi'sa' nicha'ërin paya! Chini chiníquën nanantarin ni'ton, ya'ipi piyapi'sari chinochina'.

2 Co topinan quëran ana'intërinhuë'. Ya'ipiya no'tëquën ana'intërin. Monshihuana'pi pochin nininso' nani ana'intërin. Inaso' notohuaro' piyapi'sa' anishacancantërin. Imapisopita tēpapi ni'ton, i'huërëtërin,” topi.

3 Ina quëran itantapi:

“¡Ma noyacha Tata Yosëso paya! Co noyahuë' nipsisopita ana'intërin ni'ton, huiquitapi. Pën co onporonta' tacopiarinhuë'. Conainta' tomontápon,” tosapi.

4 Napohuachinara, cato shonca catapini ansiano'sa', catapini ma'sharo'sa' pochin nininsopita, inapitanta' isonahuatona', Yosë chinotapi: “¡Naporinchi paya! ¡Ma noyacha Tata Yosëso paya! Shiranënguë huënsëaton, ya'ipiya hua'anëntarin,” tosapi. 5 Ina quëran Yosë shiranën quëran noninso' natanahuë.

“Ya'ipi Yosë imaramasopita ina chinotoco'. Hua'ano'sanquëmahuë nipon, piyap-inënpitanquëmahuë nipon, inasáchin yonquico'. Ina nóya nicatoma' natërama' ni'ton, ‘Ma noyanquëncha, Siniro, quëmaso paya,’ itoco’,” ténin.

### *Carniroa'hua sa'acaso' pita nisarinsó'*

6 Ina quëran hua'huayátërahuë piyapi'sa' nonsapiso' natanahuë. Panca so'pora pochin tënëëntarin. Chiníquën huira ahuetërinso pochin natanahuë.

“Ma noyacha Tata Yosëso paya. Chini chiníquën nanantaton, ya'ipiya hua'anëntarin.

7 Huëco' capa cancantahua'. Noya cancantahua'. Inasáchin noya noya ni'ton, natëahua'. Nani ora nanirin Carniroa'hua sa'arinso pochin nicacaso'. Imapisopitarë' ya'huëmiatarin. Ni'co'. Sanapi yaso'yahuachina, noyápiachin nitaparin. Inapoc-hachin imapisopita nitapacancanpi.

8 Huiríchin a'morëso pochin Yosëri noyápiachin cancan quëtërin. Tëhuënhachin inari catahuarin noya nicacaiso marë’,” tosapi.

9 Ina quëran anquëni sha'huitërinco ninshita'huaso marë': “Carniroa'hua sa'acaso' pita nininquë përapachinquëma', nóya cancantarama’,” itërinco. Ina quëran itaantarinco: “Yosë chachin no'tëquën sha'huitërinquën ni'ton, ina ninshitëquë’,” itërinco.

10 Naporo' isonahuato, yachinotopirahuë'. “Ama chinotocosohuë'. Caso' anquënico. Co Yosëcohuë'. Canpita pochachin canta' Yosë natërahuë. Quisoso nanamën imarama' ni'ton, Yosëíchin yonquiquë’,” itërinco.

Quisoso nanamënáchin a'chinpatëhua', no'tëquën pënëntarëhua'.

### *Quisoso canatërinso'*

11 Ina quëran Yosë nohuanton, hua'narëso pochin niantarahuë. Pi'iro'të' ni'soatohuachina, huiiri cahuario quënantarahuë. Ina aipi quëmapi huënsëarin. No'tëquën nona'pi itërehuaso'. Ma'sona tëranta' sha'huitohuachinpoa', co onporonta' nonpintarinpoahuë'. No'tëquën hua'anëntarin. Quira nica-ton, inimicoro'sa' minsëarin.

12 Ya'pirin pën nënërinso pochin huënaratarin. Na'a yancotëro'sa' oro quëran nininso' yancorin. Inaquë a'na nininëonta' ninshitërin, inaora nitotërinso'. 13 A'morinsó'

huënaiquë a'shitërin. Inaso' Yosë nanamën chachin ninin. <sup>14</sup> Notohuaro' inápaquë ya'huërsopitari imasapi, huiríchin a'mopiso'. Inapitanta' huii cahuarioro'sa' aipi huënsëatona', sontaro'sa pochin pa'sapi. <sup>15</sup> Quëmapi quëchitërinso' nanamën quëran sahuëni pochin nininso' ya'huëtërin. Chiníquën nanantaton, nanamën quëran chachin inimiconënpita minsëarin. Noninso' sahuëni pochin nicator, topinan noncharapirinhuë', co noyahuë' nipsisopita minsëarin. Piyapi'sa' no'tëquën ana'intarin. Yosëri no'huirin ni'ton, oparo'sa' to'poirëso pochin oshahuano'sa' chiníquën ana'intarin.

<sup>16</sup> Aipi a'morinsoquë nani ninshitërin:

ISO QUëmapi CHINI CHINÍquën NANANTATON, YA'IPI COPIRNORO'SANTA', HUA'ANëntarin.  
 INASÁchin NATëcaso' YA'HUërin

tënin. Tonamënquënta' ina chachin ninshitërin.

<sup>17</sup> Ina quëran a'na anquëninta' quënantarahuë. Inápaquë pi'i a'pinqüë huanirahuaton, soporo'sa' përsarin. Ya'ipi chanaro' ca'tëro'sa' chiníquën përsarin.

—Huëco' Yosëri ata'huantarinsopita ca'quico'. <sup>18</sup> Na'a piyapi'sa' chiminapona'. Copirnoros'sa', capitano'sa', chiníquën nanantopisopita, inapita chiminapona'. Cahuari-onënpitarë chachin ta'huantapona'. Hua'ano'sa' piyapinënpitarë chachin co Yosë imapihuë' ni'ton, ta'huantapi. Ma'huano'sa', sa'ahuaro'sa', inapitanta co cha'ësapihuë', tënin anquëni.

<sup>19</sup> Ina quëran ma'sha pa'pi të'huatoro' nininso' quënantarahuë. Na'a copirnoros'sa' sontaro'sanënpitarë chachin niyontonapi. Huii cahuario aipi huënsërinso' minsëcaiso marë' quira nisapi. Piyapinënpitanta' yaminsëpirinahuë'. <sup>20</sup> Quira nipachinara, huii cahuario aipi huënsërinsoari canarin. Canarahuaton, ma'sha pa'pi të'huatoro' nininso' masarin. Nonpin nanan pënëntona'pinta', masarin. Inaso', sacai' nininso' nicator, notohuaro' piyapi'sa' nonpintërin ma'sha pa'pi të'huatoro' nininso' imacaiso marë'. Marcanën niacotahuatona', mamanshinën moshapirinahuë', minsëarin huachi. Minsërahuaton, cato chachin masahuaton, ana'intomiatarin. Nanpirapirinahuë', parisitopiquë të'yatarin huachi. Inaquë panca sono sha'pimo'shirë chachin pën tënëntápon. Co onporonta' pipiapihuë'. <sup>21</sup> Inapita imapisopitanta' ata'huantarin. Inaora nanamën quëran ya'ipiya ata'huantarin. Chiminpachina', chanaro' ca'tëro'sari huëcatona', natëaquë huarë' noshinëna' ca'sapi.

## 20

### *Huaranca pi'ipi nininso'*

<sup>1</sup> Ina quëran a'na anquëninta' inápa quëran o'mararin, ni'nahuë. Panca catina, niahui, inapita së'quërin. Niahuiso' sopairo'sa' oncorapirinso' parti i'soacaso marë' së'quërin. <sup>2</sup> O'marahuatón, panca ya'huan pochin nininso' masarin. Sopai chachin inaso'. Iráca quëran huarë' piyapi nonpintërin, Satanasë itopiso'. Ina masahuaton, catinaquë tonporin. Huaranca pi'ipinta' nipirinhuë' co ni'quiritarinhuë'. <sup>3</sup> Tonporahuaton, nanin acoporo' nininquë të'yatarin. Nani të'yatahuaton, oncorapiarin. Oncorapirahuaton, noyá pa'pirapitarin ama pipicaso marëhuë'. Huaranca pi'ipi co nanitarinhuë' piyapi'sa' nonpintacaso'. Ina quëran ocoiantapirinhuë', co hua'qui quëranhuë' Yosëri ana'intomiatarin.

<sup>4</sup> Ina quëran hua'narëso pochin niantarahuë. Na'a piyapi'sa' quënanahuë. Yosëri nani acorin coisë pochin nicacaiso marë'. A'napitanta' ni'nahuë. Isoro'paquë ya'huapona', Quisosoíchin imapi. Yosë nanamën a'chinpi ni'ton, tëpapi. Co ma'sha pa'pi të'huatoro' nininso' chinotopihuë'. Co nonanpiso' moshapihuë'. Co marcanën niacotopihuë'. “Quisosoíchin imarai,” topachinara, nishitëconotëra'piapi. Inapotopirinahuë', Quisosori ananpitaantarahuaton, ichihua'anëntarin. Huaranca pi'ipi hua'anëntapi. <sup>5</sup> Inapita'ton

ananpitaantarín. Ina quèran nani huaranca pi'ipi nanihuachin, a'napita chiminpiiso-pita ananpitaantarín ana'intacaso marè'. <sup>6</sup> Quisoso imarèhuasopita'ton ananpitaantarínpoa'. Noya nicatèhua', nóya cancantarihua'. Co onporonta' chiminarihuahuè'. Iráca corto hua'ano'sa' ya'huèrin Yosè chinotacaiso marè'. A'na tahuèriso nipirín-huè', Quisoso imarèhuasopita noya noya chinotarihua'. Huaranca pi'ipi inarè'quènpoa' hua'anèntarihua'.

### *Sopai hua'an ana'intomiatèrinso'*

<sup>7</sup> Nani huaranca pi'ipi nanihuachin, sopai ocoiantarin. <sup>8</sup> Ocoiantahuachin, isoro'paquè huènantarin nisha nisha piyapi'sa' nonpintacaso marè'. Ya'ipi parti paaton, notohuaro' piyapi'sa' nonpintarin, Coco, Macoco inapita itopiso'. Inotè pochin co pichicasohuè'. Sopairi nonpintèrin ni'ton, niyontonapi quira nicacaiso marè'. <sup>9</sup> Nisha nisha parti quèran niyontonahuatona', Yosè piyapínènpita ya'huèpiquè huè'sapi. Huè'sahuatona', ninanonèn tancapitapi. Imapisopita yatèpapurinahuè', Yosèri nosoroaton, inápa quèran panca pèn a'paimarin. Anotohuachin, no'huipisopita ahuiquitarin. Ya'ipimiáchin ta'huantapi. Yosè imapisopitaíchin cha'èsapi. <sup>10</sup> Ina quèran sopai ana'intomiatarin. Hua'qui' piyapi'sa' nonpintèrin ni'ton, Yosèri ana'intarin. Panca sono sha'pimo'shirè chachin pèn orotèrinquè tè'yatarin. Co onporonta' pipiarínhuè'. Inaquè ma'sha pa'pi tè'huatoro' nininsonta' parisitarin. Nonpin nanan pènèntona'pinta' inaquè chachin parisitarin. Tahuèrirè chachin, tashirè chachin chiníquèn parisitapi. Co onporonta' sanoarínhuè'. Co onporonta' pipiapihuè'.

### *Ayaro' tahuèri ana'intèrinso'*

<sup>11</sup> Ina quèran panca hua'anèntacaso' shira quènanahuè, huiríchin nininso'. Inaquè Yosè huènsèaton, piyapi'sa' ana'intarin. Chini chiníquèn nanantarín ni'ton, isoro'pa', pi'iro'tè', inapita ta'huantopi. Capa nizarin. <sup>12</sup> Ayaro' tahuèri nani nanirin ni'ton, ya'ipi chiminpiisopita inatohua' huaniápona'. Hua'ano'sa', topinan piyapi'sa', inapita ya'ipiya inaquè pa'sapi. Yosèri ana'intacaso marè' ayontonarín. Naporo' quiricaros'a' inápaquè ninshitérinso' a'naya a'naya oniriarín. A'naso' nanpirin quirica itopiso'. Inaquè Yosè imapisopita nininènpita nani ninshitopi. A'na quiricanta' ya'huèrin. Inaquè ya'ipi ninèhuasopita ninshitérinpoa'. Noya ninèhuasopita, co noyahuè' ninèhuasopita, ya'ipiya nani ninshitérinpoa'. Ina nontaton, Yosèri ana'intarin. <sup>13</sup> Ya'ipi piyapi'sa' Yosèri nontarin. Pa'itatona', marèquè chimiitopi quèran huarè' ananpitaantarín no'tèquèn ana'intacaso marè'. Insèquèso tèranta' chiminpiisopita ya'ipiya ya'norapi. A'naya a'nayanpoa' nontarínpoa'. Co noyahuè' nipatèhua', no'tèquèn ana'intarinpoa'. <sup>14</sup> Chimirin, chiminpiisopita ya'huèpiquè, inapita panca sono pèn orotárinquè tè'yatapi. Inaquè parisitomiátápona'. <sup>15</sup> Co nanpirin quiricaquè nininènpita ya'huèhuachinahuè' inaquè chachin a'pararin.

## 21

### *Nasharo'pa' nininso'*

<sup>1</sup> Ina quèran hua'narèso pochin niantarahuè. Nasharo'pa', nasha pi'iro'tè', inapita quènanahuè. Yosè nohanton, isoro'pa' ta'huantapon. Pi'iro'tènta' ta'huantapon. Marènta' co huachi ya'huaponhuè'. Ya'ipiya nasha nizarin. <sup>2</sup> Ina quèran noyápiachin ninano' inápa quèran o'mararin ni'nahuè. Yosè ya'huèrin quèran o'mararin. Quirosarin pochin niponahuè', noya noya ninin. Noyápiachin ya'norin. Sanapi so'yacaso marè' nitaparínso pochin noyápiachin ninin. Nasha Quirosarin itopiso'. <sup>3</sup> Inápa quèran chiníquèn noninso' natanahuè.

—Iporaso huachi, Yosè piyapínènpitarè chachin ya'huèrarin. Co onporonta' patarínhuè'. Inapitarè' ya'huèmiatarin. <sup>4</sup> Yosèri chachin na'nèi' amirayatarin. Co huachi chiminaponahuè'. Co huachi sètaponahuè'. Co huachi na'nèponahuè'. Co pi'pisha tèranta'

iquitaponahuë'. Iráca na'con parisitopirinahuë', co huachi ina pochin ya'huaponahuë'. Noya noya ya'huapona', ténin.

<sup>5</sup> Ina quëran Yosë hua'anëntacaso' shiranënuquë huënsëaton, itërinco:

—Ni'quë'. Ya'ipiya anoyatarahuë. Nashasáchin acoarahuë. No'tëquën nontëranquën ni'ton, ninshitëquë'. Ya'ipiya natëtacaiso' ya'huërin, itërinco.

<sup>6</sup> Ina quëran itantarinco:

—Nani ya'ipiya anoyatërahuë. Ca'ton ya'huërahuë. Co'huara isoro'pa' ya'huëyátërasohuë', ya'huárahüë. Ana tahuërinta' ya'ipi ma'sharo'sa' ta'huantopirinahuë', caso' ya'huápo. Iráca quëran huarë' ya'huárahüë. Co onporonta' ta'huantarahuë'. Napoaton nontoco catahuainquëma'. Ni'quë'. Chiníquën yamorohuatëra, o'orë'. O'opatëra, chiníquën cancantëre'. Inapochachin canta' catahuanranquëma'. Yamororëso pochin cancantohuatama', nanpirin ii' quëchinquëma' noya cancantacamaso marë'. Caora nohuanto, catahuanranquëma'. Insonquëma tëranta' nohuantohuatamaco, huëco' anoyacancanchinquëma'. <sup>7</sup> Sopai minsëhuatama', ya'ipi tapatëranquëmasopita quëchinquëma'. Hui'nahuëpita pochin ni'saranquëma'. Casáchin yonquiamaco. <sup>8</sup> A'napitaso nipirinhüë' parisitápona'. Ayaro' tahuëri na'a piyapi'sa' pënuquë pa'sapi. Të'huatona' a'popisopita, co natëpisopitahuë', co natëtochináchinhuë' cancantopisopita, tëpatona'piro'sa', monshihuaninsopita, pënotono'sa', mamanshi chinotopisopita, nonpina'piro'sa', inapita panca sono sha'pimo'shirë chachin pën tënëntápaquë pa'sapi. Inaquë parisitápona'. Huaranca huaranca pi'ipinta' nipirinhüë', co onporonta' pipiapihuë'.

#### *Ninano' inápa quëran o'mararinso'*

<sup>9</sup> Ina quëran a'nara' anquëni huëcapairinco, ana'intacaso marë' minë' quëtopiso'. Huë'sahuaton, itërinco: “Huëquë', nasha ninano' a'nochinquën. Inaquë Carniroa'huari huayoninsopita ya'huapona'. Sanapi so'yacaso marë' nitaparainso pochin noyápiachin ninin,” itërinco.

<sup>10</sup> Itohuachincora, hua'narëso pochin niantarahuë. Ispirito Santo nohuanton, panca motopi'pa' quëparinco. Inaquë noya ninano' a'notërinco. Nasha Quirosarin itopiso'. Ina ninanoso' Yosë ya'huërin quëran chachin o'mararin. <sup>11</sup> Yosëso' noya noya ni'ton, ina pochin nicaton, huënaráchin huënaráchin a'pinin. Na'pia'huaya pa'ton nininso pochin huënaratarin. Caspi itopiso'. Isihuico pochin niponahuë', i'hua i'huanánshin quënantëre'. <sup>12</sup> Pairatopiso' inápa masho ninin. Shonca cato' ya'coana ya'huëtërin. A'naya a'naya ya'coanaquë a'na anquëniri ni'sarin. Ya'ipi quëran shonca cato' ya'huëpi. Nisha nisha ya'coanaquë nininën nani ninshitopi. A'naya a'naya israiro'sa' huëntonën ninintërinso'. Shonca cato' ni'ton, ya'ipi ya'coana nanitopi. <sup>13</sup> Pi'i pipirinsos' parti quëran pairatopiso' cara ya'coana ya'huëtërin. Pi'i ya'coninsos' partinta' cara chachin ya'huëtërin. Huancana yonsanquëchin inapochachin cara cara ya'huërin. <sup>14</sup> Pairatopiso' shonca cato' na'piquë paquëërin, panca nininso'. A'naya a'naya na'piquë Quisoso ca'tano'sanënpita nininëna' ninshitopi. Shonca cato' ya'huërin ni'ton, ya'ipi nanitopi. <sup>15</sup> Ina ninanoso', pancana. Mitro pochin oro quëran nininso' anquëni ya'huëtërin a'nicaso marë'. Ina masahuaton, a'nirin. Ninano', pairatopiso', ya'coanaro'sa', inapita a'nirin. <sup>16</sup> Cato huaranca cato pasa quiromitro naporopitërinso'. Inapochachin pancanatërinso' ninin. Inaparinsonta' cato huaranca cato pasa quiromitro inaparin. <sup>17</sup> Pairatopisonta' a'nirin. Anquëni niponahuë', piyapi'sa' ma'sha a'nipiso pochin a'niton: “Saota shonca a'natërápo mitro ya'huëtërin,” ténin.

<sup>18</sup> Pairaso' na'pi pa'ton ninin quëran nipi. Caspi itopiso'. Ina ninanoso' oro quëransáchin ninin. Oro niponahuë', i'hua i'huanánshin quënantëre'. <sup>19</sup> Paira paquëëmarinquë noyápiachin nipi. Nisha nisha na'pi pa'ton nininsopita quëran nipi. Shonca cato' nisha nisha ya'huërin. Ya'natiirinsoso' caninton, caspi itopi. Ina quëran niantarinso' caninchin, sapiro itopi. Ina quëran caninton niponahuë', hui'tonchin



hui'tonchin ninin, acata itopi. Ina piquëran canora niponahuë', caninton pochin ya'norin, ismirarita itopi. <sup>20</sup> Ina quëran quëhuanën nisahuaton, pi'pian huiri huirítin hui'shatërin. Onisi itopi. Ina quëran niantarinsonta' quëhuashin, cornarina itopi. Ina piquëranso' sha'píchin, crisorito itopi. Ina quëran caninton, piriro itopi. Ina quëran niantarinso sha'píton, topasio itopi. Ina quëranso' crisoprasa itopi. Inanta' caninton chachin. Ina piquëranso' caninton niponahuë', pi'pisha pi'pisha quëhuanën ya'huëtërin. Casinto itopi. Ya'natontarinsoso' caninchin, amatista itopi. Ya'ipi quëran shonca cato' ya'huërin. <sup>21</sup> Ya'coanaro'santa' noyápiachin. A'naya a'naya panca huiri na'pi quëran nipi. Cachinta' oro quëran chachin ninin. Orosachin niponahuë', i'hua i'huanánshin quënantërë'.

### *Yosë chachin a'pintarinpoaso'*

<sup>22</sup> Inaquëso' co Yosë chinotacaso' pëi' ya'huërinhuë'. Yosë chini chiníquën nanantërinso chachin ya'ipi parti ya'huarin. Carniroa'huanta' ya'huarin ni'ton, noya noya chinotarihua'. <sup>23</sup> Inatohua' pa'patëhua', co huachi pi'i, yoqui, inapita nohuantarihuahuë'. Tata Yosë chachin huënaráchin a'pintarinpoa'. Carniroa'huanta' a'pintarinpoa'. <sup>24</sup> Inaquë nisha nisha piyapinpoa' napopianachin yonquiarihua'. Noya a'pintarinpoa'. Nisha nisha copirnorosanta' isoro'paquë chiníquën nanantaponaraihuë', naporos Yosëichin yonquirapi. “Ma noyacha Yosëso' catahuarinpoa paya,” tosapi. <sup>25</sup> Inatohua' co huachi tashiarinhuë'. Ya'coanaro'santa' co huachi oncotapihuë'. <sup>26</sup> Naporos nisha nisha piyapinpoa' noya noya nicatëhua', inaquë ya'huarihua'. “Ma noyacha Yosëso' ni'ton, anoyacancantërinpoa paya,” ta'tëhua', inasáchin yonquiarihua'. <sup>27</sup> Noyasáchin inaquë ya'huapona'. Co manta' osha ya'huërarinhuë'. Co noyahuë' nipisopitaso', co ya'conaponahuë'. A'naquën nonpinatona: “Imarai quiyanta,” topirinahuë', co inapitaso' ya'conaponahuë'. Carniroa'hua imarëhuasopitaráchin inaquë ya'huëcontarihua'. Nanpirin quiricaquë nininënpoapita nani ninshitërinpoa'.

## 22

### *Nanpirin ii'*

<sup>1</sup> Ina quëran Yosë nohuanton, hua'narëso pochin niantarahuë. Nasha Quirosarin niantahuato, anquëni pancai' a'notërinco, noyápiachin nininso'. Inaso', Nanpirin ii' itopiso'. Yosë hua'anëntërin quëran pipirarin. Inaquë Carniroa'huanta' hua'anëntarin. <sup>2</sup> Ninano huáncana ii' pa'sarin. Cato yonsan quëran chachin nara papotërin. Nanpirin nara itopiso'. Nani yoqui nitarin. Shonca catoros nitaso', pi'ipi naniarin. Monoquëonta' ya'ipi piyapi'sa noya ya'huëcaiso marë' ya'huërin. Co huachi canioponahuë'. <sup>3</sup> Inaquë co huachi ana'intinpoaso' ya'huaponhuë'. Tata Yosë Carniroa'huarë chachin hua'anëntarin huachi. Nani tahuëri piyapinënpoapita ina chinotáparihua'. <sup>4</sup> Inaquë pa'patëhua', Yosë chachin nirayarihua'. Inasáchin natëarihua'. Ina piyapinënpita nisarihua' ni'ton, nininën të'yaquënpoaquë acotarinpoa'. <sup>5</sup> Co onporonta' tashiaponhuë'. Co huachi pi'i nohuantarihuahuë'. Co nanparin tëranta' nohuantarihuahuë'. Tata Yosëichin a'pintarinpoa'. Ichihua'anëntarinpoa'. Co onporonta' pipiarihuahuë'.

### *Quisocriso o'mantacaso' tahuëri*

<sup>6</sup> Ina quëran anquëni sha'huitërinco: “Iráca quëra huarë' Yosë nohuanton, a'naquën ninopi. Iporaso' anquëninëncos a'paimarinco ninoca'huaso marë'. A'notëranquën ni'ton, ninshitëran Yosë piyapinënpita nitotacaiso marë'. No'tën nanan nani sha'huitëranquën. Ya'ipiya natëtacaiso' ya'huërin. Co hua'qui quëranhuë' ma'sha onpoarin,” itërinco.

<sup>7</sup> Quisoso chachinta' naporin: “¡Tëhuëenchachin co hua'quiya quëranhuë' o'mantararahuë! Nani ma'sha anitotëranquën ninshitacamaso marë'. Insoquëma tëranta' natëhuatama', noya cancantarama',” itërinco.

<sup>8</sup> Caso' Coanshaco nani ma'sha ni'nahuë, natanahuë. Anquëni sha'huitohuachincora, isonahuë chinota'huaso marë'. <sup>9</sup> Yachinotopirahuë', sha'huitërinco. "Ama chinotocoso'huë'. Caso' anquënico. Canpita pochachin canta' Yosë natërahuë. Iráca quëran huarë' a'naquën Yosë nanamën pënëntërin. Quëmanta' pënëntëran. A'napita iso quirica natanahuatona', natëapi. Ya'ipinpoa' Yosë natërëhua'. Napoaton inasáchin chinotëquë'," itërinco.

<sup>10</sup> Ina quëran itantarinco: "Ya'ipi Yosë anitotërinquënso' nani ninshitëran. Ama topinan ninshitëquësokuë'. Ninorinso' nani naniriarin ni'ton, ya'ipi piyapi'sa' nanan a'patëquë' nitochina'. <sup>11</sup> A'naquën natanaponaraihuë', co natëapihuë'. Co noyahuë' nipisopitaso', aquë aquëtë' co noyahuë' nisapi. Co nishinahuën cancantopisopitanta', aquë aquëtë' niina'. Noya nipisopitaso' nipirinhüë', noya noya nisapi. Yosëichin cancantopisopitanta', noya noya imaina'," itërinco.

<sup>12</sup> Ina quëran Quisoso chachin itërinco: "Tëhuëenchachin co hua'quiya quëranhuë' o'mantararahuë. O'mantahuato, ya'ipiya no'tëquën i'huërëtarahuë. Co noyahuë' nipisopita ana'intarahuë. Noya nipisopitaso' acanaarahuë. <sup>13</sup> Ca'ton ya'huërahuë. Co'huara isoro'pa' ya'huëyátërasohuë', ya'huárahüë. A'na tahuërinta' ya'ipi ma'sharo'sa' ta'huantopirinhüë', caso' ya'huápo. Iráca quëran huarë' ya'huárahüë. Co onporonta' ta'huantarahuë'," ténin.

<sup>14</sup> Huënainën quëran anoyacancantërinso'pita nóya cancantapona'. A'mopiso' pë'sarëso pochin noyápiachin cancantapi. Inapitasáchin nanan ya'huëtöpi nanpirin nara nitërinso' capatona', nanpimiatacaiso'. Naporahuaton, nasha Quirosarinquë noya ya'conapi.

<sup>15</sup> A'naquënso nipirinhüë', co onporonta' Yosë ya'huërinquë pa'sapihuë'. Ni'ni pochin cancantopisopita, pënotono'sa', monshihuana'piro'sa', tëpatoro'sa', mamanshi chinotopisopita, inapita aipiran ya'huëmiatapi. A'naquëonta' nonpinápi ni'ton, co nohuantapihuë' no'tën nanan imacaiso'. Inapitanta' co onporonta' Yosë'pa' pa'sapihuë'.

<sup>16</sup> "Ca Quisosoco anquëninëhuë' a'patimaranquën. Nani nanan sha'huitërinquën ya'ipi imarinacosopita nitotacaiso marë'. A'naya a'naya niyontonpiquë a'patëquë' nonchina'. Iráca Tapi ya'huapon, Yosëri sha'huitërin: 'A'na tahuëri shiparin nóya nizarin. Ya'ipi piyapi'sa' nicha'ësarín,' itërin. Ca inaco. Tapi shiinco chachin. Caso' huënio tayora huënaráchin a'pininso pochin a'pintaranquëma'," itërinco Quisoso.

<sup>17</sup> Ya'ipi Quisoso imarëhuasopita: "O'mantaquë' Siniro," itërëhua'. Ispirito Santonta', inachachin ténin. Natanamasopitanta', "O'mantaquë' Siniro," itoco'. Yamororëso pochin cancantohuatama', huëco' nanpirin ii' quëchinquëma'. Achinirinpoaso pochin quëtarinquëma' noya cancantacamaso marë'. Co manta' pa'tërinhuë'.

<sup>18</sup> Nani no'tëquën ninshitëranquëma'. Ya'ipi ninorinso' no'tëquën ninshitëranquëma'. Natanpatama', inachachin a'chinacaso' ya'huërin. Iso nanan apancatohuatama', iso quiricaquë sha'huirinso chachin nisha nisha quëran Yosë ana'intarinquëma'. Na'con na'con ana'intarinquëma'. <sup>19</sup> Iso quirica quëran nani no'tëquën anitotëranquëma'. A'na nanayan tëranta' apahuantohuatama', co nanpirin nara nohuitaramahuë'. Co Yosë ninanonëinquë pa'saramahuë'.

<sup>20</sup> Quisoso chachin anitotërinco' ya'ipi ninshitëranquëma'. "Tëhuëenchachin co hua'quiya quëranhuë' o'mantararahuë," ténin. ¡Inapoquë' Siniro! A'naroáchin o'mantaquë', itërahuë.

<sup>21</sup> Siniro Quisoso noya catahuainquëma'. Ya'ipi imaramasopita nosoroatëinquëma', catahuainquëma'. Nani ninshitëranquëma huachi.

*Coansha*